



Nacom Pejume Diwesi po diwesi  
pena jume diwesi xua Jesucristo  
yabara tinatsi

Cuiba New Testament

## Contents

San Mateo	1
San Marcos	111
San Lucas	171
San Juan	271
Los Hechos	342
Romanos	428
1 Corintios	476
2 Corintios	521
Gálatas	550
Efesios	566
Filipenses	583
Colosenses	594
1 Tesalonicenses	605
2 Tesalonicenses	614
1 Timoteo	619
2 Timoteo	632
Tito	641
Filemón	647
Hebreos	649
Santiago	686
1 San Pedro	698
2 San Pedro	710
1 San Juan	717
2 San Juan	727
3 San Juan	729
San Judas	731
Apocalipsis	736



**Nacom Pejume Diwesi po diwesi pena jume  
diwesi xua Jesucristo yabara tinatsi**

**New Testament in Cuiba**

Language: Cuiba

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

**Copyright and Permission to Copy**

Copyright © 2010 Wycliffe Bible Translators, Inc.

Copyright © 2010 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

4f3e5d8c-29ba-586b-a8e9-98d4c01fbe63

ISBN: 978-1-5313-0181-1

## Jesucristo Pia Pexeinya Diwesi Jume Tatsi Mateo Petinae Diwesi

### Meje yabara pomonae Jesucristo pia pamo susatopiwi tatsi

(Lc 3.23-38)

**1** Meje barapo diwese Jesucristo pia pamo susatopiwi tatsi yabara. Jesucristo pon Nacom itoroba itaboco wetsica xua jiwi pecapanenebiyaenexatsi. Bapon Abraham pia pemomoxi susato jiwana-pin tatsi. Barapon Abraham pon bayatha caena tupa, pon copiya naebopa po cae pin nacua xua israelmonae pomonae judiomonaexae beya pinmonae tso-ponae. Matautano Jesucristo David pia pemomoxi susato jiwana-pin tatsi. Barapon David pon bayatha caena tupa, pon caena bayatha Israel nacua-piwi itorobiya pia pepa peewatsinchi.

<sup>2</sup> Abraham Isaac paxa tatsi. Bapon Isaac Jacob paxa tatsi. Bapon Jacob, Judá paxa tatsi yawa Judá pe-weicho jiwi, bapontha cae axaba. <sup>3</sup> Bapon Judá Fares iru Zara paxa tatsi. Tamar Fares pena tatsi iru Zara pena tatsi. Bapon Fares Esrom paxa tatsi. Bapon Esrom Aram paxa tatsi. <sup>4</sup> Bapon Aram Aminadab paxa tatsi. Bapon Aminadab Naasón paxa tatsi. Bapon Naasón Salmón paxa tatsi. <sup>5</sup> Bapon Salmón Booz paxa tatsi. Booz pena tatsi pewun Rahab. Bapon Booz Obed paxa tatsi. Obed pena tatsi pewun Rut. Bapon Obed Isaí paxa tatsi. <sup>6</sup> Bapon Isaí David paxa tatsi, po David caena bayatha Israel nacua-mona-e itorobiya pia pepa peewatsinchi. Matautano David pexanto tatsi pewun Salomón. Bapon Salomón pena tatsi pewun Betsabé, powa copiya bayatha Urías xeina.

<sup>7</sup> Bapon Salomón Roboam paxa tatsi. Bapon Roboam Abías paxa tatsi. Bapon Abías Asa paxa tatsi. <sup>8</sup> Bapon Asa Josafat paxa tatsi. Bapon Josafat Joram paxa tatsi. Bapon Joram Uzías paxa tatsi. <sup>9</sup> Bapon Uzías Jotam paxa tatsi. Bapon Jotam Acaz paxa tatsi. Bapon Acaz Ezequías paxa tatsi. <sup>10</sup> Bapon Ezequías Manasés paxa tatsi. Bapon Manasés Amón paxa tatsi. Bapon Amón Josías paxa tatsi. <sup>11</sup> Bapon Josías Jeconías paxa tatsi, iru Jeconías pe-weicho jiwi bapontha cae axaba. Bapon Jeconías po-xona-e israelmonae teicaeya capoinchi Babilonia nacua beya, barapo jinae-botha Jeconías naexana epatotha.

<sup>12</sup> Bapoxona-e pirapae Jeconías tanaexanatsi pexanto Babilonia nacua-tha. Jeconías Salatiel paxa tatsi. Bapon Salatiel Zorobabel paxa tatsi. <sup>13</sup> Bapon Zorobabel Abiud paxa tatsi. Bapon Abiud Eli-aquim paxa tatsi. Bapon Eliaquim Azor paxa tatsi. <sup>14</sup> Bapon Azor Sadoc paxa tatsi. Bapon Sadoc Aquim paxa tatsi. Bapon Aquim Eliud paxa tatsi. <sup>15</sup> Bapon Eliud Eleazar paxa tatsi. Bapon Eleazar Matán paxa tatsi. Bapon Matán Jacob paxa tatsi. <sup>16</sup> Bapon Jacob José paxa tatsi. Bapon José piowa tatsi pewun María. Barapowa María Jesús pena tatsi. Bapon Jesús icha wun wun dutatsi, po wun “Mesías”, jei, po wun xua jei: “Pon Nacom itoroba itaboco wetsica xua jiwi pecapanenebiyaenexa tsainchi”, jei.

<sup>17</sup> Abraham pia xainya weya tatsi trece poyobe pebiwi naexana xua Abraham muxunano daxota daxita catorce poyobe naexana, beya pu ducua po-xona-e David naexana. Bapon iru Salomón pia xainya weya tatsi trece poyobe pebiwi naexana xua Salomón muxunano daxota daxita catorce poyobe pebiwi naexana beya pu ducua po-xona-e Israel nacua-mona-e teicaeya capoinchi Babilonia nacua beya, beya pu ducua po-xona-e Jeconías naexana. Salatiel pia xainya weya tatsi trece

poyobe pebiwi naexanapona xua Jecónias muxunano. Daxota daxita catorce poyobe naexana, beya pu ducua poxonae Mesías naexana.

**Meje yabara poxonae Jesucristo  
nowaeuncua pebin wuto  
barapo cae pin nacuathe**

(Lc 2.1-7)

<sup>18</sup> Poxonae Jesucristo naexana bara iche: María Jesucristo pena tatsi, poxonae bapowa muxu pepichi pecotsiwa pon pewun José, poxonae abu cataunxuae jopa perū nacoyabiyo, bapoxonae María pexuyo bupana taecatsi. Barapo pexuyo Nacom pia Pejumope tūnaxū tatsi María tsiperū weeca exanatsi. Barapo pexuyo pewun Jesús. <sup>19</sup> José, María pia pebin tatsi tsane, poxonae pichina pon pejuntū coyene xanepanaein. Daxota bapon José, María jopa beyabara paebichi xua catsa pexuyo pecapoponaexae xua bupana taecatsi xua María aura peexanaenexa tsainchi jiwi peitūtha tatsi. Bapoxonae José namicha moyiya najuntū cui coyene baraxuba xua jopa pepichiwa tsane, xua jiwi jopa cataunxuae pecui yabara yaputaenexa. <sup>20</sup> Poxonae came cataunxuae baxua yabara nanta xeina, José maituncuataba. Bapoxonae José amachinae tsita naitutatsi matatsunpin po matatsunpin Nacom itoroba. Matatsunpin namchiya jeye: “José, David pia pemomoxi susato jiwanapin tatsim, jopa junuwinde xua nepichiwa tsane María xua jinseuri neexanaewa tsane. Tsipei barapo pexuyo, po pexuyo naexanaena, apara Nacom pia Pejumope tūnaxū tatsi pia pexuyo tatsi. <sup>21</sup> Bapowa tanaexanaeinchi pexanto. Bapon wun dutsiname, po wun ‘Jesús’, jei. Barapo wun, wun dutsiname tsipei bapon pijimonae capanepaena xua abe pia peexanae cuiru coyenein weya tatsi,

xua daxota Nacom jopa petsitanexatsi xua barapomonae pexeinaewa penatsicuentisiwa”, jei matatsunpin.

<sup>22</sup> Daxita baraxua exana penacui yabara jume wetsinexa pocotsiwa bayatha Nacom pia peitorobi jume pepaebin caena bayatha yabara tsiwūnae muxu duta Nacom nexa, xua jeye:

<sup>23</sup> “Matha taema, yabūyo pexuyo bupana taecatsi

powa jopa perū nacoyabiyo pebin.

Yawa tanaexanatsi pexanto, po pexuyo wun

dutatsi, po wun ‘Emanuel’, jei”,

jei Nacom pia peitorobi jume pepaebin.

(Barapo wun jei: “Nacom naca baru popona”, jei.)

<sup>24</sup> Poxonae José nacosataxuba, bapon exana pocotsiwa matatsunpin itoroba po matatsunpin Nacom itoroba. José María pitatsi. <sup>25</sup> Bequein cae botha nabarū poponabe daichitha jopa came imoxoyo naperū cuicuinaeyobe beya poxonae pexanto tanaexanatsi. José pexuyo wun duta, po wun “Jesús”, jei.

**Meje yabara poxonae pomonae  
opitei pecayabara wūnae yaputaewi  
barapomonae Jesús siwa  
poinchi xua petanexatsi**

**2** Jesús naexana Belén tomaratha, Judea nacuathe. Barapoxonaerū Herodes pon Judea nacuapiwi pia peyanacua ewatsinchi popona barapo Judea nacuathe. Poxonae Jesús naexana pebiwi pata Jerusalén tomaratha. Barapomonae opitei pecayabara wūnae yaputaewi. Barapomonae pia tomara tajū taenatsi ichaxota pocotsiwa xometo weecoina. <sup>2</sup> Barapomonae ichawa beya yayainyaba tsiniya, jeye:

—¿Exota naexana pexuyo, po pexuyo judiomonae itorobiya pia pepa peewatsinchi exanaeinchi poxonae pinyo tsane? Paxan payaputan xua bapon

naexana xote tsipei bapon pia opiteito tatsi panaitomatsiya punaenaponan pata nacua werena, po nacuatha ichaxota pocotsiwa xometo weecoina. Papatán xua pata wúnae jainchiwa tsane barapo pexuyo, jei.

<sup>3</sup>Herodes, pon Judea nacuapiwi pia peyanacua ewatsinchi poxonae bapon yabara jume tane xua ichún naexana pon jiwi itorobiya pia pepa peewatsinchi, bapoxonae bapon bichocono unthúthú deideijeji IṚṚṚ Jerusalén tomarapiwino daxita bichocono unthúthú deideijeji pe-jume taexae baxua. <sup>4</sup>Nexata Herodes waba sacerdotemonae pia pentacapon-aewi tatsi xua pia petanacaetutsinexa tsainchi pia botha. Matautano wabano pomonae jiwi pecuidubiwi Moisés pia peitorobi coyenewa tatsi. Daxita barapomonaetha Herodes yainyaba, jeye:

—¿Exota naexanaena Mesías, pon bepa pinae Nacom itorobei? jei Herodes.

<sup>5</sup>Barapomonae jume nota, jeye:

—Bapon naexanaena Belén tomaratha, po tomara Judea nacuatha eca. Bapon naexanaena barapo tomaratha, tsipei Nacom pia peitorobi jume pepaebin caena bayatha tsiwúnaeya yabara muxu dutsiya tina xua Mesías yabara, Nacom nexa. Nacom jeye:

<sup>6</sup>Belén tomara bequein po tomariyo tsiqui tomariyo jiwana tomara xua Judea nacuatha, daichitha Judea nacua pentacaponae wi yabara nanta xeinaena xua Belén tomara peainya cui tomariyo tsane.

Baxua nanta xeinaena tsipei barapo tomariyotha naexanaena, pon jiwi pia Pecanamataxeinae inchi tatsi. Xan Nacom bapon itorobin tamonaetha, pomonae Israel nacuapiwixae, xua bapon barapo israelmonae itorobiya

pia pepa Peewatsinchi tsainchi', jei Nacom, xua Nacom tatinatsi pon Nacom peitorobi jume pepaebin, jei sacerdotemonae irú pomonae jiwi pecuidubiwi Moisés pia peitorobi coyenewa tatsi.

<sup>7</sup>Nexata Herodes namicha moyiya waba pomonae opitei pecayabara wúnae yaputaewi. Herodes yainyaba barapomonaetha: “¿Eta poxonae yatsicaewa barapo opiteito paca tsita naituta?” jei bapon. <sup>8</sup>Poxonae barapomonae jume nota bapontha bapoxonae Herodes itoroba barapo pebiwi Belén tomara beya. Herodes jeye barapomonaetha:

—Paponare Belén tomara beya. Beta xanepanaya pajeire barapo pexuyo. Poxonae pataebiname barapo pexuyo, nexata pana netsipaebare, tsipei xan irú ponaein wúnae tajainchinexa tsanerú barapo pexuyo, jei Herodes.

<sup>9</sup>Poxonae Herodes najume weta, barapo pebiwi bara ponarúcupa, pomonae opitei pecayabara wúnae yaputaewi. Bapoxonae po opiteito bayatha tane pia nacuatha, barapo opiteito jemeicha caewa naitutaba. Yawa barapomonae matacapoinchi. Barapo opiteito ducuapona beya matapainya matatsun ducuatabica ichaxota barapo pexuyo boca.

<sup>10</sup>Poxonae barapo pebiwi tane barapo opiteito, barapo pebiwi bichocono juntu coyene weiweina.

<sup>11</sup>Barapomonae bo jojoniya ichaxota tane barapo pexuyo xua pena baru ecatsi, barapowa María. Bapoxonae barapo pebiwi pentabocotontha ena xua barapo pexuyo wúnae pejainchinexa tsainchi, tsipei barapoyo pon Pecanamataxeinaein peexanaexae tsainchi poxonae pinyo tsane. Bapoxonae barapomonae piawan coibo

isacapenta xua cajjinca. Barapo pexuyo catsibatsi xuan pocotsiwa pewun oro nain. Catsibatsino xua pocotsiwa pewun incienso xua pocotsiwa tuxusi tuxuei benata poxonae tauta exana. Matautano muxuna catsibatsi icha petuxueiwa pocotsiwa pewun mirra xua pocotsiwa anaincuito. <sup>12</sup>Bapoxonae pirapae barapo pebiwi maitumenaeya amachinae xua jopa bewa equeicha patsi tsane ichaxota Herodes eca. Daxota barapomonae pia nacua be-iyiya, icha namto iyiya.

**Meje yabara poxonae Jesusbaru panenebiya Egipto nacua beya**

<sup>13</sup>Poxonae barapo pebiwi ponarucupa bapoxonae Nacom itoroba matatsunpin Josetha. Matatsunpin tsita naituta poxonae José amachinae. Matatsunpin José baraichi, jeye: “Asiya uncuare. Pexuyo pire yawa coxiwano. Egipto nacua bebaru naetsiriyiyama. Ecare barapo nacuatha, beya abu poxonae equeicha catsipaebinchi baxota. Tsipei Herodes pexuyo jeitsina pebexubinexa tsainchi pexuyo”, jeichichi José matatsunpin.

<sup>14</sup>Poxonae cataunxuae merawi, José nacosataxuba. José pexuyo pita, yawano José pita yabayo María xua pexuyo pena tatsi. Daxita barapoyobe warapa Egipto nacua beya poxonae cataunxuae quirei tsuncuae. <sup>15</sup>Barapo nacuatha, Egipto nacuatha, barapoyobe ecabe beya poxonae juinya Herodes tupa. Baxua José cana exanatsi xua bayatha Nacom pia peitorobi jume pepaebin petsiwunae yabara paebixae Nacom nexa xua jeye: “Waban Taxanto Egipto nacua weya”, jei Nacom pon pia peitorobi jume pepaebin Nacom nexa pon jiwi Pecanamataxeinaeinchi.

**Meje yabara poxonae Herodes itoroba, ichamonae itorobatsi xua pejutebinexatsi pexui**

<sup>16</sup>Poxonae Herodes yaputane xua pomonae opitei pecayabara wunae yaputaewi muxujainyabiya tsipaeba bapontha xua itara patapaeba, bapoxonae Herodes anaya bichocono anaepana. Nexata bapon itoroba, ichamonae itorobatsi xua pejutebinexatsi daxita pexui pebiwi wutixi, po pexui cataunxuae pencuetixi, po pencuetixi cataunxuae jopa yapu othopaeyo dos po weibe, iru po pexui xua bayatha yapu othopa dos po weibe. Barapon Herodes itoroba xua pejutebinexatsi barapo pexui pebiwi wutixi daxita poxi Belén tomara cuariya beya. Herodes baxua exana yaitama bayatha pomonae opitei pecayabara wunae yaputaewi yopita xua pinae tane pexuyo pia opiteito tatsi barapo dos po weibetha poxonae peputha tapon, opiteito peputha tatsi xua jinaebotha, poxonae Judea nacua beya pona.

<sup>17</sup>Baxua Herodes cana cui wetsiya exanatsi, xua bayatha Jeremías pon Nacom pia peitorobi jume pepaebin petsiwunae yabara paebixae, xua jeye:

<sup>18</sup>“Jume tan xua wecoyeyi Ramá tomaratha, po tomara eca imoxoyo Belén tomaratha.

Powa xua wecoyeyi, bapowa Raquel, powa bayatha tupa.

Bapowa Raquel pia pemomoxi susatopiwi siwa

wecoyeyi, tsipei daxita tajutebatsi.

Barapowa jopa naitawanae copatsiyo tsipei

pexui bayatha werapa bequein ichamonae jume matawenta”, jei Jeremías.

<sup>19</sup>Herodes bapoxonae pirapae tupa. Bapoxonae matatsunpin pon Nacom

itoroba, José tsita naitutatsi poxonae José amachinae Egipto nacuatha. Matatsunpin jeye Josetha: <sup>20</sup>“Natsixitabare. Pire barapo pexuyo yawa coxiwa María, pexuyo pena tatsi. Israel nacua beya caibe nawiya. Tsipei bayatha werapa pomonae ichichipa xua barapo pexuyo pexexubiwatsi”, jei matatsunpin.

<sup>21</sup>Bapoxonae José natsixitaba. José pita pexuyo yawa coxiwa. Israel nacua beya caibe nawiya. <sup>22</sup>José jume tane xua juinya pinae Arquelao naexana Judea nacuapiwi pia peyanacua ewatsin tatsi. Arquelao Herodes pexanto tatsi. Arquelao xuya peyanacua ewatsin naexana ichaxota bayatha coxiyan peyanacua ewatsin naexana bapon Herodes. Tsipei Arquelao eca Judea nacuatha daxota José junuwa xua peponaewa barapo nacuatha. Daxota José pona Galilea nacua beya, tsipei poxonae amachinae matatsunpin itoroba xua bewa pinae ponaena barapo nacuatha. <sup>23</sup>Poxonae José patopa barapo nacuatha, bapoxona pozona po tomaratha, po tomara pewun Nazaret tomara. Baxua José cana cui wetsiya exanatsi, xua bayatha Nacom pia peitorobi jume pepaebiwí Jesús cayabara tsiwuna muxu dutsiya jeye: “Bapon wun dutinchi po wun jei: ‘Nazaret tomarapin’, jei”, jei barapo Nacom pia peitorobi jume pepaebiwí.

**Meje yabara poxonae Juan, pon  
Pebautisabin jiwí, cuiduba ira  
xuepana susato tsurucuae nacuatha**  
(*Mr 1.1-8; Lc 3.1-9, 15-17; Jn 1.19-28*)

**3** Pirapae poxonae ainya wei yapucaewa, poxonae abú cataunxuae Jesús eca Nazaret tomaratha, bapoxonae Juan pon jiwí Pebautisabin patopa ira xuepana susato tsurucuae nacua beya xua Judea nacuatha. Bapon Juan Nacom Pejume Diwesi paeba ducuanabiya. <sup>2</sup>Juan namchi: “¡Icha juntu coyene paxeinare Nacomtha painya neauraxae

xua abe paexaname! Tsipei Nacom paca waba painya nenaexanaenexa piamonae tatsi jiwana pomonae Nacom itorobiya peewatsixae”, jei Juan.

<sup>3</sup>Barapo Juan apara bapon pon caena bayatha peyabara tinaexaetsi. Isaías pon Nacom pia peitorobi jume pepaebin, bapon caena bayatha yabara jume wunaeya tina, xua caena bayatha Juan yabara jume wunaeya tinatsi. Isaías jeye: “Jume tan pon wawai ira xuepana susato tsurucuae nacuatha. Bapon wawaya jeye: ‘Patsi najuntu cui coyene wunaere pon jiwí pia pepa Pecanamataxeinaeinchi pia pepatopae wunaeya tsane’, jei pon wawai”, jei Isaías petinae diwesitha.

<sup>4</sup>Juan jumaina duwein nabocoto, po duwein pewun camello. Coreinya bocoto maraina. Juan xane pocotsiwan yapupuna, pocotsiwan be sure, matautano bana daebano. <sup>5</sup>Jiwí pata Jerusalén tomara weya, iruru pata xua daxita tomaranpiwi xua Judea nacua weya, iruru pata po tomaranpiwi xua imoxoyo Jordán mene weya. Barapomonae pata Juan pejume taenexatsi. <sup>6</sup>Poxonae barapomonae nayopita Nacomtha xua bepa pinae Nacom tsita auratsi, xua abe pexanaexae, barapoxonae Juan bautisaba barapomonae Jordán mentha.

<sup>7</sup>Ichitha poxonae Juan tane xua nawita pata fariseomonae jiwana iruru xua saduceomonae jiwana pata ichaxota Juan bautisaba, Juan jeye barapomonaetha: “¡Paxam pomonae pemuxuitorobi jiwí pam! ¡Paxam be bara jomomonae pam, tsipei jomo ba cuitaya ducupa nawa! Bara paichim anoxuae, paichichipame Nacom pacuitaya ducupame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajuntu coyene xanepanaem Nacomtha. <sup>8-9</sup>Xaniwaicha pajinompare



xain ichamonae paca cui tane, xua icha juntu coyene painya nexainaewa Nacomtha xua painya neauraxae xua abe paexaname. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowuntsim Nacom. Daxota Nacom itacupatsi xua paca cui matawenta pia jopa paca nepaca capanenebiyaenexa tsane. Matautano barichino Nacom itacupatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomonae pejume cowuntsiwixaetsi Nacom. <sup>10</sup>Poxonae pebin naein uba sipari ba canacui wunaeta xua pecaucubobinexa po naein jopa nacoichiyo. Poxonae barapo naein ucuboba nantatsun eta xua petautsinexa isototha. Paxam bara paca juta ichiya paca cana exanaena. Nacom paca yabara nacui wunaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata exanaem. <sup>11</sup>Xan xaniwaicha paca bautisabatsi meratha painya neauraxae xua abe paexaname xua daxota icha juntu coyene painya nexainaewa tsane Nacomtha. Paca bautisabatsi meratha, ichitha nama pon tsiwanaya patopan, apara bapon Mesías. Bapon paca bautisabina Nacom pia Pejumope tunaxutha tatsi poxonae Nacom paca najumope catsibina. Bapon paca jiwana cui copatsinchi xua atene tsane Cristo pejume cowuntsixaetsi xua ichamonae atene exanaena. Bapon bichocono peayapusu itorobi coyenewa xeina beyacaincha xan. Bapon pon jiwi pia Pecanamataxeinaeinchi. Daxota bapon bichocono tsita pin ura xeinan xua tataxu mu isanaxubiwa tsane

pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponae paxonae baru cui itura jina pia pentacaponae wichi. <sup>12</sup>Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jehebapona. Trigo xu jehebapona trigo xu matabohta. Matapepe jehebapona petautsinexa isototha, ichaxota po isoto jopa cuinaya itacounayiyo. Bapon bara juta cana ichi tsane jiwitha icha trigo xu cana ichiya ichi. Jiwi Nacom tsana nobina pomonae pejume cowuntsixaetsi pia nacuatha nexa. Ichamonae tsana nobinchi pomonae jopa pejume cowuntsiwichi, petautsinexa isototha ichaxota xua jopa itacounayiyo”, jei Juan.

### **Meje yabara poxonae Jesús bautisabatsi**

*(Mr 1.9-11; Lc 3.21-22)*

<sup>13</sup>Nexata Jesús patopa ichaxota Juan uncua Jordán mentha xua Galilea nacuatha. Jesús patopa xua Juan pebautisabinexa tsane. <sup>14</sup>Copiya Juan juntucuru jume matawenta xua Jesús pebautisabiwatsi tsainchi tsipei anacuicaura. Juan jeye Jesustha:

—Xan apara pon xua tanantawenon-  
aewa xua xam bewa jame tana nebauti-  
sabiwam tsane. Nama xan jopa bewa  
cabautisabi tsainchi, jei Juan.

<sup>15</sup>Ichitha Jesús jume nota:

—Anoxuae bara ‘je’ jande pocotsiwa  
xua xanepana, pocotsiwa ichichipan  
pocotsiwa xua xanepanaya exanatsi  
pocotsiwa xua Nacom naca itoroba, jei  
Jesús.

Bapoxonae Juan jume jejei xua  
Jesús bautisabatsi. <sup>16</sup>Nexata poxonae  
Jesús bautisabatsi, Jesús nainya mene  
wejuina. Bapoxonae nainya peitaboco  
nayausaranaxuba. Jesús tane xua

Nacom pia Pejumope tunaxu tatsi Jesús tapatopeicatsi, be topiboto yaruneica.  
<sup>17</sup> Bapoxonae Jesús jume tane pocotsiwa peitaboco wetsipaebicatsi, jechichi: “Bapon apara Taxanto, pon bichocono antobein pon itapetan. Bapon nejutu coyene weiweina exana”, jei Nacom.

**Meje yabara poxonae Jesús juntu coyene jujutatsi caurimonae pia pentacaponaein tatsi xua Jesús abe coyeneya petaexanaenexa tsane**

(Mr 1.12-13; Lc 4.1-13)

**4** Nexata Nacom pia Pejumope tunaxu tatsi Jesús matakayatsi ira xuepana susato tsurucuae nacua beya. Baxotiya caurimonae pia pentacaponaein tatsi Jesús piraichi juntu coyene jujutatsi xua Jesús abe coyeneya petaexanaenexa tsane.

<sup>2</sup> Jesús jopa nabanaeyo baraxotiya cuarenta po matabibetha matautano cuarenta po merawibetha. Poxonae barapo matabin yapucaewaba bapoxonae Jesús bichocono jainpa.  
<sup>3</sup> Caurimonae pia pentacaponaein tatsi imoxoyo patopa Jestutha. Bapon Jesús piraichi juntu coyene jujutatsi xua Jesús abe coyeneya petaexanaenexa tsane. Bapon Jesús baraichi:

—Icha xam yatsicaya Nacom Pexantom, netsita iture. Barapo iboton itorobare xain pan naexanapenta, jei caurimonae pia pentacaponaein tatsi.

<sup>4</sup> Ichitha Jesús jume nota:

—Nacom Pejume Diwesitha namchi: ‘Jopa metha bepa meisa jiwu betiya una jinompaetsipae pan. Bara iru yawano Nacom Pejume Diwesi jiwu betiya yajuntu cui coyeneya junte miya jinompa’, jei Nacom Pejume Diwesitha, jei Jesús.

<sup>5</sup> Nexata caurimonae pia pentacaponaein tatsi Jesús matakapoinchi Jerusalén tomara beya. Baxotiya Jesús Nacom pin pia botha pentatupa beicha capoinchi.

<sup>6</sup> Caurimonae pia pentacaponaein tatsi Jesús baraichi, jeye:

—Icha bara xaniwaicha Nacom Pexanto tatsim, wenaxoreinque. Yaitama tsipei Nacom Pejume Diwesitha namchi, jeye:

‘Nacom itorobina pia matatsunpiwi necayanabinexa.

Barapo matatsunpiwi asiya cawaetabotsina pecobetha, xua jopa necataxu tsaquituncuaenexa tsane ibototha, poxonae wenaxorecame’,

jei Nacom Pejume Diwesitha, jei caurimonae pia pentacaponaein tatsi.

<sup>7</sup> Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntu coyene jujutsiya wucainde Nacom pon jinya Necanamataxeinaein, xua necajume jejeiwa tsane xua necayawenaewa tsane poxonae jopa xapain exanaem’, jei Nacom Pejume Diwesitha, jei Jesús.

<sup>8</sup> Equeicha caurimonae pia pentacaponaein tatsi Jesús matakapoinchi ichaxota po demxuwa bichocono atororo. Baraxotiya Jesús tsita itutatsi daxita nacuan xua barapo cae pin nacuathe. Matautano Jesús tsita itutatsi daxita nacuan pia peitupanae coyenewan.  
<sup>9</sup> Caurimonae pia pentacaponaein tatsi Jesús baraichi, jeye:

—Ichaunxuae nentabocototha uncuaename taitabaratha, xua matautano ichaunxuae newunae jaintsiname xua nenanta xeinaewaxae xua xan jinya tacacanamataxeinaeinchi. Bapoxonae barapo nacuan yawa muxuna nacuan pia peitupanae coyenewan, baxuan cacatsinchi xua jinya necanamataxeinaenexa barapo nacuan, jei caurimonae pia pentacaponaein tatsi.

<sup>10</sup> Nexata Jesús jume nota:

—Xam pon caurimonae pia pentacaponae, bara nexubiriware. Yaitama Nacom Pejume Diwesitha namchi, jeye: ‘Meisa wūnae jainde jinya Necanamataxeinaein Nacom. Meisa bapon yat-sicaewa taexande pocotsiwa caitoroba’, jei Jesús.

<sup>11</sup> Bapoxonae caurimonae pia pentacaponaein tatsi Jesús pia xainya weya tatsi napitaba. Matatsunpiwi pata Jesustha xua Jesús pecui matateicaenexa tsainchi, matautano xua peapatsinexa tsainchi.

**Meje yabara poxonae Jesús  
tamropata pitaba pia  
penacuichiwa Galilea nacuatha**

(Mr 1.14-15; Lc 4.14-15)

<sup>12</sup> Poxonae Jesús jume tane xua Juan jiwi pecubi botha eca, bapoxonae Jesús pona Galilea nacua beya. <sup>13</sup> Ichitha Jesús jopa ecaeyo Nazaret tomaratha, jame saya pona Capernaum tomara beya xua baxotiya pepoponaenexa. Barapo tomara eca, Galilea pucua itapatha ichaxota ainya nacuabe nacaquita ecabe po nacuiyo pewun Zabulón nacuiyo, yawa po nacuiyo iru pewun Neftalí nacuiyo. <sup>14</sup> Pocotsiwa Jesús exana poxonae Capernaum tomaratha popona, baxua Jesús yabara nacui wetatsi xua caena bayatha Nacom pia peitorobi jume pepaebin, pon Isaías, pecayabara cui wūnae tsiwūnaeya tinaexae poxonae jeye:

<sup>15</sup> “Po ainya nacuabe pewun Zabulón nacuiyo matautano Neftalí nacuiyo, barapo nacuabe ecabe ichaxota po namtotha pucua imoxoyo caquita ducuiya. Barapo nacuabe ecabe ichaxota po pin nacua, pewun Galilea nacua. Barapo Galilea nacua icha muxunenetha eca xua Jordán mentha.

Barapo Galilea nacua weya jinompa pomonae jopa judiomonae naexanaeyo.

<sup>16</sup> Barapomonae caena bayatha jopa yaputaeyo Nacom, matautano caena bayatha jopa nayabara yaputaeyo xua muxu bara nama pewerapaeba abe peexanaexae.

Daxita barapomonae be pocotsi jiwimonae poxonae pona pequireiwatha xua poxonae matautano jopa

xeinaeyo xua penatsiwana itiyobiwa. Daichitha daxita barapomonae nama jume

cowantsina, xua jume cowantsinchi pon Nacom itoroba.

Bapon barapomonae juntu cui coyene babatsiya

xanepanaya jinompaeya exanaeinchi ichi be jiwi

ichi xua poxonae pin peoichatha jinompa”,

jei Isaías, pon Nacom pia peitorobi jume pepaebin.

<sup>17</sup> Bapoxonae Capernaum tomaratha Jesús tamropata pitaba xua jiwi cuidubatsi. Jesús namchi, jeye: “Icha juntu coyene paxeinare Nacomtha, painya neauraxae xua abe paexaname. Tsipei Nacom paca waba painya nenaexanaenexa piamonae tatsi pomonae Nacom itorobiya peewatsixae”, jei Jesús.

**Meje yabara poxonae Jesús  
waba cuatro poyobe pebiwi,  
pomona duwei peyamonawewi**

(Mr 1.16-20; Lc 5.1-11)

<sup>18</sup> Jesús pona Galilea pucua itapatha. Jesús tane ponbe ainya caepipeweichobe. Ichun pewun Simón pon icha wunno Pedro. Ichun pewun Andrés. Baponbe duwei peyamonaeinbe. Baponbe mentha

yamonauyabe duwei pocotsiwatha xua peyamaonaewa. <sup>19</sup>Nexata Jesús baraibe baponbe, jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowantsiwa tsane Nacom icha bayatha paichimbe poxonae payamonamebe duwei nawita, jei Jesús.

<sup>20</sup>Nainya caena baraponbe peyamaonawan xubotabe. Napuna ponabe Jesustha.

<sup>21</sup>Bapoxonae pirapae Jesús tane ichunbe, ponbe ainya caepipeweichobe. Ichun pewun Santiago. Ichun pewun Juan. Baponbe Zebedeo pexantobe tatsi. Baponbe jeratha paxa baru ecabe. Baponbe peyamaonawan wunaetauyabe. Jesús waba, baponbe wabatsibe. <sup>22</sup>Caena nainya jera xubotabe matautano paxa cuenta ponabe. Baponbe Jesús puna poinchibe.

### **Meje yabara poxonae Jesús pin bicheitomonae cuiduba**

*(Lc 6.17-19)*

<sup>23</sup>Jesús popona ducuaeta daxita Galilea nacua beya. Bapon cuiduba ducuaeta daxita judiomonae pia penacetutsi bontha tatsi. Jesús paeba ducuaeta Nacom pia pexeinya jume diwesi tatsi, po diwesi yabara xua Nacom waba jiwí, petanaexanaenexatsi piamonae pomonae Nacom juntu coyene itorobiya ewata. Matautano Jesús axaibi exana jiwí xua daxita carepaya xoxi atene barapomonae yawa xua faefaena peatenexae. <sup>24</sup>Pin bicheitomonae jiwí jume tane xua juinya Jesús exana daxita carepaya Siria nacuatha. Barapomonae pomonae pejume taexae xua Jesús exana, barapomonae capona daxita pomonae domaebatsi, yawa pomonae peatenexae, matautano pomonae caurimonae xeina,

matautano pomonae amameibatsi, matautano pomonae mubatsi. Jesús axaibi exana daxita barapomonae. <sup>25</sup>Pin bicheitomonae jiwí Jesús puna poinchi pomonae Galilea nacua weya pona. Iruru Jesús puna poinchi pomonae Decápolis nacua tomaran weya pona, iruru pomonae Jerusalén tomara weya pona, iruru pomonae Judea nacua weya pona. Iruru Jesús puna poinchi pomonae jinompa ichaxota po nacua eca imoxoyo Jordán mentha xua icha muxunenetha xua tajuthiya.

### **Meje yabara poxonae Jesús cuiduba jiwí demxuwatheicha**

**5** Poxonae Jesús tane barapo pin bicheitomonae, bapoxonae Jesús pona demxuwatheicha. Matautano Jesús baxoteicha eca. Bapoxonae Jesús pijimonae matawacaicha nacaetutaracupatsi pomonae pia pepuna ponaewichi. <sup>2</sup>Jesús tamropata pitaba xua diwesi cuiduba barapo pin bicheitomonae.

### **Meje poxonae Jesús yabara cuiduba pomonae pejuntu coyene weiweinae jiwí**

*(Lc 6.20-23)*

<sup>3</sup>Jesús barai barapo pin bicheitomonae pomonae pijimonaexae tatsi, jeye: “Maisa bichocono juntu coyene weiweina pomonae yaputane xua Nacom pecanantawenonaewatsi xua xanepanaya pejinompaewa tsane. Tsipei barapomonae naexanaena Nacom piamonae pomonae Nacom juntu coyene itorobiya ewata.

<sup>4</sup>“Maisa bichocono juntu coyene weiweina pomonae bequein anthuthurewe xua siwa wecoyei petaexae xua ichamonae abe cana exana jiwitha. Daichitha barapomonae Nacom cui matateicaena, barapomonae

cui matateicaeinchi xua anthuthurewe, xua ichamonae siwa wecoyeichi.

<sup>5</sup>“Maisa bichocono juntu coyene weiweina pomonae Nacom bichocono pebaru cui itura jinaewatsi xua jopa Nacom yabara ajuntucoyenetsacatsi. Barapomonae nama patsina pena iratha po ira Nacom bayatha yabara paeba.

<sup>6</sup>“Maisa bichocono juntu coyene weiweina pomonae ichichipa nawita xua exaneiba xua Nacom ichichipa, pexeinaenexa tsane pejuntu coyene xanepanaewa Nacomtha xua Nacom jopa petsitanexatsi xua barapomonae pexeinaewa penatsicuentisiwa xua abe peexanaexae bapontha. Barapomonae yawenatsi, Nacom yawena xua barapomonae pexeinaenexa tsane barapo coyene.

<sup>7</sup>“Maisa bichocono juntu coyene weiweina pomonae nantanuweya pecayabara cui cananta xeinaewi xua ichamonae peyawenaenexatsi. Barapomonae xuya Nacom nantanuweya cayabara cui nanta xeinaena xua peyawenaenexa tsane.

<sup>8</sup>“Maisa bichocono juntu coyene weiweina pomonae pejuntu xeicae jiwi xua pomonae jopa pecayabara nanta xeinaexae abe peexanae cuiru coyene. Barapomonae Nacom necotsinchi.

<sup>9</sup>“Maisa bichocono juntu coyene weiweina pomonae juntema pejinompaexae xua peyawenaexae xua iru ichamonae juntema jinompa peexanaexaetsi pomonae copiya abe nata exaneiba. Barapomonae pomonae juntema pejinompaexae Nacom unuta ‘Tapexui’, jei Nacom.

<sup>10</sup>“Maisa bichocono juntu coyene weiweina pomonae bequein bara aperutane exainchi matautano bequein bara anthuthutane exainchi, xua amsiya xaniwaicha peexanaexae pocotsiwa Nacom itoroba. Barapomonae nama Nacom pi-

jimonae tatsi naexanaena pomonae Nacom juntu coyene itorobiya ewata.

<sup>11</sup>“Maisa bichocono pajuntu coyene weiweiname poxonae bequein bara ichamonae abeya paca yabara paeba, poxonae bequeinno abe pacata exana, matautano poxonae bequeinno canaerabiya paca yabara paeba tapaneantobemxaem. <sup>12</sup>Pajuntu coyene weiweinare. Matautano juntema painompare tsipei Nacom paca catsina pia pexeinya peitupanaewan pocotsiwan Nacom paca juntana jeba pia nacuatheicha. Icha ichamonae abe pacata exana payabara nanta xeinare, matha caena barichi poxonae ichamonae abe exana pomonaetha pomonae Nacom pia peitorobi jume pepaebiw. Barapomonae caena bayatha jinompa poxonae paxam cataunxuae jopa pajinompaem”, jei Jesús.

**Meje yabara poxonae Jesús  
diwesi paeba xua sare yabara  
yawa xua pecoicha yabarano**

*(Mr 9.50; Lc 14.34-35)*

<sup>13</sup>Equeicha Jesús barai barapo pin bicheitomonae, pomonae pijimonaexae tatsi jeye: “Sare beno bara beno wuna. Ichitha icha barapo sare beno jopa abenataeyo bapoxonae jopa peitacupaewatsi xua equeicha peabenataewa. Bapoxonae jiwi barapo sare beno xuba iratha. Matauta beno taxunaunaba iratha. Paxam pomonae tamonae pam be bara jutiya ichiya pam, icha sare beno cana ichichi. Paxam payawende jiwi pomonae jinompa barapo cae pin nacuathe xua daxita jiwi jopa abe peexanaewa tsane. Ichitha icha barapomonae jopa xapain payawenaem tsane, Nacom bara paca bebai tsane. Tsipei jopa wuna pam, Nacom bara paca bebai tsane icha jiwi ichi poxonae bebai sare beno matauta xua beno taxunaunaba, tsipei jopa abenataeyo.

<sup>14</sup>“Icha pecoicha ichi poxonae pentha xua poxonae baxota jiwi yawenatsi, paxam bara juta ichiya paichim poxonae beta painompame. Barapocotsi coyenewatha jiwi payawename xua beta jinompa. Po tomara ba demxuwatha eca, barapo tomara ba jiwi tajü tane. Bara paca yabara juta coyene ichi, jiwi paca tane xua poxonae beta painya nejinompaewa. <sup>15</sup>Jiton dapon ba aibi xua pon pecoicha coicha exana xua pecoicha matacatetsinexa corototha. Jame, asiya coicha exanatsi xua pecoicha taenexa pomonae bomuxutha ena. <sup>16</sup>Bara paca yabara juta coyene ichi xua jiwi peitabaratha tatsi. Beta painompare xua jiwi painya nepaca cataenexa xua xanepanaya paexaname painya neantobemxae Nacom. Bapoxonae barapo jiwi Nacom wuna jainchinchí, pon painya Axa, pon itabocotha eca”, jei Jesús.

**Meje yabara poxonae Jesús jiwi  
yabara cuidubatsi Moisés  
pia peitorobi diwesi jume**

<sup>17</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Jopa pananta xeinaeinde xua xan patopeican xua apara Moisés pia peitorobi diwesi jume tacana exanaewa tsane xua jiwi jopa equeicha pecanantawenonaewa tsane barapo Moisés pia peitorobi diwesi jume xuano iru bara cana ichin tsane pomonae Nacom pia peitorobi jume pepaebiwi pia pecuidubiwan tatsi. Jame apara patopeican tanayabara jume cui yabara wetsinexan tsane pocotsiwa caena bayatha neyabara tsiwuna paeba po diwesintha Moisés pia peitorobi coyenewa tatsi, iruno Nacom pia peitorobi jume pepaebiwi pia penacuidubiwan jumeintha. <sup>18</sup>Bara xaniyeya paca tsipaebatsi poxonae cataunxuae barapo itaboco ducue,

matautano poxonae cataunxuae barapo ira ducue, Moisés pia peitorobi diwesi jopa weraweracae tsane. Matautano jopa cae itanetiyo aichurucuae tsane beya poxonae wetsina pocotsiwa bayatha Nacom tsiwuna yabara paeba xua wetapaeba. <sup>19</sup>Pon yabara nanta xeina pecuidubinexa ichamonaetha xua tsita jume ita xexenatsi Nacom pia peitorobi coyenewa bequein saya po peitorobi coyenewiyo peya itorobi coyenewiyo, bapon xuya, Nacom pia nacuatheicha cana juntu cui ita xexenecaeinchi. Ichitha nama pomonae cuiduba ichamonaetha Nacom pia peitorobi coyenewan, matautano xua exana pocotsiwa Nacom itoroba, barapomonae peainya cui jiwi tsane Nacom pia peitorobi nacuatheicha tatsi. <sup>20</sup>Paca tsipaebatsi jame bewa juntu coyene xanepanaya paexaneibiname ichamonaetha be pocotsi coyeneya xua Nacom paca itoroba, beyacaincha poxonae exana pomonae pecuidubiwi Moisés pia peitorobi coyenewa tatsi, matautano xua poxonae beyacaincha jinompa fariseomonae. Icha jopa yatsicaewa beta juntu coyene xanepanaya paexanaem tsane beyacaincha xua poxonae barapomonae itara mexeya wunaeya exana, jopa papatsim tsane Nacom pia peitorobi nacua beicha tatsi”, jei Jesús.

**Meje yabara poxonae Jesús yabara  
cuiduba xua peanaepanae cui coyene**

*(Lc 12.57-59)*

<sup>21</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Paxam pajume taneme pocotsiwa Moisés namchi painya amo susato jiwitha, jeye: ‘Jopa ichun anaya bexubinde. Tsipei pon xua ichun bexotsi, ichamonaetha yabara paebina xua bapon natsicuenta xua abe peexanaexae’, jei. <sup>22</sup>Ichitha nama seicaya paca tsipae-

batsi xua pon caseba ichuntha ichamonae yabara paebina xua bapon natsicuenta xua abe peexanaexae. Iruru pon biatane ichuntha ichamonae yabara paebina xua bapon natsicuenta xua abe peexanaexae. Pomonae pecanamata caitorobi bicheito bapon yabara paebinchi xua bapon natsicuenta tsipei bapon bichocono unthuthu anaepana. Matautano iruru pon namchi xua ichun jeichichi: ‘Xam nabene came’, jei pon, bapon xubinchi po nacua beya ichaxota isoto bapana jopa itacounayiyo.

<sup>23-24</sup>“Equeicha paca tsipaebatsi. Ichacuiha ichun duwein becapona ichaxota xua be pexaethopaewa xua tuxusi exana Nacom nexa poxonae tauta. Poxonae cataunxuae jopa exanaeyo baxua, matha copiya tsiwanaya yabara nanta xeinaena pocotsiwa icha metha bayatha abe exana ichuntha. Matha be ichi tsane meje xuaje: Bu abu cataunxuae bota pocotsiwa pia pecatuxusi exanaewanexa xua Nacom nexa. Matha copiya bewa ponaena ichun beya xua pia penaita coxone exanaewa tsanebe. Bapoxonae bapon caibeya bewa ponaena xua duwein petuxusi exanaewa tsane Nacom nexa poxonae tauta.

<sup>25</sup>“Icha ichamonae be paca itoroba paca necacaponanexa pontha pon jiwu peyabara paebin penatsicuentisiwa, nexata patsipaebare barapomonae, poxonae cataunxuae namtotha paca baru pona xua painya nenaita coxone exanaewa tsanebe. Xain bapoxonae barapomonae jopa paca caponaebe tsane pontha pon jiwu peyabara paebin penatsicuentisiwa. Tsipei icha barapomonae bara beya paca caponaetsipa, bapoxonae pon jiwu peyabara paebin penatsicuentisiwa equeicha dabeya policiamonae beya paca itorobichipa. Bapoxonae nama policiamonae jiwu pecubi bo beya paca itorobichipa. <sup>26</sup>Bara xaniyeya paca tsipae-

batsi. Paxam jopa paca pu copabi tsane jiwu pecubi bo weya, beya abu poxonae pana pu matomacaname daxita paratixi cuntha po paratixi xua paxeiname”, jei Jesús.

**Meje yabara poxonae Jesús  
yabara cuiduba xua jiton pita,  
powa ichun piowa tatsi, powa  
bequein piseuri xeina taetha**

<sup>27</sup>Equeicha Jesús barai barapo pin bicheitomona, pomonae pijimonaexae tatsi, jeye: “Paxam pajume taneme xua Moisés pia peitorobi coyenewan xua jeye caena bayatha: ‘Jopa ichowa pichinde powa ichun piowa tatsi, powa piseuri xeina taetham’, jei Moisés. <sup>28</sup>Ichitha nama xan paca tsipaebatsi. Icha pebin tane petsiriwa, yawa nanta xeinaeya jeye: ‘Barapowa ichichipan taise maituncuaewa tsane, bequein bapowa jopa taseuriyo’, jei, bapoxonae barapara abe exana Nacomtha, icha be pocotsi coyene ichi, poxonae pita yabuyotha powa jopa bequein piseuriyo tatsi.

<sup>29</sup>“Bara xaniyeya paca tsipaebatsi. Icha po itamaiqueito painya necoxa werena ducua icha barapo itamaiqueito paca exana xua abe painya neexanaewa tsane panaitamaiquei jucua, barapo itamaiqueiton yawa tajü beya pabebande. Metha wunae xua painya nebebeiw tsane cae itamaiqueitoxi xua Nacom pia nacua beicha cae itamaiqueitoxi painya neyawa patsinexa. Baxua jame wunae yatsicaewa, beyacaincha xua poxonae painya pepon ompin paca bebai tsane ichaxota po nacua isoto bapana jopa itacounayiyo. <sup>30</sup>Barichi icha painya necobe, po cobe painya necoxa weya, icha barapo cobe paca exana xua abe painya neexanaewa tsane panacobe ucubobare, yawa tajü beya pabebande. Metha wunae xua cae cobexi painya nebebeiw tsane, xua cae cobexi painya

neyawa patsinexa Nacom pia nacua beicha. Baxua jame wunae beyacaincha xua poxonae painya pepon ompin paca bebai tsane ichaxota po nacuatha isoto bapana jopa itacounaiyo”, jei Jesús.

**Meje yabara poxonae Jesús yabara cuiduba xua jiwi piseurixi pepunapenteibiyainwa**

*(Mt 19.9; Mr 10.11-12; Lc 16.18)*

<sup>31</sup>Equeicha Jesús barai barapo pin bicheitomonae, pomonae pijimonaexae tatsi jeye: “Caena bayatha Moisés pia peitorobi jume diwesitha namchiya jeye: ‘Pon punaxuba piowa peichaxaibixae xua pocotsiwa bapowa exana, bapon barabu piowa catsina papera, po paperatha tina xua pexubiwa tsane piseuri’, jei barapo Moisés pia peitorobi coyenetha. <sup>32</sup>Ichitha nama seicaya icha coyeneya paca tsipaebatsi. Icha pebin piowa punaxuba xua saya peichaxaibixae poxonae bequein bapowa jopa nasi cui coyene exanaeyo bapoxonae Nacom tsita abetsi xua bapon cana exana piseuritha. Tsipei bapon cana exana piowa xua piseuri tatsi nasi cui matacaeta xua weiweina pebiwitha. Barichi pon pita petsiriwa, powa piseuri pepunaxubixae, bapon barichi pia coutha abe natsixana, tsipei Nacom ichowa yabara nanta xeina xua bapowa cataunxuae ichun piowa tatsi bequein punaxuba”, jei Jesús.

**Meje yabara poxonae Jesús yabara cuiduba xua jiwi xainyeya penacui wunae tsiwunaeya yabara paebiwa xua peexanaewa pocotsiwa exanapaeba**

<sup>33</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Bayatha pajume taneme xua painya amo susato jiwi tsipaebatsi, xua Moisés tsipaeba. Moisés jeye: ‘Paxam jopa bewa naerabiya pana cui

wunae tsiwunaeya yabara paebim tsane xua painya neexanaewa pocotsiwa paexanapaebibame xua Nacom peitabaratha tatsi. Ichitha jame bewa bara xainyeya paexaneibiname pocotsiwa papaebibame xua Nacom peitabaratha tatsi’, jei Moisés pijimonaetha. <sup>34</sup>Ichitha xan seicaya icha coyeneya paca tsipaebatsi. Poxonae jiwi peitabaratha tatsi pana nacui wunae tsiwunaeya xainyeya yabara paebiname pocotsiwa xua paexanapaebame bara moya baxua paexande, xua jiwi pia painya nepaca cajume cowuntsinexa. Jopa yawa muxuna icha jumein papaebinde. Jopa pajande ichuntha: ‘Bara xaniyan xua exanaein. Nacui wunae tsiwunaeya xainyeya yabara paeban Nacom peitabaratha xua exanaein’, jopa pajande. Matautano jopa pajande: ‘Bara xaniyan. Baraxua paeban po wuntha xua Nacom pia nacua wuntheicha tatsi’, jopa pajande baxua, tsipei Nacom bara xoteicha eca pia pexeinya equeibithopeibiwa tatsi ichaxota bapon ewatsiya itorobeibeca jiwi. <sup>35</sup>Matautano barapocotsi coyenewa jopa bewa pana cui wunae tsiwunaeya yabara paebim ichuntha xua ira yabara. Tsipei barapo ira apara Nacom pia ira. Barapo iratha nataxu yuyuteca. Barichi matautano barapocotsi coyenewa jopa bewa pana cui wunae tsiwunaeya yabara paebim ichuntha xua Jerusalén tomara yabara, tsipei barapo tomara, po tomaratha ichaxota Nacom popona pon jiwi itorobiya pia pepa Peewatsinchi. <sup>36</sup>Matautano barapocotsi coyene jopa bewa pana nacui wunae tsiwunaeya yabara paebim ichuntha xua painya nentasipa yabara. Saya meisa Nacom paca yabara matasipa yaputane. Pomonae pam xua pewowi pam xua pantana tsaebiam jopa paca itacupaeyo xua equeicha



pantana inyapaname. Matautano pomonae pam pomonae amomonae pam xua pantana inyapaname jopa itacupaetsi xua equeicha pantana tsaebiam. Matautano jopa baxua daichiyo xua caentanatoxitha. Saya meisa Nacom itacupaetsi xua cana exana baxua. <sup>37</sup>Saya meisa barapo jumethabe patsipaebare ichuntha ichaxota po jumetha jei 'Je, bara exanaein', jei, matautano ichaxota po jumetha jei 'Jume jopa exanaein tsane', jei. Tsipei poxonae pamuxuna paebame poxonae pana tsiwuna yabara paebame ichamonaetha Nacom pia wuntha tatsi xua painya neexanaewa pocotsiwa paexanapaebame baraxua apara caurimonae pia pentacaponaein tatsi paca tsimuxu duba xua painya nepaebiwa baxua", jei Jesús.

**Meje yabara poxonae Jesús yabara cuiduba xua penayantomocae coyene**

*(Lc 6.29-30)*

<sup>38</sup>Equeicha Jesús barai barapo pin bicheitomonae, pomonae pijimonaexae tatsi, jeye: "Paxam pajume taneme xua bayatha Moisés paeba xua jeye: 'Pon itamaiquei esanopa ichun peitamaiqueito, bapon xuya bewa itamaiquei esanopaeinchi. Matautano pon xua wano teranopa, xua ichun wano teranopatsi, bapon xuya wano teranopaeinchi', jei. <sup>39</sup>Ichitha nama icha coyeneya paca tsipaebatsi: Jopa xuya pebin pacaitacueinchiinde poxonae paca caitacueinta, pon peaitabein. Matautano icha ichun paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. <sup>40</sup>Ichitha ichun paca yabara yopichiya paeba pontha pon jiwi peyabara paebin xua penatsicuentiwa xua painya nentoma amanayabixae bapon, bapoxonae bara pacare xua paca

itoroba. Icha painya camisa pacata pita bara yawa muxuna pacare camisa po camisa peamutiya camisa, po camisa xua athawe peruyaewa. <sup>41</sup>Ichitha soldadomonae paca itoroba xua jeye: 'Painta caponde pocotsiwa arewe xua saya cae kilómetro beya', jei, bara moya pacaponde pocotsiwa arewe xua equeicha icha cae kilómetrono pantaropatabare. <sup>42</sup>Daxita coyenexi pocotsiwa ichamona paca wuca, moya bara pacaichabeibare. Pon paca nacowaeta painyawa moya bara patsicobe copabare. Jopa paasiwinde painyawan", jei Jesús.

**Meje yabara poxonae Jesús yabara cuiduba xua jiwi bewa antobe pomonaetha pomonae pia peaitafaetabi jiwichi**

*(Lc 6.27-28, 32-36)*

<sup>43</sup>Equeicha Jesús barai barapo pin bicheitomonae, pomonae pijimonaexae tatsi, jeye: "Matautano pajume taneme xua caena bayatha Moisés namchi, xua jeye: 'Paantobeinde pomonae painya jiwi. Matautano pacasebare pomonae painya nepaca caaitafaetabi jiwi', jei xua Moisés paeba. <sup>44</sup>Ichitha icha coyeneya paca tsipaebatsi: Paantobeinde pomonae bequein painya nepaca caaitafaetabi jiwi. Matautano Nacomtha patawucare pomonae bequein abe pacata exana. <sup>45</sup>Ichitha paexanaename daxita barapo coyenexi bapoxonae yatsicaewa Nacom piamonae tatsi pam tsane. Bara paichim tsane icha be painya Axa ichi pon Nacom, pon peitabocotha peecaexae xua daxita jiwi antobetsi. Nacom xometo pentha taexana daxita jiwi pomonae pejuntu coyene xanepanae jiwi nexa iruru pomonae peajuntucoyenebe jiwi nexa. Matautano Nacom ema taitorobicano daxita jiwi pomonae xaniwaicha pejuntu

coyene xeicae jiwi nexa iruru pomonae peajuntucoyenebe jiwi nexano. <sup>46</sup>Icha saya meisa paantobem pomonae painya nepaca antobexae, Nacom jopa paca cui yabara matomacae tsane. Tsipei iruru barapo coyene exana pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa, bequein jiwi yabara nanta xeina xua bapomonae peajuntucoyenebewi. Barapomonae antobe pomonae xua pia peantobewixaetsi. <sup>47</sup>Matautano icha saya meisa painyamonae pajacobame pomonae iru pejume cowuntsiwi poxonae paca siwa pona, xuano xua jopa pajacobim ichamonae, pomonae jopa pejume cowuntsiwi, barapo coyene jopa xanepanaeyo. Tsipei pomonae Nacom jopa peyaputae jiwi, barapomonae iru ba jacobia piamonae. Ichitha nama bewa toxinchiya pananta xeinaem beyacaincha barapomonae poxonae nanta xeina. <sup>48</sup>Daxota paxam bewa bichocono xaniwaichiya beta painompaem. Matautano xua caewiyo jopa bewa paexanaem tsane xua peabe coyenewa. Barapocotsi juta coyeneya paichim tsane icha painya Axa ichi pon Nacom, pon peitabocotha peecaexae xua bichocono xaniwaichiya beta popona. Matautano bapon caewiyo jopa exanaeyo peabe coyenewa”, jei Jesús.

**Meje yabara poxonae Jesús jiwi  
yabara cuidubatsi xua jiwi  
xanepanaya peexanaewan**

**6** Equeicha Jesús barai barapo pin bicheitomonae, pomonae pijimonaexae tatsi, jeye: “Poxonae paxam paexaname pocotsiwan xua ichamonae tsita xanepanatsi xua Nacom paca itoroba, bapocotsiwan paexande xua Nacom painya nepaca cacuitaenexa.

Saya meisa jopa paexanaeinde xua jiwi u painya nepaca cacuitaenexa xanepanaeya painya nepaca cayabara paebinexa. Icha bapocotsi coyeneya paexanaetsipame nexata painya Axa Nacom pon itabocotha peecaexae jopa paca catsitsipae pocotsiwa paca yabara cui coyene matomacaewa tsipei jopa paexanaetsipaem Nacom nexa.

<sup>2</sup>“Daxota poxonae peacopeibiwi xoxi pacatsibeibame jopa ichamonae patsipaebinde xua baxua painya neexanaexae. Jopa barapocotsi coyeneya bara paichinde icha be pomonae pemuxuitorobiwi ichi, poxonae itara mexeya pomonae xanepanaya pepaebiwi. Tsipei barapocotsimonae saya ichawa beya paeba xua pinae yawena nawita peacopeibi jiwitha. Barapomonae matha jiwi wabeibatsi xua barapomonae pejume taenexa tsainchi, bapoxonae judiomonae pia penacaetutsi botha yawa namtontha baxua yabara paeba nawita xua pinae yawena nawita pomonaetha pomonae peacopeibi jiwi. Barapomonae baxua exana pia xua jiwi beta yabara nanta xeinaetsi, pia xua jeichi jiwi: Maisa barapomonae betiya exana, xua pejeinexa jiwi. Ichitha xaniwaicha paca tsipaebatsi, barapomonae xeina pia pecui yabara matomacaewatsi poxonae jiwi baxua caunuta tsipei jopa moicha exanaeyo Nacom nexa. <sup>3-4</sup>Ichitha poxonae paxam payawenama peacopeibiwi namicha moicha pacare barapomonaetha xua painya jiwimonae jopa paca necacui taenexa. Matautano poxonae Nacom painya Axa paca tane poxonae namicha moicha paexaname baxua bapoxonae bapon Nacom paca catsina pocotsiwa pia pecui yabara matomacaewa”, jei Jesús.

**Meje yabara poxonaē Jesús jiwi  
yabara cuidubatsi po coyene  
xua Nacom pewucaewatsi**

(Lc 11.2-4)

<sup>5</sup>Equeicha Jesús barai barapo pin bicheitomonaē, pomonaē pijimonaēxāē tatsi, jeye: “Poxonaē Nacom pawucame, jopa barapocotsi coyeneya paexanaēinde icha be pomonaē pemuxitorobiwi ichi, pomonaē itara mexeya beta pepaēbiwi. Barapomonaē saya ichichipa xua jiwi pecui taenexa poxonaē barapomonaē Nacom wucatsi. Barapomonaē ichichipa umena pewucaenexa Nacomtha judiomonaē pia penacætutsi bontha tatsi xua matautano barichino namtontha. Barapomonaē baxua exana xua pecui taenexatsi xua ichamonaē pecui taenexa. Bara xaniyei paca tsipaebatsi. Barapomonaē barompaya xeina pia pecui yabara matomatsiwatsi poxonaē jiwi yabara paeba xua barapomonaē pinaē bara xanepanaēya exana. Nama bapoxonaē Nacom jopa catsiyo pia pematomatsiwa barapomonaētha tsipei barapomonaē jopa moicha exanaeyo Nacom nexa. <sup>6</sup>Ichitha poxonaē Nacom pawucame, barompaya painya tutu beya paponde yawa bomuxu tutu pacoibo xatababare. Bapoxonaē painya Axa Nacom baraxotiya patsipaebare. Painya Axa paca yanta compa yawa daxita paca cui tane pocotsiwa namicha paexaname. Bapoxonaē bapon Nacom paca catsina pocotsiwa pia paca yabara cui matomacaewa, xua beta painya neexanaēxāē poxonaē Nacom patsipaebame.

<sup>7</sup>“Poxonaē Nacom patsipaebame, jopa equeicha matowa patsipaebinde po jumetha xua po jume jopa paca yawenaeyo. Jopa bara paichinde icha be pocotsimonaē ichi pomonaē jopa peyaputaewi Nacom. Barapomonaē

nanta xeina xua bara Nacom jume tane pocotsiwa barapomonaē tsipaeba xua matowa pepaebixāē. <sup>8</sup>Nexata jopa barapocotsi coyeneya bara paichinde icha be poxonaē barapomonaē icha ichi. Tsipei painya Axa Nacom bara yaputane pocotsiwa painya nenantawenonaēwam, xua beya poxonaē pawucame Nacom. <sup>9</sup>Daxota Nacom patsipaebare, paichinde: ‘Pata Taxam, xam ponxaem peitabocotha athabeicha neecaēin.

Barabū daxita jiwi cabarū cui itura jina nejuntu coyene xanepanaēinxāē.

<sup>10</sup>Barabū jopaena matakabi, po matakabitha

poxonaē xam jiwi itorobiya ewatsiname barapo cae pin nacuathe.

Barabū jiwi exanaena pocotsiwa jinya neichichipae coyenewa xua barapo cae pin nacuathe tsique.

Barabū jiwi exanaena icha peitabocotha ichi xua

exana pocotsiwa jinya neichichipae coyenewa.

<sup>11</sup>Daxita matakabin pexaewa pana catsibeibare xua

po pexaewa daxita matakabin pata canantawenonaewa tsaibi tsane.

<sup>12</sup>Pana neyabara cui cana juntemainare xua abe

pata catsita exanaewatsi.

Bapoxonaē pana neyabara cui cana exaname xua

jopa equeicha pata catsita natsicuentisiwatsi

xua abe pata catsita exanaēxāētsi.

Baraxua painta exande icha paichin ichamonaētha.

Tsipei paxan copiya payabara cui cana exanan

xua ichamonaē jopa pana netsita natsicuentisiyo

xua abe pata tanetsita exanaēxāē.

<sup>13</sup>Jopa pana copatsinde xua abe pata exanaewa tsane poxonae jiwi pana nejuntu coyene jujuta, xua abe pata exanaewa tsane. Ichitha pana necapanenebiya exande barapo abe peexanae coyene weya', pajande poxonae Nacomtha patsipaebame", jei Jesús.

<sup>14</sup>Equeicha Jesús barai barapo pin bicheitomonae, pomonae pijimonaexae tatsi, jeye: "Tsipei icha paxam pacui yabara junte-mainame pocotsiwa ichamonae pacata abe exana, nexata xuya painya Axa Nacom pon peitabocotha peecaexae, xuya paca cui yabara junte-mainaena pocotsiwa abe paexaname. <sup>15</sup>Ichitha icha paxam jopa pacui yabara junte-mainaem pocotsiwa ichamonae abe pacata exana, nexata xuya painya Axa Nacom jopa paca cui yabara junte-mainae tsane pocotsiwa abe paexaname", jei Jesús barapo pin bicheitomonaetha pomonae pijimonaexae tatsi.

**Meje yabara poxonae Jesús  
yabara cuiduba po coyene  
peyabara nainbotsi cui coyenewa**

<sup>16</sup>Equeicha Jesús barai barapo pin bicheitomonae pomonae pijimonaexae tatsi, jeye: "Poxonae paxam payabara nainbotame xua Nacom beta painya newucaenexa tsane, jopa bara juta ichiya coyeneya paexanaeinde icha be pomonae ichi pomonae itara mexeya betiya peexanaewi daichitha abe exana. Barapomonae piyain itabara aenaenaca xua poxonae bequein peyabara nainbotsiwatha Nacom. Barapomonae jopa nanta cachetsiyo yawa jopa naitabara quiatsiyo. Barapomonae ichipa xua ichamonae yaputane xua barapomonae cou bara nainbota. Bara xainyeya paca tsipaebatsi xua

barapomonae bayatha xeina barompaya pia peyabara cui matomacaewatsi xua poxonae jiwi yabara wunae jainta xua barapomonae cou bara nainbota. <sup>17</sup>Ichitha paxam poxonae payabara nainbotame, xua Nacom betiya painya newucaenexa tsane, pana naitabara iquicare yawa beta pananta caichere. <sup>18</sup>Bapoxonae jiwi jopa paca cui yaputane tsane xua paxam bara cou payabara nainbotame. Namicha painya netsita exanaexae Nacom barapo coyene. Meisa saya painya Axa Nacom paca cui yaputane, tsipei daxita yaputane pocotsiwa namicha paexaname. Bapon paca catsina pocotsiwa pia paca yabara cui matomacaewa", jei Jesús.

**Meje yabara poxonae Jesús yabara  
cuiduba xua pocotsiwa Nacom jiwi  
pejuntana jebiwatsi pia nacuatheicha**

*(Lc 12.33-34)*

<sup>19</sup>Equeicha Jesús barai barapo pin bicheitomonae, pomonae pijimonaexae tatsi, jeye: "Barapo cae pin nacuathe copei jopa pacaetubinde xua painya nexenaewa tsane nawita barapo cae pin nacuathe. Tsipei bocobocowaton abe exanaena poxonae xane pocotsiwan xua paxeiname. Ichacuiitha abe exanaena poxonae painyawan axumainbatsi. Ichacuiitha painyawan pocotsiwa paxeiname baxuan pomonae pecaibiwi paca caibina. <sup>20</sup>Ichitha jame paexande barapo pejuntu coyene xanepanaewa po pejuntu coyene xanepanaewa Nacom ichichipa. Bapoxonae Nacom paca catsibina pocotsiwa painya nepaca juntana jebiwa pia nacuatheicha. Baraxoteicha bapocotsiwa bocobocowaton jopa xaeyo. Yawa jopa axumainbichi. Matautano pomonae pecaibiwi jopa paca caibiyo baxuan xuan Nacom paca necayabara cui matomacaewan. <sup>21</sup>Ichaxota ba pajebame xua painya

neichichipaewan baxota ba payabara nanta xeiname nawita”, jei Jesús pijimonaetha.

**Meje yabara poxonae Jesús yabara cuiduba jiwi po coyene xanepanaeya peexanaewa pejuntũ coyene wetsina**

*(Lc 11.34-36)*

<sup>22</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itamaiqueiton paca yawena xua beta painya netaewa tsane. Icha painya itamaiqueiton wũnae, bara beta pataneme. <sup>23</sup>Ichitha icha painya itamaiqueiton abe, jopa beta pataetsipaem. Barichiru painya jũntũ coyenewan xua painya nenanta xeinaewan. Icha painya jũntũ coyenewan xanepanaetsipa bara beta Nacom payabara najũntũ coyene xeinaetsipame. Ichitha icha painya jũntũ coyenewan jopa xanepanaetsipae jopa beta Nacom payabara najũntũ coyene xeinaetsipaem. Painya jũntũ coyenewan paca cana exanaetsipa xua bichocono abe paexanaetsipame”, jei Jesús.

**Meje yabara poxonae Jesús yabara cuiduba jiwi, xua pon nantaũta ainya pia pecanamataxeinaeinchibe tatsi**

*(Lc 16.13)*

<sup>24</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Jiton dapon aibi pon xeina ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchibe poxonae itorobatsi. Icha pia pecanamataxeinaeinchibe jopa taraichiyoy.

Cae pia pecanamataxeinaeinchibe xanepanaeya taexana. Icha pia pecanamataxeinaeinchibe abeya taexana. Barichi jiton pon bichocono antobe Nacom jopa itacũpaetsi xua bichocono peantobewa paratixi poxonae yawa bichocono antobetsi Nacom”, jei Jesús barapo pin bicheitomonae, pomonae pijimonaexae tatsi.

**Meje yabara poxonae Jesús yabara cuiduba po coyene xua Nacom eena pijimonae**

*(Lc 12.22-31)*

<sup>25</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Paca tsipaebatsi, jopa bichocono payabara najũntũ coyene exabinde pexaewa xua painya neuna jinompaewa tsane yawano xua painya neapaewanno tsane. Barichi jopa bichocono payabara najũntũ coyene exabinde papabũru xua painya pepon nexa. Po coyene xua asũ pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui irũ, beyacaincha papabũru xua pepon nexa. <sup>26</sup>Pataema peyapupunaewi. Barapoxi jopa ubiyo pabitha. Yawa xua penawetsiwa jopa notsiyo. Yawa jopa xeinaeyo botũxũn xua pejebinexa pexaewan. Ichitha Nacom apata peyapupunaewi pexaewa. ¡Paxam nama bichocono Nacom patsita ainya cuim, beyacaincha peyapupunaewi xua Nacom tsita ainya cuichi, po Nacom painya Axa pon itabocotha eca! <sup>27</sup>Dapon aibi pon paxam jiwana pon itacũpaetsi xua xeinaena icha matacabi xua po matacabitha pepoponaewa tsane poxonae tũpaena. Bequein bapon bichocono nayabara najũntũ exaba baxua, ichitha jopa itacũpaetsi xua xeinaena caentacabi equeicha.

<sup>28</sup>“Paxam bichocono payabara najũntũ exabame papabũru. Jame

pacayabara nanta xeinare pentonon, po pentonon wexotha xuwa, xua matono itupana. Pentonon jopa nacuichiyo yawa jopa natsixanaeyo papaburu penama xatabinexa. <sup>29</sup>Ichitha paca tsipaebatsi xua pentonon matono itupana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomonae itorobiya pia pepa peewatsinchi pon bayatha tupa. <sup>30</sup>Pentonon po matonon wexotha anoxuae xuwa, Nacom cana exana xua matono itupana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wunae bara bequein saya pentonon. Barichi Nacom itacupatsi xua beta paca neca-eenaewa xua beta painya nejinompaenexa. Matautano Nacom paca catsina paparuwan. ¡Maisa pebiwi pam tsobenae, be conotha pajume cowuntame Nacom! <sup>31</sup>Jopa paunthuthu deideijeya jinompaeinde xua ichawa painya neyabara nanta xeinaexae. Jopa pajan tsainde: ‘¿Eta xua xaeinchi jane? ¿Eta xua apaeinchi jane? ¿Eta xua nama xatabinchi jane?’ jopa pajan tsainde. <sup>32</sup>Tsipei barapo cae pin nacuathe jiji saya u baxua pecayabara najuntu coyene exabi pocotsiwa nantawenona. Ichitha nama paxam painya Axa Nacom panantautame. Barapon Nacom pon peitabocopin, pon yaputane daxita pocotsiwa xua xoxi panantawenoname. <sup>33</sup>Saya meisa jame bichocono copiya payabara nanta xeinare xua painya neexanaewa xua pocotsiwa Nacom ichichipa pon jiji itorobiya pia pepa peewatsinchi. Matautano jame bichocono payabara nanta xeinare painya nexainaenexa pejuntu coyene xanepanaewa Nacomtha. Icha paexanaename barapo

coyewanan nexata bapoxonae Nacom paca catsibina xua daxita pocotsiwa panantawenoname. <sup>34</sup>Jopa payabara muxuna najuntu exabinde anoxuae pocotsiwa baya tsane pocotsiwa painya neexanaewa tsane, tsipei barapo matakabi nama xeina pocotsiwa bichocono pacata ayapube. Daxita matakabi tsoponeibi pocotsiwa xua pacata ayapube xua pocotsiwa painya neexanaewan”, jei Jesús.

**Meje yabara poxonae Jesús cuiduba xua jiji jopa bewa yabara paebi xua ichamonae penatsicuentisiwa**

(Lc 6.37-38, 41-42)

**7** Equeicha Jesús barai barapo pin bicheitomonae, pomonae pijimonaexae tatsi, jeye: “Jopa ichamonae payabara paebinde xua penatsicuentisiwa xua abe peexanaexae. Nexata bapoxonae Nacom jopa paca yabara paebi tsane painya nenatsicuentisiwa xua abe painya neexanaexae. <sup>2</sup>Nacom pia coya paca yabara paebina xua painya nenatsicuentisiwa xua abe painya neexanaewa icha po coyeneya paichim poxonae ichamonae payabara paebame xua penatsicuentisiwa xua abe peexanaexae. Icha daunweya payabara paebiname xua penatsicuentisiwa ichamonae xua abe peexanaexae, Nacom barichi daunweya paca yabara paebina xua painya nenatsicuentisiwa xua abe painya neexanaexae”, jei Jesús. <sup>3</sup>Equeicha Jesús paeba caeinth pomonae pijimonaewi jiwana pecayabara jita pepaebi diwesiyo jeye: “Xam ba jinya jiton itata taneme poxonae itata jopiyatsi naeputiyo, ichitha jopa taem xua iruru xam nama pin naeputo neitamaiqueitha ducua. Barapocotsi jita coyeneya ichi, xam ba jinya jiton cui taneme xua poxonae abe exana, ichitha jopa nayaputaem xua iruru

xam baraichim nama bichocono abe exaname. <sup>4</sup>Icha jopa taem pin naeputo xua neitamaiqueittha ducua jopa caitacupaeyo xua nejeiwa jinya jitontha: ‘Tajiton, cata jutinchi naeputiyo xua ducua neitamaiqueittha’, xua nejeiwa. <sup>5</sup>Xam nepaebim xua ichun exana xua baxua neexanaewatha ira. Xam copiya nata jure barapo pin naeputo xua neitamaiqueittha ducua. Bapoxonae beta taename nejusinexa tsane naeputiyo xua jinya jiton peitamaiqueittha tarucuatsi.

<sup>6</sup>“Jopa patsipaebinde Nacom Pejume Diwesi pomonae anaya paca aeba, xuno anaya aeba Nacom Pejume Diwesi pomonae jopa pejume cowantsiwi Nacom. Tsipei barapomonae peajuntu-coyenebe jiwi bichocono. Barapomonae bara abe exana be barapocotsi juta coyeneya ichiya exana icha be auri ichi xua poxonae anaepanaya nawano webaba pocotsiwa pacatame. Matautano barapomonae bara abe exana be barapocotsi juta coyeneya ichiya exana icha be marrano ichi, xua poxonae petaxutha taxunaunaba xua irainyaba po pexaewa paapatame”, jei Jesús.

**Meje yabara poxonae Jesús  
yabara paeba xua jiwi bewa  
matowa wuqueibi Nacomtha**

(Lc 11.9-13; 6.31)

<sup>7</sup>Equeicha Jesús barai barapo pin bicheitomonae, pomonae pijimonaexae tatsi, jeye: “Matowa Nacom pawucare, bapoxonae paca catsibina pocotsiwa xua pawucame. Baraxua matowa paexande icha paichim poxonae matowa pajeiteibame beya poxonae pataebame yawa icha paichim poxonae matowa pawawam bomuxutha beya poxonae ichun paca jume nota. <sup>8</sup>Tsipei pon matowa wuca ichun bara catatsi. Tsipei pon matowa necoba, bara taeba. Tsipei pon bomuxu pecoibototha ma-

towa wawai, bara tacoibo sarana xore-natsi, matauta jume notatsino.

<sup>9</sup>“Paxam pomonae pexui paxeiname paca muxuwetatsi. Poxonae painya pexui paca wuca pan, ¿pacatsipame iboto? ¡Jume! <sup>10</sup>Ichacuitha tsipae, poxonae painya pexui paca wuca duwei, ¿pacatsipame jomo wito? ¡Jume! Jopa baxua paraichim tsane. <sup>11</sup>Bara bequein peajuntu-coyenebe jiwi pam, ichitha paxam payaputaneme xua xanepanaeya painya pexui pacatsibeibame. Ichitha nama Nacom painya Axa pon itabocotha peecaein bichocono jopa juniya paca catsiyo pejuntu coyene xanepanaewan poxonae pawucame beyacaincha poxonae painya pexui pacatsibeibame poxonae paca wuqueiba.

<sup>12</sup>“Paexande ichamonaetha xua po coyene painya neichichipaewa xua barapomonae beta painya nepacata exanaewa tsane. Tsipei barapo coyenewa bayatha Moisés pia peitorobi coyenewatha paca itoroba, matautano Nacom pia peitorobi jume pepaebiwi bayatha paca cui itoroba”, jei Jesús.

**Meje yabara poxonae Jesús  
yabara cuiduba po boupayo  
tsica boupayo dena**

(Lc 13.24)

<sup>13-14</sup>Nexata equeicha Jesús barai barapo pin bicheitomonae, pomonae pijimonaexae tatsi, jeye: “Poxonae jiwi pona tomara beya, pomonae itapeta pin namto iya pona, barapo jiwi pinmonae, tsipei barapo tomara namto boupa iya xua jopa ayapubeyo. Pomonae nama itapeta, po namto tsica namtiyo iya pona, barapo jiwi tsiquimonaeyo tsipei barapo tsica boupayo ayapube iya. Barichi poxonae jiwi patsina Nacom pia nacua beicha saya tsiquimonaeyo patsina tsipei ichamonae jopa tsita juntu cui coyene xanepanaetsi xua

xanepanaeya pejinompaewa Nacomtha. Daxota pomonae Satanás pia nacua beya patsina pinmonae tsane tsipei jopa taayapubetsi xua barapo Satanás pia juntu coyeneyatha tatsi jinompa. Nama itapeta pacananta xeinaeya jinompare Nacom pia juntu coyenewa tatsi xua icha jiwi ichi poxonae seicaya iruru barompaya pona tomara tsica namtiyo boupayo iya”, jei Jesús.

**Meje yabara poxonae Jesús yabara  
cuiduba xua jiwi yaputane  
nae, penacoichixae**

(Lc 6.43-44)

<sup>15</sup> Equeicha Jesús barai barapo pin bicheitomonae, pomonae pijimonaexae tatsi, jeye: “Dota pam, dota pomonae penaerabiwi, pomonae xua jeye: ‘Paxan papaeban Nacom nexa’, jei. Barapomonae painya xainya beya pata itara mexeya jopa juntu coyene anaepanaeyo icha be ichi pomonae xua Nacom pejume jejei jiwichi xua peexanaewa pocotsiwa Nacom itoroba xua matautano icha be ovejamonae ichi xua pia cui coyene xeina xua jopa anaepanaeyo. Daichitha barapomonae bichocono antuicoyeneyapube xua anaepana, icha be neuthu ichi poxonae bichocono anaepana. <sup>16</sup> Ichitha paxam pacayabara ita coxonaeme barapomonae poxonae pataneme pocotsiwa barapomonae exana, icha be jiwi ichi xua poxonae yaputane nae, po nae penacoichixae. Matautano jiwi jopa yputaeyo xua bapana jiwi jopa teracae uva cuei po naetha sojei, tsipei apara uva cuei xuwa unbototha po unbo jopa e dubenaeyo. Matautano jiwi jopa bapana teracae higo thei naexitha, tsipei apara higo thei xuwa higo naetha. <sup>17</sup> Tsipei daxita naein, po naein pexeinya naein bara nacoita po pethei pexeinya thei. Matautano daxita naein, po naein camatsa naein bara nacoita po pethei camatsa thei. <sup>18</sup> Po nae pexeinya nae

jopa bapana nacoichi po pethei camatsa thei. Barichi po nae camatsa nae jopa bapana nacoichi po pethei pexeinya thei. <sup>19</sup> Daxita naein, po naein jopa nacoichiyo po pethei pexeinya thei, jiwi barapo naein uncata. Bapoxonae jiwi barapo naein tauta isototha. <sup>20</sup> Icha naein cana ichichi xua poxonae jopa penacoichiyoxaera, bara cana ichi tsainchi jiwi xua poxoru xanepanaeya jopa peexanaexaera tsane. Icha ichi xua payaputaneme naein poxonae pia pethei pataneme, barichi jiwi pantu cui coyene yaputaneme poxonae pataneme pocotsiwa barapomonae exana”, jei Jesús.

**Meje yabara poxonae Jesús  
pinae paeba xua pinae daxita  
jiwi jopa patsi tsane Nacom  
pia peitorobi nacua beicha**

(Lc 13.25-27)

<sup>21</sup> Equeicha Jesús barai barapo pin bicheitomonae, pomonae pijimonaexae tatsi, jeye: “Pinmonae jiwi neyabara caunutsiya jei tsane: ‘Tanecanamataxeinaem’, jei tsane. Daichitha barapomonae jiwana tsicamonaeyo patsina Nacom pia peitorobi nacua beicha. Saya meisa patsina pomonae exana xua pocotsiwa Taxa ichichipa. Barapomonae patsina ichaxota Taxa po nacuatheicha ewatsiya itorobeibeca. <sup>22</sup> Poxonae barapo matabi jopaena, po matabitha poxonae Nacom yabara paebina xua jiwi penatsicuentisiwa pinmonae jiwi pijunuwi neyabara caunutsiya jei tsane: ‘Pata Tanecanamataxeinaem, paxan pacueicueijan nejume diwesi xam nexa. Matautano cauri paitawetan newuntha. Matautano jinya newuntha papaeban poxonae pexeinya petsita itutsi coyenewa paexanan’, nejei tsane. <sup>23</sup> Daichitha barapomonae jume notsin. Jan tsane: ‘Bu canta bapana jopa paca yaitaetsi. ¡Taxainya weya pana



natsixibarucupare pomonae abe painya neexanae jiwi pamxaem!' jan tsane", jei Jesús.

**Meje yabara poxonae Jesús ainya bomuxube yabara paeba**

(Mr 1.22; Lc 6.47-49)

<sup>24</sup>Equeicha Jesús barai barapo pin bicheitomonae, pomonae pijimonaexae tatsi, jeye: "Pon nejume naitomata pocotsiwa paeban matautano exanano pocotsiwa ichichipan barapon beta popona Nacom nexa. Bara barapon barapocotsi juta coyeneya nacana exana icha be pocotsin peyaputaen ichi, pon bo acabanota peira matatsucaewatha xua ichaxota ira daunwei. Meje jeye: Copiya muthun tajun exanareca pecuaranobinexa bomuxu naeton. <sup>25</sup>Poxonae ema duneica yawa mene matacaewaxuba yawa joibo bomuxu daunweya capubabanota, barapo bomuxu jopa joparenaeyo, poxoru naeton tajun umenareca xuano poxoru barapo bomuxu peira matatsucaewatha uncuu ichaxota ira daunwei. <sup>26</sup>Ichitha nama pon nejume taetha xuano jopa exanaeyo pocotsiwa ichichipan jopa beta poponaeyo Nacom nexa. Bara barapon barapocotsi juta coyeneya nacana exana icha be pocotsin amameibatsi ichi. Bapon be meje: Bapon be pocotsin bo acabanota ichaxota ira matafatsana xuano naeton jopa tajun umenarecaeyo poxoru taetowa. Baraxota mene pateiba poxonae awubo tsaibi. <sup>27</sup>Poxonae ema duneica, yawa mene matacaewaxuba, yawa pin joibo capubabanota barapo bo, bapoxonae barapo bomuxu joparena poxoru naeton jopa tajun umenarecaeyo xuano poxoru bomuxu uncuu ichaxota ira matafatsana. ¡Maisa bomuxu bichocono abe!" jei Jesús barapo pin bicheitomonaetha, pomonae pijimonaexae tatsi.

<sup>28</sup>Poxonae Jesús barapo diwesin najume weta, pomonae Jesús jume tainchi, barapomonae yabara najuntu coyene cabenaeca xua Jesús pia pecuidubiwatatsi. <sup>29</sup>Tsipei Jesús ba cuiduba be peyaputaen pia peayapusu itorobi coyeneya tatsi. Jesús jopa cuidubiyo be judiomonae pia pecuidubiwi pia picoyeneya tatsi.

**Meje yabara poxonae Jesús axaibi exana pon peperu sawinchi**

(Mr 1.40-45; Lc 5.12-16)

**8** Poxonae Jesús peitapatororo wejuinca, pin bicheitomonae Jesús puna poinchi. <sup>2</sup>Jesús imoxoyo caquita poinchi pebin, pon peperu sawinchi. Bapon pentabocototha uncuu Jesús peitabaratha tatsi xua Jesús pebaru cui itura jinaexaetsi. Bapon namchi Jesús beya, jeye:

—Pon Necanamataxeinaem jiwi, icha bara ichichipame bara caitacupa xua axaibi tana neexanaewam, tsipei jinya neayapusu itorobi coyenewa nexainaem, jei bapon.

<sup>3</sup>Nexata Jesús nacobe yota yawa mata jayaba barapo pebin. Jesús barai, jeye:

—Bara ichichipan. ¡Bara axaibinde! ¡Bara caaperuxaibi exanatsi! jei Jesús.

Bapoxonae bapon nainya taichurucuaetsi xua peperu sawiwatsi. <sup>4</sup>Nexata Jesús barai peperu sawinchi:

—Taema, jopa yabara tsipaebinde ichamonaetha xua neaxaibiwam. Saya jame meisa ponde sacerdotemonae pintha xua nenaitutsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita ita peinya xeinatsi xua xam bara jumem yawa xua peru wunaem, jei Jesús.

**Meje yabara poxonae  
Jesús axaibi exana pon  
soldadomonae romanomonae pia  
pentacaponaein tatsi tanacuitatsi**

(Lc 7.1-10)

<sup>5</sup>Poxonae Jesús joniya Capernaum tomaratha, bapoxonae pebin Jesús imoxoyo caquita poinchi. Bapon romanomonae soldadomonae pia pentacaponaein tatsi. Bapon nantaüta pon tanacuiteibatsi pia botha. <sup>6</sup>Barapo pentacaponaein Jesús jume daunweya baraichi, jeye:

—Tanecanamataxeinaem, pon inta nacuiteiba camatha boca tabotha. Bapon mübatsi yawa bichocono atene, jei barapo pentacaponaein.

<sup>7</sup>Jesús namchi:

—Bara beya tha ponaetsi taaxaibi exanaenexa bapon, jei Jesús.

<sup>8</sup>Barapo soldadomonae pia pentacaponaein tatsi jume nota:

—Tanecanamataxeinaem, xan saya tacui pawin. Auran xua xam nepatopaewa tsane tabotha tsipei xam ainya cuim. Icha saya paebiname xua bapon pia peatenewatha tatsi, bapoxonae bara axaibi tsane pon inta nacuiteiba. <sup>9</sup>Xan barichi xeinan tanecanamataxeinaein pon neitoroba. Barichiru xeinan soldadomonae pomonae itorobeiban. Poxonae ichun itoroban: ‘ponde’, jan, bara bapon pona. Poxonae ichun waban: ‘antha’, jan, bara bapon patopa. Pon inta nacuita itoroban: ‘inta exande’, jan. Bara inta exana, jei barapon pon pentacaponaein.

<sup>10</sup>Poxonae Jesús baxua jume taeba, jume cui yabara cananthuthu nanta xeinanaya cabenaeca, beta pepaebixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyeya paca tsipaebatsi, Israel nacuatha iru dapocotsin jopa

caxinaeinyo pocotsin icha pon iche pon tana necui yabara jume cowuntsin xua bara neitacupa xua axaibi taexanaewa jiwi. <sup>11</sup>Paca tsipaebatsi, pinmonae patsina Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Daxita carepaya barapomona Abraham baru equiyaena, iru Isaac baru equiyaena, iru Jacob baru equiyaena. Daxita carepaya barapo nacuanmonaepiwi baru nabanaeinchi peitaboco beicha. Abraham, baru nabanaena barapomona ichaxoteicha Nacom itorobiya ewateiba jiwi. <sup>12</sup>Ichamonae nanta xeina xua bepa pinae patsina Nacom pia peitorobi nacua beicha tatsi, bara bequein jopa xanepanaeya peexanaewi. Daxota barapomonaebai tsainchi ichawatha waxainya weya ichaxota pequireiwatha. Baraxota barapomonaebichocono wecoyei tsane yawa nantanuweya nantu jayabina, jei Jesús.

<sup>13</sup>Nexata Jesús barai pentacaponaein, jeye:

—Ponde jinya bo beya. Bara cata exanatsi tanecui yabara jume cowuntsimxae xua bara taneitacupaewa xua tacata exanaewatsi, jei Jesús.

Bapoxonae barapo pentacaponaein pia petanacuichin tatsi bara caena taaxaibi exanatsi.

**Meje yabara poxonae Jesús axaibi  
exana Pedro pamiyo tatsi**

(Mr 1.29-31; Lc 4.38-39)

<sup>14</sup>Jesús joniya Simón Pedro pia botha tatsi. Baraxota Jesús tane Pedro pamiyo tatsi xua camatha boca yawa xua domaebatsi. <sup>15</sup>Jesús cobe pita, barapowa cobe pitatsi. Domae taachurucuaetsi bapowa. Nainya barapowa nanta cotax-

uba. Bapoxonae bapowa pexaewa apata barapomonaetha.

**Meje yabara poxonae Jesús axaibi exana pin bicheitomonae**

(Mr 1.32-34; Lc 4.40-41)

<sup>16</sup>Poxonae tabopiya tsanaicha, ichamonae pomonae cauri xeina barapomonae Jesús becarendenatsi. Jesús pia jumetha itaweta caurimonae. Barichi Jesús axaibi exana daxita pomonae peatenewi. <sup>17</sup>Poxonae Jesús barapo coyenein exana, bara nayabara jume cui weta exana caena bayatha Isaías peyabara cui tsiwunaeya paebixae. Bapon Isaías Nacom peitorobi jume pepaebin. Bapon jeye Cristo yabara: “Bapon naca wenota wajuntu coyene bojeiwa. Matautano bapon naca wenota waatene coyenewan”, jei Isaías pejume diwesitha.

**Meje yabara poxonae Jesús yabara paeba pomonae ichichipa xua pepuna ponaewatsi**

(Lc 9.57-62)

<sup>18</sup>Poxonae Jesús tane xua pin bicheitomonae nacaetuta bapontha, bapoxonae bapon pijimonae itoroba xua icha muxunene beya peponaenexa tsane xua pucua epatauta iya. <sup>19</sup>Poxonae cataunxuae Jesusbaru jopa torobabiyaeyo xua icha muxunene beya nexa, bapoxonae Jesús imoxoyo caquita uncuatabatsi pon jiwu pecuidubin Moisés pia peitorobi coyene. Jesús baraichi:

—Pon jiwu Necuidubim, capuna ponaeinchi daxita jupaeyantha xua ichaxotan neponaewa tsane, jei.

<sup>20</sup>Jesús jume nota:

—Namomonae ba pia muthun xeina ichaxota pemaitathopeibiwa. Iru peyapupunaewi ba coton xeina, ichaxota peyamaitathopeibiwa. Ichitha nama xan ponxaein Nacom Tananeitapetsin nama jopa daichinyo. Nama jopa xeinaeyo

bo xua tabo xua xota nafinacaecan, jei Jesús.

<sup>21</sup>Bapoxonae ichun pon iru Jesús pijimonae jiwana bapon Jesustha namchi, jeye:

—Tanecanamataxeinaem, bara nepu copare tha taxa matha muthutha xubichi copiya xua bapoxonae tacapuna ponaewatsi tsainchi, jei.

<sup>22</sup>Jesús jume nota:

—Maisa jame nepuna ponde. Bara copare xua petupaewi bara muthucaeinchi, pomonae be pewerapaewi, jopa be tana nejume cowuntsiwixae, barapomonae muthucaena, jei Jesús.

**Meje yabara poxonae Jesús xainya ducuanaya exana joibo yawa maratsacano xainya mene ducuanaya exanano**

(Mr 4.35-41; Lc 8.22-25)

<sup>23</sup>Nexata Jesús jeratha nontabiya. Jesús pijimonae baru pona jeratha. <sup>24</sup>Bapoxonae jemeicha pin joibo naetaba mentha. Maratsacan jeratha mene othopa muxu pebunarecae. Dai-chitha Jesús maituncua. <sup>25</sup>Bapoxonae Jesús pijimonae yaubaxotsi, jeichichi Jesús:

—¡Pata Necanamataxeinaem, pana capanepare! ¡Yanabunarecatsi! jei Jesús pijimonae tatsi.

<sup>26</sup>Jesús jume nota:

—¿Eta pocotsiwa metha bichocono pajunuwame? ¿Cataunxuae jopa pana neyabara jume cowuntsim xua bara tana neitacupaewa xua tapaca yawenae-watsi? jei Jesús.

Nexata Jesús asiya uncu. Bapoxonae Jesús itawetaxuba joibo, marat-sacano. Daxita caewanaya joibo yawa marat-sacano. <sup>27</sup>Bapoxonae barapo pebiwi yabara najuntu coyene cabenae-carucupa xua pocotsiwa Jesús peexanaexae. Barapomonae najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dube-nanaya! najei barapomonaе.

**Meje yabara poxonaе pebinbe ponbe caurimonaе pexeinaeinbe, ponbe Gadara nacua pinbe**

(Mr 5.1-20; Lc 8.26-39)

<sup>28</sup>Poxonaе Jesús patopa pucua icha muxunene beya xua po nacua Gадara nacua, bapoxonaе pebinbe Jesús imoxoyo caquita uncuatabutsibe. Baponbe ibo wountha poponeibabe. Caena bayatha baponbe xeinabe caurimonaе. Barapo caurimonaе baponbe anaepana cana exanatsibe daxota daxita jiwі junuwa xua peponaewa barapo namtotha ichaxota baponbe poponabe. <sup>29</sup>Bapoxonaе jemeicha caurimonaе baponbe wawai exanatsibe, jeibe:

—Nacom Pexantom tatsim, ¿eta pocotsiwa metha patopame pata xantha? ¿Patopame jinya painya neperaxa exanaetsibe pewunaeya xua po matacabitha xua poxonaе Nacom atene pana exanaena xua abe pata exanaexae? jei baponbe xua caurimonaе wawaya exana.

<sup>30</sup>Tsiwiyo tajuyo beya pin marrano duweimonaе xayompa. <sup>31</sup>Caurimonaе Jesús jeichi:

—Icha pana itawetame, moya pana nepu copabare marrano duweimon-aetha, jei caurimonaе.

<sup>32</sup>Nexata Jesús jume nota caurimon-aetha, jeye:

—Moya pataema, jei.

Nexata caurimonaе pebinbe wepu ponatsibe, yawa marrano duweimon-aetha pata. Barapo marrano duweimonaе ducupa, pin pitapatororo othopareca. Pucuatha bunothopa. Caurimonaе cabunothopatsi.

<sup>33</sup>Pomonaе yapu eena barapo marrano duweimonaе, junuwiya cuinaenouta peyabara paebinexa tomarapiwitha. Barapomonaе yabara paeba daxita pocotsiwa Jesús cana exana marrano duweimonaetha yawano pocotsiwa Jesús cana exana ponbetha ponbe xua cauri pexeinaeinbe. <sup>34</sup>Bapoxonaе daxita tomarapiwi pona ichaxota Jesús eca. Poxonaе Jesús tainchi, barapomonaе Jesús jeichichi: “Maisa bewa warapaename Gадara nacua weya, po nacua pata nacua weya”, jei daxita barapomonaе.

**Meje yabara poxonaе Jesús axaibi exana pon pecuenobinchi**

(Mr 2.1-12; Lc 5.17-26)

**9** Nexata Jesús jeratha nontabiya. Jeratha pona icha muxunene beya xua pucua epatauta iya. Jesús pia tomara beya patopa, barapo tomara icha muxunenetha eca. <sup>2</sup>Baraxota pebiwi pata. Barapo pebiwi Jesús tacarendenatsi pon pecuenobinchi. Xua xota pocotsiwatha pemaiteibiwa, barapomonaе barapocotsiwatha pecuenobinchi carendenatsi. Poxonaе Jesús tane xua barapomonaе yabara jume cowanta xua bara Jesús peitacupaewatsi xua axaibi peexanaewatsi pon pecuenobinchi, bapoxonaе Jesús barai pecuenobinchi:

—Tajiton, najuntа coyene tsacatabare. Cacui yabara juntemainaya juntа puxana exanatsiba jinya abe neexanae cuiru coyenein, jei Jesús.

<sup>3</sup>Bapoxonaе pomonaе jiwі pecuidu-biwi Moisés pia peitorobi coyenewa tatsi, barapomonaе daxita carepaya pia coutha nanta xeina. Najei: “Maisa bapon bichocono abe tsipei pocotsiwa bapon paeba bichocono Nacom tsita ajumbetsi. Jiton dapocotsin aibi pon xua jiwі cacui yabara juntemainaya juntа puxana exanatsi abe pia peexanae cuiru

coyenein tatsi”, najei barapomonaē.  
<sup>4</sup>Daichitha Jesús yaputane xua barapomonaē pijüntu coyeneintha natsipaēba. Jesús barai barapomonaē, jeye:

—¿Eta xua metha baxua abeya pana neyabara cananta xeiname? <sup>5</sup> ¿Eta po jumetha baran tsane pecuenobinchi? ¿Metha jan tsane: ‘Jinya abe neexanaē cuiuru coyenein cata jüntemainatsi’, jan tsane? Ichacuiitha ¿metha jan tsane: ‘Nontaponare, yawa bara ponare’, jan tsane? <sup>6</sup>Daxota aunxuae paca tsita itapeinya xeinaeinchi xua xan ponxaein Nacom Tananeitapetsin, xua xeinan taayapusu itorobi coyenewa xua baratana neitacupaewa xua jiwi tayabara cacui jüntemainaya jüntu puxana exanaewa abe pia peexanaē cuiuru coyenein tatsi pomonaē jinompa barapo cae pinacuathe, jei Jesús.

Bara nexata pecuenobinchi Jesús barai, jeye:

—Catsipaebatsi nontaponde. Jinya nemaituncuaewa pire. Jinya bo be-iyande, jei Jesús.

<sup>7</sup>Bapoxonaē pon pecuenobinchi caena nainya nontapona barapomonaē peitutha tatsi, yawa pita xua pemaituncuaewa. Bapoxonaē pia bo be-iya. <sup>8</sup>Poxonaē jiwi tane baxua, barapomonaē yabara najüntu coyene cabenaeca yawa Nacom wunaē jaintatsi. Barapomonaē nabarai:

—Anoxuae waxainchi tainchi pocotsiwa pewunaewa pocotsiwa jopa yaputaetsi, yawa wunaē jaintatsi xua Nacom barapo jitontha pecatsixae pia peayapusu itorobi coyenewa, jei barapomonaē.

**Meje yabara poxonaē Mateo wabatsi, Jesús waba**

(Mr 2.13-17; Lc 5.27-32)

<sup>9</sup>Jesús bara weya pontaba ichaxota axaibi exana pon pecuenobinchi. Bapoxonaē Jesús tane pebin pon pewun Ma-

teo. Bapon eca ichaxota bapon paratixi matoma noteibeca po paratixi jiwi bewa catsibina pon romanomonaē itorobiya pia pepa peewatsinchi nexa. Jesús Mateo baraichi:

—Nepuna ponde, jei Jesús.

Bapoxonaē Mateo caena nainya nontapona yawa napuna pona Jesustha.

<sup>10</sup>Pirapaeyo Jesús baru ecatsi, Mateo baru eca pia botha pexaethopeibiwatha xua Jesús pebaru xaenexatsi. Barichi Jesús baru eca pinmonaē barapo pexaethopeibiwatha pomonaē paratixi pentoma noteibiwi po paratixi jiwi bewa catsibina pon romanomonaē itorobiya pia pepa peewatsinchi nexa. Iruru Jesús baru eca ichamonaē pomonaē abe peexanaē cuiuru coyenein peexanaewi. Daxita barapomonaē Jesús baru eca pexaethopeibiwatha yawa Jesús pijimonaē baru ecano penabanaenexa. <sup>11</sup>Ichitha poxonaē fariseomonaē tane xua Jesús dacotsiwa baru eca, barapomonaē namchi. Jesús pijimonaē tatsi baraichi:

—Maisa Jesús abe exana poxoru baru xayeca pomonaē paratixi pentoma noteibiwi. Matautano, baru xayeca pomonaē abe peexanaē cuiuru coyene peexanaewi, jeichichi Jesús pijimonaē tatsi barapo fariseomonaē.

<sup>12</sup>Poxonaē Jesús baxua jume tane, bapon Jesús namchi barapomonaetha:

—Pomonaē ba xaniwaicha jinompa xua jopa ateneyo barapomonaē ba jopa canantawenonaeyo pon jiwi peyawubin. Saya jame meisa pomonaē ba atene barapomonaē jame canantawenona pon jiwi peyawubin. Bara juta coyene ichi barapomonaē pomonaē nebaru xane. Barapomonaē nenantawenona xua tayabara cui jüntemainenaē abe pia peexanaē cuiuru coyenein tatsi. <sup>13</sup>Panacuidubaponde xua Nacom Pejume Diwesi paēba. Meje xua Nacom namchi, jeye: ‘Ichichipan xua jiwi nantanuweya peyabara nanta xeinaewa

ichamonaetha xua peyawenaewa tsane. Baxua jame ichichipan beyacaincha xua ichichipan po cui coyene xua jiwi duwei petautsiwa xua tuxusi exana xan nexa', jei Nacom. Barichinno xan patopan apara tha jopa tawabinexa tsane pomonae pejuntũ coyene xanepanaewi. Apra jame patopan tha meisa tawabinexa tsane pomonae peajuntũcoyenebe jiwi, xua barapomonae icha jũntũ coyene pexeinaenexa tsane peauraxae xua abe exana, jei Jesús.

**Meje yabara poxonae Jesús yabara yainyabatsi po coyene xua Nacom peyabara nainbotsiwatsi**

(Mr 2.18-22; Lc 5.33-39)

<sup>14</sup>Nexata Juan pon jiwi Pebautisabin, bapon pia pepuna jinompaewichi barapomonae pata Jesús pia xantha tatsi. Barapomonae Jesús yainyabatsi, jeye:

—Apra paxan irũ fariseomonaerũ jopa juniya Nacom payabara nainboteibinyo poxonae Nacom pawũqueiban. ¿Eta xua metha jinyamonae daxua jopa cou daichiyo, saya cou ƚ penabaneibi? jei barapomonae pomonae Juan pia pepuna jinompaewichi tatsi.

<sup>15</sup>Jesús jume nota barapomonae:

—Jiwi ba jopa bewa wecoyeya yabara nainbotsi poxonae ichamonae pexaewa tsinacaetuta penabanaenexa xua poxonae pebin pecotsiwa pita. Poxonae cataunxuae awiya bapon eca pexaewa penabanaewatha, bapoxonae jiwi ba peburũya nabane, jopa bewa yabara nainbotsi tsane. Ichitha icha pon aena piowa pita, caena nainya waetabatsi, ichamonae waetaba xua bapon tajũ pecapon-aenexatsi, bapoxonae jame jiwi ba bewa wecoyeya yabara nainbotsi xua equeicha bapon caewa pepatopaewa tsane.

<sup>16</sup>“Jiwi ba jopa exanaeyo xua pena paparuwa tsiwiyo jiwana

caxinaxubeta po paparuwa cataunxuae jopa matanaxubiyo, xua barapo paparuwa pewan botsinexa peru dorouto. Icha baxua exanaetsipa xua pena paparuwatha wan bota peru doroutotha, bapoxonae barapo dorouto abe tsipae. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanaena barapo dorouto. Bapoxonae equeicha nama bichocono pin wan tsanaya beyacaincha xua poxonae copiya. <sup>17</sup>Mataũtano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba yawa barapo bocoto naxuba poxonae barapo bocoto tsitsica. Daxota bewa jame pena vino mera eparecae pena bocototha. Bapoxonae pena vino mera jopa naxubiyo, yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

**Meje yabara xua poxonae Jairo pexantiyo taaxaibi exanatsi, yawa yabara xua bapoxonae icha yabũyo irũ axaibi exanatsi poxonae Jesús pia paparuwa tajayabatsiru**

(Mr 5.21-43; Lc 8.40-56)

<sup>18</sup>Poxonae cataunxuae Jesús cueicuei-jei barapomonaetha, bapoxonae pebin patopa. Bapon judiomonaetha pia penacae-tutsi bo pia pecanamataxeinaein tatsi. Bapon pewũn Jairo. Jesús petaxutha irabe tatayecarecatsi. Bapon baxua exana tsipei Jesús pon ainya cui peexanaeinchi. Bapon namchi Jestustha:

—Taxantiyo anoxuaetha inta tũpa. Icha xam ponaename yawa necobetha mata jayabiname, bapoxonae barapowa

equeicha asu tsane xua equeicha nacosatsina, jei Jairo.

<sup>19</sup> Jesús bapoxonae nontapona. Jairo puna poinchi. Iru Jesús pijimonae puna poinchi. <sup>20</sup> Poxonae Jesús iya iru yabuyo Jesús imoxoyo caquita poinchi. Barapowa caena bayatha be yadoce po weyobe jopa xua pentabu janatha boca xua be nantawane. Barapowa Jesús pia paparuwa xainyowa tajayaboinyatsi. Bapowa paparuwa tajayaba xua peopirawa xua Jesús pia penamaxatatsiwa tatsi. <sup>21-22</sup> Baxua exana tsipei bapowa nanta xeina, jeye: “Icha pia paparuwa tajayabin bapoxonae axaibin tsane”, jei bapowa.

Poxonae bapowa Jesús tajayabatsi pia paparuwa, bapoxonae caena jüntubu jana naruntaba.

Nexata Jesús napatomeicha necota, yawa yabuyo tainchi. Jesús namchi bapowatha:

—Yabuyo, najüntemiya xore. Caaxaibi exanatsi jinya tana neyabara jume cowuntsixaem xua bara tana neitacupaewa xua tacaaxaibi exanaewatsi, jei Jesús.

<sup>23</sup> Jesús equeicha pona. Poxonae Jesús patopa pecanamataxeinaein pia bo tatsitha, bapoxonae Jesús tane xua pebiwi oba tsipei yabuyo bayatha tupa. Barapo pebiwi pomonae pecapu obiwi pewerapebiwi. Matautano Jesús tane pomonae pesiwa namtsebiya wecoyei jiji. <sup>24</sup> Jesús namchi jiwitha:

—Tutu weya paponde. Yabuyo apara jopa tupaeyo, maituncua apara, jei Jesús.

Poxonae Jesús baxua paeba, jiji Jesús jume cui caponatsi. <sup>25</sup> Ichitha Jesús itoroba xua barapomonae tutu wejoniya pesato beya. Bapoxonae Jesús bo tutu joniya. Jesús cobe pita, yabuyo cobe pitatsi yawano asiya cuaranotatsino penacosatsixae. <sup>26</sup> Xua Jesús yabuyo axaibi exanatsi, barapo diwesi daxita jiji jume

taetaepona pomonae barapo nacuatha jinompa.

**Meje yabara poxonae Jesús  
axaibi exana ponbe  
nantiyabe itata nacutabe**

<sup>27</sup> Poxonae Jesús bara weya pona ichaxota yabuyo caewa asu exanatsi, pebinbe Jesús puna poinchi. Baponbe peitata nacutsinbe. Baponbe wawaya jeibe:

—Xam Jesús, David pia pemomoxi susatopin jiwanam ponxaem Nacom necaitapetsin pana neyabara najüntu coyene xeinarebe xua pata tana neyawenaenexamebe, jeibe baponbe ponbe peitata nacutsinbe.

<sup>28</sup> Poxonae Jesús bomuxu bejoniya, ponbe peitata nacutsinbe Jesús imoxoyo caquita poinchibe. Jesús yainyaba baponbetha:

—¿Bara pana neyabara jume cowuntamebe xua bara tana neitacupaewa xua axaibi tapaca caexanaewatsibe? jei.

Jume notabe:

—Aja, pata Tanecanamataxeinaem, bara paca cui yabara jume cui cowuntatsibe, jeibe.

<sup>29</sup> Bapoxonae Jesús itamaiquei jayababe baponbe. Jesús namchi baponbetha, jeye:

—Icha pana necui yabara jume cowuntamebe xua bara tana neitacupaewa xua axaibi tapaca exanaewatsibe bara baxua pacata exanaeinchibe xua axaibi paca exanaeinchibe, jei Jesús.

<sup>30</sup> Bapoxonae caena nainya aitamaiqueixaibibe. Jesús jume daunweya baraibe baponbe, jeye:

—Jopa pana necui yopichindebe ichamonaetha xua pacata exainchibe baxua, jei Jesús baponbetha.

<sup>31</sup> Daichitha poxonae Jesús weya ponabe, pejume taewathabe xua Jesús paeba, tsipaebabe ichamonaetha pomonae barapo nacuatha jinompa,

daxita pocotsiwa xua Jesús cana exana baponbetha.

**Meje yabara poxonae Jesús axaibi exana pon pemuxusipanaein**

<sup>32</sup> Poxonae Jesús bo wejoniya iruru ponbe aitamaiqueixaibi exanatsibe, bapoxonae ichamonae Jesustha pata. Barapomonae capona pebin, pon muxusipana, matautano jopa paebiyoy, tsipei cauri xeina. <sup>33</sup> Bapoxonae Jesús itaweta cauri xua barapo pebin muxusipana exainchi. Caena nainya bapon cueicueije. Nexata pomonae xua tane xua Jesús exana, barapomonae yabara najuntu coyene benaeca. Barapomonae namchi, jeye:

—Jopa bapana taetsi Israel nacuatha icha be ichi pocotsiwa Jesús exana, jei barapomonae.

<sup>34</sup> Ichitha poxonae fariseomonae jume tane baxua, barapomonae namchi Jesús yabara, jeye:

—Barapon caurimonae itawetatsi tsipei xeina caurimonae pia pentacaponaein tatsi pia peayapusu itorobi coyene tatsi, jei fariseomonae.

**Meje yabara poxonae Jesús nantanuweya yabara cui nanta xeina jiwu xua peyawenaewa tsane**

<sup>35</sup> Jesús pona daxita pin tomarantha yawa po tomaraxi tsiqui tomaraxitha. Bapon cuiduba ducuaeta judiomonae pia penacaetutsi bontha tatsi. Matautano bapon paeba ducuaeta Nacom pia pexeinya jume diwesi tatsi po diwesi yabara xua Nacom waba jiwu petanaexanaenexatsi piamonae pomonae Nacom juntu coyene itorobiya ewata. Matauta bapon jiwu axaibi exana ducuaeta pomonae xua atene yawa xua cuenecuenona. <sup>36</sup> Poxonae Jesús jiwu tainchi, Jesús yabara nanta xeina barapomonae xua peyawenaewa tsane. Tsipei barapomonae natsepa

matautano jopa itacupaetsi xua pia coutha penayawenaewa. Barapomonae bara be juta coyeneya ichi, icha be ovejamonae ichi xua poxonae iratha bobena tsipei natsepa matautano tsipei dapon aibi, pon pe-enaeney ovejamonae xua peyawenaenexa. <sup>37</sup> Nexata Jesús namchi pijimonaetha:

—Bara xainyeya paca tsipaebatsi. Pabitha ba pocotsiwa peubiwanaweta nawita, daichitha ba penacuichiwi pomonae jota pinmonae aibi. Bara juta ichi barapo cae pin nacuathe. Jiwi pinmonae jinompa pomonae nantawenona xua pejume taewa tsane Nacom pia pexeinya jume diwesi tatsi. Daichitha pomonae Nacom Pejume Diwesi cueicueije tsurubenanaebiya ichamonaetha, barapomonae pinmonae aibi, saya tsiquimonaeyo. <sup>38</sup> Daxota Nacom pawucare xua peacitorobinexa tsane ichamonae xua petacamuxu tsipaebinexa tsainchi pia pejume diwesi pomonaetha pomonae barapo cae pin nacuathe pejinompaewi, jei Jesús.

**Meje yabara poxonae Jesús itapetsiya waba pia peitorobiwi tatsi xua doce poyobe**

(Mr 3.13-19; Lc 6.12-16)

**10** Nexata Jesús pijimonae waba. Barapomonae jiwana itapetatsi doce poyobe, pomonae baraichi: “Jesús pia peitorobi jiwu tatsi”, jeichichi. Jesús barapomonae cata pia peayapusu itorobi coyenewa xua cauri ichamonae petaitawetsinexatsi pomonae xua cauri xeina. Matautano Jesús cata pia peayapusu itorobi coyenewa xua pijimonae tatsi axaibi peexanaenexa pomonae xua atene, xuano xua cuenecuenona.

<sup>2</sup> Barapomonae pomonae doce poyobe pomonae peitorobiwichi, ichun pewun Simón, pon icha wanno “Pedro” baraichi. Iru ichun pewun



Andrés, pon Simón peweicho tatsi. Iru ichun pewun Santiago. Iru ichun pewun Juan, pon Santiago peweicho tatsi. Baponbe Zebedeo pexantobe tatsi. <sup>3-4</sup>Iru ichun pewun Felipe, iru ichun pewun Bartolomé, iru ichun pewun Tomás, iru ichun pewun Mateo. Barapon Mateo pon paratixi pentoma notebin po paratixi jivi bewa catsibina pon romanomonaе itorobiya pia pepa peewatsinchi nexa. Iru ichun pewun Santiago, pon Alfeo pexanto tatsi. Iru ichun pewun Tadeo. Iru ichun pewun Simón, pon celotemonaepin. Iru ichun pewun Judas Iscariote, pon Jesús caenaetaxubatsi ichamonaetha xua pebexubinexatsi.

**Meje yabara poxonaе Jesús itoroba pijimonaе xua barapomonaе peyabara cueicueijeinexa jiwitha po coyene xua Nacom waba jivi xua petanaexanaenexatsi pijimonaе tatsi**

*(Mr 6.7-13; Lc 9.1-6)*

<sup>5</sup>Barapo doce poyobe Jesús itoroba, Jesús jeye:

—Jopa paponaeinde po nacua ichaxota jinompa pomonaе jopa judiomonaе naexanaeyo. Jopa paponaeinde po tomaran ena Samaria nacuaetha. <sup>6</sup>Meisa saya paponde pomonaе Israel nacuamonaepiwitha. Barapomonaе payawende tsipei barapomonaе Nacom tajũ wepu jinompatsi xua pipato jinompa. Icha be pocotsi juta coyeneya ichi oveja, barapo ovejamonaе napuxana poxoru wepu pona tajũ beya, xua pon pe-eenaеin barapo ovejamonaе bapon tajũ wepu poinchi icha xua poxonaе napuxana. <sup>7</sup>Poxonaе papaeba dubenanaebiyame, papaebare barapomonaetha po coyene xua anoxuae Nacom waba jivi xua petanaexanaenexatsi piamonaе pomonaе itorobiya peewatsixae. <sup>8</sup>Matautano Nacom pia peayapusu

itorobi coyenewatha po coyenewe meje baxua paexande: Axaibi paexande pomonaе peatenewi; equeicha asũ paexande pomonaе werapeibina; axaibi paexande pomonaе xua peperũ sawichimonaе; matautano caurimonaе pata taitawere pomonaе caurimonaе pexeinaewi. Nacom amanaxa paca cata barapo pia peayapusu itorobi coyene, daxota poxonaе jivi payawenaxa Nacom pia peayapusuwatha, jopa jivi paratixi pawucaеinde.

<sup>9</sup>“Jopa pacaponaeinde paratixi xua poxonaе painya newarapaenexa. <sup>10</sup>Jopa pacaponaeinde cote xua painya nejeyaenexa paparuwan poxonaе pawarapame. Saya cae camisa panama xatabare, jopa icha camisa pacaponaeinde. Matauta jopa pacaponaeinde ichawan xua painya nenataxu xatabiwan, yawa icha iwaton jopa pacaponaeinde. Painya xoba paauram xua poxonaе jivi paca catsibeibina tsipei baraxua pocotsiwa paca cata apara bara painya matoma painya netanacuichixaemxae Nacom.

<sup>11</sup>“Poxonaе papanenebiyam pin tomaratha, ichacuitha tsiqui tomariyotha, pajeire pon jivi barũ cui itura jina xuano xua paca tsiwaba pia botha tatsi pia paca apatsinexa tsane. Bapon pia botha tatsi painya nepu enaeinde beya tsane poxonaе barapo tomara weya pawarapaenaxa. <sup>12</sup>Poxonaе bomuxutha pajojoniyame, barapo bopiwi pajacobare, pajande: ‘Barabũ Nacom jũntema jinompa paca cana exanaena’, pajande. <sup>13</sup>Icha baxota jinompa pomonaе pomonaetha jivi barũ cui itura jina, bara baxua Nacom barapomonaе taexanaeinchi pocotsiwa papaebame. Ichitha icha baxota jinompa pomonaе pomonaetha jopa jivi barũ cui itura jinaeyo, baxua Nacom jopa taexanae tsane pocotsiwa papaebame barapomonaetha.

Equeicha caewa pacata parenana xua pocotsiwa papaebame. <sup>14</sup>Ichitha icha icha tomarapiwi jopa paca matenta weyataeya wabiyo yawano icha jopa xapain paca jume naitaewatsiyo, nexata bapoxonae panatsixibare. Namto beya paponde xua bomuxu weya xua ichacuiitha icha tomara weya. Po tsorobo painya taxutha dubena pana nataxu wenunubabare barapo tomaratha. Poxonae baxua paexaname patsita itapeinya xeinaename, apara xua barapomonae abe exana painya xainya berena xua poxonae barapomonae paca jume itaweta. <sup>15</sup>Bara xainyeya paca tsipaebatsi matacabi patopaena, po matacabitha Nacom yabara paebina jiwi petsita natsicuentisixaetsi xua abe petsita exanaexaetsi. Barapo matacabitha jopa juniya bichocono atene tsane pomonae paca jume itaweta. Caena bayatha Sodoma tomarapiwi iru Gomorra tomarapiwi bichocono abe exana. Daxota Nacom atene exanaena barapo tomaramonaebe. Bara bequein Sodoma tomarapiwi atene matauta iru Gomorra tomarapiwi bequein atene tsipei bichocono abe exana barapomonae. Ichitha nama pomonae barapo tomaratha jinompa, pomonae paca jume itaweta, jopa juniya peraxa jubebi tsainchi, beyacaincha poxonae Sodoma tomarapiwi yawa Gomorra tomarapiwi peraxa jubebatsi”, jei Jesús.

**Meje yabara poxonae Jesús yabara  
paeba xua ichamonae abe  
exanaena Jesús pijimonaetha tatsi**

<sup>16</sup>Equeicha Jesús jeye: “Paponde ichaxota paca itorobatsi. Paca caitorobatsi pia xainya beya pomonae jopa pejume cowuntsiwi, pomonae itacupatsi xua abe painya nepaca exanaewa, icha ovejan ichi xua poxonae pona ichaxota neuthu jinompa xua itacupatsi xua abe peexanaewatsi.

Paxam pananthuthu cui wunaetsiya tsaquiya jinompare, tsipei ichamonae beya paca pepeichipa. Baxua bara paichinde icha jomo ichi xua peita coxonaein poxonae waxouto cuitaya naetsiriwatsi. Paxam bara jutiya jopa paichim tsane jopa ichamonae abe paexanaeinde, icha topiboto ichi xua anaepana jopa nanta xeinecaeyo xua juntema yapoponeca. <sup>17</sup>Paxam dota pam, dota pomonae peajuntucoyenebe jiwi. Barapomonae paca teicaena pepaca caponaenexa tsane pomonaetha pomonae tomaran pentacaponae. Bapoxonae barapomonae paca cuainchina judiomonae pia penacaetutsi bontha tatsi. <sup>18</sup>Matauta barapomonae paca caponaena pomonae peyanacua ewatsi jiwi peitabaratha tatsi. Matauta paca caponaena pomonae jiwi itorobiya pia pepa peewatsiwichi pia peitabaratha tatsi. Baxua paca cana exanaena painya tana nejume cowuntsixaemxae. Daichitha barapo pentacaponae peitabaratha tatsi paca itacupaena xua pata neyabara paebiwani pocotsiwa bayatha tapacata exanaewatsi paxam. Matautano paca itacupaena xua pata neyabara paebiwani pomonae jopa judiomonae naexanaeyo peitabaratha tatsi. <sup>19</sup>Ichitha poxonae paca caponaena pentacaponae beya, jopa payabara najuntu coyene exabinde pocotsiwa xua painya nejume notsiwa tsane barapomonaetha. Nama Nacom paca tsijume dubina po jume xua painya necaunutsiwam tsane. <sup>20</sup>Tsipei beta jopa papaebimchipae painya coutha, ichitha Nacom pia Pejumope tunaxu tatsi paca tsimuxu cueicueijei tsane. Bapon paca catsina po jumetha xua patsipaebiname.

<sup>21</sup>“Jiwi caenaetsina barompaya peweicho jiwi ichamonaetha xua ichamonae pejutebinxaxa tsane. Iru coxiyeiwi ichamonaetha caenaetsina

pia pexui xua ichamonae pejutebinexa tsane. Iru pexui paxeiwi caenaetsina ichamonaetha xua ichamonae pejutebinexa tsainchi. <sup>22</sup>Daxita nacuanpiwi paca casebina painya tana nejume cowuntsixaemxae. Ichitha icha awiya paantuyapusya nejume cowuntsiya jinompaename xua beya payacuiya werapaeya othopaename, poxonae bequein abe pacata exana ichamonae Nacom napaeba paca cana exanaena. <sup>23</sup>Icha cae tomarapiwi paca abe exanaena, parucupare icha tomara beya. Bara xainyeya paca tsipaebatsi xua xan ponxaein Nacom Tananeitapetsin, equeicha patopeicaein beya abu poxonae cataunxuae jopa panacui wetsim tsane xua paponame daxita israelmonae pia nacua tomarantha tatsi, xua papaeba dubenanaebiyame Nacom Pejume Diwesi.

<sup>24</sup>“Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaein. Matauta pon ba petanacuichin jopa ainya cuiyo, jopa be bapocotsinyo pon xua peitorobixaetsi pon pia pecanamataxeinaeinchi tatsi. <sup>25</sup>Pon ba penacuidubin bewa nanta xeinae, bewa najei: ‘Maisa ichamonae inta abe exanatsi pon tana necuidubin. Metha bara neichi tsane’, bewa najei. Iru pon ba tanacuita pia pecanamataxeinaeinchi bewa najei: ‘Maisa ichamonae inta abe exanatsi pon tanecanamataxeinaein. Metha bara neichi tsane’, bewa najei. Icha pocotsi coyeneya baponbe ichi poxonae baxua nayabara nanta xeinabe, bara pocotsi coyeneya paca cana ichiya exana jiwi icha poxonae neyabara ichiya namchi. Tsipei jiwi abe neyabara paeba xua jeye: ‘Maisa bapon Beelzebú tsecae pon caurimonae pia pentacaponaein tatsi’, jei. Matauta paca yabara jei tsane: ‘Maisa barapomonae Beelzebú pi-

jimonae tatsi po Beelzebú caurimonae pia pentacaponaein tatsi’, paca yabara jei tsane”, jei Jesús.

**Meje yabara poxonae Jesús  
yabara paeba xua pontha bewa  
ba jiwi cuitaya cunuwina**

(Lc 12.2-7)

<sup>26</sup>Equeicha Jesús jeye: “Jopa jiwi pacunuwinde xua tapan neyabara paebiwam. Tsipei daxita diwesin, xua po diwesin bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonae bexa yaputaeponaena baxua. <sup>27</sup>Tsipei daxita baxua xua nameicha paca tsipaebatsi, baxua xuya patsipaebare jiwi. Po diwesi xua merawi paca tsipaebatsi, barapo diwesi xuya ichamonae mataqueitha patsipaebare. Po diwesi xua paxapaxeya paca tsipaebatsi, barapo diwesi xuya panatha pana nejume canawabiya wawande. <sup>28</sup>Tamonae pam, paca tsipaebatsi, jopa pacunuwinde pomonae itacupatsi xua paca jutebina xua saya meisa painya pepontha. Ichitha barapomonae jopa itacupaetsi xua equeicha paca jumopein tunaxu jutebina. Jame paca tsipaebatsi pon jame bewa pajume cuitaya cunuwim bapon apara jame Nacom. Tsipei barapon Nacom itacupatsi xua paca bebai pin isototha po pin isototha jopa bapana itacounayiyo xua weraweraca painya nepaca exanaenexa painya pepon yawa painya nejumope tunaxu.

<sup>29</sup>“Jiwi ba caenaeta sito dos poyobe, saya cae paratiyotha nantomata. Bequein barapo sitobe caenaeta jiwi xua jopa matoma nautsiyo, poxoru saya sito, ichitha painya Axa Nacom yaputane yawa copata poxonae barapo sitobe jiwana iratha yajopeica xua yatupa. <sup>30</sup>Nacom daxita carepaya jopa juniya paca yabara yaputaeyo, daxota paca matana yaputane xua panta-

natiyobe painya nexeiñawa. <sup>31</sup> Jopa pajunuwinde tsipei paxam bichocono Nacom patsita ainya cuim, beyacaincha siri”, jei Jesús pijimonaetha.

**Meje yabara poxonae Jesucristo  
yabara paeba xua pomonae  
peyabara paebiwichi  
ichamonae peitabaratha tatsi**

*(Lc 12.8-9)*

<sup>32</sup> Equeicha Jesús namchi: “Yabara paca tsipaebatsi pomonae xua nayopita ichamonaetha pomonae xua najei: ‘Apara paxan Jesús pijimonaetha tatsi pan’, najei. Barichi xan xuya jan tsane Nacomtha: ‘Barapomonae apara tana nejume cowuntsiwi’, jan tsane xuya barapo Nacom peitabaratha pon Taxa, pon peitabocotha peecaexae. <sup>33</sup> Ichitha pomonae xua neyabara jei ichamonaetha: ‘Jopa bapon yaitaeyino’, jei, xan xuya barapomonae yabara jan tsane: ‘Apara barapomonae jopa yaitaeyino’, jan tsane xuya Taxa beicha, pon peitabocotha peecaexae”, jei Jesús.

**Meje yabara poxonae Jesús yabara  
paeba xua jiwi ainya bicheiton  
naexanaena xua Jesús pejume  
cowuntsixaetsi xua ichamonae jopa  
pejume cowuntsixaetsiru**

*(Lc 12.51-53; 14.26-27)*

<sup>34</sup> Equeicha Jesús namchi: “Jopa pananta xeinaeinde xua patopeican saya meisa xua jiwi junteña jinompa tacana exanaewa tsane. Jopa baxua tsipatopaeinyo. Apara jame tsipatopeican taexanaenexa po coyene jiwi naba exanatsi xua daxota ainya bicheiton penaexanaenexa. Pomonae jopa nejume cowuntsiyo ita aenae-aenei pomonaetha pomonae tana nejume cowuntsiwi. <sup>35</sup> Coxian pexanto ita aenae-aenei tsainchi. Iru coxiwa pexantiyo ita aenae-aenei tsainchi. Iru ru ichowayo pecopeinyo ita aenae-aenei

tsainchi. <sup>36</sup> Daxota pebin barompaya piamonae penaaiftaetabi jiwi nacana exanatsi.

<sup>37</sup> “Pon antobe paxa yawa pena beyacaincha xua neantobe bapon jopa naexanae tsane pon tajiwiwimonae jiwapanin. Pon antobe pexanto beyacaincha xua neantobe, bapon jopa naexanae tsane pon tajiwiwimonae jiwapanin. Yawa pon antobe pexantiyo beyacaincha xua neantobe bapon jopa naexanae tsane pon tajiwiwimonae jiwapanin. <sup>38</sup> Matautano pon jopa awiya exana ducuanae-biyaeyo pocotsiwa itoroban, tsipei jopa be peraxa exanaetsi icha be xua poxonae neichi nexata bapon jopa tajiwiwimonae aepinyo. <sup>39</sup> Pon naantobeya nata exana pocotsiwa bapon ichichipa bapon jopa xeinaeyo peajuntuyapuswa, po peajuntuyapuswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan taneantobexae bapon xeinaena peajuntuyapuswa, po peajuntuyapuswa ataya tsiteca xua Nacom pia nacua beicha”, jei Jesús.

**Meje yabara poxonae Jesús  
yabara paeba xua pocotsiwan  
peyabara cui matomatsiwa**

*(Mr 9.41)*

<sup>40</sup> Equeicha Jesús namchi: “Pon xua paca matenta weyatane pia tana neyabara jume taenexa tsane pocotsiwa papaebiname, barapara bapon yawa neweyataneru. Barapon pon xua neweyatane, barapara matautano weyataenaru xua weyainchi pon xua tana neitorobixae, bapon Nacom. <sup>41</sup> Pon cueicueijejei Nacom pia peitorobi jume diwesi, Nacom bapontha catsina pia peyabara cui matomatsiwa tsipei barapon pon barapo peitorobi jume pepaebin Nacom tanacuitatsi. Po peyabara cui matomatsiwa catatsi pon Nacom peitorobi jume pepaebin

Nacom barichi tsane jupa catsina pontha pon matenta weyatane, xua matenta weyatainchi pon Nacom pia peitorobi jume pepaebin. Matauta iru pon xua pejuntu coyene xeicaein bapontha Nacom catsina peyabara cui matomatsiwa tsipei bapon xanepanaya popona Nacom nexa. Nacom barichi tsane jupa catsina pontha pon matenta weyatane xua matenta weyatainchi pon pejuntu coyene xeicaein. <sup>42</sup>Pon xua apatsina tajiwimonae jiwana pintha bequein jopa matowa apatsiyo mera xua bequein cae corotiyo xua ameneque, daichitha Nacom bapontha catsina pia peyabara cui matomatsiwa tsipei bapon tajiwimonae jiwapanin yawenatsi”, jei Jesús.

**Meje yabara poxonae Juan pon jiwi Pebautisabin itoroba pijimonae Jesús beya, peyainyabinexa tsainchi Jesús**

(Lc 7.18-35)

**11** Jesús najume weta xua pijimonae muxuwetsiya cuiduba, po jiwimonae tatsi xua doce poyobe tatsi. Bapoxonae Jesús bara weya natsixitaba xua tomarantha peponaenexa po tomaran ena barapo nacuatha xua jiwitha pecuidubinexa Nacom pia pexinya jume diwesi tatsi.

<sup>2</sup>Juan pon jiwi Pebautisabin, bapon jiwi pecubi botha etatsi. Poxonae cataunxuae jiwi pecubi botha eca, bapon jume tane xua juinya Cristo exana. Bapoxonae Juan itorobabe Jesús beya ponbe pia pepuna jinompaewichi jiwanaabe tatsibe xua petayainyabinexatsibe Jesús beya. <sup>3</sup>Barapomonae Jesús yainyabatsi xua Juan najume caruta, xua jei:

—¿Metha bara xaniwaicha xam baponda, pon bewa patopaena pon Mesías? ¿Ichacuitha metha bara ichun pawnae ewatan jampa? jei baraponbe xua Juan najume caruta.

<sup>4</sup>Jesus jume nota baraponbe, jeye: “Papondebe, matauta Juan patsipaebarebe xuaunxuae pocotsiwa pana necui tanemebe, matautano xuaunxuae pocotsiwa pana nejume tanemebeno. <sup>5</sup>Matautano patsipaebarebe xua pomonae peitata nacutsi jiwi equeicha tane, matauta xua pomonae pejayujayujeiwi beta pona equeicha, matautano xua pomonae peperu sawichimonae equeicha peru wnae, matauta pomonae xua pemuxusipanaewi equeicha muxu nasaba, matauta pomonae xua pewerapaewi equeicha asu tsane. Matauta pomonae xua peacopeibi jiwi jume tane Nacom pia pexeinya pecapanenebiyae diwesi jume. <sup>6</sup>Patsipaebarebe Juan xua xan janje: ‘Juntu coyene weiweinaena pon jopa ainya unthuthunyo, pon xaniwaicha neyabara jume cowunta’, xua jan”, jei Jesús.

<sup>7</sup>Poxonae Juan pia penacana jume caitorobinbe tatsi ponatababe, bapoxonae Jesús tamropata pitaba xua yabara paeba jiwitha xua Juan yabara paebatsi, jeye: “Ira xuepana susato tsurucuae nacuatha paponame. Poxonae bara beya poponame, ¿eta xua painyatsi, painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. <sup>8</sup>Bara paichim. Paponame ¿painya nejumetaenexa pebin pon peitupanae paparuwa nama xatata? Jume apara. Payaputaneme pomonae peitupanae paparuwan nama xataba, barapomonae ba jinompa pexeinya bontha pomonae jiwi itorobiya pia pepa peewatsiwixaetsi. <sup>9</sup>Jume. Jopa baxua patsipon-aem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponame

xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwana pin beyacaincha ichun pon Nacom peitorobi jume pepaebin. <sup>10</sup> Juan bapon apara, pon yabara paebatsi Nacom Pejume Diwesitha poxonae Nacom netsipaeba, nejei:

‘Catsiwanae itorobinchi copiya pon tana nacajume carutsin.

Barapon juntu cui wunaetsina jiwi xua daxita

jiwi najuntu cui wunaetsina xam nexa, xua

necantenta weyataeya wabinexa poxonae

patopaename’, nejei Nacom Pejume Diwesitha.

<sup>11</sup> Bara xaniyeya paca tsipaebatsi xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonae jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicuejei po coyene xua Nacom itorobina jiwi. Ichitha po diwesi xua tamonaeanoxuae paeba barapo diwesi bichocono ainya cui diwesi beyacaincha xua Juan cueicuejei, bequein jiwi nanta xeina xua tamonaeanoxuae jopa ainya cui jiwi.

<sup>12</sup> “Juan pon jiwi Pebautisabin, poxonae bapon tamropata pitaba xua cueicuejei Nacom Pejume Diwesi xua beya anoxuae pin bicheitomonae nejume cowanta pia penaexanaenexa Nacom piamonae tatsi. Barapomonae pichichi xua penaexanaewa Nacom piamonae tatsi pomonae Nacom itorobiya peewatsixae bequein ichamonae ayapube taexana barapomonaetha. <sup>13</sup> Daxita po petinae diwesi Nacom peitorobi jume pepaebiwi tina iruru Moisés pia peitorobi coyenewa tatsi barapo naxobe

peitorobi coyenewathabe yabara tsiwunaemuxu dutsiya paeba. Barapo peitorobi coyenewabe yabara paeba xua bexa tsane jopaena matabi po mataqueitha xua Nacom juntu coyene itorobiya canamataxeinaena jiwi. Matapainya Juan patopa. Bapoxonae iru Nacom tamropata pitaba xua exana pocotsiwa bayatha yabara tsiwunaemuxu duta. <sup>14</sup> Icha paxam xaniwaicha paichichipame xua payabara jume cowuntame xua pocotsiwa barapomonae bayatha yabara paeba, bapoxonae barapanejume cowuntsiname xua paeban, xua jan: ‘Apara Juan bapon Elías pon caena bayatha tupa. Barapon apara pon Nacom peitorobi jume pepaebin, pon bayatha Nacom yabara paeba xua bepa pinae equeicha patopaena’, jan. <sup>15</sup> Icha pamuxu dubename moya pana nejume naitaware pocotsiwa tapaca tsipaebiwatsi.

<sup>16</sup> “¿Eta pocotsimonae cui jupatsi barapomonae pomonae xote jinompe pomonae Nacom jume itawetatsi? ¿Etabe juta ichi barapomonae? Barapomonae be pexui, pocotsixi panatha nabaru jinompa. Nabaru wawai tsurubenaebiya. <sup>17</sup> Barapoxi nabarai, jeye: ‘Bayatha oibo paca tsimuxu obatsiba ichitha jopa panawirabim. Bayatha paca tsimuxu wecoyechiba icha be ichi poxonae ichun tatupatsi ichitha jopa pana itanuwe jume notsim xua painya newecoyeinexaru’, jei barapoxi. <sup>18</sup> Juan patopa pon jiwi Pebautisabin. Bapon jopa xaeyo pan, yawa jopa apaeyo vino mera. Ichitha paxam pajam: ‘Apara Juan xeina cauri’, pajam. <sup>19</sup> Bapoxonae xan ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame pajam: ‘Bapon maisa jopa juniya nabanaeyo, yawa jopa juniya

apaeyo. Peatsacaewi abe peexanae jiwi pia jiton tatsi, iru pomonae paratixi pentoma noteibiwi, barapomonae pia jiton tatsi', pana neyabara jam. Nacom piamonae tatsi barapomonae tsita exana xua jiwi tsita exanatsi Nacom pia peyaputae coyeneintha tatsi. Po coyene barapomonae exana, baxua Nacom tsita pexainyei coyenetsi", jei Jesús.

**Meje yabara poxonae Jesús  
yabara paeba po tomaranpiwi  
jopa pejume cowuntsiwichi**

*(Lc 10.13-15)*

<sup>20</sup>Nexata Jesús tamropata pitaba xua biatane ainya tomaranpiwi, ichaxota bayatha copiya matha matowa exana pia petsita itutsi coyenewan. Bequein Jesús baxua matowa exana, ichitha barapomonae jopa icha juntu coyene xeinaeyo xua peauraxae xua abe exana. <sup>21</sup>Daxota barapo tomaranpiwi beya, jeye: "¡Pai jaibo, Corazín tomarapiwi tsobenae! ¡Iru Betsaida tomarapiwi tsobenae! Po tsita itutsi coyenewan exanan Corazín tomaratha iru Betsaida tomarathano, ichun jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomarabepiwi icha penanta xeinae coyenewatha yabara nanta pentsipa Nacomtha. Barapomonae iratha enaetsipa yawa paparuwan nama xatabichipa xua pocotsiwa be peru mapaton xua axun, yawa ipuna nacaxuebichipa pia pepontha. Barapomonae baxua exanaetsipa xua ichamonae petsita itapeinya xeinaewa tsainchi xua icha juntu coyenein Nacom petsita xeinaewatsi peauraxae abe peexanaexae bapontha. <sup>22</sup>Paxam pomonae Corazín tomarapiwi pam iru Betsaida tomarapiwi pam, bara

xaniyeya paca tsipaebatsi. Poxonae barapo matabi patopeicaena po mataqueitha Nacom yabara paebina daxita jiwi petsita natsicuentisixaetsi abe petsita exanaexaetsi, Tiro tomarapiwi iru Sidón tomarapiwi daxita barapo tomarabepiwi bichocono peraxa jubebinchi. Ichitha nama paxam pomonae Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. <sup>23</sup>¡Incane iru Capernaum tomarapiwi pamdu! ¿Bara pana nanta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca. Po petsita itutsi coyenewan painya tomaratha exanan icha bayatha barapo petsita itutsi coyenewan exanaetsipa Sodoma tomaratha, bara cataunxuae barapo tomara ecaetsipa, xua beya anoxuae tsipae. Tsipei barapomonae metha bayatha xeinaetsipa icha juntu coyene xua peauraxae xua abe exana Nacomtha. Metha bapoxonae Nacom jopa jutebichipae barapo tomarapiwi. <sup>24</sup>Ichitha paca tsipaebatsi paxam Capernaum tomarapiwi pam, matabi patopeicaena po mataqueitha Nacom yabara paebina daxita jiwi petsita natsicuentisixaetsi abe petsita exanaexaetsi. Barapo mataqueitha bichocono paca peraxa jubebina, beyacaincha xua Sodoma tomarapiwi peraxa jubebinchi bichocono", jei Jesús.

**Meje yabara poxonae Jesús waba  
jiwi: "Anetha xan berena tapaca  
yawenaewa tsainchi", jei**

*(Lc 10.21-22)*

<sup>25</sup>Bara caena bapoxonae Jesús juntu coyene weiweina exanatsi Nacom pia Pejumope tunaxu tatsi. Jesús namchi, jeye: "Axa peitaboco Necanamatax-

einaem, yawa ira Necanamataxeinaem. Wunaē cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonae bichocono penacuidubiwi pomonae be pinyon penatsicotaewi tsipei nanta xeina xua bichocono peyaputaewi daxita. Jame tsita itutame barapo pexainyei coyenewa xua xan yabara pomonaetha pomonae jopa bichocono penacuidubiwi, pomonae be pexui penatsicotaewi tsipei jopa nanta xeinaeyo xua bichocono peyaputae jiwi daxita. <sup>26</sup>Axa, baxua exaname necatsita xanepanaexae baxua”, jei Jesús Paxatha.

<sup>27</sup>Equeicha Jesús namchi pijimonaetha, jeye: “Taxa daxita necata xua pia peitorobi coyenewa tatsi, matautano xua pia peyaputae coyenewa tatsi. Dapon aibi pon xaniwaicha nejuntũ cui coyene yaputane. Jame saya meisa Taxa Nacom, nejuntũ cui coyene yaputane. Dapon aibi pon Taxa juntũ cui coyene yaputainchi. Saya jame meisa Taxaxae juntũ cui coyene yaputan. Matautano barichi Taxa meisa juntũ coyene yaputainchi pon saya bara copatan xua bara Taxa pejuntũ cui coyene yaputaewa tsainchi. <sup>28</sup>Anetha xan berena daxita paxam xua tapaca yawenaewa tsainchi. Daxita paxam xua pocotsiwa paca juntũ coyene natsepa exana painya abe neexanae cuiru coyene baxua paca juntũ cui coyene canapuxanaeya yabara junteinaeinchi xua painya nenafifinacaewatsinexa. Equeicha pena juntũ coyene paca cana exanaeinchi, xua painya nejuntũ coyene weiweinaeya jinompaewa tsane. <sup>29</sup>Pana necui coyene xeinare tacuidubi coyene painya nenacuidubinexam tsane yawa painya neyawenaenexa tsane xua painya necuidubiwa tsane ichamonae. Baxuan paexande tsipei xan jopa

bapana juntũ cui coyene anaepanaeya tacuidubin jiwi. Matauta bapana jopa tajuntũ cui coyene atsacaein. Matautano jopa pajuntũ coyene deideijeya jinompaem tsane. Saya jame xanepanaeya painompaename tsipei paexanaename tacuidubi cui coyenein. <sup>30</sup>Barapo tacuidubi cui coyenewan jopa ayapubeyo painya juntũ cui coyenetha. Bara paca itacupa xua painya neexanaewa tsane barapo tacuidubi cui coyenewan”, jei Jesús.

**Meje yabara poxonae Jesús pijimonaē tatsi yaboto nota trigo xu judiomonaē barompaya pia pentaquei seicaē mataqueitha tatsi**

(Mr 2.23-28; Lc 6.1-5)

**12** Caentacabi poxonae judiomonaē barompaya pia pentaquei seicaē matabitha tatsi barapo mataqueitha Jesús irũ pijimonaē tatsino pabi iyiya. Jesús pijimonaē tatsi jainpa. Barapomonae tamropata notarucupa xua yaboto xunumenapona trigo xu, bapoxonae pecobetha xu mata pepeta yawa xu xane. <sup>2</sup>Poxonae fariseomonae cui tane xua Jesús pijimonaē tatsi exana, bapoxonae barapomonae Jesús tsipae-batsi, jeye:

—Jamaisa jinya jiwimonae nacuita barapo matabithe poxonae yaboto nota trigo xu. Apra jiwi jopa yabara copatichi xua penacuchiwa po mataqueithe xua judiomonaē barompaya pia pentaquei seicaē matabi tatsi, jei fariseomonae. <sup>3</sup>Jesús jume nota, jeye:

—Barapo tajiwimonae jopa apra abe exanaeyo. Jopa payabara yorobim pocotsiwa bayatha David exana poxonae jainpa, poxonae irũ pijimonaē tajainpatsirũ. Bapon David, pon caena bayatha israelmonae itorobiya pia pepa Peewatsinchi. <sup>4</sup>Bapon David irũ pijimonaē tatsi barapomonae Nacom pin pia botha tatsi jojoniya. David



xane pan, po pan ichamonae cana exana xua Nacomtha pecatsiwatsi. Iru barapo pan David pijimonae cata xua pexaenexaru. Barapomonae xane bequein bara Nacom pia peitorobi coyenewatha copata xua saya meisa sacerdotemonae itacupatsi xua pexaewa tsane barapo pan. <sup>5</sup>Matautano bequein payabara yorobame Moisés pia peitorobi coyenewatha ichaxota jei: 'Sacerdotemonaepiwi nacuita judiomonae barompaya pia pentaquei seicae matabitha tatsi poxonae Nacom pin pia botha tatsi duwei tauta xua petuxusi exanaenexa Nacom nexa', jei. Apra barapo coyene jopa peabe coyenewiyo. Jiwi bara copata. Jopa cui matawentsiyo bequein bara barapo judiomonae barompaya pia pentaquei seicae matabitha tatsi exana taetha. <sup>6</sup>Ichitha paca tsipaebatsi xua nama taayapusu itorobi coyenewa ainya cui beyacaincha Moisés pia peitorobi coyenewan tatsi, xuano beyacaincha barapo coyene po coyene poxonae Nacom pin pia botha exana. <sup>7</sup>Paxam jopa xanepanaeya payaputaem xua Nacom jei pejume diwesitha: 'Ichichipan xua painya nexinaewa tsane nantanuweya peyabara nanta xeinae unthuto xua ichamonae painya neyawenaewa tsane. Baxua jame bichocono ichichipan beyacaincha xua duwei petautsiwa xua petuxusi exanaewa xan nexa', jei Nacom Pejume Diwesitha. Icha bayatha payaputaetsipame pocotsiwa Nacom Pejume Diwesitha paeba, bapoxonae barapo tamonae jopa abe payabara paebimchipae pomonae bequein bara jopa abe exanaeyo. <sup>8</sup>Xan ponxaein Nacom Tananeitapetsixae taitorobi coyene xeinan xua jiwi tacoya taitorobiwa pentaquei seicae matabitha, jei Jesús, fariseomonaetha.

**Meje yabara poxonae Jesús cobe wunae exana pon pecobe mubinchi**

(Mr 3.1-6; Lc 6.6-11)

<sup>9</sup>Poxonae Jesús najume weta xua fariseomonae tsipaebatsi, bapoxonae Jesús bara weya natsixitabiya ponataba trigo pabi weya. Bapoxonae pona judiomonae pia penacuetusi bo tatsi beya, bapoxonaeno joniya barapo botha. <sup>10</sup>Barapo botha pebin eca pon pecobe mubinchi. Baxotaru fariseomonae ena. Barapo fariseomonae ichipa piraichi Jesús yainyabatsi xua icha Jesús jume notsina icha jumetha xua bapoxonae Jesús pecui yabara paebinxatsi jiwitha xua Jesús abe exana. Barapo fariseomonae Jesús jeichichi:

—¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae mataqueitha jampa? jei.

<sup>11</sup>Jesús jume nota, jeye:

—¿Jintam metha pon paxam jiwana, pon xeina cae oveja, xua poxonae jopa jutsipae icha barapo oveja muthutha tajoparecatsi? Apra bara awiya jutsipa pia ovejaxae bara bequein pentaquei seicae matabi taetha. <sup>12</sup>Nama apra bichocono jiwi yabara Nacom tsita ainya cuichi beyacaincha xua oveja yabara Nacom tsita ainya cuichi. Daxota Nacom copata xua bara jiwi pexanepanae coyene exaneibina, bara bequein xua poxonae pentaquei seicae matabintha taetha, jei Jesús fariseomonaetha.

<sup>13</sup>Nexata Jesús barai pontha pon pecobe mubinchi jeye:

—Nacobe doire, jei.

Poxonae bapon nacobe doita, bapoxonae nainya cobe wunae tsanaya icha icha cobe ichi. <sup>14</sup>Bapoxonae fariseomonae Jesús weya ponarucupa xua Jesús pecui yabara paebinxatsi xua

po cui coyenewatha Jesús pebexubiwa tsainchi.

**Meje yabara xua Jesús peyabara tsiwuna e cui paebiwatsi**

<sup>15</sup> Poxonae Jesús yaputane xua yabara cui paebatsi xua abe exana matautano xua bexubapaebatsi, bapoxonae Jesús bara weya ponataba. Matautano Jesús pinmonaeno puna poinchi. Jesús axaibi exana ducuaenaebi daxita pomonae peatenewi. <sup>16</sup> Matauta Jesús barapomonaetha itoroba, jei: “Jopa baxua ichamonaetha pana necui yopichinde xua jiwi axaibi taexanaewa”, jei Jesús. <sup>17</sup> Jesús itoroba pomonae xua axaibi peexanaexae xua jopa peyabara cueicueijeinexa tsainchi ichamonaetha. Baxua exana xua penayabara jume cui wetsinexa xua Isaías pejume diwesitha bayatha yabara tsiwunaeya tina Nacom nexa pon Nacom peitorobi jume pepaebin. Nacom jeye, Jesús yabara:

<sup>18</sup> “Bapon apara pon inta nacuita, pon itapetan, pon bichocono antobein yawa xua nejuntu coyene weiweina exana pon. Taitorobicaein tajumope tunaxu xua bapon peyantsiwa tsainchi. Bapon daxita nacuanpiwitha capona exanaena tapexeinya jume diwesi pomonaetha pomonae jopa judiomonae naexanaeyo. Barapon barapo pexeinya jume diwesi caponaena, xua pejume cowuntsinexa tsane pomonae poxonae jume taibina barapo pexeinya jume diwesi xua bapoxonae barapomonae tayabara juntemainanexa abe pia peexanae cuiru coyenein tatsi.

<sup>19</sup> Matauta bapon jopa jume matsontsonobeibi tsane.

Bapon jopa namtsebiya wawai tsaibi tsane namtotha xua jiwi bapon pejume taenexa tsaibi tsainchi, xua bapon pejume naitaewatsinexa tsaibi tsainchi.

<sup>20</sup> Pomonae jopa peajuntucoyenesuwi xua tana nejume cowuntsiwa, bapon jopa bebai tsaibi tsane.

Barapomonae capanenebiya tsainchi. Matautano pijimonae tatsi poxonae juntu coyene faefaenena, jopa anaya jutebi tsane.

Bara bapon yawenaena barapomonae. Bapon baxua exanaena xua pijimonae yayawenaponaena beya tsane xua cui amanayabina pia peaitaetaebi jiwichi.

<sup>21</sup> Matauta daxita nacuanpiwi jiwamonae pomonae jopa judiomonae naexanaeyo barapomonae bapon wuna ewatatsi xua bara bapon barapomonae pecapanenebiwa tsainchi Nacom beicha”, jei Nacom Jesús yabara Isaías pejume diwesitha.

**Meje yabara poxonae Jesús baraichi xua pinae xeina Beelzebú pia peayapusu itorobi coyenewa tatsi**

(Mr 3.20-30; Lc 11.14-23; 12.10)

<sup>22</sup> Bapoxonae jiwi Jesús tacapatutsi pebin pon muxusipana exainchi cauri, matautano xua itata nacuta exainchino. Bapon Jesús axaibi exana. Bapoxonae pebin muxu nasaba, beta necota, matautano paebano. <sup>23</sup> Daxita pomonae cui tane baxua, pocotsiwa Jesús exana, daxita barapomonae yabara najuntu coyene benaecaeya najei: “Jina, ¿bapon apara David pia pemomoxi susato jiwi ji-

wanapin tatsi jampa, pon Nacom yabara wūnae tsiwūnaeya paeba xua pinae patopeicaena jampa?" jei.

<sup>24</sup>Poxonae baxua fariseomonae jume tane, jeye: "Bapon caurimonae itawetatsi apara pexeinaexae Beelzebú pia peayapusu itorobi coyenewa tatsi pon caurimonae pia pe ntaaponaein tatsi", jei fariseomonae.

<sup>25</sup>Jesús yaputane xua fariseomonae nanta xeina poxonae natsipaeba baxua, daxota jei fariseomonaetha: "Icha cae nacuapiwi nawepu tsatabe matauta nababe, bapoxonae jopa xaexaenaecaeyo. Matauta iruru icha cae tomarapiwi nababe, bapoxonae jopa xapain jinompaeyo barapo tomarapiwi. Matauta iruru icha cae bo matabuxuyomonaebe nababe, yawa nawepu tsatajopabe bapoxonae jopa xaexaenaecaeyo. <sup>26</sup>Barichi icha Satanás pijimonae tatsi nawepu tsatajopabe, matautano nababe, bapoxonae jopa xaexaenaecaeyo. Satanás jopa itacupaetsi xua itoroba pijimonae, tsipei amsiya exana. <sup>27</sup>Paxam pana neyabaram: 'Apara bapon itaweta cauri tsipei bapon xeina Beelzebú pia peayapusu itorobi coyenewa tatsi, pon Beelzebú caurimonae pia pentacaponaein tatsi', pana neyabaram jam. Icha baxua bara xainyei, ¿naxata eta po peayapusu itorobi coyeneya tatsi painyamonae itaweta cauri? ¿Iruru barapomonae itaweta cauri Beelzebú pia peayapusu itorobi coyenewatha tatsi? Daxota painyamonae paca yaputane xua apara paxam panaerabame. <sup>28</sup>Ichitha nama xan cauri itawetan Nacom pia pejumope tunaxu tatsi pia peayapusu itorobi coyenewatha tatsi, xua barapo pejumope tunaxu tana necatsixae pia peayapusu itorobi coyenewa. Baxua apara paca tsipaebatsi painya neyaputaenexa xua painya

xantha patopan ponxaein Nacom Tananeitapetsin.

<sup>29</sup>"Dapon aibi pon itacupaetsi xua botha joniya po botha pon bichocono maxu daunwei pia bo tatsi xua daxita penotsiwa tsane pocotsiwa bapon xeina pon maxu daunwei, icha jopa copiya matha maxu cutanotsiyo. Barapocotsi juta coyeneya ichin. Xan cui amanayaban Satanás daxota neitacupa xua torotsiya itawetan bapon pijimonae tatsi pomonae caurimonae.

<sup>30</sup>"Pomonae jopa neyawenaeyo, barapomonae apara inta abe exana. Barapomonae exana xua ichamonae jopa tana nejume cowuntsiwa tsane. Barapomonae jopa yawenaeyo xua ichamonae nenacaetutsina tajiwimonaexae tsane.

<sup>31</sup>"Daxota paca tsipaebatsi xua pocotsiwa jiwi abe peexanae cuiru coyenein exana matautano pocotsiwa xua jiwi abe paeba, barapo coyene Nacom itacupaetsi xua yabara juntemainaein daxita barapo coyenein. Pon abe yabara paeba Nacom pia Pejumoepo tunaxu tatsi Nacom bapana jopa yabara juntemainae tsane xua bapon paeba. <sup>32</sup>Matautano xan ponxaein Nacom Tananeitapetsin pon abe neyabara paeba Nacom itacupaetsi xua bapon peyabara juntemainae-watsi pocotsiwa bapon abe neyabara paeba. Ichitha pon nama bichocono abe yabara paeba Nacom pia Pejumoepo tunaxu tatsi, Nacom jopa bapana yabara juntemainae tsane bapon, anoxuae matautano xua bexa tsane", jei Jesús.

**Meje yabara poxonae Jesús  
yabara cuiduba xua pinae jiwi  
yaputane nae penacoichixae**

(Lc 6.43-45)

<sup>33</sup>Equeicha Jesús jeye: "Icha nae po nae pexeinya nae bara nacoita po pethei pexeinya thei. Icha nae po nae peabe

nae bara nacoita po pethei camatsa thei. Jiwi ba nae yaputane tsipei po nae penacoichixae. <sup>34</sup> Paxam pomonae bichocono abe peexanaewi pam! Icha jomomonae ichi xua abe exana jiwitha bara paichim, abe paexaname jiwitha. Paxam jopa paca itacupaeyo xua xanepanaeya painya nepaebiwa, tsipei pocotsiwa painya coibototha papaebame barapara baxua painya juntu coyeneha pacayabara nanta xeiname. <sup>35</sup> Pon ba pejuntu coyene xanepanaein bapon ba xua xanepanae paeba, tsipei ba pejuntu coyene xeicaein. Pon ba peajuntucoyenebein bapon ba xua abe paeba tsipei ba peajuntucoyenebein. <sup>36</sup> Ichitha paca tsipaebatsi xua matakabi patopeicaena po mataqueitha Nacom yabara paebina daxita jiwi penatsicuentisiwa abe peexanaexae bapontha. Barapo matakabitha daxita jiwi bewa atene tsane pepaebixae po jumein jopa xanepanaeyo. <sup>37</sup> Poxonae Nacom yabara paebina daxita jiwi penatsicuentisiwa abe peexanaexae bapontha, Nacom tsanaya tsabina pia pepaebixae jumeintha tsane. Pomonae paxam xanepanaya papaebame ichamonaetha poxonae cataunxuae pajinompage po irathe, Nacom xuya paca yabara jei tsane: 'Barapomonae bara jopa abe exanaeyo', paca yabara jei tsane. Paxam pomonae bayatha abe papaebame poxonae cataunxuae pajinompage po irathe Nacom xuya paca yabara jei tsane: 'Maisa barapomonae abe pepaebiwi', paca yabara jei tsane", jei Jesús.

**Meje yabara poxonae pomonae peajuntucoyenebe jiwi Jesús cui itorobatsi xua peexanaewa tsane pexeinya petsita itutsi coyenewa**

(Mr 8.12; Lc 11.29-32)

<sup>38</sup> Nexata fariseomonae jiwanamonae iruru pomonae jiwi pecuidubiwi Moisés pia peitorobi coyene tatsi jiwanamonae, daxita barapomonae Jesús cui itorobatsi, jeichichi:

—Pon jiwi Pecuidubim, paichichipan xua pata taewa tsane xua tapana netsita itutsiwam tsane cae jinya pexeinya netsita itutsi coyenewa pocotsiwa Nacom cacatsina pia peayapusu itorobi coyenewatha. Bapoxonae paca jume cowantsinchi, jei.

<sup>39</sup> Daxita barapomonaetha Jesús barai, jeye:

—Pomonae peajuntucoyenebe jiwi iruru pomonae jopa tana nejume cowantsi jiwi barapomonae necui itoroba xua taexanaewa cae coyenewa tapexeinya tsita itutsi coyenewa. Ichitha jopa tsita itutsin tsane icha tapexeinya tsita itutsi coyenewa. Saya meisa exanaein icha bayatha juta coyene cana ichichi Jonás pon Nacom peitorobi jume pepaebin, pon caena bayatha tupa. <sup>40</sup> Nacom Jonás itorobatsi Nnive tomarapiwi beya petsipaebinexa Nacom Pejume Diwesi barapomonaetha. Jonás jopa baxua peexanaexae daxota Nacom exana xua Jonás quianaxorecatsi duwein pon pinyo. Bapon barapo pin duwein tsijuntutha eca acoibi po matakabiyobe, matautano acoibi po merawiyobe, beya poxonae equeicha yacabaxotsi xua asu popona. Barichi tsane xan ponxaein Nacom Tananeitapetsin tupaein. Bapoxonae muthutha nebotsina acoibi po matakabiyobe nexa tsane, matautano acoibi po merawiyobe nexa tsane, beya poxonae equeicha Nacom asu juina

neexanaena. <sup>41</sup>Matacabi patopeicaena po matabitha Nacom yabara paebina daxita jiwi peperaxa exanaenexatsi penatsicuentisixae abe peexanaexae. Barapo mataqueitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Baxua exanaena tsipei barapo Nínive tomarapiwi icha jüntu coyene xeina Nacomtha peauraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha jüntu coyene paxeinaem. Nama apara xote uncuanje ponxaein taexanaein po coyenewa pepa peainya cui coyenewa xua tacaponaewa Nacom Pejume Diwesi daxita jiwitha. Bara pocotsi coyenewa toxeinchiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha. <sup>42</sup>Matauta barapo matabitha tsane petsiriwa, powa caena bayatha tupa, bapowa asiya uncuaena Nacom peitabaratha tatsi. Barapowa pia nacuapiwayo, po nacua pocotsiwa parowa bereca tajü bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueijeji tsane pomonae xua anoxuae jinompa poxonae uncuaena Nacom peitabaratha tatsi. Jei tsane bapowa: ‘Maisa pomonae xua jinompa poxonae Mesías popona po irathe deque, barapomonae abe bichocono peexanaewi, tsipei ajüntucoyenefaetabiya jume tane pocotsiwa Mesías cuiduba bequein Mesías bichocono peyaputaein’, jei tsane barapowa. Barapowa baxua paebina tsipei bapowa bayatha tajü werena pona, pesiwa ponaenexatsi

Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaein Nacom yabara. Daxota bapowa ichichipa xua pecuidubiwatsi xua Salomón pecuidubinexa Nacom yabara. Nama apara xote uncuanje ponxaein taexanaein pocotsiwa pepa peainya cui coyenewa xua tacuidubinexa Nacom yabara daxita jiwitha. Barapocotsi coyenewa toxeinchiya ainya cui coyenewa beyacaincha Salomón po cui coyene exana poxonae cuiduba Nacom yabara barapo petsiriwatha, jei Jesús.

**Meje yabara poxonae Jesús  
yabara paeba cauri xua  
caewa nauyata pebintha**

*(Lc 11.24-26)*

<sup>43-44</sup>Equeicha Jesús jeye: “Poxonae pebin wepu poinchi cauri, bapoxonae cauri pona wexotha ichaxota ira tsewa pepoponaenexa tsane baxota. Ichitha poxonae jopa caxinaeyo xua ichaxota pepoponaenexa bapoxonae bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. Poxonae caibeya pona cauri caxina, pebin caxinatsi xua xanepanaeya popona. <sup>45</sup>Nexata equeicha cauri pona pebin weya. Pirapaeyo bapon baru patopa siete poyobe cauri pomonae bichocono abe beyacaincha bapon pon copiya. Daxita barapo caurimonae pebin puna jinompatsi. Anoxuae bapon nama yatsicaya bichocono abe cana exainchi beyacaincha poxonae copiya abe cana exainchi poxonae saya caein. Barichi tsane caurimonae abe cana exanaena pomonaetha pomonae anoxuae jinompa, pomonaetha pomonae peajüntucoyenebe jiwi, icha barapo caurimonae ichi poxonae pebin abe cana exainchi”, jei Jesús.

**Meje yabara xua Jesús pena tatsi  
iruru peyapin jiwu tatsino**

(Mr 3.31-35; Lc 8.19-21)

<sup>46</sup>Jesús cataunxuae cueicueijeji tsun-  
cuae poxonaе beya iru pena tatsi  
peyapin jiwu tatsino pata. Daxita bara-  
pomonaеyobe pesato beya umena be-  
quein ichichipa Jesús baru cueicueije-  
ichi canta pin bicheito. <sup>47</sup>Ichun Jesús  
baraichi, jeye:

—Ena, iruru neyapin jiwino pesato  
beya umena. Bepara bequein cataei,  
necatsipaеbinexa tsane, jei bapon.

<sup>48</sup>Ichitha Jesús jopa bara jume jejeyo,  
saya jame yainyaba bapontha, jeye:

—¿Jintam powa be taena natsicotan-  
era? ¿Jintam pomonaе be tayapin jiwu  
natsicotanera? jei Jesús bapontha.

Baxua Jesús caunuta pia pecuidu-  
binexa xua peyabara caunutsinexa  
pomonaе pia pepuna jinompaewichi.

<sup>49</sup>Nexata Jesús pijimonaе cowai yawa  
jei jiwitha:

—Pomonaе xua cowaн аpara  
barapomonaе be taena tsicotan  
matautano iru be tayapin jiwu  
tsicotanno. <sup>50</sup>Pomonaе xua exana  
pocotsiwa Taxa Nacom itoroba,  
pon peitabocotha peecaеinxae,  
barapomonaе be tayapin jiwu tsicotan,  
matautano iru be tayapixi tsicotanno,  
matautano iru be taena tsicotanno, jei  
Jesús.

**Meje yabara poxonaе Jesús cuiduba  
jiwu pecayabara juta pepaеbi  
diwesiyo xua pon peubin yabara**

(Mr 4.1-9; Lc 8.4-8)

**13** Barapo mataqueitha caena Jesús  
bo weya pona, bapoxonaе pucua  
itapatha ecopa. <sup>2</sup>Tsipei pin bicheito  
nacaetuta Jesustha daxota Jesús jeratha  
nontabiya yawa tsiwiyo nayana toroya  
bapoxonaе ecoundeca. Daxita barapo  
pin bicheito taetabo mene itapatha

umena. <sup>3</sup>Jesús barapo pin bicheito  
cuiduba pecayabara juta pepaеbi  
diwесintha.

Cae diwesiyotha Jesús namchi, jeye:  
“Pebin pon peubin pontaba pia ubichi  
pabitha. <sup>4</sup>Poxonaе pon peubin ubauya,  
icha xu namtotha xu othopeica. Peya-  
pupunaewi yapata yawa xu xane. <sup>5</sup>Icha  
xu, xu othopeica ibowantha ichaxota  
ira itafafana. Barapoxonaе barapo xu  
caena nainya xu xuwa tsipei jopa  
taju xu xuwarecaeyo. <sup>6</sup>Ichitha poxonaе  
xometo atsa tsina bapoxonaе yaboto  
tsaquiwa yawa tupa tsipei jopa taju tabu  
opina xuwarecaeyo. <sup>7</sup>Icha xu, xu oth-  
opeica ichaxota pesoiwan xuwinaena.  
Barapo xu yaboto nanta capanaba pox-  
oru yawa muxuna xuwina pesoiwan.  
<sup>8</sup>Icha xu, xu othopeica ichaxota ira wu-  
nae. Poxonaе barapo xu, xu xuwa, xu  
nawunaeta. Icha xun, xu nanacoitapona  
cien po xu matabuxuyobe tsiniya. Icha  
xun, xu nanacoitapona sesenta po xu  
matabuxuyobe tsiniya. Icha xun, xu  
nanacoitapona treinta po xu matabuxuy-  
obe tsiniya. <sup>9</sup>Icha pamuxu dubename,  
moya pana nejume naitaeware pocot-  
siwa tapaca tsipaеbiwatsi”, jei Jesús.

**Meje yabara poxonaе Jesús namchi  
xua exua metha pecayabara juta  
pepaеbi diwesiyo yabara jane, jei**

(Mr 4.10-12; Lc 8.9-10)

<sup>10</sup>Nexata Jesús pijimonaе imoxoyo  
caquita umenarucupatsi yawa yainya-  
batsi, jeichichi:

—¿Eta xua metha jiwitha paebame  
pecayabara juta pepaеbi diwесin? jei  
Jesús pijimonaе tatsi.

<sup>11</sup>Jesús jume nota barapomonaetha,  
jeye: “Meisa paxam yatsicaewa  
Nacom yabara paca yaputane exana  
po pecuidubiwa xua moya peyawun  
xeinaewa. Barapo moya peyawun  
xeinaewa xua jiwu jopa peyaputaewa  
apara xua Nacom paca cana exana

xua painya nepaca itacupaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha jame ichamonae pomonae jopa nejume cowuntsiyo jopa daichichi. Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara juta pepaebi diwesintha xua Nacom peyabara yaputaenexatsi. <sup>12</sup>Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. <sup>13</sup>Daxota jiwitha paeban pecayabara juta pepaebi diwesintha. Baxua paeban barapomonaetha xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. <sup>14</sup>Barapomonae baxua exana bayatha petsiwunaecui yabara paebixaetsi, xua bayatha Isaías pon Nacom peitorobi jume pepaebin, petsiwunaecui yabara paebixae pejume diwesitha pocotsiwa barapomonae poxonae baxua exanaena. Isaías Mesías nexa jeye barapomonaetha: ‘Xaniwaicha pana nejume taename ichitha jopa bepayaem tsane xua jopa painya tana nejume cowuntsinexam tsane. Pana necui taename ichitha xaniwaicha jopa bepayaem tsane xua painya tana necui

yabara jume cowuntsinexam tsane.

<sup>15</sup>Paxam bichocono paainya unthutom, xua

jopa painya tana neyaputaexae jiwim.

Matautano jopa xanepanaeya pajume taem tsane,

be pomonae penamuxujematsi jiwi pam tsane.

Panaichaquetsiname icha be pomonae peitata

nacutsi jiwi pam tsane.

Baxua paexanaename tsipei jopa be-painya tana

nejume taewam tsane, xua jopa painya tana nejume cowuntsinexa tsane.

Yawano matauta, baxua paexanaename tsipei

jopa bepainya tana necui taewam tsane xua

jopa painya tana nejume cowuntsinexam tsane.

Matauta baxua paexanaename tsipei jopa bepainya

tana neyaputaewam tsane painya itamaiqueitontha.

Matautano jopa painya neuraxae xua abe

paexaname daxota jopa paca juntu coyene

xanepana exanaetsi’, jei Isaías barapomonaetha

xua Mesías nexa”, jei Jesús.

<sup>16</sup>Nexata Jesús pijimonaetha jeye: “Paxam pajuntu coyene weiweiname

tsipei poxonae pana necui taneme pocotsiwa exanan bapoxonae pana necui ya-

putaneme. Matautano pajuntu coyene weiweiname tsipei poxonae pana ne-

jume taneme pocotsiwa paeban bapoxonae pana nejume cowuntame. <sup>17</sup>Xani-

waicha paca tsipaebatsi pin bicheitomonae, pomonae Nacom peitorobi jume

pepaebiwi, matautano iruru pomonae pejuntu coyene xeicae jiwi, pomonae

caena bayatha jinompa barapomonae newunaecui ewata xua tapatopeicaewa.

Daxita barapomonae bequein bichocono betaena pocotsiwa pana necui taneme, daichitha jopa baxua taeyo. Matautano bequein bejume taena pocotsiwa pana nejume taneme daichitha baxuan jopa nejume taeyo”, jei Jesús.

**Meje yabara poxonae Jesús  
pijimonae muxu yaputane exana po  
diwesi xua pecayabara juta pepaebi  
diwesiyo pon peubin yabara**

*(Mr 4.13-20; Lc 8.11-15)*

<sup>18</sup>Equeicha Jesús jeye: “Pajume taema xua paca tsipaebatsi pecayabara juta pepaebi diwesiyo xua pon peubin yabara: <sup>19</sup>Pomonae bequein jume tane po pecuidubi coyenewa xua Nacom tamropata pitaba xua ewatsiya itoroba jiwi, barapomonae daichitha jopa yaputaeyo barapo coyenewa. Daxota barapomonae jopa xanepanaya exanaeyo icha be pocotsi juta coyeneya ichi xua pexuton xua po xuton namto othopeica. Bara juta coyeneya cana ichichi pomonae jopa yaputaeyo tacuidubiwa. Caurimonae pia pentacaponaein tatsi barapomonae omeicha bara juntu coyene weichichi tacuidubi coyenewa daxota barapomonae jopa nejume cowuntsiyo. <sup>20-21</sup>Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano juntu coyene weiweinaya Nacom jume cowuntatsi. Ichitha bara caeto jume cowunta poxoru barapomonae antufaetabiya jume jeba Nacom pejume diwesi pejuntu coyeneintha. Poxonae yaitama barapomonae bichocono peatenexae, matautano poxonae barapomonae yaitama abe petaexanaexaetsi ichamonae xua pejume cowuntsixae Nacom, bapoxonae caurimonae abe exana barapomonaetha xua barapomonae juntu coyene

wejuntemaina exanatsi xua Nacom pecayabara juntemainaewatsi. <sup>22</sup>Po xuton xua xu othopa pesoiwantha, barapo xuton caunuta xua pomonae Nacom Pejume Diwesi jume tane ichitha saya barompaya pia juntu coyenetha jinompa. Matautano saya u copei cayabara nanta xeina. Matautano saya exana pocotsiwa juntu coyene weiweina cana exainchi. Po coyene pebiwi exana baxuan barapocotsi juta coyene exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi juta coyeneya ichi barapo jiwi. Jopa xanepanaya Nacom tsita jinompaetsi. <sup>23</sup>Po xuton xua xu othopeica peira wunaewatha, bara nacoita. Barapo xuton yabara caunuta pomonae jume tane Nacom Pejume Diwesi, matautano jume cowuntano poxoru juntu coyene xanepanaeya jume tane. Matautano beta exana dubenanaebiya beya matapainya jiwi cui tane xua barapomonae bara juntu coyene xanepana Nacom peitabaratha tatsi. Bapoxonae ichamonae barapomonae jiwana beta yawena ichamonaetha icha barapo xuto ichi xua cien po xu matabuxuyobe tsiniya tsoponae. Matautano ichamonae barapomonae jiwana beta yawena ichamonaetha icha barapo xuto ichi xua sesenta po xu matabuxuyobe tsiniya tsoponae xua jume cowunta. Matautano ichamonae barapomonae jiwana beta yawena ichamonaetha icha barapo xuto ichi xua treinta po xu matabuxuyobe tsiniya tsoponae”, jei Jesús.

**Meje yabara poxonae Jesús cuiduba  
pecayabara juto pepaebi diwesiyo  
xua trigo xu yabara xua iru  
baxoyo xuwina ayabo xu**

<sup>24</sup>Bapoxonae Jesús equeicha cuiduba jiwi icha pecayabara juta pepaebi



diwesiyo, jeye: “Yabara paca tsipaebatsi po coyene xua Nacom exanaena pon jiwi ewatsiya peitorobixaetsi. Bapon yabara paebina daxita jiwi penatsicuentisixae abe peexanaexae. Barapo coyenewa jupa, icha be pocotsi coyeneya juta ichi poxonaе pebin ba uubapona pabitha peubi xuton po peubi xuton pexeinya xuton. <sup>25</sup>Ichitha poxonaе cataunxuae jiwi maitumena, bapoxonaе pon pabi pexeinaein pia peaitafaetabi jitontsi tapatopatsi pia pabitha tatsi. Bapoxonaе bapon ayabo xu taubarecatsi ichaxoyo ubareca po pexu pexeinya xu. Poxonaе nacobe weta xua uba ayabo xu, bapoxonaе napitabiya ponataba. <sup>26</sup>Poxonaе trigo xu yaothopa bapoxonaе iru ayabo xuwina. <sup>27</sup>Bapoxonaе pon pabi pexeinaein baraichi pomonaе pia petanacuichixaetsi: ‘Pata Tanecanamataxeinaem, icha bara metha ubame po xu pexeinya xu, ¿nexata eta werena metha ayabo pona xua xuwa?’ jei. <sup>28</sup>Pon pabi pexeinaein jume nota pomonaе pia petanacuichiwiixaetsi jeye: ‘Apara baxua inta exana pon tana neaitafaetabi jiton’, jei. Bapoxonaе bapon baraichi pomonaе pia petanacuichiwichi, jeye: ‘¿Ichichipame xua pata ponaewa tsane bara beya pata xunaenexa barapo ayabo?’ jei. <sup>29</sup>Ichitha bapon jume nota jeye: ‘Bara tsane itompaena tsipei icha barapo ayabo paxunaetsipame payawa xunaetsipame trigo xu. <sup>30</sup>Bara saya yawa umenaena barapo ayabo beya abu poxonaе yawa nawetsina trigo xu. Tha nexata bapoxonaе itorobichi penacuichiwi xua copiya pexunaenexa barapo ayabo xua pepa cunton peexanaenexa, xua petautsinexa tsane, xua bapoxonaе trigo xu pejebinexa tabotha xua trigo xu matabotha’, jei pon pabi pexeinaein”, jei Jesús.

**Meje yabara poxonaе Jesús cuiduba pecayabara juta pepaеbi diwesiyo po peubi xutiyo pewun mostaza xutiyo**

(Mr 4.30-32; Lc 13.18-19)

<sup>31-32</sup>Equeicha Jesús jiwi cuiduba icha pecayabara juta pepaеbi diwesiyo, jeye: “Nacom waba jiwi xua petanaexanaenexatsi pijimonaе tatsi, pomonaе itorobiya peewatsixae beya pinmonaе tsoponaе xua pomonaе jume cowantapona Nacom. Barapo coyene jupa icha be poxonaе pebin ichi poxonaе ubanta pabitha po peubi xuto tsica xutiyo. Barapo xuto xuwa beya pin naе tsoponaе. Barapo naе pepinnaexae daxota siri pemaxuranantha coton exana”, jei Jesús.

**Meje yabara poxonaе Jesús cuiduba pecayabara juta pepaеbi diwesiyo xua levadura yabara xua pan cotowa exana**

(Lc 13.20-21)

<sup>33</sup>Jesús equeicha cuiduba jiwi icha pecayabara juta pepaеbi diwesiyo, jeye: “Poxonaе Nacom waba jiwi petanaexanaenexatsi pijimonaе tatsi pomonaе itorobiya peewatsixae barapomonaе pin bicheitomonaе naenaexanapona. Barapo coyene bara juta ichi, icha levadura matawun ichi pocotsiwa cotowa exana poxonaе pan exana. Petsiriwa tres po tsoropabe trigo xu beno muxuna cauwentaba levadura matawun pocotsiwa xua cotowa exana pan. Bapoxonaе pentubu naexananaya cocotowapona tsipei levadura matawun muxunaxuba”, jei Jesús.

**Meje yabara poxonaе Jesús cuiduba jiwi pecayabara juta pepaеbi diwesixitha**

(Mr 4.33-34)

<sup>34</sup>Jesús cuiduba jiwi daxita barapo coyenein xua xuan saya u pecayabara

juta pepaebi diwesixitha. Jesús jopa cuidubeibiyo poxonae jopa paebeibiyo pecayabara juta pepaebi diwesixitha.

<sup>35</sup>Bara barapo coyeneintha Jesús cue-icueijeji xua penayabara jume wetsinexa xua bayatha pon Nacom peitorobi jume pepaebin pecui yabara wūnae tsiwūnaeya paebixae, xua jeye:

“Jiwitha tsipaebin pecayabara juta pepaebi diwesintha.

Matautano muxuna yabara tsipaebin pocotsiwa

moya yawūn xeina xua jiwi jopa peyaputaewa,

po coyene caena bayatha moya yawūn xeina xua

poxonae aena Nacom forota po cae pin nacuathe xua

pocotsiwa beya anoxuae tsoponae”,  
jei bapon xua saya Jesús tapaebatsi.

**Meje yabara poxonae Jesús pijimonae yaputane exana po pecayabara juta pepaebi diwesiyo xua ayabo yabara**

<sup>36</sup>Nexata Jesús napeyaba pin bicheito jiwimonae. Bapoxonae botha joniya. Iru baxota Jesús pijimonae tatsi barapo botha najojoniyarū. Jesús pijimonae baraichi, jeye:

—Yabara pana neyaputane exande po diwesiyo xua ayabo po ayabo xuwa trigo pabitha, jei.

<sup>37</sup>Nexata Jesús namchi, jeye: “Pon ūba po xuton pexeinya xuton, trigo xuton jan, bapon apara bara xan ponxaein Nacom Tananeitapetsin.

<sup>38</sup>Matautano po pabitha ichaxota ūba jan, apara jiwi pia jūntū coyenein yabara caunutan. Pocotsi xuton xua yabara caunutan xua pexeinya xuton jan, apara yabara caunutan pocotsi jiwimonae xua patsina Nacom pia peitorobi nacua beicha tatsi. Po xuto peabe xuton, po xuton ayabo xu jan, apara yabara caunutan pocotsi jiwimonae caurimonae pia

pentacaponaein tatsi pijimonae tatsi.

<sup>39</sup>Pon ūba po xuton abe xua ayabo xu jan, apara bapon caurimonae pia pentacaponaein tatsi yabara caunutan. Xua bayatha xu naweta jan, apara yabara caunutan, po mataqueitha xua Nacom daxita nacui wetsina. Matautano barapo matakabitha Nacom yabara paebina jiwi penatsicuentisiwa abe peexanaexae bapontha. Pomonae xua trigo xu, xu siraca jan, apara yabara caunutan matatsunpiwimonae.

<sup>40</sup>Copiya matha xuexuetapona ayabo petautsinexa isototha. Jiwi bara jutiya ichainchi po matakabitha tsane Nacom daxita yabara paebina jiwi penatsicuentisiwa abe peexanaexae bapontha. Matautano barapo cae pin nacue weraweracaena.

<sup>41</sup>Xan ponxaein Nacom Tananeitapetsin itorobin tamatatsunpiwi xua jiwi penotsinexa tsainchi pomonae abe peexanaewi, pomonae xua cana exana ichamonaetha xua ichamonae xuya irū abe peexanaenexarū. Barapo matatsunpiwi wenotsina pomonae abe peexanaewi pomonae tajiwiwimonae barū jinompatsi. Barapo abe peexanaewi jopa tamonaeyo pomonae itorobiya taewatsixae.

<sup>42</sup>Daxita barapo jiwi pomonae abe peexanaewixae bebai tsainchi, matatsunpiwi bebai tsane ichaxota isoto jopa itacounaiyiyo ataya. Baxota daxita jiwi wecoyei tsane matauta baxota nantanuweya nantū jayabina, poxorū bichocono atene tsane.

<sup>43</sup>Bapoxonae pomonae exana pocotsiwa Nacom ichichipa barapomonae bichocono pexeinya coicha xeinaena po nacuathe ichaxota Nacom itorobiya ewata piamonae pon barapomonae pia paxaxae tatsi. Po pexeinya coicha xua barapomonae xeinaena, bichocono itūpana icha be xometo ichi xua poxonae pentha. Icha pamuxu dubename, moya pana

nejume naitaeware pocotsiwa tapaca tsipaebiwatsi”, jei Jesús.

**Meje yabara poxonae Jesús  
pecayabara juta pepaebi diwesiyo  
paeba xua po peitupanaewa  
pocotsiwa bichocono ainya matoma  
xua ira buxupanatha boca panatha**

<sup>44</sup>Equeicha Jesús namchi, jeye: “Yabara paca tsipaebatsi po coyene xua Nacom exana, pomonaetha pomonae pejuntu coyene canamataxeinaexae pon jiwi itorobiya pia pepa peewatsinchi. Barapo coyene bara juta ichi, icha be pocotsiwa peitupanaewa ichi pocotsiwa ainya matoma xua ira buxupanatha boca pabitha. Poxonae pebin barapo peitupanaewa jemeicha ira buxupanatha namicha taebota, bichocono tsorobotha matatsaebota, bichocono peichichipaexae baxua. Jopa muxu tsipaebiyo ichamonaetha. Bichocono juntu coyene weiweina. Bapoxonae pia botha pona pecaenaetsinexa daxita xua xuan pocotsiwan xeina. Bapoxonae barapo paratixitha comota barapo pabi, po pabitha boca barapo peitupanaewa. Bewa barichi jiwi. Bewa jiwi bichocono beita cui jichatsi xua pexeinaewanexa tsane barapo peajuntuyapusuwa, icha poxonae pebin ichi xua pitapeitupanaewatsi piraichi daxita caenaeta pocotsiwan xeina”, jei Jesús.

**Meje yabara poxonae Jesús cuiduba  
jiwi pecayabara juta pepaebi  
diwesiyo xua po warowa pewun perla**

<sup>45</sup>Equeicha Jesús namchi, jeye: “Barichiru yabara paca tsipaebatsi po coyene xua Nacom exanaena pon jiwi ewatsiya peitorobixaetsi po coyene bichocono wunae. Barapo coyene bara juta icha be ichi poxonae jiton warowan matowa jeita. Barapo warowan xua bapon jeita, pewun

perla. Bapon jeita pecomotsinexa tsane barapo warowan, po warowan ainya matoman. <sup>46</sup>Poxonae bapon cae warowaxuto taebota, po warowaxuto perla matawun xua bichocono ainya matoma, bapoxonae bapon pia botha pona matauta bapoxonae caenaeta daxita xua xuan pocotsiwa xeina. Bapoxonae comota po warowa bichocono ainya matoma, po warowa pewun perla. Bewa barichi jiwi. Bewa jiwi bichocono beita cui jichatsi xua pexeinaenexa peajuntuyapusuwa po peajuntuyapusuwa ataya tsiteca, icha poxonae pebin ichi xua pitaperlatsi piraichi daxita caenaeta pocotsiwan xeina”, jei Jesús.

**Meje yabara poxonae Jesús cuiduba  
jiwi pecayabara juta pepaebi  
diwesiyo xua pecayamonaewa yabara**

<sup>47</sup>Equeicha Jesús namchi, jeye: “Yabara paca tsipaebatsi po coyene xua Nacom exana pon jiwi ewatsiya peitorobixaetsi xua poxonae yabara paebina jiwi penatsicuentisixae abe peexanaexae. Barapo coyene bara juta ichi, icha be pocotsiwa xua xota jiwi yacamona duwei ichi. Jiwi peyacamonaewa xoya pepa mar mentha xua daxita duweimonaein tunto pecapirenaenexa. <sup>48</sup>Poxonae bichocono wuncaxuba xua peyacamonaewa pomonae peyaxunubiwi taetabo bejutaboreca. Bapoxonae enoundeca, xua naitaubiya tsana pejejebapon-aenexa. Po duwei pepa duwei tsana naitaubiya jejebapona corotontha. Po duwei pocotsiwa camatsawan bebai tsoponae. <sup>49</sup>Barapocotsi juta coyeneya ichi tsane poxonae matakabi patopeicaena, po mataqueitha xua poxonae nacua weraweracaena, matautano Nacom daxita yabara paebina jiwi penatsicuentisixae abe peexanaexae bapontha. Bapo

mataqueitha matatsunpiwi patsicaena xua daxita jiwi petsabinexa tsainchi, pomonae abe peexanae cuiru coyenein peexanae jiwi tsana nobinchi xua pomonae xanepanaya peexanae jiwi pia xainya weya tatsi. <sup>50</sup> Pomonae abe peexanae cuiru coyene peexanae jiwi bebai tsainchi isototha ichaxota jopa ataya itacounayiyo. Baraxota wecoyei tsane matautano baxota nantanuweya nantu jayabina”, jei Jesús.

**Meje yabara poxonae Jesús cuiduba jiwi pecayabara juta pepaebi diwesiyo xua pena peitupanaewa yawa xua peru peitupanaewa yabara**

<sup>51</sup> Nexata Jesús pijimonae yainyaba, jeye:

—¿Bara daxita baxuan payaputaneme xuaunxuae paca tsipaebatsi? jei.

Barapomonae Jesús jume notatsi:

—Aa, bara payaputan pocotsiwa xuaunxuae pana netsipaebame pon pata Tanecanamataxeinaemxaem, jei barapomonae.

<sup>52</sup> Bapoxonae Jesús pijimonaetha namchi, jeye:

—Pomonae pecuidubiwi Nacom pia peitorobi diwesi pomonae tamonaexae barapomonae yabara cuiduba ichamon-aetha xua po coyene Nacom exana pon itorobiya peewatsin jiwi. Barapomonae xeina ainya diwesi coyenewabe, po diwesi xua xan yabara, peru diwesi poxonae cataunxuae aibin tsica po cae pin nacuathe tsique yabara. Matautano xeina pena diwesi poxonae xua anoxuae poponan yabara. Barapo ainya diwesi coyenewabe barapomonae paeba jiwitha. Barapomonae bara be juta ichi icha be poxonae pon bo pexeinaein ichi. Poxonae piamonae tatsi nantawenona paparuwa yawa pexaewa, bapon baxua bara cata pijimonaetha, poxoru bapon jeba xua peruwa yawa xua penawa pi-amonae nexa, jei Jesús.

**Meje yabara poxonae Jesús Nazaret tomaratha popona**

(Mr 6.1-6; Lc 4.16-30)

<sup>53</sup> Poxonae Jesús najume weta xua cuiduba jiwi barapo pecayabara juta pepaebi diwesixi bapoxonae Jesús tomara weya pontaba. <sup>54</sup> Bapoxonae Jesús patopa pia tomaratha, po tomara pewun Nazaret tomara. Baraxota Jesús cuiduba jiwi, judiomonae pia penacaetutsi botha tatsi. Pomonae jinompa Nazaret tomaratha yabara najuntu coyene cabenaeca xua pocotsiwa Jesús cuiduba. Barapomonae natsipaeba, najei:

—¿Exota metha bapon nacuiduba jane, xua daxota bapon daxita peyaputaein? ¿Jintam metha pia peyapuwatha tatsi jane, poxonae po pet-sita itutsi coyene bapon exana? <sup>55</sup> Apara saya bapon pexanto tatsi pon xua pecobe coxonaein xua naepan pematobowiwa. Apara bapon pena tatsi María. Apara bapon Santiago pentapin tatsi, iru José pentapin tatsi, iru Simón pentapin tatsi, iru Judas pentapin tatsitu iru. <sup>56</sup> Matautano iru pamcho jiwi tatsi aparta jinompa barapo tomarathe. ¿Exota metha bapon nacuiduba jane, pocotsiwa xua beta naca cuiduba? jei barapomonae.

<sup>57</sup> Daxota barapomonae Jesús casebatsi pecui uwixaetsi. Barapomonae uwa tsipei Jesús bichocono peyaputaein. Jesús namchi jiwitha, xua nayabara paeba, jeye:

—Daxita jiwi ba baru cui itura jina pontha pon Nacom peitorobi jume pepaebin. Nama pia nacuapiwi tatsi iru pia bomonae matabuxuyomonaepiwi tatsi barapomonae ba jopa bapon baru cui itura jinaetsi, jei Jesús, xua nayabara paeba.

<sup>58</sup> Nazaret tomaratha, barapo tomaratha Jesús saya be conotha exana pexeinya petsita itutsi coyenewan tsipei

barapo tomarapiwi Jesús jopa jume cowantichi.

### Meje yabara poxonae Juan bexotsi

(Mr 6.14-29; Lc 9.7-9)

**14** Bapoxonae caena Herodes pon Galilea nacuapiwi, pia peyanacua ewatsinchi, bapon jume tane daxita pocotsiwa juinya xua Jesús exana. <sup>2</sup>Herodes tsipaeba pomonae petanacuichiwiwaetsi pia botha tatsi, xua Jesús yabara paebatsi. Herodes Jesús catsawiya yabara paebatsi, jeye: “Apara bapon Juan, pon jiw i Pebautisabin, pon bequein bayatha tupa, pon equeicha asu juina. Tsipei bapon peayapusu itorobi coyenewa xeina daxota petsita itutsi coyenewa exana”, jei Herodes.

<sup>3</sup>Baxua Herodes paeba tsipei caena bayatha Herodes cui itoroba xua Juan pewaetabinexatsi, matautano xua pemaxu cubinexatsi, matautano xua jiwi pecubi botha peetsinexatsi. Baxua Herodes exana tsipei piowa tatsi powa pewun Herodías, pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabuyo. <sup>4</sup>Juan bayatha paeba Herodesta, jeye: “Nacom pia peitorobi coyenewa jopa copatsiyo xua nexinaewa bapowa tsipei ichun piowa tatsi”, jei Juan.

<sup>5</sup>Daxota Herodes bichocono anaepana. Herodes ichichipa xua Juan pebexubiwatsi. Daichitha Herodes jopa baxua exanaeyo tsipei junuwa, jiwi cunuwatsi. Tsipei daxita jiwi nanta xeina xua Juan apara pon Nacom pia peitorobi jume pepaebin. <sup>6</sup>Ichitha poxonae Herodes yantacabi jopa po matabitha poxonae caena bayatha nowauncua, barapo mataqueitha pinmonae nacaetuta xua pexaewa

yabara nacaetuta pia xaetsi. Barapo penacaetutsiwi peitutha tatsi Herodías pexantiyo tatsi nawiraba. Herodes baxua bichocono ita cui xanepanatsi. <sup>7</sup>Herodes barapowa beya paeba, jeye:

—Nacom peitutha cata tsiwunae yabara paebatsi xua pocotsiwa tacacatsiwa tsainchi pocotsiwa xua tana newucaewam tsane tsipei inta pexeinya penawirabi coyene exaname, jei Herodes.

<sup>8</sup>Bapoxonae pocotsiwa pena itorobatsi barapowa Herodes wucatsi baxua. Bapowa namchi, jeye:

—Necare Juan pentasipa xua yutabore paratontha, pon jiwi Pebautisabin matasipa, jei Herodías pexantiyo tatsi.

<sup>9</sup>Ichitha baxua Herodes jume taya wecoyei tsanareca poxoru jopa ichipaeyo xua Juan petupaewa tsane. Tsipei mexeya poxoru bayatha Nacom peitutha peyabara tsiwunae paebixae xua bepa pinae catsina xua pocotsiwa pewucaewaxae tsainchi, matautano mexeya poxoru barapo pin bicheitha peitutha pepaebixae baxua, daxota itoroba xua bapowa bara catinchi baxua. <sup>10</sup>Daxota Herodes pomonae petanacuichiwiwaetsi, barapomonae Herodes cui itoroba xua Juan pewisi ucuibinexatsi jiwi pecubi botha iya. <sup>11</sup>Bapoxonae barapomonae paratontha matasipa yutabota yawa carendena. Bapoxonae Herodías pexantiyo tatsi catatsi, equeicha barapowayo xuya pena cata, Herodías catatsi, xua peyaputaenexa xua bara cou Juan bayatha tupa.

<sup>12</sup>Nexata pomonae Juan pia pepuna jinompaewichi, barapomonae pata jiwi pecubi botha. Juan petupaevin pitatsi. Barapoxonae barapomonae Juan muthutha xotsi. Barapoxonae barapomonae pona Jesús beya xua baxua Jesús peyabara tsipaebinexatsi.

**Meje yabara poboxonae Jesús apata  
pexaewa cinco mil pebiwi**

(*Mr 6.30-44; Lc 9.10-17; Jn 6.1-14*)

<sup>13</sup> Poboxonae Jesús yaputane xua Juan tupa, bapoxonae compa jeratha pona icha muxunene beya ichaxota jiwi ajibi. Ichitha jiwi yaputane xua ichaxota Jesús pona. Daxota pinmonae xua carepaya tomaranpiwi pecaewa iya pona, ichaxota Jesús ponaena jeratha. <sup>14</sup> Poboxonae Jesús jera wenontounya, bapoxonae Jesús pin bicheito tane. Jesús yabara nanta xeina barapomonae xua peyawe-naewa tsane. Bapoxonae Jesús axaibi exana peatenewi. <sup>15</sup> Tsipei yaitama bayatha tabopiya tsanaichaba, daxota Jesús imoxoyo caquita umenarucupatsi pijimonae. Barapomonae Jesús baraichichi, jeye:

—Apara bayatha tabopiya tsanaicha. Apara xote bomuxun ajibi. Barapo jiwi itorobare bu tsiqui tomaraxi beya ponaena xua pecomocaenexa pexaewa xua pexaenexa, jei.

<sup>16</sup> Jesús jume nota pijimonae, jeye:

—Apara jopa bewa pona barapomonae, paxam jame maisa paapare pexaewa, jei.

<sup>17</sup> Jesús jume notatsi pijimonae, jeye:

—Xote jopa pexaewa paxeinaeinyo. Saya apara cinco po panyobe paxeinan matauta saya ainyobe paxeinan duweiyobe, jei.

<sup>18</sup> Jesús jume nota:

—Painta xawena baxua, jei.

<sup>19</sup> Bapoxonae Jesús najume caitoroba xua bepa daxita barapo jiwi iratha taenaetsei. Bapoxonae Jesús pecobetha pita cinco po panyobe yawa xua barapo duweiyobe xua ainyobe. Jesús peitaboco benecoicha yawa Nacomtha tsipaeba, jeye: “Axa, juntu coyene weiweinan xua pexaewa pata tanecatxiwaxaem”, jei. Poboxonae Jesús najume weta xua Paxatha

tsipaeba, bapoxonae pan epa janaca, yawano duwei epa janaqueba. Bapoxonae Jesús pijimonae caitoroba pexaewa xua pijimonae tatsi xuya pecacataponaenexa barapo jiwi. <sup>20</sup> Daxita barapo jiwi nabane beya barapo jiwi jain cowuntarucupatsi. Bapoxonae Jesús pijimonae tatsi doce po cote matabuxuyobe wunba xua bayatha nacopaba pocotsiwa xua bayatha barapo jiwi jopa xaeyo petonsanaexae. <sup>21</sup> Pomonae xua pexaewa nabane barapomonae cinco mil pebiwi. Yabuxino iru nanabane. Matautano pexuino iru nabane. Daichitha jopa ununaetsi pexui matauta yabuxi jopa ununaetsi.

**Meje yabara poboxonae Jesús  
mene matatsun jumatha pona**

(*Mr 6.45-52; Jn 6.16-21*)

<sup>22</sup> Nexata bapoxonae Jesús jera beitorobiya pijimonae, xua pijimonae copiya petsiwana warapaenexa tsainchi icha muxunene beya xua pucua iya. Poboxonae barapomonae ponarucupaba bapoxonae Jesús barapo jiwi pu itoroba xua penawibiyaenexa pia tomaran beya. <sup>23</sup> Bapoxonae Jesús demxuwa beicha pona xua baxota compa petsipaebinexa Nacomtha. Poboxonae quirei tsuxubi Jesús demxuwa compa eca. <sup>24</sup> Poboxonae Jesús Paxa tsipaebauya, bapoxonae caena iruru Jesús pijimonae tatsi cataunxuae tuwutha yana pona. Jera maratsaca caewa carena tsaibi tsipei joibo dawerena daunwei. <sup>25</sup> Mataquei wunaeyo Jesús mene matatsun jumatha pona, pijimonae itiya pona. <sup>26</sup> Poboxonae Jesús pijimonae taerucupatsi, barapomonae nanthuthu cui coyene nabenaeca. Junuwiya wawaya jeye:

—¡Pai jaibo, jina! ¡Apara dowatsi! jei barapomonae.

<sup>27</sup> Jesús pijimonaetha caena nainya tsipaeba, jeye:

—¡Apara xan! ¡Jopa pajunuwinda!  
¡Maisa pajuntũ coyene weiweinare! jei  
Jesús.

<sup>28</sup> Bapoxonae nexata Pedro Jesús  
baraichichi, jeye:

—Tanecanamataxeinaem, icha bara  
metha xam yatsicaewa bapom, moya  
neitorobare xua mene matatsun juma ta-  
iyaenexa nexainya beya, jei Pedro.

<sup>29</sup> Jesús jume nota, jeye:

—¡Moya anetha denande! jei Jesús.

Nexata Pedro mene matatsun juma  
nontabiya dunareca jera wereca. Bara  
Pedro mene matatsun juma iya pona  
pepatopaenexa Jesús pia xainya beya  
tatsi. <sup>30</sup> Daichitha poxonae Pedro  
yabara nanta xeinanareca pin joibo,  
bapoxonae bichocono junuwanareca.  
Daxota bapoxonae Pedro yamene  
jopareca. Bapoxonae Pedro jume  
daunweya wawaya jeye:

—¡Tanecanamataxeinaem, necapane-  
pare, nepitaxuina! jei.

<sup>31</sup> Bapoxonae Jesús nainya cobe  
pitaxuina. Jesús namchi, jeye:

—¡Maisa be conotha neyabara jume  
cowantame xua bara tana neitacupaewa  
xua tacayawenaewa tsainchi! ¿Eta xua  
metha ainya juntũ coyeneintha nanta  
xeiname? jei Jesús.

<sup>32</sup> Poxonae Jesús irũ Pedro  
nontabiyabe jeratha, Jesús bapoxonae  
joibo yainjei tsanaya exana. <sup>33</sup> Daxita  
pomonaer jeratha ena, barapomonae  
Jesús wunae jaintatsi. Barapomonae  
Jesús baraichi, jeye:

—Bara yatsicaya apara xam Nacom  
Pexantom tatsim, jei barapomonae.

**Meje yabara poxonae Jesús axaibi  
exana pomonaer peatenewi,  
pomonaer Genesaret nacuapiwi**

(Mr 6.53-56)

<sup>34</sup> Bapoxonae Jesús irũ pijimonae tatsi  
jeratha yana enapona beya poxonae  
Genesaret nacua beya pata. <sup>35</sup> Pomonaer

baxota jinompa, barapomonae Jesús  
caena yaitainchi. Daxota barapomonae  
najume caitoroba ichamonaetha daxita  
barapo Genesaret nacuapiwitha beya,  
xua Jesús pepatopaexae. Bapoxonae  
daxita jiwi carendena peatenewi  
ichaxota Jesús pucua itapatha uncua.  
<sup>36</sup> Barapomonae pomonaer peatenewi  
Jesús jume daunweya wũcatsi, xua  
Jesús bara pecui copatsinexa xua bara  
petajayabinexatsi pia paparuwa tatsi  
xua peopirawa. Bapoxonae daxita  
barapomonae axaibi tsane. Pomonaer  
Jesús pia paparuwa tajayabatsi daxita  
barapomonae equeicha axaibi exanatsi  
pocotsiwa bayatha atene.

**Meje yabara poxonae Jesús yabara  
paeba xua pebin abe pia peexanaer  
cuiru coyene juntũ coyene webocatsi**

(Mr 7.1-23)

**15** Fariseomonae irũ pomonaer  
jiwi pecuidubiwi Moisés pia  
peitorobi coyene tatsi, barapomonae  
jiwana Jerusalén tomara werendena.  
Barapomonae Jesús imoxoyo caquita  
umenarucupiya yainyabatsi, jeye:

<sup>2</sup>—¿Eta xua metha jinyamonae jopa  
exanaeyo xua pocotsiwa wamo susato  
jiwi pia peitorobi cui coyenewatha  
itoroba? Barapomonae pomonaer jinya-  
monae barapo cui jopa exanaeyo. Bara-  
pomonaer jopa matha tsiwanaya nacobe  
quiateibiyo poxonae beya xaiba xua jopa  
penataxobinexa tsane pia juntũ coye-  
newantha, jei daxita fariseomonae, irũ  
pomonaer jiwi pecuidubiwi Moisés pia  
peitorobi coyene tatsi.

<sup>3</sup> Nexata Jesús xuya yainyaba, jeye:

—Irũ paxamda, ¿eta xua metha jopa  
paexanaem pocotsiwa Nacom Pejume  
Diwesitha itoroba? ¿Eta xua metha saya  
meisa paexaname pocotsiwa painya amo  
susato jiwi pia peitorobi cui coyenewan-  
tha tatsi itoroba? <sup>4</sup> Jopa bewa paex-  
anaem tsane painya amo susato jiwi pia

peitorobi coyenewa tatsi po peitorobi coyenewa paca tsita ainya cui bichocono beyacaincha xua Nacom Pejume Diwesi. Tsipei Nacom Pejume Diwesitha jeye: ‘Axatha barũ cui itura jinare, irũ enatha barũ cui itura jinare’, jei Nacom. Yawa equeicha Nacom jeye: ‘Pon paxa abe yabara paeba matautano xua pena abe yabara paeba, bapon bewa tũpaena’, jei Nacom Pejume Diwesitha. <sup>5-6</sup>Ichitha paxam ba papae-bame xua pinae pebin ba itacũpatsi xua pepaebiwa xua pejeiwa paxatha yawa penatha: ‘Jopa neitacũpaeyo xua tapaca cayawenaewatsi bara bequein paacopeibim, tsipei daxita pocotsiwa xeinan baxua yabara tsiwũnae pae-ban xua Nacomtha bexa catsin’, xua pejeiwa. Matautano ba pajam: ‘Pon bapocotsiwa paeba, jopa nantawenonaeyo xua paxa yawenaena. Matauta jopa nantawenonaeyo xua pena yawenaena bara bequein acopeibi taetha’, ba pajam. Poxonae baxua pacaunutsiya paebame paxam pacana exaname xua painya amo susato jiwi pia peitorobi cui coyenewa tatsi bichocono ainya cui coyene, beyacaincha xua Nacom Pejume Diwesi xua ainya cui coyene. <sup>7</sup>Itara mexeya pomonae xanepanaeya pepaebi jiwi pam, daichitha apara peajuntũcoyenebe jiwi pam! Bara apara Isafas caena bayatha xaniwaicha paca yabara paeba pon Nacom peitorobi jume pepaebin. Bapon paca yabara jeye poxonae tina pejume diwesitha:

<sup>8</sup>Barapomonae itara be xanepanaeya neyabara

peabina jiwitha xua pinae neyabara barũ cui itura jina.

Daichitha barapomonae pia juntũ coyenewatha jopa xaniwaicha neyabara barũ cui itura jinae tsane.

<sup>9</sup>Bequein barapomonae newũnae jainteibina

poxonae nacaetuteibina, daichitha baxua jopa yawenae tsaiibi tsainchi tsipei barapomonae peajuntũcoyenebewi.

Matautano tsipei po peitorobi coyenewa cuidubina jiwitha, apara jopa taitorobi coyenewiyo tsane, apara xua saya jiwi barompaya pia peitorobi coyenewa tatsi tsane’,

jei Isafas xua paca yabara paeba, jei Jesús.

<sup>10</sup>Nexata bapoxonae Jesús waba daxita jiwi xua imoxoyo peumendenaenexa. Yawa namchi barapo jiwitha, jeye:

—Pana nejume naitaeware, painya neyaputaenexa pocotsiwa paca tsipae-batsi. <sup>11</sup>Pocotsiwa ba pebin pecoiboto deca tsijain jojonecatsi pexaewan, bequein jopa tsiwũnaeya matha nacobe quiatsiyo poxonae xaiba, barapo coyene apara ba jopa bapana pebin juntũ coyene taxobichi xua poxonae pocotsiwa pexaexae. Jame pocotsiwa ba pebin pecoibototha caunuta, xua peabe jume barapo jume coyene apara pebin juntũ coyene taxobatsi xua poxonae pecueicueijeixae baxua, jei Jesús.

<sup>12</sup>Nexata Jesús imoxoyo caquita ume-narũcupatsi pijimonae. Jesús pijimonae yainyabatsi, jeichichi:

—¿Bara yaputaneme xua fariseomonae cayabara muxu coniquiya anaepana, xua nepaebixae baxuan? jei.

<sup>13</sup>Jesús jume nota pijimonae, jeye:

—Taxa pon peitabocotha peecaexae xubina pon jopa pejume cowũntsinchi. Taxa barapocotsi jũta coyeneya cana ichi tsane jiwitha icha pebin ichi xua poxonae pabitha pona, matauta poxonae naeyo tabũ opina jonta daxita, pexubinexa. <sup>14</sup>Bara barabũ neyabara muxuconacaena, fariseomonae. Jopa payabara jume naitaewatsinde pocotsiwa barapomonae paeba.



Tsipei barapomonae jopa xanepanaya peyawenae jiwi ichamonaetha. Barapomonae barapocotsi juta coyeneya exana, icha be pon peitata nacutsin ichi, xua poxonae matabapona ichun xua pon peitata nacutsin matabapoinchi. Bapoxonae barapo cae peitata nacutsinbe napuna joparecabe muthutha deca, jei Jesús.

<sup>15</sup> Nexata Pedro Jesús baraichi, jeye:

—Yabara pana yaputane exande po pecayabara juta pepaebi diwesiyo xua pexaewa yabara, jei Pedro.

<sup>16</sup> Jesús biataeya jume nota pijimonae, jeye:

—¿Paxam bara paichimdu icha jiwi ichi? ¿Cataunxuae jopa painya yaputae jiwi pamdu? <sup>17</sup> Bayatha paxam payaputaneme pocotsiwa pebin tsijain jojonecatsi pexaewa pecoiboto deca baraxua jopa juntu coyene taxobichi, tsipei barapo pexaewa jopa ponaeyo pia juntu coyenewatha. Jame barapo pexaewa pecotsorotha pona, bapoxonae nawexacaeca. <sup>18</sup> Ichitha pocotsiwa pecoiboto tsina caunuta peabe jume, baxua apara seicaya pejuntu coyene wetsina jume pichapa. Tsipei baxua penanta xeinae coyenewa, daxota pebin abeya paeba. Daxota Nacom tsitatsi xua bapon peajuntucoyenebein Nacomtha. <sup>19</sup> Tsipei pejuntu coyene wetsina jume pichapa pocotsiwa abeya penanta xeinae coyenewan, pocotsiwe meje: Ichun anaya pebexotsi coyenewa, iru ichun piseuri tatsi pepichi coyene, iru peita coxanae coyenewatsi coyene xua poxonae penayaputae jiwi naperu nacoyoba, iru ichun piawa tatsi pecaibi coyene, iru ichun yabara penaerabiwatsi coyene, iru ichun yabara peabiwatsi coyene. <sup>20</sup> Nacom tsitatsi xua daxita barapocotsi coyenein pebin ajuntucoyenebe exanatsi xua juntu coyene taxobatsi xua daxota jopa itacupaetsi xua beta exana. Ichitha

pocotsiwa pebin nabane matautano xua poxonae bequein tsiwanaya matha jopa nacobe quiatsiyo, barapocotsi coyenein pebin jopa juntu coyene taxobichi Nacom peitutha tatsi, jei Jesús.

**Meje yabara poxonae yabuyo powayo penanapaincha poponaewayo Jesús jume cowuntatsi**  
(Mr 7.24-30)

<sup>21</sup> Nexata bapoxonae Jesús barapo ira weya warapa Genesaret nacua weya. Matautano pona icha nacua beya po nacuatha ichaxota Tiro tomara eca yawa Sidón tomara ecano. <sup>22</sup> Yabuyo, powayo barapo cananeamonaewayo patopa Jesús pia xantha tatsi. Bapoxonae barapowa wawaya Jesustha jeye:

—¡Tanecanamataxeinaem, David pia pemomoxi susato jiwi jiwanam! Neyabara najuntu cui coyene cananta xeinare, xua tana neyawenaenexam tsane. Taxantiyo inta cauri xeina; inta bichocono atene exanatsi, jei bapowa.

<sup>23</sup> Daichitha Jesús jopa jume notsiyo, saya moya uncua. Nexata bapoxonae Jesús imoxoyo caquita umenarucupatsi pijimonae. Matautano jume daunweya baraichichi pijimonae, jeye:

—Barapowa itawere, tsipei barapowa waputha jume daunweya wawai, jei.

<sup>24</sup> Nexata Jesús jume nota pijimonae, jeye:

—Nacom meisa saya neitoroba Israel piamonae susato saineiwitha pomonae judiomonae xua tayawenaenexa barapomonae, tsipei barapomonae Nacom tsitatsi xua barapomonae nacabeta icha be ovejan ichi xua poxonae pipato napuxanompa, jei.

<sup>25</sup> Ichitha barapowa pentabocotha uncua yawa irabe taeuncuareca Jesús peitabaratha tatsi tsipei bapowa baru cui itura jina peauraxae, yaitama tsipei Jesús pon jiwi pepa

Pecanamataxeinaein. Bapowa namchi, jeye:

—¡Pon Tanecanamataxeinaem, neyawende! jei.

<sup>26</sup> Jesús jume nota barapowa, jeye:

—Jopa xanepanaeyo icha matha cayawenatsi powayo nenanapaincha poponaewayom poxonaе cataunxuae matha jopa yawenaeyo pepa tamonaе judiomaе. Icha baxua exanaetsipan, bapoxonaе be pitan pexui pia pexaewa таапatsinexa aurimonaе, jei.

<sup>27</sup> Barapowa Jesús jume notatsi, jeye:

—Aa, bara barichi xuaunxuae netsipaebame ponxaem Tanecanamataxeinaem. Jopa bewa auri catsibi pexui pia pexaewa tatsi, yaitama auri iru xane pocotsiwa pexui sorobaba barapo pepuruxi pocotsiwa pexaethopaewa pebuxupana tsica. Daxota bara ichiya neichinde: Neyawende, tsipei bara neayapusu itorobi coyenewa nawita xeiname jinya axaibi exanaenexa judiomaе. Po neayapusu itorobi coyenewa judiomaе jopa canantawenonaeyo barapo neayapusu itorobi coyenewatha inta axaibi exande taxantiyo, jei.

<sup>28</sup> Nexata Jesús jume nota, jeye:

—¡Yabuyo, maisa bichocono neyabara jume cowantame xua bara tana neitacupaewa xua tacayawenaewatsi tsainchi! Bara cata exainchi pocotsiwa aunxuae newucame, jei Jesús.

Poxonaе Jesús baxua paeba, bapoxonaе nainya barapo yabuyo pexantiyo tatsi таaxaibi tsuxubichi.

### **Meje yabara poxonaе Jesús axaibi exana pin bicheitomaе peatenewi**

<sup>29</sup> Nexata bapoxonaе Jesús bara weya pona. Galilea pucua itapa iya pona. Bapoxonaе demxuwa icha juinya, baxota ecopa. <sup>30</sup> Ichaxota Jesús eca baxota pin bicheito jiwi ayei pata. Barapo bicheito jiwi carendena

pejayujayujeiwi, iru peitata nacutsi jiwinо, iru pemuxusipanaewino, matauta pomonaе iru peacowaebi jiwi xua pomonaе jopa xeinaeyo xua xota nacowaeba. Matautano iru icha bicheitomaeno, pomonaе peatenewi. Pomonaе peatenewi Jesús pexainya tajebarecatsi. Daxita barapomonaе Jesús axaibi exana. <sup>31</sup> Poxonaе daxita jiwi baxua cui tane, pomonaе jopa judiomaе naexanaeyo daxita barapo jiwi yabara cui coyene nanthuthu cabenaeca. Bapoxonaе Jesús xanepanaya peexanaexae, barapomonaе Nacom wunaе jaintatsi, po Nacom Israel nacuapiwi pia Nacom tatsi. Daxota barapomonaе baxua exana, tsipei Jesús equeicha paeba cana exanaeya exana pomonaе pemuxusipanaewi. Matauta tsipei Jesús taduba exana pomonaе bayatha jopa xeinaeyo xua xota nacowaeba. Matautano tsipei pomonaе pejayujayujei jiwi equeicha beta pona. Matautano tsipei pomonaе peitata nacutsi jiwi equeicha beta tane.

### **Meje yabara poxonaе Jesús pexaewa апата cuatro mil pebiwi**

*(Mr 8.1-10)*

<sup>32</sup> Nexata Jesús waba pijimonaе, jeye:

—Yabara cui cananta xeinan barapo pin bicheitomaе tayawenaenexa, tsipei barapomonaе acoibi po matabiyobe jinompa taxantha, maisa ajibi xua barapomonaе penabanaewa tsane. Jopa jainbotha bepu itorobinyo pia bon beya tatsi, tsipei icha barapomonaе jainbotha pu itorobichipan, metha piyain namtotha xuirabathopaetsipa, jei Jesús.

<sup>33</sup> Jesús baraichi pijimonaе, jeye:

—Xote ira xuepana susato tsurucuae nacua ichaxota jiwi ajibi. ¿Eta beya tsijeitinchi pexaewa barapomonaе pomonaе pinmonaexae? jei.

<sup>34</sup> Jesús yainyaba pijimonaе jeye:



muxuweta pijimonae xua jopa pejume cowantsinexa tsane fariseomonae iru saduceomonae pia pecuidubiwa coyenewa tatsi po pecuidubi coyenewa jopa Jesús pia pecuidubi coyenewa tatsi. Jesús jeye:

—Dota pam jopa pajume naitaewatsinde fariseomonae pia pecuidubi coyenewa tatsi xua painya nejume cowantsiyainwa. Matauta dota pam xua saduceomonae pia pecuidubi coyenewa tatsi xua painya nejume cowantsiyainwa. Barapo pecuidubi coyenewan jiwi ichawa beya ajuntucicoyenyapube cana exanapoinchi icha be pocotsi coyene ichi xua levadura matawun xua pan cotowa exanapona beya poxonae pin pan, jei Jesús.

<sup>7</sup>Poxonae Jesús yabara paeba pocotsiwa xua pan cotowa exana, bapoxonae Jesús pijimonae tatsi catsawiya nanta xeinaeya natsipaeba caemonae, najei:

—Metha Jesús daxota baxua paeba metha poxoru yaitama jopa caponaetsi pan, najei barapomonae.

<sup>8</sup>Jesús yaputane pocotsiwa barapomonae natsipaeba, daxota Jesús barai, jeye:

—Pocotsiwa pana natsipaebame xua jopa painya necaponaexae pan, apara poxoru jopa pana nejume cowantsim.

<sup>9</sup>¡Cataunxuae jopa pana necui yabara yaputaem! Paxam pana necui yabara juntemainame poxonae cinco mil pebiwi apatan pexaewa xua yabara juntemainame poxonae saya cinco po panbe. Matautano pana necui yabara juntemainame poxonae equeicha doce po cotebe pawwunbaponame pocotsiwa jiwi jopa xaeyo. <sup>10</sup>Matautano paxam pana necui yabara juntemainame xua poxonae cuatro mil pebiwi apatan pexaewa xua poxonae saya siete po panbe. Matautano pana necui yabara juntemainame poxonae equeicha siete po cotebe pawwunbaponame pocot-

siwa jiwi jopa xaeyo. <sup>11</sup>Matautano jopa payaputaem xua poxonae yabara paca tsipaebatsi fariseomonae pia pecuidubi coyenewa tatsi, iru saduceomonae pia pecuidubi coyenewa tatsi, apara jopa pan yabara paca tsipaebichi xua jopa painya necaponaexae, jei Jesús.

<sup>12</sup>Bapoxonae matapainya Jesús jume yaputaerucupatsi pijimonae, xua apara yabara paeba fariseomonae pia pecuidubi coyenewan yainwa tatsi, iruru saduceomonae pia pecuidubi coyenewan yainwa tatsi. Matautano matapainya yaputaerucupa xua apara Jesús jopa yabara paebiyo pocotsiwa pan cotowa exana.

**Meje yabara poxonae Pedro namchi  
Jesustha jeye: “Xam apara  
Mesías Nacom caitorobica”, jei**

*(Mr 8.27-30; Lc 9.18-21)*

<sup>13</sup>Bapoxonae pirapae Jesús pona. Poxonae Jesús patopa Cesarea de Filipino tomara pecuariya xua pepa tomaratha, bapoxonae Jesús yainyaba pijimonae, jeye:

—¿Eta po jiton, po jiton xua jiwi yabara paeba xua pinae bapon Nacom pia Peitapetsin tatsi? jei Jesús.

<sup>14</sup>Jesús jume notatsi pijimonae, jeye:

—Ichamonae cayabara jeye: ‘Apara bapon Juan pon jiwi Pebautisabin, pon equeicha petupaein asu juina’, jei. Iru ichamonae cayabara jeye: ‘Apara bapon Elías pon equeicha petupaein asu juina’, jei. Iruru ichamonae cayabara jeye: ‘Apara bapon Jeremías pon equeicha petupaein asu juina’, jei. Iruru ichamonae cayabara jeye: ‘Apara bapon jiwana pomonae Nacom peitorobi jume pepaebiwi’, jei, jei Jesús pijimonae tatsi.

<sup>15</sup>Nexata Jesús pijimonae barai, jeye:

—¿Incane iru paxamdu? ¿Eta pana neyabara jumichimdu xua xan eta pondun? jei Jesús.

<sup>16</sup> Simón Pedro Jesús jume notatsi, jeye:

—Xam apara Mesías. Nacom caitorobica, pon asu popona. Xam apara Nacom Pexanto tatsim, jei Simón Pedro.

<sup>17</sup> Jesús barai, Simón Pedro baraichi, jeye:

—Simón, Jonás pexantom, maisa Nacom cajuntu coyene weiweina exana, tsipei bapana jiton bapocotsiwa jopa cacuidubi pocotsiwa xua tana neyabara paebiwam. Saya apara meisa Nacom, Taxa, cacuiduba baxua pocotsiwa tana neyabara paebiwam, pon itabocotha eca. <sup>18</sup> Pocotsiwa xua tana neyabara paebiwam baxua natsita jume itapeinya xeiname xua bichocono tana necui yabara jume cowuntsiwam. Daxota cawun dutatsi po wun xua jei: ‘Pedro’, jei, po wun caunuta xua jei: ‘iboto’, jei, tsipei ba iboto bichocono mata daunwei. Pocotsiwa xua xainyeya neyabara paebame baxua be iboto coyene jutiya paebame poxona jam: ‘Xam apara Mesías. Nacom caitoroba, pon asu popona. Xam apara Nacom Pexanto tatsim’, jam. Daxita pomona xua neyabara jume cowanta barapo pexainyeya jume tana neyabara paebiwathaxaemxae, barapomona tajiwiwimona exanaein. Tajiwiwimona catsin taayapusu itorobi coyenewa xua barapo tajiwiwimona jopa peamanayabinexa tsainchi pia peaitafaetabi jiwichi pomona petupa cuiru nacua beya ponaena. <sup>19</sup> Xam Pedrom, cacatinchi taayapusu itorobi coyenewa xua copiyam tsane caponaename tajume diwesi xua xan yabara ponxaein Mesías, ponxaein Nacom Pexanton. Barapo tajume diwesi caponaename judiomonaetha matautano caponaename pomonaetha pomona jopa judiomona naexanaeyo. Matautano xam pon tajitonxae, pocotsiwa xam jopa copatsim barapo cae

pin nacuathe, xua pocotsiwa tamona exana, baxuan bara iru Nacom jopa copatsiyo pia peitorobi nacua beicha xua barapomona bara peexanaenexa baraxua. Pocotsiwa copatame xua tajiwiwimona peexanaenexa barapo cae pin nacuathe, bapocotsiwa iru Nacom copata pia peitorobi nacua beicha xua barapomona bara peexanaenexa baxua, jei Jesús.

<sup>20</sup> Nexata Jesús pijimona muxu barai xua pijimona jopa peyabara pepaebinxatsi ichamonaetha baxua xua po coyene bapon apara Mesías.

**Meje yabara poxona Jesús  
nayabara diwesi paeba po  
coyene xua petupaewa tsane**

*(Mr 8.31–9.1; Lc 9.22–27)*

<sup>21</sup> Bapoxona barapo matacabi weya Jesús tamropata pitaba xua pijimonaetha tsipaeba pocotsi coyene Jesús cana exanaeinchi ichamona, jeye:

—Bewa ponaein Jerusalén tomara beya ichaxota pitiri jiwi, iruru sacerdotemona pia pentacaponaei tatsi, iruru pomona jiwi pecuidubiwi Moisés pia peitorobi coyene tatsi, daxita barapomona bichocono neperaxa jubina. Matautano barapomona nebexubina. Daichitha poxona acoibi po matacabiyobe tsuxubi tsane equeicha Nacom tatupaen asu neexanaena, jei Jesús.

<sup>22</sup> Ichitha bapoxona Pedro, Jesús baru natsixitabatsi aisowa beya. Pedro Jesús baraichichi, jeye:

—Xam pon Necanamataxeinaem. ¡Jamaisa daxua paebameno, bara! Nacom jopa copatsi tsane xua jiwi cata exanaena baxua, jei Pedro.

<sup>23</sup> Nexata Pedro peitabara beya tatsi Jesús napatomeicha cauncuatabiya namchi, jeye:

—¡Xam newepu natsixitabare, tsipei be Satanám! ¡Nejuntu coyene jutame xua jopa xanepanaya taexanaewa tsane

neichaxaibixae xua tatsitupaewa tsane jiwil! Xam saya abe nanta xeiname icha pebiwi ichi. Saya jopa nanta xeinaem pocotsiwa Nacom necayabara nanta xeina xua tatsitupaewa tsane jiwil, jei Jesús.

<sup>24</sup> Nexata Jesús barai pijimonaе, jeye:

—Icha pebin ichichipa xua tajiwimonaе jiwana pin penaexanaewa tsane, bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonaе jame bapon bewa eexanaponaе pocotsiwa itoroban, bequein bara bapon bexotsi ichamonaе, tajiwimonaе jitonxae. <sup>25</sup> Pon naantobeya nata exana pocotsiwa bapon ichichipa, bapon jopa xeinaeyo peajuntuyapusuwa, po peajuntuyapusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacua beicha. <sup>26</sup> Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyenesuwa po peajuntucoyenesuwa ataya tsiteca, bapoxonaе bapon jopa itacupaetsi xua penajuntu coyene capanepaewa xua jopa peweraweracaewa. Tsipei pebin jopa itacupaetsi xua barapo copeitha matomatsina Nacomtha xua bapon pecatsinexa tsainchi peajuntucoyenesuwa xua barapoxonaе pepatopaewanexa tsane Nacom pia nacua beicha tatsi. <sup>27</sup> Tsipei xan ponxaein Nacom Tananeitapetsin bewa yawa muxuna patopeicaein Nacom pia peitupanaewa tatsi. Matauta matatsunpiwi baru patopeicaein. Daxita carepaya jiwitha catsibin pocotsiwa peyabara cui matomatsiwatsi. Pomonaе jopa xapain exanaeyo ichamonaetha xuya barapocotsi coyeneya exanaein

xua antomabeya catsin. Pomonaе xua xanepanaya exana ichamonaetha pocotsiwa cui itoroban xuya barapocotsi coyeneya exanaein matoma xanepanaya catsibin. <sup>28</sup> Bara xaniwaicha paca tsipaebatsi xua pomonaе xote umene barapomonaе jiwana abu, copiya matha yabara yaputaena poxonaе xan ponxaein Nacom Tananeitapetsin tamropata pitabin xua itorobiya taewatsiwa tsane pomonaе tana nejume cowantsiwi, jei Jesús.

**Meje yabara poxonaе Jesús  
pijimonaе peitutha pexeinya  
itupanaе coicha tsanaya naexana**

*(Mr 9.2-13; Lc 9.28-36)*

**17** Poxonaе seis po matabibibe jopa, po matababin weya poxonaе Jesús paeba baxua, bapoxonaе icha matabibitha Jesús pona demxuwath beicha. Pedro Jesús baru pona, iruno Santiago Jesús baru pona, iruno Juan Jesús baru pona, pon Santiago peweicho tatsi. Barapo acoibi poyobe Jesús matabapona demxuwatha, po demxuwatha bichocono taucha ichaxota jiwaibi. <sup>2</sup> Baxoteicha daxita Pedrobaru peitutha tatsi Jesús pexeinya itupanaе coicha tsanaya. Bichocono itabara daedaena icha be xometo ichi poxonaе pentha. Matautano pocotsiwa penama xatatsiwa bichocono inyapana tsanaya icha pecoicha ichi. <sup>3</sup> Bapoxonaе Pedrobaru taerucupa Moisés iru Elías xua baponbe Jesús baru cueicueijeichibe. <sup>4</sup> Bapoxonaе Pedro namchi Jesustha, jeye:

—Pata Tanecanamataxeinaem, maisa wunaе xua xote pata umenaewa. Icha ichichipame, bapoxonaе pacata acab-inchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

<sup>5</sup> Poxonaе cataunxuae Pedro cueicuei-jei, xua Jesús baru cueicueijeichi, bapox-

onaе dаxita barapomonaе bеmatawа-  
caicha taruneicatsi tsaquinaebowa po  
tsaquinaebowa bichocono pentha. Nex-  
ata barapomonaе tsaquinaebowatha pe-  
jume jume tane xua Nacom namchi,  
jeye: “Bapon apara Taxanto, pon bi-  
chocono antobein, pon itapetan. Bapon  
bichocono neјantу coyene weiweina ex-  
ana. Bapon beta pajume taema pocot-  
siwa paca tsipaeba”, jei Nacom.

<sup>6</sup>Poxonaе Jesús pijimonaе tatsi  
jume taerуcуpa baxua, bapoxonaе  
barapomonaе pia coutha iratha  
nabeбeяa, irabe taеbobendeca.  
Barapomonaе bichocono pijunuwi.  
<sup>7</sup>Bapoxonaе Jesús pijimonaе imoxoyo  
caquita uncuataba yawa pijimonaе  
warуba, jeye:

—Panonobaponde, painya xoba pa-  
jунuwame, jei Jesús.

<sup>8</sup>Poxonaе barapomonaе neco-  
barуcуpa beяa meisa Jesús compa  
uncua, ichamonaе aichurubenaе.

<sup>9</sup>Poxonaе Jesús pijimonaе бару dune-  
ica demxuwa wetsica, pijimonaе barai,  
jeye:

—Ichamonaetha jopa baxua patsi-  
paеbinde pocotsiwa aunxuae pataneme  
xuaunxuae paca tsita itutatsi, beяa  
abу poxonaе xan ponxaein Nacom  
Tananeitapetsin equeicha asun popon-  
aein tatupae coyene weya, jei Jesús.

<sup>10</sup>Nexata Jesús yainyabatsi pijimonaе,  
jeye:

—Pomonaе jiji pecuidubiwi Moisés  
pia peitorobi coyene jeye: ‘Mesías matha  
tsiwanaya patopaeinchi Elías’, jei. ¿Eta  
pocotsiwa metha jane? jei Jesús pi-  
jimonaе tatsi.

<sup>11</sup>Jesús jume nota, jeye:

—Bara xainyei, copiya matha netsi-  
wanaya patopa pon icha be Elías ichi.  
Matautano bapon cana exana jiwitha  
xua jiji cana јuntу coyene weta exanaya  
exanatsi xua tana neјume cowuntsiwa  
tsane xua tapatopaewa tsane. <sup>12</sup>Ichitha

xan paca tsipaebatsi xua bayatha apara  
patopa pon copiya matha netsiwanaya  
patopa pocotsin xua icha Elías ichi. Pox-  
onaе bapon bayatha patopeica jiji jopa  
yaitaeyo bapontha pon icha Elías ichi.  
Saya barapo jiji bapon abe cana ex-  
anatsi be pocotsi coyeneya ichichipa  
beяa poxonaе bapon yatsicaya bexotsi.  
Icha bapon ichichi xua poxonaе cana ex-  
anatsi, barapomonaе bara neichi tsane  
ponxaein Nacom Tananeitapetsin. Bara-  
pomonaе irу neбexubina, jei Jesús.

<sup>13</sup>Jesús pijimonaе tatsi matapainya  
yaputane xua poxonaе Jesús pijimonaе  
tsipaeba Elías yabara, apara xua Juan  
yabara paebatsi pon jiji Pebautisabin.

### **Meje yabara poxonaе Jesús cauri taitaweta xua pewowin xeina**

(Mr 9.14-29; Lc 9.37-43)

<sup>14</sup>Poxonaе demxuwa weya pona,  
bapoxonaе Jesús pijimonaе бару patopa  
ichaxota pin bicheito jiji jinompa.  
Bapoxonaе pebin Jesús imoxoyo caquita  
uncatabatsi. Bapon pentabocototha  
uncua Jesús peitabaratha tatsi. Bapon  
Jesús baraichi, jeye:

<sup>15</sup>—Tanecanamataxeinaem, inta  
taxanto yabara najantу coyene xeinare  
xua jinya neyawenaenexa. Taxanto inta  
waetabatsi cauri. Inta papai exanatsi.  
Inta coibo thamthamei exanatsi.  
Matayaiba exanatsino. Matautа isototha  
inta bebai tsaibichino. Matautano  
mentha inta bebai tsaibichino.  
<sup>16</sup>Bequein barapo taxanto xote  
caponanje jinyamonaetha yawa janje:  
‘Painta taxanto taitawere cauri’, jan,  
daichitha jopa itacupaetsi xua taxanto  
petaitawetsinexatsi cauri, jei bapon.

<sup>17</sup>Jesús namchi daxita barapomon-  
aetha, jeye:

—¡Paxam barapomonaе pam  
pomonaе jopa xapain cataunxuae  
pana neјume cowuntsim! ¡Paxam  
barapomonaе pam, peajuntucoyenebe

jiwi pam! ¿Eta po weibe nantawenonan xua bewa tapaca baru ecaewatsi tsainchi xua beya poxonae tapana nejume cowuntsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Inta xawena pewowin, jei Jesús.

<sup>18</sup> Bapoxonae Jesús itaweta cauri, matautano pewowin wepu ponatsi exanatsi. Barapo pewowin nainya axaibi tsuxubi.

<sup>19</sup> Bapoxonae pirapaeyo Jesús compa tsipaebatsi pijimonae. Jesús jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei Jesús pijimonae tatsi.

<sup>20</sup> Jesús jume barai pijimonae jeye:

—Jopa paca itacupaeyo xua painya itawetsiwa cauri tsipei jopa beta payabara jume cowuntsim xua Nacom painya nepaca cayawenaewa. Bara xaniyeya paca tsipaebatsi. Icha paxeinaetsipame xua be peya pejume cowuntsi coyenewiyo xua bequein, icha mostaza xutiyo juta ichi xua tsica xutiyo, ichitha bara paca itacupa xua urutotha painya nejeiwa: ‘Uruto bara jincoutha natabu jonde, icha ira beya naxore’, xua painya nejeiwa. Bara jopa bayathiyo tsipae barapo uruto. Dapocotsiwa apara pacata aibi, pocotsiwa peayapubeya daunweiwa icha paxeiname tapana nejume cowuntsiwam xua peya jume cowuntsiwiyo. <sup>21</sup> Barapo cauri saya paca itacupa xua painya neitawetsiwa poxonae matha payabara nainbotame matautano poxonae matha Nacomtha matowa pawacame, jei Jesús.

**Meje yabara poxonae equeicha Jesús nayabara paeba xua poxonae tupaena**

(Mr 9.30-32; Lc 9.43-45)

<sup>22</sup> Poxonae cataunxuae Jesús pijimonae baru popona Galilea nacuatha, pijimonae tsipaeba, jeye:

—Xan ponxaein Nacom Tananeitapetsin, jiwi necaenaetsina ichamonaetha. <sup>23</sup> Bapoxonae bequein nebexubina, ichitha poxonae acoibi po matacabiyobe yapucaewina Nacom equeicha tatupaen asu neexanaena, jei Jesús.

Bichocono Jesús pijimonae tatsi an-thuthutane, xua poxonae Jesús pejume taexaetsi poxonae baxua paeba.

**Meje yabara poxonae Jesús cata paratiyo xua Nacom pin pia bo nexa**

<sup>24</sup> Jesús baru patopa pijimonae Capernaum tomaratha. Bapoxonae pomonae paratixi penoteibiwi po paratixi judiomonae bewa catsibeibina xua Nacom pin pia bo nexa, barapomonae Pedro pexainya beya taponatsi. Barapomonae Pedro yainyabatsi, jeichichi:

—¿Pon painya nepaca cuidubin, bapon bepa pana catsei paratixi xua Nacom pin pia bo nexa? jei.

<sup>25</sup> Pedro jume nota, jeye:

—Aa, bepa paca catsei, jei Pedro.

Poxonae Pedro botha joniya, Jesús copiya barai bapon, jeye:

—Simón, ¿eta be caita cui jicha? Barapo cae pin nacuathe, ¿eta po jiwi wucatsi paratixi, po paratixi xua jiwi bewa catsibeibina pomonaetha pomonae jiwi itorobiya pia pepa peewatsiwichi poxonae pomonae jiwi itorobiya pia pepa peewatsiwichi wuca? ¿Metha bara piamonae matabuxu wuca? Ichacuitha, ¿metha bara ichamonaetha wucatsi pomonae penanapaincha jinompaewi xua icha nacua werena peponaewi? ¿Eta pomonae cuita wucatsi? jei Jesús.

<sup>26</sup> Pedro Jesús jume notatsi, jeye:

—¡Apara jame wucaetsipa ichamon-aetha! jei Pedro.

Equeicha Jesús jume nota, jeye:

—Nexata barapomonae jopa wucaeyo piamonae matabuxyo. <sup>27</sup> Barichin



jopa bewa Taxa catsin tsane paratixi, yaitama tsipei apara Taxa Pexanton tatsin. Ichitha xua barapomonae jopa wanaca casebinexa, matha mene beya ponde. Curupobo xoyama mentha bapoxonae po duwein copiya wana pichina curupobo, pire barapo duwein. Bapoxonae barapo duwein coiboto tsina paratiyo taename po paratiyo xua naca yajupabe xua wamatomatsiwabe tsane Nacom pin pia bo nexa. Bapoxonae barapo paratiyo caponde pomonae paratixi penoteibiwi beya bara careno, jei Jesús.

**Meje yabara poxonae Jesús yabara yainyabatsi pijimonae xua pon peainya cui peexanaeinchi**

(Mr 9.33-37; Lc 9.46-48)

**18** Nexata bapoxonae Jesús imox-oyo caquita umenarucupatsi pijimonae, yawa pijimonae yainyabatsi, jeichichi:

—¿Jintam paxan jiwana pan pon bichocono ainya cui cana exanaeinchi po mataqueitha poxonae Nacom wabina jiwi xua petanaexanaenexatsi pijimonae pomonae itorobiya pecanamataxeinaexae? jei Jesús pijimonae tatsi.

<sup>2</sup>Nexata Jesús waba pexuyo, yawa pijimonae tatsi peitabarayo deca tatsi tacuaranoreca. <sup>3</sup>Jesús namchi pijimon-aetha, jeye:

—Bara xainyeya paca tsipaebatsi bewa paxeinaem icha juntu coyenewa xua jopa pananta xeinaem peainya cui coyenewa yabara. Barapocotsi juntu coyenewa pexui ba xeina xua jopa taayapubetsi poxonae nejume cowunta. Bewa pananta xeinaem icha pexui ichi poxonae nanta xeina, icha paichichipame xua Nacom painya nepaca wabiwa xua pijimonae tatsi painya nepaca exanaewa pomonae pamxaem Nacom itorobiya paca

ewata. <sup>4</sup>Po jiton pon najuntu coyene acaura, xua daxota bichocono Nacom canantawenonatsi xua pejume cowuntsiwatsi, bapon jame ainya cui xua pecana exanaewatsi Nacom pijimonae tatsi jiwapanin pomonae pejume cowuntsiwichi pomonae Nacom itorobiya peewatsixae. <sup>5</sup>Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo apara bara iru matenta weyataeya wabatsi pon tana neitorobixae, xua pon bara Nacom, jei Jesús.

**Meje yabara poxonae Jesús paeba xua jiton jopa bewa cana exanae ichuntha xua iru abe peexanaewa tsane**

(Mr 9.42-48; Lc 17.1-2)

<sup>6</sup>“Nacom tsitatsi xua pebin bichocono abe exana poxonae ichun cana exanatsi xua abe peexanae cuiru coyene exana, po barapo ichun pon cataunxuae aena tana nejume cowuntsixae. Metha jame wunae tsipae xua barapo pebin pon abeya cana exanaeya taexana ichuntha, barapon pin iboto wisi cutsipatsi yawa xua tuwutha xua pin mar mentha barapo iboto cayawa cabutabachipatsino. Tsipei jopa wunae tsipae xua bapon cana exana xua ichamonae abe peexanae cuiru coyene exana pomonae cataunxuae aena nejume cowunta. <sup>7</sup>Maisa bichocono jopa xanepanaeyo barapo cae pin nacuathe nexa pomonae abe exaneiba. Barapo cae pin nacuathepiwi ataya xeineiba po jiwi pecana exanaexaetsi xua ichamonae cana exana xua barapo jiwi pecana exanaexaetsi xua ichamonae cana exana xua barapo jiwi abe peexanae cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon

abe taexana xua ichun abe exanaeya taexanaetsi.

<sup>8</sup>“Daxota paca tsipaebatsi icha painya cobe paca exana xua abe painya neexanaewa tsane maisa pana nacobe ucubobare yawa taju beya pana nacobe bebande abe painya jopa neexanaenexa. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua ainya cobebe painya necayawa bebai tsane ichaxota po nacuatha isoto jopa itacounayiyio. Matautano icha painya taxu paca exana xua abe painya neexanaewa tsane maisa pana nataxu ucubobare yawa taju beya pana nataxu bebande xua abe painya neexanaeyainwa. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebai tsane ichaxota po nacuatha isoto jopa itacounayiyio. <sup>9</sup>Matautano icha pocotsiwa pataneme painya itamaiqueitha xua icha baxua paca exana xua abe painya neexanaewa tsane painya netaexae painya itamaiqueitha, maisa pana naitamaiquei jucua. Yawa taju beya pana naitamaiquei bebande abe painya neexanaeyainwa. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua poxonae ainya itamaiqueitobe painya necayawa bebai tsane ichaxota isoto jopa itacounayiyio”, jei Jesús.

**Meje yabara poxonae Jesús tsipaeba pijimonaecayabara juta pepaebi diwesiyo xua oveja yabara pon penapuxanaein**

(Lc 15.3-7)

<sup>10</sup>Equeicha Jesús jeye: “Barapocotsi pexuyo jopa catsa jumeja pacayabara jande: ‘Maisa barapo pexuyo jopa peainya cuiyiyio’, jopa pajande. Matauta pomonaec aena pejume cowuntsiwi Nacom jopa pacayabara jande: ‘Maisa barapomonaec jopa peainya cuimonaeyo’, jopa pajande. Paca tsipaebatsi pomonaec Nacom pejume cowuntsiwi barapomonaec nantauta pia matatsunpiwi po matatsunpiwi barapomonaec yawenatsi. Barapo matatsunpiwi, Taxa Nacom peitabaratha tatsi tajinompeibatsi pia nacuatheicha, xua barapo pejume cowuntsiwi peyawenaenexa tsaibi tsainchi. <sup>11</sup>Tsipei xan, ponxaein Nacom Tananeitapetsin patopeican tayawenaenexa pomonaec jopa pejume cowuntsiwi xua barapomonaec napaeba tacana exanaewa tsane.

<sup>12</sup>“Pana nejume naitaware po pecayabara juta pepaebi diwesiyo xua paca tsipaebinchi. Barapo diwesiyo jeye: Jiton ba xeina oveja cien poyobe. Caein tanapuxanatsi. Jiton demxuwatha cuenta pona noventa y nueve poyobe oveja, pewanaweneinexa oveja, pon catsawa jopa, beya matapainya taeba. <sup>13</sup>Xaniwaicha paca tsipaebatsi poxonae jiton oveja taeba, bapon bichocono weiweina petaebixae oveja pon catsawa jopa, beyacaincha xua poxonae weiweina poxonae saya noventa y nueve poyobe po ovejamonaec jopa catsawa othopaeyo. <sup>14</sup>Barichi barapocotsi juta coyeneya ichi, Nacom pon Taxa, pon peitabocotha eca, bapon jopa ichichipaeyo xua pebarapentsiwatsi pijiwimonaec xua

pejume cowũntsiwatsi matautano xua bara caeinno irũ, pomonae aena pejume cowũntsiwixaetsi”, jei Jesús.

**Meje yabara poxonae Jesús yabara paeba xua jiton eta bichi tsane poxonae cayabara jũntemainaena pontha pon abe petaxanaexaetsi**

(Lc 17.3)

<sup>15</sup>Equeicha Jesús barai pijimona, jeye: “Icha ichũn pon irũ pejume cowũntsiũdũ, icha bapon pacata abe exana, bapon baxua yabara patsipaebare xua bapon peyaputaewa tsane xua deta cou abe exana. Icha barapon paca jume taeya jejei tsane pocotsiwa xua bapon abe exana bara bapoxonae paca itacoxonaena. <sup>16</sup>Ichacuitha icha ichũn pon pejume cowũntsiũdũ, icha bapon jopa paca jume cowũntsiya jejeyo, bara nexata equeicha pawabare pebinbe nacueyatabe xua yoroba painya netsipaebinxaxa bapon xua abe peexanaexae. <sup>17</sup>Ichitha icha awiya bapon jopa cataunxuae paca jume cowũntsiya jejeyo, bara nexata barapon pacaponde pomonaetha pomonae Nacom pejume cowũntsiwichi, xua barapomonae bapon peyabara paebinexatsi. Icha bapon awiya cataunxuae jopa came jume cowũntsiya jejeyo barapomonaetha barapoxonae barapomonae bewa yabara nanta xeinae xua bapon bara be pocotsi jiton pon jopa bapana pejume cowũntsin Nacom. Ichacuitha bewa yabara nanta xeinae xua bapon bara be pocotsi jiton jiwana, pomonae peajũntũcoyenebewi, pomonae paratixi pentoma noteibiwi, po paratixi jiwi bewa catsibeibina pon romanomonae itorobiya pia pepa peewatsinchi nexa.

<sup>18</sup>“Xainyeya paca tsipaebatsi. Pocotsiwa paxam jopa pacopatsim barapo cae pin nacuathe xua pocotsiwa exana pomonae tana nejume cowũntsiwi,

bapocotsiwa bara irũ Nacom jopa copatsiyo pia peitorobi nacua beicha xua barapomonae peexanaewa tsane baxua. Pocotsiwa pacopatame xua taji-wimona peexanaenexa barapo cae pin nacuathe bapocotsiwa irũ Nacom copata pia peitorobi nacua beicha xua barapomonae bara peexanaewa tsane baxua.

<sup>19</sup>“Matautano paca tsipaebatsi icha paxam jiwana nacueyatabe barapo cae pin nacuathe icha baponbe pebũrũya jũpaya yabara nanta xeinabe xua Nacomtha pewũcaewabe, baponbe bara baxua taexanaeinchibe pocotsiwa pewũcaexaebe xua Taxa Nacom bara taexanaena pon peitabocotha eca. <sup>20</sup>Tsipei ichaxota ba nayantabe xua nacueyatabe poyobe, xua poxonae pewũcaenexabe Nacom xua ichacuitha ichaxota acoibi poyobe, xua pomonae taneantobe jiwixae, bara bequein saya caeyobe dai-chitha xan baxota ba uncueiban irũ”, jei Jesús.

<sup>21</sup>Nexata Pedro Jesús yainyabatsi, jeye:

—Tanecanamataxeinaem, icha inta abe exana pon irũrũ jume cowũnta, ¿eta po cuiyobe tsipaebocuaein xua bewa tacui yabara jũntemainaewa tsane pocotsiwa inta abe exana? ¿Metha saya beya poxonae siete po jume cuiyobe tsipaebocuaein? jei Pedro.

<sup>22</sup>Jesús jume nota, jeye:

—Ichitha jopa catsipaebichi xua saya siete po cuiyobetham netsipaebiwa tsane xua jinya necui yabara jũntemainaewa tsane pocotsiwa cata abe exana. Seicaya apara jame catsipaebatsi, xua jopa cuinaya najume baraxubim tsane xua jinya necui yabara jũntemainaewa tsane pon cata abe exana xua beya bequein jame cuatrocientos noventa po cuiyobetham tsane xua netsipaebiwa tsane, jei Jesús.

**Meje yabara poxonae Jesús cuiduba  
pecayabara juta pepaebi  
diwesiyo xua pon jopa yabara  
jüntemainaeyo ichuntha**

<sup>23</sup>Equeicha Jesús pijimonaе barai pecayabara juta pepaebi diwesiyo, jeye: “Anoxuae paca cuidubatsi xua Nacom yabara. Nacom pijimonaе bichocono yabara jüntemaina po abe peexanae coyenein pijimonaе tatsi exana. Nacom baxua exana icha pebin ichi pon jiwi itorobiya pia pepa peewatsinchi. Bapon wuca xua caewa equeicha pematomatsinexatsi xua po matoman caena bayatha penacowaebixaetsi. <sup>24</sup>Pon jiwi itorobiya pia pepa peewatsinchi tamropata pitaba xua waba pia petanacuichiwichi. Pon copiya, bapon pon jiwi itorobiya pia pepa peewatsinchi jopa equeicha caewa tacanawitichi diez millones po paratiximonaеbe. <sup>25</sup>Barapon pon copiya pon petanacuichinxae pon jiwi itorobiya pia pepa peewatsinchi nexa jopa xeinaeyo paratiximonaе xua pon jiwi itorobiya pia pepa peewatsinchi caewa petacanawichinexa tsainchi. Daxota pon jiwi itorobiya pia pepa peewatsinchi itoroba ichuntha xua barapo petanacuichinchi caenaetaxubinchi ichuntha xua ichun pecomotsinexa tsane xua pon pebusi cui taetaeinchi pecanaexanaenexa tsainchi. Barapon pon jiwi itorobiya pia pepa peewatsinchi matauta cui itoroba xua yabyo pecaenaetsinexa tsainchino, powa barapo petanacuichin piowa tatsi. Yawano cui itoroba xua pexuino pemuxuna caenaetsinexa tsainchi. Yawano cui itoroba xua pemuxuna caenaetsinexa pocotsiwan xeina pon petanacuichin, xua barapo matoma pecatsinexatsi pon jiwi itorobiya pia pepa peewatsinchi. Ichitha daxita barapo matoma

awiya seica, bequein bapon daxita baxua cana exanaetsipatsi. <sup>26</sup>Nexata pon petanacuichin pentabocototha uncua pon jiwi itorobiya pia pepa peewatsinchi itabaratha tatsi matautano jume daunweya namchiya jeye: ‘Tanentacaponae, abu necayabara najuntu coyene xeinare, xua jopa bepijawa neaitaconaenexa. Barapara bexa daxita pentoman cacatsibinchi’, jei pon petanacuichin. <sup>27</sup>Pon jiwi itorobiya pia pepa peewatsinchi bara yabara najuntu coyene xeina peyawenaenexa, yawa yabara jüntemaina barapo paratiximonaе, matautano bara saya pu copata.

<sup>28</sup>“Daichitha bapon pon petanacuichinxae poxonaе pontaba pon jiwi itorobiya pia pepa peewatsinchi weya, jemeicha caxina pia jiton pon penabarunacuichinxaebe. Pon caxinatsi bapon matoma amanayaba saya cien po paratiximonaеbe. Pon jiwi itorobiya pia pepa peewatsinchi weya pona matoma amanayabatsi. Pon jiwi itorobiya pia pepa peewatsinchi weya pona bapon pia jiton coibotathu waetaba, muxu penaichatabi. Pon pecoibotathu waetabixae bapon jei: ‘¡Equeicha inta caewa canawire xua bayatha nentoma amanayabame!’ jei. <sup>29</sup>Bapoxonaе pon coibotathu waetabatsi pentabocototha uncua pia jiton itabaratha tatsi, matautano jeye: ‘Abu, neyabara najuntu coyene xeinare, xua jopa bepijawa neaitaconaenexa. Barapara bexa pentoma cacatsinchi’, jei pon coibotathu waetabatsi. <sup>30</sup>Ichitha pon jiwi itorobiya pia pepa peewatsinchi weya pona bapon aichaxaibi xua abu came pentoma ewatsiwa. Daxota bapon pia jiton capona jiwi pecubi bo beya, beya abu poxonaе matoma catsinchi pia jiton, xua pon jiwi itorobiya pia pepa peewatsinchi weya pona matoma catsinchi. <sup>31</sup>Poxonaе ichamonaе

pomonae iruru petanacuichiwi baxua cui tane, barapomonae unthuthu wecoyei, tsipei ichun pon iru petanacuichin jiwi pecubi botha etatsi. Bapoxonae barapomonae pon jiwi itorobiya pia pepa peewatsinchi beya pona. Barapomonae tsipaeba pontha pon jiwi itorobiya pia pepa peewatsinchi daxita pocotsiwa pon petanacuichin cana exana ichuntha pon iruru petanacuichin. <sup>32</sup>Bapoxonae pon jiwi itorobiya pia pepa peewatsinchi itoroba pijimonaе xua petawabinexa tsainchi pon petanacuichinxaetsi pontha xua pon peyabara juntemainaexae pocotsiwa penacowaetsixaetsi. Pon jiwi itorobiya pia pepa peewatsinchi bapontha jeye: ‘¡Maisa pon inta nacuitame maisa bichocono abem! Xan cayabara juntemainatsi daxita barapo ainya paratiximonaе tsipei tanebaru jumichimxaem. <sup>33</sup>Xam bewa bayatha barichim. Bewa yabara najuntu coyene xeinaem jinya jiton xua nejuntemainaenexa pocotsiwa bapon cantoma amanayaba, icha xan ichin xua bayatha cayabara najuntu coyene xeinatsi tacayawenaenexa tsainchi’, jei. <sup>34</sup>Pon jiwi itorobiya pia pepa peewatsinchi bichocono anaepana. Daxota bapon cui itoroba ichamonaе, xua barapon pon petanacuichinxaetsi caponaeinchi jiwi pecubi bo beya. Baraxota peraxa exanaeinchi xua beya abu poxonae barapon pon petanacuichinxaetsi matoma catsinchi daxita po pentoma bayatha jopa caewa petacanawichixaetsi”, jei Jesús.

<sup>35</sup>Equieicha Jesús jeye:

—Bara juta coyeneya ichi tsane icha be pon jiwi itorobiya pia pepa peewatsinchi ichi. Poxonae bapon peraxa exana barapo pia petanacuichinxaetsi xua bapon pia jiton jopa pecui yabara juntemainaexae, Nacom pon itaboco peecaein barichi tsane piji-

witha. Nacom exanaena baxua poxonae barapomonae jopa xapain yabara juntemainaeyo pomonaetha pomonae abe petaexanaexaetsi, jei Jesús.

**Meje yabara poxonae Jesús cuiduba xua jiwi piseurixi pepunapenteibiyainwa.**

(Mr 10.1-12; Lc 16.18)

**19** Poxonae Jesús najume weta xua tsipaeba pijimonaе, bapoxonae Galilea nacua weya warapa. Bapoxonae Jordán mene deca bara bereca pona, equeicha dabeya barapo Jordán mene, mene epa uncatabiya xua patopa Judea nacuatha, po nacua eca ichaxota pocotsiwa xometo bejopiya xua po nacua Jordán mene weya eca. <sup>2</sup>Pin bicheitomonae puna poinchi. Baxotiya Judea nacuatha Jesús axaibi exana peatenewi.

<sup>3</sup>Bapoxonae fariseomonaе piraichi Jesús imoxoyo caquita umenarucupatsi xua Jesús pejuntu coyene jujutsinexatsi daxota jeye Jesthata:

—¿Moisés pia peitorobi coyenewa copata xua pebin piseuri pepunaxubiwa ichi saya poxonae ichipa? jei fariseomonaе.

<sup>4</sup>Jesús fariseomonaе jume notatsi, jeye:

—¿Jopa payorobim Nacom Pejume Diwesi? Barapo diwesitha jeye: ‘Poxonae aena Nacom forota, Nacom forota pebin yawa forota petsiriwa’, jei barapo Nacom Pejume Diwesitha. <sup>5</sup>Matauta jeyeno Nacom Pejume Diwesitha: ‘Daxota baxuaxae pebin paxa wepu natsata yawa pena wepu natsata xua piowabe imoxoyo penaperu nacoyobinexabe. Baraponbe be cae jiwimonaе naexanabe’, jei Nacom Pejume Diwesitha. <sup>6</sup>Bapoxonae baponbe xua ainya jiwibe aibi, bara be caein naexanabe. Daxota pebin bapana jopa bewa punaxubi piowa, tsipei apara bayatha Nacom cana

exana xua bara be bara caein naexanabe, jei Jesús.

<sup>7</sup>Nexata fariseomonae Jesús yainyabatsi, jeye:

—¿Eta xua metha Moisés pia peitorobi coyenewa copata xua jiton itacupatsi xua pecatsiwa papera piseuri po paperatha tina xua pexubiwa tsane piseuri? jei fariseomonae.

<sup>8</sup>Jesús jume nota, jeye:

—Moisés copata xua paxam painya seuriwi painya nepunapenteibiwa jopa painya nejume cowuntsi jiwixae Nacom. Apará caena bayatha Nacom jopa baxua copatsiyo poxonae aena forat- apona jiwi. <sup>9</sup>Nama paca tsipaebatsi pon piowa punaxuba xua poxonae yabuyo bequein jopa nasi cui exanaeyo ichun- tha, icha bapon ichowa pita, bapon abe exana Nacom peitutha tatsi tsipei Na- com tsitatsi xua powa copiya baru po- pona apara bara piowa tatsi, jei Jesús.

<sup>10</sup>Nexata Jesús tsipaebatsi pijimonae, jeye:

—Icha Nacom jopa copatsiyo xua pe- bin piowa punaxubina poxonae bara- powa saya ɥ exana pocotsiwa pebin aichaxaibi, baxua bichocono ajumeya- pube. Metha nexata pebin jopa jitha ecaetsipae. Bara saya pebin metha misa ecaetsipa, jeichichi Jesús pijimonae.

<sup>11</sup>Jesús barai pijimonae, jeye:

—Daxita jiwi ba jopa itacupaetsi xua peyabara yaputaewa pocotsiwa aunx- uae payabara caanutame xua jopa jitha peenaewa. Saya meisa pomonae Nacom yabara yaputane exana barapo coyene, barapomonae itacupatsi xua pecana ex- anaewa barapo coyenetha xua jopa jitha peenaewa. <sup>12</sup>Barichi acoiwi po cui coyenewabe xua pebiwi jopa penotsiwa pecotsiwaxi jiwi. Ichamonae aichaxaibi xua jitha peenaewa tsipei barapocotsi jiwimonae bara yacuiya naexana xua

jopa penotsiwa yabuxitha. Ichamonae jopa itacupaetsi xua pecotsiwaxi penot- siwa tsipei bayatha tobu jucuatsi, xua ichamonae tobu jucua. Daxota jopa itacupaetsi xua pexui pecanaexanaewa. Ichamonae aichaxaibi xua pecotsiwaxi nota, peichichipaexae xua saya ɥ peex- anaewa pocotsiwa Nacom itoroba. Pon itacupatsi xua peyabara yaputaewa xua pocotsi coyene jopa pepichiwa pecot- siwa, bara moya jopa exanae tsane xua pepichiwa tsane pecotsiwa, jei Jesús.

**Meje yabara poxonae Jesús jeye pexuitha: “Barabu Nacom beta paca yawenaena”, jei**

*(Mr 10.13-16; Lc 18.15-17)*

<sup>13</sup>Nexata jiwi Jesús tacaponatsi pexui xua Jesús pejayabinexa pecobetha yawa xua Nacomtha pewucaenexa barapo pexui nexa xua pejeinexa: “Barabu Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonae cui matawentatsi pomonae pexui carendena tsaibi. <sup>14</sup>Ichitha Jesús jume barai pijimonae, jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntu coyene xanepanaewi icha pexui ichi. Pexui pia cui xua tayapu xanepanatsi xua pia juntu coyeneintha jume cowunta Nacom, jei Jesús pijimonaetha.

<sup>15</sup>Poxonae Jesús nacobe weta xua pexui jayabatsi yawa xua Nacomtha tawuca barapo pexui, xua jeye: “Barabu Nacom beta paca yawenaena”, jei. Bapoxonae Jesús wepu pona barapomonae.

**Meje yabara poxonae pewowin pon copei pexeinaein Jesús tsipaebatsi**

(Mr 10.17-31; Lc 18.18-30)

<sup>16</sup> Pewowin pona xua Jesús petaenex-atsi. Barapo pewowin jeye Jestutha:

—Ja Tanecuidubim, maisa nejüntu coyene xanepanaem. ¿Eta xua copiya matha exanocuaein xua ajüntuyapusuya tapoponaewa tsane xua ataya tsane? jei.

<sup>17</sup> Jesús jume barai, jeye:

—¿Eta xua nebaram: ‘Nejüntu coyene xanepanaem’, jam? Apra ichun dapon aibi pon nejüntu coyene xanepanaein. Jame meisa apra bapon Nacom compa nejüntu coyene xanepanaein. Icha ichichipame xua ajüntuyapusuya nepoponaewa xua ataya tsane, moya matha exande pocotsiwa Moisés itoroba pia peitorobi jume coyenewantha, jei Jesús.

<sup>18</sup> Pewowin Jesús jume baraichi jeye:

—¿Eta po peitorobi jume coyenewara? jei.

Jesús jume notsiya namchi xua Moisés pia peitorobi coyenewa namchi, jeye:

—‘Jopa ichun bexubinde. Jopa ichowa pichinde ichun piowa tatsi. Jopa caibinde ichun piawan tatsi. Jopa naerabiya cayabara paebinde pocotsiwa ichamonae exana. <sup>19</sup> Axatha baru jume cui itura jinare. Antobeinde necatsicuarabu enaewi icha ichim xua jincoutha naantobem’, jei Moises, jei Jesús.

<sup>20</sup> Pewowin Jesús jume baraichi, jeye:

—Daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon. ¿Eta pocotsiwa meisa inta acoibi xua exanaein? jei barapo pewowin.

<sup>21</sup> Jesús jume barai, jei:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata

acoibiyo nexa tsane xua pocotsiwa xanepanaya neexanaewa, matha daxita caenaere pocotsiwa xeiname yawa catsibare pomonaetha pomonae peacopeibi jiwí. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajuntana botsiwa pocotsiwa bichocono wuna, jei Jesús.

<sup>22</sup> Poxonae barapo pewowin baxua jume taeba bichocono unthuthu we-coyeya ponataba tsipei bichocono copei pexeinaein.

<sup>23</sup> Nexata Jesús barai pijimonaetha, jeye:

—Bara xaniyeya paca tsipaebatsi. Maisa bichocono ayapubecai xua pomonae bichocono copei pexeinaewi naexana Nacom pijimonaetha tatsi jiwana pomonae Nacom itorobiya peewatsixae. Tsipei barapomonaetha bichocono antasiwayatane barapo pia copei beyacaincha xua Nacom antobetsi. <sup>24</sup> Equeicha paca tsipaebatsi. Bichocono acuiruyapube xua duwein pon pewun camello xua pejoniyaeewa acuichetto peetabu wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaetha tatsi jiwana pomonae Nacom itorobiya peewatsixae beyacaincha xua poxonae acuiruyapube xua poxonae camello acuichetto peetabu wan iya pejoniyaeewa, jei Jesús.

<sup>25</sup> Poxonae baxua Jesús jume taerucupatsi pijimonaetha, barapomonaetha yabara najüntu cui coyene cabenaeca, yawa Jesús jeichichi:

—Bapoxonae jintam metha nexata itacupatsi xua penacapanepaewa pia coutha? jei barapomonaetha.

<sup>26</sup> Jesús necotsiya jeye:

—Pebiwí ba jopa itacupaetsi xua baxua exana, saya jame meisa Nacom compa itacupatsi xua jiwí napaeba cana

exanatsi. Tsipei daxua ajibi pocotsiwa Nacom taacuiruyapubetsi, jei Jesús.

<sup>27</sup> Nexata Pedro jeye Jesustha:

—Pata Tanecanamataxeinaem, paxan daxita pacuenta ponan pocotsiwa pax-einan pata paca puna ponaewa tsainchi. Tsipei baxua bayatha paexanan ζeta pocotsiwa metha nexata pana necatsi-name? jei.

<sup>28</sup> Jesús jume nota, jeye:

—Bara xaniyeya paca tsipaebatsi. Po mataqueitha tsane Nacom pena ira exanaena, barapo mataqueitha, xan ponxaein Nacom Tananeitapetsin ecaein tapexeinya itupanae ecaethopaewatha po tapexeinya itupanae caecaethopaewa bichocono itupana. Paxam pomonae tapana nepuna jinompaewim doce po itupanae eneibithopeibiwatha paenaename painya yabara paebinexam tsane pomonae doce po matabuxuyobe israelmonae pia penatsicuentisiwa abe peexanaexae. <sup>29</sup> Daxita pomonae taneantobe jiwixae xua pecueicueijei tsurubenaebiyaenexa Nacom Pejume Diwesi, Nacom beta cana exanaena barapomonae. Nacom beta cana exanaena pomonae pia bon pecuenta ponaexae, matauta ichacuitha ichamonae peweicho jwi pecuenta ponaexae, matautano ichacuitha pamcho jwi pecuenta ponaexae, matautano ichacuitha paxeiwi pecuenta ponaexae, matautano ichacuitha pena jwi pecuenta ponaexae, matauta ichacuitha pia pexui pecuenta ponaexae, matautano ichacuitha pia iran pecuenta ponaexae. Barapomonae barapo coyenein exana tana neantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajuntucoyeneyapuswa, po peajuntucoyeneyapuswa ataya tsiteca.

<sup>30</sup> Pomonae xua anoxuae pomonae jwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jwi tsane. Pomonae xua anoxuae pepawi naexana, pomonae jwi jopa petsita ainya cui jiwichi po cae pin nacuathe, barapomonae Nacom pia peitorobi nacuatheicha peainya cui jwi tsane, jei Jesús.

**Meje yabara poxonae Jesús paeba pecayabara juta pepaebi diwesiyo pomonae uva pabitha petanacuichiwi**

**20** Equeicha Jesús tsipaeba pijimonae pecayabara juta pepaebi diwesiyotha, jeye: “Nacom pijimonae matomatsina pia nacuatheicha xua be pematomatsiwa petaxanaexaetsi pia petanacuichiwa tatsi icha pon pabi pexeinaein ichi xua poxonae matoma catsiba pomonaetha pomonae petanacuichixaetsi. Pon pabi pexeinaein caemumbotha pona xua jeita pomonae pia petanacuichinexa tsainchi pia uva bacabo. <sup>2</sup> Bapon muxu tsipaeba pia petanacuichiwichi, jeye: ‘Paxam painta nacuire ta uva bacabo, nexata paca matoma catsibebinchi pocotsi paratiyo xua caentaqueitha nexa’, jei. Bapoxonae bapon pia petanacuichiwichi itoroba pia uva bacabo beya. <sup>3</sup> Bapoxonae equeicha bapon pona poxonae xometo tajũ beequena xua pejeichinexa ichamonae pomonae petanacuichiwichinexa tsainchi pia uva bacabo. Bapoxonae bapon tane ichamonae, pomonae panatha saya jinompa xua jopa nacuitompaeyo. <sup>4</sup> Bapon barai barapomonae jeye: ‘Paxam irurũ painta nacuire ta uva pabi. Nexata beta paca matoma catsibinchi, xua pocotsi paratiyo po horatha panacuitame nexa’, jei. Bapoxonae barapomonae pona pabi beya penacuichinexa.



<sup>5</sup>Bapon mateinyaxae equeicha pona xua pejeichinexa ichamonae pomonae pia petanacuichiwichi tsainchi. Barichi equeicha poxonae tabopiya pona xua pejeichinexa ichamonae pomonae pia petanacuichiwichi tsainchi.

<sup>6</sup>Bapon equeicha pona pana beya poxonae xometo iriya ducuaaicha xua pejeichinexa ichamonae pomonae pia petanacuichiwichi tsainchi. Bapon equeicha tane ichamonae pomonae xua jopa iru nacuitompaeyo. Bapon barai barapomonaetha, jeye: ‘¿Eta xua metha came saya anoxuae paumename po panathe, xua jopa panacuitompaem?’ jei pabi pexeinaein. <sup>7</sup>Barapomonae jume nota, jeye: ‘Canta dapon aibi pon pata tana neitorobiwa tsane’, jei. Nexata bapon barai barapomonae, jeye: ‘Paxam paponare, iruru painta nacuire ta uva pabi, nexata beta paca matoma catsibinchi xua pocotsi paratiyo po horatha painya nenacuichixae tsane’, jei pon pabi pexeinaein.

<sup>8</sup>“Poxonae quirei tsanaicha pon pabi pexeinaein, bapon itoroba pon pia petayapucaeaeinchi uva pabi, jeye: ‘Inta wabare pomonae inta nacuita yawa matoma catsibare. Tamroropata wabaponde yawa matoma catsibaponde. Copiya matha wabare pomonae opi dubena pomonae inta cotacaya nacuita poxonae xometo iriya ducuaaicha, beya poxonae papataponaena pomonae copiya inta nacuita caemumbotha’, jei.

<sup>9</sup>Nexata copiya pata pomonae cotacaya nacuita poxonae xometo iriya ducuaaicha. Daxita barapoyobe pomonae cotacaya nacuita bara beta matoma catsibatsi xua pocotsi paratiyo caentaqueitha nexa, bequein bara jopa pin mataqueitha nacuihiyo. <sup>10</sup>Nexata bara iru bapoxonae pata pomonae tamropata notarucupa xua nacuita poxonae tabopiya, bara barapomonae

iru beta matoma catsibatsi pocotsi paratiyo caentaqueitha nexa. Bapoxonae iru pata pomonae tamropata notarucupa xua nacuita poxonae mateinyaxae, bara barapomonae iru beta matoma catsibatsi, pocotsi paratiyo caentaqueitha nexa. Bapoxonae iru pata pomonae tamropata notarucupa xua nacuita poxonae xometo tajū beequeina, bara barapomonae iru beta matoma catsibatsi, pocotsi paratiyo caentaqueitha nexa. Bapoxonae iru nama pata pomonae tamropata notarucupa xua nacuita caemumbotha. Barapomonae najei: ‘Metha equeicha mataropeichiya naca catsibina paratixi tsipei nacuitatsi caemumbotha’, najei barapomonae. Daumetha barapomonae saya matoma catsibatsi, pocotsi paratiyo caentaqueitha nexa.

<sup>11</sup>Ichitha poxonae barapomonae matoma nota, itaconarucupa pontha pon peitorobixae barapomonaetha.

<sup>12</sup>Barapomonae anaya jei bapontha: ‘Pomonae nacuita cotacaya, saya cae horatha nacuita, barapomonae matoma catsibame pocotsi matoma pana catsibame. Nama apara paxan daunweya panacuitan, yawa atsatha daunweya panacuitan’, jei barapomonae. <sup>13</sup>Ichitha pon pabi pexeinaein jume nota caeintha barapomonae jiwana pintha, jeye: ‘Tajiton, apara jopa bara abe pacata exanaetsi. Canaunxuae paca muxu tsipaebatsiba paca jeichi: Paca matoma catsibinchi xua pocotsi paratiyo caentaqueitha nexa, paca jeichi. <sup>14</sup>Bara jinya matoma pire. Bara nawiyama. Xan ichichipan tacoya matoma catsiban pomonae quiripitha nacuita barapocotsi matoma, pocotsi matoma jupa paca catsibatsi. <sup>15</sup>Apara xan tawaxae itacoxonan xua tantoma exanaewa. Apara pauwame ichamonae xua jopa

taasiwaxae xua tantoma exanaewa ichamonaetha?, jei pon pabi pexeinaein.

<sup>16</sup>“Nacom barapocotsi juta coyeneya cana ichi tsane jiwitha icha pon pabi pexeinaein ichi poxonae cana exana pomonaetha pomonae pia petanacuichiwichi. Pomonae xua anoxuae pepawi naexana, pomonae jwi jopa petsita ainya cui jiwichi po cae pin nacuathe, barapomonae Nacom pia peitorobi nacuatheicha peainya cui jwi tsane. Pomonae xua anoxuae pomonae xua jwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jwi tsane”, jei Jesús.

**Meje yabara poxonae Jesús  
nayabara paeba acoibi po  
coyenebetha xua poxonae tupaena**

(Mr 10.32-34; Lc 18.31-34)

<sup>17</sup>Bapoxonae pirapae Jesús pona Jerusalén tomara beya. Poxonae cataunxuae Jesús pijimonae baru ecapona namtotha pomonae doce poyobe tatsi, barapo doce poyobe Jesús meisa waba aisowa beya petsipaebinexa.

<sup>18</sup>Jesús jeye:

—Anoxuae ponaeinchi Jerusalén tomara beya. Barapo tomaratha xan ponxaein Nacom Tananeitapetsin necaenaetsina sacerdotemonae pia pentacaponawitha tatsi yawa pomonaetha pomonae jwi pecuidubiwi Moisés pia peitorobi coyene tatsi. Barapomonae necaenaetsina ichamonaetha xua ichamonae tana nebexubiwa tsane. <sup>19</sup>Bapoxonae daxita barapomonae necaenaetsina pomonaetha pomonae penanapaincha jinompaewi xua icha nacua werena peponaewi xua barapomonae tana necui caponaenexa. Matautano barapo penanapaincha jinompaewi nebena yawano tupaerucua neexanaena

naetotha. Daichitha poxonae acoibi po matabibibe yapu jopaena equeicha Nacom asu neexanaena petupaie cuiru coyene weya, jei Jesús.

**Meje yabara poxonae Jesús  
wucatsi powa, Santiago pena  
tatsi xua iru Juan pena tatsi**

(Mr 10.35-45)

<sup>20</sup>Nexata petsiriwa Jesús imoxoyo caquita uncuatabatsi. Barapowa, Juan pena tatsi yawa Santiago pena tatsi. Juan iru Santiago, baponbe Zebedeo pexantobe tatsi. Barapo petsiriwa pexantobe baru patopa Jesustha. Barapo petsiriwa pentabocototha uncu Jesús peitabaratha tatsi, xua Jesús pewucaenexa tsainchi. <sup>21</sup>Jesús barai bapowatha, jeye:

—¿Eta pocotsiwa jinya newucaetsi? jei.

Bapowa Jesús jume notatsi, jeye:

—Poxonae matabibi patopaena po mataqueitha itorobiya ewatsiname jwi barapo mataqueitha cawucatsi xua bara itorobiname barapo taxantobe, xua nantiyabe peecaewa tsanebe xamtha, xua ichun necoxa weya peecaewa tsane, xua ichun netsocona weya peecaewa tsane, jei.

<sup>22</sup>Ichitha Jesús baraibe baraponbe, jeye:

—Paxambe jopa payaputaembe xua pocotsiwa pana newucaenamebe. Poxonae ichamonae abe inta exanaena bara saya copatsin xua barapomonae bara neperaxa jubina. Barichi poxoru paxambe pana neantobem, ¿bara iru paca itacupabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara tupa neexanaena. Barichi, ¿bara iru paca itacupabe xua bara pacopatsinamebe xua bara ichamonae tupa paca exanaenabe? jei Jesús.

Santiago peweichobe jume notabe, jeibe:

—Aa, bara pana itacupabe, jeibe.

<sup>23</sup> Jesús jume nota, jeye:

—Bara bara xainyei barapocotsi coyene ichamonae paca cana exanaenabe. Ichamonae paca peraxa exanaenabe. Matautano tupa paca exanaenabeno icha xan necana ichi tsane. Nama xua xantha nantiya paecamebe xua ichun pocotsiwa tacoxa weya eca, yawa xua ichun tasocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonae caena bayatha tsiwunaeta xua peenaewa tsane, jei Jesús.

<sup>24</sup> Jesús pijimonae pomonae umena, pomonae diez poyobe jume tane xua Santiago iru Juan Jesús wucatsibe. Bapoxonae barapo diez poyobe, Santiago iru Juan yabara anaepanarucupatsibe. <sup>25</sup> Ichitha Jesús pia xainya berena pijimonae waba yawa namchiya jeye barapomonaetha:

—Paxam bayatha pataneme po coyenewa ba exana pomonae jopa judiomonae naexanaeyo. Barapomonae ba nantauta pomonae pia nacua tatsi pia petawatsiwichi tatsi. Daichitha barapo nacua peewatsiwi aebiya itoroba piamonae, xua daxota bichocono jiwi taayapubetsi. <sup>26</sup> Ichitha nama paxam barapocotsi coyeneya jopa barapaichim tsane. Seicaya nama icha juntu coyeneyatha paca itorobatsi. Icha pon paxam jiwana icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina. <sup>27</sup> Matautano icha pon paxam jiwana icha bapon ichichipa naexana be pocotsin bichocono ainya cui penaexanaein xua beyacaincha ichamonae, bapon bewa copiya matha daxita paxam amanaya pacata

nacuichina pia coya peichichipaexae. <sup>28</sup> Icha be pocotsi coyeneya icha ichin, bara paichinde. Xan ponxaein Nacom Tananeitapetsin patopeican xua tanacuichinexa tsane ichamonae nexa. Apará jopa baxua tsipatopaeinyo xua ichamonae inta penacuichiwanexa tsane. Saya patopeican tsipei ichichipan xua daxita carepaya jiwi tayawenaewa tsane. Matautano patopeican xua tatsitupaenexa tsane be pentoma xua daxita jiwi pepanenebiyaenexa abe pia peexanae cuiru coyenein weya tatsi, jei Jesús pijimonaetha.

### **Meje yabara poxonae Jesús axaibi exana ponbe peitata nacutsinbe**

(Mr 10.46-52; Lc 18.35-43)

<sup>29</sup> Poxonae Jesús pijimonae baru pontaba Jericó tomara weya, bapoxonae Jesús puna poinchi pin bicheito. <sup>30</sup> Barapo Jerusalén namto iya ecabe pon peitata nacutsinbe. Poxonae baponbe, ponbe peitata nacutsinbe jume yaputanebe xua juinya Jesús xentapona, bapoxonae jume daunweya wawaibe, jeibe:

—¡Pon jiwi Necanamataxeinaem, ponxae David pia pemomoxi susato jiwana, pana neyabara najuntu coyene xeinarebe xua pata taneyawenaenexamebe! jei baraponbe ponbe peitata nacutsinbe.

<sup>31</sup> Barapo peitata nacutsinbe jume matawentatsibe barapo pin bicheito xua moya peecaenexabe. Ichitha baponbe equeicha jume daunweya wawaibe, beyacaincha xua poxonae copiya, jeyebe:

—¡Pon jiwi Necanamataxeinaem, ponxae David pia pemomoxi susato jiwana, pana neyabara najuntu coyene xeinarebe xua pata taneyawenaenexamebe! jei baraponbe ponbe peitata nacutsinbe.

<sup>32</sup> Nexata Jesús naruntaba yawa wabatsibe ponbe peitata nacutsinbe.

Bapoxonae baponbe Jesús yainyaba, jeye:

—¿Eta xua jinya pata cata exanaetsibe? jei Jesús.

<sup>33</sup>Baraponbe Jesús jume notatsibe, jeibe:

—Pon jiwi Necanamataxeinaem, bepanecotsinbe cuinaya, jeibe baponbe.

<sup>34</sup>Nexata baponbe Jesús yabara najuntũ coyene xeinabe xua pia peyawenaewa tsane. Bapoxonae baponbe Jesús itamaiquei jayababe. Bapoxonae baponbe nainya necotaxubabe. Jestustha napuna ponabe.

### Meje yabara poxonae Jesús Jerusalén tomaratha patopa

(Mr 11.1-11; Lc 19.28-40; Jn 12.12-19)

**21** Poxonae bara itiya pona Jerusalén tomara, Jesús bara muxu pebaru patopae pijimonae Betfagé tomaratha. Barapo Betfagé tomara demxuwa itapatororotha eca po demxuwa pewun Olivowa, tsipei baxota umena olivo naein. Bapoxonae Jesús itoroba pebinbe nacueyatabe xua doce poyobe jiwanabe. <sup>2</sup>Jesús baraibe baponbe, jeye:

—Paponarebe po tomara painya itabaraya equiya. Poxonae papatopaenamebe barapo tomaratha pacaxinaenamebe burra pesowato xua pon quetanotatsi yawano xua penun quetanotatsi pon pebto. Barapo burra paisanaxorebe yawa payama carenandebe coxiwa yawa penunno. <sup>3</sup>Icha ichun paca barai tsane: ‘¿Eta xua payama isanaxubamebe burra?’ jei tsane, nexata pajandebe: ‘Pon jiwi Pecanamataxeinaein bepa pata yama cayiyaeinjei, tsipei pinae nantawenona’, pajandebe. Nexata bapoxonae nainya bapon paca cobe itorobinabe xua painya neyama carenaenexambe tsane, jei Jesús.

<sup>4</sup>Poxonae Jesús daxita baxua paeba bara bapoxonae nayabara jume weta pocotsiwa bayatha Isaías yabara paeba pijume diwesitha xua Mesías pepatopaewa tsane Jerusalén tomaratha, jeye:

<sup>5</sup>“Patsipaebare Sión tomarapiwi.

Pajande: ‘Pataename pon itorobiya painya pepa paca Ewatsin.

Pacata juntema patopaena, xua burriyotha equeicaena, penuntha xua burra pesowato

coxi tatsi’ pajande”, jei pon Nacom

pia peitorobi jume pepaebin,

bapon Isaías, xua Mesías yabara paebatsi.

<sup>6</sup>Nexata Jesús pijimonae jitonbe tatsi ponabe. Matautano baponbe exanabe pocotsiwa bayatha Jesús itoroba. <sup>7</sup>Baponbe yama carenabe burra pesowato yawa yama carenabe penun. Baponbe pia paparuwan tsijuma jebicabe po paparuwan matha weruyabe coxiwathano yawa penunthano. Bapoxonae Jesús equeica penuntha. <sup>8</sup>Jiwi, barapo jiwi pin bicheito bichocono. Bapoxonae barapo pin bicheito namtotha paparuwan yerababa jejebabapoinya. Ichamonae peaxu ucuboba po axu icha coichaxu axu ichi. Bapoxonae barapo axu, namtotha axu jejebabapoinya. Daxita barapomonae barapo coyene exana xua Jesús pebaru cui itura jinaenexa tsainchi. <sup>9</sup>Pomonae, xua Jesús tsiwana enapoinchi iruru pomonae Jesús peputha taenapoinchi daxita barapomonae bichocono jume daunweya wawaya jeye:

—¡Pai jayana, barabu jiwi baru cui itura jinaena bapon pon David pia pemoxi susatopin tatsi! Bapon jiwi yabara jei: ‘¡Bapon David pexanto tatsi!’ jei. ¡Maisa Jesús pon jiwi itorobiya pia pepa peewatsinchi, maisa wunae! ¡Bapon

patopa Nacom peitorobixae! ¡Maisa Nacom bichocono wūnae jaintatsi pon athabeicha eca! jei barapomonaе.

<sup>10</sup>Poxonae Jesús patopa Jerusalén tomaratha, daxita barapo tomarapiwi najume cayayatsiya paeba. Cae bicheitomonaе nayainyaba, jeye:

—¿Jintam metha bapon jane? najei.

<sup>11</sup>Ichamonaе jume nota, jeye:

—Apara bapon Jesús pon Nacom pia peitorobi jume pepaebin, pon Nazaret tomarapin po tomara eca Galilea nacuaа, jei ichamonaе xua iru ichamonaе jume notatsi.

**Meje yabara poxonae Jesús aisowa benapuna torobabiya pomonaе Nacom pin pia botha pecaenaetsiwi**  
(*Mr 11.15-19; Lc 19.45-48; Jn 2.13-22*)

<sup>12</sup>Bapoxonae Jesús joniya Nacom pin pia botha, yawa aisowa benapuna torobabiya pomonaе caenaeta baxota. Jesús tabu tayebiya bebai iratha pocotsiwa pexaethopaewan, po pexaethopaewantha nantiya nacatsiba paratixi yawa xua tabu tayebiya bebai iratha peenaewan po peenaewan ichaxota ena pomonaе caenaeta topibo.

<sup>13</sup>Jesús barai barapomonaе:

—Nacom Pejume Diwesitha namchi, jeye: ‘Tabo apara po botha jiwi tanetsipaebinexa tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname ichaxota pijunuwi nantsiyabeibathopa tsipei baxota panacaetutame saya u xua painya necaibinexam tsane paratixi pomonaetha pomonaе xua pateiba xua Nacom petsipaebinexatsi, jei Jesús.

<sup>14</sup>Barapo Nacom pin pia botha tatsi, Jesús imoxoyo caquita umenarucupatsi pomonaе peitata nacutsiwi. Iruru Jesús imoxoyo caquita umenarucupatsi pomonaе pejayuyajujeiwi. Jesús

axaibi exana daxita barapomonaе.

<sup>15</sup>Sacerdotemonaе pia pentacaponae wi tatsi iruru pomonaе jiwi pecuidubiwi Moisés pia peitorobi coyenewa tatsi, daxita barapomonaе tane pocotsiwa Jesús exana pia pexeinya petsita itatsi coyenewatha. Daxita barapomonaе jume tane xua pexui wawai Nacom pin pia botha tatsi xua pexui Jesús yabara jeichichi: “¡Pai jayana, barabu jiwi baru cui itura jinaena bapon pon David pia pemomoxi susato jiwana pin tatsi! Pon jiwi yabara jei: ‘Bapon David pexanto tatsi’, jei”, jei pexui. Bapoxonae daxita pomonaе sacerdotemonaе pia pentacaponae wi tatsi iruru pomonaе jiwi pecuidubiwi Moisés pia peitorobi coyenewa tatsi anaepana poxonae Jesús cui tainchi yawa xua jume tainchino.

<sup>16</sup>Daxita barapomonaе jopa ichipaeyo xua pexui paeba, daxota anaya Jesús jeichichi:

—¿Bayatha jume taneme xua baxua pexui cayabara wawaya namchi? jei barapomonaе.

Jesús jume nota barapomonaе, jeye:

—Aa, bara bayatha jume tan xua pexui newūnae jainta. Paxam bayatha payorobame Nacom Pejume Diwesi xua pexui bara cui copatatsi xua bara wūnae pejainteibiwa tsane. David pexui yabara jeichichi Nacom Pejume Diwesitha, jeye: ‘Xam Nacom, cana exaname pexui poxi isainatsi, iru poxi jinompena, xua barapoxi pexeinya

weixi cayabara caununaya naxuna poxonae sawūnae jainchina’, jei David Nacom Pejume Diwesitha, jei Jesús daxita barapomonaetha.

<sup>17</sup>Nexata Jesús daxita barapomonaе wepu pona Jerusalén tomara weya. Bapoxonae Betania tomara bewarapiya. Baxota merawi maiteca.

**Meje yabara poxonae Jesús biatane  
higuera nae xua jopa penacoichixae**

(Mr 11.12-14, 20-26)

<sup>18</sup> Poxonae Jesús caemumbotha equeicha caibe iya Jerusalén tomara beya, bichocono jainpa pona. <sup>19</sup> Bapoxonae Jesús imoxoyo namtotha taenota higuera nae. Imoxoyo caquita pona piyain, pia taetsi pethei. Daichitha barapo naetha Jesús jopa taeyo pethei, saya ɰ noxu tane. Nexata Jesús biataenota higuera nae, jeye:

—Bapana equeicha jopa nacoichim tsane pethei, jei Jesús higuera naetha.

Bapoxonae caena nainya higuera nae yɰnuncua. <sup>20</sup> Poxonae Jesús cui tainchi pijimonae baxua barapomonaе yabara najɰntɰ coyene cui cabenaeca bichocono. Yawa Jesús yainyabatsi pijimonae, jeye:

—¿Eta xua metha higuera nae nainya yɰnuncua? jeichichi Jesús pijimonae.

<sup>21</sup> Jesús jume nota pijimonae, jeye:

—Bara xaniyeya paca tsipaebatsi. Icha xanepanaya payabara jume cowɰntame xua Nacom painya nepaca cayawenaewa xuano xua jopa ainya ɰnthɰton paxeinaem bara paca itacɰpaena xua painya nepaebiwa icha ichin xua cana exanan higuera nae. Matautano bara paca itacɰpaena xua painya nejeiwa uruto beya xua pajam: ‘Uruto natsixitabare, mar mene beya jopare’, xua painya nejeiwa. Bapoxonae bara baxua jopa bayathiyo tsane. <sup>22</sup> Daxita xua xuan pocotsiwan Nacom beya pawɰcame, icha bara xanepanaya pajume cowɰntsiya wɰcame, bara Nacom paca catsibina baxuan, jei Jesús.

**Meje yabara xua Jesús pia  
peitorobi coyenewa xeina**

(Mr 11.27-33; Lc 20.1-8)

<sup>23</sup> Nexata bapoxonae Jesús joniya Nacom pin pia botha tatsi. Poxonae

cataunxuae Jesús baxota cuidubuncua jiwi, bapoxonae Jesús imoxoyo caquita umenarɰcɰpatsi sacerdotemonae pia pentacaponaeawi tatsi iru judiomonae pia pitiri jiwi tatsi. Daxita barapomonaе Jesús yainyabatsi, jeye:

—¿Eta po peayapusɰ itorobi coyenewatha cuidubame baxuan? ¿Jintam cacata barapo peayapusɰ itorobi coyenewa?

<sup>24</sup> Jesús jume nota barapomonaе, jeye:

—Xan irurɰ tha barichichi paca yainyabinchi. Icha beta pana nejume notsiname, bapoxonae xuya yabara paca tsipaebinchi xua po peayapusɰ itorobi coyeneyatha taexanaewa baxuan. <sup>25</sup> ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús, xua Juan yabara paebatsi pon caena bayatha tɰpa.

Nexata daxita barapomonaе caemonaе najume matsontsonoba, najei: “¿Eta xua metha jei tsainchi? Icha jei tsipaetsi: ‘Juan cui itorobatsi Nacom xua pebautisabiwa jiwi’, metha naca jei tsipae: ‘¿Eta xua metha nexata jopa pajume cowɰntsim Juan?’ metha naca jei tsipae Jesús. <sup>26</sup> Jiwi cui cunuwatsi icha jeichi: ‘Juan cui itorobatsi jiwi xua bautisaba’, icha jeichi. Metha bapoxonae jiwi naca casebichipa anaya. Tsipei daxita jiwi Juan yabara jume cowɰntatsi xua bapon apara pon Nacom pia peitorobi jume tatsi pepaebi jiton”, najei barapomonaе. <sup>27</sup> Nexata barapomonaе Jesús baraichi, jeye:

—Canta jopa payaputaеinyo, jei barapomonaе.

Nexata Jesús barai barapomonaе, jeye:

—Nexata barichin tsane, jopa yabara paca tsipaebi tsainchi po peayapusɰ itorobi coyeneyatha xua daxita taexanaewan, jei Jesús.

**Meje yabara poxonaē Jesús cuiduba  
peçayabara jũta pepaēbi diwesiyo  
xua pebin ainya pexantobe tatsi**

<sup>28</sup> Equeicha Jesús namchi Nacom pin pia botha daxita barapomonaetha, xua sacerdotemonaē pia pentacaponae witha tatsi, irũ judiomonaē pia pitiri jiwitha tatsino. Jesús jeye:

—Moya pana nejume naitaeware pocotsiwa paca tsipaēbinchi. Pebin nacueyatabe poyobe tatsi pexantobe tatsibe. Bapon caeintha nacoxi barai, jeye: ‘Owae, inta anoxuae uva bacabo pabi nacuire’, jei. <sup>29</sup> Bapon jume notatsi pexanto jeye: ‘Bara, aichaxaibin’, jeichichi bapon pexanto. Daichitha equeicha bapon pexanto tatsi nanta xeinataba, bapoxonaē pona xua penacuichinexa uva pabi, paxa tatsi pia pabi tatsi. <sup>30</sup> Pirapae equeicha ichuntha, nacoxi barai barapo jumetha, jeye: ‘Owae, inta anoxuae uva pabi nacuire’, jei bapon pexantotha. Bapon paxa jume nota, jeye: ‘Je, moya daichane, methaunxuae ponaēin’, jei paxatha. Daichitha bapon jopa ponaeyo. <sup>31</sup> Incane yabara paca yainyabinchi xua bapon barapo pexantobe tatsi, ¿eta po pewowinda pon exana pocotsiwa paxa itorobatsi? jei Jesús.

Barapomonaē Jesús jume notatsi, jeye:

—Pon copiya paxa itorobatsi, jeichichi Jesús barapomonaē.

Nexata Jesús jume barai barapomonaē, jeye:

—Bara xaniyan yabara paca tsipaēbatsi, pomonaē paratixi pentoma noteibiwi po paratixi jiwi bewa catsibina pon romanomonaē itorobiya pia pepa peewatsinchi nexa, irũ yabuxi powaxi pesi cui weiweinaewaxi. Bara bequein barapomonaē peantucoyenebewi, daichitha barapomonaē naexanaena Nacom piamonaē tatsi jiwana tatsi,

beya poxonaē paxam irũ panaexaname Nacom piamonaē tatsi jiwana tatsi. <sup>32</sup> Juan pon jiwi Pebautisabin patopa xua pia nepaca cuidubinexa xua pocotsiwa bewa paexanaename painya nexainaenexa tsane po jũntũ coyene pexanepanaē jũntũ coyene. Daichitha paxam jopa pajume cowũntsim pocotsiwa Juan paēba. Ichitha Juan yabara jume cowũntatsi pomonaē paratixi pentoma noteibiwi po paratixi jiwi bewa catsibina pon romanomonaē itorobiya pia pepa peewatsinchi nexa. Irũ yabuxi powaxi pesi cui weiweinaewaxi Juan yabara jume cowũntatsi po coyene Nacom Juan peitorobiwatsi. Nama paxam bequein bara Juan pacui taneme pocotsiwa exana, daichitha jopa painya neauraxae poxonaē abe paexaname. Daxota icha jũntũ coyene jopa paxeinaem xua painya nejume cowũntsinexa Nacom, jei Jesús.

**Meje yabara poxonaē Jesús paēba  
peçayabara jũta pepaēbi diwesiyo  
pomonaē xua abe exana, pomonaē  
petayapucaenaewi uva pabi**

(*Mr 12.1-12; Lc 20.9-19*)

<sup>33</sup> Nexata Jesús equeicha namchi jiwitha, jeye: “Incane pana nejume naitaeware xua paca tsipaēbinchi peçayabara jũta pepaēbi diwesiyo. Matha irũ pebin pia pabi xaina. Bapon ũba po ũnbo pewũn uva cuei ũnbo. Yawano yapu curarata barapo uva pabi ibowantha xua jopa pejojondenaenexa ichamonaē barapo pabitha. Yawano baxota ibo feto exana, xua barapo ibo fetotha pecubinexa uva cuei. Mataũtano baxota exananota bo po bo taucha xua baxota pebin bara wenecotequeica uva pabi. Bapoxonaē bapon itoroba pomonaē pia uva pabi pia petayapucaenaewichi tsainchi, xua bapoxonaē barapomonaē

pejiwanaxaenexa pocotsiwa penawetsiwa. Bapoxonae bapon icha nacua beya pona. <sup>34</sup>Barapo matabi tsuxubi po matabitha uva cuei naweta. Bapoxonae barapo matabi pomaenae pabi petayapucaeanaewi jiwana itapetanota xua penawetsiwa. Bapoxonae pon uva pabi pexeinaein, bapon pomaenae petanacuichiwichi jiwana itoroba, xua petawucaenexa tsainchi uva cuei pomaenae beya, pomaenae pabi petayapucaeanaewi. <sup>35</sup>Ichitha barapomonaenae, pomaenae pabi petayapucaeanaewi teica, teiquebatsi pomaenae itorobatsi, pomaenae pabi pexeinaein itoroba uva pabi petayapucaeanaewi tatsi beya. Barapomonaenae pomaenae petayapucaeanaewi pabi, cuainta caeintha pomaenae penajume carutsi jiwichi jiwana pintha. Ichun bexotsi. Ichun ibotontha cuinbabatsi. <sup>36</sup>Pon pabi pexeinaein barichi equeicha itoroba ichamonaenae pomaenae pia petanacuichiwichi. Equeicha barichi pomaenae pabi petayapucaeanaewi bara jutiya cana exana barapomonaetha.

<sup>37</sup>“Bara nama matapainya pexanto itoroba. Bapon najei: ‘Barapomonaenae metha taxanto inta yabara baru cui itura jinaeinchi, daxota itoroban bapon’, najei bapon. <sup>38</sup>Dapo jumetha pomaenae pabi petayapucaeanaewi poxonae bapon tainchi barapomonaenae najei: ‘Apara bapon paxa copiniwa pichina. Daxota bapon bu bexotsi xainya xeinatsi barapo uva pabi’, najei barapomonaenae. <sup>39</sup>Barapo pexanto tatsi uva pabi juma bema xu cayiyatsi. Baxotiya bexotsi”, jei Jesús.

<sup>40</sup>Nexata Jesús barai barapo jiwana Nacom pin pia botha, jeye: “Poxonae pabi pexeinaein patopaena, zeta be cana ichi tsane pomonaetha pomaenae barapo uva pabi pia petayapucaeanaewi?” jei Jesús.

<sup>41</sup>Barapomonaenae Jesús jume notatsi, jeye:

—Bapon bewa jutebina barapomonaenae, jopa weyatae tsane barapomonaetha xua peantucoyeneyapube jiwixae. Bapoxonae itorobina ichamonaenae xua petayapucaeanaenexa tsainchi barapo uva pabi. Barapo pabi petayapucaeanaewi matha notsina uva cuei xua naweta. Bapoxonae tsabina pabi pexeinaein nexa yawa iruru barapomonaenae nexaru, jei barapo jiwitha pomaenae peenaexae Nacom pin pia botha.

<sup>42</sup>Nexata Jesús barai barapomonaenae xua nayabara paeba, jeye:

—¡Paxam bara bayatha pay-orobameba Nacom Pejume Diwesitha! Barapo diwesitha neyabara caunuta poxonae iboto yabara paeba, xua jeye:

‘Pebiwi pomaenae ibo bon peacabiwi, barapo pebiwi xuba po iboto tabu caboca

po iboto peainya cui iboto.

Ichitha Nacom itapeta barapo iboto xua petabu cabocaenexa barapo peainya cui ibotoxae.

Waxainchi nanta xeinatsi jeichichi:

Maisa pocotsiwa Nacom exana naca tsita xanepana’,

jeichichi, jei Nacom Pejume Diwesitha xua neyabara caunuta.

<sup>43</sup>Daxota paca tsipaebatsi, Nacom paca itawetsina xua jopa painya nenaexanaenexa tsane Nacom piamonaenae jiwana tatsi pam. Barapo coyenewa xua Nacom piamonaenae jiwana tatsi penaexanaenae coyenewa Nacom pichina painya xainya weya xua ichamonaetha pecatsinexa pomonaetha pomaenae petsita juntu coyene xanepanaewi. <sup>44</sup>Incane iboto yabara paca tsipaebinchi. Barapo ibototha poxonae ichauyo jopeica pepuruxi tsanaya. Matautano poxonae barapo iboto ichauyo matatsun



jopeicatsi pebeno tsanaya. Icha barapo iboto ichi poxonae cana exana ichauxitha peainya cui ibotoxae, xan barapocotsi juta coyeneya barichin pomonaetha pomonae jopa tana nejume cowantsiwi. Pia jopa tana neyaputaexae barapomonae daxota peraxa exanaein, jei Jesús.

<sup>45</sup> Sacerdotemonae pia pentacapon-aewi tatsi iru fariseomonae, poxonae jume tane barapo pecayabara juta pepaebi diwesi, xua Jesús paeba, barapomonae yaputane xua apara bara Jesús yabara paeba barapomonae. <sup>46</sup> Bequein barapomonae Jesús muxu pewaetabichi, ichitha barapomonae junuwa. Jiwi cunuwatsi, tsipei daxita jiwi Jesús xanepanaya yabara paebatsi xua pinae Jesús Nacom pia peitorobi jume pepaebiwi jiwana tatsi.

**Meje yabara poxonae Jesús  
cuiduba pecayabara juta  
pepaebi diwesiyo xua pin  
penabanaewa peexanaewa tsane**

*(Lc 14.15-24)*

**22** Equeicha Jesús tsipaeba jiwitha pecayabara juta pepaebi diwesiyo, jeye:

<sup>2</sup>“Nacom cana exana piamonaetha pomonae juntu coyene itorobiya ewata, icha pocotsin ichi pon jiwi itorobiya pia pepa peewatsinchi poxonae waba, xua poxonae ichamonaewabatsi xua petsinacaetutsinexa pexaewa xua penabanaenexa. Baxua exana poxonae pexanto tatsi pecotsiwa pepichixae. <sup>3</sup>Barapon pon jiwi itorobiya pia pepa peewatsinchi itoroba pomonae pia petanacuichiwichi xua petawabinexa tsainchi pomonae xua bayatha petsipaebixae xua petapatsiwa tsainchi pia botha xua bepa pinae petanabanaewa tsainchi pia botha. Daichitha barapomonae aichaxaibi xua pepatsiwa tsane. <sup>4</sup>Bapoxonae barapon

pon jiwi itorobiya pia pepa peewatsinchi equeicha itoroba ichamonaewapomonae pia petanacuichiwichi, jeye barapomonaetha: ‘Pomonae bayatha tsiwaban pexaewa xua penabanaenexa painta tsipaebare pajande: Bepa pinae nainya papatsim, tsipei pinae bayatha pexaewa canacui wunaeta. Tsipei caena bayatha pinae cobe itoroba xua petajutebiwa tsainchi vacan, yawano po duwein bichocono nasita. Daxota bewa pinae nainya paponae bara beya xua painya nenabanaenexa pexaewa, yaitama tsipei pinae pexanto tatsi pichina pecotsiwa, pajande’, jei barapon pon jiwi itorobiya pia pepa peewatsinchi. <sup>5</sup>Daichitha barapomonae pomonae tsiwabatsi pexaewa, barapomonae jume naitemata, saya meisa u naitomatsiya exana piawan. Barapomonae jiwanaein pia pabitha pona. Iru ichun piawa caenaetauya. <sup>6</sup>Ichamonaeru teica, pomonae pon jiwi itorobiya pia pepa peewatsinchi itoroba, barapomonae teicatsi. Yawano bichocono abe exainchi beya poxonae nama werapa. <sup>7</sup>Nexata bapon pon jiwi itorobiya pia pepa peewatsinchi bichocono caseba pomonae petajutebixatsi pomonae bapon itoroba. Nexata bapon itoroba pia soldadomonae xua barapomonae xuya pejutebinexa tsainchi matauta xua tomara petatautsinexa tsainchi. <sup>8</sup>Bapon pirapae equeicha barai ichamonaetha pomonae pia petanacuichiwichi jiwitha, jeye: ‘Bayatha bequein daxita wetan xua penabanaewa tsane, daichitha pomonae waban jopa xanepanaya nejume jejeyo daxota jopa bewa patsi tsane xua penabanaenexa. <sup>9</sup>Daxota paponde tomara namtontha, po namtontha pin namtontha, baxotiya pomonae poxonae pacaxibeibame, barapomonae painta wabare’, jei bapon. <sup>10</sup>Pomonae petanacuichiwi, barapomonae pona

namton beya. Bapoxonae barapomonae, daxita pomonae caxiba namtontha, maticayiia pon jiwi itorobiya pia pepa peewatsinchi pia bo tatsi beya. Pomonae abe peexanaewino carendenatsi, pomonae xanepanaya peexanaewino carendenatsi, beya poxonae bo tutu nayucaxuba.

<sup>11</sup>“Nexata pon jiwi itorobiya pia pepa peewatsinchi bo tutu joniya petaenexa tsane pomonae pata. Bapon itabara tane pebin xua iruru pon baxota eca. Ichitha barapo pebin pexeinya paparuwa jopa nama xatatsiyo icha be jopa ichiyo ichamonae, tsipei ichamonae pexeinya paparuwa nama xataba xua po paparuwa jiwi ba nama xataba poxonae pona penacaeutusiwatha xua penabanaenexa pexaewa poxonae pebin pecotsiwa pita.

<sup>12</sup>Pon jiwi itorobiya pia pepa peewatsinchi barai bapon, jeye: ‘Tajiton, ¿eta xua metha xote naecame xua matauta jopa pexeinya paparuwa nama xatatsim?’ jei bapon. Ichitha bapon saya moya eca. <sup>13</sup>Bapoxonae pon jiwi itorobiya pia pepa peewatsinchi barai pomonaetha pomonae pexaewa carena tsaihi pexaethopaewatha, jeye: ‘Bapon pacobe caecunta cure yawa pataxu caecunta cure, yawa aisowa beya paxore ichaxota quirei. Baxota bapon wecoyei tsane yawa baxota nantanuweya nanta jayabina, bichocono peatenexae tsane’, jei pom jiwi itorobiya pia pepa peewatsinchi. <sup>14</sup>Barapon pon jiwi itorobiya pia pepa peewatsinchi bequein pinmonae waba ichitha saya tsiquimonaeyo pata penabanaewatha. Icha barapon ichi Nacom bara juta coyene ichiya cana ichi tsane jiwi. Nacom bequein waba pin bicheitomonae, daichitha saya tsicamonae itapetatsi, pomonae Nacom pijimonae tatsi penaexanaenexa tsane”, jei Jesús.

**Meje yabara poxonae Jesús yabara cuiduba paratixi matoma po paratixi jiwi bewa catsibina pontha pon romanomonae itorobiya pia pepa peewatsinchi**

(*Mr 12.13-17; Lc 20.20-26*)

<sup>15</sup>Nexata fariseomonae pona Jesús weya, caemonae natsipaeba najei: “¿Eta po peyainyabiwa Jesús taexanaeinchi xua catsawa wanaca jume notsinexa? Bapoxonae waxainchi xain yopitatsi ichamonaetha xua bapon abeya wanaca jume notsiwaxae”, najei fariseomonae.

<sup>16</sup>Bapoxonae barapomonae itoroba pia pepuna ponaewichi, matautano barapomonae itorobano pomonae Herodes pia pepuna jinompaewichi. Daxita barapo matabuxuyobe pata Jestutha pomonae fariseomonae itoroba. Barapomonae Jesús beya jeye:

—Pon jiwi Necuidubim. Bara paya-putan xua bara jume xainyeya tsipae-bame jiwi, matautano xua jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi bara catsita najupa.

<sup>17</sup>Incane yabara pana netsipaebare xua nanta xeiname xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacua werena peponaein? Icha jopa tsipae ¿metha daxua abe tsipae? jeichichi Jesús barapomonae pomonae fariseomonae itoroba.

<sup>18</sup>Daichitha Jesús yaputane xua bichocono barapomonae abeya nanta xeina xua Jesús abe pecanaexanaenexa

tsainchi. Jesús barai barapomonae, werye:

—Paxam pomonae itara mexeya xanepanaya pepaebiwi pam, daichitha abeya pepaebiwi pam. ¿Eta xua metha pana nejuntũ coyene jujutame poxonae baxua yabara pana neyainyabame? <sup>19</sup> Incane moya painta xawena tha taetsi barapo paratiyo, jei Jesús.

Bapoxonae barapomonae barapo paratiyo Jesús tacapoinchi. <sup>20</sup> Poxonae Jesús tane barapo paratiyo, bapoxonae yainyaba barapomonae, jeye:

—¿Jintam pejumopere? ¿Yawano jintam wun ducuaire? jei Jesús.

<sup>21</sup> Nexata Jesús jume notatsi barapomonae, jeye:

—Apara romanomonae itorobiya pia pepa peewatsinchi, jei barapomonae.

Nexata Jesús barai barapomonae, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua irũ piawaxae tatsi, jei Jesús.

<sup>22</sup> Poxonae barapomonae jume tane xua Jesús beta xanepanaya jume nota, bapoxonae barapomonae yabara najuntũ cui coyene cabenaeca. Bapoxonae ponarũcupa Jesús weya.

**Meje yabara poxonae Jesús yabara yainyabatsi po coyene xua equeicha asũ pomonae pewerapeibiwi**

(Mr 12.18-27; Lc 20.27-40)

<sup>23</sup> Bapoxonae caena barapo mataqueitha saduceomonae jiwana pata Jesús pia xantha tatsi xua Jesús piraichi petsipaebinxatsi. Saduceomonae barompaya pia pecuidubi coyenewa xeina xua pinae pomonae pewerapeibiwi equeicha jopa asũ tsaibiyo. Barapo pecuidubi coyenewa jopa jupaeyo po pecuidubiwa Jesús pia pecuidubiwa tatsi xua pinae

jiwi equeicha asũ jinompaena poxonae werapa. Daxota barapo saduceomonae Jesús tsipaebatsi jeye:

<sup>24</sup>—Pon jiwi Necuidubim, Moisés nacata tina, namchi: ‘Icha pebin piowa cuenta tũpa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. <sup>25</sup> Barichi, matha irũ cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. Pon cotacaya naexana xuya pentapin coseuri pita xua bapoxonae pentapin pecoutha pexui pexeinaenexa. <sup>26</sup> Bapon irũ cuenta tũpa, irũ jopa xeinaeyo pexui. Bapoxonae ichũn xuyapin xuya barapowa pita xua pentapin coseuri pita. Bapon barichi irũ cuenta tũpa, irũ pexui jopa xeinaeyo. Daxita barapo siete poyobe cuenta nanapentapona bapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapopon-aetsi pexuyo. <sup>27</sup> Bapoxonae matapainya irũ bapowa tũpa. <sup>28</sup> Xam Jesús, ba pae-bame, ba jam: Matabi jopaena po matabitha Nacom asũ exanaena, xua jiwi asũ exanaeinchi mũthũn wetsina, ba jam. Poxonae barapo matabi jopaena xua daxita jiwi asũ jujuinaena, barapo matabitha ¿jintam metha bapowa xuya pichinchi, xua ichũn pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomonae.

<sup>29</sup> Nexata saduceomonae Jesús jume nota, jeye:

—Paxam apara catsawiya pana nejume notame, tsipei jopa beta payaputaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusũ itorobi coyenewa tatsi.

<sup>30</sup>Poxonae petupaewi equeicha asu jujuinaena, jopa jitha eenaponae tsane. Yawa barapomonae jopa pexantixi jitha cuarebaponae tsane. Tsipei barapomonae barichi tsane icha be matatsunpiwimonae ichi, po matatsunpiwimonae Nacom pia nacuatheicha jinompa, xua po matatsunpiwi jopa jitha enaeyo. <sup>31</sup>Paxam bequein bara bayatha payabara yorobame pocotsiwa Nacom namchi Pejume Diwesitha, po coyene xua pomonae pewerapaewi equeicha asu jujuina. Barapo diwesitha Nacom jeye: <sup>32</sup>‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. Baxua Nacom paeba tsipei Abraham iru Isaac iru Jacob pomonae bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomonae pewerapaewi pomonae jopa caewa equeicha asu pejinompaewi, barapomonae jopa pia Nacom tatsi, pon itabocotha eca. Saya jame meisa pomonae bayatha pewerapaewi xua caewa equeicha asu pejinompaewi, pomonae pejume cowantsiwixaetsi Nacom barapomonae jame pia Nacom tatsi, pon itabocotha eca, jei Jesús.

<sup>33</sup>Poxonae jiji jume tane pocotsiwa Jesús cuiduba, barapomonae yabara najuntũ cui coyene cabenaeca.

**Meje yabara poxonae Jesús yabara cuiduba po peitorobi cui coyene pepa peainya cui coyenewa**

*(Mr 12.28-34)*

<sup>34</sup>Poxonae fariseomonae yaputane xua saduceomonae moya umena xua Jesús beta pejume notsixae, bapoxonae fariseomonae nacaetuta xua equeicha peyainyabiwanexa tsainchi Jesús. <sup>35</sup>Barapo fariseomonae caein jiwana, pon peyabara yaputaein Moisés pia peitorobi coyene tatsi, bapon ichichipa

xua Jesús pejuntũ coyene jujutsiwatsi xua icha bara metha Jesús abeya jume notsina. Bapon jeye Jesustha:

<sup>36</sup>—Ja pon jiji Necuidubim, ¿eta po peitorobi coyene pepa ainya cui coyenewa po peitorobi coyene beyacaincha xua icha peitorobi coyene? jei.

<sup>37</sup>Jesús jume nota bapon, jeye:

—Po peitorobi cui coyenewa pepa ainya cui coyenewa jeye: ‘Antobeinde pon jiji Pecanamataxeinaein, bapon Nacom xua daxita nejuntũ coyene wetsina, matautano xua daxita jinya nepoponae coyenewatha, matautano xua daxita nenanta xeinaewatha nentasiopatha’, jei. <sup>38</sup>Jame barapo peitorobi coyene bichocono ainya cui coyenewa beyacaincha icha peitorobi coyene. Barapo peitorobi coyene, po peitorobi coyene ainya cui coyenewa, Nacom copiya itoroba. <sup>39</sup>Po peitorobi coyene cotacaya itoroba ichaxota ba ‘dos’ jei, barapo peitorobi coyene be jume jupa po peitorobi coyene copiya ducua. Iruru barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. <sup>40</sup>Barapo peitorobi coyene jumebe caunuta, xua Moisés pia peitorobi coyenewatha baxua yabara paeba, iru pomonae Nacom peitorobi jume pepaebiwi pia pecuidubi coyenewatha baxua yabara paebaru, jei Jesús.

**Meje yabara poxonae Jesús nayabara jei: “Mesías, ¿jintam pia pemomoxi susato jiwanapin tatsira?” jei**

*(Mr 12.35-37; Lc 20.41-44)*

<sup>41</sup>Poxonae fariseomonae cataunxuae nacaetutempa bapoxonae Jesús yainyaba barapo fariseomonae, jeye:

<sup>42</sup>—¿Eta xua pacayabara nanta xeiname Mesías pon Nacom pia

Peitapetsin? ¿Jintam pia pemomoxi susato jiwanapin tatsira? jei Jesús.

Barapomonae Jesús jume notatsi, jeye:

—Apara David, pon Israel nacuapiwi itorobiya pia pepa peewatsinchi, bapon pia pemomoxi susato jiwanapin tatsi, jei fariseomonae.

<sup>43</sup> Bapoxonae Jesús barai barapomonae, jeye:

—David yabara paeba xua Mesías apara pia Pecanamataxeinaeinchi tatsi poxonae David cueicueijeji exanatsi Nacom pia Pejumope tñaxu tatsi.

<sup>44</sup> David salmos penaxūnae wei diwesitha bayatha jeye:

‘Nacom pon Pecanamataxeinaein jiwi, Tanecanamataxeinaein baraichi pon Mesías, jeichichi:

Tacoxa werena ecare, beya abu tsane poxonae

necaitafaetabi jiwi pia pecanamataxeinaeinchi

tatsi caexanaeinchi, jei Nacom’,

jei David salmos penaxūnae wei diwesitha.

<sup>45</sup> Icha David Mesías yabara jei: ‘Bapon Mesías Tanecanamataxeinaein’, jei, ¿eta xua metha tsipae xua Mesías apara David pia pemomoxi susato jiwanapin tatsi? jei Jesús.

<sup>46</sup> Daxita barapomonae jopa itacupaetsi xua Jesús pejume notsiwatsi tsainchi, poxonae pinae David paeba xua pinae jei: ‘Bapon Mesías Tanecanamataxeinaein’, jei. Bara nama barapo matabitha weya, equeicha nama Jesús jopa bepeyainyabiwatsi barapomonae.

**Meje yabara poxonae Jesús  
muxuweta jiwi xua pomonae  
fariseomonae irū pomonae  
jiwi pecuidubiwi Moisés pia  
peitorobi coyene tatsi**

**barapomonae pecuiyainwa tatsi**

(Mr 12.38-40; Lc 11.37-54; 20.45-47)

**23** Nexata Jesús barai pin bicheito jiwi irū pijimonae, jeye: <sup>2</sup> ‘Pomonae jiwi pecuidubiwi Moisés pia peitorobi coyene tatsi irū fariseomonae daxita barapomonae pia pecuidubi coyene xeina xua po coyene jiwi yaputane exanatsi po coyene Moisés pia peitorobi coyenewatha paeba. <sup>3</sup> Pacui yabara jume cowñde pocotsiwa barapomonae pia pecuidubi coyenewan tatsi. Matautano paexande pocotsiwa barapomonae paca itoroba. Daichitha jopa paexanaeinde pocotsiwa barapomonae exana tsipei barapomonae itara beta pepaebiwi daichitha yabara jume toxeinchiya catsawiya exana, barapo peitorobi coyenewan. <sup>4</sup> Barapomonae be pocotsimonae poxonae ichamonae itorobatsi xua pecaponaewa pocotsiwa arewe, pocotsiwa jiwi bapana jopa itacupaetsi xua pecaponaewa. Daichitha barapomonae jopa yawenaeyo pocotsiwa ichamonae itorobatsi. Matautano barapomonae jopa tayoichaeyo cae cobesitiyotha. Icha barapomonae ichi poxonae ichamonae itorobatsi xua pecaponaewa pocotsiwa bichocono arewe, barapocotsi juta coyeneya ichi pomonae jiwi pecuidubiwi Moisés pia peitorobi coyene tatsi, irū fariseomonae, daxita barapomonae itoroba pia pecuidubi coyenewatha pocotsiwa paxam painya neexanaenexa. Ichitha barapomonae jopa exanaeyo baxua. Pocotsiwa barapomonae paca cui itoroba pocotsiwa painya neexanaenexa, paxam bapana jopa paca

itacupaeyo xua painya neexanaewa baxuan. <sup>5</sup>Barapomonae ichichipa nawita xua jiwi pecui taewa tsane pocotsiwa poxonae barapomonae exana xua bapoxonae jiwi penanta xeinaenexa xua barapomonae bara pejuntu coyene xanepanaewi. Daxota barapomonae tsica cajaxi peitapatha querabaduba xua pebocoton. Barapo bocotontha tututha iya jeya xua xoxitha tinaduba Nacom Pejume Diwesi. Yawa icha cajaxi pemaxutha querabaduba. Yawa barapo bocotontha tututha iya jeya xua xoxitha tinaduba Nacom Pejume Diwesi. Matauta barapomonae nama xataba po paparuwan bichocono apipiya deca, beyacaincha xua poxonae ichamonae nama xataba po paparuwan apipiya. <sup>6</sup>Matauta barapomonae nanta caxunaeneiba ichaxota nanta caxunaeneiba pomonae peainya cui jiwi penaexanaewi. Matautano barapomonae judiomonae pia penacatutsi bontha ichichipa nawita xua nanta caeneiba ichaxota enathopeiba pomonae peainya cui jiwi penaexanaewi. <sup>7</sup>Matauta barapomonae ichichipa xua jiwi pejacobeiwiwa tsane namtontha barapomonaetha, xua jiwi pebaru cui itura jineibinexa barapomonae. Matautano barapomonae ichichipa nawita xua jiwi ainya cui pecana exanaewa barapomonae poxonae jiwi pejei tsaibinexa 'Pomonae jiwi pecuidubiwi' poxonae pejei tsaibinexa jiwi.

<sup>8</sup>"Ichitha nama paxam jopa bewa pacopatsim xua bara jiwi jacobiya paca necajei tsaibinexa: 'Pata pecuidubi jiwi pam', paca necajei tsaibinexa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam be caemonae jiwi pam, saya jame panantautame bara caein pon ainya cui penaexanaein painya itutha. <sup>9</sup>Pomonae

po irathe jinompe jopa bewa wabi pajam 'Axa', jopa bewa pajam xua painya baru cui itura jinaexae pomonae jopa bequein barompaya painya axeiwi. Painya xoba jiwi baxua bara pajume copatame, tsipei paxam panantautame bara caein painya Axa, pon pabarū cui itura jiname pon peitabocotha eca. <sup>10</sup>Matautano jopa bewa pacopatsim xua bara jiwi jacobiya paca necajei tsaibiwa: 'Pata necanamataxeinaewi pam', paca necajei tsaibiwa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam panantautame bara caein pon painya Necanamataxeinaein, jame apara bapon meisa Cristo. <sup>11</sup>Icha pon paxam jiwana, icha bapon ichichipa naexana be pocotsin canamataxeina ichamonae bapon matha bewa copiya daxita paxam beta amanaya pacata nacuichina. <sup>12</sup>Pon xua pia coutha peainya cui jiton naexana pejuntu coyenetha, Nacom exanaena xua bapon pecui pawī jiton naexanaena. Ichitha pon xua pecui pawī jiton naexana, pejuntu coyenetha, Nacom exanaena xua bapon peainya cui jiton naexanaena.

<sup>13</sup>"¡Paxam pomonae Moisés pia peitorobi coyene tatsi painya necuidubiwi jiwi pam tsobenaem! ¡Paxam iru pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam acuiocoyeneyapubeya paexaname xua poxonae jiwi bequein ichichipa naexana Nacom piamonae tatsi jiwana. Paxam jopa pajume cowuntsim Nacom yawa jopa pacopatsim xua ichamonae iru pejume cowuntsiwa Nacom.

<sup>14</sup>"¡Paxam pomonae Moisés pia peitorobi coyene tatsi painya necuidubiwi jiwi pam tsobenaem! ¡Paxam iru pomonae fariseomonae pam

tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Powaxi pecuenta werapaewaxichi piseurixi, barapowaxi pacueranta ename pia bon. Naemata Nacom pawuqueibame. Jopa cuinaya pana najume copababeibim poxonaе pawuqueibame Nacom tsipei paichichipame nawita xua jiwi xanepanaya paca necayabara paebiwa xua bara cou paxam pejuntu coyene xanepanae jiwi pam. Daxota poxonaе po mataqueitha Nacom yabara paebina daxita jiwi penatsicuentisiwa barapo mataqueitha Nacom bichocono paca peraxa jubina, beyacaincha poxonaе peraxa jubinchi pomonaе pacuidubame.

<sup>15</sup>“¡Paxam pomonaе Moisés pia peitorobi coyene tatsi painya necuidubiwi jiwi pam tsobenaem! ¡Paxam iru pomonaе fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam taju beya paponame daxita carepayan beya, xua painya cana exanaenexa ichuntha xua bapon pejume cowuntsiwa tsane painya necuidubi coyenewan xua bapoxonaе bapon be judiomaepin penaexanaewa tsane. Bapon pacana exaname, xua bapon bichocono equeicha mataropeicha abe peexanaein. Daxota bapon bewa xubinchi ichaxota po nacuatha isoto jopa itacounayiyo, icha paca cana ichi tsane poxonaе paca bebai tsane barapo nacuatha.

<sup>16</sup>“¡Paxam abe peexanae jiwi tsobenaе pam! Paxam barapocotsi coyeneya juta panacana exaname, icha be pon peitata nacutsin ichi xua poxonaе ichun matacapoinchi pon iruru peitata nacutsin. Paxam ichamonaе ba pacuidubeibame ba pajam tsaibim: ‘Icha ichun nayabara cui wunaе tsimuxu duta xua jeye: Xaniwaicha exanaein

pocotsiwa xua catsipaebatsi Nacom pia pin bo wunthaxae tatsi, poxonaе jei, baxua ba jopa ainya cuiyiyo poxonaе ichun nayabara cui wunaе tsimuxu duta bapocotsi wuntha’, ba pajam tsaibim xua ichamonaе poxonaе pacuidubeibame. Matautano ba pajam tsaibim: ‘Icha ichun nayabara cui wunaе tsimuxu duta xua jeye: Xaniwaicha bara exanaein pocotsiwa xua catsipaebatsi oro nainto wuntha pocotsiwa daedaena po oro nain coroton Nacom pin pia botha tatsi eca, poxonaе jei, baxua ba xua bapon exana bapocotsi wuntha, baxua jame ainya cui poxonaе barapon barapo wuntha nayabara cui wunaе tsimuxu dubeibina’, ba pajam tsaibim poxonaе pacuidubeibame. <sup>17</sup>¡Paxam barapocotsi coyeneya juta panacana exaname, icha be pomonaе matasipa daunwei ichi poxonaе jopa beta jume cowuntsiyo Nacom! Nacom pin pia bo bichocono ainya cui beyacaincha oro nain, po oro nain coroton Nacom pin pia botha tatsi ena. Tsipei barapo oro nain poxonaе aisowa beequiya Nacom pin pia bo weya jopa ainya cuiyiyo. Jame saya meisa poxonaе bo tututha eca bapoxonaе ainya cui barapo oro nain, tsipei barapo bo ainya cui cana exanatsi. <sup>18</sup>Matauta ba pajam tsaibim: ‘Icha ichun nayabara cui wunaе tsimuxu duta, xua jeye: Xaniwaicha bara exanaein pocotsiwa xua catsipaebatsi xua be pexaethopaewa wuntha xua ichaxota duwei tauteiba xua tuxusi exaneiba Nacom nexa, poxonaе jei, baxua ba bapon jopa bewa exanaе poxoru baraxua xua be pexaethopaewa jopa ainya cuiyiyo poxonaе ichun nayabara cui wunaе tsimuxu duta bapocotsi wuntha’, ba pajam tsaibim poxonaе ichamonaе pacuidubeibame. Matautano ba pajam tsaibim: ‘Icha ichun nayabara cui wunaе tsimuxu duta xua jeye: Xaniwaicha bara exanaein

pocotsiwa xua catsipaebatsi duwei wuntha po duwei xua bocopiya ichaxota xua be pexaethopaewa wuntha, poxonaе jеi, baxua ba bapon jame bewa exanae poxoru po duwei xua bocopiya ichaxota xua be pexaethopaewa, baxua jame ainya cui poxonaе bapon barapo wuntha nayabara cui wunae tsimuxu dubeibina', ba pajam tsaibim poxonaе pacuidubeibame. <sup>19</sup>¡Paxam barapocotsi coyeneya juta pana cana exaname, icha be pomonaе matasipa daunwei ichi poxonaе jopa beta jume cowuntsiyo Nacom! Pocotsiwa xua be pexaethopaewa ichaxota duwei tauteiba xua tuxusi exana Nacom nexa, poxonaе tauta baraxua xua be pexaethopaewa bichocono ainya cui, beyacaincha ainya cui poxonaе duwein aisowatha bexuba xua saya pexaenexa. Tsipei duwei saya ainya cui poxonaе pocotsiwa xua be pexaethopaewatha bocopiya poxonaе petuxusi exanaewa tsane Nacom nexa. Bapoxonaе barapo duwein ainya cui, tsipei baraxua xua be pexaethopaewa ainya cui cana exanatsi. <sup>20</sup>Daxota pon nayabara cui wunae tsimuxu duta xua be pexaethopaewa wuntha, xua ichaxota duwei tauteiba xua tuxusi exaneiba Nacom nexa, saya meisa jopa barapo wunthiyo, matautano jame nayabara cui wunae tsimuxu dutsina duwei wuntha, po duwein baxota bocopiya. <sup>21</sup>Matautano pon nayabara cui wunae tsimuxu duta Nacom pin pia bo wuntha tatsi, saya jopa meisa barapo wunthiyo, matautano jame nayabara cui wunae tsimuxu dutsina Nacom pewuntha tatsi. Tsipei bara Nacom pin pia bothaxae eca. <sup>22</sup>Daxota pon nayabara cui wunae tsimuxu duta itaboco wuntha, saya meisa jopa barapo wunthiyo, matautano jame nayabara cui wunae tsimuxu dutsina Nacom pia pexeinya peecaethopeibiwa

tatsi wuntha beicha matauta Nacom pewuntha tatsi pon baxoteicha eca.

<sup>23</sup>“¡Paxam pomonaе Moisés pia peitorobi coyene painya necuidubi jiwi pam tsobenaem! ¡Paxam pomonaе fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam ba caewaxi pajiwana wetsabeibame xua painya catsibeibinexa Nacom poxonaе diez xoyobe paxeineibame xua pocotsiwa painya neubiwan. Barichi pacana exaname tsiqui xutixitha po xutoxi pewun menta, matautano po pexuno pewun anís barichi matautano po pexuno pewun comino. Bara bequein barapo coyene paexaneibame, daichitha jopa paexanaem pocotsiwa bichocono ainya cui coyenewa pocotsiwa Nacom pia peitorobi coyenewatha itoroba. Matautano jopa paexanaem po cui coyenewatha bewa bara xaniwaicha pata exanaename jiwi. Matautano jopa paexanaem po cui coyenewatha bewa jiwi payabara najuntu coyene xeinaename painya neyawenaenexa jiwi. Matautano jopa paexanaem po cui coyenewatha xua pana cana exaname xua beta painya nejume cowuntsinexa Nacom. Daxita barapo coyenein jame maisa paexanare, muxuna pa-eexanaponde po coyene copiya pa-eexanaponaе, po coyene poxonaе pajiwana nonotaponeibame poxonaе pocotsiwan diez xoyobe paxeineibame, xua pocotsiwa painya neubiwan. <sup>24</sup>¡Paxam barapocotsi coyeneya juta pana cana exaname, icha be pon peitata nacutsin ichi xua poxonaе ichun matabapoinchi pon iruru peitata nacutsin! Paxam jopa juniya pacayabara jume exaneibim xua Moisés pia peitorobi coyenewatha itoroba. Daichitha jopa paexanaem po peitorobi coyene peainya cui coyenewa



Nacomtha. Barapocotsi jũta coyeneya paexaname icha jiton ichi poxonae mera mene caewata paparuwatha xua pichixi pemuxuna apaeyainwa, daichitha apara yawa apareca xua xuan poxi peconoxi.

<sup>25</sup>“¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam pomonae irũ fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam jopa ba juniya paexaneibim poxonae meisa panaperũ iquicame. Daichitha bũpana iya painya jũntũ coyenetha pecaibi coyene paxeiname, peuwi coyeneno paxeiname. Be barapocotsi jiwi pam pocotsimonae coroton saya matawacaicha iquica yawa paratonno, ichitha atutuxuira bichocono. <sup>26</sup>Paxam fariseomonae pam, pocotsi jiwimonae pam pomonae be peitata nacũtsi jiwi pam. Copiya matha pana najũntũ cui coyene barapende barapo painya neajũntũcoyenebewan, bapoxonae jame xanepanaya painompaename.

<sup>27</sup>“¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam irũ pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Jiwi ba inyapana exana xua pocotsiwa jiton petũpaein peyamuthũ acatabiwatsi. Bequein bara baxua inyapana daichitha xua matha bocareca bichocono ayei xua jiton petũpaein. <sup>28</sup>Barapocotsi jũta coyeneya paexaname, icha be pocotsi coyene peayeíwa ichi xua jiton petũpaein. Bequein panaperũ wũnaetame, daichitha painya jũntũ coyene abe bichocono. Bequein jiwi paca yabara nanta xeina poxonae paca cui tane xua paxam deta cou

pejũntũ coyene xanepanae jiwi pam Nacomtha, daichitha painya jũntũ coyene bichocono paajũntũcoyenebem. Mataũtano bara bequein paxam itara mexeya xanepanaya pepaebi jiwi pam, daichitha apara abeya pepaebi jiwi pam.

<sup>29</sup>“¡Paxam pomonae Moisés pia peitorobi coyene tatsi painya necuidubi jiwi pam tsobenaem! ¡Paxam pomonae irũ fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam petũpaein pomonae Nacom pia peitorobi jume pepaebiwi payamuthũ acabame boutixi. Mataũtano pomonae pejũntũ coyene xeicae jiwi payamuthũ itũpana exaname. <sup>30</sup>Mataũta naerabiya pana najam: ‘Icha caena bayatha jinompaetsipatsi poxonae wamo susato jiwi jinompa metha jopa cueicha yawenaetsipaetsi poxonae barapo Nacom peitorobi jume pepaebiwi jutebatsi’, pana najam. <sup>31</sup>Barapo jumetha poxonae baxua pacaunutame, barapara barapo cui coyene paexaname, icha painya amo susato jiwi ichi poxonae barapo jũntũ coyeneya exana poxonae jutebatsi Nacom pia peitorobi jume pepaebiwi. <sup>32</sup>¡Painya amo susato jiwi abe peexanaexae, caena bayatha bara paichinde! Poxonae pana nebexubiname moya pana necui yabara jume cui were icha matha painya amo susato jiwi ichi poxonae tamropata notarũcupa xua barapo Nacom pia peitorobi jume pepaebiwi jutebatsi.

<sup>33</sup>“¡Maisa paxam pomonae pemuxitorobi jiwi pam! ¡Daxota be jomomonae pacui jũpame poxoru jomo ba cuitaya dũcupa nawa! Bara paichim anoxuae bequein paichichipame xua Nacom pacuitaya dũcupame xua abe paca exanaeyainwa. Ichitha Nacom paca itorobina ichaxota isoto jopa

itacounayiyo. Jopa papanenebiyaem tsane barapo isoto weya. <sup>34</sup>Iitorobicaein painya xantha pomonae taitorobi jume pepaebiwi. Matauta itorobicaein pomonae peyaputaewi. Matautano itorobicaein pomonae jiwi pecuidubiwi Moisés pia peitorobi coyene tatsi. Ichitha barapomonae pajiwana jutebiname. Ichamonae naetotha pacobe matabobiname painya jutebinexa tsane. Ichamonae judiomonae pia penacaetutsi bontha tatsi pabename. Daxita carepaya tomarantha abe pacana eexanaponaename pomonaetha pomonae taitorobi jiwi. <sup>35</sup>Daxota Nacom paca cana exanaena xua paca peraxa exanaena xua daxita pomonae pejuntũ coyene xeicae jiwi pejutebaponaexaetsi painya nacuatha. Painya amo susato jiwi jutebapona pomonae pejuntũ coyene xeicae jiwi. Copiya matha Abel bexotsi pon pejuntũ coyene xeicaein pon bequein jopa abe exanaeyo, beya poxonae iruru Zacarías bexotsiru pon Berequíás pexanto tatsi. Barapon Zacarías pabexubame Nacom pin pia botha ichaxota xua barapo bo tututha uncu pocotsiwa be pexaethopaewa xua ichaxota tuxusi exana Nacom nexa xua iru baxota uncu pepa Nacom pia boyo tatsi xua naitama taeuncuabe. <sup>36</sup>Bara xaniwaicha paca tsipaebatsi pomonae xua anoxuae pajinompage bichocono paca peraxa jubebina tsipei daxita paxam barapara Nacom tsitatsi xua paxam patsita xeiname penatsicuentiwa xua painya amo susato jiwi pejutebaponaexae pomonae pejuntũ coyene xanepanae jiwi xua iruru paxam painya nejutebaponaexaeru”, jei Jesús.

**Meje yabara poxonae Jesús Jerusalén tomarapiwi siwa wecoyeichi**

(Lc 13.34-35)

<sup>37</sup>Bapoxonae Jesús yabara unthuthu wecoyei Jerusalén tomarapiwi. Jesús wecoyeya namchi, jeye: “¡Maise Jerusalén tomarapiwi pam pajutebeibame pomonae Nacom pia peitorobi jume pepaebiwi! ¡Matauta paxam pajutebeibame ibotontha pomonae Nacom pacata itoroba! ¡Maise be paca caetucaetuteibinchi, tapaca cayawenaewatsi tsainchi, icha wacara ichi poxonae nacoxi caetucaetuteta pecuarafetha! ¡Maise be barichocuaein tsane, daichitha jopa paichichipaem! <sup>38</sup>Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. <sup>39</sup>Paca tsipaebatsi xua equeicha jopa pana netaem tsane beya abu poxonae pana neyabara jam tsane: ‘¡Maise bapon jiwi juntũ coyene weiweina cana exanatsi pon patopa, Nacom peitorobixae, pon jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

**Meje yabara poxonae Jesús yabara paeba xua ichamonae abe exanaena Nacom pin pia bo tatsi**

(Mr 13.1-2; Lc 21.5-6)

**24** Jesús Nacom pin pia bo tatsi wejoniya. Poxonae nama bara weya pona, bapoxonae Jesús imoxoyo caquita umenarucupatsi pijimonae. Yawa pijimonae jeichichi:

—Maise Nacom pin pia bo tatsi bepa wuna, jei barapomonae.

<sup>2</sup>Daichitha Jesús jume barai barapomonae, jeye:

—¡Moya caepatiyo pataema! Bara xaniyan paca tsipaebatsi. Maticabi jopaena barapo mataqueitha ichamonae

pomonaē penanapaincha jinompaewi xua icha nacua werena peponaewi abe cana exanaena Nacom pin pia bo tatsi po bo anoxuae pataneme. Aparā jopā cae ibotiyo nacopatuncuae tsane icha iboto peumatha. Daxita abe tsane, jei Jesús.

**Meje yabara poxonaē Jesús yabara paeba xua copiya matha pewunaeya exanaena petsita itutsi coyenewa poxonaē daxita weraweracaenaba**

(Mr 13.3-23; Lc 21.7-24; 17.22-24)

<sup>3</sup>Bapoxonaē Jesús pijimonaē baru pona demxuwatheicha po demxuwa pewun demxu Olivowa tsipei baxota umena olivo naein. Poxonaē Jesús demxuwatheicha ecopiya, bapoxonaē Jesús pijimonaē nameicha tsipaebatsi, jeye:

—Paichichipan xua xam tapata netsipaebiwam tsane, ¿eta poxonaē metha ichamonaē baxua exanaena poxonaē abe cana exanaena Nacom pin pia bo tatsi? ¿Eta pocotsiwa tsane metha xua pewunaeya tsita itapeinya xeinaena xua poxonaē patopeicaename, matautano xua poxonaē imoxoyo daxita weraweracaenaba? jei Jesús pijimonaē tatsi.

<sup>4</sup>Nexata Jesús barai, jeye:

—Dota pam bu ichamonaē naerabiya paca muxu tsipaeba xua daxota abe paexanaetsipame. <sup>5</sup>Tsipei tsana patsina ayei bicheito jiwi pomonaē natsicotaena icha be xan ichin. Barapomonaē jei tsane: ‘Aparā xan Mesías’, jei tsane. Poxonaē barapomonaē muxuitorobiya paeibina bapoxonaē pinmonaē jume cowuntsina. <sup>6</sup>Pajume taename xua jiwi juinya nabenoutsina xote yawa xua juinya iruru nabenoutsina icha ira beya. Daichitha jopā pajunuwinde, tsipei baxua pewunaeya matha copiya tsane. Daichitha cataunxuae dapo matabi aichica tsane xua poxonaē daxita weraweracaenaba yatsicaewa. <sup>7</sup>Cae nacuapiwi iru icha nacuapiwino, barapo

ainya nacuapiwibe nabenoutsina. Matautano iru pon nacua peewatsin iru ichundu pon icha nacua peewatsin, baraponbe iruru nantiya nabenabe. Matautano ainya nacuantha pin jainbo nacua tsane tsipei pin mayayo tsane. Matautano domae tsurucuae tsane ainya nacuantha. Matautano ainya nacuantha ira jijiyatsina. <sup>8</sup>Baraxua copiya matha tsane xua jiwi atene tsoponae tsane bichocono, xua beya jopā nama juniya tsane.

<sup>9</sup>“Bapoxonaē jiwi paca teiquebina, paca atene exanaena matautano paca jutebina. Daxita nacuanpiwi paca casebina painya tana nejume cowuntsixaemxae. <sup>10</sup>Barapo matabintha jiwi pentsina xua Nacom pejume cowuntsiwatsi. Matautano daxita jiwi nacasebina, matabi barapomonaē piamonaē caenaetsina ichamonaetha. <sup>11</sup>Pinmonaē tsana pateibina, pomonaē jiwi pemuxuitorobiwi. Tsana jei tsane: ‘Xan Nacom peitorobi jume tapaebin, Nacom yabara paca cuidubinchi’, jei tsane. Barapo pemuxuitorobi diwesi jume pinmonaē jume cowuntsina barapo diwesi. <sup>12</sup>Pinmonaē jopā juniya abe exanaponaē tsane daxota jiwi, jopā caemonaē nantiya naantobe tsaibi tsane. <sup>13</sup>Ichitha pon awiya xua antuyapusuya nejume cowuntsiya poponaena xua beya yacuiya tupaeya jopāena poxonaē bequein abe taexanatsi ichamonaē, bapon jame Nacom napaeba cana exanaena. <sup>14</sup>Tamonaē capanaena tapexeinya jume diwesi po diwesi xua Nacom waba jiwi petanaexanaenexatsi pijimonaē pomonaē itorobiya peewatsixae. Barapo diwesi tajiwiwimonaē pomonaē tanejume cowuntsi jiwi paebinoutsina daxita jiwitha. Poxonaē barapo diwesi daxita nacuanpiwi jume taena, bapoxonaē daxita barapo jiwi yaputaena xua bara matabi imoxoyo jopāena

po mataqueitha poxonae daxita weraweracaenaba.

<sup>15</sup>“Daniel, pon Nacom peitorobi jume pepaebin bapon caena bayatha yabara tsiwunaeya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichun Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo maticabi jopaenaba poxonae daxita weraweracaenaba”, jei Jesús. (Xan Mateon, paca baraichi: “Pon yorobina po jume diwesi tinan, moya jume naitaewatsina pia pepayutaenexa tsane”, paca jeichi.)

<sup>16</sup>Cataunxuae Jesús cueicueijeji, jeye: “Poxonae bara pocotsiwa pataename bapoxonae pomonae Judea nacuatha jinompa, barapomonae bewa demxuwan berucupiyaena. <sup>17</sup>Barapo maticabitha pon bo matatupatha uncuia bapon jopa bewa botha joniya tsane xua penotsiwa tsane pocotsiwa tabobeinchi bomuxu tututha. Saya jame bewa nainya be-naetsiricuaena. <sup>18</sup>Iruru pon pabitha popona bapon jopa bewa caibeya ponae tsane botha xua penotsiwa tsane pia paparuwan. Saya jame bewa nainya be-naetsiricuaena. <sup>19</sup>¡Pai yabuxi tsobenae powaxi pexui bupana taenatsi barapo maticabitha! ¡Pai powaxi iru pexui isaina, barapowaxi tsobenaeru! Tsipei acabe tsobenae tsane pexui. <sup>20</sup>Poxonae pewunaeya tsane baxua Nacom pawucare xua jopa painya nerucupaewa tsane poxonae awubo peaquexae bichocono, matautano xua jopa painya nerucupaewa tsane poxonae pentaquei seicae maticabitha. <sup>21</sup>Tsipei barapo maticabintha jiji bichocono pin peraxa exanaeinchi. Atene tsane beyacaincha poxonae jiji atene tsaibi poxonae Nacom aena nacua exana, xua equeicha nama bichocono pin peraxa

tsane. Equeicha bexa bapoxonae bapana jopa baxua exanae tsane poxonae bichocono jiji pin peraxa. <sup>22</sup>Icha Nacom jopa be caentacabiyobe exanaetsipae, metha dapomonae ajibi tsipae pomonae panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonae, pomonae pia peitapetsiwixae tatsi.

<sup>23</sup>“Bapoxonae icha ichun paca jei: ‘Pataema bapon apara Mesias uncuie pon Nacom itorobica’, paca jei, iru icha ichun paca jei: ‘Pataema bapon Mesias xota uncuie’, paca jei, baxuan jopa pajume cowuntsinde barapo jumein. <sup>24</sup>Tsipei pomonae pemuxuitorobi jiji tsana patsina. Barapomonae natsicotaena icha be xan ichi ponxaein Mesias. Matautano barapomonae natsicotaena icha be pomonae Nacom peitorobi jume pepaebiwi ichi tsane. Barapomonae pexeinya petsita itutsi coyenewan exanaena peitabocotha, po irathe tsaneno xua jiji pemuxuitorobinexa tsainchi, xua jiji pejume cowuntsinexa pocotsiwa barapomonae paeba. Barichiru pomonaetha pomonae Nacom pia peitapetsiwi tatsi pemuxuitorobinexa tsainchi, xua iruru icha metha barapomonae pejume cowuntsinexa tsaneru pocotsiwa barapomonae paeba. Ichitha jopa itacupaetsi tsainchi xua barapomonae pemuxuitorobiwa tsainchi. <sup>25</sup>Baxua tsiwanaya yabara paca tsiwunaeya muxu dutatsi. <sup>26</sup>Daxota icha jiji paca jei tsane: ‘Pataema bapon Mesias uncuie ira xuepana susato tsurucuae nacua beya’, icha paca jei, jopa bara beya paponaeinde. Matauta icha paca jei: ‘Pataema bapon Mesias xote uncuie bomuxu tututha’, icha paca jei, jopa baxua pajume cowuntsinde. <sup>27</sup>Icha yamuxu ichi poxonae jemeicha yacoicha uncuieica xua coicha nayotaxuba itabocotha,

barichi tsane po matabitha patopeicaein jemeicha. Xan ponxaein Nacom Tananeitapetsin tsita naitutsin daxita jiwí. <sup>28</sup>Quequeremona ba nacaetuta ichaxota baurin boca. Bara juta paichim tsane. Paxam pomona tana nejume cowuntsi jiwí pam, pana newnae ewatsiname po mataqueitha patopeicaein. Bara po mataqueitha pana nacaetutsiname”, jei Jesús.

**Meje yabara poxona Jesús  
nayabara paeba xua poxona  
equeicha patopaetsica ponxae  
Nacom pia Peitapetsin**

*(Mr 13.24-37; Lc 21.25-33;  
17.26-30, 34-36)*

<sup>29</sup>Equeicha Jesús namchi: “Po matabin poxonae nacui wetsina xua jiwí pin peraxa tsane, bapoxonae xometo nainya naquitabina. Jomocoichato jopa pentha tsane. Opiteiton peitaboco weothopeicaena. Matauta Nacom napuna torobabiyaena xua xuan itabocotha dubena. Bapoxonae jopa xapain dubena tsane. <sup>30</sup>Bapoxonae daxita jiwí taena peitabocotha xua cou equeicha apara tapatopaewa tsane ponxaein Nacom Tananeitapetsin. Poxonae daxita nacuanpiwí netaena xua patopaein, barapomona pijunuwí wecoyeyi tsane. Jiwí netaena ponxaein Nacom Tananeitapetsin xua patopeicaein tsaquinaebowantha. Nacom pia peayapusu itorobi coyenewatha, matautano bichocono pexeinya itapanae coichatha patopeicaein. <sup>31</sup>Matautano itorobin tamatatsunpiwí xua bichocono daunweya peobinexa tsane, po peobiwa pewun trompeta. Poxonae baxua jume taena tamatatsunpiwí inta caetutsina pomona taitapetsiwí. Nacaetutsina daxita nacuanpiwí jiwana, iru ichamona pomona ichaxota xometo weecoinapiwí jiwana, iru

ichamona pomona ichaxota xometo bejopiyapiwí jiwana, iru ichamona pomona pocotsiwa werenepiwí jiwana, iru ichamona pomona pocotsiwa berequepiwí jiwana”, jei Jesús.

<sup>32</sup>Equeicha Jesús jeye: “Pajume taema barapo pecayabara juta pepaebi diwesiyo xua higuera nae xua painya nenacuidubiwa tsane. Poxona ba pataneme xua pena noxu xuxuwapona, bapoxona ba payaputaneme xua bara imoxoyo wei tsurucuae tsoponae, xua pentono perubenaenexa. <sup>33</sup>Barapocotsi juta coyeneya ichi tsane poxona pataename daxita baxuan pocotsiwa aunxuae paca tsipaebatsi, pocotsiwa bexa exanaena, bapoxona payaputaename, xua bara imoxoyo tsane xua tapatopae wuna tsane. <sup>34</sup>Bara xainyeya paca tsipaebatsi daxita judiomona naitapataya naexanaponaena beya yacui othopaena poxona Nacom exanaena daxita baxuan pocotsiwa xuaunxuae paca tsipaebatsi. Bapoxona barapo judiomona weraweracaena. <sup>35</sup>Peitaboco aichurucuae tsane, matautano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban”, jei Jesús.

<sup>36</sup>Equeicha Jesús jeye: “Po matabitha baxua exanaena, matauta po horatha baxua exanaena jiwí jopa baxuan yabara yaputaeyo. Iru matatsunpiwí pomona peitaboco beicha jinompa baxuan iruru jopa yabara yaputaeyo. Iru xan, ponxaein Nacom Pexanton baxuan jopa yabara yaputaeyo. Meisa saya Nacom pon Waxa yaputane poxona po matabitha baxua exanaena, matautano yaputane poxona po horatha daxita exanaena baxua xuaunxuae paca tsipaebatsi”, jei Jesús.

<sup>37</sup>Equeicha Jesús jeye: “Icha matha ichi poxonae Noé caena bayatha popona jiwi jopa tsaqueinaeyo xua Nacom pin awubo exanaena methaunxuae. Saya barompaya icha juntu cuitha jinompa daxota jiwi werapa. Barichi juta ichi tsane poxonae patopeicaein barapo cae pin nacuathe xua ponxaein Nacom Tananeitapetsin. Poxonae patopeicaein jiwi jopa tsaqueinae tsane xua Nacom werapa exanaena barapo jiwi pomonae jopa pejume cowuntsiyoxaetsi.

<sup>38</sup>Barapo matakabintha poxonae Noé popona poxonae cataunxuae pin ema jopa duneicaeyo, jiwi jopa tsaqueinaeyo xua bexa pin awubo tsane. Barapo jiwi juntea nabaneiba yawa apeiba. Yawa jiwitha jijinapona, yawa pexantixi jitha dodoubapona beya yacuiya othopa poxonae po matakabitha Noé pin jera naetha joniya. Bapoxonae pin ema mu jopa. Daxita Noé wepu bunothopatsi pomonae jinompa poxonae Noé popona. <sup>39</sup>Barapo jiwi jopa awubo yabara tsaca jinompaeyo. Barapoxonae jemeicha pin ema uncueica. Matauta monapentatsi barapo jiwi. Icha jiwi ichi poxonae Noé popona poxonae barapo jiwi jopa nanta xeinaeyo xua nacabetsina, barichi tsane poxonae xan patopeicaein ponxaein Nacom Tananeitapetsin, jiwi jopa baxua yabara tsaqueinae tsane xua poxonae equeicha patopeicaein. <sup>40</sup>Barapo mataqueitha ainya pebinbe nacuara nacuitaayaenabe pabitha. Ichun matatsunpin pichina, pejume cowuntsixaetsi Nacom. Ichun saya cuenta ponaeinchi jopa pejume cowuntsixaetsi Nacom. <sup>41</sup>Iruru ainya yabuyobe nacuara yacatoyorobuyaenabe. Ichowa matatsunpin pichina, pejume cowuntsixaetsi Nacom. Ichowa saya cuenta ponaeinchi, jopa pejume cowuntsixaetsi Nacom.

<sup>42</sup>“Tsaca pajinompeibare xua tapatopae wuna tsane, tsipei jopa payaputaem po mataqueitha patopaein ponx-

aein jiwi Tacanamataxeinaein. <sup>43</sup>Meje pocotsiwe payaputaema. Icha pon bo pexeinaein yaputaetsipa xua poxonae patopaena pon jiwi pecaibin, bapoxonae bapon jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. <sup>44</sup>Daxota bara paichinde. Tawanaetha pana nacui wunaere, tsipei xan, ponxaein Nacom Tananeitapetsin patopeicaein poxonae jopa tsaca payabara jinompaem tsane tsipei jopa payabara nanta xeinaem tsane xua tapatopaewa tsane”, jei Jesús.

**Meje yabara poxonae Jesús  
yabara diwesi paeba ponbe xua  
bo peyapucaeaeinbe pon  
xua beta peexanaein iru xua  
pon jopa beta peexanaein**

*(Lc 12.41-48)*

<sup>45</sup>Equeicha Jesús namchi pijimonaetha pecayabara juta pepaebi diwesiyo xua pepatopaewa tsane, jeye: “Yabara paca tsipaebatsi pon matakapopona pomona bo pexeinaein tanacuitatsi. Barapon xanepanaya yaputaeya matakapopona. Poxonae bo pexeinaein wepu warapa barapomona, pon bo pexeinaein itoroba pontha pon bo petayapucaeaeinchi, jeye: ‘Inta beta matakapoponde, yawa inta beta pexaewa apare daxita matakabi pomona xua inta nacuita’, jei bo pexeinaein. <sup>46</sup>Pon bo petayapucaeaein bara juntu coyene weiweinaena poxonae patopaena pon bo pexeinaein petaxaetsi xua bara beta tayapucae bo, xuano bara beta peexanaexae pocotsiwa xua bo pexeinaein itoroba. <sup>47</sup>Xaniwaicha paca tsipaebatsi. Bo pexeinaein itorobina xua pon petayapucaeaeinchi bo xua bapon cana exanaeinchi xua equeicha daxita piawan beta petayapunaewatsi xua xuan xeina pon bo pexeinaein. <sup>48</sup>Ichitha ichacuitha pon bo petayapucaeaein

bapon peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae pon bo petayapucaecaecin. <sup>49</sup>Bapoxonae bapon cueinta pomonae pon bo pexeinaein tanacuitatsi. Matautano bapon nanabanaetsipa nawita ichamonaе yawa cupatsi nanaexanaetsipano. <sup>50</sup>Bapoxonae pon bo pexeinaein jemeicha patopaena poxonae pon bo petayapucaecaecin jopa wūnae tsaqueinaeyo. Poxonae bara po hora tsuxubi jopa yaputaeyo yawa poxonae barapo matabi tsuxubi jopa yaputaeyo. <sup>51</sup>Pon bo pexeinaein itoroba ichamonaetha xua pebenexatsi yawa peperaxa jūbinexatsi tsainchi pon bo petayapucaecaecinchi. Matautano itoroba xua barapomonae bapon pexubinxatsi ichaxota jinompa pomonae itara mexeya wūnaeya pepaebiwi ichitha abe peexanaewi. Barapo nacua bereca jiwi bichocono wecoyey pomonae abe peexanaewixae, matautano nantanuweya nantu jayabina bichocono peatenexae”, jei Jesús.

**Meje yabara poxonae Jesús cuiduba pecayabara jūta pepaebi diwesiyo xua diez powayobe xua penowaxi**

**25** Nexata Jesús equeicha icha pecayabara jūta pepaebi diwesiyo cuiduba pijimonae, jeye: “Nacom cana exanaena jiwi xua pomonae pejuntu coyene itorobiya ewatsixae, icha pebin ichi poxonae diez powayobetha xua penowaxi cana exana powaxi bapana jopa peru nacoyabiyo pebiwi. Barapo diez powayobe nota pia lámpan xua peewatsinexa pon pia pecotsiwa nacoyobina. Barapowaxi barompaya capona pia lámpan xua aceite epaca. <sup>2</sup>Icha cinco powayobe barapo diez powaxi jiwana, barapowaxi ita

coxanatsi xua penacui wūnaetsiwa. Icha cinco powayobe ita coxone xua penacui wūnaetsiwa. <sup>3</sup>Barapowaxi powaxi ita coxanatsi xua penacui wūnaetsiwa barapowaxi poxonae lámpan cajjinca jopa muxuna cajjincaeyo icha aceite xua equeicha pemene epacaenexa poxonae ameneibi tsurubenaе. <sup>4</sup>Saya meisa powaxi yaputane xua penacui wūnaetsiwa jame barapowaxi pia lámpan muxuna cajjinca aceite xua equeicha pemene epacaenexa poxonae ameneibi tsurubenaе. <sup>5</sup>Tsipei pon imoxoyo pecotsiwa nacoyobina bapon jopa cuinaya patopaeyo, daxota daxita barapo diez powayobe itamaipanarucupa. Matapainya maitarucupa. <sup>6</sup>Poxonae papae tsuxubi poxonae barapowaxi cataunxuae maita, bapoxonae jume tane pon wawai xua barapowaxi jeichichi: ‘Bara juinya dawerena pebin pon pecotsiwa nacoyobina. Bapon panta enare painya necobe jacobinexa’, jei pon wawai. <sup>7</sup>Daxita barapo diez powayobe nacosabarucupa. Matauta equeicha icha aceite epacarucupa xua bapoxonae pecoicha exanaenexa. <sup>8</sup>Bapoxonae icha cinco powayobe, powaxi jopa nacui wūnaetsiyo jeye ichawaxitha xua cinco powayobetha: ‘Panecatsibare icha aceite meraxi pata tha equeicha mene epacaetsi, yaitama pata lámpan acueicheibi’, jei barapowaxi. <sup>9</sup>Ichitha powaxi penacui wūnaetsiwaxi jume barai, jeye: ‘Aibi apara, canta peyaxi barompaya pacajjinca patauxi, jopa pacajjincaeyo xua paxam nexaru. Maisa ichaxota pecaenaetsithopaewa aceite bara bepaiyande matha pacomocare aceite xua painya nemene epacaenexa’, jei barapowaxi poxonae xua jume barai ichawaxitha. <sup>10</sup>Poxonae cataunxuae ichawaxi enapona xua pecomocaenexa aceite ichamonaetha, bapoxonaeru pebin

pecoutha patopa, pon pecotsiwa imoxoyo nacoyobina. Powaxi bayatha nacui wunaeta napuna joniya bapontha xua penanabanaenexa pexaewa xua poxona barapo pexaewa jiwi tsinacaetuta xua penabanaenexa poxona barapo pebin pecotsiwa nacoyobina. Bapoxona bomuxu bichocono boupa cateitabanota. <sup>11</sup>Bapoxona pirapaeayo ichawaxi pata powaxi aceite siwayiya, jeye: ‘Pata Tanecanamataxeinaem, paita boupa saranaxorena’, jei bapowaxi. <sup>12</sup>Ichitha bapon barapowaxi jume baraichichi, jeye: ‘Canta jopa paca yaitaetsi’, jei bapon”, jei Jesús, xua pijimona tsipaeba.

<sup>13</sup>Bapoxona Jesús barai pijimonaetha, jeye: “Tawanaetha pana najuntu coyene wunaere, tsipei jopa payaputaem po matacabitha patopaein, matautano jopa payaputaem po horatha patopaein ponxaein Nacom Tananeitapetsin”, jei Jesús.

**Meje yabara poxona Jesús paeba  
pecayabara juta pepaebi  
diwesiyo xua paratixi yabara**

*(Lc 19.11-27)*

<sup>14</sup>Equeicha Jesús pijimona cuiduba pecayabara juta pepaebi diwesiyo xua paratixi, jeye: “Anoxuae ichichipan xua tapaca tsipaebiwatsi po coyene xua xan beta matomacan pomona inta beta penacuichiwi pomona Nacom juntu coyene itorobiya ewata. Barapo coyene jupa icha be poxona pebin ichi poxona bara juntucuru warapaenaba icha nacua beya. Pewunaeya poxona warapaenaba matha waba pomona pia petanacuichi jiwichi tsainchi. Barapomonaetha itoroba xua pia paratixi tatsi beta petacacomocaewa tsainchi poxona cataunxuae wunaewatatsi xua pepatopaewa tsane. <sup>15</sup>Ichuntha pomona barapomona

jiwana cata cinco mil po paratiximonaebe. Iru ichuntha cata dos mil po paratiximonaebe. Iru ichuntha cata saya be cae mil po paratiximonaebe. Bapon daxita barapomonaetha barompaya catsiba be pocotsi coyeneya barapomona yapu jupatsi xua poxona pecacomocaewa tsane barapo paratiximonaetha. Bapoxona bapon warapa. <sup>16</sup>Pon catatsi cinco mil po paratiximonaebe, barapo cinco mil po paratiximonaebetha equeicha icha cinco mil po paratiximonaebe matoma exana. <sup>17</sup>Barichi pon catatsi dos mil po paratiximonaebe, barapo dos mil po paratiximonaebetha equeicha matoma exana icha dos mil po paratiximonaebe. <sup>18</sup>Ichitha pon catatsi cae mil po paratiximonaebe, bapon muthu cua iratha. Bapoxona barapo muthutha bota barapo cae mil po paratiximonaebe”, jei Jesús.

<sup>19</sup>Equeicha Jesús jeye: “Poxona ainya matacabin yapucaewa, bapoxona patopa pon paratixi catsiba barapomonaetha pon barapomona pia pecanamataxeinaeinchi tatsi. Bapon pia petanacuichiwichi pia paratixi matoma yabara yainyaba. <sup>20</sup>Copiya patopa pon cinco mil po paratiximonaebe catatsi. Bapon icha cinco mil po paratiximonaebe cata pia pecanamataxeinaeinchitha, yawa jeye: ‘Tanecanamataxeinaem, caena bayatha cinco mil po paratiximonaebe necatame, equeicha icha cinco mil po paratiximonaebe cata matoma exainchi’, jei bapon. <sup>21</sup>Pon pecanamataxeinaein jume nota, jeye: ‘Maisa juntu coyene wunaem matautano xam ponxae cayabara jume cowuntatsi xua xanepanaya neexanebiwam pocotsiwa caitorobatsi. Tsipei inta xanepanaya beta exaname bequein poxona be conotha caitorobatsi, daxota equeicha ichawa



caitorobatsi xua bichocono nawita. Moya tabotha nebarũ jonyama yawa nebarũ jũntũ coyene weiweinare', jei pon pecanamataxeinaein. <sup>22</sup> Bapoxonae pirapae ichũn patopa pon dos mil po paratiximonaebe catatsi yawa jeye pia pecanamataxeinaeinchitha: 'Tanecanamataxeinaem, caena bayatha dos mil po paratiximonaebe necatame, equeicha icha dos mil po paratiximonaebe cata matoma exainchi', jei bapon. <sup>23</sup> Pon pecanamataxeinaein jume nota, jeye: 'Maisa jũntũ coyene wũnaem matautano xam ponxaem cayabara jume cowũntatsi xua xanepanaya neexanebiwam pocotsiwa caitorobatsi. Tsipei inta xanepanaya beta exaname bequein poxonae be conotha caitorobatsi, daxota equeicha ichawa caitorobatsi xua bichocono nawita. Moya tabotha nebarũ jonyama yawa nebarũ jũntũ coyene weiweinare', jei pon pecanamataxeinaein", jei Jesús.

<sup>24</sup> Equeicha Jesús jeye: "Bapoxonae matapainya patopa pon cae mil po paratiximonaebe catatsi. Bapon atsaquiya jei pia pecanamataxeinaeinchitha: 'Tanecanamataxeinaem, xan yaputan xua xam be barapocotsim pon jopa jiwi juniya itorobeibim. Matautano jiwi cobe itorobeibame xua penoteibiwa pocotsiwa jopa jinyawiyo. Matautano pexaewa xua naweta noteibame ichaxota jopa ubim. <sup>25</sup> Daxota cacunuwatsi baxua neexanaeinxae tsipei metha inta pichipame barapo paratiximonaebe poxonae equeicha icha paratiximonaebe cata matoma exainchi daxota jinya paratiximonaebe mũthũtha xubotan. Xote barapo paratiximonaebe caewa cata canawitatsi', jei bapon. <sup>26</sup> Nexata pon pecanamataxeinaein namchi jeye: '¡Bepa maisa dapon abem, pon fifiname poxonae inta nacuitame! Xam apara neyabara nanta xeiname xua xan pexaewa tanoteibiwa pocotsiwa

naweta ichaxota jopa tacoya ubuibinyo. Matautano xua ichamonaeb cobe itorobeiban xua noteiba pocotsiwa jopa tawiyo. <sup>27</sup> Tsipei catsawiya neyabara nanta xeiname, xua bichocono daunwei itoroban daxota bayatha inta bewa barapo paratiximonaebe banco botha botsipame. Nexata poxonae equeicha patopan, icha paratiximonaeb equeicha matoma xeinaetsipan xua equeicha inta pemataroepicha botsixaetsipae poxonae ichamonaeb nacowaeta barapo taparatiximonaebe', jei pon pecanamataxeinaein. <sup>28</sup> Bapoxonae pon pecanamataxeinaein barai pomonaeb baxota umena jeye: 'Bapon pacobe wepire barapo cae mil po paratiximonaebe. Bapoxonae barapo paratiximonaebe pacare pon icha diez mil po paratiximonaebe xeina. <sup>29</sup> Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane xua beya poxonae bapon equeicha bichocono Nacom pejume cowũntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowũntsiwa tsainchi. <sup>30</sup> Matauta bapon pon inta beta jopa nacuichiyo bapon paxore peitaquirei nacuatha, xua barapo nacuatha pewecoyeinexa, xua nantanuweya penantũ jayabinexa tsane', jei pon pecanamataxeinaein", jei Jesús.

**Meje yabara poxonae Jesús nayabara  
peaba xua bepa pinaeb Nacom  
Pexanto tatsi tsabina daxita jiwi**

<sup>31</sup> Equeicha Jesús pijimonaeb tsipaeba, jeye: "Xan, ponxaein Nacom Tananeitapetsin patopeicaein, irũ matatsunpiwi nebarũ patsicaena. Poxonae patopeicaein, bapoxonae ecaein pexeyina peitũpanae ecaewatha

xua tawa tayabara paebinexa daxita jiwi xua penatsicuentsiwa abe peexanaexae Nacomtha. <sup>32</sup>Jiwi nacaetutsina taitabaratha pomonae daxita nacuan werena pona. Barichin tsane icha pon oveja peewatsin ichi. Bapon ba tsaba ovejamona, matautano tsaba icha duweimonaeno, po duweimonaewi pewun cabra. <sup>33</sup>Pon ovejamonaewi peewatsin, bapon ovejamonaewi cuaranoba pecoxa weya. Cabra duweimonaewi petsocona weya cuaranoba. Bara cana jutiya ichin tsane jiwitha, icha pon ovejamonaewi peewatsin ichi. Pomonae xanepanaya peexanaewi tsana nobin. Pomonae abe peexanaewi tsana nobin. <sup>34</sup>Bapoxonae xan ponxaein jiwi itorobiya pepa Taewatsin baran tsane pomonae tacoxa weya inta umena, jan tsane: ‘Anetha paxam pomonae Nacom, Taxa, paca jũntũ coyene weiweina exana. Pajojoniyama Nacom pia peitorobi nacuatheicha. Bara xoteicha caena bayatha Nacom paca tsiwũnaeta pocotsiwa xua paxam nexa, beya poxonae barapo nacue forota. <sup>35</sup>Paca itacũpa xua papatame baxoteicha, tsipei poxonae jainpan bayatha, bapoxonae pana neapatame pexaewa. Matauta tsipei poxonae meratsipan, bapoxonae mera pana neapatame. Matauta tsipei bayatha poxonae patopan painya botha poxonae be wawatsiyo coyeneya patopan daichitha pana nententa weyataeya wabame. <sup>36</sup>Matautano tsipei poxonae bayatha jumasa patopan, bapoxonae paparuwa pana necatame. Matautano tsipei poxonae bayatha neromaeba yawa poxonae atenein bara pana nesiwa poname painya tana neyawenaenexam. Matautano tsipei poxonae jiwi pecubi botha neeta, paxam papatame painya tana nenecotsinexam’, jan tsane xua ponxaein jiwi itorobiya pepa Taewatsin. <sup>37</sup>Nexata barapomonaewi, pomonae

tacoxa weya inta peumenaexae pomonae xanepanaya peexanaewi, nejei tsane: ‘Pata Tanecanamataxeinaem, ¿eta poxonae paca tainchi xua jainpame matauta xua poxonae paca apatutsi pexaewa? ¿Eta poxonae paca cui tainchi xua meratsipame xua bapoxonae mera paca apatatsi? <sup>38</sup>¿Eta poxonae paca tainchi xua poxonae be wawatsiyo coyeneya patopame xua bapoxonae paca matenta weyataeya wabatsi? ¿Eta poxonae paca tainchi xua poxonae jumasa patopame xua bapoxonae paca catatsi paparuwa? <sup>39</sup>¿Eta poxonae paca tainchi poxonae caromaeba xua poxonae atenemno xua bapoxonae paca siwa poinchi pata paca cayawenaenexatsi? ¿Eta poxonae paca tainchi poxonae jiwi pecubi botha caeta xua bapoxonae papatan pata cataenexatsi?’ nejei tsane barapomonaewi. <sup>40</sup>Bapoxonae xan ponxaein jiwi itorobiya pepa Taewatsin, jume notsin barapomonaetha jan tsane: ‘Xaniyan paca tsipaebatsi. Daxita po coyenewan paxam bayatha paexaname tamonaewi jiwitha poxonae bequein barapomonaewi jopa peainya cui jiwiyo, apara bara painta exaname’, jan tsane ponxaein jiwi itorobiya pepa Taewatsin.

<sup>41</sup>“Nexata xan ponxaein jiwi itorobiya pepa Taewatsin baran tsane pomonae tatsocona weya peumenaewi, pomonae jopa beta peexanaewi, jan tsane: ‘Panatsixibarũcupare taxainya weya, tsipei paxam pomonae abe painya neexanaewi jiwi pam. Maisa po nacuathe isoto jopa cuinaya itacounayiyo baxota paponare. Barapo iso nacua caena bayatha Nacom yabara wũnaeta caurimonaewi pia pentacaponaein tatsi nexa irũrũ pia matatsunpiwimonaewi tatsi nexa pomonae caurimonaewi. <sup>42</sup>Tsipei poxonae jainpan bayatha, jopa pexaewa pana necatsim. Matauta tsipei poxonae bayatha meratsipan, jopa

mera pana neapatsim. <sup>43</sup>Matautano tsipei caena bayatha poxona be wawatsiyo coyeneya patopan, paxam jopa pana nententa weyataeya wabim. Matauta tsipei poxona bayatha jumasa patopan, paxam paparuwa jopa pana necatsim. Matautano tsipei caena bayatha poxona neromaeba yawa poxona jwi pecubi botha ecan, paxam jopa pana nesiwa ponaem', jan tsane. <sup>44</sup>Nexata pomona abe peexanaewi nejume notsina, jei tsane: 'Pata Tanecanamataxeinaem, zeta poxona xua pata paca cui taewathatsi xua jopa paca yawenaetsi? zeta poxona xua pata paca cataebenaewathatsi poxona jainpame? Matautano zeta poxona xua pata paca cataebenaewathatsi poxona meratsipame? Matautano, zeta poxona xua poxona pata paca cataebenaewathatsi poxona be wawatsiyo coyeneya patopame? Matautano, zeta poxona xua poxona pata paca cataebenaewathatsi poxona caromaeba? Matautano, zeta poxona xua poxona pata paca cataebenaewathatsi poxona jwi pecubi botha caeta? Daxita baxuan, zeta poxona xua poxona jopa paca yawenaetsi?' nejei tsane barapomona. <sup>45</sup>Xan ponxaein jwi itorobiya pepa Taewatsin jume notsin barapomona jan tsane: 'Xaniyan paca tsipaebatsi. Daxita po coyenewa bayatha jopa paexanaem tamona jiwitha xua barapomona jopa peainya cui jwiyoaxae, apara bara jopa painta exanaem', jan tsane ponxaein jwi itorobiya pepa Taewatsin. <sup>46</sup>Bexa bapoxona tsane barapo abe peexanae jwi ponaena po nacuatha bapana jopa nacui copatsi xua atene. Pomona pentu cui xanepanae jwi ponaena po nacuatha jwi xeineiba peantucoyeneyapusuwa, po peantucoyeneyapusuwa ataya tsiteca", jei Jesús.

**Meje yabara poxonae fariseomona  
iru sacerdotemona pia  
pentacaponaeawi tatsi daxita  
barapomona Jesús yabara nanta  
xeinatsi po coyeneya xua  
Jesús pewaetabiwa tsainchi**

(Mr 14.1-2; Lc 22.1-2; Jn 11.45-53)

**26** Poxona Jesús baxua daxita najume weta, bapoxona pijimona barai, jeye:

<sup>2</sup>—Paxam payaputaneme xua poxona po baya tsane, jwi nacaetutsina penabanaenexa pexaewa peyabara nanta xeinaenexa barapo matacabi xua poxona caena bayatha matha judiomona Egipto nacua weya panenebiya, po matacabi pewun Pascua matacabi wun. Barapo mataqueitha ichamona necaenaetsina xua tuparucua tanaexanaenexa tsane naetotha, ponxaein Nacom Tananeitapetsin, jei Jesús.

<sup>3</sup>Poxona Jesús pijimona baxua tsi-paebuncua, bara caena barapo mataqueitha sacerdotemona pia pentacaponaeawi tatsi nacaetuta. Iruru baxota nacaetuta judiomona pia pitiri jwi tatsi. Barapomona daxita nacaetuta po tututha pon pewun Caifás pon sacerdotemona pia pepa pentacaponaein tatsi pia pexeinya tutu botha tatsi. <sup>4</sup>Daxita barapomona nabaru muxu jei xua bepa pinae eta bichi tsane poxona Jesús nameicha waetabinchi xua pebexubiwa tsainchi. <sup>5</sup>Barapomona najei:

—Abu jopa waetabi tsainchi poxona jwi Pascua matacabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmona anaepanaya najume cayayataxubichipa, najei daxita barapomona.

**Meje yabara poxonae petsiriwa Jesús  
mata eatabatsi penasiwa,  
po penasiwa petuxueiwa**

(*Mr 14.3-9; Jn 12.1-8*)

<sup>6</sup>Pirapae Jesús popona Betania tomaratha. Barapo tomaratha Jesús popona Simón pia botha tatsi, pon copiya bayatha peperu sawinchi.

<sup>7</sup>Barapo botha petsiriwa powa pesi cui weiweinaewa Jesús imoxoyo caquita uncuatabatsi. Barapo petsiriwa capatopa alabastro ibo wun bosibu atsato, xua bichocono wunca penasiwa xua petuxueiwa, po petuxueiwa bichocono ainya matoma. Poxonae Jesús eca pexaethopaewatha, bapoxonae barapo petsiriwa Jesús mata eatabatsi barapo petuxuei tuxusi nasiwatha. <sup>8</sup>Poxonae Jesús pijimonae tatsi tane baxua, barapomonae bichocono anaepana, yawa caemonae najeino:

—¿Eta pocotsiwa metha saya baxua xuba jane? <sup>9</sup>Barapo petuxueiwa becaenaetsipatsi bapoxonae bexenaetsipatsi paratixi nawita xua bapoxonae barapo paratixitha beyawenaetsipatsi peacopeibi jiwi, najei barapomonae.

<sup>10</sup>Jesús yaputane xua pijimonae tatsi baxua pepaebiwa, daxota Jesús jeye:

—¿Eta pocotsiwa metha barapowa pabiataneme? Pocotsiwa barapowa inta exana apara seicayarü xua pexeinya coyene inta exana. <sup>11</sup>Barapo irathe peacopeibi jiwi paca baru jinompeibina painya neyawenaenexa tsabi tsane barapo jiwi. Ichitha nama paxam jopa ataya paca baru poponae tsainchi xua pata tana neyawenaenexam barapo irathe. <sup>12</sup>Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wunaeta xua muthu tana neboyaenexa poxonae tupaen. <sup>13</sup>Bara xaniyan paca tsipaebatsi, daxita

nacuantha poxonae jiwi cueicuei jei tsane Nacom pia pecapanenebiyae diwesi, barapo jiwi yawa yabara paebina xua pocotsiwa poxonae bapowa inta exana xua jiwi barapowa peyabara cui nanta xeinaenexatsi, jei Jesús.

**Meje yabara poxonae Judas,  
Jesús caenaetaxotsi**

(*Mr 14.10-11; Lc 22.3-6*)

<sup>14</sup>Nexata Jesús pijimonae tatsi pomonae doce poyobe tatsi, barapo doce poyobe jiwana bara caein, bapon pewun Judas Iscariote. Bapon Judas pona sacerdotemonae pia pentacaponae tatsi beya xua petsipaebinexa barapomonaetha.

<sup>15</sup>Judas jeye barapomonaetha:

—¿Eta po paratixi pana necatsiname icha Jesús caenaetaxubin, painya xantha? jei.

Nexata barapomonae Judas pentoma catatsi treinta po paratiximonaebe, xua po paratixi bichocono matoma nawita.

<sup>16</sup>Barapoxonae Judas tamropata pitaba xua jeita xua po coyenetha Jesús pecaenaetaxubiwa tsainchi barapomonaetha, poxonae peyapu xanepanaewatha.

**Meje yabara poxonae Jesús  
pijimonae baru nabane  
Pascua wun matcabitha**

(*Mr 14.12-25; Lc 22.7-23; Jn 13.21-30; 1 Co 11.23-26*)

<sup>17</sup>Nexata copiya matacabi jopa po matacabi tsiwana penantacarucuae matacabi, xua po matacabintha poxonae jiwi tsinacuetutsina xua penabanaewa tsane pan, po pan jopa muxunapentsiyo levadura matawun, pocotsiwa xua cotowa exana pan. Jesús imoxoyo caquita umenarucupatsi pijimonae yawa Jesús jeichichino:

—¿Exota ichichipame xua ichaxota pexaewa paca tsinacui wunaetsinchi

wanabanaenexa tsane xua Pascua wun matakabi nexa? jei barapomonaе.

<sup>18</sup> Jesús barai pijimonaе, jeye:

—Tomara beya paponde, Jerusalén tomara beya. Paponde po botha pon bichocono pin tutu xeina. Bapontha painta jande: ‘Pon jiwi Pecuidubin namchi: Bara nama tatupae wnae tsane. Jinya tututha tajiwimonaе tha baru nabanaetsi pexaewa Pascua wun matakabi nexa’, cajei pon jiwi Pecuidubin, pajande, jei Jesús pijimonaetha.

<sup>19</sup> Jesús pijimonaе tatsi bara exana pocotsiwa bayatha Jesús pijimonaе peitorobixae. Matautano barapomonaе pexaewa nacui wunaetajeba Pascua wun matakabi nexa xua penabanaenexa.

<sup>20</sup> Poxonaе quirei tsanaicha bapoxonaе Jesús pijimonaе baru eca pexaethopaewatha pomonaе doce poyobe tatsi. <sup>21</sup> Poxonaе Jesús pijimonaе baru xunaeca bapoxonaе barai pijimonaе, jeye:

—Bara xaniyan paca tsipaebatsi caein pon paxam jiwana pam, bapon necaenaetaxubina ichamonaetha xua tana nebexubiwa tsane ichamonaе, jei.

<sup>22</sup> Nexata bapoxonaе Jesús pijimonaе tatsi unthuthu wecoyei tsurucupae, nexata daxita tsana jei tsoponaе Jesustha:

—Tanecanamataxeinaem, apara ¿xan cacaenaetaxubinchi? jei daxita barapomonaе xua Jesús tsana yainyabapoinchi.

<sup>23</sup> Jesús jume nota barapomonaе, jeye:

—Pon cae paratotha pana nabaru jajaucuncuaponanbe pan, bapon apara pon necaenaetaxubina ichamonaetha.

<sup>24</sup> Xan ponxaein Nacom Tananeitapetsin bewa tupaein, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wnae tsipae icha bapon bayatha jopa naexaenae tsipae, tsipei bexa tsane bichocono atene tsocuae tsane, bi-

chocono abe tana necana exanaexae, jei Jesús.

<sup>25</sup> Nexata Judas pon Jesús caenaetaxubinchi bapon itacaretaba, jeye Jesustha:

—Pon jiwi Necuidubim, ¿xan apara cacaenaetaxubinchi? jei Judas.

Jesús jume nota, jeye:

—A, xuaunxuae bara paebame, jei.

<sup>26</sup> Poxonaе Jesús pijimonaе baru xunaeca, bapoxonaе Jesús pecobetha pita pan yawa Paxatha tsipaeba, jeye: “Axa, maisa juntu coyene weiweinan xua pan pata tana necatsiwam”, jei. Bapoxonaе Jesús pecobetha pan epa janaca yawa catsiba pijimonaе. Bapoxonaе pijimonaе barai, jeye:

—Paxaema po pan epa janacan. Barapo pan apara yabara caunuta tapepon xua poxonaе tapaca tsitupaewatsi tsainchi, jei Jesús.

<sup>27</sup> Bapoxonaе Jesús equeicha pecobetha pita corotiyoyawa Nacomtha tsipaeba, jeye: “Axa, maisa juntu coyene weiweinan xua corotiyotha ecareca pepa uva mera xua pata tana necatsiwam”, jei. Bapoxonaе Jesús pijimonaе cata corotiyoyawa pejiwana aapaponaenexa. Bapoxonaе jeye pijimonaetha:

—Daxita pa-aapaponde xua barapo cae corotiyotha. <sup>28</sup> Pena peyabara tsiwunaе muxu dutsi coyenewa paca tsipaebatsi. Barapo uva mera xua tsijuntutu eca corotiyotha barapo mera yabara caunuta tajana xua jana othoparenaein poxonaе tupaein. Barapo jana tsita itapeinya xeinaena xua jiwi pinmonaе, yabara junteinaein abe pia peexanae cuiru coyeneyin tatsi. <sup>29</sup> Daxota paca tsipaebatsi barapo uva mera jopa equeicha paca baru apae tsainchi anoxuae. Meisa abu bexa tsane equeicha pena coyenewatha paca baru apaeinchi, barapo uva mera poxonaе Nacom neexanaena xua itorobiya ewatsin jiwi, jei Jesús.

**Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeyno”, pinae yabara jei tsainchi Jesús**

(Mr 14.26-31; Lc 22.31-34; Jn 13.36-38)

<sup>30</sup> Poxonae Jesús pijimonae baru najume weta xua naxuna Nacom nexa, bapoxonae Jesús pijimonae baru pona demxuwa beya. Barapo demxuwa pewun demxu Olivowa, olivo naein peumenaexae baxota. <sup>31</sup> Nexata Jesús barai pijimonae, jeye:

—Anoxuae barapo merawithe daxita pam pana necuentarucupaename, tapaca urapentsixaetsi tsainchi. Baxua paexanaename tsipei Nacom Pejume Diwesitha paca yabara cui tsiwunaeya jeye: ‘Poxonae ovejamonae peewatsin bexubinchi, bapoxonae ovejamonae tsanarucupaena’, jei Nacom. Penamchixae poxonae ichamonae newaetabina tana nebexubinexa pana necuentarucupaename. <sup>32</sup> Ichitha taeyarapaeyo poxonae equeicha asu neexanaena, bapoxonae paca tsiwana patopiyaeyinchi Galilea nacua beya poxonae bara beya paponaname, jei Jesús.

<sup>33</sup> Nexata Pedro Jesús jume notatsi, jeye:

—Bequein ichamonae cacuentarucupaena jinya neuraxubixae nama xan bapana jopa cacuenta naetsircuae tsainchi tana neuraxubixaemxae, jei Pedro.

<sup>34</sup> Nexata Jesús Pedro jume baraichi, jeye:

—Bara xainyeya catsipaebatsi po merawithe, pewunaeya poxonae beya ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeyno’, neyabara jam tsane, jei Jesús.

<sup>35</sup> Pedro Jesús baraichi:

—Bara bequein capuna tupaeyinchi ichitha baxua jopa cayabara paebi tsainchi, jei Pedro.

Iruru daxita Jesús pijimonae tatsi bara jumichi, nanta jupiya paeba.

**Meje poxonae Jesús Paxa tsipaeba ichaxota tsica iriyo, po iriyo pewun Getsemani**

(Mr 14.32-42; Lc 22.39-46)

<sup>36</sup> Nexata Jesús pijimonae baru patopa ichaxota tsica iriyo, po iriyo pewun Getsemani. Baxota Jesús barai pijimonae, jeye:

—Xote abu paenare tha matha Taxatha tsipaebichi painya cuariyatha xotiye, jei Jesús.

<sup>37</sup> Jesús baru pona Pedro. Iru Zebedeo pexantobe tatsi Jesús baru pona. Bapoxonae Jesús bichocono unthuthu wecoyei, yawa bichocono unthuthu deidei-jei. <sup>38</sup> Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupa. Xote paenare, yawa payoyocare xua painya tana nebaru naitaewatsinexam, jei Jesús.

<sup>39</sup> Nexata Jesús equeicha tsiwiyo dabe natsixitabiya, irabe tauncuareca tsipei jopa juniya ajuntataneyo. Bapoxonae Jesús Paxa tsipaeba, jeye:

—Axa, icha ichichipame xua tana neyawenaewam tsane, newepire pocotsiwa anthuthutane neexana. Ichitha jopa necana exanaeinde xua pocotsiwa ichichipan, saya jame necana exande xua pocotsiwa ichichipame, jei.

<sup>40</sup> Nexata Jesús equeicha caibe iya pijimonae tatsi beya poyobe xua acoibi poyobe, ichitha barapomona maita. Jesús Pedro baraichi, jeye:

—Maisa jopa paca itacupaeyo xua pata tana nebaru yoyocaewam xua poxonae bequein bara cae horatha. <sup>41</sup> Maisa payoyocare. Nacom patsipaebare xua

jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa ichitha painya pepon bichocono paacoyenefaetabim xua painya netsipaebiwa Nacom, jei Jesús.

<sup>42</sup>Equeicha Jesús bara nama caeto pona xua Paxa petsipaebinexa. Poxonae Paxa tsipaeba, jeye:

—Axa, icha jopa ichichipaem xua tana newepichiwam, pocotsiwa neajuntutane exana, bara jopa necana exanaeinde xua pocotsiwa ichichipan saya jame necana exande xua pocotsiwa ichichipame, jei Jesús.

<sup>43</sup>Bapoxonae equeicha Jesús pijimonae beya pona xua acoibi poyobe daichitha barapo acoibi poyobe came maitumena, tsipei bichocono itata tsacatsaquei xua itamaipana.

<sup>44</sup>Bara nexata Jesús equeicha saya cuentapona. Equeicha Jesús pona xua Paxa petsipaebinexa xua equeicha acoibi po cuiyobetha, barapo jumetha equeicha Jesús Paxa tsipaeba. <sup>45</sup>Nexata equeicha Jesús pona pijimonae tatsi beya. Bapoxonae barai pijimonae, jeye:

—¡Moya bara painya nepu maitumenaende aunxuae jopa Nacom patsipaebim xua painya nepaca cayawenaenexa! Bayatha tsuxubiba, po horatha poxonae xua xan ponxaein Nacom Tananeitapetsin ichun necaenaetaxubina ichamonaetha, pomonaetha pomonae peantucoyenebe jiji. <sup>46</sup>Panacosapende, panonobapondenno. Antha bu poinchi. Dota dawerena pon necaenaetaxubina ichamonaetha, jei Jesús pijimonaetha.

### Meje yabara poxonae Jesús waetabatsi

(Mr 14.43-50; Lc 22.47-53; Jn 18.2-11)

<sup>47</sup>Poxonae Jesús cataunxuae tsipaebuncua pijimonae bapoxonae Judas patopa. Bapon Judas doce poyobe jiwana caein, xua Jesús pepa pijimonae tatsi. Judas pinmonae baru patopa. Ichamonae cusin cajjinca. Ichamonae iwabi cajjinca. Daxota daxita barapomonae pata, tsipei sacerdotemonae pia pentacaponaei tatsi iru pitiri jiwiru daxita barapo pentacaponaei itoroba barapomonae. <sup>48</sup>Judas, pon Jesús caenataxubinchi, pewunaeya tsane xua poxonae patopa bapon cou tsiwanaya paeba barapo pin bicheitho, cou jeye: “Pon tsutsubin, bapon apara barapo pebin, nexata moya pawaetabare bapon”, cou jei. <sup>49</sup>Daxota poxonae patopa, bapoxonae Judas Jesús imoxoyo caquita poinchi, matauta nainya Jesús jeichichi: —Pon jiji Pecuidubim, xamda, jei Judas.

Bapoxonae nainya Judas Jesús tsutsubatsi. <sup>50</sup>Nexata Jesús jume nota, jeye: —Ponxae tajitom, moya bara exande xua jinya necana exanaetsi, jei.

Nexata barapomonae pomonae Judas pebaru patopaexae barapomonae Jesús imoxoyo caquita umenarucupatsi, bapoxonae Jesús waetabatsi.

<sup>51</sup>Caein pon Jesús pijimonae tatsi jiwana, pon Pedro, bapon nainya cusi namara wejonta. Bapoxonae bapon muxuyoro catsoniba, pon sacerdotemonae pia pepa pentacaponaein tatsi tanacuitatsi, bapon muxuyoro catsonibatsi. <sup>52</sup>Nexata Jesús barai pijimonae jiwana jitontha, pon Pedro, jeye:

—Maisa cusi jeinca pentacuerutha. Tsipei pon ba cusitha namawainta, bapon ba xuya bexubinchi cusitha. <sup>53</sup>¡Maisa xam jopa yaputaem! Icha ichichipan bara neitacupa xua

Taxatha tawucaewa, xua nainya inta peitorobinexa pia matatsunpiwi xua bichocono ayei pin bicheitomonae xua tana neyawenaewa tsane. <sup>54</sup>Icha Taxa wucaetsipan xua bapon tana neyawenaewa tsane bapoxonae jopa neyabara jume cui wetsipae po coyene bayatha Nacom Pejume Diwesitha neyabara paeba, po coyene xua tana newaetabiwa tsane xua tana nebexubiwa tsane, jei Jesús.

<sup>55</sup>Nexata Jesús barai pomonaetha pomonae Judas baru patopa, jeye:

—Pacapatame cusin yawa iwabi be poxonae pacana ichim pontha pon jiwi pecaibin. Daxita matacabin Nacom pin pia botha tatsi paca baru poponeibatsi, paca cuidubeibatsino, daichitha bapoxonae jame jopa pana newaetabim. <sup>56</sup>Ichitha daxita baxuan neyabara canacui jume weta exana, bayatha penecui yabara wuna tsiwanaya paebixae pomonae Nacom peitorobi jume pepaebiwi, Nacom Pejume Diwesitha, jei Jesús.

Bapoxonae Jesús cuentarucupatsi pi-jimonae, meisa Jesús baru umeinchi pomonae Judas bayatha baru patopa.

**Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi**

(*Mr 14.53-65; Lc 22.54-55, 63-71; Jn 18.12-14, 19-24*)

<sup>57</sup>Pomonae Jesús teicatsi barapomonae Jesús capoinchi pon pewun Caifás itabaratha tatsi. Bapon Caifás, pon sacerdotemonae pia pepa pentacaponaein tatsi pon peainya cuin yatsicaya. Baxota iru nanacaetuta pomonae judiomonae pecuidubiwichi Moisés pia peitorobi coyene tatsi, iruru pitiri jiwi pomonae judiomonaexae. <sup>58</sup>Iru Pedro Jesús tsiwiyo taju pu taetae tsiniyatsi beya poxonae patopa panatha,

po panatha ichaxota sacerdotemonae pia pepa pentacaponaein tatsi tauncuatsi bo. Poxonae Pedro pana tututha joniya bapoxonae imoxoyo naeca policiamonaetha pecui taenexa xua po coyeneya Jesús cana exanaeinchi pomonae nacaetuta.

<sup>59</sup>Sacerdotemonae pia pentacaponaein tatsi iru ichamonaeno, pomonae pecanamata caitorobi jiwi bicheito, daxita barapomonae jeita ichamonaepomonae xua Jesús naerabiya peyabara paebinxatsi pocotsiwa xua Jesús paeba xuano xua exana, pia barapo jumetha paebichi xua bara Jesús tupa peexanaewa tsainchi. <sup>60</sup>Bara bequein pin bicheito pata xua Jesús abeya peyabara paebinxatsi, ichitha cataunxuae barapomonae pomonae pecanamata caitorobi bicheito, came jopa xeinaeyo po jume naemata jume tsita itapeinya xeina pocotsiwa xua Jesús paeba xua barapo jumetha Jesús pebexubinexatsi. Matapainya bapoxonae pebinbe nacueyatabe patopabe. Baponbe Jesús abeya yabara paebatsibe. <sup>61</sup>Baraponbe jeibe Jesús yabara:

—Bapon namchi: ‘Neitacupa xua Nacom pin pia bo abe taexanaewa. Bapoxonae equeicha acoibi po matcabibe barapo Nacom pin pia bo tatsi xanebin’, jei, jeibe baponbe.

<sup>62</sup>Nexata bapoxonae sacerdotemonae pia pepa pentacaponaein tatsi asiya uncuataba yawa bapoxonae Jesús baraichi, jeye:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei sacerdotemonae pia pepa pentacaponaein tatsi.

<sup>63</sup>Daichitha saya Jesús moya uncua. Daxota bapoxonae sacerdotemonae pia pepa pentacaponaein tatsi Jesús baraichi, jeye:



—Caitorobatsi Nacom peitabaratha tatsi, pon asu popona. Yatsicaewa paebiname pocotsiwa bara xainyei nepaebiwa. Incane pana netsipaebare. ¿Bara yatsicaya xam Mesías, pon Nacom Pexantom, pon Nacom necaitorobin? jei.

<sup>64</sup> Jesús jume nota, jeye:

—Aa, xuaunxuae bara paebame. Paca tsipaebatsi xua pana netaename xan ponxaein Nacom Tananeitapetsin Nacom pia pecoza weya tatsi ecaein pon peyapusu itorobi coyenewa pexeinaein. Matautano pana netaename poxona equeicha patopeicaein tsaquinaebowantha xua peitaboco wetsica, jei Jesús.

<sup>65</sup> Nexata bapon pon sacerdotemona pia pepa pentacaponaein tatsi pin anaetha anaya paparuwa nata tsitsinaxuba. Bapoxona jeye:

—Po jumetha xua bapon paeba barapo jume Nacom tsita abetsi. Nama equeicha jopa wanantawenonaewa ichamona xua wanaca tsipaebiwa tsane xua bapon peyabara paebiwatsi. Bapon natsiaenae exana abe pepaebixae barapo jume poxona Nacom Pexanto najainta. Paxam bara pajume taneme pocotsiwa bapon paeba, pocotsiwa Nacom jopa ichipaeyo. <sup>66</sup> ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo bicheito po bicheito baxota ena, jeye:

—Bara xainyeya paebame. Jesús abe pia pepaebixae Nacom tsitatsi xua bapon tsita natsicuentatsi. Daxota bapon bewa tupaena, jei barapo pecanamata caitorobi jivi bicheito.

<sup>67</sup> Poxona barapomona Jesús itacuere cutatsi, bapoxona peonetha Jesús itabara subabatsi, yawano butsin. Ichamona Jesús itabara tsaquibacotatsi. <sup>68</sup> Bapoxona barapomona Jesús baraichi:

—Xam jam: ‘Xan Mesías’, jam, incane pana netsipaebare: ¿Jintam caitabara tsaquibobara xua bequein paca itacuere cutatsi? jei barapomona.

**Meje yabara poxona Pedro Jesús yabara paebatsi xua jeye: “Jopa dapon yaitaeyo”, yabara jeichichi Jesús**

(*Mr 14.66-72; Lc 22.56-62; Jn 18.15-18, 25-27*)

<sup>69</sup> Poxona cataunxuae Jesús cana exanompatsi bapoxona iruru Pedro panatha eca xua pesato beya. Bapoxona iruru yabuyo, powa sacerdotemona pia pepa pentacaponaein tatsi tanacuitatsi, bapowa Pedro imoxoyo caquita poinchi. Bapowa Pedro jeichichi:

—Apara xam bayatha iruru napuna poneibame Jesús, pon Galilea nacupin, jei yabuyo.

<sup>70</sup> Ichitha Pedro jume matawenta bapowa, daxita jivi peitutha tatsi. Pedro jeye:

—Jopa yaputaeyo pocotsiwa xua yabara paebame, jei Pedro.

<sup>71</sup> Poxona cataunxuae Pedro ecapona xua pia ponaetsi bomuxu coiboto beya, bapoxona iru ichawayo Pedro tainchi. Barapowa tsipaeba ichamona pomona baxota iru umena, Pedro yabara paebatsi, jeye:

—Apara bapon, pon napuna poponeiba Jesús pon Nazaret tomarapin, jei barapowayo.

<sup>72</sup> Equeicha Pedro jume matawenta, jeye:

—Bara xainyan jan. Jopa dapon yaitaeyo pon aunxuae payabara paebame, jei Pedro.

<sup>73</sup> Equeicha bapoxona pirapaeyo Pedro imoxoyo caquita poinchi pomona baxota umena. Barapomona Pedro jeichichi:

—Apara bara xam iruru bapon pijimona tatsi jiwanam, daxota barapo

jume coyeneya paebame, icha barapomonae ichi, jei.

<sup>74</sup>Nexata Pedro daunweya jeye:

—Bara Nacom peitabaratha xainyeya paca tsipaebatsi pocotsiwa bara xaniwaicha tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi, jopa dapon yaitaeinyo xuaunxuae pon payabara paebame, jei Pedro.

Bapoxonae iruru caena nainya wacara pebto fibaru. <sup>75</sup>Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe, pewunaeya poxonae wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo, neyabara jam tsane. Bapoxonae iru nainya wacara pebto fibina’, jeichichi Pedro, xua Jesús paeba. Nexata Pedro pesato bejoniya bichocono wecoyei, peajuntutanexae xua Jesús yabara paebatsi.

### Meje yabara poxonae Jesús capoinchi Pilato beya

(Mr 15.1; Lc 23.1-2; Jn 18.28-32)

**27** Poxonae pentha tsina sacerdotemonae pia pentacaponaeawi tatsi iruru judiemonae pia pitiri jiji tatsi, daxita barapomonae yabara nacaetuta xua nanta jupaeya peburuya penanta xeinaenexa po coyeneya xua Jesús pebexubiwa tsainchi. <sup>2</sup>Daxita barapomonae equeicha Jesús maxu cutatsi. Bapoxonae Jesús yamaxu cutsiya capoinchi Pilato beya, pon Judea nacuapiwi peyanacua ewatsinchi xua romanomonae peitorobixae.

### Meje yabara poxonae Judas pia coutha nabexuba

<sup>3</sup>Judas Jesús caenaetaxubatsi ichamonaetha. Poxonae bapon jume tane xua ichamonae Jesús yabara paebatsi

xua bewa tupaena abe peexanaexae, poxonae bequein jopa abe exanaeyo, bapoxonae Judas bichocono aura xua Jesús pecaenaetaxubixaetsi. Daxota Judas equeicha caewa capona barapo treinta po paratiximonaebe. Sacerdotemonae pia pentacaponaeawi catatsi iruru pitiri jiji catatsi. <sup>4</sup>Judas barai barapomonae, jeye:

—Poxonae pebin caenaetaxuban, xua jopa pon abe exanaeyo, xua poxonae ichamonae pebexubinexa xua pejana pichapabarena, xan apara bara abe exanan, jei.

Ichitha barapomonae Judas jume notatsi, jeye:

—Apara baxua jopa painta ainya cuiyiyo. Jame apara xam jinya coyam poxonae baxua cana exaname, jei.

<sup>5</sup>Nexata Judas barapo treinta po paratiximonaebe anaya xoya Nacom pin pia botha. Poxonae Nacom pin pia bo weya pona, bapoxonae Judas nabexuba pia coutha, nacoibo tathu catutaba athawetsica.

<sup>6</sup>Bapoxonae sacerdotemonae pia pentacaponaeawi tatsi nota po paratixi Judas bebaya. Bapoxonae barapomonae najei:

—Jopa naca copatsiyo xua barapo paratixi bara wajebinexa Nacom pin pia botha tatsi nexa. Tsipei apara barapo paratixi taxoba poxonae barapo paratixitha comotatsi pebin xua ichamonae pebexubinexa, xua pejana pichapabarenaenexa, jei barapomonae.

<sup>7</sup>Bapoxonae daxita barapomonae peburuya nanta xeinarucupa, najei: “Waxainchi barapo paratixitha comotinchi tsica iriyo, po iriyotha jiton tsorobon noteiba xua juruwaton peexaneibinexa. Barapo iriyotha tsane xua pemuthuthuqueibinexa tsainchi poxonae werapeibina pomonae penanapaincha jinompaewi xua icha nacua werena peponaewi”, najei. <sup>8</sup>Daxota barapo iriyo barapomonae

wun duta po wun jeye: “Pejana ira”, jei. Po iriyo barapo wuntha cataunxuae jiwi wun ununutapona beya anoxuae. <sup>9-10</sup>Baraxua barapomonaexana xua bayatha pecui yabara tsiwunaeya wunae tsimuxu dutsiya jeixae pon Nacom peitorobi jume pepaebin, pon pewun Jeremías pon caena bayatha tupa. Bapon Jeremías jeye: “Israelmonae pia pentacaponaei tatsi catsina treinta po paratiximonaebe ichuntha xua poxonaepecaenaetsixae tsainchi pon pejuntu coyene xeicaein. Barapo matomatha cana matomatsinchi pon pejuntu coyene xeicaein. Barapomonaebaxua cana exanaena bapontha tsipei barapomonaepewun nanta xeinarcupa pecana matomatsinexa. Bapoxonaeequeicha barapomonaecaewa pichina barapo treinta po paratiximonaebe. Barapo paratixitha barapomonaeririyo comotsina, po iriyotha jiton tsorobon noteibina xua exaneibina juruwaton. Baxua bara barapomonaexana be pocotsi coyeneya Nacom pon jiwi Pecanamataxeinaein nejume cui itoroba”, jei Jeremías.

**Meje yabara poxonaes Jesús uncu Pilato peitabaratha tatsi**

(Mr 15.2-5; Lc 23.3-5; Jn 18.33-38)

<sup>11</sup>Jesús cataunxuae uncu Pilato peitabaratha, pon Judea nacuapiwi peyanacua ewatsinchi. Bapon Pilato Jesús yainyabatsi, jeye:

—¿Bara yatsicaya xam judiomonaeritorobiya pia pepa Neewatsin? jei.

Jesús jume nota, jeye:

—A, xuaunxuae paebame bara baxua apara, jei Jesús Pilato beya.

<sup>12</sup>Sacerdotemonaepia pentacaponaei tatsi iru judiomonaepia pitiri jiwi tatsi, daxita barapomonaes Jesús abeyabara paebatsi xua pinae abe exana. Daichitha Jesús jopa jume barabotsiyo

barapomonaes. <sup>13</sup>Nexata daxota Pilato Jesús baraichi, jeye:

—¿Jopa jume taem pocotsiwa barapomonaebichocono abe cayabara paeba? jei.

<sup>14</sup>Ichitha Jesús jopa jume notsiyo Pilato xua pocotsiwa ichamonaes Jesús abepayabara paebiwatsi xua matauta cae jume coyenewatha jopa jume notsiyo. Daxota Pilato bichocono yabara nantu coyene cui cabenaeca baxua.

**Meje yabara poxonaes Pilato jume baru jejei xua Jesús bara pebexubiwa tsainchi ichamonaes**

(Mr 15.6-20; Lc 23.13-25; Jn 18.38-19.16)

<sup>15</sup>Bara nama, Pilato ba pia cui xeina poxonaeba jiwi tsinacaetuta pexaewa penanabanaenexa. Barapo matabitha Pilato ba caein jiwana pu sotaba pomonaes jiwi pecubi botha peenaewi. Pilato ba pu sotaba pon ba jiwi itapeta cowai xua Pilato peisanaxubinexa.

<sup>16</sup>Barapo jiwi pecubi botha iruru eca pon bichocono abe peexanaein, pon peyaputaeinchi daxita jiwi poxonaes abe exaneiba. Bapon pewun Barrabás.

<sup>17</sup>Poxonaes jiwi nacaetuta, Pilato barai barapo jiwi, jeye:

—¿Eta pon pu sotabocuaein? ¿Metha Barrabás jampa? ¿Metha Jesús jampa, pon Mesías baraichi? jei Pilato.

<sup>18</sup>Baxua Pilato paeba tsipei bapon yaputane xua pomonaes pecanamata caitorobi bicheito, Jesús peuwixaetsi, caenaetaxubatsi Pilatotha.

<sup>19</sup>Poxonaes Pilato cataunxuae pia peecaethopebiwatha eca xua Jesús peyabara paebinxatsi penatsicuentisiwa bapoxonaes Pilato piowa tatsi najume caitoroba ichuntha xua jeye: “Jopa copatsinde xua bapon pebexubinexatsi ichamonaes, tsipei apara bapon pejuntu coyene xeicaein. Yaitama tsipei merawi bapon camaitan daxota bichocono

anthuthurewein, tsipei bapon dacotsiwa bexotsi”, jei bapon xua Pilato piowa tatsi najume caitoroba.

<sup>20</sup> Ichitha sacerdotemonae pia pentacaponae tatsi, iruru judiomonae pia pitiri jiwi tatsi, daxita barapomonae jiwi cui tsacarabatsi, xua barapo jiwi Pilato pecui itorobinexatsi xua Barrabás pepu sobabinexatsi, matautano xua Jesús pe-bexubinexatsino. <sup>21</sup> Bapon Pilato equeicha barai jiwi, jeye:

—¿Eta pon pu sotabocuaein caein xua baponbe jiwana? jei. Barapomonae Pilatotha jeye:

—Maisa Barrabás pu sotabare bara, jei barapomonae.

<sup>22</sup> Equeicha Pilato yainyaba barapomonae, jeye:

—¿Eta xua cana exanocuaein Jesús pon Mesías baraichi? jei.

Nexata pinmonae Pilato jume daunweya jume notatsi, jeye:

—¡Bewa maisa naetotha tūparucua exanaem! jei barapomonae.

<sup>23</sup> Nexata Pilato jume barai, jeye:

—¿Eta pocotsiwa xua metha jane xua abe exana? jei.

Equeicha daumetha barapomonae jume daunweya jeye:

—¡Bewa maisa naetotha tūparucua exanaem! jei.

<sup>24</sup> Poxonae Pilato yaputane xua nama taabichiba pocotsiwa bapon pepaebinexa picoya, xua peajumetsacaxae barapomonae, daxota Pilato itoroba ichun xua petaxawenaenexa tsainchi mera. Bapoxonae barapo meratha nacobe quiataxuba barapo jiwi peitūtha tatsi. Bapoxonae bapon namchi, jeye:

—Xan apara jopa tacoutha bexuba exanaeinyo bapon xua daxota pejana pichapabarena pon jopa bequein abe exanaeyo. Poxonae nacobe quiataxuban meratha, baxua tsita itapeinya xeinan xua apara jopa tacouthinyo. Apra jame painya coutha pam poxonae bexuba

paexaname pon abe jopa exanaeyo, jei Pilato.

<sup>25</sup> Daxita barapomonae equeicha namchi, jeye:

—¡Paxan iru pata tamomoxi susato jiwi pata coutha pan apara xua bapon bexotsi paexanan! jei daxita barapo jiwi.

<sup>26</sup> Nexata Pilato nama pu sotaba Barrabás. Bapoxonae itoroba xua soldadomonae bara Jesús moya bichocono pecuainchinexatsi pocotsiwatha eewa xua bichocono amūpiya xua xota ba jiwi cuainteibatsi poxonae abe exaneiba. Matautano itorobano xua moya bara Jesús tūparucua exanaeinchi naetotha.

<sup>27</sup> Bapoxonae soldadomonae Jesús capoinchi Pilato pia bo tatsi beya po soldadomonae yapu eena Pilato pia bo tatsi. Bapoxonae barapo soldadomonae waba icha soldadomonae xua daxita barapo soldadomonae Jesús pematawacaicha umenaenexa tsainchi.

<sup>28</sup> Bapoxonae Jesús pia paparuwa juma xuenatsi yawa juma xatatatsi icha paparuwa, po paparuwa tsobia xua Jesús be pecana exanaenexatsi pon jiwi itorobiya pepa Peewatsinchi.

<sup>29</sup> Bapoxonae cuane tepa xua pee tepa, yawa bapoxonae Jesús canamitontsiya mata xatatatsi baxua xua cana exanatsi icha be ichi pon jiwi itorobiya pepa peewatsin poxonae mata xatatatsi tepa. Matautano Jesús cobenatatsi naewa icha be ichi pon jiwi itorobiya pepa peewatsinchi poxonae naewa cobenatatsi poxonae itoroba jiwi. Bapoxonae Jesús peitabaratha tatsi pentabocototha taenatsi xua Jesús naerabiya pebaru cui itura jinaenexa tsainchi. Bapoxonae Jesús cui caponatsi, jeye:

—¡Jaco judiomonae itorobiya pepa Neewatsim! jei barapomonae xua Jesús canamitontatsi.

<sup>30</sup> Matautano Jesús yabara naone subabatsi. Matautano Jesús cobe wepitatsi

naewa. Bapoxonae barapo naewatha Jesús mata cuaintatsi. <sup>31</sup>Poxonae Jesús canacui wetatsi xua cui caponatsi, equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tatsi. Bapoxonae Jesús capoinchi xua tūparucua peexanaenexatsi naetotha.

**Meje yabara poxonae Jesús tūparucua exanatsi naetotha**

(*Mr 15.21-32; Lc 23.26-43; Jn 19.17-27*)

<sup>32</sup>Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin. Bapon pewun Simón. Bapoxonae barapo soldadomonae Simón itorobatsi xua pecaponaenexa Jesús pia naeto tatsi, po naetotha tūparucua peexanaenexatsi Jesús.

<sup>33</sup>Bapoxonae Jesús barū patatsi ichaxota po uruto be jiton matasipa piwa. Daxota barapo uruto jiwi wun unuta “Gólgota”, jei. <sup>34</sup>Baraxotiya Jesús apatatsi vino mera, po vino mera equeicha muxuna epareca hiel mera matawun po mera bichocono atsu wūwa. Poxonae Jesús mene pana, bapoxonae Jesús aichaxaibi apa barapo mera.

<sup>35</sup>Poxonae Jesús canacobe wetatsi xua naetotha tūparucua exanatsi, bapoxonae soldadomonae nata tsaba Jesús pia paparuwan tatsi. Barapomonae ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. <sup>36</sup>Nexata barapo soldadomonae Jesús yapu caenatsi poxoru jopa ichipaeyo xua Jesús pepanepaewa tsane. <sup>37</sup>Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonae itorobiya pia pepa

Peewatsinchi”, jei barapo petinadutsiwa xua napaewatha tinaduta.

<sup>38</sup>Iruru ponbe jiwi pecaibinbe tūparucua exanatsibe naetotha ichaxota imoxoyo Jesús ducua. Ichun Jesús petsocona wetauncuiyatsi, ichun pecoxa wetauncuarenatsi. <sup>39</sup>Pomonae Jesús xentapoinchi barapomonae Jesús cui capoinchi, yawa Jesús yabara itata naichaquebatsi. <sup>40</sup>Barapomonae Jesús jeichichi:

—Xam bayatha jam: ‘Nacom pin pia bo abe exanaein, bapoxonae equeicha acoibi po matabibibe xaneibin’, jam. Moya bara jinya coutha nacapanepare naeto wetsica icha bara metha Nacom Pexantom tatsim, jei barapomonae.

<sup>41</sup>Iruru barichi sacerdotemonae pia pentacaponae tatsi iruru pomonae jiwi pecuidubiwi Moisés pia peitorobi coyene tatsi iruru judiomonae pia pitiri jiwi tatsi, daxita barapomonae Jesús cui capanatsi. Daxita barapomonae najei:

<sup>42</sup>—Bapon cain capanepibabei ichamonae, came jopa nacapanepaeyo. Icha bara bapon israelmonae itorobiya pia pepa Peewatsinchi, bu bapon pia coutha naeto wetsica ecoinca, xainya bapoxonae jume cowuntatsi. <sup>43</sup>Bapon jume cowunta Nacom, xua bepa pinae capanepaeinchi, xua Nacom capanepaena. Icha Nacom ichichipa, bu bara moya capanepaena, tsipei caena bayatha naca jei: ‘Apara xan Nacom Pexanton’, naca jei, jei barapomonae.

<sup>44</sup>Barichiru baxua paeba ponbe jiwi pecaibinbe, ponbe xua iruru cobe matatabarutatsibe naetotha. Baponbe iruru Jesús cui caponatsi.

**Meje yabara poxonae Jesús tūpa**

(*Mr 15.33-41; Lc 23.44-49; Jn 19.28-30*)

<sup>45</sup>Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mataeinyaxae weya, beya yatabopiya.

Tres po horabe quirei tsuncuae. <sup>46</sup>Bapoxonae Jesús jume daunweya wawai, jeye: “Elí, Elí, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

<sup>47</sup>Ichamonae pomonae Jesús baxota jume taeumeinchi, barapomonae jeye:

—Pajume taema. Bapon waba, Elías wabatsi, pon Elías Nacom peitorobi jume pepaebin, pon caena bayatha tupa, jei.

<sup>48</sup>Bapoxonae caein nainya cuinaepoinya pon barapomonae jiwana yawa pitaba esponja xua baxota pemene capichinexa vino mera xua po mera mene atsu. Poxonae bapon baxota mene capita, bapoxonae naewatha duta xua Jesús petayoichaenexatsi xua peapaenexa. <sup>49</sup>Ichitha ichamonae namchi, jeye.

—Abu, abu jopa apatsinde. Waxainchi abu matha taeinchi icha Elías patopeicaena xua bapon pecapanepaenexatsi, jei barapomonae.

<sup>50</sup>Equeicha Jesús jume daunweya wawai, bapoxonae nama tūpanaicha Jesús. <sup>51</sup>Bapoxonae paparuwa, po paparuwa Nacom pin pia botha ducua, barapo paparuwa nainya bopiya matonta tsitsiqueica ainya epatobe naexanabe. Matautano ira jijiyataxuba, matauta ibo wacapouna. <sup>52</sup>Po muthuntha pomonae pewerapeibiwi bobena, barapo muthun coibo tupa wacapouna pocotsiwa coibo xatababanoba xua pin ibo panawan. Barapo muthuntha cataunxuae abu saya bobena pomonae caena bayatha werapa. Pirapaeyo acoibi po matababiyobe poxonae Jesús asu juina exanatsi, xua Nacom exana, bapoxonae iruru pomonae bayatha pejume cowuntsiwichi Nacom pomonae xua bayatha peweraepaxae barapomonae iru asu jujuina exanatsi xua Nacom exana. <sup>53</sup>Bapoxonae daxita

barapomonae muthu we-iyiya. Daxita barapomonae, Jerusalén tomara beya pona po tomaratha xeina Nacom pin pia bo tatsi. Barapomonae naituta pinmonaetha Jerusalén tomarapiwitha.

<sup>54</sup>Bapoxonae soldadomonae pomonae Jesús yapu enatsi iruru barapo soldadomonae pia pentacaponaein tatsi, pon romanomonaepin poxonae daxita barapomonae tane xua ira jijiyata yawa xua tane ichawanno, bapoxonae barapomonae bichocono junuwa. Bapoxonae barapomonae jeye:

—¡Apara bara yatsicaya bapon Nacom pepa Pexanto tatsi! jei barapo soldadomonae.

<sup>55</sup>Barichi iru ainyawaxi yabuxi, barapowaxi Jesús tsiwiyo tajū wetaeumeinyatsi. Barapowaxi Jesús bayatha matha puna jinompatsi xua poxonae Galilea nacua weya pona xua Jesús peyawenaenexatsi. <sup>56</sup>Barapowaxi jiwana, ichowayo pewun María Magdalena, powa Magdala tomarapiwayo. Ichowayo pewun María, Santiago iru José baponbe penabe tatsi. Ichowayo pewun Salomé bapowa Zebedeo piowa tatsi, xua iru bapowa Santiago iru Juan baponbe pena tatsibe.

### **Meje yabara poxonae Jesús petupaein ibo muthutha yauxatatabotatsi**

(*Mr 15.42-47; Lc 23.50-56; Jn 19.38-42*)

<sup>57</sup>Poxonae quirei tsanaicha, pebin patopa ichaxota Jesús naetotha tuparucua. Bapon copei pexeinaein. Bapon pewun José. Bapon Arimatea tomarapin. Matauta bapon iru Jesús pia pepuna jinompaewichi jiwana pin tatsi pomonae Jesús pia pejume cowuntsiwichixaetsi. <sup>58</sup>Bapon pona Pilato beya pewucaenexa xua Jesús petupaein. Nexata Pilato najume caruta xua bara José pecatsinexatsi Jesús petupaein. <sup>59</sup>José nexata pita Jesús petupaein. Bapoxonae pena

paparuwatha mata quiyontabareca xua pexeinya paparuwa. <sup>60</sup>Bapoxonae José muthu iya Jesús botatsi pena ibo muthutha, po muthu bequein José pia muthu tatsi xua poxonae petupaewa tsane. Poxonae José nacobe weta xua yauxatatababota pin ibo panawatha, bapoxonae ponataba. <sup>61</sup>Baxotiya ibo muthu itapatha eca María Magdalena, powa Magdala tomarapiwayo. Iru ichowayoru María baxota naeca.

**Meje yabara poxonae Pilato itoroba soldadomonae xua Jesús peyamuthu eenaenexa tsainchi**

<sup>62</sup>Icha matababitha po matababitha pentaquei seica matababi bapoxonae sacerdotemonae pia pentacaponaei tatsi iruru fariseomonae daxita barapomonae pona Pilato beya.

<sup>63</sup>Barapomonae Pilato jeichichi:

—Pon pata Tanecanamataxeinaem, pananta xeinan xua barapo pemuxu-itorobin poxonae cataunxuae popona, pana tsipaeba, jeye: ‘Poxonae acoibi po matababibe tsuxubi tsane equeicha asun tsane petupae coyene cuiru weya’, pana jei bapon. <sup>64</sup>Daxota xam itorobare soldadomonae xua xaniwaicha peyapu eenaenexa muthu xua beya poxonae acoibi po matababibe tsuxubi tsane. Baxua exande xua jopa pepatsinexa tsane muthu beya Jesús pia pepuna jinompawichi, tsipei bu merawi barapomonae pichapa Jesús pia pepon. Tsipei pirapae naerabichipa jiwitha jei tsipae: ‘Bayatha equeicha asu exanatsi petupae cuiru coyene weya’, jei tsipae xua Jesús yabara naerabatsi. Barapomonae baxua naerabichipa jiwitha, baxua bichocono abe tsipae, beyacaincha poxonae Jesús bayatha pocotsiwa paeba xua pemuxuitorobiwa, jei barapomonae.

<sup>65</sup>Pilato barai barapomonae, jeye:

—Bara moya pataema. Moya panore soldadomonae. Moya muthu beya pabarū ponde. Paexande pocotsiwa panantawenoname xua bu moya barapo soldadomonae xaniwaicha yapu eenaena, jei Pilato.

<sup>66</sup>Nexata barapomonae iru soldadomonae bara be-iyiya. Bapoxonae muthu coibo daunwei exananota. Bichocono barapomonae cateitabanota xua pin ibo panawa xua muthu boupa ata. Matautano bichocono barapomonae pemacatha epatautarena boupa cutabarena barapo peboupa patsiwa, xua peyaputaenexa icha ichun namicha patopa xua pecaibinexa Jesús petupaein. Bapoxonae barapomonae cuentadendena soldadomonae xua barapo soldadomonae peyapu eenaenexa muthu.

**Meje yabara poxonae Jesús equeicha asu juina exanatsi petupae cuiru coyene weya**

(Mr 16.1-8; Lc 24.1-12; Jn 20.1-10)

**28** Poxonae po pentaquei seicae matababi yapu caewaba, bapoxonae matababi jopa po matababi xua nanta carucua xua cae semanatha xua penacuichi matababi. Barapo mataqueitha María Magdalena, powa Magdala tomarapiwayo iru ichawayo María, barapowayobe caemumbotha siwa ponabe muthu ichaxota Jesús yamuthu uncu. <sup>2</sup>Bapoxonae nainya ira jijiyataxuba tsipei Nacom itoroba matatsunpin xua peitaboco wetsica pona. Barapo matatsunpin yaupataxubanota barapo pin ibo panawa. Bapoxonae barapo ibo panawatha ecopiya. <sup>3</sup>Barapo matatsunpin bichocono daedaena icha be yamuxu coicha ichi. Paparuwa bichocono inyapana. <sup>4</sup>Poxonae soldadomonae baxua taerucupa bichocono cuitaya jijiyei tsurucupa,

mexeya poxi werapa iratha bobena, tsipei bichocono junuwa. <sup>5</sup>Barapo matatsunpin namchi barapowayobetha, jeye:

—Jopa pajunuwindebe. Bara yaputan xua pawenawenambe Jesús xua painya taetsibe, pon tupa exanadutatsi naetotha jiwi. <sup>6</sup>Xote apara bapon aibi. Aparay bayatha equeicha asu juina exanatsi petupa cuiru coyene weya, xua caena bayatha painya nepaca catsipaebixae. Incane anetha xote, pacou taemabe ichaxota bapon petupaen botatsi bayatha. <sup>7</sup>Nainya papondebe weye, patsipaebarebe Jesús pijimonaetatsi. Pajandebete: ‘Bara bequein bapon bayatha tupa ichitha equeicha asu juina exanatsi petupae cuiru coyene weya. Bapon copiya paca tsiwana ponaena Galilea nacua beya. Baxotiya bapon pataename, pana nejei matatsunpin’, pajandebete Jesús pijimonaetha. Poxonae bapon pataename, bapoxonae payaputaename xuaunxuae paca tsipaebatsi bara apara xaniyei, jei matatsunpin.

<sup>8</sup>Bapoxonae barapo yabuyobe muthu weya nainya pontababe. Junuwiya juntu coyene weiweinabe. Barapowayobe cuinaepoinyabe Jesús pijimonaetatsi beya xua diwesi caponabe pocotsiwa matatsunpin paeba. <sup>9</sup>Poxonae barapowayobe epathotha cataunxuae cuinaecaponabe bapoxonae Jesús jemeicha uncuataba barapowayobe pia xantha tatsi. Jesús jeye barapowayobetha: “Jaco”, jei Jesús. Barapowayobe imoxoyo caquita ponabe Jesustha bapoxonae pentabocototha uncuabe yawa taxu waetababe xua Jesús wuna pejainchinexatsi. <sup>10</sup>Jesús barai barapowayobe, jeye:

—Jopa pana necunuwindebe. Paponarebe tajiwimonae beya.

Patsipaebarebe pajandebete: Jesús paca itoroba bepa pinae paponam Galilea nacua beya. Bepa pinae baxotiya pataem, pajandebete, jei Jesús.

**Meje yabara poxonae soldadomonae naerabiya paeba, jeye: “Jesús pijimonaetupaen pitatsi”, jei**

<sup>11</sup>Poxonae barapo yabuyobe cataunxuae namtotha ecaponabe, bapoxonae icha soldadomonae jiwana, po soldadomonae Jesús yamuthu eenatsi, barapo soldadomonae tomara beya pona. Matauta sacerdotemonae pia pentacaponae tatsi tsipaebatsi daxita pocotsiwa xua xuan tane. <sup>12</sup>Barapo sacerdotemonae pia pentacaponae tatsi pona pitiri jiwi beya xua caemonae peyabara natsipaebinexa xua Jesús petupaen yabara. Bapoxonae daxita barapomonae soldadomonae paratixi nawita catsibatsi xua jiwi naerabiya petsipaebinexatsi. <sup>13</sup>Bapoxonae barapomonae soldadomonae baraichi, jeye:

—Patsipaebare jiwi xua merawi poxonae pamaitumenam Jesús pijimonaetatsi pata, yawa xua bapoxonae petupaen pitatsi. <sup>14</sup>Icha Pilato pon peyanacua ewatsin jiwi jume taebina xua Jesús petupaen aichurucuae, yawa icha bapon baxua yabara paca yainyabina, bapoxonae nexata paca yabara jume yawenaechi xua bapon jopa paca jutebi tsane, jei barapomonae.

<sup>15</sup>Nexata barapo soldadomonae nota paratixi yawa jiwi tsipaeba tsiniyatsi xua sacerdotemonae pia pentacaponae tatsi peitorobixae. Barapo penaerabi diwesi jume, judiomonaet jume cocowantapona. Anoxuae barichi po judiomonaet anoxuae jinompa, jume cocowantapona barapo diwesi.



**Meje yabara poxonae Jesús cui  
itoroba pijimonaе xua pia  
diwesi tatsi daxita nacuantha  
petapaebiwa tsainchi**

*(Mr 16.14-18; Lc 24.36-49; Jn 20.19-23)*

<sup>16</sup>Nexata once poyobe pomonaе xua Jesús pijimonaе tatsi barapomonaе naw-ibiya Galilea nacia beya. Bapoxonaе barapomonaе demxuwa beya pona, po demxuwa pinaе Jesús caunuta xua pinaе baxota patopaena. <sup>17</sup>Poxonaе barapo once poyobe baxota Jesús taerucupatsi, ichamonaе Jesús wunaе jaintatsi, bequein ichamonaе ainya juntu coyenein xeina xua Jesús xapain beta jopa yabara jume cowuntichi. <sup>18</sup>Nexata Jesús pijimonaе imoxoyo caquita pona. Bapoxonaе jeye:

—Nacom necata daxita peayapusu itorobi coyene xua peitabocotha nexa, matautano po cae pin nacuathe

tsiquenexano. <sup>19</sup>Paponare daxita carepaya jiwitha xua daxita nacuantha. Jiwi pacana exande xua tana nejume cowuntsiwa tsane. Daxita pomonaе tana nejume cowuntsiwi pabautisabare. Poxonaе pabautisabame Taxa pewun pawun taibare, matautano pana newun taibare, ponxaein Nacom Pexanton, matautano Nacom pia Pejumope tñaxu tatsi pawun taibare xua barapo acoibi wunthabe painya paca nepaca yawenaenexa pia peayapusu itorobi coyenewatha. <sup>20</sup>Daxita barapomonaе pacuidubare daxita xua xuan pocotsiwa bayatha paca itorobatsi. Matautano painya xoba pajuntemainame xua daxita maticabin bara ataya paca baru poponeibinchi beya poxonaе tsane xua equeicha patopeicaein, jei Jesús pijimonaetha.

Baja Mateo.

**Jesucristo Pia Pexeinya  
Diwesi Jume Tatsi  
Marcos Petinae Diwesi**

**Meje yabara poxonae Juan pon  
Pebautisabin jiwí cuiduba ira  
xuepana susato tsurucuae nacuatha**  
*(Mt 3.1-12; Lc 3.1-9, 15-17; Jn 1.19-28)*

**1** Baraxue tamropata pitaban xua Jesucristo pia pexeinya jume diwesi tatsi. Bapon Jesucristo, Nacom Pexanto tatsi.

<sup>2</sup>Bayatha Nacom pia peitorobi jume pepaebin, pon pewun Isaías, bapon tina petinae diwesitha. Isaías tina Nacom nexa, Nacom barapo diwesitha jeye Pexantotha:

“Itorobin copiya pon tana najume caitorobin xua catsiwanaya itorobinchi. Bapon cana exanaena jiwitha xua jiwí yabara aura tsane abe pia peexanae cuiru coyenein tatsi, xua poxonae nepatopae wunaeya tsane.

<sup>3</sup>Pon itorobin bapon jume tan pon xua wawai ira xuepana susato tsurucuae nacuatha. Bapon wawaya jeye: ‘Patsinajuntú cui coyene wunaere, pon jiwí pia pepa Pecanamataxeinaeinchi nexa pia pepatopae wunaeya tsane’, jei pon xua wawai”, jei Isaías petinae diwesitha.

<sup>4</sup>Nexata Juan pon Isaías peyabara paebixae bapon ira xuepana susato tsurucuae nacuatha patopa. Bapon Juan bautisaba ducuaebeiya, xua jiwí bautisabatsi merantha. Matautano bapon tsi-paeba jiwitha Nacom pia pexeinya jume diwesi tatsi. Bapon Juan jeye jiwitha: “Icha juntú coyene paxeinare painya neuraxae xua abe paexaname. Bapox-

onae Nacom paca yabara juntemainaena abe painya neexanae cuiru coyenein”, jei Juan. <sup>5</sup>Daxita Judea nacuamonae, iruru Jerusalén tomarapiwi, daxita barapomonae pona ichaxota beya Juan bautisaba jiwí ira xuepana susato tsurucuae nacuatha. Poxonae barapomonae nayopita Nacomtha xua bepa pinae Nacom tsita auratsi xua abe peexanaexae bapoxonae barapomonae Juan bautisaba Jordán mentha.

<sup>6</sup>Juan jumaina duwein nabocoto, po duwein pewun camello. Coreinya bocoto maraina. Xane pocotsiwa yapupuna pocotsiwan be sure poxi. Matautano bana daeba. <sup>7</sup>Barapon pomonaetha pebautisabixae tsipaeba, jeye: “Pon nepuna patopaena, apara bapon Mesías. Bapon bichocono peayapusú itorobi coyenewa xeina beyacaincha xan. Bapon pon jiwí pia Pecanamataxeinaeinchi. Xan bichocono tapawin daxota bapon bichocono tsita pin ura xeinan xua tataxu m̄ isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponae wi poxonae baru cui itura jina pia pentacaponae wichi. <sup>8</sup>Paca bautisabatsi meratha, ichitha nama barapon Mesías paca bautisabina Nacom pia Pejumope tunaxutha tatsi poxonae Nacom paca najumope catsibina”, jei Juan jiwitha xua Jesús yabara.

**Meje yabara poxonae  
Jesús bautisabatsi**

*(Mt 3.13-17; Lc 3.21-22)*

<sup>9</sup>Barapo dapaetha Jesús Nazaret tomara weya pona, po tomara eca Galilea nacuatha. Bapon Jordán mentha patopa, ichaxota Juan bautisaba. Baraxota Jesús bautisabatsi. <sup>10</sup>Poxonae mene wejuina barapoxonae caena

nainya Jesús itaboco necoicha xua peitaboco nayausaranaxuba. Jesús tane xua Nacom pia Pejumope tñaxu tatsi patopa bapontha xua be topiboto yaruneica. <sup>11</sup>Barapoxonae Jesús jume tane pocotsiwa peitaboco wetsipaebicatsi, jeichichi: “Xam apara Taxantom, pom bichocono caantobetsi, pom caitapetatsi. Nejñntu coyene weiweina exaname”, jei Nacom.

**Meje yabara poxonae Jesús jñntu coyene jñjutatsi caurimonae pia pentacaponaein tatsi xua Jesús abe coyeneya petaexanaenexa tsane**

*(Mt 4.1-11; Lc 4.1-13)*

<sup>12</sup>Poxonae Jesús nanacui wetatsi xua bautisabatsi bapoxonae Nacom pia Pejumope tñaxu tatsi Jesús nainya itorobatsi ira xuepana susato tsurucuae nacua beya. <sup>13</sup>Jesús ira xuepana susato tsurucuae nacuatha popona cuarenta po matabibibe. Baraxota pichiwan xua camatsawan jinompa ichaxota Jesús popona pocotsiwan bichocono atsaca. Caurimonae pia pentacaponaein tatsi pon Satanás Jesús piraichi jñntu coyene jñjutatsi xua Jesús abe coyeneya petaexanaenexa tsane. Pirapae matatsunpiwimonae po matatsunpiwimonae Nacom itoroba, barapomonae pata Jesustha xua Jesús pecui matateicaenexa tsainchi, matautano xua peapatsinexatsi tsainchi.

**Meje yabara poxonae Jesús tamropata pitaba pia penacuichiwa xua Galilea nacuatha**

*(Mt 4.12-17; Lc 4.14-15)*

<sup>14</sup>Nexata poxonae ichamonae Juan maxu waetabatsi xua peetsinexatsi jiwi pecubi botha, bapoxonae Jesús Galilea nacuatha patopa. Jesús paeba ducua-naeta jiwitha Nacom pia pexeinya jume diwesi tatsi. <sup>15</sup>Jesús namchi jeye: “Nacom bayatha yabara necana cui weta exana po coyeneya xua poxonae tap-

atopaewa. Daxota jiwi itacupatsi xua naexana Nacom piamonae, pomonae Nacom itorobiya peewatsixae. Daxota icha jñntu coyene paxeinare Nacomtha xua painya neauraxae xua abe paexaname, Nacom piamonae painya ne-naexanaenexa tsane. Pajume cowñnde Nacom pia pexeinya jume diwesi tatsi”, jei Jesús.

**Meje yabara poxonae Jesús waba cuatro poyobe pebiwi, pomonae duwei peyamonae**

*(Mt 4.18-22; Lc 5.1-11)*

<sup>16</sup>Poxonae Jesús pona Galilea pucua itapatha, bapoxonae tane ponbe peyax-unubinbe duwei. Ichun pewun Simón, ichun pewun Andrés. Baponbe baracae peweichobe. Baponbe peweichobe duwei yamonauyabe pucuatha. <sup>17</sup>Jesús waba, baraponbe wabatsibe. Jesús jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowñntsiwa tsane Nacom icha bayatha paichimbe poxonae payamonamebe duwei nawita, jei Jesús.

<sup>18</sup>Bara caena baraponbe botabe barapo peyamonae. Bapoxonae napuna ponabe Jesustha.

<sup>19</sup>Jesús equeicha pona. Bapoxonae equeicha ichunbe tainchibe. Baraponbe ichun pewun Santiago, iru ichun pewun Juan. Baponbe Zebedeo pexantobe tatsi. Jeratha mataquerabayayabe peyamonae xua ucupouna. <sup>20</sup>Jesús nainya waba, baponbe wabatsibe: Jesús baraibe: “Anetha, pana nepuna pondebe”, jei Jesús. Baponbe paxa cuenta ponabe jera weya, pon pewun Zebedeo. Matautano cuenta ponabe pomonae Zebedeo pia payawenae jiwichi tatsi xua yamona duwei. Baponbe Jesustha napuna ponabe.

**Meje yabara poxonae  
pebin pon cauri xeina**

(Lc 4.31-37)

<sup>21</sup> Bapoxonae Jesús pijimonae baru pona Capernaum tomara beya. Bapoxonaerũ judiomonae barompaya pia pentaquei seicae matakabi tatsi tsuxubi. Barapo matabitha Jesús pijimonae baru joniya judiomonae pia penacaeutusi botha tatsi. <sup>22</sup> Barapo jiwi yabara najũntũ coyene cabenaeca, tsipei pocotsiwa Jesús barapomonaecuidubatsi be pon peyaputaecin pia peyapusũ itorobi jume coyeneya tatsi paeba. Jesús jopa cuidubiyo be judiomonae pia pecuidubiwi pia coyeneya tatsi. <sup>23</sup> Pebin pon cauri xeina barapon eca barapo judiomonae pia penacaeutusi botha tatsi.

<sup>24</sup> Bapon wawaya jeye:

—¡Jesús Nazaret tomarapim, pana wepu warapare! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebichim? Paca yaputainchi yawa paca yaitainchi xam apara pon Nacom caitoroba, pon pepa Nentacuiruyapuxanepanaem, jei pebin pon cauri xeina.

<sup>25</sup> Jesús taitaweta, pebin taitawetatsi cauri. Jesús cauritha jeye:

—¡Moyande! ¡Barapon wepu ponde! jei Jesús cauritha.

<sup>26</sup> Barapoxonae cauri pebin naich-ababa exanatsi. Poxonae cauri barapo pebin bichocono wawai exanatsi, bapoxonae barapo cauri pebin wepu poinchi. <sup>27</sup> Daxita barapomonaec yabara najũntũ coyene cabenaeca. Daxota nayainyaba, jeye:

—¿Eta pocotsiwa jane? ¿Jamaisa baxua mexeya pena pecuidubi coyenewa? Maisa barapo pebin Jesús bichocono peyapusũ itorobi coyenewa

pexeinaein. Matautano caurimonae jume cowũnta poxonae pocotsiwa bapon itoroba, najei barapomonaec.

<sup>28</sup> Bapoxonae caena nainya daxita pomonae jinompa Galilea nacuatha jume taerũcupa pocotsiwa juinya Jesús exana.

**Meje yabara poxonae Jesús axaibi  
exana Simón Pedro pamiyo tatsi**

(Mt 8.14-15; Lc 4.38-39)

<sup>29</sup> Jesús caena nainya pona judiomonae pia penacaeutusi bo tatsi weya. Bapoxonae Jesús joniya Simón pia botha tatsi po bo xua irũ Andrés pia bo tatsi. Barapo botha Santiago irũ Juan Jesús baru joniya. <sup>30</sup> Simón pamiyo tatsi domae xainchi. Barapowa camatha boca. Poxonae Jesús patopa barapomonaec caena nainya Jesús tsipaebatsi, jeye: “Simón pamiyo tatsi domae xainchi”, jei. <sup>31</sup> Jesús caquita pona Simón pamiyo tatsi. Bapoxonae bapowa cobe pitatsi. Barapowa asiya cuaranotatsi. Bapoxonae barapowa caena nainya taaichurucuaetsi domae. Nexata barapowa pexaewa apata barapomonaetha.

**Meje yabara poxonae Jesús axaibi  
exana pin bicheitomonae**

(Mt 8.16-17; Lc 4.40-41)

<sup>32</sup> Poxonae tabopiya tsanaicha xua quirei tsanaicha, bapoxonae jiwi Jesús tacapoinchi pomonae peatenemonaewi, irũ pomonae caurimonae xeina. <sup>33</sup> Daxita barapo tomarapiwi nacaetuta bomũxũ boupatha. <sup>34</sup> Jesús axaibi exana pinmonae pomonae xeina daxita coyenexi xua xoxi peatenewa. Matautano Jesús taitaweta pomonae cauri xeina. Jesús jopa copatsiyo xua pecueicueiweiwa caurimonae, tsipei caurimonae Jesús cui yaputainchi.

**Meje yabara poxonae Jesús  
cucieueijei Nacom Pejume  
Diwesi judiomonae pia  
penacaetutsi bontha tatsi**

(Lc 4.42-44)

<sup>35</sup> Baya poxonae caem̃botha poxonae cataunxuae quiriquirica Jesús nacosataxuba. Bapoxonae tomara weya pona xua ichaxota jiwaibi bara beya pona. Baraxotiya Jesús tsipaebauya, Nacom tsipaebatsi. <sup>36</sup> Nexata Simón iru pomonae Jesús pepuna jinompae jiwichi, barapomonae Jesús pu barainatsi.

<sup>37</sup> Poxonae barapomonae Jesús caxibatsi, bapoxonae Jesús tsipaebatsi, jeye: —Daxita jiwi cawenawenei, jei.

<sup>38</sup> Jesús jume nota jeye:

—Barabũ ponaeinchi icha tomaran beya, barapo tomarantha irũ tacueicueijeinexa tsane Nacom pia pexeinya jume diwesi tatsi. Daxota apara baxua tsipatopeican, jei Jesús.

<sup>39</sup> Bapoxonae Jesús siwa pona ducua-naeta daxita tomaran Galilea nacuatha. Judiomonae pia penacaetutsi bontha tatsi Nacom pia pexeinya jume diwesi Jesús tsipaeba barapo judiomonaetha. Matautano Jesús taitaweta caurimonae.

**Meje yabara poxonae Jesús axaibi  
exana pon peperũ sawinchi**

(Mt 8.1-4; Lc 5.12-16)

<sup>40</sup> Bapoxonaerũ pebin, pon peperũ sawinchi, Jesús caquita poinchi. Bapoxonae bapon pentabocotha uncuca Jesús peitabaratha tatsi xua Jesús pebarũ cui itura jinaexaetsi. Bapon matowa Jesús wũcatsi, jeye:

—Icha bara ichichipame bara caitaçupa xua axaibi tana neexanaewam, tsipei jinya neayapusũ itorobi coyenewa nexei-naem, jei bapon.

<sup>41</sup> Jesús yabara najũntũ coyene xaina bapon, xua peyawenaenexa. Jesús na-

cobe yota, bapoxonae bapon mata jayabatsi, jeye:

—Bara ichichipan. ¡Bara axaibinde! ¡Bara caaperuxaibi exanatsi! jei Jesús.

<sup>42</sup> Bapoxonae bapon nainya taachurucuaetsi xua peperũ sawiwatsi. Matautano axaibi tsanayano. <sup>43-44</sup> Bapoxonae Jesús jume daunweya itorobiya jeye:

—Jopa yabara tsipaebinde ichamonaetha xua neaxaiwam. Saya jame meisa ponde sacerdotepintha xua nenaitutsinexa xua bapon necataenexa xua bayatha nejumewa. Care bapontha pocotsiwa xua pecatsiwa Nacomtha, pocotsiwa bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua perũ wũnaem, jei Jesús.

<sup>45</sup> Daichitha poxonae bapon pona jopa moya yawũn xei-naeyo. Bapon yabara tsipaebapona ichamonaetha pocotsiwa xua bayatha peaxaibiwa. Daxota Jesús jopa itacupaetsi xua naitutsiya pata ducua-naebiya tomarantha. Daxota Jesús tomaran cuariya popona xua aisowantha. Jiwi pomonae daxita ichawan werena pona, barapomonae Jesús pia xantha tatsi tapatatsi.

**Meje yabara poxonae Jesús axaibi  
exana pon pecuenobinchi**

(Mt 9.1-8; Lc 5.17-26)

**2** Poxonae be caentacabiyobe yapucaewa, bapoxonae Jesús equeicha caibeya pona Capernaum tomara beya. Jiwi yopita xua pinae Jesús botha eca. <sup>2</sup> Pin bicheito nacaetuta ichaxota po botha Jesús patopa, beya poxonae matauta bo coibo quecona. Barapomonaetha Jesús tsipaeba Nacom pia pexeinya jume diwesi tatsi. <sup>3</sup> Bapoxonae pebiwi pata cuatro poyobe. Barapo pebiwi yapaparuwã capata pon pecuenobinchi. <sup>4</sup> Tsipei pin bicheito,

daxota barapo pebiwi jopa itacupaetsi xua Jesús imoxoyo pecaquita ponaewatsi. Daxota barapo pebiwi bomuxutha pentatupa wereca atsa caxinaxoreca ichaxoya Jesús uncuareca. Barapo muthu deca pon pecuenobinchi yapaparuwa yorecatsi. <sup>5</sup>Poxonae Jesús yaputane xua barapomonae yabara cui jume cowanta xua bara Jesús peitacupaewatsi xua axaibi peexanaewatsi pon pecuenobinchi, bapoxonae pecuenobinchitha Jesús tsipaebiya jeye:

—Tajitom cacui yabara jüntemainaya juntu puxana exanatsiba abe jinya neexanae cuiru coyenein, jei Jesús.

<sup>6</sup>Ichitha baraxota iru naena pomonae jiwi pecuidubiwi Moisés pia peitorobi coyene tatsi. Barapomonae nanta xeinaeya najei: <sup>7</sup>“Maisa bapon bichocono abe tsipei pocotsiwa bapon paeba bichocono Nacom tsita ajumbetsi. Jiton dapocotsin aibi pon xua jiwi cacui yabara jüntemainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara jüntemainaya juntu puxana exanatsi abe pia peexanae cuiru coyenein tatsi”, najei. <sup>8</sup>Barapoxonae caena nainya Jesús yaputane pejuntu coyenewatha pocotsiwa barapomonae pia coutha nayainyaba. Jesús jeye barapomonaetha:

—¿Eta pocotsiwa metha baraxua pana natsipaebame? <sup>9</sup>¿Eta po jumetha baran tsane pecuenobinchi? ¿Metha jan tsane: ‘Jinya abe neexanae cuiru coyenein cata jüntemainatsi’, jan tsane? Ichacuitha ¿metha jan tsane: ‘Nontaponde, bara pire jinya nemaituncuaewa, yawa bara ponare’, jan tsane? <sup>10</sup>Daxota anoxuae paca tsita itapeinya xeinaeinchi, xua xan ponxaein Nacom Tananeitapsin, xua xenan taayapusu itorobi coyenewa xua bara tana neitacupaewa xua jiwi

tayabara cacui jüntemainaya juntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bapoxonae Jesús tsipaeba pontha pon pecuenobinchi. Jesús jeye:

<sup>11</sup>—Catsipaebatsi, nontaponde. Jinya nemaituncuaewa pire. Jinya bo beiyandeno, jei Jesús.

<sup>12</sup>Bapoxonae bapon caena nainya nontapona barapomonae peitutha tatsi, yawa pita xua pemaituncuaewa. Bapoxonae bapon bo tutu weya pona barapo pin bicheito peitutha tatsi. Daxita barapomonae yabara najuntu coyene cabenaeca, yawa Nacom wunae jaintatsi, jeye:

—Maisa waxainchi bapana bayatha jopa taetsi pocotsiwa wunae pocotsiwe icha be iche, jei barapomonae.

### **Meje yabara poxonae Leví wabatsi, Jesús waba**

(Mt 9.9-13; Lc 5.27-32)

<sup>13</sup>Barapoxonae Jesús pona Galilea pucua itapatha. Bapoxonae baxotiya pin bicheito pata Jesús pia xantha tatsi. Barapomonaetha Jesús cuiduba.

<sup>14</sup>Poxonae Jesús cataunxuae ecapona Galilea pucua itapatha, bapoxonae Leví tainchi. Bapon Leví Alfeo pexanto tatsi. Bapon Leví eca ichaxota bapon paratixi matoma noteibeca po paratixi jiwi bewa catsibina pon romanomonae itorobiya pia pepa peewatsinchi. Jesús Leví tsipaebatsi, Jesús jeye:

—Nepuna ponde, jei Jesús.

Bapoxonae Leví nontapona, yawa Jesús puna poinchino.

<sup>15</sup>Pirapaeyo Jesús Leví baru eca pexaethopeibiwatha, xua Leví pia botha tatsi xua Jesús pebaru xaenexatsi. Barichi Jesús baru eca pinmonae barapo pexaethopeibiwatha pomonae paratixi pentoma noteibiwi po paratixi jiwi bewa catsibina

pon romanomonaē itorobiya pia pepa peewatsinchi nexa. Irurū Jesús barū eca ichamonaē pomonaē abe peexanaē cuiuru coyenein peexanaē jiwi. Matautano Jesús pijimonaē barū eca barapo pexaethopaewatha. Pinmonaē Jesús barū eca tsipei pinmonaē Jesús puna poinchi. <sup>16</sup> Ichitha pomonaē jiwi pecuidubiwi Moisés pia peitorobi coyenewa tatsi irurū fariseomonaē, daxita barapomonaē Jesús tainchi poxonaē Jesús barū xayeca pomonaē paratixi pentoma noteibiwi, irū pomonaē abe peexanaē cuiuru coyenein peexanaē jiwi. Pomonaē Jesús tainchi daxita barapomonaē Jesús pijimonaē tatsi jeichichi:

—Maisa Jesús pon painya nepaca cacuidubin abe exana poxoru barū xayeca pomonaē paratixi penoteibiwi, matautano, barū xayeca pomonaē peajuntūcoyenebe jiwi, jei barapomonaē.

<sup>17</sup> Poxonaē Jesús jume tane baraxua, bapoxonaē Jesús jume nota, jeye:

—Pomonaē ba xua xaniwaicha jinompa xua jopa ateneyo barapomonaē ba jopa canantawenonaeyo pon jiwi peyawūbin. Saya jame meisa pomonaē ba atene barapomonaē jame canantawenona pon jiwi peyawūbin. Barichi xan patopan apara tha jopa tawabinexa tsane pomonaē pejuntū coyene xanepanaē jiwi. Saya apara tawabinexa pomonaē abe peexanaē cuiuru coyene peexanaewi tayawenaenexa tsane barapomonaē, jei Jesús.

**Meje yabara poxonaē Jesús yabara yainyabatsi po coyene xua Nacom peyabara nainbotsiwatsi**

*(Mt 9.14-17; Lc 5.33-39)*

<sup>18</sup> Caentaqueitha Juan pia pepuna jinompaewichi, irurū fariseomonaē, nainbota Nacomtha xua saya pewūcaenexa Nacomtha. Poxonaē barapomonaē nain-

bota, bapoxonaē ichamonaē Jesús siwa poinchi. Barapomonaē Jesús yabara yainyabatsi barapo penainbotsi coyene. Barapomonaē jeye Jesustha:

—Juan pia pepuna jinompaewichi, irū fariseomonaē jopa juniya Nacom peyabara nainbotsiwatsi poxonaē Nacom wūqueibatsi. Ichitha jinyamonaē jopa daichiyo, jopa nainbotsiyo Nacomtha xua saya pewūcaenexa Nacomtha, jei barapomonaē Jesustha.

<sup>19</sup> Jesús jume nota barapomonaē, jeye:

—Jiwi ba jopa bewa wecoyeya yabara nainbotsi poxonaē ichamonaē pexaewa tsinacaetuta penabanaenexa xua poxonaē pebin pecotsiwa pita. Poxonaē cataunxuae awiya bapon eca pexaewa penabanaewatha bapoxonaē jiwi ba peburūya nabane. Jopa bewa yabara nainbotsi tsane. <sup>20</sup> Ichitha icha pon aena piowa pita, caena nainya waetabatsi, ichamonaē waetaba xua tajū bapon pecapon-aenexatsi, bapoxonaē jame jiwi ba bewa wecoyeya yabara nainbotsi, xua equeicha bapon caewa pepatopaewa tsane.

<sup>21</sup> “Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru doroutotha, bapoxonaē barapo dorouto abe tsanaya tsipae. Tsipei poxonaē barapo dorouto matanaxuba barapo pena paparuwa natsaquetabiya. Poxonaē barapo pena paparuwa natsaquetabiya equeicha wan tsitsipanarena barapo dorouto. Bapoxonaē equeicha nama bichocono pin wan tsanaya beyacaincha xua poxonaē copiya. <sup>22</sup> Matautano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonaē barapo vino mera atsaxa. Barapo pena vino mera naxuba xuano barapo bocoto nax-

uba poxonae barapo bocoto tsitsica. Daxota bewa jame pena vino mera eparecae pena bocototha. Bapoxonae pena vino mera jopa naxubiyo. Yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

**Meje yabara poxonae Jesús pijimonae tatsi yaboto nota trigo xu judiomonae barompaya pia pentaquei seicae mataqueitha tatsi**

(Mt 12.1-8; Lc 6.1-5)

<sup>23</sup>Caentacabi poxonae judiomonae barompaya pia pentaquei seicae matakabi tatsi, barapo matakabitha Jesús, iru pijimonae tatsino pabi iyiya. Jesús pijimonae tatsi jainpa. Barapomonae tamropata notarucupa xua yaboto xunumenapona trigo xu. Bapoxonae pecobetha xu mata pepeta. <sup>24</sup>Poxonae fariseomonae cui tane xua Jesús pijimonae tatsi exana, bapoxonae fariseomonae Jesús tsipaebatsi, jeye:

—Jamaisa jinya jiwimonae nacuita barapo matakabithe, poxonae yaboto nota trigo xu. Apará jiwí jopa yabara cui copatsiyo xua ichamonae penacuichiwa barapo matakabithe xua judiomonae barompaya pia pentaquei seicae matakabi tatsi, jei fariseomonae.

<sup>25</sup>Jesús jume nota, jeye:

—Barapomonae tajiwiwimonae jopa apara abe exanaeyo. ¿Jopa payabara yorobim pocotsiwa bayatha David exana poxonae jainpa, poxonae iru pijimonae tajainpatsiru? Bapon David, pon caena bayatha israelmonae itorobiya pia pepa peewatsinchi. <sup>26</sup>Bapon David, iru pijimonae tatsi, barapomonae jojoniya Nacom pin pia botha tatsi poxonae pon pewun Abiatar tanacuita Nacom. Bapon Abiatar sacerdotemonae pia pepa pentacaponaein tatsi. David xane pan, po pan ichamonae cana exana xua

Nacom pecatsiwatsi. Iru barapo pan David pijimonae cata xua pexaenexaru. Barapomonae xane bequein bara Nacom pia peitorobi coyenewatha copata xua saya meisa sacerdotemonae itacupatsi xua pexaewa tsane barapo pan, jei Jesús.

<sup>27</sup>Equeicha Jesús namchi, jeye:

—Nacom, jiwí pewunaeya taexanatsi pentaquei seicae matakabi. Barapo pentaquei seicae matakabi Nacom tsixexana jiwí, xua barapo matakabitha jiwí penafinacaewatsinexa. Nacom jopa ainya cui cana exanaeyo pentaquei seicae matakabi xua beyacaincha jiwí. <sup>28</sup>Daxota xan ponxaein Nacom tana neitapetsixae xeinan taitorobi coyenewa xua jiwí tacoya taitorobiwa pentaquei seicae matakabitha, jei Jesús fariseomonaetha.

**Meje yabara poxonae Jesús cobe wuna exana pon pecobe mubinchi**

(Mt 12.9-14; Lc 6.6-11)

**3** Jesús equeicha joniya judiomonae pia penacaetutsi botha tatsi. Baraxota pon pecobe mubinchi eca. <sup>2</sup>Barichi pomonae jiwí pecuidubiwi Moisés pia peitorobi coyene tatsi, iru fariseomonae baxota ena. Daxita barapomonae Jesús necotenatsi pecui taenexatsi icha bara metha Jesús cobe wuna exanaena pentaquei seicae mataqueitha pon pecobe mubinchi. Icha Jesús pon pecobe mubinchi axaibi exanatsi, bapoxonae barapomonae xeinaena po coyenewa xua Jesús abe peyabara paebiwatsi tsainchi. <sup>3</sup>Bapoxonae Jesús barai pontha pon pecobe mubinchi, jeye:

—Nontaponare. Uncuare xote, jei Jesús.

<sup>4</sup>Pomonae Jesús tainchi Jesús barai barapomonae, jeye:

—Paca yainyabinchi, ¿eta xua copata pentaquei seicae matakabitha? ¿Wuna jampa? ¿Abe jampa? ¿Eta xua metha



tsipae? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

Ichitha barapomonaе jopa jume notsiyo, saya moya umena. <sup>5</sup>Nexata Jesús necota barapomonaе. Anaya Jesús caseba barapomonaе. Matautano juntu coyene wecoyei, tsipei barapomonaе jopa beyaputaeyo pocotsiwa bapon exana. Jesús barai pon pecobe mubinchi:

—Nacobe doire, jei Jesús.

Bapon nacobe doita. Bapoxonaе bapon nainya cobe wunae tsanaya. <sup>6</sup>Bapoxonaе fariseomonaе Jesús weya ponarucupa. Bapoxonaе barapomonaе nacaetuta Herodes pijimonaetha tatsi xua pecui yabara paebinxatsi xua po cui coyenewatha Jesús pebexubiwa tsainchi.

**Meje yabara poxonaе pin bicheito nacaetuta Galilea pucua itapatha**

<sup>7</sup>Jesús pijimonaе baru pona Galilea pucua itapa beya. Iruru pin bicheitomonaе Jesús puna poinchi pomonaе Galilea nacua weya pona. <sup>8</sup>Iruru pomonaе Judea nacua werena pona iruru pomonaе Jerusalén tomara werena pona, daxita barapomonaе Jesús puna poinchi. Iruru Idumea nacuapiwi Jesús puna poinchi. Iruru ichamonaе Jesús puna poinchi pomonaе icha muxunenetha jinompa xua Jordán mentha. Iruru Tiro tomarapiwi Jesús puna poinchi. Iruru Sidón tomarapiwi Jesús puna poinchi. Daxita barapo bicheito Jesús itata patatsi poxonaе jume tane daxita xua juinya pocotsiwan Jesús exana. <sup>9</sup>Tsipei pin bicheito, daxota Jesús pijimonaе itoroba xua jera petaxawenaewa tsainchi xua petsaquibabiyainwatsi barapo pin bicheito. <sup>10</sup>Yaitama Jesús axaibi exaneiba pin bicheito pomonaе atenemonaе, daxota iru ichamonaе

Jesús imoxoyo caquita poinchi. Barapomonaе ichichipa xua Jesús pejayabiwatsi xua barapomonaе iru axaibi peexanaenexatsiru.

<sup>11</sup>Pomonaе caurimonaе pexeinaewi, poxonaе barapomonaе Jesús tainchi, barapomonaе pentabocototha umena Jesús peitabaratha tatsi. Barapomonaе wawaya jeye xua caurimonaе wawai peexanaexaetsi:

—¡Maisa bara xam Nacom Pexantom! jei barapomonaе xua wawaya exanatsi caurimonaе.

<sup>12</sup>Jesús jume daunweya itoroba barapomonaе, jeye:

—Jopa pana neyabara paebinde ichamonaetha xua xan Nacom Pexanton, jei Jesús.

**Meje yabara poxonaе Jesús itapetsiya waba pia peitorobi jiwitatsi pomonaе xua doce poyobe**

(Mt 10.1-4; Lc 6.12-16)

<sup>13</sup>Bapoxonaе Jesús demxuwatha pona. Barapo demxuwatha Jesús waba pomonaetha xua peichichipaexae xua itapetsiya waba. Barapoxonaе barapomonaе Jesús pia xantha tatsi tapatatsi. <sup>14</sup>Jesús itapetsiya waba doce poyobe xua pomonaе pebaru jinompaenexatsi. Matautano barapomonaе Jesús itoroba xua daxita jiwitha petacueicueijeinexatsi Nacom Pejume Diwesi. <sup>15</sup>Barapomonaetha Jesús cata pia peayapusu itorobi coyenewa tatsi, xua cauri ichamonaе petaitawetsinexatsi pomonaе xua cauri pepuna jinompaewichi. <sup>16</sup>Meje barapomonaе pewunxi tatsi pomonaе Jesús waba: Simón pon icha wun wun dutatsi “Pedro”, baraichi. <sup>17</sup>Ichun pewun Santiago. Ichun pewun Juan pon Santiago peweicho tatsi. Baraponbe Zebedeo pexantobe tatsi. Baraponbetha Jesús icha wun wun dutabe “Boanerges” jei (xua po wuntha xua jei: “Yamuxu

pexantobe tatsi”, jei). Barapo wun wun duta tsipei peajuntacoyenesunbe. <sup>18</sup>Ichun pewun Andrés. Iru ichun pewun Felipe. Iru ichun pewun Bartolomé. Iru ichun pewun Mateo. Iru ichun pewun Tomás. Iru ichun pewun Santiago pon Alfeo pexanto tatsi. Iru ichun pewun Tadeo. Iru ichun pewun Simón pon celotemonaepin. <sup>19</sup>Iru ichun pewun Judas Iscariote. Barapon Judas pon Jesús caenaetaxubatsi ichamonaetha pebexubinexatsi.

**Meje yabara poxonaе Jesús baraichi  
xua pinae xeina Beelzebú pia  
peayapusu itorobi coyenewa tatsi**

(Mt 12.22-32; Lc 11.14-23; 12.10)

<sup>20</sup>Bapoxonaе Jesús, iru pomonaе pia peitapetsiwi tatsi botha jojoniya. Bapoxonaе equeicha pin bicheito nacaetuta Jesús pia xantha tatsi. Daxota Jesús iru pijimonaе tatsi jopa itacupaetsi xua penabanaewa tsane. <sup>21</sup>Jesús piamonaе matabuxyo tatsi jume tane xua jiwí paeba xua pinae juinya Jesús matayaibatsi. Daxota barapomonaе pata, xua Jesús pewaetabinexatsi, xua pia bo beya pecaponaenexatsi.

<sup>22</sup>Matautano pomonaе jiwí pecuidubiwi Moisés pia peitorobi coyene tatsi, pomonaе Jerusalén werena pona, barapomonaе jiwítha jeye Jesús yabara: “Bapon caurimonaе itawetatsi, apara pexeinaexae Beelzebú pia peayapusu itorobi coyene tatsi, pon caurimonaе pia pentacaponaein tatsi”, jei barapomonaе pomonaе jiwí pecuidubiwi Moisés pia peitorobi coyenewa tatsi.

<sup>23</sup>Bapoxonaе Jesús waba barapomonaе pia xainya berena. Yawano Jesús pecayabara juta pepaebi diwesiyo tsipaeba, jeye: “Caurimonaе pia pentacaponaein tatsi jopa itacupaetsi

xua peitawetsiwa icha caurimonaetha, xua pecae caurimonaexae. <sup>24</sup>Icha cae nacuapiwi nawepu tsatabe xua matauta nababe, bapoxonaе jopa xaexaenaecaeyo. <sup>25</sup>Matauta iruru icha cae bo matabuxyomonaеbe nababe yawa nawepu tsatajopabe, bapoxonaе jopa xaexaenaecaeyo. <sup>26</sup>Barichi icha Satanás, pijimonaе tatsi nawepu tsatajopabe matautano xua nababe, bapoxonaе jopa xaexaenaecaeyo. Satanás jopa itacupaetsi xua itoroba pijimonaе, tsipei amsiya exana.

<sup>27</sup>“Dapon ajibi, pon itacupaetsi xua botha joniya po botha pon bichocono maxu daunwei pia bo tatsi xua daxita notsina pocotsiwa bapon xeina pon maxu daunwei icha jopa copiya matha maxu cutanotsiyo.

<sup>28</sup>“Bara xaniyeya paca tsipaebatsi. Pocotsiwa jiwí abe peexanae cuiru coyenein exana, matautano pocotsiwa xua jiwí abe paeba, barapo coyenein Nacom itacupaetsi xua yabara juntemainaena xua barapo jiwí abe exana. <sup>29</sup>Pon abe yabara paeba Nacom pia Pejumope tunaxu tatsi, Nacom bapana jopa yabara juntemainae tsane xua bapon paeba. Bara bapon ataya atene tsane ichaxota jopa itacounayiyo isoto xua bapon abe peexanaexae”, jei Jesús.

<sup>30</sup>Jesús baraxua paeba, tsipei pomonaе jiwí pecuidubiwi Moisés pia peitorobi coyene tatsi barapomonaе bayatha naerabiya paeba xua pinae Jesús cauri xeina. Ichitha pon Jesús xeina apara Nacom pia Pejumope tunaxu tatsi. Daxota barapomonaе Nacom pia Pejumope tunaxu tatsi tsita natsicuentatsi, tsipei Nacom pia Pejumope tunaxu tatsi abe yabara paebatsi.

**Meje yabara Jesús pena tatsi,  
iruru peyapin jwi tatsino**

(Mt 12.46-50; Lc 8.19-21)

<sup>31</sup> Pirapae Jesús pena tatsi, iru peyapin jwi tatsi pata Jesustha. Ichitha barapomonaes pesato beumeinya. Bapoxonaes najume caruta ichamonaetha xua petawabinexa tsainchi Jesús. <sup>32</sup> Po bicheito Jesús matawacaicha enatsi, barapomonaes Jesús tsipaebatsi, jeye:

—Ena, iruru neyapin jiwino, pesato beya umena. Bepara bequein cataei. Bepara bequein catsipaebei, jei.

<sup>33</sup> Ichitha Jesús jume barai barapomonaes, jeye:

—¿Jintam powa be taena natsicotanera? ¿Jintam pomonaes be tayapin jwi natsicotanera? jei Jesús.

<sup>34</sup> Bapoxonaes Jesús necota pomonaes pematawacaicha enaewichi. Jesús jeye:

—Barapomonaes pomonaes xote umene apara be taena tsicotan, matautano be tayapin jwi tsicotan. <sup>35</sup> Pomonaes exana pocotsiwa Nacom itoroba, pon peitabocotha peecaenxae, barapomonaes be tayapin jwi tsicotan, matautano iru be tayapixi tsicotanno, matautano iru be taena tsicotanno, jei Jesús.

**Meje yabara poxonaes Jesús cuiduba  
jwi pecayabara juta pepaebi  
diwesiyo xua pon peubin yabara**

(Mt 13.1-9; Lc 8.4-8)

**4** Equeicha Jesús tamropata pitaba xua cuiduba Galilea pucua itapatha. Bapoxonaes pin bicheito nacaetuta ichaxota Jesús cuidubuncua. Tsipei pin bicheito daxota Jesús jeratha nontabiya xua peecaenexa, po nae mentha ducuiya. Barapo pin bicheitomonaes taetabo itapatha umena. <sup>2</sup> Jesús barapomonaetha cuiduba pecayabara juta pepaebi diwesintha.

Poxonaes Jesús cuiduba barapomonaes, jeye: <sup>3</sup> “Pana nejume naitaeware barapo diwesiyo: Pebin pon peubin ponataba pia ubichi pabitha. <sup>4</sup> Poxonaes pon peubin ubauya, icha xu namtotha othopeica. Pepupunaewi yapata. Bapoxonaes barapo xu xu xane. <sup>5</sup> Icha xu, xu othopeica ibowantha ichaxota xua ira itafafana. Barapoxonaes barapo xu caena nainya xu xuwa, tsipei jopa tajü xu xuwarecaeyo. <sup>6</sup> Ichitha poxonaes xometo atsa tsina, bapoxonaes yaboto tsaquiwa yawa tupa tsipei jopa tajü tabu opina xuwarecaeyo. <sup>7</sup> Icha xu, xu othopeica ichaxota pesoiwana xuwinaena. Barapo xu yaboto nanta capanaba poxoru yawa muxuna xuwina pesoiwana. Daxota barapo xu jopa xu nacoichiyo. <sup>8</sup> Icha xu, xu othopeica ichaxota ira wunaes. Poxonaes barapo xu, xu xuwa, xu nawunaeta. Icha xun, xu nanacoitapona treinta po xu matabuxuyobe tsiniya. Icha xun, xu nanacoitapona sesenta po xu matabuxuyobe tsiniya. Icha xun, xu nanacoitapona cien po xu matabuxuyobe tsiniya”, jei Jesús barapo pin bicheitomonaetha.

<sup>9</sup> Equeicha Jesús jeye: “Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús poxonaes pijimonaes muxuconaquiya tsipaeba.

**Meje yabara poxonaes Jesús namchi  
xua exua metha pecayabara  
juta pepaebi diwesin**

(Mt 13.10-17; Lc 8.9-10)

<sup>10</sup> Nexata poxonaes Jesús pipatoha eca, bapoxonaes baru eca pomonaes pia pepuna ponaewichi, iruno pijimonaes tatsi pomonaes doce poyobe. Barapomonaes Jesús yainyabatsi jeye: “¿Eta pocotsiwa yabara caanutame poxonaes barapo pecayabara juta pepaebi diwesiyo cuidubame?” jei

barapomonaē. <sup>11</sup> Jesús jume nota barapomonaē, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawɯn xeinaewa. Barapo moya peyawɯn xeinaewa apara xua Nacom paca cana exana xua painya nepaca itacɯpaewa xua painya nenaexanaewa Nacom piamonaē tatsi pam, pomonaē pamxaem Nacom itorobiya paca ewata. Ichitha meisa jame ichamonaē pomonaē jopa nejume cowɯntsiyo jopa daichichi. Nacom jopa copatsiyo xua barapomonaē peyabara yaputaewa baxua. Daxota barapomonaē cuiduban pecayabara jɯta pepaebi diwesintha, xua Nacom peyabara yaputaenexatsi. <sup>12</sup>Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. Poxoru bapomonaē jopa icha jɯntɯ coyene xeinaeyo Nacomtha, daxota barapomonaē Nacom tsita natsicuentatsi abe petsita exanaexaetsi xuano Nacom jopa yabara jɯntemainaeyo abe pia peexanaē coyenein tatsi”, jei Jesús.

**Meje yabara poxonaē Jesús  
pijimonaē muxu yaputane exana po  
diwesi xua pecayabara jɯta pepaebi  
diwesiyo, pon peɯbin yabara**

*(Mt 13.18-23; Lc 8.11-15)*

<sup>13</sup>Equeicha Jesús barapomonaetha muxu tsipaeba, jeye: “Tsipei jopa payaputaem po pecayabara jɯta pepaebi diwesiyo xua peɯbin yabara paeban daxota jopa payaputaemtsipae bequein ainya pecayabara jɯta pepaebi diwesiyo paca tsipaebichipatsi. <sup>14</sup>Paca tsipaebatsi pecayabara jɯta pepaebi diwesiyo xua iche: Pon peɯbin jɯpa,

icha be ichi pon Nacom Pejume Diwesi pepaebi ducuaenaebiyaein. <sup>15</sup>Po xuton xua namto beothopiya, aichurubenaē. Barapo xuton yabara caunuta xua jiwi bara jɯntɯ weichichi caurimonaē pia pentacaponaein tatsi, pon Satanás. Jiwi jɯntɯ coyene weajumetsurubenaē exanatsi Nacom Pejume Diwesi xua bayatha po jume jume tane, xua bapoxonaē jopa petajume cowɯntsinexa tsainchi Nacom, yawa xua jopa petanacapanenebiyaenexa tsainchi Nacom beya, xua Nacom exanaena. <sup>16-17</sup>Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi, xuano jɯntɯ coyene weiweinaya Nacom jume cowɯntatsi. Ichitha bara caeto jume cowɯnta, poxoru barapomonaē ajɯntufaetabiya jume jeba Nacom Pejume Diwesi pejɯntɯ coyeneintha. Poxonaē yaitama barapomonaē bichocono peatenexae, matautano poxonaē barapomonaē yaitama abe petaexanaexaetsi ichamonaē xua pejume cowɯntsixae Nacom, bapoxonaē caurimonaē abe exana barapomonaē aetha, xua barapomonaē jɯntɯ coyene wejɯntemaina exanatsi xua Nacom pecayabara jɯntemainaewatsi. <sup>18-19</sup>Po xuton xua xu othopeica pesoiwantha, barapo xuton caunuta xua pomonaē Nacom Pejume Diwesi jume tane, ichitha saya barompaya pia jɯntɯ coyeneyatha jinompa, yawa saya ɯ copei cayabara nanta xeina, yawa saya exana pocotsiwa jɯntɯ coyene weiweina cana exainchi. Po coyene pebiwi exana baxuan bara jɯtiya ichiya exana xua po xuton be pesoiwantha othopiya. Barapo xuton jopa thei dubenaeyo. Barapocotsi jɯta coyeneya ichi, barapo jiwi. Jopa xanepanaya jinompaeyo Nacom nexa. <sup>20</sup>Po xuton xua xu othopeica peira wɯnaewatha, bara nacoita. Barapo

xuton yabara caunuta pomonae jume tane Nacom Pejume Diwesi, matautano jume cowuntano poxoru juntu coyene xanepanaya jume tane. Matautano beta exana dubenanaebiya beya matapainya jivi cui tane xua barapomonae juntu coyene xanepana Nacom peitabaratha tatsi. Bapoxonae ichamonae barapomonae jiwana beta yawena ichamonaetha icha barapo xuto ichi xua treinta po xu matabuxuyobe tsiniya tsoponae. Matautano ichamonae barapomonae jiwana beta yawena ichamonaetha icha barapo xuto ichi xua sesenta po xu matabuxuyobe tsiniya tsoponae. Matautano ichamonae barapomonae jiwana beta yawena ichamonaetha icha barapo xuto ichi xua cien po xu matabuxuyobe tsiniya tsoponae”, jei Jesús.

**Meje yabara poxonae Jesús pijimonae tsipaeba pecayabara juta pepaebi diwesiyo xua pecoicha yabara**

*(Lc 8.16-18)*

<sup>21</sup>Equeicha Jesús barapomonaetha tsipaeba, jeye: “Poxonae jiton pecoicha, coicha exana, bapoxonae jopa coicha matacatsiyo cajatha. Yawa jopa coicha exanaeyo cama peupana deca. Jame asiya coicha exanatsi, xua pecoicha taenexa pomonae joneibarena. <sup>22</sup>Daxita pocotsiwa xua moya peyawun xeinaewa bexa tsane jivi yabara yaputaena. Barichi po diwesi xua pecayabara juta pepaebi diwesi xua paebapona jivi barapo diwesi jivi itacupaeinchi xua peyabara yaputaewa tsane. <sup>23</sup>Icha pamuxu dubename, moya pana nejume naitaeware pocotsiwa tapaca tsipaewatsi”, jei Jesús poxonae pijimonae muxuconaquiya tsipaeba.

<sup>24</sup>Equeicha Jesús barapomonae barai, jeye: “Pana nejume naitaeware

painya neexanaenexa pocotsiwa paca tsipaebatsi. Icha ichamonae daunweya payabara paebiname penatsicuentisiwa xua abe peexanaexae Nacom barichi daunweya paca yabara paebina painya nenatsicuentisiwa xua abe painya neexanaexae. Matautano equeicha ichawano mataropeicha paca catsina. <sup>25</sup>Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

**Meje yabara poxonae Jesús pecayabara juta pepaebi diwesiyo paeba xua peubi xuto yabara**

<sup>26</sup>Nexata equeicha Jesús namchi, jeye: “Yabara paca cuidubatsi po coyene xua Nacom itorobiya ewata piamonae. Barapo coyene bara juta coyeneya ichi, icha pebin ichi poxonae peubi xu xu bebeya. <sup>27</sup>Poxonae nacobe weta xua uba, bapoxonae pabi weya pona. Bara bequein bapon jopa yawenaeyo xua barapo xuton xuxuwapona mataqueitha, merawithano poxonae pebin maitequeiba, daichitha awiya barapo xu xuxuwapona. <sup>28</sup>Daxota barapo xu xuxuwapona tsipei ira yawena xua barapo xu xuxuwapona. Copiya pepaboto xuwina, bapoxonae pepato naexana. Bapoxonae pepa xu xu dubena xua bichocono axucucu. <sup>29</sup>Poxonae pepa xu xu naweta barapo matacabitha pebin pona xua penotsinexa pocotsiwa naweta”, jei Jesús.

**Meje yabara poxonae Jesús cuiduba pecayabara juta pepaebi diwesiyo po peubi xutiyo pewan mostaza xutiyo**

*(Mt 13.31-32; Lc 13.18-19)*

<sup>30</sup> Jesús barapomonaе tsipaeba, jeye: “Poxonaе Nacom waba жиwi xua petanaexanaenexatsi piamonaе tatsi pomonaе itorobiya peewatsixae, ¿eta po coyene nacoyene jupabe? ¿Eta xua paca cuidubinchi xua baxua yabara? <sup>31-32</sup> Nacom pijimonaе tatsi mataropeicha bichocono pinmonaе tsoponaе xua pomonaе jume cowuntapona Nacom. Baraxua icha be mostaza xutiyo ichi po xutiyo bichocono tsica xutiyo beyacaincha xua icha pethei xutiyo. Barapo mostaza xutiyo pebin uba pia pabitha. Xuwa beya pin nae tsoponaе. Pepinnaexae daxota siri coton exana pemaxuranantha. Icha mostaza xutiyo ichi xua beya pin nae tsoponaе, bara juta ichi Nacom pejume cowuntsiwichi, pomonaе bapon itorobiya peewatsixae. Bequein anoxuae tsica bicheitiyo, bexa tsane beya pin bicheito tsoponaе tsane”, jei Jesús.

**Meje yabara poxonae Jesús cuiduba жиwi pecayabara juta pepaebi diwesixitha**

*(Mt 13.34-35)*

<sup>33</sup> Jesús жиwitha ainya pecayabara juta pepaebi diwesixi tsipaeba poxonaе cuiduba Nacom Pejume Diwesi, icha barapocotsi diwesixi ichi xuaunxuae po diwesixi paeba. Awiya cuidudubapona beya poxonaе barapomonaе xainwaicha yaputane. <sup>34</sup> Saya meisa barapomonaetha Jesús cuidubeiba pecayabara juta pepaebi diwesixi coyenexitha. Poxonaе Jesús meisa pijimonaе baru eca, bapoxonaе Jesús pijimonaе yabara muxu yaputane exana pecayabara juta pepaebi diwesixi coyexeni.

**Meje yabara poxonae Jesús xainya ducuanaya exana joibo, yawa maratsacano xainya mene ducuanaya exanano**

*(Mt 8.23-27; Lc 8.22-25)*

<sup>35</sup> Barapo mataqueitha poxonaе quirei tsanaicha Jesús pijimonaе tsipaeba, jeye:

—Antha poinchi icha muxunene beya, pucua beicha, jei Jesús.

<sup>36</sup> Bapoxonaе Jesús pijimonaе baru wepu pona barapo pin bicheito. Bapoxonaе Jesús pijimonaе baru poinchi jeratha, po jeratha Jesús cuidubeca barapo pin bicheito. Barichi icha jeranno naponano. <sup>37</sup> Bapoxonaе mentha jemeicha naetaba pin joibo. Maratsacan jeratha mene othopa, muxu jera pebunarecae. <sup>38</sup> Ichitha Jesús jera tafetha maituncua, nantasipa yuyutuncua paparuwatha xua xota nacuenacuena. Jesús pijimonaе yaubatsi, jeichichi:

—Pon pata Necuidubin, ¿jopa catsita ainya cuiyo xua waxainchi bunathopaeinchi? jei barapomonaе.

<sup>39</sup> Bapoxonaе Jesús asiya uncuа, yawa joibo itawetaxuba. Jesús jeye maratsacantha:

—¡Barande, bara xainya mene ducuanayama! jei Jesús.

Bapoxonaе joibo caewanaya, yawa mene xainya ducuanaya. <sup>40</sup> Nexata Jesús barai pijimonaе, jeye:

—¿Eta pocotsiwa metha bichocono pajunuwame? ¿Cataunxuae jopa pana nejume cui yabara jume cowuntsim xua bara tana neitacupaewa xua tapaca yawenaewatsi? jei Jesús.

<sup>41</sup> Barapomonaе bichocono najuntu coyene cabenaeca, yawa caemonae natsipaeba najei:

—¿Metha jintamda baponda? ¡Jamaisa bapon itawetaxuba joibo yawa

maratsacan xua daxita xainya dube-nanaya! najei barapomonaе.

**Meje yabara xua pebin  
pon caurimonaе xeina  
pon Gerasa nacua pin**

(Mt 8.28-34; Lc 8.26-39)

**5** Jesús, iru pijimonaе tatsi pata icha muxunene beya xua barapo pucuathiya. Po iratha Jesusbaru pata barapo ira pewun Gerasa nacua. <sup>2</sup>Poxonaе Jesús jera wenontouna bapoxonaе patopa pebin pon caurimonaе xeina. Bapon ibo wou weya patopa Jesustha. <sup>3</sup>Barapo pebin poponeiba ibo wountha. Dapon aibi pon itacupatsi xua bapon pecutswatsi, matautano metha bequein penaintotha tsipae. <sup>4</sup>Bapon matowa penaintotha taxu cubeibatsi, yawa maxu cubeibatsi xua bapon peyapucaeinebinexa tsainchi. Daichitha bapon barapo nain nain epa xuneiba. Dapon aibi xua bapon pecui amanayabiwatsi. <sup>5</sup>Barapon mataqueitha poponeiba, yawa merawitha poponeiba. Matautano atororotha yawa ibo wountha wawai tsopoponeibi. Matautano ibotixitha pia coutha nathabeiba. <sup>6</sup>Poxonaе barapo pebin Jesús taju taebatsi, bapoxonaе cuinaepona Jesús beya. Bapon pentabocotha uncua Jesús peitabaratha tatsi xua Jesús pebaru cui itura jinaeatsi peainya cuinxae. <sup>7</sup>Bapon wawaya jeye Jesustha:

—Jesús pon Nacom Pexantom, pon peitabocotha eca, ¿eta pocotsiwa metha taxantha patopame? Jume daunweya cabaraichi jopa neperaxa exanaeinde, jei.

<sup>8</sup>Bapon baxua paeba tsipei Jesús copiya namchi, jeye:

—¡Caurimonaе pam, bapon pawepu ponare! jei Jesús.

<sup>9</sup>Jesús yainyaba bapontha:

—¿Eta po wum? jei.

Bapon jume nota jeye:

—Tawun Ayei, tsipei paxan caurimonaе pan ayei jiwi pan, jei bapon xua paeba exanatsi caurimonaе.

<sup>10</sup>Barapo caurimonaе Jesús muxu fay-acotatsi xua bepa pinae barapomonaе jopa bewa itawetichi icha nacua beya.

<sup>11</sup>Ichaxota imoxoyo peitapatororotha baxota jinompa pin marranomonaе. Barapo marrano duweimonaе xayompa peitapa tororotha. <sup>12</sup>Caurimonaе Jesús wucatsi, jeye:

—Icha pana itawetame, moya pana nepu copabare marrano duweimonaе, jei caurimonaе.

<sup>13</sup>Bapoxonaе Jesús copata xua bara caurimonaе ponaena marrano duweimonaе pebin weya. Barapo marranomonaе ducupa. Pin pitapatororo othopareca. Pucuatha bunothopa. Yawa caurimonaе cabunathopatsi. Barapo marranomonaе dos mil po duweimonaеbe.

<sup>14</sup>Bapoxonaе pomonaе peyapu eenaewi marranomonaе, barapomonaе bichocono junuwiya cuinaepona tomara beya, jiwi petsipaebinxatsi baxua yabara, yawa jiwi petsipaebinxatsi tomara cuariya beya. Bapoxonaе jiwi pata petaenexa pocotsiwa Jesús cana exana pebintha. <sup>15</sup>Poxonaе barapomonaе pata Jesustha, bapoxonaе barapomonaе tane pebin pon bayatha cauri xeina. Barapo pebin moya eca, paparuwa nama xatatano, matautano juntema eca. Bapoxonaе barapomonaе bichocono junuwa. <sup>16</sup>Pomonaе bayatha tane xua pocotsiwa Jesús bayatha cana exana pebintha, pontha pon cauri xeina, baxua yabara paeba ichamonaеtha pomonaе pata. Matautano yabara paeba pocotsiwa Jesús cana exana marrano duweimonaеtha. <sup>17</sup>Bapoxonaе barapomonaе tamropata notarucupa xua Jesús itawetatsi, jeye: “Maisa bewa warapaename Gerasa nacua

weya, po nacua pata nacua weya”, jei barapomonaē.

<sup>18</sup>Poxonaē Jesús jeratha nontabiya, bapo pebin pon bayatha caurimonaē xeina, bapon Jesús wūcatsi xua bepa pinaē Jesús puna ponaetsi. <sup>19</sup>Ichitha Jesús jopa copatsiyo xua pepuna pon-aenexa tsainchi bapon. Saya jame Jesús bapontha jeye:

—Maisa jinya bo beya ponare ichaxota jinyamonaē matabuxuyo beya. Barapomonaetha tsipaebare daxita pocotsiwa Nacom cacana exana. Matautano barapomonaetha tsipaebare xua Nacom bara cayabara najuntū coyene xeina pia necayawenaenexa, jei Jesús.

<sup>20</sup>Bapoxonaē barapo pebin ponataba. Matautano tamropata pitaba xua cueicueijei daxita pocotsiwa bayatha Jesús cana exana bapontha. Barapon baxua tsipaeba Decápolis tomarantha, po tomaran xua diez po tomaranbe xua imoxoyo nacacuita ena. Daxita jiwi barapo tomaran najuntū coyene cabenaeca poxonaē jume tane xua barapon paeba.

**Meje yabara xua poxonaē Jairo pexantiyo taaxaibi exanatsi; yawa yabara xua bapoxonaē irū icha yabūyo axaibi exanatsi poxonaē Jesús pia paparuwa tajayabatsiru**

(Mt 9.18-26; Lc 8.40-56)

<sup>21</sup>Poxonaē Jesús caibeya pona jeratha icha muxunene beya pucua iya, bapoxonaē pin bicheito Jesús pia xantha tapatatsi pitapatha. <sup>22</sup>Bapoxonaē caein patopa pon judiomonaē pia penacacetutsi bo tatsi pecanamataxeinaewi jiwanaeapin. Bapon pewun Jairo. Poxonaē bapon Jesús tainchi, Jesús peitabaratha tatsi pentabocototha tauncuatsi. <sup>23</sup>Bapon Jairo bichocono Jesús wūcatsi. Jairo jeye:

—Taxantiyo muxu imoxoyo petupae. Anetha, inta taxantiyo necobetha mata jayabare, axaibi jinya neexanaenexa tsane. Bapoxonaē inta asu pepopon-aenexa tsane, jei Jairo.

<sup>24</sup>Bapoxonaē nexata Jairo Jesús puna pona. Pin bicheito Jesús puna poinchi, yawa barapo bicheito tsaquibabatsi.

<sup>25</sup>Barapo pin bicheitotha irū napona yabūyo powa atene. Barapowa caena bayatha beya yadoce po weiyobe jopa xua pentabū janatha boca xua be nantawane. <sup>26</sup>Barapowa bichocono atene tsaibi bequein siwa poneiba pomonaetha pomonaē peyawūbiwi jiwi. Barapomonaē bapowa daxita cobe matapaeteibatsi paratixi xua bapowa peyawūbixaetsi, daichitha bapowa jopa yawenaetsi baxua. Saya equeicha bichocono abe tsoponaē bapowa. <sup>27</sup>Poxonaē bapowa jume tane xua pinaē juinya Jesús axaibi exana jiwi, bapoxonaē bapowa imoxoyo caquita uncuataba Jesús peputha tatsi xua pin bicheitotha. Barapowa Jesús pia paparuwa tatsi tajayabatsi xua peopirawa. <sup>28</sup>Barapowa pia coutha natsipaeba, najei: “Icha saya Jesús pia paparuwa tajayabin, bapoxonaē axaibin tsane”, najei. <sup>29</sup>Poxonaē barapowa tajayaba Jesús pia paparuwa tatsi, bapoxonaē caena nainya bapowa ajaneibi tsanareca. Bapowa pia coutha nayaputane xua bayatha axaibi. <sup>30</sup>Jesús pia coutha nayaputane xua ichun axaibi peexanaewatsi, tsipei pia pepon weya taajiwanaesurucuatsi pia peayapusū itorobi coyenewa tatsi. Bapoxonaē Jesús napatomeicha necota jiwitha, jeye:

—¿Jintam inta paparuwa jayabara? jei Jesús.

<sup>31</sup>Nexata Jesús pijimonaē jume no-tatsi, jeye:

—Apara xam bayatha taneme xua pin bicheito catsaquibaba. ¿Eta xua metha pana yainyabame: ‘¿Jintam metha inta



paparuwa jayabara?’ jam? jei pijimonaē tatsi.

<sup>32</sup> Ichitha Jesús daxita jupaya tane peyaputaenexa pon pejayabiwatsi. <sup>33</sup> Barapowa bichocono junuwa, tsipei yaputane xua barapowa Jesús jayabatsi poxonaē axaibi exanatsi. Barapowa jijiyeya patopa Jestutha, yawa pentabocototha uncua Jesús peitabaratha tatsi xua Jesús pebaru cui itura jinaexatsi peainya cuinxae. Barapowa bara xainyeya paeba daxita pocotsiwa xua exana. <sup>34</sup> Jesús jeye barapowatha:

—Yabuyo, caaxaibi exanatsi tana neyabara jume cowuntsixaem xua bara tana neitacupaewa xua tacaaxaibi exanaewatsi. Saya jüntemiya poponde. Bara axaibim tsaibim tsane xua bara nepu tsitecae tsane, jei Jesús.

<sup>35</sup> Poxonaē Jesús cataunxuae cueicueijei tsuncuae barapowatha, bapoxonaē pata pomonaē Jairo pia botha petanacuichi jiwichi. Bapon Jairo pecanamataxeinaein judiomonaē pia penacaeuttsi bo tatsi. Barapomonaē jeye Jairotha pon pexantiyo taatenetsi:

—Nexantiyo bayatha cata tupa. ¿Eta xua metha came fayacotame pon jivi Pecuidubin? jei barapomonaē.

<sup>36</sup> Bequein bara baxua Jesús jume tane, ichitha baxua Jesús jopa jume naitaewatsiyo. Jesús jeye Jairotha:

—Jopa junuwinde, saya maisa nejume cowunde, jei Jesús.

<sup>37</sup> Bapoxonaē Jesús jopa copatsiyo xua pepuna ponaewatsi tsainchi ichamonaē. Saya meisa Jesús copata, xua pepuna ponaenexa tsainchi Pedro, iru Santiago iru Juan pon Santiago peweicho tatsi. <sup>38</sup> Poxonaē Jesusbaru pata Jairo pia botha tatsi, bapoxonaē Jesusbaru tane pin bicheito xua ajumeyaexa. Barapomonaē bichocono wecoyeyi, yawa wawai xua Jairo pexantiyo petatupaex-

aetsi. <sup>39</sup> Bapoxonaē Jesús joniya botha, yawa tsipaeba barapomonaetha, jeye:

—¿Eta pocotsiwa metha paa-jumeyaexam, xua yawa pawecoyam? Barapo pexuyo apara jopa tupaeyo, apara maituncua, jei Jesús.

<sup>40</sup> Ichitha barapomonaē Jesús jume cui caponatsi. Nexata barapo pin bicheito Jesús pesato beitaweya. Meisa saya Jesús baru joniya coxiyün, coxiwano ichaxota Jairo pexantiyo tatsi petupaeyo tabocatsi. Matautano Jesús pijimonaē baru joniya poyobe acoibi poyobe. <sup>41</sup> Barapowayo Jesús cobe pita, yawa jeye:

—Talita, cum, jeichichi (xua apara jeichi: “Yabuyo, asiya uncuare, catsipae-batsi”, jei Jesús.)

<sup>42</sup> Bapoxonaē barapowa caena nainya nontapona, powa xua doce po weibe xeina powayo Jairo pexantiyoxae tatsi. Barapowa asiya uncua, yawa itacupatsi xua peponaewa. Barapoxonaē barapo pin bicheito poxonaē baxua Jesús cui tainchi najüntu coyene cabenaeca. <sup>43</sup> Bapoxonaē Jesús jume daunweya itoroba jiwitha xua baxua jopa peyabara paebinxatsi ichamonaetha pocotsiwa Jesús cana exana barapowayotha. Bapoxonaē Jesús itoroba xua barapo pexuyo bara peapatsiwa tsainchi pexaewa.

### **Meje yabara poxonaē Jesús Nazaret tomaratha popona**

*(Mt 13.53-58; Lc 4.16-30)*

**6** Nexata Jesús Capernaum tomara weya warapa, equeicha caibeya pia tomara beya warapa xua Nazaret tomara beya. Iruru Jesús pijimonaē puna poinchi. <sup>2</sup> Poxonaē judiomonaē barompaya pia pentaquei seicae matabi tatsi tsuxubi, barapo matabitha Jesús tamropata pitaba xua cuiduba judiomonaetha judiomonaē pia penacaeuttsi botha

tatsi. Pinmonae pomonae Jesús jume tayenatsi, barapomonae najuntũ coyene cabenaeca, jeye:

—¿Eta xota metha bapon nacuiduba daxita baxua jane? ¿Jintam metha cata bapontha barapo peyaputae coyene jane, xua daxota bapon pexeinya petsita itutsi coyenewa exana? <sup>3</sup>Apara bapon pon naepan pematabobin. Bapon apara María pexanto tatsi, apara irũ Santiago pentapin tatsi, irũ José pentapin tatsi, irũ apara Judas pentapin tatsi, irũ Simón pentapin tatsi. Apara bara irũ pamchowaxi tatsi watomaratha jinompa, jei barapomonae.

Daxota barapomonae jopa xapain Jesús yabara jume cowuntsichi. <sup>4</sup>Ichitha Jesús jeye barapo jiwitha:

—Daxita jiwi ba baru cui itura jina pontha pon Nacom peyapusu itorobi jume pepaebin. Nama pia tomarapiwi tatsi, irũ piamonae tatsi irũ pia bomonae matabuxuyomonaepiwi tatsi, barapomonae ba jopa bapon baru cui itura jinaetsi, jei Jesús.

<sup>5</sup>Daxota Jesús jopa itacupaetsi xua pexeinya petsita itutsi coyenewan pexanaewa barapo Nazaret tomaratha po tomara pia tomaraxae tatsi. Saya meisa Jesús axaibi exana tsicamonaeyo pomonae peatenewi. <sup>6</sup>Jesús najuntũ coyene cabenaeca, tsipei barapomonae jopa yatsicaewa jume cowuntsichi.

**Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwi xua petanaexanaenexatsi pijimonae tatsi**

*(Mt 10.5-15; Lc 9.1-6)*

Daxota Jesús cuidubapona tsiqui tomaraxitha po tomaraxi ena Nazaret tomara pecuariya. <sup>7</sup>Jesús waba pijimonae pomonae doce poyobe tatsi. Jesús tamropata pitaba xua tsana itoroba tsiniya tomarantha be

dos poyobe tsiniya. Jesús pijimonae cata pia peyapusu itorobi coyenewa, xua pijimonae tatsi peitawetsinexa caurimonae. <sup>8</sup>Jesús pijimonae

itoroba, xua pijimonae tatsi jopa pecaponaenexa pocotsiwan xua poxonae namtontha peponaenexa. Itoroba xua saya meisa pecaponaenexa naeton po naeton penacobena bababi naeton. Jopa bewa barapomonae pecaponaenexa cotein, yawa jopa bewa pecaponaenexa pexaewan, yawa jopa bewa pecaponaenexa paratixi. <sup>9</sup>Yawa Jesús pijimonae itoroba xua bara nataxu xatabina sapaton, po sapaton pebuxumubiwan. Matautano barapomonae bewa nama xatabina saya be cae camisan. Jopa bewa caponae icha camisan. <sup>10</sup>Jesús pijimonae barai, jeye:

—Poxonae papatame tomaratha moya bara paenare po botha papatame, xua beya abu poxonae pawarapaename barapo tomara weya. <sup>11</sup>Icha, icha tomarapiwi jopa paca matenta weyataeya wabiyo, matautano icha jopa paca jume naitaewatsiyo pocotsiwa papaebame, nexata bapoxonae barapo tomara weya pawarapare. Po tsorobon painya taxutha dubena panataxu wenunbabare barapo tomaratha. Baxua paexande xua barapomonae peyaputaenexa xua apara barapomonae abe exana paxamtha, jei Jesús.

<sup>12</sup>Bapoxonae Jesús pijimonae tatsi ponarucupa Jesús pia xainya weya tatsi. Barapomonae cueicueijej jiwitha xua bewa pinae jiwi icha juntũ coyene xeinae Nacomtha xua peauraxae xua abe peexanae cuiru coyene exana Nacomtha. <sup>13</sup>Barichino barapomonae taitaweta cauri pomonae cauri xeina. Matautano barapomonae caxueba penasiwatha pomonaetha pomonae peatenewi. Bapoxonae barapomonae

axaibi exana pinmonae pomonae peatenewi.

**Meje yabara poxonae Juan  
bexotsi pon Pebautisabin jiji**

(Mt 14.1-12; Lc 9.7-9)

<sup>14</sup>Herodes pon Galilea nacuapiwi itorobiya pia pepa peewatsinchi bapon jume tane xua juinya jiji daxita jume tane pocotsiwa Jesús exana. Daxota bapon jeye:

—Juan pon jiji Pebautisabin pon bequein bayatha tupa, equeicha asu juina. Daxota barapon Jesús xeina barapo peayapusu itorobi coyenewa xua exana pexeinya petsita itubi coyenewan, jei Herodes.

<sup>15</sup>Ichamonae Jesús yabara jeichichi:

—Bapon apara Elías xua equeicha asu, pon bayatha tupa, jei.

Iruru ichamonae jeye:

—Bapon apara pon Nacom peitorobi jume pepaebin icha pomonae ichi pomonae Nacom peitorobi jume pepaebiwi pomonae caena bayatha jinompa, jei xua ichamonae paeba.

<sup>16</sup>Poxonae Herodes baxua jume tane, jeye:

—Apara bapon Juan, pon yabara xua bayatha najume carutan xua bapon pewisi ucuibiwatsi. Anoxuae bapon equeicha asu petupae cuiru coyene weya, jei Herodes.

<sup>17</sup>Herodes baxua paeba, tsipei caena bayatha Herodes cui itoroba xua Juan pewaetabinexatsi, matautano xua pemaxu cubinexatsino matautano xua jiji pecubi botha peetsinexatsi. Herodes baxua exana tsipei piowa tatsi powa pewan Herodías pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabuyo. <sup>18</sup>Daxota Juan jiji pecubi botha etatsi, tsipei Juan Herodes tsipaebatsi, jeichichi: “Nacom pia

peitorobi coyenewa jopa copatsiyo xua xeiname bapowa tsipei bapowa eweicho piowa tatsi”, jei Juan.

<sup>19</sup>Daxota bapowa Herodías Juan bichocono casebatsi. Bequein bapowa ichichipa xua Juan pecaenaetaxubiwatsi xua ichamonae pebexubiwatsi tsainchi, ichitha jopa itacupaetsi bapowa.

<sup>20</sup>Herodías jopa itacupaetsi xua peexanaewa baxua, tsipei Herodes Juan cunuwatsi. Bapon yaputane xua Juan bara xaniwaicha peexanaein, xvano matautano bara juntu coyene xanepana Nacomtha. Daxota jopa copatsiyo xua Juan bara abe pecana exanaenexa tsainchi. Bequein Herodes yabara unthuthu deideije pocotsiwa Juan pepaebixae, daichitha awiya ichichipa pocotsiwa Juan pepaebiwa. <sup>21</sup>Ichitha matabi jopa, po matabitha Herodías itacupatsi xua Juan abe pecana exanaewatsi. Herodes yantacabi jopa, po matabitha caena bayatha Herodes naexana poxonae pexuyo. Barapo matabitha Herodes exana pin penabanaewa. Bapon waba pomonae iru pentacaponae, pomonaetha itoroba xua iru tacanamataxeinatsi icha tomarantha. Irano wabano pomonae soldadomonae pia pepa pentacaponae tatsi. Irano wabano pomonae ainya cui penaexanae jiji Galilea nacuatha. <sup>22</sup>Herodías pexantiyo tatsi patopa po tututha ichaxota nabanathopa. Barapowa tsita yaweibuncua xua barapomonae tane. Baxua Herodes ichichi xeica xua bapowa yaweibuncua. Iruru pomonae baxota naxayena, ichichi xeica baxua. Bapoxonae Herodes jeye bapowatha.

—Newucare pocotsiwa xua neichichipaewa, bapoxonae cacatsinchi jinya beta neyaweibixae, jei Herodes.

<sup>23</sup>Bapon Herodes yabara tsiwunae muxu dutsiya jeye:

—Bara cacatsinchi pocotsiwa xua newwacame. Metha bequein newwacaetsipame xua tanacua epa toyatsipan baraxua bara cacatsinchi, jei.

<sup>24</sup> Barapowa pona xua peyainyabinexa pena, jeye:

—Ena, zeta pocotsiwa metha wucacuaein? jei.

Barapowayo pena jume notatsi, jeye:

—Wucare Juan pentasipa tatsi, pon jiwi Pebautisabin matasipa, jei Herodías.

<sup>25</sup> Barapowayo barapoxonae caena nainya pona ichaxota eca Herodes. Jeye bapontha:

—Ichichipan xua nainya anoxuae tanecatsiwam tsane paratontha Juan pentasipa tatsi, pon jiwi Pebautisabin matasipa, jei.

<sup>26</sup> Barapoxonae Herodes bichocono wnthuthu wecoyei. Ichitha tsipei bayatha yabara petsiwunae muxu dutsixae xua bepa pinae catsina pocotsiwa wucaeinchi, matautano tsipei pejume taexaetsi pomonae bayatha waba, daxota Herodes jopa bejume totabiyo pocotsiwa wucatsi. <sup>27</sup> Bapoxonae caena nainya Herodes itoroba soldadomonaepin xua pecarenaenexa tsane paratontha Juan pentasipa tatsi. Bapon pona jiwi pecubi bo beya. Baraxotiya Juan wisi ucuibatsi. <sup>28</sup> Barapo soldadomonaepin matasipa carena paratontha. Bapon cata yabuyotha. Barapowayo xuya pena cata.

<sup>29</sup> Pomonae Juan pia pepuna jinompaewichi jume tane xua pinae Juan bexotsi. Barapoxonae barapomonae pona jiwi pecubi bo beya xua Juan pepichinexa tsainchi petupaen, yawano xua peboyaenexa tsainchi ibo wou muthu iya.

### Meje yabara poxonae Jesús apata pexaewa cinco mil pebiwi

(Mt 14.13-21; Lc 9.10-17; Jn 6.1-14)

<sup>30</sup> Barapoxonae pirapae Jesús pia peitorobiwi tatsi, Jesús baru nacaetutatsi. Barapomonae Jesús tsipaebatsi xua daxita pocotsiwan barapomonae peexanaexae, yawano pocotsiwa xua bayatha barapomonae cuiduba. <sup>31</sup> Jesús pijimonae tsipaeba, jeye:

—Anetha poinchi, xua wanafifina ewatsinexa tsainchi saya caeto ichaxota jiwaibi beya, jei Jesús.

Daxota Jesús baxua paeba, tsipei pijimonae Jesús itata pateibatsi, xua poxonae naepanaya poneiba. Daxota Jesús iru pijimonae tatsi jopa itacupaetsi xua pexaewa tsane. <sup>32</sup> Barapoxonae Jesús, iru pijimonae tatsi compa ponarucupa jeratha ichawatha beya xua ichaxota jiwaibi beya. <sup>33</sup> Ichitha pin bicheitomonae tane poxonae Jesús iru pijimonae tatsi jeratha pona. Barapo pin bicheitomonae Jesusbaru yaitainchi. Barapo pin bicheitomonae daxita tomaran wecuinaeyiya. Bapoxonae pata ichaxota jiwaibi beya. Barapomonae tsiwanaya patatsi Jesús. <sup>34</sup> Poxonae Jesús jera wenontouna bapoxonae Jesús tane pin bicheito. Jesús yabara najuntu coyene xeina xua barapomonae peyawenaenexatsi. Barapomonae jopa xeinaeyo pon peyawenaen barapomonaetha icha be oveja ichi poxonae jopa xeinaeyo pon peyapu eenaein. Daxota Jesús barapomonaetha cuiduba ainya coyenein. <sup>35</sup> Poxonae tabopiya tsanaichaba Jesús pijimonae itata patatsi, jeye Jestutha:

—Bayatha tabopiya tsanaicha. Xote apara bon ajibi xua ichaxota jiwi jinompa. <sup>36</sup> Barapomonae itorobare ichaxota po bon pipatotha umena yawa ichaxota xua tomaranxitha xua imoxoyo wacuariya xua barapomonae

pecomocaewa pexaewa. Tsipei xote pexaewa ajibi, jei pijimonae tatsi.

<sup>37</sup> Ichitha Jesús pijimonae barai, jeye:

—Paxam jame moya paapare pexaewa, jei.

Barapomonae jeye:

—¿Xam ichichipame xua pata upain comocaewa tsane barapo bicheitomonae ainya panmonaein xua pata como-caenexa doscientos po paratiximonae-betha pocotsi paratiximonaebe xeineiba pomonae nacuiteiba doscientos matacabibetha? jei barapomonae.

<sup>38</sup> Jesús barai pijimonae, jeye:

—Pan ¿eta xoyobe paxeiname? Incane matha pataema, jei.

Poxonae barapomonae yaputane jeye Jestustha:

—Cinco po panyobe, yawa dos poyobe duweiyobe, jei barapomonae.

<sup>39</sup> Jesús pijimonae najume caruta xua bepa daxita barapo bicheito iratha taenaetsei naepanaewatha xua pepa bicheiton tsana naexana tsiniya.

<sup>40</sup> Barapo pin bicheito pepa bicheito naexana tsiniya. Icha bicheito cien poyobe tsiniya. Icha bicheito cincuenta poyobe tsiniya. <sup>41</sup> Barapoxonae Jesús pecobetha pita pan cinco po panyobe. Yawa pita duweiyobe xua dos poyobe. Bapoxonae Jesús peitaboco benecoicha, Nacomtha tsipaeba jeye:

“Axa maisa jüntu coyene weiweinan, xua pexaewa pata tanecatsiwaxaem”, jei Jesús. Barapoxonae Jesús epa janaxuba pan. Jesús pijimonae cata barapo pan, xua pijimonae tatsi xuya pecatsibaponaenexa barapo pin bicheitha. Barichi Jesús duweiyobe epa janaxubabe. Bapoxonae apata barapo pin bicheitha. <sup>42</sup> Barapo pin bicheito bara daxita nabane. Bara jain cowüntarucupatsi. <sup>43</sup> Barapoxonae Jesús pijimonae tatsi doce po cotebe wumba xua nacopaba xua bayatha barapo jiji jopa xaeyo petonsanaexae.

<sup>44</sup> Pomonae xua barapo pan pexaexae barapomonae cinco mil pebiwimonae.

### **Meje yabara poxonae Jesús mene matatsun jumatha pona**

(Mt 14.22-27; Jn 6.16-21)

<sup>45</sup> Pirapae Jesús pijimonae itoroba xua peponaenexa jeratha, xua icha muxunene beya. Barapomonae Jesús tsiwana payatsi Betsaida tomara beya. Barapoxonae Jesús napeyaba barapo pin bicheito. <sup>46</sup> Poxonae Jesús napeyaba barapo pin bicheito, bapoxonae Jesús pona demxuwatheicha xua petsipaebinexa Nacomtha.

<sup>47</sup> Poxonae bayatha quirei tsanaicha, bapoxonae Jesús pijimonae tatsi iru jeratha tuwutha yanapona. Jesús iru compa pecaetha popona. <sup>48</sup> Jesús tane xua barapomonae bichocono daunweya nowaeta tsipei dawerena bichocono joibo daunwei. Poxonae mataqueiwunaeyo tsoponae, Jesús pijimonae imoxoyo caquita pona. Bapon mene matatsun jumatha pona. Jesús juntucuru xenta iya barapomonae.

<sup>49</sup> Poxonae Jesús pijimonae tainchi xua mene matatsun jumatha pona, barapomonae itaraerowiya nanta xeina, xua Jesús itara mexeya dowatsiwejei. Yawa barapomonae wawai. <sup>50</sup> Daxota barapomonae bichocono wawai, tsipei daxita barapomonae tane, yawa bichocono cuitaya junuwa. Ichitha Jesús barai barapomonae, jeye:

—¡Apara xan! ¡Jopa pajunuwinde! ¡Maisa pajüntu coyene weiweinare! jei Jesús.

<sup>51</sup> Bapoxonae Jesús jeratha nontabiya barapomonae pia xantha tatsi. Barapoxonae joibo caewanaya exana. Barapomonae bichocono najüntu coyene cabenaeca. <sup>52</sup> Barapomonae baxua exana, tsipei barapomonae cataunxuae jopa yaputaeyo xua apara Jesús pon Nacom itoroba. Bequein bapon pexeinya

petsita itutsi coyenewa exana poxonaе apata pan pin bicheitomonaetha, barapomonaе jopa beyaputaeyo pia juntu coyenewantha.

**Meje yabara poxonaе Jesús axaibi  
exana pomonaе peatenewi,  
pomonaе Genesaret nacuapiwi**

*(Mt 14.34-36)*

<sup>53</sup> Jesús, iru pijimonaе tatsi bara pitapa berubenathopiya xua pucua weya. Genesaret nacuatha pata. Baxota jera quetanota pitapatha. <sup>54</sup> Poxonaе Jesús jera wenontouna, bapoxonaе caena nainya pinmonaе Jesús yaitaerucupatsi. <sup>55</sup> Bapoxonaе barapo jiwi bara wecuinaeyiya daxita barapo ira weya. Matautano carendena pocotsiwa pemaichiwatha pomonaе atenemonaе, Jesús pia xainya betacayiyatsi. <sup>56</sup> Daxitantha ichaxota Jesús ponaena, ichaxota bequein tsica tomaraxi, ichaxotano bequein pin tomaran, ichaxotano bequein tomaran cuariya, daxita barapomonaе capona peatenewimonaе. Barapo peatenewimonaе jebatsi namtontha. Barapomonaе Jesús wucatsi xua Jesús petajayabinexatsi pia paparuwa peopirato tatsi. Daxita pomonaе Jesús pia paparuwa tajayabatsi daxita barapomonaе axaibi tsurucupeibi.

**Meje yabara poxonaе Jesús yabara  
paeba xua pebin abe peexanaе  
cuiru coyene juntu webocatsi**

*(Mt 15.1-20)*

**7** Nexata fariseomonaе, iru pomonaе jiwi pecuidubiwi Moisés pia peitorobi coyene tatsi xua pomonaе Jerusalén tomara werendena, daxita barapomonaе Jesús imoxoyo caquita poinchi. <sup>2</sup> Barapomonaе tane xua Jesús pijimonaе tatsi jiwana najuntu coyene taxoba xuano xua daxota Nacom tsita natsicuentatsi abe peexanaexae

poxoru jopa matha nacobe quiatsiyo poxonaе xane. Daxota barapomonaе nanta xeina xua Jesús pijimonaе tatsi pomonaе peantucuiruyapube jiwi. <sup>3</sup> (Barapomonaе aichaxaibi xua Jesús pijimonaе tatsi jopa matha nacobe quiatsiyo poxonaе xane, tsipei fariseomonaе iru daxita judiomonaе jopa daichiyo. Barapomonaе pia cui xeina xua jopa xaibiyo poxonaе jopa matha tsiwanaya daunweya nacobe quiateibiyo. Barapomonaе barapo cui coyene exana xua po cui coyene pia pamo susato jiwi tatsi copiya cananta forota. <sup>4</sup> Poxonaе barapomonaе caibe nawibeibarena ichaxota po bon xua pexaewa pecaenaetsiwan weya, bapoxonaе copiya tsiwanaya merantha naperu tsicababeiba xua poxonaе xane. Barichi barapomonaе icha coyeneinno exanapona xua peitorobi coyenewantha itoroba xua poxonaе corotixi itapa quiata, yawano corotonno xua caseta itapa quiata yawano paraton po paraton pecaxae paraton itapa quiata yawa caman.) <sup>5</sup> Bapoxonaе fariseomonaе, iru pomonaе jiwi pecuidubiwi Moisés pia peitorobi coyene tatsi, jeye Jesthа:

—¿Eta xua metha jinya jiwimonaе jopa exanaeyo xua pocotsiwa wamo susato jiwi pia peitorobi cui coyenewantha itoroba xua penajuntu coyene taxobiyainwa? Jinyamonaе barapo cui jopa exanaeyo xua jopa matha tsiwanaya nacobe quiateibiyo poxonaе beya xaiba. Daxota jinyamonaе pomonaе peantucuiruyapube jiwi xua penajuntu coyene taxobixae, jei barapomonaе.

<sup>6</sup> Jesús jume nota barapomonaе, jeye:

—Bara Isaías pon Nacom peitorobi jume pepaebin beta xaniwaicha paca yabara paeba xua paxam pomonaе itara mexeya xanepanaeya pepaebi jiwi pam, daichitha apara abeya peexanae jiwi

pam. Bapon paca yabara tinaeya jeye, xua Nacom paeba:

‘Barapomonae neyabara baru cui itura jina

poxonae cueicueijeji tsaibi, ichitha pejuntu

coyenewantha jopa neantobeyo.

<sup>7</sup>Pocotsiwa poxonae barapomonae wuna

nejainta saya pejume pawii.

Po pecuidubiwa xua barapomonae cuiduba jiwitha

saya apara jiwi pia peitorobi coyenewata tati,

jei Nacom xua Isaiás tatina Nacom, jei Jesús.

<sup>8</sup>Equeicha Jesús jeye barapo fariseomonaetha iru pomonaetha pomonae pecuidubiwi Moisés pia peitorobi coyene tati:

—Saya paxam panaitematame pocotsiwa Nacom pia peitorobi coyenewata tati painya exanaenexa po peitorobi coyenewata painya amo susato jiwi copiya canamata forota. Paxam baxua paexaname poxonae jiwi paitorobame xua jiwi matha penacobe quiateibinexa poxonae xaiba penajuntu coyene taxobiyainwa, jei Jesús.

<sup>9</sup>Equeicha Jesús barapomonaetha jeye:

—Itapetsiya painya neexanaenexa pocotsiwa painya amo susato jiwi pia peitorobi coyenewatha itoroba, daxota bichoina pajume itawetame Nacom pia peitorobi coyenewata tati. <sup>10</sup>Bayatha Moisés pia peitorobi coyenewatha itoroba, jeye: ‘Axa baru cui itura jinare, iru ena baru cui itura jinare’, jei. Equeicha bapon Moisés jeye: ‘Ponabe yabara paeba paxa, xua jopa peyawenaewa paxa ichacuitha tsipae xua penatha, bara bapon bewa tupaena’, jei Moisés. <sup>11</sup>Ichitha paxam papaebame, xua pinae pebin bara itacupatsi xua paxatha tsipaeba, ichacuitha xua

penatha xua jeye: ‘Jopa neitacupaeyo xua tapaca cayawenaewatsi, tsipei daxita pocotsiwa xeinan xua bequein pocotsiwatha tapaca cayawenaewatsi tsainchi baxuan daxita Nacomthacatan’, xua jei pebin. <sup>12</sup>Poxonae peburuya payabara nanta xeiname xua bapon baxua paeba, bapoxonae bara pacopatame xua barapo pebin jopa penantawenonaewa xua peyawenaewapaxatha, iruru xua penatha. <sup>13</sup>Poxonae paexanaponame pocotsiwa painya amo susato jiwi pia peitorobi coyenewatha itoroba, xuan xua ichamonae pacana exaname xua baxua iru exana bapoxonae paxam Nacom pia peitorobi jume pecui pawii jume pacana exaname. Barichi ichawanno xua be jupa xua peabe coyenein paexanameno, jei Jesús.

<sup>14</sup>Equeicha Jesús waba barapo bicheito pia xainya berena, jeye:

—Daxita paxam pana nejume taema yawa pana nejume copi yaputaema pocotsiwa paca tsipaebinchi.

<sup>15</sup>Pocotsiwa ba pebin pecoiboto deca tsijain jojecatsi pexaewan, barapo coyene apara ba jopa bapana pebin antucuiruyapube exanaetsi xua poxonae pocotsiwa peexanaexae. Jame pocotsiwa ba pebin nanta xaina xua pecoibototha caunuta xua peabe jume, barapo jume coyenewatha jame pebin antucuiruyapube exanatsi xua poxonae pecueicueijeixae baxua.

<sup>16</sup>Icha pamuxu dubename, moya pana nejume naitaware pocotsiwa tapaca tsipaebiwatsi, jei Jesús.

<sup>17</sup>Poxonae Jesús jiwi cuenta pona yawa bo bejoniya, bapoxonae Jesús pijimonae yabara yainyabatsi barapo pecayabara juta pepaebi diwesiyo. <sup>18-19</sup>Jesús jume nota pijimonae jeye:

—¡Paxam bara paichim icha fariseomonae ichi! Jopa payabara yaputaem barapo pecayabara juta pepaebi diwesiyo xua pexaewa

yabara. Bayatha paxam payaputaneme pocotsiwa pebin tsijain jojonecatsi pexaewa pecoiboto deca, barapo pexaewa jopa abe cana exanaeyo pebin pia juntu coyenewa. Barapo pexaewa pebin jopa antucuiruyapube exanaetsi. Barapo pexaewa jopa ponaeyo pia juntu coyenewatha. Jame barapo pexaewa pecotsorotha pona. Bapoxonae pexaewa aichurucuae nawexacaeca, jei Jesús.

Poxonae Jesús baxua paeba jiwi yaputane xua daxita pexaewan bara wuna pexaenexa. Jopa jiwi antucuiruyapube exanaetsi. <sup>20</sup>Equeicha Jesús namchi, jeye:

—Pocotsiwa pebin pecoibototha caunuta xua peabe jume, barapo jume coyenewatha jame pebin antucuiruyapube exanatsi. <sup>21-22</sup>Tsipei pejuntu coyenewatha pebin nanta xeina, xua meje bapocotsiwanje: Abe penanta xeinae coyenewa, iru peita coxanae coyenewatsi coyenewa xua poxonae penayaputae jiwi naperu nacoyaba, iru ichun piawa tatsi pecaibi coyenewa, iru ichun anaya pebexotsi coyenewa, iru ichun piseuri tatsi pepichi coyenewa, iru ichun piawa tatsi peichichipae coyenewa, iru abe peexanae coyenewa, iru ichun pemuxuitorobiwatsi coyenewa, iru peyuyujei coyenewa, iru peuwi coyenewa, iru ichun peyabara naerabiwatsi coyenewa, iru ichamonae peabi coyenewatsi, iru jopa xainyeya peexanae coyenewa poxonae bequein yaputaetha xua jopa bewa exanae. <sup>23</sup>Daxita barapo coyenein pejuntu coyene weya jume pichapa. Barapo jume coyeneintha pebin antucuiruyapube exanatsi, jei Jesús.

**Meje yabara poxonae yabuyo  
powayo penanapaincha  
poponaewayo Jesús jume cowuntatsi**

(Mt 15.21-28)

<sup>24</sup>Bapoxonae Jesús bara weya pona. Tiro tomara beya pona. Sidón tomara beya ponano. Jesús botha joniya. Bequein Jesús aichaxaibi xua jiwi yaputane ichaxota bapon eca, ichitha Jesús jopa itacupaetsi xua nameicha eca. <sup>25</sup>Barapoxonae caena nainya petsiriwa jume tane xua Jesús botha eca. Barapowa pexantiyo tatsi cauri xeina. Daxota barapo petsiriwa patopa Jesustha. Yawa pentabocototha uncuwa Jesús peitabaratha tatsi xua bapowa petsita ainya cuixaetsi. <sup>26</sup>Barapowa penanapaincha poponaewayo pecueicueijeixae griegojume. Jopa judiomonae jitowayiyu. Bapowa sirofeniciamonaewayo naexana penaexanaexae Fenicia tomaratha xua Siria nacuatha. Barapowa Jesús wucatsi jeye:

—Taxantiyo inta taitawere cauri, jei barapowa.

<sup>27</sup>Ichitha Jesús jume nota barapowatha pecayabara juta pepaebi diwesiyotha, jeye:

—Jopa bewa ba auri apatsi pexaewa pocotsiwa pexui pia pexaewa tatsi. Baxua caunutsiya apara yabara paeban xua jopa bewa catsin tsane pomonaetha pomonae penanapaincha jinompaewi pomonae jopa judiomonae naexanaeyo xua pocotsiwa barompaya judiomonae piawa tatsi. Daxota jopa wunaeyo xua cayawenatsi, jei Jesús.

<sup>28</sup>Barapowa jume nota Jesustha pecayabara juta pepaebi diwesiyotha, jeye:

—Aa, bara barichi xuaunxuae netsipaebame ponxaem Tanecanamataxeinaem. Xainyei paebame. Jopa ba bewa auri catsibi pexui pia pexaewa



tatsi. Daichitha auri ba xane pocotsiwa pexui sorobaba barapo pɛpɛrɛwixi pocotsiwa pexaethopaewa pɛbɛxɛpɛna tsica othopeica. Bara jutiya ichiya necana ichinde, daichitha neyawende, jei bapowa.

<sup>29</sup> Barapoxonae Jesús barai barapowatha, jeye:

—Bara xaniwaicha paebame daxota cayawenatsi. Moya bara bara beya ponare. Bara bayatha nexantiyo wepu poinchi cauri, jei Jesús.

<sup>30</sup> Poxonae barapowa patopa pia botha, pexantiyo taebota xua camatha juntea boca. Matautano tane xua bapowayo bayatha wepu poinchi cauri.

### Meje yabara poxonae Jesús axaibi exana pon pemuxusipanaein

<sup>31</sup> Bapoxonae Jesús Tiro tomara weya pona, xua caibeya pona, ichaxota Sidón tomara iya pona. Matautano ichaxota diez po tomaranbe iya pona po tomaran pewɛn Decápolis. Bapoxonae Galilea pucuatha patopa. <sup>32</sup> Baraxotiya Jesús pia xainya berena tacapoinchi pebin pon muxusipana, matautano xua jopa itacupaetsi xua pecueicueijeiva. Pomonae pecarendenaexae bapon, barapomonae Jesús wɛcɛtsi, xua Jesús penta jayabiwa tsane xua bapon axaibi peexanaenexa tsainchi. <sup>33</sup> Barapo pebin Jesús aisowa bebarɛ poinya pin bicheito pia xainya weya tatsi. Jesús pecobesitobetha nantiyabe muxu yauxatata. Poxonae naone sutaba peone pecobetha bapoxonae barapo cobetha ebato jayaba bapontha. <sup>34</sup> Bapoxonae Jesús peitaboco benecoicha, yawa najumei cajujuina, yawano jeino bapontha: “¡Efata!” jeichichi, (xua jeichichi: “¡Muxu nasabare!” jeichichi.)

<sup>35</sup> Bapoxonae caena nainya bapon muxu nasaba nantiyabe. Matautano bara ebato xanepana. Matautano bara itacupaetsi xua pecueicueijeiva beta.

<sup>36</sup> Bapoxonae Jesús barai barapomonae, jeye: “Jopa ichamonaetha pana neyabara paebinde pocotsiwa exanan”, jei Jesús. Bequein Jesús matowa tsipaeba baxua, daichitha barapomonae awiya baxua yabara paebeiba ichamonaetha beyacaincha xua Jesús jume matawenta. <sup>37</sup> Barapomonae najuntɛ coyene cabenaeca, yawa jeino: “¡Maisa barapon bichocono daxita coyeneya xanepana exana! Pomonae pemuxusipanaewi equeicha beta jume tane, yawa bara cueicueijeji”, jei barapomonae.

### Meje yabara poxonae Jesús pexaewa apata cuatro mil pebiwi

(Mt 15.32-39)

**8** Bapoxonae icha matabitha pinmonae nacaetuta Jesús pia xantha tatsi. Jopa xeinaeyo pocotsiwa xua pexaewa tsane. Bapoxonae Jesús waba pijimonae, yawa jeye:

<sup>2</sup>—Barapomonae yabara najuntɛ coyene xeinan tayawenaenexa, tsipei barapomonae bayatha xote nebarɛ jinompa acoibi po matabibibe. Anoxuae jopa xeinaeyo xua pocotsiwa pexaewa tsane. <sup>3</sup> Icha barapomonae jainbotha pu itorobichipan pia bon beya, piyain namtotha xuirabathopaetsipa. Metha xuirabathopaetsipa tsipei ichamonae bayatha tajɛ werendena, jei Jesús.

<sup>4</sup> Jesús pijimonae jume notatsi, jeye:

—Paxan jopa pana itacupaeyo xua barapomonae pexaewa pata apatsiwa, tsipei xote jiwaibi xua pata como-caenexa pexaewa, jei Jesús pijimonae tatsi.

<sup>5</sup> Jesús yainyaba pijimonae, jeye:

—¿Eta po panyobe paxeiname? jei.

Jesús jume notatsi pijimonae, jeye:

—Siete po panyobe paxeinan, jei.

<sup>6</sup> Nexata Jesús pijimonae najume caruta xua bepa pinae barapo jiwi iratha taenaetsei. Jesús pecobetha

pita barapo siete panyobe. Bapoxonae Nacomtha tsipaeba jeye: “Axa, maisa juntu coyene weiweinan xua pexaewa pata tanecatsiwaxaem”, jei Jesús. Bapoxonae Jesús pan epa janaquiya nacobe weta. Bapoxonae Jesús pijimonae catsibapona, xua pijimonae tatsi xuya pecatsibaponaenexa barapo bicheitho. <sup>7</sup> Barichino barapomonae be conotha xeina duweixi poxi tsiquirixi. Jesús Paxa tsipaeba jeye: “Axa, maisa juntu coyene weiweinan xua pata tanecatsiwaxaem duweixi”, jei Jesús. Poxonae Jesús epa janaca, bapoxonae pijimonae cobe itoroba xua pecatsibaponaenexa barapo bicheitho. <sup>8</sup> Daxita barapomonae bara xane. Daxita bara jain cowuntarucupatsi. Pirapae awiya equeicha wumba siete po cotebe xua nacopaba pocotsiwa xua barapomonae bayatha jopa xaeyo petonsanaexae. <sup>9-10</sup> Pomonae nabane pexaewa, barapomonae cuatro mil pebiwi. Bapoxonae Jesús pu itoroba barapomonae, xua penawibiyaenexa pia tomaran beya. Bapoxonae caena nainya Jesús, iru pijimonae tatsi, jeratha nonobabiya pewarapaenexa Dalmanuta nacua beya.

**Meje yabara poxonae fariseomonae  
Jesús cui itorobatsi xua  
peexanaewa tsane pexeinya  
petsita itutsi coyenewa**

*(Mt 16.1-4; Lc 12.54-56)*

<sup>11</sup> Bapoxonae fariseomonae pata Jesustha. Barapomonae tamropata notarucupa xua najume matsontsonoba exana Jesustha. Barapomonae Jesús pejuntu coyene jujtsinexatsi, daxota Jesús piraichi cui itorobatsi pia petsita itutsi coyenewa pocotsi coyenewa xua cana exana itaboco wetsica. Barapomonae jopa bapon jume cowuntsichi icha jopa itacupaetsi xua exana petsita itutsi coyenewa. <sup>12</sup> Jesús najumeicauna

pejuntu coyene weya poxoru barapomonae bapon amuxucoyenefaetabi exanatsi. Bapoxonae jeye:

—¿Eta pocotsiwa metha barapomonae tapexeinya tsita itutsi coyenewa necui itoroba jane? Bara xainyeya paca tsipae-batsi jopa bapana beexanaeinyo baxua, xua barapomonae necui itoroba, jei Jesús.

<sup>13</sup> Bapoxonae Jesús cuenta pona barapomonae jeratha, peponaenexa icha muxunene beya xua pucua iya.

**Meje yabara poxonae Jesús  
pijimonae yabara yaputane exana  
pocotsiwa pan cotowa exana**

*(Mt 16.5-12)*

<sup>14</sup> Jesús pijimonae tatsi junte-maina xua capona pan. Meisa cae pan capona jeratha, po nae pin naetha. <sup>15</sup> Jesús itoroba pijimonae, jeye:

—Dota pam, jopa pajume nitaewatsinde fariseomonae pia pecuidubi coyenewa tatsi xua painya nejume cowuntsiyainwa. Matautano dota pam, xua Herodes pia pecuidubi coyenewa tatsi xua painya nejume cowuntsiyainwa. Barapo pecuidubi coyenewan jiwi ichawa beya ajuntucicoyeneyapube cana exanapoinchi icha be pocotsi coyene ichi xua levadura matawun xua pan cocotowa exanapona beya poxonae pin pan, jei Jesús.

<sup>16</sup> Jesús pijimonae tatsi tamropata notarucupa xua caemonae natsipaeba, najei: “Metha apara poxoru junte-mainatsi xua caponatsi po pan xua levadura cotowa exana, daxota metha baxua Jesús juntu coniquiya naca muxu tsipaeba”, najei barapomonae.

<sup>17</sup> Jesús yaputane pocotsiwa pijimonae tatsi natsipaeba. Ichitha poxoru Jesús yabara paeba xua fariseomonae iru Herodes pia

pecuidubiwan tatsi daxota Jesús yainyaba piamonae:

—¿Eta xua metha pana natsipaebame xua jopa painya necaponaexae pan? Baxua papaebame apara poxoru jopa pana nejume yabara cowuntsim pocotsiwa paca cuidubatsi. Cataunxuae jopa pana necui yabara yaputaem poxoru jopa paichichipaem xua painya neyaputaewa tsane painya jüntü coyeneintha. <sup>18</sup>Paxam bequein pana necui taneme, ichitha jopa xaniwaicha pana necui yaputaem. Matautano bequein bara pana nejume taneme ichitha jopa xaniwaicha pana nejume copi yaputaem. Matautano pajüntemainame poxonae pexeinya petsita itütsi coyenewa exanan jiwí nexa poxonae pan catan jiwítha.

<sup>19</sup>Poxonae janacan pan xua cinco po panbe xua cinco mil pebiwi nexa, ¿eta po cotethabe pawñbaponame xua pocotsiwa nacopaba? jei Jesús.

Barapomonae Jesús jume notatsi, jeye:

—Doce po cotebe apara, jei Jesús pijimonae tatsi.

<sup>20</sup>—Poxonae janacan pan xua siete po panbe xua cuatro mil jiwí nexa, ¿eta po cotethabe pawñbaponame xua pocotsiwa nacopaba? jei Jesús.

Barapomonae Jesús jume notatsi, jeye:

—Siete po cotebe apara, jei Jesús pijimonae tatsi.

<sup>21</sup>Nexata Jesús pijimonae barai xua muxu jei:

—Metha matapainya payaputaename xua apara jopa yabara paca tsipae-bichi pan. Apara jame paca tsipae-batsi xua jopa bewa pajume cowuntsim tsane fariseomonae iru Herodes pia pecuidubiwan tatsi, jei Jesús.

### **Meje yabara poxonae Jesús itacuere wunaeta pon peitata nacütsin Betsaida tomaratha**

<sup>22</sup>Jesús pijimonae baru botouna jeratha Betsaida tomaratha. Barapo tomarapiwi jiwana carendena pon peitata nacütsin, Jesús pia xantha tatsi. Barapomonae Jesús wucatsi, xua bapon pemata jayabinexatsi xuano xua axaibi peexanaenexatsi. <sup>23</sup>Jesús cobe pita pon peitata nacütsin. Bapon cobe capoinchi aisowa beya xua tomara weya. Bapoxonae Jesús naone sutaba bapon peitamaiqueitobetha, itacuere jayabano. Jesús bapon yainyaba jeye:

—¿Bara caitacüpa xua netaewa? jei Jesús.

<sup>24</sup>Bapon necotaxuba, bapoxonae Jesús jume notatsi, jeye:

—Pebíwi tan, daichitha itanonojan. Jiwí saya be naewan jinompa, jei bapon.

<sup>25</sup>Equeicha Jesús pecobetha itamaiquei jayaba nantiyabe. Barapo pebin daunweya naitata babatsiya tane. Bapoxonae itamaiquei xanepana. Bapon bara beta matapainya wunaeta tane. <sup>26</sup>Jesús itorobiya jeye bapon xua penawiyaenexa pia bo beya:

—Jopa tomaratha ponaeinde xua jopa baxua taneyabara cueicueijeinexa jiwítha, jei Jesús.

### **Meje yabara poxonae Pedro namchi Jesustha jeye: “Xam apara Mesías pon Nacom caitorobica”, jei**

*(Mt 16.13-20; Lc 9.18-21)*

<sup>27</sup>Bapoxonae Jesús, iru pijimonae tatsi pata tsiqui tomaraxitha, po tomaraxi pewñ Cesarea de Filipino. Poxonae namtotha cataunxuae enapona, bapoxonae Jesús pijimonae yainyaba, jeye:

—¿Eta jiwí neyabara jei po coyene xua xan bapon aparan? jei Jesús.

<sup>28</sup> Barapomonae Jesús jume notatsi, jeye:

—Ichamonae cayabara jei: ‘Apara bapon Juan, pon jiwi Pebautisabin pon equeicha petupaein asu juina’, jei. Iru ichamonae cayabara jei: ‘Apara bapon Elías, pon equeicha petupaein asu juina’, jei. Iru ichamonae cayabara jei: ‘Apara bapon jiwana, pomonae Nacom peitorobi jume pepaebiwi’, jei, jei Jesús pijimonae tatsi.

<sup>29</sup> Bapoxonae Jesús pijimonae yainyaba, jeye:

—¿Incane iru paxamdu? ¿Eta paneyabara jumichimdu xua xan eta pondun? jei Jesús.

Bapoxonae Pedro, Jesús jume notatsi, jeye:

—Xam apara Mesías, pon Nacom caitorobica, jei Pedro.

<sup>30</sup> Jesús pijimonae muxu barai xua pijimonae jopa peyabara paebinxatsi ichamonaetha baxua.

**Meje yabara poxonae Jesús  
nayabara diwesi paeba po  
coyene xua petupaewa tsane**

*(Mt 16.21-28; Lc 9.22-27)*

<sup>31</sup> Bapoxonae Jesús tamropata pitaba xua pijimonae tsipaeba pocotsi coyene xua Jesús cana exanaeinchi ichamonae, Jesús jeye: “Xan ponxaein Nacom Tananeitapetsin jiwi bichocono neperaxa jubina. Matautano pitiri jiwi, iruru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyene tatsi, daxita barapomonae neitawetsina. Matautano barapomonae nebexubina. Ichitha equeicha asu poponaein poxonae acoibi po maticabiyobe tsuxubi tsane”, jei Jesús.

<sup>32</sup> Baxua Jesús pijimonae wunaeya muxu tsipaeba xua barapomonae bara xaniwaicha peyaputaenexa. Bapoxonae Pedro, Jesús compa aisowa bebaru

poinyatsi, Pedro Jesús jume daunweya tsipaebatsi xua Jesús jopa pepaebinexa baxua. <sup>33</sup> Jesús pijimonae napatomeicha necota. Bapoxonae jume daunweya jeye Pedrotha:

—¿Xam be pon caurimonae pia pentacaponaein tatsim! Bara newepu ponare, tsipei xam jopa beta nanta xeinaem icha be jopa Nacom ichim poxonae xua beta nanta xeina. Saya xam nanta xeiname icha jiwi ichi poxonae nanta xeina, jei Jesús.

<sup>34</sup> Bapoxonae Jesús waba pin bicheito, matautano wabano pijimonae, yawa jeye daxita barapomonaetha:

—Icha pebin ichichipa xua tajiwimonae jiwanapin penaexanaewa tsane, bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae pocotsiwa itoroban, bequein bara bapon bexotsi ichamonae, tajiwimonae jitonxae. <sup>35</sup> Pon naantobeya nata exana pocotsiwa bapon ichichipa, bapon jopa xeinaeyo peajuntuyapuswa, po peajuntuyapuswa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae xuano xua pecueicueijeixae Nacom Pejume Diwesi, bapon xeinaena peajuntuyapuswa, po peajuntuyapuswa ataya tsiteca xua Nacom pia nacua beicha. <sup>36</sup> Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyeneswa po peajuntucoyeneswa ataya tsiteca, bapoxonae bapon jopa itacupaetsi xua penajuntu coyene capanepaewa xua peweraweracaewa tsane. <sup>37</sup> Tsipei pebin jopa itacupaetsi xua barapo copeitha Nacom pematomatsiwatsi, xua bapon pecatsinexa tsainchi peajuntucoyeneswa xua barapoxonae pepatopaewa tsane Nacom pia nacua

beicha tatsi. <sup>38</sup>Icha ichun neacaura, yawa nejume diwesi acaurano jiwi peitabaratha tatsi, pomonaetha pomonae jopa tana nejume cowuntsi jiwi, pomonaethano pomonae bichocono abe peexanaewi, xan xuya barichin tsane. Xan ponxaein Nacom Tananeitapetsin, bapon xuya acauran tsane. Baxua exanaein poxonae patopaetsicaein be jiwi pia Pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús.

**9** Barichino Jesús jeye:

—Bara xaniwaicha paca tsipae-batsi xua pomonae xote umene barapomonae jiwana abu copiya matha yabara yaputaena xua po coyene Nacom waba jiwi xua petanaexanaenexatsi piamonae pomonae itorobiya taewatsixae taayapusuwatha. Bapoxonae barapomonae werapaena, jei Jesús.

**Meje yabara poxonae Jesús  
pijimonae peitutha pexeinya  
itupanae coicha tsanaya naexana**

(Mt 17.1-13; Lc 9.28-36)

<sup>2</sup>Poxonae seis po matabibe jopa, xua Jesús paeba baxua bapoxonae pirapae Jesús baru pona Pedro, iru Santiago iru Juan. Barapoyobe Jesús compa baru pona demxuwatheicha po demx-uwa bichocono taucha. Baxoteicha barapoyobe peitutha tatsi, Jesús pexeinya itupanae coicha tsanaya. <sup>3</sup>Pocotsiwa Jesús pia penama xatatsiwa bichocono daedaena, yawa bichocono inyapana, beyacaincha poxonae jiwi bichocono paparuwa matanaca xua inyapana exana. <sup>4</sup>Bapoxonae Pedro, iru Santiago iru Juan Elías taerucupatsi, iru Moisés ponbe caena bayatha naxubabe. Baponbe Jesús baru cueicueijeichibe. <sup>5</sup>Bapoxonae Pedro namchi, jeye Jesustha:

—Pon jiwi Necuidubim maisa wunaexua xote pata umenaewa. Pacata acab-inchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

<sup>6</sup>Pedro baxua paeba, bequein jopa yaputaeyo pocotsiwa yabara cueicueijeji, tsipei poxoru saya barapomonae bichocono pijunuwi. <sup>7</sup>Bapoxonae daxita barapomonae pia xainya bematawacaicha taruneicatsi tsaquinaebowa. Barapo tsaquinaebowatha pejume jume tane, xua Nacom Jesús yabara cueicueijeichi, jeye: “Bapon apara Taxanto pon bichocono antobein pon itapetan. Bapon beta pajume taema pocotsiwa paca tsipaeba”, jei Nacom.

<sup>8</sup>Barapoxonae caena nainya poxonae necobarucupa barapomonae, baponbe jopa taetsi, meisa saya Jesús compa uncua. <sup>9</sup>Poxonae Jesús pijimonae baru juinca demxuwa wetsica, bapoxonae Jesús tsipaeba barapo acoibi poyobe, jeye: “Ichamonaetha jopa yabara patsipaebinde pocotsiwa xuaunxuae pataneme xua tapaca catsita exanaewatsi. Jopa payabara paebinde beya abu poxonae equeicha asun poponaein tatupae coyene weya, xan ponxaein Nacom Tananeitapetsin”, jei Jesús. <sup>10</sup>Daxota barapoyobe jopa yabara paebiyo ichamonaetha xua tane. Saya barapoyobe pia coutha namicha natsipaebabe najeibe: “¿Eta xua metha baraxuara xua Jesús paeba xua pinae petupae coyene weya asu tsane?” najeibe. <sup>11</sup>Barapoxonae barapo acoibi poyobe Jesús yainyabatsi, jeibe:

—Pomonae jiwi pecuidubiwi Moisés pia peitorobi coyene tatsi, ¿eta xua metha bapomonae paeba xua pinae bewa copiya patopaena Elías, xua pinae beya poxonae patopaena Mesías? jei barapoyobe.

<sup>12</sup>Jesús barapoyobe jume notatsi, jeye:

—Bara xainyei, Nacom Pejume Diwesitha paeba xua pon be Elías copiya netsiwana patopaena. Matautano paeba xua bapon cana nantũ coyene weta exanaena jiwi pia juntũ coyenewantha xua jiwi pejume cowũntsinexa Nacom. Matautano barapo Nacom Pejume Diwesitha paeba xua xan ponxaein Nacom Tananeitapetsin ichamona neperaxa jubina. Matautano bichocono abeya neyabara paebina. <sup>13</sup>Ichitha nama xan paca tsipaebatsi xua pon be Elías bayatha apara patopa. Bapontha abeya cana exanatsi ichamona, icha be pocotsiwa barapomona ichichipa xua bapon pecana exanaewatsi. Bayatha baxua Nacom Pejume Diwesitha peyabara tsiwuna muxu dutsixae, jei Jesús.

**Meje yabara poxona Jesús cauri taitaweta xua pewowin xeina**

(Mt 17.14-21; Lc 9.37-43)

<sup>14</sup>Bapoxona pirapaeyo barapo acoibi poyobe Jesús barũ nawiya ichaxota ichamona pijimona tatsi tajinompatsi. Bapoxona barapomona tane xua Jesús pijimona tatsi pomona baxota petajinompawixaetsi barũ nacaetutatsi pin bicheito. Iru baxota naena pomona jiwi pecuidubiwi Moisés pia peitorobi coyene tatsi. Barapo pecuidubiwi Jesús pijimona tatsi jume matsontsonobatsi.

<sup>15</sup>Barapo pin bicheito najuntũ coyene nabenaeca poxona Jesús taerucupatsi. Bapoxona barapo pin bicheito caena nainya Jesús pexainya betacuinaeyiyatsi xua Jesús pejacobinexatsi. <sup>16</sup>Bapoxona Jesús yainyaba barapo pin bicheito, jeye:

—¿Eta pocotsiwa metha tajiwimona pajume matsontsonobame? jei Jesús.

<sup>17</sup>Caen pon uncua baxota, bapon Jesús jume notatsi, jeye:

—Pon jiwi Pecuidubim, xote nexantha cata caponatsi taxanto. Bapon taxanto cauri xeina, xua daxota inta muxusipana exanatsi. <sup>18</sup>Poxona taxanto taibatsi cauri, inta iratha bebai tsaibichi. Bapoxona inta coibo thamthamei exaneibatsi. Matautano inta nawano xane exanatsi. Daxota inta cuenecuenona. Bequein wũcan jinyamona, janje: ‘Painta taxanto taitawere cauri’, jan, daichitha jopa itacupaetsi xua inta taxanto petaitawetsinexatsi cauri, jei bapon.

<sup>19</sup>Bapoxona Jesús anaya barai pijimona, jeye:

—¡Paxam barapomona pam, pomona jopa xapain cataunxua pana nejume cowũntsim! ¿Eta po weibe nantawenonan xua bewa tapaca barũ ecaewatsi tsainchi xua beya poxona tapana nejume cowũntsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Pon cauri xeina painta barũ awena, jei Jesús.

<sup>20</sup>Bapoxona Jesús pexantha tacapoinchi barapo pewowin. Poxona Jesús tainchi cauri, bapoxona pewowin naichababa exanatsi. Barapo pewowin bapoxona iratha xotsi. Yawa iratha natorenababa exanatsi. Yawa coibo thamthamei exanatsi. <sup>21</sup>Pexuyo paxa tatsi, Jesús yainyaba, jeye:

—¿Eta po weiyobe barapo pewowin xeina baxua xua cauri xeina? jei.

Barapon Jesús jume notatsi, jeye:

—Caena bayatha baxua xeina poxona pexuyo tsecae. <sup>22</sup>Matowa cauri inta taxanto isototha bebai tsaibichi. Matautano inta mentha bebai tsaibichi pebexubinexatsi. Icha caitacupa xua nexanaewa tsane baxua, pana yabara najuntũ coyene xeinare jinya tapana neyawenaenexam tsane, jei pexuyo paxa tatsi.

<sup>23</sup>Jesús jume nota bapon, jeye:

—¿Eta pocotsiwa metha barapo jumetha netsipaebame xua tana neitacupaewa yabara? Tsipei ponba jume cowanta bara Nacom yawena xua peitacupaewatsi xua daxitantha beta cana exana, jei Jesús.

<sup>24</sup> Bapoxonae pexuyo paxa tatsi jume daunweya wawaya jeye:

—Bara cajume cowantatsi. Neyawende xua equeicha bichocono matowa tacajume cowantsinexa tsainchi, jei pexuyo paxa tatsi.

<sup>25</sup> Poxonae Jesús tane xua pin bicheito imoxoyo nacaetutapona, bapoxonae Jesús itaweta cauri, jeye:

—Xam caurim pom muxusipana exaname jiwi, bara caitawetatsi. Bara xubiriware barapo pewowin. Equeicha bapana jopa caewa patopaeinde bapontha, jei Jesús.

<sup>26</sup> Bapoxonae cauri pewowin papai exanatsi. Yawano naichababa exanatsi. Barapo cauri pewowin cuenta poinchi, barapoxonae barapo pewowin be petupaeyo boca iratha. Daxota daxita barapo pin bicheito paeba xua pinae barapo pewowin apara tupa. <sup>27</sup> Barapo pewowin Jesús cobe pita, yawano asiya cuaranota. Bapoxonae barapo pewowin nantacotuncuataba.

<sup>28</sup> Bapoxonae Jesús joniya botha. Jesús pijimonae compa seicaya tsipaebatsi, jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei barapomonae.

<sup>29</sup> Jesús pijimonae jume nota, jeye:

—Barapocotsimonae caurimonae paca itacupa xua painya neitawetsiwa saya meisa poxonae memecabiya matowa pawucame Nacomtha, jei Jesús.

### **Meje yabara poxonae equeicha Jesús nayabara paeba xua poxonae tupaena**

(Mt 17.22-23; Lc 9.43-45)

<sup>30</sup> Poxonae Jesús, iru pijimonae tatsi bara weya pona, bapoxonae Galilea nacua iya pona. Bapon jopa beyaputaetsi xua ichaxota ponaena, xua ichamonae yaputaena. <sup>31</sup> Baxua Jesús exana, tsipei pijimonae cuiduba. Jesús barai pijimonae xua nayabara paeba, jeye:

—Xan ponxaein Nacom Tananeitapetsin jiwi necaenaetsina ichamonaetha. Yawano nebexubina. Ichitha poxonae acoibi po matabibibe yapucaewina, bapoxonae equeicha asu poponaein, jei Jesús.

<sup>32</sup> Ichitha barapomonae pomonae Jesús pijimonae jopa jume yaputaetsi xua Jesús yabara paeba. Matautano barapomonae junuwa xua Jesús peyabara yainyabiwa tsainchi barapo jume.

### **Meje yabara poxonae Jesús yabara yainyabatsi pijimonae xua pon peainya cui peexanaeinchi**

(Mt 18.1-5; Lc 9.46-48)

<sup>33</sup> Jesús pijimonae baru patopa Capernaum tomaratha. Poxonae Jesús pijimonae botha baru patopa, bapoxonae pijimonae yainyaba, jeye:

—¿Eta xua namtotha pana najume matsontsonobaponame? jei Jesús.

<sup>34</sup> Barapomonae saya moya umena peuraxae, tsipei namtotha najume matsontsonobapona xua po coyene metha jintam ainya cui peexanaewatsi tsainchi pon barapomonae jiwanaxae. <sup>35</sup> Nextata poxonae Jesús eca, bapoxonae pijimonae waba, pomonae doce poyobe, yawa jeye:

—Pon ichichipa xua ichamonae ainya cui petsita naexanaewatsi, bapon bewa pia coutha pecui pawi jiton naexanae petanacuichinexa ichamonae, jei Jesús.

<sup>36</sup> Bapoxonae Jesús pita pexuyo, yawa pijimonae tatsi peitabarayo deca tatsi tacuaranoreca. Jesús isaeca barapo pexuyo, jeye:

<sup>37</sup> —Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo, apara bara iru matenta weyataeya wabatsi pon tana neitorobixae xua pon bara Nacom, jei Jesús.

**Meje yabara poxonae Jesús barai pijimonae: “Pon jopa nacata abe exanaeyo, bapon ba apara naca yawena”, jei**

*(Mt 10.42; Lc 9.49-50)*

<sup>38</sup> Nexata Juan namchi Jesustha, jeye:

—Ja Tanecuidubim, paxan caein patan pon cawun taiba poxonae itaweta caurimonae, xua caurimonae itawetatsi. Paxan baxua pacui itawetan, tsipei jopa naca puna poponaeyo, jei Juan.

<sup>39</sup> Ichitha Jesús Juan jume notatsi, jeye:

—Bapon baxua jopa pacui itawetsinde, tsipei dapon aibi pon pexeinya petsita itatsi coyenewan exana poxonae newun taiba xua bapoxonae cotacaya abeya neyabara paeba. <sup>40</sup> Tsipei pon abe jopa nacata exanaeyo, bapon apara naca yawena.

<sup>41</sup> Pon paca yawena xua mera paca cata xua bequein tsica corotiyotha xua iru pejume cowuntsixae, xua xan Criston tajiwimonae pamxaem, baxua peexanaexae, Nacom catsina bapontha pematomatsiwa baxua nexa, jei Jesús.

**Meje yabara poxonae Jesús paeba xua jiton jopa bewa cana exanae ichuntha xua iru abe peexanaewa tsane**

*(Mt 18.6-9; Lc 17.1-2)*

<sup>42</sup> Equeicha Jesús namchi, jeye: “Nacom tsitatsi xua pebin bichocono abe exana poxonae natsicuenta ichun cana exanatsi xua abe peexanae cuiuru coyene exana, po barapo ichun pon cataunxuae aena tana nejume cowuntsixae. Metha jame wuna tsipae xua barapo pebin pon abeya cana exanaeya taexana ichuntha, barapon pin iboto wisi cutsipatsi yawa xua tuwutha xua pin mar menetha barapo ibototha cayawa cabutabachipatsino. <sup>43-44</sup> Icha painya cobe paca exana xua abe painya neexanaewa tsane, maisa panacobe ucubobare. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaya xanepana beyacaincha xua ainya cobebe painya necayawa bebaiwa tsane ichaxota po nacuatha isoto jopa itacounayiyo, xua ataya tsiteca. <sup>45-46</sup> Matautano icha painya taxu paca exana xua abe painya neexanaewa tsane, maisa panataxu ucubobare. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebaiwa tsane ichaxota po nacuatha isoto jopa itacounayiyo xua ataya tsiteca. <sup>47</sup> Matautano icha pocotsiwa pataneme painya itamaiqueitha xua icha baxua paca exana xua abe painya neexanaewa tsane, painya netaexae painya itamaiqueitha, maisa pana naitacuere juquare. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia peitorobi nacua



beicha tatsi. Baxua jame yatsicaewa xanepana, beyacaincha xua poxonae ainya itamaiqueitobe painya necayawa bebaiwa tsane ichaxota isoto jopa itacounayiyo. <sup>48</sup>Barapo nacuatha isoto jopa itacounayiyo xua ataya tsiteca yawa oro jopa tupaeyo.

<sup>49</sup>“Tsipei daxita jiwi pia pejuntũ coyenein tatsi nacui wũanaetsina Nacom nexa pocotsi coyenewantha xua jiwi taayapubetsi bichocono xua jiwi atene exanatsi pocotsiwa icha be isoto ichi. Matautano daxita pocotsiwan jiwi tauta xua petuxusi exanaewa Nacomtha, barapocotsiwa copiya yawa muxuna nacui xaxainchina sare beno. <sup>50</sup>Sare beno, bara bena wũanae. Ichitha icha barapo sare beno jopa abenataeyo bapoxonae jopa peitacupaewatsi xua equeicha peabenataewa. Bara paichinde poxonae icha be sare beno ichi. Paxeinare pocotsi coyene pexeinya juntũ coyene xua jopa po juntũ coyene abeyo. Matautano juntema nantiya pana nabaru jinompare”, jei Jesús.

**Meje yabara poxonae Jesús cuiduba xua jiwi piseurixi pepunapenteibiyainwa**

*(Mt 19.1-12; Lc 16.18)*

**10** Jesús ponataba Capernaum tomara weya. Bapoxonae Judea nacuatha patopa. Yawa patopa Jordán mene iya icha muxunenetha, po muxunene xua Judea nacua weya. Baxotiya equeicha jiwi pin bicheitomonae nacaetuta ichaxota Jesús uncua. Equeicha Jesús cuiduba barapomonaetha, tsipei pia cui xua cuidubeiba. <sup>2</sup>Bapoxonae ichamonae fariseomonae, barapomonae piraichi Jesús imoxoyo caquita umenarucupatsi xua Jesús pejuntũ cui coyene jujutsinexatsi, daxota jeye:

—¿Metha bara Moisés copata jampa xua pebin pepunaxubiwa piowa icha saya metha ichichipa jampa? jei.

<sup>3</sup>Jesús jume epa pita barapomonae, jeye:

—¿Eta xua bapon Moisés paca itoroba? jei.

<sup>4</sup>Barapomonae Jesús jume notatsi, jeye:

—Moisés copata xua jiton itacupatsi xua pecatsiwa papera piseuri, po pperatha tina xua pexubiwa tsane piseuri. Bara bapoxonae bapon xubina piseuri, jei barapomonae.

<sup>5</sup>Bapoxonae Jesús jume nota barapomonaetha, jeye:

—Moisés paca cata barapo peitorobi coyenewa, tsipei paxam jopa bepajume cowũntsim painya juntũ coyenewatha.

<sup>6</sup>Tsipei poxonae Nacom aena forota daxita, pejume diwesitha jeye: ‘Nacom exana pebin, matautano exana yabũyo’, jei. <sup>7</sup>Equeicha Nacom jeye: ‘Daxota pebin paxa wepu natsata, yawa pena wepu natsata xua piowabe imoxoyo penaperũ nacoyobinexabe. <sup>8</sup>Baraponbe be cae jiwimonae naexanabe’, jei. Bapoxonae baponbe xua ainya jiwibe aibi, bara be caein naexanabe. <sup>9</sup>Daxota pebin bapana jopa bewa punaxubi piowa. Tsipei apara bayatha Nacom cana exana xua bara be caein naexanabe, jei Jesús.

<sup>10</sup>Poxonae Jesús, irũ pijimonae tatsi botha jinompa, bapoxonae Jesús pijimonae yabara yainyabatsi baxua.

<sup>11</sup>Bapoxonae Jesús jume epa pita, jeye:

—Pon punaxuba piowa, yawa ichowa pita, bapon abe exana piseuritha yawa Nacom peitũtha tatsi, tsipei Nacom tsi-tatsi xua powa copiya baru popona, apara bara piowa tatsi. <sup>12</sup>Barichi icha petsiriwa punaxuba pia pebin, yawa pita icha pebin, bapoxonae bapowa abe exana pia pebintha, yawa Nacom peitũtha tatsi, tsipei Nacom tsitatsi xua pon

copiya xeina, apara bara pia pebin tatsi, jei Jesús.

**Meje yabara poxonae Jesús jeye pexuitha: “Barabũ Nacom beta paca yawenaena”, jei**

*(Mt 19.13-15; Lc 18.15-17)*

<sup>13</sup>Nexata jiwí Jesús pexuí tacaponatsi xua Jesús pejayabinexa pecobetha, yawa xua Nacomtha pewucaenexa barapo pexuí nexa xua pejeinexa: “Barabũ Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonaе cui matawentatsi pomonaе pexuí carendena tsaibi. <sup>14</sup>Poxonae Jesús baxua jume tane, jopa ichipaeyo pocotsiwa pijimonae tatsi paeba, daxota anaya jeye:

—Bara pacopabare pexuí xua tana itata patsinexa. Jopa pexuí paitawetsinde, tsipei Nacom pia peitorobi nacua tatsi saya meisa barapomonaе nexa pomonaе pejũntũ coyene xanepanaewi icha pexuí ichi. Pexuí pia cui xua tayapu xanepanatsi xua pia jũntũ coyeneintha jume cowũnta Nacom. <sup>15</sup>Bara xainyeya paca tsipaebatsi. Pon jopa yabara jume cowũntsiyo xua icha be jopa pexuí ichiyo xua ba pexuí tayapu xanepanatsi xua jume cowũnta, bapon bapana jopa naexanae tsane Nacom pijimonae tatsi pomonaе Nacom itorobiya ewata, jei Jesús.

<sup>16</sup>Bapoxonae Jesús tsana tamropata nonotapona pexuí, yawa pecobetha pexuí jayabiya tawucatsi Nacom. Jeye: “Barabũ Nacom beta yawenaena barapo pexuí”, jei.

**Meje yabara poxonae pewowin pon copei pexeinaein Jesús tsipaebatsi**

*(Mt 19.16-30; Lc 18.18-30)*

<sup>17</sup>Poxonae Jesús aena warapa, bapoxonaе pebin Jesús pia xainya betacuinaerenatsi. Bapon pentabocototha uncua Jesús peitabaratha tatsi, xua pebarũ xua itura jinaenexatsi Jesús, tsipei Jesús pon peainya cuin. Bapon jeye Jesththa:

—Ja Tanecuidubim, maisa nejũntũ coyene xanepanaem. ¿Eta xua copiya matha exanocuaein xua ajũntũyapusya tapoponaewa tsane xua ataya tsane? jei bapon.

<sup>18</sup>Bapoxonae Jesús jume nota, jeye:

—¿Eta xua nebaram: ‘Nejũntũ coyene xanepanaem’, jam? Apara ichũn dapon aibi pon pejũntũ coyene xanepanaein. Jame meisa apara bapon Nacom compa pejũntũ coyene xanepanaein. <sup>19</sup>Xam bara yaputaneme po coyene Moisés pia peitorobi coyenewatha itoroba, xua jeye: ‘Jopa ichũn bexubinde. Jopa ichowa pichinde ichũn piowa tatsi. Jopa caibinde ichũn piawan tatsi. Jopa naerabiya cayabara paebinde pocotsiwa ichamonae exana. Jopa ichamonae yabara muxujainyabinde xua caibame. Axatha barũ jume cui itura jinare. Matautano enatha barũ jume cui itura jinare’, jei Moisés, jei Jesús.

<sup>20</sup>Pewowin Jesús jume baraichi, jeye:

—Pon jiwí Necuidubim, daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon, jei bapon.

<sup>21</sup>Jesús antobeya necota bapontha, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonaе

peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajuntana botsiwa pocotsiwa bichocono wūnae, jei Jesús.

<sup>22</sup> Poxonae barapo pewowin baxua jume taeba, bichocono nantanuweya pontaba, tsipei bichocono copei pexeinaein.

<sup>23</sup> Bapoxonae Jesús necota jiwi, yawa jeye pijimonaetha:

—¡Maisa bichocono ayapubecai xua copei pexeinaewi naexana Nacom pijimonaetha tatsi jiwana pomonae itorobiya canamataxeina! Tsipei barapomonae bichocono antasiwayatane barapo pia copei, beyacaincha xua Nacom antobetsi, jei Jesús.

<sup>24</sup> Jesús pijimonaetha tatsi yabara najuntũ coyene cabenaeca pocotsiwa xua Jesús paeba. Ichitha Jesús pijimonaetha equeicha tsipaeba, jeye:

—Pomonae tamonaetha pamxaem, ¡maisa bichocono ayapubecai xua pomonae copei pexeinaewi jume cowantsina Nacom! Barapomonae nanta xeina xua pia copeitha nayawena xua daxota jopa canantawenonaeyo xua Nacom pejume cowantsiwatsi.

<sup>25</sup> Bichocono acuiruyapube xua duwein, pon pewun camello xua bapon pejoniyawa acuicheto peetabũ wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaetha tatsi jiwana pomonae itorobiya canamataxeina beyacaincha xua poxonae acuiruyapube xua poxonae camello acuicheto peetabũ wan iya pejoniyawa, jei Jesús.

<sup>26</sup> Poxonae Jesús pijimonaetha jume taerucupatsi xua paeba bapoxonae najuntũ coyene cabenaeca bichocono. Barapomonae caemonaetha nayainyaba, najei:

—Bapoxonae ¿jintam metha nexata itacupatsi xua pecapanepaewa pia coutha? jei barapomonae.

<sup>27</sup> Jesús tane barapomonae, yawa jeye:

—Pebiwi ba jopa itacupaetsi xua baxua exana, saya jame meisa Nacom compa itacupatsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

<sup>28</sup> Nexata Pedro Jesús jume notatsi, jeye:

—Paxan daxita pacuenta ponan pocotsiwa paxeinan pata paca puna ponawatsi tsainchi, jei Pedro.

<sup>29</sup> Jesús Pedro jume notatsi, jeye:

—Bara xainyeya paca tsipaebatsi. Nacom beta cana exanaena daxita pomonae pecuecuijeixae Nacom pia pecapanenebiyae diwesi yawa taneantobexae beyacaincha xua ichamonaetha antobetsi. Nacom beta cana exanaena barapomonae pia bon pecuenta ponaexae inta peexanaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxewi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui yawa pia iran pecuenta ponaexae. <sup>30</sup> Nacom barapomonaetha catsina po irathe pentoma xua cien po cuiyobe tsane.

Barapomonae xeinaena bon, matautano nantauntsina peweichowi, irũ pamchowi tatsi, irũ peniwi tatsi, irũ pia pexui tatsi, yawa iranno. Daxita barapomonaetha tsicotane be barompaya piamonaetha tatsi. Barapo cae pin nacuathe barapomonae peraxa jubinchi taneantobexae, daichitha barapomonae xeinaena Nacom pia peitorobi nacuatheicha peajuntũyapusuwa po peajuntũyapusuwa ataya tsiteca.

<sup>31</sup> Pomonae xua anoxuae, pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawi naexana pomonae jiwi jopa petsita ainya cui jiwichi, po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

**Meje yabara poxonae Jesús  
nayabara paeba acoibi po  
coyenebetha xua poxonae tupaena**

*(Mt 20.17-19; Lc 18.31-34)*

<sup>32</sup> Poxonae Jesús pijimonae cataunxuae namtotha baru ecapona xua Jerusalén tomara beya, Jesús pijimonae tsiwana nantacaponae. Bapoxonae Jesús pijimonae tatsi najuntũ coyene cabenaeca, tsipei Jesús nainya nantacaponae. Iru pomonae Jesús puna poinchi yabara junuwa, tsipei yaputane xua Jesús abe cana exanaeinchi barapo tomarapiwi. Bapoxonae Jesús pijimonae compa waba aisowa beya xua pomonae doce poyobe tatsi. Jesús tamropata pitaba xua tsipaeba pijimonae xua pocotsiwa imoxoyo ichamonae Jesús cana exanaeinchi. <sup>33</sup> Jesús jeye pijimonaetha: “Anoxuae ponaeinchi Jerusalén tomara beya. Baxotiya xan ponxaein Nacom Tananeitapetsin, necaenaetsina ichamonae sacerdotemonae pia pentacaponae witha tatsi, yawa pomonaetha pomonae jiwi pecuidubiwi Moisés pia peitorobi coyene tatsi. Barapomonae itorobina xua nebexubina. Matautano necana cobenatsina pomonaetha pomonae penanapaincha jinompaewi xua pomonae icha nacua werena peponaewi. <sup>34</sup> Barapomonae necui caponaena, yawa necueinchinano. Matautano yawa necana one subabina. Bapoxonae nebexubina. Daichitha

poxonae acoibi po maticabibe weraweracaena equeicha asu poponaein petupae coyene weya”, jei Jesús.

**Meje yabara poxonae Santiago iru  
Juan Jesús yainyabatsibe**

*(Mt 20.20-28)*

<sup>35</sup> Bapoxonae Santiago iru Juan ponbe Zebedeo pexantobe tatsi, baponbe Jesús imoxoyo caquita uncuatabatsibe, jeibe Jesustha:

—Pon jiwi Necuidubim, paichichipan xua painta exanaename pocotsiwa paca wucaeinchi, jei.

<sup>36</sup> Nexata Jesús yainyaba baponbetha, jeye:

—¿Eta pocotsiwa paichichipamebe xua pacata exanaeinchibe? jei.

<sup>37</sup> Baponbe Jesús jume notatsi, jeye:

—Maticabi jopaena, po mataqueitha itorobiya ewatsiname jiwi poxonae ecaename jinyawa xua pexeinya itupanae ecaethopaewatha. Barapo mataqueitha copare xua paxanbe nantiyabe pae caeinbe patawantha xua pexeinya itupanae ecaethopaewatha. Ichun pocotsiwa necoxa weya ecaena. Ichun pocotsiwa netsocona weya ecaena, jeibe baponbe.

<sup>38</sup> Bapoxonae Jesús baraibe baponbetha, jeye:

—Paxambe jopa payaputaembe pocotsiwa pana newucamebe. Poxonae ichamonae abe inta exanaena, xan bara saya copatsin xua barapomonae bara neperaxa jubina. Barichi poxoru paxambe tapana neantobexaembe, ¿bara iru paca itacupabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara tupa neexanaena. Barichi, ¿bara iru paca itacupabe xua pacopatsinamebe xua bara ichamonae tupa paca exanaenabe? jei Jesús.

<sup>39</sup>Barapoyobe jume notabe Jesustha, jeye:

—Aa, bara baxua pana neitacupabe, jeibe.

Jesús jume notabe baponbetha, jeye:

—Bara bara xainyei, barapocotsi coyene ichamonae paca cana exanaenabe. Ichamonae paca peraxa jubinabe. Matautano ichamonae bara tupa paca exanaenabe, icha xan necana ichi tsane. <sup>40</sup>Nama xua xantha nantiya paecamebe xua ichun pocotsiwa tacoxa weya eca, yawa xua ichun tasocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonae caena bayatha tsiwunaeta xua peenaenexa tsane, jei Jesús.

<sup>41</sup>Jesús pijimonae tatsi pomonae umena, pomonae diez poyobe, barapomonae jume tane xua Santiago iru Juan Jesús wucatsibe. Bapoxonae barapo diez poyobe, Santiago iru Juan yabara anaepanarucupatsibe. <sup>42</sup>Ichitha Jesús pia xainya berena pijimonae waba yawa namchiya jeye barapomonaetha:

—Paxam bayatha pataneme po coyenewa ba exana pomonae jopa judiomonae naexanaeyo. Barapomonae ba nantauta pomonae pia nacua tatsi pia petawatsiwichi tatsi. Daichitha barapo nacua peewatsiwi aebiya itoroba piamonae xua daxota bichocono jiwi taayapubetsi. <sup>43</sup>Ichitha nama paxam barapocotsi coyeneya jopa bara paichinde. Seicaya nama icha juntu coyeneyatha paca itorobatsi. Icha pon paxam jiwana, icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina. <sup>44</sup>Matautano pon xua paxam jiwana, icha bapon ichichipa naexana be pocotsin bichocono ainya cui penaexanaein xua beyacaincha ichamonae, bapon matha bewa copiya

daxita paxam beta amanaya pacata nacuichina icha pon pebusi cui taetaeinchi ichi. <sup>45</sup>Icha be pocotsi coyeneya ichin bara paichinde. Xan ponxaein Nacom Tananeitapetsin patopeican xua tanacuichinexa tsane ichamonae nexa. Apra jopa baxua tsipatopaeinyo xua ichamonae inta penacuichiwanexa tsane. Saya patopeican tsipei ichichipan xua daxita carepaya jiwi tayawenaewa tsane. Matautano patopeican xua tatsitupaenexa tsane be pentoma xua daxita jiwi pepanenebiyaenexa abe pia peexanae cuiru coyenein weya tatsi, jei Jesús.

**Meje yabara poxonae Jesús  
axaibi exana pon peitata  
nacutsin, pon pewun Bartimeo**

(Mt 20.29-34; Lc 18.35-43)

<sup>46</sup>Bapoxonae Jesús iru pijimonae tatsi pata Jericó tomaratha. Jesús iru pijimonae tatsi tomara we-iyiya xua iruru pin bicheitomonae napona. Iruru bapoxonae pebin pon pewun Bartimeo, pon Timeo pexanto tatsi, bapon namtotha eca. <sup>47</sup>Poxonae Bartimeo jume tane xua juinya Jesús imoxoyo pona, pon Nazaret tomarapin, bapoxonae bapon Bartimeo tamropata pitaba xua wawaya jeye:

—¡Jesús, David pia pemomoxi susato jiwana, ponxae Nacom necaitapetsim neyabara najuntu coyene xeinare jinya tana neyawenaenexam! jei.

<sup>48</sup>Pinmonae jume matawenta bapontha xua moya peecaenexa. Ichitha bapon equeicha bichocono jume daunweya wawai, jeye:

—¡Jesús, David pia pemomoxi susato jiwana, ponxae Nacom Necaitapetsim neyabara najuntu coyene xeinare jinya tana neyawenaenexam tsane! jei bapon.

<sup>49</sup>Bapoxonae Jesús naruntaba yawa namchi pijimonaetha, jeye:

—Maisa painta wabare, jei Jesús.

Bapoxonae pon peitata nacútsin wabatsi, yawa barapomonae jeye bapontha:

—Bara najántu tsacatabare, jopa amurande. Nontaponare, aunxuae cawaba, jei barapomonae.

<sup>50</sup> Bapoxonae pon peitata nacútsin pia penauyapatsiwa xubiriwa, yawa jirawna. Bapoxonae pona Jesustha.

<sup>51</sup> Jesús yainyaba bapontha, jeye:

—¿Eta xua jinya tacata exanaetsi? jei.

Bapon Jesús jume notatsi, jeye:

—Pon jiwi Pecuidubim, benecótsin cuinaya, jei.

<sup>52</sup> Jesús jume nota bapontha, jeye:

—Bara moya ponde. Bara bayatha caitacuere xanepana exanatsi, tana neyabara jume cowúntsixaemxae xua bara tana neitacupaewa xua tacayawenaewatsi, jei Jesús.

Bapoxonae caena nainya pon peitata nacútsin necotaxuba. Bapoxonae bapon Jesús puna poinchi namtotha.

### Meje yabara poxonae Jesús Jerusalén tomaratha patopa

(Mt 21.1-11; Lc 19.28-40; Jn 12.12-19)

**11** Poxonae Jesús, iru pijimonae tatsi muxu pepatsi Jerusalén tomaratha copiya pata Betfagé tomaratha yawa Betania tomaratha, po tomara xua nacacuita ecabe. Barapo tomarabe cuariya demxuwa eca, po demxuwa pewun Olivowa, xua baxota olivo naein peumenaexae. Bapoxonae Jesús nacueyatabe poyobe itoroba ponbe pijimonae tatsi jiwana. <sup>2</sup> Jesús barai baponbetha, jeye:

—Paponarebe, po tomara painya itabaraya equiya. Poxonae papatopaenamebe barapo tomaratha, bapoxonae pacaxinaenamebe burro pon penun pon pequetanótsin, po burro ichamonae jopa tsijuma enaeyo. Barapo burro paisanaxorebe.

Bapoxonae payama carenandebe.

<sup>3</sup> Icha ichun paca yainyabiya jeye: ‘¿Eta xua payama isanaxubamebe burro?’ paca jei, nexata pajandebe: ‘Pon jiwi Pecanamataxeinaein bepa pata yama cayiyaeinjei tsipei pinae nantawenona. Bexa nainya equeicha payama carenaein’, pajandebe, jei Jesús.

<sup>4</sup> Barapomonae ponarucupa. Yawa caxinarucupa barapo burro pebto, pon quetanota imoxoyo bo coibototha xua aisowa beya namtotha. Bapoxonae barapoyobe yama isanaxubabe barapo burro.

<sup>5</sup> Pomonae baxota jinompa barapomonae baponbe yainyabatsi jeye: —¿Eta xua paexanamebe? ¿Eta xua burro paisanaxubamebe? jeichichibe baponbe.

<sup>6</sup> Bara baraponbe jume notabe barapomonaetha pocotsiwa bayatha Jesús pejume itorobixae. Bara baraponbe tacopatatsibe xua bara peyama isanaxubinxabe. <sup>7</sup> Bapoxonae baponbe tayama cayabe burro Jesús tayama cayatsibe. Bapoxonae pia paparuwan tsijuma jebicabe, yawa Jesús tsijuma equeica. <sup>8</sup> Bapoxonae jiwi pinmonae namtotha yerababa jejebabapoinya pia paparuwan. Ichamonae peaxu po axu be coichaxu axu ucuboba. Barapo axu namtotha jebapoinya xua Jesús ainya cui exanatsi. <sup>9</sup> Pomonae Jesús tsiwana nanta cajinjincatsi, iru pomonae Jesús peputha tajinjincatsi, barapomonae Jesús yabara wawaya jeichichi:

—¡Pai jayana, maisa Jesús pon jiwi itorobiya pia pepa peewatsinchi maisa wunae, bapon patopa Nacom peitorobixae! <sup>10</sup> ¡Bara wunae jaintatsi pon patopeica xua jiwi peitorobinexatsi, icha David ichi pon wamo susatopin poxonae bapon Israel nacua itorobiya ewata! ¡Maisa Nacom bichocono wu-

nae jaintatsi pon athabeicha eca! jei barapomonaе.

<sup>11</sup>Bara bapoxonaе Jesús patopa Jerusalén tomaratha, yawa joniya Nacom pin pia botha tatsi. Jesús naita cui wetaba xua tane daxita pocotsiwa jiwi exana barapo botha. Bapoxonaе equeicha Jesús pijimonaе baru ponataba Betania tomara beya, poyobe xua doce poyobe, tsipei bayatha tabopiya.

**Meje yabara poxonaе Jesús biatane higuera nae xua jopa penacoichixae**

*(Mt 21.18-19)*

<sup>12</sup>Icha matabitha baya, poxonaе Jesús iru pijimonaе tatsi Betania tomara weya pona, Jesús jainpona. <sup>13</sup>Taju weya Jesús tane higuera nae xua noxu tsuncuae. Jesús higuera nae beya pona piyain petaenexa pethei, ichitha saya noxu tane, tsipei cataunxuae dapo dapae aibi po dapaetha higuera nae nacoita. <sup>14</sup>Bapoxonaе Jesús barai higuera nae, jeye:

—Bapana jopa equeicha nacoichim tsane, xua jiwi jopa necathei xaenexa, jei Jesús.

Jesús pijimonaе jume tainchi baxua poxonaе higuera nae barai.

**Meje yabara poxonaе Jesús aisowa benapuna torobabiya Nacom pin pia botha pomonaе pecaenaetsiwi**

*(Mt 21.12-17; Lc 19.45-48; Jn 2.13-22)*

<sup>15</sup>Bapoxonaе pirapaeyo Jesús pijimonaе baru patopa Jerusalén tomaratha. Jesús joniya Nacom pin pia botha tatsi. Bapoxonaе Jesús aisowa benapuna torobabiya barapo Nacom pin pia bo weya pomonaе pecaenaeta jiwi baxota. Jesús tabu tayebiya bebai iratha pocotsiwa pexaethopaewa po pexaethopaewantha nantiya nacatsiba paratixi, yawa xua iruru baxota topibo caenaeta. <sup>16</sup>Jesús jopa copatsiyo xua

jiwi piawan capona Nacom pin pia bo tatsi tutiya iya. <sup>17</sup>Jesús cuiduba barapomonaе, jeye:

—Nacom Pejume Diwesitha jeye: ‘Tabo apara po botha xua daxita nacuanpiwi tanetsipaebinexa tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname, ichaxota pijunuwi nantiyabeibathopa. Tsipei baxota panacaetutame saya u xua painya necaibinexam tsane paratixi pomonaetha pomonaе xua pateiba xua Nacom petsipaеbeibinexatsi, jei Jesús.

<sup>18</sup>Sacerdotemonaе pia pentacaponaeawi tatsi, iruru pomonaе jiwi pecuidubiwi Moisés pia peitorobi coyene tatsi, daxita barapomonaе jume tane xua Jesús paeba. Bapoxonaе barapomonaе tamropata notarucupa xua jeita po coyenewatha Jesús bexubinchi. Barapomonaе bequein ichichipa Jesús bexotsi ichitha baxua jopa exanaeyo tsipei barapomonaе junuwa xua jiwi anaepana xua barapo sacerdotemonaе pia pentacaponaеawi tatsi pecasebiwatsi irano xua pecasebiwatsi pomonaе jiwi pecuidubiwi Moisés pia peitorobi coyene. Tsipei barapomonaе jiwi cunuwatsi, xua daxita jiwi peichichipaexae nawita pocotsiwa Jesús cuiduba. <sup>19</sup>Poxonaе xometo iriya ecanaicha bapoxonaе Jesús pijimonaе baru ponataba barapo tomara weya.

**Meje yabara poxonaе higuera nae yununcua**

*(Mt 21.20-22)*

<sup>20</sup>Baya poxonaе pentha tsina, Jesús pijimonaе baxoyo baru ecapona yawa tane xua higuera nae yununcua xua daxita petabaca opina wetsina. <sup>21</sup>Bapoxonaе Pedro yabara nanta xeinataba xua mexuae Jesús biatane higuera nae. Bapoxonaе jeye Jesustha:

—Pon jiwi Necuidubim, taema po higuera nae mexuae biataneme, bayatha yũnuncua, jei Pedro.

<sup>22</sup> Bapoxonae Jesús jeye pijimonaetha:

—Paxam bichocono pajume cowũnde Nacom. <sup>23</sup> Bara xainyeya paca tsipaebatsi. Icha xanepanaeya pana neyabara jume cowũtame xua Nacom painya nepaca cayawenaewa xuano xua jopa ainya unthũton paxeinaem, bara paca itacupaena xua painya nepaebiwa icha ichin xua cana exanan higuera nae. Matautano bara paca itacupaena xua painya nejeiwa uruto beya, xua pajam: ‘Uruto, natsixitabare, mar mene beya jopare’, xua painya nejeiwa. Bapoxonae bara baxua jopa bayathiyo tsane. <sup>24</sup> Daxita xua xuan pocotsiwan Nacom beya pawũcame, icha bara xanepanaeya pajume cowũntsiya wũcame, bara Nacom paca catsibina baxuan. <sup>25</sup> Poxonae Nacomtha patsipaebame, icha ichun abe pacata exana, copiya payabara jũntemainare bapon pocotsiwa pacata abe exana, xua xuya beta painya necayabara canantaxeinaenexa. Barichi Nacom pon peitabocotha eca xuya paca yabara jũntemainaena pocotsiwa abe painya neexanae cuiru coyenein paexaname. <sup>26</sup> Ichitha icha jopa payabara jũntemainaem ichun pocotsiwa pacata abe exana, barichi Nacom pon itabocotha eca, jopa paca yabara jũntemaina tsane pocotsiwa abe painya neexanae cuiru coyenein paexaname, jei Jesús.

**Meje yabara xua Jesús pia peitorobi coyenewa xeina**

(Mt 21.23-27; Lc 20.1-8)

<sup>27</sup> Bapoxonae Jesús, iru pijimonaetha tatsi caibe nawibiya Jerusalén tomara beya. Poxonae Jesús Nacom pin pia botha joniya xua yawa tututha iya ponano, bapoxonae sacerdotemonae

pia pentacaponae tatsi, iru pomonae jiwi pecuidubiwi Moisés pia peitorobi coyene tatsi iru pitiri jiwi, barapomonae Jesús imoxoyo caquita umenarucupatsi. <sup>28</sup> Barapomonae Jesús yainyabatsi, jeichichi:

—¿Eta po peayapusũ itorobi coyenewatha cuidubame baxuan? ¿Jintam cacata barapo peayapusũ itorobi coyenewa? jei barapomonae.

<sup>29</sup> Jesús jume nota barapomonae, jeye:

—Xan irurũ tha barichichi paca yainyabinchi. Icha beta pana nejume notsiname, bapoxonae xuya yabara paca tsipaebinchi xua po peayapusũ itorobi coyenyatha exanan baxuan. <sup>30</sup> ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús.

<sup>31</sup> Nexata daxita barapomonae caemonae najume matsontsonoba, najei: “¿Eta xua metha jei tsainchi? Icha jeichipaetsi: ‘Juan cui itorobatsi Nacom, xua pebautisabiwa jiwi’, metha naca jeichipae: ‘¿Eta xua metha nexata jopa pajume cowũntsim Juan?’ metha naca jeichipae Jesús. <sup>32</sup> Jiwi cui cunuwinchi icha jei tsainchi: ‘Juan cui itorobatsi jiwi, xua bautisaba’, icha jei tsainchi. Metha bapoxonae jiwi naca casebichipa anaya”, najei barapomonae. Barapomonae jiwi cunuwatsi tsipei daxita jiwi Juan yabara jume cowũntatsi, xua apara bapon Nacom pia peitorobi jume tatsi pepaebi jiton. <sup>33</sup> Bapoxonae barapomonae namchi Jesús beya, jeye:

—Canta jopa payaputaeyino, jei barapomonae.

Nexata Jesús barai barapomonaetha, jeye:

—Nexata barichin tsane jopa yabara paca tsipaebi tsainchi po peayapusũ



itorobi coyeneyatha exanan xua daxita taexanaewan, jei Jesús.

**Meje yabara poxonae Jesús paeba pecayabara juta pepaebi diwesiyo pomonaе xua abe exana, pomonaе petayapucaenaewi uva pabi**

*(Mt 21.33-46; Lc 20.9-19)*

**12** Bapoxonaе Jesús tamropata pitaba xua cuiduba jiwitha pecayabara juta pepaebi diwesiyotha, jeye: “Matha iruru pebin pin uva pabi xeina. Bapon ura po unbo pewun uva cuei unbo. Yawa yapucurata barapo pia uva pabi ibowantha xua jopa pejojondenaenexa ichamonaе barapo pabitha. Yawano baxota ibo feto exana, xua barapo ibo fetotha pecubinexa uva cuei. Matautano baxota exananota bo, po bo bichocono taucha xua baxota pebin bara wenecotequeica uva pabi. Bapoxonaе bapon itoroba pomonaе pia uva pabi pia petayapucaenaewichi tsainchi, xua bapoxonaе barapomonaе pejiwanaxaenexa pocotsiwa penawetsiwa. Bapoxonaе bapon icha nacua beya pona. <sup>2</sup>Barapo matacabi tsuxubi, po matacabitha uva cuei naweta. Bapoxonaе barapo mataqueitha pomonaе pabi petayapucaenaewi jiwana itapeta nota xua penawetsiwa. Bapoxonaе pon uva pabi pexeinaein, bapon pomonaе petanacuichiwichi jiwana itoroba, xua petawucaenexa tsainchi uva cuei pomonaе beya pomonaе pabi petayapucaenaewichi. <sup>3</sup>Ichitha barapomonaе pomonaе uva pabi petayapucaenaewi barapomonaе waetaba pon copiya patopa, pon uva pabi pexeinaein itoroba. Yawa bapon butsi. Bapoxonaе bapon caibe cobesa itorobiyatsi. <sup>4</sup>Pon uva pabi pexeinaein equeicha itoroba ichun pon pia petanacuichinchi. Barichiru bapon ibotontha matasipa cuinbabatsi, yawa abe jumetha biatainchi. <sup>5</sup>Equeicha

pon uva pabi pexeinaein itoroba ichun pon pia petanacuichinchi. Barichiru bapon bexotsiru. Equeicha ichamonaе itorobatsi. Ichamonaе butsi, iru ichamonaе jutebatsi.

<sup>6</sup>“Cataunxuae awiya bapon pexanto tanacopatatsi, pon pexanto compa tatsi, po pexanto bichocono antobe. Matapainya bapon pexanto cotacaya itoroba bara beya. Bapon nanta xeinaeya jeye: ‘Metha barapomonaе taxanto inta yabara baru cui itura jinaeinchi’, jei coxiyun. <sup>7</sup>Dapo jumetha pomonaе uva pabi petayapucaenaewi poxonaе bapon tainchi, barapomonaе najei: ‘Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi’, najei barapomonaе. <sup>8</sup>Bapoxonaе barapomonaе pon uva pabi pexeinaein pexanto tatsi tawaetabatsi. Poxonaе bexotsi bapoxonaе petupaеin aisowa beya xotsi uva pabi pecuariya beya”, jei Jesús.

<sup>9</sup>Bapoxonaе Jesús yainyaba, jeye: “Pon uva pabi pexeinaein, zeta be cana ichi tsane pomonaetha pomonaе barapo uva pabi pia petayapucaenaewichi? Apara bapon patopaena xua pejutebinexa tsane pomonaе uva pabi pia petayapucaenaewichi. Bapoxonaе barapo uva pabi catsina ichamonaetha xua petayapucaenaenexa tsainchi barapo uva pabi”, jei Jesús.

<sup>10-11</sup>Equeicha Jesús nayabara paeba barapomonaetha, jeye: “;Paxam bara bayatha payorobameba Nacom Pejume Diwesi! Barapo diwesitha neyabara caunuta poxonaе iboto yabara paeba, jeye:

‘Pebiwi pomonaе ibo bon peacabiwi, barapo

pebiwi xuba po iboto tabu caboca, po iboto peainya cui iboto.

Ichitha Nacom itapeta barapo iboto xua

petabũ cabocaenexa peainya cui  
ibotoxae.

Waxainchi nanta xeinatsi jeichichi:  
Maisa  
pocotsiwa Nacom exana naca tsita  
xanepana,  
jeichichi', jei Nacom Pejume Diwesitha",  
jei Jesús.

<sup>12</sup> Poxonae bapomonae jume tane xua  
Jesús paeba, Jesús muxu pewaetabichi.  
Tsipei bapomonae yaputane xua apara  
barapomonae yabara paebatsi poxonae  
Jesús cueicueijei barapo pecayabara  
juta pepaebi diwesiyo. Daxota Jesús  
casebatsi. Tsipei barapomonae  
jiwi cunuwatsi, daxota Jesús jopa  
waetabichi. Bapoxonae bara saya  
ponarũcũpa.

**Meje yabara poxonae Jesús yabara  
cuiduba paratixi matoma po  
paratixi jiwi bewa catsibina  
pontha pon romanomonae  
itorobiya pia pepa peewatsinchi**

(Mt 22.15-22; Lc 20.20-26)

<sup>13</sup> Bapoxonae pirapaeyo Jesús pia  
xainya betaitorobiyatsi fariseomonae  
jiwana, irũrũ pomonae Herodes pia  
pepuna jinompaewichi jiwana tatsi,  
xua daxita barapomonae piraichi Jesús  
petsipaebinxatsi xua Jesús xuya abeya  
pejume notsinexa. <sup>14</sup> Bara barapomonae  
Jesús pia xantha tatsi tapatatsi, jeye  
Jesustha:

—Pon jiwi Necuidubim. Bara paya-  
putan xua bara jume xainyeya tsipae-  
bame jiwi, xua matautano jiwi bara beta  
cuidubame xua pocotsiwa jiwi bewa ex-  
anaena pexeinaenexa tsane Nacomtha  
po jũntũ coyene pexanepanae jũntũ  
coyene. Matautano jopa jiwi cunuwim  
poxonae cuidubame poxonae bequein  
jiwi jopa ichichipaeyo baxua, tsipei xam  
daxita jiwi bara catsita najũpa. Xam  
jume xainyeya cuidubeibame jiwi Na-  
com pia peitorobi coyenewa. Incane

yabara pana netsipaebare xua nanta  
xeiname, xuaje: ¿Metha bara Nacom  
pia peitorobi coyene naca itoroba xua  
waxainchi paratixi catsibinchi pon ro-  
manomonae itorobiya pia pepa pee-  
watsinchi xua wanaca itorobixae bapon  
bequein bara bapon pon penanapaincha  
poponaein xua icha nacua werena pona?  
Icha jopa tsipae, ¿metha daxua abe  
tsipae? jeichichi Jesús barapomonae  
pomonae fariseomonae itoroba.

<sup>15</sup> Daichitha Jesús yaputane, xua bara-  
pomonae itara mexeya xanepanaeya  
pepaebi jiwi ichitha abeya peexanae  
jiwi. Jesús jeye:

—¿Eta pocotsiwa metha painya daichi  
pana nejũntũ coyene jũjutame? Moya  
painta xawena paratiyo, tha taetsi, jei  
Jesús.

<sup>16</sup> Bapoxonae barapomonae barapo  
paratiyo Jesús tacapoinchi. Poxonae  
Jesús tane barapo paratiyo, bapoxonae  
Jesús yainyaba barapomonae, jeye:

—¿Jintam pejumopere? ¿Yawano jin-  
tam wũn ducuaere? jei Jesús.

Barapomonae Jesús jume notatsi, jeye:

—Apara romanomonae itorobiya pia  
pepa peewatsinchi, jei barapomonae.

<sup>17</sup> Jesús barai barapomonae, jeye:

—Bara nexata romanomonae itoro-  
biya pia pepa peewatsinchi pacare  
pocotsiwa xua bapon piawaxae tatsi.  
Matautano bara Nacom pacare xua  
baxua irũ piawaxae tatsi, jei Jesús.

Barapomonae yabara najũntũ cui  
coyene cabenaeca pocotsiwa xua Jesús  
xanepanaeya beta jume nota.

**Meje yabara poxonae Jesús yabara  
yainyabatsi po coyene xua equeicha  
asũ pomonae pewerapeibiwi**

(Mt 22.23-33; Lc 20.27-40)

<sup>18</sup> Bapoxonae saduceomonae jiwana  
pata Jesús pia xantha tatsi xua  
Jesús piraichi petsipaebinxatsi.  
Saduceomonae barompaya pia

pecuidubi coyenewa xeina xua pinae pomonae pewerapeibiwi equeicha jopa asu tsaibiyo. Barapo pecuidubi coyenewa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonae werapa. Daxota barapomonae Jesús tsipaebatsi, jeye:

<sup>19</sup>—Pon jiwi Pecuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxonae pentapin pecoutha pexeinaenexa tsane pexui’, jei Moisés. <sup>20</sup>Barichi, matha iru cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. <sup>21</sup>Pon cotacaya naexana xuya pentapin coseuri pita xua bapoxonae pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. <sup>22</sup>Daxita barapo siete poyobe cuenta nanapentapona barapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. Bapoxonae matapainya iru bapowa tupa. <sup>23</sup>Xam, Jesús, ba paebame, ba jam: ‘Matacabi jopaena po matacabitha Nacom asu exanaena, xua jiwi asu exanaeinchi muthun wetsina’, ba jam. Poxonae barapo matacabi jopaena xua daxita jiwi asu jujuinaena, barapo matacabitha zjintam metha bapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe, caepi jiwi cuenta nanapentapona barapowa, jei saduceomonae.

<sup>24</sup>Bapoxonae Jesús jume nota barapomonae, jeye:

—Paxam apara catsawiya pana ne-jume notame, tsipei jopa beta paya-putaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. <sup>25</sup>Poxonae petupaewi asu jujuinaena jopa jitha eenaponae tsane. Yawa barapomonae pexantixi jopa jitha cuarebapona tsane. Tsipei barapomonae barichi tsane icha be matatsunpiwimonae ichi, po matatsunpiwi Nacom pia nacuatheicha jinompa, xua po matatsunpiwi jopa jitha enaeyo. <sup>26</sup>Paxam bequein bara bayatha payorobame pocotsiwa Nacom yabara namchi pejume diwesitha xua pomonae equeicha asu jujuina pomonae pewerapeibiwi. Barapo diwesitha Nacom cueicueijeiji ichaxota xua poxonae po naewa taxuncua, Nacom jeye: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. <sup>27</sup>Baxua Nacom paeba, tsipei Abraham, iru Isaac, iru Jacob pewerapeawi anoxuae equeicha caewa asu jinompa, Nacom pia nacuatheicha tatsi. Pomonae pewerapeawi, pomonae caewa equeicha asu jopa pejinompaewi, barapomonae jopa pia Nacom tatsi, pon itabocotha eca. Saya jame meisa pomonae pewerapeawi caewa equeicha asu pejinompaewi, barapomonae jame pia Nacom tatsi, pon itabocotha eca. Daxota paxam catsawa papaebame, jei Jesús.

**Meje yabara poxonae Jesús yabara cuiduba po peitorobi cui coyene pepa peainya cui coyenewa**

(Mt 22.34-40)

<sup>28</sup>Caein pon jiwana monaepin pomonae jiwi pecuidubiwi Moisés pia peitorobi coyene tatsi, bapon jume tane xua Jesús iru saduceomonae najume matsontsonobiya paeba. Matautano bapon jume tane xua Jesús xanepanaeya

betiya jume nota barapomonaetha. Daxota bapon yainyaba Jesustha, jeye:

—¿Eta po peitorobi coyene pepa peainya cui coyenewara, po peitorobi coyene beyacaincha icha peitorobi coyene? jei bapon.

<sup>29</sup> Jesús jume nota bapontha, jeye:

—Po peitorobi cui coyenewa pepa peainya cui coyenewa jeye: ‘Paxam Israel nacuamonaepiwi pam pajume taema xuaje meje: Pon jiwi Pecanamataxeinaein bara compa pepa Pata Nacom, icha Nacom ajibi. <sup>30</sup> Antobeinde Jinya Necanamataxeinaein bapon Nacom xua daxita nejuntu coyene wetsina, matautano xua daxita jinya nepoponae coyenewatha, matautano xua daxita nenanta xeinaewatha nentasiopatha, matautano daxita nedaunwei coyenewatham’, jei barapo peitorobi coyenewatha, po peitorobi coyenewa pepa peainya cui coyenewa.

<sup>31</sup> Po peitorobi coyene cotacaya itoroba ichaxotaba ‘dos’ jei, barapo peitorobi coyene be jume jupa po peitorobi coyene copiya ducua. Iruru barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. Icha peitorobi coyenewa aibi po peitorobi coyene peainya cui coyenewa, po peitorobi coyenewa xua beyacaincha po peitorobi coyenewe, jei Jesús.

<sup>32</sup> Bapoxonae caein jiwana monaepin pomonae jiwi pecuidubiwi Moisés pia peitorobi coyene tatsi, bapon jeye Jesustha:

—Bara beta paebame pocotsiwa aunxuae paebame ponxaem jiwi Necuidubim. Bara xainyeya paebame xua pinae pepa Nacom bara compa popona xua icha pepa Nacom ajibi.

<sup>33</sup> Matautano bara xainyeya paebame xua pinae bewa Nacom antobetsi

xua daxita wajuntu coyene wetsina, matautano xua daxita wajinompae coyenewatha, matautano xua daxita wananta xeinaewatha wantasipantha, matautano daxita wadaunwei coyenewantha. Matautano bara xainyeya paebame xua wanacatsicuarabu enaewi bewa pinae antobe tsainchi icha ichichi xua wacoutha naantobetsi. Baraxua jame bichocono peainya cui coyenein pocotsiwa bewa exanaetsi, beyacaincha xua duwein ompin tautatsi yawa xua ichawan tautatsi xua watuxusi exanaenexa Nacom nexa, jei bapon. <sup>34</sup> Poxonae Jesús jume tane xua bapon beta jume nota, Jesús jeye:

—Bara saya tsiwiyo cata seica xua jinya nejume cowuntsinexa xua nenantauntsinexa Nacom pon jiwi itorobiya pia pepa Peewatsinchi, jei Jesús.

Bapoxonae nama dapon ajibi xua pon Jesús peyainyabinexa tsainchi.

**Meje yabara poxonae Jesús nayabara jei: “Mesías, ¿jintam pia pemomoxi susato jiwana pin tatsira?” jei**

(Mt 22.41-46; Lc 20.41-44)

<sup>35</sup> Bapoxonae Jesús yabara cuiduba Nacom pin pia botha tatsi, xua pon Mesías baraichi xua nayabara paeba Jesús, jeye:

—¿Eta pocotsiwa metha pomonae jiwi pecuidubiwi Moisés pia peitorobi coyene tatsi paeba xua pinae Mesías bapon David pia pemomoxi susato jiwana pin tatsi? <sup>36</sup> Nacom pia Pejumope tunaxu tatsi David cueicueijejei exanatsi. David jeye:

‘Nacom pon Pecanamataxeinaein jiwi, Tanecanamataxeinaein baraichi pon Mesías,

jeichichi: Tacoxa werena ecare, beya abu

tsane poxonae necaaitafaetabi jiwi pia pecanamataxeinaeinchi tatsi caexanaeinchi, jei

Nacom pia Pejumoŋe t̄nax̄ tatsi', jei David.

<sup>37</sup> Icha David Mesías yabara jei, 'Bapon Mesías Tanecanamataxeinaein', jei, ζeta xua metha tsipae xua Mesías apara David pia pemomoxi susato jiwanaŋin tatsi? jei Jesús.

Barapo pin bicheito bichocono t̄simuxu w̄naetsi pocotsiwa Jesús cuiecuijei.

**Meje yabara poxonae Jesús  
muxuweta jiwi xua pomonae  
jiwi pecuidubiwi Moisés pia  
peitorobi coyene tatsi  
barapomonae pecuiyainwa tatsi**

(Mt 23.1-36; Lc 11.37-54; 20.45-47)

<sup>38</sup> Poxonae Jesús cuiduba jiwitha, jeye: "Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha bapomonae ichi xua barapomonae bichocono ichichipa xua penama xatabiwa po paparuwan apipiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtontha jacobebina barapomonaetha xua jiwi pebar̄ cui itura jineibinexa barapomonae.

<sup>39</sup> Barapomonae bichocono ichichipa xua nanta caeneiba judiomonae pia penacaetutsi bontha tatsi ichaxota ba enathopeiba pomonae peainya cui jiwi penaexanaewi. Matautano barapomonae bichocono ichichipa xua eneiba ichaxota ba eneiba pomonae peainya cui jiwimonae poxonae pexaewan tsinacaetuteiba penabaneibinexa tsane. <sup>40</sup> Matautano barapomonae powaxi pecuenta werapaewaxichi piseurixi barapowaxi cueranta enatsi pia bon. Barapomonae naemata jopa

cuinaya najume copababeibiyo poxonae tsipaebeiba Nacom. Barapomonae bichocono peraxa jubebinchi poxonae po mataqueitha Nacom jiwi yabara paebina penatsicuentisiwa xua abe peexanaexae Nacomtha. Barapomonae atene tsane beyacaincha poxonae ichamonae atene exanaeinchi xua jopa pejume cow̄antsixaetsi Nacom", jei Jesús.

**Meje yabara poxonae Jesús  
yabara paeba xua petsiriwa  
paratiyobe cata Nacomtha, powa  
pecuenta t̄paewatsi piseuri**

(Lc 21.1-4)

<sup>41</sup> Poxonae Jesús eca Nacom pin pia botha tatsi xua peitabara weya, xua ichaxota jiwi jeyeiba paratixi Nacom nexa, bapoxonae Jesús tane xua pinmonae pomonae copei pexeinaewi paratixi nawita jeya ichaxota jiwi jeyeiba paratixi Nacom nexa. <sup>42</sup> Barapoxonaer̄ yab̄yo patopa, powa pecuenta t̄paewatsi piseuri. Barapowa bichocono peacopebiwayo. Bapowa jeca ainya pecacomocae paratiyobe Nacom nexa. Barapo paratiyobe tsiqui paratiyobe. <sup>43</sup> Bapoxonae Jesús pijimonae waba, yawa jeye barapomonaetha:

—Bara xainyeya paca tsipaebatsi. Barapo yab̄yo, powa pecuenta t̄paewatsi piseuri, bapowa peacopebiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae xua jeya xua Nacom nexa. <sup>44</sup> Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca pocotsiwa bequein canantawenona xua pepoponaewa tsane bequein bichocono peacopebiwayo, jei Jesús pijimonaetha.

**Meje yabara poxonaē Jesús yabara  
paeba xua ichamonae abe cana  
exanaena Nacom pin pia bo tatsi**

(Mt 24.1-2; Lc 21.5-6)

**13** Poxonaē Jesús Nacom pin pia bo wejoniya, bapoxonaē caein Jesús pijimonaē jiwana tatsi, Jesús tsipaebatsi jeichi:

—iPon jiwi Necuidubim, taema maisa pexeinya iboton, yawa pexeinya ibo bo! jei bapon.

<sup>2</sup>Ichitha Jesús jume nota bapontha, jeye:

—Aunxuae patabename barapo iboton yawa xua pexeinya bon. Apra jopa cae ibotiyo nacopatuncuae tsane icha iboto peumatha. Daxita abe tsane, jei Jesús.

**Meje yabara poxonaē Jesús yabara  
paeba xua copiya matha pewunaeya  
exanaena petsita itutsi coyenewa  
poxonaē daxita weraweracaenaba**

(Mt 24.3-28; Lc 21.7-24; 17.22-24)

<sup>3</sup>Bapoxonaē Jesús pijimonaē baru pona demxuwatheicha, po demxuwa pewun demxu Olivowa tsipei baxota umena olivo naein. Poxonaē Jesús ecopiya demxuwatheicha, po demxuwa Nacom pin pia bo itama tayecatsi, bapoxonaē Jesús pijimonaē tatsi Pedro, iru Santiago iru Juan, iru Andrés, barapoyobe Jesús namicha tsipaebatsi.

<sup>4</sup>Barapoyobe jeye:

—Paichichipan xua xam tapata net-sipaebiwam tsane zeta poxonaē metha ichamonae baxua exanaena poxonaē abe cana exanaena Nacom pin pia bo tatsi? zEta pocotsiwa tsane metha xua pewunaeya tsita itapeinya xeinaena po coyene xua poxonaē imoxoyo daxita weraweracaenaba? jei Jesús pijimonaē tatsi.

<sup>5</sup>Jesús jume nota barapomonaetha, jeye: “Dota pam, bu ichamonae naerabiya paca muxu tsipaeba, xua dax-

ota abe paexanaetsipame. <sup>6</sup>Tsipei tsana patsina ayei bicheito jiwi pomonaē natsicotaena icha be xan ichin. Barapomonaē jei tsane: ‘Apra xan Mesías’, jei tsane. Poxonaē barapomonaē muxu-itorobiya paebina, bapoxonaē pinmonae jume cowuntsina.

<sup>7</sup>“Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae dapo matacabi aichica tsane xua poxonaē daxita weraweracaenaba yatsicaewa. <sup>8</sup>Cae nacuapiwi iru icha nacuapiwino, barapo ainya nacuapiwibe nabenoutsina. Matautano iru pon nacua peewatsin iru ichundu pon icha nacua peewatsin, baponbe iru nantiya nabenabe. Matautano ainya nacuantha ira jijiyatsina. Matautano ainya nacuantha jainbo nacua tsane tsipei pin mayayo tsane. Baxua copiya matha tsane xua jiwi atene tsoponae tsane bichocono xua beya jopa nama juniya tsane.

<sup>9</sup>“Ichitha dota pam, tsipei poxonaē baxua pewunaeya tsane jiwi paca teiquebina painya nepaca caenaetsinexa pomonaetha pomonaē tomaran pentacaponae. Matautano paca cuainchina judiomonaē pia penacaeuttsi bontha tatsi. Yawa paca caponaena nacua peewatsiwi peitabaratha tatsi, painya tana nejume cowuntsixaemxae. Yawa paca caponaena pentacaponae peitabaratha tatsi pomonaē iru itoroba jiwitha xua pon nacua peewatsin nexa painya tana nejume cowuntsixaemxae. Barapoxonaē bara paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. <sup>10</sup>Barapo pecapanenebiyae diwesi, tamonaē bewa paebinoutsina daxita nacuanpiwitha xua poxonaē pewunaeya tsane xua

daxita weraweracaenaba. <sup>11</sup>Poxonae barapomonae paca caponaena pomonaetha pomonae tomara pecanamataxeinaewi xua pia painya nepaca cayabara paebinexa tsane xua painya nenatsicuentsiwa xua abe painya neexanaexae bapoxonae jopa patsiwanaya junuwiya najuntũ coyene exabinde xua painya netsipaebiwa tsane barapomonae. Paxam jame papaebare pocotsiwa xua caena bapoxonae Nacom cueicueijei paca exanaena. Bapoxonae po jume pacueicueijam tsane apara jopa poxoru painya coya paichichipae, apara jame Nacom pia Pejumope tunaxu tatsi baxua paca cueicueijei exanaena. <sup>12</sup>Jiwi barompaya pia peweicho jiwi caenaetsina ichamonaetha xua pejutebinexa tsainchi. Irũrũ coxiyeiwi ichamonaetha caenaetsina pia pexui. Irũ pexui paxa jiwi caenaetsina ichamonaetha pejutebinexa tsainchi. <sup>13</sup>Daxita nacuanpiwi paca casebina painya tana nejume cowũntsiwaxae. Ichitha pomonae awiwa antuyapusya nejume cowũntsiya jinompaena xua beya yacuiya werapaeya othopaena poxonae bequein abe taexanatsi ichamonae barapomonae jame Nacom napaeba cana exanaena.

<sup>14</sup>“Daniel pon Nacom peitorobi jume pepaebin, bapon caena bayatha yabara tsiwanaya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichũn Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo matabi jopaenaba poxonae daxita weraweracaenaba”, jei Jesús. (Xan Marcos paca baraichi: “Pon yorobina po jume diwesi tinan moya jume naitaewatsina pia peyaputaenexa tsane”, paca jeichi.) Equeicha Jesús

jeye: “Poxonae barapocotsiwa pataename bapoxonae pomonae Judea nacuatha jinompa, barapomonae bewa demxuwan berucupiyaena. <sup>15</sup>Barapo matabi pon bo matatupatha uncua, bapon jopa bewa botha joniya tsane xua penotsiwa tsane pocotsiwa tabobeinchi bomũxũ tututha. Saya jame bewa nainya benaetsiricuaena. <sup>16</sup>Irũrũ pon pabitha popona, bapon jopa bewa caibeya ponae tsane botha xua penotsiwa tsane pia paparuwan. Saya jame bewa nainya benaetsiricuaena. <sup>17</sup>¡Pai yabũxi tsobenae powaxi pexui bũpana taenatsi barapo matabi! ¡Pai irũ powaxi pexui isaina barapowaxi tsobenaerũ! Tsipei acabe tsobenae tsane pexui. <sup>18</sup>Poxonae pewũnaeya tsane baxua Nacom pawũcare xua jopa painya nerucupaewa tsane poxonae awũbo peaquexae bichocono. <sup>19</sup>Tsipei barapo matabi jiwi bichocono pin peraxa exanaeinchi. Atene tsane beyacaincha poxonae jiwi atene tsaibi poxonae Nacom aena nacua exana, xua equeicha nama bichocono pin peraxa tsane. Equeicha bexa bapoxonae bapana jopa baxua exanae tsane poxonae bichocono jiwi pin peraxa. <sup>20</sup>Icha Nacom jopa be caentacabiyobe exanaetsipae metha dapomonae ajibi tsipae pomonae panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonae, pomonae pia peitapetsiwixae tatsi.

<sup>21</sup>“Bapoxonae icha ichũn paca jei: ‘Pataema bapon apara Mesías uncua pon Nacom itorobica’, paca jei, irũ icha ichũn paca jei: ‘Pataema bapon Mesías xota uncuiye’, paca jei, barapo jumein jopa pajume cowũntsinde. <sup>22</sup>Tsipei pomonae pemuxitorobi jiwi tsana patsina. Barapomonae natsicotaena icha be xan ichin ponxaein Mesías. Matautano barapomonae natsicotaena

icha be pomonae Nacom peitorobi jume pepaebiwi ichi tsane. Barapomonae pexeinya petsita itutsi coyenewan exanaena peitabocotha, po irathe tsaneno xua jiji pemuxuitorobinexa tsainchi xua jiji pejume cowuntsinexa pocotsiwa barapomonae paeba. Barichiru pomonaetha pomonae Nacom pia peitapetsiwi tatsi pemuxuitorobinexa tsainchi xua iruru icha metha barapomonae pejume cowuntsinexa tsaneru pocotsiwa barapomonae paeba. Ichitha jopa itacupae tsainchi xua barapomonae pemuxuitorobiwa tsainchi. <sup>23</sup>Tsaca pajinompare, tsipei baxua tsiwanaya yabara paca tsiwuna muxu dutatsi”, jei Jesús.

**Meje yabara poxonae Jesús  
nayabara paeba xua poxonae  
equeicha patopaetsica ponxae  
Nacom pia Peitapetsin**

(Mt 24.29-35, 42, 44; Lc 21.25-36)

<sup>24</sup>Equeicha Jesús namchi, jeye: “Po matacabitha poxonae nacui wetsina xua jiji pin peraxa tsane, bapoxonae xometo nainya naquitabina. Jomocoichato jopa pentha tsane. <sup>25</sup>Opiteiton peitaboco weothopeicaena. Matauta napuna torobabiyaena Nacom xua xuan itabocotha dubena. Bapoxonae jopa xapain dubenanaeyo tsane. <sup>26</sup>Bapoxonae daxita jiji taena peitabocotha xua po coyene apara tapatopeicaewa tsaneba tsakuinaebowatha peitaboco wetsica ponxaein Nacom Tananeitapetsin. Nacom pia peayapusu itorobi coyenewatha matautano bichocono pexeinya itupanae coichathano patopeicaein. <sup>27</sup>Matautano itorobin tamatatsunpiwi xua inta pecaetutsinexa pomonae taitapetsiwi. Nacaetutsina daxita nacuanpiwi jiwana, iru ichamonae pomonae ichaxota

xometo weecoinapiwi jiwana, iru ichamonae pomonae ichaxota xometo bejopiyapiwi, jiwana, iru ichamonae pomonae pocotsiwa werenepiwi jiwana, iru ichamonae pomonae pocotsiwa berequepiwi jiwana.

<sup>28</sup>“Payaputaema barapo pecayabara juta pepaebi diwesiyo xua higuera nae. Jeye: Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua pentono perubenaenexa. <sup>29</sup>Barapocotsi juta coyeneya ichi tsane poxonae pataeneme daxita baxuan pocotsiwa aunxuae paca tsipaebatsi pocotsiwa bexa exanaena, bapoxonae payaputaeneme, xua bara imoxoyo tsane xua tapatopae wuna tsane. <sup>30</sup>Bara xainyeya paca tsipaebatsi daxita judiomonae naitapataya naexanaponaena beya yacuiya othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweraena pomonae poxonaeru barapo matcabitha jinompa. <sup>31</sup>Peitaboco aichurucuae tsane. Matautano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

<sup>32</sup>“Po matcabitha baxua exanaena, matautano po horatha baxua exanaena jiji jopa baxua yabara yaputaeyo. Iru matatsunpiwi pomonae peitaboco beicha jinompa baxuan iruru jopa yabara yaputaeyo. Iru xan ponxaein Nacom Pexanton baxua jopa yabara yaputaeyo. Meisa saya Nacom, pon Waxa yaputane poxonae po matcabitha baxua exanaena. Matautano yaputane poxonae po horatha daxita exanaena baxua xuaunxuae paca tsipaebatsi.

<sup>33</sup>“Tsaca pajinompeibare xua tapatopae wuna tsane. Yawa Nacomtha patsipaeba dubenanaebiyama, tsipei



jopa payaputaem po mataqueitha patopaen. <sup>34</sup>Barapocotsi coyeneya juta ichi poxonae xan patopeicaein taitorobinexa tsane jiwi, icha be poxonae pebin ichi poxonae warapaena icha nacua beya. Poxonae bapon pewnaeya tsane xua warapaena pia bo weya, copiya matha waba pia petanacuichiwichi. Bapon daxita pia petanacuichiwichi barompaya cobenata petanacuichiwantsi tatsi. Matautano bapon itoroba pon bo coiboto eena xua xanepanaeya bo pe-eenaenexa.

<sup>35</sup>Paxam tsaca pajinompare, tsipei jopa payaputaem poxonae patopeicaein, icha be barapomonae ichi poxonae jopa yaputaeyo poxonae pepatopaewa tsane pia pecanamataxeinaeinchi pon bo pexeinaeinxae. Barapomonae jopa yaputaeyo icha barapon patopaena poxonae quirei tsanaicha, ichacuitha icha bapon patopaena papaetha, ichacuitha icha bapon patopaena mataqueiwanaeyo, ichacuitha icha bapon patopaena baya tsane.

<sup>36</sup>Barapomonae jopa yaputaeyo xua pia pecanamataxeinaeinchi nainya patopaena xua yaichamaicha mata taenabounaeinchi poxonae maitumena.

<sup>37</sup>Meje xuaje paca tsipaebatsi, xua paca jeichi: ‘Tsaca pajinompare’, paca jeichi, baxua iru daxita jiwitha tsipaeban”, jei Jesús.

**Meje yabara poxonae fariseomonae  
iru sacerdotemonae pia  
pentacaponae tatsi daxita  
barapomonae Jesús yabara nanta  
xeinatsi po coyeneya xua  
Jesús pewaetabiwa tsainchi**

(Mt 26.1-5; Lc 22.1-2; Jn 11.45-53)

**14** Acoibi po matabiyobe cataunxuae seica poxonae jiwi nacaetutsina penabanaenexa pexaewa, peyabara nanta xeinaenexa barapo matabi xua poxonae caena bayatha

matha judiomonae Egipto nacua weya panenebiya. Barapo matabi pewan Pascua matabi wan. Barapo Pascua matabi wuntha jiwi xane pan, po pan xua jopa cotowiyo. Sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi, daxita barapomonae nabaru muxu jei xua bepa pinae eta bichi tsane poxonae Jesús nameicha waetabinchi pebexubinexatsi. <sup>2</sup>Ichitha barapomonae najeye:

—Abu jopa waetabi tsainchi poxonae jiwi Pascua matabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonae anaepanaya najume cayayataxubichipa, najei daxita barapomonae xua Jesús yabara paebatsi.

**Meje yabara poxonae petsiriwa Jesús  
mata eatabatsi penasiwa,  
po penasiwa petuxueiwa**

(Mt 26.6-13; Jn 12.1-8)

<sup>3</sup>Poxonae Jesús Betania tomaratha popona, bapoxonae Jesús Simón pia bo tatsi betajoniyatsi, pon peperu sawinchi. Poxonae Jesús eca pexaethopae-watha, bapoxonae patopa petsiriwa. Bapowa capatopa alabastro ibo bosibu atsato, xua bichocono wanca penasiwa xua petuxueiwa. Barapo petuxueiwa bichocono ainya matoma. Poxonae wacataba barapo bosibu, bapoxonae Jesús mata eatabatsi barapo petuxuei nasiwatha. <sup>4</sup>Pomonae iru baxota ena, barapomonae jiwana anaepana, yawa caemonae najei:

—¿Eta pocotsiwa metha saya xuba jane barapo petuxuei nasiwa? <sup>5</sup>Barapo petuxuei nasiwa becaenaetsipatsi. Bapoxonae bexeinaetsipatsi trescientos po paratiximonaebe po paratiximonaebe xua namatomata xua poxonae trescientos matabibibe nexa xua

poxonae nacuita. Barapo paratixitha beyawenaetsipatsi peacopeibi jiwi, najei barapomonae.

Bapoxonae barapomonae barapowa casebatsi.

<sup>6</sup>Ichitha Jesús jeye barapomonaetha:

—Moya pande, bara pacopare.

¿Eta pocotsiwa metha barapowa pabiataneme? Pocotsiwa barapowa inta exana apara seicayarũ xua pexeinya coyene inta exana. <sup>7</sup>Barapo irathe peacopeibi jiwi paca barũ jinompeibina ataya tsaibi tsane. Paca itacũpa xua beta pata exaname barapomonae poxonae paichichipame. Ichitha nama paxam jopa ataya paca barũ poponae tsainchi barapo irathe poxonae paca itacũpa xua pana neyawename. <sup>8</sup>Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wũnaeta xua mũthũ tana neboyaenexa poxonae tũpaein. <sup>9</sup>Bara xainyeya paca tsipaebatsi. Daxita nacuanthan poxonae jiwi cueicueijejei tsane Nacom pia pecapanenebiyae diwesi barapo jiwi yawa yabara paebina xua pocotsiwa poxonae bapowa inta exana xua jiwi bapowa peyabara cui nanta xeinaenexatsi, jei Jesús.

**Meje yabara poxonae Judas,  
Jesús caenaetaxotsi**

(Mt 26.14-16; Lc 22.3-6)

<sup>10</sup>Barapoxonae Judas Iscariote pon doce poyobe jiwana, pomonae Jesús pijimonaexae tatsi, bapon sacerdotemonae pia pentacaponaei tatsi beya pona. Bapon pona xua petsipaebinxaxua Jesús caenaetaxubinchi barapomonaetha. <sup>11</sup>Poxonae barapomonae baxua jume taerũcũpa bichocono ichichiparũcũpa baxua. Yawa barapomonae Judas Iscariote muxu tsipaebatsi xua paratixi catsibapaebatsi. Bapoxonae Judas

tamropata pitaba xua jeita, xua po coyetha Jesús pecaenaetaxubiwa tsainchi barapomonaetha poxonae peyapu xanepanaewatha.

**Meje yabara poxonae Jesús  
pijimonae barũ nabane  
Pascua wũn matacabitha**

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup>Nexata copiya matacabi jopa po matacabi tsiwana penanta carucuae matacabi xua po matacabintha poxonae jiwi tsinacaetutsina, xua penabanaenexa pan, po pan jopa muxuna pentsiyo levadura matawũn, pocotsiwa xua cotowa exana pan. Barapo penanta carucuae matacabitha ba corderoxi pebtoxi xua oveja coxi jutebatsi xua jiwi pexaenexa. Bapoxonae barapo jiwi cayabara nanta xeina xua caena bayatha pia pamo susato jiwi tatsi corderoxi juteba yawa xane beya poxonae panenebiya Egipto nacua weya. Barapo matacabitha Jesús pijimonae yainyabatsi, jeye:

—¿Exota ichichipame xua xota pexaewa paca tsiwũnaetsinchi wanabanaenexa tsane xua Pascua wũn matacabi nexa? jei barapomonae.

<sup>13</sup>Bapoxonae Jesús itoroba nacueyatabe poyobe ponbe xua doce poyobe jiwana, pomonae Jesús pijimonae tatsi. Jesús jeye:

—Tomara beya paponarebe. Barapo tomarathiya pantenta ponaenamebe pebin pon mera yantana ponaena juruwatotha. Bara bapon papuna pondebe. <sup>14</sup>Bo beya paponarebe ichaxota bapon joniyaena. Pon bo pexinaein pabarande: ‘Pon jiwi Pecuidubin cabarai: ¿Incane tutura, po tututha taji-wimonae barũ nabanaein pexaewa Pascua wũn matacabi nexa?’ jei bapon, pajandebe. <sup>15</sup>Bapoxonae bapon paca tsita itacayopichinabe po tutu pin tutu po tutu xua asiyeicha po tutu xua bay-

atha tutu xaneba. Barapo tututha pexaewa pana cui wunaetajebare xua wana-banaenexa pexaewa barapo Pascua wun matababi nexa, jei Jesús.

<sup>16</sup>Bara bapoxonae baponbe ponatababe. Bara patopabe tomaratha. Bara tanebe daxita be po coyeneya bayatha Jesús paeba. Bapoxonae pexaewa nacui wunaetajebabe Pascua wun matababi nexa xua penabanaenexa.

<sup>17</sup>Poxonae quirei tsanaicha bapoxonae Jesús pijimonae baru patopa barapo tututha. <sup>18</sup>Poxonae Jesús pijimonae cataunxuae baru xunaboca pexaethopaewatha, bapoxonae Jesús pijimonae barai, jeye:

—Bara xainyeya paca tsipaebatsi caein pon paxam jiwana pam pon nebaru xaeuncua bapon necanaetaxubina ichamonaetha, jei Jesús.

<sup>19</sup>Nexata bapoxonae Jesús pijimonae tatsi unthuthu wecoyei tsurucupae, nexata daxita tsana jei tsoponae Jesustha:

—¿Apara xan cacaenaetaxubinchi? jei daxita barapomonae xua Jesús tsana yainyabaponatsi.

<sup>20</sup>Jesús jume nota barapomonaetha, jeye:

—Pon paxam jiwana pam xua doce poyobe jiwana xua cae paratotha pana nabaru jajauncuaponanbe pan aparta bapon necaenaetaxubina ichamonaetha.

<sup>21</sup>Xan ponxaein Nacom Tananeitapetsin bewa tupaein, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wunae tsipae icha bapon bayatha jopa naexanaetsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

<sup>22</sup>Poxonae Jesús pijimonae baru xaeuncua, bapoxonae Jesús pecobetha pita pan. Yawa Paxatha tsipaeba, jeye: “Axa,

maisa juntu coyene weiweinan xua pan pata tanecatsiwam”, jei. Bapoxonae Jesús pecobetha pan epa janaca, yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan aparta neyabara caunuta tapepon xua poxonae tapaca tsitupaewatsi tsainchi, jei Jesús.

<sup>23</sup>Bapoxonae Jesús equeicha pecobetha pita corotiyo, yawa Nacomtha tsipaeba, jeye: “Axa, maisa juntu coyene weiweinan xua corotiyotha ecareca pepa uva mera xua pata tanecatsiwam”, jei. Bapoxonae Jesús pijimonae cata corotiyo xua pejiwana aapaponaenexa. Daxita barapomonae bara jiwana aapapona.

<sup>24</sup>Bapoxonae Jesús jeye pijimonaetha:

—Pena petsiwunae muxu dutsi coyenewa paca tsipaebatsi. Barapo uva mera po mera xua corotiyotha tsijuntu eca yabara caunuta tajana barapo uva mera xua jana othoparenaein poxonae tupaein. Barapo jana tsita itapeinya xeinaena xua jiwu pinmonae yabara junteinaein abe pia peexanae cuiru coyenein tatsi. <sup>25</sup>Bara xainyeya paca tsipaebatsi, barapo uva mera jopa equeicha paca baru apae tsainchi anoxuae. Meisa abu bexa tsane pena coyenewatha paca baru apaeinchi barapo uva mera poxonae Nacom neexanaena xua itorobiya ewatsin jiwu, jei Jesús.

**Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeinyo”, pinae yabara jei tsainchi Jesús**

(Mt 26.30-35; Lc 22.31-34; Jn 13.36-38)

<sup>26</sup>Poxonae Jesús pijimonae baru najume weta xua naxuna Nacom nexa, bapoxonae Jesús pijimonae baru pona demxuwa beya. Barapo demxuwa pewun demxu Olivowa, olivo naein

peumenaexae baxota. <sup>27</sup>Nexata Jesús pijimonaē barai, jeye:

—Anoxuae barapo merawithe daxita pam pana necuentarucupaenane tapaca urapentsixaetsi tsainchi. Baxua paexanaenane, tsipei Nacom Pejume Diwesiha paca yabara cui tsiwunaeya jeye: ‘Poxonaē ovejamonaē peewatsin bexubin, bapoxonaē ovejamonaē tsanarucupaena’, jei Nacom. Penamchixae poxonaē ichamonaē newaetabina tanebexubinexa pana necuentarucupaenane. <sup>28</sup>Ichitha taeyarapaeyo Nacom equeicha asu neexanaena. Bapoxonaē paca tsiwana patopiyaeinchi Galilea nacua beya, poxonaē bara beya paponanane, jei Jesús.

<sup>29</sup>Nexata Pedro Jesús jume notatsi, jeye:

—Bequein ichamonaē cacuentarucupaena jinya neuraxubixae, nama xan bapana jopa cacuenta naetsiricuae tsainchi taneuraxubixaemxae, jei Pedro.

<sup>30</sup>Nexata Jesús Pedro jume baraichi, jeye:

—Bara xainyeya catsipaebatsi, po merawithe pewunaeya poxonaē ainya jume cuiyobetha wacara pebto fibina, bapoxonaē xam copiya acoibi po jume cuiyobetha neyabara jam tsane: ‘Jopa dapon yaitaeyino’, neyabara jam tsane, jei Jesús.

<sup>31</sup>Ichitha Pedro equeicha jume daunweya, jeye:

—Bara bequein capuna tupaeinchi ichitha baxua jopa cayabara paebi tsainchi, jei Pedro.

Iru ru daxita Jesús pijimonaē tatsi bara jumichi, nanta jupiya paeba.

**Meje yabara poxonaē Jesús Paxa tsipaeba ichaxota tsica iriyo, po iriyo pewun Getsemani**

(Mt 26.36-46; Lc 22.39-46)

<sup>32</sup>Nexata Jesús pijimonaē baru patopa ichaxota tsica iriyo po iriyo pewun Get-

semani. Baxota Jesús barai pijimonaē, jeye:

—Xote abu paenare tha matha Taxatha tsipaebichi, jei Jesús.

<sup>33</sup>Jesús baru pona Pedro iru Santiago iru Juan. Bapoxonaē Jesús bichocono unthuthu wecoyeyi, yawa bichocono unthuthu deideije. <sup>34</sup>Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupaē. Xote paenare, yawa payoyocare xua painya tanebaru naitaewatsinexam, jei Jesús.

<sup>35</sup>Nexata Jesús tsiwiyo dabe natsixitabiya, irabe tauncuareca, tsipei jopa juniya ajuntutaneyo. Jesús yaputane xua bichocono tsiatene tsane xua daxita jiwi abe pia peexanaē coyenein tatsi. Daxota Jesús Paxa wuca xua icha itacupatsi xua jopa penantawenonaewa xua peatenewa. <sup>36</sup>Bapoxonaē Jesús Paxa tsipaeba, jeye: “Axa caitacupa xua daxita exanane. Icha ichichipame xua taneyawenaewam tsane, newepire pocotsiwa neajuntutane exana. Ichitha jopa necana exanaeinde xua pocotsiwa ichichipan. Saya jame necana exande xua pocotsiwa ichichipame”, jei.

<sup>37</sup>Nexata Jesús equeicha caibe iya ichaxota pijimonaē jiwana tatsi taenatsi xua acoibi poyobe. Ichitha barapomonaē maita. Jesús Pedro baraichi, jeye:

—Simón, ¿maituncuame? ¿Jopa caitacupaeyo xua yoyocame xua jinya tanebaru naitaewatsinexam, matautano xua bara cae horathano? <sup>38</sup>Maisa payoyocare. Nacom patsipaebare xua jopa abe painya neexanaewa tsane poxonaē caurimonaē pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa, ichitha painya pepon bichocono paacoyenefetabim xua painya netsipaebiwa Nacom.

<sup>39</sup>Equeicha Jesús bara nama caeto caibeya pona xua Paxa petsipaebinexa barapo jumetha, po jumetha copiya Paxa tsipaeba. <sup>40</sup>Bapoxonae equeicha Jesús pijimonae beya pona xua acoibi poyobe. Daichitha barapo acoibi poyobe came maitumena, tsipei bichocono itata tsacatsaquei xua itamaipana. Barapomona jopa yaputaeyo xua Jesús petsipaebiwaitsi poxonae yaichamaicha mata taenanaboumeinchi. <sup>41</sup>Bara nexata equeicha Jesús saya cuenta pona pijimonae, xua Paxa equeicha petsipaebinexa. Equeicha pijimonaetha patopa acoibi po cuiyobetha. Jesús jeye pijimonaetha:

—¡Moya bara painya nepu maitumenaende, aunxuae jopa Nacom patsipaebim xua painya necayawenaenexa! Bayatha tsuxubi po horatha xua xan ponxaein Nacom Tananeitapetsin, ichun necaenaetaxubina ichamonaetha, pomonaetha pomonae peantucoyenebe jiji. <sup>42</sup>Panacosabapende, panonobapondeno. Antha bu poinchi. Dota dawerena pon necaenaetaxubina ichamonaetha, jei Jesús.

**Meje yabara poxonae  
Jesús waetabatsi**

(Mt 26.47-56; Lc 22.47-53; Jn 18.2-11)

<sup>43</sup>Poxonae Jesús cataunxuae tsipaebuncua pijimonae, bapoxonae Judas patopa. Bapon Judas doce poyobe jiwana caein pomonae Jesús pepa pijimonaexae tatsi. Judas pinmonae baru patopa Jesustha. Ichamonae cusin cajinjınca. Ichamonae iwabi cajinjınca. Daxota daxita barapomonae pata tsipei sacerdotemonae pia pentacaponaewi tatsi, iru pomonae jiji pecuidubiwi Moisés pia peitorobi coyene tatsi, iru pomonae pitiri jiwiru daxita barapo pentacaponaewi itoroba barapomonaetha. <sup>44</sup>Judas pon Jesús

caenaetaxubinchi beya poxonae bapon patopa cou tsiwanaya paeba barapo pin bicheitha cou Jesús yabara paebatsi, cou jeye: “Pon tsutsubin bapon apara barapo pebin Jesús. Nexata moya bara pawaetabare. Pacaponde xua soldadomonae xainwaicha pecutsinexa tsane”, jei Judas.

<sup>45</sup>Nexata Judas Jesús imoxoyo caquita poinchi. Bapoxonae nainya Jesús jeichichi:

—Pon jiji Necuidubim, ¿xamda? jei Judas.

Bapoxonae nainya Judas Jesús tsutsubatsi. <sup>46</sup>Nexata barapomonae pomonae Judas pebaru patopaexae, Jesús imoxoyo caquita umenarucupatsi. Bapoxonae Jesús waetabatsi.

<sup>47</sup>Caein pon Jesús pijimonae tatsi jiwana, bapon nainya cusi namara wejonta. Bapoxonae bapon muxuyoro catsoniba, pon sacerdotemonae pia pepa pentacaponaein tatsi tanacuitatsi bapon muxuyoro catsonibatsi. <sup>48</sup>Bapoxonae Jesús jeye jiwitha:

—Pacapatame cusin, yawa iwabi ichi be poxonae pacana ichim pontha pon jiji pecaibin. <sup>49</sup>Daxita maticabin Nacom pin pia botha tatsi paca baru poponeibatsi. Paca cuidubeibatsino. Daichitha bapoxonae jame jopa pana newaetabim. Ichitha daxita baxuan neyabara canacui jume weta exana, bayatha Nacom Pejume Diwesitha tana necui yabara wunae tsiwanaya paebixae pomonae Nacom peitorobi jume pepaebiwi.

<sup>50</sup>Bapoxonae Jesús daxita pijimonae cuentarucupatsi.

<sup>51</sup>Bapoxonae pewowin Jesús puna poinchi pon saya meisa paparuwatha naepa yaraba. Barapo pewowin waetabatsi pomonae Judas baru patopa. <sup>52</sup>Ichitha barapo pewowin nama xueta cuta pia paparuwa epato. Tamasa naetsiricua.

**Meje yabara poxonae Jesús  
capoinchi judiomonae pia  
pecanamata caitorobi jiwi bicheito  
tatsi pia peitabaratha tatsi**

(Mt 26.57-68; Lc 22.54-55,  
63-71; Jn 18.12-14, 19-24)

<sup>53</sup> Pomonae Jesús teicatsi, barapomonae Jesús capoinchi pon sacerdotemonae pia pepa pentacaponaein tatsi pia bo tatsi beya, pon yatsicaya peainya cuin. Baxota iru sacerdotemonae pia pentacaponaei tatsi nanacaetuta. Iru pitiri jiwino nanacaetuta. Baxota iru nanacaetuta pomonae jiwi pecuidubiwi Moisés pia peitorobi coyene tatsi. Daxita barapo penacaetutsi jiwi, barapomonaetha jiwi wun duta “Pecanamata caitorobi jiwi bicheito”, jei. <sup>54</sup> Iru Pedro Jesús tsiwiyo taju pu taetae tsiniyatsi beya poxonae patopa panatha, po panatha ichaxota sacerdotemonae pia pepa pentacaponaein tatsi tauncuatsi bo. Poxonae Pedro pana tututha joniya bapoxonae naeca imoxoyo policiamonaetha pomonae Nacom pin pia bo tatsi pe-eeanaewi. Pedro cui tane po coyeneya xua Jesús cana exanatsi pomonae nacaetuta. Pedro nonopeca isototha.

<sup>55</sup> Sacerdotemonae pia pentacaponaei tatsi, iru ichamonaeno pomonae pecanamata caitorobi jiwi bicheito, daxita barapomonae jeita ichamonae pomonae xua Jesús naerabiya peyabara paebinxatsi pocotsiwa xua Jesús paeba, xuano xua exana, pia barapo jumetha paebichi xua bara Jesús tupa peexanaewa tsainchi. Bara bequein pin bicheito pata xua Jesús abeya peyabara paebinxatsi, ichitha cataunxuae barapomonae pomonae pecanamata caitorobi jiwi bicheito came jopa xeinaeyo po diwesi xua daxota Jesús pebexubinexatsi. <sup>56</sup> Pinmonae bequein

Jesús yabara naerabiya paebatsi, ichitha tsanaya barompaya pia diwesin paeba. <sup>57</sup> Ichamonae asiya umena, yawa naerabiya Jesús yabara paebatsi.

<sup>58</sup> Barapomonae jeye:

—Paxan pajume tan xua bapon Jesús paeba, jeye: ‘Xan abe exanaein barapo Nacom pin pia bo, po bo jiwi pia coutha acaba. Acoibi po matababibe icha bo equeicha exanaein po bo jiwi jopa exanaeyo’, jei Jesús, jei barapomonae.

<sup>59</sup> Daichitha barapomonae awiya came cataunxuae tsanaya barompaya ichawan paeba. Barapomonae pia pepaebiwun xua Jesús peyabara paebiwatsi jopa peburuya nanta jupaya nanta xeinaeyo.

<sup>60</sup> Bapoxonae sacerdotemonae pia pepa pentacaponaein tatsi asiya uncuataba xua daxita peitabaratha tatsi. Bapoxonae bapon Jesús yainyabatsi, jeichichi:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei bapon.

<sup>61</sup> Daichitha Jesús saya moya uncu. Jopa jume notsiyo bapontha. Daxota equeicha sacerdotemonae pia pepa pentacaponaein tatsi jeye Jesthath:

—¿Bara yatsicaya xam Mesías pon Nacom necaitorobin, pon Nacom Pexanton, po Nacom wunaej pajainteiban? jei bapon.

<sup>62</sup> Bapoxonae Jesús jume nota bapontha jeye:

—Aa, bara xan tsocuaein aparta, Nacom Pexanton aparta. Paxam pana netaename xua xan ponxaein Nacom Tananeitapetsin ecaein Nacom pecoxa weya tatsi, pon peayapusu itorobi coyenewa pexeinaein. Matautano pana netaename poxonae equeicha patopeicaein tsaquinaebowantha xua peitaboco wet-sica, jei Jesús.

<sup>63</sup> Nexata bapoxonae sacerdotemonae pia pepa pentacaponaein tatsi, pin

anaetha anaya pia paparuwa nata tsitsinaxuba, peyabara anaepanaexaetsi Jesús, jeye:

—¡Nama equeicha jopa wanantawenonaewa ichamonae xua wanaca tsipaebiwa tsane xua bapon peyabara paebiwatsi! Bapon natsiaenae exana abe pepaebixae barapo jume poxonae Nacom pexanto najainta. <sup>64</sup>Bara paxam pajume taneme pocotsiwa bapon paeba pocotsiwa Nacom jopa ichipaeyo. ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo pecanamata caitorobi jiwi bicheito jeye:

—Bara xainyeya paebame. Jesús abe pia pepaebixae, Nacom tsitatsi xua bapon Nacom tsita natsicuentatsi. Daxota bapon bewa tupaena, jei barapo pecanamata caitorobi jiwi bicheito.

<sup>65</sup>Bapoxonae barapomonae jiwana, peonetha Jesús anaya itabara subabatsi. Poxonae Jesús itacuere cutatsi, bapoxonae Jesús itabara tsaquibacotatsi pecobetha. Barapomonae jeye Jestustha:

—Incane pana netsipaebare: ¿Jintam caitabara tsaquibobara xua bequein paca itabara cutatsi? jei barapomonae.

Bapoxonae iruru policiamonae pomonae Nacom pin pia bo tatsi peenaewi Jesús itabara cuaintatsi.

**Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, xua yabara jeichichi Jesús**

(Mt 26.69-75; Lc 22.56-62; Jn 18.15-18, 25-29)

<sup>66</sup>Poxonae cataunxuae Jesús cana exanompatsi bapoxonae iruru Pedro eca panatha tsica xua bo peuma werena. Bapoxonae yabuyo patopa powa sacerdotemonae pia pepa pentacaponaein tatsi tanacuitatsi. <sup>67</sup>Poxonae barapowa

Pedro tainchi xua nonopeca, Pedro came taeuncuatsi. Pedro jeichichi:

—Apara xam bayatha iruru napuna poneibame Jesús, pon Nazaret tomara-pin, jei yabuyo.

<sup>68</sup>Ichitha Pedro jume matawenta bapowa, jeye:

—Jopa dapon yaitaeinyo, matautano jopa yaputaeinyo pocotsiwa xua yabara paebame, jei Pedro.

Bapoxonae Pedro pona bomuxu coiboto beya. Bapoxonae wacara pebto fiba. <sup>69</sup>Equeicha bapowa Pedro tainchi. Bapoxonae bapowa tamropata pitaba xua tsipaeba pomonaetha pomonae baxota iru umena. Bapowa Pedro yabara paebatsi, jeye:

—Apara bapon pomonae Jesús pijimonae tatsi jiwapanin, jei.

<sup>70</sup>Equeicha Pedro jume matawenta bapowa, jeye:

—Jopa dapon yaitaeinyo, jei Pedro.

Pirapaeyo pomonae umena baxota equeicha Pedro tsipaebatsi jeichichi:

—Bara xaniwaicha barapomonae jiwana. Apara xam Galilea nacuapim, jei pomonae umena.

<sup>71</sup>Nexata Pedro jume daunweya, jeye:

—Bara Nacom peitabaratha xainyeya paca tsipaebatsi pocotsiwa bara xainyeya tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi: ‘Jopa dapon yaitaeinyo’, xuaunxuae pon payabara paebame, jei Pedro.

<sup>72</sup>Bapoxonae iruru caena nainya wacara pebto equeicha fiba. Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe pewunaeya poxonae ainya jume cuiyobetha wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo neyabara jam tsane. Bapoxonae nainya iru wacara pebto

fibina', jeichichi Pedro xua Jesús paeba. Nexata bapoxonae Pedro bichocono wecoyei peanthuthutanexae xua Jesús peyabara paebiwatsi.

**Meje yabara poxonae Jesús  
uncua Pilato peitabaratha tatsi**

(Mt 27.1-2, 11-14; Lc  
23.1-5; Jn 18.28-38)

**15** Poxonae pentha tsina sacerdotemonae pia pentacaponae tatsi, iruru judiomonae pia pitiri jiwi tatsi, iru pomonae jiwi pecuidubiwi Moisés pia peitorobi coyenein tatsi, iruru ichamonae pomonae pecanamata caitorobi bicheito jiwi jiwana, daxita barapomonae yabara nacaetuta xua nanta jupaya peburuya penanta xeinaenexa po coyeneya xua Jesús pebexubiwa tsainchi. Bapoxonae barapomonae Jesús maxu cutatsi. Bapoxonae capoinchi Pilato beya.

<sup>2</sup> Pilato Jesús yainyabatsi, jeye:

—¿Bara xam yatsicaya judiomonae itorobiya pia pepa neewatsin? jei.

Jesús jume nota, jeye:

—Xuaunxuae paebame bara baxua apara, jei Jesús.

<sup>3</sup> Sacerdotemonae pia pentacaponae tatsi namchi Pilatotha, jeye:

—Bapon Jesús bichocono exana pocotsiwa xua abe, jei barapomonae.

<sup>4</sup> Equeicha Pilato yainyaba Jesustha, jeye:

—¿Jopa jume notsim pocotsiwa barapomonae abe cayabara paeba? Maisa barapomonae bichocono abe cayabara paeba, jei Pilato.

<sup>5</sup> Ichitha Jesús jopa equeicha jume notsiyo, Pilato jopa jume notichi. Daxota Pilato najuntu coyene cabenaeca poru Jesús jopa nayabara paebiyo xua pia coya penayawenaenexa.

**Meje yabara poxonae Pilato jume  
baru jejei xua Jesús bara  
pebexubiwa tsainchi ichamonae**

(Mt 27.15-31; Lc  
23.13-25; Jn 18.38–19.16)

<sup>6</sup> Bara nama matabi jopa poxonae ba Pilato pia cui xaina poxonae ba jiwi tsinacaetuta pexaewa penanabanaenexa. Barapo matabi Pilato ba pu sotaba pon ba jiwi itapeta cowai xua Pilato peisanaxubinexa pomonae jiwi pecubi botha peenaewi jiwamonae pin. <sup>7</sup> Barapo jiwi pecubi botha iruru eca pon pewun Barrabás. Bapon bichocono abe peexanaein tsipei caena bayatha matabi ichamonae xua barapomonae najume tsacaba cana exanatsi xuano xua jiwi jutebatsi.

<sup>8</sup> Bapoxonae pin bicheito jiwi pata Pilatotha, xua Pilato pewucaenexa tsainchi xua bapon exanaena pia cui coyeneya poxonae xua isanaxubina caein pomonae jiwi pecubi botha peenaewi jiwonapin. <sup>9</sup> Bapoxonae Pilato yainyaba barapomonae Jesús yabara, jeye:

—¿Paichichipame xua tapu sotabiwa tsane pon judiomonae itorobiya pia pepa peewatsinchi? jei.

<sup>10</sup> Baxua Pilato paeba, tsipei bapon yaputane xua sacerdotemonae pia pentacaponae tatsi Jesús uwatsi. Daxota barapomonae Jesús caenaetaxubatsi Pilatotha.

<sup>11</sup> Ichitha barapo sacerdotemonae pia pentacaponae tatsi jiwi jume cui tsacabatsi xua anaepana cana exanatsi, xua Pilato pecui itorobinexatsi xua Barrabás pepu sotabinexatsi, xua Jesús jopa pepu sotabinexatsi. <sup>12</sup> Equeicha Pilato yainyaba barapo jiwi, jeye:

—¿Eta xua cana exanocuaein pon pawun dutame, xua pajam: 'Judiomonae itorobiya pia pepa peewatsinchi?' pajam, jei.



<sup>13</sup>Barapomonaē Pilato daunweya jume notatsi, jeye:

—¿Bewa maisa naetotha tɔparucua exanaem! jei.

<sup>14</sup>Bapoxonaē Pilato jeye barapomonaetha:

—¿Eta pocotsiwa xua metha jane, xua abe exana? jei.

Ichitha equeicha daumetha jume daunweya, jeye:

—¿Bewa maisa naetotha tɔparucua exanaem! jei.

<sup>15</sup>Pilato ichichipa xua bapon jopa peita aenae-aeneiwatsi jiwi. Daxota Pilato Barrabás nama pu sotabatsi. Bapoxonaē Pilato itoroba xua soldadomonaē bara Jesús moya pecuainchinexatsi pocotsiwatha eewa xua bichocono amɔpiya xua xota jiwi cuainteibatsi poxonaē abe exaneiba. Matautano itorobano xua moya bara Jesús tɔparucua exanaeinchi naetotha.

<sup>16</sup>Bapoxonaē soldadomonaē Jesús capoinchi Pilato pia bo tatsi beya po soldadomonaē yapu eena Pilato pia bo tatsi. Bapoxonaē barapo soldadomonaē waba icha soldadomonaē xua daxita barapo soldadomonaē Jesús pematawacaicha umenaenexa tsainchi.

<sup>17</sup>Bapoxonaē Jesús pia paparuwa juma xuenatsi. Yawa juma xatatatsi icha paparuwa po paparuwa tsobia xua Jesús be pecana exanaenexatsi pon jiwi itorobiya pia pepa peewatsinchi. Yawa poxonaē nacobe weta xua fata pee bapoxonaē Jesús muxuna mata xatatatsi barapo pee tepa. <sup>18</sup>Bapoxonaē barapomonaē tamropata notarɔcupa xua Jesús cui caponaeya jeichichi:

—¿Xamda? ¿Apara xam barapom pon judiomonaē itorobiya pepa Neewatsin! jei.

<sup>19</sup>Po naewa xua Jesús cobenatatsi bayatha, barapo naewa Jesús cobe wepitatsi. Bapoxonaē barapo naewatha Jesús mata cuaintatsi. Matautano Jesús

yabara naone subabatsi. Bapoxonaē barapomonaē Jesús peitabaratha tatsi pentabocototha taumeinchi, xua Jesús naerabiya wɔnae pejainchinexa tsainchi. <sup>20</sup>Poxonaē Jesús cana cui wetatsi xua cui caponatsi equeicha bapoxonaē Jesús caewa juma wejontatsi xua po paparuwa tsobia. Bapoxonaē equeicha caewa juma xatatatsi po paparuwa pia paparuwaxae tatsi. Bapoxonaē Jesús capoinchi xua pecobe matabobinexatsi naetotha pebexubinexatsi.

### Meje yabara poxonaē Jesús tɔparucua exanatsi naetotha

(Mt 27.32-44; Lc 23.26-43; Jn 19.17-27)

<sup>21</sup>Poxonaē Jesús namtotha caenapoinchi soldadomonaē, bapoxonaē barapo soldadomonaē taeba pebin, pon Cirene tomarapin pon pewɔn Simón. Bapon wexua werena pona. Bapon Alejandro paxa tatsi, irɔ xua Rufo paxa tatsi. Bapoxonaē barapo soldadomonaē Simón itorobatsi xua pecaponaenexa Jesús pia naeto tatsi, po naetotha tɔparucua peexanaenexatsi Jesús.

<sup>22</sup>Bapoxonaē Jesús capoinchi uruto beya, po uruto be jiton matasipa piwa, daxota barapo uruto jiwi wɔn unuta “Gólgota”, jei. <sup>23</sup>Baraxotiya Jesús apatatsi vino mera, po vino mera equeicha muxuna epareca mirra mera matawɔn po mera bichocono atsu. Ichitha Jesús jopa apaeyo. <sup>24</sup>Matautano bapoxonaē Jesús tɔparucua exanatsi. Bapoxonaē barapo soldadomonaē nata tsaba Jesús pia paparuwan tatsi. Barapomonaē bebeya ibotixi penacueranta notsinexa Jesús pia paparuwan tatsi.

<sup>25</sup>Poxonaē baya a las nueve tsuxubi, bapoxonaē Jesús tɔparucua exanatsi naetotha. <sup>26</sup>Jesús pentutu wet-sica tadutatsi napaewa xua barapo napaewatha tina. Barapo petinae dutsiwa

Jesús yabara jeichichi: “Baponje apara judiomonaē itorobiya pia pepa peewatsinchi”, jei barapo petinaē dutsiwa. <sup>27</sup> Iruru ponbe jiwi pecaibinbe tūparucua exanatsi naetotha imoxoyo ichaxota Jesús ducua. Ichun Jesús petsona wetarucuiyatsi, ichun pecoxa wetarucueinatsi. <sup>28</sup> Poxonaē barapomonaē baxua exana, bara barapomonaē yabara jume cui weta pocotsiwa xua bayatha Nacom Pejume Diwesitha Mesías yabara paebatsi xua jiwi paeba, xua jeye: “Bapon pomonaē abe peexanaewi jiwana”, jei.

<sup>29</sup> Pomonaē Jesús xenta poinchi barapomonaē Jesús cui capoinchi. Yawa Jesús yabara itata naichaquebatsi. Barapomonaē jeye Jesustha:

—¡Xam bayatha jam: ‘Nacom pin pia bo abe exanaein, bapoxonaē equeicha acoibi po matabibibe xanebin’, jam! <sup>30</sup> ¡Moya bara jinya coutha nacapanepare naeto wetsica icha bara metha Nacom Pexantom tsipaem! jei barapomonaē.

<sup>31</sup> Irū sacerdotemonaē pia pentacaponae wi tatsi, irū pomonaē jiwi pecuidubiwi Moisés pia peitorobi coyene tatsi, barapomonaē Jesús cui capoinchi, yawa najei Jesús yabara:

—Bapon cain capanepeibabei ichamonaē, came jopa nacapanepaeyo. <sup>32</sup> ¡Icha bara bapon Mesías, pon israelmonaē itorobiya pia pepa peewatsinchi, bu bapon bara pia coutha naeto wetsica ecoinca! ¡Xainya bapoxonaē jume cowuntatsi xua wataexae tsane! najei barapomonaē.

Barichirū baxua paebabe ponbe jiwi pecaibinbe, ponbe xua iruru cobe matatabadutatsibe naetotha. Baponbe iruru Jesús cui caponatsi.

### Meje yabara poxonaē Jesús tupa

(Mt 27.45-56; Lc 23.44-49; Jn 19.28-30)

<sup>33</sup> Poxonaē Jesús cataunxuae ducua naetotha, bapoxonaē daxita nacuantha bichocono aitaquiri xua poxonaē mateinyaxae weya, beya yatabopiya. Tres po horabe quirei tsuncuae. <sup>34</sup> Bapoxonaē Jesús jume daunweya wawai jeye: “Eloi, Eloi, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

<sup>35</sup> Ichamonaē pomonaē baxota Jesús jume taeumeinchi, barapomonaē jeye:

—Pajume taema, bapon waba, Elías wabatsi, pon Elías Nacom peitorobi jume pepaebin pon caena bayatha tupa, jei.

<sup>36</sup> Bapoxonaē caein bapomonaē jiwana nainya cuinaepoinya yawa pitaba esponja xua baxota pemene capichinexa vino mera xua po mera mene atsu. Poxonaē bapon baxota mene capita, naewatha duta xua Jesús petayoichaenexatsi xua petsutsubinexa. Bapon jeye:

—Abu, abu jopa apatsinde. Waxainchi abu matha taeinchi icha Elías patopeicaena xua bapon pepichinexatsi naeto wetsica, jei.

<sup>37</sup> Bapoxonaē Jesús jume daunweya wawai. Bapoxonaē nama tūpanaicha Jesús. <sup>38</sup> Bapoxonaē paparuwa, po paparuwa Nacom pin pia botha tatsi ducua, barapo paparuwa nainya bopiya epa matonta tsitsiqueica ainya epatobe naexanabe. <sup>39</sup> Soldadomonaē pia pentacaponaein tatsi, pon romanomonaepin pon Jesús peitabaratha tauncuatsi, poxonaē bapon tane xua Jesús tūparucua, bapon jeye:

—Apara bara yatsicaya bapon Nacom pepa Pexanto tatsi, jei.

<sup>40</sup> Barichi irū ainyawaxi yabuxi barapowaxi Jesús tsiwiyo taju

wetaumeinyatsi. Barapowaxi jiwana, ichowayo pewun María Magdalena, powa Magdala tomarapiwayo. Ichowayo iru pewun María, Santiago pon xuyapin, iru José matapin, baponbe penabe tatsi. Ichowayo iru pewun Salomé. <sup>41</sup>Barapowaxi Jesús bayatha matha puna jinompatsi xua Jesús peyawenaenexatsi xua poxonae Galilea nacuatha popona. Iru ichowaxi yabuxi pinmonae powaxi Jesús baru patopa Jerusalén tomaratha.

**Meje yabara poxonae Jesús petupaein ibo muthutha yauxatatabotatsi**

(Mt 27.57-61; Lc 23.50-56; Jn 19.38-42)

<sup>42</sup>Po mataqueitha pewun penacui xaxainchi maticabi poxonae judiomonae ba weta daxita xua penacuichiwa pewunaeya poxonae jopaena pentaquei seicae maticabi, poxonae quirei tsanaicha barapo penacui xaxainchi maticabitha bapoxonae patopa pebin Pilatotha. <sup>43</sup>Bapon pon pepatopaexae bapon pewun José, pon Arimatea tomarapin. Bapon pomonae pecanamata caitorobi jiji bicheito jiwana. Bapon baru cui itura jineibatsi jiji. Bapon yabara jume cowuntsiya wuna ewateiba po coyenewa xua poxonae Mesías patopaetsica pon jiji itorobiya peewetsinexatsi. José ajuntucoyenetsaquiya patopa Pilato pia xantha tatsi pewucaenexa Jesús petupaein. <sup>44</sup>Bapoxonae Pilato yabara najuntu coyene cabenaecataba xua bayatha Jesús tupa. Daxota bapon itoroba soldadomonae pia pentacaponaein tatsi pia yaputaetsi po coyene xua eta poxonae bayatha tupa. <sup>45</sup>Poxonae barapo soldadomonae pia pentacaponaein tatsi paeba xua pinae bayatha Jesús tupa, bapoxonae Pilato copata xua José bara pichina Jesús petupaein. <sup>46</sup>Bapoxonae José

pexeinya paparuwa comota. José naeto wepichica Jesús petupaein. Yawa mata quiyontabareca barapo pexeinya paparuwatha. Bapoxonae José ibo muthu iya boya Jesús petupaein. Yawa torenababapoinya pin ibo panawa. Yawa barapo ibo panawatha yauxatatabanota. <sup>47</sup>María Magdalena, powa Magdala tomarapiwayo iru icha María powa José pena tatsi, barapowabe tanebe ichaxota Jesús petupaein boyatsi.

**Meje yabara poxonae Jesús equeicha asu juina exanatsi petupae cuiru coyene weya**

(Mt 28.1-10; Lc 24.1-12; Jn 20.1-10)

**16** Nexata barapo judiomonae pia pentaquei seicae maticabi tatsi yapucaewaba poxonae quirei tsanaicha xua icha maticabi jopa. Bapoxonae María Magdalena, powa Magdala tomarapiwayo, iru icha María powa Santiago pena tatsi, iru ichowayoru powa pewun Salomé, daxita barapowaxi comoca petuxueiwan peponaenexa xua Jesús peperu epababinexatsi petupaein. <sup>2</sup>Bapoxonae baya caemumbotha, po maticabitha xua nanta carucua cae semanatha, barapowaxi capata petuxueiwan ichaxota Jesús ibo muthu iya boyatsi. Bapoxonae xometo pichatabina. <sup>3</sup>Barapowaxi caewaxi natsipaebenapona, najei:

—¿Jintam metha nacata pataxubina barapo ibo panawa xua yauxatatabotatsi? najei.

<sup>4</sup>Daichitha poxonae barapowaxi taerucupa xua po pin ibo panawatha yauxatatabota barapo ibo muthu bayatha cou yaupataxubanota. <sup>5</sup>Barapowaxi jojoniya barapo ibo muthu iya. Barapo ibo muthu tutu iya pewowin eca po muxunene pecoxa weya. Bapon nama xatata paparuwa, po paparuwa bichocono apiya yawa

bichocono inyapana. Barapo yabuxi bichocono junuwa, pewowin cunuwatsi. <sup>6</sup>Ichitha barapo pewowin jeye barapo yabuxitha:

—Jopa pajunuwinde. Paxam pajeitame Jesús Nazaret tomarapin, pon bayatha naetotha tupa. Ichitha bapon anoxuae xote jopa bocaeyo. Bayatha asu petupaeyo cuiru coyene weya. Pataema ichaxota Jesús bayatha botatsi petupaeyo. <sup>7</sup>Bara paponare, yawano patsipaebare Pedro iru ichamonaeyo pomonaeyo Jesús pijimonaeyo tatsirü. Nexata pajande: ‘Bepa Jesús paca tsiwana patopiyaeyo Galilea nacua beya poxonaeyo bara bepaiyaename. Bapoxonaeyo baxotiya pataename bapon icha be pocotsi coyeneya paca tsipaeba bayatha’, pajande, jei pewowin barapo yabuxitha.

<sup>8</sup>Barapo yabuxi ibo muthu wejojon-dena. Yawa bara weya ducupa tsipei bichocono pijunuwi jijiyeyi. Barapo yabuxi jopa paebiyo ichamonaetha poxoru bichocono junuwa.

**Meje yabara poxonaeyo Jesús  
María tsita naitutatsi powayo  
Magdala tomarapiwayo**

*(Jn 20.11-18)*

<sup>9</sup>Poxonaeyo Jesús asu exanatsiba petupaeyo weya po mataqueitha opi carucua xua cae semanatha poxonaeyo aena pentha, bapoxonaeyo Jesús tsita naituta María Magdalena, powa Magdala tomarapiwayo. Barapowa caena bayatha Jesús taitaweta cauri siete poyobe xua bapowa xeina barapo cauri, xua equeicha bapowa jopa pexeinaenexa. <sup>10</sup>Poxonaeyo Jesús tainchi bapowa pona pemuxu tsipaebinxo pomonaetha pomonaeyo anoxuae anthuthutane yawa wecoyeyi xua Jesús petupaeyo. Barapomonaeyo bayatha Jesús pepuna jinompaewichi. <sup>11</sup>Poxonaeyo barapomonaeyo jume tane

xua juinya Jesús asu poxonaeyo, yawa xua bapowa bayatha Jesús tainchi, barapomonaeyo baxua jopa yabara jume cowuntsiyo.

**Meje yabara poxonaeyo Jesús bebinbe  
tsita naituta namtotha poxonaeyo  
Emaús tomara beya ponabe**

*(Lc 24.13-35)*

<sup>12</sup>Pirapae bapoxonaeyo equeicha Jesús tsita naituta pijimonaeyo tatsi jiwanebetha icha cui coyeneya xua poxonaeyo jopa xapain yaitaetsi poxonaeyo namtotha pipatho ecaponabe aisawatha. <sup>13</sup>Bapoxonaeyo baponbe caibe nawiyabe. Yawa tsipaebabe ichamonaetha xua Jesús pijimonaetha tatsi xua po coyene bayatha Jesús baponbe tsita naitutatsibe. Ichitha barapomonaeyo barichiru iru jopa jume cowuntsiyoru barapo diwesi pocotsiwa baponbe paebabe.

**Meje yabara poxonaeyo Jesús cui  
itoroba pijimonaeyo xua pia  
diwesi tatsi daxita nacuantha  
petapaebiwa tsainchi**

*(Mt 28.16-20; Lc 24.36-49; Jn 20.19-23)*

<sup>14</sup>Pirapae Jesús tsita naituta pijimonaeyo pomonaeyo once poyobe poxonaeyo barapomonaeyo pexaethopae-watha iratha ena. Jesús pin jumetha muxutaenaquiya exana xua jopa pejume cowuntsixaetsi matautano peyabara muxusipanaexaetsi matauta xua jopa peyabara jume cowuntsixaetsi pocotsiwa paeba pomonaeyo tane xua Jesús equeicha bayatha asu poxonaeyo petupaeyo cuiru coyene weya. <sup>15</sup>Jesús jeye pijimonaetha: “Paponare, daxita nacuantha beya. Patsipaebare daxita jiwitha barapo pecapanenebiyae diwesi jume. <sup>16</sup>Pomonaeyo neyabara jume cowuntsina xua xan apara Nacom Pexanton tatsi, matautano xua bautisabatsi, barapomonaeyo capanenebiyaeinchi xua jopa

peweraweracaenexa. Ichitha pomonae jopa neyabara jume cowantsiyo xua xan Nacom Pexanton tatsi, barapomonae peraxa jubebinchi xua Nacom peyabara paebixae xua pinae barapomonae jopa jume cowantsiyo. <sup>17-18</sup> Pomonae neyabara jume cowantsina xua xan Nacom Pexanton tatsin muxuna exanaein xuae pocotsiwe: Barapomonae taitawetsina ichamonae cauri poxonae tawuntha wuqueibina; matautano barapomonae pena jumeintha cueicueijeji tsane; icha barapomonae jomon notsina pecobetha, jopa barapomonae tupa exanae tsainchi jomon; matautano icha barapomonae apaena po mera jiwi tupa exanatsi barapo mera jopa abe exanae tsainchi barapomonae; matautano barapomonae itacupaeinchi xua jayabina pecobetha pomonae peatenewi, xua bapoxonae barapo peatenewi peaxaibinexa tsaiibi tsane”, jei Jesús.

**Meje yabara poxonae Jesús  
athabe juinya Nacom pia  
peitorobi nacua beicha tatsi**

*(Lc 24.50-53)*

<sup>19</sup> Jesús pon jiwi Pecanamataxeinaeinchi, poxonae bapon najume

weta xua cueicueijeji pijimonaetha, bapoxonae Jesús asiya peitaboco beicha juinya exanatsi, xua Nacom exana. Bara xoteicha Jesús Paxa cuaretatsi pecoxa weya ainya cui peexanaenexatsi. <sup>20</sup> Bara barapomonae Jesús pijimonaetha tatsi ponarucupa. Yawano barapomonae cueicueijeji tsurubenaebiya jiwitha barapo pecapanenebiyae diwesi jumein daxita nacuantha. Bapon Jesús pon jiwi pepa Pecanamataxeinaeinchi yawena barapomonaetha. Matautano Jesús cana exana barapomonaetha xua barapomonae muxuna exana pexeinya petsita itatsi coyenewan xua daxota pocotsiwa barapomonae cueicueijeji jiwitha bara pexainyei jumein. Je, bara ichi tsane.

Baja Marcos.

## Jesucristo Pia Pexeinya Diwesi Jume Tatsi Lucas Petinae Diwesi

### Meje po diwesi yabara xua Lucas tamropata pitaba poxonae tina

**1** Jaco Teófilo. Ponxaem nentü cui xanepanaein, cata tinatsi. Pinmonae bayatha xuya cou tina diwesi Jesús yabara, xua ichamonae cou paeba, xua pinae Jesús poxonae xanepanaya popona pata xantha. <sup>2</sup>Pomonae cou xua baxua pepaebixae barapomonae pinae copiya yatsicaewa tane daxita pocotsiwa Jesús exana pata xantha. Matautano pinae barapomonae Nacom Pejume Diwesi tatsi cuidubeiba. <sup>3</sup>Xan netsita wünae daxota nanta xeinan xua yabara tayainyabiwa pomonae petinaexae yawa pecueicueijeixae daxita barapo diwesi xua pinae juinya Jesús exana. Bapoxonaе cuita cata tinapoinchi Teófilo jinya neyaputaenexa tsane daxita pocotsiwa Jesús exana juinya xua copiya tsoponae xuano xua bapoxonaе tsoponaeno. <sup>4</sup>Baraxua cata tinatsi jinya neyaputaenexa tsane barapo pexainyei jume po coyene ichamonae bayatha cacuiduba.

### Meje yabara poxonaе matatsunpin wünae yabara tsiwünae paeba xua Juan naexanaena pon jiji Pebautisabin tsane

<sup>5</sup>Caena bayatha poxonaе Herodes popona Judea nacuatha, xua pon Judea nacuapiwi peyanacua ewatsinchi, bapoxonaerü barichi popona barapo nacuatha sacerdotepin pon pewün Zacarías. Bapon jiwana po sacerdotepiwi pia matabuxü jiji pewün Abías. Piseuri tatsi pewün Isabel. Piseuribe pia pamo susato jiwana pin tatsibe, bapon pewün Aarón pon yatsicaya tabü ducua sacerdotepin.

<sup>6</sup>Piseuribe Nacom tsita jüntü coyene xanepanatsibe xua bara xanepanaya peexanaewabe. Pocotsiwa Nacom pon jiji Pecanamataxeinaein, nacana jume diwesi itoroba baxua itapeta beta exaneibabe. Daxota jopa yabara paebeibichibe jiji po coyene xua baponbe natsiaenae cuentabe xua abe peexaneibiwabe. <sup>7</sup>Ichitha pexui jopa xeinaeyobe, tsipei Isabel mawecowa, matautano tsipei bayatha acuewa irü tsipei pebin bayatha amo tsecae.

<sup>8</sup>Caentacabi poxonaе Zacarías ü pia matabuxü jiji pia cuitha exana Nacom nexa, bapon Zacarías xuya piamonae itapetatsi. <sup>9</sup>Barapomonae sacerdotemonae, pia cui coyene xeina xua caein piamonae jiwana itapetatsi poxonaе daxita barapomonae nacuita Nacom pon jiji Pecanamataxeinaein pin pia botha tatsi. Bapon Zacarías itapetatsi xua pejoniyenexa po tutu peainya cui tutu Nacom pin pia botha po tututha ichaxota exaneiba xua Nacom nexa. Barapo tututha Zacarías tauta petuxusi exanaenexa Nacom nexa xua Nacom peitorobixae. <sup>10</sup>Poxonaе Zacarías cataunxuae tuxusi exanawiya petuxueiwa xua tauta Nacom nexa, barapoxonaе daxita pomonae aisowa beumeinya barapomonae Nacom tsipaebompa. <sup>11</sup>Bapoxonaе Zacarías tsita naitutatsi matatsunpin pon Nacom pon jiji Pecanamataxeinaein itoroba. Po muxunene pecoxa weya matatsunpin iboto caquita uncuа po ibototha xua ichaxota tauteiba petuxueiwa Nacom nexa. <sup>12</sup>Poxonaе Zacarías taeba matatsunpin jopa yaputaeyo xua peexanaewa, bichocono pejunuwixae. <sup>13</sup>Ichitha matatsunpin Zacarías baraichi, jeichichi:

—Zacarías, jopa junuwinde. Nacom bara cajume tane poxonaе tsipaebibame bapon. Methaunxuae jinseuri Isabel tanaexanaeinchi pexuyo.

Jinseuri cata pabetsina pebin wuto. Xam wun dutsiname bapontha, po wun Juan, jei. <sup>14</sup>Juntu coyene weiweinaename. Barichi pinmonae juntu coyene weiweinaena xua bapon penaexanaexae tsane. <sup>15</sup>Bapon Juan Nacom pon jiwi Pecanamataxeinaein tsita ainya cui tsainchi. Bapon peatsaxae mera jopa apae tsane. Vino mera jopa apae tsaneno. Poxonae cataunxuae butiyotha eca bichocono juntu coyene yucaeinchi Nacom pia Pejumope tunaxu tatsi pia peayapusuwa tatsi. <sup>16</sup>Bapon cana exanaena xua ainya Israel nacuapiwi jume cowuntsina Nacom pon Pecanamataxeinaein jiwi xua barapomonae barapo Nacom pia Nacom tatsi tsainchi. <sup>17</sup>Juan tsiwanaya poponaena xua pon xua Nacom itorobina bapon tsiwanaya poponaeinchi. Juan xeinaena Nacom pia Pejumope tunaxu tatsi pia peayapusuwa tatsi icha cain Elías ichi pon Nacom peitorobi jume pepaebin. Bapon Elías bayatha tupa. Juan exanaena xua pexui paxewi antobe tsaibi tsainchi. Matautano Juan cana exanaena xua jume cowuntsina Nacom pomonae copiya Nacom pejumefebiwichi. Tsipei exanaena baxua, barapomonae tsiwanaya jume cui yabara najuntu coyene wunaetsina, xua barapomonae pejume cowuntsinexa Nacom pon Pecanamataxeinaein jiwi, jei matatsunpin.

<sup>18</sup>Zacarias yainyaba matatsunpin, jeye:

—¿Eta nejumichim yatsicaewara xua inta naexanaena pexuyo? Apra xan amo tsecaein. Iru tapetsiriwa apra inta acue tsecaeba, jei.

<sup>19</sup>Matatsunpin Zacarias jume notatsi, jeye:

—Apra xan Gabriel. Barapara Nacom ba imoxoyo caquita uncueiban. Nacom neitoroba bepara catsipaebichei barapo

pexeinya jume diwesi. Daxota yatsicaya naexanaenaba nexanto. <sup>20</sup>Incane jume taema. Yaitama jame maisa aunxuae jopa yabara nejume cowuntsim, daxota methaunxuae jopa cuinaya pae-bim tsane. Yajume aunyeibiya yantacabi jopaename poxonae beya abu nexanto naexanaena xuaunxuae catsipaebatsi, jei.

<sup>21</sup>Poxonae Zacarias tsipaebauyatsi, Zacarias pesato beya ewatumeinchi pomonae Nacom tsipaeba pesatotha. Barapomonae nabarai: “¿Eta pocotsiwa metha Zacarias came jopa jondenaeyo Nacom pin pia bo werena?” najei. <sup>22</sup>Poxonae Zacarias matapainya jondena jopa itacupaetsi xua petsipaebiwa barapomonaetha. Bapoxonae barapomonae nanta xeina xua metha bara Zacarias tsita naitutatsi xua wunae barapo tututha poxoru Zacarias pecobetha cowai barapomonaetha. Ichitha awiya came jopa cueicueijeiyoy.

<sup>23</sup>Poxonae Zacarias daxita nacobe weta xua exana Nacom nexa, Nacom pin pia botha, bapoxonae pia botha pona. <sup>24</sup>Pirapaeyo Zacarias piseuri tatsi Isabel bupana taecatsi pexuyo. Barapowa jopa naitutsiyo cinco po xometiyobe. Saya pia botha eca. <sup>25</sup>Barapowa nabarai, jeye: “Baxua Nacom inta exana pon Tanecanamataxeinaein. Bapon baxua inta exana xua jiwi jopa aura tana neexanaewa tsane”, najei bapowa.

**Meje yabara poxonae  
matatsunpin wunae tsiwanaya  
paeba xua Jesús naexanaena**

<sup>26</sup>Poxonae Isabel seis po xometiyobe yapucaewa poxonae pexuyo bupana taecatsi, bapoxonae Nacom itoroba matatsunpin, pon pewun Gabriel. Gabriel Nazaret tomara beitorobiyatsi po tomara eca Galilea nacuatha. <sup>27</sup>Gabriel patopa pesiwa ponaenexa yabuyo, powa ba-

pana jopa pebin pichiyo. Bapowa muxu pepichi pecotsiwa, pon pewun José. Bapon José David pia pemomoxi susato jiwana tatsi. Caena bayatha David Israel nacuamonae itorobiya pia pepa peewatsinchi. Barapowa powa José pecotsi-waxae tatsi pewun María. <sup>28</sup>Matatsunpin Gabriel, patopa ichaxota María eca. Gabriel barai, María baraichi, jeye:

—María jaco. Nacom itapeta cayabara tsita juntu coyene xanepanatsi beyacaincha icha yabuxi. Matautano barapara Nacom pon jiwi Pecanamataxeinaein cabaru popona, jei matatsunpin.

<sup>29</sup>Ichitha poxonaе jume taeba bapowa, yabara jume cuitaya nabenaeca. Pia coutha nayainyaba jeye: “¿Eta xua bapon nejacoba jane?” najei. <sup>30</sup>Matatsunpin María baraichi, jeichichi:

—María, jopa junuwinde, Nacom cayabara tsita juntu coyene xanepanatsi. <sup>31</sup>Matha taema xam methaunxuae pexuyo yapuruwa jinaename xuano bara pabetsiname nexanto. Bapoyo wun dutsiname po wun Jesús. <sup>32</sup>Bapon ainya cui peexanaeinchi tsainchi. Bapon wun dutinchi, icha wun jei tsainchi: ‘Nacom Pexanto tatsi pon peitabocotha eca’, jei tsainchi. Nacom pon Pecanamataxeinaein jiwi, bapon pexanto cana exanaena xua bapon jiwi itorobiya pia pepa Peewatsinchi tsane icha matha David cana ichichi, pon Jesús pia pamo susato jiton tatsi. <sup>33</sup>Bapon yacui tsitecaena xua jiwi peewatsinchi penaexanaewa tsane Israel piamonae susato saineiwi pexantha tatsi. Pia peitorobi coyenewa tatsi jopa weraweracae tsane, jei Gabriel, pon matatsunpin.

<sup>34</sup>Nexata María jume nota matatsunpin, jeye:

—¿Eta xua yapuruwa jinocuaein pexuyo? Apará cataunxuae jopa nacueyabinyo, jei María.

<sup>35</sup>Matatsunpin jume nota, jeye:

—Nacom pia Pejumope tunaxu tatsi cata patopeicaena. Matautano Nacom pon bichocono pepa pejuntu coyene xanepanaein bapon, pia peayapusuwa tatsi cantatsun matawacaicha nontsicaena icha be tsaquinaebowa ichi tsane. Daxota po pexuyo naexanaena, barapo pexuyo Nacom tsita juntu coyene xanepanaeinchi. Barapo pexuyo yabara jei tsainchi: ‘Nacom Pexanto tatsi’, jei tsainchi. <sup>36</sup>Iruru barichi jinyamonaewayo Isabel, bequein bara acue tsecae, ichitha anoxuae pexanto yapuruwa jina. Anoxuae barapowa seis po xometiyobe yapucaewa xua yapuruwa jina bequein copiya mawecowa. <sup>37</sup>Dapocotsiwa aibi pocotsiwa Nacom tsita ayapubetsi, tsipei bapon daxita bara yaputane.

<sup>38</sup>Nexata María namchi, jeye:

—Xan bara barapowayun xua taexanaewayon pocotsiwa Nacom pon jiwi Pecanamataxeinaein neitoroba. Bu moya bara Nacom inta exanaena xuaunxuae netsipaebame, jei María, matatsunpintha.

Bapoxonaе matatsunpin napitaba.

### **Meje yabara poxonaе María siwa pona, xua Isabel siwa poinchi**

<sup>39</sup>Pirapaeyo María nainya pontaba tomara beya, po tomara eca ichaxota ira marafowowa xua Judea nacuatha. <sup>40</sup>Baxota barapowa María joniya Zacarías pia botha tatsi. Bapoxonaе Isabel jacobatsi. <sup>41</sup>Poxonaе Isabel jume tane xua María jacobá, bapoxonaе pia pexuyo tsiperu natsixibecatsi Isabel. Bapoxonaе Nacom pia Pejumope tunaxu tatsi pia peayapusuwa tatsi Isabel juntu coyene yacatsi. <sup>42</sup>Bapoxonaе Isabel jume daunweya wawai xua María baraichi, jeye:

—¡Nacom cayabara tsita juntu coyene xanepanatsi beyacaincha icha yabuxi! ¡Barichi nexanto Nacom yabara tsita



juntũ coyene xanepanatsi! <sup>43</sup>¡Xam powa Tanecanamataxeinaein pena tatsim, bichocono auran xua tana nesiwa ponaewam tsipei jopa taainya cuiwayon! <sup>44</sup>Poxoru poxonae cajume tainchi xua nejacobame bapoxonae pexuyo netsiperũ weiweinaya natsixibeca. <sup>45</sup>Juntũ coyene weiweiname nejume cowuntsixae tsipei bara nayabara jume cui wetsina pocotsiwa Nacom pon jiwi Pecanamataxeinaein yabara catsiwũnae muxu duta pon Pecanamataxeinaein jiwi xua poxonae matatsunpin catsipaeba, jei Isabel.

<sup>46</sup>Nexata María namchi, jeye:

“Tajuntũ coyene Nacom wũnae jaintatsi pon jiwi Pecanamataxeinaein.

<sup>47</sup>Matautano tajuntũ coyene Nacom yabara weiweinatsi pon Tanecapanepaein.

<sup>48</sup>Nacom neweyatane xua xan saya tapawin.

Bara barapowayũn, powayũn xua taexanaewa pocotsiwa Nacom neitoroba.

Anoxuae xuano bexa tsaneno daxita jiwi pomonae

naitapataya naexanaponaena wũnae nejainchina

tsipei Nacom nejuntũ coyene weiweina exana bichocono beyacaincha icha yabuxi.

<sup>49</sup>Bapon Nacom pon peayapusũ itorobi coyene

pexeinaein inta bichocono wũnae exana. Bapon Nacom pepa pejuntũ coyene xanepanaein.

<sup>50</sup>Bapon Nacom yaweneibina jiwi pia peantobewaxae

pomonaetha pomonae copiya pecunuweibixaetsi.

<sup>51</sup>Nacom tsita itũba xua peayapusũ itorobi coyenewa xeina.

Baxua exana poxonae juntũ coyene amanayaba

pomonaetha pomonae atsaquiya penayabara

paebiwi xua ichamonae peaebiwichi.

<sup>52</sup>Nacom cui pita cana exana pomonaetha pomonae

pecanamataxeinaewi xua equeicha barapomonae jopa

naexanae tsane xua pecanamataxeinaewa jiwi.

Ichitha nama pomonaetha pomonae pecui pawi

naexana barapomonaetha Nacom cana exana xua

barapomonae penaexanaewa pomonae pecanamataxeinae jiwi.

<sup>53</sup>Pomonae xua piyain barapomonaetha Nacom cana

exana xua barapomonae petonsanaewa xua

penabanaewa po pexaewa pexeinya pexaewan.

Matautano copei pexeinaewi barapomonaetha Nacom

cana exana xua barapomonae pecobesainaewa.

<sup>54</sup>Nacom yaweneiba pijimonae Israel nacuapiwi

pomonae pia pamo susatopin tatsi, bapon Israel pon tanacuita Nacom.

Nacom jopa yabara juntemainaeayo xua peyaweneibiwa barapo pijimonae peantobexae.

<sup>55</sup>Nacom daxita exana pocotsiwa Abraham wamo

susatopin yabara tsiwũnae muxu dutatsi xuano xua yabara tsiwũnae muxu dutatsi pia

pemomoxi susato jiwi tatsi”, jei María.

<sup>56</sup>María cataunxuae acoibi po xometiyobe eca Isabel pia botha tatsi. Bapoxonae equeicha caibe nawiya pia bo beya.

**Meje yabara poxonae Juan  
naexana pon jiwi Pebautisabin**

<sup>57</sup> Nexata Isabel xua bupana taecatsi pexuyo, peru cui nauchitane. Bapoxonae pexuyo tanowaeincuatsi xua pexanto. <sup>58</sup> Pomonae Isabel pia botha petaenaewichi, iruru piamonae tatsi pomonae pecuaria petaenaewichi daxita barapomonae Isabel siwa poinchi xua pe-jacobinexa tsainchi. Barapomonae yaputane xua Nacom pon Pecanamataxeinaeinxae jiwi Isabel beta taexanatsi poxonae Isabel dacotsiwa taitorobatsi pexuyo. <sup>59</sup> Poxonae ocho po matabibibe yapucaewa barapoxonae pexuyo wi thabatsi xua pebin wutoxae xua ichaxota nareixacaeca. Barapomonae nanta xeina xua pexuyo wun dutsinchi po wun pexuyo paxa tatsi xeina, xua po wun “Zacarias”, jei. <sup>60</sup> Ichitha pexuyo pena tatsi namchi barapomonaetha, jeye:

—Jume, jame bewa jei: ‘Juan’, jei, jei pexuyo pena tatsi.

<sup>61</sup> Bapoxonae barapomonae Isabel baraichi, jeye:

—¿Exua? Jinyamonae dapocotsi wun aibiba, po wun: ‘Juan’, jei, jei barapomonae.

<sup>62</sup> Nexata barapomonae moya pecobetha cowai Zacariastha. Matautano pecobetha cowaya yainyaba, Zacarias yainyabatsi jeichichi: “¿Eta po wun jinya nexanto wun dutsichi?” jei barapomonae. <sup>63</sup> Zacarias wuca napaewa petinaenexa tsane. Bapoxonae barapo napaewatha jei xua tina: ‘Apara pewun Juan’, jei. Bapoxonae barapomonae najuntu coyene benaeca xua iru bapon namchi: ‘Bara pewun Juan’, jei. <sup>64</sup> Poxonae baxua exana, caena bapoxonae jemeicha Zacarias equeicha caewa paeba. Equeicha ebato sadujei xua cueicueije. Zacarias tamropata pitaba xua wunae jainta Nacom. <sup>65</sup> Bapoxonae daxita

pomonae imoxoyo jinompa ichaxota Zacarias piseuribe poponabe, daxita barapomonae junuwa. Matautano pomonae xua pejinompaewi daxita ichaxota po ira xua marafofowa xua barapo Judea nacua, daxita barapomonae paebinouta pocotsiwa xua bayatha petaexae. <sup>66</sup> Daxita pomonae jume tane, barapomonae najuntu coyene yabara nanta xeina nawita. Matautano caemona nantiya nayainyaba najei: “¿Eta bichane metha pexuyo poxonae wichabina?” najei barapomonae. Apara poxoru Nacom pon Pecanamataxeinaein jiwi bichocono pexuyo petsita juntu coyene xanepanaexaetsi daxota barapomonae baxua paeba.

**Meje yabara xua Zacarias pia wei**

<sup>67</sup> Pexuyo paxa tatsi Zacarias, juntu coyene yucatsi Nacom pia Pejumope tana xua tatsi pia peayapusuwa tatsi. Matautano bapon cueicueije po jumetha po jume Nacom cata. Zacarias namchi, jeye: <sup>68</sup> “Nacom pon Pecanamataxeinaein jiwi,

pon Israel pia Nacom tatsi, barabu wunae jainchinchi barapo Nacom. Tsipei bapon bayatha patopeica waxantha.

Bapon bara piamonaetsi. Matautano bapon bayatha naca capanepa.

<sup>69</sup> Pon Nacom nacata itorobica bapon pon jiwi pecapanenebiyaein pia peayapusuwatha.

Bapon David pia pemomoxi susato jiwana tatsi.

Bapon David pon Nacom pia petanacuitinchi xua

peexanaewa pocotsiwa Nacom itoroba.

<sup>70</sup> Caena bayatha Nacom yabara naca tsiwunae

muxu duta, poxonaē itoroba pia  
peitorobi jume  
petapaebiwichi xua wanaca  
tsipaebinexa.

<sup>71</sup> Bara naca tsipaeba xua pinae bapon  
pon Nacom

wanacata itorobicaexae, pinae naca  
capanepaena pomonaē wanaca  
aitafaetabi

jiwi pia xainya weya tatsi.

Matautano pinae naca capanepaena  
pomonaē

wanaca ita aenae-aenei jiwi pia  
xainya weya tatsi.

<sup>72</sup> Matautano Nacom naca tsipaeba xua  
pinae

wamo susatopiwi yabara  
canantaxeinaeinchi

xua peyawenaenexatsi.

Matautano pinae jopa jüntemainaē tsane  
xua wamo susatopiwi

peyawenaponaewatsi

xua bayatha Nacom yabara petsiwūnaē  
muxu dutsixae baxua.

<sup>73</sup> Baraxua Nacom naca tsiwūnaē muxu  
duta

xua xainyeya bara paeba poxonaē  
Abraham

tsipaebatsi, pon wamo susatopin.

<sup>74</sup> Nacom Abraham tsipaebatsi xua pinae  
naca

capanenebiya tsane wanaca aitafaetabi  
jiwi weya.

Baxua pinae nacata exanaena xua pinae  
waexanaewa tsane pocotsiwa naca

itoroba,

xuano jopa wacunuwinexa tsane  
ichamonae pinae.

<sup>75</sup> Matautano nacata exanaena xua pinae  
beta

jinompaeinchi bapon peitabaratha, xu-  
ano xua

jüntu coyene xeicaeya jinompaeinchi  
daxita

matacabintha xua jopa abe  
waexanaponaewa.

<sup>76</sup> Iru xam taxantom Juan jiwi cayabara  
wūn

dutsina pon Nacom peitorobi jume  
pepaebin,

pon itabocotha eca, cayabara jei tsane.

Baxua cayabara jei poxoru xam  
tsiwanaya

patopaename pon jiwi pia pepa  
Pecanamataxeinaein.

Daxita jiwi jüntu coyene wūnaetsiname

pepatopaenexa tsane pon jiwi pia pepa

Pecanamataxeinaein, pon Mesías.

<sup>77</sup> Nacom caitoroba Juan xua jiwi  
neyaputane

neexanaenexa tsane xua Nacom  
jüntemainaena

jiwi abe pia peexanae cuiru coyenein  
tatsi.

Bapoxonaē Nacom barapomonaē  
capanenebiya

exanaeinchi bapon beya xua jopa Nacom  
petsita

natsicuentisixaetsi xua abe peexanaexae.

<sup>78</sup> Wanacom jopa juniya wanaca anto-  
bexae xuano

xua wanaca yawenaexae nacata  
itorobicaena

pexanto itaboco wetsica.

Nacata wūnaē exanaena icha xometo  
ichi xua

nacata wūnaē poxonaē pentha pena  
matacabiexae.

<sup>79</sup> Poxonaē patopeicaena pon Nacom  
itorobicaena,

bapoxonaē bapon jiwi jüntu cui

weiweinaya exanaeinchi.

Baxua exanaeinchi, pomonaetha  
pomonaē pejume

cowūntsiwi bequein copiya  
barapomonaē

muxu pewerapae bichocono abe  
peexanaexae.

Yawa Nacom naca jumope antasu  
exanaena,

xua jüntema wajinompaeinexa tsainchi”,  
jei Zacarías xua pexanto barai pon Juan.

<sup>80</sup>Barapo pexuyo Juan wichabeca. Matautano ajuntuyapusuya popona xua Nacom yabara yaputaepona. Juan ira xuepana susato tsurucuae nacuatha tsana popona, beya poxonae po mataqueitha poxonae Juan tsita patopa Israel nacuapiwi pebautisabinexa barapomona.

**Meje yabara poxonae Jesús  
nowaeuncua pebin wato  
barapo cae pin nacuathe**

(Mt 1.18-25)

**2** Iruru bapoxonae popona romanomona itorobiya pia pepa peewatsinchi, pon pewun Augusto. Bapon itoroba piamonae peexanaenexa censo matawun xua pewun tinaewan xua daxita carepaya tomaran jiwi wun tinaeinchi. <sup>2</sup>Barapo censo matawun xua pewun tinaewan jiwi, baxua matapainya nacobe cui juta poxonae Cirenio Siria nacuapiwi pia peyanacua ewatsinchi naexana. <sup>3</sup>Daxita jiwi tsanaya barompaya pia pepa tomaran bewa benawibiyaena, ichaxota pia pamo jiwi tatsi tanowaeumeinchi. <sup>4</sup>Daxota José Nazaret tomara wewarapiya, xua Galilea nacua weya. Belén tomara bewarapiya po tomara eca Judea nacuatha. Baraxota caena bayatha David pon judiomona itorobiya pia pepa peewatsinchi nacatsiwa, pon José pia pamo jiwi susato jiwana tatsi, pon yatsicaya tabu ducua. <sup>5</sup>José pecotsiwa baru pona pewun tinaenexa tsainchibe. Barapowa pewun María. Barapowa pexuyo bupana taecatsi. <sup>6</sup>Poxonae cataunxuae baraxota Belén tomaratha ecabe, bapoxonae María xua bupana taecatsi pexuyo, bara weaperutanetsiba. <sup>7</sup>Bara bapowa tanaexanatsi pexanto pon copiya tanacatsiwatsi. Barapo pexuyo paparuwantha tsiwixitha mata quiyontababota jeriyotha, po naeyotha

ichaxota vaca naepanaewa xayathopa. Tsipei tutu quecona po bomuxutha ichaxota jiwi maiteiba pomonae pateiba pomonae siwa poneiba.

**Meje yabara poxonae  
matatsunpiwi patsica ichaxota  
pomonaetha pomonae oveja  
duweimonae peyapu eenaewi**

<sup>8</sup>Imoxoyo Belén tomaratha, pebiwi oveja duweimonae yapu eeneiba wexotha poxonae merawi. <sup>9</sup>Nexata jemeicha barapo pebiwi tsita naitutatsi matatsunpin po matatsunpin itorobicatsi xua pon jiwi Pecanamataxeinaein itorobica. Matautano Nacom pon jiwi Pecanamataxeinaein pia peitupanae coicha tatsino barapomona matawacaicha uncueicatsi. Barapo pebiwi bichocono junuwa. <sup>10</sup>Nexata matatsunpin barapomonae baraichi jeye: “Jopa pajunuwinde. Apra paca tsipaebatsi pexeinya jume diwesi xua po diwesi daxita jiwi juntu coyene weiweina exanaeinchi. <sup>11</sup>Poxoru anoxuae ichowayo tanaexanatsi pexuyo. Barapo pexuyo naexana David pia tomaratha tatsi xua Belén tomara. Barapo pexuyo, pon jiwi pecapanenebiyaein. Bapon apra pewun Mesías pon Pecanamataxeinaein jiwi, pon Nacom weitorobicatsi. <sup>12</sup>Bara barapo pexuyo paca ita cayopitatsi xua pataebotsiname vaca pia boyotha. Pataebotsiname barapo pexuyo xua paparuwatha mata quiontababotatsi jeriyotha ichaxota po naeyotha vaca naepanaewan xayathopa”, jei matatsunpin.

<sup>13</sup>Bapoxonae jemeicha equeicha icha matatsunpiwi pin bicheito naitubarucupa ichaxota icha matatsunpin uncua. Barapo matatsunpiwi itaboco wepatsica. Barapomona Nacom wuna jaintatsi. Barapo matatsunpiwi namchi, jeye:

<sup>14</sup>“;Maisa bichocono Nacom wūnae jaintatsi pon itabocotha peecaen, peitorobixae pexanto! ;Barabū jiwī jūntema jinompa barapo irathe pomonae xua Nacom jūntū coyene weiweina exanatsi!” jei matatsunpiwi.

<sup>15</sup>Poxonae matatsunpiwi athabe ichicha caibeicha itaboco beicha, bapoxonae pomonae oveja duweimonae peyapu eenaewi barapomonae nabarai, jeye:

—Bū poinchi Belén tomara beya wataenexa tsane pocotsiwa bayatha Nacom exana, xuano xuaunxuae matatsunpin naca tsipaeba pon jiwī Pecanamataxeinaein nexa, jei barapomonae pomonae oveja duweimonae peyapu eenaewi.

<sup>16</sup>Barapoxonae oveja duweimonae peyapu eenaewi nainya ponarūcupa. Barapoxonae María irū José caxibarūcupatsi. Irū pexuyo poyo boqueca jeriyotha vaca matabotha caxibarūcupatsi.

<sup>17</sup>Poxonae barapomonae taerūcupa pexuyo, barapomonae tsipaeba nawita ichamonaetha pocotsiwa bayatha barapomonae petsipaebixaetsi matatsunpin xua pexuyo yabara.

<sup>18</sup>Daxita pomonae jume taerūcupa baxua yabara najūntū coyene cabenaeca xua pomonae oveja duweimonae peyapu eenaewi pepaebixae baxua.

<sup>19</sup>María barapo diwesi moya yawūn xaina pejūntū coyenewatha xua jume cui cayabara nanta exaba. <sup>20</sup>Bapoxonae oveja duweimonae peyapu eenaewi caibe nawibiya. Barapomonae Nacom wūnae jaintatsi petaexae xuano pejume taexaeno xua bayatha matatsunpiwi pepaebixae. Barapomonae namchi, jeye:

—Maisa Nacom pon pepa yatsicaewa pejūntū coyene xanepanaein, jei.

**Meje yabara poxonae María irū  
José caponabe Jesús  
Nacom pin pia botha tatsi**

<sup>21</sup>Poxonae ocho po matabibibe yapucaewa, pexuyo wi thabatsi, xua pebin wūtoxae xua ichaxota nareixacaeca. Baxua judiomonae pia cui coyenetha tatsi. Barapoyo wūn dutatsi pewūn Jesús, po wūn bayatha matatsunpin wūn unuta xua María muxu tsipaebatsi poxonae María cataunxuae abū jopa būpana taecaetsi pexuyo.

<sup>22</sup>Nexata matabibi jopa, xua po matabibibe María irū José bewa pepon naxanebibe xua sacerdotemonaepin taexanaena be pocotsi coyeneya bayatha Moisés pia peitorobi coyenewa tatsi paeba xua daxota jopa penataxobinexa. Bapoxonae María irū José pexuyo caponabe Jerusalén tomara beya pecatsinexa tsanebe pexuyo Nacomtha pon jiwī Pecanamataxeinaein xua petsita itapeinya xeinaenexabe xua barapo pexuyo Nacom petanacuichiwa tsainchi poxonae pinyo tsane.

<sup>23-24</sup>Baxua exana tsipei Nacom pia peitorobi diwesitha tatsi tina, jeyei: “Daxita jiwī pia pexui tatsi, pebin wūtixi, poxi copiya nacatsiwena, bapoxi Nacom itapeta pia taexanaetsi pocotsiwa Nacom ichichipa”, jei Nacom pia peitorobi jume diwesitha tatsi. Yawa ponabe pecaponaenexabe pepupunaein xua pecatsiwa Nacomtha xua sacerdotemonaepin pebexubinexa xua petautsinexa xua petuxusi exanaenexa tsane Nacomtha María nexa yawa José nexa. Nacom peitorobi coyenewa tatsi jeyei: “Bara irū ainya tsaqueintobe care. Ichacuitha icha tsaqueintobe aibi, bara irū ainya topibotobe care”, jei.

<sup>25</sup>Irū irū barapoxonae pebin popona Jerusalén tomaratha, bapon pewūn Simeón. Bapon pejūntū coyene xanepanaein. Bapon wūnae jainteiba

Nacom. Bapon wūnae ewateiba xua Nacom itorobina pon Israel nacuapiwi pia Pecanamataxeinaein tatsi nexa. Bapon Israel nacuapiwi pu capanepaeinchi romanomonae weya. Barapo romanomonae icha nacua werena pona xua Israel nacuapiwi cueranta enatsi. Tsipei barapo romanomonae Israel nacuapiwi canamataxeinatsi. Nacom pia Pejumope tūnaxū tatsi Simeón barū popoinchi. <sup>26</sup>Nacom pia Pejumope tūnaxū tatsi Simeón yaputane exanatsi xua pinae copiya taena Mesías pon xua Nacom, pon jiwi Pecanamataxeinaein itorobina. Bapoxonae xua pinae pirapaeyo tūpaena. <sup>27</sup>Nacom pia Pejumope tūnaxū tatsi Simeón joniya exanatsi Nacom pin pia botha tatsi. Bara José irū pexuyo pena tatsino patopabe Nacom pin pia botha tatsi. Pexuyo capatopabe petacana exanaenexa tsainchibe icha be pocotsi coyeneya Moisés pia peitorobi coyenewatha tatsi itoroba. <sup>28</sup>Simeón isapita pexuyo. Nacom wūnae jaintatsino. Simeón namchi, jeye: <sup>29</sup>“Nacom pon Tanecanamataxeinaem, bara anoxuae caitacūpa xua tanecopatsiwam xua bara jūntemiya tatūpaewa tsane. Tsipei anoxuae bara nayabara jume wetame pocotsiwa bayatha yabara netsiwūnae muxu dutame. Poxoru xan bapon tsocuaein xua exanan xua neitorobame. <sup>30</sup>Xan yatsicaewa bara tanba, pon Pecapanenebiyaein jiwi. <sup>31</sup>Bapon tan pon xua itorobicapaebame, xua daxita jiwi taena xua bapon taeinchi. <sup>32</sup>Bapon yaputane exanaena xua Nacom yaputaeinchi pomonae jopa judiomonae naexanaeyo. Tsipei bapon be bapocotsin, xua poxonae jiwi

beta tane exainchi merawi xua xota yonoyonei. Yawano bapon exanaena xua Israel nacuapiwi, pomonae jinyamonae xua wūnae jaintinchi xua ichamonae wūnae jainchina”, jei Simeón.

<sup>33</sup>María irū José yabara najūntū coyene cabenaecabe pocotsiwa Simeón pexuyo yabara paebatsi. <sup>34</sup>Nexata Simeón barai, Nacom baraichi xua María yabara yawano xua José yabara, jeye: “Jūntū coyene weiweina exande baraponbe”, jei. Nexata Simeón, María baraichi xua pexuyo pena tatsi:

—Barapo pexuyo Nacom itapeta xua bapon peexanaenexa tsane po coyene xua Israel nacuapiwi ichamonae Nacom beya peponaenexa xua ichacuitha icha ichamonae Nacom beya jopa peponaenexa tsane. Yawa Nacom itoroba barapo pexuyo, peitūbinexa Nacom pia peayapusūwa ichitha ichamonae jume cui aitaftabi tsaibi tsane. <sup>35</sup>Daxota barapo pexuyo yaputaena pocotsiwa jiwi pejūntū coyeneintha nanta xeineibina. Ichitha xam, María, daxita baxuan caajūntūcoyenerewe exanaena be poxonae ichūn canthūthū tsapinopaena cusitha, jei Simeón xua María tsipaebatsi.

<sup>36</sup>Iṛū baxota poponarū petsiriwa, pewūn Ana. Barapowayo Nacom peitorobi jume pepaebiwayo. Barapowa Fanuel pexantiyo tatsi. Aser pon yatsicaya tabū ducua bapon pia pemomoxi susato jiwana tatsi. Barapowa bara nama penapataewa tsoponae. Barapowa caena bayatha poxonae penowayo tsecae jitha eca. Pia pebinbe siete po weiyobe nabarū poponabe. Bapoxonae pebin tūpa. <sup>37</sup>Barapowa caena bayatha piseuri cuenta tūpatsi. Anoxuae nama

barapowa yaochenta y cuatro po weiyobe jopaba. Barapowa Nacom pin pia bo weya jopa pichapebiyo. Saya exaneiba pocotsiwa Nacom itoroba merawintha yawa matakabintha. Najainboteibano poxonae tsipaebaiba Nacomtha. <sup>38</sup>Poxonae Jesús caponatsi Nacom pin pia botha xua Nacom pecatsinexatsi bapoxonae Ana imoxoyo caquita uncuá barapomonaetha. Barapowa tsipaeba Nacomtha, jeye: “Nacom maisa juntu coyene weiweinán xua painta itorobame barapo pexuyo”, jei Ana. Bapoxonae Ana yabara paebaxoya pexuyo jiwitha pomonaetha pomonae wunae ewateiba po coyene xua Nacom itorobina Israel nacuapiwitha pon Israel nacuapiwi capanenebiya exanaeínchi romanomonaé weya.

**Meje yabara poxonae Jesusbaru caibe iyyia Nazaret tomara beya**

<sup>39</sup>Nexata María iru José wetabeba daxita xua Nacom, pon jiwi Pecana-mataxeinaein, peitorobi jume coyenewa paeba. Bapoxonae caibe canawiyabe pexuyo Galilea nacua beya xua pia tomara beyabe, Nazaret tomara beyabe. <sup>40</sup>Pexuyo wichabeca. Matautano bichocono daunwei nawita, peyaputae coyene xexenaponano. Nacom tsita juntu coyene xanepanapoinchi.

**Meje yabara poxonae Jesús siwa pona Nacom pin pia bo tatsi**

<sup>41</sup>Jesús pena tatsi iru paxa tatsi daxita weitha poneiba Jerusalén tomara beya xua nataiba Pascua wun matakabin. Barapo Pascua wun jei, poxonae Israel nacuapiwi nanta xeina xua poxonae pinae bayatha pia pamo susato jiwi tatsi capanenebiya exanatsi Egipto nacua weya, xua Nacom capanenebiya. <sup>42</sup>Poxonae Jesús doce po weiyobe yapu jopa, María iru José iru

Jesús, Jerusalén tomara be-iyiya. Tsipei barapomonaé pia cui xua poneiba barapo Pascua wun matakabin nexa. <sup>43</sup>María iru José caibe nawirenabe pia tomara berena poxonae barapo matakabin weta. Ichitha pewowin Jesús naruntaba Jerusalén tomaratha. Jesús pena tatsi iru José jopa taeyobe xua Jesús nacopataba. <sup>44</sup>Nanta xeinabe xua Jesús mexeya itara napunaecaponawei pin bicheitha. Caentacabitha María iru José namtotha naecaponabe, bapoxonae itaxanawiyabe pexanto. Necobauyabe pexanto pin bicheitha pia matabuxuyo jiwimonaetha, pijiwimonaethano. <sup>45</sup>Jopa pexanto caxinaebe. Bapoxonae equeicha caibe iyabe Jerusalén tomara beya, pewenaweneinexa tsanebe pexanto baxotiya equeicha.

<sup>46</sup>Poxonae acoibi po matakabiyobe yapucaewa Jerusalén tomaratha baxota pexanto caxinabe Nacom pin pia botha tatsi. Jesús naeca ichaxota pomonae jiwi pecuidubiwi Nacom pia peitorobi jume. Jesús jume tane barapomonaé. Matautano yainyabano nawita barapomonaetha. <sup>47</sup>Daxita pomonae jume tane, najuntu coyene cabenaeca tsipei Jesús peyaputaein tsecae, matautano tsipei Jesús beta jume nota. <sup>48</sup>María iru José poxonae baxua cui tanebe najuntu coyene cabenaecabe. María pexanto barai, jeye:

—Owae, ¿eta xua metha baxua painta exaname? Axa iru xan paca yabara najuntu coyene exabatsibe, paca jeitom-patsi, jei.

<sup>49</sup>Jesús jume nota pena, jeye:

—¿Eta pocotsiwa metha ichawa beya pana nejeitompame? ¿Metha bara jopa payaputaem jampa xua bewa necui eenaena xua Taxa pia cui yabara tatsi? jei.

<sup>50</sup>Ichitha María iru José jopa xapain yaputaeyobe pocotsiwa Jesús paeba.

<sup>51</sup> Jesús caibe nanawiya pena tatsibarútha Nazaret tomara beya. Jesús pena jume jejei tsaibi yawano José jume jejei tsaibichino xua daxita exana pocotsiwa Jesús itorobeibatsi. Jesús pena, daxita baxuan moicha cacui yabara cananta xeineibatsi pejúntu coyenewatha. <sup>52</sup>Nexata Jesús wiwichabapona yawa júntu coyene ayapusaya exanapoinchino Nacom pia Pejumopetha túnaxú tatsi. Nacom irú jiwi Jesús antobe tsonaetsi.

**Meje yabara poxonae Juan pon  
Pebautisabin jiwi cuiduba ira  
xuepana susato tsurucuae nacuatha**

*(Mt 3.1-12; Mr 1.1-8; Jn 1.19-28)*

**3** Iruru Tiberio pon romanomonae itorobiya pia pepa peewatsinchi tatsi yapu jopa quince po weibe xua itorobiya canamataxeina barapo nacuanthapiwi. Bapoxonae irú Poncio Pilato Judea nacuapiwi peyanacua ewatsinchi naexana. Barichi Herodes Galilea nacuapiwi peyanacua ewatsinchi naexana. Irú Herodes peweicho tatsi Felipe, bapon Iturea nacuapiwi peyanacua ewatsinchi naexana xua Traconite nacuathano. Barichiru Lisantias Abilinia nacuapiwi peyanacua ewatsinchi naexana. <sup>2</sup>Barichiru Anás irú Caifás baponbe sacerdotemonae pia pepa pentacaponaeinbe tatsibe. Barapoxonaeru Nacom Juan tsipaebatsi poxonae ira xuepana susato tsurucuae nacuatha popona. Juan bapon Zacarías pexanto tatsi. <sup>3</sup>Juan popona ducuaanaeta Jordán nacuatha ichaxota Jordán mene. Nacom Pejume Diwesi tsipaeba ducuaanaeta jiwitha. Bapon barai jiwitha, jeye:

—Icha júntu coyene paxeinare painya neuraxae xua abe paexaname. Paca bautisabina ichamonae xua Nacom paca

necayabara júntemainaenexa abe painya neexanae cuiru coyenein, jei Juan.

<sup>4</sup>Baxua exana, peyabara jeichixaetsi xua peyabara jeixae pon Nacom peitorobi jume pepaebin Isaías poxonae bapon tina pejume diwesi. Barapo diwesitha Isaías caena bayatha wúnae tsiwúnaeya yabara paeba xua Juan yabara. Isaías namchi, jeye:

“Jume tan pon wawai ira xuepana susato tsurucuae nacuatha.

Bapon wawai jeye: ‘Patsinájúntu cui coyene wúnaere pon jiwi pia pepa Pecanamataxeinaeinchi pia pepatopae wúnaeya tsane.

<sup>5</sup>Daxita pamarafotontha paatsa jejebapoinyama.

Daxita petsuton paatsa caxiquiyama.

Pejeyajeyowa namton bopiya dubeinya paexande.

Pamarafotofotowa namton, panamto dameyama.

Apara jopa yabara janyo namton, jame apara yabara jan painya júntu coyenein. Ichi paichim xua namton paxanebame bara

paichinde pana najúntu cui wúnaere painya Nepacacanamataxeinaein nexa poxonae bapon patopeicaena.

<sup>6</sup>Daxita nacuapiwimonae yaputaena Nacom pia

pecapanenebiyae coyene tatsi’, jei pon wawai”, jei Isaías pejume diwesitha.

<sup>7</sup>Pin bicheito pata, xua Juan pebautisabinexa tsane. Juan barai barapomonae jeye: “¡Paxam pomonae pemuxitorobi jiwi pam! ¡Paxam be bara jomomonae pam, tsipei jomo ba cuitaya ducupa nawa! Bara paichim anoxuae paichichipame Nacom pacuitaya ducupame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajúntu coyene xanepanaem Nacomtha. <sup>8</sup>Xaniwaicha painompare xain ichamonae paca cui tane



xua icha juntu coyene painya nexeiaewa Nacomtha, pon jiwi Pecanamataxeinaein. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowuntsim Nacom. Daxota Nacom itacupatsi xua paca cui matawenta pia jopa paca nepaca capanenebiyaenexa tsane. Matautano barichino Nacom itacupatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomonae pejume cowuntsixaetsi Nacom. <sup>9</sup>Poxonae pebin naein uba, sipari ba canacui wunaeta pecaucubobinexa po naein jopa nacoichiyo. Poxonae barapo naein ucuboba nantatsun eta xua petautsinexa isototha. Paxam bara paca jata ichiya paca cana exanaena. Nacom paca yabara nacui wunaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata taexanaem”, jei Juan.

<sup>10</sup>Nexata barapomonae Juan yainyabatsi jeichichi:

—¿Eta pocotsiwa Nacom ichichipa pocotsiwa pata exanaenexa xua ichamonae pata necui taenexa tsane xua bara pajuntu coyene xanepanaein Nacomtha? jei barapomonae.

<sup>11</sup>Juan jume nota, jeye:

—Pon ainya camisabe xeina, bapon becatsipa pontha pon yatsicaewa jopa nauma xatatsiyo camisa. Iruru pon tamatecatsi penabanaewa bapon becatsipa ichun pontha pon jopa xeinaeyo penabanaewa, jei Juan.

<sup>12</sup>Barichiru pata, pomonae paratixi pentoma noteibiwi po paratixi jiwi bewa catsibina pon romanomonae

itorobiya pia pepa peewatsinchi nexa. Barapomonae pata xua Juan pebautisabinexa tsaneru barapomonae. Barapomonae Juan yainyabatsi, jeichichi:

—Pon jiwi Necuidubim, zeta pocotsiwa Nacom ichichipa pocotsiwa pata exanaewa tsane? jei barapomonae.

<sup>13</sup>Juan jume nota, jeye:

—Saya meisa jiwi pawucaename paratixi xua romanomonae paca itoroba. Jopa yabara muxuitorobiya pawucaeinde ichawan, jei Juan.

<sup>14</sup>Barichiru soldadomonae Juan yainyabatsi, jeichichi:

—Iru paxan, zeta pocotsiwa Nacom ichichipa pocotsiwa pata exanaewa tsane? jei barapomonae.

Juan jume nota, jeye:

—Jopa payabara jume daunweya wecobe noteibinde ichamonae piawan tatsi. Matautano ichamonae jopa pacui yopiteibinde pocotsiwa exana ichamonae poxonae apara jopa exaneibiyo. Bara saya pajuntu coyene weiweinare poxonae paratixi paxeiame poxonae ichamonae xua pata exaname xua soldadomonae pamxaem, jei Juan.

<sup>15</sup>Daxita pomonae wunae ewateiba xua Mesías pepatopeicaewa tsane, barapomonae poxonae Juan jume tainchi, barapomonae pejuntu coyeneintha nanta xeina, xua apara Juan metha apara Mesíaswei. <sup>16</sup>Ichitha Juan barai daxita barapomonae, jeye: “Xan paca bautisabatsi meratha. Ichitha nama patopaena pon bichocono ainya cui beyacaincha xan. Bapon pon pepa Pecanamataxeinaein jiwi. Xan saya tapawin. Daxota auran xua tataxu mu isanaxubiwa pia penataxu xatatsiwa. Bapon paca jiwana bautisabina Nacom pia Pejumope tunaxutha tatsi. Bapon paca jiwana cui copatsinchi xua atene tsane Jesús pejume cowuntsixaetsi

tsane. <sup>17</sup>Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jehebapona. Trigo xu jehebapona, trigo xu matabotha. Matapepe jehebapona petautsinexa isototha, ichaxota po isoto jopa cuinaya itacounayiyo. Bara juta cana ichi tsane jiwitha icha trigo xu cana ichiya ichichi jiwi Nacom tsananobina pomonae pejume cowuntsixaetsi pia nacuatha nexa. Ichamonae tsananobinchi pomonae jopa pejume cowuntsiwichi, petautsinexa isototha ichaxota xua jopa itacounayiyo”, jei Juan.

<sup>18</sup>Icha diwesi yabara jumeno Juan barapomonaetha paeba Nacom pia pexeinya jume diwesi tatsi. <sup>19</sup>Matautano Juan biatane, Herodes biatainchi pon Judea nacuapiwi pia peyanacua ewatsinchi poxoru Herodes peweicho caiba yabuyo powa Herodías. Herodes peweicho tatsi pewun Felipe. Matautano Juan biatane poxoru bayatha Herodes abe exana nawita jiwitha. <sup>20</sup>Ichitha daumetha equeicha Herodes abe exana xua Juan caenaetatsi ichamonaetha xua pecaponaenexa tsainchi jiwi pecubi botha.

**Meje yabara poxonae  
Jesús bautisabatsi**

(Mt 3.13-17; Mr 1.9-11)

<sup>21</sup>Poxonae cataunxuae Juan jopa ecaeyo jiwi pecubi botha, Juan bautisaba ducuaaeta jiwi. Barichi iru Jesús nabautisabatsi. Poxonae Jesús tsipaebuncua paxa, peitaboco nayausaranaxuba. <sup>22</sup>Nacom pia Pejumope tunaxu tatsi patopeica Jesththa, be topiboto yaruneica. Jesús jume tane pocotsiwa peitaboco wetsipaebicatsi, jeichichi:

—Xam apara Taxantom pom bichocono cantobetsi, pom caitapetatsi.

Nejuntu coyene weiweina exaname, jei Nacom.

**Meje yabara pomonae Jesús  
pia pamo susatopiwi tatsi**

(Mt 1.1-17)

<sup>23</sup>Poxonae Jesús treinta po weibe yapu jopa, bapoxonae nama tamropata pitaba barompaya pia pepa peexanae coyenewan po coyene Nacom Pejume Diwesi pecuecuijeiwa xuano jiwi axaibi exana ducuaanaebiyano. Jesús, José pexanto tatsi. Daxita jiwi nanta xeina xua mexeya itara José yatsicaewa pexantowei. José, Elí pexanto tatsi. <sup>24</sup>Bapon Elí, Matat pexanto tatsi. Bapon Matat, Leví pexanto tatsi. Bapon Leví, Melqui pexanto tatsi. Bapon Melqui, Jana pexanto tatsi. Bapon Jana, José pexanto tatsi. <sup>25</sup>Bapon José, Matatías pexanto tatsi. Bapon Matatías, Amós pexanto tatsi. Bapon Amós, Nahúm pexanto tatsi. Bapon Nahúm, Esli pexanto tatsi. Bapon Esli, Nagai pexanto tatsi. <sup>26</sup>Bapon Nagai, Maat pexanto tatsi. Bapon Maat, Matatías pexanto tatsi. Bapon Matatías, Semei pexanto tatsi. Bapon Semei, Josec pexanto tatsi. Bapon Josec, Judá pexanto tatsi. <sup>27</sup>Bapon Judá, Joanán pexanto tatsi. Bapon Joanán, Resa pexanto tatsi. Bapon Resa, Zorobabel pexanto tatsi. Bapon Zorobabel, Salatiel pexanto tatsi. Bapon Salatiel, Neri pexanto tatsi. <sup>28</sup>Bapon Neri, Melqui pexanto tatsi. Bapon Melqui, Adi pexanto tatsi. Bapon Adi, Cosam pexanto tatsi. Bapon Cosam, Elmadam pexanto tatsi. Bapon Elmadam, Er pexanto tatsi. <sup>29</sup>Bapon Er, Josué pexanto tatsi. Bapon Josué Eliezer pexanto tatsi. Bapon Eliezer, Jorim pexanto tatsi. Bapon Jorim, Matat pexanto tatsi. <sup>30</sup>Bapon Matat, Leví pexanto tatsi. Bapon Leví, Simeón pexanto tatsi. Bapon Simeón, Judá pexanto tatsi. Bapon Judá, José pexanto

tatsi. Bapon José, Jonam pexanto tatsi. Bapon Jonam, Eliaquim pexanto tatsi. <sup>31</sup>Bapon Eliaquim, Melea pexanto tatsi. Bapon Melea, Mena pexanto tatsi. Bapon Mena, Matata pexanto tatsi. Bapon Matata, Natán pexanto tatsi. <sup>32</sup>Bapon Natán, David pexanto tatsi. Bapon David, Isaí pexanto tatsi. Bapon Isaí, Obed pexanto tatsi. Bapon Obed, Booz pexanto tatsi. Bapon Booz, Sala pexanto tatsi xua icha wun Salmón. Bapon Sala, Naasón pexanto tatsi. <sup>33</sup>Bapon Naasón, Aminadab pexanto tatsi. Bapon Aminadab, Admin pexanto tatsi. Bapon Admin, Arni pexanto tatsi. Bapon Arni Esrom pexanto tatsi. Bapon Esrom, Fares pexanto tatsi. Bapon Fares, Judá pexanto tatsi. <sup>34</sup>Bapon Judá, Jacob pexanto tatsi. Bapon Jacob, Isaac pexanto tatsi. Bapon Isaac, Abraham pexanto tatsi. Bapon Abraham, Taré pexanto tatsi. Bapon Taré, Nacor pexanto tatsi. <sup>35</sup>Bapon Nacor, Serug pexanto tatsi. Bapon Serug, Ragau pexanto tatsi. Bapon Ragau, Peleg pexanto tatsi. Bapon Peleg, Heber pexanto tatsi. Bapon Heber, Sala pexanto tatsi. <sup>36</sup>Bapon Sala, Cainán pexanto tatsi. Bapon Cainán, Arfaxad pexanto tatsi. Bapon Arfaxad, Sem pexanto tatsi. Bapon Sem, Noé pexanto tatsi. Bapon Noé, Lamec pexanto tatsi. <sup>37</sup>Bapon Lamec, Matusalén pexanto tatsi. Bapon Matusalén, Enoc pexanto tatsi. Bapon Enoc, Jared pexanto tatsi. Bapon Jared, Mahalaleel pexanto tatsi. Bapon Mahalaleel, Cainán pexanto tatsi. <sup>38</sup>Bapon Cainán, Enós pexanto tatsi. Bapon Enós, Set pexanto tatsi. Bapon Set, Adán pexanto tatsi. Bapon Adán, Nacom pexanto tatsi.

**Meje yabara poxonae Jesús juntu coyene jujutatsi caurimonae pia pentacaponaein tatsi xua Jesús abe coyeneya petaexanaenexa tsane**

(Mt 4.1-11; Mr 1.12-13)

**4** Poxonae Jesús juntu coyene yucatsi Nacom pia Pejumo pe túnaxu tatsi bapoxonae caibe nawiya Jordán mene weya. Nacom pia Pejumo pe túnaxu tatsi Jesús mata cayatsi ira xuepana susato tsurucuae nacua beya. <sup>2</sup>Baraxotiya Jesús popona cuarenta po matacabibe. Caurimonae pia pentacaponaein tatsi Jesús piraichi juntu coyene jujutatsi xua Jesús abe coyeneya petaexanaenexa tsane. Barapo cuarenta po matabibetha Jesús jopa nabanaeyo. Poxonae barapo matabin yapucaewa Jesús bichocono jainpa. <sup>3</sup>Caurimonae pia pentacaponaein tatsi, Jesús baraichi, jeichichi:

—Icha xam yatsicaya Nacom Pexantom, netsita iture. Barapo iboto itorobare xain pan naexanaxoya, jei caurimonae pia pentacaponaein tatsi.

<sup>4</sup>Jesús jume nota. Caurimonae pia pentacaponaein tatsi jume notatsi, jeye:

—Nacom Pejume Diwesitha namchi: ‘Jopa metha bepa meisa jiji betiya una jinompaetsipae pan’, jei Nacom Pejume Diwesi, jei Jesús.

<sup>5</sup>Caurimonae pia pentacaponaein tatsi Jesús mataboinchi ichaxota po demxuwa bichocono atororo. Baraxotiya Jesús tsita itutarabatsi daxita nacuan, xua barapo cae pin nacuathe. <sup>6</sup>Bapoxonae caurimonae pia pentacaponaein tatsi Jesús baraichi, jeichichi:

—Daxita barapo nacuan cacatinchi jiji neitorobinexa tsane. Matautano daxita cacatinchi nacuan pia pewnaewan, tsipei bayatha necata daxita barapo nacuan xua taitorobeibiwa coyenewan. Tawaxae catsin ichuntha

pontha pon xua ichichipan xua tacatsiwa. <sup>7</sup>Ichaxuxuae nentabocototha uncuaename taitabaratha, xuano ichaxuxuae newuñae jainchiname xua nenanta xeinaewaxae xua xan jinya tacacanamataxeinaeinchi, bapoxonae baxuan daxita bara cacatsinchi jinya Necanamataxeinaenexa barapo nacuan, jei caurimonae pia pentacaponaein tatsi.

<sup>8</sup>Ichitha Jesús jume nota, jeye:

—Yaitama Nacom Pejume Diwesitha namchi, jeye: ‘Meisa wuñae jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

<sup>9</sup>Cotacaya nama equeicha Jesús mat-acapoinchi Jerusalén tomara beya, Nacom pin pia botha pentatupa beicha capoinchi. Jesús baraichi, jeichichi:

—Icha bara xaniwaicha Nacom Pexanto tatsim, wenaxoreinque.

<sup>10</sup>Nacom Pejume Diwesitha namchi, jeye:

‘Nacom itorobina pia matatsunpiwi necayanabinexa.

<sup>11</sup>Barapo matatsunpiwi asiya cawaetaboutsina

pecobetha, xua jopa necataxu tsaquituncuaenexa tsane ibototha poxonae

wenaxorecame’, jei Nacom Pejume Diwesitha,

jei caurimonae pia pentacaponaein tatsi.

<sup>12</sup>Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntu coyene jujutsiya wucaeinde Nacom pon jinya Necanamataxeinaein, xua cajume jejei tsane necayawenaenexa poxonae jopa xapain exanaem’, jei Nacom Pejume Diwesitha, jei Jesús.

<sup>13</sup>Poxonae caurimonae pia pentacaponaein tatsi yaputane xua jopa xeinaeyo po coyenetha equeicha

Jesús pejuntu coyene jujutsiwa tsainchi, bapoxonae nama Jesús wepu poinchiba xua saya bara caeto nexa.

**Meje yabara poxonae Jesús  
tamropata pitaba pia  
penacuichiwa Galilea nacuatha**

(Mt 4.12-17; Mr 1.14-15)

<sup>14</sup>Jesús caibe iya Galilea nacua beya. Matautano jopa juniya xeinaeyo Nacom pia Pejumope tunaxu tatsi pia peayapusu itorobi coyenewa tatsi. Daxita jiwi pomonae jinompa barapo nacuatha Jesús yabara paebinoutatsi. <sup>15</sup>Jesús cuidubeiba barapomonae judiomonae pia penacaetutsi bontha tatsi xua daxita tomarantha. Barapomonae Jesús wuñae jainteibatsi.

**Meje yabara poxonae Jesús  
Nazaret tomaratha popona**

(Mt 13.53-58; Mr 6.1-6)

<sup>16</sup>Nexata Jesús Nazaret tomara beya pona, po tomaratha ichaxota wichaba. Judiomonae barompaya pia pentaquei seicae matababitha tatsi Jesús joniya judiomonae pia penacaetutsi botha tatsi tsipei pia cui xeina xua peponeibiwa barapocotsi botha. Jesús xenta iya barapomonae peuncuaenexa peitabaratha, peyorobinexa Nacom Pejume Diwesi, xua barapomonae pejume taenexa. <sup>17</sup>Nexata Jesús catatsi Isaías pejume diwesi, pon Nacom peitorobi jume pepaebin, pon caena bayatha tupa. Poxonae Jesús diboro pataxuba baxota taeba pocotsiwa baxota paeba, xua jeye:

<sup>18</sup>“Nacom pia Pejumope tunaxu tatsi neyanta popona.

Nacom neitapeta tatacueicueijeinexa tsane

pia pexeinya jume diwesi tatsi pomonaetha

pomonae peacopeibi jiwi.

Matautano neitoroba xua  
tayawenaenexa  
pomona anthuthutane.

Matautano neitorobano xua  
tayawenaenexa

pomona caurimonae itorobatsi nawita  
xua

barapomona pepanenebiyaenexa.

Matautano neitorobano xua tane tacana  
exanaenexa pomona peitata nacutsi  
jiwi.

Matautano neitorobano xua  
tayawenaenexa

pomona xua bichocono taayapubetsi  
xua

pejinompaewa tsane xua barapomona  
jopa pexeinae

dubenaebiyaenexa tsane barapo  
coyenein.

<sup>19</sup>Matautano neitorobano xua jiwi  
tatsipaebinexa po coyene xua Nacom  
nacui

wunaeta xua jiwi peyawenaewa tsainchi  
pomona ichichipa xua Nacom pejume  
taewatsi”,

jei Isafas pejume diwesitha, jei Jesús xua  
yoroba.

<sup>20</sup>Poxonae Jesús barapo diboro  
acataraba, bapoxonae cata pontha pon  
jiwi peyawenequeibin judiomona pia  
penacaeutusi botha tatsi. Bapoxonae  
Jesús econeca. Daxita pomona  
baxota ena, Jesús necotenatsi xua cui  
ewatenatsi xua pecueicueijiwa tsane  
Jesús. <sup>21</sup>Bapoxonae Jesús tamropata  
pitaba xua paeba, jeye:

—Anoxuae xuaunxae pajume taneme  
baxua apara barapo mataqueithe Nacom  
nayabara jume cui weta painya itutha,  
jei Jesús.

<sup>22</sup>Daxita carepaya jiwi Jesús  
xanapanaya yabara paebatsi. Daxita  
barapomona najuntũ coyene  
cabenaeca xua pejume taexae xua po  
jume barapomona petsipaebixaetsi.  
Barapomona nantiya nabarai, jeye:

—Maisa jume xeica bapon, jume wu-  
naeya paeba. ¿Bara bapon José pexanto  
tatsi jampa? najei barapomona.

<sup>23</sup>Jesús barai barapomona, jeye:

—Metha pana netsipaebichipame  
icha be pocotsi diwesiyo iche xua  
pecayabara juta pepaebi diwesiyo xua  
ba jei: ‘Pon jiwi neyawubin, jinya  
coutha nayawubare’, xua ba jei. Barichi  
anoxuae pana nejam tsane: ‘Xua paxan  
pajume tan xua juinya Capernaum  
tomaratha exaname, barichinde xote  
exande jinya tomaratha’, pana nejam  
tsane, jei Jesús.

<sup>24</sup>Awia cataunxae Jesús cueicuei-  
jei. Equeicha namchi, jeye:

—Xaniwaicha paca tsipaebatsi  
pon ba Nacom peitorobi jume  
pepaebin pia nacuamonaepiwi  
ba aitaftabichi. <sup>25</sup>Xaniyan paca

baraichi xua caena bayatha poxona  
Elías popona pon Nacom peitorobi  
jume pepaebin, ainyawaxi powaxi  
pecuenta werapaewaxichi pia seuriwi  
Israel nacuatha jinompa. Barapo  
nacuatha cuinaya jopa duneicaeyo  
acoibi po weiyobe xuano seis po  
xometiyobethano. Daxita jiwi piyain  
barapo nacuatha Israel nacuatha.

<sup>26</sup>Nacom jopa itorobiyo, Elías jopa  
itorobichi xua peyawenaenexa tsane  
caewayo jiwana powaxi pecuenta  
werapaewaxichi pia seuriwi xua Israel  
nacuatha. Ichitha saya meisa Nacom  
itoroba, Elías itorobatsi powatha  
powa pecuenta tupaewayotsi piseuri,  
powa popona Sarepta tomaratha,  
xua Sidón nacuatha xua barapowayo  
peyawenaenexatsi. <sup>27</sup>Barichi Israel  
nacuatha pinmonae jinompa pomona  
peperũ sawatsi jiwimona, poxona  
Eliseo popona pon Nacom peitorobi  
jume pepaebin. Eliseo jopa jiwana  
axaibi exanaeyo. Ichitha meisa Eliseo  
Naamán axaibi exanatsi pon bichocono

peperu sawinchi. Bapon Naamán, Siria nacuapin, jei Jesús.

<sup>28</sup>Poxonae barapomonae jume tane pocotsiwa Jesús paeba pomonae judiomonae pia penacaetutsi botha ena, bapoxonae barapomonae Jesús casebatsi. <sup>29</sup>Asiya umenarucupa barapomonae. Jesús tomara peuma beitawayatsi. Jesús capoinchi pitapatororo itapa beya, po tsututha bomuxun jeba, xua bara wepexorecaenexa tsainchi Jesús. <sup>30</sup>Ichitha Jesús barapomonae xenta iya, pu seicataba.

**Meje yabara poxonae  
pebin pon cauri xeina**

(*Mr 1.21-28*)

<sup>31</sup>Nexata Jesús pona Capernaum tomara beya po tomara eca Galilea nacuatha. Baxotiya Jesús cuiduba jivi po mataqueitha pentaquei seicae matabitha. <sup>32</sup>Barapomonae yabara najuntu coyene cabenaeca tsipei pocotsiwa bapon barapomonae cuidubatsi be pon peyaputaein pia peayapusu itorobi jume coyeneya tatsi paeba.

<sup>33</sup>Judiomonae pia penacaetutsi botha tatsi pebin baxota eca, pon cauri xeina. Bapon bichocono wawaya exanatsi cauri. Bapon Jesús baraichi xua namtsebiya wawai, jeye:

<sup>34</sup>—¡Jesús Nazaret tomarapim, warapare pata xainya weya! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebicham? Paca yaputainchi yawa paca yaitainchi. Xam apara pon Nacom caitoroba, pon pepa Nentacuiruyapuxanepanaem, jei cauri.

<sup>35</sup>Jesús itaweta cauri, jeye:

—¡Moyande! ¡Bapon wepu ponde! jei Jesús.

Nexata cauri pebin iratha xotsi barapomonae peitutha tatsi. Pebin wepu poinchi cauri, saya juntema. Equeicha jopa ateneyono. <sup>36</sup>Daxita barapomonae yabara najuntu coyene cabenaeca, nayainyaba namchi:

—¿Eta po jumerá xua bapon paeba? Jamaisa barapo pebin itaweta caurimonae pia peayapusuya itorobi coyenewatha. Matautano barapo caurimonae bara pona.

<sup>37</sup>Daxita jivi pebinouta Capernaum tomara cuariyatha pocotsiwa Jesús exana.

**Meje yabara poxonae Jesús axaibi  
exana Simón Pedro pamiyo tatsi**

(*Mt 8.14-15; Mr 1.29-31*)

<sup>38</sup>Bapoxonae Jesús judiomonae pia penacaetutsi bo tatsi wejoniya. Jesús joniya Simón pia botha tatsi. Simón pamiyo tatsi atene, domaebatsi. Barapowa piamonae tatsi Jesús jume daunweya wucatsi xua bapowa axaibi pe-exanaenexa tsainchi. <sup>39</sup>Jesús imoxoyo caquita uncua pentasipatha. Jesús domaetha namchi, jeye:

—Barapowatha jopa bayatha yacaewiyande, jei Jesús.

Domae aichurucuae. Nainya barapowa nantacotaxuba. Bapoxonae bapowa pexaewa apata barapomonaetha.

**Meje yabara poxonae Jesús axaibi  
exana pin bicheitomonae**

(*Mt 8.16-17; Mr 1.32-34*)

<sup>40</sup>Poxonae tabopiya tsanaicha pomonae piamonae barompaya taatenetsi pomonae xua jopa nayaromae jupaeyo, daxita barapomonae Jesús betacarendenatsi. Jesús ichawa beya jayabapona pecobetha, bapoxonae daxita carepaya axaibi. <sup>41</sup>Barichi pomonae cauri pexeinaewi Jesús

taita weta barapomonaē. Barapo caurimonaē wawaya jeye:

—Apara xam Nacom Pexantom, jei.

Bequein caurimonaē baxua paēba ichitha Jesús awiya daēmetha itaweta caurimonaē. Jesús jopa najume copat-siyo xua equeicha pepaēbiwa tsane poxoru barapo caurimonaē yaputane xua bapon yatsicaēwa Mesías pon Nacom itorobica.

**Meje yabara poxonaē Jesús  
cueicueijei Nacom Pejume  
Diwesi judiomonaē pia  
penacaetutsi bontha tatsi**

(Mr 1.35-39)

<sup>42</sup>Poxonaē baya juntucuru pentha tsina, Jesús tomara weiya ichaxota jiwai bi bara beya pona. Ichitha jiwi Jesús jeitatsi. Barapoxonaē bapomonaē pata ichaxota Jesús popona. Barapomonaē aichaxaibi xua Jesús pewepu warapaēwa barapomonaē. <sup>43</sup>Ichitha Jesús namchi, jeye:

—Bewa iru yabara paēbin Nacom pia pexeinya jume diwesi tatsi, po diwesi yabara xua Nacom waba jiwi petanaēxanaēnēxatsi piamonaē pomonaē Nacom juntu coyene itorobiya ewata. Apara baxua netsiyabara itorobica, jei Jesús.

<sup>44</sup>Daxota Jesús paēba ducuaēnēta Nacom Pejume Diwesi Judea nacuatha xua judiomonaē pia penacaetutsi bontha tatsi.

**Meje yabara poxonaē Jesús  
piamonaē yawena xua duwei yamona**

(Mt 4.18-22; Mr 1.16-20)

**5**Caentacabi Jesús Genesaret pucua itapatha uncua. Pin bicheito pata bichocono nacucunaxuba Jesustha, tsipei barapomonaē ichichipa jume tane Nacom Pejume Diwesi tatsi. <sup>2</sup>Jesús ainya jerabe tane pucuatha taetabo itapatha, po jera saya naēbe. Tsipei duwei peyamaēwi bayatha nacui wetarucupa,

matautano poxoru bayatha nonobouna taetabotha. Barapomonaē pia peyamonaēwan iquicompa. <sup>3</sup>Nexata Jesús jeratha nontabiya Simón pia naētha tatsi. Jesús Simón baraichi:

—Tsiwiyo neyana torotaxoyam, jei Jesús.

Bapoxonaē Jesús eca jeratha. Jesús mene wecuidubecarena jiwi Nacom Pejume Diwesi. <sup>4</sup>Poxonaē Jesús najume weta, Simón baraichi, jeye:

—Jeratha ponde ichaxota pentatheibu. Paxoyama painya neyacamonaēwa painya necapirenaēnēxa duwei, jei Jesús.

<sup>5</sup>Simón, Jesús jume notatsi, jeye:

—Pon jiwi Necuidubim, bequein barapo merawithe payamonompan, pacobesa patan. Yaitama aunxuae neitorobame, methaunxuae xoyaein tayamaēwa, jei Simón.

<sup>6</sup>Poxonaē barapomonaē xoya, duwei pin tunto capirena, muxu peucubabi xua peyamaēwa. <sup>7</sup>Nexata barapomonaē moya pecobetha itacowaēba pomonaē penabarū yaxunobompaēxae, pomonaē icha jeratha jinompa itacowaēbatsi, penayawenaēnēxa. Barapomonaē pata. Jera ainya naēbe wuntabe duwei. Muxu pebunopaebe jerabe. <sup>8</sup>Simón pon Jesús icha wun duta, xua Pedro baraichi, bapon tane baxua. Bapoxonaē bapon Jesús peitabaratha tauncuatsi pentabocotha. Simón, Jesús baraichi, jeye:

—Tanecanamataxeinaēin, newepu ponare, tsipei xan abe taexanaēin, jei Simón Pedro.

<sup>9</sup>Poxoru Simón Pedro junuwiya najuntu coyene cabenaēca yaitama peyacamonaēwatha capirena duwei pin tunto. Iru pomonaē Simón Pedro pia jeratha petaēnaēwichi barapomonaē iru junuwiya najuntu coyene cabenaēca. <sup>10</sup>Iru Zebedeo pexantobe tatsi, Santiago iru Juan baponbe iru junuwiya

najuntũ coyene cabenaecabe. Baponbe ponbe Simón pebarũ yamonaeinbe tatsibe. Ichitha Jesús Simón baraichi, jeichichi:

—Simón, jopa junuwinde, anoxuae caexanaeinchi xua pinmonae yawenaename xua barapomonae pejume cowũntsiwa tsane Nacom icha bayatha ichim poxonae yamoname duwei nawita, jei Jesús.

<sup>11</sup>Nexata poxonae barapo jerabe botounabe, barapoxonae barapomonae baxuan daxita nacui barapenta. Bapoxonae barapomonae Jesús puna poinchi.

**Meje yabara poxonae Jesús axaibi exana pon peperũ sawinchi**

*(Mt 8.1-4; Mr 1.40-45)*

<sup>12</sup>Jesús icha tomara siwa pona. Bapoxonae pebin patopa pon peperũ sawinchi. Poxonae Jesús taebatsi, bapon Jesús peitabaratha tatsi pentabocototha tauncuatsi yawa ira betaeuncuareca. Bapon Jesús jume daunweya wũcatsi, jeichichi:

—Pon Necanamataxeinaem jiwi, icha bara ichichipame bara caitacũpa xua axaibi tana neexanaewam, tsipei jinya neayapusũ itorobi coyenewa nexainaem, jeichichi Jesús bapon.

<sup>13</sup>Nexata Jesús, nacobe yota, yawa mata jayaba bapon, pon peperũ sawinchi. Jesús barai, jeye:

—Bara ichichipan. ¡Bara axaibinde! ¡Bara caaperuxaibi exanatsi! jei Jesús.

Bapoxonae bapon nainya taachurucaetsi xua peperũ sawiwatsi. <sup>14</sup>Nexata Jesús barai bapon, jeye:

—Jopa yabara tsipaebinde ichamon-aetha xua neaxaibiwam. Saya jame meisa ponde sacerdotemonaepintha xua nenaitutsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui

itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua perũ wũnaem, jei Jesús.

<sup>15</sup>Ichitha daxita jiwi taju beya jume taetaepona pocotsiwa Jesús exana. Pin bicheiton nacaetutapona Jesustha pejume taenexa tsane pocotsiwa Jesús exana. Mataũtano nacaetutapona xua Jesús peaxaibi exanaenexa barapomonae. <sup>16</sup>Ichitha Jesús ichaxota jiwaibi bara beya poneiba compa. Baxotiya Paxatha tsipaebiba.

**Meje yabara poxonae Jesús axaibi exana pon pecuenobinchi**

*(Mt 9.1-8; Mr 2.1-12)*

<sup>17</sup>Caentacabi Jesús cuidubauya. Irũrũ baxotiya ena pomonae fariseomonae jiwana tatsi. Irũ baxota ena pomonae jiwi pecuidubiwi Moisés pia peitorobi coyenewa tatsi. Barapomonae daxita tsiqui tomaraxi werendena po tomaraxi ena Galilea nacuatha. Irũ daxita tsiqui tomaraxi werendena po tomaraxi ena Judea nacuatha, irũ ichamonae Jerusalén tomara werendena. Nacom pia peayapusũ itorobi coyenewa tatsi Jesús yawenatsi, daxota axaibi exana peatene jiwi.

<sup>18</sup>Nexata pebiwi pata. Barapo pebiwi carendena pon pecuenobinchi. Xua xota pocotsiwatha maiteiba, barapomonae barapocotsiwatha carendenatsi pecuenobinchi. Barapomonae bepa bomũxũtha cajojoniyaie xua bepa Jesús peitabaratha tabotichei. <sup>19</sup>Ichitha barapomonae jopa cajojoniyaeyo bomũxũtha tsipei pin bicheito boupa quecona. Barapo bo matatupa pereca. Nexata daxota barapo bo matatupa beenoinya. Barapomonae barapo penta tupa weatsa caxina xoreca. Nexata barapomonae nantiya opi quetabe



bumacatha barapo pemaiteibiwatha. Bapoxonae bara weyawa yorecatsi barapo pecuenobinchi jiwi pexainya deca tatsi, Jesús peitabarayo decano tatsi. <sup>20</sup>Jesús tane xua barapomonae yabara cui jume cowunta xua Jesús bara peitacupaewatsi xua axaibi peexanaewatsi pon pecuenobinchi. Daxota Jesús barai pecuenobinchi, jeye:

—Tajiton cayabara cui junte-mainat-siba abe jinya neexanae cuiru coyenein, jei Jesús.

<sup>21</sup>Nexata pomonae jiwi pecuidubiwi Moisés pia peitorobi coyene, iru fariseomonae, daxita barapomonae caemonae natsipaeba, najei: “Maisa bapon bichocono abe tsipei pocotsiwa bapon paeba bichocono Nacom tsita ajumbetsi. Jiton dapocotsin aibi pon xua jiwi cacui yabara junte-mainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara junte-mainaya juntu puxana exanatsi abe pia peexanae cuiru coyenein tatsi”, najei barapomonae.

<sup>22</sup>Ichitha Jesús yaputane xua barapomonae caemonae natsipaeba. Jesús barai barapomonae, jeye:

—¿Eta pocotsiwa metha baxua pana natsipaebame? <sup>23</sup>¿Eta po jumetha baran tsane pecuenobinchin? ¿Metha jan tsane: ‘Abe jinya neexanae cuiru coyenein cata junte-mainatsi’, jan tsane? Ichacuiitha ¿metha jan tsane: ‘Asiya uncuatabare yawa ponare’, jan tsane? <sup>24</sup>Daxota aunxuae paca tsita itapeinya xeinaeinchi xua xan ponxaein Nacom Tananeitapsin, xua xeinan taayapusu itorobi coyenewa xua baratana neitacupaewa xua jiwi tayabara cacui junte-mainaya juntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi, nontaponde. Jinya nemaituncuaewa pire. Jinya bo beiyandeno, jei Jesús.

<sup>25</sup>Bapoxonae pon pecuenobinchi caena nainya nontapona barapomonae peitatha tatsi, yawa pita xua pemaituncuaewa. Pia bo be-iyawa Nacom wunae jaintatsi poxonae namtotha ecapona. <sup>26</sup>Barapomonae daxita yabara najuntu coyene cabenaeca yawa Nacom wunae jaintatsi. Barapomonae junuwiya namchiya jeye:

—Anoxuae waxainchi tainchi xua pewunaewa pocotsiwa jopa yaputaetsi, jei barapomonae.

### **Meje yabara poxonae Leví wabatsi, Jesús waba**

(Mt 9.9-13; Mr 2.13-17)

<sup>27</sup>Poxonae baxua Jesús nacui weta, bapoxonae Jesús pontaba. Jesús tane pebin pon pewun Leví. Leví bapon pon paratixi pentoma noteibin po paratixi jiwi bewa catsibina pon romanomonae pia pepa peyanacua ewatsinchi nexa. Bapon eca ichaxota paratixi matoma noteibeca. Jesús Leví baraichi, jeichichi:

—Nepuna ponde, jei Jesús.

<sup>28</sup>Bapoxonae Leví nontapona. Daxita baxua xubota, cuenta pona. Bapoxonae Jesús puna poinchi.

<sup>29</sup>Pirapaeyo Leví pin penabanaewa exana pia botha xua Jesús tsixanatsi. Iru pebiwi pinmonae pomonae paratixi pentoma noteibiwi po paratixi jiwi bewa catsibina pon romanomonae pia pepa peyanacua ewatsinchi nexa, barapomonae Jesús baru eca pexaethopeibiwatha, iru ichamonaeno baru enatsi penabaru nabanaenexa tsane. <sup>30</sup>Ichitha fariseomonae iru pomonae jiwi pecuidubiwi Moisés pia peitorobi coyenewa, daxita barapomonae Jesús pijimonae abeya tsipaebatsi xua Jesús yabara.

Barapomonaē namchi, Jesús pijimonaē tatsi baraichi, jeichichi:

—Maisa Jesús abe exana poxoru baru xayeca pomonaē paratixi pentoma notebiwi po paratixi jiwi bewa catsibina pon romanomonaē pia pepa peyanacua ewatsinchi nexa. Matautano baru xayeca pomonaē abe peexanaē cuiru coyene pe-exanaewi, jeichichi Jesús pijimonaē tatsi barapomonaē.

<sup>31</sup> Jesús jume nota barapomonaē, jeye:

—Pomonaē ba xua xaniwaicha jinompa xua jopa ateneyo barapomonaē ba jopa canantawenonaeyo pon jiwi peyawubin. Saya jame meisa pomonaē ba atene canantawenona pon jiwi peyawubin. <sup>32</sup> Barichinno xan patopan apara tha jopa tawabinexa tsane pomonaē pejuntũ coyene xanepanaē jiwi. Apara tha meisa tawabinexa tsane pomonaē peajuntũcoyenebe jiwi, xua barapomonaē icha jũntũ coyene pexeinaenexa tsane Nacomtha, jei Jesús.

**Meje yabara poxonaē Jesús yabara yainyabatsi po coyene xua Nacom peyabara nainbotsiwatsi**

*(Mt 9.14-17; Mr 2.18-22)*

<sup>33</sup> Nexata barapomonaē fariseomonaē irũ pomonaē jiwi pecuidubiwi Moisés pia peitorobi coyene, daxita barapomonaē Jesús yainyabatsi, jeichichi:

—Pomonaē Juan pia pepuna jinompaewichi jopa juniya nainbotebiyo xua jopa juniya tsipaebiyo Nacomtha. Irũ pomonaē fariseomonaē barichiru. Ichitha nama jinyamonaē daxua jopa cou daichiyo, saya cou Ʃ penabaneibi xuaano saya Ʃ peapeibi cou, jeichichi Jesús.

<sup>34</sup> Jesús jume nota barapomonaē, jeye:

—Paxam jopa bewa paexanaem tsane xua ichamonaē nainbotsina, pomonaē patsiwabame pexaewa xua

penabanaenexa xua poxonaē pebin pecotsiwa pita. Poxonaē cataunxuae awiya bapon eca poxonaē jiwi nabane, jopa ba bapoxonaē nainbotsi. <sup>35</sup> Ichitha icha pon aena piowa pita, bapon caena nainya waetabatsi, ichamonaē waetaba xua bapon tajũ pecaponaenexatsi, bapoxonaē jame jiwi ba bewa wecoyeyae yabara nainbotsi, xua equeicha bapon caewa pepatopaewa tsane, jei Jesús.

<sup>36</sup> Matautano Jesús pecayabara juta pepaebi diwesiyo tsipaeba barapomonaē, jeye:

—Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru doroutotha, bapoxonaē barapo dorouto abe tsanaya. Tsipei poxonaē barapo dorouto matanaxuba barapo pena paparuwa natsaquetabiya. Poxonaē barapo pena paparuwa natsaquetabiya equeicha wan tsitsipanarena barapo dorouto. Bapoxonaē equeicha pin wan tsanaya beyacaincha xua poxonaē copiya. <sup>37</sup> Matautano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto tsipei barapo bocoto jopa nayeyetaponaeyo poxonaē barapo vino mera atsaxa. Barapo pena vino mera naxuba xuano barapo bocotono naxuba poxonaē barapo bocoto tsitsica. <sup>38</sup> Daxota bewa jame pena vino mera eparecae pena bocototha. Bapoxonaē pena vino mera jopa naxubiyo, xuano pena bocoto jopa nacubiyo poxoru boco yeyena xuano poxoru pena bocoto. <sup>39</sup> Pon ba xua peru vino mera apa pirapaeyo jopa ichipaeyo pena vino mera. Bapon jei: ‘Maisa peru vino mera xeica, beyacaincha pena vino mera’, jei.

**Meje yabara poxonaē Jesús  
pijimonae tatsi yaboto nota trigo xu  
judiomonae barompaya pia  
pentaquei seicaē mataqueitha tatsi**

(Mt 12.1-8; Mr 2.23-28)

**6** Caentacabitha judiomonae barompaya pia pentaquei seicaē matakabitha tatsi Jesús pijimonae baru iya pabi iyiya. Jesús pijimonae tatsi xunumenapona trigo xu, bapoxonae barapomonae pecobetha xu mata pepeta yawa xu xane. <sup>2</sup>Nexata Jesús pijimonae tatsi tayainyabatsi, fariseomonae yainyaba, jeye:

—¿Eta pocotsiwa baxua paexaname? Aparā jiwī jopa yabara cui copatsiyo xua ichamonae penacuichiwa barapo matakabithe, xua judiomonae barompaya pia pentaquei seicaē matakabi tatsi, jei barapomonae.

<sup>3</sup> Jesús jume nota barapomonae, jeye:

—Barapo tajimonae jopa apara abe exanaeyo. ¿Jopa payabara yorobim pocotsiwa bayatha David exana poxonaē jainpa poxonaē irū pijimonae tajainpatsirū? Bapon David pon caena bayatha Israel nacuamonae itorobiya pia pepa peewatsinchi. <sup>4</sup>Bapon David irū pijimonae tatsi barapomonae Nacom pin pia botha jojoniya. David xane pan, po pan ichamonae cana exana xua Nacomtha pecatsiwatsi. Irū barapo pan David pijimonae cata xua pexaenexaru. Barapomonae xane bequein barapo Nacom pia peitorobi coyenewatha copata xua saya meisa sacerdotemonae itacupatsi xua pexaewa barapo pan.

<sup>5</sup> Jesús namchi, jeye:

—Xan ponxaein Nacom Tananeitapetsin taitorobi coyenewa xeinan xua jiwī tacoya taitorobiwa pentaquei seicaē matakabitha, jei Jesús fariseomonaetha.

**Meje yabara poxonaē Jesús cobe  
wūnaē exana pon pecobe mūbinchi**

(Mt 12.9-14; Mr 3.1-6)

<sup>6</sup>Icha matakabitha judiomonae pia pentaquei seicaē matakabitha tatsi Jesús joniya judiomonae pia penacæututsi botha tatsi. Matautano tamropata pitaba xua cuiduba barapomonae. Barapo botha eca pon pecoxa weya pecobe mūbinchi. <sup>7</sup>Pomonae jiwī pecuidubiwi Moisés pia peitorobi coyene tatsi, irū fariseomonae baxota ena. Daxita barapomonae Jesús necotenatsi pecui taenexatsi icha bara metha Jesús cobe wūnaē exanaena pentaquei seicaē mataqueitha pon pecobe mūbinchi. Icha Jesús pon pecobe mūbinchi axaibi exanatsi, bapoxonae barapomonae xeinaena po coyenewa xua Jesús abe peyabara paebiwatsi tsainchi. <sup>8</sup>Ichitha Jesús yaputane pocotsiwa barapomonae nanta xeina. Jesús barai pontha pon pecobe mūbinchi, jeye:

—Nontaponde, uncuare xote, jei Jesús.

Bapon nontapona, asiya uncuā Jesús peitabaratha tatsi. <sup>9</sup>Nexata Jesús barai ichamonae, jeye:

—Paca yainyabinchi, ¿eta xua copata pentaquei seicaē matakabitha? ¿Wūnaē jampa? ¿Abe jampa? ¿Eta xua, xua exana jane? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

<sup>10</sup>Nexata Jesús naita muxunene cauncuapona, tane pomonae pematawacaicha enaewichi. Jesús barai pon pecobe mūbinchi, jeye:

—Nacobe doire, jei Jesús.

Bapon nacobe doita. Nainya cobe wūnaē tsanaya. <sup>11</sup>Ichitha barapomonae bi-chocono Jesús casebarucupatsi. Barapomonae caemonae natsipaeba najei:

—¿Etabe cui yabara ichainchi Jesús? jei barapomonae fariseomonae.

**Meje yabara poxonaē Jesús  
itapetsiya waba pia peitorobiwi tatsi  
pomonaē xua doce poyobe**

*(Mt 10.1-4; Mr 3.13-19)*

<sup>12</sup>Barapo matacabintha Jesús pona demxuwatha petsipaebinxaxa Paxa. Baraxotiya Jesús Paxa matowa tsipaeba barapo merawitha. <sup>13</sup>Poxonaē baya xometa penta tsina bapoxonaē Jesús pijimonaē waba. Barapomonaē jiwana itapetsiya waba doce poyobe, pomonaē baraichi xua jeye: “Jesús pia peitorobi jiji tatsi”, yabara jeichichi. <sup>14</sup>Meje barapo doce poyobe pomonaē Jesús pia peitorobiwi tatsi. Meje barapomonaē: Simón, pon icha wun “Pedro”, baraichi, iru ichun pewun Andrés, pon Simón peweicho tatsi, iru ichun pewun Santiago, iru ichun pewun Juan, iru ichun pewun Felipe, iru ichun pewun Bartolomé. <sup>15</sup>Iru ichun pewun Mateo, iru ichun pewun Tomás, iru ichun pewun Santiago, pon Alfeo pexanto tatsi, iru ichun pewun Simón, pon celotemonaepin. <sup>16</sup>Iru ichun pewun Judas, pon Santiago pexanto tatsi, iru ichun pewun Judas Iscariote, pon Jesús caenaetaxubatsi ichamonaetha xua Jesús pebexubinexatsi.

**Meje yabara poxonaē Jesús  
pin bicheitomonaē cuiduba**

*(Mt 4.23-25)*

<sup>17</sup>Barapo doce poyobe Jesús demxuwa webaru dunareca, peira matafatanaewatha baru patopa. Baxota peira matafatanaewatha pin bicheito Jesús ewatumeinchi. Ichamonaē pomonaē Jesús pejume cowuntsiwichi baxota umena. Iru Jerusalén tomarapiwi pata xua Judea nacuapiwi. Barichi Tiro tomarapiwi, Sidón tomarapiwino pata. Barapo tomarabe mar mene itapatha ecabe. Daxita barapo pin bicheito pata

xua Jesús pejume taenexatsi xua cueicueijeji xua Jesús pia axaibi exanaetsi peatene jiji. <sup>18</sup>Pomonaē cauri pexeinaewi barapomonaē Jesús taitaweta cauri. <sup>19</sup>Daxita jiji ichichipa xua Jesús pejayabiwatsi tsipei Jesús daxita jiji axaibi exana pia peayapusuwatha.

**Meje yabara poxonaē Jesús  
yabara cuiduba pejuntu coyene  
weiweinaewa, xua jopa  
pejuntu coyene weiweinaewa**

*(Mt 5.1-12)*

<sup>20</sup>Nexata Jesús pijimonaē necota. Jesús barai pijimonaē, jeye:

“Pajuntu coyene weiweiname bequein anoxuae peacopeibi jiji pam. Tsipei Nacom pia pejume cowuntsiwichi tatsi piamonaē tatsi pam, pomonaē Nacom juntu coyene itorobiya ewata.

<sup>21</sup>“Pajuntu coyene weiweiname, bequein bara anoxuae pajainpame, bexa tsane patonsanaename.

“Pajuntu coyene weiweiname, bequein bara anoxuae pawecoyam, bexa tsane bichocono pajuntu coyene weiweinaename.

<sup>22</sup>“Pajuntu coyene weiweiname poxonaē bequein jiji paca ita aenae-aenei, bequein paca itaweta bo weya xua poxonaē bequein abeya paca muxutainyaba. Matautano poxonaē bequein jiji paca yabara abe paeba. Barapomonaē baxua paca cana exana tamonaē jiji pamxaem xua xan ponxaein Nacom Tananeitapetsin. <sup>23</sup>Bichocono pajuntu coyene weiweinare barapo mat-acabitha, tsipei peitabocothicha Nacom paca catsibina pia pexeinya peitupanaewan pocotsiwan Nacom paca juntana jeba pia nacuatheicha. Icha barapomonaē paca ichi, barapomonaē pia pamo susato jiji tatsi, Nacom pia peitorobi jume pepaebiwichi barichichi abeya biatainchi yawa abe exanatsi.

<sup>24</sup>“¡Ichitha pai jaibo paxam, anox-uae copei paacabem tsobenaem pox-oru methaunxuae equeicha jopa painya neraichiwa tsane!

<sup>25</sup>“¡Pai jaibo, paxam pomonae anox-uae patonsanabename tsipei methaunx-uae bexa tsane pajainpabenaename!

“¡Pai jaibo, paxam pomonae pajüntu coyene weiweinabename tsipei anoxuae methaunxuae pajüntu coyene wecoyam tsane!

<sup>26</sup>“¡Pai jaibo, pomonae jiwi wünae paca jainteibena painya necueicuei-jeixae po diwesi jopa Nacom Pejume Diwesiyo! ¡Icha barapomonae paca ichi barichi barapomonae pia pamo susato jiwi tatsi, wünae jainta pomonaetha pomonae naerabiya paeba xua pinae barapomonae Nacom pia peitorobi jume pepaebiwi!” jei Jesús.

**Meje yabara poxonae Jesús  
yabara cuiduba xua jiwi bewa  
antobe pomonaetha pomonae  
pia peaitafaetabi jiwichi**

(Mt 5.38-48; 7.12)

<sup>27-28</sup>Equeicha Jesús namchi, jeye: “Paxamtha pomonae beta pana nejume taneme, barapomonae paca baraichi: Paantobeinde pomonae bequein painya nepaca caaitafaetabi jiwi. Matautano beta pata taexande pomonae paca ita aenae-aenei. Matautano amanaya beta papaebare pomonaetha pomonae paca yabara abe paeba. Nacomtha patawücare pomonae xua paca biatane. <sup>29</sup>Icha ichün paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. Icha ichün pacata pita peamütiyu camisa, po camisa xua athawe peruyaewa yawa bara saya moya pacopare xua equeicha painya nepacata pichiwa tsane camisa. <sup>30</sup>Daxita coyenexi pocotsiwa ichamonae paca wüca

moya bara pacaichabeibare. Pon pacata pita painyawa jopa equeicha caewa pawücaeiinde. <sup>31</sup>Paexande ichamonaetha xua po coyene painya neichichipaewa xua barapomonae beta painya nepacata exanaewa tsane.

<sup>32</sup>“Icha saya meisa paantobem pomonae painya nepaca antobexae, Nacom jopa paca cui yabara matomacae tsane. Tsipei apara iru pomonae peajüntucoyenebewi antobe ichamonae pomonae peantobewixaetsi. <sup>33</sup>Barichi icha saya beta pata exaname pomonae beta pacata exana, Nacom jopa paca cui matomatsiyo tsaneno baxua. Tsipei pomonae peaitabe jiwi barapocotsi coyene iru exana ichamonaetha pomonae peaitabe jiwitha. <sup>34</sup>Barichi icha saya pacatsibame ichamonae xua bexa xuya painya nepaca catsibinexa, Nacom jopa paca cui matomatsiyo tsane baxua. Tsipei pomonae peaitabe jiwi barichi icha peaitabe jiwitha catsiba xua xuya equeicha pecatsibeibinexatsi. <sup>35</sup>Paxam jame bewa paantobem tsane painya nepaca caaitafaetabi jiwi, xuano jame beta bewa paexanaem ichamonaetha. Matautano jame bewa bara pacatsibim ichamonae xua jopa painya neyabara ewateibiwa xua xuya painya nepaca catsibeibiwa tsane. Icha baxua paexanaename Nacom paca catsibina pia nacuatheicha pocotsiwa xua paca juntana jeba pia nacuatheicha. Matautano Nacom paca cana exanaena pia pexanton jiwi tatsi pam, pon peitabocotha eca. Tsipei Nacom pejüntu coyene xanepanaein, daxota yawena barapomonaetha, pomonae bequein xua jopa wecobe noteibiya jacobebiyo xuano xua peaitabe jiwi. <sup>36</sup>Payabara cui nanta xeinare po coyene xua ichamonae painya neyawenaewa. Icha be Nacom ichi xua yabara cui nanta xaina po coyene xua peyawenaenexatsi jiwi, bara paichinde”, jei Jesús.

**Meje yabara poxonae Jesús cuiduba  
xua jiwi jopa bewa yabara paebina  
ichamonae xua penatsicuentisiwa  
xua abe peexanaexae**

(Mt 7.1-5)

<sup>37</sup> Equeicha Jesús namchi, jeye: “Jopa ichamonae payabara paebinde xua penatsicuentisiwa xua abe peexanaexae. Nexata bapoxonae Nacom jopa paca yabara paebi tsane painya xua nenatsicuentisiwa xua abe painya exanaexae. Ichamonae jume daunweya jopa pajande: ‘Apara bapon picoya, apara bapon picoya’, jopa pajande. Nexata Nacom jopa paca daichi tsane baxua. Pacui yabara jüntemainare po coyene ichamonae pacata abe exana, nexata Nacom paca cui yabara jüntemainaena xua abe painya neexanaewa. <sup>38</sup> Ichamon-aetha, jopa juniya pacatsibinde, nexata Nacom jopa juniya paca catsibi tsane. Painya dorotha paca catsina, beta pacata pesabina, yawa beta pacata xatabacorecaena pecobetha yawa pacata nūnūcūtaxuina. Yawa pacata wūnca exanaena. Icha daunweya payabara paebina xua penatsicuentisiwa ichamonae xua abe peexanaexae, Nacom barichi daunweya paca yabara paebina xua painya nenatsicuentisiwa xua abe painya neexanaexae”, jei Jesús.

<sup>39</sup> Jesús tsipaeba barapomonaē pecayabara jūta pepaebi diwesiyo, jeye: “Pon ba peitata nacutsin jopa itacupaetsi xua pematacaponaewa ichūn pon irū peitata nacutsin. Icha bapon baxua exanaetsipabe, baponbe fetotha joparecaetsipabe. <sup>40</sup> Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaēin. Ichitha pon poxonaē wetsina xua nacuiduba, bapon be pia pecuidubin cui jūpa”, jei Jesús.

<sup>41</sup> Barichi equeicha Jesús paeba caeintha pomonaē pijimonaē tatsi

jiwana icha pecayabara jūta pepaebi diwesiyo, jeye: “Xam be jinya jiton itata taneme poxonaē naepūtiyo itata jopiyatsi, ichitha jopa taem xua irūxū xam nama pin naepūto neitacueretotha ducua. Barapocotsi jūta coyeneya ichi, xam ba jinya jiton cui taneme xua poxonaē abe exana, ichitha jopa nayaputaem xua irūxū xam bara ichim nama bichocono abe exaname. <sup>42</sup> Icha jopa taem pin naepūto xua neitacueretotha ducua, jopa caitacupaeyo xua nejeiwa jinya jitontha: ‘Tajiton, cata jutinchi naepūtiyo xua ducua neitacueretotha’, xua nejeiwa. Xam nepaēbin xua ichūn exana xua baxua neexanaewatha irū. Xam copiya nata jure barapo pin naepūto xua neitacueretotha ducua. Bapoxonaē beta taename nejutsinexa tsane naepūtiyo xua jinya jiton peitacueretotha tarucuatsi”, jei Jesús.

**Meje yabara poxonae Jesús  
yabara cuiduba xua pinae jiwi  
yaputane nae penacoichixae**

(Mt 7.17-20; 12.34-35)

<sup>43</sup> Jesús namchi, jeye: “Po naēin pexeinya naēin jopa bapana nacoichiyo po pethei camatsa thei. Barichi po naēin camatsa naēin jopa bapana nacoichiyo po pethei pexeinya thei. <sup>44</sup> Jiwi yaputane nae po nae penacoichixae. Daxita jiwi yaputane xua higo thei, po pethei pexeinya thei jopa bapana teracae po naetha sojei xua camatsa nae. Mataūtano jiwi yaputane xua uva thei po thei ūnbototha xūwa jopa bapana teracae naēixitha. Bara jūta ichi jiwi yaputane xua pebin pejūntū coyene xanepanaēin pon xanepanaya peexanaēinxae. <sup>45</sup> Pon ba pejūntū coyene xanepanaēin, bapon ba jame ba paeba pocotsiwa pexeinya coyene, pejūntū coyene xanepanaēinxae. Barichi pon ba peajūntūcoyenebein bapon ba

abe paeba, peajuntucoyenebeinxae. Pocotsiwa jiwi nanta xeina pejuntu coyenetha, baxua ba pecoiboto tsina cueicueijeji”, jei Jesús.

**Meje yabara poxonae Jesús ainya  
bomuxube yabara paeba**

(Mt 7.24-27)

<sup>46</sup>Equeicha Jesús namchi, jeye: “Paxam pana neyabara jam: ‘Patatanecanamataxeinaem’, pajam, daichitha jopa paexanaem pocotsiwa paca itorobatsi. <sup>47</sup>Incane yabara paca tsipaebinchi pon xua patopa taxantha, nejume naitomata pocotsiwa paeban, matautano exanano pocotsiwa ichichipan, bapon beta popona Nacom nexa. <sup>48</sup>Bapon barapocotsi juta coyeneya nacana exana icha be ichi pon bo acabanota peira matatsucaewatha xua ichaxota ira daunwei. Meje jeye: Copiya muthun tajn exanareca pecuaranobinexa bomuxu naeton. Poxonae mene matacaewaxuba, barapo bomuxu jopa joparenaeyo poxoru naeton tajn umenareca xuano poxoru bomuxu uncua pematatsucaewatha ichaxota ira daunwei. <sup>49</sup>Ichitha nama pon nejume taetha, xuano jopa exanaeyo pocotsiwa ichichipan, bapon be meje: Bapon be pocotsin bo acabanota ichaxota ira matafatsana, xuano naeton jopa tajn umenarecaeyo. Poxonae mene matacaewaxuba, barapo bomuxu joparena poxoru naeton jopa tajn umenarecaeyo, xuano poxoru bomuxu uncua ichaxota ira matafatsana. Barapo bomuxu nainya joparena. ¡Maisa bomuxu bichocono abe!” jei Jesús.

**Meje yabara poxonae  
Jesús axaibi exana pon  
soldadomonae romanomonae pia  
pentacaponaein tatsi tanacuitatsi**

(Mt 8.5-13)

**7** Poxonae Jesús baxuan najume weta xua barapomonae jume tane, bapoxonae Capernaum tomara beya pona. <sup>2</sup>Baxotiya popona romanomonae soldadomonae pia pentacaponaein tatsi, pon xeina pia petanacuiteibinchixaetsi. Barapon bichocono antobe pia petanacuitinchi. Bapon pon petanacuiteibin bichocono atene, xua awatha petupa. <sup>3</sup>Poxonae romanomonae soldadomonae pia pentacaponaein tatsi Jesús yabara jume tainchi, bapoxonae itoroba pitiri jiwi judiomonae jiwapaniwi Jesús beya xua petaaxaibi exanaenexa tsainchi pia petanacuiichin tatsi. <sup>4</sup>Barapomonae Jesús imoxoyo caquita poinchi. Barapomonae Jesús jume daunweya tsipaebatsi, jeichichi:

—Barapo pentacaponaein, pentacui xanepanaein, daxota yawende. <sup>5</sup>Poxoru bapon wanacuamonae wunae yabara cananta xeineibatsi. Matautano bapon itoroba xua acaba pata penacaetutsi bo pia paratixitha, jei barapo pitiri jiwi.

<sup>6</sup>Nexata Jesús baru poinchi barapomonae. Ichitha poxonae Jesús muxu pepatopae, romanomonae soldadomonae pia pentacaponaein tatsi pia botha tatsi, barapo soldadomonae pia pepa pentacaponaein tatsi, bapon itoroba pia jiwi xua petacajume jeichinexa tsainchi Jesththa: “Tanecanamataxeinaein, xan saya tacui pawin. Auran xua xam nepatopaewa tsane tabotha tsipei xam ainya cuim. <sup>7</sup>Daxota jopa patopaeinyo nexainya beya, tsipei xam ainya cuim, xua paebiname pia peatenewatha tatsi bapoxonae bapon axaibi bara tsane

pon inta nacuiteiba. <sup>8</sup>Xan bichi xeinan tanecanamataxeinaein, pon neitoroba. Barichirũ xeinan soldadomonaе pomonaе itorobeiban. Poxonaе ichũn itoroban: ‘ponde’, jan, bapon pona. Poxonaе ichũn waban: ‘antha’, jan, bapon patopa. Pon inta nacuita, itoroban: ‘inta exande’, jan, inta exana”, jeye pentacaponaein, jei pomonaе penacajume caitorobixaetsi.

<sup>9</sup>Poxonaе Jesús baxua jume taeba, jume cui yabara cananthũta nanta xeinanaya cabenaeca beta pepaebixae romanomonaе soldadomonaе pia pentacaponaein tatsi. Jesús necotaba pomonaе puna poinchi, barai, jeye:

—Xaniyan paca tsipaebatsi Israel nacuatha irũ dapocotsin jopa caxinaeinyo pocotsin icha pon iche pon tana necui yabara jume cowũntsin xua bara neitacũpa xua axaibi taexanaewa jiwi, jei Jesús.

<sup>10</sup>Poxonaе barapomonaе botha caibe nawibiya, barapomonaе taeba dũcũpa xua axaibiya boca romanomonaе soldadomonaе pia pentacaponaein tatsi pia petanacuichin tatsi.

**Meje yabara poxonaе Jesús  
petũpaеin asu exana pexanto tatsi  
powa pecuenta tũpaewayotsi piseuri**

<sup>11</sup>Poxonaе Jesús baxua nacui weta, bapoxonaе Nain tomara beya pona. Jesús cueyabatsi pijimonaе, irũ pin bicheitomonaeno napona. <sup>12</sup>Poxonaе Jesús muxu pepatopae tomaratha, Jesús tane xua pewowin petũpaеin cajojondenatsi xua pemũthũthũ xubinexa tsainchiba, pon pena tsita compa. Barapo pewowin powa pecuenta tũpaewayotsi piseuri barapowa pexanto tatsi. Barapowa puna poinchi pin bicheito. <sup>13</sup>Bapon Jesús pon Pecanamataxeinaeinxae jiwi, barapowa yabara cui nanta xeinatsi. Jesús barai bapowa, jeye:

—Jopa wecoyande, jei Jesús.

<sup>14</sup>Nexata Jesús imoxoyo caquita pona petũpaеin, yacaja jayabano. Pomonaе yacaja capona yacaja caumenarũcũpa. Jesús barai petũpaеin, jeye:

—Pewowin catsipaebatsi, nontaponde, jei Jesús.

<sup>15</sup>Nexata pewowin pon tũpa, nantacotecataba, yawa tamropata pitaba xua pecueicueijejiwa. Jesús coxiwatha cana cobenata pexanto. <sup>16</sup>Poxonaе pin bicheito taerũcũpa baxua, barapo pin bicheito bichocono junuwa. Barapoxonaе barapo pin bicheito Nacom wũnae jaintatsi, barapomonaе namchi:

—Nacom peitorobi jume pepaеbin, pon ainya cui, waxantha patopa. Nacom siwa pona peyawenaenexa pijimonaе pomonaе pia pejume cowũntsiwichi, jei barapomonaе.

<sup>17</sup>Daxita jiwi jume tane xua Jesús exana Judea nacuatha, irũ po nacuan imoxoyo caquita ena Judea nacuatha.

**Meje yabara poxonaе Juan  
itoroba pijimonaе Jesús beya  
peyainyabinexa tsainchi Jesús**

(Mt 11.2-19)

<sup>18</sup>Juan pijimonaе tsipaebatsi daxita baxua xua Jesús exana. Juan waba ainya pebinbe pijimonaе jiwana tatsi. <sup>19</sup>Baponbe Juan itoroba Jesús beya xua najume caruta baponbetha matauta xua Jesús peyainyabinexatsi xua icha metha bara baponde jei pon bewa patopeicaena, bapon Cristo, jei. Ichacuitha metha ichũn jampa, xua pawũnae ewatsin jampa jei. <sup>20</sup>Bara baponbe ponbe Juan peitorobixaebe, baponbe imoxoyo Jesús caquita uncuatsibe. Baponbe Jesús baraichi:

—Juan pon jiwi Pebautisabin, bapon pana nejume caruta, bapon namchi: ‘¿Metha bara xaniwaicha baponda, pon bewa patopeicaena, bapon Cristo?’ jei.



‘¿Ichacuitha metha bara ichun pawnae ewatan jampara?’ jei Juan, jei baponbe.

<sup>21</sup>Poxonae baponbe patopabe, Jesús axaibi exana peatenewi, iru pomonae pin domae xainchi, yawa taitaweta pomonae cauri xeina. Matautano yawenano xua equeicha tane pomonae jopa necotsiyo. <sup>22</sup>Baponbe jume notatsibe. Jesús jume nota, jeye:

—Paponarebe Juan beya. Juan patsipaebarebe xuaunxuae pocotsiwa panecui tanemebe, matautano xuaunxuae pocotsiwa pana nejume tanemebeno. Matautano patsipaebarebe xua pomonae peitata nacutsi jiwi equeicha tane, matautano xua pomonae pejayujayujeimonae beta pona equeicha. Matautano xua pomonae peperu sawichimonae equeicha peru wnae, matautano xua pomonae pemuxusipanaewi equeicha muxu nasaba, matauta xua pomonae pewerapaewi equeicha asu. Matautano pomonae xua peacopeibiwi jume tane Nacom pia pexeinya pecapanenebiyae diwesi jume. <sup>23</sup>Patsipaebare Juan xua xan janje: ‘Juntu coyene weiweinaena pon jopa ainya unthuthuto, pon xaniwaicha neyabara cui jume cowanta’, xua jan, jei Jesús.

<sup>24</sup>Nexata ponbe Juan itorobabe ponabe Juan beya. Bapoxonae Jesús tsipaeba jiwitha, xua Juan yabara paebatsi, jeye barapomonaetha: “Ira xuepana susato tsurucuae nacuatha paponame. Poxonae bara beya paponame, ¿eta xua painyatsi? ¿Painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. <sup>25</sup>Bara paichim paponame, ¿painya nejume taenexa pebin, pon peitupanae paparuwa nama xatata? Jume apara. Payaputaneme pomonae peitupanae paparuwan nama xataba, barapomonaetha jinompa pexeinya bontha

pomonae jiwi itorobiya pia pepa peewatsiwixaetsi. <sup>26</sup>Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponame xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwanapin beyacaincha ichun pon Nacom peitorobi jume pepaebin. <sup>27</sup>Juan bapon apra, pon yabara paebatsi Nacom Pejume Diwesitha poxonae Nacom netsipaeba, nejeyi:

‘Catsiwanae itorobinchi copiya pon tana nacajume carutsin.

Barapon juntu cui wnaetsina jiwi, xua daxita jiwi najuntu cui

wnaetsina xam nexa, xua necantenta weyataeya wabinexa poxonae patopaename’,

nejeyi Nacom Pejume Diwesitha.

<sup>28</sup>Paca tsipaebatsi, xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonaetha jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueijei po coyene xua Nacom itorobina jiwi. Ichitha po diwesi xua tamonaetha anoxuae paeba barapo diwesi bichocono ainya cui diwesi beyacaincha xua Juan cueicueijei, bequein jiwi nanta xeina xua tamonaetha jopa ainya cui jiwi.

<sup>29</sup>“Daxita barapomonaetha baxua jume taerucupa. Iruru jume taerucupa pomonae paratixi pentoma noteibiwi romanomonaetha pia pepa peyanacua ewatsinchi nexa, pomonae bayatha Juan bautisaba. Daxita barapomonaetha nanta xainarucupa xua Nacom bara

pepa pentacui xanepanaein. <sup>30</sup>Ichitha fariseomonaē iru pomonaē jiwī peucidubiwi Moisés pia peitorobi coyene tatsi, barapomonaē jume itaweta, Nacom jume itawetatsi pocotsiwa xua Nacom beexanaena barapomonaē nexa. Matautano barapomonaē cui itaweta, Juan cui itawetatsi xua pia pebautisabi coyenewa.

<sup>31</sup>“Jiwi pia Pecanamataxeinaeinchi tatsi, bapon Jesús namchi, jeye: ¿Eta pocotsimonaē cui jupatsi barapomonaē pomonaē xote jinompe pomonaē Nacom jume itawetatsi? ¿Etabe juta ichi barapomonaē? <sup>32</sup>Barapomonaē be pexui, pocotsixi panatha nabaru jinompa. Nabaru wawai tsurubenaebiya. Barapoxi nabarai, jeye: ‘Bayatha oibo paca tsimuxu obatsiba ichitha jopa panawirabim. Bayatha paca tsimuxu wecoyeichiba icha be ichi poxonaē ichun tatupatsi, ichitha jopa pana itanuwe jume notsim xua painya newecoyeinexaru’, jei barapoxi. <sup>33</sup>Juan patopa pon jiwi Pebautisabin. Bapon jopa xaeyo pan. Matautano jopa apaeyo vino mera. Ichitha paxam pajam: ‘Apara Juan puna popoinchi cauri’, pajam. <sup>34</sup>Bapoxonaē xan, ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame, pajam: ‘Bapon maisa jopa juniya nabanaeyo, yawa jopa juniya apaeyo. Peatsacae jiwi abe peexanaē jiwi pia jiton tatsi, iru pomonaē paratixi pentoma noteibiwi barapomonaē pia jiton tatsi’, pana neyabara jam. <sup>35</sup>Nacom piamonaē tatsi barapomonaē tsita exana xua jiwi tsita exanatsi Nacom pia peyaputae coyeneinthata tatsi. Po coyene barapomonaē exana baxua Nacom tsita pexeinya coyenetsi”, jei Jesús.

**Meje yabara poxonaē  
Jesús siwa pona Simón  
fariseomonaēpin pia bo beya tatsi**

<sup>36</sup>Caein fariseomonaēpin bapon Jesús wabatsi petaxaenexa tsainchi pia botha. Jesús pona bara beya yawa naeca pexaethopaewatha penanabanaenexa tsane. <sup>37</sup>Nexata petsiriwa patopa powa pesi cui weiweinaewa, powa barapo tomaratha popona. Barapowa yaputane xua Jesús nanabanaeicha fariseomonaē jiwanaepintha. Barapowa alabastro ibo wun bosibu atsato capatopa Jesustha xua petuxuei nasiwa xua bichocono wunca. <sup>38</sup>Barapowa Jesús imoxoyo caquita wecoyei tsuncuaetsi yawa peitacuere mentha Jesús taxu atatsica exanatsi. Bapoxonaē barapowa pia pentanatha baxota Jesús taxu tsewa exanatsi. Barapowa Jesús taxu tsutsubatsi poxoru Jesús Pecanamataxeinaein jiwi. Bapoxonaē barapowa Jesús taxu eatabatsi petuxuei nasiwatha. <sup>39</sup>Poxonaē fariseomonaē jiwanaepin pon Jesús pewabixaetsi petaxaenexa tsane pia botha, poxonaē bapon tane baxua, bapon pia coutha nabarai: “Icha bapon xaniwaicha tsipae pon Nacom peitorobi jume pepaēbin tsipae metha yaputaetsipa xua powa jayabatsi apara powa pesi cui weiweinaewa, matautano xua bapowa powa peatsacaewa. Ichitha bapon xaniwaicha jopa daponyo pon Nacom itoroba”, jei barapon pon fariseomonaēpin. <sup>40</sup>Nexata Jesús barai fariseomonaē jiwana jiton, jeye:

—Simón incane catsipaēbinchi, jei.

Bapon jume nota, jeye:

—Pon jiwi Necuidubimxae, moyataema, jei.

<sup>41</sup>Jesús barai, jeye:

—Pebinbe nacueyatabe nacowaetabe paratixi ichuntha. Ichun jopa cataunxuae xuya catsiyo quinientos po paratixi-

monaebe po paratixi quinientos po mat-acabibe nexa poxona nacuita. Ichun jopa cataunxuae xuya catsiyo cincuenta po paratiximonaebe pontha pon penacowaetsixaetsi. <sup>42</sup>Poxoru baponbe jopa itacupaetsibe xua xuya equeicha pecatsiwa tsanebe pontha pon penacowaetsixaebe, daxota pon penacowaetsixaetsi paratixi, bapon namchi, jeye: 'Metha basaya paca cui yabara juntemainatsibe', jei. Incane netsipaebare Simón xua baponbe, ¿jintam yatsicaewa antobetsira xua beyacaincha ichun antobetsi xua antobe pon nacowaetatsi paratixi? jei Jesús.

<sup>43</sup>Simón jume nota, Jesús jume notatsi, jeye:

—Bu, metha moya pon bichocono cacui yabara juntemainatsi bichocono pon penacowaetsixae quinientos po paratiximonaebe, jei Simón.

Jesús barai:

—Bara beta nejume notame, jei Jesús.

<sup>44</sup>Nexata Jesús necota barapo petsiriwa, bapoxonae Jesús Simón baraichi: Taema pocotsiwa barapo petsiriwa inta exana. Xan patopan jinya botha ichitha jopa meratha netaxu waexubim xua painya cui coyenyathaxae xua judiomona pamxaem. Nama barapowa peitacuere mentha netaxu atatsica exana yawa pia pentanatha netaxu tsewa exana. <sup>45</sup>Xam jopa netsutsubim, ichitha bapowa poxona caena jonarenan awiya came netaxu tsutsuba.

<sup>46</sup>Jopa nenta epatabim petuxuei tuxusi nasi mera. Ichitha barapowa petuxuei tuxusi nasi mera netaxu epataba. <sup>47</sup>Daxota catsipaebatsi xua bapowa matowa nasi cui matacaeta. Daxita baxuan yabara juntemainan, daxota bichocono neantobe. Ichitha nama pon be conotha nasi cui matacaeta, be conotha yabara cui juntemainan. Bapon be conotha neantobe, jei Jesús.

<sup>48</sup>Equeicha Jesús namchi bapowatha. Petsiriwa baraichi, jei:

—Cacui yabara juntemainaya juntü puxana exanatsiba abe jinya neexanae cui ru coyenewan, jei Jesús.

<sup>49</sup>Pomonae Jesús pebaru nabanaeetsi, barapomona nabarai, jeye:

—Bapon, ¿jintamda, jamaisa bapowa cacui yabara juntemainaya juntü puxana exanatsi abe pia peexanae cui ru coyenewan tatsi? jei barapomona pomona baxota naena.

<sup>50</sup>Jesús barai petsiriwa, jeye:

—Bayatha necacapanepaewa caexainchi tsipei yabara tana nejume cowuntsixaem. Saya juntemiya poponde, jei Jesús.

### Meje yabara yabuxi powaxi Jesús yanabatsi

**8** Bapoxonae pirapae Jesús daxita tomarantha pona ducuaeta, tsica tomaraxithano po tomarantha pin tomaranthano. Matautano paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamona pomona Nacom juntü coyene itorobiya ewata. Jesús yanabatsi pia peitorobiwi tatsi pomonae doce poyobe. <sup>2</sup>Barichi Jesús yanabatsi petsiriwaxi, powaxi Jesús bayatha taitaweta cauri xuano axaibi exanano xua domae xainchi. Barapowaxi jiwana caewayo pewun María Magdalena, tsipei pia tomara tatsi pewun Magdala. Barapowa María powa bayatha taitawetatsi siete poyobe cauri. <sup>3</sup>Bichiru petsiriwa, powa pewun Juana, bapowa napona. Bapowa Juana, Cuza piowa tatsi. Bapon Cuza pon Herodes pia bo tatsi tayapucaecatsi. Iru ichowa pewun Susana, bapowa napona. Iru ichowaxi ainya yabuxiru napona. Daxita barapowaxi Jesús upain exaneibatsi xua xoxi barapowaxi pexeinaexae.

**Meje yabara poxonae Jesús cuiduba  
jiwi pecayabara juta pepaebi  
diwesiyo xua pon peubin yabara**

*(Mt 13.1-9; Mr 4.1-9)*

<sup>4</sup>Daxita tomaranpiwi pata. Poxonae pin bicheito nacaetuta Jesús cuiduba barapo bicheito po diwesiyo pecayabara juta pepaebi diwesiyo. <sup>5</sup>Jesús barai: “Pebin pon peubin pontaba pia ubichi pabitha. Poxonae pon peubin ubauya, icha xu namtotha othopeica, pexu jiwi taxunaunaba, yawa pepupunaewi xu xane. <sup>6</sup>Icha xu, xu othopeica ibowantha. Poxonae barapo xu xuwa, barapo xu, xu yanna poxoru jopa tajũ xuwarecaeyo poxoru ibotixi nacũcũna yawa poxoru ira tsewa. <sup>7</sup>Icha xu, xu othopeica ichaxota pesoiwan xuwinaena. Barapo xu yaboto nanta capanaba poxoru yawa muxuna xuwina pesoiwan. <sup>8</sup>Icha xu, xu othopeica ichaxota ira wũnae. Poxonae barapo xu, xu xuwa, xu nawũnaeta. Cae xuto nacoita cien po xu matabũxũyobe”, jei Jesús.

Poxonae Jesús baxua paeba, bapoxonae jume daunweya namchi: “Icha pamuxu dubename, moya pana nejume naitaeware pocotsiwa tapaca tsipaebi-watsi”, jei Jesús.

**Meje yabara poxonae Jesús namchi  
xua exua metha pecayabara juta  
pepaebi diwesiyo yabara, jane jei**

*(Mt 13.10-17; Mr 4.10-12)*

<sup>9</sup>Nexata Jesús yainyabatsi pijimonae, barapomonae namchi, jeye: “¿Eta pocotsiwa yabara caunutame poxonae pana netsipaebame barapo pecayabara juta pepaebi diwesiyo?” jei bapomonae. <sup>10</sup>Jesús jume nota, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawũn xeinaewa. Barapo moya peyawũn xeinaewa apara xua Nacom exana xua paca cana exana

xua painya nepaca itacũpaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha jame ichamonae meisa pomonae jopa nejume cowũntsiyo jopa daichichi Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara juta pepaebi diwesiyo xua Nacom peyabara yaputaenexatsi. Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane”, jei Jesús.

**Meje yabara poxonae Jesús  
pijimonae muxu yaputane exana po  
diwesi xua pecayabara juta pepaebi  
diwesiyo pon peubin yabara**

*(Mt 13.18-23; Mr 4.13-20)*

<sup>11</sup>Equeicha Jesús namchi: “Meje apara baxua yabara caunutan poxonae paeban pecayabara juta pepaebi diwesiyo: Po xuto xua iratha xuwa nacoichiya xanepanaya exana. Barapo xuto yabara caunuta Nacom Pejume Diwesi xua poxonae pebin jũntũ coyene webocatsi pebin wũnaeya xanepanaya cana exanatsi. <sup>12</sup>Po xuton xua namto beothopiya, aichurubena. Barapo xuton yabara caunuta xua jiwi bara jũntũ coyene weichichi caurimonae pia pentacaponaein tatsi. Jiwi jũntũ coyene weajumetsurubena exanatsi Nacom Pejume Diwesi xua bayatha po jume jume tane, xua bapoxonae jopa petajume cowũntsinexa tsainchi Nacom, yawa xua jopa petana capanenebiyaenexa tsainchi Nacom beya xua Nacom exanaena. <sup>13</sup>Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano

juntũ coyene weiweinaya Nacom jume cowuntatsi. Ichitha bara caeto jume cowũnta poxoru barapomonae antũfaetabiya jume jeba Nacom Pejume Diwesi pejũntũ coyeneintha. Mataũta cauri juntũ coyene wemuxu paeba xua abe peexanaenexa tsane. Daxota barapomonae cayabara jũntemaina Nacom. <sup>14</sup>Po xuton xua xu othopa pesoiwantha barapo xuton caunuta xua pomonae Nacom Pejume Diwesi jume tane ichitha saya barompaya pia jũntũ coyenyatha jinompa, yawa saya Ʃ copei cayabara nanta xeina, yawa saya exana pocotsiwa jũntũ coyene weiweina cana exanatsi. Po coyene pebiwi exana baxuan barapocotsi jũta coyeneya exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi jũta coyeneya ichi, barapo jiwi jopa xanapanaya jinompaeyo Nacom nexa. <sup>15</sup>Po xuton xua xu othopeica peira wũnaewatha, bara nacoita. Barapo xuton yabara caunuta pomonae jume tane Nacom Pejume Diwesi xuano jume cowuntano poxoru jũntũ coyene xanapanaya jume tane. Matautano beta exana dubenanaebiya beya matapainya jiwi cui tane xua barapomonae jũntũ coyene xanepana Nacom peitabaratha tatsi”, jei Jesús.

**Meje yabara poxonae Jesús pijimonae tsipaeba pecayabara jũta pepaebi diwesiyo xua pecoicha yabara**

(Mr 4.21-25)

<sup>16</sup>Equeicha Jesús namchi: “Poxonae jiton pecoicha coicha exana bapoxonae jopa coicha matacatsiyo. Mataũta jopa coicha exanaeyo cama peũpana deca. Jame asiya coicha exanatsi, pecoicha taenexa pomonae jojoneibarena. <sup>17</sup>Daxita pocotsiwa xua moya peyawũn xeinaewa bexa tsane jiwi yabara yaputaena. Barichi barapo diwesi xua

pecayabara jũta pepaebi diwesi xua paebaponan jiwi itacũpaeinchi xua peyabara yaputaewa tsane.

<sup>18</sup>“Pana nejume naitaeware painya neexanaenexa pocotsiwa paca tsipae-batsi. Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowũntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowũntsiwa tsainchi”, jei Jesús.

**Meje yabara Jesús pena tatsi irũru peyapin jiwi tatsino**

(Mt 12.46-50; Mr 3.31-35)

<sup>19</sup>Nexata Jesús pena tatsi irũru peyapin jiwi tatsino pata ichaxota Jesús uncua. Ichitha jopa Jesús imoxoyo caquita ponaetsi tsipei bichocono pin bicheito. <sup>20</sup>Ichũn Jesús baraichi:

—Ena, irũru neyapin jiwino pesato beya umena. Bepara bequein cataei, jei bapon.

<sup>21</sup>Jesús namchi barapomonaetha:

—Apara jame be taena tsicotan yawano be tayapin jiwi tsicotan pomonae xua jume tane Nacom Pejume Diwesi xuano xua exana pocotsiwa Nacom itoroba, jei Jesús.

**Meje yabara poxonae Jesús xainya ducuanaya exana joibo, yawa maratsacano xainya mene ducuanaya exanano**

(Mt 8.23-27; Mr 4.35-41)

<sup>22</sup>Caentacabi Jesús baru pona piji-monae jeratha. Jesús pijimonae barai:

—Anthã, poinchi icha muxunene beya, pucua beya, jei Jesús.

Barã ponarũcupaba. <sup>23</sup>Poxonae cataunxuae jeratha yana enapona bapoxonae Jesús maituncuataba.

Bapoxonae jemeicha pin joibo naetaba mentha. Matauta bichocono jera mene wunca, muxu pebunarecae. <sup>24</sup>Nexata Jesús yaubaxotsi. Jesús baraichi:

—¡Jesús, Patatanecuidubim, yana bunarecatsi! jei barapomonae.

Nexata Jesús nacosataxuba. Jesús itawetaxuba joibo maratsacano. Daxita caewanaya joibo yawa maratsacano. <sup>25</sup>Nexata Jesús barai pijimonae:

—¿Jopa pana nejume cui yabara jume cowantsim xua bara tana neitacupaewa xua tapaca yawenaewatsi? jei Jesús.

Barapomonae bichocono junuwa yawa najuntu coyene cabenaecarucupa. Barapomonae caemonae natsipaeba, jeye:

—¿Jintam metha baponda? ¡Jamaisa bapon itaweta joibo yawa maratsacan xua daxita xainya dubenanaya! najei barapomonae.

**Meje yabara xua pebin yabara  
pon caurimonae pexeinaein  
pon Gerasa nacua pin**

*(Mt 8.28-34; Mr 5.1-20)*

<sup>26</sup>Pirapaeyo jebouna Gerasa nacua itapatha, po itapa eca Galilea nacua icha itapa panawa beya. <sup>27</sup>Poxonae Jesús muxu penontounae jeratha, pebin pon copiya tomarapin pon equeicha aisowapin naexana, bapon patopa. Jesús caquita uncuatabatsi. Caena bayatha bapon puna jinompatsi caurimonae. Paparuwa jopa yawa poponaeyo, matautano botha jopa poponaeyo, saya ibo wountha poponeiba. <sup>28</sup>Poxonae Jesús tainchi, iratha jopa. Pentabocotha uncua bapon, Jesús peitabaratha tatsi. Jume daunweya wawai:

—Jesús, Nacom Pexantom, pon peitabocotha eca. ¿Eta pocotsiwa metha patopame taxantha? ¡Jume daunweya cabaraichi jopa neperaxa exanaeindel! jei.

<sup>29</sup>Daxota bapon baxua paeba yaitama Jesús taitaweta cauri xua peponaenexa bapon pia xainya weya tatsi. Bapon matowa teiqueibatsi cauri. Bayatha bequein jiwi taxu cubeiba yawa pemaxuno pe-naintotha xua bapon xua jopa peponaenexa, ichitha bapon nain xuneiba. Bapon ira xuepana susato tsurucuae nacua beya itorobeibatsi cauri. <sup>30</sup>Jesús yainyaba:

—¿Eta po wam? jei Jesús.

Bapon jume nota exanatsi Jestustha. Bapon namchi, jeye:

—Tawun ayei, jei.

Baxua namchi tsipei bayatha cauri bicheito cunto pata bapontha. <sup>31</sup>Equeicha barapo pebin cueicueijejei exanatsi barapo cauri bicheito cunto. Barapo cauri cunto namchi, jeye: “Jesús jopa pana neitawetsinde po nacua ira bereca ichaxota jiwi atene tsaibi”, jei bapon xua cueicueijejei exanatsi cauri. <sup>32</sup>Pin marrano duweimonae pitapatororotha jinompa xua yawa xayompano. Caurimonae Jesús jume daunweya wucatsi, jeye: “Pana nepu copabare marrano duweimonaetha”, jei. Jesús namchi: “Moya pataema”, jei. <sup>33</sup>Nexata caurimonae pebin wepu ponatsi, yawa marrano duweimonaetha pata. Barapo marrano duweimonae ducupa, pin pitapatororo othopareca. Pucuatha bunothopa. Caurimonae cabunothopatsi.

<sup>34</sup>Pomonae yapu eena barapo marrano duweimonae junuwiya cuinaenouta tomarantha xuano tomaran aisowapiwi, xua pepaebinexa xua baxua exana. <sup>35</sup>Jiwi poxonae baxua tane, pata baxota ichaxota Jesús uncua. Tainchi pon wepu poinchi caurimonae. Bapon Jesús petaxu deca taecatsi, xuano paparuwa nama xatateca. Axaibiya eca, be pocotsin jopa matsiyabichi. Barapo jiwi junuwa nawita. <sup>36</sup>Pomonae copiya tane, barapomonae equeicha tsipaeba ichamonaetha pomonaetha pomonae

jopa taeyo po coyene xua bapon equeicha jume xua copiya bequein caurimonae pexeinaewa. <sup>37</sup>Poxonae daxita barapo Gerasa nacuapiwi jume tane baxua, daxita barapomonae Jesús itawetatsi xua pewarapaenexa bara weya xua Gerasa nacua weya, poxoru barapomonae junuwa bichocono. Daxota Jesús jeratha nontabiya bara warapano. <sup>38</sup>Pebin, pon wepu poinchi caurimonae, Jesús wúcatsi xua bepara puna ponaetsei Jesús. Ichitha Jesús jopa copatsiyo xua pepuna ponaewa tsainchi bapon.

<sup>39</sup>—Jinya bo beya ponare. Daxita paebare jiwitha xua bayatha Nacom cata exana, jei Jesús.

Pebin nawiya tomara beya yawa daxita paezano tomaratha xua po coyene bayatha Jesús taexana xua bapon tacana exanatsi.

**Meje yabara xua poxonae Jairo pexantiyo taaxaibi exanatsi; yawa yabara xua bapoxonae iru icha yabuyo axaibi exanatsi poxonae Jesús pia paparuwa tajayabatsiru**

*(Mt 9.18-26; Mr 5.21-43)*

<sup>40</sup>Poxonae Jesús caibe patoparena Galilea nacua berena, jiwí Jesús matenta weiweinaya wabatsi, tsipei daxita barapomonae Jesús ewatatsi. <sup>41</sup>Nexata pebin patopa pon pewun Jairo. Bapon Jairo pon canamataxeina judiomonae pia penacaetutsi bo tatsi. Jesús petaxutha irabe tatayecarecatsi. Baxua Jairo exana poxoru Jesús pon ainya cui peexanaeinchi. Bapon Jairo Jesús jume daunweya wabatsi, jeye: “Anthá tabothona ponare”, jei Jairo. <sup>42</sup>Bapon baxua paeba tsipei Jairo pexantiyo saya compa tatsi. Barapowayo doce po weibe xeina. Bapowayo muxu petupae.

Poxonae Jesús iya iru pin bicheito naponá. Bichocono jiwí acuc. <sup>43</sup>Barapo pin bicheitha yabuyo iru

napona. Bapowa caena bayatha beya yadoce po weiyobe jopa xua pentabu janatha boca xua be nantawane. Barapowa daxita cobe caewitatsi xua peaxaibi exanaenexa tsainchi. Pomonae jiwí peyawubiwi cobe caewita daichitha jopa axaibi exanaetsi. <sup>44</sup>Bapoxonae barapowa imoxoyo caquita uncuataba Jesús peputha tatsi. Barapowa Jesús pia paparuwa tatsi tajayabatsi xua peopirawa. Bapoxonae caena nainya bapowa ajaneibi tsanareca. <sup>45</sup>Nexata Jesús yainyaba barapo pin bicheitha, jeye:

—¿Jintam nejayabara? jei.

Daxita barapomonae paeba xua pinae jopa jayabichiba. Daxota Pedro barai:

—Patatanecuidubim, barapo pin bicheito acucu canapuna torobabiya tane, dacotsiwa jam: ‘¿Jintam nejayaba?’ jam, jei Pedro.

<sup>46</sup>Ichitha Jesús jume nota:

—Ichun nejayaba tsipei taayapusuwa newepu jiwana aichurucuae xua axaibi exanan, jei Jesús.

<sup>47</sup>Petsiriwa yaputane xua cobe yaputainchi xua Jesús cobe yaputane poxonae bapowa jayaba. Barapowa junuwiya patopa yawa pentabocototha uncua ira betaeuncuarecano Jesús petaxutha tatsi. Baxua exana bapowa poxoru Jesús ainya cui peexanaeinchi. Nexata barapowa namchi barapo bicheito peitabaratha, jeye:

—Apara xan jayaban. Poxonae jayaban caena nainya axaibin, jei. <sup>48</sup>Nexata Jesús barai, bapowa baraichi, jeye:

—Yabuyo caaxaibi exanatsi tana neyabara jume cowuntsixaem xua bara tana neitacupaewa xua tacaaxaibi exanaewatsi. Saya jüntemiya poponde, jei Jesús.

<sup>49</sup>Poxonae cataunxuae Jesús tsipaebauya bapowatha, pebin patoparu pon Jairo pia bo tatsi weya pona. Bapon tsipaeba pontha pon

pecanamataxeinaeinxae judiomonae pia penacaetutsi botha tatsi pon Jairo. Jairo barai, jeichichi:

—Nexantiyo bayatha cata tupa. Jopa came fayacotsinde pon jiwi Pecuidubin, jeichichi Jairo bapon.

<sup>50</sup> Ichitha poxonae Jesús jume tane baxua, xua Jairo barai, Jesús barai, Jairo barai, jeye:

—Jopa junuwinde, maisa saya nejume cowande. Nexantiyo cata axaibi tsane, jei Jesús.

<sup>51</sup> Poxonae botha pata, Jesús jopa juntuuru bebaru joniyaeyo ichamonae. Saya meisa Pedro iru Santiago iru Juan iru powayo tupa paxa tatsi, bapon Jairo yawa pena tatsi, Jesús baru joniya barapomonae. <sup>52</sup> Daxita barapomonae yabuyo siwa wawaya wecoyechi. Ichitha Jesús barai barapomonae, jeye:

—Jopa pawecoyande, yabuyo apara jopa tupaeyo, maituncua apara, jei Jesús.

<sup>53</sup> Ichitha Jesús jume caponatsi barapomonae. Tsipei barapomonae yaputane xua yatsicaewa apara tupa barapowayo.

<sup>54</sup> Nexata Jesús jume daunweya cobe pichiya barai, jeye:

—Ja, owae asiya uncuatabare! jei Jesús.

<sup>55</sup> Barapowayo equeicha petupaewa nacosataxuba, caena nainya asiya uncuataba. Jesús itoroba barapomonae xua barapowayo peapatsinexatsi pexaewa.

<sup>56</sup> Barapowayo paxa tatsi iru pena tatsi najuntu coyene cabenaecaeya tanebe. Jesús barapomonae tsipaeba xua jopa cui yopichi tsainchi ichamonaetha xua po coyene bapon peexanaexae.

**Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwi xua petanaexanaenexatsi pijimonae tatsi**

(Mt 10.5-15; Mr 6.7-13)

**9** Jesús pijimonae caetuta pomonae xua doce poyobe. Yawa pijimonae cata pia peayapuswa. Matautano catano peitorobi coyenewa xua barapomonae peitaweteibinexa tsane cauri xuano xua peaxaibi exanaenexa tsaibi tsane jiwi pomonae atene. <sup>2</sup> Jesús itoroba barapomonae xua barapomonae peyabara cueicueijeinexa tsane jiwitha xua po coyene Nacom waba jiwi xua petanaexanaenexatsi pijimonae pomonae itoroba peewatsixae. Matautano itoroba xua barapomonae peaxaibi exanaenexa tsane jiwi pomonae atene. <sup>3</sup> Jesús barai pijimonae:

—Jopa pacaponaeinde ichawa xua painya necawarapaenexa. Matautano jopa iwabi pacaponaeinde, yawa jopa cote pacaponaeinde. Matautano jopa pacaponaeinde pexaewa, yawa jopa pacaponaeinde paratixi. Saya cae camisa panama xatabare, jopa icha camisan pacaponaeinde. <sup>4</sup> Botha po botha papatsiname, bara po botha painya nepu enaeinde bapoxonae barapo botha painya nepu warapaeinde.

<sup>5</sup> Pomonae xua ichaxota jopa paca matenta weyataya wabiyo barapo tomara weya pawarapare. Pana taxu wenunbabare tsorobon po tsorobon painya taxutha dubena. Baxua paexande xua barapomonae peyaputaenexa xua abe exana paxamtha, jei Jesús.

<sup>6</sup> Bara barapomonae ponarucupa. Matautano barapomonae pona daxita carepaya peya tomaraxitha. Matautano papaeba tsiniya Nacom pia pecapanenebiyae diwesi jume



tatsi. Yawa axaibi exana tsiniyano jiwi pomonae atene.

**Meje yabara poxonae Herodes  
Juan yabara jume unthuthu  
deideijeichi pebexubixaetsi bayatha**

*(Mt 14.1-12; Mr 6.14-29)*

<sup>7</sup>Bapoxonae Herodes Galilea nacuapiwi pia peyanacua ewatsinchi daxita jume tane xua Jesús exana. Bapon Herodes jopa xapain beta nanta xeinaeyo. Tsipei ichamonae catsawa Jesús yabara namchichi: “Apara bapon Juan, pon bequein bayatha tupa, equeicha asu juina”, jei. <sup>8</sup>Iru ichamonae namchi: “Bapon apara Elías, pon tsita naituta jiwitha”, jei. Iru ichamonae namchi: “Apara pomonae bayatha Nacom peitorobi jume pepaebiwi, barapomonae jiwana, bapon apara, pon petupaein equeicha juina”, jei barapomonae. <sup>9</sup>Ichitha Herodes namchi:

—Bara bayatha ichamonae cobe itorobacoumba xua Juan pewisi ucuibiwatsi. ¿Jintam metha bapon xua yabara jume tan nawita xua pinae peitupanaewan exana? jei.

Herodes bichocono beyaitaena, Jesús beyaitaainchi pon wuna peexanaein.

**Meje yabara poxonae Jesús apata  
pexaewa cinco mil pebiwi**

*(Mt 14.13-21; Mr 6.30-44; Jn 6.1-14)*

<sup>10</sup>Poxonae pata pomonae Jesús itoroba, barapomonae Jesús tsipaebatsi pocotsiwa xua barapomonae exana. Jesús tsana baru jopa barapo pijimonae tatsi xua pin bicheito weya. Ichaxota jiwi aibi, Jesús bara beya baru pona pijimonae, Betsaida tomara pecuariya beya baru pona. <sup>11</sup>Ichitha poxonae barapo bicheito yaputane xua xota Jesús ponaena, barapo bicheito iru Jesús puna poinchi. Jesús matenta weiweinaya waba barapo pin bicheito.

Matautano Jesús yabara tsipaeba barapo bicheitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae. Matautano Jesús axaibi exana atenemonae.

<sup>12</sup>Poxonae imoxoyo tabopiya Jesús barompaya pijimonae tatsi pomonae xua doce poyobe, barapoyobe Jesús imoxoyo caquita umenarucupatsi. Jesús baraichichi, jeje:

—Barapo bicheito itorobare pejeichinexa tsane xua ichaxota maichina xuano xua pexaewa pejeichinexa tsane tomaranxitha yawa po bon pipatotha umena, poxoru xote aibi pexaewa yawa bon xua ichaxota pemaichiwa tsane, jeichichi Jesús pijimonae.

<sup>13</sup>Ichitha Jesús barai pijimonae:

—Paxam paapare pexaewa, jei Jesús.

Jesús jume notatsi pijimonae:

—Saya apara cinco po panbe pax-einan matautano saya ainyoyobe pax-einan duweiyobe. Apara acoibi tsipei pin bicheito. Metha paponan pata comotsinexa icha pexaewa, daxita barapomonae nexa, jei.

<sup>14</sup>Barapo bicheito be cinco mil pebiwi. Nexata Jesús pijimonae barai:

—Pana nantaure xua ichamonae tsana eniyaena be cincuenta po matabuxuyobe tsiniya, jei.

<sup>15</sup>Bara Jesús pijimonae tatsi exana pocotsiwa xua Jesús paeba. Bapoxonae barapo pin bicheito iratha ena. <sup>16</sup>Bapoxonae Jesús pan pita cinco po panbe, yawa duwei ainyobe pitano. Jesús itaboco benecoicha, Paxa tsipaeba: “Axa, maisa juntu coyene weiweinan xua pexaewa pata tanecat-siwaxaem”, jei Jesús. Poxonae Jesús epa janaquiya nacobe weta, pijimonae caitoroba xua pecatsibaponaenexa tsane barapo bicheitha. <sup>17</sup>Bara daxita nabane, yawa bara daxita

jain cowantaruꝑatsi. Bapoxonae Jesús pijimonae tatsi doce po cote matabuxyobe wunba xua bayatha nacopaba pocotsiwa xua bayatha barapo jiwi jopa xaeyo petonsanaexae.

**Meje yabara poxonae Pedro namchi Jesustha jeye: “Xam apra Mesías pon Nacom caitorobica”, jei Pedro**

(Mt 16.13-19; Mr 8.27-29)

<sup>18</sup>Caentacabitha Jesús Nacom tsipae-bawiya, meisa pijimonae baru pona. Bapoxonae Jesús yainyaba pijimonae, jeye:

—¿Eta jiwi neyabara jei po coyene xua xan bapon aparan? jei Jesús.

<sup>19</sup>Barapomonae Jesús jume notatsi, jeye:

—Ichamonae cayabara, jei: ‘Apara bapon Juan pon jiwi Pebautisabin, pon equeicha petuꝑaein asu juina’, jei. Iru ichamonae cayabara, jei: ‘Apara bapon Elías, pon equeicha petuꝑaein asu juina’, jei. Iruꝑ ichamonae cayabara, jei: ‘Apara bapon jiwana pomonae Nacom peitorobi jume pepaebiwi, pon petuꝑaein equeicha asu juina’, jei, Jesús pijimonae tatsi.

<sup>20</sup>Nexata Jesús pijimonae yainyaba, jeye:

—Incane iru paxamdꝑ, ¿eta pana neyabara jumichimdꝑ xua xan eta pondun? jei Jesús.

Pedro jume epa pita:

—Xam apra Mesías, pon Nacom caitorobica, jei Pedro.

**Meje yabara poxonae Jesús nayabara diwesi paeba po coyene xua petuꝑaewa tsane**

(Mt 16.20-28; Mr 8.30–9.1)

<sup>21</sup>Jesús pijimonae muxu barai, xua pijimonae jopa peyabara paebinexatsi ichamonaetha baxua. <sup>22</sup>Yawa barai pijimonae po coyene xua bexa ichamonae

Jesús cana exanaeinchi. Jesús namchi, jeye:

—Xan ponxaein Nacom Tananeitapetsin, jiwi bichocono neperaxa jubina. Matautano pitiri jiwi iruru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyenewa tatsi, daxita barapomonae neitawetsina. Matautano barapomonae nebexubina. Ichitha equeicha asu poponaein poxonae acoibi po matababiyobe tsuxubi tsane, jei Jesús poxonae nayabara paeba.

<sup>23</sup>Bapoxonae Jesús barai daxita pijimonae, jeye:

—Icha pebin ichichipa xua tajiwimonae jiwanapin penaexanaewa tsane bewa bapon yabara naitematsi pocotsiwa xua bapon ichichipa pia peexanae coyenewan tatsi. Bapoxonae jame bapon bewa eexanaponae daxita matababi pocotsiwa itoroban bequein bara bapon bexotsi ichamonae, tajiwimonae jitonxae. <sup>24</sup>Pon

naantobeya nata exana pocotsiwa bapon ichichipa, bapon jopa xeinaeyo peajuntuyapusuwa, po peajuntuyapusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacua beicha. <sup>25</sup>Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyenesuwa, po peajuntucoyenesuwa ataya tsiteca, bapoxonae bapon jopa itacupaetsi xua penajuntu coyene capanepaewa xua jopa peweraweracaewa. <sup>26</sup>Icha ichun neacaura, yawa nejume diwesi acaurano, xan ponxaein Nacom Tananeitapetsin xuya bapon acauran tsane. Baxua exanaein poxonae patopaetsicaein be jiwi pia

pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús.<sup>27</sup> Bara xaniwaicha paca tsipaebatsi xua pomonae xote umene abu barapomonae jopa werapae tsane. Barapomonae jiwana copiya matha necotsina xua po coyene Nacom waba jiwu xua petanaexanaenexatsi piamonae pomonae itorobiya peewatsixae, bapoxonae barapomonae werapaena, jei Jesús.

**Meje yabara poxonae Jesús  
pijimonae peitutha pexeinya  
itupanae coicha tsanaya naexana**

*(Mt 17.1-8; Mr 9.2-8)*

<sup>28</sup> Poxonae ocho po matabibe jopa xua poxonae Jesús barapo diwesi paeba, bapoxonae Jesús pona demxuwa beicha petsipaebinexa Nacom. Pedro iru Juan iru Santiago barapo matabuxuyobe baru poinchibe.<sup>29</sup> Poxonae Jesús cataunxuae Nacom tsipaebauya, bapoxonae icha itabara tsanaya. Matauta penama xatatsiwano inyapana tsanaya yawa bichocono daedaena tsanaya.<sup>30</sup> Nexata pebinbe yaitupanae be damacu patopabe. Baponbe, iru Jesús, bapoyobe nabaru cueicueijeibe. Ponbe xua Jesús jemeicha tsita patopatsibe, bapon Moisés iru ichun pewun Elías, ponbe xua caena bayatha naxubabe.<sup>31</sup> Baponbe yabara baru cueicueijeibe xua Jesús petupaewa tsane xua peraxa jubinchi ichamonae Jerusalén tomaratha.<sup>32</sup> Bequein Pedrobaru bichocono itamaipana daichitha nacosatumena. Pedrobaru tane xua Jesús yamatawacaicha pexeinya itupanae be damacu tsuncuaetsi. Matautano Pedrobaru tane ponbe Jesús baru uncu, Moisés iru Elías.<sup>33</sup> Moisés iru Elías, poxonae baponbe Jesús weya

naetababe, bapoxonae Pedro Jesús baraichichi, jeye:

—Jiwi Necuidubin, maisa wuna xua xote pata umenaewa. Pacata acabinchi acoibi po boutobe, cae bouto xam nexa, icha bouto Moisés nexa, icha bouto Elías nexa.

Ichitha Pedro beta jopa yaputaeyo xua baxua paeba.<sup>34</sup> Poxonae Pedro cataunxuae baru cueicueije Jesús, bapoxonae daxita pexainya bematawacaicha taruneicatsi tsaquinaebowa. Poxonae barapomonae tsaquinaebowa tututha nataerucupa bichocono junuwa.<sup>35</sup> Nexata barapomonae tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon beta pajume taema pocotsiwa paca tsipaeba”, jei Nacom.

<sup>36</sup> Poxonae Nacom najume weta, Pedrobaru necobarucupa xua Jesús beya compa uncu. Pedrobaru saya moya. Jopa pejumeyo ichamonaetha xua tane.

**Meje yabara poxonae Jesús cauri  
taitaweta xua pewowin xeina**

*(Mt 17.14-21; Mr 9.14-29)*

<sup>37</sup> Baya poxonae Jesús barapo acoibi poyobe pijimonaebe dabe baru dunareca Jesús pin bicheito matenta poinchi.

<sup>38</sup> Nexata barapo bicheitha jiwana pebin, bapon jume daunwei wawai, jeye:

—Jiwi Necuidubin, incane inta taema taxanto. Bapon taxanto inta compa pebin.<sup>39</sup> Taxanto inta waetabatsi cauri, inta papai exanatsi, yawa inta iratha bebaichi. Matauta inta coibo thamthamei exanatsi poxoru matayaibatsi exanatsi. Inta taxanto cui tainchi jopa bepu sorobabeibichi barapo cauri.<sup>40</sup> Bayatha bequein jinyamonae jume daunweya cui itoroban: ‘Painata taxanto taitawere cauri’, jan. Ichitha jopa itacupaetsi xua taxanto inta petaitawetsiwatsi cauri, jei pewowin paxa tatsi.

<sup>41</sup> Jesús barai pin bicheitho, jeye:

—¡Paxam barapomonaē pam pomonaē jopa xapain cataunxuae pana nejume cowuntsim! ¡Paxam barapomonaē pam, peajuntucoyenebe jiwi pam! ¿Eta po weibe nantawenonan xua bewa tapaca baru ecaewa tsainchi xua beya poxonaē tapana nejume cowuntsiwam tsane? ¿Matautano eta po weibe equeicha nantawenonan xua tapaca cayawenaewatsi tsainchi? jei Jesús.

Nexata Jesús barai pewowin paxa tatsi, jeye:

—¡Nexanto inta carenande! jei Jesús.

<sup>42</sup> Poxonaē pewowin cataunxuae Jesús itiya poinchi, bapoxonaē equeicha pewowin iratha xotsi cauri. Equeicha pewowin coibo thamthamei exanatsi. Ichitha Jesús taitaweta cauri pewowin. Jesús axaibi exana pewowin. Equeicha Jesús caewa cata. Coxiyān caewa catatsi pexantoxae. <sup>43</sup> Daxita barapo pin bicheito yabara najuntū coyene cabenaeca pocotsiwa pewowin pexeinya coyene taexanatsi Nacom.

**Meje yabara poxonaē equeicha Jesús nayabara paeba xua poxonaē tupaena**

(Mt 17.22-23; Mr 9.30-32)

Poxonaē awiya cataunxuae yabara najuntū coyene cabenaecompa barapo pin bicheito pocotsiwa Jesús exana, bapoxonaē Jesús pijimonaē barai:

<sup>44</sup>—Incane beta pajume taema, yawa jopa pana nejume cayabara jūntemainaēinde. Xan, ponxaein Nacom Tananeitapetsin jiwi, necaenaetsina ichamonaetha xua tanebexubinexa tsane, jei Jesús.

<sup>45</sup> Ichitha Jesús pijimonaē jopa xapain jume yaputaetsi xua barai. Barapomonaē jopa tacopatichi Nacom xua Jesús pejume yaputaewa tsainchi. Bara-

pomonaē junuwa xua Jesús yabara peyainyabiwa tsainchi xua Jesús yaputane peexanaenexa xuaunxuae paeba.

**Meje yabara poxonaē Jesús yabara yainyabatsi pijimonaē po coyene xua pon peainya cui peexanaeinchi**

(Mt 18.1-5; Mr 9.33-37)

<sup>46</sup> Nexata Jesús pijimonaē tatsi caemonaē yabara nayainyaba, najei: “¿Jintam paxantha bichocono peainya cuinda xua beyacaincha ichun?” jei. <sup>47</sup> Jesús yaputane baxua pocotsiwa barapomonaē yabara nanta xeina. Nexata Jesús cobe pita pexuyo yawa pexainya cuaranoreca.

<sup>48</sup> Nexata Jesús barai pijimonaē:

—Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi barapon bara apara nententa weyataeya waba. Xan jopa meisa nententa weyataeya wabiyo apara bara irū matenta weyataeya wabatsi pon tana neitorobixae xua pon bara Nacom. Daxota pon paxam jiwana pam, pon jopa paca tsita ainya cuiyo, bapon jame Nacom tsita ainya cuichi, jei Jesús.

**Meje yabara poxonaē Jesús barai pijimonaē: “Pon jopa nacata abe exanaeyo, bapon ba apara naca yawena”, jei**

(Mr 9.38-40)

<sup>49</sup> Nexata Juan Jesús baraichi, jeye:

—Ja Tanecuidubim, paxan caein patan pon cawūn taiba poxonaē itaweta caurimonaē, xua caurimonaē itawetatsi. Paxan baxua pacui itawetan tsipei jopa naca puna poponaeyo, jei Juan.

<sup>50</sup> Ichitha Jesús jume nota, jeye:

—Jopa pacui itawetsinde, tsipei pon jopa nacata abe exanaeyo bapon ba apara naca yawena, jei Jesús.

**Meje yabara poxonae Jesús  
jume itaweta, Santiago iru  
Juan jume itawetatsibe**

<sup>51</sup> Poxonae imoxoyo maticabi jopaena, po maticabitha Jesús athabe icha tsane, xua Nacom exanaena, bapoxonae Jesús bichocono awiya nantusuba xua peponaewa tsane Jerusalén tomara beya. <sup>52</sup> Jesús nawnae jume caitoroba pia jitonbe tatsi. Barapo Jesús pia jitonbe tatsi ponabe Samaria nacua beya. Ponabe xua bo tutu pewucaenexa tsanebe po tomara barapo Samaria nacuatha eca xua Jesús peecaenexa. <sup>53</sup> Ichitha barapo tomarapiwi xua Samaria nacuatha jinompa, barapomonae aichaxaibi xua Jesús weiweinaya pententa wabiwatsi baxota poxoru barapomonae yaputane xua Jesús pona Jerusalén tomara beya. <sup>54</sup> Ichitha Santiago iru Juan poxonae baxua tanebe, ponbe bequein tawucabe bo tutu Jesús nexa, baponbe Jesús baraichi, jeye:

—Patatanecanamataxeinaem, ¿xam ichichipame xua paxan isoto pawucaein po isoto xua itaboco wetsica xua petautsinexatsi barapomonae? jei baponbe.

<sup>55</sup> Nexata Jesús pijimonae napatome-icha necota yawa jume itaweta. <sup>56</sup> Nexata equeicha Jesús pijimonae baru pona icha tsiqui tomariyo beya.

**Meje yabara poxonae Jesús yabara  
paeba pomonae ichichipa xua  
pepuna ponaewatsi**

(Mt 8.19-22)

<sup>57</sup> Poxonae namtotha enapona, pebin Jesús baraichi, jeye:

—Patatanecanamataxeinaem, ichichipan xua tacapuna ponaewatsi xua ichaxota poname, jei pebin. <sup>58</sup> Jesús jume nota, jeye:

—Namomonae ba pia muthun xeina ichaxota pemaitathopeibiwa. Iru peya-pupunaewi ba coton xeina ichaxota peyamaitathopeibiwa. Nama xan ponxaein Nacom Tananeitapetsin nama jopa daichinyo. Nama jopa xeinaeinyo bo xua tabo xua xota nafinacaecan, jei Jesús.

<sup>59</sup> Jesús barai ichuntha, jeye:

—Nepuna ponde.

Ichitha bapon Jesús jume notatsi, jeye:

—Tanecanamataxeinaem, nepu compare xua taxa matha muthutha xubichi copiya xua bapoxonae tacapuna ponaenexatsi, jei.

<sup>60</sup> Jesús jume nota, jeye:

—Bara compare xua petupaewi muthucaeinchi, pomonae xua be pewerapaewi jopa betanejume cowantsiwixae, barapomonae muthucaena. Ichitha xam ponare jinya neyabara tsipaebinexa jiwitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae, jei Jesús.

<sup>61</sup> Nexata ichun Jesús baraichi, jeye:

—Tanecanamataxeinaem, ichichipan xua tacapuna ponaewatsi. Ichitha copiya bara necopare xua tana napeyabiwa tsane tamonae, tabopiwi, jei bapon.

<sup>62</sup> Jesús jume nota:

—Pebinba jopa itacupaetsi xua beta penacuichiwa pabi icha saya napatome-icha necobiya nacuita. Barapocotsi juta coyeneya ichi, icha pebin exana Nacom pia petanacuichiwa tatsi jopa xapain exanaeyo xua peyabara paebiwa po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae icha bapon saya cayabara nanta xeina pocotsiwa barapo cae pin nacuathe xeina, jei Jesús.

**Meje yabara poxonae Jesús pijimonae  
itoroba setenta y dos poyobe pebiwi**

**10** Barapoxonae Jesús pon jiwi Pecanamataxeinaeinxae tatsi,

bapon itapeta equeicha icha pijimonaе tatsi setenta y dos poyobe. Daxita tomarantha Jesús itoroba be dos poyobe tsiniya, tsica tomaraxithano, pin tomaranthano xua ichaxota Jesús cotacaya ponaena. <sup>2</sup>Jesús barai barapomonaе poxonaе muxu peitorobi, jeye: “Bara xaniyeya paca tsipaebatsi. Pabitha ba pocotsiwa peubiwan naweta nawita, daichitha ba penacuichiwi pomonaе jota pinmonaе aibi. Bara j̄ta ichi barapo cae pin nacuathe. Jiwi pinmonaе jinompa pomonaе nantawenona pejume taenexa Nacom pia pexeinya jume diwesi tatsi. Daichitha pomonaе Nacom Pejume Diwesi cueicueijej̄ tsurubenanaebiya ichamonaetha barapomonaе pinmonaе aibi saya tsiquimonaeyo. Daxota Nacom paw̄care xua pecaitorobinexa tsane ichamonaе xua petacamuxu tsipaebinexa tsainchi pia pejume diwesi pomonaе barapo cae pin nacuathe pejinompaewi nexa. <sup>3</sup>Paponde ichaxota paca itorobatsi. Paca itorobatsi pia xainya beya pomonaе jopa jume cowantsiyo, pomonaе itacupatsi xua abe painya nepaca exanaewa icha oveja ichi xua poxonaе pona ichaxota neuth̄u jinompa xua itacupatsi xua abe peexanaewatsi. <sup>4</sup>Jopa pacaponaеinde cote. Yawa paratixi jopa pacaponaеinde. Yawa jopa pacaponaеinde painya nenataxu xatabiwan. Matauta jopa ichamonaе namtotha paewatumeyaеinde xua saya painya netsipaebinexa. <sup>5</sup>Poxonaе bom̄x̄utha pajojoniyaename, barapo bopiwi pajacobare, pajande: ‘Barab̄u Nacom j̄ntema jinompa paca cana exanaena’, pajande. <sup>6</sup>Icha baxota jinompa pomonaе j̄ntema jinompa, baxua Nacom taexanaena xua papaebame. Ichitha icha baxota jinompa pomonaе jopa j̄ntema

jinompaeyo, baxua Nacom jopa taexanae tsane xua papaebame. Equeicha caewa pacata parenana xua baxua papaebame. <sup>7</sup>Barapo botha paenare. Paxaema paapareno pocotsiwa barapomonaе paca apata. Painya xoba paauram xua paca cata tsipei baraxua xua paca cata painya matoma painya netanacuichixae Nacom. Jopa ichawa beya paponaeinde bontha, saya bara po botha paenare. <sup>8</sup>Poxonaе tomaratha papanenebiyam, icha barapomonaе paca matenta weyataeya waba, moya paxaema pocotsiwa barapomonaе paca apata. <sup>9</sup>Axaibi paexande peatene jiwi, pomonaе xua barapo tomaratha ena. Barapomonaе pabarande: ‘Anoxuae Nacom waba jiwi xua petanaexanaenexatsi piamonaе tatsi pomonaе itorobiya peewatsixae’, pajande. <sup>10-11</sup>Ichitha poxonaе icha tomaratha papatsiname icha barapo tomarapiwi jopa paca matenta weyataeya wabiyo, pajande barapomonaetha: ‘¡Po tsorobon panataxu wen̄un̄ubaban painya tomaratha, apara xua abe paexaname pata xainya berena poxonaе pana nejume itawetame! Payaputaema, anoxuae Nacom waba jiwi petanaexanaenexatsi piamonaе tatsi pomonaе itorobiya peewatsixae ichitha pana nejume itawetame pomonaе Nacom pata tana neitorobiwi panxaein’, pajande. <sup>12</sup>Xaniyeya paca tsipaebatsi matabi patopaena. Barapo matabitha Nacom yabara paebina jiwi xua penatsicuenta xua petsita exanaexatsi. Barapo matabitha jopa juniya bichocono atene tsane pomonaе paca jume itaweta. Ichitha nama pomonaе barapo tomaratha jinompa pomonaе paca jume itaweta jopa juniya atene tsane, beyacaincha poxonaе Sodoma tomarapiwi atene”, jei Jesús.

**Meje yabara poxonae Jesús  
yabara paeba po tomarapiwi  
jopa pejume cowuntsiwichi**

(Mt 11.20-24)

<sup>13</sup> Jesús equeicha pijimonaetha namchi, pomona setenta y dos poyobe xua ichamona yabara paebatsi, jeye: “¡Pai jaibo Corazín tomarapiwi tsobena! ¡Iru Betsaida tomarapiwi tsobena! Po tsita itutsi coyenewan exanan Corazín tomaratha yawa Betsaida tomaratha ichun jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomaranbepiwi icha penanta xeinae coyenewatha yabara nanta pentsipa Nacomtha. Barapomona iratha enaetsipa yawa paparuwan nama xatabichipa xua pocotsiwa be peru mapaton xua axn, yawa ipuna nacaxuebichipa pia pepontha. Barapomona baxua exanaetsipa xua ichamona petsita itapeinya xeinaenexa tsainchi xua icha juntu coyenein Nacom petsita xeinaewatsi peauraxae xua abe peexanaexae. <sup>14</sup> Poxona barapo matabi patopeicaena po matabitha Nacom yabara paebina daxita jivi xua petsita natsicuentixaetsi xua abe petsita exanaexaetsi, Tiro tomarapiwi, Sidón tomarapiwino, daxita barapo tomarabepiwi bichocono peraxa jubebinchi. Ichitha nama paxam pomona Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. <sup>15</sup> ¡Incane iru Capernaum

tomarapiwi pamdu! ¿Bara pananta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca.

<sup>16</sup> “Pon xua paca jume naitaewata, barapara nejume naitaewataru. Pon xua paca jume itaweta, barapara nejume itaweta xan berena. Pon xua nejume itaweta, barichi Nacom jume itawetatsi pon xua tana neitorobixae”, jei Jesús.

**Meje yabara poxonae equeicha caibe  
parenaena Jesús pijimona tatsi  
pomona setenta y dos poyobe pebiwi**

<sup>17</sup> Barapo setenta y dos poyobe juntu coyene weiweina caibe nawibarena, jeye:

—Patatanecanamataxeinaem, caurimona pana nejume cowunta xua paitawetan poxona paca wun wun taibatsi, jei Jesús pijimona tatsi.

<sup>18</sup> Jesús jume nota, jeye:

—Aa, bara bayatha cauri pia pentacaponaein tatsi Satanás tan xua jopeica itaboco wetsica icha yamuxu ichi poxonae uncueica. <sup>19</sup> Paxam paca catatsi taayapusuwa painya netaxunaunabaponaewa tsane jomon yawa putonno, xua jopa painya nepaca capepeichinexa. Po peayapusuwa paca catatsi bichocono daunwei, beyacaincha painya nepaca caaitafaetabi jiton, pon cauri pia pentacaponaein pia peayapusuwa tatsi xua xota jivi abe exanatsi. Jivi dapomona aibi pomona abe paca cana exana. <sup>20</sup> Jopa pajuntu coyene weiweinaeinde xua caurimona pia paca jume jejeixae xua ducpa poxona paitawetame, saya jame pajuntu coyene weiweinare xua Nacom painya nepaca wun dubixae pia diborotha itabocotha.

**Meje yabara poxonae Jesús juntu  
coyene weiweina exanatsi Nacom  
pia Pejumope tñaxu tatsi**

(Mt 11.25-27; 13.16-17)

<sup>21</sup>Bara caena bapoxonae Jesús juntu coyene weiweina exanatsi Nacom pia Pejumope tñaxu tatsi. Jesús namchi, jeye: “Axa peitaboco Necanamataxeinaem, yawa ira Necanamataxeinaem. Wñae cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonae bichocono penacuidubiwi pomonae be pinyon penatsicotaewi tsipei nanta xeina xua bichocono peyaputaewi daxita. Jame nama tsita itutame barapo pexainyei coyenewa xan yabara pomonaetha pomonae jopa bichocono penacuidubiwi pomonae be pexui penatsicotaewi tsipei jopa nanta xeinaeyo xua bichocono peyaputae jiwi daxita. Axa baxua exaname necatsita xanepanaexae baxua”, jei Jesús Paxatha.

<sup>22</sup>Equeicha Jesús pijimonae barai pomonae xua setenta y dos poyobe, jeye: “Taxa daxita necata xua pia peitorobi coyenewa tatsi matautano xua pia peyaputae coyenewan tatsi. Dapon aibi pon xaniwaicha nejuntu cui coyene yaputane. Jame saya meisa Taxa Nacom, nejuntu cui coyene yaputane. Dapon ajibi pon Taxa juntu cui coyene yaputainchi ichun, saya meisa Taxaxae juntu cui coyene yaputan. Matauta barichi Taxa meisa juntu coyene yaputainchi pon saya bara copatan xua bara Taxa pejuntu cui coyene yaputaewa tsainchi pomonae ichichipan”, jei Jesús.

<sup>23</sup>Nexata Jesús pijimonae napatomeicha necota pomonae xua doce poyobe. Meisa barapomonaebetha barai, jeye: “Juntu coyene weiweina pomonae xua tane, pocotsiwan xua pataneme.

<sup>24</sup>Poxoru paca tsipaebatsi, xua Nacom pia peitorobi jume pepaebi jiwimonae iru nacuan peewatsiwimonae, pomonae bayatha napenta barapomonae bequein betaena pocotsiwa pataneme ichitha jopa taeyo. Matauta barapomonae bequein bejume taena pocotsiwa pajume taneme ichitha jopa jume taeyo”, jei Jesús.

**Meje yabara poxonae Jesús  
yabara paeba Samaria  
nacuapin, pon wñae exana**

<sup>25</sup>Nexata iruru pon jiwi pecuidubin Moisés pia peitorobi coyene tatsi, barapon Jesús piraichi juntu coyene jujutsiya yainyabatsi xua barapon pejume barabotsinexatsi. Barapon Jesús jeichichi:

—Ja Tanecuidubim, ¿eta xua copiya matha exanocuaein xua ajuntuyapusya tapoponaewa tsane xua ataya tsane? jei.

<sup>26</sup>Jesús jume nota, jeye:

—¿Eta xuara xua barapo Moisés pia peitorobi coyene diwesitha tina? ¿Eta xua yabara yorobame barapo diwesitha? jei Jesús.

<sup>27</sup>Pon jiwi pecuidubin Moisés pia peitorobi coyene bapon Jesús jume notatsi, jeye:

—Antobeinde jinya Necanamataxeinaein, bapon Nacom, daxita xua nejuntu coyene wetsina, matautano xua daxita jinya nepoponae coyenewatha, matautano xua nanta xeiname, daxita xua nenanta xeinaewatha nentasipatha, matautano daxita xua nedaunwei coyenewatham, matautano antobeinde necatsicuarabu ecaein icha ichim xua naantobem jinya coutha, jei pon jiwi pecuidubin Moisés pia peitorobi coyene.

<sup>28</sup>Nexata Jesús jume nota, jeye:

—Bara beta nejume notame. Icha baraxua exanaename peajuntuyapuswa xeinaename po



peajüntuyapusüwa xua ataya tsiteca, jei Jesús.

<sup>29</sup> Ichitha pon jiwi pecuidubin Moisés pia peitorobi coyene tatsi, barapon awiya nanta xeina nawita, pia jiwi nanta xeinaetsi xua bapon xeina pexeinya peyainyabiwa. Bapon Jesús yainyabatsi, jeye:

—¿Jintam barü pomonae tanetsicuarabü enaewi? jei.

<sup>30</sup> Nexata Jesús jume nota, jeye:

—Iruü pebin Jericó tomara bereca pona, Jerusalén tomara namtotha weya pona. Poxonae awiya namtotha ecapona jemeicha waetabatsi pomonae jiwi pecaibiwi. Barapon daxita wecobe notatsi xua pocotsiwa xeina, yawa butsi. Barapomonae aichurubena, tsica cuiyotha copatabatsi. <sup>31</sup> Bapoxonae irü sacerdotemonaepin barapo namto ecapona. Poxonae barapon yasusüinya taebotatsi sacerdotemonaepin tajü matawacaicha toquetaba. <sup>32</sup> Iru levimonaepin baxoyo ecapona, bapon irü tajü matawacaicha toquetaba poxonae yasusüinya taebota. <sup>33</sup> Ichitha Samaria nacuapin baxoyo irü ecapona poxonae yasusüinya taebota, yabara najüntü coyene xeinanareca peyawenaenexa. <sup>34</sup> Nexata Samaria nacuapin imoxoyo caquita uncuataba pon yasusüinya boca. Bapon wan yawübecapona penasiwatha vino merathano. Bapoxonae paparuwatha wan yarabecapona. Bapoxonae burrotha cuaretsica piyüntha. Bomüxü beya capona ichaxota jiwi maiteibathopa. Baxota xanepanaeya bota. <sup>35</sup> Bapoxonae baya poxonae juntucuru Samaria nacuapin ponaenaba, pita ainya paratixi. Bapoxonae cata pontha pon bo pexeinaein. Samaria nacuapin barai pontha pon bo pexeinaein: ‘Barapon beta xanepanaya bore. Icha paratixi seicanaya, equeicha bexa cacatsinchi

poxonae caewa denan tsane’, jei Samaria nacuapin, jei Jesús.

<sup>36</sup> Equeicha Jesús namchi, jeye: “Barapo acoibi poyobe jiwana, ¿jintam yabara cananta xeiname xua wünae exana xua peantobexaetsi pon waetabatsi pomonae jiwi pecaibiwi, yawa xua butsino?” jei Jesús.

<sup>37</sup> Pon jiwi pecuidubin Moisés pia peitorobi coyene tatsi, bapon Jesús jume notatsi, jeye:

—Pon xua yabara najüntü coyene xeinanareca xua peyawenaenexa, jei bapon.

Jesús jume nota, jeye:

—Ponare, icha pocotsi coyeneya Samaria nacuapin ichi barichiya exande, xanepanaya exande ichamonaetha, jei Jesús.

#### **Meje yabara poxonae Jesús, Marta yawa María siwa poinchibe**

<sup>38</sup> Jesús pijimonae cataunxuae barü ecapona namtotha Jericó tomara beya barü pona. Pijimonae barü patopa tsica tomariyotha ichaxota petsiriwa popona powa pewün Marta. Barapowa Jesús matenta weyataeya wabatsi pia botha. <sup>39</sup> Marta peyapiyo nantaüta powa pewün María. Barapowa María Jesús caquita ecatsi xua Jesús pejume taenexatsi pocotsiwa paeba. <sup>40</sup> Ichitha Marta enatsi pia penacuichiwa xua Jesús tsixanatsi pexaewa xuano xua pijimonae tatsi nexano. Barapowa pona Jesús beya, namchi, jeye:

—Tanecanamataxeinaem, ¿jopa taem xua tayapiyo necopata xua compa nacuitan? Awiya bobena penacuichiwan. Itorobare bü neyawena, jei Marta.

<sup>41</sup> Ichitha Jesús jume nota, jeye:

—Marta, caenauya jinya nenacuichiwan xua pocotsiwa xua ichichipame nexanaewa. <sup>42</sup> Saya cae coyene ainya cui xua xam nantawenoname pocotsiwa xua

María exana xua barompaya itapeta xua wūnae exana poxonaē nejume tayeca. Jiton dapocotsin aibi xua pon María jūntu coyene weaichurubenaē exainchi xua nejume tayeca, jei Jesús.

**Meje yabara poxonaē Jesús  
pijimonae yabara cuiduba  
xua Nacomtha petsipaebiwa**

(Mt 6.9-15; 7.7-11)

**11** Caentacabi Jesús tsipaebauya Nacom ichawatha. Jesús najume weta, bapoxonaē pijimonae tatsi jiwana poyobe xua doce poyobe Jesús baraichi, jei:

—Jesús, Patatanecanamataxeinaem, pana necuidubare xua Nacomtha pata tsipaebiwa, icha Juan ichi xua pijimonae cuiduba, jei bapon.

<sup>2</sup> Jesús barai barapomonaē, jeye:

—Poxonaē Nacom patsipaebame, pajande:

‘Pata Taxam xam ponxaem peitabocotha athabeicha neecaēin.

Barabu daxita jiwī cabaru cui itura jina nejūntu coyene wūnaewa nexēinaexae.

Barabu jopaena matakabi po matakabi xua

poxonaē xam jiwī itorobiya canamataxeinaename

barapo cae pin nacuathe.

<sup>3</sup> Daxita matakabin pexaewa pana catsibeibare po

pexaewa daxita matakabi pata canantawenonaewa.

<sup>4</sup> Pana neyabara cui cana jūntemainare xua abe pata catsita exanaewatsi.

Bapoxonaē pana neyabara cui cana exanare xua

jopa equeicha pata catsita natsicuentiwatsi

tsainchi xua abe pata catsita exanaewatsi.

Baraxua painta exande icha paichin ichamonaetha.

Tsipei paxan copiya payabara cui cana exanan

xua ichamonaē jopa pana netsita natsicuentisiyo

xua abe pata tanetsita exanaewa.

Jopa pana copatsinde xua abe pata exanaewa

tsane poxonaē jiwī pana nejūntu coyene jūjūta xua abe pata exanaewa tsane’,

pajande poxonaē Nacomtha patsipaebame, jei Jesús.

<sup>5-6</sup> Equeicha Jesús barai, jeye:

—Metha beya tsipae xua caēin paxam jiwana bapon nantaūta pon peyaputaēinchi.

Bapon pia peyaputaēinchi beya pona papaetha.

Pia peyaputaēinchi barai: ‘Tamo, cacowaetatsi acoibi po panbe, yaitama icha taneyaputaēin patopa pon anoxuae

warapa tabo berena. Jopa xēinaēinyo xua taapatsiwa bapon’, jei pebin.

<sup>7</sup> Metha pon bomūxu tututha boca bapon jume notsipa, jei tsipae: ‘Jopa nejume fayacotsinde bomūxu boupa

daunwei, tapexui baru maituncuan camatha. Jopa benontaponaēinyo

xua pan tacacatsiwa tsane’, jei tsipae pon bomūxu tututha boca.

<sup>8</sup> Paca tsipaebatsi bequein bapon bomūxūtha

jopa benontaponaeyo, bequein bara pia peyaputaēinchi, daichitha cata poxoru

jume fayacotatsi pia peyaputaēinchi. Matautano cata daxita xua pia

peyaputaēinchi nantawenona.

<sup>9</sup> Daxota paca tsipaebatsi. Matowa pawūcare Nacom, bapoxonaē paca catsibina

pocotsiwa xua pawūcame. Baraxua matowa paexande icha paichim

poxonaē matowa pajeiteibame beya poxonaē pataebame, yawa icha paichim

poxonaē matowa pawawam bomūxūtha beya poxonaē ichūn paca jume nota.

<sup>10</sup> Tsipei pon matowa wūca ichūn bara catatsi. Tsipei pon matowa necoba, bara taeba. Tsipei pon bomūxu pecoibotha

matowa wawai bara tacoibo sarana xorenatsi yawa jume notatsino.

<sup>11-12</sup>“Paxam pomonae pexui paxeiname paca yainyabatsi. Poxonae painya pexui paca wuca duwei, ¿painya pexui pacatsipame jomo? Jume. Ichacuitha tsipae poxonae painya pexui paca wuca petobu, ¿painya pexui pacatsipame puto? Jume, jopa baxua paraichim tsane. <sup>13</sup>Bara bequein peajuntucoyenebe jiwi pam, ichitha paxam payaputaneme xua pewnaewan painya pexui pacatsibeibame. Ichitha nama Nacom painya axa jopa juniya paca catsiyo Nacom pia Pejumope tunaxu tatsi poxonae pawucame. Nacom paca cata beyacaincha poxonae painya pexui pacatsibeibame poxonae paca wuqueiba”, jei Jesús.

**Meje yabara poxonae Jesús baraichi xua pinae xeina Beelzebú pia peayapusu itorobi coyenewa tatsi**

(Mt 12.22-30; Mr 3.20-27)

<sup>14</sup>Iruru Jesús taitawetauya cauri xua pebin muxusipana exainchi. Poxonae cauri pebin wepu poinchi, bapoxonae pebin equeicha paeba. Jiwi yabara najuntu coyene cabenaeca poxonae baxua tane. <sup>15</sup>Ichitha ichamonae namchi: “Bapon caurimonae itawetatsi apara pexeinaexae Beelzebú pia peayapusu itorobi coyenewa tatsi pon caurimonae pia pentacaponaein tatsi”, jei barapomonae.

<sup>16</sup>Ichamonae Jesús wucatsi: “Pana netsita iture peitupanaewa xua peitaboco wetsica jopeicaena”, jei. Barapomonae baxua paeba poxoruru ichichipa xua Jesús tsita itutsina, pia yaputaetsi icha barapon pon yatsicaewa Nacom itoroba. <sup>17</sup>Ichitha Jesús yaputane xua barapomonae nanta xeina. Jesús barai:

“Icha cae nacuapiwi nawepu tsatabe xua matauta nababe, bapoxonae jopa

xaexaenaecaeyo. Matauta iruru icha cae bo matabuxuyomonaebe nababe yawa nawepu tsatajopabe, bapoxonae jopa xaexaenaecaeyo. <sup>18</sup>Barichi icha Satanás pijimonae tatsi nawepu tsatajopabe matautano xua nababe bapoxonae jopa xaexaenaecaeyo. Satanás jopa itacupaetsi xua itoroba pijimonae tsipei amsiya exana. Baxua paca tsipaebatsi tsipei naerabiya pana baram: ‘Apara bapon cauri itaweta Beelzebú pia peayapusu itorobi coyenewa tatsi pexeinaexae pon cauri pia pentacaponaein tatsi’, pana neyabara jam. <sup>19</sup>Icha Beelzebú pia peayapusu itorobi coyeneya tatsi cauri itawetan pon cauri pia pentacaponaein tatsi, ¿nexata eta po peayapusu itorobi coyeneya tatsi painyamonae cauri itaweta? ¿Iruru barapomonae cauri itawetatsi Beelzebú pia peayapusu itorobi coyeneya tatsi? Daxota painyamonae paca yaputane xua apara paxam panaerabame. <sup>20</sup>Ichitha nama xan cauri itawetan Nacom pia Pejumope tunaxu tatsi pia peayapusu itorobi coyenewatha tatsi xua barapo pia pejumope tunaxu tatsi tanecatsixae. Baxua apara paca tsipaebatsi painya neyaputaenexa, xua painya xantha patopan ponxaein Nacom Tananeitapetsin.

<sup>21</sup>“Pebin ba pon bo pexeinaein pon xua maxu daunwei, bapon nayanaba xua xuan peopi sojeiwan. Daxota pocotsiwan xua xeina pia botha bara xaniwaicha tabobeinchi. <sup>22</sup>Ichitha icha ichun patopa pon beyacaincha maxu daunwei, bapon ba nawita yawa caiba barapo peopi sojeiwan xua xuan bomuxu pexeinaein nanta xeina xua barapocotsiwantha bara xaniwaicha nayaewata. Poxonae barapo peopi sojeiwan bapon caiba tatsana ichamonae bichocono pematataeuncuaexae.

<sup>23</sup>“Pomonae jopa neyawenaeyo, barapomonae apara inta abe exana. Barapomonae exana xua ichamonae jopa tana nejume cowuntsiwa tsane. Barapomonae jopa neyawenaeyo xua ichamonae nenacaetutsina tajiwimonaexae tsane”, jei Jesús.

**Meje yabara poxonae Jesús  
yabara paeba cauri xua  
caewa nauyata pebintha**

*(Mt 12.43-45)*

<sup>24</sup>Equeicha Jesús namchi, jeye: “Poxonae pebin wepu poinchi cauri, bapoxonae cauri pona wexotha ichaxota ira tsewa pepoponaenexa tsane baxota. Ichitha poxonae jopa caxinaeyo xua ichaxota pepoponaenexa bapoxonae bapon nabarai: ‘Tha caibeya pon-aetsi pebin beya ichaxota bayatha wepu ponan’, jei cauri. <sup>25</sup>Poxonae caibeya pona cauri caxina, pebin caxinatsi xua xanapanaya popona. <sup>26</sup>Nexata equeicha cauri pona pebin weya. Pirapaeyo bapon baru patopa siete poyobe cauri pomonae bichocono abe, beyacaincha bapon pon copiya. Daxita barapo caurimonae pebin xeina. Anoxuae bapon nama yatsicaya bichocono abe cana exainchi beyacaincha poxonae copiya abe cana exainchi poxonae saya caein”, jei Jesús.

**Meje yabara poxonae Jesús  
yabara paeba po coyene pepa  
pejuntu coyene weiweinaewa**

<sup>27</sup>Poxonae Jesús cataunxuae cueicuei-jei tsuncuae barapo diwesi, baxota pin bicheitha petsiriwa jume daunwei wawai Jesustha, jeye:

—¡Maisa ena juntu coyene weiweina powayo xua bayatha caexana yawa xua mito caapatano! jei petsiriwa.

<sup>28</sup>Ichitha Jesús barai petsiriwa, jeye:

—¡Bequein barichi, jame yatsicaewa juntu coyene weiweina pomonae jume

tane xua Nacom paeba xuano xua exana pocotsiwa Nacom itoroba! jei Jesús.

**Meje yabara poxonae pomonae  
peajuntucoyenebe jiwi Jesús cui  
itorobatsi xua peexanaewa tsane  
pexeinya petsita itutsi coyenewa**

*(Mt 12.38-42; Mr 8.12)*

<sup>29</sup>Jesús imoxoyo matawacaicha umenatsi pin bicheito. Jesús barai barapo pin bicheito, jeye: “Jiwi pomonae anoxuae jinompa barapomonae peajuntucoyenebe jiwi. Barapomonae necui itoroba xua bepa pinae tsita exanaein tatsita itutsi coyenewa xua pexeinya coyenewa. Ichitha jopa exanaein tsane icha tatsita itutsi coyenewa xua pexeinya coyenewa, saya meisa exanaein icha bayatha juta coyene cana ichichi Jonás pon Nacom peitorobi jume pepaebin, pon caena bayatha tupa. <sup>30</sup>Caena bayatha Nínive tomarapiwi Jonás yaputainchi pon Nacom peitorobi jume pepaebin xua po coyene bapon Jonás Nacom peitorobinchi, tsipei Nacom bichocono Jonás ainya cui exanatsi. Xan ponxaein Nacom Tananeitapetsin Nacom ainya cui neexana. Daxita jiwi pomonae anoxuae jinompa barapomonae neyaputane po coyene xua xan Nacom neitorobica peitaboco wetsica. <sup>31</sup>Matacabi patopeicaena po matabitha Nacom yabara paebina jiwi xua penatsicuentisiwa daxita peperaxa exanaenexa xua abe peexanaexae. Barapo mataqueitha tsane petsiriwa powa caena bayatha tupa, bapowa asiya uncuaena Nacom peitabaratha tatsi. Barapowa pia nacua, nacuapiwayo, po nacua pocotsiwa parowa bereca tajú bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueijejei tsane pomonae xua anoxuae jinompa poxonae uncuaena Nacom peitabaratha tatsi.

Jeï tsane bapowa: ‘Maisa pomonae xua jinompa poxonae Mesías popona po irathe deque, barapomonae abe bichocono peexanaewi tsipei ajuntucoyenefaetabiya jume tane pocotsiwa Mesías cuiduba bequein Mesías bichocono peyaputaen’, jeï tsane barapowa. Barapowa baxua paebina poxoru bapowa bayatha tajũ werena pona pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaen xua Nacom peyabara yaputaewatsi. Daxota bapowa ichichipa xua pecuidubinexatsi xua Salomón pecuidubinexa Nacom yabara. Nama xote uncuanje ponxaein taexanaein pocotsiwa pepa peainya cui coyenewa xua tacuidubin daxita jiwitha xua Nacom yabara. Barapocotsi coyenewa toxeinchiya ainya cui coyenewa beyacaincha po cui coyene Salomón exana poxonae cuiduba xua barapowa cuidubatsi xua Nacom yabara. <sup>32</sup>Barichi barapo matacabitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Barapomonae baxua exanaena tsipei barapo Nínive tomarapiwi icha juntu coyene xeina Nacomtha peauraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha juntu coyene paxeinaem. Nama apara xote uncuanje ponxaein taexanaein pocotsiwa pepa peainya cui coyenewa xua tacaponaewa Nacom Pejume Diwesi daxita jiwitha. Barapocotsi coyenewa toxeinchiya ainya cui coyenewa beyacaincha Jonás po cui coyene exana poxonae

Nacom Pejume Diwesi capona Nínive tomarapiwitha”, jeï Jesús.

**Meje yabara poxonae Jesús yabara cuiduba jwi po coyene xanepanaya peexanaewa pejuntu coyene wetsina**

(Mt 5.15; 6.22-23)

<sup>33</sup>Jesús namchi jiwitha jeye: “Jiton dapon aibi pon pecoicha cueicha exana xua quirei pebuxu pana wetsina, yawa xua cueicha matacateta cajatha. Jume, jame, asiya cueicha exanatsi xua pecoicha taenexa pomonae jojoneibarena. <sup>34</sup>Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itacuereton painya nepaca cayawenaenexa xua beta painya netaewa tsane. Icha painya itacuereton wunae bara beta pataneme. Ichitha icha painya itacuereton abe jopa beta pataetsipaem. Barichiru painya juntu coyenewan xua painya nenanta xeinaewan. Icha painya juntu coyenewan xanepanaetsipa bara beta Nacom payabara najuntu coyene xeinaetsipame. Ichitha icha painya juntu coyenewan jopa xanepanaetsipae jopa beta Nacom payabara najuntu coyene xeinaetsipaem. <sup>35</sup>Painya juntu coyenewan paca cana exanaetsipa xua bichocono abe paexanaetsipame daxota dota pam. Painya xoba merawi paponame icha jopa paxeinaem xua peyonoyoneiwa poxoru cotacaya panapapeichipame. Barichi pam, painya xoba pajinompame icha jopa paxeinaem xua pocotsiwa beta painya neyabara nanta xeinaewa Nacom poxoru cotacaya abe paexanaetsipame. <sup>36</sup>Ichitha painya juntu coyene wunae, xuano xua jopa paxeinaem peabe coyenewa painya juntu coyenewa, bara xaniwaicha Nacom payabara yaputaneme icha poxonae pecoicha paca cana ichi xua beta pataneme”, jeï Jesús.

**Meje yabara poxonaē Jesús  
muxuweta jiwī fariseomonaē iru  
pomonaē jiwī pecuidubiwi Moisés  
pia peitorobi coyene tatsi  
barapomonaē pecuiyainwa tatsi**

(Mt 23.1-36; Mr 12.38-40; Lc 20.45-47)

<sup>37</sup>Poxonaē Jesús najume weta, fariseomonaē jiwānapin Jesús wabatsi xua petaxaenexa tsainchi pia botha. Jesús joniya yawa ecoundeca pexaethopaewatha. <sup>38</sup>Fariseomonaē najūntu coyene cabenaecaeya necotecataba xua Jesús jopa matha tsiwanaya penacobe quiatsiyoxae poxonaē xane icha judiomonaē ichi, xua saya pia cui coyene tatsi xua barapomonaē nanta xeina icha jopa matha nacobe quiatsiyo Nacomtha natsicuentisipa. <sup>39</sup>Nexata Jesús pon Pecanamataxeinaeinxae jiwī, fariseomonaēpin baraichi:

—Paxam fariseomonaēpiwi pam, paxam jopa ba juniya paexaneibim poxonaē meisa panaperu iquicame. Daichitha bupana iya painya jūntu coyenetha pecaibi coyene paxeiname, peuwi coyeneno paxeiname. Be barapocotsi jiwī pam, pocotsimonaē coroton saya matawacaicha iquica yawa paratonno, ichitha atutuxuira bichocono. <sup>40</sup>Jopa peyaputae jiwī pam. Nacom exana wapepon yawa exana wajūntu coyenewa. ¡Baxua payaputanemeba! <sup>41</sup>Xua xoxi paxeineibame matha abū copiya pajiwana tsabeibare pomonaē peacopeibiwi nexa. Bapoxonaē xua xoxi nacopabeiba baxua panata copabeibare. Icha bara paichim tsane, bara xaniwaicha pajūntu coyene xanepaname Nacomtha. Yawa jopa panantawenonaem xua pana nacobe iquiqueibame jiwī peitūtha xua be panatsicotaneme pocotsi pebin pejūntu coyene wūnaein.

<sup>42</sup>Equeicha Jesús namchi, jeye: “¡Paxam fariseomonaēpiwi pam tsobenaē, xua peperaxa peru jūbiwa bexa paxeinaename! Daxita xua painya neubiwa Nacom pacatsibeibame caewaxi poxonaē diez xoyobe paxeineibame. Iru xua tsiwaxino pacatsibeibame. Bequein baxua paexaneibame ichitha Nacom jopa paantobem. Matauta ichamonaē jopa xapain pata exanaem. Bewa paexanaem xua Nacom pacatsibeibame caewaxi poxonaē diez xoyobe paxeiname. Yawano bewa paantobem Nacom. Yawano bewa xainyeya paexanaem jiwitha”, jei Jesús fariseomonaēpintha.

<sup>43</sup>Bapoxonaē Jesús fariseomonaē baraichi, jeye: “¡Paxam fariseomonaēpiwi pam tsobenaē! Bexa paxeinaename xua peperaxa peru jūbiwa. Paxam paichichipeibame xua painya nenanta caeneibiwa pexeinya peenaewantha judiomonaē pia penacaetutsi botha po peenaewan ichaxota enathopeiba pomonaē ainya cui penaexanaewi. Matautano paichichipeibame xua jiwī paca wūnaē jainteiba poxonaē paca jacobā namtotha, xua jiwī painya nepaca baru itura jinaenexa”, jei Jesús.

<sup>44</sup>Equeicha Jesús namchi, jeye: “¡Moisés pia peitorobi coyene tatsi, jiwī pecuidubiwi pam tsobenaē! ¡Iru fariseomonaē pam tsobenaē! Poxonaē jiton ba pona namtotha jopa tsaqueinaeyo xua jiton piwa baxoyo bocareca mūthu deca, xua peayeiwa poxoru jopa wūnaeyo. Paxam bara paichim. Jiwī imoxoyo paca caquita pona jopa tsaqueinaeyo xua pocotsiwa painya jūntu coyenetha pananta xeiname xua abe xua jopa pecui wūnaewiyo”, jei Jesús.

<sup>45</sup>Nexata pomonaē jiwī pecuidubiwi Moisés pia peitorobi coyene tatsi, bara-

pomonaē jiwana caein bapon Jesús baraichi, jeye:

—Jiwi Necuidubin, poxonaē baxua paebame, apara irū pana neyabara jam poxonaē catsawiya paebame, jei.

<sup>46</sup> Nexata Jesús jume nota, jeye:

—¡Irū paxam Moisés pia peitorobi coyene tatsi jiwi pecuidubiwi pam tsobenaem! Tsipei paxam ichamonaē paitorobame xua capona pocotsiwa arewe pocotsiwa jiwi bapana jopa itacupaetsi xua pecaponaewa, ichitha paxam jopa pata yoichaem, matauta bara cae cobesitiyotha jopa pata yoichaem. Jiton ba itoroba ichuntha xua pecaponaenexa pocotsiwa jopa juniya arewiyo, xua pocotsiwa jopa itacupaetsi xua pecaponaewa pon itoroba. Bara paichim paxam ichamonaē pacuidubame xua jopa itacupaetsi xua peexanaenexa baxuan xua pocotsiwa irū xua jopa paca itacupaeyo xua painya neexanaewa baxuan.

<sup>47</sup> “¡Paxam patsobenaem! Paxam petupaewi pomonaē Nacom peitorobi jume pepaebiwi payamuthū acabame boutixi bequein painya amo susato jiwi juteba barapomonaē. <sup>48</sup> Poxonaē baxua paexaname, ichamonaē patsita itapeinya xeiname xua paxam bara irū paichichipamerū pocotsiwa xua painya amo susato jiwi juteba xua barapomonaē pomonaē Nacom peitorobi jume pepaebiwi jutebatsi. Daxota barapo petupaewi payamuthū acabame boutixi.

<sup>49</sup> “Daxota Nacom peyaputae jumetha namchi: ‘Itorobicaein barapomonaetha taitorobi jume pepaebiwi irū pomonaē taitorobiwi. Ichamonaē pomonaē taitorobi jume pepaebiwi jutebinchi. Ichamonaē pomonaē taitorobi jume pepaebiwi abe exanaeinchi. Ichamonaē, pomonaē taitorobiwi jutebinchi. Ichamonaē, pomonaē taitorobiwi abe

exanaeinchi’, jei Nacom peyaputae jumetha”, jei Jesús. <sup>50</sup> Equeicha Jesús namchi, jeye: “Pomonaē anoxuae jinompa Nacom cana exanaena xua barapomonaē peraxa jubebinchi petsitaxaetsi xua barapomonaē penatsicuentisiwa xeina, tsipei jiwi juteba xua Nacom peitorobi jume pepaebiwi jutebatsi caena bayatha xua weya xua poxonaē Nacom aena forota barapo cae pin nacue. <sup>51</sup> Painya amo susato jiwi jujutebapona xua pomonaē pejuntu coyene xeicaē jiwi jutebatsi. Copiya matha Abel bexotsi beya poxonaē irurū Zacarías bexotsiru. Barapon Zacarías pabexubame Nacom pin pia botha ichaxota xua barapo bo tututha naitama taeuncuabe xua be pexaethopaewa xua ichaxota duwei tauteiba Nacom nexa irū ichaxota po tutu yatsicaewa Nacom pia tutu. Daxota paca tsipaebatsi Nacom cana exanaena xua daxita paxam pomonaē anoxuae pajinompame paca peraxa jubebina tsipei Nacom patsitame xua paxeiname penatsicuentisiwa xua painya amo susato jiwi pejutebixae barapomonaē”, jei Jesús.

<sup>52</sup> Equeicha Jesús namchi, jeye: “¡Paxam jiwi pecuidubiwi pam tsobenaem xua Moisés pia peitorobi coyene tatsi! Paxam ayapube paexaname xua jiwi peyaputaewa Nacom Pejume Diwesi poxoru icha caununaya pacuidubame, xua jopa xapain pocotsiwa Nacom paebiyo. Paxam jopa pajume cowuntsim Nacom matauta jopa pacopatsim xua ichamonaē irū pejume cowuntsiwa Nacom”, jei Jesús.

<sup>53</sup> Poxonaē Jesús baxua paeba poxonaē cataunxuae jopa natsixatabiyo, fariseomonaē irū pomonaē jiwi pecuidubiwi Moisés pia peitorobi coyene, daxita barapomonaē Jesús bichocono casebatsi. Barapomonaē Jesús muxu fayaco-

tatsi xua yainyabatsi nawita, peamuxuconae exanaenexa tsainchi. <sup>54</sup>Barapomonae Jesús piraichi matowa yainyabatsi peyaputaenexa icha Jesús ajume-beya jume bara botsina.

**Meje yabara poxonae Jesús  
yabara cueicueijeji jiwitha xua  
fariseomonae itara beta paeba  
ichitha jopa xapain exanaeyo**

**12** Poxonae cataunxuae Jesús cueicueijeji tsuncuae, bapoxonae ayei jiwi nacaetutapona Jesustha. Jiwi nataxu taxunaunaba. Jesús tamropata pitaba xua cueicueijeji jiwitha. Copiya matha Jesús pijimonae tsipaeba, jeye: “Dota pam jopa pajume naitaewatsinde fariseomonae pia pecuidubi coyenewa tatsi xua painya nejume cowuntsiyainwa. Barapomonae itara beta paeba ichitha jopa xapain exanaeyo. <sup>2</sup>Daxita diwesin xua po diwesin bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonae bexa yaputaeponaena baxua. <sup>3</sup>Paxam xua po diwesi merawi nameicha pana natsipaebame, barapo diwesi ichamonae mataqueitha jume taena. Matautano pocotsiwa paxam aisawatha pana namuxu paxapaxeya tsipaebame, barapo diwesi ichamonae panatha paca jume canawabiya wawai tsane”, jei Jesús.

**Meje yabara poxonae Jesús  
yabara paeba xua pontha bewa  
ba jiwi cuitaya cunuwina**

*(Mt 10.26-31)*

<sup>4</sup>Equeicha Jesús pijimonae barai, jeye: “Tamonae paxam paca tsipaebatsi jopa pacuitaya cunuwinde pomonae xua itacupatsi xua paca necajutebiwa xua meisa painya pepontha. Ichitha barapomonae jopa itacupaetsi xua equeicha paca jumopein tunaxu

jutebina. <sup>5</sup>Ichitha yabara paca tsipaebatsi pontha jame bewa pacuitaya cunuwim, bapon apara jame Nacom. Tsipei bapon itacupatsi xua painya nepaca bebaiwa pin isototha po pin isototha jopa bapana itacounayiyo xua weraweraca painya nepaca exanaenexa painya pepon. Xaniyan paca tsipaebatsi bewa jame pacunuwim bapon Nacom.

<sup>6</sup>“Jiwi ba caenaeta siri cinco poyobe, saya ainya paratiyobe nantomata. Bequein barapo siri caenaeta jiwi xua jopa matoma nautsiyo, ichitha Nacom jopa yabara junteinaeyo siri, matautano caeyono jopa yabara junteinaeyo. <sup>7</sup>Iru daxita painya nentanan Nacom daxita matapaeicha paca matana ununa. Jopa pajunuwinde tsipei paxam Nacom bichocono patsita ainya cuim beyacaincha siri”, jei Jesús pijimonaetha.

**Meje yabara poxonae Jesucristo  
yabara paeba xua pomonae  
peyabara paebiwichi  
ichamonae peitabaratha tatsi**

*(Mt 10.32-33; 12.32; 10.19-20)*

<sup>8</sup>Equeicha Jesús namchi pijimonaetha, jeye: “Yabara paca tsipaebatsi pomonae xua nayopita ichamonaetha, pomonae xua najei: ‘Apara paxan Jesús pijimonae tatsi pan’, najei. Barichi xan, ponxaein Nacom Tananeitapetsin xuya jan tsane matatsunpiwitha. Barapomonae apara tana nejume cowuntsiwi, jan tsane xuya barapo Nacom pia matatsunpiwi tatsi peitabaratha tatsi. <sup>9</sup>Ichitha pomonae xua neyabara jei ichamonaetha: ‘Jopa dapon payaitaeyo’, jei, xan ponxaein Nacom Tananeitapetsin xuya barapomonae yabara jan tsane Nacom pia matatsunpiwi peitabaratha tatsi: ‘Apara barapomonae jopa yaitaeyo’, jan tsane.

<sup>10</sup>“Xan ponxaein Nacom Tananeitapetsin pon abe neyabara



paeba Nacom itacupatsi xua bapon peyabara junte mainaewatsi pocotsiwa bapon abe neyabara paeba. Ichitha pon nama Nacom pia Pejumo pe tunaxu tatsi bichocono abe yabara paebatsi Nacom jopa bapana yabara junte mainae bapon.

<sup>11</sup>“Paca caponaena judiomonae pia penacaeutusi bontha ichaxota nacaeteutaiba pentacaponae wi. Paca caponaena pomonaetha pomonae peyabara paebi jiwu xua penatsicuentisiwa xua abe peexanaexae yawa tomara pia pentacaponae wi peitabaratha tatsi paca caponaena. Poxonae baxua paca exanaena, jopa payabara najuntu coyene exabinde pocotsiwa xua painya nejume notsiwa xuano xua painya netsipaebiwa tsane barapomonaetha. <sup>12</sup>Poxonae juntu curu pacaunutsiya paebiname, bapoxonae Nacom pia Pejumo pe tunaxu tatsi paca tsijume dubina pocotsiwa painya netsipaebiwa tsane”, jei Jesús.

**Meje yabara poxonae Jesús pijimonae yabara tsipaeba pon copei pexeinaein**

<sup>13</sup>Caein pin bicheitoha, bapon Jesús baraichi, jeye:

—Jiwu Necuidubim, taeweicho inta itorobare bu necata xua tawa xua taxa pecopiniwa xua xuan taxa bayatha pana nejuntana jeba, jei.

<sup>14</sup>Jesús jume epa pita, jei:

—Maisacai, apara dapon aibi pon necana exana xua xan tapaca yabara paebiwatsi xua painya nenatsicuentisiwa xua abe painya neexanaexae. Matautano apara dapon aibi pon necana exana xua xan be pon tapacata tsabibeiwatsi pocotsiwa painya axa pia pecopiniwan tatsi, xua bayatha paca juntu na jebeiba painya axa, jei Jesús.

<sup>15</sup>Yawa Jesús namchi, jeye:

—Dota xua asiwiya paantobem xua xoxi paxeiname. Bequein pebin copei nawita xeinaetha, ichitha barapo pebin

jopa yawenaetsi xua beta pepoponaewa, jei Jesús.

<sup>16</sup>Nexata Jesús tsipaeba jiwu tha pecayabara juta pepaebi diwesiyo, xua jeye: “Iru matha pebin popona pon copei pexeinaein. Pia pabi tatsi pexaewa tanawetatsi nawita. <sup>17</sup>Pon copei pexeinaein nexata pia coutha nabarai: ‘¿Eta bichocuaein tsane? ¿Eta xota jebocuaein pocotsiwan pabitha notan?’ jei. <sup>18</sup>Pia coutha najume nota: ‘Bara yaputan tha xubichi pexaewa matabon. Tha equeicha acabichi po bon bichocono pin bon. Barapo pin bontha daxita pexaewa etsin yawa etsinno daxita pocotsiwa xeinan. <sup>19</sup>Nexata najuntu coyene baran tsane: Bara daxita xeiname ainya wei dapaen nexa. Nafinacaecare, xaibare, apeibareno, juntu coyene weiweinebare’, najei xua najuntu coyene barai pon copei pexeinaein. <sup>20</sup>Ichitha pon copei pexeinaein Nacom barai bapon, jeye: ‘Pebin pon jopa xapain nenanta xeinaem, methaunxuae anoxuae merawi tupaename. Daxita baxuan xua yabo notame, ¿jintam metha piawa tsane?’ jei Nacom. <sup>21</sup>Baxua barichi pon xua saya copei yabara nanta xeina nawita pecaetubinexa. Bapon Nacom copei xeina taetha, Nacom tsitatsi xua bapon apara acopeibi, tsipei bapon pejuntu coyene tatsi tsocuae xua Nacom jopa pejume cowantsixaetsi”, jei Jesús.

**Meje yabara poxonae Jesús yabara cuiduba po coyene xua Nacom eena pijimonae**

(Mt 6.25-34)

<sup>22</sup>Bapoxonae Jesús pijimonae tsipaeba, jeye: “Paca tsipaebatsi, jopa bichocono payabara najuntu coyene exabinde pexaewa xua painya neuna jinompaewa tsane. Barichi jopa bichocono payabara najuntu coyene exabinde papaburu xua painya pepon

nexa. <sup>23</sup> Pocotsi asu pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui iru, beyacaincha papaburu xua pepon nexa. <sup>24</sup> Uni payabara yaputaema. Bapomonae jopa ubiyo pabitha. Matautano jopa jotsiyo pocotsiwa penawetsiwa. Jopa xeinaeyo ботухнп xua pejebinexa pexaewa. Ichitha Nacom, uni apatatsi pexaewa. Paxam nama bichocono Nacom patsita ainya cuim jame, beyacaincha peyapupunaewi xua Nacom tsita ainya cuichi. <sup>25</sup> Dapon aibi pon paxam jiwana pon itacupatsi xua xeinaena icha matabi xua po matabitha pepoponaewa tsane poxonaе tupaena. Bequein bapon nayabara nantu exaba nawita baxua, ichitha jopa itacupaetsi xua xeinaena caentacabi equeicha. <sup>26</sup> Icha jopa paca itacupaeyo xua paexaname xua be conotha xua caentacabi nexa, zeta xua metha equeicha yabara panantu exabame ichawan xua daunwei bichocono?

<sup>27</sup> “Jame pacayabara nanta xeinare pentonon xua xuwa, xua matono itupana. Pentonon jopa naciuchiyo yawa jopa natsixanaeyo papaburu penamaxatabinexa. Ichitha paca tsipaebatsi xua pentonon matono itupana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomonae itorobiya pia pepa peewatsinchi pon bayatha tupa. <sup>28</sup> Pentonon, po matonon wexotha anoxuae xuwa, Nacom cana exana xua matono itupana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wunaе bara bequein saya pentonon. Barichi Nacom itacupatsi xua beta

paca neca-eenaewa xua beta painya nejinompaenexa. Matautano Nacom paca catsina paparuwan. ¡Maisa pebiwi pam tsoberae be conotha pajume cowantame Nacom! <sup>29</sup> Jopa payabara najuntu coyene exabinde pexaewa xuano xua painya neapaewan yabara. Jopa panthuthu deideijeya jinompaenexa xua ichawa pacayabara nanta xeiname. <sup>30</sup> Tsipei barapo cae pin nacuathe jiwi, saya i baxua pecayabara najuntu coyene exabi pocotsiwa nantawenona. Ichitha nama paxam painya Axa Nacom panantauteame pon yaputane daxita pocotsiwa xua xoxi panantawenoname. <sup>31</sup> Meisa saya bichocono pacayabara nanta xeinare xua painya neexanaewa xua Nacom ichichipa waba jiwi xua jiwi wabatsi xua petanaexanaenexatsi pijimonae pomonae itorobiya pecanamataxeinaexae. Icha baxua paexanaename nexata Nacom paca catsibina xua daxita pocotsiwa panantawenoname”, jei Jesús.

**Meje yabara poxonaе Jesús yabara cuiduba xua pocotsiwa Nacom jiwi pejuntana jebiwatsi pia nacuatheicha**  
(Mt 6. 19-21)

<sup>32</sup> Equeicha Jesús namchi, jeye: “Tamonae pomonae be ovejamonae pam, painya nejunuwi jiwi pamxaem. Jopa pajunuwinde bequein bara tsiquimonaeyo pam. Painya Axa Nacom pia coya peichichipaexae pia coya paca cana exanaena pijimonae tatsi jiwana pam pomonae pejume cowantsiwichi pomonae itorobiya pecanamataxeinaexae. <sup>33</sup> Pacaenaere xua paxeiname. Barapo paratixi pomonae acopeiwiwi pacatsibare. Poxonaе baxua paexaname, bapoxonaе xuya Nacom athabeicha paca catsibina pocotsiwa xua painya nepaca juntana jebiwa pocotsiwa xua jopa naxubiyo.

Athabeicha pecaibin jopa patopaeyo painya nepaca caibinexa pocotsiwa pajebame bara xoteicha. Matautano ofo jopa xaeo pocotsiwa xua pajebame bara xoteicha. <sup>34</sup>Ichaxota ba pajebame xua painya neichichipaewan baxota ba payabara nanta xename nawita”, jei Jesús.

**Meje yabara poxonae Jesús  
yabara paeba xua pinae  
bewa nacui wunaetichi**

<sup>35-36</sup>Equeicha Jesús namchi, jeye: “Pana najuntu coyene cui wunaere xua tapatopaewa tsane. Barapocotsi juta coyeneya paichinde, icha pomonae petanacuichiwi ichi xua nacui wunaeta, xua pon bo pexeinaein imoxoyo pepatopaexae. Bapon pon bo pexeinaein nasiwa pona ichaxota jiwi nacaetuta xua pexaenexa pexaewa poxonae pebin piowa pita. Bapon nawirena bara werena, pomonae pia petanacuichiwichixaetsi nainya tayausanaxorenatsi pecoiboto poxonae bapon patopa pia botha. Barapocotsi juta coyeneya paichinde. Paxam panacui wunaetsiya jinompare xua tapatopeicaewa tsane. <sup>37</sup>Poxonae bo pexeinaein patopa icha bapon tane xua pomonae pia petanacuichiwichixaetsi jopa maichiyo bapoxonae barapomonae juntu coyene weiweina. Bara xaniwaicha paca tsipaebatsi bapon pon bo pexeinaeinxae pia petanacuichiwichi cuareba pexaethopaewatha, bapoxonae apatsina pexaewa. <sup>38</sup>Pon bo pexeinaein, bara bequein papaetha patopaetha tsipae, ichacuitha bara bequein metha patopaetha tsipae mataquei wunaeyo, ichitha barapomonae pomonae petanacuichiwi juntu coyene weiweinaetsipa poxonae bo pexeinaein tane xua jopa maichiyo barapomonae. <sup>39</sup>Barichi payaputaema,

icha bo pexeinaein yaputaetsipa xua poxonae patopaena pon jiwi pecaibin jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. <sup>40</sup>Bara paichinde. Tawanaetha pana nacui wunaere tsipei xan ponxaein Nacom Tananeitapetsin patopeicaein poxonae jopa tsaca payabara jinompaem tsane poxonae jopa payabara nanta xeinaem tsane xua tapatopaewa tsane”, jei Jesús

**Meje yabara poxonae Jesús yabara  
diwesi paebe ponbe xua bo  
peyapucaeaeinbe pon xua  
beta peexanaein, iru xua  
pon jopa beta peexanaein**

(Mt 24.45-51)

<sup>41</sup>Nexata Pedro Jesús yainyabatsi:

—Jesús, pata Tanecanamataxeinaem, po diwesi xuaunxuae pana tsipaebame, xua pecayabara juta pepaebi diwesiyo, ¿saya meisa paxan nexa? ¿Iru icha monae nexano? jei Pedro.

<sup>42</sup>Jesús pon Pecanamataxeinaeinxae jiwi, Pedro jume notatsi pecayabara juta pepaebi diwesiyotha pepatopaewa tsane yabara, jeye: “Yabara catsipaebatsi pon matacapopona pomonae bo pexeinaein tanacuitatsi. Barapon xanepanaya yaputaeya matacapopona. Poxonae bo pexeinaein wepu warapa barapomonae, pon bo pexeinaein itoroba pontha pon bo petayapucaeaeinchi, jeye: ‘Inta beta matacapoponde, yawa inta beta pexaewa apare daxita matacabi pomonae xua inta nacuita’, jei bo pexeinaein. <sup>43</sup>Pon bo petayapucaeaein bara juntu coyene weiweinaena poxonae patopaena pon bo pexeinaein, petaexaetsi xua bara beta tayapucaeae bo, xuano bara beta peexanaexae xua bo pexeinaein itoroba. <sup>44</sup>Xaniwaicha paca tsipaebatsi. Bo pexeinaein itorobina, xua pon petayapucaeaeaxaetsi bo, bapon cana exanaeinchi xua equeicha

daxita piawa beta petayapu enaewatsi xua xuan xeina pon bo pexeinaein. <sup>45-46</sup>Ichitha ichacuiitha pon yapucaeca bo bapon peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae. Bapoxonae bapon cueinta pomonae pon bo pexeinaein tanacuitatsi, pebiwi yawa petsiriwaxi. Matautano bapon nanabanaetsipa nawita ichamonae yawa cupatsi nanaexanaetsipano. Bapoxonae bo pexeinaein jemeicha patopaena poxonae pon bo petayapucaecaen jopa wunae tsaqueinaeyo. Poxonae barapo hora tsuxubi jopa yaputaeyo yawa poxonae barapo matababi tsuxubi jopa yaputaeyo. Pon bo pexeinaein itorobina ichamonaetha xua pebenexatsi yawa peperaxa exabinexa tsainchi pon bo petayapucaecaen icha cana ichichi pomonae jopa pejume cowuntsiwi.

<sup>47</sup>“Pon bo yapucaeca, bapon bequein yaputane pocotsiwa pon bo pexeinaein itoroba xua ichichipa, ichitha jopa exanaeyo pocotsiwa itorobatsi, xua bo pexeinaein itoroba. Barapon bichocono peraxa jubinchi xua jopa peexanaexae pocotsiwa itorobatsi. <sup>48</sup>Ichitha ichun pon bo yapucaeca jopa cono yaputaeyo pocotsiwa bo pexeinaein itoroba yawa itatemaya abe exana. Bequein jopa cono yaputaeyo yawa itatemaya abe exana, ichitha nantawenona xua peperaxa exanaewatsi be conotha, tsipei abe exana be conotha. Pon ba be conotha Nacom yabara yaputaeinchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

**Meje yabara poxonae Jesús yabara paeba xua jiwi ainya bicheiton naexanaena xua Jesús pejume cowuntsixaetsi xua ichamonae jopa pejume cowuntsixae**

(Mt 10.34-36)

<sup>49</sup>Equeicha Jesús namchi, jeye: “Patopan barapo cae pin nacuate Nacom tana neitorobixae xua jiwi aperaxatane taexanaenexa abe peexanaexae barapo jiwi. Tapatopaewaxae jiwi atene tsane icha be ichi poxonae barapo jiwi tautatsi isototha. ¡Maisa metha bayatha bena baxua exanocuaein barapo isoto! <sup>50</sup>Xan barichin tsane daxita matapaeicha aperaxatanein tsane poxonae tupaen. Awiya bichocono anthuthurewein xua beya baxua inta exanaena. <sup>51</sup>¿Pananta xeiname xua xan apara patopan xua jiwi juntema pejinompaewa tsane? Apra aibi, jopa baxua tsipatopaeinyo. Apra jame patopeican taexanaenexa po coyene jiwi naba exanatsi xua daxota ainya bicheiton penaexanaewa tsane. <sup>52</sup>Anoxuae, yawa bexa tsane cinco poyobe cae matabuxuayo xua bomuxutha jinompa barapomonae nawepu tsatajopaenabe. Tres poyobe ita aenae-aenei tsane xua dos poyobe ita aenae-aenei tsainchibe. Nantiya barapo matabuxuyobe naita aenae-aenei tsanebe. Baxua exanaena xua ichamonae tana nejume cowuntsi jiwixae xua iru ichamonae jopa tana nejume cowuntsixae. <sup>53</sup>Coxiyan pexanto ita aenae-aenei tsane. Coxiyan xuya pexanto ita aenae-aenei tsainchi. Coxiwa pexantiyo ita aenae-aenei tsane. Coxiwa xuya pexantiyo ita aenae-aenei tsanebe. Pecopeinyobe naita aenae-aenei tsanebe”, jei Jesús.

**Meje yabara poxonaē Jesús  
diwesi paeba xua jiwī itaboco  
tane peitaboco yaputaenexa**

(Mt 16.1-4; Mr 8.11-13)

<sup>54</sup>Yawa Jesús barai jiwītha, jeye: “Poxonaē tsaquinaebowa pataneme xua pocotsiwe wejopeine: ‘Ema dawa jopeina’, pajam. Jopa jume bara duneica. <sup>55</sup>Poxonaē joibo jopa: ‘Wei imoxoyo’, pajam. Jopa jume bara coicha jopa. <sup>56</sup>Itara mexeya pexeinya juntu coyene paxeiname ichitha peajuntucoyenebe jiwī pam. Itaboco yawa irano panaita caewatame painya yaputaetsi icha ema yawa xua icha pexeinya matabi. Ichitha jopa payabara yaputaem xua bequein peitupanaewan exanan, ichitha cataunxuae came awiya jopa payabara yaputaem po coyene xua baxua Nacom taneitorobiwa”, jei Jesús.

**Meje yabara poxonaē Jesús paeba  
xua ichun juntu cui xanepanaya  
juntema popona cana exana  
xua pon peaitaetabixaetsi**

(Mt 5.25-26)

<sup>57</sup>Equeicha Jesús namchi jiwītha, jeye: “¿Eta xua metha painya coutha beta jopa pana nayabara nanta xeinaem xua icha metha wūnae painya neexanaewa? <sup>58</sup>Icha ichun bepaca itoroba paca necaponaenexa pontha pon jiwī peyabara paebin xua penatsicuentisiwa xua abe peexanaexae nexata bapon patsipaebare poxonaē cataunxuae namtotha paca baru ecapona xua painya naita coxone exanaenexa. Xain bapoxonaē bapon jopa paca caponaē tsane pontha pon jiwī peyabara paebin xua penatsicuentisiwa xua abe peexanaexae. Tsipei icha bapon bara beya paca caponaetsipa, bapoxonaē pon jiwī peyabara paebin xua penatsicuentisiwa xua abe peexanaexae equeicha dabeya policia-

monae beya paca itorobichipa. Bapoxonaē nama policiamonaē jiwī pecubi bo beya paca itorobichipa. <sup>59</sup>Bara xaniyeya paca tsipaebatsi. Paxam jopa paca pu copabi tsane jiwī pecubi bo weya, beya abu poxonaē panatsipu matomacae-name daxita paratixi cuntha po paratixi xua paxeiname”, jei Jesús.

**Meje yabara poxonaē Jesús yabara  
paeba xua ainya cui xua icha juntu  
coyene pexeinaewa Nacomtha**

**13** Barapoxonaē ichamonae pata. Jesús tsipaebatsi, jeye:

—Galilea nacuapiwi Jerusalén tomaratha capata duweimonae, Nacom pin pia botha xua barapo duweimonae pejutebinexa petautsinexa xua petuxusi exanaenexa Nacom nexa. Ichitha poxonaē cataunxuae baxua exanempa Galilea nacuapiwi pon Galilea nacuapiwi peyanacua ewatsinchi, pon pewun Pilato poxonaē bapon baxua jume taeba, xua Galilea nacuapiwi exanempa Nacom pin pia botha, bapoxonaē bapon pia soldadomonaē itoroba Nacom pin pia bo beya xua pejutebinexatsi Galilea nacuapiwi. Daxita duwei jana, yawa Galilea nacuamonae jiwī jana cae jana naexananaya, jei barapomonaē.

<sup>2</sup>Jesús jume nota, jeye: “¿Eta xua metha pananta xeiname? ¿Barapo pebiwi jutebatsi bichocono yatsicaya abe peexanaewixae beyacaincha pomonaē abe peexanaewi pomonaē jinompa Galilea nacuatha? <sup>3</sup>Apara aibi. Icha jopa Nacom patsita xeinaem icha juntu coyene, bara paichipaem, paca weraweraca exanaetsipa. <sup>4</sup>Ichacuitha metha pacui cananta xeiname pomonaē dieciocho poyobe, pomonaē bayatha bomuxutha mata perababatsi xua po botha bichocono taicha po bo pewun Siloé. ¿Barapomonaē mata tsapababatsi bichocono abe

peexanaexae beyacaincha pomonae jinompa Jerusalén tomaratha? <sup>5</sup>Apara aibi. Icha Nacom jopa patsita xeinaem icha juntu coyene, paxam bara paichipaem paca weraweraca exanaetsipa”, jei Jesús.

**Meje yabara poxonae Jesús yabara paeba higuera nae xua po diwesi pecayabara juta pepaebi diwesiyo**

<sup>6</sup>Nexata Jesús tsipaeba pecayabara juta pepaebi diwesiyo. Bapon namchi, jeye: “Matha iruru pebin higuera nae xeina po nae ubanota pia pabitha. Barapo pebin pia pabitha pona pia taetsi icha yacuei dubena. Ichitha poxonae tane jopa yacuei dubenaeyo. <sup>7</sup>Nexata pon pabi pexeinaein tsipaeba pontha pon pabi petayapu eenaeinchi, namchi, jeye: ‘Taema acoibi po weibe pabitha poneiban tha bequein taibichi pethei ichitha jopa yacuei dubeneibiyo. Ûncataxore. Jopa ichichipaeinyo xua came barapo nae saya uncua ichaxota ubanotinchi icha nae, po nae penacoichi nae’, jei pon pabi pexeinaein poxonae tsipaeba pon pabi petayapu eenaeinchi. <sup>8</sup>Ichitha pon pabi petayapu eenaein jume nota: ‘Tanentacoponaem, abũ barapo nae uncuaena barapo weithe. Tha yaira tabaca nacuenuena exanaetsi paraparatotha, bapoxonae duwei petasin jebarecaetsi petabaca deca. <sup>9</sup>Metha bapoxonae matono dubenaetsipa icha weitha. Icha jopa matono dubenae tsane icha weitha nexata moya beuncataxotsi’, jei pon pabi petayapu eenaein”, jei Jesús.

**Meje yabara poxonae Jesús axaibi exana yabũyo pentaquei seicae matabitha powayo naepasi xurutsiya pona**

<sup>10</sup>Caentacabitha judiomonae barompaya pia pentaquei seicae matabitha tatsi Jesús cuidubauya

Nacom Pejume Diwesi judiomonae pia penacaetutsi botha tatsi. <sup>11</sup>Barapo botha yabũyo eca, powa caena bayatha atene dieciocho po weiyobe. Barapowa naepasi xurutsiya pona. Barapowa xua juntucuru epasi boipana ajibi. <sup>12</sup>Poxonae barapowa Jesús tane, Jesús waba barai, jeye:

—Yabũyo anoxuae jopa neraichiwa, bayatha wunaem, jei Jesús.

<sup>13</sup>Nexata barapowa Jesús pecobetha jayaba. Bapoxonae yabũyo epasi naroitaba yawa barapowa wuna jainta, Nacom wuna jaintatsi. <sup>14</sup>Ichitha pon pecanamataxeinaein judiomonae pia penacaetutsi bo tatsi, bapon Jesús casebatsi xua axaibi peexanaexae pentaquei seicae matabitha. Bapon barai jiwitha, jeye:

—Bara irũ seis po matabibite xua be cae semanatha tsooneibi xua barapo matabintha benacuitatsi. Jame barapo seis matabintha moya papare xua axaibi painya nepaca exanaewa tsane. Nama jopa papatsinde pentaquei seicae matabitha, jei bapon pon pecanamataxeinaein judiomonae pia penacaetutsi bo tatsi.

<sup>15</sup>Bapoxonae Jesús jume nota, jeye:

—Itara mexeya pexeinya juntu coyene painya nexainaewi ichitha peajuntu-coyenebe jiwi pam. Ichitha paxam irũ panacuitame pentaquei seicae matabitha. Burro ba payama isanaxubame, bueyno ba payama isanaxubame painya apatsinexa mera pepa mene beya barapo pentaquei seicae matabitha. <sup>16</sup>Barapowa powayo Abraham pia pemomoxi susatopiwi jiwanawayo tatsi. Barapowa caena bayatha atene exanatsi. Satanás atene exana dieciocho po weyobetha. Daxota iruru barapowa xan axaibi exanan pentaquei seicae matabithe, jei Jesús.

<sup>17</sup>Poxonae Jesús baxua caunuta, bapoxonae pomonae Jesús pia

peaitafaetabiwichi aura tsumenae. Ichitha daxita jiwí jũntũ coyene weiweina petæxae xua Jesús pexeinya pewũnaewa exana.

**Meje yabara poxonae Jesús cuiduba pecayabara jũta pepaebi diwesiyo po peubi xutiyo pewũn mostaza xutiyo**

(Mt 13.31-32; Mr 4.30-32)

<sup>18</sup>Equeicha Jesús namchi, jeye: “Poxonae Nacom waba jiwí petanaexanaenexatsi pijimonaе tatsi, pomonaе itorobiya peewatsixae, ¿eta po coyene nacoyene jũpabe? ¿Eta xua paca cuidubinchi xua baxua yabara?

<sup>19</sup>Baraxua apara icha be mostaza xutiyo ichi po mostaza xuto pebin ũba pia pabitha. Xuwa beya pin nae tsoponae. Pepinnaexae daxota siri exana coton pemaxũranantha. Icha mostaza xutiyo ichi xua beya pin nae tsoponae, bara jũta ichi Nacom pejume cowũntsiwi. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

**Meje yabara poxonae Jesús cuiduba pecayabara jũta pepaebi diwesiyo xua levadura yabara xua pan cotowa exana**

(Mt 13.33)

<sup>20</sup>Barichi Jesús namchi, jeye: “Poxonae Nacom waba jiwí petanaexanaenexatsi pijimonaе tatsi pomonaе itorobiya peewatsixae barapomonaе pin bicheitomonaе naenaexanapona. ¿Eta po coyene nacoyene jũpabe? <sup>21</sup>Barapo coyene bara jũta ichi icha levadura matawũn ichi, pocotsiwa cotowa exana poxonaе pan exana. Petsiriwa tres po tsoropabe trigo xu beno muxuna cauyentaba levadura matawũn pocotsiwa xua cotowa exana pan. Bapoxonaе pentũbu naexananaya, cocotowapona tsipei

levadura matawũn muxunaxuba”, jei Jesús.

**Meje yabara poxonae Jesús yabara cuiduba po boupayo tsica boupayo dena**

(Mt 7.13-14, 21-23)

<sup>22</sup>Poxonae Jesús Jerusalén namto beya pona, cuiduba tsiniya Nacom Pejume Diwesi po bon epatotha bobena yawa tomaranthano. <sup>23</sup>Pomonaе Jesús cuiduba barapomonaе caein jiwana Jesús yainyabatsi, jeichichi:

—Patatanecanamataxeinaem, ¿saya tsiquimonaeyo pomonaе capanenebiyatsi? jeichichi Jesús.

Nexata Jesús namchi jiwitha, jeye:

<sup>24</sup>—Bequein bichocono ayapube xua naexana Nacom pijimonaе pomonaе Nacom itorobiya ewata, ichitha bichocono pajũjũre xua panaexaname Nacom pijimonaе tatsi. Baraxua be poxonaе pin bicheitomonaе ichichipa xua pejojondenaewa tsica boupayo dena. Bichocono ayapube. Bequein barapomonaе ichichipaena xua pejojondenaewa tsane ichitha jopa itacũpae tsainchi. <sup>25</sup>Barapoxonaе matabi jopaena po matabitha poxonaе pon bo pexeinaein pecoiboto daunwei exanaena. Paxam pomonaе aisowatha paumename pecoiboto padacadacatsiname, pajam tsane: ‘Patatanecanamataxeinaem, painta coibo saranaxorena bomũxũ’, pajam tsane. Ichitha bapon paca jume notsina. Jei tsane: ‘Bũ canta jopa paca yaitaetsi xua jopa paca yaputaetsi xua ichaxota werena painya neponaewi’, jei tsane. <sup>26</sup>Paxam pajam tsane: ‘Bara cain bayatha paca barũ xainchiba yawa paca barũ apatsiba, yawa bayatha jiwí cuidubameba namtotha pata tomaratha’, pajam tsane. <sup>27</sup>Ichitha Nacom pon painya Nepacacanamataxeinaein paca jume

notsina: ‘Aunxuae bayatha paca baraichiba: Bũ canta jopa paca yaitaetsi. Jopa paca yaputaetsi xua ichaxota werena painya neponaewi’, jan. ‘Taxainya weya panatsixibarũcupare. Aparaxam peajuntũcoyenebe jiwi pam, xua abe painya neexanaewi’, paca jei tsane. <sup>28</sup>Barapoxonae pataename xua Abraham, irũ Isaac, irũ Jacob, irũ daxita Nacom peitorobi jume pepaebiwi xua ena Nacom pia peitorobi nacuatheicha. Ichitha paxam baxoteicha jopa pana naenaem tsane poxoru paca bebai tsane Nacom pia peitorobi nacua weya. Daxota pawecoyam tsane anaya nantanuweya pana nawano tsaquibasinaename poxoru paca bebai tsane Nacom pia peitorobi nacua weya. <sup>29</sup>Poxoru pinmonae patsina, Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Ichamonae pomonae ena pocotsiwa bereca, barapomonaepiwi patsinano. Ichamonae pomonae pocotsiwa beweyabeicha ena, barapomonaepiwi patsinano. <sup>30</sup>Pomonae xua anoxuae pepawi naexana pomonae jiwi jopa petsita ainya cui jiwichi po cae pin nacuathe barapomona Nacom pia peitorobi nacuatheicha peainya cui jiwi tsane. Pomonae xua anoxuae, pomonae jiwi petsita ainya cui jiwichi po cae pin nacuathe, barapomona bexa Nacom pia peitorobi nacuatheicha jopa peainya cui jiwi tsane, jei Jesús.

**Meje yabara poxonae Jesús Jerusalén tomarapiwi siwa wecoyeichi**

(Mt 23.37-39)

<sup>31</sup>Barapoxonae fariseo jiwanaomonae pata. Jesús tsipaebatsi. Jeichichi:

—Bewa warapaetsipame barapo tomara weya. Dota bepa Herodes cabexubei, jei.

<sup>32</sup>Ichitha Jesús jume nota, jeye:

—Paponare painya netsipaebinexa pon jiwi pemuxujainyabin, bapon Herodes. Pana nejume yopire pajande: ‘Taema anoxuae yawa baya tsane itawetsin caurimonae jiwi weya yawa axaibi exanaein peatenewi. Popobaya tsane wetsin’, jei pajande. <sup>33</sup>Ichitha anoxuae yawa baya tsane nantawenonan xua bara beya Jerusalén tomara beya ponaein namtotha. Barapoxonae popobaya patopiyaein Jerusalén tomaratha. Jopa tana neitacupaexae xua tatũpaewa tajũ Jerusalén tomara pepuya beya ponxaein Nacom peitorobi jume tapaebin. Bewa tũpaein Jerusalén tomaratha, jei Jesús fariseomonaetha.

<sup>34</sup>Bapoxonae Jesús yabara unthũthũ wecoyei Jerusalén tomarapiwi. Jesús wecoyeya namchi, jeye: “¡Maisa Jerusalén tomarapiwi pam, pajutebeibame pomonae Nacom pia peitorobi jume pepaebiwi! ¡Matautano paxam pajutebeibame ibotontha pomonae Nacom pacata itoroba! ¡Maisa bepaca caetucuetuteibinchi, tapaca cayawenaewa tsainchi, icha wacara ichi poxonae nacoxi caetucuetuteta pecuarafetha! ¡Maisa bebarichocuaein tsane daichitha jopa paichichipaem!

<sup>35</sup>Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. Paca tsipaebatsi xua equeicha jopa pana netaem tsane, beya abũ poxonae pana neyabara jam tsane: ‘¡Maisa bapon jiwi juntũ coyene weiweina cana exanatsi, pon patopa Nacom peitorobixae, po Nacom jiwi Pecanamataxeinaeinchi!’ pana neyabara jam tsane”, jei Jesús fariseomonaetha.



**Meje yabara poxonae Jesús  
axaibi exana pon peru putsuna**

**14** Caentacabi pentaquei seicae matabitha Jesús pona fariseomonaē pia pentacaponaeui tatsi jiwana pin pia botha tatsi penanabanaenexa. Baxota fariseomonaē ichamonaē Jesús amanayabiya tainchi pecui yaputaenexa tsainchi xua exana. <sup>2</sup>Iru baxota pebin patopa ichaxota Jesús naeca. Barapo pebin pon peru putsuna. <sup>3</sup>Nexata Jesús yainyaba pomonaē jiji pecuidubiwi Moisés pia peitorobi coyene, yainyabano fariseomonaē, jeye: —¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae matabitha jampa? ¿Ichacuitha metha jopa yabara copatsiyo jampa? jei Jesús.

<sup>4</sup>Ichitha barapomonaē moya umena. Bara Jesús jayaba pecobetha pontha pon atene, yawa axaibi exana, tsipaebano xua bara peponaenexa. <sup>5</sup>Jesús tsipaeba, barapo fariseomonaetha, jeye:

—Paxam panantawenoname xua panacuitame pentaquei seicae matabietha xua poxonae pajutsiname painya nexanto xua poxonae butecatsi iruba bueyno bara bequein pentaquei seicae matabi, jei Jesús.

<sup>6</sup>Barapomonaē jopa itacupaetsi xua Jesús pejume notsiwatsi.

**Meje yabara poxonae Jesús yabara  
paeba pomonaē pexaewa  
petsiwabiwichi penabanaenexa  
poxonae pebin piowa pita**

<sup>7</sup>Nexata Jesús tsipaeba barapomonaē pecayabara juta pepaebi diwesiyo pomonaetha pomonaē xua pata penabanaenexa. Baxua tsipaeba poxonae tane xua barapomonaē nanta caeniya, copiya penabanaenexa. Jesús namchi barapomonaetha, jeye:

<sup>8</sup>—Poxonae ichun cawaba jinya nena-banaenexa tsane, jopa nantacaecaeinde ichaxota enothopeiba pomonaē peainya cui jiji. Poxoru metha iruru patopaetsi-pa pon bichocono jiji tsita ainya cuichi pon beyacaincha xam. <sup>9</sup>Pon xua cawaba, iru xua wabatsi pon jiji tsita ainya cui naexanatsi, bapon cabarai tsipae: ‘Incane nontaponde icha muxunenetha ecare. Cotacaya xaema. Ichaxota ecame, baxota ecaena pon jiji tsita ainya cui naexanatsi’, jei tsipae pon xua paca mata canabane. Nexata icha muxunenetha uranaya ecoundecaetsipame. <sup>10</sup>Daxota poxonae cawaba nenabanaenexa, cotacaya ecareinca necajeinexa poxonae patopa pon paca mata canabane: ‘Tajiton, icha muxunenetha ecare ichaxota xaiba pomonaē jiji tsita ainya cui naexanatsi’, jei. Bapoxonae pomonaē pata xua penabanaenexa barapomonaē cayaitaena xua xam pon jiji tsita ainya cui naexaname. <sup>11</sup>Pon pia coutha peainya cui jiton naexana pejuntu coyenetha, Nacom exanaena xua bapon pecui paw jiton naexanaena. Ichitha pon xua pepawi naexana pejuntu coyenetha Nacom exanaena xua bapon peainya cui jiton naexanaena, jei Jesús.

<sup>12</sup>Yawano Jesús barai pontha pon pexaewa petsiwabixaetsi, jeye:

—Poxonae pexaewa tsixaname yawano ichacuitha xua poxonae pin penabanaewa tsixaname, jopa wabinde jinya jiwimonaē penabanaenexa. Iru jopa wabinde eweichomonaē iru jinyamonaē iru pomonaē copei pexeinaewi. Poxoru barapomonaē pentoma exanaetsi-pa xua xuya catsi wabichipa penabanaewa. <sup>13</sup>Jame maisa poxonae jiji pexaewa tsixaname yawano ichacuitha pin penabanaewa tsixaname, wabare pomonaē peacopeibi jiji. Yawa wabare pomonaē jopa peainya cui jiji, iru pejayuyaju jei jiwino, iru pomonaē peitata nacutsi

jiwino. <sup>14</sup>Bapoxonae juntu coyene weiweinaename. Barapomonae jopa itacupaetsi xua xuya necatsi wabiwa penabanaewa xua pentoma nexa. Ichitha Nacom cata exanaena pentoma poxonae jiwi asu exanaeinchi pomonae pejuntu coyene wunaei jiwi, xuano xua exana pocotsiwa Nacom itoroba, jei Jesús.

**Meje yabara poxonae Jesús  
cuiduba pecayabara jata  
pepaebi diwesiyo xua pin  
penabanaewa peexanaewa tsane**

(Mt 22.1-10)

<sup>15</sup>Poxonae baxua jume tane, pomonae xua xayena, barapomonae caein jiwana Jesús baraichichi, jeichichi:

—jPon xua nanabane Nacom pia peitorobi nacuatheicha tatsi, bapon bichocono juntu coyene weiweina! jeichichi Jesús bapon.

<sup>16</sup>Nexata Jesús jume nota, jeye:

—Pebin pin penabanaewa tsiexana jiwi. Barapo pebin itoroba ichun, xua pewabinexa ayei bicheito.

<sup>17</sup>Poxonae barapo hora tsuxubi poxonae pexaewa nacui wunaeta, bapon itoroba pia petanacuichinchi xua pewabinexatsi pomonae bayatha wabatsi. Barapon namchi: ‘Pajande jiwi: Antha pajojondena jei. Pexaewa weta jei, pajande’, jei pon mata canabane.

<sup>18</sup>Ichitha daxita barapomonae paeba xua pinae enatsi xua peexanaewa. Ichun namchi: ‘Bayatha pabi comotan, tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei.

<sup>19</sup>Ichun namchi: ‘Canta diez poyobe comotan buey. Tha canta matha taetsi. Nexata nejume yopire pinae jopa casebinde yaitama pinae jopa patopae tsane, jande’, jei. <sup>20</sup>Ichun namchi: ‘Canta anoxuaetha taseuri pitan. Nexata nejume yopire pinae jopa itacupaetsi

xua pepatopaewa tsane, jande’, jei. <sup>21</sup>Poxonae caibe nawiya pon penajume caitorobinchi bapon daxita baxua tsipaeba pia pecanamataxeinaeinchitha. Nexata pon pecanamataxeinaein caseba pomonaetha pomonae bequein pewabixae, xua jopa pepatsixae. Bapon barai pia petanacuichinchi, jeye: ‘Nainya ponde tomara namtontha, yawa tsiqui namtoxitha tomara cuariya. Berene peacopeibiwi caponde, penabenaewi caponde, pejayujayujeimonae caponde, pomonae peitata nacutsi jiwi berene caponde’, jei pon pecanamataxeinaein. <sup>22</sup>Pon petanacuichin pia pecanamataxeinaeinxaetsi, bapon pia pecanamataxeinaeinxaetsi barai: ‘Tanecanamataxeinaem, xua neitorobame bayatha exanan, ichitha bomuxu jopa tutu canaupaxubiyo, jiwi yayatha’, jei. <sup>23</sup>Nexata bapon jume notatsi pia pecanamataxeinaeinchi: ‘Equeicha nainya ponde tomara cuariya beya po namton pin namtontha, yawa tsiqui namtoxithano tomara cuariya. Baxota jume daunweya itorobare pomonae xua taneme xua pepatsinexa tabotha petutu canaupaxubinexa tsane. <sup>24</sup>Catsipaebatsi, pomonae bequein waban ichitha jopa patsiyo, barapomonae jopa nabanae tsane tabotha’, jei pon pecanamataxeinaein, jei Jesús.

**Meje yabara poxonae Jesús paeba  
xua pinae bewa matha nacui  
barapentsi pia peexanaewan poxonae  
Jesús pepuna jinompaewa tsainchi**

(Mt 10.37-38)

<sup>25</sup>Pin bicheitomonae Jesús puna poinchi. Jesús napatomeicha necota, namchi barapomonaetha, jeye: <sup>26</sup>“Icha pebin ichichipa xua tajiwiwimonae jiwanapin penaexanaewa tsane, bapon bewa yabara naitematsi pia peexanaewa. Bapon jame bewa

neantobe tsane beyacaincha xua paxatha, beyacaincha xua penatha, beyacaincha xua piowatha, beyacaincha xua pia pexuitha, beyacaincha xua peweichowitha, beyacaincha xua pamchoxitha, yawano xua beyacaincha naantobe pia coutha, nexata bapon bara tajiwiwimonaepin. Ichitha icha jopa baxua exanaeyo xua bichocono nama tana neantobewa, bapon jopa tajiwiwimonaeyo. <sup>27</sup>Matautano pon jopa awiya exana ducuaenaebiyayo pocotsiwa itoroban, tsipei jopa beperaxa exanaetsi icha be xua poxonae neichi nexata bapon jopa tajiwiwimonaepinyo. <sup>28</sup>Poxonae pebin imoxoyo bo exana, po bo, pin bo, copiya matha nanta xeina xua bo yabara, copiya coichaxu ununa, icha jura xua pecubaponaenexa pomonae nacuita bo. <sup>29</sup>Ichacuitharu saya naewa wetanota, poxoru coichaxu axu weraweraca. Daxota jopa yaputaeyo xua pewetsiwa. Ichamonae pata, barapomonae bo taenota. Poxonae tane barapomonae cui capona, bapon cui caponatsi. <sup>30</sup>Barapomonae namchi tsane, jei tsane: ‘Barapon tamropata pitaba bo xua acaba, ichitha jopa itacupaetsi xua pewetsiwa’, jei tsane”, jei Jesús. <sup>31</sup>Equeicha Jesús namchi: “Iruru pon jivi itorobiya pia pepa peewatsinchi ichichipa xua jivi naba exana ichun beya pontha pon iru jivi itorobiya pepa peewatsin. Poxonae bapon baxua exana, copiya nanta xeina, najei tsane: ‘Jamaisa, saya beisa diez mil po soldadomonae bicheitobe neyaewatacua, bapon netsi veinte mil po soldadomonae bicheitobe yaewatatsi. Metha tamonae jopa inta itacupaetsi xua peamanayabiwa barapo veinte mil bicheitha xua taxainya berena ponaena’, najei tsane. <sup>32</sup>Icha barapon jopa itacupaetsi xua peamanayabiwa, bapon najume caitorobina ichuntha, poxonae

cataunxuae taju eca, ichun pon icha nacupawi itorobiya pia pepa peewatsinchi xua petapaebinexa tsainchi xua jopa penabiwa tsane yabara, xua equeicha juntema pejinompaenexa. <sup>33</sup>Icha bapon ichi pon jivi itorobiya pia pepa peewatsinchi xua baraxuba xua nanta xeina, xua penabiwa tsane, barichi icha paxam jopa pabarapentsim daxita pocotsiwa paxeiname, jopa paca itacupaeyo xua tajiwiwimonaepinya nenaexanaewam”, jei Jesús.

**Meje yabara poxonae Jesús diwesi yabara paeba xua bequein sare xoya pexaewatha ichitha awiya axaibi**

*(Mt 5.13; Mr 9.50)*

<sup>34</sup>Equeicha Jesús jeye: “Sare beno, bara beno wuna. Ichitha icha barapo sare beno jopa abenataeyo, bapoxonae jopa peitacupaewatsi xua equeicha peabenataewa. <sup>35</sup>Barapo sare jopa ira nexiyo tsipei naein jopa beta xuwa exanaetsi. Daxota barapo sare jivi bewa xubi. Icha pamuxu dubename moya pana nejume naitaeware pocotsiwa tapaca tsipaebiwatsi”, jei Jesús.

**Meje yabara poxonae Jesús paeba pecayabara juta pepaebi diwesiyo xua oveja pe-eenaein yabara xua poxonae pia oveja taeba**

*(Mt 18.10-14)*

**15** Pomonae paratixi pentoma noteibiwi, po paratixi jivi bewa catsibina pon romanomonae itorobiya pia pepa peewatsinchi nexa, iru pomonae abe peexanae cuiru coyene peexaneibiwi daxita barapomonae Jesús imoxoyo caquita umenarucupatsi xua Jesús pejume taenexatsi. <sup>2</sup>Daxota fariseomonae iruru pomonae jivi pecuidubiwi Moisés pia peitorobi coyene tatsi daxita barapomonae Jesús

abe yabara paebatsi. Barapomonaē namchi, jeye:

—Barapo pebin naponā pomonaētha pomonaē abe peexanaē cuiru coyene pe-exanaēwi, yawa barapomonaētha nana-bane, jei.

<sup>3</sup>Tsipei Jesús yabara paebatsi barapomonaē, daxota nexata Jesús tsipaēba pecayabara jūta pepaēbi diwesiyo jeye: <sup>4</sup>“Jiton ba xeina oveja cien poyobe, caēin tanapuxanatsi. Jiton wexotha cuenta pona noventa y nueve poyobe oveja pewenaweneinexa oveja pon beya matapainya taēba. <sup>5</sup>Poxonaē jiton oveja taēba pon aichurucuaē, jūntū coyene weiweinyā bota peutucuratha.

<sup>6</sup>Poxonaē jiton oveja capatopa botha bapoxonaē piamonaē waba pomonaē petaēnaēwichi pia botha, pia jiwi wabano, wabano pomonaē petsicuarabū enaēwichi. Jiton daxita barapomonaētha barai, jeye: ‘Panēbarū jūntū coyene weiweinare tsipei oveja bayatha taēban pon bayatha inta aichurucuaē’, jei bapon piamonaētha.

<sup>7</sup>Xaniyan paca tsipaēbatsi. Icha jiton ichi poxonaē jūntū coyene weiweina petaēbixae oveja, barichi pomonaē peitaboco beicha ena. Bapomonaē bichocono jūntū coyene weiweina poxonaē ichūn Nacom tsita xeinatsi icha jūntū coyene pon copiya penacui matacaetsin xua abe peexanaē cuiru coyene exana. Barapomonaē bapon yabara toxēinchiya jūntū coyene weiweinatsi beyacaincha poxonaē yabara jūntū coyene weiweinatsi pomonaē xua noventa y nueve poyobe jiwi pomonaē xanēpanaya peexanaēwi, pomonaē jopa Nacom pentichi”, jei Jesús.

**Meje yabara poxonaē Jesús paēba pecayabara jūta pepaēbi diwesiyo xua yabūyo yabara xua poxonaē taēba paratiyo**

<sup>8</sup>Equeicha Jesús paēba pecayabara jūta pepaēbi diwesiyo, jeye: “Pēsiriwa diez po paratiyobe xeina xua pecacomocae paratixi. Cae paratiyo taaichurucuaētsi, daxota pecoicha coicha exana. Bo tutu camona bewayo, beya matapainya taēba. <sup>9</sup>Poxonaē barapowa paratiyo taēba bapoxonaē pia jitowaxi waba, wabano powaxi petsicuarabū enaēwaxichi. Barapowa namchi barapowaxitha: ‘Pana nebarū jūntū coyene weiweinare poxorū bayatha taēban paratiyo, po paratiyo bayatha inta aichurucuaē’, jei. <sup>10</sup>Paca tsipaēbatsi barichi peitabocothēicha Nacom pia matatsunpiwimonaē tatsi bichocono jūntū coyene weiweina poxonaē ichūn Nacom tsita xeinatsi icha jūntū coyene pon copiya penacui matacaetsin xua abe peexanaē cuiru coyene peexanaēin”, jei Jesús.

**Meje yabara poxonaē Jesús paēba pecayabara jūta pepaēbi diwesiyo xua pebin yabara pon pexanto cayabara cui jūntemaina xua abe exana**

<sup>11</sup>Barichi equeicha Jesús paēba icha pecayabara jūta pepaēbi diwesiyo, jeye: “Jiton xeina pexantobe. <sup>12</sup>Pon xuyapin paxa barai: ‘Axa, necare xua necopiniwa tsane pocotsiwa xua pana nejūntana jebame bequein cataunxuae poponame’, jei xuyapin. Nexata barapo jumetha coxiyan pexantobe tsata catabe. <sup>13</sup>Pirapaēyo xuyapin piawa caēnaeta xua paxa catatsi. Barapo paratixi cuntha tajū beya pona icha nacua beya. Icha nacuatha abe exana. Barapo paratixi cobe caewitatsi xua nasi cui matacaēta yabuxitha. <sup>14</sup>Poxonaē bapon daxita

paratixi wetaxuba, iruru mayayo tsuxubiru barapo nacuatha, barapon muxu piyain petupae. <sup>15</sup>Nexata bapon jeita penacuichiwa ichuntha xua barapo nacuatha. Bara barapon itorobatsi xua petayapu eenaenexa marranomona. <sup>16</sup>Bapon piyain ichichipa xane marranomona pexunenowa xua pettebocoton, tsipei bapon jopa catichi pexaewa. <sup>17</sup>Nexata bapon pia coutha nanta xeinanaya najei: '¡Maisa taxa pia petanacuichiwichi tatsi pexaewa ajainbe, tonsana nawita! Nama xota ecanje tain muxu tatupae. <sup>18</sup>Tha tacoyo beya nawiyaetsi ichaxota taxa popona. Metha jan tsane: Axa, Nacom tsita abe exanan, yawa catsita abe exanatsino. <sup>19</sup>Daxota equeicha jopa be taxanto, nejam. Nenatsicotaema be jinya necata nacuichiwi jiwanan, jan tsane', najei barapo xuyapin. <sup>20</sup>Nexata bapon paxa beya caibe nawiya.

"Poxonae cataunxuae taju jiniya, paxa taebiyatsi, coxiyan pexanto yabara nantanuweya cui nanta xaina. Coxian pexanto matenta cuinaepoinya. Nexata pexanto cobe jayaba. Juntu coyene weiweinyaya pexanto naisa cateita waetaba peantobexae. <sup>21</sup>Nexata barapo xuyapinxae paxa barai: 'Axa, Nacom abe tsita exanan, yawa abe catsita exanatsino. Daxota equeicha jopa be taxanto nejam. Nenatsicotaema be jinya necata nacuichiwi jiwanan', jei barapo xuyapin. <sup>22</sup>Ichitha coxiyan barapo jumetha barai pia petanacuichiwichi: 'Nainya papire pexeinya paparuwa pamaxatare taxanto. Yawa anillo pacobesi xatare. Yawa pataxu xatare xua penataxu xatatsiwa. <sup>23</sup>Vacayo pebtiyo poyo nasiteca pacare-nande. Pabexore. ¡Bu xainchi! <sup>24</sup>Poxoru barapo taxanto mexeya nacata tupawejan, ichitha anoxuae asu. Bayatha nacata aichawiya, anoxuae matapainya netsita patopa', jei coxiyan. Nexata bapoxonae

tamropata notarucupa xua weiweina poxonae xane", jei Jesús.

<sup>25</sup>Equeicha Jesús namchi, jeye: "Iruru pin penabanaewa exanoma, iruru matapin pabitha popona. Poxonae bo benawirena busi taeba xua busi tanbaba yawa jume tane xua juinya nawiraba. <sup>26</sup>Nexata barapon pon matapinxae waba caein pomona penacuichiwi. Yainyaba, jeye: '¿Eta xua juinya busi exanoma?' jei. <sup>27</sup>Nexata barapon pon penacuichiwi jiwana jume nota. Jeye: 'Apara poxoru neyapin patopa. Axa pana itoroba bepa pinae pabexubin vaca pebtiyo poyo nasiteca, poxoru pinae neyapin xanepanaya asuya pepatopaexae', jei. <sup>28</sup>Ichitha barapon pon matapinxae barapo jumetha anaepana. Jopa bejoniyaeyo botha. Coxian pesato bejoniya, pexanto jume daunweya waba: 'Owae, antha, antha jonarena', jei coxiyan. <sup>29</sup>Nexata barapo coxiyan pexanto jume notatsi: 'Bara xam caena bayatha yaputaneme xua ainya wei cata nacuitatsi yawa jopa cajumefebichi. Ichitha bapana jopa necatsim peweinyo cabritiyo, tajiwimonae tabaru nabanaenexa. <sup>30</sup>Ichitha barapo nexanto anoxuae cata patopa, xua jinya paratixi caewitaxuba xua penasi cui matacaetsiwa yabuxitha. Xam penacuichiwi itorobame xua vacayo pebtiyo bexubina poyo nasiteca tayapin nexa', jei barapon pon matapinxae.

<sup>31</sup>"Nexata coxiyan jume nota pexanto: 'Owae, apara xam cabaru poponeibatsi. Daxita pocotsiwan xeinan, apara bara jinyawa. <sup>32</sup>Ichitha anoxuae wuna nawita xua pin penabanaewa, yawa juntu coyene weiweinaeinchi poxoru barapo neyapin, pon xua mexeya nacata tupawejan, anoxuae asu popona. Caena bayatha nacata aichurucuae, yawa anoxuae matapainya naca tsita patopa', jei

coxiyan poxonae pexanto tsipaeba”, jei Jesús.

**Meje yabara poxonae Jesús paeba  
pecayabara j̄ta pepaebi diwesiyo  
xua pebin yabara pon jopa  
xanepanaya peyapucaeaein bo**

**16** Equeicha Jesús tsipaeba pijimonae pecayabara j̄ta pepaebi diwesiyo. Jesús jeye: “Matha ir̄u pebin popona pon copei pexeinaein. Bapon xeina pon bo petayapucaeaeinchi. Bapon pon copei pexeinaein tsipaebatsi ichamonae xua pinae pon bo petayapucaeaeinxatsi jopa pinae xapain exanaeyo, saya pinae abe exana, jei ichamonae. <sup>2</sup>Nexata bo pexeinaein pon copei pexeinaeinxae, bapon waba pia petayapucaeaeinchi bo. Bapon barai pontha pon bo petayapucaeaeinchi, jeye: ‘¿Jame ichamonae jume tan xua pinae inta abe exaname xua tawan? Incane tha taetsi xua po paperantha tinadubame pocotsiwa inta caenaetame, xuano xua inta comocame. Tsipei jopa becaexanaetsi equeicha xua inta yapucaeame daxita tawan’, jei. <sup>3</sup>Nexata pon bo peyapucaeaeinxae nacui yabara nanta xeina pia coutha, nabarai: ‘¿Eta pocotsiwa exanocuaein anoxuae tsipei nama pon tanecanamataxeinaein imoxoyo necopata xua bapoxonae jopa taxeinaewa tsane pocotsiwa taexanaewa? Jopa nebusi coxonaeyo xua naein tauncatsiwa pabitha. Auran tsipae xua saya amanaya i taw̄queibiwa paratixi. <sup>4</sup>Jaina, bara yaputan xua po coyeneya exanaein poxonae tanecanamataxeinaein necopatsina, xua poxonae jopa xeinaein tsane tanacuichiwa xua ichamonae tanententa wabeibinexa pia botha’, jei. <sup>5</sup>Nexata bapon pon bo petayapucaeaein daxita tamropatsiya wawabapona

pomonae pia pecanamataxeinaeinchi petantoma amanayabixaetsi. Bapon matha yainyaba pontha pon copiya patopa jeye: ‘¿Eta xoyobe matoma amanayabame xua jopa cataunxuae catsim pontha pon tanecanamataxeinaein?’ jei. <sup>6</sup>Bapon jume nota, pon bo peyapucaeaein, jume notatsi, jeye: ‘Cien po penasi mera bosibube xua pin bosixibun tha baxua catichi, ichitha cataunxuae jopa baxota matomatsinyo barapo penasi mera bosibun’, jei. Pon bo petayapucaeaein xuya jume nota: ‘Taema xote xeinanje jinya papera xua tinadutame, cien po nasi bosixibun, jam, xua bexa matomatsiname. Xote nainya ecoundeinque barapo netinadutsiwa, iquinaxore. Icha itaneto dure xua saya cincuenta po penasi mera bosixibube, jande’, jei pon bo petayapucaeaein. <sup>7</sup>Bapoxonae equeicha ichuntha yainyaba: ‘Incane ir̄u xamdu, ¿eta xoyobe tanecanamataxeinaein taacoibichi xua catsiname bapon?’ jei. Bapon jume nota, pon bo petayapucaeaein jume notatsi, jeye: ‘Tha catichi cien po sacube aro sacun’, jei bapon. Nexata pon bo petayapucaeaein xuya jume nota: ‘Taema xote xeinanje jinya papera xua bayatha tinadutame xua cien po sacube, jam, xua bexa matomatsiname pontha pon tanecanamataxeinaeintha. Xote nainya ecoundeinque barapo itaneto tsitsinaxore, icha pena netinadutsiwa tinadure xua saya ochenta po sacube, jande’, jei pon bo petayapucaeaein. <sup>8</sup>Ichitha bo pexeinaein yabara paeba pon bo petayapucaeaeinchi xua pinae bequein bara bapon abe taexana ichitha yaputane xua pocotsiwa pia coutha nayawena xua poxonae pia jiwimonae peexanaewa. Daxota paca tsipaebatsi pomonae anoxuae jinompa barapo cae pin nacuathe, pomonae jopa penejume cowuntsiwi nama barichi.

Barapomonae yabara najuntũ coyene wũnaeta xua po coyene cae jiwimonae penaexanaewa xua daxota cae jiwimonae nantiya penayaweneibinexa. Baxua barapomonae exana beyacaincha pomonae Nacom pejume cowantsiwi.

<sup>9</sup>“Paca tsipaebatsi ichamonae pacatsibeibare paratixi xua painya jiwi painya neexaneibinexa po paratixi xeina pomonae barapo cae pin nacuathepiwi pomonae abe peexanaewi. Bapoxonae poxonae jopa paxeinaem tsane paratixi pomonae bayatha payawenname barapomonae paca matenta weiweinaya wabina po bontha xua ataya tsitecaeya pajinompaname.

<sup>10</sup>“Pon xua xanepanaya yapucaeca xua poxonae peya penacuichiwiyo, barichi beta yapucaeca xua poxonae pin penacuichiwa. Pon naerabiya exana poxonae peya penacuichiwiyo, barichi naerabiya exanaena xua poxonae pin penacuichiwa. <sup>11</sup>Icha paxam jopa xanepanaya patayapuenam xua paratixi xua barapo cae pin nacuathe nexa, Nacom jopa paca itorobiyo xua patayapuenaname xua bapon pia pexeinya pexeinaewa tatsi. <sup>12</sup>Icha jopa xanepanaya payapucaecaem ichũn piawa, metha nexata jopa paca catsipae xua painyawa nexa tsane painya neyapucaenaewamxae.

<sup>13</sup>“Jiton dapon aibi pon xeina ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonae itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaya taexana. Icha pia pecanamataxeinaeinchi abeya taexana.

Barichi jiton pon bichocono antobe Nacom, jopa itacupaetsi xua bichocono peantobewa paratixi poxonae yawa bichocono antobetsi Nacom”, jei Jesús.

<sup>14</sup>Ichitha fariseomonae pomonae xua bichocono antobe nawita paratixi, barapomonae baraxua Jesús jume tayenatsi, yawa Jesús cui caponatsi. <sup>15</sup>Nexata Jesús fariseomonae baraichi, jeye: “Paxam barapomonae pam, xua ichamonae paca yabara nanta xeina xua pejuntũ coyene xanepanae jiwi pam. Ichitha Nacom paca juntũ coyene yaputane xua peajuntũcoyenebe jiwi pam. Xua pocotsiwan jiwi bichocono tsita ainya cuichi, baxuan Nacom bichocono tsita abetsi”, jei Jesús.

**Meje yabara poxonae Jesús diwesi yabara paeba Moisés pia peitorobi coyene tatsi, yawa po coyene Nacom waba jiwi petanaexanaenexatsi pijimonae pomonae itorobiya pecanamataxeinaexae**

<sup>16</sup>Equেicha Jesús namchi, jeye: “Caena bayatha jiwi xeina Moisés pia peitorobi coyenewa tatsi, yawano xua pomonae Nacom peitorobi jume pepaebiwĩ pia pecuidubiwa tatsi, beya Juan patopa. Barapoxonae caena poxonae Juan popona pon jiwi Pebautisabin, jiwi paebinouta po coyene Nacom xua waba jiwi petanaexanaenexatsi pijimonae tatsi pomonae itorobiya peewatsixae. Jiwi bewa yabara najuntũ coyene subi awiya xua pepatsinexa Nacom pia peitorobi nacua beicha tatsi.

<sup>17</sup>“Yapu xanepana xua itaboco yawa ira peweraweracaewa. Nama Nacom peitorobi jume ajumeyapusũ bapana jopa peweraweracaewa bequein bara cae peitorobi coyene”, jei Jesús.

**Meje yabara poxonae Jesús  
cuiduba xua jiwi piseurixi  
pepuna penteibiyainwa**

(Mt 19.1-12; Mr 10.1-12)

<sup>18</sup>Equeicha Jesús namchi, jeye: “Pon punaxuba piowa yawa ichowa pichapa, bapon abe exana piseuritha yawa Nacom peitutha tatsi, tsipei Nacom tsitatsi xua powa copiya baru popona apara bara piowa tatsi. Barichi pon pita petsiriwa powa pepunaxubixae piseuri, bapon barichi pia coutha abe natsiexana, tsipei Nacom ichowa yabara nanta xeina xua bapowa cataunxuae pia pebin xeina bequein bara punaxuba”, jei Jesús.

**Meje yabara poxonae Jesús diwesi  
yabara paeba xua pon copei  
pexeinaein iru ichun pon Lázaro**

<sup>19</sup>Equeicha Jesús tsipaeba icha diwesi, jeye: “Matha iruru barichi pebin pon copei pexeinaein. Pexeinya paparuwan xua pena paparuwa nama xatabapona. Matauta daxita matababi peitupanae nabanaewa exaneiba. <sup>20</sup>Iruru ichun pebin popona, pon pewun Lázaro pon peacopeibin. Bapon Lázaro wan nawita xeina peparutotha. Bapon iratha eca pon copei pexeinaein pia bo bopatha weya tatsi. <sup>21</sup>Xua pon copei pexeinaein pia pexaethopaewatha taothopeicatsi pexaewa pepuruwan, baraxua Lázaro ichichipa xaiba. Yawa aurimonae pata xua Lázaro pewan daebinxatsi. <sup>22</sup>Icha matababitha Lázaro tupa. Matatsunpiwi Lázaro jumope pitatsi. Jumope capoinchi ichaxota Abraham popona athabeicha. Iruru pon copei pexeinaein tupa, yawa muthutha xotsi.

<sup>23</sup>“Pon copei pexeinaein patopa ichaxota pateiba pomonae pewerapeibiwi barapo petupae cuiru coyene nacuatha. Bapon bichocono atene. Bapon athabeicha necoicha. Bapoxonae

Abraham taju taebiyatsi asiyeicha, yawa xua Lázaro baru equiyatsi. <sup>24</sup>Pon copei pexeinaein wawai: “Tamo susato jiwanam, Abraham, necui yabara nanta xeinare. Inta Lázaro itorobinca taneebato memeyatsinexa meratha poxoru bichocono netaxua po isotothe uncuan’, jei. <sup>25</sup>Ichitha Abraham jume nota: “Tamonae susato jiwanam, nanta xeinatabare xua caena bayatha poxonae cataunxuae asu poponame, xeiname xua acabem xua pocotsiwan ichichipame xua nexainaewa. Xanepanaya poponame. Ichitha nama Lázaro jopa daichiyo poxonae cataunxuae asu popona. Jopa xanepanaya poponaeyo. Xote bapon wuna yabara nantanuweya cananta xeinatsi xua peyawenaenexatsi. Ichitha nama xam jopa caraichiyo. Bichocono caperu weyawa. <sup>26</sup>Yawa pin pitapatororo naca yacaincha ducua. Daxota pomonae ichichipa bara bedunareca taxainya wereca jopa itacupaetsi xua bara beparecaena nexainya bereca. Iru pomonae nexainya weruneina jopa itacupaetsi xua taxainya betsina pepatsinaenexa’, jei.

<sup>27</sup>“Nexata pon copei pexeinaein jume nota: ‘Nexata tamo susatopim cawucatsi inta Lázaro itorobare taxa pia bo beya. <sup>28</sup>Baxota xeinan cinco poyobe tayapin jiwi. Abraham Lázarotha najume carure xua bu tayapin jiwi jopa pepatsinexaru tsane ichaxota uncuan xua bichocono atenein’, jei. <sup>29</sup>Ichitha Abraham jume nota: ‘Apara neyapin jiwi xeina Moisés pia peitorobi coyene tatsi, yawa Nacom peitorobi jume pepaebiwi pia penacuidubiwan tatsi. Bu barapomonae exana pocotsiwa baraxua pejume coya’, jei Abraham. <sup>30</sup>Pon copei pexeinaein jume nota: ‘Aa, tamo susato jitom, Abraham, ichitha icha petupaewi jiwana caein siwa ponaena barapomonae beya, barapomonae jume cowuntsina yawa icha juntu coyene pexeinaenexa tsane



Nacomtha', jei. <sup>31</sup> Ichitha Abraham jume nota: 'Icha barapomonaе jopa exanaeyo xua peexanaewa pocotsiwa Moisés pia peitorobi coyene tatsi itoroba, xuano xua Nacom peitorobi jume pepaеbiwi pia pecuidubiwan tatsi, barapomonaе jopa jume cowuntsipae bara bequein Nacom taitorobichipa xua jiwana caein pomonaе petupaewi', jei Abraham", jei Jesús.

**Meje yabara poxonaе Jesús paeba xua jiton jopa bewa cana exanae ichuntha xua iru abe peexanaewa tsane**

(Mt 18.6-7, 21-22; Mr 9.42)

**17** Jesús namchi pijimonaetha, jeye: "Barapo nacuathepiwi ataya xeineiba po jiwi pecana exanaexaetsi xua ichamonaе cana exana xua barapo jiwi abe peexanae cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon cana exana, xua ichun cana exanatsi, xua ichun abe peexanaewa tsane. <sup>2</sup>Metha jame wunaе tsipae xua barapo pebin pin iboto wisi cutsipatsi pin mar mentha barapo iboto cayawa cabutabachipatsino. Tsipei jopa wunaе tsipae xua bapon cana exana xua ichamonaе abe peexanae xuiru coyene exana pomonaе cataunxuae aena nejume cowanta. <sup>3</sup>¡Dota pam, xua jopa bara paichim tsane!

"Icha ichun pon iru pejume cowantsindu, icha bapon pacata abe exana, bapon baxua yabara patsipaebare. Icha icha juntu coyene paca tsita xeinaena peauraxae xua pacata exana, bapoxonaе pacui yabara juntemainare pocotsiwa bapon pacata exana. <sup>4</sup>Bequein bara bapon abe pacata exana, siete po cuiyobe xua cae matabitha, yawa paca tsipaeba siete po jumeyobe, bapon jeye: 'Maisa auran tsocuae xua abe pacata exanatsi, equeicha jopa pacata abe exanae

tsainchi', jei pon abe exana. Daxota paca jeichi xua nantawenona peyabara juntemainaewa baxua xua po coyene bapon pacata abe exana", jei Jesús.

**Meje yabara poxonaе Jesús yabara paeba xua pin pejume cowantsi coyenewa**

<sup>5</sup> Jesús pon Pecanamataxeinaein jiwi, equeicha pia peitorobiwi baraichi, jeye:

—Pana cana exande xua bichocono pata jume cowuntsiwa beyacaincha xua anoxuae, jei barapomonaе.

<sup>6</sup> Nexata Jesús pia peitorobiwi jume nota, jeye:

—Icha paxeinaetsipame xua be peya pejume cowantsi coyenewiyo xua bequein icha mostaza xutiyo juta ichi xua tsica xutiyo ichitha bara paca itacupa xua naewatha painya nejeiwa: 'Ee, naewa jinya coutha natabu jonde yawa pin mar mene beya equeicha uncuare', painya nejeiwa. Bapoxonaе barapo nae jopa bayatha tsipae poxonaе pajam tsipae baxua, jei Jesús.

**Meje yabara poxonaе Jesús paeba xua pocotsiwa jiwi bewa exanae pocotsiwa pentacaponaein itoroba**

<sup>7</sup> Equeicha Jesús namchi, jeye: "Metha ba paxam jiwana caein xeina pia petanacuichinchi pon penacuichin bapon ira cacobauya, matauta vaca yapu capopona. Bapoxonaе bapon pon penacuichin wexua wenawirena, bo benawirena. Pon paxam jiwana caein metha bapon jopa jei tsipae: 'Anetha, jondena matha xaema', jopa jei tsipae bapon. <sup>8</sup> Jame bapon jei tsipae: 'Pexaewa netsiupain exanare. Inta carena tsaibinde pexaewa pexaethopaewatha poxonaе xunaecan. Bapoxonaе cotacaya bexa nabanare', jei tsipae pon paxam jiwana. <sup>9</sup> Pon penacuichin jopa jei tsipaetsi: 'Jaco xua taneyawenaewam', jopa jei tsipae pon

paxam jiwana. Tsipei saya taexanatsi xua bapon peitorobixae. <sup>10</sup>Icha pon petanacuichin ichi xua taexana peitorobixaetsi pia pentacaponaein, paxam bara juta paichinde. Poxonae pawetame pocotsiwa Nacom paca itoroba, pajande: 'Paxan pata nebusi cui tataewimonae pan xuano pata pecui pawi pan, tsipei saya paexanan xua pocotsiwa bewa paexanaein', pajande", jei Jesús.

**Meje yabara poxonae Jesús axaibi exana diez poyobe pebiwi, pomonae peperu sawichimonae**

<sup>11</sup>Poxonae Jesús cataunxuae ecapona Jerusalén tomara beya nexa, Samaria nacua iya pona yawa Galilea nacua iya pona. <sup>12</sup>Poxonae Jesús tsica tomariyotha patopa, diez poyobe pebiwi pata Jesús pia xantha tatsi. Barapo diez poyobe peperu sawichimonae, ichitha barapomonae Jesús tajū wetaeumendenatsi. <sup>13</sup>Barapomonae wawai, jeye:

—Jesús, pon Patatanecuidubim, pana neyabara najuntu coyene xeinare jinya pata tana neyawenaenexam, jei barapo peperu sawichimonae.

<sup>14</sup>Poxonae Jesús tane barapomonae, Jesús barai, jeye:

—Paponare sacerdotemonaetha painya nepaca cataenexa, jei Jesús.

Poxonae cataunxuae namtotha enapona, bapoxonae barapomonae peru jume tsurucupae xua peperu sawiwatsi barapomonae. <sup>15</sup>Barapo diez poyobe jiwana caein, poxonae bapon taeba xua axaibi tsurucupae, bapoxonae Jesús beya pona, xua caibeya pona, yawa jume daunweya Nacom wunae jaintatsi. <sup>16</sup>Barapon pentabocototha uncuwa Jesús peitabaratha tatsi. Yawa irabe taeuncuareca xua Jesús pejacobinexatsi. Barapo pebin apara pon seicaya

Samaria nacuapin. <sup>17</sup>Nexata Jesús namchi, jeye:

—¿Diez poyobe itara axaibi exanan? ¿Incane dapo nueve poyobe jane?

<sup>18</sup>Bapon apara penanapaincha jinompaewi jiwapanin. Yawa cou compa caiberena pia wunae jainchichi Nacom, jei Jesús.

<sup>19</sup>Nexata Jesús equeicha pebin baraichi, jeye:

—Nontaponde pondeno, bayatha axaibim tana neyabara jume cowuntsix-aemxae xua bara tana neitacupaewa xua axaibi tacaexanaewatsi, jei Jesús.

**Meje yabara poxonae Jesús yabara paeba po coyene xua poxonae Nacom itorobiya ewatsina jiwi**

(Mt 24.23-28, 36-41)

<sup>20</sup>Fariseomonae Jesús yainyabatsi namchi, jeye:

—¿Eta poxonae Nacom itorobina pon peitapetsinxae pata tanecapanenebiwa exanaenexa, xuano xua itorobiya pata taneewatsiwa? jeichichi barapomonae Jesús.

Jesús jume nota, jeye:

—Poxonae Nacom itorobiya ewatsina jiwi, barapo coyene jiwi jopa itacupaetsi xua petaewa baxua. <sup>21</sup>Daxota jiwi jopa jei tsane: 'Baraxote bayatha patope', jopa jei tsane. Matautano jopa jei tsane 'Xoteiche bayatha patope', jopa jei tsane. Tsipei apara po coyene xua Nacom itorobiya ewatsina jiwi barapo coyene patopa jiwitha. Daxota Nacom juntu coyene itorobiya ewatsina jiwi pomonae pejume cowuntsiwixaetsi Nacom, jei Jesús.

<sup>22</sup>Nexata Jesús barai pijimonae, jeye:

—Matacabin othopaena po matacabintha poxonae paichichipame xua painya tana netaewam xua ponxaein Nacom Tananeitapetsin xuano xua muxuna bepataebenaename caentacabi xua barapo matacabin jiwana. Dapo jumetha jopa painya

nepaca itacupaewa tsane xua painya tana netaewam tsane xuano xua caentacabi xua barapo matacabin jiwana. <sup>23</sup>Ichamonaе paca jei tsane: ‘Baraxote bayatha patopa bapon’, paca jei tsane. Ichacuitha paca jei tsane: ‘Baraxoteicha bayatha patopa bapon’, paca jei tsane, ichitha jopa paponaeinde bara beya yawa jopa pajume cowuntsinde. <sup>24</sup>Icha yamuxu ichi xua jemeicha yacoicha uncueica, xua coicha nayotaxuba itabocototha, barichi tsane po matcabitha poxonaе patopeicaein ponxaein Nacom Tananeitapetsin. <sup>25</sup>Ichitha copiya nantawenona xua neperaxa jubina ichamonaе. Yawa neitawetsinano pomonaе xua anoxuae jinompa. <sup>26</sup>Icha matha ichi poxonaе Noé caena bayatha popona jiji jopa tsaqueinaeyo xua Nacom pin awubo exanaena methaunxuae. Saya barompaya icha juntu cuitha jinompa daxota jiji werapa. Barichi juta ichi tsane poxonaе patopeicaein barapo cae pin nacuathe xua ponxaein Nacom Tananeitapetsin. Poxonaе patopeicaein jiji jopa tsaqueinae tsane xua Nacom werapa exanaena barapo jiji pomonaе jopa pejume cowuntsiyoxaetsi. <sup>27</sup>Pomonaе jinompa poxonaе Noé popona, barapomonaе junteма nabaneiba, yawa apeiba, yawa apeiba yawa jiwitha jijinapona yawa pexantixi jitha dodoubapona, beya yantacabi othopa poxonaе po matcabitha Noé pin jera naetha joniya. Bapoxonaе pin ema mu jopa. Daxita Noé wepu bunothopatsi pomonaе jinompa poxonaе Noé popona. <sup>28</sup>Barichiru jiji pocotsiwa ichamonaе exana poxonaе ichun pebin popona pon pewun Lot. Barapomonaе nabaneiba, yawa apeiba, yawa comaqueiba, yawa caenaeteiba, yawa pexaewa ubeiba, yawa bomuxun acabeiba. <sup>29</sup>Poxonaе bapon Lot Sodoma

tomara wenaetabiya, barapoxonaе iso itere mu, mu othopeica tomaratha, yawa pocotsiwa be ibo puru baxua itaboco weothopeicano xua bichocono atou. Daxita Sodoma tomarapiwi werapa. <sup>30</sup>Icha Sodoma tomaratha ichi xua jemeicha iso itere mu, mu othopeica yawa xua jemeicha ibo puru itaboco weothopeica, bara juta ichin tsane jemeicha patopeicaein ponxaein Nacom Tananeitapetsin poxonaе jiji tsita naitutsin.

<sup>31</sup>“Barapo matcabitha icha ichun bo matatupatha uncuа, barapon jopa bewa botha joniyaе tsane xua penotsiwa tsane pocotsiwa tabobeinchi bomuxu tututha. Iru pon pabitha popona jopa bewa caibeya ponae tsane botha, saya jame nainya benaetsiricuaena. <sup>32</sup>Pacui yabara nanta xeinare Lot piseuri tatsi xua tupa poxonaе jopa nainya naetsiricuaeyo piawan caibe pesiwa necoy-aexae. <sup>33</sup>Pon naantobeya nata exana pocotsiwa bapon ichichipa, bapon jopa xeinaeyo peajuntuyapusuwa po peajuntuyapusuwa ataya tsiteca xua Nacom pia nacula beicha. Ichitha pon neantobeya inta exana pocotsiwa ichichipan bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacula beicha.

<sup>34</sup>“Paca tsipaebatsi po mataqueitha patopaеin, ainya pebinbe ponbe xua nanta jupaya maitecabe, caein matatsunpin pichina, pon pejume cowuntsixae Nacom. Ichun saya cuenta ponaeinchi jopa pejume cowuntsiyoxae Nacom. <sup>35</sup>Iru а аinya yabuyobe nacuara yacatoyorobauyaenabe, ichowa matatsunpin pichina pejume cowuntsixae Nacom. Ichowa saya cuenta ponaeinchi jopa pejume cowuntsixae Nacom. <sup>36</sup>Iru а аinya pebinbe nacuara nacuitauyaenabe pabitha, ichun matatsunpin pichina, ichun saya cuenta ponaeinchi”, jei Jesús.

<sup>37</sup>Poxonae baxua Jesús pijimonae jume tainchi, Jesús yainyabatsi jeichichi, jeye:

—Pata Tanecanamataxeinaem, ¿exota metha baxua exanaena? jeichichi pijimonae.

Jesús pijimonae jume nota pecayabara juta pepaebi diwesiyotha, jeye:

—Quequeremonae ba nacaetuta ichaxota baurin boca. Bara juta paichim tsane paxam pomonae tana nejume cowantsi jiwi pam pana newnae ewatsiname po mataqueitha patopeicaein, barapo mataqueitha panacaetutsiname, jei Jesús.

**Meje yabara poxonae Jesús paeba pecayabara juta pepaebi diwesiyo xua yabuyo yabara powa pecuenta tupaewayotsi piseuri xua iru pon jiwi peyabara paebin xua penatsicuentisiwa xua abe peexanaexae**

**18** Jesús pijimonae tsipaeba pecayabara juta pepaebi diwesiyo xua pecuidubinexa, jeye: “Paxam daxita matabi bewa pawqueibim Nacom. Painya xoba paajuntucoyenaetabim tsaibim poxonae pawqueibame”, jei Jesús. <sup>2</sup>Equeicha Jesús pijimonae barai, jeye: “Matha iruru tomaratha popona pon jiwi peyabara paebin xua penatsicuentisiwa xua abe peexanaexae. Bapon jopa Nacom cunuwichi. Yawa bapon jopa beta yabara nanta xeinaeyo jiwitha xua peyawenaenexa. <sup>3</sup>Barapo tomaratha iruru popona petsiriwa, powa pecuenta tupaewayotsi piseuri. Barapowa siwa poneiba pontha pon jiwi peyabara paebin xua penatsicuentisiwa xua abe peexanaexae. Barapowa jei tsaibi bapontha: ‘Neyawende, ichun inta abe exana’, jei tsaibi. <sup>4</sup>Pon jiwi peyabara paebin xua penatsicuentisiwa

xua abe peexanaexae bapon ainya matabin juntucuru jopa beexaneibiyo pocotsiwa barapowa wuqueiba. Ichitha bapon matapainya nanta xeina. Najei: ‘Xan apara jopa Nacom cunuwinyo. Matauta jopa beta tayabara nanta xeineibin jiwi xua tayawenaenexa. <sup>5</sup>Ichitha barapo pecuenta tupaewayotsi piseuri matowa nefayacota daxota neamuxufaetabi exana. Metha moya barapowa yawenaen, xua equeicha barapowa jopa penesiwa ponaenexa, tsipei bichocono amuxufaetabin’, najei pon jiwi peyabara paebin xua penatsicuentisiwa xua abe peexanaexae”, jei Jesús.

<sup>6</sup>Jesús pon Pecanamataxeinaein jiwi equeicha namchi, jeye: “Baxua apara pocotsiwa paeba pon jiwi peyabara paebin xua penatsicuentisiwa xua abe peexanaexae xuano pon jopa beta yabara nanta xeinaeyo jiwitha xua peyawenaenexa. Pajume naitaeware pocotsiwa bapon paeba. <sup>7</sup>¿Eta xua metha pananta xeiname? ¿Metha bara Nacom came bayatha tsaibi poxonae jiwi yaweneibatsi pomonae xua pewuqueibixaetsi? ¡Jume, apara! Nacom nainya jiwi yaweneiba poxonae barapo jiwi abe exaneibatsi ichamonae, beyacaincha xua barapowa yawenatsi. Jame yatsicaewa Nacom yaweneiba pomonaetha pomonae peitapetsixae pewuqueibixaetsi merawitha yawa mataqueithano. <sup>8</sup>Paca tsipaebatsi xua Nacom jopa bayatha tsaibiyo xua peyaweneibinexa pomonae nejume cowanta. Xan ponxaein Nacom Tananeitapetsin poxonae patopeicaein, ¿metha bara pin bicheito taeyopeicaein jampa, pomonae xua xanepanaya beta tana nejume cowantsiya jinompaewi pomonae Nacom pewuqueibiwichi?” jei Jesús pijimonaetha.

**Meje yabara poxonae Jesús paeba pecayabara jũta pepaebi diwesiyo yabara xua fariseomonaer irũ pon paratixi matoma penoteibin**

<sup>9</sup> Jesús icha pecayabara jũta pepaebi diwesiyo tsipaeba pomonaetha pomonaer jiwĩ peabiwi pomonaer xua nayabara nanta xeina xua pinaer beta jume cowũta xua pinaer ichamonaer jopa daichiyõ. <sup>10</sup> Jesús namchi, jeye: “Iũũũ ainya pebinbe Nacom pin pia bo beya ponabe, xua baxotiya pewũcaenexabe Nacom. Ichũũ fariseomonaerpin, ichũũ bapon jiwana pomonaer paratixi pentoma noteibiwi po paratixi jiwĩ bewa catsibina pon romanomonaer itorobiya pia pepa peewatsinchi nexa. <sup>11</sup> Fariseomonaerpin nantacotuncua yawa penthũtotha wũca Nacomtha. Poxonaer tsipaeba Nacom, jeye: ‘Nacom meisa xam nejũũũ coyene xanepanaer. Jũũũ coyene weiweinan xua tana neyawenaewam tsipei xan jopa be ichamonaerinyõ pomonaer xua jiwĩ peabiwi, yawa xua peabewi, xuano xua penasi cui matacaetsiwi yabũxitha. Mataũtano xan jopa dapomonaer jiwanyõ pomonaer xua paratixi pentoma noteibiwi po paratixi jiwĩ bewa catsibina pon romanomonaer itorobiya pia pepa peewatsinchi nexa. <sup>12</sup> Xan cayabara nainbotatsi ainya cuiyobe xua cae semanatha, beta tacawũqueibinexatsi. Mataũtano cae paratixi jiwana wetsabeiban xam nexa poxonaer diez po paratiximonaerbe xeineiban. Yawano daxita xua xeinan baxuano jiwana tsaban xam nexa’, jei fariseomonaerpin. <sup>13</sup> Ichitha pon paratixi pentoma noteibin auranaya tajũ beuncuiya. Saya irabe necoreca yawa jopa athabe necoichaeyõ. Saya Ʃ penantanuweya penanthũthũ jayabi abe peexanaerinxae. Bapon Nacom wũca, jeye: ‘Jaibo, Nacom neyabara

najũũũ coyene cui xeinare xua tana neyawenaewam tsane bequein bara taajũũũcoyeneypubein’, jei pon paratixi matoma penoteibin. <sup>14</sup> Barapon pon paratixi penoteibin poxonaer najume weta xua wũca Nacom, nawiya pia bo beya. Paca tsipaebatsi xua barapon Nacom tsitatsi xua jopa xeinaeyõ xua penatsicuentisiwa xua abe peexanaerxae. Ichitha fariseomonaerpin jopa daichichi tsipei bapon awiya peajũũũcoyenebein. Pon xua pia coutha peainya cui jiton naexana pejũũũ coyenetha, Nacom exanaena xua bapon pecui pawĩ jiton naexanaena. Ichitha pon xua pepawi naexana pejũũũ coyenetha, Nacom exanaena xua bapon peainya cui jiton naexanaena”, jei Jesús.

**Meje yabara poxonaer Jesús jeye pexuiha: “Barabũ Nacom beta paca yawenaena”, jei (Mt 19.13-15; Mr 10.13-16)**

<sup>15</sup> Nexata jiwĩ Jesús tacaponatsi pexui, xua Jesús pejayabinexa pecobetha yawa xua Nacomtha petawũcaenexa barapo pexui xua pejeinexa: “Barabũ Nacom beta paca yawenaena”, pejeinexa. Ichitha Jesús pijimonaer tatsi poxonaer baxua tane, tamropata notarũcũpa xua barapomonaer cui matawentatsi pomonaer pexui carendena tsaibi. <sup>16</sup> Ichitha Jesús waba pexui. Jesús pijimonaer barai:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonaer nexa pomonaer pejũũũ coyene xanepanaerwi icha pexui ichi. Pexui pia cui xua tayapu xanepanatsi xua pia jũũũ coyeneintha jume cowũta Nacom. <sup>17</sup> Xaniyan paca tsipaebatsi. Pon jopa yabara jume cowũntsiyo xua icha be jopa pexui ichiyõ xua ba pexui tayapu xanepanatsi

xua jume cowunta, bapon bapana jopa naexanae tsane Nacom pijimonaе tatsi pomonaе Nacom itorobiya ewata, jei Jesús.

**Meje yabara poxonaе pewowin pon copei pexeinaein Jesús tsipaebatsi**

(Mt 19.16-30; Mr 10.17-31)

<sup>18</sup>Caеin pon pentacaponaewi jiwana pin bapon Jesús yainyabatsi, jeichichi:

—Ja Tanecuidubim, maisa neјuntu coyene wunaem. ¿Eta xua copiya matha exanocuaein xua ajuntuyapusya tapoponaewa tsane xua ataya tsane? jei.

<sup>19</sup>Jesús jume epa pita, jeye:

—¿Eta xua nebaram: ‘Neјuntu coyene xanepanaem’, jam? Apara ichun dapon aibi pon neјuntu coyene xanepanaein. Jame meisa apara bapon Nacom compa neјuntu coyene xanepanaein. <sup>20</sup>Xam yaputaneme po coyene Moisés pia peitorobi coyenewatha itoroba xua jeye: ‘Jopa ichowa pichinde ichun piowa tatsi, jopa ichun bexubinde, jopa caibinde ichun piawan tatsi, jopa naerabiya cayabara paebinde pocotsiwa ichamonaе exana. Axatha jume baru cui itura jinare. Matautano enatha jume baru cui itura jinare’, jei Moisés, jei Jesús.

<sup>21</sup>Pon pentacaponaein jume epa pita, jeye:

—Daxita caena bayatha barapo coyenein exaneiban, poxonaе pexuyothan tamropata pitaban, beya anoxuae yacuiya pinyon, jei.

<sup>22</sup>Poxonaе Jesús baxua jume tane, Jesús barai, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyonexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonaе

peacopeibi jiw. Bapoxonaе jame moya anetha, nepuna ponde. Bequein bara bapoxonaе acopeibim tsane, daichitha Nacom cacatsina peitaboco beicha, pocotsiwa Nacom necajuntana botsiwa pocotsiwa bichocono wunaе, jei Jesús.

<sup>23</sup>Poxonaе barapo pebin jume taeba, bichocono јuntu wecoyei, tsipei bichocono copei pexeinaein. <sup>24</sup>Poxonaе Jesús tane xua barapon јuntu coyene wecoyei, Jesús barai, jeye:

—¡Maisa bichocono ayapubecai xua copei pexeinaewi naexana Nacom pijimonaе tatsi jiwana pomonaе itorobiya canamataxeina! Tsipei barapomonaе bichocono antasiwayatane barapo pia copei, beyacaincha xua Nacom antobetsi. <sup>25</sup>Nama bichocono acuiruyapube xua duwein pon pewun camello xua bapon peјoniyaewa acuicheto peetabu wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaе tatsi jiwana pomonaе itorobiya canamataxeina beyacaincha xua poxonaе acuiruyapube xua poxonaе camello acuicheto peetabu wan iya peјoniyaewa, jei Jesús.

<sup>26</sup>Pomonaе xua baxua jume taerucpa, barapomonaе Jesús yainyabatsi, jeye:

—Bapoxonaе јintam metha nexata itacupatsi xua penacapanepaewa pia coutha? jei barapomonaе.

<sup>27</sup>Jesús jume nota, jeye:

—Pebiwі ba jopa itacupaetsi xua baxua exana, saya jame meisa Nacom compa itacupatsi xua jiwі napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

<sup>28</sup>Pedro barai, Jesús baraichi:

—Tapata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi, jei Pedro.

<sup>29</sup> Jesús jume nota, jeye:

—Bara xainyeya paca tsipaebatsi. Nacom beta cana exanaena daxita pomonae peyabara cueicueijeixae po diwesi xua Nacom waba jiwi petanaexanaenexatsi pijimonae tatsi pomonae itorobiya peewatsixae. Nacom beta cana exanaena barapomonae pia bon pecuenta ponaexae, yawa piseuri pecuenta ponaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxei jiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui pecuenta ponaexae.

<sup>30</sup> Barapomonae barapo coyenein exana taneantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajüntucoyenyapusüwa po peajüntucoyenyapusüwa ataya tsiteca, jei Jesús.

**Meje yabara poxonae Jesús  
nayabara paeba acoibi po  
coyenebetha xua poxonae tupaena**

(Mt 20.17-19; Mr 10.32-34)

<sup>31</sup> Bapoxonae Jesús pijimonae compa waba aisowa beya xua pomonae doce poyobe tatsi. Jesús barai barapomonae, jeye: “Anoxuae ponaeinchi Jerusalén tomara beya. Baraxotiya tana nayabara jume cui wetsinexa bara nama, po coyene Nacom pia peitorobi jume pepaebiwí newünae tsiwanaya yabara tina xua xan ponxaein Nacom Tananeitapetsin. <sup>32</sup> Yawa necaenaetsina pomonaetha pomonae penanapaincha jinompaewi, xua icha nacua werena peponaewi xua barapomonae tanecui

caponaenexa. Matautano abe neyabara paebina. Yawa neyabara naone subabina. <sup>33</sup> Yawa necuainchina, barapomonae nebexubina. Daichitha poxonae acoibi po matabibibe yapu caewina equeicha asu neexanaena petüpaecü coyene weya”, jei Jesús.

<sup>34</sup> Ichitha Jesús pijimonae tatsi jopa yaputaeyo baxua xua pocotsiwa Jesús pijimonae tsipaeba. Barapomonae jopa jume ita cui cüpaetsi poxoru Jesús barompaya nabaru jume yabara canamchi, baxua barapomonae taayapubetsi bichocono.

**Meje yabara poxonae Jesús  
Jericó tomaratha axaibi exana  
pon peitata nacutsin**

(Mt 20.29-34; Mr 10.46-52)

<sup>35</sup> Poxonae Jesús itiya pona Jericó tomara, pon peitata nacutsin namtotha eca, yawa jiwi wüqueibeca paratixi.

<sup>36</sup> Poxonae bapon ponxae peitata nacutsin jume tane xua juinya pin bicheito pona, bapoxonae bapon yainyaba, ichamonae yainyabatsi, jeye: “¿Eta xua metha juinya pin bicheito pona?” jei pon peitata nacutsin.

<sup>37</sup> Bapon ponxae peitata nacutsin jume notatsi, jeye: “Apara Jesús, Nazaret tomarapin xote imoxoyo patope”, jei.

<sup>38</sup> Nexata bapon pon peitata nacutsin jume daunweya wawai, jeye:

—Jesús, David pia pemomoxi susato jiwanaipim, ponxae Nacom necaitapetsim neyabara najüntü coyene xeinare jinya tana neyawenaenexam, jei pon peita nacutsin.

<sup>39</sup> Pomonae xua pin bicheito matacaenapoinchi, barapomonae pon peitata nacutsin jume matawentatsi xua moya peecaenexa. Ichitha bapon equeicha jume daunweya wawai, jeye:

—Jesús, David pia pemomoxi susato jiwanaipim ponxae Nacom Necaitapetsim neyabara najüntü coyene xeinare

jinya tana neyawenaenexam, jei pon peitata nacutsin.

<sup>40</sup> Nexata Jesús naruntaba. Jesús namchi, jeye:

—Painta maxu xawena, jei.

Poxonae pon peitata nacutsin imoxoyo patopa Jesustha, Jesús yainyaba, barai, jeye:

<sup>41</sup> —¿Eta xua jinya tacata exanaetsi? jei.

Pon peitata nacutsin jume nota, jeye:

—Jesús Tananecanamataxeinaem, benecotsin cuinaya, jei.

<sup>42</sup> Jesús jume nota, barai, jeye:

—Moya necore antha. Axaibi caexanatsi tana neyabara jume cowuntsix-aemxae xua bara tana neitacupaewa xua tacayawenaewatsi, jei.

<sup>43</sup> Caena nainya bapon necotaxuba. Yawa Jesús puna poinchi. Matautano Nacom wunae jointatsi. Poxonae pin bicheito baxua cui tane, iruru daxita barapo bicheito Nacom wunae jointatsi.

**Meje yabara poxonae pebin pon pewun Zaqueo Jesús jume cowuntatsi**

**19** Jesús Jericó tomaratha patopa. Bapoxonae bapon barapo tomara xenta iya. <sup>2</sup> Baxota Jericó tomaratha pebin popona, pon copei bichocono pexeinaein. Bapon pewun Zaqueo. Bapon pon pecanamataxeinaein pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. <sup>3</sup> Barapon Zaqueo bequein ichichipa xua Jesús peyaitawatsi, ichitha Jesús jopa taetsi tsipei pin bicheito, matautano poxoru Zaqueo xataxatequeca. <sup>4</sup> Nexata Zaqueo nanta cacuinaepoinya, peitiya ecoinyaenexa tsane naetha, po nae imoxoyo namtotha uncua ichaxota Jesús ponaena, xua Jesús barapo naetheicha xaniwaicha peyaitaenexatsi. <sup>5</sup> Jesús barapo nae cacuita ecapona,

bara asiya necoicha. Poxonae Zaqueo naetha tayeichatsi, Jesús namchi, jeye:

—Zaqueo, nainya ecoinca tha jinya botha ecaetsi anoxuae, jei Jesús.

<sup>6</sup> Bapoxonae Zaqueo nainya dunatabica. Matautano Jesús matenta weiweinaya wabatsi pia botha.

<sup>7</sup> Poxonae pin bicheito baxua tane, Jesús abe yabara paebatsi, jeye:

—Maisa Jesús bewa jopa ponae barapo botha, tsipei bapon abe peexanae cuiru coyene peexanaein, jei barapo bicheito.

<sup>8</sup> Nexata Zaqueo nantacotuncua pia botha, yawa jeye Jesustha:

—Taema Jesús Tanecanamataxeinaem, tha daxita jiwana wetsabichi pocotsiwa xeinan, tacatsibinexa tsane pomonaetha pomonae peacopeibiwi. Matautano pomonae xua naerabiya wucan cae paratixi equeicha caewa tha catsibichi cuatro po paratixibe, jei Zaqueo.

<sup>9</sup> Jesús jume nota, jeye:

—Anoxuae Nacom cana exana xua barapomonae pecapanenebiyae jiwichi, pomonae barapo botha peenaewi. Zaqueo, xam Abraham pia pemomoxi susatopiwi jiwanam. <sup>10</sup> Daxota xan ponxaein Nacom Tananeitapetsin patopan tawenaweneinexa tsane pomonae abe peexanae cuiru coyene peexanaewi pomonae icha xam ichim, xua tacapanenebiyaenexa tsane barapomonae, jei Jesús.

**Meje yabara poxonae Jesús paeba pecayabara juta pepaebi diwesiyo xua diez po paratixibe yabara**

(Mt 25.14-30)

<sup>11</sup> Barapomonae jume tayena xua Jesús paeba barapo jiwitha poxonae Zaqueo yabara paebatsi. Daxota Jesús cuiduba barapo jiwi pecayabara juta pepaebi diwesiyotha, tsipei barapomonae nanta xeina xua



Jesús pona Jerusalén tomara beya xua itara mexeya barapomonaē itorobiya pia pepa peewatsinchi tatsi naexanaenawejei.

<sup>12</sup> Bapoxonaē Jesús jeye: “Matha iruru pebin popona. Barapo pebin jiwānāpin pomonaē peainya cui jiwī pomonaē barompaya piamonaē matabuxūmonaē. Barapo pebin taju pona icha nacuatha xua barapon icha nacuatha peexanaenexa tsainchi pocotsin be jiwī itorobiya pia pepa peewatsinchi, xua itorobiya peewatsinexa piamonaē. Barapoxonaē caibe nawiyaena pia nacuatha. <sup>13</sup> Poxonaē cataunxuae jopa taju ponaeyo matha waba diez poyobe pebiwi, xua petanacuichinexatsi. Daxita barapomonaētha barompaya catsina be cae paratixi xua pocotsiwa ainya matoma. Barapo pebin namchi pomonaētha pomonaē pia petanacuichiwichi, jeye: ‘Barapo paratixitha pacomocare, equeicha pacaenaere xuya, painya xuya nawita nexēnāponaenexa paratixi. Payacobe cui othopare poxonaē beya patopaēin’, jei barapo pebin. <sup>14</sup> Ichitha bapon casebatsi piamonaē, pomonaē jinompa pia nacuatha tatsi. Pomonaē bapon casebatsi, barapomonaē itoroba ichamonaē xua pecoyo wepetayiyaenexatsi poxonaē bapon penta caponaēin naexanopiya ichaxota pon jiwī itorobiya pia pepa peewatsinchi. Xua barapo penacajume caitorobiwichi pejeinexa: ‘Ponxaem jiwī itorobiya pia pepa neewatsin, taema, apara bapon piamonaē aichaxaibichi xua peexanaewatsi pon jiwī itorobiya pia pepa peewatsinchi’, jei penacajume caitorobiwichi, xua saya tapaeba.

<sup>15</sup> “Daichitha barapon cana exanatsi, pon jiwī itorobiya pia pepa peewatsinchi, xua ichun cana exana pon iru jiwī itorobiya pia pepa peewatsinchi, bapoxonaē equeicha

bapon caibe nawiya pia nacua beya. Poxonaē bapon pia nacuatha patopa bapon waba pia petanacuichiwichi pomonaētha pomonaē catsiba paratixi. Waba peyaputaenexa icha barapomonaē metha comoca yawa caenaeta icha be pocotsi coyeneya bayatha bapon itoroba. <sup>16</sup> Pon copiya patopa bapon namchi: ‘Tanecanamataxeinaem, po paratixi necatame, barapo paratixitha comocan, xuya equeicha caenaetan, equeicha diez po paratixibe matoma xeineiban’, jei pon copiya patopa. <sup>17</sup> Pon pecanamataxeinaēin jume nota, jeye: ‘Maisa xam beta exaname pon inta nenacuichim. Yaitama beta eexanaponaē xua peyauyo caitorobatsi daxota pentacaponaēin caexanatsi xua necanamataxeinaewa tsane diez po tomariyobepiwi’, jei. <sup>18</sup> Iru icha petanacuichinchi patopa. Bapon jeye: ‘Tanecanamataxeinaem, po paratixi necatame, barapo paratixitha comocan, equeicha caenaetan, equeicha matoma xeineiban cinco po paratixibe’, jei. <sup>19</sup> Pon pecanamataxeinaēin jume nota. Bapontha jeye: ‘Xam pentacaponaēin caexanaēinchi xua necanamataxeinaenexa cinco po tomariyobepiwi’, jei.

<sup>20</sup> “Iru icha pia petanacuichinchi patopa, bapon jeye: ‘Tanecanamataxeinaem, taema xote xeinanje jinya paratiyo, cata mata quiyontabatsi painyaweratha. <sup>21</sup> Yaitama cacui cunuwatsi, tsipei be barapocotsim pon jopa jiwī juniya itorobeibim. Matautano jiwī cobe itorobeibame xua noteibina pocotsiwa jopa jinyawiyo. Matautano pexaewa xua naweta noteibame ichaxota jopa ubim’, jei. <sup>22</sup> Nexata pon jiwī itorobiya pia pepa peewatsinchi namchi: ‘Bepa maisa dapon abem. Aparaxam jinya coutha nanatsicuentisi exaname abe nepaebixae. Xam yaputaneme xua xan

pon jopa jiwi juniya taitorobeibin, xuano xua pexaewa naweta tanoteibiwa xua ichaxota jopa tacoya ubeibinyo, matautano xua ichamonaе cobe itorobeiban xua noteiba pocotsiwa jopa tawiyo. <sup>23</sup> Tsipei catsawiya neyabara nanta xeiname xua bichocono daunweya itoroban daxota bayatha inta bewa barapo paratiyo banco botha botsipame xua equeicha poxonaе patopan, icha paratiyo equeicha matoma xeinaetsipan xua equeicha inta pemataropecihabotsixae tsipae poxonaе ichamonaе nacowaeta barapo paratiyo', jei. <sup>24</sup> Pon jiwi itorobiya pia pepa peewatsinchi barai, pomonaе xua ena baxota baraichi: 'Barapon pacobe wepire barapo paratiyo, nexata barapo paratiyo pacare pon xua equeicha diez po paratixibe matoma exanaeya xeina', jei pon jiwi itorobiya pia pepa peewatsinchi. <sup>25</sup> Pomonaе ena, barapomonaе jume epa nota, jeye: 'Pon jiwi itorobiya pepa neewatsin, equeicha icha paratiyo jopa catsinde bapontha. Bayatha apara diez po paratixibe xeina', jei barapomonaе. <sup>26</sup> Pon jiwi itorobiya pia pepa peewatsinchi barapomonaе jume notatsi, jeye: 'Paca tsipaebatsi, pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonaе bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. <sup>27</sup> Yabara paca tsipaebatsi pomonaе taneaitafaetabi jiwi. Barapomonaе neaichaxaibi xua jiwi itorobiya pepa taewatsin tanecana exanaewa. Barapomonaе pacarenenande ichaxota ecan. Barapomonaе pajutebare ichaxota

ecan', jei pon jiwi itorobiya pia pepa peewatsinchi", jei Jesús.

### **Meje yabara poxonaе Jesús Jerusalén tomaratha patopa**

(Mt 21.1-11; Mr 11.1-11; Jn 12.12-19)

<sup>28</sup> Poxonaе Jesús baxua najume weta, bapoxonaе pona Jerusalén tomara beya. <sup>29</sup> Jesús itiya patopa Betfagé tomara, Betania tomarano xua saya patopa demxu-wathata po demxuwa pewun Olivowa tsipei baxota umena olivo naein. Bapoxonaе nacueyatabe poyobe itoroba poyobe xua pijimonaexae tatsi jiwanabe pomonaе xua doce poyobe. <sup>30</sup> Jesús barai baponbe, jeye:

—Paponarebe po tomara painya itabaraya equiya. Poxonaе papatopaenamebe barapo tomaratha, pacaxinaenamebe burro pon penun pon pequetanotsin, pon jopa ichamonaе tsijuma enaeyo. Payama isanaxorebe bepayama carenandebe. <sup>31</sup> Icha ichun paca barai: '¿Eta pocotsiwa payama isanaxubamebe burro?' icha paca jei bapon, nexata pajandebe: 'Pon Wanacanamataxeinaein bepa pata yama cayiyeinjei, tsipei pinae nantawenona', pajandebe, jei Jesús.

<sup>32</sup> Poxonaе baponbe tomaratha patopabe, tanebe be pocotsi coyeneya bayatha Jesús namchi. <sup>33</sup> Poxonaе baponbe burro yama isacauyabe, baponbe yainyabatsibe pomonaе barapo burro pexeinaexae. Baponbe baraichibe:

—¿Eta pocotsiwa burro payama isacauyamebe? jeichichibe baponbe.

<sup>34</sup> Baraponbe jume notabe barapomonaetha, jeye:

—Pon Pecanamataxeinaein jiwi bepa pinae patayama cayiyein, tsipei pinae nantawenona, jeibe baponbe.

<sup>35</sup> Baraponbe burro tayama cayabe, Jesús tayama cayatsi. Baraponbe burro paparuwa tsijuma jebicabe po

paparuwan aitiyu xua baponbe pia paparuwan tatsi, bapoxonae Jesús cuaretsicatsi.<sup>36</sup> Jesús burrotha ecapona. Jiwi paparuwan namtotha yerababa jejebabapoinya. Barapo paparuwan Jesús matatsun ecapona burrotha. Barapomonae baxua exana tsipei Jesús matenta weyatainchi xua patopa.<sup>37</sup> Poxonae Jesús muxu perunadecae demxuwa wereca, po demxuwa pewun Olivowa, tsipei baxota umena olivo naein barapoxonae pomonae Jesús pejume cowuntsiwichi, barapomonae juntu coyene weiweinyaya jume daunweya wawai. Yawano Nacom wunae jaintatsi xua bayatha pexeinyaya petsita itutsi coyenewan petaexae xua Nacom exana.<sup>38</sup> Barapomonae jeye:

—¡Pai jayana! ¡Maisa Jesús pon jiwi itorobiya pia pepa peewatsinchi, maisa wunae, bapon patopa Nacom peitorobixae! ¡Pomonae xua peitabocotha jinompa juntu coyene weiweina bichocono! ¡Maisa Nacom bichocono wunae jaintatsi pon athabeicha eca! jei Jesús pijimonae tatsi.

<sup>39</sup>Nexata fariseo jiwanamona, pomonae naenapona pin bicheitha, barapomonae Jesús baraichi:

—Pon jiwi Necuidubim, jinya jiwimonae baxua jume matawende: ¡Moya pande! jande, jei fariseo jiwanamona.

<sup>40</sup>Ichitha Jesús jume epa pita, jeye:

—Paca tsipaebatsi, icha barapomonae metha moya tsipae bara nexata iboton jume daunweya wawai tsipae, jei Jesús.

<sup>41</sup>Poxonae Jesús imoxoyo Jerusalén tomaratha patopa, poxonae tomara tane, Jesús juntu coyene wecoyei tsanareca, poxoru Jerusalén tomaramona yabara wecoyeichi.

<sup>42</sup>Jesús namchi, jeye: “¡Pai maisa bepayaputaenama xua pocotsi juntu coyene juntea jinompa paca cana exana! Nama anoxuae baxua nantsiyata.

Jopa paca itacupaeyo xua painya nexainaewa painya juntu coyenetha.<sup>43</sup> Meisa matabi pacata jopaena po matabi abe. Barapo matabitha painya nepaca caaitafaetabi jiwi paca yatomara yatoxoroto exanaxubina. Tsorobo paca yacaincha acabina. Yawa paca yacaincha umenaena daxita muxuneneintha.<sup>44</sup> Paxam Jerusalén tomarapiwi pam, yawano painya pexuino, ichamonae paca jutebina. Painya bon iratha paca yawa bebai tsane. Jopa cae iboto asiya uncuiyae tsane, omeicha othopeicaena. Tsipei paxam jopa Nacom payaitaem xua poxonae paca necasiwa ponaewa”, jei Jesús Jerusalén tomarapiwimonae yabara.

**Meje yabara poxonae Jesús aisowa benapuna torobabiya pomonae Nacom pin pia botha pecaenaetsiwi**

(Mt 21.12-17; Mr 11.15-19; Jn 2.13-22)

<sup>45</sup>Jesús Nacom pin pia botha joniya. Baxota Jesús aisowa benapuna torobabiya pomonae caenaeta baxota.<sup>46</sup> Jesús barai barapomonae, jeye:

—Nacom Pejume Diwesitha jeye: ‘Tabo apara po botha xua jiwi tanetsipaebinxaxa tsaihi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname, ichaxota pijunuwi nantsiyabeibathopa, tsipei baxota panacaetutame saya u xua painya necaibinxam tsane paratixi pomonaetha pomonae xua pateiba xua Nacom petsipaebibinxaxa, jei Jesús.

<sup>47</sup>Nacom pin pia botha daxita matabi Jesús cuidubeiba. Ichitha sacerdotemonae pia pentacaponawewi, iru pomonae jiwi pecuidubiwi Moisés pia peitorobi coyene tatsi, iruru tomara pia pentacaponawewi daxita barapomonae Jesús yabara nanta xeinatsi nawita xua pebexubinexa tsainchi.<sup>48</sup> Ichitha jopa

itacupaetsi barapomonaе xua Jesús pe-  
bexubiwa tsainchi tsipei pin bicheito  
beta xanepanaya Jesús jume tayenatsi.

**Meje yabara xua Jesús pia  
peitorobi coyenewa xeina**

(Mt 21.23-27; Mr 11.27-33)

**20** Caentacabi Jesús Nacom pin pia  
botha joniya. Barapo botha Jesús  
cuiduba jiwi. Yawa Nacom pia peca-  
panenebiyae diwesi yabara cueicuei-  
jei. Bapoxonaе iru sacerdotemonaе pia  
pentacaponae wi tatsi pata. Iru pata  
pomonaе jiwi pecuidubiwi xua Moisés  
pia peitorobi coyenewa tatsi. Iru pata  
pomonaе penapataе jiwi. <sup>2</sup>Daxita bara-  
pomonaе Jesús baraichi, jeye:

—Incane pana tsipaebare, ¿eta po  
peitorobi coyenewatha cuidubame bax-  
uan? ¿Jintam cacata barapo peitorobi  
coyene? jei.

<sup>3</sup>Nexata Jesús jume nota, jeye:

—Xan iruru tha barichichi paca  
yainyabinchi pana nejume nore.

<sup>4</sup>¿Jintam Juan cui itorobatsi jane xua  
jiwi pebautisabinexa tsainchi? ¿Metha  
bara Nacom cui itoroba jampa? ¿Metha  
bara jiwi cui itoroba jampa? jei Jesús.

<sup>5</sup>Barapomonaе caemonaе yabara nat-  
sipaeba pocotsiwa Jesús pepaеbiwa.  
Barapomonaе jeye: “¿Eta xua metha jei  
tsainchi? Icha jei tsipaetsi xua Juan  
cui itorobatsi Nacom xua pebautisabiwa  
jiwi, metha naca jei tsipae: ‘¿Eta xua  
metha nexata jopa pajume cowantsim  
Juan?’ metha naca jei tsipae Jesús. <sup>6</sup>Icha  
jei tsipaetsi Juan cui itorobatsi jiwi,  
metha apara jiwi naca jutebina ibotox-  
itha, tsipei daxita barapo jiwi nanta  
xeina xua Juan pon Nacom peitorobi  
jume pepaеbin”, najei barapomonaе.  
<sup>7</sup>Barapomonaе Jesús jume notatsi, jeye:

—Canta jopa payaputaеinyo xua pon  
Juan cui itorobatsi xua jiwi pebautisabi-  
watsi, jei barapomonaе.

<sup>8</sup>Nexata Jesús barai barapomonaе,  
jeye:

—Nexata barichin tsane. Jopa yabara  
paca tsipaеbi tsainchi, po peitorobi  
coyeneyatha exanan xua daxita taex-  
anaewan, jei Jesús.

**Meje yabara poxonaе Jesús paeba  
pecayabara juta pepaеbi diwesiyo  
pomonaе xua abe exana, pomonaе  
petayapucaenaewi uva pabi**

(Mt 21.33-44; Mr 12.1-11)

<sup>9</sup>Nexata Jesús diwesi tsipaeba  
jiwitha po diwesi pecayabara juta  
pepaеbi diwesiyo. Jesús jeye: “Matha  
iru pebin pin uva pabi xeina. Bapon  
uba po unbo pewan uva cuei unbo.  
Bapoxonaе bapon itoroba pomonaе pia  
uva pabi petayapucaenaewichi tsainchi,  
xua bapoxonaе barapomonaе peji-  
wanaxaenexa pocotsiwa penawetsiwa.  
Bapoxonaе bapon icha nacula beya pona  
ainya wei nexa. <sup>10</sup>Matacabi tsuxubi  
xua uva cuei naweta. Bapoxonaе  
barapo mataqueitha pomonaе pabi  
petayapucaenaewi jiwana itapeta nota  
xua penawetsiwa. Bapoxonaе pon  
uva pabi pexeinaein, caein jiwana  
itoroba pomonaе pia petanacuichiwichi  
jiwana, xua petawucaenexa tsainchi  
uva cuei pomonaе beya pomonaе pabi  
petayapucaenaewichi. Ichitha barapon  
pon najume caitorobatsi, bapon butsi.  
Bapon caibe cobesa iya. <sup>11</sup>Pon uva pabi  
pexeinaein bapon equeicha caein jiwana  
itoroba pomonaе pia petanacuichiwichi  
jiwana. Bapon barichi bichocono butsi,  
caibe cobesa nawiya yawa jopa catichi.  
<sup>12</sup>Pon uva pabi pexeinaein equeicha  
caein jiwana itoroba pomonaе pia  
petanacuichiwichi jiwana. Barichi  
pomonaе pabi petayapucaenaewi  
barapon butsi yawa wan exanatsi yawa  
pabi weya xotsi.

<sup>13</sup>“Pon uva pabi pexeinaein mata-  
painya nanta xeina najei: ‘¿Eta xua

metha exanaein? Metha taxanto itorobin pon bichocono antobein. Metha poxona taxanto taeinchi, metha inta yabara baru cui itura jinaeinchi', najei. <sup>14</sup>Dapo jumetha pomona uva pabi petayapucaenaewi poxona bapon taeinchi, barapo petayapucaenaewi uva pabi najei tsane: 'Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi', najei barapomona. <sup>15</sup>Barapo pexanto tatsi uva pabi juma bemaxu cayiyatsi. Baxotiya bexotsi", jei Jesús.

Nexata Jesús barai barapomona, pomona jume tayenatsi Jesús, jeye: "Pon uva pabi pexeinaein, zeta be cana ichi tsane pomonaetha pomona barapo uva pabi pia petayapucaenaewichi? <sup>16</sup>Pon uva pabi pexeinaein patopaena pia uva pabitha, pomona uva pabi peyapucaenaewi daxita barapomona jutebinchi. Barapoxona barapo uva pabi ichamona xuya catinchi xua petayapucaenaenexa tsainchi barapo uva pabi", jei Jesús.

Pomona Jesús jume tayenatsi poxona baxua jume tane xua Jesús paeba, barapomona Jesús jume itawetatsi, jeye:

—¡Bara, jopa bepajume taeinyo baxua, tsipei xua paebame Nacom jopa copatsiyo pata xantha xua pata tanejutebinexa ichamona! jei barapomona.

<sup>17</sup>Ichitha Jesús tane, barapomona tainchi. Jesús jeye:

—Incane pajume taema pocotsiwa Nacom Pejume Diwesitha neyabara caunuta poxona iboto yabara paeba, jeye: 'Pebiwu pomona ibo bon peacabiwu, barapo pebiwu xuba po iboto tabu caboca, po iboto peainya cui iboto. Ichitha Nacom itapeta barapo iboto xua petabu cabocaenexa peainya cui ibotoxae',

jei Nacom Pejume Diwesitha.

<sup>18</sup>Incane iboto yabara paca tsipaebinchi. Barapo ibototha poxona ichauyo jopeica pepuruwixi tsanaya. Matautano poxona barapo iboto ichauyo matatsun jopeicatsi pebena tsanaya. Icha barapo iboto ichi poxona cana exana ichauxitha peainya cui ibotoxae, xan barapocotsi juta coyeneya barichin pomonaetha pomona jopa tana nejume cowuntsiwi. Pia jopa tana neyaputaexae barapomona daxota peraxa exanaeinchi, jei Jesús.

<sup>19</sup>Sacerdotemona pia pentacapon-aewi tatsi, iru pomona jiwu pecuidubiwu xua Moisés pia peitorobi coyenewa tatsi, daxita barapomona juntu-curu Jesús teicatsi poxoru barapomona yaputane xua yabara paebatsi xua Jesús paeba. Nexata Jesús jopa teicaetsi poxoru jiwu cunuwatsi.

**Meje yabara poxona Jesús yabara cuiduba paratixi matoma po paratixi jiwu bewa catsibina pontha pon romanomona itorobiya pia pepa peewatsinchi**

(Mt 22.15-22; Mr 12.13-17)

<sup>20</sup>Barapomona itoroba, ichamona itorobatsi xua petataenexa tsainchi. Pomona xua itorobatsi, barapomona naexana itara mexeya pentu cui xanepanaewi. Barapomona pona Jesús beya, xua Jesús naerabiya pecui jume yopichinexa tsainchi xua exana yawa xua paeba. Pia bapoxona Jesús waetabichi yawa pia caponaetsi pontha pon Judea nacuapiwi peyanacua ewatsinchi. Bapon peajumeyapusu itorobiwa xeina, xua po peajumeyapusu itorobiwa cata pon romanomona itorobiya pia pepa peewatsinchi. <sup>21</sup>Daxota barapomona Jesús yainyabatsi jeye:

—Pon jiwu Necuidubim. Bara payaputan xua bara jume xainyeya tsipa-

bame jiwi, matautano xua jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonaе cuidubame poxonaе bequein jiwi jopa ichichipaeyo baxua, tsipei xam daxita jiwi catsita najupa. <sup>22</sup> Incane yabara pana netsipaebare xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonaе itorobiya pia pepa peewatsinchi xua wanaca itorobixae bapon bequein bara pon penanapainchi poponaein? Icha jopa tsipae, ¿metha daxua abe tsipae? jeichichi Jesús barapomonaе pomonaе fariseomonaе itoroba.

<sup>23</sup> Ichitha Jesús yaputane xua piraichi baxua yainyabatsi.

<sup>24</sup> Daxota jeye:

—Incane moya painta xawena paratiyo, tha taetsi. ¿Jintam pejumopere? ¿Yawano jintam wun ducuaе? jei Jesús.

Barapomonaе jume nota, jeye:

—Apara romanomonaе itorobiya pia pepa peewatsinchi, jei barapomonaе.

<sup>25</sup> Nexata Jesús barai barapomonaе, jeye:

—Bara nexata romanomonaе itorobiya pia pepa peewatsinchi pacare pocotsiwa xua bapon piawaxae. Matautano Nacom pacare xua baxua iru piawaxae tatsi, jei Jesús.

<sup>26</sup> Barapomonaе jopa itacupaetsi xua Jesús pewaetabiwatsi daxita jiwi peitutha, tsipei Jesús beta jume nota barapomonaе. Barapomonaе yabara najuntu cui coyene cabenaeca pocotsiwa xua Jesús xanepanaya beta jume nota, daxota barapomonaе saya moya umena.

### **Meje yabara poxonaе Jesús yabara yainyabatsi po coyene xua equeicha asu pomonaе pewerapeibiwi**

(Mt 22.23-33; Mr 12.18-27)

<sup>27</sup> Bapoxonaе saduceomonaе jiwana pata Jesús pia xantha tatsi xua Jesús piraichi petsipaebinxatsi. Saduceomonaе barompaya pia pecuidubi coyenewa xeina xua pinae pomonaе pewerapeibiwi equeicha jopa asu tsaibiyo. Barapo pecuidubiwa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonaе werapa. Daxota saduceomonaе Jesús siwa poinchi. Saduceomonaе Jesús baraichi:

<sup>28</sup> —Pon jiwi Necuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa pentapin pecoutha coseuri pichina xua bapoxonaе pentapin pecoutha pexeinaenexa tsane pexui’, jei Moisés. <sup>29</sup> Barichi, matha iru cae peweicho jiwi xua caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. <sup>30</sup> Pon cotacaya naexana xuya pentapin coseuri pita xua bapoxonaе pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. <sup>31</sup> Bapoxonaе ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona barapowa poxonaе bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. <sup>32</sup> Bapoxonaе matapainya iru barapowa tupa. <sup>33</sup> Xam, Jesús, ba paebame, ba jam: ‘Matacabi jopaena po matacabitha Nacom asu exanaena xua jiwi asu exanaeinchi muthu wetsina’, ba jam. Poxonaе barapo matacabi jopaena xua

daxita jiwi asu jujuinaena, barapo mat-acabitha, ζjintam metha barapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomonaē.

<sup>34</sup>Nexata saduceomonaē, Jesús jume nota. Jesús jeye:

—Barapo nacuathe pebiwi yawa yabuxi, barapomonaē jitha eenapona.

<sup>35</sup>Pomonaē xua Nacom itapeta waba, poxonaē barapomonaē patsina Nacom pia nacuatha, barapomonaē jopa equeicha jitha eenaponaē tsane, yawa jopa pexantixi jitha cuarebaponaē tsane. <sup>36</sup>Tsipei barapo nacuatheicha, barapomonaē bexa jopa werapae tsane icha matatsunpiwi ichi xua jopa werapaeyo. Matauta barapomonaē Nacom pia pexui, tsipei barapomonaē equeicha asu barapo petupae coyene weya. <sup>37</sup>Caena bayatha Moisés yabara naca cuiduba xua pomonaē pewerapeibiwi xua equeicha asu tsaibi tsane, po diwesitha naewa yabara tina po naewa taxuncua. Barapo diwesitha Nacom pon Pecanamataxeinaein jiwi, namchi: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. <sup>38</sup>Baxua Nacom paeba tsipei Abraham iru Isaac, iru Jacob pomonaē bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomonaē pewerapaewi pomonaē jopa caewa equeicha asu pejinompaewi, barapomonaē jopa pia Nacom tatsi, pon itabocotha eca. Saya jame meisa pomonaē bayatha pewerapaewi caewa equeicha asu pejinompaewi pomonaē pejume cowantsiwixaetsi Nacom, barapomonaē jame pia Nacom tatsi, pon itabocotha eca, jei Jesús.

<sup>39</sup>Nexata pomonaē jiwi pecuidubiwi Moisés pia peitorobi coyene tatsi, bara-

pomonaē jiwanamonaē Jesús baraichi, jeye:

—Pon jiwi Necuidubim, maisa bara beta xanepanaya paebame, jei barapomonaē.

<sup>40</sup>Saduceomonaē equeicha jopa Jesús yainyabichi xua equeicha beta pejume notsiwatsiyainwa.

**Meje yabara poxonaē Jesús nayabara jei: “Mesías, ζjintam pia pemomoxi susato jiwanaēpin tatsira?” jei**

(Mt 22.41-46; Mr 12.35-37)

<sup>41</sup>Equeicha Jesús nayabara paeba pomonaētha pomonaē jiwi pecuidubiwi Moisés pia peitorobi coyene tatsi. Jesús jeye:

—ζEta pocotsiwa metha jiwi paeba xua pinaē Mesías bapon David pia pemomoxi susato jiwanaēpin tatsi? <sup>42-43</sup>Tsipei David jei salmos penaxunaē weixi diwesintha:

‘Nacom pon Pecanamataxeinaein jiwi Tanecanamataxeinaein baraichi pon Mesías jeichichi:

Tacoxa werena ecare, beya abu tsane poxonaē

necaitafaetabi jiwi pia Pecanamataxeinaeinchi

tatsi caexanaeinchi, jei Nacom’,

jei David salmos penaxunaē weixi diwesintha.

<sup>44</sup>Icha David yabara jei xua Mesías yabara jeichi: Bapon Mesías Tanecanamataxeinaein, jei, ζeta xua metha tsipae xua Mesías apara David pia pemomoxi susato jiwanaēpin tatsi? jei Jesús.

**Meje yabara poxonaē Jesús muxuweta jiwi xua pomonaē jiwi pecuidubiwi Moisés pia peitorobi coyene tatsi barapomonaē pecuiyainwa tatsi**

(Mt 23.1-36; Mr 12.38-40; Lc 11.37-54)

<sup>45</sup>Pomonaē xua umena daxita barapomonaē Jesús jume taeumeinchi

poxonae Jesús pijimonae tsipaeba. Jesús namchi, jeye: <sup>46</sup>“Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha barapomonae ichi xua barapomonae bichocono ichichipa xua penama xatabiwa po paparuwan apipiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtotha jacobebina xua barapomonae pejacobinexatsi xua jiwi pebaru cui itura jineibinexa barapomonae xua barapomonae pebaru cui itura jineibinexatsi. Barapomonae bichocono ichichipa xua nanta caeneiba judiomonae pia penacaetutsi bontha tatsi ichaxota ba enathopeiba pomonae peainya cui jiwi penaexanaewi. Matauta barapomonae bichocono ichichipa xua eneiba ichaxota ba eneiba pomonae peainya cui jiwimonae poxonae pexaewan tsinacaetuteiba xua poxonae penabaneibinexa tsane. <sup>47</sup>Matautano barapomonae powaxi pecuenta werapaewaxichi piseurixi, barapowaxi cueranta enatsi pia bon. Barapomonae naemata jopa cuinaya najume copababeibiyo poxonae tsipaebeiba Nacom. Barapomonae bichocono peraxa jubebinchi poxonae po mataqueitha Nacom yabara paebina jiwi xua pia penatsicuentisiwa xua abe petsita exanaexaetsi. Barapomonae bichocono atene tsane xua poxonae beyacaincha ichamonae atene exanaeinchi xua jopa pejume cowuntsixaetsi Nacom”, jei Jesús.

**Meje yabara poxonae Jesús yabara paeba xua petsiriwa paratiyobe cata Nacomtha, powa pecuenta tupaewatsi piseuri**

(Mr 12.41-44)

**21** Nacom pin pia botha Jesús tane xua baxota pomonae copei xeinaewi paratixi jeya Nacom nexa ichaxota jiwi jebeiba paratixi. <sup>2</sup>Barichi Jesús tane xua iru ainya tsica paratiyobe jeca baxota powa pecuenta tupaewatsi piseuri, yawa bapowa peacopeibiwayo. <sup>3</sup>Jesús jeye:

—Bara xaniyeya paca tsipaebatsi. Barapo yabuyo powa pecuenta tupaewatsi piseuri, barapowa peacopeibiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae nawita jeya xua Nacom nexa. <sup>4</sup>Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca po paratiyobe bequein canantawenona xua pexaewa tsane, bequein bichocono peacopeibiwayo, jei Jesús pijimonaetha.

**Meje yabara poxonae Jesús yabara paeba xua ichamonae abe exanaena Nacom pin pia bo tatsi**

(Mt 24.1-2; Mr 13.1-2)

<sup>5</sup>Ichamonae yabara natsipaeba nawita Nacom pin pia bo tatsi. Barapomonae najei: “¡Maisa Nacom pin pia bo tatsi bepa wunae! ¡Maisa bepa wunae xua jiwi tutu pepena peitupanaewan barapo Nacom pin pia botha xua Nacom nexa!” jei barapomonae. Nexata Jesús jeye:

<sup>6</sup>—Matacabi jopaena po mataqueitha tsane ichamonae pomonae penana-paincha jinompaewi pomonae xua icha nacua werena peponaewi abe exanaena Nacom pin pia bo tatsi, xuaunxuae pataneme po bo. Jopa cae ibotiyo na-



copatuncuae tsane icha iboto peumatha, daxita abe tsane, jei Jesús.

**Meje yabara poxonaes Jesús yabara paeba xua copiya matha pewunaeya exanaena petsita itutsi coyenewa poxonaes daxita weraweracaenaba**

(Mt 24.3-28; Mr 13.3-23)

<sup>7</sup>Nexata jiwi Jesús yainyabatsi, jeye:

—Pon jiwi pata Pecuidubim, ¿eta poxonaes metha ichamonae baxua exanaena poxonaes abe cana exanaena Nacom pin pia bo tatsi? ¿Eta pocotsiwa tsane xua pewunaeya tsita itapeinya xeinaena po coyene xua poxonaes imoxoyo daxita weraweracaenaba? jei Jesús pijimonae tatsi.

<sup>8</sup>Jesús jume barai: “Dota pam bu ichamonae naerabiya paca muxu tsipaeba xua daxota abe paexanaetsipame. Tsipei tsane patsina ayei bicheito jiwi pomonae natsicotaena icha be xan ichin. Barapomonae jei tsane: ‘Apara xan, Mesías’, jei tsane. Ichun jei tsane: ‘Anoxuae Mesías patopaena’, jei tsane. Ichitha paxam jopa payabara jume cowuntsinde pocotsiwa xua barapomonae paeba.

<sup>9</sup>Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae dapu matabi aichica tsane xua poxonaes daxita weraweracaenaba yatsicaewa”, jei Jesús.

<sup>10</sup>Equeicha Jesús namchi: “Cae nacuapiwi iru icha nacuapiwino barapo ainya nacuapiwibe nabenoutsina. Matautano iru pon nacua peewatsin iru ichundu pon icha nacua peewatsin baponbe iru nantiya nabenabe.

<sup>11</sup>Matautano ainya nacuantha ira jijiyatsina. Matautano ainya nacuantha jainbo nacua tsane, tsipei pin mayayo

tsane. Matautano domae tsurucuae tsane ainya nacuantha. Matautano Nacom peitabocotha peitupanaewan itutsina, xua jiwi bichocono cunuwa.

<sup>12</sup>“Poxonaes baxua pewunaeya tsane jiwi paca teiquebina, paca atene exanaena. Judiomonae pia penacaetutsi botha paca caponaena painya paca yabara paebinexa painya nenatsicuentisiwa xua abe painya neexanaexae. Yawa paca caponaena jiwi pecubi botha. Paca caponaenano nacua peewatsiwi peitabaratha tatsi, painya tana nejume cowuntsixaemxae. Yawano paca caponaena pentacaponae wi peitabaratha tatsi, pomonae iru itoroba jiwitha xua pon nacua peewatsin nexa painya tana nejume cowuntsixaemxae.

<sup>13</sup>Barapoxonaes paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. <sup>14</sup>Pananta xeinare painya juntu coyenetha, pana najande: ‘Jopa tsiwanaya yabara nacui wunaetsi tsainchi xua ichamonae watsipaebiwatsi xua abe wanaca yabara paebiwa’, pana najande. <sup>15</sup>Tsipei xan paca tsumuxu dutinchi po jume xua pacaunutsiname, xua po jumetha beta paca yaputane exanaena. Barapo jume pacata exanatsi xua painya paca necaaitafaetabi jiwi jopa paca jume matanonopentsi tsane, xuano xua jopa peitacupaenexa tsainchi xua abe painya nepaca yabara paebiwa.

<sup>16</sup>Paca caenaetsina ichamonae icha jiwitha pomonaetha pomonae jiwi pecanamataxeinaewi. Iru painya axeiji yawa painya ena jiwi paca caenaetsina ichamonaetha. Iru painya eweicho jiwi paca caenaetsina ichamonaetha. Iru painya amoyo jiwi paca caenaetsina ichamonaetha. Iru painya jiwimonae paca caenaetsina ichamonaetha. Barichi ichamonae pomonae paxam jiwana pam jutebinchi. <sup>17</sup>Daxita nacuanpiwi paca casebina, painya tana nejume

cowantsixaemxae. <sup>18</sup>Ichitha Nacom paca capanenebiyaena painya nejuntu coyenein panenebiyaenexa. <sup>19</sup>Awiya paantuyapusuya nejume cowuntsiya jinompare poxonae bequein ichamonae abe pacata exana xua beya payacuiya werapaeya othopaename xua painya xeinaewa tsane peajuntuyapusuwa po peajuntuyapusuwa ataya tsiteca.

<sup>20</sup>“Poxonae pataename xua soldadomonaе xua icha nacuapiwi yacaincha matawacaicha yatororoto naexanaxubina Jerusalén tomara bapoxonae payaputaename xua barapo tomara bara imoxoyo abe exanaeinchi. <sup>21</sup>Barapo mataqueitha, daxita pomonae Judea nacuatha jinompa barapomonaе bewa demxuwan berucupiyaena. Iru pomonae Jerusalén tomarapiwi, barapomonaе bewa bara berucupiyaena. Iru pomonae pabitha jinompa, barapomonaе jopa bewa ducupaetsipae tomara beya. <sup>22</sup>Tsipei barapo matabintha Nacom cui itorobina, ichamonae cui itorobinchi, xua jiji peraxa exanaeinchi, icha be po coyeneya Nacom Pejume Diwesitha yabara paeba baxua. <sup>23</sup>¡Pai yabuxi tsobenae powaxi pexui bupana taenatsi barapo matabitha! ¡Pai powaxi iru pexui isaina, barapowaxi tsobenaeru! Tsipei acabe tsobenae tsane pexui. Matautano Nacom cui itorobina barapo nacuathe, ichamonae cui itorobinchi xua barapo nacuathepiwi pin peperaxa jubiwatsi tsainchi. <sup>24</sup>Ichamonae cusitha jutebinchi. Ichamonae yamaxu cubiya caponaeinchi icha nacuan beya. Barapo Jerusalén tomaratha pomonae penanapaincha jinompaewi xua icha nacua werena peponaewi dubenanaebiyaena beya barapo matabi yacobe cui othopaena, po matabitha xua Nacom cobe matawentsina xua equeicha jopa enae

tsane barapo tomaratha barapomonaе”, jei Jesús.

**Meje yabara poxonae Jesús  
nayabara paeba xua poxonae  
equeicha patopaetsica ponxae  
Nacom pia Peitapetsin**

(Mt 24.29-35, 42-44; Mr 13.24-37)

<sup>25</sup>Equeicha Jesús jeye: “Bapoxonae xometotha naitutsina peitupanaewa, yawa jomocoichatho, yawa opiteitontha. Barapo irathe daxita nacuanpiwi yabara najuntu coyene cabenaenoutsina. Matautano busi taena pin maratsacan busi xua busi jopa xainya mene ducuaeyo. Bichocono jiji najuinycacaena. <sup>26</sup>Jiwi pijunuwi muxu pewerapae tsane poxonae nanta xeinaena po coyene Nacom exanaena barapo cae pin nacuathe. Matauta junuwina xua exanaena itabocotha poxonae Nacom napuna torobabiyaena xua xuan itabocotha dubena. Bapoxonae jopa xapain dubenanaeyo tsane. <sup>27</sup>Bapoxonae jiji netaena ponxaein Nacom Tananeitapetsin xua tsaquinaebowatha patopeicaein. Nacom pia peayapusuwa itorobi coyenewatha, matautano bichocono pexeinya itupanae coichatha yawa patopeicaein. <sup>28</sup>Poxonae baxuan juntucuru exanaenaba, panantusubarucupare, athabe panecotumeinyama, tsipei bara imoxoyo paca necapanenebiwa tsane”, jei Jesús.

<sup>29-30</sup>Nexata Jesús pijimonaе tsipaeba pecayabara juta pepaebi diwesiyo xua higuera nae, jeye: “Pataema nae po nae pewun higuera nae, xuano ichacuitha icha naeinno xua pataneme xua pena noxu xuxuwa pona. Nexata bapoxonae payaputaema xua imoxoyo wei tsurucuae tsoponae. <sup>31</sup>Nexata barapocotsi juta coyeneya icha tsane xuaunxuae paca tsipaebatsi xua poxonae jiji muxu pijunuwi pewerapae tsane. Bapoxonae

payaputaename xua bara imoxoyo tsane poxonaе xua tapatopae wūnae tsane poxonaе jiwі itorobiya ewatsin.

<sup>32</sup>“Bara xaniyeya paca tsipaebatsi daxita judiomonaе naitapataya naexanaponaena beya yacui othopaena poxonaе Nacom exanaena daxita baxuan pocotsiwa xuaunxuae paca tsipaebatsi. Bapoxonaе barapo judiomonaе weraweracaena.

<sup>33</sup>Peitaboco aichurucuae tsane, matauta ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

<sup>34</sup>“Dota pam, pana neyabara cananta xeinaeya jinompare. Painya xoba pana najuntū coyene ararana exaname xua pana nasi cui matacaetame yabuxitha xuano xua pana nacupa exaname peatsaxae meratha, yawano xua saya i pananta xeiname xua panantawenoname xua saya paxam nexa. Bapoxonaе barapo matacabi xain jopa paca benaеcae tsane poxonaе jopaena. <sup>35</sup>Tsipei barapo matacabi jemeicha jopaena, icha be pocotsi juta coyeneya ichi poxonaе duwein jemeicha autabatsi mayatha. Barapo matacabi jopaena daxita barapo cae pin nacuathe yajiwі canaupaxuinchi.

<sup>36</sup>Tsaca pajinompeibare xua tapatopae wūnae tsane. Matowa patsipaeba dubenanaebiyama Nacom. Patsipaеbeibare xua Nacom paca capanenebiya exanaena baxua weya xua poxonaе Nacom cana exanaena ichamonaetha xuaunxuae paca tsipaebatsi. Barichi patsipaеbeibareno xua painya nepaca itacupaewa tsane xua painya neumenaewa taitabaratha ponxaein Nacom Tananeitapetsin”, jei Jesús pijimonaetha.

<sup>37</sup>Daxita matacabi Jesús cuidubeiba jiwі Nacom pin pia botha Jerusalén tomaratha. Merawitha tsaibi demxuwa

beya poneiba xua baxotiya peecaenexa tsaibi tsane, po demxuwa pewun Olivos. <sup>38</sup>Daxita matacabi jiwі caemumbotha tsaibi pateiba Nacom pin pia botha xua Jesús pejume taenexa tsaibi tsainchi.

**Meje yabara poxonaе fariseomonaе iru sacerdotemonaе pia pentacaponaewi tatsi daxita barapomonaе Jesús yabara nanta xeinatsi po coyeneya xua Jesús pewaetabiwa tsainchi**

(Mt 26.1-5, 14-16; Mr 14.1-2, 10-11; Jn 11.45-53)

**22** Bara nama imoxoyo matacabi jopa po matacabitha xua jiwі nacaetuta pexaenexa pan xua jopa cotowiyo. Barapo matacabi pewun Pascua matacabi wun. Barapo Pascua matacabi wuntha jiwі yabara nanta xeina po matacabi poxonaе caena bayatha matha judiomonaе Egipto nacia weya panenebiya. <sup>2</sup>Sacerdotemonaе pia pentacaponaewi tatsi, iru pomonaе jiwі pecuidubiwi Moisés pia peitorobi coyene tatsi, daxita barapomonaе nabaru muxu jei xua bepa pinae eta bichi tsane poxonaе Jesús waetabinchi pebexubinexatsi. Cataunxuae jopa exanaeyo, canta jiwі cunuwatsi.

<sup>3</sup>Bapon Judas caein jiwana pomonaе doce poyobe pomonaе Jesús pijimonaexae tatsi. Judas icha wun xeina, po wun “Iscariote”, baraichi. Nexata bapoxonaе Satanás caurimonaе pia pentacaponaein tatsi, Judas imoxoyo peinya caquita uncuatabatsi peitorobinexatsi xua abe peexanaewa tsane. <sup>4</sup>Judas siwa pona sacerdotemonaе pia pentacaponaewi tatsi, iru policiamonaе xua pebaru cueicueijeinexa tsane. Barapomonaе policiamonaе pentacaponaewi, xua pomonaе peyabara umenaewi Nacom pin pia bo tatsi. Daxita barapomonaetha

Judas tsipaeba xua pocotsi coyeneya poxonae Jesús caenaetinchichi barapomonaetha. <sup>5</sup>Barapomonaebichocono ichichiparucupa baxua. Yawa barapomonaebichonae Judas muxu tsipaebatsi xua paratixi catsibapaebatsi. <sup>6</sup>Judas bara yabara jejei xua barapomonaebichonae. Bapoxonae Judas tamropata pitaba xua jeita xua po coyenetha Jesús pecaenaetaxubiwa tsainchi barapomonaetha poxonae peyapu xanepanaewatha poxonae jiwaibi tsurucupae.

**Meje yabara poxonae Jesús pijimonaebichonae baru nabane Pascua wun matakabitha**

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup>Nama matakabi jopaba po matakabitha poxonae jiwit sinacaetutsina xua penabanaenexa pan po pan jopa muxuna pentsiyo levadura matawun pocotsiwa xua cotowa exana pan. Barapo penantacarucuae matakabitha ba corderoxi pebtoxi xua oveja coxi jutebatsi xua jiwit pexaenexa. <sup>8</sup>Pedro iru Juan itorobatsibe, Jesús itoroba. Jesús barai, jeje:

—Paponarebe panacui wunaerebe pexaewa Pascua wun matakabi nexa waxaenexa tsainchi, jei Jesús.

<sup>9</sup>Baponbe, Pedro iru Juan, Jesús yainyabatsibe. Jeibe:

—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun matakabi nexa? jei barapomonaebichonae.

<sup>10</sup>Jesús jume nota. Jeye:

—Poxonae tomaratha papatopae-namebe, pataenamebe pebin. Barapo pebin juruwatotha yantana ponaena mera. Bapon papuna ponarebe bo beya ichaxota bapon joniyaena. <sup>11</sup>Pon bo pexeinaein pabarande: ‘Pon jiwit Pecuidubin cabarai: ¿Incane tutura, po tututha tajiwimonaebichonae baru xaein Pascua

wun matakabi nexa? jeye Pecuidubin’, pajandebe, jei Jesús. <sup>12</sup>Equeicha Jesús jeye:

—Bapoxonae pon bo pexeinaein paca tsita ita cayopichinabe po tutu pin tutu. Barapo tutu, po tutu xua asiyeicha, barapo tutu bayatha xaneba. Barapo tututha pexaewa panacui wunaetajebare xua wanabanaenexa pexaewa barapo Pascua wun matakabi nexa, jei Jesús.

<sup>13</sup>Barapoyobe ponabe, penamchixae daxita tanebe be pocotsi coyeneya Jesús bayatha paeba. Bapoxonae pexaewa nacui wunaetajebare Pascua wun matakabi nexa xua penabanaenexa.

<sup>14</sup>Poxonae barapo hora tsuxubi poxonae quirei tsanaicha, Jesús baru ecoundeca pexaethopaewatha pijimonaebichonae pomonaebichonae doce poyobe pomonaebichonae pia peitorobiwixae tatsi Jesús.

<sup>15</sup>Nexata Jesús barai, jeye:

—Maisa bichocono juntu coyene weiweinan xua tapaca cabaru nacaetutsiwatsi, yawa tapaca cabaru nabanaebichonae watsi barapo Pascua wun nabanaebichonae matakabitha, xua baxua matha pewunaeye tsane xua poxonae tatupaewa tsane.

<sup>16</sup>Daxota paca tsipaebatsi xua equeicha jopa tapaca baru nacaetutsiwatsi tsainchi xua wanabanaewa tsane Pascua wun matakabitha. Equeicha exanaeinchi barapo penabanaewa po mataqueitha poxonae Nacom neexanaena xua jiwit itorobiya ewatsin, jei Jesús.

<sup>17</sup>Nexata Jesús pecobetha pita corotiyo, Nacomtha tsipaeba, jeye:

—Axa, maisa juntu coyene weiweinan xua corotiyotha ecareca pepa uva mera xua pata tanecatsiwam, jei.

Yawa barai pijimonaebichonae, jeye:

—Barapo corotiye pana nacobe wenonotaponde tamropata tsiwixi pa-aapaponde. <sup>18</sup>Daxota paca tsipaebatsi barapo uva mera jopa equeicha paca baru apae tsainchi anoxuae. Meisa abu bexa tsane pena

coyewatha paca baru apaeinchi barapo uva mera poxonae Nacom neexanaena xua jiwi itorobiya ewatsin, jei Jesús.

<sup>19</sup> Jesús pecobetha pita pan, Nacomtha tsipaeba, jeye:

—Axa, maisa juntu coyene weiweinan xua pan pata tanecatsiwam, jei.

Bapoxonae Jesús pecobetha epa janaca pan, yawa catsiba pijimonae. Pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitupaewatsi tsainchi. Baxua paexaneibare bapocotsiwa xuaunxuae pan paca baru xainchi. Barapo coyene paexaneibare painya tana neyabara juntanaineibinexa tsaiibi tsane, jei Jesús.

<sup>20</sup> Poxonae Jesusbaru najain weta, barapoxonae Jesús yabara paeba corotiyo, icha ichi xua yabara paeba pan. Jesús jeye:

—Nacom exana pena peca-panenebiyae coyene jiwi nexa. Barapo pecaapaewiyotha uva mera paapame, xuaunxuae paapame, apara natsicotane be tajana xua tatupaen jana jopeicaein. Barapo pejanatha paca juntu coyene cui capanepaeinchi abe painya neexanae cuiru coyenein weya.

<sup>21</sup> Pebin taxantha necacuita namaxu yutabota pexaethopaewatha, barapo pebin necaenaetsina ichamonaetha xua tanebexubinexa tsane ichamonaetha.

<sup>22</sup> Xan ponxaein Nacom Tananeitapetsin bewa tupaen, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha, jei Jesús.

<sup>23</sup> Nexata barapomonae caemonae nantiya nayainyaba, jeye: “¿Jintam metha caenaetsi Jesús?” najei barapomonae.

**Meje yabara poxonae Jesús pijimonae tatsi, yabara najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana**

<sup>24</sup> Pirapaeyo Jesús pijimonae tatsi najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana. <sup>25</sup> Nexata Jesús jume barai: “Pomonae jopa judiomonae naexanaeyo, barapomonae ba nantauta piamonae pomonae nacua peewatsiwi. Barapomonae pomonae jiwi itorobiya pia pepa peewatsiwichi barompaya piamonaexae jopa juniya itorobeibiyo. Barapomonae pomonae jiwi itorobiya pia pepa peewatsiwichi baxua exana, xua daxita jiwi pia jeichi: ‘Maisa barapomonae pomonae jiwi itorobiya pia pepa peewatsiwichi wunae nacata exana xua naca itoroba’, pia jeichi jiwi.

<sup>26</sup> Ichitha paxam jopa bewa paraichim tsane xua aebiya painya neitorobiwa tsane. Jame, icha cui bewa paxeinare. Pon ainya cui peexanaeinchi paxamtha xua beyacaincha ichamonaetha bapon bewa naexanaena be pon pecui paw. Pon xua jiwi itorobeiba, bapon bewa naexanaena be pon amanaya tanacuita ichun nexa. <sup>27</sup> Iru ainya pebinbe. Ichun pexaethopaewatha ecoundeca. Ichun pexaewa apata. Pon ecoundeca apatatsi. ¿Jintamda pon ainya cui peexanaeinchira xua beyacaincha ichun? Pon xua jiwi apata pexaewa bapon jopa ainya cui peexanaeinchi. Jame pon pententa apatinchi bapon jame pon peainya cui peexanaeinchi, xua beyacaincha ichun. Nama painya xantha ecan, xua tacoya nacana exanan be pon xua pexaewa jiwi taapatsin, pocotsin jopa ainya cuiyiyo.

<sup>28</sup> “Paxam barapomonae pam, pomonae meisa pana nebaru

jinompeibame poxonae bequein ichamonae inta abe exana. <sup>29</sup>Daxota paca catatsi taitorobi coyenewan icha Taxa Nacom neichi xua necata barapo peitorobi coyenewan. <sup>30</sup>Barapo peitorobi coyenewan paca catatsi, painya nenabarū nabanaenexa taitorobeibi nacuatheica. Paenaename pexeinya peitupanae enaewantha, painya neyabara paebinexa tsane pomonae doce po bicheito cuntyobe, pomonae Israel pia pemomoxi susato jiwimonae tatsi xua penatsicuentisiwa abe pia peexanaexae”, jei Jesús.

**Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeyno”, pinae yabara jei tsainchi Jesús**

(Mt 26.31-35; Mr 14.27-31; Jn 13.36-38)

<sup>31</sup>Equiecha Jesús jeye:

—Simón jan, caurimonae pia pentacaponaein tatsi, bapon Satanás newuca: ‘Jinyamonaepin necare’, nejei. Bapon ichichipa xua abe cata exanaena xua taneitawetsinexam tsane. Icha jiwí ichi xua pebeno daunweya yasisita pexubinexa pesiberapewa. Barichi caurimonae pia pentacaponaein tatsi ichichipa cajuntū coyene itorobina xua taneitawetsinexam tsane. <sup>32</sup>Ichitha xan Taxa beicha cata tsipaebatsi xua jopa tana neyabara junteinaenexam tsane xua tana nejume cowuntsiwam. Ichitha Satanás cacana exanaena xua tana nejumefebiwam saya bara caeto tsane. Bapoxonae equeicha caewa nejume cowuntsiname. Poxonae equeicha caewa nejume cowuntsiname, nexata ichamonae pomonae tana nejume cowuntsiwi barapomonae yawenaename xua ajuntuyapusya tana nejume cowuntsiwa tsane, jei Jesús.

<sup>33</sup>Simón Jesús jume notatsi, jeye:

—Tanecanamataxeinaem, maisa be cabarū poponaeinchi. Bara bequein

ichamonae cacaponaeina jiwí pecubi botha ichitha awiya capuna tupaeyinchi. Matauta bequein tupaename ichitha awiya capuna tupaeyinchi, jei Simón Pedro.

<sup>34</sup>Jesús jume nota, jeye:

—Pedro, catsipaebatsi bexa necaunutsiname acoibi po jume cuiyobe neyabara jam tsane: ‘Dapon jopa yaitaeyno’, neyabara jam tsane. Barapoxonae irū tsane wacara pebto fibina, jei Jesús.

**Meje yabara poxonae bara nama barapo matabi tsane po matabitha Jesús waetabatsi**

<sup>35</sup>Nexata Jesús pijimonae yainyaba, jeye:

—Poxonae bayatha paca itorobatsi paca jeichi: ‘Jopa paratixi doró pacaponaeinde, jopa cote pacaponaeinde, jopa panataxu xatabinde xua penataxu xatabiwa’, jan. ¿Eta xoyo pacata seica xua xoyo pacobena poname? jei Jesús.

Barapomonae Jesús jume notatsi, jeye:

—Ajibi, bara paxeyinan pocotsiwa panantawenonan, jei.

<sup>36</sup>Nexata Jesús jume nota. Barapomonae jume notatsi. Namchi:

—Anoxuae paca tsipaebatsi xua icha cui coyeneya. Pon cote xeina, moya bewa caponae. Pon xeina paratixi doró, moya bewa caponae. Pon peaitiyū camisa xeina, bapon bewa caenaetsina barapo camisa, barapo paratixitha bewa comotsina cusi. <sup>37</sup>Poxoru paca tsipaebatsi caena bayatha Nacom Pejume Diwesitha neyabara paeba, jeye: ‘Bapon cayabara cananta xeinaeyinchi jei tsane bapon jiwana caeyin pomonae peabewi’, jei Nacom Pejume Diwesitha xua pinae jiwí jei tsane. Jiwi nantawenona xua baxua neyabara caunutsina xua Nacom

peneyabara jumichixae baxuan pejume diwesitha, jei Jesús.

<sup>38</sup>Barapomonae Jesús jume notatsi. Jeye:

—Patatanecanamataxeinaem, xote bayatha paxeinan ainya watobe cusi, jei.

Jesús jume nota, jeye:

—Bara, bare, jei Jesús.

**Meje yabara poxonae Jesús Paxa tsipaeba ichaxota tsica iriyo po iriyo pewun Getsemani**  
(Mt 26.36-46; Mr 14.32-42)

<sup>39</sup>Nexata Jesús tomara weya pona. Bapon pona demxuwa beya po demxuwa pewun demxu Olivowa, olivo naein peumenaexae baxota poxoru pia cui xua poneiba baxota petsipaebebinexa Paxa. Jesús pijimonae puna poinchi. <sup>40</sup>Poxonae barapo demxuwatha patopa, Jesús pijimonae barai:

—Nacom patsipaebare xua jopa abe painya neexanaewa tsane xua caurimonae paca itoroba.

<sup>41</sup>Nexata Jesús pijimonae tsiwiyo wepu natsixitaba. Saya jopa tajuyo. Be poxonae pebin ibotiyo xoya xua be pocotsiwatha naruntabiya jopeica. Jesús pentabocotha ecoundeca. Paxa tsipaeba. <sup>42</sup>Jesús namchi: “Axa, icha ichichipame xua tana neyawenaewam, inta pire xua ajuntucoyenerewe nexana. Ichitha jopa neexanaeinde be pocotsi coyeneya ichichipan. Saya jame necana exande be pocotsi coyeneya ichichipame”, jei Jesús.

<sup>43</sup>Bapoxonae Jesús tsita naitutatsi matatsunpin pon itaboco wetsica pona. Barapo matatsunpin Jesús antusuya cana exanatsi poxonae yawenatsi. <sup>44</sup>Bichocono Jesús ajuntutane tsipei Paxa copatatsi xua jiwi petsitupaewa tsainchi. Paxa beya bichocono matowa jume daunweya tsipaeba. Yawano bichocono najaneta. Barapo

penajanetsiwa poxonae iratha othopeica be pejana othothopeica.

<sup>45</sup>Poxonae najume wetaba xuano xua asiya uncuano bapoxonae pijimonae beya pona. Jesús tane pijimonae xua tamaitumeinchi. Barapomonae maita tsipei juntu cuerona xua wecoyeyi, xua Jesús yaitama petupapaebixae.

<sup>46</sup>Nexata Jesús pijimonae barai, jeye:

—¿Eta xua metha pamaitame? Panonobaponde Nacom patsipaebare xua jopa abe painya neexanaenexa tsane pocotsiwa caurimonae paca itoroba, jei Jesús.

**Meje yabara poxonae Jesús waetabatsi**

(Mt 26.47-56; Mr 14.43-50; Jn 18.2-11)

<sup>47</sup>Cataunxuae abu Jesús pijimonae tsi-paebuncua poxonaeru jiwi pin bicheito pata. Caenin Jesús pijimonae tatsi jiwana, pon pewun Judas, pomonae xua doce poyobexae, bapon pin bicheito matacapona. Judas Jesús imoxoyo caquita uncuatabatsi xua Jesús petsutsubinexa tsainchi. <sup>48</sup>Nexata Judas baraichi, Jesús barai, jeye:

—Xan ponxaein Nacom Tananeitapetsin, ¡Judas, jamaisa netsutsubame, apara metha jinya necaenaetichi ichamonaetha! jei Jesús.

<sup>49</sup>Pomonae Jesús pijimonae tatsi caquita umeinchi, poxonae barapomonae baxua tane xua Judas Jesús tsutsubatsi xua pecaenaetsinexatsi ichamonaetha, bapoxonae barapomonae Jesús baraichi:

—Pata Tanecanamataxeinaem, ¿barapomonae cusitha paucuboban? jei Jesús pijimonae tatsi.

<sup>50</sup>Jesús pijimonae tatsi jiwana caenin, bapon muxuyoro catsoniba, pon sacerdotemonae pia pepa pentacaponaenin tatsi tanacuitatsi bapon muxuyoro catsonibatsi po muxuyoroto pecoxa werucuiya. <sup>51</sup>Ichitha Jesús barai bapon jeye:

—Bara, bara, jei Jesús.

Pon muxuyoro catsonibatsi Jesús muxuyoro jayaba pecobetha. Bapoxonae bapon equeicha muxuyoro ducuanaya. <sup>52</sup>Jesús tsipaeba, sacerdotemonae pia pentacaponaei tatsi tsipaebatsi. Yawano tsipaebano pomonaetha pomonae penapataewi. Barichi tsipaebano pomonaetha pomonae Nacom pin pia bo peyapu enaewi. Daxita barapomonaetha Jesús cueicueijei, pomonae ichichipa xua Jesús pewaetabiwatsi. Jesús jeye:

—¡Pacapatame cusin yawa iwabi, icha paichim poxonae pacana exaname pontha pon jiwí pecaibin! <sup>53</sup>Poxonae daxita matakabi Nacom pin pia botha paca baru poponeibatsi, jopa pana newaetabim. Ichitha anoxuae barapo matakabi tsuxubi nama po matakabitha Nacom paca yabara cui copata xua painya neexanaewa tsane pocotsiwa paca necaitorobixae cauri, bapon Satanás pon peyaitaquireya jinain.

**Meje yabara poxonae Pedro Jesús yabara paebatsi xua jeye: “Jopa dapon yaitaeinyo”, yabara jeichichi Jesús**

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup>Nexata daxita barapomonae Jesús teicatsi. Yawano capoinchino sacerdotemonae pia pepa pentacaponaein tatsi pia bo beya tatsi. Pedro, Jesús tsiwiyo taju pu taetae tsiniyatsi. <sup>55</sup>Baraxotiya sacerdotemonae pia pentacaponaein tatsi pia botha tatsi bara po botha aisowa beya panatha tututha isoto itutaeta. Soldadomonae barapomonae nayatox-oro to exanaxubiya ena isototha. Baraxota iru Pedro naeca. <sup>56</sup>Yabuyo powa sacerdotemonae pia pepa pentacaponaein tatsi tanacuitatsi, poxonae Pedro tainchi barapowa, xua iru naeca baxota isototha

barapowa Pedro caununaya baraichichi, jeichichi:

—Bapon iru apara bayatha Jesús puna poponeibatsi, jei.

<sup>57</sup>Ichitha Pedro jume matawenta, jei:

—¡Petsiriwa, barapo pebin jopa yaitaeinyo! jei Pedro.

<sup>58</sup>Bapoxonae pirapaeyo iru ichundu pebin patopa. Bapon Pedro iru tainchi xua iru naeca baxota. Pedro baraichi bapon, jeye:

—Xam apara iru Jesús pijimonae tatsi jiwanam, jei.

Ichitha Pedro jume barai, jeye:

—¡Pebin, jopa dapomonae jiwanyo apara! jei Pedro.

<sup>59</sup>Poxonae cae hora yapucaewa, iruru ichun Pedro matowa baraichichi:

—Bapon apara napuna poneiba Jesús, tsipei bapon Galilea nacupindu, jei.

<sup>60</sup>Ichitha Pedro jume barai, jeye:

—¡Pebin, daumetha jopa taeinyo xua paebame! jei Pedro.

Poxonae Pedro cataunxuae baxua cueicueijei, bapoxonae caena nainya wacara pebto caein fiba. <sup>61</sup>Nexata Jesús napatomeicha necota, Pedro necoyatsi. Nexata Pedro nanta xeinataba xua bayatha Jesús Pedro tsipaebatsi, poxonae jeye: “Xam barapo merawithe, pewunaeya poxonae wacara pebto fibina xam copiya acobi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane. Barapoxonae iru nainya wacara pebto fibina”, jeichi Pedro xua Jesús paeba. <sup>62</sup>Nexata Pedro pesato bejoniya. Bichocono wecoyeyi, peajuntutanexae xua Jesús yabara paebatsi.

**Meje yabara poxonae Jesús cui caponatsi**

(Mt 26.67-68; Mr 14.65)

<sup>63</sup>Pomonae Jesús yapucaumeinchi, daxita barapomonae Jesús cui caponatsi, yawa butsin. <sup>64</sup>Jesús itacuere cutatsi,



paparuwatha yawa itabara cuaintatsino. Barapomonae Jesús baraichi:

—Incane pana netsipaebare, ¿jintam caitabara tsaquibobara xua bequein paca itabara cutatsi? jei.

<sup>65</sup> Daxita barapomonae Jesús tsumu jume baru paebatsi ainya jumeintha.

**Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi**

(Mt 26.59-66; Mr 14.55-64; Jn 18.19-24)

<sup>66</sup> Poxonae pentha tsina nabaru nacae-tuta penapataewi judiomonae, iru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyene tatsi. Daxita barapomonae Jesús capoinchi pecanamata caitorobi bicheito itabaratha tatsi xua peyainyabinexatsi, jeichi:

<sup>67</sup> —Incane pana netsipaebare, ¿Xam Mesías, pon Nacom necaitorobin? jei.

Jesús jume epa pita jeye:

—Icha: ‘Aa’, paca jei tsipaetsi, apara jopa pana nejume cowantsitsipaem.

<sup>68</sup> Icha paca yainyabichipatsi tayainyabiwan apara jopa pana nejume notsipaem. <sup>69</sup> Ichitha ponxaein Nacom Tananeitapetsin ecaein Nacom pia pecoxa weya tatsi, po Nacom peayapusu itorobi coyenewa pexeinaein, jei Jesús.

<sup>70</sup> Bapoxonae daxita barapomonae Jesús baraichi:

—¿Nexata metha xam Nacom Pexanto tatsim? jei.

Jesús jume epa pita jeye:

—Aa, barichi xuaunxuae papaebame painya coutha, jei.

<sup>71</sup> Nexata barapomonae caemonae natsipaeba najei:

—Anoxuae jopa nantawenonaetsi xua ichamonae Jesús peyabara paebiwatsi. Tsipei anoxuae nama yatsicaewa jume tainchi, xua bapon pia coutha nayabara paeba, jei barapomonae.

**Meje yabara poxonae Jesús uncua Pilato peitabaratha tatsi**

(Mt 27.1-2, 11-14; Mr 15.1-5; Jn 18.28-38)

**23** Nexata daxita penayatoroto exanaxubiya enae jiwi barapomonae asiya umenarucupa, Jesús teicatsi yawa capoinchi Pilato peitabaratha tatsi. Pilato bapon pon Judea nacuapiwi peyanacua ewatsinchi. <sup>2</sup> Baxota daxita barapomonae Jesús cui yopitatsi xua abe exana, jeye:

—Barapo pebin patan xua wajiwiwimonae jume cui tsacabatsi xua anaepana cana exanatsi. Yawano pajume tanno pocotsiwa jopa bewa pinae paratixi matoma catsi pontha pon romanomonae itorobiya pia pepa peewatsinchi. Matauta bapon nayabara paeba: ‘Xan apara Mesías pon jiwi itorobiya pepa Taewatsin’, jei, jei barapomonae.

<sup>3</sup> Nexata Pilato Jesús yainyabatsi, jeye:

—¿Xam judiomonae itorobiya pia pepa Neewatsin? jei.

Jesús jume nota namchi, jeye:

—Xuaunxuae paebame bara baxua apara, jei Jesús.

<sup>4</sup> Nexata Pilato barai sacerdotemonae pia pentacaponae tatsi yawa baraino jiwi, jeye:

—Jopa jume itaraerowinyo bapon xua po jumetha penayaita anae exanaewa, xua pebexubinexatsi barapo pebin, jei.

<sup>5</sup> Ichitha barapomonae jume daunweya cueicueije, jeye:

—Jiwi jopa juniya jume cui tsacabichi xua anaepana exanatsi pia pecuidubiwantha, daxita Judea nacuatha. Baxua Galilea nacuatha tamropata pitaba, equeicha aunxuae waxainya becui joparene, jei.

**Meje yabara poxonae Jesús uncua  
Herodes peitabaratha tatsi**

<sup>6</sup>Poxonae Pilato baxua jume taeba barapo bicheito baraichi, jeye:

—¿Jesús bara Galilea nacuapin? jei Pilato barapo bicheitotha.

<sup>7</sup>Barapo bicheito namchi, jeye:

—Aa, bapon Galilea nacuapin, jei barapomona.

Bapoxonae Pilato itoroba, Jesús itorobatsi, Herodes peitabaratha beya. Bapon Herodes pon Galilea nacuapiwi peyanacua ewatsinchi. Herodes siwa poneiba Jerusalén tomara. <sup>8</sup>Poxonae Jesús taebatsi Herodes, bapon bichocono juntu coyene weiweinanareca, tsipei bayatha Herodes cuinaya betaena. Herodes saya jume taiba xua Jesús yopiteibatsi. Herodes ichichipa tane xua Jesús petsita itutsi coyenewa exanaena. <sup>9</sup>Herodes Jesús matowa yainyabatsi. Ichitha Jesús jopa jume notsiyo. <sup>10</sup>Baraxota iru ena sacerdotemona pia pentacaponae tatsi. Iruru baxota ena pomona jivi pecuidubiwi Moisés pia peitorobi coyenewa tatsi. Daxita barapomona Jesús bichocono abe yabara paebatsi Herodes pia xantha tatsi. <sup>11</sup>Nexata Herodes yawano pia soldadomona tatsino daxita barapomona Jesús tsamu jume baru paebatsi. Jesús cui caponatsi, pexeinya paparuwa juma xatatatsi pocotsi paparuwan nama xataba pomona peyanacua ewatsi jivi. Equeicha Jesús itorobatsi Pilato peitabaratha beya, Herodes bara beitorobiya. <sup>12</sup>Barapo matabitha Herodes iruno Pilato naitacoxonabe. Baponbe caena bayatha saya penaita aenae-aenei jitonbe.

**Meje yabara poxonae Pilato jume  
baru jejei xua Jesús bara  
pebexubiwa tsainchi ichamona**

(Mt 27.15-26; Mr  
15.6-15; Jn 18.39-19.16)

<sup>13</sup>Sacerdotemona pia pentacaponae aewi tatsi iruru judiomona pia pentacaponae aewi, iruru daxita jivi, daxita barapo bicheito Pilato waba xua barapo bicheito penacaeutsinexa.

<sup>14</sup>Pilato barai barapo bicheito, jeye:

—Paxam barapo pebin pacapona taxantha. Pajam: ‘Barapo pebin daxita jivi jume cui tsacabatsi xua anaepana exanatsi’, pajam. Bayatha bequein baxua barapo pebin yabara yainyaban painya itabaratha pocotsiwa bayatha payabara paebame taxantha, ichitha jopa jume itaraerowinyo bapon, xua po jumetha penayaita anae exanaewa xua yabara pana netsipaebame. <sup>15</sup>Icha ichin xua jopa jume itaraerowinyo Herodes barichi. Daxota equeicha Jesús caibe itorobarenatsi waxainya berena. Yaitama Jesús jopa abe exanaeyo, daxota jopa bewa bexubi. <sup>16</sup>Tha cueintichi bapon. Tha bapoxonae pu copatichi, jei Pilato.

<sup>17</sup>Poxonae Pascua matabintha ichun ba bewa isanaxubichi. Pilato barapo Pascua matabintha nantawenona xua isanaxubina caein pon jivi pecubi botha peecaen, pon xua jivi ichichipa, xua bapon peisanaxubinexa tsainchi.

<sup>18</sup>Bapoxonae daxita jivi jume daunweya wawai, jeye:

—¡Soldadomona itorobare xua bapon pebexubinexatsi! ¡Barrabás painta pu sotabare! jei.

<sup>19</sup>Barrabás jivi pecubi botha etatsi, tsipei caena bayatha matabona ichamona xua barapo tomarapiwi najume tsacaba cana exanatsi xuano xua jivi jutebatsi. <sup>20</sup>Pilato ichichipa xua Jesús

pu copatatsi. Daxota equeicha barapo bicheito tsipaebatsi xua Jesús yabara paebatsi. <sup>21</sup>Ichitha equeicha barapo bicheito jume daunweya wawai Pilatotha, jeye:

—¡Bewa maisa naetotha tɔparucua exanaem! ¡Bewa maisa naetotha tɔparucua exanaem! jei.

<sup>22</sup>Equeicha Pilato tsipaeba barapo bicheito, jeye:

—¿Eta pocotsiwa xua metha jane xua abe exana? Xan jopa jume itaraerowinyo bapon xua po jumetha penayaita anae exanaewa xua pebexubinexatsi bapon. Tha cueintichi, tha bapoxonae pu copatabichi, jei.

<sup>23</sup>Barapo bicheito jopa juniya wawayo xua naetotha tɔparucua peexanaenexatsi Jesús. Iruru sacerdotemonae pia pentacaponae watsi jume daunweya wawairu, beya capanepa po coyene ichichipa pecana exanaewa. <sup>24</sup>Daxota Pilato namchi: “Moya paexande be pocotsi coyeneya paichichipame”, jei Pilato. <sup>25</sup>Nexata Pilato nama pu sotaba pon jiwi pecubi botha peecaen, pon jiwi ichichipa xua bapon peisanaxubiwa tsainchi. Bapon pewun Barrabás, pon waetabatsi poxonae jiwi najume tsacaba xuano poxonae jiwi jutebatsi. Bapoxonae Jesús copatatsi, Pilato copata, xua Jesús bara pebexubinexatsi judiomonae pejumeyainwa tatsi.

**Meje yabara poxonae Jesús tɔparucua exanatsi naetotha**

(Mt 27.32-44; Mr 15.21-32; Jn 19.17-27)

<sup>26</sup>Poxonae Jesús cataunxuae caenapoinchi tɔpa peexanadutsinexatsi naetotha, pebin waetabatsi, soldadomonae waetaba. Bapon pewun Simón, Cirene tomarapin. Bapon wexua werena pona. Bapon peutucuratha tabotsicatsi naeto, xua pecaponaenexa Jesús peputha tatsi.

<sup>27</sup>Jesús peputha tapoinchi pin bicheito, iru ainya yabuxino Jesús peputha tapoinchi. Daxita barapowaxi nantanuweya siwa namtsebiya wecoyeichi Jesús. <sup>28</sup>Ichitha Jesús necotabiya barai barapowaxi, jeye:

—Yabuxi Jerusalén tomarapiwaxi pam, jopa pana nesiwa namtsebiya wecoyande. Jame maisa painya coutha pana nasiwa wecoyande, painya pexuino pasiwa wecoyande. <sup>29</sup>Tsipei matabin othopaena po matabintha jiwi atene tsane. Barapo matabintha, jiwi jei tsane: ‘Juntu coyene weiweina po yabuxi jopa pexui xeinaeyo. Juntu coyene weiweina po yabuxi jopa bapana butixitha taenaetsi pexui. Juntu coyene weiweina po yabuxi bapana pexui jopa isainae’, jei tsane jiwi barapo matabintha. <sup>30</sup>Yawano jiwi namchi tsane: ‘Maisa xanepana xua wawerapaewa xua wanaca cunubabiwa demxuwan, yawano tsorobon naca matatsun wetoxebabina xua jopa wanaca itutsiwa tsane’, jei tsane jiwi barapo matabintha. <sup>31</sup>Xan wunae exanan dacotsiwa jiwi jopa juniya neperaxa exanaeyo. Ichitha pomonae abe peexanaewi nama jopa juniya bichocono peraxa exanaetsi beyacaincha xua neperaxa exana, jei Jesús.

<sup>32</sup>Cataunxuae Jesús ecapona. Iruru ponbe abe matowa peexanaeinbe, baponbe Jesús peputha tacapoinchibe, xua baponbe iru pebexubinexa tsainchibe poxonae Jesús bexotsi. <sup>33</sup>Daxita jiwi Jesús baru patatsi ichaxota po uruto be jiton matasipa piwa. Po uruto wun caunuteiba xua jei tsaibi: “La Calavera”, jei. Barapo uruto matasoitha Jesús tɔparucua exanatsi naetotha. Iruru ponbe jiwi pecaibinbe tɔparucua exanatsibe naetotha ichaxota imoxoyo Jesús ducua. Ichun Jesús petsocona wetauncuiyatsi, iru ichun

pecoxa wetauncuarenatsi. <sup>34</sup>Poxonae Jesús naetotha ducua, Jesús jeye:

—Axa yabara cui jüntemainare po coyene barapomonae necana exana, tsipei barapomonae jopa yaputaeyo xua necana exana, jei Jesús.

Soldadomonae nata tsaba Jesús pia paparuwan tatsi. Bapomonae ibotixi be-beya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. <sup>35</sup>Baraxota Jesús taeumeinchi jiwi. Ichitha nama pentacaponaeui Jesús cui caponatsi, barapomonae jeye:

—Bapon cain capanepibabei ichamonae, came jopa nacapanepaeyo. Icha bara bapon Mesías, pon Nacom pia peitapetsin, bu bara bapon pia coutha nacapanepa naeto wetsica, jei barapomonae.

<sup>36</sup>Soldadomonae iru Jesús cui capoinchi, imoxoyo caquita umenapoinchino. Barapo soldadomonae Jesús apatatsi po mera pewun vino, po mera mene atsu. <sup>37</sup>Barapo soldadomonae Jesús baraichi, jeye:

—¡Icha xaniwaicha judiomonae itorobiya pia pepa Neewatsim, moya jinya coutha nacapanepare! ¡Naeto wetsica ecoinca! jei soldadomonae.

<sup>38</sup>Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apra judiomonae itorobiya pia pepa peewatsinchi”, jei barapo petinadutsiwa.

<sup>39</sup>Ponbe Jesús pecuariya tacobe matatabarutatsibe, ponbe matowa abe peexanaeinbe, baponbe caein ichun, bapon Jesús biatainchi petupaeyainwa naetotha. Bapon namchi:

—¡Icha xaniwaicha xam Mesías, ponxaem Nacom caitapeta, moya jinya coutha nacapanepare! ¡Yawano pana necapaneparebe! jei bapon.

<sup>40</sup>Pon icha naetotha ducua, bapon jume matawenta, pon Jesús casebatsi, bapon jume matawentatsi. Pon icha naetotha ducua namchi, jeye:

—¿Xam jopa cuitaya junuwim Nacom? Apraunxuae tupaieinchibe ichaunxuae Jesús ichi tsane.

<sup>41</sup>Waxainchibe jopa juniya naca peraxa jubiyobe abe waexanaexaebe, apra bara xainwaicha xua nacata exana tsipei bayatha apra abe exanatsibe. Ichitha nama ponje jopa apra abe exanaeyo, jei.

<sup>42</sup>Nexata pon baxua penamchixae, bapon Jesús baraichi, jei:

—Jesús, neyabara cananta xeinare xua tana neyawenaexam po matacabitha poxonae patopeicaename xua jiwi neitorobinexam tsane, jei bapon.

<sup>43</sup>Jesús jume nota, jeye:

—Xaniwaicha bara catsipaebatsi, anoxuae tsane cabaru ecaeinchi ichaxota jiwi juntu coyene weiweinthopeiba, peitupanae nacuatheicha, jei Jesús.

### Meje yabara poxonae Jesús tupa

(Mt 27.45-56; Mr 15.33-41; Jn 19.28-30)

<sup>44</sup>Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mateinyaxae weya, beya yatabopiya. Tres po horabe quirei tsuncuae. <sup>45</sup>Poxonae cataunxuae xometo jopa penthiyo, bapoxonae paparuwa, po paparuwa Nacom pin pia botha ducua, barapo paparuwa nainya bopiya matonta tsitsiqueica. <sup>46</sup>Nexata Jesús jume daunweya wawai, jeye:

—Axa, nejumope pire, po jumope tana necatsixaemxae, jei Jesús.

Poxonae Jesús baxua caunuta, bapoxonae Jesús tupaiaicha.

<sup>47</sup>Soldadomonae pia pentacaponaein tatsi Roma nacupin, poxonae bapon

baxua taeba, bapoxonae Nacom wūnae jaintatsi, jeye:

—Jaina, apara baraponje jopa abe exanaeyo, itara ichamonae yopita xua abe exana, jei bapon.

<sup>48</sup>Daxita pomonae xua baxua taeu-mena baxota, barapomonae pia bo benawibiya. Poxonae namtotha enapona, daxita barapomonae nantacari cuain-tucobenapona poxorū bichocono ajūn-tucoyenetane xua Jesús pewisiwatsi. <sup>49</sup>Ichitha pomonae Jesús peyaitae jiwi, irū yabūxino, powaxi Jesús puna den-denatsi Galilea nacua werena, daxita barapomonae Jesús taju wetaeumeinyatsi poxonae ichamonae Jesús bexotsi.

**Meje yabara poxonae Jesús petūpaein ibo mūthūtha yauxatatabotatsi**

(Mt 27.57-61; Mr 15.42-47; Jn 19.38-42)

<sup>50</sup>Irūru pebin popona, bapon pewūn José, Arimatea tomarapin. Arimatea tomara eca Judea nacuatha. Bapon pentacui xanepanaein. Yawano beta pepoponaein Nacom peitūtha tatsi. José, bapon jiwana caein pomonae judiomonae pia pecanamata caitorobi bicheito tatsi. <sup>51</sup>Barapon José yabara jume cowūntsiya wūnae ewateiba po coyenewa xua poxonae Mesías patopaetsica pon jiwi itorobiya peewatsinexatsi. Poxonae pomonae pecanamata caitorobi bicheito exana poxonae Jesús bexotsi, baxua José jopa peburūya nacayabara nanta xeinaeyo. <sup>52</sup>José Pilato siwa poinchi. Pilato wūcatsi Jesús petūpaein, José wūca. <sup>53</sup>José naeto wepichica Jesús petūpaein. Bapoxonae José mata quiyontabareca barapo pexeinya paparuwatha. Bapoxonae José ibo mūthū iya boya, po mūthū jiwi mūthū tofobobapona. Barapo mūthūtha cataunxuae petūpaein ichūn jopa boyaetsi. <sup>54</sup>José baxua exana po mataqueitha pewūn penacui xaxainchi

matacabi poxonae judiomonae ba weta daxita xua penacuitsiwa pewūnaeya poxonae jopaena pentaquei seicae matacabi. Barapo pentaquei seicae matacabi imoxoyo jopaena.

<sup>55</sup>Powaxi Jesús puna den-denatsi Galilea nacua werena, barapowaxi pona mūthūtha, petāenexa xua Jesús mūthūtha xotsi. <sup>56</sup>Poxonae barapowaxi bo benawibiya, bapoxonae nacui wūnaetajeba petuxueiwan yawa penasiwanno, xua Jesús petūpaein tsixaxaintajebatsi.

**Meje yabara poxonae Jesús equeicha asū juina exanatsi petūpae cuiru coyene weya**

(Mt 28.1-10; Mr 16.1-8; Jn 20.1-10)

**24** Barapowaxi botha cuicuina pe-seicae matacabitha, Moisés pia peitorobi coyeneya pepaebixae, barapo matacabi yabara.

Poxonae judiomonae pia pentaquei seicae matacabi tatsi yapu caewaba bapoxonae patopa matacabi po matacabi xua copiya ducua cae semanatha. Barapo matacabitha poxonae aena pentha tsina, yabūxi pona mūthū beya ichaxota Jesús boca. Barapowaxi capona petuxueiwan yawa penasiwanno xua bayatha xaxaintajeba. Barapowaxi cueyabatsi icha yabūxi. <sup>2</sup>Poxonae barapowaxi barapo mūthū beya pata, barapowaxi taerūcupa xua po ibo panawatha yauxatatabota xua pin ibo panawa barapo ibo mūthū bayatha cou yaupataxubabota. <sup>3</sup>Barapowaxi joniya mūthi ya ichitha barapowaxi jopa taeyo xua Jesús pon Pecanamataxeinaein petūpaein pebocuaewa. <sup>4</sup>Barapowaxi yabara najūntū coyene cabenaeca. Jopa yaputaeyo xua exana tsipei jopa taeyo xua Jesús petūpaein boca. Barapowaxi tsita naitūtatsi nacueyatabe pebinbe ponbe xua asiya uncuabe, xuano

xua yawa paparuwa nama xatatabe, po paparuwa bichocono daedaena. <sup>5</sup>Barapowaxi bichocono junuwa, pijunuwi irabe necobareca. Barapo pebinbe barapowaxi baraichi, jeibe:

—¿Eta xua metha petupae cuiru coyewathana panecobompame pon equeicha asu barapo petupae cuiru coyene weya? <sup>6</sup>Xote jopa bocaeyo bapon. Bayatha bapon asu petupae cuiru coyene weya. Payabara jume nanta xeinare xua bayatha bapon paca tsipaeba poxona cataunxuae Galilea nacuatha popona. <sup>7</sup>Paca jeye: ‘Xan ponxaein Nacom Tananeitapetsin, bewa necaenaetsina pomonaetha pomona abe peexanaewi. Barapo abe peexanaewi naetotha tuparucua neexanadutsina. Ichitha equeicha po matabi acoibibetha asun juina neexanaena petupae cuiru coyene weya’, paca jei Jesús, jei barapo pebinbe xua barapowaxi tsipaebatsi.

<sup>8</sup>Nexata barapowaxi baxua jume cui yabara nanta xeinarcupa xua bayatha barapowaxi tsipaebatsi, xua Jesús tsipaeba. <sup>9</sup>Poxona barapowaxi muthu wenawibiya tomara beya, barapowaxi daxita paeba pocotsiwa tane. Jesús pia peitorobiwi tatsi pomona xua once poyobe barapomona tsipaebatsi, ichamonaeno tsipaebatsino, pomona Jesús jume cowuntatsi. <sup>10</sup>Powaxi yopita, xua powaxi Jesús pia peitorobiwi tsipaebatsi, ichowayo pewun María Magdalena powa Magdala tomarapiwayo, iru ichowayo Juana, ichowayo María, Santiago pena tatsi, yawanoru ichowaxino powaxi saya napona. <sup>11</sup>Ichitha Jesús pia peitorobiwi tatsi nanta xaina xua barapowaxi jopa xainyeyo, yawano jopa jume cowuntsichi barapowaxi.

<sup>12</sup>Bapoxona Pedro muthu becuinaepoinya. Muthu tututha tane xua meisa paparuwa boca. Bapon pia bo benawiya. Bapon baxua yabara nanta xaina nawita.

**Meje yabara poxonae Jesús pebinbe tsita naituta namtotha poxonae Emaús tomara beya ponabe**

(Mr 16.12-13)

<sup>13</sup>Barapo matabitha Jesús pijimona tatsi jiwana namtotha ecaponabe, siwa ponabe tomara, po tomara pewun Emaús. Barapo tomara eca once po kilometrobe xua Jerusalén tomara weya. <sup>14</sup>Baraponbe yabara natsipaebecaponabe namtotha xua mexuaetha exana. <sup>15</sup>Poxona cataunxuae yabara natsipaebecaponabe yawa yabara najume matsontsonobecaponabe, bapoxonae Jesús imoxoyo caquita uncuatababe yawa naponano. <sup>16</sup>Bequein baraponbe Jesús tainchi, ichitha baponbe jopa ita cui canaupatsibe xua Jesús peyaitaewatsi. <sup>17</sup>Nexata Jesús yainyaba, baponbe baraichibe, jeye:

—¿Eta xua namtotha yabara pana natsipaebecaponamebe? jei Jesús.

Baponbe juntu wecoyeya naruntababe peyabara natsipaebecaponaexa xua mexuaetha exana. <sup>18</sup>Ponbe penacueyatsixaebae caein pewun Cleofas. Bapon Cleofas Jesús jume notatsi, jeye:

—Daxita pomona jinompa Jerusalén tomaratha, daxita barapomona yaputane xua exana barapo matabintha. ¿Meisa xam compam jopa yaputaem xua mexuaetha exana? jei.

<sup>19</sup>Nexata Jesús baraibe baponbe, jei:

—¿Eta xua exanara barapo tomaratha? jei.

Baraponbe jume notabe, jeibe:

—Apara pana natsipaebecaponabe xua jiwi exana, pajan: ‘Xua po coyeneya Jesús Nazaret tomarapin cana exanatsi’, pajan. ‘Pon Nacom peitorobi jume papaebin, pon peitupanae petsita itatsi coyenein exana Nacom pia peayapusu itorobi coyeneya tatsi’, pajan. ‘Pon xanepanaya pecueicueijein Nacom

peitũtha tatsi, xuano xua jiwi peitũtha tatsi', pajan. <sup>20</sup>Sacerdotemonae pata tanecanamataxeinaewi irũ pata pecanamata caitorobiwi piraichi Jesús cobe waetabatsi pia Pilato peitorobinexa soldadomonae xua Jesús tũparucua peexanaenexa tsainchi naetotha. <sup>21</sup>Bequein pawũnae ewatan xua Jesús patopa xua peyawenaenexa tsane Israel nacuapiwi xua barapo Israel nacuapiwi panenebiya peexanaenexatsi, ichitha bapon jopa capanenebiyaeyo barapomonae. Yawano acoibi po matabibibe pu caewa poxonae Jesús bexotsi. <sup>22</sup>Yabuxi, powaxi xua paxan jiwana pan, barapowaxi pona mũthũ beya poxonae aena pentha tsina. Pona ichaxota Jesús boca. Barapowaxi pana tsipaeba xua tane. Daxua pana nenabenaeca exana bichocono. <sup>23</sup>Barapowaxi pinae jopa taeyo Jesús petũpaein. Bapoxonae pana netsipaeba xua pinae barapowaxi tsita naitũtatsi matatsunpiwi. Pinae matatsunpiwi namchi: 'Bayatha Jesús asũ', jei pinae. <sup>24</sup>Bapoxonae pata jiwimonae, barapomonae jiwana mũthũ beya pona. Barapomonae bara tane baxua, xua yabuxi yopita. Ichitha Jesús petũpaein jopa taetsi, jeibe xua Jesús tsipaebatsi.

<sup>25</sup>Nexata Jesús jume nota baraponbe, jeye:

—Paxam pomonae jopa peyaputae jiwi pam, xuano xua bewayo pajume cõwõtaponame pocotsiwa bayatha Nacom peitorobi jume pepaebiwi paeba. <sup>26</sup>Paxam payaputaneme xua Mesías pon Nacom itapeta, copiya bewa peraxa exanaeinchi. Nacom cana exanaena xua bapon patopaena Nacom pia peitorobi nacua beicha xua pexeinaenexa tsane Nacom pia peayapusu itorobi coyenewa tatsi, jei Jesús.

<sup>27</sup>Nexata Jesús tsipaeba baraponbe xua daxita i dapõ diborontha Jesús yabara paebatsi Nacom Pejume Diwe-

sitha. Copiya matha Jesús yaputane exana po diwesin xua Moisés tina xua Jesús yabara paebatsi. Bapoxonae equeicha Jesús yaputane exana xua po diwesi Nacom peitorobi jume pepaebiwi tina, xua Jesús yabara paebatsi.

<sup>28</sup>Jesús, irũ barapo pebinbe imoxoyo pata tomaratha, po tomara siwa ponaena. Barapo pebinbe naruntababe, ichitha Jesús mexeya maisa pona namto tomara weya. <sup>29</sup>Ichitha baponbe Jesús jume daunweya baraichi, jeye:

—Pana nebarũ ecare, qũrei tsanaicha tabopiya tsanaicha, quirei tsanaicha aparta, jeibe.

Daxota Jesús puna joniya ichaxota baraponbe patopabe xua barponbe pebarũ ecaenexa tsainchibe. <sup>30</sup>Nexata poxonae Jesús barũ eca pexaethopae-watha baponbe, bapoxonae Jesús wecobe pita pan. Paxa barai: "Axa, maisa jũntũ coyene weiweinan xua pata tana necatsiwam barapo pan", jei. Bapoxonae Jesús epa janaxuba pan. Baponbe catatsibe. <sup>31</sup>Poxonae Jesús baxua exana, caena bapoxonae baponbe Jesús yaitainchi. Baponbe yaitaebabe. Bapoxonae Jesús yacuinaya jemeicha aichurucuae tsanaya. <sup>32</sup>Baponbe natsipaebabe, najeibe:

—Maisa jũntũ coyene weiweinatstibe poxonae namtotha naca tsipaebecaponabe. Bapon naca yaputane exanabe xua bapon peyabara paebiwatsi Nacom Pejume Diwesitha, jei baponbe.

<sup>33</sup>Bapoxonae caena yacuinaya caibe iyabe Jerusalén tomara beya. Baraxotiya Jerusalén tomaratha baponbe caxinabe penacaetutsi jiwi pomonae once poyobe pomonae Jesús pia peitorobiwi tatsi. Irũru nanacaetuta pomonae cueyaba xua pomonae once poyobe pia pecueyabiwichi. <sup>34</sup>Barapo penacaetutsi jiwi namchi baponbetha, jeye:

—Aparta xainyei. Bara Jesús pon Pecanamataxeinaein, asũ. Aparta bapon

Jesús Simón tsita naitutatsi, jei barapo penacaeutsimonae.

<sup>35</sup>Nexata baponbe daxita yabara pae-babe barapo penacaeutsi jiwitha xua baponbe namtotha cuidubecapoinchibe. Matauta paeabeno xua baponbe mata-painya yaitaebabe xua Jesús yaitaebatsi poxonae Jesús pan epa janaxuba, xuano xua poxonae catatsibeno pan.

**Meje yabara poxonae Jesús  
tsita naituta pijimonae  
Jerusalén tomaratha**

*(Mt 28.16-20; Mr 16.14-18; Jn 20.19-23)*

<sup>36</sup>Poxonae cataunxuae tsipaebabe barapo diwesi, bapoxonae Jesús jemeicha tsita naituta barapomonae peitabaratha. Jesús jacobae barapomonae, jeye:

—Barabũ Nacom jũntema jinompa paca cana exana, jei Jesús barapo penacaeutsimonaetha.

<sup>37</sup>Barapomonae bichocono nabenaeca, yawa bichocono cuitaya junuwa. Barapomonae nanta xeina xua metha Jesús perowatsi tainchi.

<sup>38</sup>Ichitha Jesús barai barapo penacaeutsimonae, jeye:

—¿Eta xua metha junuwiya pana nabenaecame? ¿Eta xua metha ainya unthuton pam? <sup>39</sup>Pana necobe taema, yawa pana netaxu taema. Aparae xan tsocuaein. Pana nejayabare, yawa pana neyaputaema xua xan pepa jiton. Dowatsi bapana jopa wi ducuae, yawa bapana jopa piwa ducuae. Ichitha aunxuae nama yatsicaewa xaniwaicha pana netaneme xua xan pepa jiton icha paxam paichim, jei Jesús.

<sup>40</sup>Poxonae baxua Jesús najume weta, nacobe wan ituba, yawa nataxu wan ituba. <sup>41</sup>Ichitha came awiye barapomonae jopa jume cowũntsiyo poxoru barapo diwesi barapomonae tsita jume xeicatsi yawa barapo diwesi

yabara najũntũ coyene cabenaeca exanatsi. Jesús jeye:

—¿Paxam xote penabanaewiyo pax-einame? jei Jesús.

<sup>42</sup>Nexata barapomonae Jesús catatsi duweiyoy, poyo seba. <sup>43</sup>Jesús wecobe pita, yawa xane barapomonae peitutha tatsi. <sup>44</sup>Bapoxonae Jesús namchi barapomonaetha:

—Caena bayatha paca tsipaebatsi poxonae cataunxuae paca barũ ecatsi. Paca jeichiche: ‘Daxita po coyenein neyabara tina, daxita baxuan peneyabara jeixae, bewa necana exanaena. Daxita xua Moisés po diwesintha neyabara tina, bewa necana exanaena. Daxita pocot-siwa Nacom peitorobi jume pepaebiwi neyabara tina, bewa necana exanaena. Daxita xua salmos penaxũnae weixi diwesintha neyabara tina, bewa necana exanaena’, paca jeichiche, jei Jesús.

<sup>45</sup>Jesús barapomonae yaputane exana xua Nacom Pejume Diwesi paeba.

<sup>46</sup>Jesús barai barapomonae, jeye:

—Nacom Pejume Diwesitha neyabara jei: ‘Mesías bewa tũpaena, yawa equeicha asũ tsane po matababi acoibibe petũpae coyene cuiru weya. <sup>47</sup>Yawano bewa barapomonae Mesías pia pejume cowũnchiwichi bewa tsipaebina daxita nacuantha Nacom Pejume Diwesi tatsi Mesías pia peayapusũ itorobi coyeneyatha tatsi. Copiya petamropata notsinexa Jerusalén tomara weya. Barapomonae jei tsane jiwitha: Bewa icha jũntũ coyene Nacom patsita xeinaem xua bapoxonae Nacom painya nepaca cayabara jũntemainaewa tsane abe painya neexanae cuiru coyenewa, jei tsane barapomonae’, jei Nacom Pejume Diwesitha, jei Jesús. <sup>48</sup>Equeicha Jesús barai pijimonae, jeye:

—Paxam daxita jiwi patsipaebiname daxita xua pataneme. <sup>49</sup>Matauta pataemano xua pacata itorobicaeinchi Na-



com pia Pejumope t̄nax̄u tatsi xua bayatha Taxa yabara paca tsiw̄nae muxu duta. Barapo Nacom pia Pejumope t̄nax̄u tatsi yawa patopaena peayapus̄u itorobi coyenewa. Paenare xote Jerusalén tomaratha, beya poxonae barapon yawa pacata patopaena pia peayapus̄u itorobi coyenewa Nacom pia nacua tatsi wetsica, jei Jesús.

**Meje yabara poxonae Jesús  
athabe juinya Nacom pia  
peitorobi nacua beicha tatsi**

*(Mr 16.19-20)*

<sup>50</sup>Nexata Jesús pijimonaе bar̄u pona Jerusalén tomara weya, Betania tomara bebar̄u iya. Jesús namax̄u yoicha

itaboco beicha yawa tsipaeba Nacomtha xua pijimonaе tatsi nexa, xua pijimonaе petayawenaenexatsi.

<sup>51</sup>Poxonaе cataunxuae Jesús tsipaebuncua Nacom xua pijimonaе tatsi nexa, bapoxonaе Jesús athabe juinya exanatsi peitaboco beicha, Nacom exana. <sup>52</sup>Poxonaе Jesús pijimonaе tatsi baxua tane, bapoxonaе barapomonaе Jesús pecoutha tatsi namchi: “Maisa Wanacanamataxeinaein w̄nae”, jei. Barapomonaе Jerusalén tomara beya j̄nt̄u coyene weiweinaya caibe nawibiya. <sup>53</sup>Barapomonaе Jesús pia peitorobi jiwi tatsi Nacom pin pia botha, baxota Nacom jopa juniya w̄nae jainteibichi.

Baja Lucas.

## Jesucristo Pia Pexeinya Diwesi Jume Tatsi Juan Petinae Diwesi

### Meje yabara poxonae Mesías jiwi forotatsi, pon pewun “Pejume”, baraichi

**1** Poxonae cataunxuae daxita nacuan jopa forotsiyo, bapoxonae iruru caena bayatha Mesías popona, pon Nacom Pexanto tatsi, pon pewun “Pejume”, baraichi. Bapon Nacom caena bayatha baru poponeiba. Bapon apara bara Nacom. <sup>2</sup>Poxonae aena copiya, bapoxonae bapon caena bayatha Nacom baru popona. <sup>3</sup>Nacom cana exana xua Mesías daxita nacuan foforota. Dapocotsiwa aibi xua yaseicanaya xua pocotsiwa bapon jopa exanaeyo. <sup>4</sup>Bapon Mesías, pon “Pejume” baraichi bapon asu cana exana daxita jiwi tsipei bapon ataya xeina peasu coyenewa. Matautano bapon pena juntu coyeneno cana catsiya taexanano jiwi xua jiwi yaputaena po coyene pexainyei coyenewa. <sup>5</sup>Icha peoicha ichi xua jiwi yaweinchi xua beta pejinompaenexa poxonae quirei, bara juta ichi Mesías. Bapon jiwi yaweinchi xua beta xanepanaya pejinaponaenexa poxonae bapon Mesías cuiduba jiwi. Caurimonae pia pentacaponaein tatsi bequein ichichipa xua Mesías peamanayabiwatsi, ichitha caurimonae pia pentacaponaein tatsi jopa itacupaetsi xua Mesías peamanayabiwatsi tsipei bichocono Mesías peayapusuwa xeina.

<sup>6</sup>Bapoxonae iru Nacom itoroba pebin, pon pewun Juan. <sup>7</sup>Bapon patopa xua Mesías peyabara paebinexatsi, po wun xua jei “Pon Nacom itorobica”, jei. Bapon Juan daxita jiwi juntu coyene cui tsacaraba xua jiwi Mesías pewunaeya tatsi, penajuntu cui wunaetsinexa xua

daxita jiwi Mesías pejume cowuntsinexa tsainchi. <sup>8</sup>Juan apara Mesías aibi. Apara saya pia Mesías wunae yabara paebichi xua Juan peitorobixaetsi baxua. <sup>9</sup>Bapon Mesías patopeica po cae pin nacuathe tsique peyawenaenexa daxita carepaya jiwitha pia pecuidubi coyewantha.

<sup>10</sup>Bapon popona barapo cae pin nacuathe tsique. Bara bequein bapon exana pia coya barapo nacue, po cae pin nacuathe tsica pona, daichitha barapo cae pin nacuathepiwi jopa Mesías yaitaetsi po coyene xua bapon po cae pin nacuathe tsique forota daxita.

<sup>11</sup>Bequein bapon bara pia nacuathe patopeica, daichitha barapo cae pin nacuapiwi bapon jopa weiweinaya matenta wabichi. Matautano jopa yaputaetsi xua po coyene bapon Mesías apara pon Nacom itoroba.

<sup>12</sup>Ichitha ichamonae pomonae bapon matenta weiweinaya wabatsi xuano xua bapon jume cowuntatsi, barapomonae Mesías cana exana xua po coyeneya barapomonae Nacom piamonae tatsi penaexanaewa tsane. <sup>13</sup>Tsipei barapomonae jopa naexanaeyo Nacom pia pexui xua poxoru be jiton coyeneya penaexanumenaponaexae. Matautano barapomonae jopa naexanaeyo Nacom pia pexui xua poxoru pebin peichichipaexae xua pepichiwa piowa. Matautano barapomonae jopa naexanaeyo Nacom pia pexui xua poxoru coxiyun peichipaexae xua pexeinaewa pia pexui. Saya jame barapomonae Nacom pia pexui tatsi naexana, tsipei Nacom cana exana baxua.

<sup>14</sup>Barapon Mesías pon pewun “Pejume”, baraichichi, bapon poxonae naexana po cae pin nacuathe tsique bara bapon yatsicaya pepa jiton. Matautano naca baru popona bapon. Bapon wun ununatatsi “Jesús” baraichichi. Matautano bapon pejuntu coyene

wetsina bichocono jiwi antobetsi. Matautano bapon xainyeya pepaebin. Matautano paxan pacui tan xua Jesús exaneiba pia pexeinya peayapusuwatha po pexeinya peayapusuwa Jesús Paxa catatsi. Bapon Nacom Pexanto tatsi, bara yatsicaya compa tatsi pepa Pexanto. <sup>15</sup>Juan yabara paeba, Jesús yabara paebatsi. Juan jeye: “Bara barapon apara pon bayatha yabara paeban xua poxonae janje: ‘Pon cotacaya patopa xua xan tsiwana patopan, bapon jame bichocono peainya cuin, beyacaincha xan. Tsipei bapon caena bayatha popona poxonae xan aibin xua poxonae abu cataunxuae jopa naexanaeinyo’, janje”, jei Juan.

<sup>16</sup>Bapon Jesús naca cata daxita pia peyaputae coyenewan. Jopa juniya amanaya naca catsiyo baxuan, xua pocotsiwa nantawenonatsi jüntema watsita jinompaenexa tsane bapon.

<sup>17</sup>Moisés naca cata Nacom pia peitorobi coyenewan tatsi. Baxuan bichocono jopa juniya ayapubeyo. Ichitha Jesucristo, pon “Mesías” baraichi xua pocotsiwa naca cuiduba xua pinae Nacom jopa juniya antobeyo jiwi, xuano xua pocotsiwa naca cuiduba bara baxua yatsicaya pexainyei jume.

<sup>18</sup>Dapon aibi pon Nacom petaewatsi. Nacom Pexanto tatsi, pon yatsicaewa compa tatsi bapon naca cana exana xua Nacom wayaputaewatsi, paxa imoxoyo pebaru poponaexaetsi.

**Meje yabara poxonae Juan pon  
jiwi Pebautisabin Jesucristo  
yabara cueicueijeichi**

*(Mt 3.11-12; Mr 1.7-8; Lc 3.15-17)*

<sup>19</sup>Judiomonae pomonae ena Jerusalén tomaratha barapomonae sacerdotemonae itorobatsi iruru levitamona itorobatsi Juan beya, xua Juan peyainyabinexatsi xua pejeinexatsi: “¿Xam jintamumda?”

pejeinexatsi. <sup>20</sup>Juan beta nayabara paeba, jeye:

—Xan Mesías apara aibin, pon Nacom itorobicaena, pon wanaca capanenebiwa tsane, jei Juan.

<sup>21</sup>Nexata equeicha Juan yainyabatsi, jeichichi:

—¿Metha nexata xam jintamumda? ¿Bara xam bapom pon Nacom peitorobi jume pepaebim pon pewun Elías, pon bayatha tupa? jei barapomonae.

Juan jume nota, jeye:

—Xan bapon apara aibin, jei.

Equeicha Juan yainyabatsi, jeichichi:

—¿Nexata jintam metham? ¿Xam bapom pon Nacom peitorobi jume nepaebim pon bewa patopeicaena juinya pata tanecuidubinxea tsane Nacom Pejume Diwesi? jei barapomonae.

Equeicha Juan jume nota, jeye:

—Jume, xan apara aibin dapon, jei Juan.

<sup>22</sup>Nexata daxita barapomonae Juan baraichi, jeye:

—¿Eta pom metham? Tsipei xua pata tanejume notsiwam pata tha xuya tsipaebichi pomonae pana nejume caitoroba. ¿Etabe pana nejumichim tsane xua jinya coutha nenayabara paebiwam? jei barapomonae.

<sup>23</sup>Nexata Juan jume nota, jeye:

—Xan bapon aparán pon wawan ichaxota ira xuepana susato tsurucuae nacua beya, xua jan: ‘Patsi najuntu cui coyene wunaere, pon jiwi pia pepa Pecanamataxeinaeinchi nexa pia pepatopae wunaeya tsane’, xua jan ponxaein xua wawan ira xuepana susato tsurucuae nacua beya. Bayatha Isaías pejume diwesitha taneyabara jume cui wunae tsiwanaya paebixae pon Nacom peitorobi jume pepaebin, jei Juan.

<sup>24</sup>Daxita pomonae Juan baru cueicueijeichi, barapomonae fariseomonae

itoroba. <sup>25</sup>Daxita barapomonaē Juan yainyabatsi, jeichichi:

—Icha xam bapon Mesías aibim xuanō xua icha Elías aibim, yawa icha xam bapon aibim pon Nacom peitorobi jume nepaēbin, ¿nexata jintam cacui itoroba xua nebautisabiwa jiwī? jei barapomonaē.

<sup>26</sup>Juan jume nota, jeye:

—Xan meratha bautisaban, ichitha ichūn beta exanaēna beyacaincha xan. Bapon bara bequein painyamonae pia xantha tatsi popona ichitha bapon jopa payaitaem. <sup>27</sup>Bequein bapon nepuna patopaena, ichitha pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua tataxu mū isanaxubiwa tsane pia penataxu xatatsiwa tatsi, jei Juan.

<sup>28</sup>Daxita baxuan Juan yainyabatsi ichaxota po tomara pewūn Betania. Barapo tomara eca icha pocotsiwa xometo weecoina xua icha muxunenetha eca Jordán mentha. Barapo muxunenetha Juan bautisaba jiwī.

### **Meje yabara xua poxonaē Jesús pon “Cordero”, baraichichi**

<sup>29</sup>Icha mataqueitha Juan tane, Jesús tainchi xua Juan pexainya tarenatsi. Bapoxonaē Juan jiwitha jeye: “Incane pataema pon pejuntū coyene xeicaēin pon Nacom itorobica, pon ‘Cordero’, baraichichi xua oveja pebto penūn. Apra bapon pon jiwī petsitupaewa tsainchi xua abe pia peexanaē cuiru coyenein tatsi icha poxonaē ovejiyo ichi poxonaē tsitupa jiwī abe pia peexanaē cuiru coyenein tatsi. <sup>30</sup>Bara bapon apra pon bayatha yabara paēban poxonaē janje: ‘Pon cotacaya patopa xua xan tsiwūna patopan, bapon jame bichocono peainya cuin, beyacaincha xan. Tsipei bapon caena bayatha popona poxonaē xan aibin xua poxonaē abū cataunx-

uae jopa naexanaēinyo’, janje. <sup>31</sup>Xan copiyatha jopa yaputaēinyo xua Jesús bapon barapara Mesías, pon icha wūn Cristo, pon Nacom itorobica. Ichitha xan patopan tabautisabinexa meratha Israel piamonaē susato saineiwi xua barapomonaē bapon peyaputaewa tsainchi”, jei Juan.

<sup>32</sup>Juan yawa namchi, jeye: “Poxonaē bapon bautisaban bapoxonaē tan Nacom pia Pejumope tūnaxū tatsi xua peitaboco weruneica xua be topiboto yaruneica. Barapo Nacom pia Pejumope tūnaxū tatsi, bapon pexantha tapatopatsi. <sup>33</sup>Xan cataunxuae bapoxonaē xaniwaicha jopa yaitaēinyo bapon. Ichitha pon xua necui itoroba xua jiwī bautisaban meratha, nejei bapon: ‘Tae-name tajumope tūnaxū xua be topiboto tsecae xua peitaboco weruneica, po tajumope tūnaxū bapon pia xantha tapatopatsi. Poxonaē baxua taename bapoxonaē yaputaename xua barapo pebin apra pon jiwī pebautisabiwa tsainchi tajumope tūnaxūtha. Bapon barompaya pia pebautisabi coyenewa exanaēna xua poxonaē barapo tajumope tūnaxū catsibina pomonaētha pomonaē piamonaētha. Barapoxonaē barapo tajumope tūnaxū barapomonaē yanaba jinompaeinchi’, jei Nacom. <sup>34</sup>Bapoxonaē bapon yaitan xua deta cou apra Mesías, yaitama tan xua poxonaē bayatha Nacom netsipaēba. Daxota paca tsipaēbatsi xua bapon barapara Nacom Pexanto tatsi”, jei Juan jiwitha.

### **Meje yabara xua poxonaē Jesús itapeta pomonaē copiya pomonaē Jesús pijimonaē tatsi**

<sup>35</sup>Icha mataqueitha equeicha Juan pon jiwī Pebautisabin pecoutha patopa xuanō xua pebinbe nacueyatabe puna poinchi ponbe xua pia pepuna pon-aewichi jiwānabe tatsi. <sup>36</sup>Poxonaē Juan tane xua Jesús dawerena ichaxoyo Juan

dena, bapoxonae Juan jeye xua Jesús yabara jeichi:

—¡Pataema apara bapon pon ‘Cordero’ baraichi xua oveja pebto penun pon Nacom itorobica xua petsitupaenexa jiwí abe pia peexanae cui ru coyenein tatsi! jei Juan.

<sup>37</sup> Barapo pebinbe ponbe Juan pia pepuna ponaewichi jiwanabe tatsi, baraponbe Juan jume tainchibe xua Juan baxua paeba. Bapoxonae barapo pebinbe Jesús puna poinchibe. <sup>38</sup> Nexta Jesús napatomeicha necota caibeya yawa tanebe xua barapo pebinbe Jesús puna poinchibe. Bapoxonae baponbe Jesús yainyaba, jeye:

—¿Painya eta xuatsi?

Jesús jume notatsibe baponbe, jeibe:

—Pon jiwí Necuidubim, ¿exota pononame? jeibe.

<sup>39</sup> Jesús jume nota baponbe, jeye:

—Anetha, matha pataema, jei Jesús.

Nexta napuna ponabe yawa natanebe ichaxota Jesús popona. Barapo mataqueitha naecabe ichaxota Jesús popona. Jopa nawiyaebe tsipei xometo tabopiya tsanaichaba.

<sup>40</sup> Ponbe Juan pejume taexaetsibe xuanopuna ponaexaetsibe Jesús, caein pewun Andrés, Simón Pedro peweicho tatsi. <sup>41</sup> Andrés copiya matha peweicho wenawenei pon pewun Simón. Andrés barai peweicho, jeye:

—Paxan pacaxinan pon pewun Mesías, jei Andrés. (Barapo wun yabara caunuta xua jei “Cristo”, jei.)

<sup>42</sup> Bapoxonae Andrés peweicho capona, Simón capoinchi ichaxota Jesús uncuá. Poxonae Jesús tane xua poxonae Simón tainchi, jeye:

—Xam Simón Juan pexanto tatsim. Ichitha xam anoxuae newun Cefas tsane, barapo wun Cefas wun jei: ‘Iboto’, jei, jei Jesús. Seicaya griego jume wun ‘Pedro’, jei barapo wun iru jei: ‘Iboto’, jei.

### Meje yabara poxonae Jesús Felipe wabatsi, iru Natanael wabatsi

<sup>43</sup> Bapoxonae icha mataqueitha Jesús ichichipa xua peponaewa Galilea nacua beya. Bapoxonae Jesús, Felipe caxinatsi, yawa jeichichi:

—Nepuna ponde, jei Jesús.

<sup>44</sup> Barapo Felipe Betsaida tomarapin, po tomaratha iru Andrés popona iru Pedro. <sup>45</sup> Nexata Felipe Natanael wenaweneichi, yawa Felipe barai bapon, jeye:

—Pebin pacaxinan, pon bayatha Moisés yabara tsiwunae cui tina pia peitorobi diwesi jume coyenewatha. Matautano pon bayatha iruru Nacom peitorobi jume pepaebiwí yabara tsiwunae cui tina. Bapon apara Jesús, José pexanto tatsi. Bapon Jesús pon Nazaret tomarapin, jei Felipe.

<sup>46</sup> Natanael jeye:

—Dapon pebin pon pejuntu coyene xanepanaein Nazaret tomara weya bapana jopa pona. Tsipei daxita barapo tomarapiwí apara peajuntucuiruyapubewi, jei Natanael.

Felipe jume barai, jeye:

—Anetha incane matha taema, jei Felipe.

<sup>47</sup> Poxonae Jesús tane xua Natanael imoxoyo caquita pona, Jesús jeye:

—Patopa pebin pepa israelmonaepin, pon jopa jiwí pemuxuitorobin, pon xaniwaicha pejume cowantsin Nacom, jei Jesús.

<sup>48</sup> Nexta Natanael Jesús yainyabatsi. Natanael jeye:

—¿Eta ichim xua taneyaitaewam? jei.

Jesús jume nota, jeye:

—Bayatha catainchi poxonae higuerae nae tabacatha uncuame poxonae cataunxuae Felipe jopa cawabiyo, jei Jesús.

<sup>49</sup> Bapoxonae Natanael jume nota, jeye:

—Pon jiwi Necuidubim. ¡Apara xam bara Nacom Pexantom! ¡Apara bara xam Israel nacuamonae itorobiya pia pepa Neewatsim! jei Natanael.

<sup>50</sup> Jesús jume nota, jeye:

—Xam nejume cowuntame poxonae xua saya catsipaebatsi xua cacataewatsi higuera naetha. Ichitha bexa necotsiname xua exanaein pocotsiwa pexeinya peitupanae tsita itutsiwan, beyacaincha xua saya aunxuae catsipaebatsi, jei Jesús.

<sup>51</sup> Equeicha Jesús jeye:

—Xaniyan paca tsipaebatsi paxam pataename xua Nacom peitaboco saranaxuicaena. Matautano pataename matatsunpiwi xua jujuneibicaena xote tsique taxantha pia taneyawenaetsi. Matautano pataename xua equeicha caibe jujuneibiyaena taxainya weicha, ponxaein Nacom Tananeitapetsin, jei Jesús.

**Meje yabara poxonae jiwi tsinacaetuta pexaewa Caná**

**tomaratha xua penabanaenexa xua poxonae pebin pita pecotsiwa**

**2** Poxonae acoibi po matabibibe yapucaewa, bapoxonae iruru pexaewa tsinacaetuta Caná tomaratha xua Galilea nacuatha xua pebin pecotsiwa pepichixae. Jesús pena tatsi iru baxota natane pewabixaetsi. <sup>2</sup> Iru Jesús wabatsi, iru pijimonae tatsi wabatsi xua penaponaewa tsane barapo pexaewa petsinacaetutsiwatha xua poxonae pebin pecotsiwa pita. <sup>3</sup> Vino mera omeicha mene weranapenta tsipei daxita jiwi apa. Daxota Jesús pena baraichi, jeye:

—Nama equeicha ameneibi vino mera omeicha mene weranapenta, jei Jesús pena tatsi.

<sup>4</sup> Jesús jume nota, jeye:

—Ena, abu bexabu abu jopa yabara neyainyabinde baxua. Canta daxua

aichica xua petsita itubiwa taexanaewa, jei Jesús.

<sup>5</sup> Bapoxonae barapowa barai pomonaetha pomonae pexaewa carena tsaibi, jeye:

—Moya paexande xua pocotsiwa bapon paca itoroba, jei barapowa.

<sup>6</sup> Baxota iratha ena seis po juruwatobe sayawan. Barapo pin juruwaton barompaya cae juruwatontha tsiniya cincuenta po mera bosibu matabuxuyobe tutu canaupá. Icha juruwatontha tsiniya setenta po mera bosibu matabuxuyobe tutu canaupá. Barapo juruwatontha ba judiomonae mene yaebeiba xua barapo merantha penacobe quiateibinexa xua daxota jopa Nacom petsita najuntu coyene taxobeibinexatsi. <sup>7</sup> Pomonae pexaewa carena tsaibi barapomonae Jesús barai, jeye:

—Barapo saya juruwatontha pawunbare mera, jei.

Bapoxonae barapomonae barapo juruwaton wunba. <sup>8</sup> Bapoxonae Jesús barai, jeye:

—Anoxuae barapo juruwaton tsiwixi pajiwana mene wenore xua po mera equeicha vino mera exanan. Pacaponare pontha pexaewa mata canabane, jei Jesús.

Daxota barapomonae bara baxua exana xua Jesús peitorobixae. <sup>9</sup> Pon mata canabane pexaewa, bapon mene pana barapo vino mera, po vino mera copiya saya mera. Ichitha bapon jopa yabara yaputaeyo xua barapo vino mera xua eta werena metha mene capona. Saya meisa pomonae mene eepacaponá barapo juruwatontha barapomonae yaputane xua barapo juruwatontha jiwana mene nota xua po mera vino mera naexana. Bapoxonae pon mata canabane pexaewa waba, pon pecotsiwa pita bapon wabatsi. <sup>10</sup> Bapon barai, pon pecotsiwa pita baraichi, jeye:

—Daxita jiwi ba poxonae aena copiya matha apata po vino mera mene xeica. Poxonae jiwi ba wenaxuba po vino mera xeica, bapoxonae ba barapo jiwi ba equeicha apatatsi po vino mera be conotha xaexaeca. Ichitha nama xam icha coyene exaname. Po vino mera be conotha mene xaexaeca matha copiya apatame jiwi barapo vino mera. Poxonae barapo vino mera jiwi wenaxuba po vino mera be conotha mene xaexaeca bapoxonae apatame po vino mera bichocono xeica, jei bapon.

<sup>11</sup>Baxua xua Jesús exana Caná tomaratha xua Galilea nacuatha. Barapo pexeinya petsita itutsi coyenewa poxonae xua aena copiya matha exana pia peayapuswatha. Poxonae baxua Jesús pijimonae cui tainchi, Jesús jume cowuntatsi pijimonae.

<sup>12</sup>Poxonae baxua pexaewa najain weta bapoxonae Jesús pona Capernaum tomara beya. Bapon pena baru pona yawa peweicho jiwi baru pona, matautano pijimonae baru pona. Baxota Capernaum tomaratha daxita Jesusbaru be caentacabiyobe ena.

**Meje yabara poxonae Jesús aisowa  
benapuna torobabiya pomonae  
Nacom pin pia botha pecaenaetsiwi**  
(Mt 21.12-13; Mr 11.15-18; Lc 19.45-46)

<sup>13</sup>Tsipei poxoru imoxoyo barapo maticabi tsaneba xua Pascua wun maticabin daxota Jesusbaru Jerusalén tomara beya pona. Barapo Pascua wun maticabin, po maticabin poxonae judiomonae yabara nanta xeina xua pinae caena bayatha pia pamo susato jiwi tatsi panenebiya Egipto nacua weya. <sup>14</sup>Baxota Jesús caxina Nacom pin pia botha pomonae baxota caenaeta buey duweimonae, yawa ovejamonaeno yawa topibomonae caenaetano. Matautano Jesús tane xua pomonae ena pexaethopaewantha ichaxota paratixi

nantiya nacatsiba jiwi. <sup>15</sup>Poxonae Jesús tane barapomonae, Jesús bapoxonae exana xua pocotsiwa xota cuainta xua duwein peru muto. Daxita barapomonae Jesús Nacom pin pia bo wenapuna torobabiya. Yawano Jesús muxuna itaweta xua barapomonae piawanaxae, bueymonaeno, ovejamonaeno. Pomonae xua ena pexaethopaewantha xua ichaxota nantiya nacatsiba paratixi Jesús iratha tabebai paratixi, yawa irabe tayebabareca torobabiya pexaethopaewan. <sup>16</sup>Pomonae baxota caenaeta topibo, Jesús barai barapomonae, jeye:

—¡Daxita baxuan panore barapo Nacom pin pia bo weya pocotsiwan pacaenaetame! ¡Barapo Nacom pin pia bo jopa pacana exanaeinde xua be pocotsi bo jiwi ichaxota caenaeta pexaewa! jei Jesús.

<sup>17</sup>Bapoxonae Jesús pijimonae tatsi yabara jume cui nanta xeinarucupa xua Nacom Pejume Diwesitha namchi xua Cristo yabara jeichichi xua jeye: “Yabara nejuntu coyene yuca xua yabara nanta xeinan xua pocotsiwa Taxa pia pin pia botha tatsi xeina. Daxota jiwi necaseba”, jei Nacom Pejume Diwesitha xua Cristo yabara paebatsi.

<sup>18</sup>Nexata judiomonae Jesús yainya batsi, jeye:

—¿Eta po pexeinya petsita itutsi coyenewa pana netsita itutsiname? Bapoxonae xain payaputaecin xua bara cou xam deta xeiname Nacom pia peitorobi coyenewa tatsi xua daxota jiwi cui itawetame Nacom pin pia bo tatsi weya, jei.

<sup>19</sup>Jesús jume nota, jeye:

—Icha barapo bo weraweraca paexanaename, equeicha acoibi po maticabibetha beta caewa xanebin, jei Jesús.

<sup>20</sup>Nexata barapo judiomonae Jesús tsipaebatsi, jeye:

—Jiwi barapo Nacom pin pia bo tatsi acaba ainya wei, cuarenta y seis po

weibetha nacobe weta. ¿Eta pocotsiwa baxua paebame xua jinya saya acoibi po matacabibetha equeicha wūnae exanaetsi? jei judiomonaē.

<sup>21</sup>Po bo xua Jesús yabara paeba apara xua nayabara paeba pia pepon. <sup>22</sup>Daxota poxonae Jesús equeicha asu juina petūpae cuariyatha Jesús pijimonaē yabara jume cui nanta xeinatsi xua bayatha Jesús paeba. Daxota jume cowūnta Nacom Pejume Diwesi. Yawano Jesús jume cowūntatsi pocotsiwa xua paeba.

### Meje yabara xua po coyene Jesús daxita jūntu coyene yaputane jiwi

<sup>23</sup>Poxonae Jesús Jerusalén tomaratha popona xua Pascua wūn matacabintha bapoxonae pin bicheitomonaē Jesús jume cowūntatsi. Daxota barapo bicheiton jume cowūnta tsipei tane Jesús pia pexeinya petsita itutsi coyenewan tatsi. <sup>24</sup>Jesús jopa yabara jume cowūntsiyo barapomonaē bequein jume cowūntatsi taetha. Tsipei Jesús daxita jūntu coyene yaputane jiwi xua ainya jūntu coyene pexeinaewa. <sup>25</sup>Daxota jopa nantawenonaeyo xua ichamonaē Jesús petsipaebiwatsi icha jiwi yabara. Tsipei bapon Jesús daxita jūntu coyenein yaputane jiwi.

### Meje yabara poxonae Nicodemo Jesús tsipaebatsi

**3** Irurū pebin popona pon fariseomon- aepin, pon pewūn Nicodemo. Bapon judiomonaē canamataxeinatsi. <sup>2</sup>Bapon Nicodemo merawi Jesús siwa poinchi, yawa Jesús jeichichi:

—Pon jiwi Necuidubim, bara paxan payaputan xua Nacom caitoroba xua jinya pata tanecuidubiwam tsane. Tsipei ichūn jopa itacūpaetsi xua pexeinya pet- sita itutsi coyenewan peexanaewa Na- com pia peayapusūwatha tatsi icha Na- com jopa yantsiyo bapon icha be xua

poxonae ichim poxonae xua exaname Nacom necayantsixae, jei Nicodemo.

<sup>3</sup>Nexata Jesús Nicodemo jume notatsi, Jesús jeye:

—Xaniyan catsi paebatsi. Pon eque- icha jopa caewa naexanaeyo xua pena jiton penaexanaenexa, bapon jopa itacu- paetsi xua Nacom piamonaē tatsi pe- naexanaewa pomonaē Nacom itorobiya peewatsixae, jei Jesús.

<sup>4</sup>Nicodemo Jesús jume epa notsiya yainyabatsi. Nicodemo jeye:

—¿Eta bichi xua pebin pon bayatha pinyo xua equeicha caewa pena jiton naexana? ¿Metha bara itacūpatsi xua pena equeicha tsiperū wepatopa xua equeicha caewa penaexanaenexa pena jiton? jei Nicodemo.

<sup>5</sup>Jesús jume nota, jeye:

—Xaniyan catsipaebatsi. Pon meratha jopa bautisabichi xuano xua icha jopa xeinaeyo Nacom pia Pejumo pe tūnaxū tatsi po jumope tūnaxū bapon icha jūntu coyene xeina pecana exanaenexatsi, bapon jopa itacūpaetsi xua Nacom piamonaē tatsi penaexanaewa pomonaē Nacom itorobiya peewatsixae.

<sup>6</sup>Pomonaē pena jiwi tsiperū wenaexana bara jiwi coyeneya yacuiya naexana. Pomonaē naexana Nacom piamonaē tatsi barapomonaē Nacom pia Pejumo pe tūnaxū tatsi cana exana xua barapomonaē pexeinaewa icha jūntu coyene. Barapomonaē yacuiya naexana Nacom piamonaē tatsi tsipei exana pocotsiwa Nacom pia Pejumo pe tūnaxū tatsi itoroba. <sup>7</sup>Jopa najūntu coyene cabenaecaeinde xua tacatsipaebiwatsi xua tacajeiwatsi: ‘Daxita jiwi bewa pena jiwi naexanae equeicha’, tacajeiwatsi xua. <sup>8</sup>Joibo ba pona ichaxota ichichipa peponaewa. Joibo busi taneme, ichitha jopa yaputaem xua ichaxota weponarena, yawa jopa yaputaem xua xota ponaena. Icha jiwi ichi xua jopa taeyo joibo ichitha tane xua joibo



bubujei barichi jiwi jopa taeyo Nacom pia Pejumope t̄nax̄u tatsi. Saya jiwi yaputane xua icha jiwi j̄unt̄u coyene xeica cana exainchi barapo Nacom pia Pejumope t̄nax̄u tatsi, jei Jesús.

<sup>9</sup>Nexata Nicodemo equeicha Jesús yainyabatsi, jeye:

—¿Eta metha bichi Nacom pia Pejumope t̄nax̄u tatsi? jei Nicodemo.

<sup>10</sup>Jesús jume barai, Nicodemo jume baraichi, Jesús jeye:

—Xam pon daxita neyaputaecin israelmonae pexantha tatsi yawa pon jiwi necuidubim barapomonae pexantha tatsi. Bequein barapo jitom ichitha jopa baxua yabara yaputaem xua tacatsipaebiwatsi. <sup>11</sup>Xaniyan catsipaebatsi xua paxanbe, Juan, pon jiwi Pebautisabin, ir̄u xan Jesús paca tsipaebatsi xua pocotsiwan payaputanbe. Matautano paxanbe bara yatsicaewa pata paebinbe xua patanbe bayatha. Ichitha paxam pomonae judiomonae pam jopa yabara pana nejume cow̄ntsim pocotsiwa paxanbe paca tsipaebatsi. <sup>12</sup>Icha jopa pana nejume cow̄ntsim pocotsiwan xua barapo cae pin nacuathe yabare paca tsipaebatsi bara paichim jopa pana nejume cow̄ntsiapaem icha yabara paca tsipaebichipatsi pocotsiwan Nacom pia peitorobi nacua beicha tatsi.

<sup>13</sup>“Dapon aibi pon peitaboco beicha pona Nacom beicha xua equeicha caewa patopeica bara wetsica. Daxota jiwi jopa yabara yaputaeyo Nacom pia peitorobi nacua beicha tatsi. Saya meisa jame xan ponxaein Nacom Tananeitapetsin patopeican tanacua wetsica daxota yabara yaputan Nacom pia peitorobi nacua beicha tatsi. <sup>14-15</sup>Caena bayatha ira xuepana susato tsurucuae nacuatha, pinmonae werapa poxoru jomon sinebatsi. Daxota Moisés penainto asiya duta xua be jomo canaxobiya exana. Pomonae jomon sinebatsi, poxonae barapomonae tane barapo penain

jomo, bapoxonae jopa werapaeyo. Icha Moisés ichi bara neichi tsane jiwi. Xan ponxaein Nacom Tananeitapetsin, ichamonae asiya naetotha t̄parucua neexanaena. Barichi tsane pomonae yabara nejume cow̄ntsina po coyene xua xan naetotha tatsit̄upaewa tsane xua barapomonae abe pia peexonae cuiru coyenein tatsi, barapomonae jopa weraweracae tsane. Barapomonae xeinaena peaj̄unt̄uyapus̄wa, po peaj̄unt̄uyapus̄wa ataya tsiteca”, jei Jesús.

**Meje yabara xua Nacom daxita  
jiwi bichocono antobetsi  
barapo cae pin nacuathe**

<sup>16</sup>Equeicha Jesús nayabara paeba poxonae Nicodemo tsipaebatsi. Jesús jeye: “Nacom antobe bichocono daxita carepaya jiwi xua barapo cae pin nacuathe. Daxota Nacom Pexanto itoroba pon yatsicaya compa tatsi. Pon Nacom Pexanto tatsi jume cow̄ntatsi, bapon jopa weraweracae tsane. Bapon peaj̄unt̄uyapus̄wa xeinaena, po peaj̄unt̄uyapus̄wa ataya tsiteca. <sup>17</sup>Nacom Pexanto jopa itorobicaeyo xua saya barapo cae pin nacuepiwi atene peexanaenexatsi xua penatsicuentisixae xua abe peexanaexae Nacomtha. Saya apara jame Nacom Pexanto itorobica xua jiwi pecapanenebiyaenexatsi penatsicuentisiwa weya.

<sup>18</sup>“Pon Nacom Pexanto tatsi yabara jume cow̄ntatsi, bapon jopa Nacom tsitatsi xua atene peexanaewa tsainchi xua penatsicuentisixae xua abe peexanaexae Nacomtha. Ichitha nama pon Nacom Pexanto tatsi jopa yabara jume cow̄ntsiichi bapon Nacom bayatha tsitatsi xua atene peexanaewatsi tsainchi xua penatsicuentisixae jopa peyabara jume cow̄ntsiixaetsi Nacom Pexanto tatsi, pon bara compa. <sup>19</sup>Pomonae jopa Nacom Pexanto tatsi yabara jume

cowantichi, barapomonae Nacom bayatha tsitatsi xua atene peexanaewatsi xua penatsicuentisixae xua abe peexanae cuiru coyenein peexanaexae. Tsipei poxonae Nacom Pexanto tatsi patopeica po cae pin nacuathe tsique, barapomonae ichichipa exana abe peexanaewan beyacaincha xua peexanaewa pocotsiwa Nacom itoroba. <sup>20</sup> Tsipei daxita pomonae abe peexanaewi barapomonae Nacom Pexanto tatsi aichaxaibichi daxota jopa imoxoyo caquita ponaetsi bapon. Barapomonae jopa ichipaeyo xua peyaputaewatsi, xua Nacom Pexanto tatsi peyaputaewa xua pocotsiwa barapomonae abe exana. <sup>21</sup> Ichitha pomonae pejume cowantsiwi, pomonae yatsicaewa beta xanapanaya exana, barapomonae Nacom Pexanto tatsi imoxoyo caquita poinchi. Tsipei barapomonae ichichipa xua peyaputaewatsi xua Nacom Pexanto tatsi peyaputaewa tsane xua pocotsiwa barapomonae wuna peexanaexae, xua pocotsiwa Nacom peitorobixae”, jei Jesús Nicodemotha poxonae nayabara paeba.

**Meje yabara poxonae Juan pon  
jiwi Pebautisabin equeicha  
Jesús yabara cueicueijeichi**

<sup>22</sup> Poxonae Jesús najume weta xua poxonae Nicodemo tsipaebatsi, bapoxonae pirapae Jesús pijimonae baru pona Judea nacua beya. Barapo nacuattha Jesús ainya matababintha pijimonae baru popona. Matautano baxota Jesús pijimonae cui itoroba xua jiwi pebautisabiwa tsainchi. <sup>23</sup> Iruru Juan bautisaba jiwi Enón tomaratha, po tomara eca ichaxota imoxoyo po tomara pewun Salim. Tsipei baxota menein nawita. Pimonae Juan itata patatsi, yawa Juan bautisaba barapomonae. <sup>24</sup> Juan baxua pewunaeya exana xua poxonae jiwi pecubi botha etatsi.

<sup>25</sup> Bapoxonae pomonae Juan pia pepuna jinompaewichi tatsi iru judiomonaeno, barapomonae yabara baru najume matsontsonobatsi pebautisabi coyenewa. <sup>26</sup> Barapomonae Juan siwa poinchi xua Juan yabara peyainyabinexa tsainchi baxua. Jeye Juantha:

—Pon jiwi Necuidubim, incane matha taema. Pon caniwi cabaru popona Jordán mentha xua icha muxunene beya, pon bayatha yabara pana netsipaebame, bapon nama anoxuae bautisabauya jiwi yawa bapon puna poinchi daxita jiwi, jei Juan pijimonae tatsi xua Jesús yabara paebatsi.

<sup>27</sup> Nexata Juan barai barapomonae, jeye:

—Jiwi ba jopa xenaeyo icha Nacom jopa catsiyo. <sup>28</sup> Paxam bara yatsicaewa pana nejume taneme xua paca jeichi: ‘Xan dapon aibin Mesías’, jan. ‘Apara bapon pia pewunaeya tatsi Nacom neitoroba’, jan. <sup>29</sup> Poxonae ba pebin pecotsiwa pita bapon pona yabuyo pia botha tatsi. Pon piowa pepichixae bapon pia jiton tatsi bichocono juntu coyene weiweina xua bapon piowa pepichixae poxonae jume tauncua xua pia jiton tatsi piowa pita. Icha pebin cana ichichi pia jiton, bara juta ichin Jesucristotha anoxuae. Bichocono juntu coyene weiweinan tsipei daxita jiwi Mesías puna poinchi. <sup>30</sup> Bapon bewa mataropeicha ainya cui naexanaponae jiwi peitutha tatsi. Xan bewa jopa ainya cui naexanaponaein tsane jiwi peitutha tatsi, jei Juan.

**Meje yabara poxonae Juan yabara  
paeba pon peitaboco wetsica pona**

<sup>31</sup> Equeicha Juan piamonae barai, jeye:

—Pon peitaboco wetsica pona, bapon jame bichocono peyaputaecin beyacaincha xua ichamonae. Pon

xua po irathepin bapon apara saya jiton. Bapon saya yabara cueicueijei pocotsiwa po irathe yabara. Ichitha pon peitaboco wetsica pona, bapon daxita canamataxeina. <sup>32</sup>Bapon bequein jiwi yabara tsipaebatsi pocotsiwa xua bayatha tane peitabocotha, xuano xua pocotsiwa bayatha jume tane peitabocotha, ichitha jiwi jopa jume cowantsiyo pocotsiwa bapon paeba. <sup>33</sup>Icha pebin jume cowanta pocotsiwa paeba pon peitaboco wetsica peponaexae xua Nacom yabara paebatsi, barapon tsita itapeinya xeina ichamonaetha, xua apara Nacom bara xaniwaicha pepaebin. <sup>34</sup>Pon xua Nacom itoroba bara bapon cueicueijei Nacom pejumein tatsi, tsipei Nacom jopa juniya nacana jumope tunaxu catsiyo xua bapon peyawenaewa tsainchi. <sup>35</sup>Nacom bichocono antobe Pexanto. Pexanto cata peayapusu itorobi coyenewa xua bapon daxitan pecanamataxeinaewa tsane. <sup>36</sup>Pon Nacom Pexanto tatsi yabara jume cowantinchichi, bapon peajuntuyapusuwa xeinaena, po peajuntuyapusuwa jopa bapana weraweracaeyo. Ichitha pon Nacom Pexanto tatsi jopa yabara jume cowantichichi, bapon jopa xeinae tsane barapo peajuntuyapusuwa. Nama bapon Nacom cana exanaena xua bapon bichocono atene peexanaewa tsainchi, jei Juan.

#### **Meje yabara poxonae Jesús tsipaeba powayo Samaria nacuapiwayo**

**4** Jesús jume tane xua jiwi tsipaeba fariseomonaetha xua jeye: “Jesús pinmonae xeina, pomonae pia pepuna ponaewichi. Jesús toxechiuya jopa juniya bautisabiyo jiwi beyacaincha xua poxonae Juan bautisaba jiwi”, jei jiwi fariseomonaetha. <sup>2</sup>(Daumetha Jesús apara jopa bautisabiyo. Apra jame Jesús pijimonae tatsi bautisaba jiwi.)

<sup>3</sup>Poxonae Jesús jume yaputane xua jiwi paeba fariseomonaetha, bapoxonae Jesús pijimonae Judea nacua webaru warapiya. Caibeya warapa Galilea nacua beya.

<sup>4</sup>Poxonae warapa Galilea nacua beya bewa ponaena ichaxoyo Samaria nacua iya, tsipei namto baxoyo ducuiya. <sup>5</sup>Bapoxonae Jesús pijimonae baru patopa Sicar tomaratha, po tomara eca Samaria nacua. Barapo tomara, Sicar tomara eca ichaxota imoxoyo po iriyo caena bayatha Jacob pexanto cata. Barapo Jacob pexanto tatsi pewun José. Jacob iru pexanto tatsi caena bayatha tupa. <sup>6</sup>Barapo iriyotha mene muthu eca, barapo mene muthu pewun, “Jacob pia muthu”, jei. Tsipei Jesús natsepapona namto dena, tsipei taju werena pona, daxota barapo mene muthu muxuburutha ecopa. Matautano bapoxonae mateinyaxae tsuxubi iru. <sup>7-8</sup>Iru bapoxonae Jesús pijimonae tatsi tomara be-iyiya pecomocaenexa pexaewa. Barapomonae pecoutha tatsi yabuyo Samaria nacuapiwayo patopa ichaxota Jesús po mene muthu muxuburutha eca. Jesús barai bapowa, jeye:

—Mera necare, jei Jesús.

<sup>9</sup>Bapoxonae barapo Samaria nacua-monaepiwayo Jesús jume notatsi. Barapowa jeye:

—¿Eta pocotsiwa metha mera nebaru ununame? Apra judiomonaepim iru xan apara Samaria nacua-monaewayon, jei.

Barapowa baxua paeba tsipei judiomonae iru Samaria nacua-monae daxita barapomonae jopa naita coxonaeyo. <sup>10</sup>Nexata Jesús jume nota, jeye:

—Icha xam yaputaetsipame xua pocotsiwa Nacom cata jiwitha, yawa icha neyaputaetsipame pon aunxuaein mera cawucatsi, bapoxonae jame

newaetsipame mera, xua icha mera, po mera jiwi peajuntuyapuswa xaina cana exainchi, po peajuntuyapuswa jopa bapana weraweracaeyo, jei Jesús.

<sup>11</sup> Bapowa Jesús jume notatsi, jeye:

—Pon jiwi Necanamataxeinaem, apara jopa xeinaem xua xota mene capatame. Yawa po mene muthu apara tajū deca. ¿Jinya exota po mene boca inta mene capitichi, po mera jiwi ajuntuyapusu exainchi? <sup>12</sup> Barapon Jacob pata tamo susatopin pana cata barapo mene muthu. Bapon barapo mene muthu mene capaneiba peapeibinexa, iru pia pexui tatsi mene capaneiba xua peapeibinexa, matautano mene capaneiba peapateibinexa pia duweimonaem. ¿Metha bara Jacob toxecha ainya cuim, beyacaincha bapon? jei bapowa.

<sup>13</sup> Jesús jume nota, jeye:

—Daxita pomonaem xua po mene muthu mene capaneiba xua peapeibinexa equeicha meratsipouneibina. <sup>14</sup> Ichitha pon apa xua po mera catan, bapon equeicha jopa caewa meratsipae tsane. Barapo mera icha ira bupana mene ichi xua epatoya mene jujuina poxoru bichocono ira buxupana mene nayca. Barichi po coyene xua cacatinchi barapo coyene cajuntu coyene yca cacana exanaena, bapoxonae xeinaename peajuntuyapuswa, po peajuntuyapuswa xua ataya tsiteca, jei Jesús.

<sup>15</sup> Nexata bapowa Jesús jume notatsi, bapowa jeye:

—Pon jiwi Necanamataxeinaem, dapo mera necare xua jopa caewa tameratsipouneibiwa tsane yawa xua equeicha po mene muthu jopa tapateibiwa tsane xua mera tacapanathopeibinexa, jei barapowa.

<sup>16</sup> Jesús jume nota, jeye:

—Moya matha iyande, matha jinseuri wabare. Nexata bapoxonae xote papatoparebe, jei Jesús.

<sup>17</sup> Bapowa jume nota, Jesús jume notatsi, jeye:

—Taseuri apara jopa xeinaem, jei.

Nexata Jesús jume barai, jeye:

—Bara xainyeya peabame poxonae jam, ‘Taseuri jopa xeinaem’, jam. <sup>18</sup> Tsipei caena bayatha cinco pooyobe pebiwi punaxubame. Pon xua anoxuae baru poponame, apara jinseuri aibi. Poxonae peabame baxua bara xainyeya peabame, bara jopa naerabim, jei Jesús.

<sup>19</sup> Barapowa poxonae Jesús baxua jume tainchi barapowa jeye:

—Pon jiwi Necanamataxeinaem, bara catainchi xua xam apara pon Nacom peitorobi jume nepaebim. <sup>20</sup> Pata tamo susato jiwi, Samaria nacuamonaepiwi, barapomonaem wunaem jainteiba Nacom xote po demxuwathe. Ichitha paxam judiomonaem pam, papaebame xua pinaem bewa jiwi wunaem jainteibina Nacom bomuxutha po bo uncua Jerusalén tomaratha po bo Nacom pin pia bo tatsi, jei barapowa.

<sup>21</sup> Jesús jume nota, jeye:

—Yabuyo moya yabara nejume cowunde xua tacatsipaebiwa. Tsipei barapo matacabi imoxoyo patopaena, po mataqueitha xua wunaem pajainteibiname Nacom. Nama jopa painya nenantawenonaewam tsane xua painya neponaewa, po demxuwathe yawa Jerusalén tomara beya xua wunaem painya nejainteibiwa tsane Nacom. <sup>22</sup> Paxam Samaria nacuamonaem pam, jopa payaputaem pon wunaem pajainteibame. Paxan nama judiomonaem pan payaputan pon wunaem pajainteiban, tsipei pon pecapanenebiyaein jiwi apara bapon judiomonaem jiwanaem. <sup>23</sup> Ichitha anoxuae nama patopa po mataqueitha poxonae pomonaem xaniwaicha wunaem pejainchiwa Nacom, barapomonaem icha

coyene cuitha Nacom wūnae jaintinchi, xua barapomonae pia Paxaxae tatsi. Barapomonae xaniwaicha pia pejūntu coyenewatha wūnae jainchina Nacom. Tsipei Nacom baxua ichichipa xua wūnae pejainchiwatsi xua jiwi wūnae pejainchiwa pejūntu coyenewatha.<sup>24</sup> Nacom pejūntu coyene xanepanaein pon peinya jumopein. Daxota pomonae Nacom wūnae pejainchiwatsi, barapomonae bewa xaniwaicha pejūntu coyenewatha wūnae jainchina Nacom, jei Jesús.

<sup>25</sup> Barapowa jume nota, jeye:

—Yaputan xua patopeicaena pon pewun Mesías, (xua pon icha wun “Cristo” baraichi). Poxonae bapon patopeicaena daxita yabaran pana necuidubina, jei bapowa.

<sup>26</sup> Jesús jume nota, jeye:

—Apara xan bapon, pon aunxuaein catsipaebatsi, jei Jesús.

<sup>27</sup> Bapoxonae equeicha Jesús pijimonae tatsi pata. Daxita barapomonae yabara najūntu cui coyene cabenaeca xua Jesús tsipaeba Samaria nacuamonaewayo. Ichitha dapon aibi xua pon pejeiwa Jesustha, “¿Eta xua metha jinya xuatsi? ¿Eta pocotsiwa metha bapowa tsipaebame?” xua pon pejeiwa.<sup>28</sup> Nexata bapowa juruwato cuenta iya tomara be-iyā, nainya yacuinaya iya. Bapowa jiwi tsipaeba, jeye:

<sup>29</sup> —Anetha, pataema pebin ichaxota muthu mene. Bapon yabara netsipaeba daxita pocotsiwa bayatha caena exanan. ¡Apara bapon metha Mesías! jei bapowa.

<sup>30</sup> Bapoxonae jiwi tomara we-iyiwa peponaenexa ichaxota Jesús popona.<sup>31</sup> Iruru Jesús pijimonae jume daunweya baraichichi, jeye:

—Pon Patatanecuidubim, matha xaema, jeichichi pijimonae.

<sup>32</sup> Jesús jume barai pijimonae, jeye:

—Xan xeinan pexaewa, po pexaewa jopa payaputaem, jei Jesús.

<sup>33</sup> Jesús pijimonaexae tatsi nexata bara caemonae nayainyaba, jeye:

—¿Metha bara ichun Jesús apatatsi pexaewa? najei barapomonae.

<sup>34</sup> Ichitha Jesús pijimonae jume barai, jeye:

—Icha pebin ichi xua bewa nabanaena, barichin xan bewa exanaein pocotsiwa Nacom ichichipa pocotsiwa bapon tana necui itorobixae. Matautano bewa nacui wetsin Nacom pia penacuichiwa tatsi xua tana neitorobixae. Daxota xua bapoxonae tanejūntu coyene yucaewa tsane be poxonae pebin xua pexaewa una tonsana.<sup>35</sup> Paxam ba pajam: ‘Abū cataunxuae cuatro po xometobe yapu seica pabitha xua pexaewa penawetsiwa tsane’, ba pajam. Ichitha nama paca jeichi: ‘Pataema bayatha pexaewa naweta xua pabitha’, paca jeichichi. Barapocotsi jūta coyeneya paca jeichi: ‘Jiwi barapo cae pin nacuathe bayatha najūntu cui coyene wūnaetaba xua pejume taenexa Nacom Pejume Diwesi xua pejume cowūntsinexa’, paca jeichi.<sup>36</sup> Catsibin pomonae tamonaexae pocotsiwa xua pematomatsiwa xua inta ichamonae peyawenaexaetsi xua iruru be tamonae jiwi penaexanaenexa. Pomonae nejume cowūnta barapomonae catsibin peajūntuyapusūwa, po peajūntuyapusūwa jopa weraweracaeyo. Tsipei pomonae tajume diwesi pecueicueijeijiwi copiya xuano iru pomonae tajume diwesi cotacaya xuya yaputane cana exana xua daxota jiwi nejume cowūnta, daxita barapomonae matabuxuyobe naba ru jūntu coyene weiweina xua ichamonae nejume cowūnta pecana exanaexaetsi.<sup>37</sup> Tsipei po diwesiyo xua tsica diwesiyo, po diwesiyo yabara canaūta jūtsiya pepaebiwa bara apara xaniwaicha, po diwesiyo xua ba jeye: ‘Ichun ūba, iru

ichun xuya jota poxonae naweta', xua jei po diwesiyo. <sup>38</sup>Paca itorobatsi xua inta payawenname jiwi xua tajiwimonae penaexanaenexa xua po coyene jopa pacata ayapubeyo xua poxonae paexaname baxua. Baxua paexanaename bequein bara jopa dapomonae pam pocotimonae copiya tajume diwesi paeba barapo jiwitha. Jame paxam apara barapomonae pam, xua xuya cotacaya yaputane pacana exaname barapo tajiwimonae. Baraxua icha be poxonae ichi poxonae ichun xuya jota cotacaya poxonae ichun copiya uba, jei Jesús.

<sup>39</sup>Bapoxonae pin bicheitomonae pomonae barapo tomaratha jinompa xua Samaria nacuatha, Jesús jume cowuntatsi, tsipei barapo petsiriwa pejeixae: "Bapon Jesús yabara netsipaeba daxita pocotsiwa bayatha caena exanan", jei. <sup>40</sup>Poxonae barapo Samaria nacuapiwi Jesustha pata, bapoxonae Jesús jume daunweya jeichichi: "Pana baru ecare pata tomaratha", jeichichi. Daxota Jesús ainya matabibe naeca barapo tomaratha. <sup>41</sup>Bichocono pinmonae Jesús jume cowntaponatsi poxonae jume tane xua Jesús paeba. <sup>42</sup>Nexata barapomonae bapowa tsipaebatsi, jeichichi:

—Anoxuae nama pajume cowntan jopa meisa saya poxoru pata tanetsipae-biwam. Matautano bara pajume cowntan tsipei yatsicaewa pata muxuton-tha pajume tan pocotsiwa bapon paeba. Matautano bara payaputan xua bapon pon jiwi Pecapanenebiyaeinchi abe pia peexanae cuiru coyenein tatsi weya xua barapo jiwi jopa peweraweracaenexa, jei barapomonae.

**Meje yabara poxonae  
Jesús axaibi exana pon  
pentacaponaein pexanto tatsi**

<sup>43</sup>Poxonae barapo ainya matabibe yapucaewa, bapoxonae Jesús pijimonae Samaria nacua webaru warapiya xua baru pona Galilea nacua beya. Ichitha pijimonae jopa baru patopaeyo pia tomaratha Nazaret tomaratha. <sup>44</sup>Tsipei Jesús bayatha pijimonae tsipaeba xua nayabara jeye:

—Pon ba Nacom peitorobi jume pepaebin, bapon ba pia nacuapiwi jopa baru cui itura jinaetsi, jei Jesús.

<sup>45</sup>Poxonae Jesús pijimonae baru patopa Galilea nacuatha, barapo Galilea nacuapiwi Jesús matenta weyataya wabatsi. Tsipei caena bayatha barapo Galilea nacuapiwi Jesús tainchi Jerusalén tomaratha, poxonae jiwi nacaetuta xua penabanaenexa pexaewa po matabintha pewun Pascua wun matabin poxonae jiwi yabara canantana xeina xua caena bayatha pia pamo susato jiwi tatsi panenebiya Egipto nacua weya. Matautano tsipei poxoru bayatha barapomonae tane daxita pocotsiwa Jesús exana baxota.

<sup>46</sup>Bapoxonae Jesús pecoyo baru pona pijimonae Caná tomara beya xua po tomara eca barapo Galilea nacuatha. Barapo Caná tomara, po tomaratha ichaxota bayatha Jesús meratha equeicha vino mera cana exana. Poxonae Jesús Caná tomaratha eca, iruru pebin pon pentacaponaein Capernaum tomaratha popona. Bapon pexanto taatenetsi. Barapo pentacaponaein tanacuita, pon jiwi itorobiya pia pepa peewatsinchi tanacuitatsi. <sup>47</sup>Barapon pon pentacaponaein yaputane xua Jesús pijimonae baru patopa Galilea nacuatha xua Judea nacua weya pona.

Bapoxonae Jesús siwa poinchi. Bapon Jesús jume daunwei jeichichi:

—Tabo beya ponde. Inta taxanto axaibi exande tsipei imoxoyo petupae, jei bapon.

<sup>48</sup>Nexata Jesús barai bapon xua pia-monaе tatsirũ, jeye:

—Paxam jopa yabara pana nejume cowũntsim. Saya poxonae pexeinya pet-sita itutsi coyenewan paca tsita exa-neibatsi bapoxonae deta pana nejume cowũnteibame, jei Jesús.

<sup>49</sup>Ichitha pentacaponaein jume nota, jeye:

—Pon Necanamataxeinaem jiwi, anetha nainya iyande, xua pewũnaeya tsane poxonae taxanto tupaena, jei.

<sup>50</sup>Nexata Jesús jume barai bapon, jeye:

—Moya caibe nawiyama jinya bo beya. Bayatha cata axaibi nexanto, jei Jesús.

Barapo pentacaponaein yabara jume cowũnta pocotsiwa Jesús paeba. Bara pontaba pia bo beya. <sup>51</sup>Poxonae barapo pentacaponaein cataunxuae ecapona namtotha xua pia bo beya pona, bapoxonae bapon matenta poinchi pomonaе pia petanacuichiwi-xaetsi pia botha. Bapon jeichichi:

—Nexanto bayatha cata axaibi, jei barapomonaе.

<sup>52</sup>Nexata bapon yainyaba pia petanacuichiwichi, jeye:

—¿Eta poxonae inta taxanto axaibi? ¿Eta xoyo poxonae ecatabiya xometo? jei bapon.

Barapomonaе jume nota, jeye:

—Mexuae axaibi tsuxubi poxonae mateinyaxae pepuya weya bapoxonae yasataxotsi domae, jei barapomonaе.

<sup>53</sup>Nexata pexuyo paxa tatsi yabara nanta xeinataba xua barapo mateinyaxae pepuya weya xua mexuae Jesús namchi jeye: “Moya caibe nawiyama jinya bo beya, bayatha

nexanto cata axaibi”, jei Jesús. Bapoxonae bapon irũ pomonaе pia botha petaenaewichi Jesús yabara jume cowũntatsi.

<sup>54</sup>Barapo pexeinya petsita itutsi coyenewa xua poxonae equeicha Jesús cotacaya exana poxonae caibe warapiya Galilea nacua beya poxonae Judea nacua wewarapiya.

### Meje yabara poxonae Jesús axaibi exana pon pecuenobinchi ichaxota po fetiyo pewũn Betzata

**5** Bapoxonae pirapae Jesús pona Jerusalén tomara beya. Barapo tomaratha judiomonaе nacaetuta xua penabanaenexa pexaewa. <sup>2</sup>Barapo tomaratha xua iboton peyacaincha toxoro dutsi acabiwa coiboton cae boupa iya barapo boupa pewũn “Oveja pia boupa”, jei. Imoxoyo barapo boupa iya eca tsica mene fetiyo. Barapo fetiyo hebreo jumetha pewũn “Betzata”, jei. Barapo fetiyotha cinco po boutiyobe umena. <sup>3</sup>Barapo boutontha peatenewi iratha bobenapoinya, ichamonaе pomonaе peitata nacutsi jiwi, irũ ichamonaeno pomonaе pejajuyajuyei jiwi, irũ ichamonaeno pomonaе pecuenobiwichi. Barapomonaе ewatabobena xua barapo mene fetiyo mene najirababa. <sup>4</sup>Tsipei ichacuitha tsaibi matatsunpin patopeiqueiba barapo mene fetiyotha xua peitaboco wetsica pona. Barapo matatsunpin mene najirababa exana barapo mene fetiyo. Pon copiya maxũ cayatsi mene beya xua baxota cuaranotatsi, bapoxonae axaibi exainchi. <sup>5</sup>Baxota pebin irũ boca pon caena bayatha atene treinta y ocho po weiyobetha. <sup>6</sup>Jesús tane xua bapon iratha boca. Matautano Jesús yaputane xua bapon ainya dapaein bayatha ewata boca. Jesús yainyaba bapontha, jeye:

—¿Ichichipame xua neaxaibiwa? jei Jesús.

<sup>7</sup> Pon atene Jesús jume notatsi, jeye:

—Pon Necanamataxeinaem jiwi, dapon inta aibi pon taneyawenaewa xua mene betanemaxu cayaenexa poxonae matatsunpin mene najirababa exana. Poxonae tacoutha taepatotha iya tsaibin ichun copiya netsiwana patopeiba. Bapon axaibi, copiya pecaxinaexae mene, jei pon atene.

<sup>8</sup> Jesús jume barai, jeye:

—Asiya uncuare. Pire jinya nebo-caewa. Bara ponde, jei Jesús.

<sup>9</sup> Bapoxonae caena nainya axaibi tsuxubi. Yawa pita pia peboacaewa, bara ponano. Ichitha barapo matabi apara po matabi pentaquei seicae matabi.

<sup>10</sup> Daxota judiomonae barai pontha pon axaibi exainchi. Jeichichi:

—Apara anoxuae po matabi xua pentaquei seicae matabi. Barapo mataqueitha jopa cacopatsiyo xua bara necaponaewa jinya neboacaewa, jei judiomonae.

<sup>11</sup> Bapon jume barai judiomonae, jeye:

—Pon neaxaibi exana bapon nebarai: ‘Pire jinya neboacaewa, bara ponde’, ne-jei bapon, jei bapon judiomonaetha.

<sup>12</sup> Nexata judiomonae yainyaba bapon, jeye:

—¿Jintam bapon pon baxua cabarai: ‘Pire jinya neboacaewa, bara ponde’, jei? jei barapomonae.

<sup>13</sup> Ichitha bapon jopa wun taeyo pon peaxaibi exanaexaetsi, tsipei Jesús pin bicheittha naita cafetaba. <sup>14</sup> Pirapae bapon Jesús taeba Nacom pin pia botha tatsi. Jesús barai bapon, jeye:

—Incane nejume taema. Jame caaxaibi exanatsi. Equeicha jinxoba abe exaname, tsipei bapoxonae bichocono atenem tsipae beyacaincha xua poxonae copiya atenem, jei Jesús.

<sup>15</sup> Nexata barapo pebin pona judiomonae beya xua pejeinexa:

—Apara pon neaxaibi exana bapon apara Jesús, jei bapon.

<sup>16</sup> Daxota Jesús abe tsiyabara jeitapoinchi xua pebexubiwa tsainchi yaitama Jesús axaibi exana pon atene po mataqueitha pentaquei seicae mataqueitha. <sup>17</sup> Ichitha Jesús jeye barapomonaetha:

—Taxa, apara cataunxuae nacuiteiba daxita matabintha. Xan barichin bara bequein pentaquei seicae matabi tan, jei Jesús.

<sup>18</sup> Daxota bichocono nama judiomonae jopa juniya anaepanaeyo, yawa ichichipa xua Jesús pebexubiwa tsainchi. Barapomonae anaepana tsipei yaitama Jesús po mataqueitha pentaquei seicae matabitha nacuita poxonae bequein barapomonae jopa copatsiyo. Matautano anaepana tsipei Jesús naexana xua Nacom pecui jupaewatsi, yawa tsipei jeye: “Nacom, Taxa”, jei.

**Meje yabara poxonae Jesús yabara  
paeba xua pexeinaewa pia  
peayapusu itorobi coyenewa**

<sup>19</sup> Nexata equeicha Jesús barai barapo judiomonae, jeye: “Xaniyan paca tsipaebatsi xua xan Nacom Pexanton jopa exanaeinyo pocotsiwa tacoutha ichichipan. Saya jame exanan pocotsiwa Taxa cui tan pocotsiwa exana. Daxota bapocotsiwan baxua exanan. <sup>20</sup> Taxa bichocono neantobe, yawa netsita ituta daxita xua bapon pocotsiwa exana. Taxa equeicha ichawanno netsita itutsina pocotsiwa xua bichocono wunae beyacaincha xua bayatha exanan. Bapoxonae yabara pana najuntu cui coyene cabenaecaename. <sup>21</sup> Taxa equeicha asu cana exana pomonae caena bayatha werapa. Xan barichin tsane Nacom Pexantonxaein equeicha asu cana exanaein pomonae pewerapaewi, pomonae xua ichichipan xua asu tacana exanaewa.



<sup>22</sup>Taxa jopa ba yabara paebiyo jiwi xua penatsicuentisiwa xua abe peexanaexae. Saya meisa xan Pexanto tatsixaein necata barapo peayapusu itorobi coyenewa xua tayabara paebiwa jiwi xua penatsicuentisiwa xua abe peexanaexae Nacomtha. <sup>23</sup>Baxua Taxa barapo peayapusu itorobi coyenewa necata xua daxita jiwi tana nebaru cui itura jinaenexa xua icha barapo jiwi ichi xua poxonae Taxa baru cui itura jinatsi. Xan ponxaein Nacom Pexantoxaein ponxaein Nacom tana neitorobixae pon jopa nebaru cui itura jinaeyo bapon barichi Taxa jopa baru cui itura jinaetsi.

<sup>24</sup>“Bara xainyeya paca tsipaebatsi xua xan, Nacom Pexantoxaein, pon xanepanaya nejume naitaewata pocotsiwa paeban xuano xua Taxa jume cowuntatsi bapon peajuntuyapusuwa xeinaena po peajuntuyapusuwa xua ataya tsiteca. Bapon bapana jopa yabara caunutsin tsane xua bapon Nacom bayatha tsitatsi xua bapon penatsicuentisiwa xua daxota bapon bewa tupaena abe peexanaexae. Tsipei bapon be barapocotsin, bara be pocotsin xua equeicha asu exanan petupae cuiru coyene weya. <sup>25</sup>Xainyeya paca tsipaebatsi. Aparaxua barapo matacabi patope, po mataqueitha pomonae be pewerapaewi jopa pexeinaexae peajuntuyapusuwa, barapomonae nejume taena. Yawano icha barapomonae nejume cowuntsina bapoxonae xeinaena peajuntuyapusuwa. <sup>26</sup>Taxa xeina xua peajuntuyapusuwa, po pia peajuntuyapusuwa tatsi jopa weraweracaeyo. Daxota bara tayapu xanepanatsi xua ichun pecatsinexatsi barapo peajuntuyapusuwa. Matautano Taxa necata barapo peajuntuyapusuwa xua daxota xuya jiwi catan. <sup>27</sup>Taxa pia peayapusu itorobi coyenewa necata xua jiwi tayabara paebinexa

xua penatsicuentisiwa xua abe peexanaewixae Nacomtha. Tsipei naexanan pepa Jiton daxota necui jupa xua barapo pia peayapusu itorobi coyenewatha jiwi tayabara paebiwa xua penatsicuentisiwa xua abe peexanaexae. <sup>28</sup>Jopa baxua payabara najuntu coyene cabenaecaeinde pocotsiwa tapaca tsipaebiwatsi. Tsipei patopaena icha matacabi po mataqueitha pomonae pewerapaewi nejume taena. <sup>29</sup>Barapomonae pomonae pewerapaewi muthu wejujuinaena. Pomonae xua xanepanaya exana xua poxonae caena bayatha jinompa, barapomonae asu exanaeinchi xua pexeinaewa tsane peajuntuyapusuwa. Ichitha nama pomonae abe exana xua poxonae caena bayatha jinompa, barapomonae asu exanaeinchi xua peyabara paebinexatsi xua penatsicuentisiwa xua abe peexanaexae Nacomtha”, jei Jesús.

**Meje yabara poxonae Jesús tsita itapeinya xeina jiwi xua bara xeina peayapusu itorobi coyenewa**

<sup>30</sup>Cataunxuae awiya Jesús cueicueijei judi monaetha. Jesús jeye: “Jopa exanaeincho pocotsiwa tacoutha ichichipan. Jiwi yabara paeban xua penatsicuentisixae xua abe peexanaexae Nacomtha be pocotsi coyeneya Taxa tanecui itorobixae. Baxua xua pocotsiwa poxonae jiwi yabara paeban xua penatsicuentisiwa xua abe peexanaexae apara bara xanepana. Tsipei jopa exanaeincho pocotsiwa tacoutha ichichipan jame saya exanan pocotsiwa Taxa ichichipa, pon tana neitorobixae. <sup>31</sup>Icha saya meisa nayabara paebichipan tacoutha, yawa icha ichun jopa neyabara jume yawenaetsipae metha bapoxonae pana neyabara jam tsipaem: ‘Apara pocotsiwa bapon pia coutha nayabara paeba jopa xainyeyo’, pana neyabara

jam tsipaem. <sup>32</sup>Ichitha ichun neyawena xua tana neyabara paebiwa tsipei paeban xua pocotsiwa bapon paeba. Nanta jupaya papaebanbe. Apra bapon Nacom bara Taxa. Bara yaputan po coyene bapon xua tana neyabara paebiwa apra bara xainyei. <sup>33</sup>Paxam ichamonae paitorobame Juan beya, xua Juan peyainyabiwa tsainchi, pocotsiwa Juan yabara paca jume nota xua xan yabara, bara apra xainyei. <sup>34</sup>Xan jopa jiton nantawenonaeyo xua tana nebaru jume yawenaewa xua jiwi yabara tana nejume cowuntsiwa xua bara xainyeya tapaebin. Saya yabara paca tsipaebatsi pocotsiwa Juan tana neyabara paebiwa. Poxonae baxua pajume cowuntsiname pocotsiwa Juan tana neyabara paebiwa bapoxonae paca capanenebiyaena abe painya neexanae cuiru coyenein weya xua jopa painya atene tsabiwa tsane abe painya neexanaewantha. <sup>35</sup>Poxonae pecoicha itanata, jiwi ba caeto juntu coyene weiweina poxoru ichichipa barapo coicha xua yonoyonei. Icha pecoicha ichi Juan barichi. Poxonae Juan paca cuiduba copiya pajuntu coyene weiweiname caeto, poxoru paichichipame barapo diwesi pocotsiwa bapon paca tsipaeba. <sup>36</sup>Ichitha nama xan xeinan xua pocotsiwa ainya cui beyacaincha xua po diwesi Juan tana neyabara paebiwa. Baxuan xua xuan pocotsiwa exanan apra bara xua pocotsiwa Taxa neitoroba. Po pexeinya petsita itubiwan xua exanan poxonae baxuan jiwi necui tane bapoxonae nejume cowunta xua Taxa necata barapo peayapusu itorobi coyenewa. <sup>37</sup>Matautano Taxa, pon tana neitorobixae, beta xanapanaya neyabara paeba. Ichitha paxam jopa bapana Nacom pajume taem xua pejume. Matautano jopa bapana pataem pia pepon. <sup>38</sup>Nacom Pejume

Diwesi jopa paxeinaem painya juntu coyeneintha tsipei jopa pana nejume cowuntsim ponxaein xua Nacom tana neitorobixae. <sup>39</sup>Paxam matowa pana nacuidubame Nacom Pejume Diwesi, tsipei pananta xeiname xua pia bapoxonae Nacom painya nepaca catsibichi pia peajuntuyapusuwa, po peajuntuyapusuwa jopa weraweracaeyo. Ichitha Nacom Pejume Diwesi, po diwesi payorobame, apra xua tana neyabara paebiwa. <sup>40</sup>Ichitha jopa bapana pana nejume cowuntsim xua tapaca catsibinexatsi barapo peajuntuyapusuwa, po peajuntuyapusuwa jopa weraweracaeyo.

<sup>41</sup>“Jopa netsita ainya cuiyiyo xua bara jiwi tana nebaru cui itura jinaewa xua ainya cuin tanaexanaeae.

<sup>42</sup>Matautano paca juntu coyene yaputainchi xua painya juntu coyeneintha jopa Nacom paantobem.

<sup>43</sup>Xan, Nacom Taxa tana neitorobixae, pacata patopatsi, daichitha jopa pana nejume cowuntsim. Ichitha icha ichun pacata patopaetsipa pon pia coutha naitoroba, bapon xanapanaya pajume cowuntsipame. <sup>44</sup>Jopa paca itacupaeyo xua pana nejume cowuntsiname tsipei saya pananta xeiname xua pia jiwi paca necayabara baru cui itura jineibiwa. Jopa pananta xeinaem xua po coyene Nacom paca necayabara baru cui itura jinaewa tsane. <sup>45</sup>Jopa pananta

xeinaeinde xua Taxatha tapaca yabara paebiwatsi xua po coyene abe painya neexanaewa. Xan dapon apra aibin xua abe tapaca yabara paebiwatsi. Paxam pananta xeiname, pana najam: ‘Caena bayatha Nacom nacana jume diwesi cata Moisestha xua jiwi pejume cowuntsiwa tsane. Jume cowuntatsi barapo diwesi, daxota Nacom naca capanenebiya tsane’, pana najam. Daichitha jopa paexanaem pocotsiwa Moisés paca itoroba. Poxoru tsipei

jopa Nacom pajume cowuntsim daxota Nacomtha abe paexaname. <sup>46</sup>Icha pajume cowuntsipame pocotsiwa Moisés neyabara tinaeya paeba, metha iruru pana nejume cowuntsipame, tsipei Moisés neyabara tina. <sup>47</sup>Icha jopa pajume cowuntsim pocotsiwa Moisés neyabara paeba, bara paichipaem jopa pana nejume cowuntsipaem”, jei Jesús xua judiomonaes tsipaebatsi.

**Meje yabara poxonae Jesús apata pexaewa cinco mil pebiwi**

(Mt 14.13-21; Mr 6.30-44; Lc 9.10-17)

**6** Poxonae Jesús najume weta judiomonaetha, bapoxonae Jesús pijimonaes baru pona jeratha xua Galilea pucua icha muxunene beya. Barapo pucua icha wun Tiberias pucua. <sup>2</sup>Pin bicheito Jesús puna poinchi, tsipei Jesús cui tainchi xua exana pia pexeinya pet-sita itutsi coyenewan, poxonae axaibi exana peatenewi. <sup>3</sup>Nexata Jesús pijimonaes baru ecoinya demxuwa icha. Bapoxonae baxoteicha Jesús pijimonaes baru ecopiya. <sup>4</sup>Imoxoyo bara nama patopaena matababi xua judiomonaes pia Pascua wun matababi tatsi. <sup>5</sup>Jesús tane xua puna poinchi pin bicheito. Bapoxonae Jesús barai, Felipe baraichi jeichichi:

—¿Eta xota metha pexaewa barapomonaes upain comocaeinchi? jei Jesús Felipetha.

<sup>6</sup>Baxua Jesús Felipe yainyabatsi, pia xua Felipe jume taetsi, xua po coyeneya Felipe pejume notsiwa tsane. Tsipei Jesús yaputane po coyeneya xua imoxoyo peexanaewa. <sup>7</sup>Nexata Felipe Jesús jume notatsi, jeye:

—Bequein doscientos po pan matabuxumonaes comocaeisipathatsi jopa awiya jupaetsipae xua daxita barompaya pexexeinaponaewa barapo bicheito. Barapo denario paratiyo matawun xua bichocono matoma

nawita xua caentaqueitha nexa xua matoma xeineiba pomonaes penacuichiwi, jei Felipe.

<sup>8</sup>Bapoxonae Andrés pon iruru Jesús pijimonaes tatsi jiwana jiton, pon Simón Pedro peweicho tatsi, bapon Jesús jeichichi:

<sup>9</sup>—Meje pewowin wuto uncue. Bapoyo cinco po panbe xeina, po pan xua cebada beno pan. Matautano bapoyo duweiyoy ainyobe capana. ¡Ichitha apara jopa yapu jupaeyo xua pin bicheito! jei Andrés.

<sup>10</sup>Nexata Jesús jume nota pijimonaes, jeye:

—Daxita jiwi patsipaebare xua peenaewa tsane iratha, jei.

Baxota naepanaewan nawita. Baxota pebiwi iratha ena. Barapo bicheito bara be cou cinco mil pebiwi. <sup>11</sup>Nexata Jesús pecobetha pita pan, po pan xua pexuyo capatopa. Bapoxonae Jesús Paxatha tsipaeba: “Axa, maisa juntu coyene weinanan xua pata tana necatsiwaxaem pexaewa”, jei Jesús. Bapoxonae Jesús pijimonaes tsicobe jajanacaponana pan. Equeicha Jesús pijimonaes tatsi cacatsibapona barapo pan barapo cinco mil pebiwitha. Jesús barichiya exana poxonae duweiyobe pita. Matautano pijimonaes tsicobe jajanacaponana barapo bicheito nexa. Barapo cinco mil pebiwi baraxane xua ichichipa piyainxae. <sup>12</sup>Poxonae daxita tonsanarucpa, bapoxonae Jesús pijimonaes barai:

—Panore xua barapomonaes jiwana xane. Pajebare, jopa pabebande, jei Jesús.

<sup>13</sup>Barapomonaes Jesús pijimonaes tatsi nonotapona pocotsiwa barapo pin bicheito jiwana xaexaepona. Jesús pijimonaes tatsi doce po cotebe wunba xua bayatha po cinco panbe jiwana xaexaepona pin bicheito po pan xua cebada beno pan. <sup>14</sup>Barapo cinco mil jiwi poxonae Jesús cui tainchi xua

pexeinya petsita itutsi coyenewa exana, jeye:

—Apara bara bapon pon Nacom peitorobi jume pepaebin, pon xua juinya bewa pinae patopaena po nacuathe xua wanacuatha tsica, jei.

<sup>15</sup>Ichitha Jesús yaputane xua barapomonae ichichipa xua po coyene Jesús penaexanaewa tsane be pon jiwi itorobiya pia pepa peewatsinchi tsane barapo bicheito pia nacuathe tatsi. Daxota equelicha Jesús ponataba demxuwa beya, xua compa peecaenexa.

**Meje yabara poxonae Jesús mene matatsun jumatha pona**

(Mt 14.22-27; Mr 6.45-52)

<sup>16</sup>Poxonae quirei tsanaicha Jesús pijimonae tatsi pucua itapa bepareca.

<sup>17</sup>Bapoxonae jeratha nonobabiya. Barapo pucua iya jeratha epatauta iyiyi xua pepatsiwa tsane Capernaum tomara beya. Jesús cuenta iyiyatsi poxoru bayatha quirei, yawano poxoru Jesús jopa cataunxuae patopaeyo.

<sup>18</sup>Bapoxonae pin joibo tsuxubi. Yawa maratsaca muxunenababa jera.

<sup>19</sup>Poxonae Jesús pijimonae tuwutha yana panenebiya, bapoxonae Jesús pijimonae tainchi. Jesús mene matatsun juma dena pona jera dena. Bapoxonae barapomonae bichocono junuwa.

<sup>20</sup>Ichitha Jesús pijimonae barai, jeye:

—¡Apara xan! ¡Jopa pajunuwinda! jei Jesús.

<sup>21</sup>Bapoxonae Jesús pijimonae yaitaerucupatsi. Bapoxonae Jesús juntu coyene weiweinaya wabatsi pijimonae xua jeratha penontabinaenexa. Bapoxonae nainya patarucupa Capernaum tomaratha.

**Meje yabara poxonae jiwi Jesús wenaweneichi**

<sup>22</sup>Icha mataqueitha pin bicheito, pomonae umena pucua itapatha xua

icha muxunenetha, barapomonae tane xua Jesús pijimonae cuenta ponarucupatsi jeratha, po jera saya bara cae nae xua po nae baxota boca. <sup>23</sup>Poxonae cataunxuae Jesús yabara nanta xeinatsi baxua, bapoxonae icha jera naein pata xua po naein Tiberias tomara werendena. Barapo jera naein pata ichaxota po iriyo itama tayeca xua ichaxota bayatha Jesús, pon Wanacanamataxeinaein, Paxa tsipaeba xua jeye: “Axa, maisa juntu coyene weiweinana xua pata tanecatsiwam pan”, xua jei, xuano xua baxota Jesús apata pan jiwitha. <sup>24</sup>Barapomonae yaputane xua Jesús aichurucuae. Matautano yaputane xua Jesús pijimonae tatsi aichurubena. Daxota jeran notarucupa Capernaum tomara be-iyiyi xua Jesús pewenaweneiwa tsainchi.

**Meje yabara xua Jesús apara bapon yabara caunutatsi xua poxonae po pexaewa Nacom jiwi itaboco wetaitorobcatsi**

<sup>25</sup>Poxonae barapomonae pata icha muxunene beya xua pucua iya, bapoxonae Jesús tainchi. Barapomonae Jesús yainyabatsi, jeichichi:

—Pon jiwi Necuidubim, ¿eta poxonae xote patopame? jei barapomonae.

<sup>26</sup>Jesús jume barai barapo jiwi, jeye:

—Xaniyan paca tsipaebatsi. Pana newenawenam, tsipei bayatha pana najain taneme pexaewa xua beya poxonae patonsaname. Apara jopa baxua patsipatsim xua bayatha tapaca tsita exanaexaetsi pexeinya tatsita itutsi coyenewan. <sup>27</sup>Jopa pananta xainaende xua saya pexaewa pana natsiupain nacuitame, po pexaewa saya nainya weraweraca. Saya meisa jame payabara nanta xeinare xua peajuntuyparus coyenewa, po peajuntuyparus coyenewa jiwi ajuntuyparus exanatsi, po peajuntuyparuswa

jopa weraweracaeyo. Taxa, Nacom, barapo peajüntuyapusüwa necata, po peajüntuyapusüwa xuya paca catsinchi ponxaein Nacom Tananeitapetsin, jei Jesús.

<sup>28</sup>Nexata barapomonae Jesús yainyabatsi, jeye:

—¿Eta xua bewa paexanaein xua xainyeya pata exanaewa tsane pocotsiwa Nacom ichichipa? jei.

<sup>29</sup>Nexata Jesús jume nota barapomonae, jeye:

—Jame Nacom baxua ichichipa xua pata tanejume cowüntsiwam tsane ponxaein xua barapon Nacom, Taxa, neitoroba, jei Jesús.

<sup>30</sup>Nexata barapomonae Jesús yainyabatsi, jeye:

—¿Eta po jinya pexeinya netsita itutsi coyenewa, pana netsita itutsiname? Icha paca cui taeinchi baxua xua pana netsita itutsiname nexata bapoxonae xua xain paca jume cowüntatsi. <sup>31</sup>Ichaxota ira xuepana susato tsurucuae nacuatha wamo susato jiwi xane pexaewa, po pexaewa Nacom taitorobica itaboco wetsica. Barapo pexaewa maná matawün. Barapomonae baxua cana exanatsi be pocotsi coyeneya Nacom Pejume Diwesitha yabara jeichichi: 'Nacom cata barapomonaetha pexaewa, po pexaewa itaboco wetaitorobica', jei Nacom Pejume Diwesitha, jei barapomonae.

<sup>32</sup>Nexata Jesús jume barai barapomonae, jeye:

—Xaniyan paca tsipaebatsi, Moisés barapo pexaewa apara jopa wamo susato jiwi catsichi, po pexaewa xua itaboco wetaitorobicatsi. Apará jame Nacom, Taxa, barapo pexainyei nabanae pexaewa taitorobica. <sup>33</sup>Po pexaewa Nacom itaboco wetaitorobica, apara neyabara wünae caunuta. Nacom neitorobica xua tacana exanaewa tsane jiwi barapo cae pin nacuathe xua jiwi pexeinaewa tsane peajüntuyapusüwa, po peajün-

tuyapusüwa jopa weraweracaeyo, jei Jesús. <sup>34</sup>Nexata barapomonae Jesús baraichichi, jeye:

—Patatanecanamataxeinaem, barapo pexaewa pana catsibeibare daxita mat-acabi tsaibi, jei.

<sup>35</sup>Jesús jume nota, jeye:

—Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wünae caunutsixae ponxaein jiwi peajüntuyapusüwa tacatsin. Bequein jiwi xaiba pexaewa daichitha equeicha jainpouneiba, yawa equeicha meratsipouneiba. Jame pon patopa taxantha yawa pon nejume cowünta bara xeina daxita pocotsiwa penantawenonaewa. <sup>36</sup>Bara bayatha bequein paca tsipaebatsi, daichitha jopa pana nejume cowüntsim bequein pana netaneme. <sup>37</sup>Daxita pomonae xua Taxa necata, barapomonae bara tamonae. Barichi pomonae nejume cowünta, barapomonae jopa beban tsane. <sup>38</sup>Xan apara jopa baxua tsipatopeicaeyo itaboco wetsica xua taexanaewa tsane pocotsiwa tacoutha ichichipan. Apará saya jame baxua tsipatopan xua taexanaewa tsane pocotsiwa Taxa ichichipa. <sup>39</sup>Tsipei Taxa ponxae neitoroba, barapon ichichipa xua daxita jiwi beta ta-eenaewa tsane pomonae tana necatsixae. Matautano Taxa jopa ichipaeyo xua barapomonae jiwana caein tanexubiwa. Matautano Taxa ichichipa xua equeicha asü cana exanaein petupae coyene cuariya weya pomonae tana necatsixae xua poxonae po matakabi opi ducuaenaba po cae pin nacuathe. <sup>40</sup>Paxam yabara paca tsipaebatsi xua pocotsiwa Taxa peichichipaewa. Daxita pomonae neyabara paebina po coyene xua xan apara Nacom Pexanton, xuano xua nejume cowünta, barapomonae xeinaena peajüntuyapusüwa xua ataya tsiteca. Barapomonae asü exanaein petupae coyene cuariya weya poxonae matakabi opi

ducuaenaba po cae pin nacuathe, jei Jesús.

<sup>41</sup>Poxonae Jesús baxua nayabara paeaba bapoxonae judiomonae Jesús abe yabara paeabatsi, tsipei Jesús jeye: “Xan apara bapon po pexaewa Nacom itaboco wetaitorobica jiwi xua po pexaewa tana neyabara wūnae caunutsixae ponxaein jiwi peajüntuyapusūwa tacatsin”, jei Jesús. <sup>42</sup>Barapomonae najei caemonae:

—Apara bapon Jesús, José pexanto tatsi. Apara coxiyūn bayatha yaputainchi, coxiwano yaputainchino. ¿Eta pocotsiwa metha naca tsipaeba xua pinae itaboco wetsica pona? najei barapomonae.

<sup>43</sup>Nexata Jesús jume barai, jeye:

—Jopa caemonae pana natsipaebinde xua abe papaebame. <sup>44</sup>Dapon aibi pon peitacūpaewatsi xua pia coutha pepatopaewa xantha xua tana nepuna ponaewa tsane icha Taxa pon tana neitorobixae, pia coutha jopa copatsiyo xua jiwi pepatsinexa xantha. Barapomonae asū exanaein petūpae coyene cuariya weya poxonae po mataqueitha daxita weraweracaena po nacuathe.

<sup>45</sup>Nacom peitorobi jume pepaebiwi pia petinae diwesintha jeye: ‘Daxita jiwi Nacom yaputane cana exanaena’, jei barapo Nacom peitorobi jume pepaebiwi pia petinae diwesintha. Daxota daxita pomonae Taxa jume tainchi xuano xua jume cowūntatsino barapomonae bara pata taxantha.

<sup>46</sup>“Dapon aibi pon Taxa tainchi. Jame meisa ponxaein itaboco wepatopeican bara Taxa tan. <sup>47</sup>Xaniyan paca tsipaebatsi, pon nejume cowūnta bapon jame xeinaena peajüntuyapusūwa, po peajüntuyapusūwa jopa weraweracaeyo. <sup>48</sup>Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wūnae caunutsixae ponxaein jiwi peajüntuyapusūwa tacatsin. <sup>49</sup>Painya amo susato jiwi pex-

aewa xane ichaxota ira xuepana susato tsurucuae nacuathe. Barapo pexaewa maná matawūn. Bequein bara barapo pexeinya pexaewa nabane daichitha matapainya werapa. <sup>50</sup>Paxam yabara paca tsipaebatsi po pexaewa Nacom itaboco wetaitorobica jiwi xua po pexaewa tana neyabara wūnae caunutsixae. Pon nejume cowūntsina jopa weraweracaena tsane icha ichūn ichi xua poxonae xane barapo pexaewa jopa tūpaeyo. <sup>51</sup>Xan apara bapon xua po pexaewa Nacom itaboco wetaitorobica jiwi, po pexaewa ayapusū, xua po pexaewa tana neyabara wūnae caunutsixae. Pon xua nejume cowūnta bara ataya poponae icha ichūn ichi xua poxonae xane barapo pexaewa bara asū. Po pexaewa xua yabara paeban, apara tapepon xua paca catatsi painya nenabanaewa tsane. Tūpaein xua jiwi pexeinaewa tsane peajüntuyapusūwa”, jei Jesús.

<sup>52</sup>Nexata judiomonae caemonae najume matsontsonoba, najei:

—¿Eta pocotsiwa metha bapon naca tsipaeba xua naca catapaeba pia pepon xua wanabanaewa tsane? jei barapomonae.

<sup>53</sup>Jesús barai barapomonae, jeye:

—Xaniyan paca tsipaebatsi xan ponxaein Nacom Tana neitapetsin. Icha jopa paxaem tsane tapepon, yawa icha jopa paapaem tsane tajana, jopa paxeinaem tsane peajüntuyapusūwa, po peajüntuyapusūwa jopa weraweracaeyo. <sup>54</sup>Pon xua tapepon xane yawa xua apa tajana, bapon xeinaena peajüntuyapusūwa, po peajüntuyapusūwa jopa weraweracaeyo. Yawa bapon asū exanaein petūpae coyene cuariya weya po mataqueitha poxonae daxita weraweracaena po cae pin nacuathe. <sup>55</sup>Tsipei tapepon be pexeinya pexaewa poxonae xua jiwi pexaewa tsane. Yawa tajana be pexeinya peapaewa xua jiwi peapaewa

tsane. <sup>56</sup>Pon tapepon xane yawa apa tajana, bapon nebarū poponeibina yawa xan barū poponeibin. Tsipei poxoru bapon neyabara jume cowūnta xua xan bapon pia pepon tatsi tsitūpan, yawano xua tajana othoparenaewa bapon nexa xua abe pia peexanae cuiru coyenein tatsi nexa. <sup>57</sup>Taxa ponxae neitoroba bapon ataya asū poponeiba. Irurū xan barichin ataya asū poponeiban tsipei Taxa necata pia peajūntūyapusūwa, po peajūntūyapusūwa jopa weraweracaeyo. Barichirū pon xane tapepon, xua poxonaē tana nejume cowūntsiwa, bapon asū poponeibina tacatsixae peajūntūyapusūwa. <sup>58</sup>Xan yabara paeban pexaewa, po pexaewa Nacom itaboco wetaitorobica jiwi. Barapo pexaewa jopa jūpaeyo, xua icha be maná matawūn ichi, po pexaewa painya amo susato jiwi xane. Daichitha barapomonaē matapainya werapa. Po pexaewa yabara paeban icha ichūn xane barapo pexaewa, bapon xeinaena peajūntūyapusūwa, po peajūntūyapusūwa jopa weraweracaeyo, jei Jesús.

<sup>59</sup>Baxuan Jesús cuiduba judiomonaē pia penacaetutsi botha tatsi xua Capernaum tomaratha.

**Meje yabara poxonaē Jesús yabara  
paeba peajūntūyapusūwa, po  
peajūntūyapusūwa  
jopa weraweracaeyo**

<sup>60</sup>Pinmonaē pomonaē Jesús puna poinchi, poxonaē barapomonaē Jesús jume tainchi pia pecuidubiwa, bapoxonaē barapomonaē najei:

—Pocotsiwa bapon paeba maisa bi-chocono ayapube xua wayabara jume cowūntsiwa. ¿Jintam metha itacūpatsi xua peexanaewa tsane pocotsiwa bapon peaba? najei.

<sup>61</sup>Ichitha Jesús yaputane pocotsiwa xua peyabara paebiwatsi barapomonaē xua peayapubexae pocotsiwa Jesús

pepaebiwa. Nexata Jesús yainyaba barapomonaē, jeye:

—Pocotsiwa aunxuae paca tsipae-batsi, ¿baxua pacata ayapube? <sup>62</sup>¿Eta xua metha pananta xeinaetsipame icha pana netaetsipame xua athabe taichaewa itaboco beicha ichaxota bayatha poponan ponxaein Nacom Tananeitapetsin? <sup>63</sup>Jiwi asū jinompa poxoru xeina pejumope tūnaxū. Poxonaē pejumope tūnaxū panepa jiton ba pia pepon tūpa. Icha pejumope tūnaxū ichi xua jiton asū exainchi pia pepon, barichi xua xan pocotsiwa tapaca tsipaebiwatsi barapo jume paca jūntū coyene ayapusū cana exana xua jopa painya neweraweracaewa tsane. <sup>64</sup>Ichitha cataunxuae pinmonaē pomonaē paxam jiwana pam, jopa nejume cowūntsiyo, jei Jesús.

Caena bayatha Jesús copiya wūnaē tsiwanaya yaputane pomonaē jopa pe-jume cowūntsiwa tsainchi. Matautano caena bayatha Jesús copiya wūnaē tsiwanaya yaputane pon pecaenaetsiwa tsainchi tsane ichamonaetha xua pebexubiwa tsainchi Jesús. <sup>65</sup>Equeicha Jesús barai pomonaetha pomonaē pia pepuna ponaewichi, jeye:

—Daxota paca jeichi: ‘Dapon aibi pon peitacūpaewatsi xua pia coutha pepatopaewa xantha xua tana nepuna ponaewa tsane, icha Taxa pia coutha jopa copatsiyo xua bara jiwi pepatsiwa xantha’, paca jeichi, jei Jesús.

<sup>66</sup>Poxonaē Jesús baxua paeba bapoxonaē pin bicheito pomonaē Jesús pepuna ponaewichi barapomonaē Jesús cuenta warapatsi. Barapomonaē equeicha nama jopa Jesús puna ponaetsi. <sup>67</sup>Bapoxonaē Jesús pijimonaē yainyaba pomonaeyoxae xua doce poyobe, pomonaē Jesús pijimonaexae tatsi. Jesús pijimonaē barai, jeye:

—¿Paxam painya irū ponaetsirū? jei Jesús.

<sup>68</sup> Nexata Simón Pedro Jesús jume notatsi. Pedro jeye:

—Patatanecanamataxeinaem, dapon aibi tsipae pon papuna ponan icha paca cuenta ponaetsipatsi. Saya meisa payaputan xua meisa xam compam yabara pana netsipaebame peajantuyapusuwa, po peajantuyapusuwa jopa weraweracaeyo. <sup>69</sup> Paxan paca jume cowantatsi. Matautano payaputan xua xam apara pon Nacom caitoroba, pon pepa Nentacuiruyapuxanepanaem, jei Simón Pedro.

<sup>70</sup> Jesús pijimonaе jume nota, jeye:

—Paxam pomonaе doce poyobe pam pomonaе tapaca caitapetsiwichi pam. Daichitha caein jiwana pam cauri piamonae jiton tatsi, jei Jesús.

<sup>71</sup> Poxonaе Jesús baxua paeba, Jesús yabara paeba Judas, Simón Iscariote pexanto tatsi. Bapon Judas Jesús caenaetsinchi bequein bapon caein jiwana pomonaе Jesús pijimonaexae tatsi, pomonaе doce poyobe tatsi.

**Meje yabara poxonaе  
Jesús jopa yabara jume  
cowantichi peweicho jiwi**

**7** Bapoxonaе Jesús popona ducua-naeta baxota xua Galilea nacua. Jesús aichaxaibi xua pepoponaewa Judea nacua, tsipei judiomonaе, pomonaе baxota jinompa, ichichipa xua Jesús pebexubiwatsi. <sup>2</sup> Bara nama imoxoyo tsurucuae tsoponaeba po matababintha judiomonaе jinompa tsica bomuxuxitha xua penabanaenexa pexaewa. Barapo matababin ba judiomonaе cayabara nanta xeina xua caena bayatha pinae pia pamo susato jiwi tatsi jinompa tsica bomuxuxitha ira xuepana susato tsurucuae nacua.

<sup>3</sup> Jesús baraichi pia peweicho jiwi, jeye:

—Jopa xote poponaеinde. Judea nacua beya warapiyama xain baxotiya jinyamonaе cacui tane pocotsiwa

exaname xua jinya netsita itutsiwa. <sup>4</sup> Pon xua ba ichichipa peyaputaewatsi daxita jiwi, bapon ba daxita jiwi peitutha exana po coyene xua moya peyawun xeinaewa po coyene jiwi copiya jopa yabara yaputaeyo. Bapon ba jopa nameicha exanaeyo. Xam iruru barichinde. Daxita jiwi peitutha exande xain cacui tane xua jinya netsita itubiwa neexanaewam, jeichichi Jesús peweicho jiwi.

<sup>5</sup> Baxua Jesús baraichichi peweicho jiwi, tsipei Jesús jopa jume cowantichi peweicho jiwi. <sup>6</sup> Nexata Jesús jume barai peweicho jiwi, jeye:

—Apara inta cataunxuae dapo matababi aichica, po mataqueitha tana naitutsiwa judiomonaetha xua Judea nacua. Ichitha poxonaе paichichipame xua painya neponaewa moya bara paponde Judea nacua beya. <sup>7</sup> Pomonaе jopa Nacom jume cowantichi barapomonaе jopa paca casebiyo. Ichitha xan necaseba tayabara paebixae xua po coyene pocotsiwa barapomonaе exana pejuntu coyeneintha apara abe. <sup>8</sup> Paxam bara moya paponde ichaxota judiomonaе nacaetuta xua penabanaenexa pexaewa. Xan nama jopa ponaеinyo cataunxuae canta tamatababi aichica, jei Jesús.

<sup>9</sup> Poxonaе Jesús baxua najume weta, bapoxonaе abu cataunxuae Galilea nacua po popona be caentacabiyo be xua pecoyo weya peponaenexa.

**Meje yabara poxonaе Jesús nasiwa  
pona Jerusalén tomara ichaxota  
judiomonaе nacaetuta xua  
penabanaewa tsane pexaewa**

<sup>10</sup> Poxonaе Jesús peweicho jiwi tatsi bayatha ponaba penanabanaenexa pexaewa iru Jesús bara beya pona. Jesús compa nameicha pipatotha pona. Jopa peburuya naponaeyo jiwitha. <sup>11</sup> Barapo judiomonaе penacaetutswitha Jesús



wenaweneichi. Barapo judiomonaē pia pentacaponae wi tatsi caemonaē nayainyaba, najei:

—¿Incane methara? ¿Exota metha pona bapon? najei barapomonaē xua Jesús yabara paebatsi.

<sup>12</sup>Barapo pin bicheitomonaetha ichamonaē Jesús yabara paxapaxeya paebatsi. Ichamonaē jeye: “Bapon apara pejuntũ coyene xanepanaein”, jei. Ichamonaē jeye: “Bũũ, metha jume, apara jiwi muxujainyabeibatsi”, jei barapomonaē.

<sup>13</sup>Ichitha dapon aibi pon pentha pejume jinaewa jiwi peitutha xua Jesús peyabara paebi watsi, tsipei judiomonaē pia pentacaponae wi tatsi cunu watsi.

<sup>14</sup>Poxonaē cuatro po matakabinbe yapucaewa xua poxonaē judiomonaē po matakabintha nacaetuba, bapoxonaē Jesús joniya Nacom pin pia botha. Matautano baxota tamropata pitaba xua pecuidubiwa jiwitha.

<sup>15</sup>Bapoxonaē judiomonaē yabara najuntũ cui coyene cabenaeca pocotsiwa Jesús beta caununaya pepaebiwa. Yawano najei:

—¿Eta xua metha bapon bichocono yaputane diwesi bequein jopa nacuidubiyo diwesi xua jopa barichiyo xua waxainchi wepu wanacuidubi watsi diwesi? jei.

<sup>16</sup>Jesús jume nota barapomonaē, jeye:

—Po diwesi jiwi cuiduban apara jopa barompaya tacuidubi coyenewa. Saya apara Taxa pia pecuidubi coyenewan tatsi jiwi cuiduban, pon tanecui itorobixae baxua. <sup>17</sup>Ichã ichũn ichichipa exana pocotsiwa Nacom ichichipa, bapon necayabara yaputaena xua po coyene tacuidubi coyenewa. Bapon yaputaena ichã metha bara cuiduban pocotsiwa Taxa neitoroba, xuano xua ichacui tha ichã metha apara cuiduban pexeinya peayapusũ itorobi coyenewatha po coyene xua

tawa xua saya tacoutha ichichipan. <sup>18</sup>Pon barompaya pia diwesi pia coutha nayabara paeba, apara bapon pia xua wũnae yabara paebichi xua jiwi wũnaeya peyabara paebiwa tsane. Ichitha ichũn pon ichichipa xua jiwi Nacom wũnae pejainchi watsi pon Nacom bapon peitorobixae tsi, bapon jame po diwesi pexainyei diwesi paeba. Bapon jame jopa pemuxuitorobin jiwi.

<sup>19</sup>“Moisés paca cata pia peitorobi coyenewa. Daichitha jopa pacayabara jume cui cowũntsiya exanaem. Bequein Moisés paca cui itoroba xua bepa pinae jopa jiton pabexubim tsane. Dapo jumetha, ¿eta xua metha paichichipame xua pata tanebexubi wam?” jei Jesús.

<sup>20</sup>Daxita barapomonaē Jesús jume notatsi, jeye:

—¡Apara cou cauri xeiname! Dapon apara aibi pon cabexubapaeba, jei judiomonaē.

<sup>21</sup>Jesús jume barai barapomonaē, jeye:

—Daxita paxam payabara najuntũ cui coyene cabenaecame, tsipei pebin axaibi exanan po matakabitha pentaquei seicae matakabitha. <sup>22</sup>Ichitha paxam irũ panacuiteibame barapo matakabitha. Moisés paca cata pia peitorobi coyenewa xua pexui painya newi thabiwa xua ichaxota pebiwichi xeinatsi xua ichaxota nareixacaena xua ocho po matakabibetha poxonaē yapu othopeiba. Ichitha Moisés jopa tamropata pitabiyo baxua, saya jame painya amo susato jiwi tamropata notarũcupa baxua. Poxonaē ocho po matakabibe yapu othopeiba pawi thabame pebin wũtixi bequein poxonaē pentaquei seicae matakabi pataetham. <sup>23</sup>Paxam paichichipame xua painya yabara jume cui wetsiwa xua pocotsiwa Moisés paca cui itoroba. Daxota pexui pebin wũtixi pawi thabame ichaxota pebiwichi xeinatsi xua ichaxota nareixacaena bequein pentaquei se-

icae matabi pataetham poxonae. Icha bara paichim pentaquei seicae matabitha, ¿eta pocotsiwa metha pana necasebame xua pebin axaibi taexanaexae pentaquei seicae matabitha? <sup>24</sup>Painya xoba pebin payabara paebame xua penatsicuentisiwa xua abe peexanaexae Nacomtha poxonae cataunxuae jopa payaputaem pocotsiwa pebin abe exana. Jame metha copiya pacui yaputaema xua icha bara metha pebin abe exana tsipei methapara barapo pebin xanepanaya exana.

### **Meje yabara xua Jesús yabara paeba xua ichaxota copiya popona**

<sup>25</sup>Pomonaе Jerusalén tomaratha jinompa, poxonae barapomonaе Jesús baxua jume tainchi, nayainyaba. Barapomonaе najei:

—¿Metha apara baponje, pon yabara paebatsi ichamonaе xua bepa pinae pon bexubichi? <sup>26</sup>Bapon apara jiwi peitabaratha paebuncuajeba. Ichitha dapon aibi pon pejume matawentsiwatsi bapon. ¿Metha poxoru pentacaponaewi bapon yabara nanta xeinatsi xua bapon barapara Mesías pon Nacom itoroba daxota jopa pejumeyo barapomonaе? <sup>27</sup>Ichitha waxainchi yaputainchi xua ichaxota werena pona bapon. Jame poxonaе Mesías patopaena dapon ajibi tsane pon yaputaena xua ichaxota werena peponaewa Mesías, jei barapomonaе, pomonaе Jerusalén tomarapiwi.

<sup>28</sup>Jesús cuiduba jiwi Nacom pin pia botha tatsi. Poxonaе Jesús baxua jume tane pocotsiwa jiwi paeba, bapoxonaе Jesús jume daunweya wawai, jeye:

—Pana neyabara cananta xeinaeya yaitaneme. Yawa pana neyabara nanta xeiname xua payaputaneme xua ichaxota werena taponaewa. Apara jopa tsipatopaeinyo xua taexanaewanexa pocotsiwan ichichipan tacoutha.

Mexeya apara daxota tsipatopan ichun tana neitorobixae pon xua yabara jume xainyeichi xua barapon bara eca peitabocotha. Bapon paxam jopa payaputaem. <sup>29</sup>Bapon bara yaitan tsipei bapon pexainya wetsica ponan. Matautano bapon neitorobica, jei Jesús.

<sup>30</sup>Bapoxonaе bequein barapomonaе ichichipa xua Jesús pewaetabiwatsi, ichitha Jesús jopa waetabichi tsipei cataunxuae Jesús pia matabi jopa tapatopeicaetsi. <sup>31</sup>Pin bicheitomonaе Jesús yabara jume cowuntatsi xua Jesús apara bara Mesías. Barapomonaе Jesús yabara jeichichi:

—Barapo pebin pexeinya petsita itutsi coyenewan exana be pocotsi coyene bayatha Nacom peitorobi jume pepaebiwi paeba xua juinya pinae Mesías pocotsiwa exanaena, jei barapomonaе.

### **Meje yabara poxonaе fariseomonaе itoroba policiamonaе xua Jesús pewaetabiwa tsainchi**

<sup>32</sup>Bapoxonaeru fariseomonaе jume tane pocotsiwa jiwi Jesús yabara baraichi: “Bapon apara Cristo”, xua jei jiwi. Nexata bapoxonaе fariseomonaе iruru sacerdotemonaе pia pentacaponaewi tatsi, daxita barapomonaе itoroba policiamonaе Nacom pin pia bo beya xua Jesús pewaetabiwa tsainchi. <sup>33</sup>Nexata Jesús jei jiwitha:

—Saya caeto paca baru popoinchi. Bapoxonaе pirapaeyo equeicha tacoya beicha Taxa beicha ponaein pon tana neitorobixae. <sup>34</sup>Paxam pana newenawenam tsane ichitha jopa pana necaxinaem tsane. Tsipei jopa paca itacupae tsane xua painya neponaewa xua ichaxota taponaewa tsane, jei Jesús.

<sup>35</sup>Nexata judiomonaе caemonaе nayainyaba, najei:

—¿Exota metha bapon ponaena xua jopa wacaxinaewa tsainchi? ¿Metha

icha judiomonaetha ponaena jampa po judiomonae icha nacua werena pona po judiomonae griegomonae baru jinompa jampa? Metha pia bapoxonae bapon cuidubichi barapo judiomonae, griegomonaeno. <sup>36</sup>¿Eta xua metha baxua caunuta poxonae naca jei: ‘Paxam pana newenawenam tsane ichitha jopa pana necaxinaem tsane, tsipei jopa paca itacupae tsane xua painya neponaewa xua ichaxota taponae tsane’, poxonae xua naca jei? najei judiomonae.

**Meje yabara poxonae Jesús yabara  
paeba xua ira buxupana mene  
epatoyaya ichawa beya mene pona**

<sup>37</sup>Po matabi opi ducuanayaba xua po mataqueitha judiomonae nacaetuta xua penabanaenexa pexaewa, barapo matabi bichocono peainya cui matabi. Barapo matabitha Jesús uncua jiwi peitabaratha tatsi. Matautano jume daunweya wawaya jeye:

—Icha ichun meratsipa, bu pona xan berena xua peapaenexa mera. <sup>38</sup>Nacom Pejume Diwesitha paeba: Pinae pon tana nejume cowantsiwa bichocono juntu coyene yuyca exanaponaeinchi po coyene xua tana nejume cowantsiwa, icha be pinae mene ichi tsane po mene ira buxupana mene, po mene xua ichawa beya epatoyaya mene pona bichocono pemene nayca ponaexae, jei Jesús.

<sup>39</sup>Baxua Jesús paeba, xua pomonae pejume cowantsiwa tsainchi, barapomonae pinae xeinaena Nacom pia Pejumope tunaxu tatsi. Ichitha cataunxuae Nacom pia Pejumope tunaxu tatsi aichica. Tsipei cataunxuae Jesús jopa tupaeyo naetha. Matautano tsipei cataunxuae jopa ponaeyo Nacom beicha. Bapoxonae bexa tsane barapomonae pomonae Jesús pejume cowantsiwichi xeinaena Nacom pia Pejumope tunaxu tatsi.

**Meje yabara poxonae jiwi Mesías  
yabara najume matsontsonobatsi**

<sup>40</sup>Baxota iruru ena ichamonae pomonae Jesús jume tainchi poxonae yabara paeba mera. Barapoxonae barapomonae najume matsontsonobiya paeba. Ichamonae jeye:

—Apara barapo pebin pon Nacom peitorobi jume pepaebin, pon wunae ewatatsi, pon bewa juinya patopaena, jei.

<sup>41</sup>Ichamonae jeye:

—Apara barapo pebin, bapon apara Mesías pon Nacom itorobeicapaeba peitaboco wetsica, jei.

Ichitha ichamonaeru jeye:

—Jume apara, apara Mesías aibi, tsipei Mesías jopa patopaeyo Galilea nacua werena. <sup>42</sup>Tsipei Nacom Pejume Diwesitha jeye: ‘Bapon Mesías itorobarecaein. Bapon Mesías David pia pemoxi susato jiwana pin tatsi, pon caena bayatha Judea nacumonae itorobiya pia pepa peewatsinchi tatsi naexana. Bapon Mesías Belén tomaratha naexanaena, po tomaratha David ichaxota popona bayatha’, jei Nacom Pejume Diwesitha, jei barapomonae.

<sup>43</sup>Daxota pinmonae najume matsontsonoba, tsipei daxita barapomonae Jesús ichawa beya barompaya yabara nanta xeinatsi. <sup>44</sup>Barapomonae jiwana monae bequein ichichipa xua Jesús pewaetabiwatsi, ichitha dapon aibi pon Jesús pewaetabiwatsi.

**Meje yabara poxonae  
pentacaponae jiwi Jesús  
yabara jume cowantichi**

<sup>45</sup>Bapoxonae policiamonae pomonae Nacom pin pia bo peyapu eenaewi nawibiya fariseomonae beya yawa sacerdotemonae pia pentacaponae tatsi beyano. Daxita barapomonae policiamonae yainyabatsi, jeichichi:

—¿Eta xua metha jopa pacarendenaem Jesús? jei daxita.

<sup>46</sup>Barapo policiamonae jume nota barapomonae, jeye:

—¡Dapon aibi ichun pon beta pepae-biwa, icha bapon ichi xua beta wunaeya paeba! jei.

<sup>47</sup>Daxita nexata barapomonae policiamonae jume notatsi, jeye:

—¿Paxam iruru jiwi pacui jupame, xua iruru pajume cowantame bequein bara bapon paca muxuitoroba?

<sup>48</sup>Tsipei apara jopa payaputaem xua judiomonae pia pentacaponae tati jopa yabara jume cowantsiyo bapon. Iru fariseomonae pia pentacaponae tatsiru jopa yabara jume cowantsiyo bapon. <sup>49</sup>Pomonae Jesús jume cowantatsi apara barapomonae jopa yaputaeyo pocotsiwa Nacom paeba pia peitorobi jumeintha. Barapomonae apara Nacom atene cana exanaena xua petsita natsicuentisixatsi xua abe petsita exanaexatsi, jei daxita fariseomonae.

<sup>50</sup>Barapo fariseomonae jiwana-pin baxota eca, pon pewun Nicodemo, pon merawitha bayatha Jesús siwa poinchi. Bapon Nicodemo jeye fariseomonaetha xua ichamonaetha:

<sup>51</sup>—Waitorobi coyewatha ba je-ichichi: ‘Jopa bewa yabara paebichi pebin xua penatsicuentisiwa xua abe peexanaexae poxonae cataunxuae jopa jume taetsi bapon pocotsiwa exana. Jame copiya matha bewa jume taetsi xua bapon pia coutha nayopita xua pocotsiwa exana’, ba jeichichi, jei Nicodemo.

<sup>52</sup>Nexata fariseomonae Nicodemo jume notatsi, jeye:

—¿Xam iruru barichim Galilea nacuapin naexaname, po Galilea nacuapiwi jopa beta yaputaeyo? Maisa jame matowa yorobare Nacom Pejume Diwesi. Xain yaputaneme xua dapon aibi pon xua Nacom peitorobi jume

pepaebin, pon Galilea nacua werena pona, jei fariseomonae.

**Meje yabara poxonae yabuyo  
abe exana poxonae nasi cui  
wainmeinta icha pebintha  
bequein pia pebin xeinaetha**

<sup>53</sup>Nexata daxita barapomonae barompaya pia bon be-iyiya.

**8**Nexata Jesús pona demxuwa beya, po demxuwa pewun demxu Olivowa. <sup>2</sup>Icha matacabittha poxonae pentha tsina, bapoxonae equeicha Jesús caibeya pona Nacom pin pia bo tati beya. Pinmonae Jesús imoxoyo caquita poinchi. Jesús eca yawa tamropata pitaba xua pecuidubiwa jiwi. <sup>3</sup>Bapoxonae judiomonae, pomonae jiwi pecuidubiwi Moisés pia peitorobi coyene tati, iruru fariseomonae, daxita barapomonae carendena petsiriwa Jesús pia xantha tati. Barapomonae cui taepona poxonae barapo petsiriwa nasi cui wainmeinta icha pebintha bequein pia pebin xeinaetha. Bapoxonae daxita barapomonae barapo petsiriwa cuaranotatsi pin bicheito itabarayo deca xuano xua Jesús peitararayo deca tati. <sup>4</sup>Daxita fariseomonae iruru judiomonae, pomonae jiwi pecuidubiwi Moisés pia peitorobi coyene tati daxita barapomonae Jesús baraichi, jeye:

—Pon jiwi Necuidubim, paxan jeme-icha pacui taeponan xua barapo yabuyo abe exana, poxonae nasi cui wainmeinta icha pebintha bequein pia pebin xeinaetha. <sup>5</sup>Moisés pia peitorobi coyewatha naca tsipaeba xua pinae bewa tupa exanaetsi ibowantha powaxi poxonae barapo coyene exana xua abe exana. ¿Incane iru xamdu? ¿Jinya eta xua pana netsipaebichi xua pata cana exanaewa bapowatha? jei.

<sup>6</sup>Baxua naemata Jesús yainyabatsi, pia poxonae Jesús abeya jume notsina bapoxonae pia barapomonae

Jesús abe yabara paebichi. Nexata bapoxonae Jesús irabe taeuncuareca yawano ira tinano pecobesitha. <sup>7</sup>Tsipei barapomonae matowa Jesús yainyabatsi, daxota Jesús equeicha nantacotaxuba. Yawano barai barapomonae, jeye:

—Caein paxam jiwana pam, pon bapana jopa abe exanae, bñ bapon jame copiya matha bapowa cuintabatsi ibototha, jei Jesús.

<sup>8</sup>Equeicha Jesús irabe taeuncuareca. Yawano equeicha Jesús ira tina pecobesitha. <sup>9</sup>Ichitha poxonae barapomonae Jesús jume tainchi, bapoxonae daxita barapomonae barompaya nanthũthũ cayabara nanta xeina xua irũrũ abe exanarũ barapomonae. Daxita barapomonae Jesús pia xainya weya tatsi tsana nanatsixibapona. Copiya penapataewi pona, bapoxonae cotacaya ichamonae nawibiya, beya jiwaibi. Saya meisa barapo yabũyo compa uncua Jesús pia xantha tatsi. <sup>10</sup>Bapoxonae Jesús equeicha nantacotaxuba. Yawa Jesús tane barapo yabũyo xua compa uncua pia xantha tatsi. Jesús barai yabũyo, jeye:

—¿Incane dapomonae? ¿Dapomonae aibi pomonae cayabara paeba xua nenatsicuentisiwa xua abe neexanaexae Nacomtha? jei Jesús.

<sup>11</sup>Barapowa Jesús jume notatsi, jeye:

—Jume, Tanecanamataxeinaein, dapomonae aibi pomonae neyabara paeba xua tanatsicuentisiwa xua abe taexanaexae Nacomtha, jei.

Nexata Jesús barai bapowa, jeye:

—Xan irũrũ jopa cayabara paebi tsainchi xua nenatsicuentisiwa xua abe neexanaexae Nacomtha. Nawiyama, equeicha jopa abe peexanae cuiru coyene exanaeinde, jei Jesús.

**Meje yabara poxonae Jesús namchi, jeye: “Icha pecoicha ichi xua jiwi beta tane cana exainchi merawi, barichin xan jiwi cana exanan xua Nacom beta peyaputaewatsi”, jei Jesús**

<sup>12</sup>Equeicha Jesús tsipaeba jiwi Nacom pin pia botha. Jesús jeye:

—Icha pecoicha ichi xua jiwi beta tanecana exainchi merawi, barichin xan jiwi cana exanan xua Nacom beta peyaputaewatsi xua pomonae jinompa po cae pin nacuathe. Pon nejume cowanta, bapon xeinaena peajũntũyapusuwa, po peajũntũyapusuwa ataya tsiteca xua bapon jopa abe peexanaenexa, jei Jesús.

<sup>13</sup>Nexata fariseomonae Jesús baraichi, jeye:

—Xam apara jinya coutha nayabara diwesi paebame, daxota jopa be paca jume cowantichi tsipei jopa ainya cuiyo pocotsiwa paebame, jei fariseomonae.

<sup>14</sup>Jesús jume nota barapomonaetha, jeye:

—Xua xan nayabara diwesi paeban, baxua apara xainyan, bequein bara tacoutha nayabara diwesi paeban saya. Tsipei yaputan ichaxota werena taponae xua ichaxota beya taponae tsane. Ichitha paxam jopa payaputaem ichaxota werena taponae xua ichaxota beya taponae tsane.

<sup>15</sup>Paxam jiwi payabara paebame xua penatsicuentisiwa xua abe peexanaexae Nacomtha saya xua poxonae pataneme xua exana icha po cae pin nacuathepiwi ichi. Xan jopa bapana jiwi yabara paebinyo xua penatsicuentisiwa xua abe peexanaexae Nacomtha saya xua poxonae tan xua exana. <sup>16</sup>Icha jiwi yabara paeban xua penatsicuentisiwa xua abe peexanaexae Nacomtha bara pexainyei coyenyatha exanan. Tsipei jopa bapana companyo poxonae jiwi yabara paeban xua penatsicuentisiwa xua abe peexanaexae Nacomtha tsipei Taxa Na-

com nebaru exana baxua pon tana neitorobixae. <sup>17</sup>Painya itorobi coyenewatha jeye: 'Icha ichunbe nanta jupaeya yabara paebabe pocotsiwa tanebe bewa baponbe pajume cowantsiname tsipei baxua apara ainya cui', jei. <sup>18</sup>Xan tacoutha nayabara diwesi paeban. Iruru Taxa neyabara diwesi paeba, pon tana neitorobixae. Daxota Taxa pana nacueyatanbe, jei Jesús.

<sup>19</sup>Nexata barapomonae Jesús yainyabatsi, jeye:

—¿Incane Axa, exota poponara? jei.

Jesús jume nota, jeye:

—Paxam jopa pana neyaitaem, matautano Taxa jopa payaitaem. Icha pana neyaitaetsipame bapoxonae metha payaitaetsipame Taxa, jei Jesús xua fariseomonae tsipaebatsi.

<sup>20</sup>Baxuan Jesús caunuta poxonae tsipaeba jiwi Nacom pin pia botha tatsi. Jesús imoxoyo uncua ichaxota jiwi jeba paratixi Nacom nexa. Dapon aibi pon Jesús pewaetabiwatsi, tsipei Jesús pia matabi cataunxuae taachicatsi.

**Meje yabara poxonae Jesús namchi:  
“Jopa paca itacupae tsane xua  
painya neponaewa tsane ichaxota  
taponawa tsane”, jei Jesús**

<sup>21</sup>Equeicha Jesús jeye barapo fariseomonaetha:

—Bexa equeicha caibeicha ponaein. Paxam pana neitaxanaename painya tapaca cayawenaenexa tsainchi abe painya neexanae cuiru coyenein weya. Jopa paca capanepae tsainchi abe painya neexanae cuiru coyenein weya xua poxonae pawerapaename. Jopa paca itacupae tsane xua painya neponaewa ichaxota taponawa tsane, jei Jesús fariseomonaetha.

<sup>22</sup>Nexata judiomonae caemonae najei:

—¿Eta pocotsiwa metha bapon naca tsipaeba xua pinae jopa tae tsainchi xuano xua pinae jopa naca itacupae

tsane xua waponawa ichaxota bapon peponaewa tsane? ¿Metha pia coutha pia nabexuichi? jei judiomonae.

<sup>23</sup>Nexata Jesús barai judiomonae, jeye:

—Paxam saya betsiqepiwi pam. Xan seicaya nama athabeicha tapoponaein. Paxam seicaya nama po cae pin nacuathepiwi pam. Xan nama po cae pin nacuathepin aibi. <sup>24</sup>Daxota bayatha paca jeichi: 'Paxam jopa paca capanepae tsainchi abe painya neexanae cuiru coyenein weya poxonae pawerapaename', jan. Tsipei jopa pana neyabara jume cowantsim po coyene xua bara tana neitacupaewa xua tapaca cayawenaewatsi, daxota pamuxuna werapaename abe painya neexanae cuiru coyenein, jei Jesús judiomonaetha.

<sup>25</sup>Nexata barapomonae Jesús yainyabatsi, jeye:

—¿Jintam xamda? ¿Etapo jitom? jei.

Jesús jume nota barapomonae, jeye:

—Poxonae aena tamropata pitaban xua paca cuidubatsi, bapoxonae bayatha nayopichiya paca tsipaebatsi po coyene xua ichaxota werena taponawa. <sup>26</sup>Acoibi nawita xua yabara tapaca tsipaebiwatsi po coyene xua abe peexanae cuiru coyenein painya neexanaewa xua daxota Nacom patsita natsicuentame xua abe painya neexanaexae Nacomtha. Taxa neitoroba xua jiwi tatsipaebiwa pocotsiwa bayatha Taxa jume tan. Taxa bara yatsicaya jume xainyeya paeba, jei Jesús.

<sup>27</sup>Ichitha barapomonae jopa yaputaeyo poxonae Jesús jeye Nacom yabara: “Taxa”, jei xua apara Paxa caunuta, pon Nacom. <sup>28</sup>Daxota Jesús barai barapomonae, jeye:

—Poxonae paxam naetotha pana necobe matatabarutsiname xan ponxaein Nacom Tananeitapetsinxae, bapoxonae pana neyaputaename xua

deta cou apara barapo jiton xan. Matautano pana neyaputaename xua xan jopa tacoutha nayabara paebinyo, saya xua cueicueijan pocotsiwa Taxa necuiduba. <sup>29</sup>Tsipei pon neitoroba apara nebaru popona. Taxa bapana jopa compa popona neexanae tsipei saya exaneiban pocotsiwa Taxa tsita xanepanatsi, jei Jesús.

<sup>30</sup>Poxonae Jesús baxua caunuta pinmonae judiomonae Jesús jume cowuntatsi.

**Meje yabara poxonae Jesús yabara  
paeba Nacom pijimonae tatsi iru  
pomonae caurimonae pia  
pentacaponaein tatsi piamonae tatsi**

<sup>31</sup>Nexata bapoxonae Jesús barai judiomonae, po judiomonae Jesús pejume cowuntsixaetsi. Jesús jeye:

—Icha paxam xanepanaya pana nejume cowuntsiya exanaponaeya jinompaename pocotsiwa tapaca tsipaebiwatsi, bapoxonae bara pepa tajimonae pam tsane. <sup>32</sup>Bapoxonae payaputaename po coyene pexainyei coyenewa. Matautano papanenebiyaename pexainya weya pon paca itoroba xua abe painya neexanaewa, jei Jesús.

<sup>33</sup>Barapo judiomonae, Jesús jume notatsi, jeye:

—Apara paxan Abraham pia pemomoxi susato jiwi tatsi pan. Dapon aibi pon pana itoroba xua pata taexanaewa poxonae pana itoroba xua poxonae pana busi tatane. ¿Eta pocotsiwa metha pana nejam: ‘Paxam papanenebiyaename pexainya weya pon paca itoroba xua abe painya neexanaewa’, pana nejam? jei pomonae Jesús jopa jume cowuntichi.

<sup>34</sup>Jesús barai barapomonae, jeye:

—Xaniyan paca tsipaebatsi daxita pomonae xua abe peexanae cuiru coyenein exana barapomonae bara exana po coyenein pia pepon itorobatsi icha jiton ichi pon amanaya tanacuita

ichun xua poxonae bewa exanae pocotsiwa peitorobixaetsi poxonae busi cui tatainchi. <sup>35</sup>Pon ba amanaya tanacuita ichun, bapon ba apara piamonae aibi pomonae peitorobixaetsi, tsipei bapon pebusi cui taetaeinchi. Ichitha pon ba xua ichun pexantoxae tatsi, bapon ba ataya pexanto tatsi bara piamonae pexeinaexae bapon. <sup>36</sup>Daxota xan Nacom Pexanton, icha panenebiya paca cana exainchi caurimonae pia pentacaponaein tatsi weya, pon xua paca itorobeiba xua abe painya neexanaewa, barapoxonae bara ataya paca capanenebiya tso poneibi tsainchi bapon pexainya weya tatsi. <sup>37</sup>Bayatha yabara paca yaputainchi xua Abraham pia pemomoxi susatopiwi tatsi pam. Daichitha paichichipame xua pana nebexubame, jopa painya neichipaexae xua painya nejume taewa pocotsiwa paca tsipaebatsi. <sup>38</sup>Xan yabara paeban po coyenein xua Taxa netsita ituta. Paxam paexaname xua po coyenein painya axa paca itoroba, jei Jesús.

<sup>39</sup>Barapomonae Jesús jume notatsi, jeye:

—¡Pata tamo susatopin pon be pata taxa patsicotan, bapon apara Abraham! jei barapomonae.

Ichitha Jesús jume barai, jeye:

—Icha bara Abraham pia pexui tatsi pam tsipaem, metha bara paexanaetsipame pocotsiwa bapon bayatha caena exana. <sup>40</sup>Bequein bara paca tsipaebatsi po coyene pexainyeiwa xua po coyene Nacom necuiduba, ichitha paichichipame xua pana nebexubame. Apara Abraham jopa bapana baxua daichi. <sup>41</sup>Paxam bara barapocotsiwa paexaname pocotsiwa painya axa exana, jei Jesús.

Nexata barapomonae Jesús baraichi, jeye:

—Paxan dapomonae pan aibi pomonae piacoibi jiwi pan, tsipei pata

taena jopa nasi cui wainmeinchiyo. Paxan xaniwaicha payaputan xua bara compa painta pata taxa, bapon Nacom, jei barapomonaе.

<sup>42</sup>Nexata Jesús jume barai, jeye:

—Icha bara Nacom pia pexui pam tsipaem metha pana neantobe tsipaem. Tsipei Nacom bapon pia xainya wetsica ponan, anoxuaeno bara uncuanje. Apara jopa daxua tsipatopaeinyo xua tacoutha tana nayabara paebiwa tsane. Saya patopan poxoru Nacom neitoroba. <sup>43</sup>Paxam jopa payaputaem xua paca tsipaebatsi poxoru jopa be painya nejume taexae baxua pocotsiwa paca tsipaebatsi. <sup>44</sup>Caurimonaе pia pentacaponaein tatsi, bapon apara painya axa. Barapo caurimonaе pia pentacaponaein tatsi bapon piamonaе tatsi pam daxota paexaname pocotsiwa bapon paca itoroba. Barapo caurimonaе pia pentacaponaein tatsi jiwi jutepapoinchi poxonaе Nacom aena nacua forota weya, xua beya anoxuae. Bapon bapana jopa xainyeya pepaebin tsipei po juntu coyene Nacom xainyeya peyabara paebiwatsi jopa xeinaeyo. Poxonaе bapon naerabiya paeba, baxua paeba tsipei barapo penaerabi juntu coyene xeina. Bapon jiwi itorobatsi xua jiwi naerabiya pepaebeliwiwa tsane. <sup>45</sup>Paxam bapon piamonaе tatsi pamxaem daxota jopa xaniwaicha pana nejume cowuntsim pocotsiwa xainyeya tapaebiwa. <sup>46</sup>Paxam caein jiwana pam dapon aibi pon tana neyabara jeiwa: ‘Maisa bapon abe exana’, pon tana neyabara jeiwa. Bequein bara pexainyei jume paca tsipaebatsi daichitha jopa pana nejume cowuntsim. <sup>47</sup>Pon ba Nacom piamonaе tatsi baraba namuxu naewata pocotsiwa Nacom paeba. Paxam apara jopa Nacom piamonaе tatsi pam, daxota jopa bepajume cowuntsim pocotsiwa Nacom paeba, jei Jesús xua judiomonaе tsipaebatsi.

**Meje yabara poxonaе Jesús namchi: “Poxonaе cataunxuae Abraham jopa poponaeyo, caena bayatha tsiwanaya ataya poponeiban”, jei Jesús**

<sup>48</sup>Nexata equeicha judiomonaе Jesús baraichi, jeye:

—Bara xainyeya paca yabara pae-batsi poxonaе pana najan: ‘Bapon apara Samaria nacuamonaepin, apara cauri xeina’, poxonaе paca yabara jeichichi, jei judiomonaе.

<sup>49</sup>Jesús jume nota, jeye:

—Xan apara cauri jopa nebaru popon-aeyo. Saya xua exanan bara pocotsiwa jiwi cana exanan xua Taxa wunaе pe-jainchiwatsi, ichitha nama paxam pana necasebame, saya abeya pana neyabara paebame. <sup>50</sup>Jopa netsita ainya cuiyiyo xua jiwi wunaе tana nejainchiwa. Be-quein Taxa ichichipa xua jiwi wunaе tana nejainchiwa. Bapon Taxa yabara paebina jiwi pomonaе xua abe peex-anaewa xua penatsicuentisiwa xua abe petsita exanaexaetsi. <sup>51</sup>Xaniyan paca tsi-paebatsi pon nejume cowuntsiya ex-anaena pocotsiwa paeban, bapon jopa bapana tupae tsane, jei Jesús.

<sup>52</sup>Bapoxonaе judiomonaе Jesús jume notatsi, jeye:

—Bara xaniwaicha payaputan xua xam cabaru popona cauri. Abraham iruru pomonaе Nacom peitorobi jume pepaebiwatsi daxita barapomonaе caena bayatha werapa. Ichitha xam pana ne-jam: ‘Pon nejume cowuntsiya exanaena pocotsiwa paeban, bapon jopa bapana tupae tsane’, pana nejam. <sup>53</sup>¿Xam apara jopa toxechina ainya cuim Abraham pon pata tamo susatopin! Bapon caena bay-atha tupa iruru caena bayatha wer-apa pomonaе Nacom peitorobi jume pepaebiwatsi. ¿Eta xua metha jinya coutha nanta xeiname xua ichamonaе cayabara nanta xeinaena xua xam pon peainya cui jitom? jei judiomonaе.



<sup>54</sup> Jesús jume nota, jeye:

—Icha saya compa xan tacoutha wɛnae najaintan baxua jopa xapain wɛnaeayo. Jame pon wɛnae nejainta bapon apara Nacom, pon payabara jam: ‘Apara pata Taxa, bapon Nacom’, pajam. <sup>55</sup> Bequein baxua papaebame daichitha jopa xapain payabara yaputaem Nacom. Xan Nacom yaputan. Ichitha icha jan tsipaein: ‘Bapon jopa yaputaeminyo’, jan tsipaein, metha apara naerabichipan icha paichim xua naerabiya papaebame poxona. Ichitha xan yatsicaewa yaputan Nacom daxota bara baxuan itapeta exanan xua pocotsiwa tana neitorobixae pon Taxa bapon Nacom. <sup>56</sup> Abraham painya amo susatopin bayatha yabara wɛnae yaputane xua tapatopaewa tsane po cae pin nacuathe tsique. Daxota bapon bichocono juntu coyene weiweina. Bara xainyei patopan po cae pin nacuathe tsique daxota bichocono juntu coyene weiweina bapon.

<sup>57</sup> Nexata judiomonae Jesús baraichi, jeye:

—Apara pena jitom cataunxuae, jopa xeinaem apara cincuenta po weibe. ¿Eta pocotsiwa metha jam: ‘Abraham tan’, jam? Bara caena bayatha Abraham tɛpaba, jei judiomonae.

<sup>58</sup> Jesús jume nota, jeye:

—Xaniyan paca tsipaebatsi poxona cataunxuae Abraham jopa poponaeyo caena bayatha tsiwanaya ataya poponeiban, jei Jesús judiomonaetha.

<sup>59</sup> Nexata bapoxonae barapomonae anaepanaya ibowan notarɛcupa pecuinbabinexatsi Jesús. Ichitha Jesús nantsiyataraba yawa ponataba Nacom pin pia bo weya. Jesús xenta iya, barapomonae pia xainya iya tatsi.

**Meje yabara poxonae Jesús axaibi exana pon peitata nacutsin, pon xua pexuyotha yawa naexana**

**9** Iruru Jesús Nacom pin pia bo weya baru pona pijimonae xua poxona namtotha baru ecapona. Bapoxona Jesús caxina pebin pon peitata nacutsin xua pon pexuyotha yawa naexana. <sup>2</sup> Jesús pijimonae yainyabiyatsi, jeye:

—Patatanecuidubim, ¿eta pocotsiwa metha bapon itata nacutsiya naexana? ¿Metha poxoru paxa tatsi abe exana? ¿Metha poxoru pena tatsi abe exana? ¿Ichacuihitha metha tsipae poxoru bapon pia coutha abe exana? jei barapomonae.

<sup>3</sup> Jesús pijimonae jume barai, jeye:

—Jume apara, jopa apara itata nacutsiyo poxoru abe peexanaexae bapon. Matautano jopa apara baxua xua paxa tatsi abe peexanaexae. Matautano jopa apara baxua xua pena tatsi abe peexanaexae. Jame apara bapon itata nacuta xua jiwi peyaputaenexa xua Nacom peayapusuwa xeina xua axaibi peexanaenexa tsainchi bapon. <sup>4</sup> Jiton ba nacuita poxona cataunxuae pentha tsuncuae. Poxonae quirei tsuxubi pebin ba jopa itacɛpaetsi xua penacuichiwa. Xan barichin. Poxonae cataunxuae poponan po cae pin nacuathe bewa exanaein tanacuichiwa. Barapo tanacuichiwa apara pia penacuichiwa tatsi pon tana neitorobixae. Poxonae tɛpaein jopa neitacɛpae tsane xua taexanaewa barapo tanacuichiwa xua bayatha Nacom neitoroba. <sup>5</sup> Poxonae cataunxuae po cae pin nacuathe poponanje jiwi yawenan xua Nacom beta peyabara yaputaewa tsainchi, icha jiton ichichi pecoicha xua yawenatsi merawi xua beta penecotsiwa, jei Jesús pijimonaetha.

<sup>6</sup> Poxonae Jesús baxua najume weta, bapoxonae iratha naone sutaba,

yawa peonetha tsoroboyo nacobena ponaxuba. Bapoxonae Jesús barapo tsoroboyotha itacuere caxueba peitata nacutsin. <sup>7</sup>Nexata Jesús barai bapon, jeye:

—Ponare fetiyo beya, po fetiyo pewun Siloé. Barapo Siloé fetiyotha naitacuere waexore, jei Jesús. (Barapo Siloé fetiyo wun jei: “Po fetiyo Nacom itoroba”, jei.)

Pon peitata nacutsin pona fetiyo beya naitata waexubano. Poxonae equeicha bapon caibe iya Jesús beya, nama bara itacupatsi xua petaewa. <sup>8</sup>Bapon pia petsicuarabu enaewichi tatsi, iruno pomonae pecui yaputaexaetsi xua poxonae bapon aitatabeya popona daxita barapomonae bapon yabara natsipae-batsi. Ichamonae jeye:

—¿Apara baponda pon iratha jiwi wuquequeibara paratixi? jei.

<sup>9</sup>Ichamonae jeye:

—Aa, apara bapon, pon iratha jiwi wuquequeiba paratixi, jei.

Ichamonae jeye:

—Apara bapon aibi. Saya apara be bapon, jei.

Ichitha pon peitata nacutsin pia coutha jeye:

—Apara bara xan tsocuaein, jei.

<sup>10</sup>Nexata daxita barapomonae peitata nacutsin yainyabatsi, jeichichi:

—¿Eta xua metha anoxuae taneme? jei daxita barapomonae.

<sup>11</sup>Pon peitata nacutsin jume nota barapomonae, jeye:

—Pon pewun Jesús, bapon tsoroboyo peonetha nacobena pontaba, bapoxonae barapo tsoroboyotha neitacuere caxueba. Yawa nejei: ‘Fetiyo beya ponare, po fetiyo pewun Siloé. Barapo fetiyotha naitacuere waexore’, nejei. Bara barabeya ponan. Poxonae baxota naitacuere waexuban, bapoxonae baratan, jei bapon.

<sup>12</sup>Bapoxonae peitata nacutsin yainyabatsi barapomonae, jeichichi:

—¿Incane dapo pebin, pon caaxaibi exana? jeichichi.

Bapon jume barai bapomonae, jeye:

—Bu, canta jopa taeinyo, jei bapon.

**Meje yabara poxonae pon equeicha xua itata wunae matowa yainyabatsi xua fariseomonae matowa yainyaba**

<sup>13</sup>Pon xua equeicha itata wunae, pomonae pia petsicuarabu enaewichi tatsi barapomonae bapon capoinchi fariseomonae beya. <sup>14</sup>Ichitha po mataqueitha Jesús axaibi exana pon peitata nacutsin, xua poxonae tsoroboyo peonetha nacobena pontaba, barapo matacabi apara judiomonae pia pentaquei seicae matacabi tatsi. <sup>15</sup>Bapoxonae bapon yainyabatsi fariseomonae, jeye:

—¿Eta bichim xua anoxuae jamaisa necotame? jei fariseomonae.

Bapon jume barai, jeye:

—Bapon tsoroboyo peonetha neitacuere caxueba. Bapoxonae naitacuere waexuban meratha. Bapoxonae yawa bara necotan, jei fariseomonaetha.

<sup>16</sup>Bapoxonae fariseo jiwanamonae bapon baraichi, jeye:

—Pon caaxaibi exana apara Nacom jopa bapon itorobicaeyo, tsipei bapon jopa yabara baru cui itura jinaeyo barapo pentaquei seicae matacabi, jei fariseo jiwanamonae.

Ichamonae jeye:

—Icha bapon peajuntucoyenebein, ¿metha nexata eta pocotsiwa pexeinya petsita itutsi coyenewa exana? jei.

Daxita barapo fariseomonae nantiya najume matsontsonoba. <sup>17</sup>Equeicha fariseomonae, pon bayatha itacuere axaibi exainchi, bapon yainyabatsi, jeichichi:

—¿Incane xam, eta xua yabara nanta xeinameru pon caaitacuerexaibi exana? jei fariseomonae.

Bapon jume epa pita, jeye:

—Yaitama bapon neaxaibi exana metha moya bara bapon, pon Nacom peitorobi jume pepaebin, jei bapon.

<sup>18</sup>Ichitha judiomonae jopa bejume cowantsiyo pocotsiwa pon peitata nacutsin bayatha itacuere axaibi exainchi xuano xua anoxuae itacupatsi xua petaewa. Daxota bapoxonae barapo judiomonae pon itacuere axaibi exainchi paxa tatsi wabatsi, yawa pena tatsi wabatsi. <sup>19</sup>Barapo judiomonae jeye coxiyünbetha:

—¿Baponje bara yatsicaya painya nexanto? ¿Apara bara bapon pon bayatha yaitata nacutsiya naexana? ¿Eta bichi xua anoxuae itacupatsi xua penecotsiwa? jei judiomonae.

<sup>20</sup>Barapo coxiyünbe jume notabe, jeibe:

—Bara yatsicaewa payaputan xua bapon barapara pata taxanto. Matautano payaputan xua bayatha bapon itata nacutsiya naexana. <sup>21</sup>Daichitha jopa payaputaeyno xua eta bichi xua bapon anoxuae necota. Matautano jopa payaputaeyno xua pon pata taxanto itacuere axaibi exainchi. Paxam moya bara bapon payainyabare. Bũ nexata bapon pia coya paca jume notsina tsipei apara bayatha pinyo, jeibe coxiyünbe.

<sup>22</sup>Barapo coxiyünbe cunuwa judiomonae cunuwatsi. Tsipei judiomonae bayatha jei: “Pomonae Jesús yabara jume cowantatsi, pomonae xua jeye: ‘Jesús apara bapon Mesías pon Nacom itorobica’, pomonae jeye, barapomonae paitawetan pata penacaetutsi bo weya”, jei barapo judiomonae. Daxota barapo coxiyünbe pijunuwi jopa jeibe: “Apara bapon Jesús pon Mesías bapon painta taxanto itacuere axaibi exainchi”, jopa jeibe.

<sup>23</sup>Daxota barapo coxiyünbe barapo judiomonaetha jeibe: “Paxam moya bapon payainyabare. Bũ nexata bapon

pia coya paca jume nota tsipei bayatha pinyo”, jeibe coxiyünbe.

<sup>24</sup>Bapoxonae equeicha judiomonae pon itacuere axaibi exainchi yainyabatsi, jeichichi:

—Yatsicaewa xainyeya pana netsipaebare xua iruru Nacom necajume taenexa. Paxan payaputan xua Jesús bapon apara pon peajuntucoyenebein, jei judiomonae.

<sup>25</sup>Bapon jume nota barapo judiomonaetha, jeye:

—Xan jopa yabara yaputaeyno xua icha metha bapon pon peajuntucoyenebein. Saya meisa yaputan xua copiya taitata nacutsin xuano xua anoxuae neitacupa xua tanecotsiwa, jei bapon.

<sup>26</sup>Equeicha barapo judiomonae bapon yainyabatsi, jeichichi:

—¿Eta caitacuere ichi poxonae caaitacuerexaibi exana? jei judiomonae.

<sup>27</sup>Bapon jume nota barapo judiomonae, jeye:

—Bara bayatha paca tsipaebatsiba. Came jopa yabara pana nejume cowuntsim. ¿Eta xua metha equeicha bepa baxua matowa paca tsipaebichi? ¿Painya iruru naexanaetsi Jesús pijimonae tatsi? jei bapon.

<sup>28</sup>Ichitha barapo judiomonae bapon biatainchi, jeichichi:

—Xam moya Jesús piamonae jiton tatsi naexande, nama paxan Moisés pia peitorobi coyenewa pata exanaponae jiji. <sup>29</sup>Paxan payaputan xua Nacom Moisés itorobatsi. Ichitha nama pon caaitacuerexaibi exana jopa payaputaeyno xua ichaxota werena peponaewa xua ichun peitorobixae, jei judiomonae.

<sup>30</sup>Bapon jume nota, jeye:

—¡Jina! Paxam jopa payaputaem xua bapon Jesús ichaxota werena peponaewa xua bequein painya tana netaewatham xua Jesús tana

neaitacuerexaibi exanaewa. <sup>31</sup> Waxainchi yaputainchi bara, xua Nacom jopa jume naitaewatsiyo pomonaetha pomonae abe peexanaewi xua peyawenaewanexa. Nacom saya meisa jume naitaewata pomonaetha pomonae wunae pejainchixaetsi. Matautano Nacom saya jume naitaewata pomonaetha pomonae peitorobixae xua pia petaexanaewa tsainchi pocotsiwa bapon peichichipaexae. <sup>32</sup> Poxonae aena Nacom nacua forota, bapoxonae xua beya anoxuae, dapon aibi pon ichun itacuere axaibi exainchi pon peitata nacutsin. <sup>33</sup> Icha bapon Nacom jopa itorobichipae, metha bapon jopa itacupaetsipaetsi xua ichun itacuere axaibi peexanaewatsi, pon peitata nacutsin, jei bapon.

<sup>34</sup> Nexata bapon baraichi, jeichichi:

—Daxota itata nacutsiya naexaname tsipei ajuntucoyenebeya naexaname. ¡Dacotsiwa apara ichichipame pana necuidubamecai! jei judiomonae.

Bapoxonae bapon itawetatsi judiomonae pia penacaetutsi bo tatsi weya.

### **Meje yabara poxonae Jesús yabara paeba pomonae jopa Nacom yaputaetsi**

<sup>35</sup> Jesús yaputane xua pon bayatha itacuere axaibi exainchi itawetatsi judiomonae pia penacaetutsi bo tatsi weya, xua judiomonae itaweta. Poxonae bapon Jesús caxina, Jesús jeye:

—¿Xam yabara jume cowuntame pon Nacom pia Peitapetsin tatsi? jei Jesús.

<sup>36</sup> Bapon jume barai Jesús, jeye:

—Pon Necanamataxeinaem jiwi, incane netsipaebare, ¿Incane bapon pon Nacom pia Peitapetsin? Bapoxonae tha jume cowuntichi, jei pon peitata nacutsin.

<sup>37</sup> Jesús jume nota, jeye:

—Xam apara bapon bayatha taneme pon Nacom pia Peitapetsin tatsi. Pon aunxuaein catsipaebatsi, apara bara xan, jei Jesús xua nabarai.

<sup>38</sup> Nexata bapon pentabocototha uncua Jesús peitabaratha tatsi xua Jesús wunae pejainchinexatsi. Bapon jeye:

—¡Tanecanamataxeinaem, cajume cowuntatsi bara! jei bapon.

<sup>39</sup> Bapoxonae Jesús barai, jeye:

—Barapo cae pin nacuathe patopeican xua jiwi tayabara paebinexa xua penatsicuentisiwa xua abe peexanaexae Nacomtha. Pomonae xua bayatha jopa Nacom cayabara yaputaetsi barapomonae cana exanaein xua barapomonae Nacom cayabara yaputaetsi. Pomonae xua bayatha bequein nanta xeina xua Nacom cayabara yaputainchi barapomonae cana exanaein xua barapomonae equeicha jopa Nacom cayabara yaputae tsainchi, jei Jesús.

<sup>40</sup> Bapoxonae fariseo jiwanamonae, pomonae Jesús barai uncua, poxonae barapomonae Jesús jume tainchi, Jesús yainyabatsi, jeye:

—¿Apara pana baram xua equeicha jopa payabara yaputaetsi tsane Nacom? jei fariseo jiwanamonae.

<sup>41</sup> Jesús jume nota, jeye:

—Icha paxam bayatha jopa payabara yaputaemtsipae Nacom, jopa apara painya coutham tsipae xua poxonae abe painya neexanaewa. Ichitha mexeya poxoru pajam: ‘Payaputan Nacom’, pajam daxota apara painya coutham xua bara abe painya neexanaewa, jei Jesús.

### **Meje yabara poxonae Jesús yabara paeba pon oveja pe-eenaein**

**10** Equeicha Jesús namchi: “Xaniyan paca tsipaebatsi diwesi xua pata neyabara yaputaewam tsane. Pebin ba oveja pia curara boupa iya joniya. Ichitha pon peboupa jopa

joniyaeyo, saya ecoinya icha muxunene werena, bapon apara pon pecaibin oveja. <sup>2</sup>Pon jame joniya pepa boupa iya bapon apara pon pe-eenaen oveja. <sup>3</sup>Pon peboupa xatababin, bapon boupa saranaxorena pon oveja pe-eenaen taboupa saranaxorenatsi. Poxonae pon oveja pe-eenaen junuta oveja, barapo oveja jume copi yaputane baxua. Pon oveja pe-eenaen, bapon daxita barapo oveja barompaya pia wunxitha junuta. Bapoxonae bapon curara weya mata coniya ovejamonaenae. <sup>4</sup>Poxonae curara weya mata coniya daxita bapon mata caecapona yawa punaenapoinchi pejume copi yaputaexaetsi. <sup>5</sup>Ichitha barapo ovejamonaenae jopa puna ponaeyo ichuntha, pontha pon jopa yaitaeyo. Saya cuitaya ducupa tsipei ichun jopa jume copi yaputaetsi”, jei Jesús.

<sup>6</sup>Jesús tsipaeba barapomonaenae barapo pecayabara juta pepaebi diwesiyo poxonae oveja yabara paeba, daichitha came barapomonaenae jopa yaputaeyo barapo diwesi.

### **Meje yabara xua Jesús pon beta pe-eenaen jiwi**

<sup>7</sup>Nexata equeicha Jesús tsipaeba barapomonaenae, jeye: “Icha oveja ichi xua curaratha jojoniya xua peboupa peyawenaexaetsi, barichi jiwi xua Nacom pia nacuatheicha tatsi pata poxoru xanxaein xua tayawenaexae. <sup>8</sup>Daxita pomonaenae netsiwana pata, pomonaenae xua jei: ‘Nacom pana itoroba’, jei, barapomonaenae apara pomonaenae jiwi pemuxujainyabiwi. Ichitha jiwi jopa yabara jume cowuntsiyo barapomonaenae, icha oveja ichi xua aichaxaibi pepuna ponaewa ichuntha jopa pejume copi yaputaexae. <sup>9</sup>Xan jiwi tayawenaenae daxota pon nejume cowunta yawenan xua pepatopaewa Nacom beicha. Icha oveja ichichi xua merawi curaratha yaboupa xatatabatsi xuano xua

mataqueitha yausaranaxorenatsi xua pexaenexa naepanaewa, barichi pomonaenae tana nejume cowuntsiwi barapomonaenae beta yawenan.

<sup>10</sup>“Pon pecaibin patopa xua saya pecaibinexa oveja, yawa xua saya abe peexanaenexa yawa pebexubinexa. Ichitha nama xan patopan xua jiwi tacatsinexa peajuntuyapusuwa, po peajuntuyapusuwa jopa weraweracaewa xua jiwi jopa juniya mataropeichiya xexeinaponaenae tsane barapo peajuntuyapusuwa. <sup>11</sup>Pon beta pe-eenaen oveja, bapon tsitupa pia ovejamonaenae, tsipei jopa ichichipaeyo xua petajutebiwatsi pia ovejan tatsi xua poxonae pomonaenae pecaibiwi jutebina. Barapocotsi coyene ichi jiwi beta ta-eenaen. Jiwi tsitupaenae xua barapomonaenae tacapanepaenexa. <sup>12</sup>Ichitha pon tanacuita ichun xua tayapu eena oveja apara saya piaparatiwaxi. Poxonae bapon neuthu tane pijunuwi, oveja cuenta naetsiriwa, tsipei barapo ovejamonaenae pia ovejamonaenae tatsi aibi. Poxonae neuthu icha ovejan teicatsi, bapoxonae icha ovejamonaenae tsanaothopa. <sup>13</sup>Bapon naetsiriwa tsipei saya oveja eena xua piaparatiwaxi, xuano xua jopa xapain peyabara nanta xeinaexae ovejamonaenae.

<sup>14-15</sup>“Xan natsicotan be pon ovejamonaenae beta tayapu eenaen tsipei beta ta-eenaen pomonaenae tana nejume cowuntsiwi. Taxa neyaitane, xuya Taxa yaitan. Barichi yaitan pomonaenae tana nejume cowuntsiwi, xuya barapomonaenae neyaitane. Xan tana nejume cowuntsiwi yaitatsin xua tatsitupaenexa naetotha xua jopa peweraweracaewa tsane barapomonaenae. <sup>16</sup>Barichi xeinan icha tana nejume cowuntsiwi pomonaenae jopa israelmonaeyo. Barapomonaenae bewa iruru nacaetuta exanaenae xantha pomonaenae caena bayatha tana nejume cowuntsiwi iru pomonaeno xua bexa nejume cowuntsinano. Cae bicheito

exanaein. Barapomonae exanaena pocotsiwa itoroban. Matautano xeinaena bara compa xua xan ponxaein beta ta-eenaein, icha pebin ichi pon ovejamonaē peyapu eenaein xua poxonaē ovejamonaē caetucaetuteta cae curaratha.

<sup>17</sup>“Taxa bichocono neantobe tsipei tsitupaēin pomonaē tana nejume cowuntsiwi. Ichitha equeicha asun tsane. <sup>18</sup>Dapon aibi pon xua pia coutha tana nebexubiwa. Saya jame poxonaē tacoutha ichichipan. Xan itacoxonan xua bara jiwi tsitupaewa. Matautano itacoxonan xua equeicha asu tapoponaewa tsane petupaewa weya. Baxua itacoxonan xua taexanaewa, Taxa tana neitorobixae”, jei Jesús.

<sup>19</sup>Poxonaē barapo judiomonaē Jesús baxua jume tainchi, bapoxonaē equeicha barapo judiomonaē yabara najume matsonsonoba. <sup>20</sup>Ichamonaē judiomonaē yainyaba xua icha judiomonaē yainyabatsi, jeichichi:

—¿Eta xua metha bapon pajume naitawatame pocotsiwa bapon paeba? ¡Apara matayabatsi! ¡Cauri xeina apara! jei judiomonaē.

<sup>21</sup>Ichamonaē jeye:

—Dapon aibi pon xanepanaya pepaebiwa icha cauri xeina. Caurimonaēpin jopa bapana itacupaetsi xua pon peitata nacutsin axaibi peexanaewatsi, jei ichamonaē.

### **Meje yabara poxonaē judiomonaē Jesús jume itawetatsi**

<sup>22</sup>Poxonaē awubo daxita jiwi nacae-tuta Jerusalén tomaratha xua penabanaenexa pexaewa. Barapo penacae-tutsi matababin poxonaē nabane jiwi yabara nanta xeina xua caena bayatha piamonaē tatsi equeicha xaneba Nacom pin pia bo tatsi poxonaē ichamonaē abe exana. Barapomonae baxua yabara nacaetuta peyabara paebinexa

xua barapo bo Nacom nexa. <sup>23</sup>Jesús popona Nacom pin pia bo tauchipa boutotha. Barapo Nacom pin pia bo tauchipa bouto pewun Salomón. <sup>24</sup>Baxota judiomonaē Jesús imoxoyo caquita umenarucupatsi yawa Jesús jeichichi:

—¿Eta po matabibē metha ainya muxu paxeinaein xua pata cayabara yaputaewa tsainchi? Icha bara yatsicaya Mesías xam, moya pana netsipaebare, jei.

<sup>25</sup>Jesús jume nota, jeye:

—Bara bayatha paca tsipaebatsiba ichitha jopa pana nejume yabara cowuntsim. Pocotsiwa xua exanan, xua Taxa tana neitorobixae, baxua apara bara paca tsita naitapeinya xeinatsi xua xan apara bara Mesías. <sup>26</sup>Baxua jopa pana neyabara jume cowuntsim tsipei jopa tajimonaē pam be pocotsi coyeneya aunxuae bayatha paca tsipaebatsi. <sup>27</sup>Pomonaē tana nejume cowuntsiwi nejume copi yaputane yawa nepuna pona, icha ovejamonaē ichi xua jume copi yaputane pontha pon pe-eenaexaetsi xuano xua barapo ovejamonaē puna pona xua bapon puna poinchi. <sup>28</sup>Tana nejume cowuntsiwi catan peajuntuyapusuwa, po peajuntuyapusuwa xua bapana jopa peweraweracaewa tsane. Matautano ichamonaē jopa itacupaetsi xua tana newecobe notsiwa xua tamonaē inta notatsi. <sup>29</sup>Taxa barapomonae necata. Barapon Taxa bichocono toxeincha caein ainya cui, beyacaincha ichun xua ainya cui. Dapon aibi pon Taxa wecobe notatsi xua piamonaē tatsi tanotatsi. <sup>30</sup>Xan, iru Taxa bara caein panbe, jei Jesús.

<sup>31</sup>Nexata judiomonaē ibotoxi nota xua Jesús pecuinabiwa tsainchi. <sup>32</sup>Jesús barai barapomonae, jeye:

—Paxamtha matowa exaneiban pe-einya tatsita itutsi coyenewan Taxa pia peayapusuwatha tatsi. ¿Eta po tatsita

itutsi coyenewan taexanaexae ibotoxitha painya necuinbabichi? jei Jesús.

<sup>33</sup> Judiomonae jume nota, jeye:

—Jopa apara daxota paca cuinbabichi poxoru pexeinya petsita itutsi coyenewan neexanaexae. Daxota paca cuinbabatsi tsipei jam: ‘Xan iru Taxa bara caein panbe’, jam. Baxua apara abe paebame tsipei be Nacom naexaname jinya coutha poxonae saya pebim, jei judiomonae.

<sup>34</sup> Jesús barai, jeye:

—Nacom Pejume Diwesitha yabara paebatsi pomonae Nacom pejume cowuntsiwichi. Nacom jeye: ‘Paxam iruru nacommonae pam’, yabara jei Nacom, pomonae pejume cowuntsiwixaetsi. <sup>35</sup> Nacom paeba xua pinae pomonae petajume cowuntsiwixaetsi pejume diwesi barapomonae pinae bara nacommonae tsenae. Matautano waxainchi yaputainchi barapo diwesitha xua jopa bapana Nacom naerabiyo. <sup>36</sup> Nacom neitapeta, neitorobano tapatopaenexa barapo cae pin nacuathe. ¿Eta xua metha papaebame xua xan abe paeban poxonae jan: ‘Xan Nacom Pexanton’, jan? <sup>37</sup> Icha jopa exanaeinyo pocotsiwa Taxa neitoroba painya xoba pana nejume cowuntame baxua. <sup>38</sup> Icha exanan pocotsiwa Taxa neitoroba, bapoxonae pana necui yabara jume cowunde pocotsiwa exanan, bequein jopa pana nejume cowuntsim xua paca tsipaebatsi. Bapoxonae xain payaputaename xua xan Taxa nebaru popona, xua barichin xua Taxa baru poponan, jei Jesús.

<sup>39</sup> Equeicha barapomonae ichichipa xua Jesús pewaetabiwatsi ichitha Jesús naetsiriwa barapomonae weya.

<sup>40</sup> Nexata Jesús pijimonae caibe baru nawiya icha muxunene beya xua Jordán mentha. Baraxotiya Jesús pijimonae baru eca, ichaxota Juan bayatha bauti-

saba jiwí. <sup>41</sup> Pin bicheitomonaé Jesús siwa poinchi pejume taenexatsi. Barapomonae Jesús yabara natsipaebatsi, najei:

—Xaniyei bequein Juan pexeinya petsita itutsi coyenewan jopa exanaeyo daichitha daxita pocotsiwa xua Jesús yabara paebatsi, daxita baxuan bara apara xainyei, najei barapomonae.

<sup>42</sup> Baraxotiya pin bicheitomonaé Jesús yabara jume cowuntatsi.

### Meje yabara poxonae Lázaro tupa

**11** Iru pebin popona, pon pewun Lázaro. Bapon atene. Bapon Betania tomarapin. Iruru bapon Lázaro pamchobe tatsi barichi Betania tomarapiwayobe. Barapo pamchobe tatsi ichowayo pewun María, ichowayo pewun Marta. <sup>2</sup> Barapowa María, powa Lázaro pamcho tatsi, powa Jesús taxu epatabinchi icha matabitha penasiwatha xua petuxueiwa xuano xua taxu tsewa exanaeinchi pentanatha. <sup>3</sup> María pamchobe najume caitorobabe ichuntha icha tomara beya xua baxotiya Jesús beya petacajume jeichinexatsibe:

—Patatanecanamataxeinaein, jinya jiton atene, petacajume jeichinexatsibe bapon.

<sup>4</sup> Poxonae Jesús baxua jume tane, Jesús jeye:

—Bequein Lázaro atene ichitha barapo peatenewa jopa exanaeyo xua tupa peexaneibiwa ataya. Saya atene, apara Nacom pia jiwí tsita itutsichi pia peayapusuya itorobi coyenewa. Matautano iru xan Nacom Pexanton jiwitha tatsita itutsinexa taayapusuya itorobi coyenewa, jei Jesús.

<sup>5-6</sup> Bequein Jesús antobe Marta iru María iru Lázaro ichitha cataunxuae eca baxotiya ainya matabibé poxonae jume taetha xua Lázaro bayatha atene nawita. <sup>7</sup> Pirapae Jesús daxita pijimonae barai, jeye:

—Caibeya poinchi Judea nacua beya, jei Jesús.

<sup>8</sup>Nexata daxita Jesús pijimonae baraichi, jeye:

—Pon Patatanecuidubim, cain judiomonae, Judea nacua ichichichipa cacuinbaba ibotoxitha. Dacotsiwa equeicha jinya ponaetsi barapo Judea nacua beya, jeichichi.

<sup>9</sup>Jesús barai, jeye:

—Caentacabi doce po horabe xeina poxonae pentha tsuncuae. Icha pebin mataqueitha popona jopa xuirapopaeayo pentha petsuncuaexae barapo cae pin nacuahe. <sup>10</sup>Barichin poxonae cataunxuae poponan barapo cae pin nacuahe bewa exanaein xua Taxa pocotsiwa neitoroba. Tsipei poxonae tupaen jopa neitacupae tsane xua exanaein baxua, barapo cae pin nacuahe.

<sup>11</sup>Pirapae Jesús daxita pijimonae barai, jeye:

—Wajiton, Lázaro, maituncua. Ichitha tha bexa yaubaxuichi, jei Jesús.

<sup>12</sup>Nexata daxita Jesús pijimonae baraichi, jeye:

—Patatanecanamataxeinaem, icha bapon maituncua, ¿metha poxoru anoxuae yasatatsi, daxota baxua paebame? jeichichi.

<sup>13</sup>Ichitha Jesús namchi: “Lázaro bayatha tupa”, jei, xua poxonae jei: “Lázaro maituncua”, jei. Daichitha Jesús pijimonae tatsi nanta xeina xua metha Lázaro maituncua icha merawi ichi poxonae maiteca. <sup>14-15</sup>Bapoxonae Jesús pijimonae tsita najume itapeinya xeina, jeye:

—Lázaro bayatha naxuba. Pacata daxua wūnae xua jopa baxotiya poponaeinyo poxonae Lázaro tupa. Tsipei baxua painya nejume cowantsinexa, daxota jopa nainya ponaeinyo. Antha poinchi bara beya ichaxota Lázaro boca, jei Jesús.

<sup>16</sup>Nexata Tomás, pon icha wūn Gemelo peweichobe penama naexanaexaebe, bapon Jesús pijimonae tatsi baraichi, jeye:

—Bū naca baru pona Jesús, xain Jesús naca baru werapa, jei Tomás.

**Meje yabara xua Jesús namchi:  
“Xan pon jiwi asu taexanaein  
petupae cuiru coyene weya”, jei**

<sup>17</sup>Poxonae Jesús pijimonae baru patopa Betania tomaratha, jiwi Jesús tsipaebatsi xua pinae bayatha Lázaro cuatro po matacabibe yapucaewa xua muthutha xotsi. <sup>18</sup>Betania tomara tajuyo itamataeca Jerusalén tomara saya tres po kilómetro epatiyobe xeina.

<sup>19</sup>Pinmonae judiomonae Marta iru María siwa poinchibe pia botha tatsi peitanuwe matutaenexa tsainchibe petatupaexaetsibe peweicho tatsi.

<sup>20</sup>Poxonae Marta yaputane xua Jesús pijimonae baru patopa, bapowa bo wejonarena xua Jesús pententa weyataeya wabinexatsi. Ichitha nama María botha eca. <sup>21</sup>Marta Jesús baraichi, jeye:

—Pon Necanamataxeinaem jiwi, icha bayatha xote ecaetsipame, metha bayatha jopa tupaetsipae taeweicho. <sup>22</sup>Yaputan xua methaunxuae Nacom catsina daxita pocotsiwa newucaewam, jei Marta.

<sup>23</sup>Jesús barai, jeye:

—Eweicho equeicha cata asu poponaena, jei Jesús.

<sup>24</sup>Marta Jesús baraichi, jeye:

—Aa, bara yaputan xua equeicha asu poponaena poxonae po mataqueitha daxita jiwi Nacom asu exanaena petupae cuiru coyene weya poxonae po cae pin nacue daxita weraweracaena, jei Marta.

<sup>25</sup>Nexata Jesús jume barai, jeye:

—Xan apara barapo jiton, pon jiwi asu jinompa taexanaein petupae cuiru coyene weya. Matautano xan pon jiwi



tacatsin peajuntuyapusuwa, po peajuntuyapusuwa jopa weraweracaeyo. Pon nejume cowunta bequein bara tupa ichitha equeicha asu poponaena. <sup>26</sup> Pon xeinaena peajuntuyapusuwa xuano xua nejume cowuntsina, bapon bapana jopa weraweraca tsane. ¿Baxua bara yabara jume cowuntame? jei Jesús xua Marta tsipaebatsi.

<sup>27</sup> Bapowa jume nota, jeye:

—Aa, Tanecanamataxeinaem, bara baxua yabara jume cowuntan xua xam Mesías pon Nacom Pexantom, pon bewa juinya patopaename po cae pin nacuathe tsique, jei Marta.

**Meje yabara poxonae Jesús itamata wecoyei tsuncuae ichaxota Lázaro yamuthu uncu**

<sup>28</sup> Poxonae Marta najume weta xua Jesús tsipaebatsi, bapoxonae Marta pamcho waba powa pewun María. Marta nameicha pamchotha jeye:

—Pon jiwi Pecuidubin xote patope, cawaba, jei Marta.

<sup>29</sup> Poxonae María baxua jume taeba, bapoxonae caena nainya ponataba Jesús petaenexatsi. <sup>30</sup> Jesús abu cataunxuae pijimonae jopa baru ponaeyo tomaratha. Jesús caxinatsi ichaxota copiya Marta Jesús caxinatsi. <sup>31</sup> Judiomonae pomonae María pamchobe itanuwe matateicat-sibe xua pomonae pia botha tatsi taenatsibe, poxonae barapo judiomonae tane xua María nainya ponataba, iruru barapomonae napuna pona. Barapo judiomonae nanta xeina xua mexeya itara María pamchobe muthu beya ponabewei xua pewecoyeinexabe ichaxota peweichobe tatsi tayamuthu uncuatsibe.

<sup>32</sup> Poxonae María itamata patopatsi María pentabocototha uncu, yawa Jesús baraichichi, jei:

—Tanecanamataxeinaem, icha bayatha xote ecaetsipame metha bayatha

pata taeweicho jopa tupaetsipae, jei María xua Jesús tsipaebatsi.

<sup>33</sup> Jesús tane xua María wecoyei. Taneno xua judiomonae pomonae napon xua iruru wecoyei. Bapoxonae Jesús anthuthu wecoyei yawa anthuthurewe. <sup>34</sup> Jesús baraino barapomonae, jeye:

—¿Exota Lázaro pamuthuthu xubame? jei Jesús.

Jesús jume notatsi, jeye:

—Pon Necanamataxeinaem jiwi, xotiye incane matha taema, jei barapomonae.

<sup>35</sup> Iruru Jesús wecoyei tsanareca.

<sup>36</sup> Bapoxonae judiomonae Jesús yabara jeichichi, jeye:

—Incane pataema maisa bapon Lázaro bichocono antobetsi, najei judiomonae.

<sup>37</sup> Ichitha ichamonae judiomonae Jesús yabara jeichichi:

—Icha bapon itacupatsi xua pon peitata nacutsin axaibi exainchi, ¿eta xua metha bapon jopa itacupaetsi xua Lázaro yawenatsi xua bayatha jopa tupaetsipae? najei judiomonae.

**Meje yabara poxonae Lázaro equeicha asu popona**

<sup>38</sup> Equeicha Jesús bichocono anthuthurewe. Yawa imoxoyo pijimonae baru pona muthu beya. Barapo muthu ibo muthu, yawa muthu yauxatatabanota pin ibo panawatha.

<sup>39</sup> Jesús barai barapomonae, jeye:

—Papataxore ibo panawa, jei Jesús.

Lázaro pon tupa bapon pamcho tatsi Marta, Jesús jeichi:

—Patatanecanamataxeinaem, apara bayatha pepon bichocono tuxamna, tsipei bayatha cuatro po matabibey yapucaewa poxonae tupa, jei Marta.

<sup>40</sup> Ichitha Jesús Marta jume baraichi, jeye:

—Bara bayatha catsipaebatsiba: Icha yabara jume cowuntame, necotsiname

Nacom pia peayapusuwa, cajeichiba, jei Jesús.

<sup>41</sup>Nexata ichamonae ibo panawa pataxuba. Bapoxonae Jesús peitaboco beicha athabeicha necoicha. Yawa jeye Paxatha:

—Axa, juntu coyene weiweinan, yaitama nejume taneme pocotsiwa tacawucaexaetsi. <sup>42</sup>Bara yaputan xua nejume taibame poxonae cawñqueibatsi. Apará catsipaebatsi baxua xua pomonae xote umene barapomonae nexa xua tana neyabara jume cowuntsinexa xua xan pon tana neitorobim, jei Jesús.

<sup>43</sup>Poxonae Jesús najume weta baxua, bapoxonae jume daunweya wawai, jeye:

—¡Lázaro, bara wejondena! jei Jesús.

<sup>44</sup>Bapoxonae pon xua tupa muthu wejondena. Xua bayatha paparuwatha maxu caecunta cubaxotsi yawa pesito decano yawa xua painyaweratha itabara yarabaxotsi, baxuan Lázaro yawa jon-dena. Jesús barai jiwi, jeye:

—Daxita baxuan paweisacare, bapoxonae bu bara pona, jei Jesús.

**Meje yabara poxonae fariseomonae  
iru sacerdotemonae pia  
pentacaponaei tatsi daxita  
barapomonae Jesús yabara nanta  
xeinatsi xua po coyeneya  
Jesús pewaetabiwa tsainchi**

(Mt 26.1-5; Mr 14.1-2; Lc 22.1-2)

<sup>45</sup>Judiomonae pomonae María pamchobe cueyatatsibe, poxonae barapo judiomonae baxua Jesús cui tainchi Jesús yabara jume cowuntatsi pinmonae. <sup>46</sup>Ichitha ichamonae judiomonae fariseomonae beya pona xua peyabara paebinexa pocotsiwa bayatha Jesús exana. <sup>47</sup>Nexata fariseomonae iru sacerdotemonae pia pentacaponaei tatsi daxita barapomonae nacaetuta penacanamata

caitorobi bicheitho, yawa najei barapomonae:

—¿Eta xua exanaeinchi metha? Barapo pebin exana nawita pexeinya petsita itutsi coyenewan. <sup>48</sup>Icha baraxua saya yabara cui copatinchi metha pinmonae bapon yabara jume cowuntsinchi. Barapoxonae romanomonae pia pentacaponaei patsina waxantha, yawa abe exanaena Nacom pin pia bo tatsi xua watomaratha, yawa wanacuatha naca jutebina, najei barapomonae.

<sup>49</sup>Caein bapomonae jiwana pewun Caifás. Bapon Caifás barapo weitha sacerdotemonae pia pepa pentacaponaei tatsi naexana. Bapon Caifás jei pin bicheitho:

—Paxam apara jopa baxua payabara yaputaem. <sup>50</sup>Matautano jopa payabara yaputaem xua po coyene pacata xanepana xua ichun bara caein piamonae yaitatsina pebexubinexatsi xua daxita piamonae tatsi jopa petajutebinexa tsainchi, jei Caifás xua piraichi nanta xeina.

<sup>51</sup>Ichitha Caifás jopa baxua pia coutha nanta xeinaeyo. Tsipei Caifás barapo weitha sacerdotemonae pia pepa pentacaponaei tatsi naexana, daxota tsiwunae yabara paeba xua Nacom cueicueije exana xua Jesús bewa tsitupaena judiomonae. <sup>52</sup>Meisa barapo judiomonae Jesús jopa tsitupaeyo, apara iruru ichamonae nexano Jesús tsitupa xua Jesús caemonae nacaetuta peexanaenexa pomonae Nacom piamonae tatsi, pomonaeno tajū ena ichaxota icha nacuantha. <sup>53</sup>Daxota barapomonae judiomonae pia pentacaponaei tatsi nabaru muxu jei po coyeneya xua poxonae Jesús pebexubiwa tsainchi.

<sup>54</sup>Daxota Jesús jopa naitapeinya xeinaeyo judiomonaetha. Saya Jesús Judea nacua wewarapiya, tomara beya pona po tomara pewun Efraín, po

tomara eca ichaxota ira xuepana susato tsurucuae nacua. Barapo tomaratha pijimonae baru eca Jesús.

<sup>55</sup>Bara nama imoxoyo tsurucuae tsoponae po matababin xua judiomonae pia Pascua wun matababin tatsi. Pin bicheitomonae tomara weya pona xua Jerusalén tomara beya pona xua baxotiya pia cui coyenewa peexanaenexa Nacom nexa, xua Nacom jopa petsita natsicuentinexatsi xua abe petsita peexanaexae. Tsipei pia peitorobi coyenewatha tatsi baxua yabara paeba xua barapomonae bewa baxua exanaena Pascua wun matababin pewunaeya. <sup>56</sup>Daxita barapomonae Jesús wenaweneichi. Poxonae barapomonae Nacom pin pia botha pata, baxota barapomonae najei:

—¿Etabe payabara nanta xeinaeya ichim? ¿Metha Jesús xote patopaena jampa? ¿Metha jopa patopae tsane jampa? najei barapomonae.

<sup>57</sup>Fariseomonae iruru sacerdote-monae pia pentacaponae tatsi daxita barapomonae jiwi baraichi, jeichichi:

—Pon tane Jesús, nexata bu pana netsipaeba, xua bapon pata tha waetabichi, jei barapomonae.

**Meje yabara poxonae petsiriwa Jesús  
mata eatabatsi penasiwa,  
po penasiwa petuxueiwa**

(Mt 26.6-13; Mr 14.3-9)

**12** Poxonae cataunxuae seis po matababibe aibi xua Pascua wun matababin nexa, Jesús pijimonae baru pona Betania tomara beya. Barapo Betania tomara, po tomara ichaxota Lázaro popona, pon Jesús bayatha asu exana petupae cuiru coyene weya. <sup>2</sup>Baxota pexaewa Jesús upain exanatsi. Marta apata pexaewa. Jesús pijimonae tatsi iru naena pexaethopaewatha. Iru Lázaro baxota naeca xua iru naxane.

<sup>3</sup>Iru bapoxonae María carena bosibu bichocono wunca petuxuei nasiwa. Barapo tuxusi tuxuei nasiwa bichocono ainya matoma. Barapo tuxusi tuxuei nasiwa pewun nardo. Barapo petuxuei tuxusi nasiwatha María Jesús mata eatabatsi yawa taxu eatabatsino. Bapoxonae María pentanatha Jesús taxu tsewa exainchi. Daxita bomxu tutu canaupa ducua xua tuxuei tsurucuae. <sup>4</sup>Iru naeca Judas Iscariote, pon Simón pexanto tatsi. Bapon Judas Jesús pijimonae tatsi jiwana. Barapo Judas pon bexa Jesús caenaetsinchi. Bapon namchi, jeye:

<sup>5</sup>—¿Eta pocotsiwa metha saya xuba barapo tuxusi tuxuei nasiwa? Barapo petuxuei tuxusi nasiwa becaenaetsipame xua nentoma xeinaenexa beyacaincha xua trescientos po paratiximonaebe xua po paratiximonaebe beyacaincha trescientos po matababibe nexa, poxonae nacuita, jei Judas Iscariote.

<sup>6</sup>Judas apara jopa baxua paebiyo xua peantobexaetsi pomonae peacopeibiwi. Saya apara baxua paeba poxoru bapon pon pecaibin jiwi. Bapon Judas Jesusbaru paratixi dunucue tacapoinchi. Ichitha bapon cou jiwana wenoteiba paratixi poxonae Jesusbaru jeiba. <sup>7</sup>Nexata Judas Jesús barai, jeye:

—¡Moyande bara copare! Aparu xua barapowa netsibota barapo petuxuei tuxusi nasiwa tapepon nexa xua tatupaein tana neperu waenexa poxonae po mataqueitha muthiya tana neboyaenexa tsane. Baxua netsibota apara xua muthu tana neboyaenexa poxonae tupaein. <sup>8</sup>Barapo irathe peacopeibi jiwi paca baru jinompeibina painya neyawaenexa tsaibi tsane barapo jiwi. Ichitha nama paxam jopa ataya paca baru pononae tsainchi xua pata tana neyawaenexam barapo irathe, jei Jesús.

**Meje yabara poxonaē  
sacerdotemonaē pia pentacaponae  
tatsi peburuya nanta xeina xua  
Lázaro pebexubiwa tsainchi**

<sup>9</sup>Pinmonae judiomonaē jume tane xua Jesús popona Betania tomaratha. Bapoxonaē barapo judiomonaē pona Betania tomara beya xua Jesús petanexatsi iruru xua Lázaro petanexatsi pon Jesús bayatha asu exana petupae cuiru coyene weya. <sup>10</sup>Nexata sacerdotemonaē pia pentacaponae tatsi peburuya nanta xeina xua iru Lázaro pebexubiwa tsainchi. <sup>11</sup>Tsipei pinmonae judiomonaē penta sacerdotemonaē pia pentacaponae tatsi pia pecuidubiwan tatsi. Matautano barapo judiomonaē saya Jesús jume cowuntatsi tsipei Jesús cui tainchi pocotsiwa Jesús wūnaē exana poxonaē Lázaro asu exainchi petupae cuiru coyene weya.

**Meje yabara poxonaē Jesús  
Jerusalén tomaratha patopa**

*(Mt 21.1-11; Mr 11.1-11; Lc 19.28-40)*

<sup>12</sup>Icha mataqueitha baya xua poxonaē po mataqueitha Jesús taxu wainchi petuxuei nasiwatha, bapoxonaē Jesús pijimonaē baru pona Jerusalén tomara beya. Bapoxonaeru Jerusalén tomaratha ena pin bicheito pomonaē xua copiya bayatha pata Pascua wun matacabin nexa. Daxita barapomonaē yaputane xua anoxuae methaunxuae patopaena Jesús barapo tomaratha. <sup>13</sup>Barapo pin bicheito peaxu ucuboba po axu icha coichaxu axu ichi. Barapomonaē Jesús matenta iyiyatsi xua Jesús pententa wey-ataeya wabinexatsi. Yawa jume daunweya wawaya jeye:

—¡Pai jayana! ¡Maisa Jesús pon Pecanamataxeinaein jiwī deta wūnaē, bapon patopa Nacom peitorobixae! ¡Maisa Nacom bichocono wūnaē

jaintatsi pon peitabocotha eca! ¡Maisa Jesús deta wūnaē, pon Israel nacuamonaē itorobiya pia pepa Peewatsinchi tatsi! jei barapo pin bicheito.

<sup>14</sup>Bapoxonaē Jesús tane burro pon penun. Bapoxonaē barapo burrotha equeica yawa ponano namtotha. Jesús exana be pocotsi coyeneya caena bayatha yabara paebatsi Nacom Pejume Diwesitha, xua Mesías pepatopaewa tsane Jerusalén tomaratha, jeye:

<sup>15</sup>“Sión tomarapiwi pam, jopa pajunuwinde.

Pataema pon itorobiya pepa painya Nepacacaewatsin.

Bapon pacata patopaena xua burrotha equeicaena”, jei Nacom Pejume Diwesitha.

<sup>16</sup>Bapoxonaē Jesús pijimonaē tatsi jopa yaputaeyo po coyene xua caena bayatha Jesús wūnaē yabara tsiwūnaē paebatsi, xuano xua po coyene exanaenano. Ichitha pirapae poxonaē Jesús caibe nawicha peitaboco beicha, yawa poxonaē Paxa matenta weyataeya wabatsi, bapoxonaē barapomonaē yaputane po coyene Jesús yabara tsiwūnaē paebatsi Nacom Pejume Diwesitha, xuano xua jiwī exana poxonaē Jesús wūnaē jaintatsi.

<sup>17</sup>Pomonaē napon poxonaē Jesús Lázaro wabatsi petupae cuiru coyene weya, barapomonaē tamropata notarucupa xua jiwitha paeba pomonaetha pomonaē Jerusalén tomarapiwi, pomonaē bayatha Jesús pecui taexaetsi poxonaē Lázaro asu exainchi. <sup>18</sup>Daxota pinmonae pona Jesús beya xua Jesús pematenta weyataeya wabinexatsi. Tsipei barapo pinmonae jume tane pocotsiwa Jesús exana pexeinya petsita itutsi coyenewa poxonaē Lázaro asu exainchi. <sup>19</sup>Nexata fariseomonaē caemonaē natsipaeba, najei:

—¡Incane matha pataema! Barapomonaē jopa naca jume cowuntsiyo, yawa daxita jiwi meisa napuna pona bapontha, najei barapomonaē.

**Meje yabara poxonaē griegomonaē  
Jesús wenaweneichi**

<sup>20</sup> Barapo pin bicheito, po bicheito copiya bayatha Jerusalén tomaratha ena, xua baxota wūnaē pejainchinexa Nacom, barapo pin bicheito jiwana-monaē, griego nacuamonaēpiwi jiwana. <sup>21</sup> Barapo griego nacuamonaēpiwi Felipe imoxoyo caquita poinchi. Barapon Felipe Betsaida tomarapin xua Galilea nacuatha. Barapo griego nacuamon-aēpiwi Felipe tsipaebatsi, jeichichi:

—Incane matha pana nejume taema. Pata bequein Jesús taetsi, jei.

<sup>22</sup> Bapoxonaē Felipe jume yopita Andrés beya, xua equeicha baponbe pejume yopichinexabe Jesús beya.

<sup>23</sup> Bapoxonaē Jesús baraponbe baraichi yawa daxita barapo jiwi baraichi, jeye:

—Nama imoxoyo barapo matacabi tsoponaē, po mataqueitha xan, ponxaein Nacom tana neitapetsixae nebexubina ichamonaē. Barapo mataqueitha Nacom ainya cui neexanaena. <sup>24</sup> Xaniyan paca tsipaebatsi. Poxonaē trigo xuto saya xu boca yawa icha jopa xu bocaeyo tsorobo tututha, yawa icha jopa xuwiyo, jopa itacupaetsi xua pexaewa naexana. Ichitha icha barapo trigo xuto tsorobo tututha boca yawa icha xuwa, bapoxonaē jame bara pexaewa naexana. Icha barapo trigo xuto ichi, xan barapocotsi coyeneya jiwi bara necana ichi tsane. <sup>25</sup> Pon naantobeya nata exana pocotsiwa bapon ichichipa po cae pin nacuathe, bapon jopa xeinaeyo peajuntuyapusūwa, po peajuntuyapusūwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan, bapon xeinaena peajuntuyapusūwa, po

peajuntuyapusūwa ataya tsiteca xua Nacom pia nacua beicha. <sup>26</sup> Pon ichichipa exana tawa xua penacuichiwa, bapon bara bewa moya exanaena pocotsiwa itoroban. Pon exana pocotsiwa itoroban, bapon patopaena ichaxota poponan. Icha pebin exana pocotsiwa itoroban, bapon Taxa cana exanaena xua bapon peainya cui jiton tsane Taxa pia nacua beicha tatsi, jei Jesús.

**Meje yabara poxonaē Jesús nayabara  
paeba xua petupaewa tsane**

<sup>27</sup> Equeicha Jesús jeye: “Anoxuae bichocono anthuthurewein tsipei tatupaewa tsaneba. ¿Eta jumichicuaein tsane metha Taxatha? ¿Metha jan tsane: ‘Axa, necapanepare baxua weya’, metha jan tsane? Jume, apara jopa baxua tsipatopeicaeyo. Apara tsipatopeican xua taaperutanewa tsane jiwi nexa. <sup>28</sup> Jame bejan: ‘Axa, bara bu jiwi cana exaname xua wūnaē necajainchiwa’, bejan jame”, jei Jesús.

Poxonaē Jesús baxua najume weta, bapoxonaē Jesús jume tane xua Nacom namchi peitaboco wetsica, jeye: “Bayatha apara baxua jiwi cana exanan xua jiwi wūnaē tana nejainteibiwanea, tsipei daxita beta exanan. Matautano equeicha ichawa exanaein xua jiwi wūnaē tana nejainteibiwanea tsane”, jei Nacom.

<sup>29</sup> Pinmonaē umena xua Jesús jume taeumeinchi, iru Jesús pijimonaē tatsi baxota umenaru. Barapo jiwi baxua nayabara yainyaba xua Nacom cueicuei-jei. Ichamonaē jeye:

—¡Apara xua jurujurei yamuxu! jei.

Ichamonaē jeye:

—¡Apara bapon tsipaebatsi matatsunpin! jei.

<sup>30</sup> Nexata Jesús pijimonaē barai, jeye:

—Pon pajume taneme apara Nacom. Jopa apara paebiyō xua xan nexa. Apara paeba pia xua painya nejume

taenexa daxota baxua Nacom paeba. <sup>31</sup>Imoxoyo nama matacabi patopaena, po mataqueitha Nacom yabara pae-bina jiwi xua penatsicuentisiwa xua abe peexanaexae bapontha. Pon jiwi juntu coyene itorobatsi xua abe pe-exanaewa po cae pin nacuathe, nama imoxoyo Nacom amanayabina bapon poxonaе xubina barapo cae pin nacue weya. <sup>32</sup>Poxonaе ichamonae nedutsina naetotha tatupaenexa tsane, bapoxonaе daxita jiwi cana exanaein xua pomonaе peichichipaewa tsane xua tana nejume cowuntsinexa, jei Jesús.

<sup>33</sup>Poxonaе Jesús baxua paeba jiwi ya-putane exainchi xua Jesús pebexubiwa tsainchi poxonaе tupaena. <sup>34</sup>Bapoxonaе barapo jiwi Jesús tsipaebatsi. Jesús jeichichi:

—Paxan pajume tan xua poxonaе wamonae yoroba Moisés pia peitorobi coyenewatha pocotsiwa baxota jeye: ‘Bara Mesías ataya asu poponeiba’, jei baxota. ¿Eta xua metha pana netsipaebame xua pinae pon Nacom Peitapetsin bewa naetotha tupaena? ¿Jintam metha pon Nacom Peitapetsin? jei barapomonaе.

<sup>35</sup>Nexata Jesús tsipaeba barapomonaе xua nacaunuta, jeye:

—Saya caeto pana netaneme pon paca yaputane exainchi. Beta pajinomp-are tapaca yawenaexae tsainchi, icha paichim xua beta pajinompame poxonaе xometo paca yawena xua beta pa-jinompame mataqueitha. Pana nejume cowunde poxonaе cataunxuae po cae pin nacuathe poponanje. Matautano poxonaе cataunxuae paca itacupa xua pata tanejume cowuntsiwam. Jopa abe paex-anaeinde xua poxoru poxonaе jopa pata tanejume cowuntsixaemxae. Tsipei bara jutiya ichi, poxonaе jiwi abe exana be poxonaе pomonaе pona ichaxota quirei. Jopa beta ponaeyo tsipei jopa xeinaeyo pecoicha. <sup>36</sup>Pana nejume cowunde pox-

onaе cataunxuae po cae pin nacuathe poponanje. Bapoxonaе paxam tajimonaе pam tsane, jei Jesús.

Poxonaе baxua Jesús najume weta, barapo jiwi weya natsixitaba yawa wepu aichurucuae.

**Meje yabara poxonaе Jesús yabara paeba xua eta xua metha pinae Jesús jopa jume cowuntichi judiomonaе**

<sup>37</sup>Bequein Jesús matowa exana pia pexeinya petsita itutsi coyenewan barapomonaе peitutha tatsi, daichitha pinmonaе barapomonaе jopa Jesús yabara jume cui cowuntichi po coyene xua Jesús bara bapon Mesías pon Nacom itorobica. <sup>38</sup>Baxua exana xua nayabara jume cui weta po coyene bayatha pon Nacom peitorobi jume pepaebin Isaías wunaе tsiwanaya yabara jei:

“Pon jiwi Necanamataxeinaein barapomonaе jopa jume cowuntsiyo xua pacuiduban bequein barapomonaе tane matowa poxonaе paexanan Nacom pia peayapusuwatha”, jei Isaías.

<sup>39</sup>Barapomonaе jopa jume cowuntsiyo, tsipei Isaías equeicha jei:

<sup>40</sup>“Nacom cana exana xua barapomonaе jopa

beta xapain naita cui coyene yaputaeyo. Matautano Nacom cana exana xua jopa pejume

cowuntsiwa pejuntu coyene wetsina. Barapomonaе be natsicotane peitata nacutsi

jiwi, tsipei jopa beyaputaeyo, xua icha juntu coyene pexeinaewanexa.

Matautano jopa ichipaeyo xua peyabara jume

cowuntsiwa po coyene xua Nacom itacupatsi

xua pejuntu coyene xanepana peexanaewa”,

jei Isaías pejume diwesitha.

<sup>41</sup> Daxita baxuan Isaías paeba xua Jesús yabara paebatsi. Isaías caena bayatha tane poxonae eca Mesías pia pexeinya pia peitupanae peecaewatha. Daxota Isaías yabara paeba, Mesías yabara pae-batsi xua pocotsiwa bayatha petaexae.

<sup>42</sup> Bequein daxita judiomonae Jesús jopa jume cowuntichi, daichitha icha-monae judiomonae Jesús jume cowuntatsi. Matautano ichamonae judiomonae xua pomonae judiomonae pia pentacaponae witsi Jesús jume cowuntatsi. Ichitha daxita barapomonae jopa Jesús yabara paebichi jiwi peitutha tatsi tsipei fariseomonae cunuwatsi. Tsipei icha barapomonae Jesús yabara pae-bichipatsi, metha barapomonae itawet-sipatsi judiomonae pia penacaetutsi bon tatsi weya, xua fariseomonae itawet-sipa. <sup>43</sup> Tsipei barapo Jesús pia pe-jume cowuntsiwichi pijunuwi daxota itapeta jume naitaewata xua jiwi jei: “Jopa Jesús payabara paebinde”, jei jiwi. Barapomonae pomonae Jesús pe-jume cowuntsiwichi baxua itapeta jume naitaewata beyacaincha xua poxonae bequein Nacom cui itoroba.

**Meje yabara xua po jume Jesús paeba barapo jumetha jiwi yabara paebinchi xua penatsicuentisiwa xua abe peexanaexae**

<sup>44</sup> Equeicha Jesús jume daunweya jeye: “Pon nejume cowunta meisa jopa nejume cowuntsi tsane, jame Taxa jume cowuntsinchino pon tana neitorobixae. <sup>45</sup> Pomonae xua neyaputane barapomonae barichi Taxa yaputainchi. <sup>46</sup> Xan pon yabara yaputane paca cana exainchi Nacom. Patopeican po cae pin nacuathe xua pomonae tana nejume cowuntsiwi jopa penantawenonaenexa xua pejinompawea poxonae jopa Nacom yabara yaputaetsi. <sup>47</sup> Pon bequein jume tane tajume diwesi xuano xua

icha bequein jopa exanaeyo tana nejume taewatha pocotsiwa itoroban, bapon jopa yabara paebin tsane xua penatsicuentisiwa xua abe peexanaexae Nacomtha. Tsipei apara jopa baxua tsipatopaeinyo xua tacoya barapocotsi jiwimonae tayabara paebinexa xua penatsicuentisiwa xua abe peexanaexae Nacomtha. Jame apara tsipatopan xua jiwi u tacapanenebiyaenexa tsane. <sup>48</sup> Pon jopa tsita ainya cuichi xua jopa tsita ainya cuinyo, xuano xua icha jopa jume cowuntsiyo pocotsiwa paeban po jume aunxuae paeban, bapon barapo jumetha yabara paebinchi xua penatsicuentisiwa xua abe peexanaexae poxonae po mataqueitha nacua weraweracaena. <sup>49</sup> Tsipei xan jopa paebinyo pocotsiwa tacoutha taichichipawea. Saya apara baxua daxita exanan pocotsiwa Taxa neitoroba pocotsiwa bewa paebin xuano xua pocotsiwa bewa jiwi cuidubin. <sup>50</sup> Yaputan Taxa pia peitorobi coyenewa, barapo peitorobi coyenewa jiwi cana exainchi xua pexeinaewa peajuntuyapusuwa, po peajuntuyapusuwa ataya tsiteca. Daxota pocotsiwa paca tsipaebatsi apara xua Taxa bayatha tana neitorobixae”, jei Jesús.

**Meje yabara poxonae Jesús pijimonae taxu matawane meratha**

**13** Barapoxonaeru bara barapo mat-acabi tsuxubi, po mataba tsi-wanaya mata carucua xua Pascua wun matababin. Jesús yaputane xua bara nama imoxoyo bara po mataba tat-soponaetsiba, po mataqueitha Jesús cuenta ponaena po cae pin nacue xua Paxa beicha peponaewa tsane. Jesús antobe tsaibi pia pejume cowuntsiwichi pomonae xua tajinompatsi po cae pin nacuathe. Nama imoxoyo Jesús exana xua pocotsiwa jiwi yaputane xua Jesús

jopa juniya antobeyo pomonae pia pe-  
jume cowantsiwichi.

<sup>2-4</sup>Judas, pon Simón Iscariote  
pexanto tatsi, bapon cui itorobatsi  
caurimonae pia pentacaponaein  
tatsi xua Jesús pecaenaetsinexatsi  
ichamonaetha. Jesús yaputane xua  
bayatha Paxa wetsica pona. Matautano  
xua equeicha Paxa beicha patopaena  
xuano xua Paxa catatsi daxita pia  
peayapusya itorobi coyenewa. Baxua  
bequein xeina, daichitha poxonae  
pijimonae baru eca pexaethopaewatha  
asiya uncuataba. Yawa paparuwa  
nama jonta, po paparuwa matha  
weruya. Yawa icha paparuwatha  
naepa cuta. <sup>5</sup>Bapoxonae Jesús mera  
epata corototha. Bapoxonae pijimonae  
taxu matawaepona meratha. Yawa  
paparuwatha taxu tsewa exana po  
paparuwatha naepa cuta.

<sup>6</sup>Poxonae Jesús Simón Pedro muxu  
petaxu matawaetsi, Simón jeye:

—Tanecanamataxeinaem, zeta pocot-  
siwa metha iru jinya netaxu matawaetsi?  
jei Simón Pedro.

<sup>7</sup>Jesús jume barai, jeye:

—Xua baxue cata exanatsi anoxuae  
jopa yabara yaputaem. Ichitha bexa  
tsane baxua yabara yaputaename, jei  
Jesús.

<sup>8</sup>Ichitha equeicha Simón Pedro jume  
barai, jeye:

—Bapana jopa netaxu matawaem  
tsane, jei Simón Pedro.

Jesús jume barai, jeye:

—Icha jopa cataxu matawaetsipaetsi  
meratha nexata jopa tajimonae jitom tsi-  
paem, jei Jesús.

<sup>9</sup>Simón Pedro jume barai, jeye:

—Tanecanamataxeinaem, meisa  
jopa netaxu matawaeinde, jame yawa  
necobe matawaema, yawa nentasipa  
matawaema, jei Simón Pedro.

<sup>10</sup>Jesús jume barai, jeye:

—Pon xua anoxuae nowaexuba,  
bapon equeicha jopa nantawenonaeyo  
xua pia pepon matawaeinchi, saya jame  
meisa petaxu. Paxam pejuntu coyene  
xeicae jiwi pam, saya caein jiwana pam  
jopa daichiyo, jei Jesús.

<sup>11</sup>Jesús jeye: “Paxam pejuntu coyene  
xeicae jiwi pam, ichitha caein jiwana  
pam jopa daichiyo”, jei. Jesús baxua  
paeba tsipei yaputane xua caein jiwana  
pomonae Jesús pijimonae tatsi, bapon  
Jesús caenaetinchi.

<sup>12</sup>Poxonae Jesús nacobe weta xua pi-  
jimonae taxu matawane meratha eque-  
icha paparuwa nama xatata po pa-  
paruwa copiya nama xuenaxuba. Bapox-  
onae equeicha econeca pexaethopae-  
watha. Yawa pijimonae barai, jeye:

—¿Bara payaputaneme xuaunxuae  
pacata exanatsi? <sup>13</sup>Pana neyabara  
jam: ‘Pon Patatanecuidubin’, pana  
neyabara jam. Yawano pana neyabara  
jam: ‘Pon Patatanecanamataxeinaein’,  
pana neyabara jam. Bara xainyeya  
pana neyabara jam baxua, tsipei  
apara xan bapon. <sup>14</sup>Icha xan painya  
Tapacacuidubinchi xuano xua painya  
Tapacacanamataxeinaeinchi xua paca  
taxu matawainchi meratha bewa paxam  
bara paichim tsane, bewa nantiya pana  
nataxu matawaem meratha. <sup>15</sup>Baxua  
paca tsita exainchi xua painya bara  
paichinexam tsane ichaunxuae ichin.  
<sup>16</sup>Xaniyan paca tsipaebatsi. Pon ba  
tanacuita bapon jopa ainya cuiyo.  
Jame bapon pia pentacaponaein tatsi  
yatsicaya ainya cui beyacaincha pon  
tanacuita. Pon ba itorobatsi jopa ainya  
cuiyo. Jame pon peitorobixae bapon  
ainya cui. <sup>17</sup>Icha baxua payaputaneme  
yawa icha baxua paexanaenameno  
bapoxonae pejuntu coyene weiweinae  
jiwi pam tsane.

<sup>18</sup>“Apara jopa daxita paca yabara pae-  
bichi xua pejuntu coyene weiweinae  
jiwi pam tsane, tsipei caein jiwana pam



jopa daichiyo. Xan paca jũntũ coyene yaputainchi tsipei tapaca itapetichi jiwichi pam. Ichitha nacui yabara jume wetsina be po coyeneya bayatha Nacom tsiwũnae yabara paeba pejume diwesitha. Nacom jeye: ‘Pon baru xan, pon itara mexeya tajiton, bapon equeicha caewa tana neaitafaetabi jiton naexana’, jei Nacom Pejume Diwesitha. <sup>19</sup>Baxua pewũnaeya paca tsipaebatsi xua poxonae necana exanaena pon equeicha caewa tana neaitafaetabi jiton naexana. Bapoxonae painya yabara tana nejume cowantsinexam tsane xua xan bapon aparán xua ponxaein paca tsipaebatsi. <sup>20</sup>Xaniyan paca tsipaebatsi. Po pebin matenta weyataya waba pontha pon itoroban barapo pebin barapara nententa weyataya waba. Barichi pon nententa weyataya waba barapara Nacom matenta weyataya wabatsi, pon tana neitorobixae”, jei Jesús.

**Meje yabara poxonae Jesús  
jeye: “Judas necaenaetsina  
ichamonaetha”, jei**

(Mt 26.20-25; Mr 14.17-21; Lc 22.21-23)

<sup>21</sup>Poxonae baxua Jesús najume weta, bapoxonae bichocono anthuthũrewew tsanareca. Yawa najume naitapeinya xeinaeya, jeye:

—Xaniyan paca tsipaebatsi. Caein jiwana pam bapon necaenaetsina ichamonaetha, jei Jesús pijimonaetha.

<sup>22</sup>Nexata Jesús pijimonaetha tatsi naitabara taerucupa, nantiya najeye: “¿Jintam metha bepa Jesús caenaetichi?” najei. Ichitha barapomonae jopa yaputaeyo xua Jesús yabara jei pon. <sup>23</sup>Caein Jesús pijimonaetha tatsi jiwana, pon bichocono Jesús antobe, bapon Jesús imoxoyo baru xunaeca, barapo pexaethopaewatha.

<sup>24</sup>Simón Pedro pecobetha moya jume

itoroba jeye: “Jesús yainyabare: ‘¿Jintam yabara paebame?’ jande”, jei Simón Pedro xua jume itorobatsi pon Jesús imoxoyo caquita ecatsi. <sup>25</sup>Bapoxonae Jesús imoxoyo caquita ecarenatsi equeicha. Jesús yainyabatsi, jeye:

—Tanecanamataxeinaem, ¿jintam caenaetsina? jei.

<sup>26</sup>Jesús jume nota, bapon jume notatsi, jeye:

—Pan pũrũwiyo tha atatsica exanaetsi. Pon catan barapo pan pũrũwiyo, bapon apara pon necaenaetsina ichamonaetha, jei Jesús pontha pon peyainyabixae.

Poxonae Jesús pan pũrũwiyo atatsica exana, bapoxonae Jesús cata, Judas catatsi pon Simón Iscariote pexanto tatsi. <sup>27</sup>Poxonae Judas barapo pan Jesús wecobe pitatsi, bapoxonae caena nainya Judas jũntũ coyene itorobatsi Satanás caurimonae pia pentacaponaein tatsi xua Jesús pecaenaetsiwa tsainchi. Bapoxonae Jesús jeye, Judas jeichichi:

—Xua pocotsiwa jinya anoxuae exanaetsi, moya exande nainya, jei Jesús.

<sup>28</sup>Daxita barapomonae pomonae Jesús pijimonaetha tatsi, pomonae pebaru xunaecaexae, jopa xapain yaputaeyo pocotsiwa Jesús itoroba, xua Judas itorobatsi. <sup>29</sup>Tsipei bapon Judas paratixi dorocapopona, daxota Jesús pijimonaetha tatsi nanta xeina xua mexeya itara Jesús itorobawejei xua pia tacomotichi pexaewa penabanae coyenewa nexa. Yawa nanta xeina xua mexeya itara Jesús itorobawejei xua Judas paratixi pecatsinexa peacopeibi jiwitha. <sup>30</sup>Poxonae Judas Jesús wecobe pitatsi pan pũrũwiyo, bapoxonae Judas ponataba. Irũrũ bapoxonae quirei tsanaicharũ.

**Meje yabara poxonae Jesús  
yabara cuiduba jiwi pena  
peitorobi coyenewa**

<sup>31</sup>Nexata poxonae Judas pontaba Jesús pijimonae barai, jeje:

—Imoxoyo nama paca tsita itutsinchi taayapusya itorobiya coyenewa xua xan apara bara ponxaein Nacom Tananeitapetsin. Barichino paca tsita itutsinchi Nacom pia peayapusu itorobi coyenewa tatsi. <sup>32</sup>Icha xan ponxaein Nacom Tananeitapetsin, icha paca tsita itutatsi Nacom pia peayapusu itorobi coyenewa, nexata Nacom xuya nainya paca tsita itutsina taayapusu itorobi coyenewa xua xan apara bara ponxaein Nacom Tananeitapetsin. <sup>33</sup>Pomonae be tapexui tapaca canatsicotaewichi pam, bara nama saya caeto paca baru poponaeinchi. Icha ichin xua caena bayatha xua judiomonaе tsipaеban, bara paca jumichichi anoxuae: ‘Jopa paca itacupaе tsane xua pana nepuna ponaename ichaxota taponaeewa tsane’, paca jeichi. <sup>34</sup>Barapo pena itorobi coyenewe paca cuidubatsi, xua janje: ‘Nantiya pana naantobeinde, icha paca ichichi xua paca antobetsi. Bewa bara paichim tsane xua nantiya pana naantobem tsane’, jan. <sup>35</sup>Icha paxam nantiya pana naantobem tsurubenanaebiyam tsane, daxita jiwi paca cui yaputaena xua paxam bara apara tana nejume cowantsi jiwi pam, jei Jesús.

**Meje yabara poxonae Jesús namchi  
xua Pedro jei tsane: “Jopa  
dapon yaitaeinyo”, pinae  
yabara jei tsainchi Jesús**

(Mt 26.31-35; Mr 14.27-31; Lc 22.31-34)

<sup>36</sup>Simón Pedro Jesús yainyabatsi, Pedro jeje:

—Tanecanamataxeinaem, ¿jinya exota ponaetsi? jei Simón Pedro.

Jesús jume nota, jeje:

—Anoxuae jopa caitacupaeyo xua tana nepuna ponaewam ichaxota ponxaein. Ichitha bexa tsane caitacupaena xua tana nepuna ponaewam ichaxota ponxaein, jei Jesús.

<sup>37</sup>Nexata Simón Pedro jume barai, jeje:

—Tanecanamataxeinaem, ¿eta xua metha baxua paebame xua anoxuae jopa neitacupaeyo xua tacapuna ponaewatsi ichaxota poname? ¡Ichitha xan bara copatan xua jiwi tana nebexubinexa tacapuna ponaenexatsi! jei Pedro.

<sup>38</sup>Jesús jume barai, jeje:

—¿Bara xaniwaicha xua xam bara copatame xua jiwi necabexubinexa tana nepuna ponaenexam? Jume, apara xaniyan catsipaebatsi barapo merawithe acoibi po jumeyobebe neyabara jam tsane: ‘Jopa dapon yaitaeinyo’, neyabara jam tsane. Bapoxonaе iruru wacara pebto fibina, jei Jesús.

**Meje yabara poxonae Jesús  
jeje: “Xan apara pon jiwi  
matacaponan Taxa beicha”, jei Jesús**

**14** Equeicha Jesús pijimonae barai, jeje: “Jopa yabara nantu exabinde ichawan. Pana neyabara jume cowanteibare yawano Taxa payabara jume cowanteibareno. <sup>2</sup>Taxa pia nacua beicha bon nawita ichaxota jiwi pejinompaewa. Icha bon ajibi tsipae, metha bayatha jopa paca tsipaebichipaetsi, daxota apara paeban tsipei xainyan. Daxota paca tsiwanaeya pacata tutu wunaetinchi bara po bon. <sup>3</sup>Poxonaе wetan xua Taxa beicha taponaeewa xuano xua icha nacobe wetan xua bon paca tsiwanaeya tutu wunaetatsi, bapoxonaе equeicha patopeicaein. Paca caponaeinchi ichaxoteicha xua taponaeewa tsane. <sup>4</sup>Paxam payaputaneme ichaxota ponaein. Daxota payaputane-

meno po coyeneya xua painya nepatsiwa tsane baxota”, jei Jesús.

<sup>5</sup>Tomás jeye Jesustha:

—Patatanecanamataxeinaem,

jopa payaputaeyino po nacua beya ichaxota ponaename. Tsipei baxua jopa payaputaeyino, daxota jopa pana neitacupaeyo xua pata ponaewa po nacua beya ichaxota xam ponaename, jei Tomás.

<sup>6</sup>Jesús jume nota, jeye:

—Xan apara pon jiwi tamatacaponeain Taxa beicha. Matautano xan pon xainyeya tapaebin. Matautano xan apara pon jiwi tacatsin peajuntuyapuswa, po peajuntuyapuswa ataya tsiteca. Saya meisa xan ba jiwi yawenan xua pepatsiwa Taxa beicha. <sup>7</sup>Icha paxam pana neyaputaneme bara paichim Taxa payaputaneme. Daxota anoxuae nama Taxa payaputaneme yawano patanemeno tsipei paxam pana netaneme, jei Jesús.

<sup>8</sup>Nexata Felipe Jesús baraichichi, jeye:

—Patatanecanamataxeinaem, copare xua Axa pata tha taetsi. Bapoxonae juntea pata jinompaewa tsane, jei Felipe.

<sup>9</sup>Jesús Felipe jume notatsi. Jesús jeye:

—Felipe, bara bayatha cabarũ popoinchiba. ¿Eta xua came jopa neyaputaem? Pon ba netane barichi apara bara Taxa tainchi. Daxota jopa benejam: ‘Copare painta pata tha Axa taetsi’, jopa bepana nejam. <sup>10</sup>¿Eta xua metha jopa jume cowuntsim xua bara Taxa neyanta xua bara irũ Taxa yantandũ? Daxita pocotsiwan paca tsipaebatsi apara jopa paebinyo pocotsiwa tacoutha ichichipan. Aparaxa Taxa pon neyantsiya popona baxua apara exana pocotsiwa xua exanan.

<sup>11</sup>Pajume cowunde xua Taxa neyanta popona, xua Taxa irũ yanta poponan xua daxota Taxa be caein panbe. Icha jopa paca itacupaeyo xua pana

nejume cowuntame pocotsiwa yabara paca tsipaebatsi Taxa, moya pana necui yabara jume cowunde xua bayatha exanan pexeinya tatsita itutsi coyenewan. Baxuan jiwi tsita ituban xua bara xainyei xua Taxa neyanta popona xua daxota Taxa be caeinbe panbe. <sup>12</sup>Xaniyan paca tsipaebatsi, pon nejume cowunta, bapon irũ exanaena pocotsiwa exanan. Matautano equeicha ichawan mataropeicha exanaena pewunaewan beyacaincha xua pocotsiwa exanan. Tsipei xan ponaein Taxa beicha. <sup>13</sup>Daxita pocotsiwan pana newun caununaya wucame Taxa beicha, bara baxua exanaein, tapaca catsita itutsinexatsi Taxa pia peayapusũ itorobi coyenewa tatsi. <sup>14</sup>Bara pacata exanaeinchi poxonae pana newun caununaya wucame Taxa beicha, jei Jesús.

#### **Meje yabara poxonae Jesús tsiwunaeya paeba xua bexa Nacom najumope tunaxũ itorobina jiwitha**

<sup>15</sup>Equeicha Jesús barai pijimonae, jeye: “Icha pana neantobem, moya paexande titorobi coyenewan. <sup>16</sup>Icha baxua paexanaename tha bapoxonae Taxa wucaetsi jan tsane: ‘Axa, ichun itorobare xua barapomonae peyawenaenexatsi’, jan tsane. Bapoxonae Taxa pacata itorobina pon ataya paca yantsiya poponeibina. <sup>17</sup>Pon Nacom itorobina, apara bapon bara pia Pejumope tunaxũ tatsi, po Pejumope tunaxũ tatsi paca yaputane exana xua bara xainyei xua pocotsiwa Nacom yabara. Ichitha pomonae jopa nejume cowuntsiyo, barapomonae jopa yaputaeyo Nacom pia Pejumope tunaxũ tatsi. Daxota barapo Nacom pia Pejumope tunaxũ tatsi jopa itacupaetsi xua barapomonae peyantsiya jinompaewatsi. Daichitha payaputaename barapo Nacom pia Pejumope tunaxũ tatsi tsipei pacata patopaena

yawano ataya paca yantsiya poponaena”, jei Jesús.

<sup>18</sup>Equeicha Jesús barai pijimonae, jeye: “Jopa paca punapentsi tsainchi. Equeicha caibe patopeicaein xua tapaca baru poponaewatsi tsainchi. <sup>19</sup>Bara caeto jiwi jopa netae tsane pomonae jopa tana nejume cowuntsiwi. Ichitha paxam pana netaename. Paxam equeicha asu pajinompaename tsipei xan equeicha asu poponaein. <sup>20</sup>Barapo mataqueitha poxonae Nacom pia Pejumope tunaxu tatsi patopeicaena, payaputaename xua xan Taxa be caein pana naexananbe iru xua paxam be caein pana necana exaname iru xua xan be caein paca cana exanatsi. <sup>21</sup>Pon yaputane taitorobi coyenewan xuano xua exana xua barapo taitorobi coyenewan paeba, bapon tsita itapeinya xeina jiwitha xua xaniwaicha bara neantobe. Taxa antobe tsane bapon, pon neantobe. Xan barichin antobein tsane bapon. Matautano yaputane exanaein xua bara bapon baru poponan”, jei Jesús.

<sup>22</sup>Iru Judas pon seicaya ichundu, pon Judas Iscariote aibi, barapo Judas Jesús tsipaebatsi, Jesús jeichichi:

—Patatanecanamataxeinaem, zeta xua jinya meisa pana neyaputane exanaetsi xua bara pana nebaru jinompame xua jopa daichim pomonaetha pomonae jopa cajume cowuntsiyo? jei Judas.

<sup>23</sup>Jesús Judas jume notatsi, jeye:

—Pon neantobe bapon exana pocotsiwa itoroban. Bapoxonae Taxa antobe tsane bapon. Xan iruru Taxa pon caein panxaeinbe papatopaeinbe bapontha pata yantsinexa bapon. <sup>24</sup>Pon jopa neantobeyo, bapon jopa exanaeyo pocotsiwa itoroban. Po jume diwesi xu-aunxuae pana nejume taneme apara jopa nata paebinyo. Apra baxua pae-ban tsipei Taxa nejume caitoroba pon

tana neitorobixae, jei Jesús xua Judas tsipaebatsi.

<sup>25</sup>Equeicha Jesús pijimonae barai, jeye: “Daxita baxuan paca tsipaebatsi poxonae cataunxuae paca baru popoinchi anoxuae. <sup>26</sup>Inta paxam pacata Nacom najumope tunaxu itorobina. Barapo Nacom pia Pejumope tunaxu tatsi paca yawenaena. Matautano paca cuidubina xua pexainyeiwa xua Nacom yabara. Matautano barapo Nacom pia Pejumope tunaxu tatsi paca cana exanaena xua pana neyabara cananta xeinaename xua pocotsiwan bayatha daxita yabara paca tsipaebatsi.

<sup>27</sup>“Poxonae paca cuenta ponaeinchi juntea jinompa paca cana exanaeinchi. Paca catinchi po coyene juntea tapoponae coyenewa. Barapo juntea tapoponae coyenewa jopa bara be juta ichiyo xua jiwi barompaya juntea pia pejinompae coyenewa tatsi. Jopa yabara pana najuntu exabinde ichawan. Matauta jopa junuwiya pajinompaeinde. <sup>28</sup>Bayatha pana nejume taneme xua ponaein jan xuano xua equeicha patopeicaein paxamtha xua paca baru poponaeinchi jan. Icha xaniwaicha pana neantobem tsipaem metha pajuntu coyene weiweinaetsipame xua taponae Taxa beicha. Tsipei Taxa bichocono ainya cui, beyacaincha xua xan poxonae cataunxuae poponan po cae pin nacuate. <sup>29</sup>Baxua paca tsipaebatsi xua tsiwunae paeban painya tana nejume cowuntsinexam tsane poxonae xaniwaicha baxua tsane.

<sup>30</sup>“Nama imoxoyo jopa neitacupaeyo xua equeicha caeto tapaca tsipaebiwa tsainchi, tsipei nama imoxoyo patopaenaba pon jiwi juntu coyene itorobeibatsi po jiwitha jopa tana nejume cowuntsiwi. Ichitha bapon jopa xeinaeyo peayapusu itorobi coyenewa xua tana neitorobiwa

tsane. <sup>31</sup>Bewa exanaein pocotsiwa xua Taxa neitoroba, xua daxita jiwi peyaputaenexa xua apara bara xan ponxaein Taxa bichocono tana neantobein.

“¡Panonoba ponde! Weye poinchi”, jei Jesús pijimonaetha.

**Meje yabara poxonae Jesús yabara paeba uva ñnboto xua pepa ñnboto**

**15** Equeicha Jesús jeye: “Icha pepa ñnboto ichi xua petabu opina wejujuina mene xua uva thei penacoichinexa, xan bara pocotsi juta coyeneya cana ichin jiwi. Jiwi ajuntucoyeneyapusuya cana exanan pomonae tana nejume cowuntsi jiwi, icha uva pabi pexeinaein ichi xua yabaca xueta xua xanapanaya petaxuwiwa tsainchi. Taxa bara juta coyeneya ichi. Taxa yawena pomonae tana nejume cowuntsiwi, pomonae xanapanaya inta pejinompaewi. <sup>2</sup>Uva pabi pexeinaein daxita ucuboba po maxuranaan xua jopa nacoichiyo. Bapoxonae daxita barapo pemaxuranaan po maxuranaan xua dubena xanapanaya nacoita beyacaincha xua copiya poxonae nacoita. Taxa barapocotsi juta coyeneya exana. Taxa itaweta pomonae bequein nejume cowunta ichitha jopa beta jinompaeyo xan nexa. Barichi pomonae bequein nejume cowunta ichitha saya tsiwiyo exana pocotsiwa itoroban, Taxa atene cana exana xua barapomonae atene, xua daxota barapomonae beta exanaena pocotsiwa itoroban. <sup>3</sup>Pajuntu coyene wunaem painya tana nejume cowuntsixaemxae xua bayatha po jume diwesi tapaca tsipaebixaetsi. <sup>4</sup>Pana necayawa jinompeibare icha ichin xua ataya paca cayawa poponeibinchi. Uva ñnboto maxuranaewa ba poxonae iratha maxurana boca jopa ba pipatotha matono xuwouncuaeyo xua pethei perubenaenexa. Bara juta coyeneya

paichim. Icha jopa pana necayawa jinompaem, jopa paxeinaem tsane xua po coyene pexeinya peajuntuyapusu coyenewa.

<sup>5</sup>“Icha pepa uva ñnboto ichi xua xeina pemaxuranaan, bara juta coyeneya ichin. Xeinan pomonae tana nejume cowuntsi jiwi pam. Pepa uva ñnboto nacoita exana nawita pethei pemaxuranaantha tsipei poxoru pemaxuranaan dubena pepa uva ñnbototha tsica. Bara jutiya ichi icha pana necayawa jinompame bapoxonae bichocono paca juntu coyene xanepana exanaeinchi. Daxota icha pana nepentsiya jinompame jopa paca itacupaetsipae xua paexaname pocotsiwa xua Nacom ichichipa. <sup>6</sup>Pon jopa necayawa poponaeyo bapon Taxa itawetsina, icha xua uva pabi pexeinaein ichi. Bapon petupae maxuranaan nota xua bayatha ucobobeba yawa bapoxonae isotototha bebeya petautsinexa.

<sup>7</sup>“Icha pana necayawa jinompaename yawa icha jopa pajuntemainem tsane pocotsiwa bayatha paca cuidubatsi, bapoxonae pocotsiwa pana newucaename bara baxua pacata exanaeinchi. <sup>8</sup>Jiwi Taxa baru cui itura jinatsi poxonae paca tane xua betiya xanapanaya pajinompame painya neexanaexae pocotsiwa Taxa paca itoroba. Yawa Taxa baru cui itura jinatsi tsipei barapomonae paca cui yaputane xua paxam barapara pepa tamonae jiwi pam. <sup>9</sup>Paca antobetsi icha Taxa ichi xua neantobe. Ataya payacuiya jinompare xua paxam po coyene xua pomonae tapana nejume cowuntsi jiwi pam. <sup>10</sup>Paexanaponde pocotsiwa paca itorobatsi, bapoxonae bichocono tsitecaeya paca antobe tsoponae tsainchi, icha xan ichin xua poxonae exanan pocotsiwa Taxa

neitoroba xua daxota ataya tsitecaeya neantobe tsoponae.

<sup>11</sup>“Baxuan paca tsipaebatsi xua paca juntu coyene xanepana exanaeinchi xua bapoxonae bichocono pajuntu coyene weiweinaename. <sup>12</sup>Barapo taitorobi coyenewa baxue xua janje: ‘Nantiya paxam pana naantobeinde, icha paca ichichi xua paca antobetsi’, jan. <sup>13</sup>Yabara paca tsipaebatsi po peantobewa bichocono ainya cui beyacaincha icha peantobewa. Barapocotsi peantobewa xeina pebin poxonae peantobexae pia jiton yaitataba xua pebexubinexatsi xua pia jiton tatsi jopa bepetabexubiwa tsainchi. <sup>14</sup>Paxam apara tajiwimonae pam, icha paexanaponaename pocotsiwa xua tapaca itorobiwatsi. <sup>15</sup>Anoxuae jopa bepaca caunutichi xua paxam pomonae inta amanaya penacuichiwi pam. Nama po cae pin nacuathe pomonae petanacuichiwi jopa yabara yaputaeyo pocotsiwa exana pomonae pia pecanamataxeinaewichi tsipei jopa baxua yabara paebiyu. Ichitha paca caunutatsi xua paxam apara tajiwimonae pam, tsipei nama xan paca cana exainchi xua payabara yaputaneme daxita pocotsiwan xuan Taxa necui itoroba. <sup>16</sup>Apara jopa pana neitapetsim. Jame apara paca itapetatsi. Paca cui itorobatsi xua xanepanaya painya neexanaewa pocotsiwa Taxa paca itoroba. Ichichipan xua jopa peweraweracaewa tsane pocotsiwan painta exanaename. Bapoxonae Taxa bara pacata exanaena poxonae Taxa beicha pawucame poxonae pana nebuxuna bobenouname. <sup>17</sup>Daxota equeicha paca jeichi: ‘Paxam nantiya pana naantobeinde’, jan”, jei Jesús pijimonaetha.

**Meje yabara poxonae Jesús jeye: “Jiwi necaseba, iru paca caseba”, jei Jesús**

<sup>18</sup>Equeicha Jesús jeye: “Pomonae jopa nejume cowuntsiyo icha barapomonae paca caseba pananta xeinare xua barapomonae copiya necaseba daxota paca casebaru. <sup>19</sup>Icha paxam pomonae jopa pata tana nejume cowuntsiwi jiwana pam tsipaem, bapoxonae pomonae necaseba paca antobe tsipae icha ichi xua barompaya antobe pijimonaetha. Pomonae xote jinompe, pomonae jopa tana nejume cowuntsiwi, barapomonae pexantha tatsi paca itapetatsi daxota barapomonae paca caseba. Tsipei anoxuae paxam jopa barapomonae jiwana pam. <sup>20</sup>Pana nejume cayabara nanta xeinare xua bayatha paca tsipaebatsi xua janje: ‘Pon ba tanacuita ichun, bapon jopa ainya cuiyo, jame pia pentacaponaein tatsi ainya cui pon peitorobixaetsi’, paca jeichi. Tsipei jiwi inta abe exana daxota iru pacata abe exana. Jiwi jopa jume cowuntsiyo tacuidubiwa. Barichi jopa jume cowuntsiyo painya necuidubiwa. <sup>21</sup>Daxita baxuan jiwi paca cana exanaena xua painya neexanaexae pocotsiwa paca itorobatsi tsipei jopa yaputaetsi pon neitoroba pon Taxaxae. <sup>22</sup>“Icha jopa patopaeinchipae po cae pin nacuathe, xuano xua icha jopa cuidubinchipae barapomonaetha, barapomonae jopa natsicuentisipae xua abe peexanaexae tsipei jopa yaputaetsipae xua abe exana. Ichitha anoxuae jopa itacupaetsi xua pejeiwa: ‘Jopa payaputaeyo xua abe paexanan’, xua pejeiwa, tsipei patopan yawa cuiduban barapomonae. <sup>23</sup>Pomonae xua necaseba, barapomonae iru Taxa casebatsi. <sup>24</sup>Barapomonae tane xua xan exanan pocotsiwa ichun jopa itacupaetsi

xua peexanaewa. Icha barapomonae jopa bayatha necui taetsipae xua exanan jopa natsicuentisipae xua abe peexanaexae jopa peyaputaexae tsipae xua abe exana. Ichitha barapomonae bara xaniwaicha necui tane xua exanan. Matautano yaputane xua abe exana. Daxota barapomonae necaseba iru daxota Taxa casebatsi. <sup>25</sup>Ichitha baxua bewa neyabara jume cui wetsina tsipei Moisés pia peitorobi coyenewatha neyabara tsiwunaeya jeye: ‘Barapomonae necaseba poxoru saya apatsi’, jei barapo Moisés pia peitorobi coyenewatha.

<sup>26</sup>“Itorobin Nacom pia Pejumope tunaxu tatsi xua po pejumope tunaxu Taxa werena pona, po pejumope tunaxu paca yawenaena po pejumope xainyeya pepaebin. Barapo pejumope tunaxu neyabara paebina poxonae bapon patopeicaena. <sup>27</sup>Paxam bara paichim tsane ichamonaetha pana neyabara paebiname. Tsipei poxonae aena tamropata pitaban tanacuichiwa barapo cae pin nacuathe, bapoxonae caena bayatha pana nebaru jinompame”, jei Jesús pijimonaetha.

**16** Equeicha Jesús barai pijimonaetha, jeye: “Baxua paca tsipaebatsi xua jopa painya nebarapentsiwa tsane xua tapana nejume cowuntsiwam poxonae jiwi abe pacata exanaena. <sup>2</sup>Paca itawetsina judiomonaetha pia penacae-tutsi bon weya. Po mataqueitha poxonae jiwi paca jutebina, barapo jiwi catsawiya nanta xeinaena xua Nacom pecui itorobixae xua daxota painya paca necajutebiwa tsane. <sup>3</sup>Barapo jiwi baxua pacata exanaena, tsipei jopa neyaputaeyo matauta Taxa tsipei jopa yaputaetsi. <sup>4</sup>Baraxua paca tsipaebatsi xua painya tana necayabara jume cananta xeinaewam tsane poxonae barapo matacabi tsane poxonae po mataqueitha jiwi abe pacata exanaena.

### Meje yabara po coyene xua Nacom pia Pejumope tunaxu tatsi exana

“Poxonae aena tamropata pitaban tanacuichiwa baraxua jopa paca tsipaebichi tsipei paca baru popoinchi. <sup>5</sup>Ichitha nama anoxuae baxua paca tsipaebatsi tsipei ponaein, xua Taxa beicha taecaewa tsane pon tana neitorobixae. Dapon aibi paxam jiwana pam pon neyainyaba xua nejei: ‘¿Eta xota ponaename?’ pon nejei, tsipei daxita pam bara pana neyaputaneme xua xota taponawa. <sup>6</sup>Nama anoxuae bi-chocono panthuthu wecoyam tapaca tsipaebixae baxua. <sup>7</sup>Ichitha bara yat-sicaya xainyeya paca tsipaebatsi. Baxua pacata wunaetha xua taponawa tsipei icha jopa ponaeinchipae, jopa neitacupaetsipae xua taitorobiwa Nacom pia Pejumope tunaxu tatsi xua painya nepaca cayawenaenexa. Icha ponaein barapo jumope pacata itorobinchi. <sup>8</sup>Poxonae Nacom pia Pejumope tunaxu tatsi patopeicaena, jiwi yabara yaputane cana exanaeinchi pocotsiwa daxita jiwi abe peexanae cuiru coyenein exana. Matautano barapo Nacom pia Pejumope tunaxu tatsi jiwi yaputane cana exanaeinchi xua xan saya xanapanaya Nacom tayabara paebin. Matautano barapo Nacom pia Pejumope tunaxu tatsi jiwi yaputane cana exanaeinchi xua po coyene poxonae Nacom exanaena xua Nacom yabara paebina daxita jiwi xua penatsicuentisiwa xua abe peexanaexae. <sup>9</sup>Poxonae barapomonae abe peexanae cuiru coyene exana baxua tsita itapeinya xeina xua barapomonae jopa tana nejume cowuntsiwi. <sup>10</sup>Matautano jiwi yaputane cana exanaeinchi xua xan saya xanapanaya Nacom tayabara paebin, tsipei Taxa beicha ponaein yawa paxam jopa equeicha pana ne-taem tsane. <sup>11</sup>Matauta barapo Nacom pia Pejumope tunaxu tatsi jiwi ya-

putane cana exanaeinchi xua po coyene poxona Nacom exanaena xua Nacom yabara paebina daxita jiwi xua penat-sicuentisiwa xua abe peexanaexae. Tsipei caena bayatha bapocotsiwa exana caurimonae pia pentacaponaeintha, pon jiwi juntu coyene itorobatsi barapo cae pin nacuathe xua abe peexanaenexa. Matautano Nacom bapontha cana exanaena xua bexa bapon weraweracaena.

<sup>12</sup>“Ichawa bequein xeinan xua tapaca tsipaebiwatsi ichitha anoxuae jopa paca itacupaeyo xua painya neyaputaewa tsipei jopa paca coyene cupaeyo. <sup>13</sup>Poxona patopeicaena Nacom pia Pejumope tunaxu tatsi, barapo pejumope tunaxu paca tsipaebina daxita xua xuan pocotsiwa pexainyeiwa tsipei apara jopa paebi tsane xua pia coutha peichichipaewa. Saya paebina xua Nacom bayatha jume tainchi. Matautano barapo pejumope tunaxu yabara yaputane paca cana exanaena pocotsiwa bexa tsane exanaena po cae pin nacuathe tsique. <sup>14</sup>Barapo Pejumope tunaxu jiwi cana exanaeinchi xua jiwi wuna tana nejainchiwa tsane. Pocotsiwa xua paca tsipaebatsi, barapo pejumope tunaxu xuya yaputane paca exanaena. <sup>15</sup>Daxita xua Taxa pocotsiwa xeina iru apara xan tawa. Daxota paca jeiche: ‘Pocotsiwa tacuidubi coyenewa, barapo coyenewa barapo pejumope tunaxu xuya equeicha paca cuidubina’, paca jeichi.

<sup>16</sup>“Caeto tsane jopa pana netaem tsane. Ichitha bexa tsane bapoxonae equeicha pana netaename. Bapoxonae pirapaeyo Taxa beicha ponaein”, jei Jesús pijimonaetha.

**Meje yabara poxona Jesús jeye:**  
**“Bequein copiya pawecoyam tsane ichitha bexa equeicha pajuntu coyene weiweinaename”, jei Jesús**

<sup>17</sup>Bapoxonae ichamonae pomonae Jesús pijimona tatsi caemonae nayainyaba, najei:

—¿Eta xua bapon naca tsipaebara? ¿Eta xua metha naca jei: ‘Caeto tsane jopa pana netaem tsane. Ichitha bexa tsane, bapoxonae equeicha pana netaename. Bapoxonae pirapaeyo Taxa beicha ponaein’, naca jei? <sup>18</sup>¿Eta xua metha ‘caeto tsane’, jane? Jopa baxua yaputaetsi, najei.

<sup>19</sup>Jesús pijimona yaputane xua pijimonae juntucuru yainyabatsi. Daxota pijimona barai, jeye:

—Xuaunxuae paca jeichi: ‘Caeto tsane jopa pana netaem tsane. Ichitha bexa tsane bapoxonae equeicha pana netaename’, jan ¿baxua apara pana necayabara jume yainyabame?

<sup>20</sup>Xaniyan paca tsipaebatsi. Tacoutha paxam pawecoyam tsane yawano paanthuthurewem tsane poxonae iruru juntu coyene weiweinaena pomonae jopa tana nejume cowantsi jiwi. Bequein caeto pawecoyam tsane ichitha equeicha pajuntu coyene weiweinaename. <sup>21</sup>Poxonae yabuyo bupana taecatsi pexuyo, poxonae imoxoyo naexanaena pexuyo, bapowa bichocono wecoyei. Ichitha poxonae bayatha pexuyo naexana, bapoxona bapowa nacayabara juntemaina xua bayatha yaporowa papai xua peatenexae. Daxota bapowa juntu coyene weiweina pexuyo bayatha penaexanaexae. <sup>22</sup>Bara juta coyeneya paichim tsane. Poxonae tupaen xua taponaeinexa tsane, bequein pawecoyam tsane, ichitha panetaename poxonae asun tsane xua ponaein Taxa beicha. Yawa bapoxonae pajuntu coyene



weiweinaename. Dapon aibi pon barapo jüntu weiweinae coyenewa paca jüntu coyene wejüntemaina cana exanaena.

<sup>23</sup>“Barapo mataqueitha, po mataqueitha Taxa beicha ponaein, equeicha bara nama jopa painya tana neyainyabiwam tsane. Saya meisa poxonae Taxa beicha pana newun caununaya wucaename, bara baxua daxita pacata exanaena. Baxuan pocotsiwa paca tsipaebatsi bara xainyan. <sup>24</sup>Caena bayatha xua beya anoxuae jopa pana newun caununaya wucaem Taxa beicha. Anoxuae nama pana newun caununaya wucaename Taxa beicha. Bara baxua pacata exanaena xua bichocono yatsicaya painya nejüntu coyene weiweinaewa tsane”, jei Jesús pijimonaetha.

**Meje yabara poxonae Jesús jeye:**  
**“Xan amanayabaxubin pon jiwi jüntu coyene itorobatsi po cae pin nacuathe”, jei Jesús**

<sup>25</sup>Equeicha Jesús barai pijimonaetha, jeye: “Pocotsiwan xua bayatha paca tsipaebatsi, bara paeban pecayabara juta pepaebi diwesixitha. Ichitha barapo matakabi patopaena, po mataqueitha jopa paca tsipaebi tsainchi pecayabara juta pepaebi diwesixitha. Barapo mataqueitha bara Nacom yabara jume penthiya paca tsipaebinchi. <sup>26</sup>Barapo mataqueitha pana newun caununaya wucaename Taxa beicha. Jopa paca tsipaebichi xua Taxatha tapacata wucaewa tsainchi tsipei apara bara painya coya paca itacupa. <sup>27</sup>Taxa paca antobe pata tana neantobemxaem yawa pata tana nejume yabara cowuntsixaemxae xua xan bara yatsicaya Taxa wetsica ponan. <sup>28</sup>Taxa pia xainya wetsica ponan xua tapatopaewa tsane po cae pin nacuathe tsique. Ichitha anoxuae barapo cae pin nacue cuenta ponan xua equeicha

Taxa beicha taponaeewa tsane”, jei Jesús pijimonaetha.

<sup>29</sup>Nexata Jesús pijimonaexae baraichichi, jeye:

—Anoxuae bara yatsicaya jume penthiya pana netsipaebame. Jopa paebim pecayabara juta pepaebi diwesixitha. <sup>30</sup>Anoxuae payaputan po coyene xua bara daxita neyaputaewan. Matautano payaputan xua jopa pata nantawenonaewa xua paxan pata paca cayainyabiwatsi. Daxota pajume cowuntan xua xam bara yatsicaewa Nacom wetsica neponaein, jeichichi Jesús pijimonaetha.

<sup>31</sup>Jesús jume barai pijimonaetha, jeye:

—¡Anoxuae matapainya pana nejume cowuntame! jei Jesús. <sup>32</sup>Bara nama imoxoyo matakabi patopa, po mataqueitha tsana parucupaename poxonae jiwi paca yotabina. Paxam pana necuentarucupaename. Daichitha xan jopa companyo tsane tsipei Taxa neyanta bayatha. <sup>33</sup>Daxita baxuan paca tsipaebatsi painya nejüntu coyene weiweinaenexam tsane tapana necayawa jinompaexaem tsane. Poxonae cataunxuae pajinompaename po cae pin nacuathe jiwi paca atene exanaena poxonae abe paca cana exanaena. Daichitha juntea pajinompare. Tsipei xan amanayabaxubin pon jiwi jüntu coyene itorobatsi po cae pin nacuathe, jei Jesús pijimonaetha.

**Meje yabara poxonae Jesús pijimonaetha wuca Paxatha**

**17** Poxonae Jesús baxua najume weta xua pijimonaetha tsipaeba, bapoxonae Jesús itaboco necoicha. Paxatha tsipaeba jeye: “Axa, aunxuae patopaena xua poxonae jiwi tsita itutsiname xua xan, apara bara Nexanton, pon taainya cuin. Bapoxonae jiwi tsita itutsin xua xam jinya

neainya cuim. <sup>2</sup>Xam, Nexantonxaein, daxita jinya neitorobi coyenewa necatame xua taitorobinexa tsane jiwi. Daxita po jiwi necatame, po jiwi tana nejume cowuntsiwi, barapo jiwi catsin peajuntuyapusuwa, po peajuntuyapusuwa ataya tsiteca. <sup>3</sup>Axa, yatsicaya compam xam Nacom, iru xan Jesucriston compan ponxaein neitorobame po cae pin nacuathe tsique. Pomonae nejume cownta iru xuano cajume cowntano, barapomonae xeinaena peajuntuyapusuwa, po peajuntuyapusuwa ataya tsiteca.

<sup>4</sup>“Po cae pin nacuathe exanan xua jiwi wunaecajainchiwa. Bayatha wetan xua bayatha necui itorobame xua taexanaewa tsane. <sup>5</sup>Axa, anoxuae equeicha ainya cui neexande neitabaratha, icha matha neichim poxonae caena bayatha ainya cui neexaname neitabaratha poxonae nexantha poponan poxonae cataunxuae po cae pin nacue jopa forotsinyo.

<sup>6</sup>“Pomonae bayatha itapetame, pomonae nejume cownta, barapomonae yabara cuiduban xua xam cayabara paebatsi. Barapomonae bara jinyamonae yawa nepuna pona exaname. Barapomonae bara xanepanaya exana xua pocotsiwa itorobame. <sup>7</sup>Pocotsiwan xua xan paeban xuano xua exanan, daxita baxuan exanan tana necatsimxae jinya pexeinya ayapusu itorobi coyenewa. Anoxuae daxita baxuan barapomonae yaputane. <sup>8</sup>Pocotsiwan necuidubame xuya barapomonae cuiduban. Daxita baxuan barapomonae yabara nejume jejei. Barapomonae yaputane xua xan bara yatsicaya xam wetsica ponan. Matautano yaputaneno xua xam tana neitorobiwam.

<sup>9</sup>“Cawucatsi barapomonae nexa xua neyawenaewa tsane barapomonae. Apra jopa yabara cawucaetsi

pomonae jopa nejume cowuntsiyo xua neyawenaewa tsane. Saya jame yabara cawucatsi pomonae tana necatsixaemxae pomonae jinyamonae. <sup>10</sup>Daxita pomonae xua jinyamonae apra tamonaeru. Daxita iruru pomonae xua tamonaec, apra jinyamonae. Ichamonae wunaeya necayabara nanta xeina xua xan ainya cuin tsipei xanepanaya jinompa, pomonae tana nejume cowuntsi jiwi.

<sup>11</sup>“Xan jopa poponaein tsane po cae pin nacuathe tsipei ponaein nexainya beicha xua tapoponaenexa nexantheicha. Nama barapomonae jopa daichiyo, saya po cae pin nacuathe dubenanaebiyaena. Axa, xam ponxaein bichocono nejuntu coyene xanepanaein tsaibim. Pomonae bayatha tana necatsixaemxae barapomonae bebere jinya neayapusu neitorobi coyenewatha xua barapomonae jopa pejuntu coyene cui itorobinexa tsainchi xua abe peexanaewa tsane xua caurimonae pia pentacaponaein tatsi juntu coyene cui itoroba. Bapoxonae barapomonae be caein cana naexanaeinchibe waantobexaebe barapomonae icha ichichibe xua be caein naexainchibe. <sup>12</sup>Poxonae cataunxuae poponan po cae pin nacuathe, apra xan bebeteiban barapomonae jinya neayapusu neitorobi coyenewatha pomonae tana necatsixaemxae. Barapo tamonaec beta bebetan yawa jopa copatsinyo xua ichun tana newepu aichurucuaewa, saya meisa caein nexubina barapomonae jiwana. Daxota bapon bewa tupaena tsipei bichocono peajuntucoyeneyapubein. Bapon abe exana tsipei caena bayatha nejume diwesitha bapon yabara paebatsi po coyeneya xua bapon tana necana exanaewa tsane.

<sup>13</sup>“Anoxuae xan ponan nexainya beicha ichaxoteicha ecame. Ichitha daxita baxuan paeban poxonae cataunxuae po cae pin nacuathe

poponanje xua barapomonae bichocono pejuntũ coyene weiweinaenexa, po pejuntũ coyene weiweinaewa bayatha xeinan. <sup>14</sup>Nejume diwesi catan barapo tamona. Ichitha barapo tamona inta casebatsi ichamona tsipei barapo jiwi po cae pin nacuathepiwi. Barapo tamona nama po cae pin nacuathepiwi aibi, icha ichin xua xan po cae pin nacuathepin aibin. <sup>15</sup>Apara jopa cawũcaetsi xua barapo tamona nenotsinexa po cae pin nacue weye. Saya apara cawũcatsi xua barapomonae nebebetsinexa caurimona pia pentacaponaein tatsi pecuiyainwa. <sup>16</sup>Icha xan ichin xua po cae pin nacuathepin aibin, barichi barapo tamona jopa barapo cae pin nacuathepiwiyo. <sup>17</sup>Nejume diwesi, apara po diwesi nexainyei diwesi jume. Poxona barapo tamona jume tane baxua barapomonae catame xua pejuntũ coyene weiweinaewa xua peexanaewa tsane pocotsiwa ichichipame. <sup>18</sup>Icha neichim xua neitorobame pomonaetha pomona jopa jume cowũtsiyo, barichin pomona tana nejume cowũtsiwi itoroban pomonaetha pomona jopa tana nejume cowũtsiwi. <sup>19</sup>Najuntũ coyene catan nexainya beya tha xua exanaetsi pocotsiwa ichichipame. Baxua exanan tsipei antobein tamona. Exande xua barapomonae irũ penajuntũ coyene catsinexa nexainya beya xua pia peexanaewa tsane pocotsiwa ichichipame. Baxua peexanaenexa tsane pexeinaexae nejume diwesi, po diwesi nexainyei jume diwesi.

<sup>20</sup>“Jopa meisa cawũcaetsi barapo tamona nexa, apara yawano irũ yabara cawũcatsi pomona bexa nejume cowũtsina poxona jume taena tajume diwesi xua poxona pepaebixae tsane barapo tamona. <sup>21</sup>Cawũcatsi xua barapomonae be

caein penaexanaenexa xuano xua cae penanta xeinaeya nacana barũ cayawa nanta xeinaenexa tsainchibe. Baxua exanatsibe barapomonaetha icha neichim xua neyantame xuano xua xam cayantatsirũ. Poxona barapomonae be caein nacayawa naexana ponaeinchibe, bapoxona ichamona yabara jume cowũtsina xua xam bara yatsicaya tana neitorobiwam. <sup>22</sup>Barapo tamona peainya cui coyenewa catan, po peainya cui coyenewa xam necatame xua barapomonae be caein penaexanaenexa icha ichichibe xua bara caein naexanatsibe. <sup>23</sup>Xan tamona yantan irũ xam neyantame, tsipei daxitatsi be caein naexainchi daxota barapomonae yatsicaya bara be caein naexana. Bapoxona daxita jiwi cui yaputaena xua xam bara yatsicaya tana neitorobiwam. Matautano barapo jiwi cui yaputaena xua tamona antobem icha ichim xua neantobem.

<sup>24</sup>“Axa, necatame barapo tana nejume cowũtsiwi. Ichipan xua barapomonae pomona tana nejume cowũtsiwi ponaena ichaxoteicha taponawa tsane xuano xua pia petaenexa tsane taainya cui coyenewa xua necatame. Tsipei caena bayatha neantobem poxona cataunxuae jopa forotsiyo po cae pin nacue. <sup>25</sup>Axa, pon bichocono nejuntũ coyene xanepanaem. Pomona jopa tana nejume cowũtsiwi jopa pepa jinyamonaeyo tsipei jopa cayaitaeyo. Ichitha xam bara cayaitainchi. Pomona tamona, pomona tana nejume cowũtsiwi barapomonae neyabara yaputane xua xam tana neitorobiwam. <sup>26</sup>Barapomonae pomona tana nejume cowũtsiwi yabara yaputane exanan xua xam cayabara paebatsi. Abũ cataunxuae awiya baxua exanaein xua jinya necaantobenexa tsane icha neichim xua neantobem.

Matautano barapomonae ataya yaitata poponeibin”, jei Jesús poxonae Paxa tsipaeba.

**Meje yabara poxonae  
Jesús waetabatsi**

(Mt 26.47-56; Mr 14.43-50; Lc 22.47-53)

**18** Poxonae Jesús najume weta xua poxonae Paxa tsipaeba, bapoxonae pomonae Jesús pijimonaexae tatsi Jesús baru pona. Jesús baru pona foto iya icha muxunene beya, po foto cataunxuae ira tsewa. Barapo foto pewun Cedrón. Barapo icha muxunene beya umena xua ponaein peubi naein, baxota Jesús pijimonaexae baru patopa. <sup>2</sup>Judas, pon Jesús caenaetatsi, bapon yaputane barapo momiyi tsipei baxota matha matowa Jesús pijimonaexae baru nacaetuteiba. <sup>3</sup>Judas patopa ichaxota Jesús pijimonaexae baru uncua. Judas baru pona soldadomonae iruno policiamonae, po policiamonae pomonae Nacom pin pia bo peyabara umenaewi. Daxita barapomonae, pomonae Judas baru patopa fariseomonae itoroba iru sacerdotemonae pia pentacaponae tatsi itorobaru. Daxita barapomonae cusin capona. Iru ichamonae lámbaran capata iru ichamonae banaxuton capata. <sup>4</sup>Bequein Jesús tsiwana yaputane barapomonae xua po coyene pecana exanaewa tsainchi, ichitha Jesús itataya yawa yainyaba, jeye:

—¿Jintam pawenawenam? jei Jesús.

<sup>5</sup>Daxita barapomonae Jesús jume notatsi, jeye:

—Apara Jesús Nazaret tomarapin pawenawenan tsompae, jei.

Jesús jume nota, jeye:

—Apara bara bapon uncuanje, jei Jesús.

Iru Judas, pon Jesús caenaetatsi, baxota nauncuaru. <sup>6</sup>Poxonae Jesús, jeye: “Apara, bara bapon uncuanje”, jei,

bapoxonae barapomonae pewna iyiya caibeya yawa xuirabathopa. <sup>7</sup>Equeicha Jesús yainyaba, jeye:

—¿Jintam pawenawenam tsompae? jei.

Equeicha barapomonae, jeye:

—Apara, Jesús Nazaret tomarapin pawenawenan tsompae, jei barapomonae.

<sup>8</sup>Nexata Jesús barai, jeye:

—Bayatha paca tsipaebatsiba: ‘Apara bara bapon uncuanje’, jan. Icha pana newenawenam bara tamonae inta painta pu copabare, jei Jesús.

<sup>9</sup>Baxua exana tsipei caena bayatha Jesús jeye Paxatha: “Axa, barapo tamonaexae beta bebetan yawa jopa copatsinyo xua ichun tana newepu aichurucuaewa”, jei Jesús. <sup>10</sup>Bapoxonae Simón Pedro namara wejonta pia wato cusi. Simón Pedro muxuyoro catsoniba pon pewun Malco, po muxuyoroto pecoxa werucuiya. Bapon Malco pon sacerdotemonae pia pepa pentacaponae tatsi tanacuitatsi. <sup>11</sup>Jesús Pedro barai, jeye:

—Cusi jeinca pentacuerutha. ¿Eta pocotsiwa daxua daichim? ¿Xam ichipame xua jopa taexanaewa tsane pocotsiwa caena bayatha Taxa neitoroba xua bara bewa jiji atene tana necana exanaewa? jei Jesús.

**Meje yabara poxonae Jesús  
uncua Anás peitabaratha tatsi**

(Mt 26.57-58; Mr 14.53-54; Lc 22.54)

<sup>12</sup>Bapoxonae soldadomonae iru soldadomonae pia pentacaponae tatsi iruru policiamonae, po policiamonae pomonae Nacom pin pia bo peyabara umenaewi, daxita barapomonae Jesús waetabatsi yawa maxu cubatsi. <sup>13</sup>Bapoxonae Jesús capoinchi Anás pia bo tatsi beya. Bapon Anás Caifás paxuyo tatsi. Bapon Caifás barapo weitharu sacerdotemonae pia pepa

pentacaponaein tatsi naexana. <sup>14</sup>Barapon Caifás, pon caena bayatha jei judiomonaetha: “Metha w̄nae xua bara caein piamonae yaitatsina pebexubinexatsi xua daxita piamonae tatsi jopa petajutebinexatsi”, jei Caifás xua bayatha paeba.

**Meje yabara poxonae Pedro Jesús yabara paebatsi xua jeje: “Jopa dapon yaitaenyō”, yabara jeichichi Jesús**

(Mt 26.69-70; Mr 14.66-68; Lc 22.55-57)

<sup>15</sup>Simón Pedro iru ichun ponxaeru Jesús pijimonae tatsi jiwana Jesustha napuna ponabe poxonae policiamonae Jesús capoinchi sacerdotemonae pia pepa pentacaponaein tatsi pia botha tatsi. Barapon pon ichun bapon yaitainchi xua sacerdotemonae pia pepa pentacaponaein tatsi yaitane. Daxota bapon sacerdotemonae pia pepa pentacaponaein tatsi pia pin pia bo panatha tatsi Jesús puna jonyatsi. <sup>16</sup>Nama Pedro aisowatha uncua peboupa juma werena. Daxota bapon pon ichun pana weya pona peboupa beya xua yab̄yo petsipaebinxatsi powayo yapu eeneiba peboupa. Bapon jeje: “Inta Pedro pu itorobarena xua bara jondenaena”, jei. Tsipei barapo sacerdotemonae pia pentacaponaein tatsi bapon yaitainchi daxota barapowa Pedro bara copatatsi xua bara jondenaena. <sup>17</sup>Nexata poxonae Pedro jondena, bapowa Pedro yainyabatsi, jeichichi:

—¿Bara xam, Jesús pijimonae tatsi caein jiwanamda? jeichichi Pedro.

Pedro jume nota, jeje:

—Jume, apara xan dapon aibin, jei Pedro.

<sup>18</sup>Yaitama iru aque tsuncuaeru daxota pomonae sacerdotemonae pia pepa pentacaponaein tatsi tanacuitatsi iru policiamonaeno, daxita barapomonae isoto

itutaeta barapo panatha. Daxita barapomonae nonopumena barapo isototha. Pedro iru baxota nanonopuncuaru.

**Meje yabara poxonae sacerdotemonae pia pepa pentacaponaein tatsi Jesús matowa yainyabatsi**

(Mt 26.59-66; Mr 14.55-64; Lc 22.66-71)

<sup>19</sup>Iruru bapoxonae sacerdotemonae pia pepa pentacaponaein tatsi tamropata pitaba xua Jesús matowa peyainyabi-watsi. Jesús jeichichi: “Jesús, ¿jintam baru jinyamonae? ¿Eta po diwesi cuidubame barapo jinyamonae?” jeichichi Jesús.

<sup>20</sup>Jesús jume nota, jeje:

—Caena bayatha daxita jiwi peitutha cueicueijan tsaibin. Judiomonae pia penacaetutsi bontha ataya cuidubeiban. Matautano Nacom pin pia botha ichaxota judiomonae nacaetuteiba, baraxotano ataya cuidubeiban. Bapana jopa jiwi wepu nameicha paebin xua pocotsiwa jiwi jopa tana nejume taenexa. <sup>21</sup>¿Eta pocotsiwa metha nejume yabara yainyabame? Jame maisa moya yainyabare pomonae bayatha nejume tane. Moya barapomonae catsipaebina pocotsiwa bayatha tsipaeban barapomonae petanejume yaputaexae pocotsiwa bayatha tsipaeban, jei Jesús.

<sup>22</sup>Poxonae Jesús baxua najume weta, bapoxonae caein policiamonae jiwana pin pomonae baxota umena, po policiamonae Nacom pin pia bo peyabara umenaewi bapon Jesús jumata cuaintaxotsi. Yawa bapon Jesús jeichichi:

—¿Eta xua dapo jume paebame poxonae baxua jume notame sacerdotemonae pia pepa pentacaponaein tatsi? jei bapon.

<sup>23</sup>Jesús jume nota, jeje:

—Icha bara pocotsiwa abe paeban, moya netsipaebare xua abe. Ichitha icha xua wūnae paeban, ¿eta pocotsiwa metha nexata nejumata cuaintaxubame? jei Jesús.

<sup>24</sup> Bapoxonae Anás Jesús yamaxu cubiya itorobatsi Caifás beya. Bapon Caifás sacerdotemonae pia pepa pentacaponaein tatsi naexana barapo weitharū.

**Meje yabara poxonae equeicha Pedro Jesús yabara paebatsi: “Jopa dapon yaitaeinyo”, yabara jeichichi Jesús**

(Mt 26.71-75; Mr 14.69-72; Lc 22.58-62)

<sup>25</sup> Poxonae baxuarū, irurū cataunxuae Pedro nanonopuncua. Barapoxonae barapomonae Pedro yainyabatsi, jeichichi:

—¿Xam apara Jesús pijimonae tatsi caein jiwanamda? jeichichi Pedro.

Ichitha Pedro jume notsiya jeye:

—Jume, apara xan bapon aibin, jei Pedro. <sup>26</sup> Bapoxonae equeicha ichūn Pedro yainyabatsi pon sacerdotemonae pia pepa pentacaponaein tatsi tanacuitatsi. Pon Pedro yainyabatsi, bapon caein jiwana pomonae Pedro jiwana muxuyoro catsoniba. Bapon Pedro yainyabiya jeichichi:

—Xam bayatha caena catainchi poxonae Jesús paca barū pona momiyo beya. ¿Bara methara? jeichichi Pedro.

<sup>27</sup> Pedro equeicha jume notsiya jeye:

—Jume, jopa dapon yaitaeinyo, jei.

Bapoxonaerū caena nainya wacara pebto fiba.

**Meje yabara poxonae Jesús uncua Pilato peitabaratha tatsi**

(Mt 27.1-2, 11-14; Mr 15.1-5; Lc 23.1-5)

<sup>28</sup> Caemūbotha Jesús capoinchi Caifás pia bo weya pon jiwi peyanacua ewatsinchi pin pia bo tatsi beya, pon pewūn Pilato. Ichitha judiomonae jopa jojoniyaeayo barapo botha pon

jiwi peyanacua ewatsinchi pin pia bothaxae tatsi. Judiomonae pia jūntū coyene cui xeina xua jei: “Judiomonae jopa bewa nanacaetutsi pomonae jopa be judiomonae naexanaeyo pia bothaxae tatsi po mataqueitha poxonae imoxoyo Pascua wūn matakabin xua poxonae jiwi penabanaewanexa pexaewa”, jei. Tsipei icha baxua exanaetsipa pia coutha najūntū coyene taxobichipa yawa barapomonae jopa itacupaetsipaetsi xua pexaewa xaena, po pexaewa poxonae xane Pascua wūn matakabintha. <sup>29</sup> Daxota Pilato aisowa bejoniya pia bo weya xua petsipaebinxatsi pomonae pesatotha umena. Pilato jeye barapomonaetha:

—¿Eta pocotsiwa painya yabara netsipaebichi bapon xua abe peexanaewa? jei.

<sup>30</sup> Barapomonae Pilato jume notatsi, jeye:

—Icha bapon jopa abe exanaetsipae, metha bapon jopa caponaetsipaetsi nexantha, jei barapomonae.

<sup>31</sup> Nexata Pilato barai jiwi, jeye:

—Paxam papire bapon, barompaya painya neitorobi coyenewatha payabara paebare xua penatsicuentisiwa xua abe peexanaexae, jei Pilato.

Barapo judiomonae jume nota, jeye:

—Ichitha paxan judiomonae pan, romanomonae pia peitorobi coyenewa jopa pana copatsiyo xua ichūn pacui itoroban xua jiton pebexubiwatsi xua poxonae abe peexanaexae, jei judiomonae.

<sup>32</sup> Baxua exana tsipei bayatha Jesús tsiwanaya nayabara paeba po coyeneya jiwi poxonae Jesús pebexubiwa tsainchi.

<sup>33</sup> Bapoxonae Pilato equeicha pia pin pia bo bejoniya yawa Jesús wabatsi, jeichichi:

—¿Xam judiomonae itorobiya pia pepa Neewatsin? jei Pilato.

<sup>34</sup> Jesús jume nota, jeye:

—¿Apara jincoya necayabara cananta xeinaeya yainyabame? Apara ichun yabara necatsipaebixae baxua, ¿daxota barapo jumetha neyainyabame? jei Jesús.

<sup>35</sup> Pilato jume nota, jeye:

—Jopa taeinyo tsipei apara xan judiomonaepin aibin. Apara jinya nacua-monaepiwi iru sacerdotemonae pia pentacaponae tati, apara barapomonae cacaenaeta taxantha. ¿Eta pocotsiwa metha exaname? jei Pilato.

<sup>36</sup> Nexata Jesús jume nota, jeye:

—Taitorobi coyenewatha jopa itorobinyo jiwi po cae pin nacuathe. Icha baxua exanaetsipan, bara nexata tamona neyawenaetsipa xua judiomonae jopa tana newaetabinexa. Ichitha taitorobi coyenewatha jopa itorobinyo jiwi po cae pin nacuathe, jei Jesús.

<sup>37</sup> Nexata Pilato Jesús jeichichi:

—¿Apara xam pon jiwi itorobiya pia pepa Neewatsin? jeichichi Jesús.

Jesús jume nota, jeye:

—Aa, apara bara xan bapon pon jiwi itorobiya pia pepa Taewatsin xuaunxuae bara paebame. Daxota naexanan po cae pin nacuathe yawa patopan tapaebinexa xua pocotsiwa pexainyeiwa yatsicaewa. Daxita pomonae ichichipa xua pejume cowantsiwa xua barapo pexainyei jume, barapomonae bara nejume tane, jei Jesús.

<sup>38</sup> Pilato Jesús baraichi, jeye:

—¿Eta pocotsiwa metha pocotsiwa pexainyeiwa? jei Pilato.

**Meje yabara poxonae Pilato jume baru jejei xua Jesús bara pebexubiwa tsainchi ichamonae**

(Mt 27.15-31; Mr 15.6-20; Lc 23.13-25)

Poxonae Pilato baxua yainyaba, bapoxonae Pilato equeicha aisowa bejoniya xua equeicha judiomona

petsipaebinxatsi. Pilato barai judiomona, jeye:

—Xan jopa jume itaraerowinyo bapon xua po jumetha nayaita anae exanaena xua pebexubinxatsi. <sup>39</sup> Ichitha paxam painya cui paxeiname xua ba caein tapacata isanaxubiwatsi pomonae jiwi pecubi botha nobatsi poxonae xua po mataqueitha Pascua wun matacabintha. ¿Bara anoxuae pacata saya pu copatinchi pon judiomonae itorobiya pia pepa peewatsinchi? jei Pilato.

<sup>40</sup> Nexata barapo judiomona jume daunweya wawai, jeye:

—¡Jume, jopa dapon isanaxubinde! ¡Maisa jame Barrabás isanaxore! jei barapo judiomona.

Barapon Barrabás, pon bichocono jiwi pecaibi.

**19** Nexata Pilato najume caitoroba xua Jesús bara pecuainchinxatsi xua pocotsiwatha ewa xua bichocono amupiya xua xota ba jiwi cuaintebatsi poxonae abe exaneiba. Soldadomona baxua exana. <sup>2</sup> Barapo soldadomona Jesús mata xatatatsi pee tepa. Matautano bapoxonae Jesús pia paparuwa juma xuenatsi. Icha paparuwa juma xatatatsi po paparuwa tsobia. <sup>3</sup> Bapoxonae barapo soldadomona Jesús imoxoyo cacuita umenarucupatsi. Yawa Jesús cui caponaeya jeichichi:

—¡Jaina, maisa wunaem pon judiomona itorobiya pia pepa Neewatsin! jei barapo soldadomona xua Jesús cui capoinchi.

Bapoxonae Jesús itabara cuaintatsi.

<sup>4</sup> Equeicha Pilato pesato bejoniya judiomona beya. Pilato barai judiomona, jeye:

—Matha pataema. Bapon pacata carenaeinchi, painya neyaputaenexa xua xan jopa jume taeinyo xua po jumetha pe-nayaita anae exanaewa xua pebexubinxatsi barapo pebin, jei Pilato.

<sup>5</sup>Bapoxonae Jesús pee tepa pesato beyawa joniya. Yawa paparuwa yawa joniya po paparuwa tsohia. Nexata Pilato barai jiwi, jeye:

—¡Pataema xote uncue baponje! jei Pilato.

<sup>6</sup>Bapoxonae sacerdotemonae pia pentacaponaeawi tatsi iru policiamonae, poxonae daxita barapomonae Jesús taerucupatsi, jume daunweya wawaya jeye:

—¡Naethohta bara tupaerucua bewa exanaem! ¡Naethohta bara tupaerucua bewa exanaem! jei barapomonae.

Pilato barai jiwi, jeye:

—Moya paxam jame bara papire, moya painya coya naethohta tupaerucua paexande. Yaitama xan apara jopa jume taeinyo po jumetha xua bapon penayaita anae exanaewa xua pebexubinexatsi.

<sup>7</sup>Ichitha judiomonae Pilato jume notatsi, jeye:

—Paxan pata taitorobi coyenewa paxeinan. Bapon pia coutha Nacom Pexanto tatsi natsicotane daxota bapon bewa tupaena tsipei pata taitorobi coyenewa baxua peyabara paebixae, jei judiomonae.

<sup>8</sup>Poxonae Pilato baxua jume tane, Pilato nama bichocono equeicha junuwa.

<sup>9</sup>Equeicha Pilato Jesús caibe maxu coniyatsi bo beya. Baxota Pilato Jesús yainyabatsi. Jesús jeichichi:

—¿Eta werenapim xam? jei Pilato.

Ichitha Jesús jopa jume notsiyo.

<sup>10</sup>Nexata Pilato Jesús baraichi, jeichichi:

—¿Eta pocotsiwa jopa nejume notsim? ¿Apara xam jopa neyaputaem xua xeinan taitorobi coyenewa xua tana neitacupaewa xua jiwi taitorobiwa xua tupaerucua necaxanadutsiwa naethohta? Matautano xeinan taitorobi coyenewa po coyene xua jiwi taitorobiwa xua saya necapu sotabiwa, jei Pilato.

<sup>11</sup>Jesús jume nota, jeye:

—Icha Nacom jopa cacatsipae barapo peitorobi coyenewa metha ichamonae jopa itorobimchipae xua ichamonae abe tana necana exanaewa. Daxota pon necanaeta xamtha bapon jame bichocono abe exana beyacaincha xam xua abe necana exaname, jei Jesús.

<sup>12</sup>Poxonae baxua Pilato jume taeba, bequein bichocono nanta xaina xua Jesús bara saya pepu sotabiwa tsainchi, ichitha junuwa poxoru judiomonae jume daunweya wawai. Barapomonae jeye:

—¡Icha xam bara saya, pu sotabame, apara romanomonae itorobiya pia pepa peewatsinchi bapon jopa pia jiton tsi-paem! ¡Pon pia coutha naexana xua be natsicotane pon jiwi itorobiya pia pepa peewatsinchi, bapon apara romanomonae itorobiya pia pepa peewatsinchi bapon pia peaitafaetabinchi jittontsi! jei judiomonae.

<sup>13</sup>Poxonae Pilato baxua jume taeba, bapoxonae ecoundeca ichaxota pia coutha cayabara cananta xeinecaeya cueicueijeji tsequeibi jiwi. Bapon baxota eca yawa najume caitorobeca xua bara berena Jesús pecarendenaenexatsi ichaxota Pilato eca, po pia peecaethopae tutu ibo pana tatsi hebreo jumetha, “Gabata”, jei. Baraxua jei: “Pefaratsiwa ibowa pana”, jei. <sup>14</sup>Bapoxonaeru barapo matakabi tsuxubiru, po matakabi copiya tsiwanaya ducua Pascua wun matakabi. Barapo mataqueitha judiomonae pexaewa xaxaintajeba xua Pascua wun matakabi nexa xua baya tsane. Poxonae mateinyaxae tsuxubi, bapoxonae Pilato barai judiionaetha, jeye:

—¡Incane pataema pon itorobiya pepa painya Nepacacaewatsin! jei.

<sup>15</sup>Ichitha barapo judiomonae jume daunweya wawaya jeye:

—¡Maisa bara tupaena! ¡Bara naethohta tupaerucua exande! jei.

Pilato jume barai, jeye:



—¿Bara itorobin jampa xua pebexubi-watsi pon itorobiya pepa painya Nepacawatsin? jei Pilato.

Ichitha sacerdotemonaē pia pentacaponae tatsi Pilato jume notatsi, jeye:

—Apara ichan jopa paxeinaeinyo pon jiwi itorobiya pia pepa Peewatsinchi. Jame saya meisa panta bara compa pon itorobiya pepa pata Neewatsin, bapon jame apara pon romanomonaē itorobiya pia pepa Peewatsinchi, jei judiomonaē.

<sup>16</sup> Barapo jumetha Pilato Jesús canacobena catatsi barapo judiomonaetha. Baxua Pilato exana xua Jesús bara tupa peexanaenexatsi naetha. Bapoxonaē barapo judiomonaē Jesús pitatsi.

**Meje yabara poxonaē Jesús  
tuparucua exanatsi naetha**

(Mt 27.32-44; Mr 15.21-32; Lc 23.26-43)

<sup>17</sup> Jesús bara pona, yawa pia naeto utucurapona, xua barapo naetha pecobe matatabarutsinexatsi ichaxota po demxuwatha be jiton matasipa piwa. Barapo demxuwa caunuteiba xua jei tsaibi: “La Calavera”, jei. (Seicaya hebreo jumetha jei tsaibi: “Gólgota”, jei.) <sup>18</sup> Barapo demxu matasoittha Jesús cobe matatabarutatsi naetha. Iru ainya pebinbe cobe matatabarutatsibe. Jesús tutiyotha yanaeto uncuā, ichan Jesús pecoxa weya tayanaeto uncuatsi iru ichan Jesús petsocona weya tayanaeto uncuatsi. <sup>19</sup> Pilato itoroba xua Jesús pentutu wetsica petarutsinexatsi napaeuyo. Barapo napaeuyotha jeye xua tinaduta: “Jesús, Nazaret tomarapin, pon judiomonaē itorobiya pia pepa Peewatsinchi”, jei barapo petinaē napaeuyotha. <sup>20</sup> Pinmonaē judiomonaē yoroba barapo petinadutsiwa tsipei ichaxota Jesús cobe matatabarutatsi imoxoyo itama tayeca tomara, po tomara pewan Jerusalén. Barapo petinaē

napaeuyotha, hebreo jumetha tina, griego jumetha tinano, iru latín jumetha tinano. <sup>21</sup> Daxota sacerdotemonaē pia pentacaponae tatsi, pomonaē judiomonaē xae, Pilato baraichi, jeye:

—Jopa jande ‘Pon judiomonaē itorobiya pia pepa Peewatsinchi tatsi’, jopa jande. Jame maisa jande: ‘Ponje najei: Xan pon judiomonaē itorobiya pia pepa Taewatsin, najei’, jande, jei sacerdotemonaē pia pentacaponae tatsi.

<sup>22</sup> Ichitha Pilato jume nota, jeye:

—Xuaunxuae tinadutan bara ducuaena, jei Pilato.

<sup>23</sup> Soldadomonaē poxonaē Jesús canacobena wetatsi xua cobe matabobatsi, bapoxonaē nota Jesús pia paparuwan tatsi. Tsipei cuatro po soldadopinbe daxota nata tsaba xua cuatro poyobe nexa xua soldadomonaē. Matauta dorouto Jesús juma wejontatsi, po dorouto ompareca, xua jopa epa xuxucaeyo. <sup>24</sup> Barapo cuatro poyobe xua soldadomonaē caemonaē natsipaeba, najei:

—Jopa tsana nata epa tsitsicaē tsainchi. Jame metha xanepana xua ibotixi bebeya tsainchi. Bapoxonaē yaputaeinchi xua pon ibotiyo beta xoya, moyā copiya pichina, jei.

Baxua barapomonaē exana peyabara cui wūnaē tsiwanaya jeixae pon Nacom peitorobi jume pepaēbin. Bapon jeye Cristo yabara, Nacom Pejume Diwesitha: “Tapaparuwan nata tsabina yawa ibotixi bebeya tsane penacueranta notsinexa tsane tapaparuwan”, jei pon Nacom peitorobi jume pepaēbin. Bara baxua exana barapo soldadomonaē.

<sup>25</sup> Jesús pena tatsi imoxoyo uncuā ichaxota Jesús ducua. Barichi Jesús pena tatsi iru pamcho tatsi baxota umena. Barichi icha María, powa Cleofas piowa tatsi baxota uncuā. Barichi icha María, powa María Magdalena, powa Magdala tomarapiwayo, baxota uncuā.

<sup>26</sup>Poxonae Jesús taenota pena yawa poxonae taenota pon bichocono Jesús antobe, pon pijimonae jiwana pin bapoxonae Jesús barai pena, jeye:

—Ena, taema bapon nexanto cata uncuareque, jei Jesús.

<sup>27</sup>Bapoxonae Jesús barai bapon, jeye:

—Incane taema barapowa, powayo enaxae, jei Jesús.

Bapoxonae barapowa barapon pena tsicotae ya waba pia botha.

### **Meje yabara poxonae Jesús tupa**

(Mt 27.45-56; Mr 15.33-41; Lc 23.44-49)

<sup>28</sup>Bapoxonae pirapaeyo Jesús yaputane xua bayatha yabara jume cui wetatsi xua bayatha Nacom Pejume Diwesitha paeba. Matautano xua Jesús penajume cui yabara wetsinexatsi xua bayatha Nacom Pejume Diwesitha yabara tsiwuna paebatsi, bapoxonae Jesús jeye:

—Meratsipan, jei.

<sup>29</sup>Baxota juruwato eca xua yawa eca vino mera, po mera atsu. Nexata barapo soldadomonaee esponjatha mene yutsiya capita. Bapoxonae Jesús naewatha tadutatsi yawa tayoichatsi pecoiboto deca.

<sup>30</sup>Jesús tsutsubiya apa barapo vino mera. Bapoxonae jeye:

—Bara daxita neyabara jume cui weta, jei Jesús.

Bapoxonae Jesús nawisi jetataba. Tupa naicha.

### **Meje yabara poxonae soldadomonaepin Jesús epa catsitsinaxubiya cawuichatsi dejonatha**

<sup>31</sup>Cataunxuae barapo matacabi po matacabitha poxonae judiomonaee pewunaeya nacui wunaeta pia pentaquei seicae matacabi tatsi nexa. Barapomonaee jopa ichipaeyo xua came naetotha dubenaena po pebiwi naetotha werapa poxonae jopae

barapo pentaquei seicae matacabi, po matacabi peainya cui matacabixae. Barapo pentaquei seicae matacabi, po matacabi tamropata pitaba xua Pascua wun matacabin. Judiomonaee jopa ichipaeyo xua pejontsiwa pepon naetotha barapo pentaquei seicae matacabitha. Daxota barapo judiomonaee Pilato jume itorobatsi, jeye: “Soldadomonaee itorobare xua petopa janacaenexa tsainchi pomonaee naetotha dubena xua nainya barapo pebiwi tupa peexanaenexatsi. Matauta itorobare xua barapo pebiwi naeton wetsica penotsinexatsi icha xaniwaicha daxita barapo pebiwi bayatha werapa”, jei barapo judiomonaee.

<sup>32</sup>Nexata soldadomonaee bara beya pona. Yawa barapo soldadomonaee copiya topa janaxuba ichun pon Jesús icha muxunene wetarucuiyatsi. Bapoxonae equeicha ichun topa janaxotsi pon Jesús icha muxunene wetarucuiyatsi.

<sup>33</sup>Poxonae soldadomonaee imoxoyo umenarucupa ichaxota Jesús ducua, bapoxonae Jesús tainchi xua bayatha Jesús tupa. Daxota barapo soldadomonaee Jesús jopa topa janaxuichi.

<sup>34</sup>Ichitha caein barapo soldadomonaee jiwana, bapon Jesús epa cawuicha catsitsinaxubiyatsi dejonatha. Bapoxonae caena nainya jana othoparena yawano mera othoparenano. <sup>35</sup>Xan, Juan, baxuan daxita tan pocotsiwa soldadomonaee Jesús cana exanatsi. Daxota pocotsiwa xua baxua paeban bara xainyan, xua daxota painya tana nejume cowuntsinexam.

<sup>36</sup>Barapomonaee baxua exana tsipei bayatha Nacom Pejume Diwesitha Cristo yabara tsiwanaya jeichichi: “Jopa piwa janaxubi tsainchi bapon xua matauta cae piwano”, jei Nacom Pejume Diwesitha. <sup>37</sup>Matautano icha jume diwesitha xua Nacom Pejume

Diwesi, jeye: “Necoichaeinchi pon xua cawũichatsi”, jei Nacom Pejume Diwesitha.

**Meje yabara poxonae Jesús petũpaein ibo mũthũtha yauxatatabotatsi**

(Mt 27.57-61; Mr 15.42-47; Lc 23.50-56)

<sup>38</sup>Bapoxonaerũ pebin, pon pewũn José, pon Arimatea tomarapin, bapon Jesús irũ jume cowũntatsi. Ichitha José baxua jopa nayopichiyo ichamonaetha xua Jesús pejume cowũntsiwatsi, tsipei judiomonaе jume cunuwatsi. Bapon José copiya Pilato muxu tsipaebiya jeichichi, jeye:

—Nejume baru jejande tha jontichi Jesús petũpaein naeto wetsica, jei José.

—Bara moya taema, jei Pilato.

Daxota José bara beya pona. Bapoxonaе José jonta naetha Jesús petũpaein. <sup>39</sup>Irũrũ ichũn napona Jesús pia mũthũtha. Bapon pewũn Nicodemo, pon matha Jesús siwa poinchi merawi. Daxota bapon Nicodemo patopa xua José peyawenaenexatsi. Bapon Nicodemo capatopa treinta po kilobe xua pocotsiwa pebeno, po beno xua tuxuei. Barapo benotha muxunaxuba po petuxuei nain pewũn mirra, xuano xua icha petuxuei nainwano po petuxuei nainwa pewũn áloe. <sup>40</sup>Bapoxonaе José irũ Nicodemo pitabe Jesús petũpaein. Yawa paparuwatha petuxuei beno muxuna capanaboinca mata quiyontabicabe. Baxua exanabe, tsipei judiomonaе pia cui coyene xeina xua poxonaе pon petũpaein canacui wũnae wetatsi poxonaе namũthũqueiba. <sup>41</sup>Imoxoyo ichaxota Jesús po demxuwatha tũpa, baxota peũbi naein umena. Barapo peũbi naein uniyotha ibo itapatororotha mũthũ boca pena mũthũ, po mũthũtha cataunxuae jopa mũthũtha xubichi petũpaein ichũn. <sup>42</sup>Barapo pena mũthũtha Jesús boyatsi, tsipei barapo pena mũthũ imoxoyo boca ichaxota Jesús tũpa. Matauta tsipei

quirei tsanaicha xua poxonaе patopa pentaquei seicaе matababi, po mataqueitha judiomonaе jopa nacuichiyo.

**Meje yabara poxonae Jesús equeicha asũ juina exanatsi petũpae cuiru coyene weya**

(Mt 28.1-10; Mr 16.1-8; Lc 24.1-12)

**20** Bapoxonaerũ domingo matababi jopa, po matababi xua copiya ducua cae semanatha. Bapoxonaе caemũbotha poxonaе cataunxuae quiriquirica, bapoxonaе María Magdalena, powa Magdala tomarapiwayo, mũthũtha patopa ichaxota Jesús boca. Barapowa tane xua mũthũ yapusauncia xua bequein ichamonaе yapu xatatabanota pin ibo panawatha. <sup>2</sup>Bapoxonaе barapowa nainya pata taxainya becuinaerena ichaxota Simón Pedro uncua irũ xan, Juan, baxota uncuan ponxaein Jesús bichocono neantobe. Yawa pana nejei:

—Cou Jesús petũpaein pitatsi, pon Wanacanamataxeinaein. Jopa payaputaеinyo ichaxota equeicha botatsi, pana nejei.

<sup>3</sup>Bapoxonaе Simón Pedro, irũ xan Juan, mũthũ bepaiyanbe. <sup>4</sup>Bara beya pana nacuara cuinayanbe. Ichitha xan, Juan, bichocono bichoinan beyacaincha Pedro. Daxota mũthũtha patopan copiya. <sup>5</sup>Yawa mũthũ beya nabũxũ tsutiya necobian. Paparuwa tan xua iratha boca, po paparuwatha Jesús petũpaein mata quiyontabatsi, ichitha jopa joniyaеinyo. <sup>6</sup>Bapoxonaе Simón Pedro tacoya werena cotacaya patopa. Bapoxonaе mũthũ joniya. Barichi barapon barapo paparuwa tane xua iratha boca. <sup>7</sup>Matautano taneno po paparuwatha Jesús matasipa quiyontababotatsi. Barapo paparuwa nanta quiyontabiya tsanaya boca. <sup>8</sup>Bapoxonaе xan, ponxaein copiya patopan, irũ joniyan mũthũ

iya. Poxonae daxita baxuan tan, bapoxonae nainya jume cowuntan xua Jesús bayatha asu. <sup>9</sup>Bayatha jopa payaputaeyno Nacom Pejume Diwesi, po diwesitha xua xota bapon yabara paebatsi po coyene xua bapon bewa asu tsane petupae coyene cuiru weya. <sup>10</sup>Nexata xan, Juan, iru Simón Pedro caibe panawiyambe bo beya.

**Meje yabara poxonae Jesús  
María tsita naitutatsi, powayo  
Magdala tomarapiwayo**

(Mr 16.9-11)

<sup>11</sup>María Magdalena, Magdala tomarapiwayo, powa pana tsiwun caya, bapowa equeicha caiberena muthutha patopa. Barapowa muthu coiboto juma weya wecoyeyi tsuncuae. Poxonae wecoyeyi tsuncuae nantanuweya nabuxu japasota necobiya muthu iya. <sup>12</sup>Bapoxonae bapowa tane ponbe matatsunpinbe xua ecabe ichaxota bayatha Jesús botatsi petupaein. Barapo matatsunpinbe po paparuwa apiya nama xatatabe pemainya paparuwa. Icha matatsunpin eca Jesús pentasipa coyo deca tatsi. Icha matatsunpin eca Jesús pia pesito coyo deca tatsi. <sup>13</sup>Barapo matatsunpinbe María yainyabatsi, jeichichi:

—María, ¿eta xua metha wecoyam tsauya? jei.

María jume nota, jeye:

—Yaitama cou Tanecanamataxeinaein petupaein pitatsi. Jopa taeinyo xua equeicha xota botatsi petupaein, jei María.

<sup>14</sup>Poxonae bapowa najume wetsiya paebaxoya, xuano xua poxonae napatomeicha necotaxoya, bapoxonae pebin taenotatsi ichitha bapowa jopa yapuraeyo xua apara bapon Jesús. Ichitha bapowa Jesús jopa yaitaetsi. <sup>15</sup>Nexata Jesús María yainyabatsi, jeichichi:

—Ja, ¿eta pocotsiwa came wecoyam tsauyam? ¿Jintam wenawenam? jei.

Barapowa nanta xeina xua mexeya itara pon peubi naein yapu eenawei. Daxota bapowa, jeye:

—Icha xam bayatha pitame petupaein pon Tanecanamataxeinaein, incane netsipaebare xua equeicha exota botame. Tha bapoxonae petupaein equeicha pitichi, jei María.

<sup>16</sup>Nexata Jesús barai, jeye:

—María, jei.

María equeicha napatomeichaxuba. Yawa hebreo jumetha jeye:

—¡Rabuni! jei (po jumetha xua jei: “Pon jiwi Necuidubin”, jei).

<sup>17</sup>Jesús jume nota, jeye:

—Jopa nejayatabinde tsipei cataunxuae jopa ponaeinyo ichaxota Taxa equiya. Jamaisa ponde, paebareno tajimonaetha xua xan paeban xua jan: ‘Taxa beicha ponaein, po Taxa painya Axa iru’, jan. ‘Barapon Nacom, Tanacom iru paxam painya Nacom’, jan xua, jei Jesús.

<sup>18</sup>Barapoxonae María Magdalena, powa Magdala tomarapiwayo, tsiwun caya Jesús pijimonae tatsi beya. Bapowa tsipaeba xua bayatha tane pon Pecanamataxeinaein jiwi. Yawano tsipaebano daxita pocotsiwa Jesús paeba bapowatha.

**Meje yabara poxonae Jesús  
pijimonae tsita naituta**

(Mt 28.16-20; Mr 16.14-18; Lc 24.36-49)

<sup>19</sup>Barapo mataqueitha poxonae cataunxuae awiya domingo, bapoxonae merawi Jesús pijimonae tatsi nacaetuta. Tsipei judiomona cui cunuwatsi daxota bo bichocono boupa daunwei exana. Nexata Jesús barapo tututha patopa. Yawa pijimonae peitabarayo deca tauncua. Pijimonae jacobiya jeye:

—Maisa juntea pajinompare, jei Jesús.

<sup>20</sup> Poxonae Jesús baxua najume weta bapoxonae tsita nacobe wan ituta pijimonae yawa naepa wan ituta. Poxonae Jesús pijimonae taerucupatsi bichocono juntu coyene weiweina petaexaetsi Jesús pon barapomonae Pecanamataxeinaexaetsi. <sup>21</sup> Pirapaeyo equeicha Jesús pijimonae barai, jeye:

—Maisa juntea pajinompare. Icha Taxa neichi xua neitoroba bara paca ichichi paca itorobatsi, jei Jesús.

<sup>22</sup> Nexata bapoxonae Jesús pijimonae matatsun ofutaba, jeye:

—Nacom pia PejumoPe tñaxu tatsi bara paca yantsina, jei. <sup>23</sup> Pomonae xua pacui cayabara juntemainame abe pia peexanae cuiru coyenein tatsi, bara barapomonae Nacom iru cayabara cui juntemainaena abe pia peexanae cuiru coyenein tatsi. Pomonae jopa pacayabara cui juntemainaem abe pia peexanae cuiru coyenein tatsi, bara barapomonae Nacom iru jopa cayabara cui juntemainaeyo abe pia peexanae cuiru coyenein tatsi, jei Jesús.

### **Meje yabara poxonae Tomás tane xua Jesús equeicha asu**

<sup>24</sup> Tomás, bapon Jesús pijimonae tatsi jiwana. Bapon icha wun Gemelo, po wun xua jei: “Nama naexanabe pexuyobe”, jei. Barapon Tomás jopa naecaeyo poxonae Jesús pijimonae tsita naituta.

<sup>25</sup> Pirapae poxonae Jesús napitaba ichamonae pomonae Jesús pijimonae tatsi Tomás tsipaebatsi, jeichichi:

—Paxan Jesús, pon Wanacanamataxeinaein, patan, jeichichi Tomás.

Ichitha Tomás jume nota, jeye:

—Jopa jume cowuntsinyo baxua. Jopa bejume cowuntsinyo icha jopa cobe wan taeinyo xua penain wan, xuano xua icha jopa jayabinyo tacobetha. Matautano jopa bejume cowuntsinyo icha jopa yene wan jayabinyo, jei Tomás.

<sup>26</sup> Poxonae ocho po matabibe yapucaewa xua icha domingotha, bapoxonae equeicha bomuxutha nacaetuta Jesús pijimonae tatsi. Bapoxonaeru Tomás jame naeca. Bequein bomuxu boupa bichocono daunwei exana ichitha Jesús jonarena. Pijimonae peitabarayo deca tauncua. Yawa jacobiya jeye:

—Maisa juntea pajinompare, jei Jesús.

<sup>27</sup> Bapoxonae Jesús jeye Tomás beya:

—Moya necobe wan jayabare xua penain wan. Moya taema xua nantiyabe tacobe wanbe. Yawano neyene wan jayabare. Jopa ainya muxu xeinaeinde. Moya maisa nejume cowunde, jei Jesús.

<sup>28</sup> Nexata Tomás jume nota, jeye:

—¡Jaina, deta Tanecanamataxeinaem! ¡Yawa Nacom, Tanacom! jei Tomás.

<sup>29</sup> Jesús jume nota, jeye:

—Tomás anoxuae nejume cowuntame tanetaemxaem. Ichitha pomonae bequein jopa netaeyo xua daichitha nejume cowunta, barapomonae bichocono juntu coyene weiweina, jei Jesús.

### **Meje yabara xua eta pocotsiwa metha yabara tina barapo diboro**

<sup>30</sup> Jesús ainya coyenein matowa pijimonae peitatha exaneiba pexeinya petsita itutsi coyenewan. Daxita barapo coyenein awiya yabara seica xua jopa yabara tinaeinyo barapo diborothe.

<sup>31</sup> Daxita xua xuan pocotsiwa yabara tinan po diborothe apara xua baxuan painya yabara jume cowuntsinexam tsane xua Jesús apara bara Mesías. Matautano yabara tinan xua painya yabara jume cowuntsinexa xua Jesús apara Nacom Pexanto tatsi. Matautano yabara tinan xua painya nexeiaenexa tsane peajuntuyapuswa, po peajuntuyapuswa xua ataya tsiteca xua poxonae pajume cowuntsiname Jesús.

**Meje yabara poxonae Jesús tsita  
naituta siete poyobe pomona  
p jimonaexae tatsi jiwana**

**21** Bapoxonae pirapae equeicha Jesús pijimonae tsita naituta Tiberias pucua itapatha. Poxonae pijimonae tsita naituta poxonae apara iche: <sup>2</sup>Jesús pijimonae tatsi nacaetuta. Barapo matabuxuyobe meje: Simón Pedro, iru Tomás pon icha wun Gemelo, iru Natanael Caná tomarapin, po tomara eca Galilea nacuaatha, iru xan, Juan, iru taeweicho xua Zebedeo pexantobe tatsi panbe, iru ichunberu. Daxita barapo matabuxuyobe pan panacaetutan Tiberias pucua itapatha.

<sup>3</sup>Simón Pedro pana jei:

—Tha duwei yamonaetsi, jei.

Paxan pajanje:

—Paxan iru paca puna ponaeinchi, pajan.

Bapoxonae jeratha daxita panonobabiyán. Ichitha barapo merawitha jopa duwei pataeinyo, bequein payamonan.

<sup>4</sup>Poxonae baya pentha tsina, Jesús pana tsita naituta pitapathiya, tuwutha payana dubendenan. Ichitha paxan jopa payaitaeinyo xua bapon apara Jesús.

<sup>5</sup>Nexata Jesús pana nebarai:

—Incane, ¿jopa pataem duwei? jei Jesús.

—Jume, duwei aibi, pajan.

<sup>6</sup>Nexata Jesús pana barai, jeye:

—Jera coxa beya bara bepaxoyama peyacamaewa. Bapoxonae pacapirenaename duwei, jei Jesús.

Baxua paexanan. Pirapae jopa pana itacupaeyo xua patajutaxorenaewa peyacamaewa, poxoru pin duwei tunto pacapirenan. <sup>7</sup>Nexata xan, Juan, ponxaein bichocono Jesús neantobe, Simón Pedro baran, janje:

—Apara bapon Jesús, pon Wanacana-mataxeinaein, jan.

Poxonae Simón Pedro nejume taeba, bapoxonae paparuwa xua nama xuenabota nainya yacuinaya nama xatataba. Bapoxonae mene weitata jopiya. <sup>8</sup>Ichitha paxan pomona jopa paraichinyo jeratha pajebounan. Barapo jera be conotha tajū tuwutha berucuaarena saya cien metrobe xeina. Bewayo pajeboundenan tsipei peyacamaewa mentha yawa ducuaona pin duwei tunto. <sup>9</sup>Poxonae jera wepanonobabiyán, bapoxonae isoto patan xua barapo isototha duwein yutaboya yawano xua pan boquiya. <sup>10</sup>Jesús pana barai, jeye:

—Painta xawena duwei xuaunxuae pacaebouname, pana jei.

<sup>11</sup>Simón Pedro jeratha nontabiya. Yawa taetabo itapa bejutabotsina peyamaewa xua bichocono wunca duwei. Ciento cincuenta y tres po duwei matabuxumonaebe. Bequein duwei bichocono wunca daichitha jopa ucupanayiyo peyacamaewa.

<sup>12</sup>Nexata Jesús pana barai, jeye:

—Anthá matha paxaema, pana jei.

Paxan jiwana dapon aibi pon peyainyabinexa, pon pejeinexa: “¿Jintam xamda?” pon jei, tsipei daxita paxan payaitan xua bapon apara pon Patatanecanamataxeinaein.

<sup>13</sup>Bapoxonae Jesús isoto bepoinya pepichinexa pan. Bapoxonae pana necatsiba yawa duwei pana necatsiba.

<sup>14</sup>Baxua exana poxonae nama acoibi po cuiyobe xua Jesús pana netsita naituta xua poxonae equeicha asu pona petupae cuiru coyene weya.

**Meje yabara poxonae Jesús  
baru cueicueije Simón Pedro**

<sup>15</sup>Poxonae pana nain wetan xua Jesús pana apata, bapoxonae Simón Pedro, Jesús yainyaba, jeye:

—Simón, pon Juan pexantom, ¿bichocono neantobem, beyacaincha xua po pebiwe neantobe? jei.

—Aa, Tanecanamataxeinaem, bara caena bayatha neyaputaneme xua tacaantobewatsi bichocono, jei Pedro.

Jesús barai, jei:

—Icha neantobem, inta tamona tana nejume cowuntsiwi yawende, icha pon ovejaxi pe-eenaen ichi xua yawena ovejaxi, jei Jesús.

<sup>16</sup>Equeicha Jesús barai Pedrotha, jeye:

—Simón, pon Juan pexantom, ¿bichocono neantobem? jei.

—Aa, Tanecanamataxeinaem, bara caena bayatha neyaputaneme xua bichocono tacaantobewatsi, jei Pedro.

Jesús jume nota, jeye:

—Icha neantobem, inta tamona tana nejume cowuntsiwi yawende, icha pon ovejamona pe-eenaen ichi xua yawena ovejamona, jei Jesús.

<sup>17</sup>Equeicha acoibi po jume cuiyobe Jesús barai Pedrotha, jeye:

—Simón, pon Juan pexantom, ¿bichocono neantobem? jei.

Pedro juntũ coyene wecoyei yaitama Jesús yainyaba acoibi po jume cuiyobetha. Pedro jeye Jesustha:

—Tanecanamataxeinaem, bayatha caena daxita yaputaibame. Matautano yaputanemeno xua tacaantobewatsi, jei Pedro.

Jesús jume nota, jeye:

—Icha neantobem, inta tamona pomona tana nejume cowuntsiwi yawende, icha pon ovejamona pe-eenaen ichi xua yawena ovejamona. <sup>18</sup>Xaniyan catsipaebatsi poxona matha cataunxuae pewowim jinya paparuwa bara jincoutha namaxatabeibame. Matautano matha bara poneibame xua ichaxota ba ichichipa neponaewa. Ichitha poxona perum tsane, ichamona camaxu

cũbiya yotsina. Ichũn paparuwa cama xatatsina. Ichamona camaxũ caponaena ichaxota jopa ichipaem xua neponaewa, jei Jesús.

<sup>19</sup>Poxona Jesús baxua paeba Pedro wũnae tsiwanaya cui yaputane exainchi xua jivi eta bichi tsane poxona Pedro bexubinchi. Matautano Jesús tsiwanaya cui yaputane exana xua jivi Nacom wũnae jainchinchu xua poxona jivi taena xua po coyene cuirutha xua poxona Pedro tũpaena peexanaexae pocotsiwa Nacom itoroba. Bapoxona Jesús jeye Pedrotha:

—¿Bara ataya yacuiya poponare xua tamona jitom! jei Jesús.

**Meje yabara poxona Jesús  
neyabara paeba ponxaein  
xua Jesús bichono neantobe**

<sup>20</sup>Poxona Pedro napatomeicha necota, bapoxona netaenota xua punauncuan ponxaein Jesús bichocono neantobe. Xan apara bapon pon bayatha matha imoxoyo Jesús caquita xunaecan, poxona matha jan: “Tanecanamataxeinaem, ¿jintam pon cacaenaetapaeba?” ponxaein matha jan. <sup>21</sup>Poxona Pedro netane, bapoxona jeye Jesustha:

—Tanecanamataxeinaem, ¿incane ponje tsanerũ? jei Pedro.

<sup>22</sup>Jesús Pedro jume notatsi, jeye:

—Icha xan tacoutha ichichipan xua bapon Juan bara ataya asũ poponena beya poxona xua equeicha caewa patopeicaein po cae pin nacuathe, baxua jopa apara cata ainya cuiyo. Jamaisa xam bara ataya yacuiya poponde po coyene xua tamona jitom, jei Jesús.

<sup>23</sup>Daxota Jesús pijimona tatsi, barapomona neyabara tsiwũn capana pijimonaetha xua xan jopa tatũpaewa tsane. Ichitha Jesús jopa paebiyo xua jopa tatũpaewa tsane. Saya apara jei: “Icha xan tacoutha ichichipan xua bapon bara

ataya asu poponaena beya poxonaē xua equeicha caewa patopeicaein po cae pin nacuathe, baxua jopa apara cata ainya cuiyo”, jei Jesús.

<sup>24</sup>Xan, Juan, ponxaein xua Jesús yabara paeban. Daxita pocotsiwa xua xuan paeban, apara pexainyeiwan. Matauta barapo diborothe xan apara tinan, pon Juan tsocuaein. Bara paichim

daxita xua xuan tinan payaputanemeru xua baxuan apara bara pexainyeiwan.

<sup>25</sup>Awiya cui yapu seica xua tayabara tinaewa pocotsiwa Jesús daxita exana. Icha daxita diwesin tsana yabara titiniyaetsipan pocotsiwa Jesús exana, metha barapo diboron jopa po cae pin nacue tsijuntutu canaupaetsipaetsi.

Baja Juan.



## Po Coyenein Jesucristo Pia Peitorobiwi Tatsi Pexeinya Coyenein Exana

**Meje yabara xua Lucas yabara tina  
xua Nacom yabara tsiwuna muxu  
duta xua itorobina jiwitha  
pia Pejumope tunaxu tatsi.**

**1** Xam, Teófilom, tajiton cata tinatsi. Bayatha copiya matha cain cata tinatsi icha diwesi. Barapo diwesitha yabara catsipaebatsi daxita po coyenewan xua Jesús exana. Cata tinatsi bayatha daxita xua po mataqueitha Jesús tamropata pitaba po coyene xua peexanaewa, matautano xua pecuidubiwano, xua beya yacui weraweracanaya po mataqueitha poxonae athabe juinya. <sup>2</sup>Poxonae pewunaeya tsane xua Jesús athabe icha, matha pia peitorobiwi itapeta. Jesús cuiduba barapomonae xua Nacom pia Pejumope tunaxu tatsi pia peayapusuwatha tatsi. Jesús cata barapomonae po coyenewan xua Jesús petaexanaenexa tsainchi. <sup>3</sup>Poxonae Jesús equeicha asu, poxonae bequein tupa, bapoxonae Jesús tsita naituta barapomonaetha. Cuarenta po matacabibetha Jesús tsita naituba ducuaenaebiya barapomonae. Petsita naituba ducuaenaebiyaexae pijimonae, barapoxonae pijimonae yaputainchi xua xaniwaicha bara petupaein equeicha asu. Jesús barapo pia peitorobiwi yabara cuiduba po coyene Nacom waba jiwí petanaexanaenexatsi pijimonae pomonae itorobiya peewatsixae.

<sup>4</sup>Poxonae cataunxuae awiya Jesús pia peitorobiwi baru nacaetuta ducuaenaebiya, Jesús barai, jeye:

—Abu jopa paponaeinde Jerusalén tomara weya. Paeware xua Nacom Taxa bayatha yabara paca tsiwuna

muxu duta. Taxa namchi: ‘Tajumope tunaxu itorobicaein’, jei. Baraxua bayatha paca tsipaebatsi. <sup>5</sup>Barapon Juan bautisaba u meratha. Ichitha tsiwiyo bayiyo bexa tsane Nacom pia Pejumope tunaxutha tatsi paca bautisabina. Pacata patsina Nacom pia Pejumope tunaxu tatsi painya paca baru poponaenexa tsane, jei Jesús pijimonaetha.

### Meje yabara poxonae Jesús athabe icha

<sup>6</sup>Poxonae Jesús pia peitorobiwi baru nacaetutatsi Jesús yainyabatsi pia peitorobiwi, jeichichi:

—Jesús, pata Necanamataxeinaem, ¿methaunxuae anoxuae exanaename xua Israel nacuapiwi equeicha xeinaena itorobiya pia pepa peewatsinchi? jeichichi Jesús pijimonae.

<sup>7</sup>Jesús jume nota pijimonae, jeye:

—Paxam jopa paca itacupaeyo xua painya neyaputaewa po dapae poxonae Nacom peexanaewa tsane baxua, matautano xua po mataqueitha poxonae peexanaewa tsane. Saya meisa Taxa xeina peayapusu itorobi coyenewa, po peayapusu itorobi coyenewatha xua peexanaewa baxua.

<sup>8</sup>Poxonae Nacom pia Pejumope tunaxu tatsi pacata patsina painya nepaca baru poponaenexa xua bapoxonae peayapusuwa painya nexenaenexa. Tajume diwesi painta papaebiname Jerusalén tomaratha, Judea nacuathano, Samaria nacuathano, daxita carepaya tajú nacuantha, jei Jesús.

<sup>9</sup>Poxonae Jesús baxua najume weta, Jesús athabe caichatsi Nacom. Jesús pia peitorobiwi taeumeinyatsi. Barapomonae tsaquinaebowata xua Jesús matawacaicha duneicatsi. Equeicha Jesús jopa taetsi. <sup>10</sup>Poxonae awiya came barapomonae necotumeinya itaboco, barapomonae

jemeicha caquita umenarucupatsi pon xua nacueyatabe, ponbe xua pemainya paparuwa penama xatatsinbe. <sup>11</sup>Baraponbe Jesús pijimonae tatsi baraiichi, jeye:

—Ja, pomonae Galilea nacuapiwi pam, ¿eta xua metha came awiya paitaboco necotumeinyame? Bapon Jesús, pon xuaunxuae athabe icha painya xamtha, bexa tsane equeicha patopaetsica, barapocotsi jata coyeneya ichi tsane ichaunxuae aunxuae icha ichi, poxonae athabe icha.

**Meje yabara poxonae Jesús pia peitorobi jiwi tatsi Matías itapetatsi Judas pecoutha petanacuichiwa tsainchi**

<sup>12</sup>Barapoxonae Jesús pia peitorobi jiwi tatsi demxuwa weiyiya po demxuwa pewun Olivo demxuwa xua Jerusalén tomara be-iyiya. Poxoru Jerusalén tomara imoxoyo daxota barapomonae itacupatsi xua peponaewa Jerusalén tomara beya demxuwa weya bequein bara judiomonae pia pentaquei seicae matabi tatsi saya poxoru Moisés pia peitorobi coyenewatha baxua peyabara copatsixae. <sup>13</sup>Poxonae Jesús pia peitorobiwi tatsi pareca Jerusalén tomaratha, athabe jujuinya po tututha athawetsica jinompa. Baraxota jinompa Jesús pia peitorobiwi tatsi pewun Pedro, iru Juan, iru Santiago, iru Andrés, iru Felipe, iru Tomás, iru Bartolomé, iru Mateo. Iru popona ichun Santiago pon Alfeo pexanto tatsi. Iru popona ichun pon pewun Simón. Barapon Simón celotemonae jiwana pin. Barapo celotemonae pomonae ba ichichipa xua pexeinaewa barompaya pia pecanamataxeinaeinchi. Iru popona ichun pon pewun Judas pon Santiago pexanto tatsi. <sup>14</sup>Daxita barapomonae iru Jesús peyapin jiwi tatsi baru nacaetuteibatsi, xua pebaru

tsipaeibinexatsi Nacomtha. Iru Jesús pena tatsi, bapowa María, iru ichowaxi yabuxi baru nacaetuteibatsi xua pebaru tsipaeibinexatsi Nacomtha.

<sup>15</sup>Nexata caentacabi Pedro nontapona ichaxota ena pomonae xua Jesús pejume cowuntsiwi. Barapo bicheito be ciento veinte poyobe. Barapomonae Pedro barai, jeye: <sup>16</sup>“Tamonae pam, pomonae iru painya nejume cowuntsiwixae Jesús. Bewa nayabara jume cui wetsina po coyene bayatha Nacom namchi xua pejume diwesitha yabara tsiwanaya paeba. Bayatha caena David cueicuejei exanatsi Nacom pia Pejumope tunaxu tatsi xua Judas cui coyene caunutatsi xua pinae Jesús waetabinchi pomonae Judas matabapona. <sup>17</sup>Bara Judas yatsicaya pata jiton petain pana nabaru nacuitan barapo penacuichiwa.

<sup>18</sup>Poxonae Judas Jesús caenaetatsi, sacerdotemonae pia pentacaponae tatsi Judas catatsi paratixi. Pirapae sacerdotemonae pia pentacaponae tatsi bapo paratixitha Judas petupaein tsicomotatsi ira. Judas iratha jopeica poxonae tupa yawa coto tsitecatsi, unu pichatecatsino abe peexanaexae. <sup>19</sup>Nexata pomonae Jerusalén tomaratha pejinompaewi, barapomonae jume tane pocotsiwa Judas exana. Daxota barapomonae barapo ira wun duta po wun jei: ‘Acéldama ira’, jei. Barapo jume, barapomonae pijumetha xua jei: ‘Pejana ira’, jei”, jei Pedro. <sup>20</sup>Equeicha Pedro barai barapomonae pomonae pejume cowuntsiwi, jeye: “Salmos penaxunae wei diwesitha Judas petupaexae yabara paeba, jeye:

‘Pia bo tatsi tausaya bo tauncuaeinchi.

Jopa ichun ecae tsane baxota’, jei.

Matautano namchino:

‘Equeicha pecoutha tanacuitinchi ichun’,

jei Salmos penaxunae wei diwesitha, xua Judas yabara”, jei Pedro.

<sup>21</sup>Nexata Pedro equeicha namchi, jeye: “Xote waxantha jinompa pebiwi pomonae matha cain pana nepuna jinomparu poxonae Jesús pon Wanacanamataxeinaein pana nebaru jinompa daxita pan. <sup>22</sup>Barapo pebiwi taneno xua Juan Jesús pebautisabiwatsi. Yawa barapo pebiwi taneno xua poxonae Jesús cataunxuae exana ducuaenaebiya pocotsiwa xua pewnaewan. Matautano barapo pebiwi taneno poxonae Jesús yantacabi jopa po mataqueitha poxonae athabe juinya. Bewa wabichipatsi caein barapo pebiwi jiwana, pon pecui yaputaein po coyene Jesús equeicha asu popona. Bapon iru pana puna cueicueijei tsane xua po coyene Jesús equeicha asu pepoponaewa”, jei Pedro barapo pejume cowuntsi jiwitha.

<sup>23</sup>Barapomonae pomonae pejume cowuntsi jiwi najiwana itapeta ayunbe. Ichun pewun José Barsabás, pon icha wun Justo. Iru ichun pewun Matías. <sup>24</sup>Nexata barapomonae Jesús athabeicha tsipaebatsi, jeye: “Nacom, pon jiwi Necanamataxeinaem. Daxita jiwi nejuntu coyene yaputaein. ¿Incane methara ponbe jiwana pon xua ichichipamera, pon xua cuita itapeta ichichipame? <sup>25</sup>Barapon iru penaexanaenexa jinya neitorobi jiton pon xuya Judas pecoutha petanacuichinexatsi. Judas tupa nacabeta abe peexanaexae. Judas pona ichaxota po nacuatha jopa nacoicha duntsiyo isoto”, jei barapomonae.

<sup>26</sup>Nexata barapomonae wun jiyatabaxuba ibotiyobe. Nexata saya Matías wun naitutaraba. Daxota bapon Matías itapeta cuita wabatsi. Matías once pomonaeyobetha napon pomonae Jesús pia peitorobi jiwi tatsi.

**Meje yabara poxonae Nacom  
pia Pejumope tunaxu tatsi  
patopeica pomonaetha pomonae  
Nacom pejume cowuntsiwi**

**2** Pentecostés matakabi tsuxubi, po mataqueitha xua poxonae jiwi tsinacaetuteiba penabanaenexa pexaewa peyabara nanta xeinaexae xua pexaewa naweta. Barapo matakabitha daxita pomonae Jesús pejume cowuntsiwi bara cae botha nacaetuta. <sup>2</sup>Barapo mataqueitha barapomonae busi tane, pebusi po busi xua be joibo busi po busi xua busi nainya naetaba itaboco wetsica. Barapo busi daxita bo tutu canaupya ichaxota barapomonae nacaetuta. <sup>3</sup>Barapoxonae barapomonae tsita naitapeinya xeinatsi xua be peebato jumope coichan. Barapo peebato jumope coichan daxita carepaya barompaya barapomonae jajayababa tsiniya taenatsi. <sup>4</sup>Barapoxonae daxita carepaya barapomonae juntu coyene yucatsi Nacom pia Pejumope tunaxu tatsi pia peayapusu itorobi coyenewa tatsi. Matautano daxita barapomonae barompaya tsanaya icha jumeintha cueicueijei xua be po jumetha Nacom pia Pejumope tunaxu tatsi cueicueijei cana exana barapomonae po jumein xua jopa yaputaeyo.

<sup>5</sup>Barapo matakabintha, iruru pinmonae judiomonae pata Jerusalén tomaratha, po judiomonae i dapocotsi nacuan werena peponaewi xua penataenexa Pentecostés wun matakabi poxonae tsinacaetuta pexaewa penabanaenexa. Barapomonae bichocono pejume cowuntsiwi Nacom. <sup>6</sup>Barapo ayei bicheitomonae pomonae judiomonae barapomonae busi tane xua po busi, busi duneica ichaxota nacaetuta pomonae barapon Jesús pia pejume cowuntsiwichi tatsi.

Barapo judiomonae jume tane xua daxita barapomonae barompaya pia jumexitha cueicueijeji xua judiomonae pia pejume tatsi. Bapoxonae barapomonae nanacaetuta Jesús pejume cowantsiwitha. Barapomonae pomonae judiomonae najuntu coyene cabenaeca. Yawa jopa yaputaeyo xua peyabara nanta xeinaewa baraxua tsipei daxita barapomonae pomonae Jesús pejume cowantsiwichi barompaya judiomonae pijumexitha tatsi cueicueijeji. <sup>7</sup>Daxita barapomonae pomonae judiomonae najuntu coyene cabenaeca. Nantiya caemonae natsipaeba, jeye:

—¡Jina, bara barapomonae Galilea nacuapiwiba, pomonae bequein barapomonae jopa icha jumeintha pecueicueijeji jiwi xua wajumeintha pecueicueijejiwa! <sup>8</sup>¿Eta pocotsiwa barapomonae metha daxita barompaya tsanaya icha jumeintha cueicueijeji xua wajumeintha? <sup>9</sup>Xote jinompa Partia nacuapiwi iru Media nacuapiwiba, iru Elam nacuapiwiba. Barichi xote jinompe Mesopotamia nacuapiwi, iru Judea nacuapiwiba, iru Capadocia nacuapiwiba, iru Ponto nacuapiwiba, iru Asia nacuapiwiba. <sup>10</sup>Matautano barichi xote jinompa Frigia nacuapiwi, iru Panfilia nacuapiwiba, iru Egipto nacuapiwiba, iru Libia nacuapiwiba pomonae jinompa imoxoyo Cirene nacua. Matautano ichamonae pata pomonae Roma tomarapiwi. <sup>11</sup>Barapo Roma tomarapiwi icha judiomonae pepa judiomonae xua yacui naexana. Icha judiomonae jopa pepa judiomonaeyo. Saya judiomonae penaexanaewi, tsipei barapomonae jume cowanta Nacom icha be judiomonae ichi pomonae pepa judiomonae. Iru pata ichamonae Creta nacuapiwi, iru Arabia nacuapiwiba. Ichitha daxita waxainchi jume tainchi xua Nacom pewunaewan exana

peayapuswatha, poxoru barapo Jesús pijimonae tatsi wajumeintha paeba, jei barapo judiomonae.

<sup>12</sup>Daxita barapo judiomonae najuntu coyene cabenaeca. Daxota barapomonae jopa xaniwaicha yabara nanta xeinaeyo baxua. Barapomonae caemonae nayainyabiya, jeye:

—¿Eta pocotsiwa metha baxua jane? jei. <sup>13</sup>Ichamonae saya jume cui capana. Barapomonae namchi, jeye:

—¡Apara barapomonae Jesús pijimonae tatsi cupatsi! jei.

### **Meje yabara poxonae xua Pedro tsipaeba barapomonae**

<sup>14</sup>Jesús pia peitorobiwi tatsi poyobe xua once poyobe, barapoyobe pia xantha tatsi Pedro nontapona. Matautano nontapona pepa bicheito itabaratha tatsi. Pedro jume daunweya barai barapo bicheitotha, jeye: “Paxam, pomonae Judea nacuapiwi pamxaem iru daxita pomonae Jerusalén tomarapiwi pamxaem, incane pana nejume taema, yabara paca tsipaebinchi xuaunxuae pajume taneme. <sup>15</sup>Barapo pebiwe xua Jesús pijimonae tatsi apara jopa cupaetsi xuaunxuae pacui yabara nanta xeiname. Apara awiya xometo caewa ecareca. Cataunxuae apara baya daxota jopa cupaetsi. <sup>16</sup>Baraxua xuaunxuae anoxuae pajume taneme, caena bayatha Nacom pia peitorobi jume pepaebin yabara tsiwuna muxu duta pon pewun Joel. Joel baraxua Nacom Pejume Diwesitha tina xua saya tatina, xua pinae Nacom paeba. <sup>17</sup>Jeyei Nacom:

‘Poxonae barapo cae pin nacuathe po maticabi  
opi weraweracaena, bapoxonae barapo maticabitha daxita carepaya jiwitha najumope tunaxu cayataxubiya catsibin. Painya nexanto jiwi iru painya nexantixi neyabara cueicueijeji tsane pocotsiwa xua yaputane exanan.

Pewowi yatsicaya tsita naituteibinchi  
 be poxonae camaiteibina.  
 Pitiri jiwi camaiteibina poxonae amachi-  
 nae tsane.  
<sup>18</sup> Pomonae xua amanaya neyabara  
 diwesi  
 canantsipaebina, barapomonaethano  
 najumotho catsibin barapo matababitha,  
 yabuxithano, pebiwithano. Barapoxonae  
 inta cueicueijejei tsane.  
<sup>19</sup> Peitabocotha paca tsita itutsinchi po  
 coyenein  
 bichocono pewunaewan xua jiwi  
 bichocono  
 najuntũ coyene cabenaeca exanatsi.  
 Iratha tsicano paca tsita itutsinchi po  
 coyenein  
 xua jopa juniya be pejana tsurucuae  
 tsane, xuano  
 xua jopa juniya be isoto tsurucuae tsane,  
 xuano  
 xua jopa juniya be nobo tsuxu tsurucuae  
 tsane.  
<sup>20</sup> Poxonae patopaetsica pon jiwi  
 Pecanamataxeinaein  
 copiya baraxue panecotsiname xua  
 xometo quiri  
 jei tsane, jopa pentha tsurucuae tsane.  
 Yawa panecotsiname xua jomocoichato  
 be  
 janowa ducuaena.  
 Barapo matababi wuna tsane poxonae  
 pon jiwi  
 Pecanamataxeinaein patopaetsica.  
 Barapo matababi Nacom pepa  
 peitupanae  
 matababi exanaena.  
<sup>21</sup> Pomonae picoya penata wucaewa Na-  
 comtha xua  
 Nacom peyawenaenexa tsainchi,  
 barapomonae  
 capanenebiya tsainchi Nacom', jei Joel  
 xua saya Nacom tapaebatsi", jei Pedro.  
<sup>22</sup> Equeicha Pedro barai barapomonae  
 jeye: "Pomonae Israel nacuapiwi  
 pamxaem, incane pana nejume

taema, xua paca tsipaebinchi. Jesús,  
 pon Nazaret tomarapinxae bapon  
 Nacom itoroba painya xantha. Bapon  
 Jesús pewunaewan exana pexeinya  
 petsita itutsi coyenewanno Nacom  
 pia peyapusuwatha tatsi, painya  
 neyaputaenexa tsane xua Nacom  
 yawena xua Jesús peyawenaewatsi.  
 Paxam bayatha payaputaneme xua  
 bapon tsita naituba ducuaenebiya.  
<sup>23</sup> Bayatha Nacom paca cui wuna  
 tsiwanaya tane xua po coyeneya  
 pata exanaename pexantotha tatsi.  
 Nacom bara paca cui copata xua  
 abe paexaname. Jesús pawaetabame  
 painya caenaetsinexa tsane bapon  
 peacuipe jiwitha. Barapomonae  
 Jesús cobe matabobatsi naetotha  
 yawa bexotsi. <sup>24</sup> Ichitha equeicha  
 Nacom asu exana pexanto petupae  
 cuiru nacua weya. Nacom Pexanto  
 capanepa pia peantuyapusuwatha  
 barapo petupae cuiru nacua weya,  
 tsipei barapo petupae cuiru nacua jopa  
 xeinaeyo peyapusuwa xua Jesús awiya  
 pebotsiwatsi barapo petupae cuiru  
 nacuatha. <sup>25</sup> Iru David, Israel nacuapiwi  
 itorobiya pia pepa peewatsinchi, caena  
 bayatha tina Nacom Pejume Diwesitha.  
 David tina Jesús jume yabara tatsi.  
 David namchi, jeye:  
 'Yaputan xua Tanecanamataxeinaein  
 nebaru  
 poponeiba daxita matababi.  
 Bapon neyaweneiba.  
 Bapon nebaru poponeiba daxota  
 jopa junuwin tsane.  
<sup>26</sup> Daxota bichocono juntũ coyene  
 weiweinan.  
 Matautano daxota Nacom Pejume  
 Diwesi  
 juntũ coyene weiweinaya  
 cueicueijan ichamonaetha.  
 Bara bequein tupaen, muthutha  
 bocuaeinno,

ichitha jume cowantān xua Nacom eque-  
icha asu

neexanaena pia peantuyapusuwatha.

<sup>27</sup>Xam Nacom jopa punaxubim tsane  
tajumope

petupae cuiru cuariyatha.

Poxoru xan jinya nexanton tajuntu cui  
xanepanaen daxota jopa benecopatsim  
xua tatupaein tuxamnuncuaein,  
yawa xua tsabanuncuaein.

<sup>28</sup>Neita cui tsita itubame beta  
xaniwaicha

tapoponaenexa tsane poxonaē equeicha  
asu

neexanaename petupae cuiru nacua  
weya.

Nejuntu coyene weiweina exaname  
tsipei

neyanta poponeibame', jei David

xua saya Jesús tapaebatsi", jei Pedro.

<sup>29</sup>Equeicha Pedro barai bara-  
pomonaē, jeye: "Tamonae, daxota  
beta paca tsipaebatsi xua pinae David  
wamo susato nacuapin bayatha pinae  
tupa. Piamonaē muthutha xotsi.  
Awiya waxantha boca barapo muthu  
ichaxota petupaein muthutha xotsi.

<sup>30</sup>Apara, barapon David, pinae Nacom  
peitorobi jume pepaebim. Bayatha  
pinae David nacana wūnaē tsiwanaya  
muxu tsidutatsi Nacom, xua pinae  
David pijimonaē tatsi jiwana pon jiji  
Pecanamataxeinaein tatsi naexanaena.  
Barapon pon Pecanamataxeinaein jiji  
Israel nacuapiwi canamataxeinaeinchi  
icha cain bayatha David ichi  
poxonaē canamataxeina barapo Israel  
nacuamonaē. <sup>31</sup>Bayatha pinae David

yabara tsiwūnaē muxu duta xua bexa  
tsane Nacom Mesías equeicha asu  
exanaeinchi. Nacom Pexanto tatsi pon  
David yabara jume jei, apara bapon  
Mesías. David namchi xua Mesías jeyei  
xua saya pinae David tapaeba: 'Xam  
Nacom jopa punaxubim tsane tajumope  
petupae cuiru cuariyatha. Poxoru xan

jinya nexanton tajuntu cui xanepanaein,  
daxota jopa benecopatsim xua  
tatupaein tuxamnuncuaein yawa xua  
tsabanuncuaein', jei David xua Mesías  
jeyei. <sup>32</sup>Pon Mesías, pon xuaunxuae  
yabara paca tsipaebatsi apara bapon  
Jesús pon Nacom equeicha asu exana.  
Baraxua paxan yatsicaewa pata cui  
taewi. <sup>33</sup>Jesús asiya icha peecaenexa  
Nacom pecoxatha tatsi. Jesús pon jiji  
pepa Pecanamataxeinaein exanatsi  
Nacom. Matautano Jesús nacana  
jumope catatsi, Nacom. Barichi  
baxua xuaunxuae pataneme yawa  
pana nejume tanemeno xua daxita  
carepaya barompaya icha jumexitha  
pacueicueijan, baraxua Nacom pia  
Pejumope tunaxu tatsi pana cata.

<sup>34</sup>Poxoru David saya tupa, jopa athabe  
ichiyo, icha be jopa Jesús ichiyo  
poxonaē athabe icha Jesús. Ichitha  
saya baxua David tapaeba Nacom, xua  
Nacom Mesías tsipaebatsi, jeye:

'Nacom, Tanecanamataxeinaein  
baraichi.

Tacoxatha weya ecare.

<sup>35</sup>Abu beya poxonaē matapainya  
necaaitafaetabi jiji

pia Pecanamataxeinaein tatsi  
caexanaeinchi.

Barapomonaē beexanaetsipa pocotsiwa  
xua xam

nepaebiwam', jeye pinae Nacom xua  
Mesías

tsipaebatsi, jei David Nacom nexa", jei  
Pedro.

<sup>36</sup>Equeicha Pedro namchi  
barapomonaetha: "Paxam, pomonaē  
Israel nacuapiwi pamxaem. Anoxuae  
payaputaneme pon xua naetotha  
tuparucua paexaname, Nacom exana  
xua bapon jiji pia Pecanamataxeinaein  
tatsi naexana. Yawano Nacom naca  
itata caewata xua pon Mesías jei, pon  
Nacom itorobica petsitupaenexa jiji,  
apara bapon Jesús", jei Pedro.

<sup>37</sup>Poxonae daxita carepaya barapomonae baxua jume taerucupa bichocono juntu coyene wecoyei tsurucupae. Barapomonae Pedro baraichi iru Jesús pia peitorobi jivi tatsi baraichi, jeye:

—Patamonae, zeta bewa pabichin tsane metha? jei.

<sup>38</sup>Nexata Pedro barapomonae barai, jeye:

—Icha juntu coyene paxeinare Nacomtha painya neauraxae xua abe paexaname. Matautano daxita carepaya pam ichamonae paca bautisabina Jesucristo pewantha xua Nacom pia paca necayabara junteinaenexa xua abe painya neexanae cuiru coyenein. Barapoxonae Nacom paca nacana jumope catsibina. <sup>39</sup>Barapo peyabara tsiwunae muxu dutsiwa apara paxam nexa, iru muxuna daxita painya pexui nexano. Matautano pomonae taju beya jinompa iru barapomonae nexa. Barichi Nacom pon Wanacanamataxeinaeinxae, pomonae waba peantobexae barapomonae iru nexa, jei Pedro.

<sup>40</sup>Barapo jumeintha yawa icha jumeintha Pedro tsipaeba barapomonae. Matautano Pedro bichocono muxuweta poxonae jeye:

—Po coyenein xua daxita abe pe-xanae cuiru coyenein paexaneibame, barapo coyenein pana nacui barapende, po coyenein xua daxita carepaya jivi ex-aneiba, jei Pedro.

<sup>41</sup>Po matabitha poxonae Pedro paeba baxua barapo matabitha pomonae jume cowanta xua Pedro paeba barapomonae bautisabatsi. Barapo matabitha tres mil po bicheito jiwimonaebe naexana xua pomonae copiya pomonae Nacom pejume cowuntsiwi xaetsi barapomonae mataropeicha pinmonae naexantsi.

<sup>42</sup>Barapomonae nacuiduba nawita,

xua Jesucristo pia peitorobi jivi tatsi paeba. Barapomonae nacana cui nanta jupaya jinompa. Nacomtha nabaru tsipaebibano. Nabaru nacaetuteibano xua penabaru epa janaqueibinexa pan xua penabaru xaibinexa. Barapomonae baxua exana dubenanaebiya xua Jesucristo peyabara nanta xeina dubenanaebiyaenexatsi po coyene xua Jesucristo bayatha icha ichi xua poxonae pan epa janaca.

**Meje yabara po coyeneya xua  
jinompa pomonae copiya  
Jesús pejume cowuntsiwi**

<sup>43</sup>Jesucristo pia peitorobiwi tatsi, barapomonae pexeinya petsita itutsi coyenewan exana nawita Nacom pia peayapusuwatha tatsi. Daxota pomonae jopa Jesucristo pejume cowuntsiwichi, daxita barapomonae junuwa, Nacom cunuwatsi poxonae cui tane baxuan.

<sup>44</sup>Daxita barapomonae, pomonae Jesús pejume cowuntsixaetsi, barapomonae xaniwaicha caemonae peburuya nabaru jinompa. Matautano barapomonae caemonae nantiya nacatsiba dubenanaebiya pichiwiwi pocotsiwan xua xeina. <sup>45</sup>Matautano barapomonae daxitan pocotsiwan xua xeina caenaeta dubenanaebiya. Bapoxonae barapo paratixi nata tsaba dubenanaebiya xua jopa pexeinaexae ichamonae xua icha be pocotsi coyeneya pocotsiwan canantawenona ichamonae. <sup>46</sup>Daxita carepaya barapomonae nabaru nacaetuta dubenanaebiya Nacom pin pia botha. Matautano pia boxitha nabaru nacaetuta dubenanaebiya pan nabaru epa nantaruba janaquiya exana dubenanaebiya. Junteina nabaru juntu coyene weiweinaeya xaerubenanaebiya.

<sup>47</sup>Daxita barapomonae carepaya Nacom wunae jainta dubenanaebiya. Matautano barapomonae baru cui itura jinatsi ichamonae beta peexanaexae.

Daxita matakabi tsaibi pomonae Nacom pejume cowuntsiwixaetsi barapomonae Nacom cana exana xua mataropeicha pinmonae tsoponae tsaibi.

**Meje yabara poxonae pon  
pejayujayujei jiton  
equeicha cui jume exanatsi**

**3** Caentaqueitha quiripitha poxonae tres po horabe tsuxubi po horatha poxonae jiwi ba poneiba Nacom pin pia botha xua petsipaebibinexa Nacomtha bapoxonae Pedro iru Juan Nacom pin pia botha jonyabe. <sup>2</sup>Barapo bo Nacom pin pia bo tatsi icha coiboto jiwi wun duta, jeye: “Pexeinya coiboto”, jei. Barapo coibototha daxita matakabi tsaibi pebin cuareteibatsi pon pejayujayujei jiton xua yawa naexana poxonae pexuyo. Daxota bapon baxota cuareteibatsi xua pewuquequeibinexa pomonaetha pomonae joneibiya barapo coiboto iya. <sup>3</sup>Pon pejayujayujei jiton wuca paratixi poxonae Pedro iru Juan tainchibe xua muxu pejoniyaebe barapo coiboto iya. <sup>4</sup>Nexata Pedro iru Juan tanebe bapon. Pedro barai bapontha, jeye:

—Incane pana taemabe, jei Pedro.

<sup>5</sup>Nexata necota bapon. Nanta xeinataba xua catinchi paratixi. <sup>6</sup>Ichitha Pedro barai bapontha, jeye:

—Canta jopa xeinaeinyo paratixi. Matautano jopa xeinaeinyo pocotsiwa oro nain matawun. Meisa po coyenewa xua taxainaewa baxua cacatinchi. Jesucristo, Nazaret tomarapin wuntha cabaraichi, asiya uncuatabare yawa pondeno, jei Pedro.

<sup>7</sup>Nexata Pedro pocotsiwa pexoxa weya cobe pita. Yawa asiya cuaranotano. Bapoxonae nainya beta taxuyawere daunweya ducuanaya. Pesitano wunae tsanayano. <sup>8</sup>Nexata bapon pon pejayujayujei jiton jirawuna. Asiya uncuatabano. Ponano. Bapoxonae

Pedro iru Juan puna jonyatsibe bapon, Nacom pin pia botha. Jirajirawiya ponano. Yawano Nacom wunae jaintatsi. <sup>9</sup>Nexata daxita pomonae xua Nacom pin pia bo tututha peenaexae, tainchi pon pejayujayujei jitonxae xua pona, yawano xua Nacom wunae jaintatsino. <sup>10</sup>Barapomonae daxita carepaya najuntu coyene cabenaecaeya tane, tsipei barapomonae bayatha cui tane xua bapon amanaya jiwi wuquequeiba paratixi pecoibototha, po coiboto pewun “Pexeinya coiboto”, jei.

**Meje yabara poxonae Pedro  
diwesi paeba Nacom pin pia  
botha po tututha pewun  
Salomón bo wun tututha**

<sup>11</sup>Poxonae pejayujayujei jiton awiya maxu waetabatsibe Pedro Juanno bapoxonae iruru daxita jiwi najuntu coyene cabenaecaeya cuinaenouta Nacom pin pia botha xua tututha po tututha Salomón bo wun tututha ichaxota Pedro baru jinompa. <sup>12</sup>Poxonae Pedro barapomonae caetaebiya, Pedro barai: “Ja, pomonae Israel nacuamonaepiwi pamxaem, zeta xua metha daxita paxam pana najuntu coyene cabenaecaeya taneme baxua? zPana neyabara nanta xeinamebe xua pata taayapusuwatha paaxaibi exananbe pejayujayujei jiton? zMatautano pana neyabara nanta xeinamebe poxoru Nacom pajume cowuntanbe daxota pon pejayujayujei jiton axaibi? <sup>13</sup>Ajibi, apara wamo susato jiwi pia Nacom tatsi axaibi exana bapon. Barapo Nacom Jacob pia Nacom tatsi, Abraham bapon pia Nacomno, Isaac bapon pia Nacomno. Apara bapon baxua taexana Nacom. Bapon Nacom Pexanto bichocono ainya cui cana exana poxonae pexanto asu exana petupae cuiru coyene weya. Bapon apara Jesús pon pacaenaetame



pomonaetha pomonae pentacaponae, pon bepa bequein isanaxubei Pilato poxonae paxam jopa pacopatsim xua bapon peisanaxubiwa. <sup>14</sup>Bapon pon bichocono pejuntũ coyene xanepanaein xua jopa xeinaeyo penatsicuentisiwa xua abe peexanaexae tsipei saya exaneiba pocotsiwa Nacom ichichipa. Ichitha jopa paichipaem xua Pilato peisanaxubiwa tsane bapon. Saya meisa pawucame xua Pilato peisanaxubiwa ichan pon jiwi pejutebeibin pon Barrabás. <sup>15</sup>Poxonae baxua paexaname barapara Jesús pabexubame. Bapon Jesús pon jiwi cana exanatsi xua jiwi ajuntũyapusuya pejinompaewa. Bapon Jesús Nacom equeicha asũ exana petũpae cuiru coyene weya. Bara baxua yatsicaya pacui tan daxita. <sup>16</sup>Po jume wun peayapusũ wun, bapo wun Jesús pia wun. Daxota pejayujayujei jiton barapo jume wuntha axaibi exanatsi. Barapon pataneme xua axaibi, tsipei bapon jume nanta pitabiya jume cowũnta barapo peayapusũ jume wun. Daxota barapon painya itabaratha axaibi tsuxubi poxoru jume cowũnta Jesús”, jei Pedro.

<sup>17</sup>Equeicha Pedro jeye: “Tamonae yaputan xua jopa payabara yaputaem xua paexaname poxonae Jesús pabexubame. Barichi painya pentacaponae wino jopa yabara yaputaeyo xua baxua exana. <sup>18</sup>Nacom peitorobi jume pepaebiwi bayatha Mesías yabara tsiwana paebatsi. Barapomonaepaeba, jeye: ‘Bexa tsane Mesías bexubinchi’, jei. Nacom bara nacui yabara jume weta baxua xua bayatha Nacom peitorobi jume pepaebiwi paeba. <sup>19</sup>Daxota icha juntu coyene paxeinare Nacomtha painya neauraxae xua abe paexaname. Yawa pajume cowunde painya nepaca cayabara junte mainaenexa abe painya neexanae cuiru coyenein. Yawa Nacom pawucare xua paca juntu coyene

xanepana exanaena. Bapoxonae Nacom paca juntu coyene ayapusuya exanaena. <sup>20</sup>Tsipei Nacom equeicha athawetsica Jesús itorobicaeinchi pon bayatha Nacom itapeta pon Mesías xua painya nepaca capanenebiyaenexa tsane abe painya neexanae cuiru coyenein weya. <sup>21</sup>Cataunxuae abũ Jesucristo equiya Nacom pia nacuatheicha tatsi. Equeicha bapon patopaetsica poxonae Nacom wunae exanaena daxitan, be pocotsi coyeneya bayatha Nacom peitorobi jume pepaebiwi paeba. <sup>22</sup>Barichi Moisés pata amo susato jiton namchi: ‘Painyamonae jiwana Nacom cana exanaena, pon Nacom pia peitorobi jume pepaebin tsecae tsane icha neichi. Pajume cowũntsiya exande daxita pocotsiwa xua bapon paca tsipaebina. <sup>23</sup>Daxita pomonae jopa jume cowũntsiyo pocotsiwa bapon paeba, barapomonaepaeba, weraweraca cana exanaena xua jopa penaexanaenexa Nacom pijimonae tatsi’, jeyei Moisés”, jei Pedro.

<sup>24</sup>Equeicha Pedro jeye: “Daxita Nacom peitorobi jume pepaebiwi irũ Samuel pon xua yatsicaya tabũ ducua, baraxua carepaya bapo diwesin yabara paeba barapo matacabin. <sup>25</sup>Barapo Nacom pia peyabara tsiwunae muxu dutsiwa po peyabara tsiwunae muxu dutsiwa Nacom tsiwunae muxu duta Nacom pia peitorobi jume pepaebiwiwitha, apara bara irũ paxam nexa. Baxua Nacom pena peyabara tsiwunae muxu dutsiwa Abraham yabara tsiwunae muxu dutatsi pon wamo susatopin xua xanepanaya painya nejinompaenexa. Nacom Abraham baraichi, jeye: ‘Caen jinya nemomoxi susato jiwi jiwana pin pepatopaexae tsane daxita i dapocotsi nacuanpiwi yawenaein’, jei Nacom Abrahamtha. <sup>26</sup>Poxonae Nacom Pexanto asũ exana petũpae cuiru coyene weya, bapoxonae

copiya pacata itoroba painya xantha pia painya nepaca cayawenaenexa xua daxita paxam painya nenacui barapentsinexa abe painya neexanae cuiru coyenein”, jei Pedro.

**Meje yabara poxonae Pedro iru Juan cueicueijeji tsuncuaebe pomonaе tomarapiwi pia pentacaponae tati peitabaratha tati**

**4** Poxonaе cataunxuae Pedro iru Juan cueicueijeibe barapomonaetha, bapoxonaе sacerdotemonaе pia pentacaponae tati pata. Iru patopa pon soldadomonaе pia pentacaponaein tati pon Nacom pin pia botha tati pe-enaеin. Yawa saduceomonaeno iru pata baxota. <sup>2</sup>Barapomonaе bichocono anaepana, yaitama Pedro Juanno paebabe xua po coyene Jesús petupaein equeicha asu, xua pinae barichi jiwino poxonaе tupa equeicha asu. <sup>3</sup>Bara nexata Pedro Juanno waetabatsibe barapomonaе. Jiwi pecubi botha capoinchibe. Barapo botha etatsibe tsipei quirei tsanaya xua beya poxonaе yaitapenacaena. <sup>4</sup>Pinmonae jume tane po diwesi Juan iru Pedro paebabe, yawa jume cowuntano barapo diwesi. Barapomonaе iruru pomonaе copiya jume cowunta caena bayatha, daxita barapomonaе nexata daxita cinco mil bicheito tsuxubi xua saya pebiwi ununatsi.

<sup>5</sup>Icha mataqueitha judiomonaе pia pentacaponae tati, iruru pitiri jiwi, iruno pomonaе jiwi pecuidubiwi Moisés pia peitorobi coyenewa tati, daxita barapomonaе nacaetuta Jerusalén tomaratha. <sup>6</sup>Baxota iru nanacaetuta Anás pon sacerdotemonaе pia pepa pentacaponaein tati. Iru nanacaetuta Caifás, Anás perobi. Iru nanacaetuta Juan iru Alejandro, ponbe Anás piamonaе tati. Barichiru nanacaetuta ichamonaе pomonaе

sacerdotemonaе pia pentacaponae tati barapomonaе piamonaе tati. <sup>7</sup>Bapoxonaе ichamonaе itoroba xua Pedro iru Juan pecuaranotatsinexatsibe barapo penacaetutsiwi itabaratha. Yainyabatsibe, jeichibe:

—¿Jintam pia peayapusu itorobi coyenewatha tati matautano jintam pewuntha tati axaibi paexanamebe? jeichichibe.

<sup>8</sup>Pedro bichocono juntu coyene yu-catsi Nacom pia Pejumope tunaxu tati pia peayapusu itorobi coyenewa tati. Pedro barapomonaе jume nota, jeye:

—Pomonaе tomarapiwi pia pentacaponae jiwi pamxaem, iruru pomonaе pitiri jiwi pamxaem, pomonaе Israel pijimonaе tati pamxaem, daxita barapomonaе pam paca tsipaebatsi.

<sup>9</sup>Maisa yabara pana yainyabamebe xua po coyene pejayujayuwei jiton axaibi xua painya neyaputaenexa xua eta po coyeneya xua paexananbe poxonaе bapon axaibi exanatsi po coyene xua bichocono wunaе. <sup>10</sup>Daxota paxanbe paca jume notatsi xua iru israelmonaejiwi peyaputaenexa po coyene xua pon pejayujayuwei jiton axaibi exanatsi poxonaе pawun paeban Jesús pewun pon Nazaret tomarapin. Bapon Jesús, pon apara naetotha tupaerucua paexaname matautano pon equeicha Nacom petupaein asu exana petupae cuiru coyene weya.

<sup>11</sup>Bayatha Nacom Pejume Diwesitha tsiwanaya yabara paeba xua po coyeneya pacana exanaename Jesustha. Paxam be barapocotsimonaе pam, be pocotsimonaе xua ibo bo peacabiwi. Barapomonaе xuba iboto po iboto bequein ainya cui naexana beyacaincha icha iboto. Paxam bara paichim Jesucristo paxubame pon peainya cuin xua Nacom ainya cui cana exana beyacaincha ichamonaе. <sup>12</sup>Barapo cae pin nacuathe dapocotsin aibi pon

capanepeiba jiwi. Saya meisa bapon Jesús capanepeiba jiwi. Ichun Nacom jopa nacata itorobiyo.

<sup>13</sup>Daxita tomarapiwi pia pentacaponae wi tatsi yabara najuntu coyene cabenaeca xua Pedro Juanno jopa auriyobe xua atsaquiya paebabe. Tsipei barapomonaе pomonaе pentacaitorobi bicheito yaputane xua Pedro Juanno jopa nacuidubiyobe petinae botha matautano xua baponbe saya pecui paw i jitonbe. Barichi barapo pentacaitorobi bicheito yaputaneno xua xaniwaicha apara baponbe ponbe napuna poponeibabe Jesth. <sup>14</sup>Barapomonaе moya ena tsipei pon pejayujayujei jiton Pedro Juanno axaibiya caquita uncuatsibe. Daxota barapomonaе Pedro Juanno jopa abe yabara paebichibe. <sup>15</sup>Pedro Juanno matha pesato beitorobiyatsibe. Barapomonaе natsipaeba. <sup>16</sup>Nabara i, jeye:

—¿Eta bichainchi metha baraponbetha Pedro Juanno? Bayatha daxita carepaya Jerusalén tomarapiwi yaputane xua Juan Pedrono exanabe pexeinya petsita itutsi coyenewa Nacom pia peayapuswatha tatsi. Daxota jopa naca itacupaeyo xua wapaebiwa po coyene xua baponbe jopa apara exanaeyobe pexeinya petsita itutsi coyenewa Nacom pia peayapuswatha tatsi. <sup>17</sup>Maisa aichaxaibichi xua daxita carepaya jiwi jume taetaepona baxua. Metha daxota baponbe jume daunweya itorobinchi xua equeicha jopa paebi tsanebe xua Jesús peyabara paebiwatsi, jei barapomonaе.

<sup>18</sup>Barapo pentacaitorobi bicheito equeicha Pedro iru Juan wabatsibe. Jume daunweya tsipaebatsibe:

—Equeicha jopa Jesús payabara paebindebe. Equeicha jopa yabara pacuidubindebe barapo cui, jei barapomonaе.

<sup>19</sup>Bara nexata Pedro Juanno jume notabe barapomonaе, jeibe:

—Incane payabara nanta xeinare icha metha bara Nacom tsita xanepanatsi xua paxanbe pata paca cajume cowuntsiwatsi xua pata exanaewabe pocotsiwa pana itorobame xua daxota jopa pata exanaewa pocotsiwa Nacom pana itoroba. <sup>20</sup>Bewa paexanaeinbe daxita pocotsiwa Nacom pana neitorobabe. Bewa papaebinde daxita pocotsiwa patanbe xua Jesús exana yawa xua pajume tanbeno xua Jesús paeba, jeibe Pedro Juanno.

<sup>21</sup>Barapomonaе pomonaе tomarapiwi pia pentacaponae wi tatsi, Pedro iru Juan jume itawetatsibe. Daichitha saya pu copatatsibe. Barapomonaе jopa itacupaetsi xua pecuainchiwatsibe Pedro iru Juan jiwi pecunuwixaetsi, tsipei pinmonae jiwi Nacom wunaе jaintatsi, petaexae pocotsiwa Pedro iru Juan exanabe. <sup>22</sup>Pon pejayujayujei jiton pontha pon Nacom pexeinya petsita itutsi coyenewa taexana, bapon axaibi exanatsi poxonaе cuarenta po weiyobe xaina.

**Meje poxonaе pomonaе Jesús pejume cowuntsiwichi tatsi wuca Nacom xua jopa pejunuwinea tsane poxonaе Nacom Pejume Diwesi cueicueije i tsane jiwitha**

<sup>23</sup>Pedro Juanno nainya pontababe ichaxota Jesús pejume cowuntsiwichi tatsi jinompa. Baxota nanabaru nacaetutatsibe. Barapomonaetha paebabe, xua baraunchichibe sacerdotemonaе pia pentacaponae wi, pitiri jiwino. <sup>24</sup>Poxonaе Pedro iru Juan baxua jume taerucupatsibe, barapomonaе Nacomtha tsipaeba, jeye: “Nacom, pon pata Necanamataxeinaem, xam daxita peitabocotha exaname, irathano, menthano, daxita icha coyeneinno. <sup>25</sup>David pon neitorobi jume papeabin, nejumope tunaxu

cueicueijei cana exanatsi xua cata paeba, poxonae jeye:

‘¿Eta xua metha, pomonae jopa judiomonae

naexanaeyo cayabara anaepana?

Bara bequein ichipa abe cata exana ichitha jopa itacupaetsi.

<sup>26</sup>Daxita carepaya nacuanpiwi pomonae jiwi itorobiya pia pepa peewatsiwichi iru ichamonae pomonae jiwi peyanacua ewatsiwichi barapomonae nacaetuta xua abe

neayabara paebinxaxua yawa xua

Nexanto pia abe yabara paebichi pon

Mesías, pon jinya Neitapetsin’, jeyei David,

xua pinae Nacom tapaebatsi”, jei

barapomonae xua wuca Nacomtha.

<sup>27</sup>Equeicha bapomonae jeye: “Bara yatsicaya baxua exana poxonae Herodes iru Poncio Pilato, iru icha nacuamonaepiwino, iru Israel nacuamonaepiwino xote nacaetuta Jerusalén tomaratha. Barapomonae nacaetuta xua Jesús abe peyabara paebinxatsi nexanto pon pejuntu coyene xanepanaein pon Mesías pon itapetame. <sup>28</sup>Barapomonae,

pomonae xote nacaetuta, exana daxita xua caena bayatha cui wuna tsiwanaya yabara paebame po coyene xua barapomonae exanaena. <sup>29</sup>Pata

Necanamataxeinaem, matha jume taema xua pana yabara abe jume baraunchi xua abe pana exanapaeba.

Pana care xua neajuntuyapuswa xua jopa junuwiya pata paebinxaxua tsane jinya jume diwesi, tsipei paxan jinya neitorobi jiwi pan. <sup>30</sup>Peatenewi axaibi

exande neayapuswatha. Matautano barabu copatame xua pexeinya petsita itutsi coyenewan paexanaein poxonae pacueicueijan tsane jinya jume diwesi, Jesús nexanto pia peayapuswatha tatsi pon pejuntu coyene xanepanaein”, jei barapomonae poxonae wuca Nacomtha.

<sup>31</sup>Barapomonae najume wetarucupa xua Nacomtha petsipaebiwa. Bapoxonae ichaxota nacaetuta barapomonae ira jijiyataxuba. Daxita barapomonae juntu coyene wuca cana exanatsi Nacom pia Pejumope tunaxu tatsi pia peayapusu itorobi coyenewa tatsitha. Matautano barapomonae Nacom Pejume Diwesi jopa junuwiya paebinoutsioy.

**Meje yabara poxonae pomonae  
Jesús pejume cowuntsiwi  
pocotsiwan xua xeina daxita  
baxuan bara barapomonae nexa**

<sup>32</sup>Pomonae pejume cowuntsiwi Jesucristo pinmonae tsoponae. Barapomonae peburuya nanta xeina be caenthuto coyeneya. Ichun jopa jeiyo: “Apara pocotsiwa xeinan meisa tawa”, jopa jeiyo. Ichitha daxita xua barapomonae xeina baxua saya daxita bara barapomonae nexa. <sup>33</sup>Jesús pia

peitorobi jiwi tatsi ajumeyapusuya yabara paeba pocotsiwa bayatha tane poxonae Jesucristo pon jiwi Pecanamataxeinaeinchi xua equeicha petupaein asu popona exanatsi. Matautano yabara cueicueijei po

coyene Nacom bichocono wuna exana daxita barapomonaetha peantobexaetsi. <sup>34-35</sup>Jopa ichun acopeibiyo pomonae

Jesús pejume cowuntsiwi. Daxita barapomonae xeina xua pocotsiwa penantawenonaewa poxoru ichamonae

pomonae nawita pexeinaewi caenaeta dubenanaebiya pabin, bomuxunno. Barapo paratixi poxonae xeineiba,

catsibeibatsi Jesucristo pia peitorobi jiwi tatsitha. Nexata xuya barapo paratixi Jesucristo pia peitorobi

jiwi tatsi catsibeiba pomonaetha pomonae peacopeibi jiwi xua daxota jopa petaseicaenexatsi pocotsiwa

nantawenona. <sup>36</sup>Barichi exana bapon José pon Leví pia pemomo susato jiwanapin. Jesucristo pia peitorobi jiwi

tatsi icha wun duta bapontha, po wun Bernabé. (Barapo wun, xua hebreo jume jei: “Pon jiwi pentateiqueibin”, jei.) Barapon José, Chipre tunaetha naexana. <sup>37</sup>Bapon pia pabi caenaeta. Bapoxonae barapo paratixi Jesucristo pia peitorobi jiwi tatsi catatsi peacopeibiwi nexa.

### Meje yabara poxonae Ananías iru piowa Safira abe exanabe

**5** Bapoxonae iru ichun pon pewun Ananías iru piowa pewun Safira, pabi xeinabe. Bapon piowabe pia ira caenaetabe. <sup>2</sup>Bapon piowabe najupa nanta xeinabe. Baponbe icha paratixi nata botabe. Icha paratixi Jesucristo pia peitorobi jiwi tatsi catabe bequein Ananías paeba xua daxita catabe Jesús pia peitorobi jiwitha tatsi. <sup>3</sup>Bara nexata Pedro Ananías baraichi, jeye:

—Ananías, ¿eta xua metha Satanás jume jejam xua cajume tsiduta xua Nacom pia Pejumope tñaxu tatsi muxuitorobame? ¿Eta xua metha paratixi nata botame xua ira matoma cacata? <sup>4</sup>Po ira caenaetame apara bara jinya ira. Yawa barapo matomano apara bara jinyawa. Barapo paratixi icha canantawenoname bara ba moya tainchi. ¿Eta xua metha baxua najuntu coyene xeiname? Jopa apara muxuitorobim pebiwi. Jame yat-sicaya apara Nacom pia Pejumope tñaxu tatsi muxuitorobame, jei Pedro.

<sup>5</sup>Poxonae baraxua Ananías jume taeba, petupaein Ananías iratha jopa. Daxita pomonae xua jume tane xua bapon tupa, bichocono junuwa. <sup>6</sup>Pewowi pata. Ananías petupaein mata yarabatsi pesato becayatsi, xua pemuthutha xubinexatsi.

<sup>7</sup>Pirapaeyo poxonae tres po horabe weta, Ananías piowa tatsi patopa ichaxota Pedrobaru ena. Barapowa jopa yapuraeyo xua pia pebin tatsi tatupatsi. <sup>8</sup>Nexata Pedro barai barapowa, jeye:

—¿Bara daxita pana catame xoxi pacaenaetame pentoma pabi? jei Pedro.

Barapowa jume nota, jeye:

—Aja, bara daxita, jei barapowa.

<sup>9</sup>Nexata Pedro barai barapowa, jeye:

—¿Eta xua metha pana muxu wetamebe xua Nacom pia Pejumope tñaxu tatsi pamuxuitorobinamebe? Taema, pewowi pomonae aunxuae jinya pebin muthutha xotsi, pecoibototha pata, necamuthutha xubinexa tsaneru.

<sup>10</sup>Barapoxonae caena nainya Safira Pedro petaxutha petupaein tanabotabatsi. Poxonae pewowi taeba xua barapowa bayatha tupa, bapoxonae bapowa jontaxorenatsi. Pia pebin cacuita muthutha xorecatsi.

<sup>11</sup>Daxita Jesús pejume cowuntsi jiwi, ichamonaeno unthuthu nayotarucupa pejunuwixae poxonae baraxua jume tane.

### Meje yabara poxonae Jesús pia peitorobi jiwi tatsi ainya pexeinya petsita itatsi coyenewan exana, Nacom pia peayapusuwatha tatsi

<sup>12</sup>Jesús pia peitorobi jiwi tatsi pexeinya petsita itatsi coyenein exana jiwitha Nacom pia peayapusuwatha tatsi. Pinmonae Jerusalén tomarapiwi pomonae jume cowunta Jesús, Nacom pin pia botha nacaetuta. Po tutu pewun Pórtico de Salomón tutu, bapo tututha nacaetuta. <sup>13</sup>Ichamona, pomonae xua jopa jume cowuntsiyo Jesús, junuwa xua penanacaetutsiwa Jesús pejume cowuntsi jiwitha tatsi. Ichitha barapo Jerusalén tomarapiwi tsita cui wunaetsi Jesús pejume cowuntsi jiwi tatsi. <sup>14</sup>Pin bicheito nayoyotapona, pebiwino, yabuxino pomonae xua jume cowuntapona Jesús ponxae jiwi Pecanamataxeinaeinchí. <sup>15</sup>Jesús pia peitorobi jiwi tatsi wunae peexanaexae, Nacom pia peayapusuwatha tatsi, daxota pomonae atene namtotha

capoinchi. Ichamonae camatha bobena namtotha. Ichamonae weintha bobena. Barapomonae ichipa jayababatsi xua Pedro pejumope tatsi, xua barapomonae peaxaibi exanaenexa tsainchi. <sup>16</sup>Jiwi nacaetuta Jerusalén tomaratha pomonae xua pia tomaran jeba Jerusalén tomara pepuya weya. Barapomonae capata peatenewi iru pomonae xua matajemabatsi exanatsi cauri. Daxita barapomonae peburuya axaibi exanatsi. Daxita barapomonae carepaya equeicha axaibi.

**Meje yabara poxonae Jesús pia peitorobi jiwi tatsi peraxa exanatsi**

<sup>17</sup>Nexata sacerdotemonae pia pepa pentacaponaein tatsi, iru pomonae xua napuna pona, pomonae saduceomonae, daxita barapomonae Jesús pia peitorobi jiwi tatsi anaepanaya jume uwatsi.

<sup>18</sup>Daxota pomonae xua anaepana Jesús pia peitorobi jiwi tatsi teicatsi. Jiwi pecubi bothano capoinchi. <sup>19</sup>Ichitha Jesús itoroba matatsunpin. Bapon merawi patopa. Jiwi pecubi coiboto yausaranaxuba. Matatsunpin aisowa bemaxu cayiya Jesús pia peitorobi jiwi tatsi. <sup>20</sup>Matatsunpin Jesús pia peitorobi jiwi tatsi tsipaebatsi, jeye: “Paponde Nacom pin pia botha. Baxota paumende. Payabara paebare daxita jiwitha barapo pena juntu coyene po coyene xua Nacom cata jiwitha xua beta pejinompaenexa”, jei matatsunpin. <sup>21</sup>Poxonae baya caemumbotha Jesús pia peitorobi jiwi tatsi bara exana xua matatsunpin paeba. Bara Nacom pin pia botha yacuinaya jojoniya pecuidubinexa jiwi.

Barapoxonae sacerdotemonae pia pepa pentacaponaein tatsi, iru saduceomonaeno waba daxita carepaya Israel nacua pia penapatae jiwi xua penacaetutsinexa pentacaitorobi bicheitha. Barapoxonae barapomonae

itoroba ichamonae xua Jesús pia peitorobi jiwi tatsi pecuaranobinexatsi pin bicheitha peitabaratha tatsi. <sup>22</sup>Ichitha poxonae policiamonae jiwi pecubi botha pata, Jesús pia peitorobi jiwi tatsi jopa taetsi. Daxota policiamonae diwesiyo caibeya capona pin bicheito peitabaratha. <sup>23</sup>Policiamonae namchi, jeye:

—Poxonae papatan jiwi pecubi botha, soldadomonae pomonae peewatsiwi barapo pecubi botha barapo soldadomonae pecoiboto yabara umena, daunwei tsuncuae. Poxonae pasaranaxoyan jopa paitaraerowinyo Jesús pia peitorobi jiwi tatsi. Jiwaibi. Aichurubena, jei.

<sup>24</sup>Poxonae sacerdotemonae pia pepa pentacaponaein tatsi, iru Nacom pin pia bo peyabara umenaewi pia pentacaponaein tatsi, iru sacerdotemonae pia pentacaponaein tatsi jume tane baxua, bapoxonae najuntu coyene benaecaeya nayainyaba, jeye: “¿Exota metha jane Jesús pia peitorobi jiwi tatsi? ¿Exua jane?” jei. <sup>25</sup>Iruru barapoxonae pebin patopa. Barapomonae baraichi, jeye:

—Ja, pomonae jiwi pecubi botha pacaponame, barapomonae Nacom pin pia botha umena. Matautano cuiduba jiwi, jei bapon.

<sup>26</sup>Nacom pin pia bo peyabara ume-naewi barapomonae pia pentacaponaein tatsi bapon baru pona policiamonaeno Nacom pin pia botha. Equeicha caewa baru dendensatsi Jesús pia peitorobi jiwi tatsi ichaxota nacaetuta pentacaitorobi bicheito. Saya jopa abe exanaetsi poxonae teicatsi. Saya baru cui wunaeya carendenatsi poxoru barapo policiamonae jiwi cui cunuwatsi. Daxota policiamonae saya be xainyatha teica barapomonae xua jiwi pecuiyainwaxae tatsi xua policiamonae pecuini-babiwa tsipaetsi ibotixitha. <sup>27</sup>Nacom pin pia bo peyabara umenaewi pia pen-

tacaponaein tatsino, barapomonaē Jesús pia peitorobi jiwi tatsi capoinchi pentacaitorobi bicheito peitabaratha. Sacerdotemonaē pia pepa pentacaponaein tatsi bapon, Jesús pia peitorobi jiwi tatsi baraichi, jeye:

<sup>28</sup>—Bayatha jume daunweya paca tsipaebatsiba: ‘Equeicha jopa Jesús payabara paebinde’, pajan. ¿Ichitha eta xua paexaname? Daxita carepaya Jerusalén tomarapiwi yaputane pocotsiwa paxam pacuidubame Jesús yabara. Yawa painya metha paebichi xua paxan panatsiaena cuentan Nacomtha tupa pata exanaexae Jesús, jei barapo pentacaitorobi bicheito.

<sup>29</sup>Nexata Pedro iru ichamonae pomonaē Jesús pia peitorobi jiwi tatsi daxita barapo matabuxuyobe jume nota barapomonaetha, jeye:

—Apara jame bewa paexanaein pocotsiwa Nacom pana itoroba. Nacom pia peitorobi coyenewa ainya cui beyacaincha jiwi pia peitorobi coyene tatsi.

<sup>30</sup>Pata amo susato jiwi pia Nacom tatsi, barapo Nacom Jesús equeicha petupaein asu exanatsi pon xua pabexubame, poxonaē naetha tupa ruca paexanadutame. <sup>31</sup>Nacom Pexanto pia peayapusuwatha exana yatsicaya jiwi pia pepa Pecanamataxeinaein tatsi. Yawa exana pexanto pon jiwi Pecapanenebiyaein. Baxua exana poxonaē pecoxatha taecatsi pexanto. Nacom baxua exana tsipei ichichipa xua Israel nacuapiwi icha juntu cui coyene xeinaena bapontha, xua bapoxonaē barapomonaē Nacom pecui yabara junte mainaenexa po coyene xua barapomonaē Nacom tsita natsicuentatsi xua abe pe-eexanaexae.

<sup>32</sup>Bara yatsicaya pata cui taewi daxita baxuan, Nacom pia Pejumope tunaxu tatsi iru taneru. Daxota paca tsipaebatsi baxua, pocotsiwa xua Jesús exana. Nacom najumope cata pomonaetha pomonaē xua peichichipaewa xua pe-

exanaewa pocotsiwa Nacom itoroba, jei Jesús pia peitorobi jiwi tatsi.

<sup>33</sup>Pentacaitorobi bicheito jume taerucupa xua pocotsiwa paeba barapomonaē pomonaē Jesús pia peitorobiwi tatsi. Bapoxonaē barapomonaē bichocono casebarucupatsi. Barapo pentacaitorobi bicheito ichichipa xua barapo Jesús pia peitorobiwi tatsi pejutebiwatsi.

<sup>34</sup>Barapo pentacaitorobi bicheitha eca fariseomonaepin pewun Gamaliel, pon jiwi pecuidubin Moisés pia peitorobi coyene tatsi. Jiwi bapon baru cui itura jineibatsi. Bapon asiya uncuwa yawa itoroba xua bara caeto pesato becayiya tsainchi barapomonaē pomonaē Jesús pia peitorobi jiwi tatsi. <sup>35</sup>Bapoxonaē bapon Gamaliel barai barapomonaē pomonaē pentacaitorobi bicheitha, jeye:

—Paxam pomonaē Israel nacuamonaepiwi pamxaem, dota pam xua pocotsi coyeneya pacana exanaename barapomonaē. <sup>36</sup>Metha bara pajunte mainame poxonaē matha bapon Teudas poxonaē pia coya pentacaponaein naexana, nayabara paeba xua pinae bichocono peainya cui jiton. Cuatrocientos pebiwimonaē matabuxube puna jinompatsi bapon. Ichitha poxonaē Teudas bexotsi ichamonae, bapoxonaē pijimonaē tatsi ducupa, poxonaē daxita yotabatsi. Saya xua Teudas exana baxua pecui pawi. <sup>37</sup>Barichi Teudas pepuya weya ichun patopa pon pewun Judas. Bapon pentacaponaein najainta poxonaē jiwi pewun tinae matabi tsuxubi. Bapon Galilea nacuapin. Piamonaē pin bicheito puna jinompatsiru, ichitha barichi bapon Judas bexotsi ichamonae. Barichiru pijimonaē tatsi tarucupatsi poxonaē yotabatsi. <sup>38</sup>Daxota paca jeichi: ‘Jesús pia peitorobi jiwi tatsi bara pacui copabare’, jan. Icha

barapomonaē saya exanaetsipa xua jiwi itoroba, nexata barapomonaē jopa amanayabichipae pocotsiwa xua ichichipa peexanaewa. <sup>39</sup>Ichitha icha barapomonaē exanaetsipa pocotsiwa Nacom itoroba, nexata paxam jopa pacui amanayabichipaem barapomonaē. Dota pam. Daxota jopa paexanaponaēinde po coyene xua Nacom pia peaitafaetabi jiwichi pana naexanaponaē, jei Gamaliel.

Barapomonaē pomonaē pentacaitorobi bicheito bara jopa pecuiyo Gamaliel pepaebixae. <sup>40</sup>Barapoxonaē barapomonaē pomonaē pentacaitorobi bicheito equeicha wabatsi Jesús pia peitorobi jiwi tatsi. Bapoxonaē matha copiya ichamonaē itorobatsi xua Jesús pia peitorobi jiwi tatsi pecuainchinexatsi. Equeicha jume daunweya tsipaebatsi: “Equeicha jopa Jesús payabara papaebim tsane”, jei. Bapoxonaē pu copababatsi nama Jesús pia peitorobi jiwi tatsi. <sup>41</sup>Jesús pia peitorobi jiwi tatsi pentacaitorobi bicheito weya pona. Barapomonaē juntu coyene weiweina tsipei peraxa exanatsi ichamonaē, Jesús pijimonaēxae xua baxua saya Nacom pecopatsixae. <sup>42</sup>Awiya barapomonaē amsiya yabara cuiduba, Nacom pin pia botha Jesús pia pexeinya jume diwesi yawa xua boxithano. Matautano cuidubano xua Jesús apara Mesías pon Nacom itorobica.

**Meje yabara poxonaē Jesús pia peitorobi jiwi tatsi itapeta siete poyobe peyawenaenexa tsane ichamonaetha**

**6** Barapoxonaē barapo mataqueitha pinmonaē jume cowanta Jesús. Pomonaē xua griego jume pecueicuei-jeiwi anaya tsipaeba, pomonaē xua hebreo jume pecueicuei-jeiwi baraichi, jeye: “Patamonaē, powaxi pecuenta

werapaewaxichi piseurixi powaxi griego jume pecueicuei-jei-waxi poxonaē judiomonaē apata pexaewa, barapowaxi saya peyaxui apatatsi pexaewa. Ichitha meisa judiomonaewaxi powaxi pecuenta werapaewaxichi barapowaxi jopa juniya nabaneibiyo”, jei. <sup>2</sup>Jesús pia peitorobi jiwi tatsi, pomonaē doce poyobe, barapomonaē baru nacaetuta ichamonaē pomonaē iru Nacom pejume cowantsiwi. Barapomonaē pomonaē Jesús pia peitorobi jiwi tatsi jeye barapomonaetha:

—Painta jopa yapu xanepanaeyo xua pata nacui barapentsiwa xua pata cueicuei-jeiwa Nacom Pejume Diwesi xua saya pexaewa pata apatsinexa jiwi. <sup>3</sup>Daxota waji-wimonaē paitapere siete poyobe pebinbe paxam jiwana. Paitapere pomonaē xua daxita jiwi ita cui juntu coyene xanepaneibatsi, pomonaē xua juntu coyene yucatsi Nacom pia Pejumope tunaxu tatsi pia peayapusuwatha tatsi, pomonaē xua peyaputaewi. Barapo siete poyobe pacui itorobin xua pexaewa apateibina. <sup>4</sup>Bapoxonaē paxan Jesús pia peitorobi-wi tatsi pan, jopa paapatsin tsane pexaewa. Saya meisa Nacom pata tsipaebibichi nawita yawa pata cueicuei-jei tsaibichi Jesús pejume diwesi, jei barapomonaē.

<sup>5</sup>Jesús pejume cowantsi jiwi tatsi nanta jupaya nanta xeinarcupa. Bapoxonaē Esteban itapetatsi. Bapon Esteban pon bichocono jume cowanta Jesús yawa bichocono juntu yucatsi Nacom pia Pejumope tunaxu tatsi pia peayapusuwa tatsi. Itapetatsi Felipeño, iru Prócoro, iru Nicanor, iru Timón, iru Parmenas, iru Nicolás. Bapon Nicolás Antioquía tomarapin. Bapon copiya jopa naexanaeyo judiomonaē-pin. Poxonaē jume cowanta Nacom, bapoxonaē judiomonaē-pin naexana. <sup>6</sup>Barapoxonaē barapo siete poyobe



Jesús pejume cowuntsi jiwi tatsi capona Jesús pia peitorobi jiwi tatsitha. Jesús pia peitorobi jiwi tatsi mata jayabiya tawuca Nacomtha xua Nacom yawenaena barapomona.

<sup>7</sup>Pinmonae jume tane Nacom Pejume Diwesi. Pinmonaeno iru jume cowanta Cristo Jesús, pomona Jerusalén tomaratha jinompa. Iru judiomona pia sacerdotemona tatsi, barapocotsimona pin bicheito jume cowanta.

### **Meje yabara poxona Esteban waetabatsi**

<sup>8</sup>Esteban pexeinya petsita itutsi coyenewan exaneiba jiwitha Nacom pia peayapusu itorobi coyenewatha tatsi. Tsipei Nacom yanta popona bapon daxota Esteban Nacom yaweneibatsi pecatsixaetsi peayapuswa. <sup>9</sup>Nexata nacaetuta pinmonae judiomona pia penacaetutsi botha tatsi. Ichamonae wun dutatsi xua jeichichi: “Pomonaepu sorobabewiwichi poxona busi cui tatayebabatsi”, yabara wun jeichichi. Iru nanacaetutapona Cirene tomarapiwi, iru Alejandria tomarapiwi, iru Cilicia nacuapiwi iru Asia nacuapiwi. Daxita barapomona Esteban jume matsontsonobatsi. <sup>10</sup>Ichitha Esteban xaniwaicha cueicueijejei exanatsi Nacom pia Pejumope tunaxu tatsi. Daxota poxona Esteban paeba barapomona jopa itacupaetsi xua beta pejume notsiwa. <sup>11</sup>Nexata barapomona po pin bicheito penacaetutsimona ichamona nantsiyatsiya catatsi paratixi petacamuxitorobinexa tsainchi xua Esteban paeba. Barapomona pomona pemuxitorobi jiwi namchi xua Esteban Moisés baraunchichi abe jei, yawa xua Nacom baraunchichi abe jei. <sup>12</sup>Barapo jumetha pemuxitorobi jiwi daxita jiwi anaepana exanatsi xua Esteban jume canaerabatsi. Pitiri jiwino anaepana. Iru

pomona jiwi pecuidubiwi Moisés pia peitorobi coyene tatsi barapomonaeno iru anaepana. Daxota barapo penapatae jiwi iru pomona jiwi pecuidubiwi Moisés pia peitorobi coyene tatsi barapomona Esteban yorobateicatsi. Pentacaitorobi bicheito peitabaratha capoinchi. <sup>13</sup>Barapo pentacaitorobi bicheito equeicha waba pomona Esteban jume cui canaerabatsi wabatsi. Barapomona pomona penaerabiwi Esteban yabara jeichichi:

—Bapon Esteban Nacom pin pia bo tatsi baraunchichi abe jei. Barichi bapon Esteban Moisés pia peitorobi coyenewa tatsi baraunchichi abe jei. <sup>14</sup>Pajume tan, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Barapo bo Nacom pin pia bo tantanaca exanaein’, pinae jei Jesús. Equeicha Esteban namchi xua pinae Jesús paeba pinae jeye: ‘Tampopata pitaban po peitorobi coyenewa xua bayatha Moisés paca itoroba’, jei pinae bapon Jesús, jei barapomona pomona penaerabiwi.

<sup>15</sup>Pomona baxota ena pomona pentacaitorobi bicheito, barapomona Esteban necotenatsi. Barapomona itabara tayena xua Esteban peitabara be matatsunpin itabara, xua bichocono wuna.

### **Meja yabara poxona Esteban pentacaitorobi bicheito itabaratha pia coya paeba**

**7** Nexata sacerdotemona pia pepa pentacaponaein tatsi bapon Esteban baraichi, jeichi: “¿Bara xainyei xua barapomona cabarai?” jei sacerdotemona pia pepa pentacaponaein tatsi. <sup>2</sup>Esteban jume nota, jeye: “Tamona pam pana nejume taema. Wanacom wuna nawita. Barapon Abraham tsita naitutatsi poxona caena bayatha awiya Mesopotamia nacuatha popona.

Bapon Abraham wamo susatopin matha copiya tsiwanaeya popona Mesopotamia nacuatha poxonae Harán tomara bewarapiya. <sup>3</sup>Nacom pinae Abraham baraichi: ‘Barapo ira jinya ira cuenta warapare. Jinyamonaeno cuenta warapare. Icha ira bewarapiyama ichaxota po ira beya cacaponaeinchi’, jei pinae Nacom. <sup>4</sup>Nexata pinae Abraham Caldea nacua wewarapiya. Harán tomara pinae bewarapiya. Poxonae pinae Abraham Harán tomaratha popona pinae Abraham paxa tatapatsi pon pewun Taré. Bapoxonae Nacom, Abraham pinae itorobatsi barapo irathe po irathe pajinompame anoxuae. <sup>5</sup>Barapoxonae pinae Abraham cataunxuae jopa catichi ira. Saya pinae tacayabara wuna tsimuxu dutatsi. Nacom pinae Abraham baraichi: ‘Jinya ira tsane, iru jinya jiwi penaitapataya naexana dubenaponeibiwi tsane pomonae jinya nemomo susato jiwi pia ira nexa tsaneru’, jei pinae Nacom. Ichitha pinae barapoxonae jopa xeinaeyo pexui. <sup>6</sup>Baraxua Nacom pinae Abraham baraichi: ‘Jinya nemomo susato jiwi icha nacuatha jinompaena. Be pomonae penanapaincha jinompaewi tsicotaeinchi xua be pocotsi jiwimonae icha nacua werena peponaewi. Tanacuitinchi ichamonae xua amanaya tanacuichina. Busi cui tatayebeibinchino. Caitacueintinchino yawa. Cuatrocientos po weiyobe tsane xua jinyamonaenaitapataya atene exaneibinchi’, jei Nacom Abrahamtha. <sup>7</sup>Equeicha Nacom tsipaeba Abraham, jeye: ‘Barapomonae xua abe pacata exanaena poxonae paca busi cui tataibina barapomonae jopa cui juntemainaein tsane. Barapomonae itawetsiya peraxa jubin. Bapoxonae jinya nemomoxi susato jiwi warapaena po nacuathe ichaxota uncuame yawa wuna nejainchina xote’, jei pinae

Nacom Abrahamtha. <sup>8</sup>Nacom pinae Abraham itorobatsi xua peexanaenexa po coyene xua pexui pebin wutixi pewi thabiwatsi xua ichaxota nareixacaena. Barapo coyene exana Abraham penanta xeinaenexa iru piamonae tatsi xua po coyene bayatha Nacom pinae yabara tsiwuna muxu duta, xua bea pinae yaweneibina xua barapomonae pinae bea yaweneibinchi. Daxota pinae poxonae Abraham pexanto tanaexanatsi pexanto wi thaba, pinae pewun Isaac. Isaac iru pinae barichi pexanto wi thaba, pinae pewun Jacob. Jacob iru pinae barichi wi thaba pexanto jiwi, pomonae bayatha Israel nacuamonaepiwi pia pentacaponaeiwi tanaexanatsi barapo doce poyobe.

<sup>9</sup>“Jacob pia pexanto jiwi tatsi, barapo doce poyobe, wamo susatomonae. Barapo doce poyobe jiwana caein pewun José. José pentapin jiwi uwatsi. Daxota José pentapin jiwi caenaetatsi. Pomonae bapon José comotatsi barapomonae José Egipto nacua becayiyatsi. Pon be jiwi pebusi cui tataibinchi be bapocotsin petsicotaenexa tsainchi. Ichitha Nacom José yawenatsi pebaru poponaexaetsi. <sup>10</sup>Poxonae José abe jume baraunchaibichi ichamonae, yawa poxonae muxu atene peexaneibichi awiya José capanepibatsi Nacom. Poxonae faraón peitabaratha taponatsi José, Nacom exana xua José faraón tsita juntu coyene xanepanatsi. Matautano Nacom peyaputaen exanano. Bapon faraón Egipto nacuamonaenae pia pepa peewatsinchi tatsi. Faraón cana exana xua José Egipto nacuapiwi yanacua ewatatsi faraón nexa. Matautano faraón cana exana xua José canamataxeina daxita xua xuan faraón xeina.

<sup>11</sup>“Barapoxonae Egipto nacuatha jainbo nacua tsurucuano, Canaan nacuathano iru. Pata amo susato jiwi

jopa pexaewa taeyo. Yawa piyain pewerapae nacua tsurucuae poxoru pexaewa ajibi. <sup>12</sup>Poxonae Jacob jume tane xua trigo xu xeina Egipto nacuatha, pia pexui bara beitorobiya. Barapon Jacob pia pexui tatsi, pata amo susato jiji. Baraxua poxonae xua copiya aena pona Egipto nacuatha. <sup>13</sup>Poxonae equeicha pona José pentapin jiji tsita naitapeinya xeina xua bapon bara peweicho jiji tatsi. Bapoxonae faraón yaputane xua barapomonae apara bara José piamonae tatsi. <sup>14</sup>Pirapae José pentapin jiji itoroba xua petabaru dendenaenexatsi paxa tatsi, pon pewun Jacob, matautano piamonae tatsi petabaru dendenaenexatsi po jiwimonaexae xua setenta y cinco poyobe. <sup>15</sup>Daxota Jacob iru pijimonaeno Egipto nacua beya warapa. Baxota pirapae bapon tupa. Iru pirapae pata amo susato jiwino weraparu baxota. <sup>16</sup>Pirapaeno Jacob piwan capoinchi Siquem tomara beya. Baxota piwan muthutha xotsi, po ira bayatha Abraham comota, po ira Hamor pexantixi tatsi caenaeta.

<sup>17</sup>“Ainya wei tsuxubi. Poxonae barapomonae Egipto nacua wewarapiyaenaba, be pocotsi coyeneya bayatha Nacom yabara tsiwunae muxu duta, bapoxonae Israel nacuapiwi pinmonae naexana. <sup>18</sup>Nexata Egipto nacuatha ichun nacua peewatsin naexana, pon José jopa yaputaetsi. <sup>19</sup>Barapo Egipto nacuapiwi itorobiya pia pepa peewatsinchi tatsi pata amo susato jiji muxuitorobeibatsi. Yawa cuainteibatsino. Yawa cobe itorobeibatsino xua pexui saya pebebainexa tsaibi tsane aisowatha xua pewerapeibinexa. <sup>20</sup>Barapoxonae iru Moisés naexanaru. Moisés paxa pia botha wichatatsi acobi po xometiyobe. Barapon Moisés pexeinyan nawita Nacom tsita juntu coyene xanepanecatsi

barapo pexuyo. <sup>21</sup>Poxonae Moisés pena xotsi yawa paxa xotsi namicha jeriyotha yana botetatsi mentha xua musuripawa cuba, barapoxonae faraón pexantiyo tatsi Moisés pitatsi. Be pexanto tsicotane, pia botha wichata. <sup>22</sup>Bapon Moisés nacuiduba nawita pocotsiwa Egipto nacuamonae yaputane. Daxota peyaputaenin tsecaeno, wunae peexanaein tsecaeno.

<sup>23</sup>“Pirapae poxonae Moisés yacuarenta po weibe jopa, bapon nanta xeina xua piamonae pesiwa ponaewa pomonae Israel nacuamonaexae. <sup>24</sup>Poxonae Moisés piamonae siwa pona, bapon tane xua piamonae jiwana tatsi tabutsi, Egipto nacuapin. Daxota Moisés yawena pon piamonae jiwana xae tatsi yawa bexuba Egipto nacuapin. <sup>25</sup>Moisés nanta xeina, pia coutha nabarai: ‘Tamona, Israel nacuamonaepiwi neyaputaena xua Nacom neitoroba. Mata cawarapaein barapomonae Egipto nacua weya, penacapanenebiyaenexa tsane’, najei. Ichitha daumetha barapomonae jopa tsaqueinaeyo. <sup>26</sup>Icha matabitha Moisés tane xua caepinbe iru nababeru Israel nacuamonaepinbe. Moisés barai baponbe: ‘Ja, zeta xua metha caepinbe pana nabamebe?’ jei. <sup>27</sup>Pon piamonae ba, Moisés napuna torobapoinchi. Moisés baraichi: ‘¿Jintam caitoroba pata xantha xua pon be jiji neyabara paebin penatsicuentiwa xua abe peexanaexae, xuano xua jiji Necanamataxeinaem naexaname? <sup>28</sup>¿Jinya nebexuichi icha mexuae ichim Egipto nacuapin?’ jeichichi Moisés. <sup>29</sup>Poxonae Moisés jume taebiriwa baxua, Moisés naetsiricua Madián nacua benaetsiricuiya. Baxota Moisés tanaexanatsi pexuyobe, pebin wutobe”, jei Esteban.

<sup>30</sup>Equeicha came Esteban barapomonae baru cueicueije. Namchi,

jeye: “Caentacabi pirapae poxonaе cuarenta po weibe pu caewa, xua poxonaе equeicha icha cuarenta po weibe xeina, Moisés popona ichaxota ira xuepana susato tsurucuae nacuatha. Imoxoyo demxuwan, po demxuwan pewun Sinaí baraxota Moisés tsita naitutatsi matatsunpin xua poxonaе isototha uncua xua taxuncua tsica naeyo. <sup>31</sup> Moisés yabara najuntu coyene cabenaeca. Bapon itatapoinya tsipei ichipa yaitane. Bapoxonaе baxota Moisés jume tane xua Nacom namchi: <sup>32</sup> ‘Apara jinya amo susato jiwi pia Nacom tatsin. Iru apara, Abraham pia Nacom tatsin. Iruru apara Isaac pia Nacom tatsin. Apara iru Jacob pia Nacom tatsin’, jei Nacom. Moisés pijunuwi bichocono jiyijiyei daxota aichaxaibi xua tane. <sup>33</sup> Nacom pinae Moisés baraichi: ‘Xua nataxu xatatame nataxu wejonde, poxoru po iratha poname apara tairiyo. <sup>34</sup> Tamonaе, pomonaе Egipto nacuatha jinompa bichocono atene exaneibatsi yawa jume tanno xua nanenaba. Daxota barapomonaе capanepan. Antha, caitorobatsi equeicha necoyo beya, Egipto nacua beya’, jei pinae Nacom”, jei Esteban.

<sup>35</sup> Equeicha Esteban namchi, jeye: “Pomonaе Egipto nacuatha jinompa, barapomonaе Moisés aichaxaibichi. Barapomonaе Moisés baraichi: ‘¿Jintam caitoroba pata xantha xua naexaname pon be jiwi neyabara paebin xua penatsicuentsiwa xua abe peexanaexae xuano xua naexaname pon be necanamataxeinaein?’ jei barapomonaе. Bequein barapomonaе baxua paeba ichitha Nacom cana exana xua bapon Moisés naexana be pon jiwi peyabara paebin xua penatsicuentsiwa xua abe peexanaexae. Matautano Moisés cana exanatsi pon pecapanepaеin piamonaе. Baxua Moisés

naexana poxonaе matatsunpin itoroba po matatsunpin Moisés tsita naitutatsi poxonaе isototha uncua xua taxuncua tsica naeyo. <sup>36</sup> Bapon Moisés pon wamo susato jiwi capanepatsi Egipto nacua weya. Moisés petsita itutsi coyenewan exana Nacom pia peayapusuwatha. Baxua exana Egipto nacuatha, Mar Rojo menthano. Matautano exanano ichaxota ira xuepana susato tsurucuae nacuatha cuarenta po weibetha. <sup>37</sup> Moisés Israel nacuamonaе jiwitha namchi: ‘Nacom paca jiwana cana exanaena pon pia peitorobi jume petapaebinchi icha neichi barichi tsane. Bapon xua pon Nacom itorobina, apara pon painyamonaе jiwana tsane’, jei Moisés. <sup>38</sup> Matautano apara bapon Moisés pon nanacaetuta poxonaе Israel nacuamonaе nacaetuta ichaxota ira xuepana susato tsurucuae nacuatha. Matautano bapon Moisés diwesi tsipaeba jiwitha xua petsipaebixaetsi matatsunpin poxonaе tsipaebatsi demxuawatha po demxuwa pewun Sinaí. Barapo diwesi po diwesi Moisés wamo susato jiwi tsipaebatsi barapo diwesi jiwi cana exanatsi xua peajuntuayapusuwa pexeinaewa. Barapo diwesi iru waxainchi nexaru.

<sup>39</sup> “Ichitha barapomonaе wamo susato jiwi jopa bejume jejeyo xua peexanaewa pocotsiwa Moisés itorobatsi Nacom. Moisés jume matawentatsi. Saya barapomonaе ichipa xua equeicha caibeya penawibiwa Egipto nacua beya. <sup>40</sup> Poxonaе cataunxuae Moisés demxuawatha pona, barapoxonaе barapomonaе Moisés peweicho tatsi pon pewun Aarón, bapon baraichi: ‘Painta exande ainya ibo nain nacomun. Barapo ibo nain nacomun naca tsiwana copiya cajijincaena namtotha. Jopa payaputaеinyo xua Moisés aichawiya pon pana matacapona Egipto nacua weya’, jeichichi Aarón. <sup>41</sup> Barapoxonaе

barapomonaē penain nacom exana be vacayo pebtiyo canaxobeta. Bapoxonaē barapomonaē tabexuba oveja, penain nacom vacayo nexa. Tsipei barapomonaē nanta xeina xua metha penain nacom ichichipa baxua. Barapomonaē bichocono jūntū coyene weiweina penain nacom pia coya peexanaexae, xua pin penabanaewa xua pebaru itura jinaenexatsi barapo ibo nacom. <sup>42</sup>Barapomonaē Nacom wepu tsatajopa tsipei barapomonaē pia penain nacom exana. Nacom bara copata barapomonaē xua bara barapomonaē bara exanaena be pocotsi coyeneya xua ichichipa peexanaewa. Daxota barapomonaē opitei be nacom cana exana, po opitei barapomonaē wūnae jainta. Barapomonaē pomonaē wamo susatomonaē, exana pocotsiwa caena bayatha Nacom pia peitorobi jume pepaebin yabara cui tsiwūnae muxu dutsiya tina. Bapon diwesi tina xua Nacom jume yabara tinatsi xua Nacom namchi barapo diwesitha, jeye: ‘Israel nacuamonaē, paxam oveja pabexubame painya penain nacomūn nexa, ichitha xan nexa jopa paraichim. Baraxua paexaname poxonaē pajinom-pame ichaxota ira xuepana susato tsurucuae nacuatha xua cuarenta po weibetha. <sup>43</sup>Yawa pacaponame penain boutiyo nacom po penein boutiyo nacom pewūn Moloc. Yawa pacaponame icha penain opitei nacom po opitei penain nacom pewūn Refán. Barapo penain nacombe paexaname painya wūnae jaintichi. Daxota xan itorobin ichūn xua paca mata cawarapaena Babilonia nacua beya. Bequein jopa bepawarapaem ichitha awiya

paca itorobinchi’, jei Nacom.

<sup>44</sup>“Wamo susato jiwi exana xua be bo xua anseraboco, xua ichaxota tututha jeba ibo xua po iboton Moisés mata tina xua Nacom pejume caitorobiwan. Barapomonaē cuita acaba be pocotsi boyo Moisés tsita itutatsi Nacom. <sup>45</sup>Wamo susato jiwi poxonaē tawerapatsi paxa tatsi, itorein pita barapo boyo xua anseraboco boyo. Pata tamo jiwi Nacom pia boyo capona poxonaē Josué napona. Poxonaē pata tamo jiwi ainya nacuan nonota tsiniya barapoxonaē equeicha barapo anseraboco boyo capona beya yacobe cui mat-acabi othopa poxonaē David popona pon Israel nacuapiwi itorobiya pia pepa peewatsinchi. <sup>46</sup>Bapon David pon Israel nacuapiwi itorobiya pia pepa peewatsinchi tatsi, Nacom tsita pejūntū coyene xanepanaeinchi. Bapon David ichichipa xua acaba pin bo Nacom nexa po Nacom Jacob pia Nacom tatsi. <sup>47</sup>Ichitha Salomón bapon apara pon Nacom pin pia bo exana. <sup>48</sup>Bequein Nacom pon pepa Nacom jopa poponaeyo botha pocotsi bo jiwi acaba Nacom nexa. Nacom peitorobi jume pepaebin baxua yabara paeba xua Nacom tapaebatsi, jeye:

<sup>49</sup>‘Peitaboco apara ichaxota taequeibithopeibiwa.

Ira apara ichaxota nataxu yūtabotan.

¿Eta pocotsi bo netsiexanaename?’

jei pon Wanacanamataxeinaein.

Matautano jeino: ‘Ichacuitha ¿eta po irara

xua ichaxota nafifinacaecaein?

<sup>50</sup>Apara xan tacoutha exanan daxita ira yawa

peitaboco daxota jopa nantawenonaeinyo xua

ichawa tana netsiexanaewam’, jei Nacom”;

jei Esteban.

<sup>51</sup>Equeicha Esteban barai, jeye: “Maisa bichocono pajuntũ coyene daunwam xua jopa bepayaputaem. Matautano pamuxu tutu daunwam, yawano pajuntũ coyene daunwam icha be pocotsimonae ichi pomonae jopa peyaputaewi Nacom. Barichi paichaxaibim Nacom pia Pejumope tunaxũ tatsi. Paxam bara paichim icha painya amo susato jiwi ichi. <sup>52</sup>Apara painya amo susato jiwi bayatha Nacom pia peitorobi jume pepaebiwi catsa jume baru paeabatsi, yawa cueintatsino. Matautano bayatha jutebatsi barapomonae pomonae Nacom pia peitorobi jume pepaebiwi, pomonae namchi: ‘Bexa patopaena pon pepa pejuntũ xanepanaein pon Mesías baraichi’, jei. Cain paxam, barapon poxonae patopa, pacaenaetame, pabexubameno. <sup>53</sup>Nacom pia peitorobi diwesi pajume taneme xua matatsunpiwi paca tsipaeba Nacom nexa. Ichitha jopa paexanaem pocotsiwa Nacom paca itoroba barapo pia peitorobi diwesitha”, jei Esteban pentacaitorobi bicheitha.

### Meje yabara poxonae Esteban tupa

<sup>54</sup>Poxonae pentacaitorobi bicheito jume tane pocotsiwa Esteban paeba, bapoxonae bichocono Esteban yabara cui anaepanarucupatsi. <sup>55</sup>Ichitha Esteban bichocono juntũ coyene yuca cana exainchi Nacom pia Pejumope tunaxũ tatsi pia peayapusuwatha. Esteban athabeicha necoicha. Bapon necota Nacom pia peitupanae coicha tatsi irũ Jesucristo xua uncua Nacom pecoxatha tatsi. <sup>56</sup>Nexata Esteban namchi, jeye:

—Incane pataema. Necotan xua peitaboco naitaboco coibo yausaranaxuba. Tan Jesús xua uncua Nacom pecoxa weya tatsi ponxae Nacom pia Peitapetsin tatsi, jei Esteban.

<sup>57</sup>Barapomonae jume itapataya namuxu acaba pocotsiwa Esteban paeba. Yawa anaepanaya wawai. Barapomonae be cae bicheito naexana pomonae Esteban betacuinaeyiyatsi. <sup>58</sup>Barapomonae Esteban aisowa bexoyatsi tomara weya. Yawa baraxota ibotontha cuinbabatsi. Pomonae abe peexanaewichi Esteban, barapomonae Saulo juma camisa jeba xua pocotsiwan nainya werubiya. Bapon Saulo pon pewowin xua bayatha pinyo.

<sup>59</sup>Poxonae barapomonae Esteban cuinbabompatsi ibotontha bapoxonae Esteban tsipaeba Nacomtha, jeye: “Jesús, pon Tanecanamataxeinaem, nejumope tunaxũ pire”, jei Esteban. <sup>60</sup>Bapoxonae pentabocototha uncua. Namtsebiya wawaino, jeye: “¡Jesús, Tanecanamataxeinaem! ¡Necana cui junte-mainare, yawa jopa neyantomatsinde xua barapomonae inta abe exana!” jei Esteban.

Poxonae najume wetaba, tũpanaicha Esteban.

**8** Saulo iru baru ita cui wunaetsi poxonae ichamonae Esteban bexotsi.

### Meje yabara poxonae Saulo abe exana pomonaetha pomonae Jesús pejume cowuntsiwi

Po matabitha Esteban bexotsi, barapo matabitha judiomonae tamropata notarucupa xua Jesús pejume cowuntsi jiwi tatsi bichocono abe exanatsi Jerusalén tomaratha. Daxita Jesús pejume cowuntsi jiwi tatsi yotabatsi. Ichamonae Judea nacua berucupiya, ichamonae Samaria nacua berucupiya. Meisa Jesús pia peitorobi jiwi tatsi pomonae xua doce poyobe ena Jerusalén tomaratha. Jopa ducupaeyo. <sup>2</sup>Ichamonae, pomonae Nacom pejume cowuntsiwichi, Esteban muthutha xotsi. Barapomonae Esteban bichocono siwa wecoyeichi. <sup>3</sup>Saulo jeita ducuaeta Jesucristo pia pejume cowuntsi jiwi

tatsi. Daxita bomuxun jupaya Saulo jiwi teteica tsiniya yabuxino pebiwino. Jiwi pecubi bo beya capona.

**Meje yabara poxonae Jesús pejume cowuntsi jiwi tatsi paeba dubenanaebiya Jesús pia pexeinya jume diwesi tatsi Samaria nacuatha**

<sup>4</sup>Pomonae bewa Jerusalén tomara werucupiyaena barapomonae Jesucristo pia pecapanepae jume diwesi paeba dubenanaebiya daxita po tomarantha xua pateiba. <sup>5</sup>Barapomonae jiwana tatsi pon Felipe baraichi bapon pona pepa tomaratha Samaria nacuatha. Barapo tomaratha tamropata pitaba xua pecueicueijejiwa Cristo yabara. <sup>6</sup>Jiwi nacaetuta dubenanaebiya. Matautano jume naitomatsiya jume taerubenanaebiya pocotsiwa Felipe cueicueijeji Cristo yabara. Matautano barapomonae taerubenanaebiya pexeinya petsita itutsi coyenewan xua Felipe exana Nacom pia peayapusu itorobi coyenewatha. <sup>7</sup>Pomonae xua cauri pexeinaewi, barapomonae equeicha axaibi exanatsi poxonae Felipe taitaweta cauri. Matautano caurimonae barapomonae wawaya wepu ducupeibatsi. Ichamonae pomonae pecuenobichi jiwi, pejayujayujejimaeno, daxita barapomonae axaibi exanatsi. <sup>8</sup>Felipe baxua peexanaexae daxota barapo tomarapiwi bichocono juntu coyene weiweinaya jinompa.

<sup>9</sup>Barapo Samaria tomaratha popona pon pentawun Simón. Bapon Simón mara pexeinaein. Matautano bapon barapo Samaria tomarapiwi muxujainyabeibatsi poxonae bapon pia coya pentacaponaein naexana. <sup>10</sup>Daxita tomarapiwi pomonae peacopeibiwi iru pomonae nawita pexeinaewino, barapomonae beta jume naitawata pocotsiwa Simón paeba. Barapomonae

namchi, jeye: “Barapon Simón apara pon yabara jeichichi: ‘Pon bichocono Nacom pia peayapusuwa tatsi xeina’, yabara jeichi”, jei barapomonae.

<sup>11</sup>Daxita barapo tomarapiwi itapeta jume naitawata pocotsiwa Simón paeba, tsipei saya caena bayatha barapomonae muxujainyabatsi mara peexanaewi pia coyeneyatha tatsi. <sup>12</sup>Barapomonae jume cowunta po pexeinya jume diwesi Felipe cueicueijeji xua Nacom yawa Jesucristo yabara, po diwesi xua Nacom waba jiwi petanaexanaexatsi pijimonae tatsi jiwana pomonae Nacom itorobiya ewata. Bapoxonae barapomonae bautisabatsi pebiwi yawa yabuxino. <sup>13</sup>Bapoxonae bapon Simón iru jume cowunta. Iruno bapon bautisabatsi. Matautano bapon tamropata pitaba xua Felipe peyantsiwatsi. Bapon Simón yabara najuntu coyene cabenaeca bichocono poxonae Felipe pexeinya petsita itutsi coyenewan exana Nacom pia peayapusuwatha.

<sup>14</sup>Jesucristo pia peitorobi jiwi tatsi, pomonae peenaexae Jerusalén tomaratha, jume tane xua Samaria nacuamonae jume cowunta Nacom Pejume Diwesi. Daxota barapomonae Pedro itorobatsi iru Juan itorobatsi, Samaria nacuamonae beya. <sup>15</sup>Poxonae Juan Pedrobe patopabe barapomonaetha, bapoxonae Nacomtha tawucabe Samaria nacuapiwi nexa, pomonae pejume cowuntsixae Nacom. Baponbe ichichipabe xua barapomonae peyanaba jinompaenexatsi Nacom pia Pejumope tunaxu tatsi. <sup>16</sup>Pedro iru Juan tawucabe barapomonae Nacomtha. Tsipei barapomonae awiya cataunxuae jopa tapatichi pia juntu coyeneinth Nacom pia Pejumope tunaxu tatsi. Saya meisa poxoru bautisabatsi Jesús pon Pecanamataxeinaein jiwi bapon pewuntha tatsi. <sup>17</sup>Pedro iru Juan,

pecobetha mata jayababe barapomonaē. Barapoxonaē barapomonaē tapatatsi pia jūntu coyeneintha tatsi Nacom pia Pejumoŋe tūnaxu tatsi.

<sup>18</sup> Poxonaē Simón cui tane xua Pedro Juanno pecobetha mata jayababe xua daxota Nacom pia Pejumoŋe tūnaxu tatsi tapatatsi barapomonaē, Simón ichichipa xua pecatsiwa paratixi baponbētha. <sup>19</sup> Simón namchi, jeye:

—Dapo peyapusūwa necare. Tha iru poxonaē mata jayabeiban ichamonaē tapateibinchi Nacom pia Pejumoŋe tūnaxu tatsi, jei Simón.

<sup>20</sup> Nexata Pedro Simón baraichi, jeye:

—Barabu xam yawa jinya paratixino cayawa muxuna weraweraca exanaena, tsipei saya nanta xeiname xua necaitacupaewa xua Nacom pia peyapusūwa tatsi necomotsiwa paratixitha, po peyapusūwa bequein Nacom amanaya pecatsiwa jiwitha. <sup>21</sup> Jopa caitacupaeyo xua nexeiwaewa Nacom pia peyapusūwa tatsi, tsipei apara Nacom cajūntu coyene yaputane xua neajūntucoyenebēwa. <sup>22</sup> Nacui baraxore jinya abe neexanaē cuiru coyenein. Nacom wūcare, xain Nacom cayabara jūntemaina xua nanta xeiname baxua. <sup>23</sup> Catainchi xua pejume uwiwa nenthūtotha xeiname. Xam neabēwa canthūthu yancababa daxota beta jopa xapain poponaem, abe nanta xeiname jincoutha, jei Pedro.

<sup>24</sup> Nexata Simón jume nota. Pedro iru Juan jume notatsibe, jeye:

—Painta yabara wūcarebe Nacomtha baxua xuaunxuae pana netsipaebamebe, xain bapoxonaē xeinaein barapo coyene xua jopa abe tana necana exanaenēxa, jei Simón.

<sup>25</sup> Bapoxonaē Pedro Juanno ichamonēaetha nacui yopitabe po coyene xua bayatha jume cowūntabe Nacom. Yawa xua penthūtotha taecatsibe Nacom pia Pejumoŋe tūnaxu tatsi. Baponbe Nacom pia

pexeinya jume diwesi tsipaebabe barapomonaētha. Jerusalén tomara bewarapiyabe. Poxonaē warapabe, Jesús pia pexeinya jume diwesi papaeba tsiniyabe Samaria nacuaetha. Ainya tomarantha cueicueijeibe.

**Meje yabara xua poxonaē  
Felipe iruru Etiopía nacuapin  
nantenta ponabe namtotha**

<sup>26</sup> Barapoxonaē pirapae, Jesucristo pon Pecanamataxeinaein jiwi, bapon pia matatsunpin tatsi, Felipe tsita naitatsiya tsipaebatsi, jeichichi: “Nontaponde, yawa ponde pocotsiwa parowa bereca. Jerusalén namto iyande xua po namto Gaza tomara betaerucuiya”, jei matatsunpin. Barapo namto ducuiya ichaxoyo ira xuepana susato tsurucuae nacua iya. <sup>27</sup> Felipe nantacotaxuba, bapoxonaē bara ponataba. Poxonaē Felipe namtotha ecapona, bapoxonaē caxina pebin Etiopía nacuapin. Barapon pon pentacaponaein pon peainya cui jiton. Matautano bapon paratixi tayapu eena xua yabūyo nexa powa Etiopía nacua pepa peewatsiwayo. Bapon Etiopía nacuapin bayatha pona Jerusalén tomara beya xua wūnaē pejainchinēxa Nacom. <sup>28</sup> Bapon caewa pia nacua siwa ecapona Etiopía nacua. Cawayu pecaponaē naeyoetha ecapona yawa yorobecapona po diwesi bayatha Isaías tina, pon Nacom peitorobi jume pepaebin.

<sup>29</sup> Nacom pia Pejumoŋe tūnaxu tatsi Felipe baraichi, jeye: “Imoxoyo ponde cawayu pecaponaē naeyo beya yawa imoxoyo caquita naecaponde”, jeichichi Felipe. <sup>30</sup> Felipe cuinaepona cawayu pecaponaē naeyo beya, ichaxota jume tane xua yoroba Etiopía nacuapin. Bapon yoroba Nacom Pejume Diwesi, xua po diwesi bayatha Isaías tina. Felipe barai bapontha jeye:



—¿Bara yaputaneme xuaunxuae yorobame? jei.

<sup>31</sup> Bapon Felipe jume notatsi, jeye:

—¿Eta bichin xua tayaputaewa icha dapon aibi pon yabara neyaputane exana barapo diwesi? jeichi Felipe.

Felipe wabatsi xua penontabinaenexa xvano xua peecaenexa ichaxota bapon eca. <sup>32</sup> Po diwesi ichaxota bapon yoroba xua baxue meje:

“Be poxonae jiwi oveja yamu capona pebexubinexa tsane, barichi tsane jiwi caponaena jiton pebexubinexa tsane.

Be cordero moya, jopa papayo poxonae na thabatsi

barichi tsane jiton moya tsane, jopa papai

tsane poxonae caitacueintinchi poxonae yawa aperutane tsaneno.

<sup>33</sup> Jiton ura exanaeinchi.

Jiwi ura exanaena.

Jopa beta yabara exanae tsainchi poxonae jiton atene tsane poxonae jopa bequein abe exanaeyo.

Jiwi jopa yabara paebi tsane xua pia pexui tatsi, poxoru jopa nantautsi tsane pexui, pemomoxino.

Jiwi barapo jiton bexubinchi”, jei Nacom

Pejume Diwesi, po diwesi Isaías tina xua ichaxota yoroba Etiopía nacuapin.

<sup>34</sup> Nexata Felipe yainyabatsi Etiopía nacuapin, jeichichi:

—Incane netsipaebare, ¿jintam Isaías yabara jei? ¿Pia coutha nayabara jei jampa? ¿Bara metha ichun yabara jeichi? jeichichi Felipe Etiopía nacuapin.

<sup>35</sup> Felipe yaputane exana Etiopía nacuapin po diwesi xua Isaías tina Jesús jume yabara. Bapoxonae nama paeba po coyene Jesús pia pexeinya jume diwesi tatsi. <sup>36</sup> Poxonae Felipe Etiopía nacuapinno namtotha ecaponabe, bapoxonae Etiopía nacuapin namchi, jeye:

—Taema meniyo eque jeba. ¿Jopa nebautisabim tsane? jeichichi Felipe.

<sup>37</sup> Felipe barai, jeye:

—Icha daxita carepaya jume cowuntame nejuntu coyenetha, methaunxuae bara cabautisabinchi, jei Felipe.

Etiopía nacuapin Felipe jume notatsi, jeye:

—Bara yabara jume cowuntan xua Jesucristo, bara Nacom pexanto tatsi, jei bapon.

<sup>38</sup> Nexata Etiopía nacuapin cobe itoroba xua duntabina pon xua cawayu pecomaecaein. Nexata duneicabe Felipe Etiopía nacuapinno. Meniyo bejonecabe. Nexata Felipe meniyotha bautisaba Etiopía nacuapin.

<sup>39</sup> Poxonae meniyo wejuinabe, Nacom pia Pejumo pe tunaxu tatsi Felipe puxanatsi. Felipe equeicha jopa taetsi Etiopía nacuapin. Saya equeicha Etiopía nacuapin juntama pona pia nacua beya. <sup>40</sup> Felipe taerucupatsi ichamonae Azoto tomaratha. Felipe daxita tomaran tamropatecapona xua pecueicueijejwa Jesucristo pia pexeinya jume diwesi tatsi, beya yacui jopa Cesarea tomaratha.

### Meje yabara poxonae Saulo jume cowunta Jesús

(Hch 22.6-16; 26.12-18)

**9** Awiya came Saulo ichipa daxita pejutebiwa pomonae Jesucristo pejume cowuntsi jiwi tatsi, pon Jesús Pecanamataxeinaein jiwi. Daxota Saulo siwa pona sacerdotemonae pia pepa pentacaponaein tatsi. <sup>2</sup> Saulo wuca: “Necare cartan judiomonae pia penacaetutsi bon pia pentacaponaei nexa. Tha tacaponaeitsi Damasco tomara beya. Icha caxinaein pomonae Jesús pejume cowuntsiwi tha jiwi pecubi botha caponaetsi Jerusalén tomaratha, pebiwino, yabuxino”, jei Saulo. <sup>3</sup> Saulo Damasco tomara beya pona. Poxonae

bara muxu pepatopae, bapoxonae pin coicha yacaincha matawacaicha matatsun uncuatabicatsi. Barapo coicha peitaboco wejopeica. <sup>4</sup>Nexata iratha jopa Saulo. Yawa jume taneno xua pejume xua baraichichi, jeichichi: “Saulo, Saulo, ζeta xua metha tamonae inta abe exaname?” jei pejume.

<sup>5</sup>Saulo jume nota, jeye: “Pon jiwi Pecanamataxeinaem, ζjintamumda?” jei Saulo. Saulo ı pejume jume notatsi, jeye: “Apara bara xan Jesús, ponxaein inta abe cana exaname tamonae. <sup>6</sup>Non-taponde, tomara be-iyande. Baraxotiya catsipaebina pocotsiwa bewa exanaename”, jeichichi Saulo.

<sup>7</sup>Pebiwi, pomonae Saulo puna poinchi bichocono pijunuwi moya umena tsipei saya ı pejume jume tane ichitha pepon jopa xapain taeyo. <sup>8</sup>Saulo nantacotaxuba asiya uncua. Poxonae necotaxuba jopa xapain taeyo. Daxota pomonae Saulo puna poinchi cobe capoinchi Damasco tomara beya. <sup>9</sup>Baraxota Damasco tomaratha Saulo eca acoibi po matabibibe. Jopa xapain necotsiyo. Barapo acoibi po matabibibetha jopa nabanaeyo, jopa apayono.

<sup>10</sup>Baxota Damasco tomaratha popona pon pejume cowantsin Jesucristo. Bapon pewun Ananías. Ananías tsita naitapeinya xeinatsi Jesús poxonae camaita. Ananías tsipaebatsi Jesús jeichichi: “¡Ananías!” jeichi. Ananías jume nota, jeye: “Jai, apara xote ecanje, pon jiwi Pecanamataxeinaem”, jei.

<sup>11</sup>Nexata Jesús Ananías baraichi: “Nontaponde. Namto beya ponde, po namto pewun Bopiya perucuiyae namto. Poxonae Judas pia botha patopame, yainyabare barapo botha. ‘ζIncane Saulo, Tarso tomaramonaepin?’ jande. Iraunxuaeru Saulo Nacom tsipaebauya.

<sup>12</sup>Saulo amachinae xua cacamaita, xua

Ananías xua itacuere wunaetsiname Saulo necobetha”, jei Jesús.

<sup>13</sup>Nexata Ananías jume nota, jeye: “Pon jiwi Pecanamataxeinaem, pinmonae netsipaeba xua pinae bapon cata abe exanatsi jinya jiwimonae, pomonae Jerusalén tomaratha jinompa. <sup>14</sup>Bapon carta capatopa xote, po carta bayatha sacerdotemonae pia pentacaponaeawi caitoroba. Saulo carta capatopa poxorur sacerdotemonae jume jejei xua Saulo pinae bara caponaena jiwi pecubi bo beya pomonae cawun ununeiba poxonae Nacom tsipaebibatsi”, jei Ananías.

<sup>15</sup>Jesús Ananías baraichi, jeichichi: “Ponde tsipei yaitama bapon bayatha Saulo itapetan. Bapon Saulo tsipaebina tajume diwesi icha nacuantha, po nacuantha jinompa pomonae jopa judiomonae naexanaeyo. Matautano tsipaebina pomonaetha pomonae jiwi itorobiya pia pepa peewatsiwichi. Matautano tsipaebina barapo tajume diwesi israelmonaetha. <sup>16</sup>Tha bexa Saulo tsita itutichi po coyene xua bewa atene tsane tajume diwesi penatsipei cueicueijeixae tsane”, jei Jesús.

<sup>17</sup>Nexata Ananías pona ichaxota Saulo eca. Poxonae joniya botha, Saulo pecobetha ainya cobethabe mata jayabatsi. Ananías namchi, jeye:

—Saulom, pon be tayapin catsicotainchi, nejume cowantsixae Jesús. Bapon Jesús pon jiwi Pecanamataxeinaein neitoroba, pon namtotha catsita naituta xuano xua catsipaebano. Jesús neitoroba nenecotsinexa tsane yawa Nacom necajuntı coyene yuca exanaenexa pia Pejumo pe tunaxutha, jei Ananías xua Saulo tsipaebatsi.

<sup>18</sup>Barapoxonae caena nainya peitacueretotha be petsebocoton taothopeinatsi. Bapoxonae equeicha caewa wunaeya daxita carepaya

tane. Saulo asiya uncua bapoxonae caena bautisabatsi. <sup>19</sup>Poxonae nabane bapoxonae cui thunei tsanaya. Be caentacabiyobe Saulo eca Damasco tomaratha ichaxota ena pomonae pejume cowuntsiwi Jesucristo.

**Meje yabara poxonae Saulo  
Jesús pejume diwesi paeba  
Damasco tomaratha**

<sup>20</sup>Caena nainya Saulo pona judiomonae pia penacaetutsi bontha tatsi. Tsipaeba barapomonaetha, jeye: “Barapon Jesús, apara Nacom Pexanto tatsi”, jei. <sup>21</sup>Daxita pomonae jume tayena barapomonaetha yabara najuntu coyene cabenaeca, nabarai, najei:

—Bara baraponda, pon cain matha Jerusalén tomaratha patopa xua abe peexanaponaenexatsi pomonae Jesucristo pewun ununaewichi poxonae Nacom wuqueibatsi. Apari bapon pon bayatha xote patope xua peteicaenexatsi pomonae pejume cowuntsiwi xuano xua pecaponaenexatsi pomonaetha pomonae sacerdotemonae pia pentacaponaewi xua Jerusalén tomara beya, najei.

<sup>22</sup>Ichitha bapon Saulo awiya jume tsacatsacapiya cueicueije. Bapon tsita itapeinya xeina xua Jesús apara Mesías. Daxota barapomonaetha judiomonae moya umenarucupa tsipei yabara najuntu coyene cabenaeca pocotsiwa xua Saulo paeba.

**Meje yabara poxonae Saulo panepa  
judiomonae pecuiyainwa**

<sup>23</sup>Poxonae ainya matabin yapucaewa judiomonae caemonae peburuya nanta xeina xua bepa bexubichei Saulo. <sup>24</sup>Saulo ichun muxu baraichi: “Bepa cabexubei ichamonae”, jei. Saulo ewatumeinchi tomara coibotontha po coiboton xua tomara peyacaincha toxoroto dutsiwa coiboton. Barapo coibotontha

Saulo ewatumeinchi daxita matabi, yawa merawino. <sup>25</sup>Ichitha Saulo merawi panepa poxonae pijimonae pitatsi yawa yacote yorecatsi pepa tomara juma deca xua tomara peyacaincha toxoroto dutsiwa juma deca.

**Meje yabara poxonae Saulo  
Jerusalén tomaratha popona**

<sup>26</sup>Poxonae Saulo Jerusalén tomaratha patopa bepa bequein baru nacaetutei Jesús pejume cowuntsiwichi tatsi, ichitha barapomonaetha Saulo cunuwatsi tsipei nanta xeina xua Saulo jopa xapain Jesús pejume cowuntsiwichi jiwana tatsi. <sup>27</sup>Ichitha Bernabé Saulo cuaranotatsi Jesús pia peitorobi jiwatsi tatsi peitabaratha tatsi. Bernabé barapomonaetha namchi, jeye: “Pinae bayatha Saulo namtotha tsita naitutatsi Jesús pon jiwatsi Pecanamataxeinaein. Matautano pinae Saulo muxu tsipaebatsi. Matautano pinae tsipaeba Jesús pejume diwesi Damasco tomaratha xua pinae cui tsacatsacapiya cueicueije”, jei Bernabé. <sup>28</sup>Daxota Saulo napopona ducuaeta Jerusalén tomaratha ichaxota Jesús pia peitorobi jiwatsi. Saulo Jerusalén tomaratha jume tsacatsacapiya cueicueije ducuaeta Jesús pejume diwesi tatsi pon jiwatsi Pecanamataxeinaein. <sup>29</sup>Saulo yabara baru natsipaeba Jesús pejume diwesi, yawa baru najume matsontsonobatsi judiomonae, pomonae xua griego jume penatsipaewi. Barapomonaetha judiomonae, ichichipa xua Saulo pebexubiawatsi. <sup>30</sup>Pomonae iru Jesús pejume cowuntsiwi tatsi jume tane, xua bepa Saulo imoxoyo bexubichei judiomonae. Daxota Saulo Cesarea tomara becayiyatsi. Baxota punaxubathopatsi. Equeicha Saulo dabe pu itorobiyatsi Tarso tomara beya.

<sup>31</sup>Daxita Jesús pejume cowuntsi jiwi tatsi juntea jinompa Judea nacuatha, Galilea nacuatharu, Samaria nacuatharu, tsipei jopa ichamonae abe exanaeyo barapomonaetha. Matautano barapomonaetha. Matautano barapomonaetha mataropeichiya nacuidubapona xua pejume cowantaponaewa Nacom. Matautano exanapona pocotsiwa Nacom ichichipa. Nacom pia Pejumope tñaxu tatsi barapomonaetha yaweinchi pejuntũ coyeneintha tatsi. Pinmonae Jesús jume cocowantapona.

**Meje yabara poxonae  
Eneas axaibi exanatsi**

<sup>32</sup>Poxonae Pedro siwa pona ducuaanaeteiba daxita tomaran Jesús pejume cowuntsi jiwi tatsi, bapoxonae yawa siwa ponano pomonaetha Jesús pejume cowuntsi jiwi pomonaetha ena Lida tomaratha. <sup>33</sup>Baxota Pedro caxina pon pecuenobinchi xua saya camatha boca. Bayatha caena xeina baxua ocho po weibe. Bapon pewun Eneas. <sup>34</sup>Pedro, Eneas baraichi:

—Eneas, Jesucristo caaxaibi exana. Asiya uncuatabare. Jinya cama xaxainta xore, jei Pedro.

Barapoxonae caena yacuina y nantacotaxuba Eneas. <sup>35</sup>Nexata Lida tomarapiwi, irũ Sarón tomarapiwino, barapomonaetha Eneas tainchi xua equeicha beta pona. Bapoxonae barapomonaetha nacui barapenta xua copiya jume cowanta pejume cowuntsinexa Jesucristo, pon jiwi Pecanamataxeinaein.

**Meje yabara poxonae Dorcas  
equeicha caewa asũ  
exanatsi poxonae tũpa**

<sup>36</sup>Irũ jame caena bayatha Jope tomaratha popona powa pejume cowuntsiwayo Jesús. Bapowa pewun Tabita. Barapo wun seicaya

griego jume wun “Dorcas” baraichi. Barapowa pocotsiwa wunae itapeta exaneiba nawita. Matautano barapowa yaweneiba pomonaetha pomonaetha peacopeibiwi. <sup>37</sup>Barapowa caena nainya atene tsanaya. Caena nainya tũpanaya. Daxita petũpaein matapaeta peru iquicatsi. Bapoxonae po tutu athabeicha baxota boichatsi. <sup>38</sup>Jope tomara Lida tomara imoxoyo nacaquita ecabe. Baxota Pedro popona Lida tomaratha. Baxota Jope tomaratha pomonaetha Jesús pejume cowuntsiwichi tatsi jume tane xua juinya Pedro Lida tomaratha popona. Bapoxonae itoroba pebinbe nacueyatabe xua bepa pinae tawabathopiyaetsi xua Pedro pewabathopiyaenexatsi Lida tomara beya. Baponbe namchibe. Pedro baraichi: “Cawaba pomonaetha Jesús pejume cowuntsiwichi tatsi. Bepa pinae anetha iyaem”, jeibe baponbe.

<sup>39</sup>Bara Pedro puna pona baponbetha. Poxonae Pedro patopa Jope tomaratha, barũ jojoniyatsi Pedro, ichaxota po tututha boca petũpaei Dorcas. Daxita pecuenta werapaewaxichi piseurixi caquita wecoyei tsumenaetsi Pedro. Yawa barapowaxi Pedro tsita itũbatsi dorobũ, camisanno xua bayatha Dorcas taxũca poxonae cataunxuae abũ popona. <sup>40</sup>Pedro pesato beitaweya daxita barapomonaetha. Pedro imoxoyo caquita eca pentabocototha. Nacomtha tsipaeba. Bapoxonae powa tũpuncua Pedro pexainya benecoya, Pedro barai bapowa, jeye:

—Tabita, asiya uncuatabare, jei Pedro.

Bapoxonae powa tũpuncua necotaxuba. Poxonae Pedro tainchi, bapoxonae nantacotecataba. <sup>41</sup>Pedro Dorcas cobe pitatsi. Asiya cuaranotatsi. Bapoxonae Pedro waba pomonaetha Jesús pia pejume cowuntsi jiwi tatsi, irũ powaxi pecuenta werapaewaxichi

piseurixi. Barapomonaē Pedro tsita ituta xua equeicha Dorcas asu. <sup>42</sup>Jope tomarapiwi jume taerucpa xua equeicha Dorcas petupaewa nacosata. Bapowa equeicha asu popona. Daxota pinmonae jume cowanta Jesús pon jiwi Pecanamataxeinaeichi. <sup>43</sup>Jope tomaratha Pedro baxota popona ainya matakabin. Pedro popona Simón pia botha tatsi pon xua duwei peboco wunaeteibin.

### Meje yabara Pedro iru Cornelio

**10** Iruru jame Cesarea tomaratha pebin warapaeya popona. Bapon pewun Cornelio. Cornelio, jame yatsicaya pia nacua tatsi Italia nacua. Bapon soldadomonaē pia pentacaponaein tatsi. Iruru soldadomonaē pia nacua tatsi Italia nacua. <sup>2</sup>Cornelio piamonaē baru jume cowanta Nacomtha. Matautano Nacom wunaē jaintatsi. Barapon Cornelio matowa yaweneiba judiomonaē, pomonaē peacopeibiwi. Bapon paratixi catsibeiba barapomonaetha. Bapon Cornelio tsipaebewa Nacomtha. <sup>3</sup>Icha mataqueitha, Cornelio mataqueitha quiripitha amachinae.

Cornelio tane Nacom pia matatsunpin tatsi be poxonaē camaita. Matatsunpin patopaeya namchi, jeye: “¡Cornelio!” jei. <sup>4</sup>Cornelio junuwiya camaitiya tane matatsunpin. Cornelio jume epa pita, jeye: “Pon jiwi Pecanamataxeinaem, zeta xua jinyatsi?” jei Cornelio. Cornelio jume notatsi matatsunpin jeye: “Bayatha Nacom cajume tane poxonaē tsipaebame pexainya beya. Cacui taneno xua yaweneibame peacopeibiwi. Nacom cayabara nanta xeina. <sup>5</sup>Cornelio, ichamonaē Jope tomara beitorobiyama pewabinexa tsainchi pon ainya wunbe pexinaein. Bapon Simón baraichi yawa Pedro baraichi. <sup>6</sup>Barapon Simón Pedro eca icha Simón pia botha tatsi pon Simón se-

icaya pon duwein peboco wunaeteibin. Barapon Simón mar mene itapatha yabo uncua”, jeichichi Cornelio matatsunpin.

<sup>7</sup>Poxonaē matatsunpin napitaba, barapoxonaē Cornelio ichamonaē waba, pomonaē xua pia botha petanacuichiwichi. Iru soldadomonaēin waba, pon xua pia botha tanacuitatsi. Barapon soldadomonaēin pejuntu coyene xanepanaein Nacomtha. <sup>8</sup>Barapomonaetha tsipaebatsi pocotsiwa bayatha Cornelio tsipaebatsi matatsunpin. Cotacaya Cornelio itoroba barapomonaē Jope tomara beya.

<sup>9</sup>Icha mataqueitha barapomonaē warapa Jope tomara beya. Poxonaē cataunxuae itiya pona poxonaē mateinyaxae, poxonaē bara imoxoyo patichaba, bapoxonaē iruru Pedro bo matatupa beecoinyarū, po bo matatupa pereca. Nacom tsipaebawiya poxonaē bayatha mataeinyaxae tsuxubi. <sup>10</sup>Pedro bichocono jainpeca, bepa bequein xaei. Ichitha poxonaē awiya cataunxuae tasetatsi, Pedro tsita naitutatsi be poxonaē camaita.

<sup>11</sup>Pedro athabe necoicha xua peitaboco nayausanaxuba. Yawa taneno xua pin paparuwa pexainya betaruneicatsi, be xua jiton nantiya caruneicabe.

<sup>12</sup>Bapoxonaē barapo paparuwatha Pedro tane daxita xua xuan saya pecobetha pona be cawayun. Yawa tane daxita xua xuan saya petaxutha bobenapona be maquibun. Yawa tane daxita xua xuan saya petompacuetontha bobenapona be jomon. Matautano tane daxita xua xuan saya yapupuna be peyapupunaewi. <sup>13</sup>Nexata Pedro peitabocotha jume tane xua namchi, jeye: “Pedro asiya uncuatabare. Pon xua ichichipame, pire. Moya bexore. Yawa xaema”, jei barapo jume.

<sup>14</sup>Nexata Pedro jume nota, jeye: “Bara, bayatha apara jopa bapana camatsawan xaeinyo, xua tamonaē jopa

copatsiyo xua pexaewa”, jei Pedro.  
<sup>15</sup>Equeicha Pedro jume tane pejume xua tsipaebatsi, xua jeichichi: “Xua Nacom catsijainya exana, baraxua jopa camat-sawa jaintocuaetsi”, jeichichi.

<sup>16</sup>Pedro matha acoibi po jumeyobe tsipaebatsi baxua. Bapoxonae paparuwa caibe juinya peitaboco beicha. <sup>17</sup>Xua Pedro baraichi Nacom, baxua Pedro yabara nanta xeina nawita: “¿Eta xua metha Nacom yabara nejumichira?” na-jei. Pomonae Cornelio itoroba, barapomonae i dapo bon yainyainyaba tsiniya: “¿Incane Simón pia bo?” jei. Bapoxonae bapomonae pata Simón pia curara coibototha tatsi. Poxonae barapomonae pata, Pedro cataunxuae yabara nanta xeina xua tsipaebatsi xua Nacom tsipaeba. <sup>18</sup>Poxonae Cornelio pijimonae tatsi pata baxota, pin jumetha namchi, jeye: “¿Incane Simón pon icha wun ‘Pedro’ baraichi? ¿Baxota bara ecara?” jei.

<sup>19</sup>Awiya came Pedro baxua yabara nanta xeinequiya xua pocotsiwa bapon tane. Nexata bapoxonae Nacom pia Pejumope tunaxu tatsi Pedro baraichi, jeye: “Pedro, nejume taema. Acoibi poyobe pebiwi cawenawenei tsompae. <sup>20</sup>Nontaponde nainya ira bedunatabareinca. Barapomonae naponde, beitatema napontabare, yaitama barapomonae itoroban”, jeichichi Pedro.

<sup>21</sup>Bara nexata Pedro ira bedunatabareca. Pedro barai barapomonae, jeye:

—Apara bara xan, po jiton xua pana newenawenei tsompaem. ¿Eta xua metha papatame? jei.

<sup>22</sup>Barapomonae Pedro jume notatsi, jeye:

—Papatan yaitama Cornelio, pon soldadomonae pia pentacaponaein tatsi, bapon pana itoroba. Barapon pejuntu coyene xanepanaein. Barapon Nacom jume cowuntatsi. Iruru daxita

judiomonae barapon baru cui itura jineibatsi yawa antobetsi. Pinae Nacom pia matatsunpin tatsi Cornelio itorobatsi Simón Pedro wabare nejume taenexa tsane jei pinae, jei barapomonae, xua Pedro tsipaebatsi.

<sup>23</sup>Nexata Pedro waba barapomonae xua petamaitenaewa tsainchi barapo botha. Icha matababitha piawa xaxainta xua caponaena. Bapoxonae Pedro napona barapomonae. Iru ichamonae naponano, pomonae iru Jesús pejume cowuntatsi tatsi, pomonae xua ena Jope tomaratha.

<sup>24</sup>Icha matababitha pata Cesarea tomaratha. Baraxota Simón Pedro ewatatsi. Cornelio pia matababitha-omonae pewabixae baru ewateca, yawa pia jiwi tatsino. <sup>25</sup>Poxonae Pedro Cornelio pia botha tapatopatsi, Cornelio Pedro jacobatsi. Bapoxonae Cornelio Pedro peitabaratha pentabocototha tauncuatsi, pewuna jainchinexa tsainchi Pedro. <sup>26</sup>Ichitha Pedro, Cornelio asiya cuaranotsiya baraichichi, jeye:

—Cornelio, nontaponde. Saya apara xan pebin naexanan icha xam ichim barichin apara, jei Pedro.

<sup>27</sup>Poxonae Pedro natsipaebiya jonyabe, baxota Pedro pin bicheito tane xua nacaetuta. <sup>28</sup>Nexata Pedro barai barapomonae, jeye:

—Bara bayatha payaputaneme xua waxainchi judiomonae jiwichi wacui coyenewa xeinatsi xua jopa nacui yabara copatichi xua wabaruru nacaetutebiwa pomonae jopa judiomonae naexanaeyo. Matautano jopa nacui yabara copatichi xua pia bonthano waponeibiwa. Ichitha Nacom aunxuae necuiduba xua pinae jopa bewa ichamonae catsapiwi jaintin tsane. <sup>29</sup>Daxota bichoina patopan yaitama pinae pana wabame. ‘Bara’, jopa janyo.

Methaunxuae paca yainyabinchi: ¿Eta xua metha pana tsiwabame? jei Pedro.

<sup>30</sup>Nexata Cornelio, Pedro jume no-tatsi, jeye:

—Petain cuatro po matabibibe tsuxubi, quiripitha xote tabotha poxona yabara nainbotan xua Nacom tsipaeban barapoxona matatsunpin jemeicha tabotha patopa. Barapo matatsunpin paparuwa nama xatata po paparuwa bichocono daedaena. <sup>31</sup>Matatsunpin nebarai: ‘Cornelio, bayatha Nacom cajume tane poxona tsipaebame pexainya beya. Cacui taneno xua yaweneibame peacopeibiwi daxota Nacom cayabara nanta xeina’, jei. <sup>32</sup>Nebaraino: ‘Ichamona Jope tomara be itorobiyama, pewabinexa tsainchi pon ainya wunbe pexeinaein. Bapon Simón baraichi, yawa Pedro baraichi. Pedro eca ichun Simón pia botha tatsi, pon Simón pon seicaya duwein peboco wunaeteibin. Barapon Simón mar mene itapatha yabo uncu’, nejei. <sup>33</sup>Daxota nainya itoroban ichunbe acoibi poyobe yaitama apara cawabatsi. Barabu patopame. Daxita paxan xote Nacom peitabaratha pajinompan. Matautano paca ewatatsino tsipei yaitama tha paca jume taetsi xua Nacom, pon Pecanamataxeinaein, cana cajume itoroba, jei Cornelio.

**Meje yabara poxona Pedro pin diwesi paeba Cornelio pia botha tatsi**

<sup>34</sup>Pedro barapomonaetha namchi, jeye:

—Anoxuae yaputan xua Nacom jopa cana exanaeyo jiwi xua ichun ainya cui xua beyacaincha ichun. Nacom daxita jiwi tsita najupatsi. <sup>35</sup>Daxita nacuantha pomona xua Nacom wuna jaintatsi xuano xanapanaya exanano, Nacom antobe barapomona. <sup>36</sup>Bayatha payaputaneme xua Nacom

Pejume Diwesi nacariwesi itoroba paxantha pomona Israel pia pemomoxi susato jiwi tatsi panxaein. Barapo pexeinya diwesi jume juntema jinompa pana exana poxona Jesucristo pajume cowuntan. Nacom Jesús Pecanamataxeinaein exanatsi daxita carepaya jiwi nexa. <sup>37</sup>Paxam bara payaputaneme xua Juan Jesús yabara cueicueijeichi yawa bautisaba jiwi Galilea nacuaatha. Bapoxonae iruru Jesucristo tamropata pitaba xua cueicueije Galilea nacuaatha yawa daxita Judea nacuaatha. <sup>38</sup>Matautano bara payaputanemeno xua Nacom cata pia peayapusu itorobi coyenewa, Jesucristo Nazaret tomarapin catatsi. Yawano Jesucristo nacana jumope tunaxu catatsi. Bapoxona Jesús daxita carepaya tomarantha popona ducuaeta. Yawa axaibi exana ducuaetano peatene jiwi. Yawa taitaweta ducuaetano pomona xua cauri pexeinaewi. Daxota bapon baxua beta exana Nacom pebaru poponaexae. <sup>39</sup>Bayatha pacui tan daxita carepaya xua Jesús exana Judea nacuaatha, Jerusalén tomarathano ichaxota jinompa judi mona. Bapoxona nama Jesús naetotha cobe matatabarutatsi, xua poxona tupa exanadutatsi naetotha. <sup>40</sup>Poxona acoibi po matabibibe tsuxubi Nacom petupaein equeicha asu exana. Matautano bapon pana netsita naituta exana. <sup>41</sup>Ichitha daxita jiwi jopa tsita naituta exanaetsi. Saya paxan pana netsita naituta exana. Nacom pana itapeta pia patayopichinexa ichamonaetha pocotsiwa Jesús exana xuano xua paebano. Paxan Jesús pabarü naban, matautano pabarü apanno poxona equeicha asu popona. <sup>42</sup>Jesús pana itoroba daxita nacuantha pata paebinxu tsane Nacom Pejume Diwesi, xuano bapon pejume

diwesino. Nacom cana exana, Jesucristo cana exanatsi be pon jiwi peyabara paebin penatsicuentsiwa xua abe peexanaexae. Bexa tsane Jesús daxita jiwi nanantaustiya jiwana torotsiya itawetsina, pomonae cataunxuae jinompa yawa pomonae bayatha werapano. <sup>43</sup> Bayatha pomonae Nacom pia peitorobi jume pepaebiwi Jesús pejume diwesi paeba. Barapomonae namchi: ‘Daxita pomonae Jesús pejume cowantsiwichi barapomonae Nacom yabara juntemainaena abe pia peexanae cuiuru coyenein tatsi Nacom pia peayapusuwathaxae’, jei barapomonae, jei Pedro.

**Meje yabara poxonae pomonae jopa judiomonae naexanaeyo pejuntũ coyeneintha tapatatsi Nacom pia Pejumope tũnaxũ tatsi**

<sup>44</sup> Poxonae cataunxuae Pedro cueicueijei, bapoxonae Nacom pia Pejumope tũnaxũ tatsi tapatatsi pomonae jume tane xua Pedro paeba. <sup>45</sup> Judiomonae, Jope tomarapiwi, pomonae pejume cowantsixae Jesucristo, barapomonae Pedro puna poinchi. Barapomonae daxita yabara najuntũ coyene cabenaeca xua irũ barapomonae pomonae jopa judiomonae naexanaeyo irũ pejuntũ coyeneintha taenatsi Nacom pia Pejumope tũnaxũ tatsi. <sup>46</sup> Judiomonae yaputane xua bara xaniwaicha Nacom pia Pejumope tũnaxũ tatsi tapatatsi pomonae jopa judiomonae naexanaeyo. Yaputane tsipei barapomonae barompaya tsanaya icha jumeintha cueicueijei. Ichitha barapomonae jopa xapain najume copi yaputaeyo. Judiomonae jume taneno xua pomonae jopa judiomonae naexanaeyo Nacom wũnae jaintatsi. <sup>47</sup> Pedro namchi, jeye:

—Barapomonae apara Nacom pia Pejumope tũnaxũ tatsi xeina icha wax-

ainchi ichichi. Jiton dapon aibi pon jeye: ‘Jopa bewa bautisabi, apara pomonae jopa judiomonae naexanaeyo’, xua pon pejeiwa, jei Pedro.

<sup>48</sup> Pedro cui itoroba judiomonae. Pedro namchi, jeye: “Pabautisabare barapomonae pomonae jopa judiomonae naexanaeyo. Jesucristo pewũn pawũn taibare poxonae pabautisabare”, jei Pedro. Bapoxonae pirapae barapomonae, pomonae xua aena taenatsi Nacom pia Pejumope tũnaxũ tatsi, Pedro apusiwatsi xua jopa warapae tsane yawa xua caeto abũ ecaenano.

**Meje yabara poxonae Pedro diwesi tsipaeba pomonaetha pomonae Jesús pejume cowantsi jiwi Jerusalén tomaratha**

**11** Jesús pia peitorobi jiwi tatsi irũrũ pomonae pejume cowantsiwi Jesús, pomonae ena Judea nacuatha, barapomonae daxita jume tane xua irũrũ pinae pomonae jopa judiomonae naexanaeyo bayatha jume cowanta Nacom Pejume Diwesi. <sup>2</sup> Poxonae Pedro Jerusalén tomara bewarapiya, judiomonae pomonae xua jume cowanta xua ainya cui Jesús pejume cowantsi jiwi tatsi pewi thabiwa tsainchi, barapomonae Pedro jume daunweya tsipaebatsi. <sup>3</sup> Pedro baraichi, jeye:

—¿Eta xua metha barapomonae siwa poname pomonae jopa judiomonae naexanaeyo? ¿Eta xua metha naxaneme barapomonaetha? jei judiomonae.

<sup>4</sup> Nexata Pedro diwesi eetapona xua cueicueijei barapomonaetha. Po diwesin eetapona, barapo diwesin xua poxonae siwa pona pomonae jopa judiomonae naexanaeyo. Pedro namchi:

<sup>5</sup>—Poxonae Jope tomaratha Nacom tsipaeban, pin paparuwa tan be poxonae camaitan. Barapo paparuwa peitaboco weruneica be pemutontha nantiya ya-



caincha opi queraba. Taxainya duneica. <sup>6</sup>Barapo paparuwatha tan xua bobena. Baraxuan tan xua saya pecobetha pona be cawayun. Baraxuanno tan xua saya petaxutha bobenapona be maquibun. Baraxuanno tan xua saya petompacuetontha bobenapona be jomon. Baraxuanno tan xua saya yapupuna be peyapupunaewi. <sup>7</sup>Peitabocotha jume tan xua nebarai: 'Pedro asiya uncuatabare. Pon xua ichichipame, pire. Moya bexore. Yawa xaema', nejei. <sup>8</sup>Jume notan nexata: 'Bara, bayatha apara jopa bapana camatsawan xaeinyo xua tamona jopa copatsiyo xua pexaewa', jan. <sup>9</sup>Equeicha peitaboco wenebaraichica: 'Xua Nacom catsijainya exana, baxua jopa camatsawa jaintocuaetsi', nejei. <sup>10</sup>Acoibi po jumeyobe nebarai. Saya u barapo jumethabe nebarai. Bapoxona paparuwa equeicha peitaboco beicha caibe caicha. <sup>11</sup>Paparuwa caibe juinya, iruru pebiwi acoibi poyobe pataru. Bapoyobe Cesarea tomarapiwi, taxantha pata. Barapo acoibi poyobe, pomona Cornelio itoroba. <sup>12</sup>Nacom pia Pejumo tñaxu tatsi nebarai: 'Napuna ponde. Beitatema pontabare', nejei. Iru nebaru pona seis poyobe Cesarea tomara beya pomona pejume cowantsiwi Jesús. Pajoniyani Cornelio pia botha tatsi. <sup>13</sup>Cornelio pana netsipaeba xua pinae pia botha tapatopatsi matatsunpin. Matatsunpin namchei: 'Pebiwi Jope tomara beitorobiyama, pewabinexa tsainchi pon xua ainya wunbe xeina, Simón yawa Pedro. <sup>14</sup>Barapon Simón Pedro paca tsipaebina Jesús pejume diwesi, paca necayawa capanenebiyaenexa tsane Nacom', jei pinae matatsunpin poxonae pinae Cornelio tsipaebatsi, jei Pedro barapomonaetha. <sup>15</sup>Pedro equeicha namchi:

—Poxonae Jesucristo pejume diwesi paebaxoyan Corneliobarutha, barapoxona Nacom pia Pejumo tñaxu tatsi

tapatatsi barapomonaetha. Icha cain painta ichi, barichi pomonaetha Nacom nacana jumope catsiba. <sup>16</sup>Bapoxona nantana pitaban Jesús pejume, poxona pana barai: 'Juan saya u meratha bautisaba. Ichitha Nacom seicaya barompaya pia cuitha paca bautisaba. Ichitha Nacom seicaya barompaya pia cuitha paca bautisabina. Bapoxona painya juntu coyeneintha pacata patsina Nacom pia Pejumo tñaxu tatsi', jei Jesús. <sup>17</sup>Xaniwaicha beta yaputan xua Nacom nacana jumope tñaxu cata barapomonaetha pomona jopa judiomona naexanaeyo, icha cain ichi poxona Nacom nacana jumope tñaxu cata pata xantha poxona Jesucristo pajume cowuntan. Daxota Nacom jopa cui yancatabinyo poxona ichichipa exana barapomonaetha, jei Pedro.

<sup>18</sup>Poxona Jesucristo pejume cowantsi jiwi, pomona ena Jerusalén tomaratha, poxona baxua jume taerucpa moya umenarucpa. Matautano Nacom wuna jaintatsino. Barapomona namchi, jeye:

—¡Maisa wuna, iru Nacom nacana cui cata pomonaetha pomona jopa judiomona naexanaeyo xua barapomona pejume cowantsiwa tsaneru Jesús, yawa xua juntea pejinompaewa tsaneru! Baraxua Nacom ichichipa xua barapomona najuntu cui coyene barapenta xua abe, petaxeinaenexa tsainchi peajuntuyapusuwa, po peajuntuyapusuwa xua jopa weraweracaeyo, jei barapomonaetha.

**Meje yabara poxona Jesús  
pejume cowantsi jiwi tatsi  
jinompa Antioquia tomaratha**

<sup>19</sup>Jesucristo pia pejume cowantsi jiwi tatsi ducpa, tsipei peanaepanaewi yotaba, poxona po matabitha Esteban bexotsi. Barapomona tsanarucpa, ichun Fenicia nacua

beya, ichun Chipre nacua tunaeto beya, ichun Antioquia tomara beya. Barapomonaе saya judiomonaetha cueicueijeі Jesucristo peјume diwesi. <sup>20</sup>Ichamonaе, pomonaе peјume cowantsiwi Jesus, Chipre nacua tunaetopiwi, Cirene tomarapiwino, barapomonaе Antioquia tomaratha pata. Daxita barapomonaе tsipaeba pomonaetha pomonaе jopa judiomonaе naexanaeyo Jesus peјume diwesi tatsi pon jiwі pia Pecanamataxeinaeinchi. <sup>21</sup>Barapomonaе yawenatsi nawita Nacom pia peayapuswa tatsi. Daxota pin bicheito pomonaе jopa judiomonaе naexanaeyo, barapomonaе jume cowantatsi Jesus, pon jiwі Pecanamataxeinaeinchi.

<sup>22</sup>Jerusalén tomaratha, Jesucristo peјume cowantsi jiwі tatsi, barapomonaе, jume tane xua Antioquia tomarapiwi jume cowanta Jesucristo pomonaе jopa judiomonaе naexanaeyo. Daxota Bernabé Antioquia tomara beitorobiyatsi. <sup>23</sup>Poxonaе Bernabé Antioquia tomaratha patopa be ita cui wunaetsi xua Nacom yawena barapomonaetha. Bapoxonaе Bernabé juntu coyene weiweina. Bernabé barapomonaе barai, jeye: “Paajuntu-coyenyapusya jinompare Nacomtha. Matautano Nacom ajuntuyapusya pajume cowantaponde”, jei Bernabé. <sup>24</sup>Bernabé peјuntu coyene xanepanaein. Bapon juntu coyene yucatsi Nacom pia Peјumope tunaxu tatsi tsipei daxita i daxuan exana pocotsiwa Nacom itoroba. Matautano bichocono Nacom jume cowantatsi. Daxota pin bicheito jume cowanta Jesus, pon jiwі Pecanamataxeinaeinchi.

<sup>25</sup>Nexata Bernabé Tarso tomara bewarapiya, pewenaweneinexatsi Saulo. <sup>26</sup>Poxonaе Saulo caxinatsi baxota, Antioquia tomara bebaru warapiyatsi Saulo. Baraponbe cae wei

naecabe baxota, cuidubabe pin bicheito xua Jesus peјume diwesi. Baraxota jiwі matha Jesus pijimonaе tatsi wun dutatsi xua Antioquia tomarapiwi wun duta xua jeye: “Cristobarumonaе”, jeichichi barapomonaе pomonaе Jesus pijimonaе tatsi.

<sup>27</sup>Poxonaе Bernabé iru Saulo cataunxuae cuidubapoponabe Antioquia tomaratha, Nacom pia peitorobi jume pepaebiwi baxota pata, Jerusalén tomara werendena. <sup>28</sup>Bara caein jiwana pewun Agabo.

Agabo asiya uncuа barapomonaetha. Bapon wunaе tsiwanaya paeba. Agabo yaputane exanatsi Nacom pia Peјumope tunaxu tatsi. Agabo namchi, jeye: “Bexa tsane daxita carepaya nacuantha jainbo tsane”, jei Agabo. Baraxua xainyei poxonaе jumba matha Claudio romanomonaе itorobiya pia pepa peewatsinchi tatsi naexana, bapoxonaе pin jainbo tsurucuae.

<sup>29</sup>Daxota Jesus peјume cowantsiwi tatsi, pomonaе ena Antioquia tomaratha, ichipa yawena pomonaе iru peјume cowantsiwixae Jesus pomonaе peenaexae Judea nacuatha. Daxota barapomonaе pomonaе Jesus peјume cowantsiwixae pebruya nanta xeina xua paratixi taitorobina. Daxita barapomonaе carepaya paratixi cata be xua po coyene cobe itacupatsi xua pecatsiwa. <sup>30</sup>Barapomonaе baxua exana. Barapo paratixi Bernabé iru Saulo caitorobatsibe pitiri jiwі nexa xua Judea nacua beya.

**Meje yabara poxonaе Santiago  
bexotsi iru xua poxonaе Pedro  
jiwi pecubi botha capoinchi**

**12** Barapoxonaе Herodes pon Judea nacuapiwi peyanacua ewatsinchi, bapon tamropata pitaba xua pomonaе Jesus peјume cowantsiwi tatsi peraxa exanatsi. <sup>2</sup>Herodes

itoroba pia jiwi, xua pin cusitha Santiago pebexubiwatsi, pon Juan peweicho tatsi. <sup>3</sup>Herodes jume tane xua judiomonae tsita xanepanatsi xua Santiago bexotsi. Daxota Herodes cui itoroba piamonae xua Pedro pewaetabiwatsi xua pecaponaenexatsi jiwi pecubi botha. Baxua exana poxonae Pascua wun matababintha poxonae jiwi pan xane po pan xua jopa xeinaeyo levadura xua pocotsiwa cotowa exana. <sup>4</sup>Poxonae Pedro jiwi pecubi botha eca, soldadomonae yapucaumena, Pedro yapucaumeinchi. Soldadomonae, cuatro po bicheito matabuxuyobe. Cae matabuxuyo xeina be cuatro poyobe. Be cae matabuxuyo tamroropatapona poxonae yacaincha umeneibatsi Pedro. Herodes yabara nanta xeina xua peexanaewa tsane xua Pedro pin bicheito peitabaratha cuaranotinchi pepa tomaratha poxonae Pascua wun matababin yapu caewina. <sup>5</sup>Awiya came Pedro jiwi pecubi botha eca. Ichitha Jesús pejume cowuntsiwichi jume daunweya wuca Nacom, Pedro tawucatsi.

### **Meje yabara poxonae Nacom, Pedro capanepatsi jiwi pecubi bo weya**

<sup>6</sup>Herodes merawi nanta xeina xua baya tsane Pedro cuaranotinchi pepa bicheitha peitabaratha. Barapo merawitha, abu cataunxuae Pedro nantiya cobe nain camaituncuatsibe soldadomonaepinbe. Iru soldadomonaepinbe yacaincha uncuabe jiwi pecubi bo boupa. <sup>7</sup>Caena nainya Jesús pia matatsunpin tatsi Pedro tsita naitutatsi. Jiwi pecubi botha pin coicha pentha tsuxubi bichocono. Matatsunpin Pedro yaubaxotsi. Nexata Pedro nacosataxuba. Matatsunpin namchi, jeye: “Pedro, nanainya nonta ponde”, jei matatsunpin. Bapoxonae Pedro nantiya cobe nain jopeicabe iratha. <sup>8</sup>Bapoxonae

matatsunpin Pedro baraichi, jeye: “Coreinya bocoto bichocono nacoto epa catutabare. Nainya nataxu xatare jinya nenataxu xatatsiwa”, jei. Baraxua Pedro exana. Equeicha matatsunpin namchi, jeye: “Pire jinya camisa po paparuwa xua nainya weruyame. Antha nepuna ponde”, jei matatsunpin.

<sup>9</sup>Nexata matatsunpin Pedro pecoiboto bepuna joniya, pesato beya. Ichitha Pedro xapain jopa naita cui coyene taeyo xua jiwi pecubi bo wepuna joniya matatsunpin. Saya nanta xeina be amachinae. <sup>10</sup>Pedro iru matatsunpin xenta jonyabe soldadomonaepin pon yacaincha uncuabe ichaxota Pedro etatsi. Bapoxonae equeicha icha soldadomonaepin xenta jonyabe pon ewatuncua pepa boupa xua pesatotha. Pedro iru matatsunpin peboupa penainwa xua peyacaincha dutsiwa bara wejonyabe tomara beya. Barapo boupa jemeicha nacoibo yausaranaxuba. Pedro matatsunpinno namtotha ponabe. Poxonae icha namtotha patopabe bapoxonae jemeicha matatsunpin Pedro cuenta aichuru-cuaetsi tomara namtotha.

<sup>11</sup>Barapoxonae Pedro xaniwaicha naita cui coyene tane. Bapon nabarai, jeye: “Bara yatsicaya xainyei Jesús pia matatsunpin inta itoroba tsipei metha bepa necapanepae Herodes pia xainya weya tatsi, xuanu xua judiomonae pia xainya weya tatsi, pomonae ichichipa abe inta peexanaewa”, najei.

<sup>12</sup>Poxonae baxua nacui cananta xeina, Pedro pona María pia bo tatsi beya. Bapowa Juan pena tatsi. Juan icha wun xeina, Marcos. María pia botha tatsi pin bicheito nacaetuta pewuqueibinexa Nacomtha. Baxota Pedro patopa. <sup>13</sup>Pedro curara coiboto dadacata. Yabuyo powa pewun Rode muxu naya pia yaputaetsi pon patopa. <sup>14</sup>Poxonae barapowa Pedro jume copi tainchi xua wawai abu jopa saranaxubiyo peboupa. Bapowa bi-

chocono jũntũ coyene weiweina daxota caibe cuinaya piamonae tsiwũn caya. Namchi:

—Pedro curara coibototha uncua, jei Rode.

<sup>15</sup>Barapomonae namchi, jeye:

—¡Apara camatayaiba! jei.

Equeicha bapowa jume nota, jeye:

—¡Babara xainyan, Pedro bapon yat-sicaya! jei.

Equeicha barapomonae jume nota, jeye:

—Metha apara Pedro pia matatsunpin tatsi, pon yantatsi, jei.

<sup>16</sup>Awia came Pedro peboupa dacadacatuncua. Poxonae barapomonae peboupa saranaxoya, Pedro yabara najũntũ coyene benaecaeya tainchi. <sup>17</sup>Pedro pecobetha moya jume matawenta. Cotacaya Pedro diwesi tsipaeba barapomonae xua bayatha capanepatsi jiwi pecũbi bo weya, xua Jesús capanepa pon jiwi Pecanamataxeinaeinxae tatsi. Pedro namchi, jeye:

—Barapo diwesi Santiago patsipaebare irũ ichamonae patsipaebare pomonae Jesús pejume cowũntsiwi tatsi, jei Pedro.

Barapoxonae Pedro icha namto be-ia.

<sup>18</sup>Poxonae baya pentha tsina soldadomonae nabenaenompa tsipei jopa yabara yaputaeyo po coyene xua Pedro aichurucuae. <sup>19</sup>Herodes soldadomonae itorobatsi xua jeitatsi Pedro. Ichitha jopa Pedro taebichi. Daxota Herodes cana exana xua barapo soldadomonae natsiaenae cuenta pepanepaexae Pedro. Barapoxonae Herodes icha soldadomonae cui itorobatsi xua barapo soldadomonae jutebinchi. Barapoxonae Herodes Judea nacua wewarapiya, Cesarea tomaratha pepoponaenexa.

### Meje yabara poxonae Herodes tũpa

<sup>20</sup>Herodes pon Judea nacuapiwi peyanacua ewatsinchi, bapon Tiro tomarapiwi casebatsi irũ Sidón tomarapiwino casebatsi. Bequein bayatha copiya Herodes itoroba pexaewa barapo tomarabe nexa ichitha anoxuae jopa daichiyo poxoru Herodes caseba barapo tomarapiwibe. Daxota Sidón tomarapiwi irũ Tiro tomarapiwino itoroba pebiwi pesiwa ponaenexa tsainchi Blasto pon peainya cui jiton xua Herodes pon tanacuitatsi. Barapomonae ichichipa xua Herodes xaniwaicha caewa be piamonae exana, daxota barapomonae Blasto tsipaebatsi xua barapomonae peyabara jume yawenaenexatsi xua poxonae petsipaebinexatsi Herodes.

<sup>21</sup>Daxota Herodes wũn duta, barapo matabi, po matabitha xua Herodes siwa ponaeinchi barapomonae. Poxonae matabi tsuxubiba barapo matabitha Herodes pia paparuwa nama xatataba po paparuwa tsofia, pocotsi paparuwan nama xataba pentacaponae. Bapoxonae pia peccaewatha eca. Herodes piamonaetha tsipaeba. <sup>22</sup>Nexata barapomonae wawai Herodes baraichi, jeye: “¡Apara xua bapon paeba, jopa be pebinyo, apara bara nacom tsecae!” jei barapomonae.

<sup>23</sup>Bara caena bapoxonae Nacom pia matatsunpin tatsi Herodes iratha xotsi. Iratha xotsi yaitama bapon jopa Nacom barũ cui itura jinaetsi poxonae pia coya Nacom naexana. Oro wũn caewita poinchi. Jana caewita poinchino. Tsapita poinchino. Herodes tũpanaicha. <sup>24</sup>Pomonae xua jume cowũnta Jesús, barapomonae tajũ tsipaebapona Nacom Pejume Diwesi daxita nacuantha. Daxota daxita pinmonae jume cowũntatsi Jesús.

<sup>25</sup>Poxonae Bernabé Saulono nacui wetabe baxua, Jerusalén tomara we-warapiyabe. Antioquía tomara bewarapiyabe. Juan Marcos baru warapatsi.

**Meje yabara poxonae  
Bernabé Saulono Nacom  
Pejume Diwesi caponabe**

**13** Baraxota Antioquía tomaratha jiwana jinompa pomonae pejume cowantsiwi Nacom pomonae Nacom pia peitorobi jume pepaebiwi iru pomonae jiwu pecuidubiwi Moisés pia peitorobi coyene. Barapomonae meje: Bernabé iru Simón pon icha wunno, Negro baraichi, iru Lucio Cirene tomarapin ecaru. Iru Saulo ecaru. Iru Manaén ecaru, pon Herodes bayatha caepinbe naexanabe xua nacuara wichaba ponabe. Herodes Galilea nacuapiwi peyanacua ewatsinchi naexana. <sup>2</sup>Caentacabi, poxonae barapomonae Nacom pejume coyene canatsipaeba exana, yawa yabara nainbota, barapoxonae Nacom pia Pejumope tunaxu tatsi barapomonae tsipaebatsi, jeye: “Paitorobare Bernabé, Saulono, petsipaebinexa tsanebe Nacom pia pexeinya jume diwesi tatsi po penacuichiwa baponbe bayatha tsiwabanbe”, jei Nacom pia Pejumope tunaxu tatsi.

<sup>3</sup>Nexata poxonae xua Nacom wuca najume weta, xuano poxonae weta xua yabara nainbota, barapoxonae Bernabé Saulono pecobetha mataboco jayabatsibe. Bapoxonae napeyabatsibe.

**Meje yabara poxonae Nacom pia  
peitorobi jiwu tatsi, Nacom pia diwesi  
tatsi cueicueijeji Chipre tunaetotha**

<sup>4</sup>Bapoxonae Bernabé Saulonuru itorobatsibe Nacom pia Pejumope tunaxu tatsi. Seleucia tomara bewarapiyabe. Bapoxonae ponabe jeratha po naetha po nae pin nae, petunaeto beya. Barapo tunaeto pewun Chipre. <sup>5</sup>Poxonae patopa Salamina

tomaratha, Nacom pia pexeinya diwesi tatsi cueicueijeji judiomonae pia penacuetutsi bontha tatsi. Juan Marcos bichi napona Bernabé Saulono peyawenaenexatsi.

<sup>6</sup>Barapoyobe daxita barapo tunaeto matawacaicha enapona petsipaebinexa Nacom pia pexeinya jume diwesi tatsi. Bapoxonae Pafos tomaratha pata. Barapo tomaratha bapoyobe caxinabe judiomonaepin pon pewun Barjesús. Bapon Barjesús mara pexeinaein, pon saya naeraba paeba. Bapon Barjesús namchi, jeye: “Xan tacueicueijejin Nacom nexa”, jei. <sup>7</sup>Barapon napuna poneiba pontha pon Chipre tunaetopiwi peyatunaeto ewatsinchi ponxae pewun Sergio Paulo. Bapon Sergio Paulo peyaputaen. Bernabé Saulono wabatsibe pia jume taetsibe xua Nacom Pejume Diwesi tatsi pepaebiwa.

<sup>8</sup>Barapon pon mara pexeinaein icha wun xeina, griego jume, “Elimas”, baraichi. Bapon Bernabé Saulono jume yancatabatsibe, tsipei jopa ichipaeyo xua Sergio Paulo jume cowuntsina Nacom Pejume Diwesi. <sup>9</sup>Nexata Saulo, pon icha wunxae Pablo, Nacom pia Pejumope tunaxu tatsi juntu coyene yucatsi. Pablo bichocono pexainya beya tane. <sup>10</sup>Pablo barai, jeye:

—¡Barjesús, xam pon jiwu nemuxuitorobeibin, abe neexanaein, cauri pexantom, daxita xua pewunaewan neaichaxaibim! ¿Eta xua daichim jiwu cui yancababeibame xua pejume cowunteibiwa Jesús, pon jiwu Pecanamataxeinaeinchi? <sup>11</sup>Bara anoxuae Nacomtha natsiaenae cuentsiname. Daxota caitacuere piontababa. Jopa caeto pesato taem tsane, beya poxonae matapainya Nacom copatsina xua netaewa tsane, jei Pablo.

Bapoxonae Elimas nainya itata quirei. Bapon ichawa beya ichun nacobena jayaba, pecobe caponaenexatsi

peitata nacutsinxae. <sup>12</sup>Poxonae Sergio Paulo baxua tane bapoxonae bapon Nacom jume cowantatsi tsipei tsita wunaetsi pocotsiwa Pablo Bernabeno yabara cuidubabe Nacom pon jiwi Pecanamataxeinaeinchi.

**Meje yabara poxonae Bernabé  
Pablono Antioquía tomaratha  
ecabe xua Pisidia nacuatha**

<sup>13</sup>Pablo iru pijimonae tatsino Pafos tomara wewarapiya. Perge tomara be-iyiya jeratha, po nae pin nae. Perge tomaratha pata, Panfilia nacuatha. Barapo nacuatha daxita barapomonae Juan Marcos wu pona. Barapoxonae Jerusalén tomara bewarapiya. <sup>14</sup>Nexata Pablo iru pijimonae tatsi Antioquía tomara be-iyiya. Barapo tomara Pisidia nacua nacacuita ecabe. Barapo matabitha, po matabitha pentaquei seicae matabitha, judiomonae pia penacuetusi botha tatsi pata, yawa enoundeca. <sup>15</sup>Baraxota ichun yoroba Moisés pia peitorobi coyene diwesi tatsi. Yawa yoroba xua Nacom peitorobi jume pepaebiwi paeba. Bapoxonae poxonae najume weta pentacaponaeawi, pomonae peyabara umenaewi penacuetusi bo, barapomonae Pablo wabatsi iru piamonae tatsi wabatsi. Barapomonae jeye:

—Pata tajiwimonaem, icha paxeiname diwesi, po diwesi xua barapomonae pejuntu coyene tsacabiwatsi xua junta pejinompaewa nexa barapomonae pomonae xote ene, bara moya papaebare barapo diwesi, jei barapomonae.

<sup>16</sup>Nexata Pablo asiya uncua. Pecobetha jume matawenta xua moya peenaenexa. Pablo barai, jeye:

—Incane pajume taema, israelmonae pam, iru paxamno pomonae Nacom abe paca necaexanaeyainwa pam xua icha abe paexaname, pomonae judiomonae jopa naexanaeyo pam. <sup>17</sup>Wamo

susato jiwi, pomonae Israel piamonae, barapomonae Nacom cana exana xua barapomonae nayoyotapona beya xua pin bicheito naexanapona, poxonae cataunxuae Egipto nacuatha jinompa. Nacom itapeta waba barapomonae, xua petanaexanaenexatsi pijimonae jiwana tatsi. Daxota Nacom pia peayapusuwatha wamo jiwi capanepatsi Egipto nacua weya. <sup>18</sup>Wamo jiwi ira xuepana susato tsurucuae nacua beya warapa cuarenta po weibe. Nacom yaweneiba barapomonae bequein barapomonae abe exaneiba cuarenta po weibe. <sup>19</sup>Wamo susato jiwi timaxu dubatsi Nacom poxonae jutebatsi Canaán nacuamonae. Nacom caewitaxuba Canaán nacuamonae siete po bicheito matabuxuyobe. Wamo susato jiwi barapo ira xuya catatsi, Nacom cata. <sup>20</sup>Daxita baraxua Nacom exana barapomonaetha cuatrocientos cincuenta po weibetha.

“Bapoxonae Nacom jiwana cana exana pomonae jiwi peyabara paebi-wichi xua penatsicuentisiwa xua abe peexanaexae pentacainompaenexa tsane barapomonae. Nacom baxua exana beya poxonae pon pewun Samuel popona pon Nacom pia peitorobi jume pepaebin. <sup>21</sup>Nexata israelmonae Nacomtha wuca pon be yatsicaya barapomonae barompaya itorobiya pia pepa peewatsinchi tatsi tsane. Daxota Nacom taexana barapomonaetha pon pewun Saúl, Cis pexanto tatsi, pon Benjamín pia pemomoxi susato jiwana tatsi. Bapon Saúl, pon jiwi itorobiya pia pepa peewatsin naexana cuarenta po weiyobe. <sup>22</sup>Bapoxonae Saúl cui matawentatsi Nacom abe peexanaexae. Equeicha exana ichun pon jiwi itorobiya pia pepa peewatsinchi, pon pewun David. Nacom yabara jume jei David: ‘David tan, pon Isaí pexanto. David netsita junta coyene xanepana yawa wuna exanano.

David itapeta exanaena daxita pocotsiwa ichichipan', jei Nacom. <sup>23</sup> David pia pemomo susato jiwana tatsi, bapon pewun Jesús. Jopa cain bayatha Nacom Pejume Diwesi paebi penamchixae Jesús capanepa Israel nacuamonae. Baraxua caena bayatha Nacom yabara tsiwunae muxu duta. <sup>24</sup> Pewunaeya poxonae Jesús tamropata pitabina xua pecuidubiwa Nacom nexa copiya matha Juan daxita Israel nacuapiwi tsipaeba xua pinae bewa nacui barapentsina abe pe-exanae cuiru coyenein xua Nacom pet-sita xeinaenexatsi icha juntu coyenein, xuano xua bewa pinae nabautisabina. <sup>25</sup> Poxonae Juan bara imoxoyo tupa, jeye: 'Jopa daponyo xan, pon xua payabara nanta xeiname, pon Mesías baraichi. Cotacaya ichun patopaena xua pon nepuna patopaena. Pocotsiwa bapon exana bichocono ainya cui bey-acaincha pocotsiwa exanan. Bichocono pin ura tsita xeinan xua daxota bewa jopa tataxu mu isanaxubiwa tsane pia penataxu xatatsiwa tatsi', jei Juan", jei Pablo.

<sup>26</sup> Equeicha Pablo jeye: "Tamonaepam, Abraham pia pemomoxi susato jiwit tatsi pamxaem, iruru pomonaep Nacom abe paca necaexanaeyainwampam xua icha abe paexaname. Nacom pacata itoroba barapo pecapanenebiyae diwesi jume po diwesi Juan yabara paeba. <sup>27</sup> Barapomonaepomonaep Jerusalén tomaratha jinompa iru pia pentacaponawit tatsi jopa Jesús yaitaetsi po coyene xua bapon apara Mesías. Matautano barapomonaep jopa yaputaeyo xua bayatha Nacom peitorobi jume pepaebiwi yabarawunae tsiwanaya paeba xua bexa Jesús cana exanaeinchi. Pentaqueiseicae matakabitha poxonae ichamonae yoroba po diwesi xua Nacom pia peitorobi jume pepaebiwi tina, judiomonaep pia penacaetutsi botha tatsi

barapomonaep jopa yabara yaputaeyo barapo diwesi. Poxonae Jesús naetotha tupa ruca exanatsi, barapomonaep nanta jupiya exana Jesustha icha be pocotsi coyeneya bayatha Nacom pia peitorobi jume pepaebiwi paeba. <sup>28</sup> Barapo judiomonaep jopa xeinaeyo po coyeneya xua Jesús pebexubiwa tsainchi. Bequein Jesús jopa abe exanaeyo ichitha barapomonaep Pilato wucatsi xua Pilato itorobina soldadomonaep xua Jesús pebexubiwa tsainchi. <sup>29</sup> Barapomonaep exana daxita po coyene bayatha xua Jesús yabara wunae tsiwanaya paebatsi Nacom Pejume Diwesitha. Barapoxonae Jesús pijimonaep petupaepin naeto wepichicatsi. Pijimonaep muthutha xotsi petupaepin pitapatororo muthutha. <sup>30</sup> Ichitha Nacom, Jesús equeicha caewa asu exanatsi petupaep cuiru coyene weya. <sup>31</sup> Matha cain Jesús puna jinompeibatsi ichamonae poxonae Galilea nacuathapopona, Jerusalén tomarathano. Barapomonaetha equeicha Jesús tsita naituta ducuaenaebiya ainya matakabidapaepin. Pomonaep Jesús bayatha tsita naituta, barapomonaep apara pomonaep xua anoxuae daxita tomaran tsipaeba dubenanaebiya Jesús yabara.

<sup>32</sup> "Daxota paca tsipaebatsi Jesucristo pia pexeinya diwesi jume xua bayatha Nacom yabara tsiwunae muxu duta wamo susato jiwitha. <sup>33</sup> Baxua Nacom exana poxonae Jesús equeicha asu exanatsi. Nacata exana poxoruwaxainchi wamo susatopiwi pijimonaetsi. Icha be pocotsi coyeneya bayatha tina Nacom Pejume Diwesitha xua salmos penaxunae weixi diwesintha, po wei xua ichaxota 'dos', jei xua jeye: 'Xam, taxantom, itawan caexanatsi bara', jei. <sup>34</sup> Nacom, Jesús asu exanatsi, xua equeicha jopa petupaenexa tsane, xua equeicha jopa tsabanuncuae tsane. Daxota jei pejume diwesitha: 'Paca catinchi xua bayatha David tayabara tsiwunae muxu dutan',

jei. <sup>35</sup>Daxota pon xua tina salmos penaxūnae weixi diwesintha, barapo diwesintha Nacom baraichi: ‘Jopa copatsim xua nexanto petsabanuncuaewa tsane pon bichocono pejūntū coyene xanepanaein’, jei. <sup>36</sup>Xainyei, David exana xua Nacom ichipa poxonae barū popona Israel nacuapiwi. David bayatha tūpa. Mūthūtha xotsi ichaxota pamo jiwi tatsi yamūthū umena. Yawa bayatha tsabanuncua. <sup>37</sup>Ichitha barapo pepon po pepon Nacom asū exana, barapo pepon jopa tsabanaeyo. <sup>38</sup>Tamonae pam, maisa bepayabara yaputae-name Jesús po coyene xua bapon Jesús pacata cayawa tūpa abe painya neexanae cuiru coyenein xua daxota Nacom jūntemaina barapo abe painya neexanae cuiru coyenein. <sup>39</sup>Tsipei Jesús tūpa daxota daxita pomonae jume cowūnta bapontha, Nacom jūntū coyene wūnaetsina. Bequein jiwi exana daxita pocotsiwa Moisés pia peitorobi coyenewatha itoroba, ichitha barapo coyenewa bapana jopa jiwi jūntū coyene xanepana exanaetsi abe pia peexanae cuiru coyenein tatsi weya. <sup>40</sup>Dota, icha metha jopa Nacom pajume cowūntsi-paem, bara paichim tsipae icha be pocotsi coyeneya bayatha pomonae Nacom peitorobi jume pepaebiwi yabara tina. Namchiya tina, jeye:

<sup>41</sup>‘Ja, jiwi pecui caponaemona pam, bara pana nabenaecare, pawerapare. Xan, Nacom, anoxuae exanaein bichocono pepa pewūnaewa poxonae cataunxuae pajinompame. Baxua xua exanan, jopa pajume cowūntsim, bara bequein ichamona paca tsipaeba’, jei Pablo.

<sup>42</sup>Pablo, irū pia pepuna ponaewichi daxita barapoyobe judiomona pia penacaeutsi bo tatsi wejojoniya. Pomona baxota umena pomona jopa

yacuiya naexanaeyo xua judiomona penaexanaewa, barapomona Pablo wūcatsi xua bepa pinae Pablo equeicha cuidubina po diwesi anoxuae paeba xua equeicha icha diwesi mataropeichiya cuidubina xua icha mataqueitha tsane xua pentaquei seicae matakabitha. <sup>43</sup>Poxonae najume weta Pablo irū Bernabé, puna poinchibe judiomona irū pomonae jopa judiomona naexanaeyo. Barapomona Nacom jume cowūnta nawita icha judiomona ichi. Pablo Bernabeno tsipaebabe barapomona: “Nacom pajume cowūnta dubenanaebiyama xua Nacom wūnae pia pacata exanaenexa painya jūntū coyeneintha pia paca necaantobexae”, jeibe.

<sup>44</sup>Icha matakabi, po matakabitha pentaquei seicae matakabitha, pin bicheito pomona tomaratha ena, nacaetuta xua pejume taenexa Nacom pia pexeinya jume diwesi tatsi, pon Pecanamataxeinaeinchi jiwi. <sup>45</sup>Ichitha poxonae judiomona pinmonae necota, jume uwa tsipei pinmonae nacaetuta pejume taenexatsi Pablo. Pablo jume matawentatsi xua paeba yawa tsūmū jume barū paebatsino. <sup>46</sup>Nexata Pablo Bernabeno tsipaebabe barapomona. Jopa auriya paebiyobe. Jeibe:

—Bara xanepana xua copiya Nacom Pejume Diwesi paca tsipaebatsi pomona judiomona pamxaem. Daichitha, jopa bepajume taem barapo diwesi tsipei jopa paichichipaem xua painya nexenaewa peajūntūyapusūwa po peajūntūyapusūwa ataya tsiteca. Daxota anoxuae ichamonaetha pata tha ponaetsi pomonaetha pomonae jopa judiomona naexanaeyo. <sup>47</sup>Pata Tanecanamataxeinaein Nacom pana itoroba. Pana baraino, jeye: ‘Paca exanatsi xua painya neyawenaewa daxita pomonae jopa judiomona naexanaeyo



xua xanepanaeya pejinompaenexa tsane.

Matautano paca exanatsi xua beta painya netsipaebinxaxa Nacom Pejume Diwesi daxita nacuantha, xua jiwi pecapanenebiyaenexa tsainchi Nacom abe pia peexanae cui ru coyenein weya tatsi', jei Nacom, jei Pablo.

<sup>48</sup> Poxonae baxua jume taerucupa, pomonae jopa judiomonae naexanaeyo, barapomonae bichocono juntu coyene weiweinarucupa, junte ma jinompano. Pablo tsipaebatsi: "Nacom Pejume Diwesi jume xeica. Bichocono jume wuna", jei. Daxita barapomonae jume cowanta pomonae Nacom cuita itapeta petaxeinaenexa tsainchi peajuntuyapuswa, po peajuntuyapuswa ataya tsiteca.

<sup>49</sup> Barapomonae pomonae Jesús pejume cowuntsiwichi daxita nacuantha tsipaeba Jesús pia pexeinya jume diwesi tatsi, pon jiwi Pecanamataxeinaein.

<sup>50</sup> Ichitha judiomonae anaepana exana yabuxi powaxi Nacom cananta xeinatsi bichocono. Yawa pebiwi pomonae peainya cui jiwi, barapo pebiwi anaepana exanatsiru. Iru judiomonae Pablo Bernabeno abe yabara cueicueijeichibe, daxota daxita jiwi Pablo iru Bernabé casebatsibe. Barapo jiwi Pablo Bernabeno itawetaxotsibe pia nacua beya. <sup>51</sup> Nexata Pablo Bernabeno nataxu nunutababe tsorobo. Baxua exanabe petsita itapeinya xeinaenexa po coyene bapomonae abe exana poxonae jume itaweta Nacom Pejume Diwesi. Barapoxonae warapabe Iconio tomara beya. <sup>52</sup> Ichitha pomonae Jesús jume cowanta, barapomonae bichocono juntu coyene weiweina. Matautano barapomonae juntu coyene yucatsi Nacom pia Pejumo pe tunaxu tatsi.

### Meje yabara poxonae Pablo Bernabeno Iconio tomaratha poponabe

**14** Iconio tomaratha Pablo Bernabeno judiomonae pia penacaeutusi botha tatsi jonyiabe. Beta paebabe daxota pinmonae Jesús jume cowanta. Judiomonae jume cowanta, iruru pomonae jopa judiomonae naexanaeyo jume cowanta Jesús. <sup>2</sup> Ichitha po judiomonae jopa Jesús pejume cowuntsiwichi barapomonae cui tsacaba pomonae jopa judiomonae naexanaeyo cui tsacabatsi. Daxota barapomonae pomonae jopa judiomonae naexanaeyo abe yabara nanta xeina xua pomonae Jesús pejume cowuntsiwi tatsi abe yabara nanta xeinatsi. <sup>3</sup> Pablo Bernabeno barapo tomaratha ecabe. Ainya matabi dapaein baraponbe ecabe baraxota. Nacom Pejume Diwesi jume daunweya cueicueijeibe Pecanamataxeinaein nexa. Baponbe Nacom cata pia peayapuswa peexanaenexabe pexeinya petsita itatsi coyenewan. Poxonae jiwi cui tane xua baponbe exanabe, barapo jiwi yaputane xua Nacom yawena baponbe, peantobexaetsibe. <sup>4</sup> Daxita jiwi tomaratha be ainya jiwibe natsababe. Ichamonae judiomonae ichichipa. Ichamonae Jesús pia peitorobi jiwi tatsi ichichipa. Daxota ainya bicheitobe nacana exanabe. <sup>5</sup> Nexata bapoxonae judiomonae iru pomonae jopa judiomonae naexanaeyo peburaya yabara jume baru nanta xeinarucupa xua pentacaponae wi paeba po coyene xua Pablo yawa Bernabé abe peexanaewa tsainchibe xuano xua ibotontha pecuinbabinexatsibe. <sup>6</sup> Poxonae Bernabé Pablobe jume taebabe nainya naetsirucube Lистра tomara beya, Derbe tomara beyano. Barapo tomarabe Licaonia nacua

ecabe. Matautano icha tomaran beya ponabe Pablo Bernabeno xua po tomaran ena barapo Licaonia nacuatha. <sup>7</sup>Barapo tomarantha cuiduba ducuaanaebiyabe Jesús pia pexeinya jume diwesi tatsi.

**Meje yabara poxonae Pablo Listra tomaratha ibotontha cuinbabatsi**

<sup>8</sup>Listra tomaratha pebin popona pon pemubinchi, pon xua jopa peponaein. Bapon pexuyotha caena yawa naexaneca, xuano bapana jopa pona. <sup>9</sup>Bapon pon pemubinchi Pablo jume tainchi xua pocotsiwa cueicueije. Pablo pemubinchi tane. Pablo nanta xeina, xua pon pemubinchi bara Nacom jume cowuntatsi. Pablo nanta xeinataba xua axaibi peexanaewa tsainchi pon pemubinchi. Daxota bichocono Pablo naita cui duya bapontha beya. <sup>10</sup>Nexata Pablo jume daunweya barai, jeye:

—Asiya uncuare, jei.

Pon pemubinchi asiya uncuatabiya jirawuna yawa nainya ponano. <sup>11</sup>Poxonae Pablo cui tainchi barapomona, jume daunweya wawai pin jumetha, Licaonia pijumetha tatsi:

—¡Nacombe be pebin juta tsecae waxainya berena patopabe! jei.

<sup>12</sup>Barapomona namchi: “Maisa Bernabé bara mexeya nacom tsecae, po nacom pewun Zeus. Irũ Pablo bara mexeya icha nacom tsecae, po nacom pewun Hermes”, jei. Barapomona bapo wun duta poxoru tsipei Pablo penantacapaebin tsecae. <sup>13</sup>Irũ barapo nacom Zeus pia sacerdotemonaepin xeinaru, pon Zeus wuna jainteibatsi pia penacaetutsi bo tatsitha. Barapo penacaetutsi bo uncua tomara coiboto juma weya. Barapo sacerdotepin vaca pebton wiyaba pentonon pecaponaenexa Zeus pia penacaetutsi botha tatsi. Barapo tomarapiwi irũ Zeus pia sacerdotepin ichichipa

juteba vaca pebton petautsinexa xua petuxusi exanaenexa Pablo irũ Bernabé nexabe pia Pablo irũ Bernabé yabara nanta xeinaebe barapomona xua barapomona bara pejuntu coyene xanepanaewi. <sup>14</sup>Bernabé Pablobe jume tanebe xua taexanaeinchibe baxua barapomona. Bapoxona anaya nama paparuwa tsitsinaxubabe. Cuinaeponaya wawaibe poxoru aichaxaibibe xua baxua barapomona exanaena. Jeibe:

<sup>15</sup>—¿Eta xua daxua pana canautame? Apra saya jiji panbe. Be paxam paichim bara paichinbe. Papatopanbe tsipei apra pata paca catsipaebinexa tsainchi xua painya nenacui barapentsiwa tsane barapo coyenexi xua jopa pecui xanepanaewiyo. Maisa Nacomtha panantana pende. Barapo Nacom pon peantacuiyapusun, exana peitaboco, iranno, pin meneinno. Daxita xua xuanno yawa muxuna dubena tsiniya Nacom bayatha exana. <sup>16</sup>Wawunaeya Nacom cui copata daxita nacuapiwi xua bara pejinompaenexa icha be pocotsi coyeneya ichichipa xua pejinompaewa. Daxita jiji pia cui nata exana saya. <sup>17</sup>Nacom xua pewunaewan nacopiniwa tsita ituba daxota jiji naita cui coyene tane xua Nacom exana. Barapon Nacom apra pon ema pacata itorobica, pexuwiranno paca tsijain exaneica catsicano. Pexaewa paca cata. Paca juntu coyene weiweina exana, jei.

<sup>18</sup>Bequein Bernabé Pablobe jume daunweya yabara paebabe baraxua, awiya barapomona ichichipa jutebina vaca pebton xuano xua wuna pejainchinexatsibe Pablo irũ Bernabé. Barapomona muxu pejutebi vaca daichitha jopa jutebiyo.

<sup>19</sup>Bapoxona judiomona pomona jopa pejume cowuntsiwi, Antioquia tomara weparena, irũ Iconio tomara weparena. Daxita barapo judiomona

Listra tomarapiwi baru cueicueijeichi pebaru anaepanaenexatsibe Pablo iru Bernabeno. Nexata barapomona Listra tomarapiwi ibotontha cuinbabatsi Pablo. Barapomona najuntu coyene xeina xua bayatha tupa Pablo. Pablo tomara coiboto juma bejojontapoinyatsi. <sup>20</sup> Jesús pejume cowuntsiwichi Pablo cacuita mata wacaicha umenarucupatsi. Bapoxona Pablo asiya uncuataba. Equeicha tomara bepoinya. Icha mataqueitha Bernabé Pablob Derbe tomara beya ponabe.

<sup>21</sup> Barapoxona Bernabé Pablob muxu tsipaebabe Jesús pia pexeinya jume diwesi tatsi. Pinmona jume cowunta Jesús. Equeicha bapoxona Listra tomara beya, caibeya ponabe. Iconio tomarano, Antioquia tomara beyano bara bewarapiyabe. <sup>22</sup> Bernabé iru Pablo barapo tomarantha juntu coyene tsacababe pomonaetha pomona pejume cowuntsiwi xua xanepanaya pejinompawewa tsane. Matautano cui itorobabe barapomonaetha xua bewa barapomona beta xanepanaya jume cowunta dubenanaebiyaena. Barichino matautano tsipaebabe xua pinae poxona ichamona pepatsiwa tsane Nacom pia peitorobi nacua beicha bewa matha ajuntucoyenetane exaneibinchi xua ichamona taexanaena. <sup>23</sup> Bernabé Pablob tamroropata itapeta tsiniyabe pitiri jiwi daxita Jesús pejume cowuntsiwi pia penacaetutsi bontha. Barapo pitiri jiwi itapetatsi peyawenaenexa xua peyawenaenexatsi pomona Jesús pejume cowuntsiwi. Poxona daxita najume weta xua Nacomtha petsipaebiwa, xuano xua yabara nainbota pitiri jiwi nexa, barapoxona Pablo iru Bernabé, Nacom pon Pecanamataxeinaein jiwi, jeichichi:

“Nacom, barapo pitiri jiwi beta eenare jinya necajume cowuntsixae”, jeibe.

**Meje yabara poxona Bernabé iru Pablo Antioquia tomaratha equeicha caibe patopiyabe xua po tomara peecaexae Siria nacuatha**

<sup>24</sup> Copiya matha Pisidia nacua bewarapiyabe. Bapoxona Panfilia nacuatha patopabe. <sup>25</sup> Jesús pia pexeinya jume diwesi tsipaebabe Perge tomaratha. Barapoxona equeicha Atalia tomara bewarapiyabe. <sup>26</sup> Baraxotiya Atalia tomaratha Antioquia bewarapiyabe jeratha, po naetha po nae pin nae. Antioquia tomara barapo tomara ichaxota bayatha matha barapomona Bernabé iru Pablo tawucatsibe Nacomtha poxona juntucuru warapabe. Bayatha cain barapo Antioquia tomarapiwi tawuca Nacomtha, xua Nacom beta eenaena peantobexae xua Pablo iru Bernabeno beta eenaechibe poxona nacuitabe Nacom pia penacuichiwa. Baxota equeicha Pablo Bernabeno pecoutha patopabe tsipei barapo pia penacuichiwabe bayatha wetabe. <sup>27</sup> Bernabé iru Pablo poxona patopabe Antioquia tomaratha caetutabe pomona pejume cowuntsiwi Jesús. Baponbe barapomonaetha tsipaebabe po coyene bayatha Nacom Pablo iru Bernabé taexanatsibe. Matautano tsipaebabe xua Nacom pon Pecanamataxeinaein jiwi, pomona jopa judiomona naexanaeyo tacopatatsi xua iru barapomona peitacupaewatsi xua pejume cowuntsinexatsi Jesús. <sup>28</sup> Bernabé iru Pablo baraxotiya ainya dapaein naecabe barapomona pia xantha tatsi pomona Jesús pejume cowuntsi jiwichi.

**Meje yabara poxonae nacaetuta  
Jerusalén tomaratha Jesús pia  
peitorobi jiwi tatsi iru penapatae jiwi**

**15** Barapoxonae iru pebiwi, pomonae Judea nacuatha jinompa, pata Antioquía tomaratha. Barapomonae tamropata notarucpa xua pecuidubiwa pomonaetha pomonae iru pejume cowuntsiwixae Jesús. Jeye: “Icha paichichipame xua painya nepaca capanenebiwa matha pana nawi thabare pebiwi pam ichaxota pana nareixacaename icha be ichi pocotsi coyeneya bayatha Moisés paca itoroba”, jei. <sup>2</sup>Pablo iru Bernabeno jume daunweya tsipaebabe xua baxua jopa xainyeyo. Ichitha jume matsontsonobatsibe barapomonae. Daxota Pablo iru Bernabé wun dutatsibe, iru ichamonae wun dubatsi xua daxita barapomonae peponaenexa Jerusalén tomara beya. Matautano barapomonae itorobatsi xua barapo penawi thabi coyene yabara petsipaebinxatsi Jesús pia peitorobi jiwi tatsi, iruru pitiri jiwi petsipaebinxatsi pomonae penacaetutsi jiwi jiwana xua Jerusalén tomaratha.

<sup>3</sup>Barapo Antioquía tomarapiwi pomonae Jesús pejume cowuntsiwi pu taeumena. Pablo iru Bernabé iru icha pebiwi pu taeumeinchi. Barapoxonae Pablo Bernabeno iru icha pebiwino warapa. Barapomonae siwa pona Fenicia nacua beya, Samaria nacua beyano. Barapomonae Pablo Bernabeno tsipaebabe, jeibe: “Pomonae xua jopa judiomonae naexanaeyo, barapomonae pia cui coyenein nacui barapenta po coyenein xua jume cowanta bayatha pia jume cowantichi Nacomtha”, jeibe Pablo, Bernabeno. Daxita pomonae iru pejume cowuntsiwixae Jesús bichocono juntu coyene weiweina poxonae jume tane baxua.

<sup>4</sup>Bernabé iru Pablo poxonae patopabe Jerusalén tomaratha, pomonae pejume cowuntsi jiwi baponbe matenta weiweinaya wabatsibe. Iruru Jesús pia peitorobi jiwi tatsi matenta weiweinaya waba. Barichiru pitiri jiwi matenta weiweinaya waba. Bernabé iru Pablo tsipaebabe barapomonaetha po coyene bayatha Nacom taexana baponbetha. <sup>5</sup>Ichitha ichamonae fariseomonae, pomonae bayatha jume cowanta Jesús, asiya umena. Barapomonae namchi, jeye:

—Pomonae jopa judiomonae naexanaeyo pomonae pejume cowuntsiwi Jesús bewa exanaetsi xua penawi thabiwa tsane xua ichaxota nareixacaena xua ichaxota pebiwixae xeina. Matautano bewa cui itorobichi xua bewa exanaponaena pocotsiwa bayatha Moisés itoroba pia peitorobi coyenewatha, jei.

<sup>6</sup>Bapoxonae Jesús pia peitorobi jiwi tatsi iru pitiri jiwimonaeno nacaetuta peyabara paebinxaxa barapo penawi thabi coyene. <sup>7</sup>Caena bayatha bapomonae najume matsontsonobompa. Bapoxonae Pedro asiya uncuataba. Barai barapomonaetha, jeye:

—Tamonae pam, pomonae iru painya nejume cowuntsiwixae Jesús, paxam payaputaneme, xua caena bayatha Nacom neitapeta painya xantha. Newaba tacueicueijeinexa tsane Jesús pia pexeinya pecapanenebiyae diwesi jume pomonaetha pomonae jopa judiomonae naexanaeyo, xua iruru barapomonae pejume cowuntsinexa barapo diwesi. <sup>8</sup>Nacom pejuntu coyene yaputaenin jiwi daxota naca yaputane exana xua bapon tsitatsi xua barapomonae pejuntu coyene xanepanaewi bequein jopa judiomonae naexanaeyo. Nacom bara nanajumope tunaxu cata barapomonaetha icha

matha naca cana ichi. <sup>9</sup>Nacom bichocono antobe barapomonaе icha ichi xua bichocono naca antobe. Nacom juntu coyene puxana exana barapomonaе xua abe pia peexanae cuiru coyenein tatsi pejume cowuntsixaetsi icha naca ichi. <sup>10</sup>Maisa anoxuae jopa bepayabara yaputaem pocotsiwa Nacom exana. Matautano barapo pejume cowuntsiwi pomonaе jopa judiomonaе naexanaeyo pacui itorobame xua penawi thabiwa xua ichaxota nareixacaena xua ichaxota pebiwichi xeinatsi. Matautano be paca ita cui jicha xua barapomonaе bewa exanaena pocotsiwa Moisés itoroba. Apra baraxua jopa naca itacupaeyo xua waexanaewa. Iruru wamo susato jiwi jopa itacupaetsi xua peexanaewa baxua. <sup>11</sup>Nama apra waxainchi wanaca capanenebiyae jiwichi xua saya amanaya xua Jesús pon jiwi Pecanamataxeinaein peichichipaexae baxua. Barapo pejume cowuntsiwi iru bara cana ichichi, jei Pedro barapomonaetha.

<sup>12</sup>Bapoxonaе barapomonaе moya umena. Barapomonaе Bernabé iru Pablo jume taeumenatsibe. Tsipaebabe: “Paponeibanbe pomonaetha pomonaе jopa judiomonaе naexanaeyo. Paexaneibanbe barapomonaetha pexeinya petsita itutsi coyenewan Nacom pia peayapusuwiyatha tatsi”, jeibe. <sup>13</sup>Poxonaе Bernabé iru Pablo najume wetabe xua paebabe, bapoxonaе Santiago namchi, jeye:

—Tamonae pam, pomonaе iru painya nejume cowuntsiwixae Jesús, pana nejume taema: <sup>14</sup>Simón Pedro aunxuae naca tsipaeba. Pedro namchi: ‘Poxonaе Nacom copiya tamropata pitaba xua yawena pomonaе jopa judiomonaе naexanaeyo, Nacom jiwana itapeta pomonaе xua peantobenexa tsainchi bapon’, jei Pedro. <sup>15</sup>Xuaunxuae

Pedro paeba caena bayatha Nacom pia peitorobi jume pepaebiwi yabara tsiwunaе muxu dutsiya tina Nacom Pejume Diwesitha xua Nacom nexa, jeye:

<sup>16</sup>‘Poxonaе daxita baraxua wetsina, xan Nacom equeicha patoparecaein. Exanaein xua caein, pon David pia pemomo jiwi tatsi jiwana matacapoponaena piamonaе, icha matha David ichi poxonaе piamonaе matacapopona.

<sup>17</sup>Poxonaе baraxua exanaein, barapoxonaе ichamonaе pomonaе jopa judiomonaе naexanaeyo newenawenei tsane pia tanejume cowuntsinexa tsane. Barapomonaе pia Pecanamataxeinaein tatsi

naexanaein taitapetsixaе barapomonaе. <sup>18</sup>Nacom pon jiwi yaputaeya exanatsi barapo coyenein caena bayatha pepaebixae baxua daxota xaniwaicha Nacom exanaena’, jei Nacom pia peitorobi jume pepaebiwi, Nacom Pejume

Diwesitha xua Nacom nexa, jei Santiago.

<sup>19</sup>Santiago cataunxuae awiya cueicueije, jeye: “Daxota nanta xeinan, equeicha waxainchi jopa bewa itorobi tsainchi pomonaе jopa judiomonaе naexanaeyo xua peexanaewa po coyenein xua taayapubetsi. Barapomonaе nacui barapenta pia cui coyenein po coyenein xua jume cowunta bayatha pia jume cowuntichi Nacomtha. <sup>20</sup>Betatinaetsipatsi carta pomonaе jopa judiomonaе naexanaeyo. Barapo cartatha jeichipaetsi: ‘Jopa equeicha pewi paxaeinde po wi jiwi tajeba ibo nacom nexa. Painya xoba yabuxi panotame po yabuxi jopa painya seurixi. Painya xoba duwei pawu xaneme pon saya pipato tupa xuano pon saya bunopa. Matautano jopa paxaeinde pejanan’, bejei tsipaetsi.

<sup>21</sup> Baraxua bewa exanaetsi poxorū caena cain bayatha pomonae Nacom Pejume Diwesi pecanatsipaebi jiwī yorobeiba barapo diwesi judiomonae pia penacaetutsi bontha tatsi. Daxita tomarantha xua po matakabintha pentaquei seicae matakabintha barapomonae yorobeiba Nacom Pejume Diwesi, po diwesi xua Moisés tina bayatha pocotsiwa yabara tsiwūnae muxu duta Nacom”, jei Santiago.

**Meje yabara poxonae barapo bicheito carta tatina pomonaetha pomonae jopa judiomonae naexanaeyo**

<sup>22</sup> Jesús pia peitorobi jiwī tatsi irūru pitiri jiwī, irū daxita pomonae pejume cowūntsiwi juntucuru najiwana itapeta. Bapoxonae xua Antioquía tomara beya penajiwana itorobinexa Pablo irū Bernabé. Judas wūn dutatsi pon icha wūn Barsabás. Irū Silas wūn dutatsi, baponbe ponbe bichocono peainya cui jitonbe xua pomonae irū pejume cowūntsiwi pia xantha tatsi. <sup>23</sup> Jesús pia peitorobi jiwī tatsi irūru pitiri jiwī, irū pomonae Jesús pejume cowūntsiwi, barapomonae carta tina xua pecaitorobinexa xua Pablo irū Bernabé irū Judas irū Silas barapoyobe pecaitorobinexatsi. Barapo carta namchi, jeye:

“Paxan Nacom pia peitorobi jiwī tatsi pan, irū pitiri jiwī panno xua nacaemonae jiwichi xua wajume cowūntsiwichi Jesús. Paxan pajacoban patamonae pomonae jopa judiomonae naexanaeyo pomonae irū Jesús pejume cowūntsiwichi, pomonae pejinompaexae Antioquía tomaratha, xuano xua pejinompaexae Siria nacuatha, Cilicia nacuathano. <sup>24</sup> Payaputan ichamonae xua patamonae pata tomara weya pipato paca siwa pona painya tomara beya. Paca cajume acaura. Barapomonae namchi: ‘Pana nawi thabare. Matautano paexande

pocotsiwa Moisés pia coyenewatha itoroba’, jei. Jopa paitorobinyo barapo jume. <sup>25</sup> Daxota be juntucuru pawūnaein xua cuita pananta jupaya nanta xeinan. Paitoroban ichamonae pata xainya weya pia paca necataenexa tsane. Napuna ponabe Bernabé Pablono ponbe bichocono paantobein. <sup>26</sup> Baponbe Pablo irū Bernabé muxu pebocaebe xua pebexubiwatsibe pecueicueijei tsurucuaenaebiyaxaebe Jesucristo nexa, pon Wanacanamataxeinaein. <sup>27</sup> Paitorobanbe Judas Silasno. Baraponbe saya pia coutha paca tsipaebinabe daxita xua barapo cartatha papaeban painya neyaputaenexa. <sup>28</sup> Paxan irū Nacom pia Pejumope tūnaxū tatsi pananta jupaya nanta xeinan xua jopa bepaca itorobichi icha cui coyene po cui coyene bichocono pacata ayapube xua painya neexanaewa tsane. Meisa saya ū baxua xua pacata tinatsi po cartathe baxua panantawenoname xua painya neexanaewa tsane. <sup>29</sup> Painya xoba paxaneme pewi po wi jiwī tajeba ibo nacom nexa poxonae tauta barapo duwei xua tuxusi exana barapo ibo nacom nexa. Barichi painya xoba duwei pawī xaneme pejanano po duwei pipato tūpumena. Matautano ichamonae painyamonae jiwana pia xoba nota yabūxi powaxi jopa piseurixi tatsi. Icha baraxua panacui barapentsiname xanepanaya pajinompaename. Baja”, jei barapo cartatha.

<sup>30</sup> Bernabé irū Pablo, irū Judas Silasno barapomonaeyobe peitorobixaetsi bara Antioquía tomara be-iyiya. Barapo tomarathiya barapomonaeyobe caetuteta pomonae pejume cowūntsiwi. Matautano barapomonaeyobe barapo carta cata barapomonaetha. <sup>31</sup> Pomonae irū pejume cowūntsiwixae Jesús bara yoroba barapo carta.

Barapomonae bichocono juntu coyene weiweina tsipei barapo cartatha cui matateicaeya yabara paebatsi. <sup>32</sup>Judas iru Silas peitacupaexaetsibe xua beta petsipaebiwbabe Nacom Pejume Diwesi xua Nacom yaputane exana, daxota juntu coyene tsacababe barapomonaetha pomonae iru Jesús pejume cowuntsiwi tatsi xua beta pejinompaewa tsane. Matautano baponbe cui matateicabe. <sup>33</sup>Barapoyobe barapo pejume cowuntsiwitha naecabe caena bayiyo. Barapoxonae barapomonae pomonae pejume cowuntsiwixae Jesús barapoyobe juntu coyene xanepanaya pu napeyabatsi xua penawibiyaexae caibeya ichaxota werena bayatha pomonae peitorobirenaexaetsi. <sup>34</sup>Ichitha Silas juntucuru narunta. <sup>35</sup>Pablo iru Bernabé Antioquía tomaratha ecabe. Baponbe iru ichamonaeno pomonae pinmonae, daxita barapomonae cuiduba dubenanaebiya yawa tsipaeba dubenanaebiya Jesús pon Pecanamataxeinaein jiwi pia pexeinya jume diwesi tatsi.

**Meje yabara poxonae Pablo equeicha warapa nacueyatabe po cuiyobetha xua Jesús pia pexeinya jume diwesi tatsi pecueicueijeiya nexa**

<sup>36</sup>Pirapaeyo icha mataqueitha, Pablo barai, Bernabé baraichi, jeye:

—Anthá equeicha Jesús pejume cowuntsiwi siwa ponaeinchi daxita jupaya tomarantha ichaxota matha cain Jesús pon jiwi Pecanamataxeinaein pia jume diwesi tatsi tsipaebatsibe. Wayaputaenexabe icha metha bara beta jinompa bapomonae, jei Pablo.

<sup>37</sup>Bernabé ichichipa xua puna poinchibe pon Juan, pon icha wunno Marcos. <sup>38</sup>Ichitha Pablo jopa ichipaeyo xua pebaru ponaewatsi Juan Marcos tsipei bayatha Panfilia tomaratha

Bernabé iru Pablo cuenta ponatsibe. Bayatha Juan Marcos juntucuru jopa benapuna nanacuichiyo Jesús pia pexeinya jume diwesi tatsi. <sup>39</sup>Najume matsontabe. Bernabé iru Pablo nawu tsatajopabe. Bernabé tsana baru jopa Marcos. Weratha ponabe Chipre tunaeto beya. <sup>40</sup>Barapoxonae Pablo cuita waba Silas. Antioquía tomaratha pomonae pejume cowuntsiwixae Jesús, Pablo Silasno tatsipaebatsibe Nacomtha xua Nacom peenaenexa peantobexae xua Pablo iru Silas peenaenexatsibe poxonae cueicueijeibe Nacom Pejume Diwesi. <sup>41</sup>Pablo iru Silas warapabe Siria nacua beya, Cilicia nacua beyano. Baponbe juntu coyene tsacababe pomonaetha pomonae pejume cowuntsiwi Jesús xua beta pejinompaewa nexa.

**Meje yabara poxonae Timoteo cueyata, Pablo iru Silas cueyatatsibe**

**16** Pablo iru Silas Derbe tomaratha patopabe. Equeicha bapoxonae Listra tomaratha patopabe. Baraxota Listra tomaratha caxinabe pebin pon pejume cowuntsin Jesús. Bapon pewun Timoteo. Pena tatsi saya judiomonaewayo. Barapowa iru pejume cowuntsiwayo Jesús. Timoteo paxa tatsi griegomonaepin. <sup>2</sup>Jesús pejume cowuntsiwi, pomonae jinompa Listra tomaratha, iru pomonae Iconio tomaratha jinompano, barapomonae Timoteo beta yabara paebatsi xua pinae pejuntu coyene xanepanaein. <sup>3</sup>Pablo ichichipa xua bepuna ponaeichatsi Timoteo xua peyawenaenexatsi. Ichitha matha copiya cui itorobatsi Timoteo xua pewi thabinexatsi xua ichaxota nareixacaeca xua ichaxota pebinxae xeina. Pablo baxua exana tsipei jopa ichipaeyo xua judiomonae anaepana peexanaewa tsainchi xua jopa pewi thabixae tsipaetsi Timoteo. Tsipei Pablo yaputane xua judiomonae nawita

ichaxota poneibinabe. Barapomonaē judiomonaē nawi thabeiba tsipei pia cui. Matautano barapomonaē judiomonaē yaputane xua Timoteo paxa tatsi griegomonaēpin. Daxota Timoteo jopa caena bayatha wi thabichi tsipei canta griegomonaē jopa daxua exaneibiyo. <sup>4</sup>Daxita jupaya tomarantha pateiba, Pablono, Silasno, Timoteono. Barapomonaēyobe tsipaebabe pomonaetha pomonaē Jesús pejume cowuntsiwi pocotsiwa bayatha Jesús pia peitorobi jiwī tatsi irū pitiri jiwī tina cartatha poxonaē nacaetuta Jerusalén tomaratha pomonaē pejume cowuntsiwi Jesús. <sup>5</sup>Daxota pomonaē penacaetutsi jiwī bara xanepanaya beta jume cowūnta. Daxotano pinmonaē jume cowūnta. Daxita matababi mataropeicha pinmonaē tsoponaē xua jume cowūntapona Jesús.

### **Meje yabara poxonaē Pablo camaita Macedonia nacuapin**

<sup>6</sup>Nacom pia Pejumope tūnaxū tatsi Pablo jopa copatichi xua pecueicueijeīwa tsane Nacom pejume diwesi Asia nacuatha. Daxota Pablobaru Frigia nacua iya pona xuano xua Galacia nacua iya pona. <sup>7</sup>Misia nacua iyīya. Baraxotiya bequein ichichipa pata Bitinia nacuatha, ichitha Jesús pia Pejumope tūnaxū tatsi apusiwa. <sup>8</sup>Daxota Misia nacua iyīya. Troas tomaratha mene itapatha pata. <sup>9</sup>Baraxota merawi Pablo camaita pebin pon Macedonia nacuapin. Bapon Macedonia nacuapin nantacotuncua. Pablo jume daunweya wabatsi: “¡Anetha denande! Macedonia nacua berena. ¡Pana yawende!” jeichichi Pablo. <sup>10</sup>Pablo camaita bapon, daxota paxainxainyan xua pata warapaenexa Macedonia nacua beya. Irū xan, Lucas tsocaein, naponan. Paxan tsipei payaputan xua bara Nacom pana

itoroba barapo nacuatha xua pata cueicueijeīwa tsane Jesús pia pexeinya jume diwesi tatsi.

### **Meje yabara poxonaē Pablo irū Silas Filipos tomaratha ecabe**

<sup>11</sup>Jeratha pawarapan, po naetha po nae pin nae. Paponarūcupan Troas tomara mene itapa weya. Weratha bopiya payiyan petunaeto cacuitiya Samotracia tunaeto. Icha matababitha papatan Neápolis tomaratha. <sup>12</sup>Equeicha baxotiya Filipos tomara bepaiyian, po tomaratha xua romanomonaē cueranta ena. Barapo Filipos tomara yatsicaya pepa tomara, pepa Macedonia nacua. Baraxota ainya matababin paenan. <sup>13</sup>Caentacabi, po matababi pentaquei seicaē matababitha, tomara pepuya beya paponan mene itapa beya, ichaxota judiomonaē Nacom wūqueiba. Paenan baraxotiya. Jesús pejume diwesino pacueicueijan yabūxitha powaxi xua cou bayatha nacaetuta. <sup>14</sup>Barapowaxi caewayo jiwana pana jume tane. Barapowa pewūn Lidia, Tiatira tomarapiwayo. Bapowa caenaeteiba papabūrū, po papabūrū mū tsobia po papabūrū ainya matoman. Barapowa wūnaē jainteiba Nacom. Barapowa beta jume tane pocotsiwa Pablo paeba. Nacom pon jiwī Pecanamataxeinaein, barapowa icha jūntū coyene cana exanatsi xua peexanaenexa pocotsiwa Pablo paeba. <sup>15</sup>Barapowa bautisabatsi, yawa piamonaē matabūxūyo tatsi bautisabatsi. Bapoxonaē bapowa pana barai, jeye:

—Icha bara metha xaniwaicha pananta xeiname xua Jesús tajume cowuntsiwayo, pon jiwī Pecanamataxeinaein, nexata antha tabotha pamaire, pana nejei Lidia.

Pecono jumeyotha pana barai, bepa pinaē xua pia botha pamaichin.



<sup>16</sup>Icha mataqueitha poxonae namtotha paenaponan xua poxonae paponan ichaxota jiwi wuqueiba Nacomtha, baxota yabuyo pacaxinan namtotha. Barapowayo cauri xeina. Barapowayo pebusi cui taetaewayotsi xua amanaya petanacuichiwa pia pentacaponaein nexa. Matautano barapowayo paratixi caetuba pia pentacaponaein tatsi nexa xua bapowa pecueicueijei tsaibixae pocotsiwa cauri yaputane exana. <sup>17</sup>Barapowa, Pablo, iru paxan pana pu wabapona. Bapowa wawaya namchi, jeye:

—¡Barapomonaе tanacuita Nacom nexa, po Nacom itabocotha eca! ¡Paca muxu tsipaeba Nacom pia pecapanenebiyae diwesi! jei barapowayo.

<sup>18</sup>Bapowa baxua exaneiba ainya mat-acabin. Pablo amuxufaetabi. Pablo barapowa taitaweta cauri. Pablo cauritha namchi, jeye:

—Jesucristo wuntha caitawetatsi. Naetsiriware. Xubariware bapowayo, jei Pablo.

Bara caena barapowayo copatabatsi cauri.

<sup>19</sup>Barapoxonae yabuyo cui tainchi pia pentacaponaeiwichi tatsi xua equeicha jopa amanaya tacaetubi tsane paratixi barapomonaе nexa. Daxota Pablo Silasno waetabatsibe. Pematacaitorobi bicheito jiwi peitabaratha capoinchibe tomara panatha. <sup>20</sup>Barapomonaе Pablo iru Silas cuaranotatsibe peitabaratha tatsi pomonaе jiwi peyabara paebiwi xua penatsicuentsiwa xua abe peexanaexae. Barapomonaetha jeye:

—Baponbe judiomonaе jitonbe, watomaratha baponbe wamonae cui tsacabatsi xua najume matsontsonoba. <sup>21</sup>Baraponbe pia cui coyeneya naca cuiduba. Barapo coyene jopa becopatichi xua wajume taenexa

xuano xua waexanaenexa, tsipei romanomonaetsi, jei barapomonaе.

<sup>22</sup>Bara nexata Pablo iru Silas baru anaepanarucupatsibe jiwi. Matautano pomonaе jiwi peyabara paebiwi xua penatsicuentsiwa xua abe peexanaexae, barapomonaе ichamonaе cui itorobatsi xua Pablo iru Silas peuma xuenaxubinexatsibe paparuwa, bapoxonae xua pecuainchinexatsibe iwatontha. <sup>23</sup>Matha bichocono cuaintatsibe. Bapoxonae caponatsibe jiwi pecubi bo beya. Pon peyabara equeibin pomonaе cubebatsi jiwi pecubi botha bapon cui itorobatsi jeichichi: “Beta yapu eenare, xua jopa penaetsiriwanexabe”, jeichichi barapon.

<sup>24</sup>Poxonae bapon jume tane pocotsiwa pentacaponaeiwi cui itoroba, bapoxonae po tutu taju beya baxota Pablo iru Silas cuaranoyatsibe. Bichocono naepawatha taxu cateitabetatsibe jiwi petaxu cateibabi naewatha.

<sup>25</sup>Papaetha Pablo iru Silas Nacomtha tsipaebabe yawa Nacom pijume weino naxunabe. Ichamonaе baraxota cubebatsi jiwi pecubi botha. Barapomonaе Pablo iru Silas jume tayenatsibe. <sup>26</sup>Barapoxonae jemeicha bichocono jijiyataxuba. Ibowano jijiyataxubano xua bomxu peyutanotsiwa. Bapoxonae jemeicha nainya saya dubenanaya peboupan.

Matautano pomonaе jiwi pecubi botha jebatsi daxita taxu nain sarababatsi. <sup>27</sup>Pon peyabara equeibin pomonaе cubebatsi, bapon nacosataxuba. Bapon tane xua barapo jiwi pecubi bo saya peboupa umenarucupa. Bapoxonae pia cusi namara jonta. Muxu penabexubi, tsipei bapon nanta xeina xua bara daxita panenebiya, Pablo, Silasno iru ichamonaeno. <sup>28</sup>Ichitha Pablo waba bapon pon peyabara equeibin pomonaе cubebatsi jiwi pecubi botha, jeye:

—¡Jopa jinya coutha nabexubinde, tsipei apara cataunxuae xote pajinompan! jei Pablo.

<sup>29</sup>Nexata pon peyabara equeibin pomonae cubebatsi jiwi pecubi botha, wawaya namchi, jeye: “Painta itanatabare”, jei. Jijiyeya cuinaepondena. Pablo iru Silas imoxoyo petaxutha pentabocototha caquita tauncuatabatsibe. <sup>30</sup>Bapoxonae bapon pon peyabara equeibin pomonae cubebatsi jiwi pecubi botha, bapon Pablo iru Silas pesato becayatsibe. Pablo iru Silas baraichichibe, jeye:

—Ja, ¿eta bichocuaein tsane xua tana necapanepaewa tsane Nacom beicha? jei bapon.

<sup>31</sup>Pablo iru Silas jume notabe, jeye:

—Jume cowunde Jesús pon jiwi Pecanamataxeinaein, bapoxonae necapanepae jitom tsane iru jinyamonae matabuxuyo pecapanenebiyae jiwi tsainchi, jeibe.

<sup>32</sup>Tsipaebabe bapontha, Jesús pon jiwi Pecanamataxeinaein, pia pexeinya jume diwesi tatsi. Matautano tsipaebabe piamonae matabuxuyo jiwitha tatsi, pomonae pia botha petaenaexaetsi. <sup>33</sup>Caena barapoxonae, pon peyabara equeibin pomonae cubebatsi jiwi pecubi botha, Pablo, iru Silas wan quietatsibe. Bapoxonae bapon bautisabatsi iru piamonae matabuxuyo tatsi bautisabatsi. Pablo, iru Silas bautisababe. <sup>34</sup>Bapoxonae Pablo iru Silas bo beya caponatsibe. Pexaewa catatsibe. Bapon piamonae matabuxuyo tatsino bichocono juntu coyene weiweina pejume cowuntsixae Nacom.

<sup>35</sup>Pomonae jiwi peyabara paebiwi penatsicuentisiwa xua abe peexanaexae, barapomonae caemumbotha itoroba, policiamonae itorobatsi ichaxota pon peyabara equeibin pomonae cubebatsi jiwi pecubi botha. Bapon

copatatsi xua bara Pablo iru Silas pepu copatsinexatsibe. <sup>36</sup>Nexata pon jiwi peyabara equeibin pomonae cubebatsi jiwi pecubi botha, bapon Pablo baraichi, jeye:

—Pomonae jiwi peyabara paebiwi penatsicuentisiwa xua abe peexanaexae, barapomonae necui itoroba xua tapaca isanaxubiwa tsainchibe. Bara paca itacupabe xua bara papu seicaenamebe, jei bapon.

<sup>37</sup>Ichitha Pablo barai policiamonae aetha, jeye:

—Apara barapomonae pana cuainta pepa bicheito peitabaratha. Dacotsiwa barapomonae abe painta exana. Seicaya apara romanomonae pan. Copiya matha jopa pana caponaeyobe ichaxota pon jiwi peyabara paebin xua penatsicuentisiwa xua abe peexanaexae. Saya barapomonae pia coutha paeba xua abe paexananbe. Daxota jiwi pecubi botha pana caponabe. Deta aena poxonae juntucuru pana isanaxubapaebabe moya namicha pana itorobabe. Pentacaponae patsipaebare, pomonae pana cuainta, bu jame barapomonae pia coutha pana nepu sotababe, jei Pablo.

<sup>38</sup>Baxua policiamonae bayatha jume yopita pomonaetha pomonae jiwi peyabara paebiwi xua penatsicuentisiwa xua abe peexanaexae. Barapomonae bichocono junuwa poxonae jume tane xua Pablo iru Silas apara romanomonaepinbe. <sup>39</sup>Barapomonae ponarucupa jiwi pecubi botha, Pablo, iru Silas siwa poinchibe peuraxae xua bayatha Pablo, iru Silas cuaintatsibe. Barapomonae Pablo iru Silas tsipaebatsibe, jeichichibe: “Maisa paauran tsipei abe paca exanatsibe. Moya paponarebe. Jopa po tomarathe paecaeindebe. Jopa pana neyopichinde”, jei. <sup>40</sup>Poxonae Pablo iru Silas jiwi pecubi bo wenaetabiyabe, Lidia pia bo tatsi be-iyabe. Siwa ponabe

pomonaē pejume cowuntsiwixae Jesús. Barapomonaetha baponbe juntu coyene tsacababe xua xanepanaya pejinompaewa tsane. Bapoxonaē bara wewarapiyabe.

**Meje yabara poxonaē Tesalónica  
tomarapiwi namtsebiya  
anaepanaeya wawai xua Pablo,  
iru Silas pecasebixaetsibe**

**17** Pablo iru Silas Anfípolis tomara iyabe. Apolonia tomara iyabeno. Barapoxonaē Tesalónica tomaratha patopabe po tomara ichaxota judiomonaē pia penacaetutsi bo tatsi uncuā. <sup>2</sup>Pablo pia cui xeina xua judiomonaē pia penacaetutsi bontha tatsi pateiba. Daxota baxota eca acoibi po semanabe. Matautano daxita pentaquei seicaē maticabintha barapo judiomonaē pia penacaetutsi botha Pablo iru Silas cuidubabe. <sup>3</sup>Pocotsiwa Nacom Pejume Diwesi paeba, baxua Pablo tsipaeba po coyene xua pinae pon Mesías bewa bexubinchi ichamonaē, xua xua pinae bapoxonaē equeicha asu tsane. Pablo jeye barapomonaetha:

—Pon xua Jesús xuaunxuae yabara paca muxu tsipaebatsi, bapon apara bara Mesías, jei Pablo.

<sup>4</sup>Ichamonaē, judiomonaē jume cowanta. Barapomonaē Pablo, iru Silas caemonaē naexanatsibe. Barichi pin bicheiton griegomonaē jume cowantarū, pomonaē Nacom wunaē jaintatsi. Barapomonaē jume cowanta Jesús. Iruru ainya yabuxi bicheiton jume cowanta Jesús powaxi baru cui itura jineibatsi xua jiwi baru cui itura jineiba. <sup>5</sup>Ichitha icha judiomonaē pomonaē jopa pejume cowuntsiwi, baxua yabara uwa. Daxota barapomonaē pebiwi baru nacaetuba po pebiwi peajuntucoyenyapubewi xua po pebiwi saya pejinompaewi

namtontha. Daxita barapomonaē namtsebiya wawai tomaratha. Jasón pia botha tatsi anaepanaya joniya xua Pablo iru Silas pejeichinexatsibe xua pewaetabinexatsibe xua xua pecaenaetsinexatsibe jiwitha. <sup>6</sup>Ichitha baxota Pablo iru Silas jopa taebichibe. Daxota catsaya waetabatsi Jasón, iru ichamonaē pomonaē pejume cowuntsiwixae Jesús. Pablo iru Silas waetabatsibe. Daxita barapomonaē pentacaponae jiwitha becayiyatsi. Daxita barapomonaē yabara wawaichiya jeichibe:

—¡Barapo pebinbe daxita nacuantha abe paeba ducuaenaebiyabe yawa waxainya becui joparenabe! <sup>7</sup>Jasón barapomonaē matenta weiweinaya waba pia botha. Jasón pia botha maitecabe. Daxita Pablobaru jopa exanaeyo po peitorobi coyenewan xua pon romanomonaē itorobiya pia pepa peewatsinchi itoroba. Matautano barapomonaē paeba xua pinae ichun popona pon jiwi itorobiya pia pepa peewatsinchi, bapon pinae Jesús, xua jopa yabara cananta xeinaetsi pon romanomonaē itorobiya pia pepa peewatsinchi, jei barapomonaē xua namtsebiya wawai.

<sup>8</sup>Poxonaē baxua jume tane, pentacaponaewi iru pomonaē xua baxota umena, daxita barapomonaē anaepanaeya namtsebiya wawai. <sup>9</sup>Barapo pentacaponaewi wecobe nota paratixi xua Jasón iru pomonaē pejume cowuntsiwi wecobe notatsi. Barapo pentacaponaewi namchi xua pinae equeicha caewa catsinchi Jasón barapo paratixi poxonaē Pablobaru tomara weya ponaena. Bapoxonaē pentacaponaewi Pablo baru pu sorobabatsi pewarapaenexa tsane tomara weya.

**Meje yabara poxonaē Pablo irū Silas  
Berea tomaratha poponabe**

<sup>10</sup>Barapo merawitha pomonaē irū pejume cowuntsiwixae Jesús, barapomonaē Pablo, irū Silas itorobatsibe xua nainya pewarapaenexabe Berea tomara beya. Poxonaē barapo tomaratha patopiyabe judiomonaē pia penacaetutsi botha tatsi jonyabe. <sup>11</sup>Judiomonaē, pomonaē Berea tomarapiwi, barapomonaē pejuntū coyene xanepanaewi icha be jopa Tesalónica tomaratha ichiyo. Jame barapo Berea tomarapiwi bara xanepanaya jume tane Jesús pejume diwesi. Daxita matabi barapomonaē Nacom Pejume Diwesitha yorobeiba pia yaputaetsi barapo diwesi, po diwesi xua Pablo irū Silas paebabe icha metha baraxua bara xainyeibe. <sup>12</sup>Daxota pinmonaē jume cowūnta Jesús. Judiomonaē jume cowūnta Jesús. Irū griegomonaē jume cowūntano, yabūxi, irū pebiwi. Powaxi jume cowūnta Jesús, barapowaxitha jiwī barū cui itura jineiba. <sup>13</sup>Judiomonaē, Tesalónica tomaramonaē, jume tane xua Pablo cuiduba Nacom Pejume Diwesi Berea tomaratha. Daxota bapomonaē Berea tomara be-iyi. Baxotiya barapomonaē namtsebiya wawai xua Pablo irū Silas pecasebixaetsibe. <sup>14</sup>Ichitha pomonaē pejume cowuntsiwixae Jesús, Pablo itorobatsi xua nainya peponaenexa imoxoyo mar mene beya poxonaē cataunxuae Silas irū Timoteo ecabe Berea tomaratha. <sup>15</sup>Pomonaē Pablo cweyabatsi barapomonaē Pablo punaxubathopatsi Atenas tomaratha. Barapomonaē equeicha caibe nawibiya Berea tomara beya. Barapomonaē Silas irū Timoteo tsipaebatsibe xua Pablo najume caruta xua bepa pinae Silas irū Timoteo nainya patopaenabe Atenas tomaratha.

**Meje yabara poxonaē Pablo  
Atenas tomaratha popona**

<sup>16</sup>Pablo ewata, Silas irū Timoteo ewatatsibe Atenas tomaratha. Barapoxonaē barapo tomaratha Pablo tane xua barapomonaē ainya ibo nacomūn xaina. Daxota bichocono yabara najuntū coyene exaba. <sup>17</sup>Daxota Pablo tsipaeba Nacom Pejume Diwesi judiomonaetha judiomonaē pia penacaetutsi botha tatsi. Matautano baxotano tsipaeba pomonaē bequein jopa judiomonaē naexanaeyo, barapomonaē Nacom wūnae jaintatsi. Barichi daxita matabi pomonaē Pablo caxibeiba pomonaē nacaetuteiba tomara pin panatha barapomonaethano Pablo cuidubeiba Nacom Pejume Diwesi. <sup>18</sup>Barichi griegomonaē ichichipa xua pejume taewa pocotsiwa Pablo paeba. Ichamonaē griegomonaē itapeta jume cowūnta pocotsiwa epicureomonaē cuiduba. Irū ichamonaē griegomonaē itapeta jume cowūnta pocotsiwa estoicomonaē cuiduba. Barapomonaēbe Pablo tsipaeba. Bapoxonaē ichamonaē Pablo yabara jeichichi, jeye:

—¿Eta xua bapon naca barai tsipae, pon xua jopa juniya cueicueijeji tsaibiyo? jei.

Ichamonaē jeye:

—Mexeya maisa bapon cueicueijeji pia nacomūn nexa, jei.

Barapomonaē baraxua paeba, tsipei Pablo Jesús pia pexeinya jume diwesi paeba ducuanabiya, matautano poxorū paeba xua Jesús equeicha pinae asū. <sup>19</sup>Nexata ichamonaē Pablo teicatsi pecaponaenexatsi atororotha ichaxota ba pentacaponaewi nacaetuteiba, poxonaē ichaui muxu peexaneibi. Barapo pentacaponaewi matabūxūyo pewūn Areópago, Pablo yainyabatsi, jeichichi:

—Pana netsipaebare bepayabara yaputaein po diwesi xua cuidubiya paeba ducuaenaebiyame. <sup>20</sup> Xuaunxuae pana tsipaebame, barapo diwesi jopa payaputaeyino bayatha. Pata bequein yabara yaputaetsi xua po diwesi baxua yabara caunuta, jei barapomona.

<sup>21</sup> Atenas tomaramona iru pomona penanapaincha jinompaewi xua icha nacia werena peponaewi, pomona anoxuae jinompa xote, daxita barapomona ɳ saya pepaebibi. Yawa saya ɳ cou paebeiba poxona pena jume jume taiba, saya baxua paebeiba.

<sup>22</sup> Nexata Pablo Areópago wun matabuxuyo peitabaratha tatsi asiya uncuataba. Pablo namchi, jeye:

“Paxam Atenas tomaramona pam. Bara paca cui yaputainchi xua painya nacomun wuna pajaintame. <sup>23</sup> Poxona ponan ichaxota painya nacomun wuna pajaintathopeibame tan ainya ibo nacom matabon. Matautano tan baxota, ichaxota nacom wuna pajaintame, xua cou ichaxota pocotsiwatha xua be pexaethopaewa xua ichaxota duwei patautathopame baxua cou panta tinadutame. Baxua panamchim couje: ‘Barapo nacom xua pon jiji jopa yaputaeyo’, pajam. Xu-aunxuae cou asiya pawun dutame pon, bapon, apara pepa Nacom. Xuaunxuae po diwesi yabara paca tsipaebatsi, barapon pejume diwesi apara.

<sup>24</sup> “Barapon pon pepa Nacom, daxita barapo ira exana. Daxita carepaya juraya exana. Barapon pon pia coya peewatsin barapo susato nacuano, yawa barapo itabocono. Po bon patsiacabeibame Nacom xua po botha jiji wuna pejaintithopeibinexa Nacom, apara ba Nacom jopa poponaeyo barapocotsi botha. <sup>25</sup> Xua pocotsiwan jiji taexana Nacom nexa, baraxua Nacom jopa nantawenoneibiyo. Barapo Nacom saya pia coutha daxita nacata exana. Peayapusuwano, naca

cata. Daxita barapo petusato tutu joibo naca cata. Baxuan daxita amanaya saya nacata exana. Daxita ichauxino muxuna exanano.

<sup>26</sup> “Copiya meisa bapon Nacom compa exana pebin, bara caein. Barapo cae janatha daxita yanacia exana jiji. Daxita wuna tsiwanaeya yaputaneno poxona naexanaena daxita jiji. Matautano yaputane xua eta po weiyobetha jinompaena. Matautano yaputane xua pia irantha bexa naexanumenaponaena.

<sup>27</sup> Icha pebin cuita cananta xeinaetsipa Nacom, bara Nacom cana exanaetsipa xua bapon bara Nacom pejume cowunsiwa tsainchi. Nacom jopa tajú ecaeyo ichitha bara waxantha imoxoyo popona. <sup>28</sup> Nacom pepoponaexae daxota asu jinompatsi. Nacom naca exana, daxota beta nacuiyenabatsi, yawa daxota wacobexitha ɳ waexanae. Ichaunxuae ichin xua paca tsipaebatsi barichi painyamonae baxua paeba pomona diwesi petinaewi poxona jei, ‘Nacom apara pia jiwichi waxainchi’, jei. <sup>29</sup> Waxainchi Nacom pia jiwichixaetsi, daxota jopa bewa nanta xeinaetsi xua Nacom po Nacom pepa Nacom, apara jurpa po nacomun jiji exana pecobetha. Barapo nacomun po nacomun xua jiji cana exana xua oro nainton yawa xua plata nainton yawa xua ibowan, saya jiji pia coyene cuirutha nanta xeina xua peexanaewa barapo nacomun. <sup>30</sup> Matha copiya bayatha Nacom saya beitatemaya tane jiji abe pia peexanaewan tatsi, tsipei barapomona jopa yabara yaputaeyo pocotsiwa Nacom ichichipa. Ichitha matapainya anoxuae daxita jiji Nacom cui itoroba xua petsita xeinaenexatsi icha juntu coyene, xua jopa equeicha peexanaenexa abe peexanae coyene. Saya ɳ penanta xeinaenexa tsane pocotsiwa Nacom ichichipa. <sup>31</sup> Nacom matacabi wun duta xua po mataqueitha tsane Jesús caetuaetutetsina daxita jiji

pia peitabaratha. Barapo matabaratha tsane Jesús xaniwaicha yabara paebina daxita jiwí xua penatsicuentasiwa xua abe peexanaexae. Pomonaexua abe exana itawetsinchi, pomonaexua wunaexana jopa itawetsi tsainchi. Nacom itapeta, xua Jesús tsiitapetatsi barapo penacuichiwa tsipei Jesús saya xaniwaicha pepaebin. Poxonaexua Nacom Jesús asu exanatsi petupaewitha, Nacom naca tsita itapeinya xaina xua apara Jesús tsiitapetatsi barapo penacuichiwa”, jei Pablo.

<sup>32</sup>Poxonaexua barapomonaexua Pablo jume tainchi po coyene xua equeicha petupaewi pinaexua tsaibi tsane, ichamonae Pablo jume cui caponatsi nawita. Ichamonae namchi, jeye:

—Bexa paca jume tainchi equeicha xuaunxuaexua paebame, jeichichi Pablo.

<sup>33</sup>Nexata Pablo cuenta ponataba barapomonaexua. <sup>34</sup>Ichitha ichamonae Pablo puna poinchi yawa bapomonaexua Jesús jume cowuntatsi. Ichun barapomonaexua jiwana pewun Dionisio. Bapon Dionisio Areópago wun matabuxuyo jiwana pin. Petsiriwa powa iru napona powa iru pejume cowuntsixae Jesús, bapowa pewun Dámaris. Ichamonae iru napona pomonaexua iruru Jesús pejume cowuntsiwichi.

### Meje yabara poxonaexua Pablo Corinto tomaratha popona

**18** Pirapae equeicha Pablo Atenas tomara wewarapiya. Corinto tomara bewarapiya. <sup>2</sup>Baraxota Pablo caxina judi monaepin, pon pewun Aquila. Bapon Ponto nacuapin. Piowa tatsi pewun Priscila. Piseuribe mexuaetha Italia nacua wewaraparenabe, tsipei pon romanomonaexua itorobiya pia pepa peewatsinchi pon pewun Claudio, bapon judi monaexua daxita itorobatsi xua pewarapaewa tsane barapo Roma tomara weya. Daxota

Corinto tomaratha patopabe. Pablo siwa pona, Aquila petsiriwano siwa poinchibe. <sup>3</sup>Pablo naeca Aquila pia botha tsipei bapon pia penacuichiwiyo iru xaina icha Aquila piawabe ichi. Pia penacuichiwiyo xaina xua chivo boco bouton exana. Aquila piowabe nacuitabe, iru Pablo piawa nacuita. <sup>4</sup>Daxita matababi, po matababintha pentaquei seicaexua matababintha Pablo poneiba judi monaexua pia penacuetatsi botha tatsi. Baxota Pablo jume daunweya cueicueijeipepamonaetha pepa judi monaetha iru pomonaetha jopa judi monaexua naexanaeyo. Pablo cueicueijeipepamonaetha tsipei ichichipa xua barapomonaexua Jesús pejume cowuntsiwa tsainchi.

<sup>5</sup>Poxonaexua Silas iru Timoteo Macedonia nacua wepatoparenabe, barapoxonaexua daxita matababintha Pablo cuidubeiba judi monaetha. Pablo paeba xua pinaexua pon Jesús jeichichi xua apara pinaexua bapon apara bara Mesías, pon xua pinaexua barapomonaexua pewunaexua ewatsixae. <sup>6</sup>Barapomonaexua tamropata pitaba xua Pablo abe yabara paebatsi yawa tsumu jume baru paebatsi. Nexata Pablo pepatomeicha nama paparuwa nunataba. Baxua exana poxoru barapomonaexua anthuetafiya jume tane. Pablo barai barapomonaexua, jeye:

—Bara apara painya coutha icha pana natsicuentame xua daxota poxonaexua paweraweracaname. Jopa tacouthinyo xua jopa paxeinaem tsane peajuntacuiyapusuwa, tsipei bayatha yabara paca tsi-paebatsi barapo peajumeyapusu diwesi. Tha anoxuae Nacom Pejume Diwesi caponaetsi pomonaetha pomonaexua jopa judi monaexua naexanaeyo, jei Pablo.

<sup>7</sup>Barapoxonaexua Pablo judi monaexua pia penacuetatsi bo tatsi wewarapiya. Pablo pona Justo pia bo beya tatsi. Bapon Justo, icha wun xaina, Ticio baraichi. Bapon wunaexua pejanteibin

Nacom. Bapon yabo uncuia ichaxota imoxoyo judiomonae pia penacaetutsi bo tatsi pewna werena. <sup>8</sup> Irũ Crispo, pon judiomonae pia penacaetutsi bo peyapucauncuaein, bapon piamonae matabũxyo barũ jume cowũta Jesús pon jiwi Pecanamataxeinaein. Barichi pinmonae pomonae Corinto tomaratha jinompa poxonae jume tane Nacom Pejume Diwesi, bapomonae irũ jume cowũta Jesús. Pomonae pejume cowũtsiwi barapomonae daxita bautisabatsi. <sup>9</sup> Bapoxonae Pablo merawi camaituncua Nacom pon Pecanamataxeinaein jiwi. Pablo baraichichi, jeye: “Jopa junuwinde. Nacom Pejume Diwesi paeba ducuaenaebiyama. Jinxoba moyam. <sup>10</sup> Tsipei apara, xan cabarũ popoinchi, daxota ichamonae jopa itacũpaetsi xua abe necaexanaewa. Barapo tomarathe tamonae, pinmonae apara inta jinompa”, jei Jesús. <sup>11</sup> Pablo baxota popona dieciocho po xometiyobe Corinto tomaratha. Baxota Pablo cuiduba ducuaenaebiya Nacom Pejume Diwesi.

<sup>12</sup> Irũrũ pebin popona pon pewn Galión. Bapon Galión Acaya nacuapiwi pia peyanacua ewatsinchi exanatsi. Barapoxonae judiomonae pomonae Acaya tomarapiwi nacaetuta Pablo yabara nacaetutatsi pecasebixaetsi xua pecaponenexatsi Galión peitabaratha tatsi. <sup>13</sup> Judiomonae namchi, Galión baraichi, jeye:

—Poxonae bapon Pablo paeba ducuaenaebiba pinmonae baraxua jume jejei tsaibi. Pablo cuidubeiba jiwi, xua pinae jame bewa jiwi wũnae jainteibi Nacom po coyene jopa jũpaeyo Moisés pia peitorobi coyenewa tatsi, jei barapomonae.

<sup>14</sup> Pablo bara muxu pepaebi, irũ Galión paebaxoyarũ. Nexata barapon namchi judiomonae baraichi, jeye:

—Û judiomonae pam. Painya xoba pana tsipaebame. Jame icha bapon caiba, icha jiton bexotsi, icha ichawiyo exana xua abe, metha jame bapoxonae paca jume jejei tsipaetsi. Ichitha bapon jopa abe exanaeyo. <sup>15</sup> Saya ù payabara cueicueijam tsaibi barompaya painya cui xua painya amo jiwi pia cui coyeneya tatsi. Moya baxua paxam paexande pocotsiwa Pablo payabara paebame. Tsipei jopa bepacata naexanaetsi be pon jiwi peyabara paebin xua penatsicuentisiwa xua abe peexanaexae. Moya painya coutha pacui itawere, jei Galión.

<sup>16</sup> Bapoxonae Galión pesato benapuna torobabiya barapo judiomonae. <sup>17</sup> Bara nexata daxita judiomonae Sóstenes waetabatsi pon judiomonae pia penacaetutsi bo tatsi peewatsin. Barapomonae Sóstenes butsi Galión peitabaratha tatsi. Daichitha baxua Galión saya cui tane, jopa tsita ainya cuichi.

**Meje yabara poxonae Pablo equeicha Antioquía tomara beya caibeya warapa. Baxotiya tamropata pitaba xua warapa acoibi po cuiyobetha xua pecueicueijeinexa Jesús pia pexeinya jume diwesi tatsi**

<sup>18</sup> Pablo awiya came baxota popona ainya matababin Corinto tomaratha. Bapoxonae nama copiya napeyaba pomonae pejume cowũtsiwixae Jesús. Siria nacua bewarapiya weratha, po naetha po nae pin nae. Aquilano piowabe naponabe. Barapoxonae juntucuru bara ponatabichiba copiya matha nanta catepateya sibaxuba Cencrea tomaratha xua penayabara tsita itapeinya xeinaenexa xua nayabara jume cui wetsina xua exanaena xua bayatha Nacomtha nayabara tsiwũnae muxu duta. <sup>19</sup> Bara Efeso tomaratha patarũcũpa. Baxota Pablo Aquila

piseuribe xubetatsibe pia ponaetsi ichaxota judiomonae nacaetuta barompaya pia penacaetutsi botha. Baraxota Pablo baru cueicueijeji barapo judiomonae. <sup>20</sup>Efeso tomarapiwi bequein Pablo apusiwatsi xua abu peecaewa tsane. Ichitha Pablo juntucuru jopa beecaeyo baxota ainya matababin. <sup>21</sup>Nexata Pablo napeyaba barapomonae. Pablo namchi, jeye: “Tha nama Jerusalén tomara beequiyaetsi. Tha naewatequiyaetsi xua jiwi petsinacaetutsinexa pexaewa xua penabanaewa. Metha equeicha paca taeyoparenaeinchi icha Nacom metha newuna ichipaena”, jei Pablo.

—Bara warapataba Pablo. Efeso tomara wewarapiya jeratha po naetha po nae pin nae. <sup>22</sup>Poxonae Cesarea tomaratha patopa Jerusalén tomara be-iyá, pia jacobichi pomonae Jesús pejume cowuntsiwichi. Bapoxonae equeicha Antioquía tomara bewarapiya. <sup>23</sup>Poxonae bara juntucuru yaainya merawin jopa baxotiya equeicha icha nacuabe bewarapiya. Galacia nacua bewarapiyano. Frigia nacua bewarapiyano. Baxota Jesús pejume diwesi cuiduba Pablo pomonaetha pomonae Jesús pejume cowuntsiwi. Pablo juntú coyene tsacaba xua barapomonae ajuntuyapusuya pejume cowantaponaewa tsane Jesús.

**Meje yabara poxonae Apolos  
Nacom Pejume Diwesi  
cueicueijeji Efeso tomaratha**

<sup>24</sup>Caein judiomonae jiwapanin Efeso tomaratha patopa. Bapon pewun Apolos. Bapon seicaya iru Alejandría tomarapin. Bapon Nacom Pejume Diwesi peyaputaecin yawa beta cacueicueijeji barapo diwesi. <sup>25</sup>Apolos beta yabara cuidubatsi ichamonae xua Jesús, pon Pecanamataxeinaein jiwi, pia cui. Juntú coyene weiweinaya paeba.

Xaniwaicha piamonae cuiduba Jesús yabara bequein saya yaputane xua po coyene pinae Juan pebautisabiwa jiwi xua icha juntú coyene pexeinaenexa Nacomtha. <sup>26</sup>Apolos judiomonae pia penacaetutsi botha tatsi bichocono juntú coyene wunaeya cueicueijeji Nacom Pejume Diwesi. Priscila, Aquila piowabe jume tanebe bapon. Wababe bapon, pia bo becayabe. Aquila, Priscila pia pebinbe yabara muxu tsidutabe icha diwesi xua Nacom pia pepa diwesi po diwesi xua jopa yaputaeyo. <sup>27</sup>Apolos ichichipa xua peponaewa Acaya nacua beya. Bapoxonae pomonae pejume cowuntsiwixae Jesús, Apolos canatsiwana tinaxotsi carta xua tatinatsi pomonae pejume cowuntsiwixae Jesús. Daxota barapomonae tatina xua Apolos pententa weiweinaya wabinexatsi. Poxonae Apolos patopa Acaya nacua, bapon yawena pomonaetha pomonae bayatha Nacom jume cowuntatsi pomonae Nacom peantobexae. <sup>28</sup>Apolos daxita jiwi peitabaratha jume amanayaba poxonae Jesús beta yabara paebatsi. Daxota barapomonae judiomonae jopa itacupaetsi xua pejume notsiwatsi bapon po coyene xua poxonae bapon abe pepaebiwa. Poxonae Apolos yoroba Nacom Pejume Diwesi bapon tsita itapeinya xeina xua Jesús apra Mesías pon Nacom itorobica.

**Meje yabara poxonae Pablo  
Efeso tomaratha popona**

**19** Poxonae Apolos Corinto tomaratha eca, bapoxonae iru Pablo seicaya ducuaebiwa daxita tomaran jupaya, po tomarantha ichaxota atororon. Efeso tomaratha patopa, baxota Pablo caxina ichamonae pomonae Cristo pejume cowuntsiwichi. <sup>2</sup>Pablo yainyaba barapomonae, jeye:



—¿Bayatha Nacom pia Pejumope tñaxu tatsi painya juntu coyenetha pacata pata poxonae pajume cowñtame Jesús? jei.

Barapomonae Pablo jume notatsi, jeye:

—Jume, jopa payaputaeyino. ¿Eta pocotsiwara xua Nacom pia Pejumope tñaxu tatsi? Bayatha jopa payabara jume taeyino baxua, jei.

<sup>3</sup>Pablo yainyaba, jeye:

—¿Eta pabichim poxonae pajume cowñtame poxonae paca bautisaba? jei.

Pablo jume notatsi, jeye:

—Apara saya payabara jume cowñtana xua Juan cuiduba, po coyene xua Juan itorobatsi xua jiwi pebautisabiwatsi, jei.

<sup>4</sup>Pablo jume nota, jeye:

—Aja, Juan bautisaba pomonaetha pomonae abe pia peexanae cuiru coyenein nacui barapenta xua pomonae pejume cowñtsiwichi Nacom. Daxota metha Juan piamonaetha barai: ‘Pajume cowñde pon xua tsiwana patopan’, jei Juan piamonaetha. Xua Juan namchi: ‘Pon xua tsiwana patopan’, jei, bapon apara Jesús, pon ‘Mesías’ baraichi, jei Pablo.

<sup>5</sup>Poxonae baraxua Pablo jume taerucupatsi, caena barapomonae bautisabatsi Jesús pia pewantha tatsi pon Pecanamataxeinaein jiwi.

<sup>6</sup>Poxonae Pablo barapomonae pecobetha mata jayaba, barapoxonae barapon Nacom pia Pejumope tñaxu tatsi barapomonae tapatatsi pejuntu coyeneintha, yawa cueicueijei exanebatsi icha jumeintha xua ichamonae pia jume tatsi. Matautano barapoxonae barapomonae cueicueijei Nacom Pejume Diwesi pocotsiwa Nacom yaputane exana. <sup>7</sup>Daxita barapomonae pomonae baxota ena doce

pomonae matabuxuyobe pomonae xua Jesús pejume cowñtsixaetsi.

<sup>8</sup>Baxota Efeso tomaratha, Pablo judiomonae pia penacaetutsi botha tatsi poneiba acoibi po xometiyobetha Nacom Pejume Diwesi pecueicueijeiwanexa. Bapon jopa junuwiyo poxonae cueicueijei. Matautano yabara tsipaeba po coyene Nacom waba jiwi petanaexanaexatsi piamonae tatsi pomonae itorobiya peewatsixae. <sup>9</sup>Ichitha ichamonae aichaxaibi jume tane. Jopa juntucuru bejume cowñtsiyo. Saya barapomonae jiwi peitutha tatsi abe yabara paeba Jesús pia pena pecuidubiwa tatsi. Nexata barapomonae pia xainya weya tatsi Pablo napitaba. Saya meisa baru pona pomonae Jesús pejume cowñtsiwichi po bo penacidubi bo beya. Pebin pon pewun Tirano barapo bo, bapon pia bo tatsi. Barapo botha Pablo daxita matabi Nacom Pejume Diwesi cuidubeiba. <sup>10</sup>Baraxota Pablo ainya weibe paeba ducuaebiya Nacom Pejume Diwesi. Daxita pomonae Asia nacuapiwi judiomonae iru pomonae jopa judiomonae naexanaeyo barapomonae jume cowñta Jesús pia pexeinya jume diwesi tatsi, pon Pecanamataxeinaein jiwi. <sup>11</sup>Nacom Pablo yawenatsi xua pexeinya petsita itatsi coyenewan exana Nacom pia peayapuswatha tatsi. <sup>12</sup>Ichamonae paparuwan yawa painyaweran capona Pablo beya xua barapo paparuwantha Pablo peperu jayababinexatsi. Barapo paparuwan nata capona peatene jiwitha. Bapoxonae barapo paparuwantha nainya axaibi tsouneibi. Iru pomonae cauri xeina barapo paparuwantha nacapanenebiya tsaibi. Barapomonae cauri wepu poneibatsi.

<sup>13</sup>Ichamonae judiomonae, pomonae saya pejinompaewi, barapomonae pia cui xeina xua jiwi taitaweteibatsi cauri.

Barapomonae ichichipa Jesús wun wun taibatsi poxonae itaweta cauri. Barapomonae caurimonae baraichi, jeye: “¡Bara Jesús pewuntha paca itawetatsi, pon Pecanamataxeinaein jiwi, xua pon Pablo wun yopita ducuaenaebiya!” jei barapomonae.

<sup>14</sup> Iru barapoxonaeru judiomonae pin pon pewun Esceva, xeina siete poyobe tatsi pebiwi. Barichi barapo siete poyobe wun wun taibatsi Jesús, poxonae itaweta cauri. Esceva sacerdotemonae pia pentacaponae wiwana tatsi. <sup>15</sup> Poxonae barapomonae paeba barapo wuntha, Jesús pewuntha tatsi, barapomonae jume notatsi cauri, jeye: “Bara taya-putaein Jesús, Pablono bara yaputanno. ¿Incane paxamda? ¿Jintam pamda?” jei bapon cauri.

<sup>16</sup> Bapoxonae barapo siete poyobe pexainya betanaxorenatsi pon cauri xeina. Barapomonae butsi. Matautano barapomonae jopa nacuiyenabiyo. Barapo siete poyobe daxita tamasa jebompatsi yawa wan dubatsi. Bo bejumasa ducupiya. <sup>17</sup> Pomonae Efeso tomaratha peenaewi, judiomonae, iru pomonae jopa judiomonae naexanaeyo, daxita bapomonae jume tane xua siete poyobe jumasa ducupa. Barapomonae junuwa bichocono. Daxota barapomonae Jesús pon Pecanamataxeinaein jiwi wunae jaintatsi.

<sup>18</sup> Pomonae Jesús jume cowuntatsi pinmonae barapomonae jiwana baxota pata. Barapomonae jiwi peitutha tatsi paeba xua bepa pinae bayatha abe exana poxonae mara coyeneya exana nawita. <sup>19</sup> Pomonae Jesús pejume diwesi coyene nacuiduba, barapomonae carendena diboron po diboron xua mara yabara penacuidubiwan. Barapo diboron tauteba. Poxonae barapo diboron tauteba daxita nataeumena. Barapomonae yabara matoma ununa xua

pinae barapo diboron matoma nawita, cincuenta mil po paratiximonaebe pinae nantomata. <sup>20</sup> Barapoxonae pin bicheito jume cowunta Jesús, pon Pecanamataxeinaein jiwi. Yawa barapomonae tsita itapeinya xeina dubenanaebiya xua bara Nacom aparta xeina peayapusu itorobi coyenewa.

<sup>21</sup> Poxonae baxua weta Pablo najuntu coyene weta xua pesiwa pon-aeua tsane tomaran xua Macedonia nacuatha, yawa xua Acaya nacuathano xua bapoxonae Jerusalén tomara bepe-warapiyaenexa. Nanta xeinano xua peponaeua tsane Roma tomara beya. <sup>22</sup> Ponbe Pablo yawenatsi, Timoteono Erastono, baponbe Pablo Macedonia nacua beitorobiyabe. Cataunxuae abu bapon Pablo Asia nacuatha eca.

### **Meje yabara poxonae jiwi namtsebiya wawai Efeso tomaratha Pablo pecasebixaetsi**

<sup>23</sup> Barapoxonae Efeso tomarapiwi anaya anaepanaeya najume cayayataxuba poxoru aichaxaibi xua pejume taewa xua Pablo yabara cueicueiwei Jesús pia pena pecuidubiwa tatsi. <sup>24</sup> Pon xua abe penajume cayayataxubin xua poxonae namtsebiya wawai bapon pewun Demetrio. Bapon pinmonae xeina pomonae petanacuichiwichi xua petaxanaewichi penainwixi. Barapomonae Demetrio taexanatsi tsiqui penain boxi xua Artemisa pia bo canaxobeba. Artemisa Efeso tomarapiwi pia nacomwa tatsi. Barapowa jopa be pepa nacomiyo. <sup>25</sup> Bapon Demetrio pia petanacuichiwichi waba. Pomonae iru Artemisa pia penain boxi peexanaewi wabatsino. Demetrio namchi daxita barapomonaetha, jeye: “Bara metha payaputaneme xua paratixi xeinatsi poxoru Artemisa pia penain boxi exanatsi wacaenaetsinexatsi, daxota xeinatsi paratixi. <sup>26</sup> Pon pataneme yawa

pajume tanemeno, barapon Pablo. Bapon paeba ducuaenaebiya xua pinae pomonae icha nacom canaŭtsiya exana apara pinae xapain jopa daxua pepa nacomiyo. Pomonae Pablo cuidubeiba jume jejei tsaibichi ayei jiwi Efeso tomarathano, Asia nacuathanorū jume jejei pinmonae. <sup>27</sup>Baxua bichocono nacata abe, tsipei icha jiwi jopa comocaetsipae barapo penain boxi xua waxainchi exaneibatsi bapoxonae jopa xeinaetsipaetsi paratixi. Jiwi namchi tsane: ‘Artemisa pia pin bo tatsi abe. Xapain jopa pepa Nacom pin pia boyo’, jejei tsane. Cataunxuae anoxuae barapo jiwi Asia nacuapiwi irū daxita nacuanpiwi Artemisa wūnae jainteibatsi. Ichitha icha jume cowūntsinchi Pablo, metha equeicha jopa bewūnae jainteibichipaetsi Artemisa”, jejei Demetrio.

<sup>28</sup>Poxonae baxua Demetrio jume taerūcupatsi, anaepanarūcupa barapomonae. Yawa barapomonae namtsebiya wawai, jeye: “¡Maisa Artemisa powa pata tanecanamataxeinaewa, barapowa bichocono pejūntū coyene xanepanaewa! ¡Maisa Efesiomonae pan Artemisa wūnae pajaintan!” jejei barapomonae.

<sup>29</sup>Barapoxonae daxita tomarapiwi jupaya anaepana. Gayo irū Aristarco, ponbe Macedonia nacuapinbe, ponbe Pablo pepuna ponaexaetsibe, baraponbe waetabatsibe. Po botha ichaxota jiwi nacatuteiba pecueicueijeinexa tsaibi tsane bara bemaxū cayatsibe. <sup>30</sup>Bepa bequein Pablo najoniyaei barapo botha, petsipaebinexa tsane barapomonae, ichitha Jesús pejume cowūntsiwichi Pablo jopa pu copatichi. <sup>31</sup>Barichi pomonae pentacaponae wi jiwana Asia nacuatha, barapomonae Pablo pia jiwi tatsi cou tana cajume caitorobatsi xua bepa pinae Pablo jopa najoniyae tsane baxota. <sup>32</sup>Barapoxonae barapo

penacaetutswatha, ichamonae icha caununaya wawai irū ichamonae icha caununaya wawai. Daxita barapomonae najume cayayataxubiya wawai. Ichamonae jopa yaputaeyo po coyene xua barapomonae yabara nacaetuta. <sup>33</sup>Barapo penacaetutsimonae anaepana. Pablo yabara anaepanatsi irū pijimonae tatsi tayabara anaepanatsi. Daxota judiomonae caemonae najiwana napuna totabiya pebin xua bapon peitabaratha peuncuaenexa barapo penacaetutswatha. Bapon pewūn Alejandro. Bapon pecobetha jume matawenta tsipei ichichipa bequein yabara jume yawena judiomonae barompaya piamonae. <sup>34</sup>Poxonae barapomonae Alejandro yaitaerūcupatsi xua Alejandro judiomonae pin, barapoxonae equeicha daxita namtsebiya wawai tsompae ainya horabe. Barapomonae namchi, jeye: “¡Maisa pata tanecanamataxeinaewa Artemisa! ¡Maisa barapowa pejūntū coyene xanepanaewa! ¡Maisa efesiomonae pan Artemisa wūnae pajaintan!” jejei barapomonae.

<sup>35</sup>Nexata, pon xua tomara peewatsin, bapon uncuā barapo penacaetutsi itabaratha. Bapon jume matawenta xua equeicha jopa penamtsebiya wawainexa tsane barapomonae. Bapoxonae bapon namchi, jeye: “Pomonae Efeso tomaramonae pam. Bara daxita nacuamonaepiwi naca yaputane xua waxainchi notatsi Artemisa pin pia bo tatsi. Mataŭtano yaputane xua waxainchi botatsi po iboto xua athawe jopeica. Barapo iboto apara bara Artemisa tsipei be Artemisa pia pawī. <sup>36</sup>Jiton dapocotsin aibi pon xua nejume barai xua naeraban, daxota saya irū moya pande. Painya xoba ichawa pananta xeiname poxonae jopa beta pananta xeinaem. <sup>37</sup>Ponbe, Gayo irū Aristarco, ponbe pacarendename,

baponbe jopa abe paebiyobe. Baponbe jopa caibiyobe xua xoyo boca Artemisa pin pia botha tatsi. Matautano Artemisa nacomwa jopa cui aebiyobe. <sup>38</sup>Icha Demetrio iru petanacuichiwichi nanta xeina xua ichamonae Demetriobaru abe taexainchi moya jame barapomonae bewa ponaena po bo ichaxota ena pomonae jiwí peyabara paebiwi xua penatsicuentisiwa xua abe peexanaexae. Bapoxonae barapomonae itacupatsi xua petsipaebiwa pomonaetha pomonae tomara pentacaponae wi po coyene xua ichamonae abe exana barapomonaetha. <sup>39</sup>Icha ichawa painya paebichi abu anoxuae jopa papaebinde. Po mataqueitha poxonae pentacaponae wi ba nacaetuta pejume taenexa xua jiwí paeba bapoxonae jame papaebare. <sup>40</sup>Wanamtsebiya wawaijeixae anoxuae daxota romanomonae naca yabara anaepanaena tsipei nanta xeinaena xua waxainchi aichaxaibichi xua barapomonae naca itoroba. Jopa xeinaetsi po diwese xua yabara tsipaebinchi barapomonaetha pocotsiwa xua yabara namtsebiya wawaichi”, jei tomara peewatsin. <sup>41</sup>Poxonae najume wetaba baxua, barapomonae pesato beitorobiyatsi.

**Meje yabara poxonae Pablo  
siwa pona Macedonia  
nacua, Grecia nacuano**

**20** Bara najume wetarucupa daxita poxonae namtsebiya wawai tsompae. Bapoxonae Pablo waba pomonae Jesús pejume cowuntsiwichi pebaru nacaetutsinexa. Barapomonaetha Pablo yabara tsipaeba Jesús pejume diwesi xua barapomonae peajuntuyapusuya xanapanaya pejinompaenexa tsane Nacomtha. Bapoxonae Pablo barapomonae napeyaba. Macedonia nacua bewarapiya. <sup>2</sup>Daxita barapo

tomaran, Pablo siwa pona barapo Macedonia nacua, cuidubano pomonaetha pomonae Jesús pejume cowuntsiwichi, xua peajuntuyapusuya xanapanaya tajinompaenexa tsainchi Nacomtha. Poxonae nacui wetaba equeicha Grecia nacua bepatopiya. <sup>3</sup>Baraxota Pablo acoibi po cometiyo be yapucaewa. Bara juntucuru Siria nacua beya warapa jeratha po nae pin naetha. Bapoxonae jume tane xua pinae judiomonae anaepana xua Pablo be xubapabatsi. Daxota Pablo najuntu cui weta xua caibeya peponaewa tsane petaxutha Macedonia nacua beya. <sup>4</sup>Pablo yanabatsi ichamonae. Iru ichun naponae bapon pewun Sópater, pon Berea tomarapin, pon Pirro pexanto tatsi. Iru ichunbe naponabe baponbe pewunbe Aristarco iru Segundo, baponbe Tesalónica tomarapinbe. Iru ichun naponae, bapon pewun Gayo, Derbe tomarapin. Iru ichun naponae, bapon pewun Timoteo. Iru ichunbe naponabe, ponbe pewunbe Tíquico iru Trófimo, baraponbe Asia nacuapinbe. <sup>5</sup>Barapomonae daxita pana netsiwana nantacaponae, Troas tomaratha cou baxota pana ewata. <sup>6</sup>Ichitha Filipos tomara weya pawarapan jeratha, po naetha po nae pin nae poxonae weta Pascua wun matabin. Barapo Pascua matabintha jiwí xane pan xua pocotsiwa jopa cotowiyo. Poxonae cinco po matabibee caewa papatan Troas tomaratha, baxota barapomonae pacaxiban. Baraxota paenan siete po matabibee.

**Meje yabara poxonae Pablo  
Troas tomara siwa pona**

<sup>7</sup>Pentaquei seicae matabibitha, domingotha, pana nacaetutan, pata epanantarubi janacaenexa tsane pan. Pablo cuiduba pomonae Jesús pejume cowuntsiwichi, tsipei baya

warapaena Pablo. Daxota poxonae cueicueijeji beya yapapae. <sup>8</sup>Po tutu athabeicha barapo tututheicha pana nacaetutan. Barapo tututha ainya coichan dubena. <sup>9</sup>Pewowindu pewun Eutico, barapoyo bomuxu tututha ventanatha pemuxuburutha eca. Pablo bayiyo tsuxubi xua Nacom Pejume Diwesi cueicueijeji. Barapoxonae Eutico nantacotiya maitecataba. Tajn wejopeica. Po tututha Pablo cueicueijeji tsuncuae xua ichaxota acoibi tututheicha barapo tutu wejopeica. Eutico petupaeyo pitatsi. <sup>10</sup>Bara nexata Pablo dunatabica. Pablo Eutico caquita ecatsi pentabocototha. Pablo naisa cateita waetaba. Piamonae barai Pablo, jeye:

—Jopa pajunuwinde, bara apara asu, jei.

<sup>11</sup>Nexata Pablo equeicha caibe juinya. Pan epa janaxuba, yawa xane. Barapoxonae equeicha Pablo matowa cueicueijeji Nacom Pejume Diwesi, beya yajume pentha tsina. Bapoxonae weta. Bara cou nama matabi wnae tsuxubiba Pablo warapa. <sup>12</sup>Barapo pewowin Eutico equeicha bara asu. Eutico piamonae bo becayiyatsi. Daxita saya juntu coyene tsacabatsi xua juntema jinompa xua equeicha Eutico peasxae.

**Meje yabara poxonae Pablo jeratha Troas tomara wewarapiya po naetha po nae pin nae xua Mileto tomara bewarapiya**

<sup>13</sup>Paxan copiya jeratha paponan weratha Aso tomara beya tsipei yaitama Pablo pana itoroba xua bepa pinae weratha paponaein. Bapon yaitama bepa petaxutha ponaei. Bara xotiya, Aso tomaratha paichichipan payapitan Pablo. <sup>14</sup>Poxonae Pablo Aso tomaratha pacaxibarucupan, bapon equeicha pana yantaba. Mitilene tomara beya pawarapan. <sup>15</sup>Mitilene tomara

wepawarapiyan. Bapoxonae icha matabitha imoxoyo Quo tunaeotha papatan icha muxunenetha. Baraxota caentacabitha paenan. Equeicha icha matabitha Samos tunaeotha papatan. Barapoxonae equeicha icha matabitha Mileto tomaratha papatan. <sup>16</sup>Baxua Pablo exana tsipei bapon nanta xaina xua jopa beecaeyo ainya matabicin Asia nacuatha. Bapon aichaxaibi pona Efeso tomaratha. Ichichipa Jerusalén tomara beya bichoina peponaewa tsane, tsipei imoxoyo bara Pentecostés matabi tsane, icha bara pecui jupaenexatsi.

**Meje yabara poxonae Pablo tsipaeba penapatae jiwi Efeso tomaratha**

<sup>17</sup>Pablo Mileto tomaratha eca. Pablo najume caitoroba ichamonae xua Efeso tomaramonae pitiri jiwi pewabinexatsi pomonae Jesús pejume cowuntsiwichi, xua Mileto tomaratha pepatsinexa. <sup>18</sup>Poxonae Efeso tomarapiwi, penapatae jiwi pata baxota, Pablo barai, jeye: “Bara paxam payaputaneme xua wnae poponan poxonae copiya patopan Asia nacuatha painya xantha. Awiya cataunxuae barichin wnae poponan. <sup>19</sup>Daxita matabi Jesús pejume diwesi cueicueijan tsaibi. Jopa bichocono atsaca tsaibinyo. Jume wunaeya natsipaeban saya. Poxonae Nacom pon jiwi Pecanamataxeinaein pejume diwesi cueicueijan, bichocono yaitawanaeya cueicueijan yawa nejume yancababeiba judiomonae yawa bepa nejutebeibe. <sup>20</sup>Paxam payaputaneme xua jopa nacui baraxubinyo xua tapaca tsipaebiwatsi Jesús pejume diwesi xua po coyene painya nepaca yawenaewa tsane. Paca cuidubatsi jiwi peitabaratha tatsi. Matautano painya boxithano paca cuidubatsi. <sup>21</sup>Judiomonae jume daunweya cuiduban. Iruru pomonae jopa judiomonae naexanaeyo jume daunweya cuiduban xua barapomonae

bewa icha juntu coyene pexeinaenexa Nacomtha xuano pejume cowuntsinexatsi Jesús pon Wanacanamataxeinaein.<sup>22</sup> Nacom pia Pejumope tunaxu tatsi neitoroba xua bewa ponaetsipanjei Jerusalén tomara beya. Ichitha jopa nayaputaainyo pocotsiwa xua baxotiya tsane ichamonae inta exanaena.<sup>23</sup> Jame anoxuae saya meisa yaputan xua Nacom pia Pejumope tunaxu tatsi yabara netsipaeba xua daxita tomaran ichaxota pateibin. Nebarai, jeye: ‘Jiwi pecubi bontha cajebeibina, yawa caperaxa exaneibinano’, nejei Nacom pia Pejumope tunaxu tatsi.<sup>24</sup> Juntucuru xua icha tupan, baraxua jopa netsita ainya cuiyo. Bara jemba tsane icha saya poponaein. Icha tupan, bara jemba tsane. Daxota neitacupa xua juntu coyene weiweinaya exanaein pocotsiwa Jesús neitoroba beya yacuiya tujopaein. Matautano daxota neitacupa xua wetsin pocotsiwa Jesús neitoroba, pon Pecanamataxeinaeinchi jiwi, xua tapaca tsipaebiwatsi barapo pexeinya jume diwesi po coyene xua bichocono jiwi peantobewatsi Nacom.

<sup>25</sup> “Bayatha paca tsipaebatsi Nacom Pejume Diwesi po diwesi yabara xua Nacom waba jiwi, petanaexanaenexa tsainchi pijimonae jiwana tatsi pomonae itorobiya peewatsixae. Anoxuae bara xaniwaicha yaputan paxam pomonae pamxaem xua paca tsipaebatsi barapo diwesi, equeicha jopa pana netaem tsane.<sup>26</sup> Daxota anoxuae paca tsipaebatsi icha jopa pajume cowuntsim, baraxua apara jopa tacoyiyo. Bara apara painya coyam tsipei bayatha bequein matowa paca tsipaebatsi pexeinya jume diwesi.<sup>27</sup> Daxita xua Nacom neitoroba barapo diwesi omeicha paca tsipaebatsi. Jopa icha diwesiyo copatsinyo.<sup>28</sup> Painya coutha xanepanaya pana najuntu coyene yabara nanta xeinare.

Matautano xaniwaicha payapu eenare pomonae Jesús pejume cowuntsiwichi. Paxam pitiri jiwi pam, baxua paexande tsipei Nacom pia Pejumope tunaxu tatsi paca itoroba painya neyapu cainompaenexa tsane Jesús pejume cowuntsiwi tatsi. Matautano baxua paexande tsipei barapomonae Nacom piamonae tatsi, tsipei pexanto tatsi tsitupa xua barapomonae jopa peweraweracaewa tsane.<sup>29</sup> Yaputan poxona warapaein tacoutha patsina ichamonae. Barapomonae Jesús pejume cowuntsiwichi abe exanaeinchi. Barapomonae Jesús pejume cowuntsiwichi ducupa exanetnchi icha neuthu ichi.<sup>30</sup> Barichi painya jiwi jiwamonae ajumebeya cuidubina xua jopa xainyeyo. Barapomonae cuidubina penaerabi diwesi, xua pomonae Jesús pejume cowuntsiwichi pejume cowuntsinexa barapo penaerabi diwesi.<sup>31</sup> Dota pam, xua peabe jume, painya nejume cowuntsiwa. Pana necui yabara nanta xeinare xua paca cuidubatsi acoibi po weiyobe. Paca cuidubatsi merawithano, mataqueithano. Matautano paca siwa wecoyeichi ichacuitha.

<sup>32</sup> “Tamonae pam, Nacomtha pacata tsipaebatsi xua paca necayawenaewa tsane, xuano xua Nacom Pejume Diwesi painya necayawenaenexa po diwesi xua paca cuiduba xua pinae Nacom paca antobe. Barapo Nacom Pejume Diwesi peayapusuwa xaina xua ajuntuyapusuya paca cana exanapona. Matautano paca catsina daxita pocotsiwa bayatha pepa piamonaetha yabara tsiwunae muxu duta xua catsiba paeba.<sup>33</sup> Jopa taichichi tsaibinyo xua ichun pia paratixi tatsi matautano xua ichun pia paparuwan tatsi.<sup>34</sup> Jame bara payaputaneme xua tacoutha natsiyabara nacuitan. Bara tawa comotan. Matautano xua pexaewa comotan, paparuwano.

Matautano yawenan pomonae xua necueyaba. <sup>35</sup>Bayatha payaputaneme xua daunweya nacuitan. Baxua exanan tsipei ichichipan xua painya neyaputaewa tsane, xua painya neyawenaenexa pomonae peacopeibi jiwi. Jopa pajuntemainaeinde xua Jesús pon Pecanamataxeinaein jiwi namchi, xua jeye: ‘Ba juntu coyene weiweina bichocono pon cata beyacaincha xua pon pecatsixaetsi’, jei Jesús”, jei Pablo.

<sup>36</sup>Poxonae Pablo najume wetsiya paeba, poxonae xua pitiri jiwi tsipaebatsi, bapoxonae pentabocototha uncua. Pablo daxita baru tsipaeba Nacomtha. <sup>37</sup>Barapoxonae daxita matowa wecoyeyi. Yawano matowa naisa teicatsino Pablo poxonae tsutsubatsi, peantobexaetsi. <sup>38</sup>Barapomonae bichocono wecoyeyi tsipei Pablo bayatha namchi, jeye: “Equeicha jopa pana netaem tsane”, jei. Barapoxonae barapomonae Pablo jera bepuna tayathopiyatsi po naetha po nae pin nae.

**Meje yabara poxonae Pablo weratha  
Jerusalén tomara bewarapiya  
po naetha po nae pin nae**

**21** Poxonae Jesús pejume cowuntsiwichi pacuenta ponan, barapoxonae Cos tomara bepawarapiyan weratha. Barapoxonae icha matabitha Rodas tomara bepaiyan weratha. Barapoxonae equeicha icha matabitha Pátara tomara bepawarapiyan weratha. <sup>2</sup>Pátara tomaratha baxota equeicha icha nae panotarucupan. Fenicia tomara bepawarapiyan. <sup>3</sup>Poxonae Chipre tunaeto patan pamatawacaicha toqueban. Barapo tunaeto pata tatsocona iya paxenta iyian. Siria nacua bepaiyan. Barapo nae Tiro tomaratha botouna, pejotsinexa tsane xua capona. Tiro tomaratha paxubarucupan barapo

nae. Baxota painompanno. <sup>4</sup>Baraxota Tiro tomaratha pacaxibarucupan pomonae Jesús pejume cowuntsiwichi. Barapomonae pia xantha tatsi pajinompan siete po merawiyobe. Barapomonae Pablo tsipaebatsi, jeichichi: “Jopa Jerusalén tomara beya ponaeinde”, jeichichi. Nacom pia Pejumoepi tnatuxi tatsi barapomonae yabara tsiwanaya tsipaebatsi po coyene xua ichamonae Pablo cana exanaeinchi barapo tomaratha. <sup>5</sup>Poxonae barapo siete merawiyobe payapucaewan paponarucupan. Daxita pomonae Jesús pejume cowuntsiwichi, tomara weya pana nepu taeumenathopiya yabuxino pexuino. Taetabo mene itapa bepaiyan. Baraxota pentabocototha paumenan. Nacom patsipaeban. <sup>6</sup>Pana napeyaban barapomonae, pana naisa teica pata taneantobexae. Bapoxonae equeicha jera panotarucupan, barapomonae equeicha pia boxi benawibiya.

<sup>7</sup>Bara papanenebiyan tsurucupae xua Tiro tomara weya paponan. Tolemaida tomara beya papanenebiyan. Baxota equeicha pajacoban pomonae Jesús pejume cowuntsiwichi. Caentacabitha baxota pajinompan. <sup>8</sup>Icha matabitha, Pablono yawa xua pomonae pata tacueyabixae pan Cesarea tomaratha papatan. Barapo tomaratha Felipe pia bo tatsi bepaiyan. Bapon Nacom Pejume Diwesi pecueicueijei ducuaenebiyae jiton. Bapon jiwana pomonae siete poyobe pomonae peyawenae jiwi. Barapo siete poyobe, matha cain itapetatsi Jerusalén tomaratha xua Jesús pia peitorobi jiwi tatsi peyawenaenexatsi. Barapon pia xantha tatsi paenan. <sup>9</sup>Felipe cuatro po pexantiyobe tatsi xeina. Barapowaxi cataunxae jopa jitha enaeyo. Barapowaxi tsipaeba jiwi Nacom Pejume Diwesi xua Nacom yaputane

exana. <sup>10</sup>Baxota caentacabiyobe paenan Cesarea tomaratha. Barapoxonae Judea nacuapin patopa, pon Nacom pia peitorobi pepaebin, pon pewun Agabo. <sup>11</sup>Agabo pana nesiwa pona. Pablo coreinya bocoto mara wejontatsi. Barapo coreinya bocototha petaxuno, pemaxuno Agabo pia coutha nacaecunta cubaxuba. Bapoxonae Agabo namchi, jeye:

—Bayatha Nacom pia Pejumope tunaxu tatsi netsipaeba po coyene xua judiomonae exanaena Jerusalén tomaratha. Bepa pinae barapomonae caiche tsane pon xua pia bocoto pexeinaein pocotsi bocote, ichaunxuae naichin, bara juta caichi tsane pinae. Matautano bepa pinae barapomonae cacaponae pomonaetha pomonae penanapaincha jinompaewi xua icha nacua werena peponaewi, jei Agabo.

<sup>12</sup>Poxonae baxua pajume tan, paxan iru pomonae Cesarea tomarapiwi Pablo pabaran, pajanje:

—Bara, jinxoba poname Jerusalén tomara beya, pajan.

<sup>13</sup>Ichitha Pablo pana jume nota, jeye:

—¿Eta xua metha pana siwa wecoyam? ¿Eta xua metha pana itanuwe forotame? Bara bayatha nacui yabara jume wetan tanecubinexa tsane, matautano tatupaenexa tsane Jerusalén tomaratha tajume cowuntsixae Jesús, pon jiw Pecanamataxeinaein, jei Pablo.

<sup>14</sup>Bequein Pablo jume daunweya pabaran xua jopa ponae tsane ichitha Pablo dapu jumetha bepa ponaei. Matapainya saya jopa equeicha pata jumeyo. Matautano pajan:

—Basaya moya baxua exanaena be pocotsi coyeneya xua Nacom ichichipa, pajan.

<sup>15</sup>Bapoxonae poxonae pana jume wetan baxua, bara nama paxainxainyan. Bapoxonae Jerusalén tomara bepawarapiyan. <sup>16</sup>Ichamonae Cesarea tomara-

piwi, pomonae Jesús pejume cowuntsiwichi pana nepuna pona. Pana capona bo beya pata tajinompaenexa tsane, pebin pon pewun Mnasón, bapon pia bo beya tatsi. Bapon Mnasón Chipre tunaetopin. Bapon pinae caena bayatha jume cowunta Jesús.

### **Meje yabara poxonae Pablo, Santiago siwa poinchi**

<sup>17</sup>Poxonae Jerusalén tomaratha papatan, baxota pomonae Jesús pejume cowuntsiwichi weiweinaya pana matenta waba bichocono. <sup>18</sup>Icha matacabitha Pablo pana nebaru pona. Pasiwa ponan Santiago. Baraxota iru daxita pitiri jiw jinomparu. <sup>19</sup>Barapomonae Pablo jacobae. Bapoxonae tsiwiyo bexa Pablo tsipaeba daxita po coyene xua Nacom exana pomonaetha pomonae jopa judiomonae naexanaeyo. Yawano paeba po coyene Pablo itorobatsi Nacom, xua petacaponaeenexa Nacom Pejume Diwesi tatsi. <sup>20</sup>Poxonae jume tane baxua xua Pablo paeba, barapoxonae barapomonae Nacom wunae jaintatsi. Nexata Santiago Pablo baraichi, jeye:

—Taema, incane jume taema. Judiomonae pin bicheiton tsoponae, pomonae bayatha Jesús jume cowuntatsi. Daxita barapomonae namuxutainyaba xua pinae daxita jiw nantawenona xua Moisés pia peitorobi coyene exanapona. <sup>21</sup>Cayopita ichamonae xua pinae cuidubame judiomonae pomonae icha nacuantha pejinompaewi. Pinae cuidubame xua equeicha pinae barapomonae bewa jopa yabara jume cui exanae pocotsiwa bayatha Moisés itoroba. Matautano pinae cuidubame barapomonae xua pinae jopa bewa penawi thabi coyene exanae tsane xua pewi thabiwa pia pexui ichaxota nareixacaena xua ichaxota pebiwixae xeina. Matautano pinae cuidubame xua barapomonae



bewa jopa exanae barapo peitorobi coyenewan xua pinae pocotsiwa wamo jiwu bayatha exaneiba. <sup>22</sup> ¿Eta xua waxainchi exanaeinchi? Tsipei judiomonaе, pomonaе pejume cowantsiwi Jesús, nacaetsina xote barapo Jerusalén tomarathe, poxonaе jume taena xua patopame. <sup>23</sup> Paxan xua paca itorobatsi baxua exande. Taema xote pata xantha cuatro poyobe poponabe pebiwi. Barapoyobe yabara nacui wunaе tsijume dutabe Nacomtha pocotsiwa xua exanapaeba. Anoxuae baxua barapomonaе bewa exanae pocotsiwa bayatha exanapaeba. <sup>24</sup> Barapomonaе matacayande paratixi nanacui baru nantomare sacerdotemonaepintha, xam nexano iru barapomonaе nexano xua jopa painya nenajuntu coyene taxobinexa. Nanacui baru nantomare, barapoyobe penanta catepateya sibapentsinexa tsane. Icha baxua exanaename, daxita jiwu cacui yaputaena xua bayatha jopa exanaem xua ichamonaе abe cayabara paeba. Yawa daxita jiwu cacui yaputaena xua xam xaniwaichiya exaname pocotsiwa Moisés itoroba. <sup>25</sup> Paxan pata tinan carta pomonaе Jesús pejume cowantsiwichi, pomonaе jopa judiomonaе naexanaeyo. Pata yabara tinan baxua xua pananta xeinan xua barapomonaе beexanaetsipa. Pajan barapo cartatha: ‘Painya xoba duwei pawu xaneme po duwein jiwu tsiseba ibo nacom. Matautano painya xoba paxaneme po duwein pon saya pipato tupuncua, xuano painya xoba pajana xaneme. Painya xoba pasiwa xeiname yabuxi xua jopa painya seurixi’, pajan, jei Santiago.

**Meje yabara poxonaе soldadomonaе Pablo maxu waetabatsi judiomonaе pin pia botha tatsi, bapoxonaе jiwu pecubi bo beya caponatsi**

<sup>26</sup> Nexata Pablo baru poinya barapo cuatro poyobe. Icha matacabi Pablo iru barapo cuatro poyobe exana po coyene xua jopa penajuntu coyene taxobiwa Nacomtha. Bapoxonaе Pablo iru barapo cuatro poyobe Nacom pin pia botha tatsi jojoniya. Pablo namchi, jeye: “Equeicha papatsinan siete po matacabibe poxonaе pawetsin po coyene xua daxota jopa pata najuntu coyene taxobiwa Nacomtha. Pacaponaein duwein sacerdotemonaepin pebexubinexa tsane xua pata catsinexa Nacom”, jei Pablo.

<sup>27</sup> Poxonaе barapo siete matacabiyobe imoxoyo yapucaewinaba, bapoxonaе Pablo judiomonaе Nacom pin pia botha tainchi. Pomonaе Pablo tainchi, barapomonaе judiomonaе pomonaе Asia nacula weya pona. Pomonaе Pablo tainchi, barapomonaе exana xua pin bicheito namtsebiya wawai xua Pablo pecasebixaetsi. Bapoxonaе Pablo waetabatsi. <sup>28</sup> Jume daunweya wawai, jeye: “¡Pajume taema, paxam pomonaе Israel nacuapiwi pamxaem! ¡Pana yawende! Barapon cuiduba ducuaеbiya daxita jiwu. Abeya naca yabara cui cueicueije. Matautano abeya yabara cueicueije Moisés pia peitorobi coyenewan tatsi. Matautano barapo Nacom pin pia bo abeya yabara cueicueije barapon. Matautano bapon griegomonaе matacapoinchi barapo Nacom pin pia bo berena. Poxonaе Pablo matacapona griegomonaе, Nacom pin pia botha tatsi atutube exana”, jei barapomonaе.

<sup>29</sup> Baxua paeba, tsipei poxoru bayatha barapomonaе Pablo tainchi Jerusalén tomaratha. Baxota Pablo baru pona Efeso tomarapin, pon pewun Trófimo.

Daxota barapomonaē catsawa nanta xeina xua metha bayatha Pablo Nacom pin pia botha baru pona Tró-fimo. Daumetha Tró-fimo baxota jopa naponaeoyo.

<sup>30</sup>Daxita tomarapiwi juraya equeicha jume daunweya wawai. Daxita cuinaerendena, barapomonaē Pablo yoroba teicatsi. Nacom pin pia bo wemaxu capoinyatsi. Barapoxonaē barapomonaē bichocono yaboupa cateitabanota Nacom pin pia bo. <sup>31</sup>Barapomonaē, pomonaē peanaepanaewi muxu Pablo pebexubichi. Bara nexata romanomonaē soldadomonaē pia pepa pentacaponaein tatsi jume tane xua daxita Jerusalén tomaramonaē najume cayayataxuba. <sup>32</sup>Nexata soldadomonaē pia pepa pentacaponaein tatsi, bapon pia soldadomonaē copiya piamonaē caeacetuteta. Bapoxonaē barapo soldadomonaē pin bicheito becuinaeyiya ichaxota Pablo muxu pebexubichi. Poxonaē barapo soldadomonaē taerucupatsi barapo bicheito xainya umenarucupa. Barapoxonaē barapomonaē equeicha jopa Pablo butsi. <sup>33</sup>Nexata soldadomonaē pia pepa pentacaponaein tatsi Pablo imoxoyo caquita uncuatabatsi. Bapoxonaē Pablo maxu waetabatsi. Bapon soldadomonaē pia pepa pentacaponaein tatsi piamonaē itoroba xua ainya naintothabe pemaxu cubaxubinexatsi Pablo. Bapoxonaē bapon soldadomonaē pia pepa pentacaponaein tatsi yainyaba pin bicheitotha, jeye: “¿Jintam baraponda? ¿Eta xua metha bapon exana?” jei. <sup>34</sup>Ichitha barapomonaē ichawan caununaya wawai. Ichamonaē ichawa wawai. Daxota bapon soldadomonaē pia pentacaponaein tatsi jopa xapain jume taeyo. Bapoxonaē bapon soldadomonaē pia pentacaponaein tatsi Pablo itorobatsi soldadomonaē pia bo beya

tatsi. <sup>35</sup>Poxonaē patopa soldadomonaē pia bo beya, penonobabeiyawatha xua nonababeibiya soldadomonaē Pablo yoichiya capoinchi bara beya. Pin bicheito bichocono anaepana daxota Pablo yoichiya capoinchi. <sup>36</sup>Barapo pin bicheito soldadomonaē cayabara wawaya punaenapoinchi, jeye: “¡Maisa pabexore bapon!” jei barapomonaē.

### Meje yabara poxonaē Pablo paeba barapomonaē peitabaratha

<sup>37</sup>Poxonaē juntucuru Pablo soldadomonaē pia bo beya capoinchi, Pablo barai soldadomonaē pia pentacaponaeintha tatsi, jeye:

—¿Metha ichauyo catsipaebichipatsi? jei Pablo.

Poxonaē baxua jume taeba, soldadomonaē pia pentacaponaein tatsi yainyaba, jeye:

—¿Xam necueicueijeinda griego jumera? <sup>38</sup>¿Xam barapo jitomda egipcio nacuapimda, pon nacaetuteiba exaneiba pijimonaē xua ichamonaē pejutebeibinexa tsainchi? ¿Xam barapomonaē pia pentacaponaein tatsi, pon xua matacaponaponame cuatro mil jiwu ichaxota ira xuepana susato tsurucuae nacuatha? jei soldadomonaē pia pepa pentacaponaein tatsi.

<sup>39</sup>Nexata Pablo jume nota, jeye:

—Apara pepa judiomaepiyon. Tarso tomaratha naexanan. Tatomara ainya cui tsipei pepa tomara. Tarso tomara Cilicia nacuatha eca. Nejume cui yabara copare xua barapomonaē tatsipaebiwa tsane, jei Pablo.

<sup>40</sup>Soldadomonaē pia pepa pentacaponaein tatsi bara Pablo yabara jume copatatsi xua Pablo bara pepaebiwa tsane. Pablo ichaxota nonababeibiya baxota asiya uncu. Yawa pecobetha jume matawenta barapomonaē xua moya peenaenexa. Poxonaē moya

enarucupa barapomonaе, Pablo hebreo jumetha cueicueijeі. Namchi, jeye:

**22** “Tamonaе pam, iru pomonaе pitiri jiwi pam, pana nejume taema xua tapaca tsipaеbiwa tsainchi xua tana nabaru jume yawenaewan”, jeі Pablo.

<sup>2</sup>Poxonaе barapomonaе jume taerucupa, xua Pablo hebreo jumetha cueicueijeі, barapomonaе moya enarucupa. Pablo barapomonaе barai, jeye:

<sup>3</sup>“Xan apara judiomonaepin. Bayatha naexanan Tarso tomaratha, Cilicia nacuatha. Saya apara Jerusalén tomaratha wichaban. Baxota nacuiduban po coyenein wamo susato jiwi itorobeiba. Daxita barapo coyenein pebin pewun Gamaliel, necuiduba. Necui eeneiba xua Nacom tanacuiteiban xua daxita tajuntu coyenewatha icha anoxuae daxita paichiponaem.

<sup>4</sup>Bayatha jeiteiban pomonaе pejume cowuntsiwi Jesús pia pena pecuidubiwa tatsi. Teiqueibanno, jiwi pecubi bo beya caponeiban, pebiwino yawa yabuxino. Tsipei ichichipan xua ichamonaе jutebeiba xua barapomonaе pejutebeibinexatsi.

<sup>5</sup>Sacerdotemonaе pia pentacaponaein tatsi iru pitiri jiwi paca tsipaebina xua bayatha barapomonaе necata cartan xua barompaya wajudiomonaе nexa xua Damasco tomaratha. Barapo cartanxae neitacupa xua tateicaewa tsane pomonaе Jesús pejume cowuntsiwichi. Baxota Damasco tomaratha ponan tajeichinexa pomonaе Jesús pejume cowuntsiwichi, tsipei tha Jerusalén tomara becayaetsi barapomonaе, matautano tsipei tha yamaxu cubiya caponaetsi taperaxa exanaenexa tsane barapomonaе”, jeі Pablo.

**Meje yabara poxonaе Pablo diwesi paeба xua poxonaе po coyene pejume cowuntsiwa Jesustha**

<sup>6</sup>Equeicha Pablo jeye: “Damasco tomara namtotha ecaponan, bara nama mateinyaxae tsuxubi. Poxonaе bara muxu tapatopaeba Barapo tomaratha, bapoxonaе pin coicha neyancataba. Taxainya benematawacaicha jopeica. Peitaboco wejopeica. <sup>7</sup>Iratha jopan. Bapoxonaе peitaboco wenebaraichica. Jume tauncuan, nebarai, jeye: ‘Saulo, Saulo, zeta xua metha tamonaе inta abe exaname?’ jeі. <sup>8</sup>Nexata yainyaban: ‘Pon jiwi Necanamataxeinaem, zjintamumda?’ jan. Nejume epa pita, jeye: ‘Apara xan Jesús, Nazaret tomarapin ponxaein tamonaе inta abe exaname’, nejeі. <sup>9</sup>Pomonaе nepuna pona iru coicha taneno. Bichocono bapomonaе junuwa. Saya meisa coicha tane, saya jopa jume taeyo po jume xua nebaraichica. <sup>10</sup>Nexata yainyaban: ‘Pon jiwi Necanamataxeinaem, zeta pocotsiwa metha exanocuaein?’ jan. Bapon nebarai, jeye: ‘Nontaponde Damasco tomara be-iyande barapo tomaratha, ichun yabara catsipaebina pocotsiwa xua bewa exanaename’, nejeі. <sup>11</sup>Barapo coicha bichocono neitata naquitaba exana. Pomonaе nepuna pona Damasco tomara benemaxu cayiya.

<sup>12</sup>“Barapo tomaratha, Damasco tomaratha, cou pebin popona, bapon pewun Ananías. Bapon daxita yabara jume cuiya exaneiba Moisés pia peitorobi coyene tatsi. Barapo judiomonaе, Damasco tomaratha, barapomonaе Ananías xanepanaya yabara paebeibatsi. <sup>13</sup>Ananías nesiwa pona. Bapon nebarai: ‘Saulo, tamonaе jitom, equeicha caewa nepu necotsinde’, jeі. Bara caena barapoxonaе equeicha caewa necotaxuban. Bapon bapoxonaе

taenotan. <sup>14</sup> Ananías nebarai, jeye: ‘Pata amo jiwi pia Nacom tatsi bayatha itapeta cawaba xua neyaputaenexa tsane xua Nacom caitoroba. Caitapeta xua netaenexa pon yatsicaewa pejuntu coyene xanepanaein, matautano nejume taenexa pocotsiwa catsipaeba. <sup>15</sup> Aunxuae Jesús yabara cueicueijam tsane daxita nacuan jupayantha. Yabara paebiname daxita xua taneme xuano xua jume tanemeno. <sup>16</sup> Anoxuae, ¿eta xua metha came ecame? Nontaponde. Barabu ichun cabautisabina Jesucristo pewuntha, pon jiwi Pecanamataxeinaein, necayabara juntemainaenexa abe jinya neexanae cuiru coyenein’, nejei Ananías”, jei Pablo.

**Meje yabara poxonae Pablo  
nayabara paeba xua peitorobiwatsi  
ichaxota pomonaetha pomonae jopa  
judiomonae naexanaeyo**

<sup>17</sup> Pablo cataunxuae cueicueije, jeye: ‘Poxonae caibe nawiyen Jerusalén tomara beya, Nacom pin pia botha tatsi ponan. Barapo botha Nacom tsipaeban. Bapoxona camaitan xua netsita naitauta. <sup>18</sup> Jesús necotan, pon jiwi Pecanamataxeinaein. Bapon nebarai: ‘Antha yacuinaya pontabare Jerusalén tomara weya, tsipei barapomonae jopa xapain cajume cowuntsi tsane xua tana neyabara paebiwam’, jei Jesús. <sup>19</sup> Nexata jume epa pitan: ‘Pon jiwi Necanamataxeinaem, barapomona bayatha necui yaputane xua poneiban daxitan judiomonae pia penacaetutsi bontha tatsi. Bayatha jiwi pecubi botha caponeiban, pomonae necajume cowuntsiwi. Matautano bichocono beibanno. <sup>20</sup> Poxonae Esteban bichocono jana othopeica xan saya cui necotuncuan. Bapon Esteban pon cajume cowunta bayatha. Bapon jinya diwesi

pecanantsipaebin. Poxonae Esteban bexotsi, saya cui matu tauncuan. Yabara jume baru cui jejan poxonae barapomonae Esteban bexubapaebatsi. Barapomona pipaparuwan tajeban’, jan Jesustha. <sup>21</sup> Ichitha bapon pon jiwi Pecanamataxeinaein nebarai: ‘Antha ponde. Aunxuae taju caitorobinchi barapomona beya, pomonaetha pomona jopa judiomona naexanaeyo beya’, nejei”, jei Pablo.

**Meje yabara poxonae soldadomona  
pia pentacaponaein  
tatsi Pablo waetabatsi**

<sup>22</sup> Pablo cataunxuae paebuncua barapo penonobabeibiyathopaewatha soldadomonae pia botha. Poxonae Pablo jume taerucupatsi xua bepa pinae ponaena pomonaetha pomona jopa judiomona naexanaeyo beya, bapoxonae barapo bicheito namtsebiya wawai, jeye: “¡Maisa bapon pabexore bara! ¡Dapocotsin jopa bewa poponael!” jei. <sup>23</sup> Awiya came barapomona wawai tsompae. Yawa pia paparuwan anaya nunubaba. Yawa taetowan anaya athabe bebeicha. <sup>24</sup> Romanomona soldadomonae pia pepa pentacaponaein tatsi, bapon pia soldadomonae itoroba xua Pablo pecaponaenexatsi soldadomonae pia bo beya tatsi xua jiwi pecubi bo. Baxota Pablo capoinchi pecuainchinexa tsainchi xua daxota Pablo peyabara paebiwa tsane baxua xua Pablo peyabara namtsebiya wawaichiwatsi judiomona. <sup>25</sup> Poxonae bara juntucuru Pablo maxu cutanotatsi xuano juntucuru muxu pebetsino, Pablo barai soldadomonae pia pentacaponaein tatsi, jeye:

—Jopa be pana necuainchipaem tsipei apara xan romanomonaepin. Matautano baxua jopa pana necanaichipaem icha jopa neyabara paebiyo pon jiwi

peyabara paebin penatsicuentsiwa xua abe peexanaexae, jei Pablo.

<sup>26</sup>Poxonae baxua jume tane, soldadomonae pia pentacaponaein tatsi, bapon pona pia pepa pentacaponaein tatsi beya. Bapon namchi pia pepa pentacaponaeintha, jeye:

—Dota xua xam cana exanaename bapontha. Apra cou deta Pablo iru romanomonaepin, jei.

<sup>27</sup>Nexata soldadomonae pia pepa pentacaponaein tatsi, bapon Pablo imoxoyo caquita uncuatabatsi. Bapon Pablo yainyabatsi, jeichichi:

—¿Bara yatsicaya xainyei bara xam romanomonaepim? jeichichi Pablo.

Pablo jume nota, jeye:

—Aa, bara xan tsocuaein, jei Pablo.

<sup>28</sup>Soldadomonae pia pepa pentacaponaein tatsi Pablo jume notatsi, jeichichi:

—Xan iru barichin romanomonaepin. Nacui yabara matomatan bichocono pin paratixi matoma xua romanomonaepin tana naexanaewa tsane, jei.

Pablo namchi, jeye:

—Apra seicaya nama xan caena bayatha pexuyothan yacuiya naexanan romanomonaepin, jei.

<sup>29</sup>Poxonae Pablo baxua paeba, bapoxonae pomonae Pablo muxu pecuainchichi Pablo pexeinya wetanatsixibarucupiyatsi. Iruru bara wenatsixitabiya soldadomonae pia pepa pentacaponaein tatsi tsipei bapon yaputane xua Pablo apra romanomonaepin. Daxota junuwa xua Pablo pemaxu cubixaetsi.

**Meje yabara poxonae Pablo  
pentacaitorobi bicheitomonae  
peitabaratha uncua  
pomonae judiomonae**

<sup>30</sup>Icha matacabitha soldadomonae pia pepa pentacaponaein tatsi bepa yaputaei, bepa jeyei: “¿Eta xua metha

Pablo yabara anaepanatsi judiomonae?” bepa jeyei. Daxota bapon, Pablo taxuenaxotsi xua maxu cutatsi. Nexata bapon itoroba xua sacerdotemonae pia pentacaponaein tatsi iru pentacaitorobi bicheito nacaetutsina. Pablo bara bebaru iyatsi. Baraxota cuaranotatsi barapomonae peitabaratha tatsi.

**23** Pablo pentacaitorobi bicheito beya bichocono naita cui dutsiya necoya. Pablo barapomonae beya namchi, jeye:

—Tamonae, caena bayatha beya anoxuae juntu coyene xanepanaya poponan Nacom peitutha tatsi, jei Pablo.

<sup>2</sup>Nexata sacerdotemonae pia pepa pentacaponaein tatsi, Ananías, bapon itoroba xua Pablo pecoibo cuainchinexatsi pomonae Pablo imoxoyo caquita peumenaexaetsi. <sup>3</sup>Ichitha Pablo jume nota, Ananías jume notatsi, jeye:

—Xam ponxaem itara mexeya xanepanaya nepaebin ichitha jivi nemuxuitorobin, Nacom cacuainchina. Xam ecame xote jinya tana neyabara paebinxam tana natsicuentsiwa xua abe taexanaexae icha be pocotsi coyeneya Moisés pia peitorobi coyenetha baxua yabara paeba. Ichitha xam jopa xapain exanaem poxonae ichamonae itorobame xua tana necoibo cuainchinexa poxonae Moisés pia peitorobi coyenewatha jopa baxua itorobiyo, jei Pablo.

<sup>4</sup>Pomonae Pablo imoxoyo caquita umeinchi, jeichichi:

—Apra sacerdote pia pepa pentacaponaein tatsi abe tsipaebame pon Nacom tanacuitatsi, jei barapomonae.

<sup>5</sup>Pablo jume nota, jeye:

—Tamonae, jopa yaputaainyo xua pon tsipaeban apra sacerdotemonae pia pepa pentacaponaein tatsi. Icha yaputaetsipan, jopa paebinchipae. Nacom Pejume Diwesitha namchi, jeye: ‘Jopa bewa painya pentacaponaein jiwana

abe pajainchim pomonae xua painya tomaratha', jei Nacom Pejume Diwesi, jei Pablo.

<sup>6</sup>Nexata Pablo cui yabara nanta xeina barapomonaetha tsipei ainya bicheitobe, ichamonae saduceomonaerū, ichamonae fariseomonaerū. Daxota bapom Pablo jume daunweya wawai barapomonaetha, jeye:

—Tamonae, bara xan apara fariseomonaepin, yawa fariseomonaepin pexanton. Tsipei jume cowantan xua jiwi petupaewi equeicha asu tsaibi tsane daxota pana necaponame painya tana neyabara paebinexam xua tana natsicuentsiwa xua abe taexanaexae, jei Pablo.

<sup>7</sup>Poxonae Pablo baxua paeba saduceomonaerū irū fariseomonaerū najume matsontsonobabe. Barapo bicheito ainya bicheitobe naexanabe, tsipei barapo bicheitobe seicaya barompaya nabarū nanta xeina. <sup>8</sup>Saduceomonaerū paeba xua pinae petupaewi jopa equeicha asu tsaibi tsane. Matautano barapomonaerū paeba xua pinae matatsunpiwi jopa jinompaeyo, matautano pinae dowatsi dapomonaerū pinae ajibi. Ichitha meisa fariseomonaerū jume cowanta daxita barapo diwesin, xua pinae pewerapeibiwi equeicha asu tsaibi tsane, matautano xua pinae dowatsi jinompa, xuano xua pinae matatsunpiwi bara jinompa. Daxita barapo diwesin fariseomonaerū jume cowanta. Ichitha nama saduceomonaerū jopa daichiyo. <sup>9</sup>Daxita barapo bicheitobe namtsebiya wawai. Fariseomonaerū jiwana ichamonae nonobapona. Barapomonaerū yaputane nawita Moisés pia peitorobi coyene tatsi. Barapomonaerū namchi, jeye:

—Bapon Pablo jopa abe exanaeyoba, metha dowatsi bapon tsipaebatsi, ichacuitha metha matatsunpin bapon tsipaebatsi, jei barapomonaerū.

<sup>10</sup>Barapomonaerū daxita najume matsontsonobiya biatane. Bapon romanomonaerū soldadomonaerū pia pepa pentacaponaein tatsi, bapon bichocono junuwa tsipei Pablo tsana perū xunaeinchi. Daxota bapon romanomonaerū soldadomonaerū pia pepa pentacaponaein tatsi itoroba pia soldadomonaerū xua Pablo equeicha caponaeinchi soldadomonaerū pia bo beya tatsi.

<sup>11</sup>Icha mataqueitha merawi pon Pecanamataxeinaein jiwi, Pablo imoxoyo caquita uncuatsi xua tsita naitautatsi. Bapon namchi, Pablo baraichi, jeye: “Pablo, najuntū coyene tsacatabare. Icha ichim xua Jerusalén tomaratha neyabara paebame barichinde equeicha Roma tomaratha neyabara paebare”, jei Jesús.

**Meje yabara poxonae  
judiomonaerū nanta xeina xua  
Pablo pebexubiwa tsainchi**

<sup>12</sup>Icha mataqueitha, ichamonae judiomonaerū peburūya nanta jupaya nanta xeina xua Pablo pebexubiwa tsainchi. Barapomonaerū nayabara tsiwūnae muxu duta Nacomtha xua bepa pinae jopa nabanaerū tsane, xuano jopa apae tsaneno xua beya pinae yajainbonaya othopaena poxonae Pablo bexubinchi. <sup>13</sup>Barapomonaerū pomonaerū Pablo bexubapaebatsi xuano xua yabara nainbotapaebatsi bichocono pinmonae beyacaincha xua pocotsi cuarenta po pebiwimonaeyobe. <sup>14</sup>Barapomonaerū pona sacerdote pia pentacaponaein tatsi beya, yawa judiomonaerū pia pitiri jiwi tatsi beya. Barapo pebiwimonaeyobe barai barapomonaerū, jeye:

—Bayatha pana nayabara tsiwūnae muxu duban Nacomtha xua jopa pata nabanaewa tsane beya tsane poxonae cataunxuae jopa pabexubinyo tsane Pablo. <sup>15</sup>Paxam irū pomonaerū

pentacaitorobi bicheito, romanomonaes soldadomonaes pia pepa pentacaponaein tatsi patsipaebare xua bapon pia soldadomonaes peitorobinexa xua Pablo pecuaranotsinexa tsainchi painya itabaratha baya tsane. Romanomonaes soldadomonaes pia pepa pentacaponaein tatsi pamuxuitorobare. Naemata bapon pabarande: ‘Awiya peyainyabiwa paxeinan pata tha yainyabichi Pablo’, pajande. Paxan pata tha nama namtotha ewatumenaeatsi. Pata tha beXuichi, poxonaes barapomonaes Pablo caponaeinchi, jei barapomonaes.

<sup>16</sup> Pablo perobi tatsi jume tane xua barapo cuarenta po pebiwimonaeyobe namtotha nantsiyatsiya bobenapaeba pewaetabinexa tsainchi Pablo. Daxota Pablo perobi tatsi pona soldadomonaes pia bo tatsi beya. Baxota Pablo perobi tsipaebatsi xua barapomonaes Pablo bepa bexubichei. <sup>17</sup> Nexata Pablo waba pon xua romanomonaes soldadomonaepin pia pentacaponaeiwi jiwana. Pablo namchi, jeye:

—Poye pewowin wuto caponde romanomonaes soldadomonaes pia pepa pentacaponaein tatsi beya, tsipei bapoyo diwesiyo xeina xua petsipaebiwa tsane, jei Pablo.

<sup>18</sup> Romanomonaes soldadomonaes pia pentacaponaein tatsi Pablo perobi tatsi capoinchi xua romanomonaes soldadomonaes pia pepa pentacaponaein tatsi beya. Bapon namchi, jeye:

—Pablo soldadomonaes pia botha peecaen, bapon neitoroba xua pinaes bepa caponaeinjei poye. Tsipei pinaes xeina diwesiyo xua necatsipaebinexa, jei bapon soldadomonaes pia pentacaponaein tatsi. <sup>19</sup> Pablo perobi tatsi cobe pitatsi romanomonaes soldadomonaes pia pepa pentacaponaein tatsi. Bara natsixitabatsi aisowa beya. Bapoyo baraichichi, jeichichi:

—¿Jinya eta xua netsipaebichi? jeichichi.

<sup>20</sup> Nexata pewowin wuto jume nota romanomonaes soldadomonaes pia pepa pentacaponaeintha, jeye:

—Judiomonaes peburaya nanta xeina xua bepa cawucaei xua Pablo baya necaponaenexa pentacaitorobi bicheitha. Bepa camuxuitorobei. Bepa jeyei: ‘Panantawenonan pata tha Pablo yainyabichi ichawiyoy’, bepa jeyei barapomonaes. <sup>21</sup> Ichitha jopa jume cowuntsinde, barapomonaes namtotha nantsiyatsiya bobenapaeba pewaetabinexa tsainchi taxuyo. Barapo cuarenta po pebiwimonaeyobe natsiwunaes yabara muxu duba Nacomtha xua bepa pinaes jopa nabanaes tsane yawa jopa apae tsane beya pinaes poxonaes tsane poxonaes Pablo bexubinchi. Anoxuae barapomonaes cajume cui ewata xua jam tsane: ‘Baya tsane Pablo pentacaitorobi bicheitha itorobinan’, jam tsane, jei Pablo perobi tatsi.

<sup>22</sup> Nexata romanomonaes soldadomonaes pia pepa pentacaponaein tatsi barapoyo napeyabatsi. Pewowin wuto ponataba. Pewowin wuto baraichi, jeye:

—Ichuntha jopa tsipaebinde xuaunxuae po diwesiyo netsipaebame, jei soldadomonaes pia pepa pentacaponaein tatsi.

**Meje yabara poxonaes soldadomonaes pia pepa pentacaponaein tatsi Pablo itorobatsi Félix beya pon Judea nacuamonaes pia peyanacua ewatsinchi**

<sup>23</sup> Romanomonaes soldadomonaes pia pepa pentacaponaein tatsi waba ainya pentacaponaeinbe. Bapon baraponbetha itoroba. Barai: “Soldadomonaes pacui wunaerebe doscientos po soldado matabuxube pomonaes xua petaxutha

ponaena, iru setenta po soldado matabuxube pomonae xua cawayutha ponaena, iru doscientos po soldado matabuxube pomonae dejonan cajjincaena. Barapo bicheito daxita peponaenexa Cesarea tomara beya merawitha poxonae a las nueve tsuxubi. <sup>24</sup> Matautano pacui wunaerebe cawayu ayunbe xua Pablo peequeicaenexa tsane. Matautano paitorobarebe xua Pablo beta pecaponaenexatsi, xua asuno Félix beya”, jei. <sup>25</sup> Bapon pia soldadomonae caitoroba carta. Barapo cartatha namchi, jeye:

<sup>26</sup> “Xan Claudio Lisias. Félix, ponxaem tacabarü cui itura jinaeinchi, cajacobatsi. <sup>27</sup> Pon anoxuae cata itorobatsi nexainya beya barapo pebin waetabatsi, judiomonae waetaba. Muxu pebexuichi. Poxonae jume tan xua bapon romanomonaepin najainta daxota nainya soldadomonae barü ponan bapoxonae bapon capanepan. <sup>28</sup> Tsipei tha yaputaetsi xua barapomonae Pablo yabara paebatsi, daxota Pablo cuaranotan judiomonae pia pentacaitorobi bicheitho tatsi. <sup>29</sup> Jume tan xua barapomonae Pablo yabara paebatsi xua pinae bapon jopa exanaeyo icha be pocotsiwa barapomonae pia peitorobi coyenewan tatsi paeba. Ichitha barapomonae jopa xeinaeyo po coyene xua daxota Pablo pebexubinexatsi, xuan xua daxota jiwi pecubi botha peetsinexatsi. <sup>30</sup> Ichitha bapoxonae jume tan xua judiomonae namuxuweta pebexubinexa tsainchi Pablo. Daxota Pablo nexainya beya itoroban. Tsipaeban judiomonae pia pentacaitorobi bicheito tatsi. Janje: ‘Icha awiya Pablo pacui itawetsiname xua abe bapon exana —cabaraichi— bapon pia xainya beya paponare. Papebare Félixtha baxua, pocotsiwa Pablo exana’, jan. Baja, Claudio”, jei barapo cartatha.

<sup>31</sup> Barapo soldadomonae exana pocotsiwa xua bayatha itoroba pon romanomonae soldadomonae pia pepa pentacaponaein tatsi itoroba pon pewun Claudio. Barapo soldadomonae barapo merawitha Pablo capoinchi Antípatris tomara beya. <sup>32</sup> Icha mataqueitha barapomonae soldadomonae pomonae petaxutha pona, caibe nawibiya ichaxota tauncuatsi soldadomonae pia bo beya. Pomonae cawayutha pona awiya Pablo barü poinchi. <sup>33</sup> Soldadomonae Pablo capoinchi Cesarea tomara beya. Barapomonae soldadomonae Félix catatsi barapo carta. Pablono baxota punaxubothopatsi. <sup>34</sup> Félix matha yoroba carta. Bapoxonae Pablo yainyabatsi, jeichichi:

—Pablo, ¿eta po nacua jitomda? jei.

Pablo jume nota, jeye:

—Bara Cilicia nacua piyon, jei.

<sup>35</sup> Félix namchi, jeye:

—Poxonae judiomonae patsina, pomonae xua abe cayabara paeba, bapoxonae cajume taeinchi xua tana netsipaebiwam tsane, jei Félix.

Bapoxonae Félix itoroba soldadomonae xua Pablo yapucaenaeinchi ichaxota po botha peitupanae bo, po bo Herodes cuenta naxuba.

**Meje yabara poxonae  
Pablo Félix peitabaratha  
tatsi nayabara jume paeba**

**24** Icha matababitha poxonae cinco po matababibe tsuxubi, pebiwi pata Cesarea tomaratha. Ichun pewun Ananías. Bapon Ananías sacerdotemonae pia pepa pentacaponaein tatsi. Iru pitiri jiwimonaeno pata. Iru pon xua petapaebeibin jiwi, pon pewun Tértulo bapon napatopa. Barapomonae nacua pata Cesarea tomaratha. Barapomonae Félix peitabaratha taumeinchi, xua



Pablo abeya peyabara paebineatsi.  
<sup>2</sup>Poxonae Pablo carendenatsi, Tértulo Pablo abe yabara paebatsi. Félix baraichi, jeye:

—Félix, xam pon pana yanacua ewatame. Daxota juntema xanepanaya pajinompan. Maisa bara beta itorobiya canamataxeiname jiwi jinya neyaputae coyenewatha. Daxota xam beta exaname barapo nacuathe. <sup>3</sup>Félix, xam pon pata paca baru itura jinaeinchim, xua exaname yatsicaya wuna nawita barapo nacue nexa. <sup>4</sup>Jopa ichichipaeinyo xua tacayatacutsiwatsi. Daxota catsipaebatsi xua saya caeto pana nejume taema xua pata paca catsipaebiwa tsainchi. <sup>5</sup>Anoxuae payaputan xua Pablo bichocono pana cui fayacota xua abe exana. Matautano bapon judiomonae cui tsacabatsi xua nacaseba exanatsi daxita nacuantha. Matautano bapon, apara pomonae nazarenomonae barapomonae pia pentacaponaein tatsi, pomonae pecuidubi jiwi icha coyeneya pocotsiwa jopa xainyeyo. <sup>6</sup>Yawa Nacom pin pia bono tatsi juntucuru abe taexanatsino, poxonae juntucuru baru jonyatsi pon jopa judiomonae naexanaeyo Nacom pin pia botha. Daxota pawaetaban. Paxan paichichipan Pablo paperaxa exanan barompaya pata peitorobi coyenewa cuitha. <sup>7</sup>Ichitha soldadomonae pia pepa pentacaponaein tatsi, Lisias, daunweya pana wecobe maxu pitatsi Pablo. <sup>8</sup>Soldadomonae pia pepa pentacaponaein tatsi, Lisias, pana barai: ‘Pomonae Pablo abe jaintatsi moya Félix peitabaratha papaebare’, pana jei Lisias, jei Tértulo.

Tértulo equeicha namchi, jeye:

—Félix icha yainyabatsipame Pablotha metha bara yaputaetsipame xuaunxuae cabaraichichi. Xuaunxuae Pablo yabara paeban baxua xaniyan yatsicaya, jei Tértulo.

<sup>9</sup>Judiomonae, pomonae Tértulo puna poinchi namchi: “Tértulo bara xaniyei paeba”, jei. <sup>10</sup>Nexata Félix Pablo moya pecobetha jume itorobatsi. Bapoxonae Pablo Félix baraichi, jeye:

—Yaputan xua caena bayatha ainya wei xam naexaname pon jiwi neyabara paebin xua penatsicuentsiwa xua abe peexanaexae xua barapo tomarathe nexa. Daxota juntu coyene weiweinan xua tana nayabara paebiwa neitabaratha. <sup>11</sup>Icha yainyabame barapomonae, Jerusalén tomarapiwi, catsipaebichipa xua bayatha Jerusalén tomara beya ponan. Baxota ponan tsipei Nacom pin pia botha wuna tajainchinexa Nacom. Anoxuae petain doce matabibibe yapucaewan poxonae xua bayatha ponan bara beya. <sup>12</sup>Jopa jume matsontsonobeibinyo jiwi. Yawa jiwi jopa jume cui tsacabeibinyo xua anaepanaya penajume cayayatsinexa. Baxuan jopa exanaeinyo Nacom pin pia botha. Matautano judiomonae pia penacaeuttsi bontha tatsi, baxuan jopa exanaeinyo. Matautano tomaran pecuariyathan jopa baxuan exanaeinyo. <sup>13</sup>Pomonae paeba xua pinae abe exanan, barapomonae jopa jume cupaetsi xua tana necui yopichiwa xua abe exanan. <sup>14</sup>Xaniwaicha catsipaebatsi xua xan Nacom tanacuitan pon tamo susato jiwi pia Nacom tatsi. Baraxua exanan xua jiwi cuiduban be pocotsi coyeneya xua paeba Jesús pia pena pecuidubiwa tatsi po pecuidubiwa judiomonae yabara nanta xeina xua pinae barapo pecuidubiwa jopa xainyeyo. Xan jume cowuntan daxita Moisés pia peitorobi coyenewan. Matautano po diwesin Nacom pia peitorobi jume pepaebiwa tina, barapo diwesinno jume cowuntan. <sup>15</sup>Xan barichindu, Nacom yabara baru jume cowuntsiya ewatan icha barapomonae ichi xua po coyene

pomonaē pēwērapawē equeicha asu tsane, pomonaē peajuntucoyenebe jiwī iru xua asu tsane pomonaē pejuntucoyene xanepanaē jiwino. <sup>16</sup>Daxota jopa najuntucoyene acaurinyo tsipei nayaputan xua Nacom beta taexanan. Jiwithano jopa najuntucoyene acaurinyo.

<sup>17</sup>“Ainya wei dapaein saya icha nacuantha poponan. Bapoxonaē equeicha tatomara beya poponan, Jerusalén tomara beya. Patopan baxota Nacom pin pia botha poxoru yaitama paratixi caponan xua tamonaē nexa po paratixi ichamonaē taitoroba. Matautano bara beyan xua baxotiya Nacom tatsita exanaenexa xua pocotsiwa be tacatsiwa Nacomtha, xua duwein tatautsiwa tsane. <sup>18</sup>Barapo coyenein awiya exanawiyān, bequein bayatha nenacui yabara jume weta exana po coyene xua daxota Nacom jopa tsitanyo xua taajuntucoyenebewan be pocotsi coyeneya xua judiomonaē itoroba. Bapoxonaē judiomonaē pomonaē Asia nacia wēparena netaeba Nacom pin pia botha. Barapomonaē baxota necaxiba bequein poxonaē jopa jiwī namtsebiya wawaya exanaēinyo. <sup>19</sup>Pomonaē netane Nacom pin pia botha pomonaē Asia nacia werena pepatsiwi bewa dapomonaē xote patsi xua necatsipaēbinexa tsane xua tana neyabara paēbinexa tsane xua abe taexanaewa. <sup>20</sup>Icha barapomonaē jopa patsiyo pomonaē xote ena bu paeba. Barapomonaē netane poxonaē cain matha judiomonaē pia pentacaitorobi bicheito peitabaratha uncuān. Barapomonaē bu catsipaeba, icha metha bara abe exanan poxonaē barapo pentacaitorobi bicheito peitabaratha tatsi uncuān. <sup>21</sup>Saya u baxua exanan poxonaē peitabaratha uncuān, bapoxonaē bichocono wawan. Janje: ‘Anoxuae poxonaē paxam pana

neyabara paebame xua tanatsicuentisiwa xua abe taexanaewa paxam pananta xeiame xua abe exanan yaitama jume cowuntan xua pēwērapawē equeicha asu tsaibi tsane’, jan jei”, Pablo.

<sup>22</sup>Félix caena bayatha yabara yaputane Jesús pia pena pecuidubiwa tatsi. Daxota Félix cataunxuae abu jopa baxua yabara paēbiyo pocotsiwa barapomonaē paeba. Daxota Félix namchi, bapomon-aetha, jeye:

—Abu bexa pacatsipaēbinchi, poxonaē soldadomonaē pia pepa pentacaponaein tatsi patopaena pon Lisias, bapoxonaē yabara paēbin pocotsiwa Pablo exana, jei Félix.

<sup>23</sup>Nexata Félix itoroba soldadomonaē pia pentacaponaein tatsi xua soldadomonaē Pablo cataunxuae yapu eeniya pebaru jinompaenexatsi Herodes pia botha tatsi, bequein bara copata xua Pablo bara exanaena be pocotsiwa xua bapon ichichipa exana barapo botha. Matautano copatano xua Pablo bara pesiwa ponaenexatsi piamonaē xua piamonaē peyawenaenexatsi xua pocotsiwa nantawenona bapon.

<sup>24</sup>Icha matabitha pirapaeyo Félix piowabe patopabe. Petsiriwa pewun Drusila. Barapowa judiomonaewayo. Félix najume caitoroba ichantha xua Pablo pewabinexatsi Félix berena, matautano xua Pablo Félix yabara petsipaēbinexatsi xua po coyene jiwī jume cowunta Jesucristo. <sup>25</sup>Pablo Félix tsipaebatsi xua pinae ainya cui xua jiwī beta yanthuthiya jinompa icha be Nacom ichi xua beta yanthuthiya popona. Matautano paebano xua pinae jiwī pia xoba abe exaneiba. Matautano namchino xua pinae caentacabitha tsane Nacom wabina daxita jiwī xua peyabara paēbinexa xua penatsicuentisiwa xua abe peexanaexae barapo cae pin nacuathe. Félix najuntuc

coyene cabenaeca poxonae jume tane baxua. Pablo tsipaebatsi, jeichichi:

—Jinya tutu beya bara ponde. Bexa equeicha cawabinchi icha ichawiyo jopa neenaeyo, jei Félix.

<sup>26</sup> Félix nanta xeina xua paratixi pecatsiwa tsainchi xua Pablo pecatsiwa tsane xua daxota Pablo pepu copatsinexatsi. Daxota memecabiya wabatsi Pablo. <sup>27</sup> Baraxua exana beya yaainya weibe jopa. Barapoxonae Félix weta xua pon peyanacua ewatsin jiwi naexana barapo Judea nacuatha, xua icha nacua beya pe-warapaexae. Ichun Félix pecoutha tatsi tapatopatsi pon pewun Porcio Festo pon xuya pon peyanacua ewatsin jiwi naexana Judea nacuatha. Félix ichichipa xua peweyataewatsi xua judiomonae peweyataewa daxota Pablo jopa copatichi xua bara yatsicaewa pepu copatsiwatsi xua pepanepaewa tsane.

### Meje yabara poxonae Pablo Festo peitabaratha tatsi tauncuatsi

**25** Festo bara patopa xua penaexanaenexa pon peyanacua ewatsin jiwi. Poxonae acoibi po matabibibe weta Cesarea tomara weya pona, Jerusalén tomara beya pona. <sup>2</sup> Barapo tomaratha Jerusalén tomaratha sacerdotemonae pia pentacaponae tatsi iru judiomonaeno pomonae pentacaponae wino, barapomonae Pablo abeya cui yabara canantsipaebatsi. <sup>3</sup> Barapomonae Festo baraichi: “Bu painta ichamonae Pablo Jerusalén tomara beya capoinchi”, jei. Barapomonae baxua Festo jeichichi, tsipei Pablo namtotha ewatabobenapaebatsi pebexubinexatsi. <sup>4</sup> Festo jume nota, jeye:

—Canta Pablo Cesarea tomaratha eca xua soldadomonae baru jinompatsi. Tha nama imoxoyo bara beya equeicha caibeya ponaetsi. <sup>5</sup> Painyamonaе ji-wana pomonae pentacaponae moya

bu barapomonae nepuna pona Cesarea tomara beya. Icha Pablo abe exana, metha moya baraxota Pablo jame be cui yabara paebichipatsi barapomonae, jei Festo.

<sup>6</sup> Festo cataunxuae Jerusalén tomaratha ocho po merawiyobe yapucaewa xua equeicha ainya da-paeyobe. Barapoxonae Cesarea tomara bewarapiya caibeya. Icha matabibitha Festo eca peequeibithopeiwiwatha po tututha ichaxota yabara paebequeiba jiwi xua penatsicuentisiwa xua abe pe-exanaexae. Festo barai soldadomonae: “Painta caponde Pablo taxainya berena”, jei. <sup>7</sup> Poxonae Pablo patopa, judiomonae imoxoyo umenarucupa pomonae Jerusalén tomara weparena. Barapomonae judiomonae Pablo yacaincha matawaqueicha umenatsi. Barapomonae Pablo cui yabara paebatsi xua abe exana nawita. Ichitha xua barapomonae paeba jopa tsita itapeinya xeinaeyo xua apara bara xainyei pocotsiwa barapomonae paeba. <sup>8</sup> Nexata Pablo pia coya nayabara paeba, jeye:

—Xan jopa abe exanaeyo. Jopa abe yabara paebinyo Moisés pia peitorobi coyene tatsi. Matautano Nacom pin pia bo jopa abe yabara paebinyo. Matautano jopa abe yabara paebinyo romanomonae itorobiya pia pepa peewatsinchi tatsi, jei Pablo.

<sup>9</sup> Festo bepara antobetsei judiomonae. Daxota Festo Pablo yainyabatsi, jeichichi:

—¿Jinya ponaetsi Jerusalén tomara beya xua baxotiya cayabara paebinchinatsicuentisiwa xua abe neexanaexae? jei Festo.

<sup>10</sup> Pablo jume nota, Festo jume notatsi, jeye:

—Xan uncuan peitabaratha tatsi pomonae pentacaponae wino, pomonae romanomonae itorobiya

pia pepa peewatsinchi tatsi itoroba. Barapomonaē pentacaponae wi bara itacupatsi xua barapo tomarathe tana neyabara paebinea xua tana natsicuentisiwa xua abe taexanaexae. Jopa nantawenonaēinyo xua taponae wa tsane Jerusalén tomaratha. Xam bayatha beta yaputaneme xua jopa abe exanaēinyo judi monaetha.

<sup>11</sup> Icha xaniwaicha abe exanan barapomonaetha, metha moya benebexubina. Jopa junuwinyo xua tatupaewa tsane. Ichitha icha jopa xainyeyo xua barapomonaē neyabara paeba, metha nexata barapomonaē jopa nebexubichipae. Tha nama warapaetsi romanomonaē itorobiya pia pepa peewatsinchi beya, tacoya nayabara paebichi, jei Pablo.

<sup>12</sup> Copiya matha Festo tsipaeba pejume yaweneibiwichi. Barapoxonaē Festo, Pablo baraichi, jeye:

—Yaitama aunxuae siwa ponapae-bame romanomonaē itorobiya pia pepa peewatsinchi tatsi, xua necayabara paebinea xua nenatsicuentisiwa xua abe neexanaexae daxota moya ponaename bapon beya, jei Festo.

**Meje yabara poxonaē Pablo uncua  
Agripa peitabaratha tatsi  
pon peyanacua ewatsin jiwi**

<sup>13</sup> Icha matabitha Agripa, pon peyanacua ewatsin jiwi, bapon pona Cesarea tomara beya. Petsiriwa puna poinchi, bapowa pewun Berenice. Festo siwa poinchi Cesarea tomaratha iya. <sup>14</sup> Baraxotiya Agripa petsiriwano ainya matabin ecabe. Festo namchi Agripatha, jeye:

—Xote eque pon cain Félix xubeta Cesarea tomaratha xua bapon pebaru jinompaenexatsi soldadomonaē. <sup>15</sup> Poxonaē Jerusalén tomaratha ecan, sacerdotemonaē pia pentacaponae jiwi tatsi, pitiri jiwino, barapomonaē netsipaeba

xua bepa pinae Pablo itorobin xua petupaewa tsane. <sup>16</sup> Barapomonaē baran: ‘Barapocotsi coyene romanomonaē pan pata cui coyene. Paxan jopa pacopatsinyo xua ichun amanaya bexotsi. Jame copiya pomonaē xua abe yabara paeba ichuntha, barapomonaē bewa paebina bapon peitabaratha tatsi icha bara metha bapon xaniwaicha abe exana. Bapoxonaē bapon pia coutha beya nayabara paebichipa xua barapomonaē paeba’, jan. <sup>17</sup> Daxota poxonaē barapomonaē pata xote, jopa be bayathinyo yaitama. Daxota baya caena nainya ecoundecan, po tututha yabara paebequeiban jiwi xua penatsicuentisiwa xua abe peexanaexae. Itoroban soldadomonaē xua Pablo pecaponaenexatsi taxainya berena. <sup>18</sup> Xan nanta xeinan xua Pablo bichocono abe exana. Ichitha poxonaē barapomonaē asiya umena peyabara cueicueijeinexa tsainchi, Pablo jopa paebiyo po diwesi xua daxota tananta xeinaenexa xua Pablo bara abe exana cou. <sup>19</sup> Pocotsiwa xua Pablo yabara cueicueijeichi, saya xua apara pia pejume cowuntsiwa tatsi yabara, matautano xua Pablo peyabara cueicueijeixae pebin pon Jesús baraichi, xua pinae equeicha asu poxonaē tupa. Sicaya nama barapomonaē paeba xua pinae bapon apara tupa, xua equeicha jopa asuyo. <sup>20</sup> Jopa yaputaēinyo xua baxua exanan xua Pablo abe yabara paebatsi. Daxota copiya matha Pablo yainyaban, janje: ‘¿Xam, jinya ponaetsi Jerusalén tomara beya xua baraxotiya cayabara paebinchin xua nenatsicuentisiwa xua abe neexanaexae?’ jan. <sup>21</sup> Ichitha Pablo dapu jumetha netsipaeba xua bepa ponaē Augusto beya, romanomonaē itorobiya pia pepa peewatsinchi beya, pon xua bepa pinae yabara paebinchin xua penatsicuentisiwa xua abe peexanaexae. Daxota itoroban soldadomonaē xua Pablo abu pebaru ji-

nompænexatsi soldadomonaē, beya abu poxonae necui jupa xua itorobin pontha pon romanomonaē itorobiya pia pepa peewatsinchi, jei Festo xua Agripa tsipaebatsi.

<sup>22</sup> Nexata Agripa Festo baraichi, jeye:

—Tha bequein iru jume taetsiru Pablo, jei Agripa.

Agripa jume notatsi, Festo jume nota, jeye:

—Metha moya baya tsane jume taename, jei Festo.

<sup>23</sup> Bara icha matabitha Agripa iru Berenice patopabe. Paparuwa peitupanaewa nama xatatabe. Agripa pinmonae baru pata, soldadomonaē pia pepa pentacaponawewi tatsino, iru Cesarea tomara pia pentacaponawewino. Barapo bicheito Agripa baru pona. Festo itoroba soldadomonaē xua Pablo pecarendenaenexa tsainchi. <sup>24</sup> Festo barai, jeye:

—Agripa, xam pon neyanacua ewatsin jiwi, iru pomonaē pecanamataxeinaē jiwi pamdu. Bapon xote uncue Pablo. Daxita judiomonaē iru Jerusalén tomarapiwi, iru Cesarea tomarapiwi, daxita barapomonaē Pablo jume yabara paebatsi xua pinaē abe exana. Matautano barapomonaē neitoroba nawita xua bepa pinaē Pablo itorobin xua petupaewa tsane. <sup>25</sup> Ichitha xan saya tacoya nanta xeinan be jopa neichichi abe exanaeyo, poxonae nejume nota, poxonae tsipaeban. Daxota jopa becaenaetaxubinyo xua pebexubiwa tsainchi. Ichitha Pablo netsipaeba xua bepa ponaei romanomonaē itorobiya pia pepa peewatsinchi tatsi beya, pon pewun Augusto, tsipei bepa pinaē yabara paebichi xua penatsicuentisiwa xua abe peexanaexae. Daxota yabara najuntu coyene wetan xua bapon Pablo

taitorobiwa tsane bara beya. <sup>26</sup> Yaitama bapon jopa abe exanaeyo, jopa yaputaeinyo xua eta be tajumichiwa tsane barapo cartatha poxonae Pablo itorobin xuano xua cartano cayabara cui pu catsin bara beya. Daxota anoxuae Pablo painya itabaratha cuaranotan. Xam Agripa, pon neyanacua ewatsin jiwi, moya matha copiya yainyabare Pablo, tsipei tha beta cui yabara tatinaetsi bara beya pontha pon romanomonaē itorobiya pia pepa peewatsinchi. <sup>27</sup> Tsipei inta jopa xanepanaetsipae icha itorobichipan Pablo pon pewaetabinchi icha jopa yabara paebinchipae xua pocotsiwa bapon peexanaexae, jei Festo xua Agripa tsipaebatsi.

**Meje yabara poxonae Pablo pia  
coutha cuita paeba,  
Agripa peitabaratha tatsi,  
pon peyanacua ewatsin jiwi**

**26** Bara nexata Agripa Pablo baraichi, jeye:

—Icha jinya paebichi, moya taema, jei.

Barapoxonaē Pablo namaxu yoicha xua Agripa jacobatsi. Bapoxonaē namchi, jeye: <sup>2</sup> “Agripa, pon neyanacua ewatsin jiwi, maisa bichocono juntu coyene weiweinan, xua anoxuae neitabaratha tana nayabara jume paebixae tsane pocotsiwa bayatha neyabara paeba judiomonaē po coyene xua pinaē abe exaneiban. <sup>3</sup> Poxoru yaitama, xam Agripa, bayatha yaputaneme pata juntu coyenein pomonaē judiomonaē panxaein. Yaputanemeno baxuan xua pana najume matsontsonoban. Daxota cabaraichi xua saya beta nejume taema xua jopa aitaconaeinde”, jei Pablo.

**Meje yabara poxonae Pablo nayabara  
paeba, poxonae pinae cataunxuae  
jopa jume cowuntsiyo Jesús**

<sup>4</sup>Equeicha Pablo namchi, jeye: “Daxita judiomonae barapomonae neyaputane xua poxonae pexuyon, poxonae caena bayatha pia xantha tatsi poponan xua tanacuaxae. Barichino neyaputane poxonae Jerusalén tomaratha poponan. <sup>5</sup>Icha yainyabatsipame barapomonae, yabara catsipaebichipa pocotsiwa exaneiban xua fariseomonae pocotsi juntu coyene cuidubeiba, pocotsiwa judiomonae cuidubeibatsi, tsipei xan fariseomonaepin. Daxita barapomonae yaputane xua caena bayatha jume cowuntan daxita pocotsiwa xua barapomonae itoroba. Fariseomonae itapeta cuita exaneiba pocotsiwa Nacom itoroba beyacaincha ichamonae xua exaneiba. <sup>6</sup>Judiomonae necapona xote tsipei saya poxoru yabara wunaewatan xua bexa Nacom asu exanaena pomonae xua werapa. Baxua pinae Nacom wamo susato jiwi yabara tsiwunaewatan muxu dutatsi. <sup>7</sup>Patamonae pomonae Israel nacuamonaepiwi pomonae xua doce pomonae bicheitobe, baxua yabara jume cui wunaewatan ewata poxonae petupaewi equeicha asu exanaeinchi, xua poxonae Nacom exanaena. Daxota barapomonae Nacom wunaewatan jainteibatsi. Matautano itapeta exana pocotsiwa Nacom itoroba, merawithano, matabithano. Xam Agripa pon neyanacua ewatsin jiwi catsipaebatsi baxua tayabara jume cowuntsixaerũ, daxota judiomonae neyabara paeba xua pinae abe exanan. <sup>8</sup>Painya xoba pananta xeiname xua Nacom jopa itacupaetsi xua equeicha jiwi asu peexanaewatsi pomonae xua werapa”, jei Pablo.

**Meje yabara poxonae Pablo nayabara  
paeba xua pinae copiya abe exana  
nawita pomonaetha pomonae  
pejume cowuntsiwichi Jesús**

<sup>9</sup>Equeicha Pablo jeye: “Xan copiya tacoutha nanta xeinan xua bewa bichocono abe exanaein pomonaetha pomonae Jesús pejume cowuntsiwichi pon Nazaret tomarapin. <sup>10</sup>Jerusalén tomaratha baxua exanan. Sacerdotemonae pia pentacaponaewi pia peitorobi coyenewa necata xua daxota tana necui jupaewa xua jiwi tacaponaewa jiwi pecubi botha. Pinmonaeca caponan, pomonae Jesucristo pejume cowuntsiwi. Xan yabara jume jejan xua barapomonae pejutebiwatsi. <sup>11</sup>Anaya caenaetan, peraxa exananno poxoru ichipan xua barapomonae pentsina xua Jesús pejume cowuntsiwatsi. U baxua exanan. Daxita judiomonae pia penacaetutsi bontha tatsi exananno. Bichocono anaepanan. Daxota icha nacuantha ponan tajeichinexa pomonae pejume cowuntsiwichi Jesús xua barapomonae abe taexanaenexa”, jei Pablo.

**Meje yabara poxonae equeicha Pablo  
nayabara paeba poxonae  
pinae jume cowunta Jesús**

<sup>12</sup>Equeicha Pablo namchi, jeye: “Barichi sacerdotemonae pia pentacaponaewi tatsi pia peitorobi coyenewa necata xua daxota tana necui jupaewa xua taponae Damasco tomara beya, xua pomonae jume cowunta Jesucristo tacaponaenexa tsane Jerusalén tomara berena. <sup>13</sup>Xam pon neyanacua ewatsin jiwi baraxaniwaicha catsipaebatsi poxonae namtotha paenaponan poxonae mateinyaxae tsuxubi pecoicha tan xua peitaboco wejopeica, pin coicha po coicha beyacaincha xua xometo.

Barapo coicha pomonae nepuna pona nebarũ matawacaicha matatsun uncueica. <sup>14</sup>Nexata daxita iratha paothopan. Jume tan xua pon hebreo jumetha nebarai, jeye: ‘Saulo, Saulo, ¿eta xua tamonae inta abe exaname? Poxonae tamonae peraxa exaname, apara jinya coutha atene nacana exaname icha be buey ichi poxonae ba pia coutha xua xota sojei nataxu matababa’, nejei. <sup>15</sup>Nexata jume notan janje: ‘Pon jiwi Necanamataxeinaem, ¿jintam xamda?’ jan. Nejume nota jeye: ‘Apara bara xan, Jesús ponxaein inta abe exaname tamonae pomonae tana nejume cowũntsiwi. <sup>16</sup>Nontaponde. Xua anoxuae necotame catsita naitutatsi. Apara tha tana nejume yopichim. Matautano bexano equeicha ichawa necotsiname tana neyabara paebinexam tsane baxuanno. <sup>17</sup>Cacui itorobatsi xua Nacom Pejume Diwesi necueicueijamnexam. Nexata cacapanepaeinchi poxonae juntucuru caperaxa exana judiomonae iru pomonae jopa judiomonae naexanaeyo. <sup>18</sup>Caitorobatsi judiomonaetha iru pomonaetha pomonae jopa judiomonae naexanaeyo xua jopa equeicha pejinompaenexa poxonae jopa jume cowũntsiyo. Matautano caitorobatsi xua barapomonae jopa peexanapon-aenexa pocotsiwa caurimonae pia pentacaponaein tatsi itoroba, pon Satanás, jame meisa peexanaenexa pocotsiwa Nacom itoroba. Matautano caitorobatsi xua barapomonae tana nejume cowũntsinexa. Bapoxonae yabara jũntemainaein barapomonae abe pia peexanae cuiru coyenein tatsi, matautano xua pexeinaenexa pocotsiwa Nacom yabara tsiwunae muxu duba’, nejei Jesús”, jei Pablo.

**Meje yabara poxonae Pablo exana pocotsiwa Nacom itoroba poxonae tsita naitutatsi namtotha**

<sup>19</sup>Equeicha Pablo namchi, jeye: “Agripa, xam pon neyanacua ewatsin jiwi, xan jopa jumefebinyo xua Jesús neitoroba poxonae itaboco wenetsita naitutsica xua namtotha netsita naituta poxonae pecoichatha jume tan xua Jesús netsipaeba. <sup>20</sup>Copiya matha Damasco tomarapiwi tsipaeban Nacom Pejume Diwesi. Bapoxonae equeicha barapo diwesi tsipaeban Jerusalén tomarapiwi. Bapoxonae equeicha daxita Judea nacuamonaepiwi barapo diwesi tsipaebanno. Iru pomonaetha pomonae jopa judiomonae naexanaeyo tsipaebanno. Barapo diwesi tsipaeban xua barapomonae icha jũntũ coyenein pexeinaenexa, yawa Nacom pejume cowũntsinexatsi, matautano xua barapomonae petsita itapeinya xeinaenexa jiwitha xua bara Nacom jume cowũntatsi xua beta peexanaexae. <sup>21</sup>Daxota judiomonae newaetaba poxonae Nacom pin pia botha patopan yawa bepa nebexubei. <sup>22</sup>Ichitha Nacom neyawena. Daxota awiwa Nacom Pejume Diwesi paeban bichocono daxita i dapomonaeintha pomonaetha pomonae pepawi jiwi iru poponaethano pomonae peainya cui jiwi. Baraxua saya meisa paeban be pocotsi coyeneya matha juinya Moisés yabara wunae tsiwanaya paeba iruru be pocotsi coyeneya matha juinya Nacom peitorobi jume pepaebiwi yabara wunae tsiwanaya paeba. <sup>23</sup>Barapomonae tsipaeban po diwesi yabara xua pinae bexa Mesías peraxa exanaeinchi ichamonae. Matautano bapon pinae pon xua copiya pomonae pewerapaewi asu nanta caexanaeinchi. Matautano xua pinae judiomonae iru pomonae jopa judiomonae naexanaeyo yabara

yaputane exanaeinchi pecapanenebiyae diwesi jume”, jei Pablo xua Agripa tsipaebatsi.

**Meje yabara poxonae Pablo paeba  
Jesús pejume diwesi Agripatha xua  
Agripa pejume cowuntsinexa**

<sup>24</sup> Poxonae baraxua Pablo najume weta xua nayabara jume paeba, Festo jume daunweya wawai, jeye:

—¡Pablo, maisa cantsiyaibeca poxoru saya ɯ necuidubi daxota cantsiyaiba! jei Festo.

<sup>25</sup> Pablo jume nota, jeye:

—Festo ponxaem tacabarɯ cui itura jinaeinchi, jopa nentsiyaibiyo apara. Xuaunxuae paeban, apara seicayarɯ xua xaniwaicha paeban xua bara apara pexainyeiwa. <sup>26</sup> Ee taema, Agripa, pon pepa peyanacua ewatsin jiwi pon xote eque. Bapon yaputane xua xaniwaicha paeban. Bapontha jopa junuwinyo xua tsipaeban. Xuaunxuae catsipaebatsi bapon baxua daxita yaputane poxoru jopa namicha exanaeincho. <sup>27</sup> Agripa, xam pon neyanacua ewatsim jiwi. ¿Jume cowuntame pocotsiwa Nacom pia peitorobi jume pepaebiwi paeba? Bara yaputan xua bara jume cowuntame, jei Pablo.

<sup>28</sup> Agripa jume nota, Pablo jume notatsi, jeye:

—Saya caeto netsipaebame. Saya barapo jumetha nanta xeiname xua xan nainya jume cowuntsinan Jesús, jei Agripa.

<sup>29</sup> Nexata Pablo namchi, jeye:

—Xua caeto paca tsipaebatsi yawa icha matowa paca tsipaebatsi bara ba Nacomtha pacata wɯcatsi xam nexa, irɯ pomonae nexa, pomonae nejume tane painya nejume cowuntsinexam tsane Jesús. Ichichipan xua painya neexanaewa icha ichin xua tajume cowuntsiwa, bara bequein jopa ichipaeinyo xua painya nemaxɯtha painya nexainaewa jiwi pecubi nainto

be pocotsi nainto xuaunxuae tamaxɯtha ducua, jei Pablo.

<sup>30</sup> Poxonae Pablo najume weta baxua, Agripa pon peyanacua ewatsin jiwi irɯ Berenice asiya uncuatababe. Irɯ Festo pon peyanacua ewatsin jiwi asiya uncuataba. Pomonae irɯ ena asiya umenarɯcupa. <sup>31</sup> Aisowa be-iyiya barapomonae natsipaeba, najei:

—Barapon Pablo jopa apara abe exanaeyo po coyeneyatha xua daxota bapon pebexubinexatsi, matautano po coyeneyatha xua daxota bapon jiwi pecubi botha peetsinexatsi, najei barapomonae.

<sup>32</sup> Agripa tsipaeba, Festo baraichi, jeye:

—Icha metha jopa naca wɯcaetsipae Pablo xua peponaewa tsane pontha pon romanomonae itorobiya pia pepa peewatsinchi xua baxotiya peyabara peebinexatsi penatsicuentsiwa xua abe peexanaexae metha pu copatsipatsi xua bara pepanepaewa tsane yatsicaewa, jei Agripa.

**Meje yabara poxonae Pablo  
Roma tomara beitorobiatsi**

**27** Barapomonae najuntɯ coyene weta xua pata taneitorobiwa Italia nacua beya. Pablo irɯ ichamonaerɯ pomonae peteiquebiwichi daxita barapomonae itorobatsi Roma tomara beya. Pon barapomonae matacapoinchi bapon pewɯn Julio, pon soldadomonae pia pentacaponaein tatsi. Barapo matabuxuyo soldadomonae bicheito wɯn dutatsi “Augusto soldado bicheito”, jei, poxoru barapo soldadomonae Augusto tanacuitatsi, pon romanomonae itorobiya pia pepa peewatsinchi. Barapo soldadomonae Pablo irɯ ichamonaecaponatsi Augusto beya. <sup>2</sup> Pepa weranaetha pawarapan, po nae Adramitio tomara werena pona. Barapo nae equeicha Asia



nacua beya ponaena. Po tomaraxi pitapatha ena barapo tomaraxi bepa siwa ponaei. Ichun pana cueyata. Bapon pewun Aristarco Tesalónica tomarapin. Barapo tomara Tesalónica tomara eca Macedonia nacuatha. <sup>3</sup>Icha matacabitha Sidón tomaratha papatan. Baraxota barapon Julio, Pablo baru jume wnaetsi. Matautano bapon Julio, Pablo copatatsi xua bara Pablo piamonae pesiwa ponaewa tsainchi, xuano xua bara Pablo peyawenaenexatsi xua xoxi nantawenona. <sup>4</sup>Bara Sidón tomara wewarapiyan weratha. Bara weratha paenaponan joibo cuiyainwa Chipre tunaeto pantawaqueban, yaitama bichocono pin joibo dena ichaxoyo copiya payiyan. <sup>5</sup>Bara mar mene iya paenaponan, Cilicia nacua, Panfilia nacuano imoxoyo pacaquita enaponan. Bapoxonae Mira tomaratha papatan, po tomara Licia nacuatha eca.

<sup>6</sup>Baraxota pon soldadomonae pia pentacaponaein tatsi bapon icha nae taeba baraxota. Barapo nae Alejandría tomara werena pona. Barapo nae iru seicaya Italia nacua beya ponaena. Barapo naetha equeicha Julio pana baru iya Italia nacua beya. <sup>7</sup>Ainya matacabin saya bewayo paenaponeiban, poxoru yaitama joibo jera caewa carena tsaibi. Gnido tomara paxenta enaponan. Salmón tomarano paxenta enaponan. Creta tunaetono pantawaqueban. <sup>8</sup>Bewayo weratha paenaponan, pitapa pacaquita enaponan. Tomaratha papatan ichaxota pexutoroto. Baxota pajebounan, po tomara pewun Buenos Puertos. Barapo tomara imoxoyo eca ichaxota Lasea tomara.

<sup>9</sup>Baraxota came awiya ainya matacabin paenan. Bayatha yapu caewa barapo matacabin poxonae barapomonae warapapaeba barapo matacabitha xua pin mene mara mene iya. Tsipei imoxoyo awubo

tsurucuae tsoponae, daxota Pablo nanta xeina xua icha metha paponatsipan, panacabetsipan. Daxota barapomonae Pablo muxuweta. <sup>10</sup>Pablo namchi, jeye: —Pebiwi pam, pana nejume taema. Ichaunxuae warapaeinchi methaunxuae nacabetinchi. Matautano methaunxuae weranae abe exanaena. Matautano xoxino xua capoinchi methaunxuae napentsina. Matautano jiwi methaunxuae napentsina, jei Pablo.

<sup>11</sup>Ichitha soldadomonae pia pentacaponaein tatsi, bapon Julio, jopa jume naitomatsiyo xua Pablo tsipaeba. Ichitha dapu jumetha saya meisa pon jera pecanamataxeinaein iru pon jera pexeinaein, baponbe itapeta jume naitomatatsibe. <sup>12</sup>Barapomonae nanta xeina, xua baraxota jopa beenaeyo poxoru barapo tomara jopa cui wnaeyo xua jera peboacaewa poxonae awubo pin joiboxae. Pinmonae barapomonae jiwana tsita xanepanatsi xua Buenos Puertos weya pewarapaenexa jeratha Fenice tomara beya, po tomara eca Creta tunaetotha. “Methaunxuae tsiwanaya payaeinchi penacabetsi awubo, joibono”, jei. Barapo tomara cui wnae xua ichaxota jera jebouneiba. Baxota joibo yayapa poxoru tomara naita cafeteca, poxoru joibo jopa patopaeyo pocotsiwa wetsica yawa pocotsiwa wetsina. Baraxota bepa enaei poxonae awubo tsuxubi.

### Meje yabara poxonae maratsaca daunwei pepa mar mentha

<sup>13</sup>Nexata bewayo joibo tsuncuae, be pocotsiwa parowa wejopeina. Daxota barapomonae namchi: “Bu poinchi cataunxuae saya tsiqui joibiyo”, jei. Bapoxonae totabiya jera. Barapo Creta tunaeto imoxoyo pitapa pacaquita enaponan weratha. <sup>14</sup>Poxonae saya caeto paenaponan bapoxonae pin joibo pana epa taepona, Creta nacua tunaeto

wejoparena. Jera epa yutaba. <sup>15</sup>Nexata joibo jera muxunenababa. Canta joibo nawita, daxota jopa paponaeinyo joibo beya. Daxota saya pacopatan xua saya bara joibo pana yanacaputabiyaenaba. <sup>16</sup>Cauda tunaetiyo bepana yanacapatubiya. Baraxota ichaxota joibo yayapa, tsica naeyo jeriyo po naeyo paquetoutan, pajontaxuinan pepa naetha. <sup>17</sup>Panacuitontan xua pajonta xuinan. Barapo naeyo pepa jeratha pacutabotan. Nexata jera penacuichiwi pepa bumacantha peuma wemuxuburu capabina, muxuburu babataruba xua pewacatabiyainwa joibo. Nexata barapomonaе bichocono junuwa poxoru nanta xeina xua mexeya itara jera naxatatabawei taetabotha, po taetabo pewun Sirte. Daxota wera jontabota jeratha. Saya jera caputabiya joibo. <sup>18</sup>Icha matababitha came awiya maratsacan bichocono daunwei. Daxota ichawan mentha bebai xua xuan capona. <sup>19</sup>Icha matababitha daxota pabeban xua jeratha jeba tsipei ichichipa xua tafafanatsi. <sup>20</sup>Ainya matababin came awiya jopa panecotsinyo xometo. Opiteino jopa panecotsinyono. Pajunuwan. Pananta xeinan: “Metha aparaunxuae jopa nacapanenebiya tsainchi. Bunothopaeinchi aunxuae”, pajan.

<sup>21</sup>Ainya matababin pana yapu xenaca xua jopa panabanaeinyo. Pablo nontapona. Barapomonaе baraichi, jeye:

—Bara bayatha paca tsipaebatsiba: ‘Creta tunaeto beya, jopa pawarapaeinde’, paca baraichiba. Daumetha equeicha pawarapame. Daxota aunxuae jera abe exana. Matautano pananta puxanameno xuaunxuae pabebam xoxi pacaponame. <sup>22</sup>Ichitha saya jopa pajunuwinde. Jopa pajiwana tupaem tsane, bequein meisa jera naxubina. <sup>23</sup>Merawi matatsunpin netsita naituta. Barapo matatsunpin

Nacom itoroba pon Tanacom xuano xua taexanaexae pocotsiwa bapon neitoroba. <sup>24</sup>Barapo matatsunpin nebarai: ‘Pablo jopa junuwinde poxoru bexa tsane romanomonaе itorobiya pia pepa peewatsinchi pon Augusto, peitabaratha tatsi uncuaename. Daxota pomonaе xua napona cata capanepatsi Nacom’, nejei matatsunpin. <sup>25</sup>Daxota, paxam pana najantü coyene tsacabare, poxoru xan nanta xeinan xua pocotsiwa matatsunpin netsipaeba bara baxua exanaena. <sup>26</sup>Ichitha petunaetotha naca monapentsina, jei Pablo.

<sup>27</sup>Poxonaе catorce po matababibe tsuxubi, barapoxonaе mar mene pacaxiban. Barapo pepa mar mene pewun Adriático mene. Barapo mentha joibo pana yana muxunenababa. Merawi papaetha, pomonaе petanacuichiwi barapo naetha, barapomonaе nanta xeina xua imoxoyo ira itiya pona. <sup>28</sup>Barapomonaе mene epa tutu canaubareca. Treinta y seis po mu epatiyobe xeina xua iratha deca. Caeto equeicha mene epa tutu canauba, baxota veinte y siete po mu epatiyobe xeina xua iratha deca. <sup>29</sup>Barapomonaе pejunuwixae xua jera tofotabina poxonaе yutabina ibowantha, daxota barapomonaе po nainto arewe, xua jera duntaba exanaduta petafe xoreca. Cuatro po naintobe xoreca peruntaba exanadutsinexa. Matautano barapomonaе Nacomtha wuca xua xometo pentha tsane, penecotsinexa tsane. <sup>30</sup>Pomonaе petanacuichiwi barapo naetha barapomonaе nanta xeina xua perucpaewa. Daxota barapomonaе naemata po nainto arewe dureca pebuxureca. Ichitha tsiqui naeyo mentha durecano, poxoru pia namicha ducpaetsi barapo naeyotha. <sup>31</sup>Pablo barai Julio, pon soldadomonaе pia pentacaponaein tatsi, xuano baraino soldadomonaetha, jeye:

—Icha pomonae petanacuichiwi barapo naetha icha jopa enae tsane barapo pin naethe, jopa Nacom capanenebiyae tsane, jei Pablo.

<sup>32</sup>Daxota soldadomonaе jeriyo mu ucuiba. Jeriyo mentha jopeica.

<sup>33</sup>Poxonae caemumbo, Pablo pijiwimonaе jain itoroba. Pablo pijiwimonaе barai, jeye:

—Bayatha dos po semanabe painya junuwi jopa bichocono panabanaem poxoru pajunuwame xua pabunothopame. <sup>34</sup>Daxota pin jumetha paca jeichichi. Moya matha paxaema tsipei baxua ainya cui xua painya nenacapanenebiyaenam. Bara caein jopa napuxanae tsane. Matautano jopa caentanatiyo aichurucuae tsane.

<sup>35</sup>Poxonae Pablo najume weta, pecobetha pan pita, Nacomtha tsipaeba barapomonaе peitabaratha tatsi. Barapoxonae pan epa janaxuba. Bapoxonae xane. <sup>36</sup>Bapoxonae barapomonaе najantũ coyene tsacabarucupa. Matautano barapomonaе daxita juntema nabanerucupa. <sup>37</sup>Jerapiwi doscientos setenta y seis po matabuxumonaеbe pan xua daxita pan. <sup>38</sup>Poxonae barapomonaе najain wetarucupa, daxita barapomonaе trigo xu bebai pepa mentha poxoru bepa jera tafafanaetsei.

### Meje yabara poxonae jera bunareca

<sup>39</sup>Poxonae xometo baya pentha tsina, pomonaе petanacuichiwi barapomonaе jopa yaitaeyo ira, po iratha muxu pepatsi. Poxonae barapomonaе pexutoroto tane, barapomonaе nanta xeina xua juntucuru jebounaena taetabo itapatha. <sup>40</sup>Daxota barapomonaе nayana mu ucuiba, xua po nainton arewe mene bupana bobendeca. Po catenano pecabobotsi catena, barapo catenano isanaxoreca. Nexata paparuwa duta wera naetotha. Barapo wera

pebuxutha duta. Jera nainya cacuita caputabiya ira. <sup>41</sup>Ichitha barapoxonae barapo nae ichaxota tsewa tuwutha naxatatabarena. Buxu naxatatabuncua bichocono. Petafe fotaba maratsacatha.

<sup>42</sup>Soldadomonaе bepara jutubei pomonaе peteiquebi jiwichi, tsipei poxonae mentha othopaena mexeya itara ducupaenawei. <sup>43</sup>Ichitha soldadomonaе pia pentacaponaein tatsi, bapon Julio, ichipa xua Pablo asu popona. Daxota Julio jopa yabara jume copatsiyo xua jutebinchi pomonaе peteiquebi jiwichi. Bapoxonae Julio itoroba pomonaе yaputane xueiba, copiya pepatsinexa tsane pepa iratha. <sup>44</sup>Pomonaе xua jopa xueibiyo napaewan cobena xueibiya. Matautano barapo jera pepan cobena xueibiya. Daxota daxita panenebiya pepa iratha.

### Meje yabara poxonae Pablo Malta tunaetotha patopa

**28** Poxonae po tunaetotha papanenebiyan ichamonaе pana tsipaeba: “Apara Malta tunaeto”, jei. <sup>2</sup>Malta tunaetopiwi beta pana matenta weiweinaya waba. Bichocono ema duna. Ema pana atsana. Aqueno. Daxota barapomonaе pin isoto itutaeta. Bapoxonae barapomonaе pana waba: “Anthа panonopenare”, jei. <sup>3</sup>Pablo isoton nota po isoton tsewa. Poxonae barapo isoton pepa isototha bebebeya, barapo isotontha jomo athabe jopeina poxoru bichocono atou. Pablo cobe sinaducuaitsi barapo jomo. <sup>4</sup>Malta tunaetomonaepiwi, Pablo cui tainchi xua jomo cobe sinaducuaitsi. Barapomonaе nantiya natsipaeba, najei: “Barapo pebin apara pon jiwi pejutebin. Bequein panepa pepa mar mentha ichitha barapo nacom, po nacom pewun Justicia, bapon itoroba jomo pesinarucuaenexa tsainchi, xua

bapon jopa pepoponaenexa tsane”, jei barapomonaē.

<sup>5</sup>Ichitha Pablo nacobe nūnūtaba jomo isototha. Saya axaibi tsuncuae Pablo. <sup>6</sup>Daxita barapomonaē Pablo cui necotumeinchi xua cobe putsunanaya yawa icha iratha jopiyaena petūpaein. Bayatha cui wenaewatumena. Poxonaē baxua jopa daichiyo, daxota equeicha ichawa nanta xeinarcūpa: “Metha moya bara Pablo nacom tsecae”, jei bapomonaē.

<sup>7</sup>Ichaxota isoto, baxota ainya iran bobena Malta tunaeto peewatsin, bapon pia iran tatsi. Bapon, acoibi po matabibē beta pexaewa pana apata. Baxota yawa pamaitenan. Bapon pewūn Publio pon iran pata tan. <sup>8</sup>Publio paxa tatsi camatha boca. Domaebatsi. Suibatsino. Pablo barapo tutu bejoniya ichaxota bapon boca. Bapoxonaē Pablo cobe jayabiya tsipaeba Nacomtha. Bara bapon axaibi tsanaya. <sup>9</sup>Poxonaē baraxua exana Pablo, daxita Malta tunaetomonaē, pomonaē peatenewi, baxota pata. Irū Pablo axaibi exanarū daxita barapomonaē. <sup>10</sup>Malta tunaetomonaē pana barū cui itura jina nawita. Bapoxonaē poxonaē equeicha pawaraparūcūpan jeratha, pana nepu catsiba xua xoxi pata nantawenonaenexa poxonaē weratha pawarapan.

**Meje yabara poxonaē Pablo  
Roma tomaratha patopa**

<sup>11</sup>Poxonaē acoibi po xometiyobe payapucaewan barapo Malta tunaetotha, barapoxonaē pawarapan. Pawarapan weratha po naetha po nae barapo Malta tunaetotha ayawūbo tsuncuae. Barapo nae Alejandría tomara werena peponaē nae. Barapomonaē barapo naetha petafetha cuareta naewiyo be jitonyobe. Saya canaxoba pia nacombe. Icha

nacom pewūn Cástor. Icha nacom pewūn Pólux. <sup>12</sup>Siracusa tomaratha pajebounan. Barapo tomaratha acoibi po matabibetha paenan. <sup>13</sup>Barapo tomara wewarapiyan, Siracusa tomara weya. Bapoxonaē Regio tomaratha papatan. Icha matabibitha joibo wexubiye Puteoli tomara bepana yanacaicha ainya merawibe. Baxota papatan Puteoli tomaratha. <sup>14</sup>Baraxota pacaxiban pomonaē irū pejume cowūntsiwichi Jesús. Barapomonaē pana waba: “Cae semanatha pana barū enare”, jei. Bapoxonaē equeicha Roma tomara bepawarapiyan. Pecaē payiyan. <sup>15</sup>Pomonaē irū pejume cowūntsiwichi Jesús, Roma tomaramonaēpiwi, cou pana yabara jume tane xua imoxoyo papatan. Daxota cou ichamonaē pana siwa dendena pecaerena. Foro de Apio tomara beparena. Ichamonaē Tres Tabernas tomara beparena pia pana taetsi. Poxonaē Pablo barapomonaē tane, Nacomtha tsipaeba. Pablo juntu coyene sadūjei xua juntema pepoponaewa poxonaē tane pomonaē pejume cowūntsiwichi Jesús. <sup>16</sup>Poxonaē Roma tomaratha papatan, soldadomonaē pia pentacaponaein tatsi, copata xua Pablo bara saya pepoponaenexa icha botha, xuano xua saya caein Pablo peyapu eenaenexatsi soldadomonaēpin.

**Meje yabara poxonaē Pablo  
Nacom pexeinya jume diwesi  
paeba Roma tomaratha**

<sup>17</sup>Poxonaē acoibi po matabibē yapucaewa, Pablo najume caruta ichamonaetha petawabinexa tsainchi Roma tomarapiwi, pomonaē judiomonaē pia pentacaponaei tatsi. Poxonaē barapomonaē pata, Pablo barai barapomonaē, jeye:

—Tamonae, jopa abe exanaeinoyo wamonaetha pomonaē judiomonaēxae.

Matautano bequein jopa abe exanaeinyo wamo susato jiwi piamonae pia coyene cuitha tatsi, ichitha barapomonae newaetaba. Matautano jiwi pecubi botha necapona Jerusalén tomaratha xua romanomonae pia pentacaponaei tatsi pia xantha tatsi.<sup>18</sup> Barapomonae, romanomonae, neyabara yainyaba nawita xua icha abe exanan. Ichitha barapomonae neyaputane xua jopa abe exanaeinyo. Daxota barapomonae ichipa xua saya tana necopatabiwa tsane. Romanomonae aichaxaibi xua jemeicha saya nenacui cayantomata xua tana nebexubiwa tsane tsipei pinae jopa abe exanaeinyo.<sup>19</sup> Ichitha judiomonae neapusiwa xua jopa taponaeewa tsane. Daxota bewa wucaein xua taponaeewa tsane romanomonae itorobiya pia pepa peewatsinchi beya, xua tana neyabara paebinexa tsane icha metha abe exanan. Baxota ponan bequein jopa xeinaeinyo xua po coyene tayabara paebiwa tamonae xua abe exana.<sup>20</sup> Daxota paca wabatsi tha paca cataetsi xuano xua tha panejume taeicham. Waxainchi israelmonaeaxetsi wunaewatatsi pon Nacom itorobicapaeba. Tajume cowantsixae baxua daxota anoxuae penainto tamaxutha ducua, jei Pablo barapo pentacaponaeiwitha.

<sup>21</sup> Barapoxonae romanomonae Pablo baraichi, jeichichi:

—Jopa painta patopaeyo carta Judea nacua werena xua xam necayabara tinaewa. Po judiomonae, Judea nacua werena pata pomonae patamonae, barapomonae jopa abe cayabara paebiyo.

<sup>22</sup> Paichichipan paca jume tainchi xua jinya coutha nanta xeiname. Poxoru daxita nacuan pajume tan, xua Jesús pia pena pecuidubi coyenewan tatsi abe yabara paeba, jei barapo judiomonae pia pentacaponaei tatsi xua Pablo tsipaebatsi.

<sup>23</sup> Pablo muxu tsipaebatsi po mataqueitha xua patsina. Barapo mataqueitha Pablo pia botha tapatatsi pin bicheito. Pablo baya tamropata pitaba xua tsipaeba barapomonaetha, beya yapentha. Pablo jume daunweya yabara cueicuei jei barapomonaetha po diwesi po coyene xua Nacom waba jiwi petanaexanaexatsi piamonae tatsi poxonae Jesús jume cowuntatsi. Matautano tsipaeba barapomonaetha Jesús yabara xua Jesús apara pon Moisés yabara paeba pia peitorobi coyenewatha. Matautano Jesús apara pon Nacom pia peitorobi jume pepaebiwi yabara tina pia petinae diwesintha.<sup>24</sup> Xua Pablo po jume diwesi paeba, ichamonae jume cowanta poxonae cataunxuaeru ichamonae jopa jume cowuntsiyo.<sup>25</sup> Barapomonae be ainya bicheitobe natsicotane. Daxota bapomonaebe tamropata notarucupa xua peponaeewa. Pablo namchi, jeye:

—Po diwesi Nacom pia Pejumope tuxaxu tatsi cata xua Isaías catatsi xua bapon petsipaebinexa xua wamo susato jiwi petsipaebinexatsi, barapo diwesi po diwesi pexeinya diwesi, xua jeye:

<sup>26</sup> ‘Ponde, barapomonaethano jande: Pajume taneme ichitha jopa xapain payabara jume yaputaem pocotsiwa pajume taneme.

Pataneme painya itacueretontha ichitha jopa xapain payaputaem pocotsiwa panecotame.

<sup>27</sup> Barapomonae najuntuxu coyene ararana exana,

jopa peichichipaexae xua pejume taewa. Matautano antufaetabiya jume tane.

Barapomonae baraxuan exana, poxoru jopa betaeyo peitacueretontha, poxoru jopa bejume taeyono pemuxutontha, yawa poxoru pejuntuxu coyeneintha jopa beyaputaeyo.

Barapomonae jopa ichipaeyo xua tana  
 netsita  
 xeinaewa icha jũntũ coyene xua daxota  
 jopa  
 neitacũpaeyo xua tayabara  
 jũntemainaewa  
 abe pia peexanae cuiru coyenein tatsi',  
 jeyei Nacom pia Pejumope tũnaxũ tatsi  
 xua  
 Isafas cueicueijei exanatsi pinae, jei  
 Pablo.

<sup>28</sup> Pablo cataunxuae cueicueijei, jeye:  
 —Anoxuae xuano bexa tsaneno  
 payaputaename xua pomonae  
 jopa judiomonae naexanaeyo jume  
 taena Nacom pia pecapanenebiyae  
 diwesi. Bara barapomonae beta jume  
 naitaewatsina.

<sup>29</sup> Poxonae Pablo najume weta  
 natsixibarũcũpa judiomonae. Poxonae

pona barapomonae yabara najume  
 matsontsonoba xua Pablo paeba.

<sup>30</sup> Pablo Roma tomaratha popona  
 ainya weibe. Pia botha eca xua saya  
 tanacowaeicha eca. Barapo botha daxita  
 matenta weiweinaya wabeiba pomonae  
 pesiwa poneibixaetsi Pablo. <sup>31</sup> Pablo  
 tayapu xanepanatsi xua pepoponaewa.  
 Barapoxonae Pablo barapomonaetha  
 yabara tsipaeba po diwesi po coyene  
 Nacom waba jiwi petanaexanaenexatsi  
 pijimonae tatsi pomonae itorobiya  
 peewatsixae. Matautano yabara  
 cuidubano xua Jesucristo yabara,  
 pon Pecanamataxeinaein jiwi.  
 Romanomonae pia pentacaponaein tatsi  
 Pablo jopa cui matawentichi.

Baja Lucas.

## Meje Po Carte Pablo Tatina, Roma Tomarapiwi Tatinatsi

### Meje yabara poxonae Pablo tamropata pitaba xua tatina pomonaetha pomonae Roma tomarapiwi

**1** Xan, Pablon, apara pon tanacuichin amanaya Jesucristo nexa. Nacom newaba yawa tsana nenota xua necana exana Jesucristo pia peitorobi jiwi jiwana tatsin xua tacueicueijeinexa Nacom pia pecapanenebiyae diwesi jume.

<sup>2</sup>Barapo pecapanenebiyae diwesi jume caena bayatha Nacom yabara tsiwuna muxu duta Nacom pia peitorobi jume pepaebi jiwitha poxonae barapomona tina Nacom Pejume Diwesi xua Nacom yaputane exana, po diwesi xua Nacom pia pexeinya jume diwesi tatsi. <sup>3</sup>Barapo diwesi yabara tinatsi Jesucristo, pon Wanacanamataxeinaein, pon Nacom Pexanto tatsi. Poxonae bapon Jesucristo be jiton coyeneya naexana, xaniwaicha bapon David pia pemomoxi susato jiwana pinsi tatsi. Barapo David pon caena bayatha Israel nacuapiwi itorobiya pia pepa peewatsinchi. <sup>4</sup>Poxonae Nacom pia peayapusu itorobi coyenewatha Jesucristo pon Wanacanamataxeinaein asu exanatsi petupae cuiru coyene weya, bapoxonae Nacom tsita itapeinya xeina jiwitha xua bapon Jesucristo bara Nacom Pexanto tatsi po pexantoxae tatsi pia jumope tunaxu tatsi juntu coyene xanepana Nacomtha.

<sup>5</sup>Jesucristo pata tana neantobexae, Nacom pana cata pocotsi coyene xua pana netsita coyene xanepana xua pata tana necana exanaewa tsane Jesucristo pia peitorobi jiwi tatsi. Nacom pana itoroba pata cueicueijeinexa daxita nacua jiwitha xua barapomonae pejume

cowuntsinexa yawa xua peexanaenexa pocotsiwa xua Jesucristo itoroba. <sup>6</sup>Daxita barapomona pomona jume cowunta, paxam barapomona jiwana pam. Nacom iru paca waba xua paxam Jesucristo piamona tatsi jiwana pam painya nenaexanaenexa. <sup>7</sup>Daxita pam pacata tinatsi pomona pajinompame Roma tomaratha, pomona pam xua Nacom paantobem. Yawano Nacom paca waba xua bapon painya tsita nenajuntu coyenein xanepana exanaexam tsane. Barabu Nacom, pon Waxa, iru Jesucristo pon jiwi Pecanamataxeinaein baponbe paca yawenaenabe pia paca necaantobexae. Matautano baponbe barabu juntema jinompa paca cana exanaena.

### Meje yabara poxonae Pablo ichichipa xua pesiwa ponaewa Roma tomara

<sup>8</sup>Matha copiya Jesucristo wun caununaya tsipaeban Nacomtha, janje tsaibin: "Nacom, yabara juntu coyene weiweinan Roma tomarapiwi, tsipei daxita nacuan jiwi yabara paeba xua pinae barapo Roma tomarapiwi xaniwaicha beta cajume cowunta", jan tsaibin Nacomtha. <sup>9</sup>Ajuntayapusya Nacom tanacuitan. Nacom tacueicueijan pia jume diwesi xua pocotsi jume Pexanto tatsi tayabara paeban. Barapon Nacom bara yatsicaewa neyaputane xua matowa paca yabara nanta xeinaeya tsipaebaponatsi barapo Nacomtha. <sup>10</sup>Nacomtha yainyabeiban xua icha bapon ichichipa xua bara metha neitacupaetsipa xua matapainya tapaca siwa ponaewatsi tsainchi. <sup>11</sup>Paca siwa ponaeinchi tsipei bichocono ichichipan xua tapaca taewatsi. Ichichipanno xua tapaca cuidubiwatsi tsainchi xua Nacom pia Pejumope tunaxu tatsi painya nepaca cayawenaenexa tsane painya juntu coyenewatha. Bapoxonae paca juntu coyene ayapusu exanaena.

<sup>12</sup>Pocotsiwa xuaunxuae yabara paeban apara xua waxainchi caemonaе nantiya wanajuntũ coyene tsacabinexa xua jũntema wajinompaenexa. Baxua nacana exanaeinchi poxonae wanatsipaеbeibinexa Nacom Pejume Diwesi, po jume diwesi pajume cowũntame xua irũrũ jume cowũntandũ.

<sup>13</sup>Tamonaе pam, pomonaе irũ painya nejume cowũntsiwixae Jesucristo. Ichichipan xua payaputaneme xua matowa ichichipeiban xua tapaca siwa poneibiwa tsaibi tsainchi. Ichitha beya anxuae jopa neitacupaeyo xua tapaca siwa ponaewatsi. Ichichipan xua tapaca cuidubiwatsi Nacom Pejume Diwesi xua pejume cowũntsinexa pomonaе jopa copiya jume cowũntsiyo, xua irũrũ pejũntũ coyene tsacabinexatsi pomonaе copiya jume cowũnta. Baxua barichin tsane icha bayatha ichin ichamonaetha xua poxonae yawenan pomonaе jopa judiomonaе naexanaeyo xua pejume cowũntsinexa. <sup>14</sup>Nacom neitoroba daxita jiwitha. Daxota bewa cueicueijan tsane Nacom Pejume Diwesi daxita jiwitha, bequein metha bara tomarapiwi tsipae, ichacuitha metha bara bequein unupiwi tsipae, bequein metha peyaputaewi tsipae, ichacuitha metha bequein jopa peyaputaewi tsipae. <sup>15</sup>Daxota bichocono ichichipan xua paxam irũ tapaca cuidubiwatsi tsainchi Nacom Pejume Diwesi pomonaе pamxaem xua painya nejinompaewi pam Roma tomaratha.

**Meje yabara xua Nacom Pejume  
Diwesi xeina peayapusũ itorobi  
coyewewa xua jiwi  
pecapanenebiwatsi**

<sup>16</sup>Jopa ajumeurinyo xua tacueicueijeia Nacom pia pexeinya jume diwesi. Poxonae jiwi jume cowũnta barapo diwesi, Nacom capanenebiya exana barapomonaе abe

pia peexanae cuiru coyenein weya tatsi pia peayapusũ itorobi coyenewatha. Nacom capanenebiya pomonaе pia pejume cowũntsiwichi, matha copiya judiomonaе, bapoxonae irũ pomonaе jopa judiomonaе naexanaeyo. <sup>17</sup>Barapo diwesi naca yaputane exana xua Nacom naca cana jũntũ coyene xanepana exana bapontha, xua jopa watsita natsicuentisixae xua abe waexanaexae bapontha. Nacom baxua naca cana jũntũ coyene exana saya poxorũ Ʃ meisa wayabara jume cowũntsixae pocotsiwa exanapaeba, bapon. Nacom Pejume Diwesitha jeye baxua yabara: “Pontha, pon Nacom jũntũ coyene xanepana exana pia peyabara jume cowũntsinxaetsi pocotsiwa exanapaeba bapon ataya tsitecaeya poponaena”, jei Nacom Pejume Diwesitha.

**Meje yabara xua jiwi  
penatsicuentisawa Nacomtha  
abe peexanaexae**

<sup>18</sup>Waxainchi yaputainchi xua Nacom anaepana pomonaetha pomonaе abe peexanaewi. Daxota itorobica athawetsica po coyenetha xua barapo jiwi atene peexanaewatsi. Nacom anaepana, jiwi abe peexanaexae bapontha yawano abe peexanaexae ichamonaetha. Matautano barapomonaе abe peexanaexae, jopa copatsiyo xua bara pia jũntũ coyeneintha peyaputaewa pexainyei jumein. <sup>19</sup>Barapomonaе bewa xaniwaicha bayatha yaputaena po coyene xua Nacom pejũntũ coyene tatsi. Tsipei bayatha Nacom tsita najũntũ coyene ituta barapomonaetha. <sup>20</sup>Jiwi jopa itacupaetsi xua paeba xua pinae jopa Nacom yabara yaputaetsi. Beya poxonae Nacom aena forota barapo cae pin nacue, jiwi yaputane xua Nacom xaniwaicha popona yawa pia peayapusũ itorobi coyewewa bapana jopa weraweracae tsane. Jiwi yaputane baxua poxonae tane pocot-



siwa Nacom forota bequein Nacom jopa taetsi. Daxota jiwi natsiaenae cuenta exana Nacomtha pia coutha poxonaе abeya paeба xua pinae jopa yaputaetsi Nacom. <sup>21</sup> Bequein barapomonae yabara yaputane xua bara Nacom popona, daichitha barapomonae jopa baru cui itura jinaeyo Nacom ponxae xua yatsicaewa pia pepa Nacom tatsi. Yawano barapomonae jopa jei tsaibiyo Nacomtha: “Nacom, pajuntũ coyene weiweinan xua pocotsiwa painta neexanaewamxae”, jopa jei tsaibiyo. Saya meisa barapomonae yabara nanta xeina dubenanaebiya pocotsiwa xua pepawi. Saya abeya nanta xeina dubenanaebiya xua daxota jopa yaputaeyo pexainyei jume. <sup>22</sup> Bequein barapomonae paeба xua pinae peyaputaewi daichitha be pomonae xua jopa xapain peyaputae jiwi naexanaeyo. <sup>23</sup> Barapomonae jopa wunae jainchiyo Nacom, pon ataya tsitecaeya popona. Saya Ʃ wunae pejainchi ibo nacomun, po ibo nacomun be tsita jiwichi xua saya peweraweracae coyene. Yawano icha ibo nacomun exana xua xuan be peyapupunaewi, yawano po ibo nacomun be jomon xua petompacuetontha pona, yawano po ibo nacomun be duwein xua pecobe xeina yawa pesito xeina.

<sup>24</sup> Daxota Nacom copata xua barapomonae bara moya peexanaenexa abe peexanaewa be pocotsi coyeneya xua ichichipa. Bapoxonae barapomonae nantiya nata exana pocotsiwa xua aura exanatsi pia pepontha. <sup>25</sup> Baxuan Nacom copata xua peexanaewa barapomonae, tsipei barapomonae jopa jume cowuntsiyo Nacom pia pexainyei diwesi jume. Saya barapomonae itapeta Ʃ jume cowunta xua xuan penaerabi diwesi jumein. Pocotsiwan Nacom forota baxuan barapomonae be pia nacomun cana exana pejume cowuntsinexa, matautano

xua barapomonae pebaru cui itura jinaenexa xua wunae pejainchiwa nexa. Barapomonae jopa wunae jainchiyo pepa Nacom, pon daxita peforotsin. Barapon waxainchi bewa wunae jainteibinchi xua ataya tsaibi tsane pia peexaneibixae waxainchi nexa. Je, bara ichi tsane.

<sup>26</sup> Daxota Nacom copata xua barapomonae bara moya peexanaenexa pocotsiwan xua aura exanatsi pia pepontha pocotsiwan abe coyenewa peichichipaewan. Matautano

barapomonae pia yabuxi tatsi jopa equeicha exanaeyo po coyene yabuxi ba exana poxonaе peichichipaewa pia pebin. Bapoxonae barapo yabuxi exana xua cae yabuxi naichichipa. <sup>27</sup> Barichi pebiwi aichaxaibi po coyene pebiwi ba exana poxonaе peichichipaewa pia petsiriwa. Saya meisa bichocono penthutontha ichichipa exana xua cae pebiwi naichichipa. Barapo pebiwi nantiya nata exana pocotsiwa xua pin ura xeina exanatsi. Barapomonae abe peexanaexae Nacomtha natsicuenta. Daxota Nacom copata xua barapomonae pia pepon atene nata exana.

<sup>28</sup> Poxoru barapomonae jopa ichipaeyo xua jopa pejume cowuntsiwa Nacom, daxota Nacom copata xua barapomonae moya bara abeya penanta xeinaenexa. Matautano Nacom copata xua barapomonae bara moya exanaena pocotsiwan jopa bewa exanae pocotsiwa xua abe. <sup>29</sup> Barapomonae jopa juniya juntũ coyene yucaetsi xua peabe coyenewan. Barapomonae nasi cui weiweina exanaduta, yawano abe exana ichamonaetha. Yawano exana xua ichichipa pocotsiwa ichamonae xeina. Yawano ichichipa xua ichamonae atene exanatsi. Barapomonae uwa, ichamonae uwatsi. Yawano barapomonae juteba, ichamonae jutebatsi. Yawano penabi coyene exana. Yawano barapomonae

jiwi muxujainyaba nawita. Yawano barapomonaē bichocono piamonaē caseba nawita. Yawano caemonaē nabaru paxapaxei xua ichamonaē abe yabara paebatsi. <sup>30</sup>Yawano barapomonaē jume atsaquiya abeya yabara paeba xua ichamonaē pocotsiwa exana. Barichi barapomonaē Nacom casebatsi. Yawano barapomonaē biatane ichamonaē. Yawano pia coutha penayabara paebiwi xua pinae peainya cui jiwi. Yawano barapomonaē peabiwi xua ichamonaē aebatsi. Yawano jeita nawita pocotsiwan xua peabe coyenewa. Yawano jopa exanaeyo pocotsiwan xua paxeiwi itorobeibatsi. <sup>31</sup>Barapomonaē jopa ichichipaeyo xua Nacom peyabara yaputaewatsi. Yawano barapomonaē jopa jume xainyeya exanaeyo pocotsiwan xua exanapaebiba. Yawano barapomonaē jopa xapain antobeyo ichamonaē. Yawano barapomonaē jopa ichamonaē yabara jūntemainaetsi xua abe exana. Yawano barapomonaē jopa ichamonaē xapain yabara nanta xeinaetsi xua peyawenaenexatsi. <sup>32</sup>Barapomonaē yaputane pocotsiwa xua Nacom itoroba. Yawano barapomonaē yaputane xua pomonaē barapo peabe coyenewan exana bewa werapaena. Bequein barapomonaē yaputane baxuan ichitha awiya abe eexanapona. Yawano barapomonaē jūntu coyene weiweina, poxonaē ichamonaē iru barapo peabe coyenewan exana.

**Meje yabara xua Nacom yabara paebina penatsicuentisiwa jiwi, xua yatsicaewa pexainyei coyenewatha**

**2** Paca tsipaebatsi paxam judiomonaē jiwana pam pomonaē xua ichamonaē pecayabara nanta xeinaewichi xua icha abe exana xuano xua icha jopa abe exanaeyo. Paxam jopa bewa pajam tsane ichuntha:

“Xam abe exaname, natsicuenta exaname Nacomtha”, jopa bewa pajam tsane. Tsipei poxonaē ichun payabara paebame xua penatsicuentisiwa xua abe peexanaewaxae, apara painya coutha panatsicuentame Nacomtha xua abe painya neexanaexae. Poxoru bichocono abe painya neexanaewi icha ichi pomonaē payabara paebame xua penatsicuentisiwa xua abe pia peexanaewaxae. <sup>2</sup>Waxainchi yaputainchi xua Nacom yabara paebina daxita jiwi xua penatsicuentisiwa xua abe peexanaexae xua yatsicaewa pexainyei coyenewatha xua abe peexanaexae bapontha. Poxonaē Nacom yabara paebina xua penatsicuentisiwa jiwi, bapon paebina xua pomonaē barapo peabe coyenewan exana bewa peraxa jūbebinchi xua atene tsane. <sup>3</sup>Paxam ichun payabara paebame penatsicuentisiwa xua abe pia peexanaewaxae. Apara painya coutha panatsicuentame Nacomtha xua iru paxam painya nebarichiwatham xua abe painya neexanaexae. Paxam jopa paca itacupaeyo xua painya nepanenebiwa poxonaē Nacom atene exanaena xua poxonaē yabara paebina jiwi xua penatsicuentisiwa xua pomonaē abe peexanaewi. <sup>4</sup>Paxam paichaxaibim poxonaē Nacom bichocono peichichipaexae xua painya nepaca yawenaewa xua painya nepaca antobexae. Yawa paxam paichaxaibim poxonaē Nacom abu saya jūntema ewata xua beta pacata exanaena xua pomonaē pamxaem xua pajume cowantsiname yawa atene paca exanaena pomonaē pamxaem jopa painya nejume cowantsiwi. Nacom baxua exana pia xua paxam painya auratsi abe painya neexanaexae. Yawano pia painya bapoxonaē Nacom wūcaetsi xua painya nepaca cayabara jūntemainaenexa painya abe exanaē

coyewewan. <sup>5</sup>Paxam ainya unthuton paxename. Yawano jopa paichipaem xua icha juntu coyene painya tsita xeinaewa Nacom. Daxota paxam mataropeicha paexanaponame xua pocotsiwan abe. Daxota bexa Nacom paca yabara anaepanaena xuano atene paca exanaena painya tsita natsicuentisixae po mataqueitha Nacom paebina xua bewa atene exanaeinchi pomonae barapo peabe coyewewan exana. Nacom yabara paebina jiwi xua penatsicuentisiwa xua abe peexanaexae xua yatsicaewa pexainyei coyewewatha abe peexanaexae bapontha. <sup>6</sup>Nacom catsibina pentoman daxita carepaya jiwitha xua pocotsiwan pia petanacuichiwixaetsi. Pomonae abeya tanacuita xuya abeya matoma catsibebinchi. Pomonae wunaeya tanacuita xuya wunaeya matoma catsibebinchi. <sup>7</sup>Ichamonae Nacom peajuntuayapusu coyewewa catsibina pomonaetha pomonae jopa aitaconaeya exana dubenanaebiyayo pocotsiwa Nacom ichichipa. Barapomonae ichichipa nawita xua po coyene Nacom petsita xanepanaewa tsainchi. Matautano barapomonae ichichipa nawita pia pebaru cui itura jinaewa Nacomtha. Matautano barapomonae ichichipa nawita xua pia xeinaetsi peajuntuayapusu coyewewa po peajuntuayapusu coyewewa ataya tsiteca. <sup>8</sup>Ichamonaetha, Nacom anaya exanaena xua atene exanatsi barapomonae pomonae saya u piawa nata exana. Yawa Nacom atene exanaena pomonae jopa jume cowuntsiyo Nacom pia pexainyei jume diwesi. Barapomonae Nacom bichocono caseba itapeta peichichipaewaxae xua abe coyewewa peexanaewa. <sup>9</sup>Atene exanebinchi yawa ajunturewe exanebinchi daxita pomonae abe coyewewan peexanaewi, matha copiya pomonae judiomonae,

bapoxonae iru catsibinchi pomonae jopa judiomonae naexanaeyo. <sup>10</sup>Ichitha nama Nacom seicaya catsibina pomonaetha pomonae xanepanaya betiya peexanaewi po coyewewa xua Nacom petsita xanepanaewa tsainchi. Yawano catsibina po coyewewa xua pebaru cui itura jinae coyewewa. Yawano catsibina po coyewewa xua juntea pejinompaeyo coyewewan. Matha copiya catsibinchi judiomonae, bapoxonae iru catsibinchi pomonae jopa judiomonae naexanaeyo.

<sup>11</sup>Barapomonaethabe Nacom catsina barapo coyenein tsipei Nacom tsita najupatsi daxita jiwi. <sup>12</sup>Pomonae jopa judiomonae naexanaeyo daxita barapomonae yaputane poxonae abe exana pia peitorobi coyewewan pexeinaexae. Icha barapomonae awiya eexanapona pocotsiwa xua abe, Nacom tsita natsicuentatsi. Barapomonae werapaena abe peexanaexae bequein jopa yaputaeyo Moisés pia peitorobi coyewewa tatsi. Pomonae judiomonae barapomonae yaputane Moisés pia peitorobi coyewewa tatsi. Daxota yaputane poxonae abe exana. Poxonae barapomonae abe eexanapona Nacom tsita natsicuenta exanatsi abe peexanaexae, poxoru yaputane Moisés pia peitorobi coyene tatsi. <sup>13</sup>Pomonae jume tane Moisés pia peitorobi coyewewa tatsi xuano exana pocotsiwa itoroba, barapomonae Nacom tsita juntu coyene xanepanatsi. Pomonae saya jume tane Moisés pia peitorobi coyene tatsi daichitha jopa exanaeyo pocotsiwa itoroba, barapomonae Nacom jopa tsita juntu coyene xanepanaetsi. <sup>14</sup>Pomonae jopa judiomonae naexanaeyo barapomonae jopa xeinaeyo Moisés pia peitorobi coyewewa tatsi. Ichitha ichacuitha barapomonae exana xua be pocotsi coyene Moisés pia

peitorobi coyenewatha itoroba. Baxua barapomonaе exana, tsipei pejuntũ coyenewantha yaputane pocotsiwa xua abe xuano pocotsiwa xua xanepana bequein bara jopa xeinaeyo Moisés pia peitorobi coyenewa tatsi. Poxonaе baxuan exana be barompaya pia peitorobi coyenewan xeina pia juntũ coyenewantha. <sup>15</sup>Poxonaе barapomonaе beta exana, baxua itapeinya xeina xua barapomonaе pia juntũ coyenewantha xeina Nacom pia peitorobi coyenewa tatsi. Barapomonaе yacuiya naexana. Barapomonaе pia juntũ coyenein yaputane cana exanatsi xua poxonaе wnae exana xuano xua poxonaе ichacuitha abe exana. <sup>16</sup>Jemeicha jopaena matabi po mataqueitha poxonaе Nacom itorobina xua Jesucristo yabara paebina daxita jiwi xua pia penatsicuentisiwa xua abe peexanaexae Nacomtha. Barapo mataqueitha Jesucristo yabara paebina jiwi xua penatsicuentisiwa xua abe peexanaexae xua pocotsiwan namicha abeya peexanaexae matautano pocotsiwan namicha abeya penanta xeinaexae. Baraxua Jesucristo bara exanaena icha be pocotsi coyeneya paeban poxonaе cueicueijan Nacom pia pexeinya pecapanenebiyae diwesi jume.

**Meje yabara xua judiomonaе yawa Moisés pia peitorobi coyenewa tatsi**

<sup>17</sup>Paxam papaebame, pajam: “Paxan seicaya judiomonaepiwi pan”, pajam. Pananta xeiname xua Moisés pia peitorobi coyenewa tatsi paca capanepaena. Atsaquiya papaebame xua barompaya painya nacom, yatsicaya pepa Nacom. <sup>18</sup>Barichi paxam papaebame xua pinae payaputaneme pocotsiwa xua Nacom pia peichichipae coyenewa. Matautano papaebame xua pinae Moisés pia peitorobi coyenewa paca cuiduba xua painya neitapetsiwa

po coyene xua pexainyei coyenewa. <sup>19</sup>Matautano atsaquiya papaebame, pajam: “Paxan pacuiduban pomonaе jopa peyaputae jiwi Nacom. Yawa jume cowunta pacana exanan pomonaе jopa jume cowuntsiyo Nacom”, pajam. <sup>20</sup>Paxam pananta xeiname xua paca itacupa xua pacuidubame pomonaе Nacom jopa peyaputae jiwi. Barichi pananta xeiname xua paca itacupa xua yaputane pacana exaname pomonaе pena pejume cowuntsiwi. Paca itacupa barapo ainya coyenewabe painya neyaputaexae Moisés pia peitorobi coyenewa xua xeina pexainyei yaputae coyenewan. <sup>21</sup>Poxonaе ichamonaе po coyenein yabara pacuidubame paxam jopa apara matha pajume yabara cowuntsiya exanaem barapo coyenein. Paxam pacuidubame pocotsi coyenewa xua jopa bewa caibi ichamonaetha xua irũ painya barichiwathamdu. <sup>22</sup>Paxam pacuidubame xua jopa bewa ichun piowa tatsi tapichichi xua irũ painya barichiwathamdu. Paxam papaebame xua pinae paichaxaibim ibo nacomun, ichitha paxam pacaibame pocotsiwan xua jeba ibo nacomun pia botha tatsi. <sup>23</sup>Atsaquiya papaebame xua paxeiname Moisés pia peitorobi coyenewa. Ichitha irũ apara paxam jopa paexanaem xua painya nebaru cui itura jinaewa Nacom, poxonaе jopa payabara jume cui coyeneya exanaem barapo Moisés pia peitorobi coyenewa. Daxota ichamonaе jopa Nacom baru cui itura jinaetsi. <sup>24</sup>Daxota Nacom Pejume Diwesitha jeye: “Apara paxam painya coutha pam poxonaе pomonaе jopa judiomonaе naexanaeyo Nacom abe yabara paebatsi tsipei copiya paxam abe paexaname”, jei Nacom Pejume Diwesitha.

<sup>25</sup>Paxam judiomonaе pam, xua pebiwi pam paca wi thaba poxonaе cataunxuae pexui pam. Paca jumapa perũ muxunene caxica xua ichaxota pebi-

wichi xeinatsi ichaxota pana nareixacae-name. Baxua paca cana exana poxoru Moisés pia peitorobi coyene paca itoroba xua painya tsita itapeinya xeinaenexa xua bara apara Nacom piamonae tatsi pam. Barapo coyenewa xua Moisés pia peitorobi coyene tatsi paca yawena xua Nacom pajume cowunta dubenanae-biyame icha paexaname daxita pocotsiwa Moisés paca itoroba. Ichitha icha jopa paexanaem pocotsiwa xua Moisés paca itoroba jopa paca yawenaeyo xua Nacom pajume cowunta dubenanae-biyame bequein paca wi thabitha tsipae. <sup>26</sup>Pon jopa wi thabichi poxonae bapon exana pocotsiwa Moisés pia peitorobi coyenewatha itoroba, Nacom tsitatsi be xua bapon bayatha apara wi thabatsi. Nacom tsitatsi xua bapon bara pijimonae jiton tatsi bequein bara jopa wi thabichi. <sup>27</sup>Ichacuitha pebiwi bequein jopa wi thabichi, daichitha exana pocotsiwa Moisés pia peitorobi coyenewatha itoroba. Barapomonae paca juntu cui coyene yabara nanta xeinaena xua icha abe paexaname Nacomtha xuanano xua icha wuna paexaname Nacomtha. Bequein payaputaetham Moisés pia peitorobi coyenewa xua petinae diwesi, ichitha jopa payabara jume cuiya exanaem pocotsiwa barapo Moisés pia peitorobi coyenewatha paeba. <sup>28</sup>Pon jiwu tsitatsi xua pepa judiomonaepin saya poxoru pewi thabixaetsi xua pepontha, bapon Nacom jopa tsitatsi xua pia jiton tatsi. <sup>29</sup>Jame xua pepa judiomonaepin penaexanaenexa tsane, saya jame poxonae Nacom juntu coyene xanepana exana barapo jiton xua Nacom jopa bapon tsita natsicuentichi abe peexanaexae pia juntu coyenewatha. Poxonae jiton xaniwaicha wi thabatsi, apara baxua, xua poxonae jiton xaniwaicha jume cowunta pejuntu coyenewatha Nacom. Pocotsiwa xua Moisés pia petinae coyenewa, jopa exanaeyo xua ji-

ton icha juntu coyene pexeinaewa Nacomtha xua pexanepanaewa. Saya apara meisa Nacom pia Pejumo pe tunaxu tatsi baxua exana. Jiwi wunaeya yabara paeba pomonae xua pewi thabiwichi. Ichitha nama Nacom wunaeya yabara paeba pontha pon icha juntu coyene xeina bapontha xua pexanepanaewa.

**3** Metha beya ichun yainyabichipa jei tsipae: “¿Eta po coyene, po coyene Nacom tsita xanepanatsi, po coyene beta wepu toxeinchiya exana pomonae judiomonae xua wepu beta toxeincha exanatsi pomonae jopa judiomonae naexanaeyo? ¿Eta po coyene, po coyene Nacom tsita xanepanatsi, po coyene beta wepu toxeinchiya exana pon pewi thabinchi xua wepu beta toxeincha exanatsi pon jopa pewi thabinchi?” jei tsipae. <sup>2</sup>Metha jume notsipan bapon, jan tsipae: “Apara bara bichocono jopa juniya xanepanaeyo xua penaexanaewa judiomonae xuanano xua wi thabatsi, poxoru copiya Nacom Pejume Diwesi nacana jume diwesi cata judiomonaetha”, jan tsipae. <sup>3</sup>Ichacuitha metha beya equeicha bapon yainyabichipa jei tsipae; “Daichitha ¿eta bichi tsipae icha barapomonae jiwana nacui barapentsipa xua jopa peyabara jume cowuntsiwa xua Nacom bexa exanaena pocotsiwa Nacom yabara tsiwuna muxu duta? ¿Daxota metha Nacom xuya nacui baraxubichipa xua jopa equeicha peexanaewa pia peyabara tsiwuna muxu dutsiwa?” jei tsipae. <sup>4</sup>Metha jan tsipae: “¿Jume, apara Nacom bapana jopa baxua exanae! Apara jame Nacom daxitan pexainyewantha exaneiba. Nacom bewa exaneibina baxuan bara bequein jiwu pemuxuitorobi jiwu. David baxua yabara paeba Nacom Pejume Diwesitha xua Nacom tapaebatsi, jeye: ‘Nacom, poxonae cueicueijam jiwu yaputaena xua xam xainyeya bara nepaebin.

Bapoxonae jiwi jume amanayabame  
 poxonae baxua  
 exaname poxonae bequein jiwi cayabara  
 paeba xua  
 abe exaname', jei David Nacom Pejume  
 Diwesitha", jan tsipae.

<sup>5</sup> Ichitha metha ichamonae jume cox-  
 onaya najume matsontsonobichipa jei  
 tsipae: "Poxonae waxainchi abe ex-  
 anatsi bapoxonae Nacom naca atene  
 exana. Abe waexanae coyenewantha  
 jiwi tsita itapeinya xeinatsi xua bara  
 Nacom aichaxaibi abe peexanae coye-  
 newa xua bara Nacom xanepanaya pe-  
 exanaein. Daxota abe waexanae coye-  
 newantha Nacom yawenatsi. ¿Eta xua  
 metha yabara paebinchi baxua? ¿Metha  
 Nacom jopa xaniwaicha exanaeyo icha  
 naca atene exana abe peexanae cuiru  
 coyene waexanaexae?" jei tsipae bara-  
 pomonae, xua saya paeba icha jiwi ichi  
 pomonae jopa peyaputae jiwi. <sup>6</sup> Metha  
 barapomonae jume notsipan, jan tsipae:  
 "¡Jume apara, baxua jopa xainyeyo! Icha  
 Nacom jopa xaniwaichiya exanaetsipae  
 poxonae naca yabara paeba xua penat-  
 sicientiwa bapoxonae jopa itacupaetsi-  
 paetsi xua daxita yabara paebatsi jiwi  
 xua penatsicuentiwa xua abe peexanae  
 cuiru coyene peexanaexae. Ichitha Na-  
 com apara xaniwaichiya exana daxota  
 itacupatsi xua daxita jiwi yabara pae-  
 batsi penatsicuentiwa", jan tsipae.

<sup>7</sup> Metha ichamonae jei tsipae:  
 "Nacom jopa bewa naca yabara paebi  
 penatsicuentiwa tsane wanaca yabara  
 paebinexa xua abe waexanaewan  
 poxonae naerabiya cueicueijeichi.  
 Poxoru poxonae naerabiya  
 cueicueijeichi ichamonae tsita itapeinya  
 xeinatsi xua Nacom seicaya exana  
 xua Nacom bichocono xainyeya  
 pepaebin xuano xua Nacom bara  
 peainya cuin", jei tsipae barapomonae.

<sup>8</sup> Ichamonae iru jei tsipae: "Daxota  
 waxainchi bewa abe exanaeinchi, xua

watsita itapeinya xeinaenexa xua  
 Nacom bara xainyeya pepaebin", jei  
 tsipae barapomonae. Barapomonae  
 naerabiya paeba xua pinae xan barapo  
 coyene cuiduban ichamonae. Barapo  
 naerabiya pepaebiwu xua neyabara  
 jume caenaeraba, barapomonae Nacom  
 tsita natsicuentinchi abe taneyabara  
 paebixae.

**Meje yabara xua daxitatsi  
 pomonaetsi pomonae Nacom  
 watsita natsicuentiwichi  
 abe waexanaexae bapontha**

<sup>9</sup> ¿Waxainchi pomonae judiomonaetsi  
 Nacom tsitatsi xua jopa wanatsicuenti  
 jiwichi xua beyacaincha pomonae jopa  
 judiomonae naexanaeyo xua naca tox-  
 einchiya bichocono abe peexanaewi?  
 Jume. Tsipei bayathaunxuae paeban:  
 "Waxainchi judiomonaetsi iru pomonae  
 jopa judiomonae naexanaeyo daxitatsi  
 abe waexanae jiwichi", jan. <sup>10</sup> Nacom  
 Pejume Diwesitha baxua yabara jeye:  
 "¡Dapomonae ajibi pomonae xua  
 xanepanaya  
 peexanaewi, xua matautano bara  
 caeinno!

<sup>11</sup> Matautano dapon ajibi pon ichichipa  
 xua  
 peyabara yaputaewa pexainyei  
 coyenewa.

Matautano dapon ajibi pon xua  
 ichichipa penaponaewa Nacomtha.

<sup>12</sup> Daxita jiwi Nacom pentatsi yawano  
 abe  
 peexanae jiwi bichocono.

¡Dapon ajibi pon xua xanepanaya beta  
 exana, xua matautano bara caeinno!

<sup>13</sup> Barapomonae caunuta nawita pocot-  
 siwa peabe

jumein, icha muthu tsina ichi xua  
 cawenabeina

xua tuxamna baxoyareca  
 pebocarecaexae pon tupa.

Bapomonae pepaebiwantha ichamonae

muxujainyabeibatsi.

Barapo pepaebiwantha ichamonae  
ajuntucoyenetane exanatsi, icha jomo  
ichi  
xua ichun sinatsi poxona bichocono  
atene

exanatsi pewano tsapa pexeinaexae.

<sup>14</sup> Barapomonaé saya Ꞇ cueicueijeí xua  
xuan peabe  
jumein, po jumein xua atsaca  
pepaebiwa.

<sup>15</sup> Barapomonaé bichocono ichichipa  
nawita xua  
ichamonae bichocono atene  
peexanaewatsi

xuano xua pejutewiwatsi.

<sup>16</sup> Daxita ichaxota poneiba  
barapomonaé,  
ichamonae abe exaneibatsi.

Matautano exaneiba pocotsiwa  
ichamonae

ajuntucoyenetane cana exanatsi.

<sup>17</sup> Barapomonaé jopa yaputaeyo xua po  
coyene

caemonae nantiya juntema jinompa  
penaexanae coyenewa.

<sup>18</sup> Matautano barapomonaé jopa  
cunuwiyo Nacom xua  
abe peexanaeyainwatsi”, jei Nacom Pe-  
jume Diwesitha.

<sup>19</sup> Waxainchi yaputainchi xua daxita  
Nacom paeba Moisés pia peitorobi  
coyewathá baraxua judiomonaé  
nexa. Barapomonaé bewa exanaé  
Moisés pia peitorobi coyenewa tatsi.  
Ichitha judiomonaé jopa itacupaetsi xua  
peexanaewa barapo coyenewa. Barichi  
pomonaé jopa judiomonaé naexanaeyo  
jopa itacupaetsi xua peexanaewa baxua.  
Barapo coyeneya Nacom yaputane  
exana xua daxita jiwi jopa pepaebinexa  
xua pinae jopa abe peexanaewa  
barapo jiwi. Matautano Nacom tsita  
itapeinya xeina jiwitha xua Nacom  
yabara paebina xua penatsicuentisiwa  
daxita jiwi xua abe peexanaexae

bapontha. <sup>20</sup> Dapon ajibi pon itacupaetsi  
xua pejeiwa: “Xan bichocono tajuntú  
coyene xanepanaein xua Nacom jopa  
tatsita natsicuentisixae abe taexanaexae  
bapontha. Tsipei daxita yabara jume  
cuiya exanan pocotsiwa Moisés pia  
peitorobi coyewathá itoroba”, xua  
pejeiwa. Tsipei jame apara barapo  
Moisés pia peitorobi coyenewa tatsi  
naca yaputane exana xua waxainchi  
apara abe waexanae jiwichi.

### **Meje yabara xua jiwi capanenebiyatsi pejume cowantsixae Nacom**

<sup>21</sup> Ichitha anoxuae Nacom jiwi  
yaputane exanatsi po coyeneya bapon  
exana xua poxonaé jiwi juntú coyene  
xanepana exanatsi bapontha. Nacom  
jopa tsita natsicuentichi barapomonaé  
xua abe peexanaexae. Nacom baxua  
exana jopa poxoruyo xua peexanaexae  
pocotsiwa Moisés pia peitorobi  
coyewathá itoroba. Moisés pia  
peitorobi coyenewa tatsi, irꞆ Nacom pia  
peitorobi jume pepaebiwi paeba xua  
bewa jiwi Nacom tsita juntú coyene  
xanepanaetsi. <sup>22</sup> Nacom juntú coyene  
xanepana cana exana jiwi poxonaé  
barapo jiwi jume cowanta Jesucristo.  
Nacom bara daxita najuntú coyene  
jꞆpiya exana pomonaetha pomonaé  
pejume cowantsiwi Jesucristo,  
poxoru Nacom tsita najupatsi barapo  
pejume cowantsiwichi. <sup>23</sup> Tsita  
najupatsi yaitama daxita jiwi peabe  
coyewanan exana. Yawano barapo  
jiwi taseicatsi po coyene xua Nacom  
tsita xanepanatsi barapomonaé.  
<sup>24</sup> Ichitha Nacom peantobexae jopa  
tsita penatsicuentisiwatsi barapo jiwi.  
Baxua Nacom amanaya taexana. Nacom  
pentoma exana xua jiwi pejuntú coyene  
xanepanaenexa poxonaé Cristo Jesús  
naetha tsitupa, xua jiwi tsitupatsi.  
<sup>25</sup> Nacom Pexanto itorobica, pon Cristo.  
Bapon jana pichapabarena poxonaé

tsitupa jiwi pia peabe coyenewan tatsi. Nacom jüntemaina jiwi pia peabe coyenewan poxonaе barapomonaе jume cowunta Cristo. Barapo coyenewatha Nacom yaputane exana xua bara jüntu coyene xanepana cana exana jiwi xua jopa Nacom petsita natsicuentiswatsi xua abe peexanaexae. Bayatha bapon beitatemaya cui taetaepona jiwi abe pia peexanae cuiru coyenewan tatsi pomonaе xua caena bayatha jinompa poxonaе cataunxuae Jesús jopa tupaeyo. <sup>26</sup>Ichitha anoxuae Nacom yaputane exana jiwitha xua beta xanepanaya peexanaewa. Anoxuae Nacom jopa beitatemaya cui taeyo jiwi abe pia peexanae cuiru coyenewan tatsi. Apra jame Nacom jüntu coyene xanepana cana exana jiwi poxonaе Nacom yabara jüntemaina jiwi xua pia penatsicuentiswaxua abe peexanaexae. Baxua exana daxita pomonaetha pomonaе pejume cowuntsiwi Jesús.

<sup>27</sup>Daxota waxainchi jopa naca itacupaeyo xua atsaquiya nayabara paebatsi xua beta waexanaewa. Waxainchi jopa najüntu coyene xanepana exanaetsi bequein ichichipatsi xua waexanaewa pocotsiwa Moisés pia peitorobi coyenewatha itoroba, daichitha jopa exanaetsi. Nama apra wajume cowuntsixae Jesús, daxota bapon naca jüntu coyene xanepana cana exana Nacomtha. <sup>28</sup>Nama anoxuae waxainchi yaputainchi xua Nacom jüntu coyene xanepana cana exana pontha pon jume cowunta Jesús. Nacom jopa jüntu coyene xanepana exanaeyo poxonaе bequein ichun ichichipa xua peexanaewa pocotsiwa Moisés pia peitorobi coyenewatha itoroba xua daichitha poxonaе jopa exanaeyo.

<sup>29</sup>Nacom jopa meisa apra judiomonaе pia Nacom tatsi. Apra iru pomonaе jopa judiomonaе naexanaeyo barapomonaе iru pia Nacom tatsi.

<sup>30</sup>Ichha Nacom ajibi, saya meisa bapon Nacom nacata bara compa. Barapo Nacom jüntu coyene xanepana cana exana jiwi, pomonaetha pomonaе jume cowunta Jesucristo, bequein pomonaе wi thabatsi xuano bequein pomonaе jopa wi thabichi. <sup>31</sup>Waxainchi jopa naci barapentichi Moisés pia peitorobi coyenewa tatsi yaitama jume cowuntatsi Jesús. Jame poxonaе xaniwaicha jume cowuntatsi Jesús bapoxonaе bara xaniwaicha exanatsi pocotsiwa Moisés pia peitorobi coyenewatha itoroba.

### Meje xua Abraham yabara

**4** Anoxuae paca tsipaebatsi xua pocotsiwa Nacom exana Abrahamtha. Bapon wamo susatopin, iruru daxita judiomonaе pia pamo susatopin tatsi pon caena bayatha tupa. <sup>2</sup>Abraham jopa pia coya najüntu coyene xanepana exanaeyo xua jopa Nacom petsita natsicuentiswatsi xua abe peexanaexae. Daxota jopa itacupaetsi xua atsaquiya nayabara paeba xua xanepanaya peexanaewa. Bapon jopa itacupaetsi xua atsaquiya paeba Nacom peitutha tatsi. <sup>3</sup>Nacom Pejume Diwesitha Abraham yabara paebatsi, jeye: “Abraham jume cowunta Nacom. Peyabara jume cowuntsixae pocotsiwa xua Nacom exanapaeba, Nacom jüntu coyene xanepana cana exana bapon”, jei Nacom Pejume Diwesitha. <sup>4</sup>Poxonaе jiton ba tanacuita ichun, jopa jiton pentoma becatsichi xua saya amanaya nexa poxoru ichun peyabara nanta xeinaexae bapon. Jame jiton ba bewa pentoma catsichi xua poxoru penacuichixae. <sup>5</sup>Ichitha nama Nacom seicayiya exana. Pon yabara jume cowunta pocotsiwa Nacom exanapaeba xua Nacom peyabara jüntemainaenexa xua bapon pia penatsicuentiswaxua tatsi, bara Nacom yawena bapon. Barapo jiton Nacom tsita jüntu coyene xanepanatsi,



bequein bapon jopa exanaeyo pocotsiwa bewa bapon exanae xua daxota Nacom peyawenaenexa tsane. <sup>6</sup>David pon wamo susatopin, pon caena bayatha tupa, bapon caena bayatha Israel nacuapiwi itorobiya pia pepa peewatsinchi. Bapon David yabara paeba po jiton bichocono juntu coyene weiweina. Jeye: “Pon peyabara jume cowuntsixae pocotsiwa Nacom exanapaeba, Nacom juntu coyene xanepana cana exana. Jopa apara Nacom juntu coyene xanepana exanaeyo xua poxoru bapon wunaeya xanepanaya peexanaexae. Apra poxoru Nacom peichichipaexae, daxota baxua exana”, jei David. <sup>7</sup>Equeicha David jei: “Juntu coyene weiweina pomonae Nacom

yabara juntemaina xua puxana exana abe

pia peexanae cuiru coyenewan tatsi.

<sup>8</sup>Juntu coyene weiweina pon Nacom jopa tsita natsicuentisichi xua abe peexanaexae”, jei David.

<sup>9</sup>Po pejuntu coyene weiweinaewa xua David yabara paeba, meisa saya u pomonae pewi thabiwichi jopa nexiyo. Apra barapo pejuntu coyene weiweinaewa iru pomonae jopa pewi thabiwichi nexano apra. Bayathaunxuae paca tsipaebatsi xua Abraham yabara jume cowanta pocotsiwa Nacom exanapaeba, daxota Nacom juntu coyene xanepana cana exana bapon xua jopa Nacom tsitatsi xua Abraham penatsicuentisiwa xua abe peexanaexae. <sup>10</sup>Abraham jopa juntu coyene xanepana exanaetsi poxonae nacana cui wetatsi xua pewi thabiwatsi. Apra Nacom Abraham juntu coyene xanepana exanatsi poxonae cataunxuae jopa wi thabichi. <sup>11</sup>Abraham peyabara jume cowuntsixae pocotsiwa Nacom exanapaeba, Nacom juntu coyene

xanepana exana. Cotacaya bapoxonae Abraham wi thabatsi. Barapo pewi thabi coyene tsita itapeinya xeina xua bara Nacom juntu coyene xanepana exana Abraham, peyabara jume cowuntsixae pocotsiwa Nacom exanapaeba. Abraham petsiwana exanaexae xua pewi thabiwatsi, daxota Nacom tsitatsi xua Abraham be coxiyun poxonae cana exanatsi xua canamataxeinaena xua daxita nacuanpiwi pomonae jopa pewi thabiwichi. Barapomonae be Abraham pia pexui. Baxua Nacom cana exana po jiwitha, po jiwi peyabara jume cowuntsiwixaetsi pocotsiwa exanapaeba bara bequein daxita barapo jiwi jopa pewi thabiwichi copiya. Daxota Nacom iru yabara nanta xeina xua bara iru barapomonae juntu coyene xanepana bapontha. <sup>12</sup>Barichi Abraham be coxiyun cana exanatsi, xua pomonae bayatha pewi thabiwichi barapomonae be pia pecanamataxeinaeinchi. Jopa Abraham be coxiyun cana exanaetsi xua poxoru barapomonae pewi thabixaetsi. Jame apra be coxiyun cana exanatsi poxoru iru peyabara jume cowuntsiya jinompaexae pocotsiwa Nacom exanapaeba icha Abraham ichi, pon wamo susatopin xua beya poxonae wi thabatsi.

**Meje yabara xua poxonae Nacom cata pia peyabara tsiwunae muxu dutsiwa, Abraham catatsi**

<sup>13</sup>Nacom yabara tsiwunae muxu duta Abrahamtha iru pia pemomoxi susato jiwitha tatsi. Nacom yabara tsiwunae muxu duta xua catsina daxita barapo cae pin nacue Abrahamtha, iru pia pemomoxi susato jiwitha tatsi. Daxita barapomonaetha Nacom jopa apra catsiyo barapo yabara petsiwunae muxu dutsiwa xua poxoru Abraham peexanaexae pocotsiwa Moisés pia peitorobi coyenewatha itoroba tsipei

Moisés jopa cataunxuae naexanaeyo poxonae bayatha Abraham tupa. Aparā Nacom cata barapo yabara petsiwūnae muxu dutsiwa poxoru Abraham peyabara jume cowūntsixae pocotsiwa Nacom exanapaeba. Daxota Nacom yabara tsitatsi xua bara Abraham pejūntū coyene xanepanaein bapontha. <sup>14</sup>Icha pomonae xeinaetsipa pocotsiwa Nacom yabara tsiwūnae muxu duta, icha barapomonae apara barapomonae tsipae pomonae exana daxita pocotsiwa Moisés pia peitorobi coyenewatha itoroba bapoxonae barapomonae jopa nantawenonaetsipae xua yabara jume cowūnta pocotsiwa Nacom exanapaeba. Matautano pocotsiwa xua Nacom yabara tsiwūnae muxu duta barapomonae jopa tsita xainyei tsipaetsi. <sup>15</sup>Ichitha baraxua jopa xainyeyo, tsipei Moisés pia peitorobi coyenewa saya exana xua jiwi atene peexanaewatsi. Atene exanatsi poxoru jiwi beta jopa daxita yabara jume cuiya exanaeyo barapo Moisés pia peitorobi coyenewa tatsi. Ichitha pomonae jopa xeinaeyo Moisés pia peitorobi coyenewa, barapomonae Nacom jopa tsita penatsicuentiswatsi xua abe peexanaexae xua poxonae jopa exanaeyo barapo peitorobi coyenewa.

<sup>16</sup>Daxota Nacom yabara tsiwūnae muxu duta Abrahamtha peyabara jume cowūntsixaetsi pocotsiwa Nacom exanapaeba. Nacom pia yabara petsiwūnae muxu dutsiwa, Nacom bara xaniwaicha amanaya catsina Abraham pia pemomoxi susato jiwitha tatsi. Nacom jopa meisa catsiyo pomonaetha pomonae peexanaewi xua Moisés itoroba. Aparā Nacom irū cata pomonaetha pomonae pejume cowūntsiwichi icha Abraham ichi poxonae jume cowūnta Nacom. Bapon Abraham be coxiyūn cana exainchi xua daxita waxainchi be

xua wanacanamataxeinaein, copiya pejume cowūntsixae. <sup>17</sup>Nacom jeye Abrahamtha pejume diwesitha: “Xam cacana exanatsi xua ainya nacuanpiwi necayabara nanta xeinaenexa xua xam compam daxita nacuanpiwi cacanamata caexanatsi be coxiyūm”, jei Nacom Pejume Diwesitha. Daxota barapo yabara petsiwūnae muxu dutsiwa Nacom tsita coyene xanepanatsi. Barapon Nacom Abraham yabara jume cowūnta pocotsiwa Nacom exanapaeba. Matautano barapo Nacom equeicha asu exana pomonae bayatha werapa. Matautano barapon Nacom itoroba xua forota pocotsiwan jiwi bapana jopa tae copiya, poxoru Nacom cataunxuae abū jopa forotsiyo bapocotsiwan.

<sup>18</sup>Abraham poxonae nawei wetaba xua jopa itacupaetsi xua pexeinaewa pexui, awiya cataunxuae yabara jume cowūntsiya wūnae ewata pocotsiwa Nacom exanapaeba. Bapon jume cowūntsiya popona xua Nacom exanaena xua bayatha paeba xua Abraham pinae bapon pexanto xeinaena. Abraham yabara jume cowūnta pocotsiwa Nacom exanapaeba pocotsiwa yabara tsiwūnae muxu duta. Bapon Abraham cana exanatsi xua daxita carepaya nacuan jiwi peyabara nanta xeinaenexa xua Abraham compa daxita nacuanpiwi canamata exanatsi be coxiyūn. Caena bayatha Nacom tsipaeba Abraham. Nacom jeye: “Abraham, exanaein ayei jiwi jinya nemomoxi susato jiwi”, jei Nacom. <sup>19</sup>Abraham jopa jūntū coyene natsepaeayo xua peyabara jume cowūntsiwa pocotsiwa Nacom exanapaeba, bequein bara bapon cien po weibe xeina. Bapon Abraham yaputane, xua bapon irū piowa tatsi Sara bara imoxoyo methaunxuae tupaenabe. Abraham piseuribe bichocono perunbe. Matautano

yaputaneno xua Sara jopa itacupaetsi xua pexui pexeinaewa. <sup>20</sup>Bapon Abraham jopa ainya muxu xeinaeyo. Matautano jopa nacui baraxubiyo xua peyabara jume cowuntsiwa pocotsiwa Nacom exanapaeba xua pocotsiwa Nacom yabara tsiwunaexa muxu duta xua pinae Abraham pexanto xeinaena. Jame bapon Abraham beta xaniwaicha jume cocowuntapona. Abraham wunaexa jaintapona Nacom. <sup>21</sup>Baxua Abraham exanapona poxoruru bara yatsicaewa yaputane xua Nacom itacupatsi xua peexanaewa pocotsiwa xua bapon yabara tsiwunaexa muxu duta. <sup>22</sup>Abraham peyabara jume cowuntsixae pocotsiwa Nacom exanapaeba, daxota bapon Nacom tsitatsi xua bapon bara peyabara juntu coyene tsita xanepanaeinchi xua jopa petsita natsicuentisixaeetsi abe peexanaexae bapontha.

<sup>23</sup>Po jumein xua bayatha Abraham yabara paebatsi xua jeye: “Nacom tsitatsi xua bapon bara pejuntu coyene xanepanaein xua jopa petsita natsicuentisixaeetsi abe peexanaexae bapontha”, jei, barapo jumein jopa meisa tinaeyo xua bapon nexa. <sup>24</sup>Barapo jumein xua po jumein tina apara iru bara waxainchi nexa xua naca yabara paebaru. Wajume cowuntsixae Nacom, daxota Nacom tsitatsi xua bara waxainchi iru wajuntu coyene xanepanae jiwichi xua jopa watsita natsicuentisiwatsi xua abe waexanaexae bapontha. Waxainchi yabara jume cowuntatsi pocotsiwa Nacom exanapaeba, pon Jesús asu exanatsi petupae cuiru coyene weya, pon Wanacanamataxeinaein. <sup>25</sup>Nacom itoroba xua bapon Jesús naca tsitupa abe waexana cuiru coyenewan. Matautano Nacom asu exanano, xua Jesús asu petupae cuiru coyene weya xua wanaca cana exanaenexa xua jopa

Nacom watsita natsicuentisawa tsane xua abe waexanaexae bapontha.

**Meje yabara xua Nacom wanaca cana exanaewa xua jopa wanatsicuentisawa tsane bapontha, xua abe waexanaexae**

**5** Nacom naca cana exana xua bapon jopa watsita natsicuentisawa tsane abe waexanaexae bapontha. Baxua Nacom naca cana exana wayabara jume cowuntsixae pocotsiwa Nacom exanapaeba. Daxota waxainchi juntea dubenanaebiyatsi Nacom peitutha tatsi Jesucristo wanaca tsitupaexae, pon Wanacanamataxeinaeinxae. <sup>2</sup>Cristo wajume cowuntsixae, daxota naca cana exana xua Nacom bara wanaca yawenaewa tsane wanaca antobexae. Nacom wanaca yawenaexae ajuntucoyenesuya jinompatsi. Yawa waxainchi juntu coyene weiweinatsi wawunaexa ewatsixae xua bexa iru xeinaeinchi pebaru cui itura jinaewa po pebaru cui itura jinaewa jiji Nacom tsita xeinatsi peainya cuinxae icha bapon ichi. <sup>3</sup>Jopa meisa baxua nexiyo, jame yawa juntu coyene weiweineibatsi poxonaexa ichamonae naca atene exaneiba. Tsipei waxainchi yaputainchi xua wanaca juntu coyene ayapusu exanaewa xua daxota jopa waaitaconaewa poxonaexa bequein ichamonae naca atene exana. <sup>4</sup>Poxonaexa ajuntucoyeneyapusuya jinompatsi xua daxota jopa waaitaconaewa poxonaexa bequein ichamonae naca atene exana, bapoxonaexa Nacom naca weyatane xua bara beta waexanaewa. Poxonaexa Nacom naca weyatane, baxua naca cana exana xua wawunaexa ewatsiya ewatsiwatsi xua Nacom nacata exanaena pocotsiwa yabara naca tsiwunaexa muxu duta. <sup>5</sup>Barapo wawunaexa ewatsiwa jopa naca juntu coyene cana exanaeyo xua wajuntu coyene wecoyeiwa xua

jopa wataexae pocotsiwa wawanae ewatsiwa. Nacom bichocono naca juntu coyene yuca cana exana pia peantobe coyenewa pia Pejumope tunaxutha. Barapo pia Pejumope tunaxu tatsi naca nacana jumope cata wajuntu coyenewatha.

<sup>6</sup>Poxonae waxainchi jopa naca itacupaeyo xua wacoutha wanacapanenebiwa, bapoxonae Cristo naca tsitupa abe waexanae cuiru coyenewan nexa. Bapon Cristo tupa poxonae po mataqueitha Nacom copata xua bapon petupaewa tsaneba. <sup>7</sup>Barapo cae pin nacuathe nacata ayapube xua nanta xeinatsi xua jiton wayabara nanta xeinaewa xua ichun peita araranaewatsi xua peyapu cabocaewa xua daxota petupaewa bequein barapo ichun daxita yabara jume cuiya exana pocotsiwa Moisés pia peitorobi coyenewatha paeba. Tsipei jiwi ba anatsiuntabe, jopa ichipaeyo xua petupaewa. Ichitha ichacuitha tsipae metha jiton yaita araranaetsipa xua peyapu cabocaewa xua daxota petupaewa pon xanapanaya petaexanaein ichamonae.

<sup>8</sup>Jame Nacom xaniwaicha naca tsita itapeinya xeina pia wanaca antobexae. Baxua Nacom naca cana exana poxonae Cristo naca yapu caboca xua wanaca tsitupaewa bara bequein cataunxae abe waexanae jiwichi.

<sup>9</sup>Nacom naca exana xua waxainchi pejuntu coyene xanepanae jiwichi xua poxonae jopa natsicuentisichi bapontha abe waexanaexae, xua poxonae Cristo naca tsitupa. Bapoxonae yawa jana pichapabarena. Barichi icha coyenewano exanaenano. Cristo naca yaputane exana xua wanaca capanenebiwa tsane Nacom pia pewanaca casebiwa weya. Po mataqueitha Nacom yabara paebina daxita jiwi xua penatsicuentisiwa xua abe peexanaexae, barapo mataqueitha

Nacomtha jopa natsicuentisi tsainchi xua abe waexanaexae. <sup>10</sup>Copiyatha waxainchi Nacom pia peaitafaetabi jiwichi. Ichitha bapon Nacom naca cana exana xua waita coxonaewa xua daxota Nacom pia jiwi tatsi wanaexanaenexa, Pexanto tatsi pewanaca tsitupaexae. Ichitha anoxuae Nacom pia jiwi tatsixaetsi, Jesucristo naca capanenebiya pia peasu poponae coyenewatha. <sup>11</sup>Jopa meisa baxuiyo, jame juntu coyene weiweinatsino Nacomtha xua xuan Jesucristo peexanaexae waxainchi nexa, pon Wanacanamataxeinaein. Bapon Cristo naca cana exana xua waxainchi Nacom wanaca ita coxonaewa xua daxota Nacom pia jiwi tatsi wanaca cana exanaewa.

#### **Meje xua Adán yabara iru Cristo yabara**

<sup>12</sup>Caein pon xua copiya abe exana barapo cae pin nacuathe, bapon Adán. Bapon caena bayatha tupa copiya abe peexanaexae. Bapoxonae daxita jiwi abe eexanapona barapo cae pin nacuathe. Jiwi abe peexanaponaexae daxota werapaena, tsipei daxita jiwi abe exana.

<sup>13</sup>Barapo cae pin nacuathe jiwi abe eexanapona beya poxonae Moisés pia peitorobi coyene tatsi xeina barapo cae pin nacuathepiwi. Poxonae jiwi cataunxae jopa yaputaeyo Moisés pia peitorobi coyenewa tatsi, jopa Nacom tsitatsi xua barapomonae pexeinaewa penatsicuentisi coyenewa bapontha bequein barapomonae abe exanaetha. <sup>14</sup>Ichitha po dapaetha poxonae Adán popona weya xua beya poxonae iru Moisés popona, jiwi abe eexanapona. Daxota jiwi xeinaepona po coyenewatha xua daxota werapaena barapo jiwi. Barapomonae werapa bequein pia peabe coyenewan tatsi jopa barichiyo icha Adán ichi. Adán abe exana poxonae bequein Na-

com itoroba xua jopa bewa pinae xae tsane petheito. Bapon Adán bara be bapon pon bexa patopeicapaebe, bapon Cristo. Adán pia coutha xua jiwi abe peexanaewa xua jiwi pecanamata caexanaeatsi. Seicaya nama Cristo pia coutha xua jiwi beta peexanaewa xua jiwi pecanamata caexanaeatsi.

<sup>15</sup>Pocotsi coyene xua Adán naca tsixana jopa be ichiyo xua pocotsi coyene naca tsixana Jesucristo. Jiwi nawita werapa poxoru caein abe pecanamata exanaeae bapon Adán. Ichitha Nacom amanaya naca tsixana pecapanenebiyae coyenewa poxoru caein, pon Jesucristo, naca tsitupa abe waexanaeae. Barapo coyene xua po coyene Nacom naca tsixana bichocono peainya cui coyene, beyacaincha po cui coyene Adán naca tsixana. Barapo coyene Nacom naca tsixana xua peantobexae daxita jiwi peyawenaenexa ayei jiwitha. <sup>16</sup>Po peabe coyenewa caein canamata exana bapon Adán jopa coyene jupaetsi xua nacui coyene jupa exanabe po cui coyene xua Nacom amanaya naca tsixana. Copiya Adán canamata exana abe peexanae cuiru coyene. Bapoxonae daxita jiwi jupa exana. Nacom yabara paeba Adán xua penatsicuentiwa abe peexanaeae. Daxota Nacom Adán yabara jeichichi xua Adán bewa pinae tupaena abe peexanaeae. Barichi Nacom tane xua daxita jiwi bewa werapaena bichocono abe peexanaeae. Daxota Nacom ichichipa xua jiwi peyawenaewatsi. Nacom amanaya juntu coyene xanepana exana jiwi xua barapo jiwi jopa natsicuentiyo bapontha, abe peexanaeae. Baxua exana Cristo petsitupaexae jiwi. <sup>17</sup>Bara xaniwaicha caein abe pecanamata exanaeae, daxita jiwi bewa werapaena abe peexanaeae. Ichitha nama anoxuae pocotsiwa caein peexanaeae pon

Jesucristo, barapocotsiwa bichocono ayapusu beyacaincha xua Adán exana. Jesucristo petsitupaexae jiwi daxota Nacom bichocono jopa juniya yawenaeyo jiwi peantobexae. Barapo jiwi Nacom amanaya juntu coyene xanepana exana. Daxota Nacom weyatane xua barapomonae jopa xeinaeyo penatsicuenti coyenewa bapontha bequein barapomonae abe exana taetha. Barapomonae Jesucristo ayapusya nanabarũ yawa popona penanabaru yawa itorobinexa tsane ichamonaetha.

<sup>18</sup>Barapon Adán pia peabe coyenewaxae, daxita jiwi natsicuenta Nacomtha xuya abe peexanaeae icha Adán ichi. Po pexanepanae coyenexae xua Jesucristo exana, barapo coyene jiwi cana exanatsi xua capanenebiyatsi penatsicuenti coyenewa weya xua abe peexanaeae. Daxota daxita jiwi pomonae pejume cowuntsixae Jesucristo itacupatsi xua ataya asu jinompaena. <sup>19</sup>Baxua caunutan xua caein jopa pejume jejeixae xua peexanaewa pocotsiwa xua Nacom itoroba, daxota jiwi ayei jiwi abe eexanapona. Barichi xua caein pejejeixae xua peexanaewa pocotsiwa Nacom itoroba, daxota ayei jiwi najuntu coyene xanepana exanapona Nacomtha. Matauta barapomonae Nacom capanenebiya exana xua pia penatsicuenti coyenewa weya, xua abe peexanaeae.

<sup>20</sup>Nacom itoroba, xua Moisés tina pia peitorobi coyenewa xua jiwi peyaputaewa tsane xua bara jiwi daxita abe peexanaponae jiwi poxonae jopa yabara jume cuiya exanaeyo pocotsiwa Moisés itoroba. Poxonae jiwi equeicha mataropeicha yaputane Moisés pia peitorobi coyenewa, bapoxonae equeicha bichocono mataropeicha yaputane abe peexanae coyenewan. Daichitha Nacom bichocono mataropeicha aantobe

tsoponaē xua peyawenaenexatsi barapomonaē. <sup>21</sup>Copiya daxita jiwī werapa abe peexanaēxae. Ichitha anoxuae Nacom peantobexae jiwī daxota cana exana xua jopa xeinaeyo penatsicuentisi coyenewa xua abe peexanaēxae. Nacom jiwī catatsi peajuntuyapusu coyenewa po peajuntuyapusuwa ataya tsiteca Jesucristo pon Wanacanamataxeinaein wanaca tsitupaēxae.

**Meje yabara xua waxainchi asu jinompatsi caemonaē wanaexanaēxae Cristotha**

**6** Waxainchi jopa bewa abe eexanaponaēinchi xua Nacom wanaca yayawenaponaenexa xua daxota wayaputaenexa xua bara Nacom naca antobe. <sup>2</sup>Jopa bewa baxua exanaetsi. Waxainchi bayatha wetatsi xua abe waexanaewa. Equeicha jopa bewa abe exanaetsi, icha be pon petupaēin ichi, xua jopa itacupaetsi xua equeicha abe peexanaewa, tsipei bayatha tupa. <sup>3</sup>Paxam payaputaneme baxue: Poxonaē waxainchi ichamonaē naca bautisaba, bapoxonaē caemonaē nanaexainchi Cristo Jesustha. Waxainchi caemonaē wananaexanaēxae Cristotha poxonaē naca bautisaba, bapoxonaē be cae cui coyeneya nanaexanatsi xua wawerapaewa, icha bapon ichi poxonaē tupa. Baxua be icha waxainchi xua bayatha werapatsi xua daxota equeicha jopa naca itacupaeyo xua abe waexanaewa. <sup>4</sup>Wanaca bautisabi coyenewa baxua be poxonaē Cristo naca cayawa muthuthu xotsi. Yawano be Cristo naca cayawa tupa poxonaē bapon tupa. Icha Cristo ichichi xua equeicha asu exanatsi petupaē cuiuru coyene weya, Nacom bara naca ichi tsane. Nacom Cristo paxa asu cana exanatsi pia peitupanaē coicha ayapusu itorobi coyenewatha. Barichi Nacom bara naca ichi tsane wayawa

jinompaenexa pena juntu coyenewa. Bapoxonaē xeinatsi pena juntu coyenewa, xua po juntu coyenewatha jinompatsi icha Cristo ichi. Nacom, baxua Cristo paxa cana exanatsi Nacom pia peitupanaē coicha ayapusu itorobi coyenewatha.

<sup>5</sup>Tsipei waxainchi be caemonaē nanaexanaēinchi po petupaē coyenewatha poxonaē bapon tupa. Barichi tsane poxonaē equeicha asu naca exanaena petupaē cuiuru coyene weya icha matha Cristo ichichi poxonaē asu exainchi petupaē cuiuru coyene weya. Bapoxonaē caemonaē nanaexanaēinchi Cristotha. Daxota icha Cristo ichichi xua poxonaē asu exainchi equeicha petupaē cuiuru coyene weya, naca barichi tsane. Nacom equeicha asu naca exanaena petupaē cuiuru coyene weya caemonaē wananaexanaēxaetsi Cristotha poxonaē be naca yawa tupa Cristo. <sup>6</sup>Waxainchi yaputainchi, xua pocotsiwan exanatsi xua xuan waperu juntu coyenein po coyenein naca cana exana xua abe waexanaewa, barapo coyenein be weraweraca poxonaē Cristo tupa exanadutatsi naetotha. Baxua nacata exana xua jopa equeicha bichocono waichichipaewa tsane xua waexanaewa abe coyenewa poxonaē bequein wajuntu coyene naca itoroba xua abe waexanaewa tsane. <sup>7</sup>Daxota ba pon xua bayatha tupa jopa itacupaetsi xua equeicha abe peexanaewa. Waxainchi barichichi jopa naca itacupaeyo xua equeicha abe waexanaewa tsane. <sup>8</sup>Waxainchi Cristo naca cayawa tupa, daxota jume cowuntatsi xua bexa bapon Cristo baru jinompaēinchi. <sup>9</sup>Waxainchi yaputainchi, xua poxonaē Cristo equeicha asu exanatsi petupaē cuiuru coyene weya, bapoxonaē bapana equeicha jopa tupa exanaē tsainchi. <sup>10</sup>Poxonaē Cristo tupa bapon saya

bara cae coyenewatha tupa xua daxita jiwí nexa abe peexanaexae xua ataya tsiteca. Ichitha xua Cristo anoxuae asu popona, barapo pepoponae coyenewa xua beta peexanaenexa pocotsiwa Nacom peichichipaewa xua bara ataya tsane. <sup>11</sup> Barichi anoxuae paxam bewa pananta xeinaename be pomonae xua werapa xua equeicha jopa itacupaetsi xua abe peexanaewa. Bara paichinde paexande xua jopa paexanaeinde icha barapomonae ichi. Paexande pocotsiwa Nacom tsita xanepanatsi xua pocotsiwa Nacom ichichipa xua caemonae painya nenaexanaexae Cristo Jesustha.

<sup>12</sup> Daxota jopa pacopatsinde xua painya juntu coyenein paca itoroba xua abe painya neexanaewa. Painya pepon werapaena daxota jopa paexanaem tsane xua pocotsiwa painya pepon paca itoroba xua pocotsiwa ichichipa paexaname xua peabe coyenewan. <sup>13</sup> Painya xoba pacopatame xua bara painya juntu coyenein paca itorobina xua painya neexanaewa tsane peabe coyenewan. Jame maisa bara pacopare xua bara Nacom paca juntu coyene itorobeibina painya neexanaenexa pocotsiwa Nacom paca itoroba. Bara paichinde icha be ichi xua pomonae bayatha werapa xua equeicha asu exanatsi xua jopa equeicha abe exanaeyo. <sup>14</sup> Anoxuae barapo abe peexanae coyenewa po coyene xua copiya paexanaponame jopa itacupaetsi xua paca cana exana xua equeicha abe painya neexanaponaewa tsane. Barichi anoxuae equeicha jopa panantawenonaem xua paexanaename pocotsiwa Moisés paca itoroba pia peitorobi coyenewatha Nacom painya paca capanenebiyaenexa. Jame paexana dubenanaebiyama pocotsiwa xua Nacom ichichipa pia paca necayawenae coyenewatha, pia paca necaantobexae.

**Meje yabara xua waxainchi  
bewa exanaetsi pocotsiwa  
pexainyei coyenewa**

<sup>15</sup> Waxainchi jopa bewa abe eexanaponaeinchi! Anoxuae jopa Moisés naca itorobiyo pia peitorobi coyenewatha xua waexanaewa. Apra Nacom naca itoroba wanaca yawenaenexa xua wanaca antobexae. <sup>16</sup> Paxam payaputaneme icha pebin nacaenaeta xua ichichipa exana pocotsiwa xua ichun itoroba, bapoxonae bapon naexana be pon xua amanaya petanacuichin pon pia pentacaponaeinchi nexa. Daxota poxonae paxam paichichipame xua itapeta painya neexanaewa peabe coyenewan, bapoxonae barapo peabe coyenewa be paca canamataxeina. Bapoxonae be pana nacana exaname be pocotsin amanaya petanacuichin pia pentacaponaein nexa. Daxota pawerapaename, painya neexanaexae barapo abe peexanae coyenewa. Ichacuitha icha paichichipame xua itapeta painya neexanaewa pocotsiwa xua Nacom itoroba, bapoxonae xaniwaichiya painompame. Nacom tsitatsi xua painya juntu coyenein xanepana xua jopa painya nenatsicuentsiwa abe painya exanaexae bapontha. <sup>17</sup> Ichitha baxua yabara Nacom tsipaeban, janje: “Nacom maisa juntu coyene weiweinan, barapo Roma tomarapiwi pia peexanaexae. Tsipei copiya u saya xua abe coyenewan peexanaewi. Ichitha anoxuae barapomonae cajume cowunta. Barapomonae bichocono jume cowunta pia juntu coyenewatha pocotsiwa pexainyei jume xua barapomonae nacuiduba”, janje Nacomtha. <sup>18</sup> Daxota anoxuae Nacom paca capanenebiya exana barapo abe painya neexanae coyenewan weya. Yawano paxam amanaya painya

netanacuichi jiwī pam Nacom nexa xua beta painya neexanaewam. <sup>19</sup>Xan cueicueijan pocotsi jumeintha xua jiwī itacupatsi peyaputaenexa, tsipei yaputan xua pacata ayapube xua painya neyaputaewa. Caena bayatha paxam saya payabara copatame xua bara painya neexanaewa peabe coyenewan xua paichichipame. Jamaisa anoxuae payabara copare xua painya pepon peexanaponaenexa pocotsiwa xua pexanepanae coyenewan Nacom nexa. Bapoxonae Nacom patsita juntu coyene xanepanaya jinompame.

<sup>20</sup>Poxonae cataunxuae saya ɯ painya neexanaewi abe peexanae coyenewan, bapoxonae jopa ɯ painya neexanae jiwī pocotsiwa pexanepanae coyenewan.

<sup>21</sup>Poxonae bayatha peabe coyenewan paexaname baraxua apara jopa paca yawenaeyo. Apara saya paca aura exana anoxuae. Ichitha barapo abe peexanae coyenewan saya paca cana exana xua painya newerapaewa tsane.

<sup>22</sup>Ichitha anoxuae panenebiya painya nepaca exanaexae barapo abe painya neexanae coyenewan weya, daxota anoxuae paexaname pocotsiwa xua Nacom paca itoroba. Daxota pocotsiwa Nacom painya nepaca matomatsiwa, baxua apara poxonae Nacom paca juntu coyene xanepana cana exana bapontha. Matautano Nacom paca catsibina pocotsiwa peajuntucoyenesuwa po peajuntucoyenesuwa ataya tsiteca. <sup>23</sup>Barapo peabe coyenewaxae saya jiwī wera-paena cana exanaeinchi. Ichitha pocotsiwa xua Nacom amanaya wanaca catsiwa, baxua apara po coyene xua peajuntuypusū coyene po peajuntuypusū coyene ataya tsiteca. Barapo peajuntuypusū coyenewa naca cana exana xua caemonae naexainchi Cristo Jesthā, pon Wanacanamataxeinaein.

**Meje yabara xua po peitorobi  
coyenewa poxonae  
jitha peecaewa yabūyo**

**7** Tamonae pam, pomonae pam pomonae irū painya nejume cowuntsi jiwixae Jesucristotha. Paxam barapomonae pam xua payaputaneme Moisés pia peitorobi coyenewa tatsi. Yawano payaputaneme xua jiwī saya bewa exanaena pocotsiwa Moisés itoroba barapo peitorobi coyenewatha poxonae cataunxuae jinompa barapo cae pin nacuathe. Ichitha poxonae jiwī werapa barapomonae jopa equeicha bewa exanae pocotsiwa barapo peitorobi coyenewa itoroba. <sup>2</sup>Paca tsipaebatsi peyabara jūta paebiwa: Petsiriwa powa xaina piseuri bewa piseuritha cuicuinae pepaebixae barapo peitorobi coyenewa, xua poxonae pia pebin tatsi awiya asū popona. Ichitha icha barapowa pia pebin tatsi tatupatsi barapowa jopa nantawenonaeyo xua peexanaewa pocotsiwa Moisés itoroba barapo peitorobi coyenewatha xua po coyene pebin yabara paebatsi. <sup>3</sup>Daxota icha barapowa isa maiteca icha pebin xua nasi cui exana icha pebintha poxonae cataunxuae barū popona pia pebin, bapowa bapoxonae Nacom tsita natsicuentatsi xua abe peexanaexae. Ichitha icha bapowa pia pebin tatsi tatupatsi barapowa itacupatsi xua pepichiwa icha pebin. Barapowa jopa Nacom tsita natsicuentasichi xua abe peexanaexae. Poxonae baxua exana, tsipei barapo peitorobi coyenewa jopa yabara paebiyo baxua.

<sup>4</sup>Tamonae pam, paxam pomonae irū painya nejume cowuntsiwixae Jesucristo. Barichi bara jūta ichi poxonae Cristo tūpa, paxam irū be pawerapame. Daxota jopa panantawenonaem xua paexananame pocotsiwa Moisés itoroba pia peitorobi



coyewatha. Anoxuae paxename ichun pon paca itoroba. Baraxua barichi icha yabuyo ichi xua pita icha pebin pon bapowa itorobatsi poxonaе piseuri tatsi tatupatsi. Anoxuae paxam Cristo piamonaе tatsi pam, pon equeicha asu exanatsi petupae cuiru coyene weya. Barapo coyewatha Nacom naca cana exana xua wanaca itacupaewa xua waexanaewa tsane pocotsiwa xanepana Nacom nexa. <sup>5</sup>Poxonaе waxainchi copiya jume cowuntatsi, Moisés yabara naca itoroba pia peitorobi coyewatha po coyenewa jopa bewa exanaetsi. Ichitha wajuntu coyewatha ichichipatsi nawita xua waexanaewa barapo abe peexanae coyewanan poxonaе jume tainchi xua jopa bewa exanaetsi barapo coyene. Barapo coyene naca cana exana xua saya wawerapaewa tsane. <sup>6</sup>Ichitha anoxuae jopa wanantawenonaewa xua waexanaewa pocotsiwa Moisés itoroba pia peitorobi coyewatha. Waxainchi bayatha be werapatsi xua daxota barapo Moisés pia peitorobi coyene tatsi jopa itacupaetsi xua wanaca itorobiwa. Daxota anoxuae naca itacupa xua watanacuichiwa Nacom. Waxainchi xeinatsi pena juntuвu coyene po pena juntu coyene Nacom pia Pejumope tunaxu tatsi naca cata. Nama jopa equeicha exanaetsi pocotsiwa Moisés itoroba barapo pia peru itorobi coyewatha xua bayatha tina.

**Meje yabara xua Pablo jeye:**  
**“Meje xua po peabe exanae**  
**coyene xeinan”, jei.**

<sup>7</sup>Waxainchi jopa bewa paebichi xua Moisés pia peitorobi coyenewa tatsi abe. Tsipei barapo Moisés pia peitorobi coyenewa tatsi necuiduba xua bara abe exanan. Copiya jopa yaputaeinyo xua peabe coyenewa poxonaе yabara uwiya ichichipan pocotsiwan ichamonaе

xeina. Ichitha barapo peitorobi coyenewa naca tsipaeba, naca jeye: “Jopa yabara uwiya paichichipaeinde pocotsiwa xua ichamonaе xeina”, jei barapo peitorobi coyenewa. <sup>8</sup>Poxonaе copiya jume cowuntan, Moisés yabara neitoroba pia peitorobi coyewatha po coyewanan xua jopa bewa uwiya ichichipaein tsane ichamonaе piawan. Ichitha jame ichichipan nawita tajuntu coyewatha xua taxainaewa tsane xua ichamonaе piawan poxonaе jume tan xua jopa bewa ichichipaein tsane xua taxainaewa tsane ichamonaе piawan. Poxonaе awiya jopa yaputaeinyo Moisés pia peitorobi coyenewa jopa ichipaeinyo xua taxainaewa pocotsiwa ichamonaе piawan. <sup>9</sup>Caena bayatha poxonaе jopa yaputaeinyo Moisés pia peitorobi coyenewa xan saya junteма poponan, tsipei jopa yabara yaputaeinyo xua abe taexanaewa. Ichitha pirapae bequein yabara yaputan barapo peitorobi coyenewa, xua ichamonaе piawan peuwiwa yabara, awiya bichocono abe exanaponan. Bapoxonaе bara be tatupae coyewaba tsipei jopa junteма tapoponaewa abe taexanaexae. <sup>10</sup>Barapo Moisés pia peitorobi coyenewa tatsi Nacom cata xua jiwi pejuntu coyene weiweinaenexa xua poxonaе pejuntu coyene xanepanaewa tsane. Poxonaе jiwi jume cowuntsiya exana daxita xua barapo coyewatha itoroba, barapo jiwi bexa tsane xeinaena peajuntuyapusuwa xua bara ataya tsane xeinaena. Daichitha barapo coyenewa wecoyei necana exana tsipei bewa tatupae coyenewa tsane poxoru jopa neitacupaeyo xua exanan daxita xua barapo coyenewa itoroba. <sup>11</sup>Barapo Moisés peitorobi coyenewa be netsita penaerabi coyenewa. Mexeya itara xeinacuaein jantocuae peajuntuyapusuwa poxonaе exanaein pocotsiwa Moisés itoroba

pia peitorobi coyenewatha. Daichitha poxonaē abe exanan Moisés pia peitorobi coyenewa netsita ituta xua bewa tupaēin tanatsicuentiswaxae abe taexanaexae Nacomtha.

<sup>12</sup>Daxita po peitorobi coyenewan Nacom cata Moiséstha daxita bara wunaē, yawa bara pexainyei coyenewan.

<sup>13</sup>Barapo Moisés pia peitorobi coyenewa jopa necana exanaeyo xua bewa tupaēin tanatsicuentiswaxae abe taexanaexae Nacomtha. Apra jame barapo abe taexanae coyene necana exana xua be tupaēin tanatsicuentiswaxae abe taexanaexae Nacomtha. Bequein barapo Moisés pia peitorobi coyene tatsi wunaē, daichitha barapo peitorobi coyene neyaputane exana xua abe taexanaein. Barapo peitorobi coyenewatha xua Nacom naca yaputane exana xua poxonaē abe exanatsi barapo abe peexanae coyenewa bara xainyei, bara abe bichocono. Jopa bichocono juniya abeyo.

<sup>14</sup>Yaputainchi xua Moisés pia peitorobi coyenewa tatsi apra xanepana, Nacom weya pejume pichipaexae. Ichitha poxoru saya jiton juntu coyeneya taxinaeinxae tajuntu coyene necana exana xua abe taexanaewa. <sup>15</sup>Tsipei jopa xapain yaputaeyo pocotsiwa xua exanan, poxoru jopa exanaeyo pocotsiwa xua xanepana xua pocotsiwa ichichipan xua taexanaewa nexa. Ichitha pocotsiwa aichaxaibin xua jopa pexanepanaexae, daichitha apra baxua exaneiban.

<sup>16</sup>Ichitha icha abe exanan xua bequein aichaxaibin abe taexanaewa, bapoxonaē yaputan xua Moisés pia peitorobi coyenewa tatsi xanepana. Tsipei barapo peitorobi coyenewa necuiduba xua jopa bewa exanae abe peexanae coyenewan.

<sup>17</sup>Tacoutha jopa ichipaeyo xua abe taexanaewa bequein baxua exanan. Ichitha barapo abe peexanae coyenewa xua tajuntu coyenewatha xeinan,

barapo coyene necana exana xua apra abe taexanaewa. <sup>18</sup>Tsipei xan yaputan xua xeinan jiton pia coyene. Daxota jopa xinaeyo pexanepanae coyenewa. Bequein ichichipan xua xanepanaya taexanaewa, ichitha jopa neitacupaeyo xua baxua exanan tacoutha. <sup>19</sup>Jopa exanaeyo po pexanepanae coyenewa bequein ichichipaethan xua taexanaewa. Ichitha u exanaponan po abe peexanae coyenewan bequein aichaxaibithan xua taexanaewa. <sup>20</sup>Daxota icha abe exanan pocotsiwa bequein aichaxaibithan xua abe taexanaewa, bapoxonaē jopa neitacupaeyo xua tacoutha nayawenan xua jopa abe taexanaewa. Barapo abe peexanae coyenewa xua tajuntu coyenewatha xeinan, barapo coyene necana exana xua equeicha mataropeicha abe taexanaewa.

<sup>21</sup>Daxota nayaputan pocotsiwa exaneiban tajuntu coyenewatha, xua poxonaē bequein ichichipan beta taexanaewa tsane bapoxonaē abe exaneiban. <sup>22</sup>Bichocono ichichipeiban tajuntu coyenetha Nacom Pejume Diwesi tatsi. <sup>23</sup>Ichitha yaputan xua po peabe coyenewa tajuntu coyenewatha xeinan neitoroba xua abe taexanaewa tsaiibi, bequein nanta xeinan xua beta taexanaewa, icha Nacom ichichipa. Ichitha barapo peabe coyenewa neitoroba xua equeicha mataropeichiya abe taexanaewa, po peabe coyenewa xua tajuntu coyenewatha xeinan. Xan be pon tanebusi cui taetaein ichamonae tsipei barapo abe taexanaewa neitorobeiba xua abe taexanaewa.

<sup>24</sup>¡Ooo, jopa taxanepanae tsocuaeyo! ¡Jopa tajuntu coyene wunaē tsocuaeyo! ¿Jintam metha necapanepaena barapo tapepon weya po pepon xua bewa tupaena?

<sup>25</sup>Daxota Nacomtha janje: “Nacom juntu coyene weiweinan xua Jesucristo,

pon Tanecanamataxeinaein, itacupatsi xua tanecapanepaewa tsane barapo tapepon weya”, jan Nacomtha. Daxota yaputan xua nanta xeinan xua bara beta taexanaewa pocotsiwa Nacom neitoroba, ichitha tajuntu coyenewatha exanan pocotsiwa xua abe taexanaewa.

**Meje yabara xua peajuntuyapusuya pejinompaewa po peajuntuyapusuwa Nacom pia Pejumope tunaxu tatsi naca cata**

**8** Dapon ajibi pon itacupatsi peyabara paebiwa xua pomonae caemonae penaexanaewi Cristo Jesustha natsicuenta abe peexanaexae Nacomtha. <sup>2</sup>Nacom pia Pejumope tunaxu tatsi naca cata peajuntuyapusuwa xua wajinompae coyenewanexa xua caemonae xua wanaexanaexaetsi Cristo Jesustha. Barapo Nacom pia Pejumope tunaxu tatsi neyawena pia peayapusu itorobi coyenewatha. Necapanepa exana po peitorobi coyene weya xua neitoroba xua abe taexanaewa. Matautano necapanepa exana xua po peitorobi coyene weya tupa necana exana. <sup>3</sup>Moisés pia peitorobi coyenewa tatsi jopa itacupaetsi xua jiwi capanenebiya exainchi abe pia peexanae cuiru coyenein weya. Jiwi jopa itacupaetsi xua daxita yabara jume cuiya exana barapo Moisés pia peitorobi coyenewa tatsi. Ichitha Nacom Pexanto itorobica pon yatsicaya pepa Pexanto tatsi. Barapo Pexanto tatsi naexana be bara jiton pia pepon tatsi, bara naca peru coyene jupa, po pepontsi xua abe waexanae jiwichi. Poxonae Cristo tsitupa waabe exanae cuiru coyenewan, bapon amanayaba barapo waabe exanae cuiru coyenewantha. Barapo peabe coyenewan jopa peitacupaenexa tsainchi xua wanaca cana exanaewa tsane xua equeicha abe waexanaewa tsane. <sup>4</sup>Nacom

baxua exana xua waxainchi wanaca itacupaenexa xua waexanaewanexa tsane pocotsiwa Moisés itoroba pia peitorobi coyenewatha. Waxainchi naca itacupa xua waexanaewa pocotsiwa Moisés pia peitorobi coyenewatha itoroba, poxoru jopa aparta exanaetsi xua wapepon peichichipaexae. Aparta jame exainchi xua pocotsiwa Nacom pia Pejumope tunaxu tatsi wanaca itorobixae.

<sup>5</sup>Pomonae exana dubenanaebiya pocotsiwa pia pepon ichichipa exana, saya barapomonae yabara nanta xeina xua abe peexanae coyenewa. Pomonae exana dubenanaebiya icha pocotsiwa Nacom pia Pejumope tunaxu tatsi ichichipa, barapomonae saya yabara nanta xeina xua xanepanaya peexanae coyenewa pocotsiwa Nacom nexa. <sup>6</sup>Jiwi ba yabara nanta xeina abe peexanae cuiru coyenewan pocotsiwa pia pepon tatsi ichichipa. Bapoxonae barapo jiwi werapaena peexanaexae barapo abe peexanae coyene. Iru icha jiwi ba yabara nanta xeina xanepanaya peexanae coyenewan xua pocotsiwan Nacom pia Pejumope tunaxu tatsi ichichipa, barapomonae xeinaena peajuntuyapusuwa po peajuntuyapusuwa xua bara ataya tsane. Matautano xeinaena juntema pejinompae coyenewa. <sup>7</sup>Pomonae saya peyabara nanta xeinaewi xua abe peexanae coyenewa xua pocotsiwa pia pepon tatsi ichichipa exana, barapomonae aparta Nacom pia peaitafaetabi jiwichi. Barapomonae jopa ichipaeyo xua peexanaewa pocotsiwa Nacom itoroba pia peitorobi coyenewatha xuano xua jopa itacupaetsi xua peexanaewa barapo coyene. <sup>8</sup>Pomonae naitomatsiya exana pocotsiwa xua pia pepon tatsi itoroba xua abe peexanae coyenewa

peexanaewa, barapomonae Nacom jopa tsita xanepanaetsi.

<sup>9</sup>Ichitha nama paxam jopa paexanaem baxua po abe peexanae cuiru coyenewan painya pepon paca cana exana xua abe painya neexanaewa. Ichitha nama paxam pajinompame icha be pocotsi coyeneya Nacom pia Pejumoepo tñaxu tatsi ichichipa, icha barapo jumope yat-sicaewa paca baru jinompa. Pon jopa Nacom pia Pejumoepo tñaxu tatsi baru poponaetsi, bapon jopa Cristo pijimonaetsi. <sup>10</sup>Ichitha icha Cristo paca baru popona, Nacom pia Pejumoepo tñaxu tatsi paca cana exana xua jopa painya natsicuentiswam xua abe painya neexanaexae Nacomtha. Baxua paca cana exana bara bequein painya pepon werapa exanatsi abe peexanae coyenewan. Baxua paca cana exana painya nejuntu coyene xanepanaexae Nacomtha. <sup>11</sup>Nacom pia Pejumoepo tñaxu tatsi Jesús asu exanatsi petupae cuiru coyene weya. Icha Nacom pia Pejumoepo tñaxu tatsi paca baru popona, bapoxonae Nacom asu exanaena painya pepon, po pepon xua werapaena. Baxua Nacom pacata exanaena, icha Nacom pia Pejumoepo tñaxu tatsi ichi poxonae Cristo asu exanatsi petupae cuiru coyene weya. Baxua Nacom exanaena painya nepaca baru jinompaexae Nacom pia Pejumoepo tñaxu tatsi.

<sup>12</sup>Tamonae pam, paxam pomonae iru painya nejume cowuntsiwixae Jesucristo. Waxainchi jopa bewa exanaetsi pocotsiwan xua wapepon naca cana exana xua abe waexanaewa tsane. <sup>13</sup>Tsipei icha paxam paexana dubenanaebiyame xua pocotsiwa painya pepon ichichipa xua abe painya neexanaewa tsane, bapoxonae pawerapaename. Ichitha jame paexana dubenanaebiyama pocotsiwa Nacom pia Pejumoepo tñaxu tatsi paca cui itoroba xua painya neexanaewa

tsane. Bapoxonae jopa paexanaem pocotsiwan xua painya pepon paca cana exana xua abe painya neexanaewa tsane. Bapoxonae bexa tsane ajuntusuya pajinompaename Nacom pia nacuatheicha.

<sup>14</sup>Daxita pomonae Nacom pia Pejumoepo tñaxu tatsi itorobiya ewata, barapomonae bara Nacom pia pexui tatsi.

<sup>15</sup>Nacom paca nacana jumope cata. Barapo pejumoepo jopa paca cana exanaeyo pomonae be painya nepaca busi cui tatayebeibi jiwi pam xua ichamonae amanaya painya netanacuichi jiwi pam, xua daxota equeicha pajunuwame. Jame barapo Nacom pia Pejumoepo tñaxu tatsi paca cana exana xua Nacom pia pexui tatsi pam. Barapo Nacom pia Pejumoepo tñaxu tatsi naca exana xua barompaya wajeiwa: “Axa”, wajeiwa Nacomtha. <sup>16</sup>Nacom pia Pejumoepo tñaxu tatsi iru wajuntu coyenewa natsipaebabe xua pinae bara Nacom pia pexui tatsi wanaexanaewichiba. <sup>17</sup>Waxainchi Nacom pia pexui tatsi wanaexanaexae, daxota xeinatsi pocotsiwa Nacom wanaca juntana jebiwa xua bexa tsane naca catsibina. Barapocotsiwa bayatha yabara naca tsiwunae muxu duba. Poxonae Nacom baxua naca catsibina, Cristo matha catsinchi xua waxainchi wajiwana xeinaenexa. Icha waxainchi ichamonae naca atene exana, icha poxonae Cristo ichichi xua matha atene exanatsi ichamonae, bapoxonae waxainchi Cristo baru xeinaeinchi pocotsiwa Nacom wanaca juntana jebiwa. Nacom naca catsibebina po pexeinya peitupanae coicha xua bayatha Cristo catatsi.

**Meje yabara xua Nacom  
piamonaetha catsicaena pia  
pexeinya peitupanae coicha**

<sup>18</sup>Xan yaputan xua bequein ichamonae naca atene exana barapo cae pin nacuathe, baxua jopa ainya cuiyo.

Matautano yaputan xua Nacom cata pia pexeinya peitupanae coicha Jesustha. Barichi naca catsibina barapo pexeinya peitupanae coicha po pexeinya peitupanae coicha xua jopa juniya wunaeyo. <sup>19</sup>Daxita po jiwi Nacom forota barapo cae pin nacuathe, barapo jiwi wunaey weyataeya ewata po mataqueitha poxonae Nacom tsita itutsina piamonae. Nacom tsita itutsina piamonae xua daxita jiwi peyaputaenexa tsane xua xaniwaicha barapomonae apara Nacom pia pexui. <sup>20</sup>Daxita baxuan xua xuan Nacom exana po cae pin nacuathe barapo coyenein abe naexanaena. Jopa apara barapo coyenein pia couthiyo xua peweraweracaewa tsane peabexae, saya apara poxoru Nacom baxua pecopatsixae poxoru Nacom namchi xua daxita bewa weraweracaena Adán abe peexanaexae. Ichitha Nacom yabara cana juntu coyene weta exana xua pejopaewa tsane matakabi po mataqueitha xua barapo cae pin nacue pena nacua naexanaena.

<sup>21</sup>Barapo cae pin nacuathe xua pena nacua, jiwi jopa bapana equeicha werapae tsane. Matautano daxita coyenein xua Nacom forota jopa bapana equeicha weraweracae tsane. Barapo mataqueitha daxita xua xuan Nacom forota Nacom wunaey cana exanaena, icha pijimonaetha cana ichi tsane xua pijimonaetha tatsi bichocono wunaeya xanepana naexanaena. <sup>22</sup>Waxainchi yaputainchi daxita baxuan xua pejinompaewan xua Nacom peforotsiwan caena bayatha atene xua beya anoxuae. Atene icha yabuyo ichi xua bichocono atene poxonae imoxoyo pexuyo tanaexanatsi. <sup>23</sup>Daxita baxuan meisa jopa ateneyo. Bara iru waxainchi daxitatsi atenetsi bequein Nacom pia Pejumope tunaxu tatsi naca yawa jinompa. Barapo pejumope, apara pocotsiwa xua copiya matha

Nacom naca cata xua pocotsiwa jiwana Nacom bexa naca catsibina. Bichocono ajuntucoyenerewetsi xua junthuthu wecoyeichi, poxonae waxainchi ewatatsi po mataqueitha poxonae Nacom yatsicaewa naca cana exanaena pia pexuichi, xua barichino naca catsibinano pena pepon. <sup>24</sup>Poxonae Nacom naca capanenebiya, Nacom naca tsipaeba pinae naca catsibina pena pepon. Barapo pepon cataunxuae abu wunaey ewatatsi. Icha waxainchi xeinaeinchi pocotsiwa xua wunaey ewatatsi bapoxonae jopa nantawenonaetsi xua came wunaey ewatatsi, tsipei bayatha xeinaeinchiba. Poxoru jiton ba jopa came wunaey ewatsiyo pocotsiwa xua bayatha xeinaba. <sup>25</sup>Ichitha icha wunaey ewatatsi pocotsiwa xua came jopa xeinaetsi bapoxonae bewa wunaey ewatichi xua jopa bepijawa aitaconaetsi.

<sup>26</sup>Barichi Nacom pia Pejumope tunaxu tatsi naca yawena tsipei waxainchi wajuntu coyene faefaenaewi. Waxainchi jopa yaputaetsi xua betiya cuitiya wucatsi Nacom. Ichitha poxonae juntu coyene bojeichi, poxoru jopa wanaca itacupaewa xua po jumetha wacaunutsiwa, bapoxonae Nacom pia Pejumope tunaxu tatsi nacata wuca Nacomtha. <sup>27</sup>Nacom, bapon yaputane pocotsiwa xua jiwi pia juntu coyenewatha nanta xeina. Matautano barapon yaputane pocotsiwa Nacom pia Pejumope tunaxu tatsi ichichipa paeba jiwi nexa. Nacom pia Pejumope tunaxu tatsi Nacom wucatsi icha be pocotsi coyeneya Nacom ichichipa pomonae xua Nacom piamonae tatsi nexa.

**Meje yabara xua waxainchi  
amanayabatsi po coyenein xua  
bequein naca atene exana**

<sup>28</sup>Waxainchi yaputainchi xua daxita po coyenein xua nacata exana bequein

wuna, ichacuitha bequein abe, dai-chitha Nacom equeicha daxita baxuan nacata xanepana exana. Baxua Nacom taexana pomonaetha pomonae pia peantobexaetsi. Barapomonae Nacom waba petaxanaewa tsainchi pocotsiwa bapon ichichipa. <sup>29</sup>Caena bayatha poxonae aena nacua forota, Nacom tsiwana yaputane barapomonae pomonae pejume cowantsiwichi tsainchi. Matautano Nacom itapeta xua pecana exanaenexa icha be pexanto tatsi ichi. Baxua Nacom exana xua Pexanto tatsi bapon Jesús, be matapin naexana xua daxita jiwi pentapin tatsi. <sup>30</sup>Pomonae xua Nacom itapeta xua caena bayatha xua copiya poxonae aena nacua forota, bara yawano Nacom waba xua peexanaenexa pia pexui tatsi. Pomonae Nacom pewabixae bara yawano exana xua barapomonae jopa penatsicuentsiwa xua abe peexanaexae pecatsixae pejuntu coyene xanepanaewa bapontha. Pomonae xua Nacom pejuntu coyene xanepana exanaexae, bara yawano yabara tsiwuna muxu duta xua barapomonae naexanaena icha be Nacom Pexanto tatsi ichi.

<sup>31</sup>Anoxuae waxainchi yaputainchi xua Nacom naca yawena daxota dapon ajibi pon naca juntu coyene amanayaba xua abe wanaca exanaenexa. <sup>32</sup>Poxoru Nacom Pexanto jopa asiwiyo daxota Nacom copata xua wanaca tsitupaenexa. Daxita waxainchi yaputaeinchi xua daxota daxitan coyenein Nacom amanaya naca catsiba po coyenein canamatawenonatsi. <sup>33</sup>Dapon ajibi xua itacupatsi yabara paeba xua pinae Nacom tsita natsicuentatsi pomonae pia peitapetsiwixae tatsi xua abe petsita exanaexaetsi. Nacom yabara paeba xua pinae apara jopa barapomonae tatsi natsicuentisichi xua abe petsita exanaexaetsi bequein abe exana taetha.

<sup>34</sup>Matautano dapon ajibi xua itacupatsi yabara paeba xua barapomonae bewa

werapaena penatsicuentisixae xua abe peexanaexae Nacomtha. Barapomonae jopa bewa werapae tsane, tsipei Cristo Jesús tsitupa barapomonae, abe peexanaexae Nacomtha. Bapon Cristo Jesús equeicha asu exanatsi. Anoxuae eca Nacom pia coxa weya tatsi. Bapon Cristo Jesús Paxatha wuca xua nacata wuca. <sup>35</sup>Cristo naca antobe, daxota dapon ajibi pon itacupatsi xua tsanayiya naca cana exana Cristo weya. Ichacuitha ichamonae atene wanaca exanaewichitha awiya Cristo naca antobe. Ichacuitha ichamonae daunwei wanacata exanaewichitha awiya naca antobe. Ichacuitha ichamonae abe wanacata exanaewichiwathatsi wayabara cueicueijeixae Jesús awiya bapon naca antobe. Ichacuitha wajainpaewichiwathatsi awiya naca antobe. Ichacuitha wanacata acoibichiwathatsi paparuwa awiya naca antobe. Ichacuitha wanapeipeichiwathatsi poxonae ichamonae abe nacata exana awiya naca antobe. Ichacuitha ichamonae wanaca jutebichiwathatsi awiya naca antobe. Daxita barapo coyenein jopa canaupatsi xua tsanayiya wanaca exanaewa Cristo weya. <sup>36</sup>Icha naca ichi daxita barapo coyenein, barichiru Nacom Pejume Diwesitha bayatha baxua yabara naca tsiwuna muxu duta, jeye:

“Nacom poxoru tapaca cajume cowantsi jiwixaetsi daxita matabin tsaibi ichamonae ichichipa pana jutebeiba. Barapomonae pana necana exaneiba icha jiwi ichi xua poxonae daxita matabin ovejan capaneiba pon oveja pejutebeibin beya”, jei Nacom Pejume Diwesitha, xua yabara naca tsiwuna muxu duta.

<sup>37</sup>Ichitha bequein waxainchi daxita barapo coyenein naca atene exana,

daichitha amanayabatsi barapo coyenein Cristo pia peayapusu itorobi coyenewatha pon wanaca antobein. <sup>38-39</sup>Daxota bara yatsicaewa yaputan, xua dapocotsi coyene ajibi po coyenetha xua tsanayiya naca exana Nacom pia peantobe coyene weya tatsi. Jopa tsanayiya naca exanaeyo bara bequein poxona tupaethatsi, yawa bara bequein poxona jinompaethatsi. Iru matatsunpiwi jopa canaupaetsi xua tsanayiya wanaca cana exanaewa, bequein iru caurimonaeru, bequein iru pocotsiwan xua anoxuae exanaponaru, bequein iru xua pocotsiwan bexa tsaneru, bequein iru xua pocotsiwan wetsica patopaenano, bequein iru xua pocotsiwan ira wetsinano, bequein iru ichawano xua pocotsiwa Nacom forota. Bara bequein daxita barapo coyenein, ichitha jopa canaupaetsi xua tsanayiya pewanaca exanaewa Nacom pia wanaca antobe coyene weya tatsi. Nacom naca cata barapo peantobewa xua Cristo Jesús xeina, pon Wanacanamataxeinaein.

### Meje yabara xua Nacom itapeta judiomonae

**9** Pocotsiwan paca tsipaebatsi barapocotsiwan pexainyei jumein. Tajume cowuntsixae Cristo, bara jopa naerabinyo. Tajuntu coyenetha Nacom pia Pejumope tunaxu tatsi neitoroba. Barapon jume daunweya netsipaeba xua pinae bara yatsicaewa xainyeya cueicueijan. <sup>2</sup>Xainyan, wecoyan. Bichocono tamonaе siwa anthuthutanein tsaibi jopa pejume cowuntsixae Cristo. <sup>3</sup>Bichocono antobein barapomonae pomonaе tanacuapiwi. Daxota nayabara paeban, janje: Bena bequein siwa tupaеuaein tamonaе xua bequein tsana tanaexanaewa Cristo weya, xua be poxonaе Nacom tsita

tanatsicuentsiwa xua barapomonae аbe pia peexanae coyenewan nexa. Bapoxonaе xua Nacom tamonaе pia pecapanenebiyaenexatsi, daxota Nacom copata xua ichamonae nebexubina, najanje. <sup>4</sup>Pon Israel, pon caena bayatha tupa, bapon nawun cata tamonaetha. Daxota tamonaе “israelmonae”, baraichi. Bapon pia pemomoxi susato jijiwi tatsi pomonaе tamonaexae Nacom barapomonae pia pexui exana. Barapomonae bayatha Nacom yanta popona xua daxota barapomonae tane Nacom pia pexeinya peitupanae coicha poxonaе xua beta exana barapomonae nexa, Nacom tsipaeba barapomonae pocotsiwa xua bapon peichichipaewa. Matautano Nacom yabara tsiwunaе muxu duta pomonaetha pomonaе xua ataya yaweneibina barapomonae peexanaenexa xua bapon ichichipa. Barapomonaetha Nacom cata Moisés pia peitorobi coyenewa tatsi. Matautano Nacom cata barapomonae po coyene xua barapomonae xaniwaicha wunaе pejainchinexa bapontha. Matautano Nacom yabara tsiwunaе muxu duta barapomonae xua Cristo pepatopeicaewa tsane. <sup>5</sup>Barapomonae wamo susato jijiwi pia pemomoxi susato jijiwi tatsi. Cristo be jiton coyeneya naexana barapomonae jiwana pomonaе pia pemomoxi susatopiwi jiwana tatsi. Bapon Cristo apara bara Nacom. Barabu Nacom bara ataya wunaе jainteibinchi pon xua daxita coyeneintha canamataxeina.

<sup>6</sup>Ichitha barapomonae bequein Nacom cata daxita barapo coyenein, daichitha anoxuae barapomonae jopa Nacom xanepanaya beta tsita jinompaetsi jopa Cristo peyabara jume cowuntsixaetsi. Bequein ichamonae nanta xeinaetsipa xua pinae Nacom Pejume Diwesi jopa ainya cuiyo xua barapomonae jopa peexanaexae pocotsiwa Nacom itoroba,

ichitha baraxua jopa xainyeyo pocot-siwa barapomonae nanta xeina. Baraxua jame tsita itapeinya xeina xua apara jopa daxitiyo pomonae Israel pia pemomoxi susato jiwi tatsi xua Nacom pia-monae tatsi. <sup>7</sup>Matautano Abraham pia pemomoxi susato jiwi tatsi apara jopa daxitiyo barapomonae xua Nacom pia-monae tatsi. Nacom caena bayatha tsi-paeba Abrahamtha, jeye: “Xam xeinae-name pomonae pepa jinya nemomoxi susato jiwi xua Isaac pon nexanto xua pia pexui jiwana tatsi”, jei Nacom.

<sup>8</sup>Baxua naca yaputane exana xua Nacom jopa exanaeyo daxita xua Abraham pia pemomoxi susato jiwi tatsi be Nacom pia pexui tatsi. Nacom meisa be pia pexui cana exana pomonaetha pomonae pejume cowuntsixae xua Nacom pia peyabara tsiwunae muxu dut-siwa. Barapomonae jume cowunta Nacom pia peyabara tsiwunae muxu dut-siwa xua Cristo capanenebiyaena barapomonae. <sup>9</sup>Tsipei Nacom tsipaeba Abrahamtha poxonae yabara tsiwunae muxu duta. Nacom jeye: “Barapo xometotha xua icha weitha taitorobi coyenewatha bapoxonae Sara pexanto pabetsina pebin wuto xua nexanto tsane”, jei Nacom.

<sup>10</sup>Jopa meisa baxuiyo, ichawano Nacom exana. Sara pexanto tatsi naexana pewun Isaac. Poxonae Isaac pinyo, bapon nacueyoba piowa, pewun Rebeca. Rebeca tanama ecatsibe pebin wutobe. Barapo pexuyobe cae axa nantautabe bapon Isaac, pon wamo susatopin. <sup>11-13</sup>Caena bayatha pewunaeya poxonae barapoyobe jopa naexanaebe, xuanano pewunaeya xua poxonae barapoyobe jopa abe exanaeyobe matautano pewunaeya xua poxonae jopa wunae exanaebe, bapoxonae Nacom tsi-paeba Rebeca tsipaebatsi. Nacom jeye: “Pon xua copiya naexanaena bapon peyapin canamataxeinaeinchi”, jei Nacom. Barapo jume bara nayaraba jume

jupabe xua icha diwesitha Nacom Pejume Diwesitha xua Rebeca pexantobe tatsi yabara paebatsi xua ichaxota, jeye: “Cuita itapetan Jacob xuyapin, ichitha nama Esaú naitematatan matapin”, jei Nacom Pejume Diwesitha. Baxua naca yaputane exana xua Nacom pia coya itapeta pomonaetha pomonae xua peichichipaewa, xua pewabiwa barapomonae. Nacom jopa yabara itapetsiyo barapomonae peexanaexae pocot-siwa Nacom peichichipaewa.

<sup>14</sup>Ichamonae paeba, xua pinae Nacom jopa xapain exanaeyo poxonae caein jiwana itapeta, xua poxonae ichun naitematatsi. Apara jopa xapain wunaeyo xua barapomonae Nacom yabara paebatsi. <sup>15</sup>Tsipei Nacom paeba Moisestha, jeye: “Pomonae wunaeya yabara nanta xeinaein xua tayawenaenexa, barapomonae beta yawenaein”, jei Nacom. <sup>16</sup>Baxua naca cuiduba xua jopa jiton itapetichi poxoru wunae peexanaexae. Matautano jopa itapetichi xua poxoru peichichipaexae xua peitapetsiwatsi. Saya jame pebiwi itapetatsi poxonae Nacom wunaeya yabara nanta xeina xua peyawenaenexa tsane barapomonae. <sup>17</sup>Nacom cueicueije pejume diwesitha nacua peewatsintha pon Egipto nacuapiwi itorobiya pia pepa peewatsinchi. Nacom jeye bapontha: “Apara xan ponxaein tacoya cacana exanatsi pon Egipto nacuapiwi itorobiya pia pepa peewatsinchi. Painya xantha tapexeinya tsita itutsi coyenewa exanaein xua tsita itapeinya xeinaein xua xan xeinan bichocono peayapusu itorobi coyenewa. Matautano exanaein xua daxitan nacuan jiwi taneyabara jume taenexa”, jei Nacom. <sup>18</sup>Daxota yaputainchi xua Nacom itacupatsi xua wunaeya yabara nanta xeina xua peyawenaenexa pontha pon ichichipa xua peyawenaewa. Matautano Nacom saya yabara



copata xua ichun pejuntu coyenetha pexeinaewa po coyene pejumefebi coyenewa. Baxuan Nacom cana exana pomonaetha pomonae Nacom ichichipa xua xeinaena barapo coyenein.

<sup>19</sup> Metha paxam pana nebaram xua barapomonaе yabara xua pajam: “Poxonae Nacom atene exana pomonaetha pomonae petsita natsicuentisixaeysi xua abe peexanaexae ¿baxua Nacom jopa xaniwaicha exanaeyo jampa? Nacom copata xua barapomonaе xeina pejuntu coyeneintha pejumefebi coyenewan. ¿Barapomonaе Nacom tsita natsicuentisixaeysi jampa, poxonae Nacom bequein copata baxua jampa?” pajam. <sup>20</sup> Ichitha paca jume notatsi, janje: “¿Paxam pebiwi tsobenae pam! ¿Eta po jiwi pam xua painya nejume matsontsonobiwi Nacom? Juruwato jopa itacupaetsi xua pejeiwa pontha pon peexanaexaeysi: ‘¿Eta xua metha bara necanauta jutsiya exaname?’ xua pejeiwa juruwato. Bapana juruwato jopa itacupaetsi xua pepaebiwa baxua”, paca jeichi. <sup>21</sup> Pon xua juruwato peexanaein bapon itacupaetsi xua cae tsorobotha jiwana exana ainya juruwaton xua seicayan be pocotsi coyeneya xua ichichipa. Bapon itacupaetsi xua pexeinya juruwato exana xua bichocono ainya matoma. Matautano bapon itacupaetsi xua bara cana exana xua jopa wunaeyo xua saya pecasetsinexa.

<sup>22</sup> Nacom barichi itacupaetsi xua jiwi pecana exanaewatsi be pocotsi coyeneya xua ichichipa. Bequein Nacom ichichipa tsita ituta pia peanaepanaewa pomonaetha pomonae abe peexanaewi, ichitha jopa cataunxuae baxua exanaeyo. Matautano bequein ichichipa tsita ituta pia peayapusu itorobi coyenewa po coyene xua barapomonaе tupa peexanaewatsi, ichitha Nacom jopa cataunxuae baxua cana exanaeyo

barapomonaetha. Ichitha Nacom caena bayatha beitatemaya taetaepona xua barapomonaе abe pia peexanae coyenewan, po abe coyenewan xua Nacom anaepana exanatsi. Barapomonaе muxu peweraweracae exanaetsi abe peexanaexae. <sup>23</sup> Nacom beitatemaya naca taetaepona wanaca tsita itutsinexa daxita waxainchi xua bichocono bara ichichipa xua wanaca yawenaewa tsane bayatha itapeta wanaca antobewaxae. Caena bayatha Nacom yabara naca tsiwunaeta xua iru waxeinaenexa Nacom pia pexeinya juntu coyenewa xua bichocono peantobewa. <sup>24</sup> Nacom naca waba pomonaexaeysi pomonae judiomonaе jiwanatsi. Matautano Nacom naca waba pomonaexaeysi pomonae jopa judiomonaе naexanaeyo jiwanatsi. <sup>25</sup> Baxua Nacom yabara paeba pejume diwesitha pomonae yabara, pomonae jopa judiomonaе naexanaeyo po diwesitha ichaxota Oseas tina. Nacom jeye:

“Pomonae copiya jopa tamonaeyo, barapomonaе yabara jan tsane, ‘Apara tamonaе’, jan tsane.

Matautano pomonae copiya jopa antobeinyo

barapomonaе yabara jan tsane:

‘Apara taantobe jiwi’, jan tsane.

<sup>26</sup> Matautano ichaxota ba jiwi yabara jan: ‘Paxam

jopa tamonaе pam’, jan, baraxota barapomonaе

yabara jan tsane: ‘Apara paxam tapexui pam,

po Nacomxaein ataya tsitecaeya jiwi asu jinompa

taexanaein’, jan tsane”, jei Nacom, ichaxota po

diwesitha Oseas tina pon caena bayatha tupa.

<sup>27</sup> Barichi iru Isaiás yabara jeye judiomonae: “Bequein judiomonae bi-chocono jiwi ayaxa icha taetowan ichi xua bobena mar mene itapatha, dai-chitha saya be conotha barapo judiomonae jiwana pomonae xua Nacom capanenebiya. <sup>28</sup> Saya conotha capanenebiya tsipei Nacom methaunxuae yabara paebina daxita jiwi barapo cae pin nacuathepiwi pia petsita natsicuentisixaeetsi xua abe petsita exanaexaeetsi. Yawano jiwi ayei weraweraca exanaeinchi xua Nacom exanaena”, jei Isaiás. <sup>29</sup> Isaiás copiya yabara tsiwunae muxu duta, jeye:

“Nacom apara bapon pon xua itoroba daxita coyeneintha.

Bapon wunaeya naca yabara nanta xeina xua

wanaca yawenaewa tsane xua awiya be conotha pejinompaenexa pomonae wamomoxi

susato jiwi jiwana, xua daxita jopa peweraweracaewa tsane.

Icha Nacom jopa baxua exanaetsipae, bapoxonae

waxainchi bara naca juta ichipae icha bayatha

Sodoma tomarapiwi cana ichichi, matautano icha

matha Gomorra tomarapiwi cana ichichi xua

daxita weraweraca”, jei Isaiás

Nacom Pejume Diwesitha.

**Meje yabara xua judiomonae jopa jume cowuntsiyo Nacom pia pexeinya jume diwesi tatsi**

<sup>30</sup> Barapo peyabara jutiya paebiwan naca yaputane exana xua apara pomonae jopa judiomonae naexanaeyo Nacom jopa tsitatsi xua barapomonae penatsicuentisiwa xua abe peexanaexae. Baxua Nacom cana exana barapomon-aetha bequein barapomonae jopa tsaqueinaeyo xua pexeinaewa pejuntu

coyene xanepanaewa Nacomtha. Barapomonae xeina pejuntu coyene xanepanaewa Nacomtha Cristo pejume cowuntsixaeetsi. <sup>31</sup> Ichitha nama barapo judiomonae paeba, jeye: “Nacom naca juntu coyene xanepana exanaena xua jopa Nacom watsita natsicuentisinxatsi xua abe waexanaexaeetsi bapontha. Bapon baxua naca cana exanaena icha exanaeinchi pocotsiwa Moisés pia peitorobi coyenewatha itoroba”, jei barapomonae. Daichitha barapomonae judiomonae jopa itacupaetsi xua daxita peyabara jume cuiya exanaewa pocotsiwa Moisés itoroba pia peitorobi coyenewatha. <sup>32</sup> ¿Eta xua metha jane xua barapomonae jopa itacupaetsi xua exana pocotsiwa Moisés pia peitorobi coyenewatha itoroba? Metha poxoru barapomonae nanta xeina xua poxonae beta exana bapoxonae jopa pexeinaewa tsane penatsicuentisiwa Nacomtha. Barapomonae jopa jume cowuntsiyo xua Nacom itorobica Cristo, daxota barapomonae Nacom tsita natsicuentatsi xua abe petsita exanaexaeetsi. Barapomonae nacabeta exana, poxonae jopa jume cowuntsiyo Nacom, atene peexanaexaeetsi tsane icha jiton ichi poxonae xuirapopa ibototha xua pia coutha nacabeta exana xua atene naexana. <sup>33</sup> Nacom Cristo yabara paebatsi pejume diwesitha. Icha jiwi ichi poxonae nacabeta poxonae xuirabathopa ibototha, barichi jiwi nacabeta poxonae Cristo jopa jume cowuntichi. Nacom jeye: “Jerusalén tomaratha po tomara atororo xua po tomara pewun Sión barapo tomaratha notsin pon jiwi pecapanenebiyaenexa tsainchi. Jiwi nacabeta exana poxoru barapo jiwi jopa jume cowuntsiyo bapontha, icha jiwi ichi xua nacabeta exana poxonae xuirabathopa ibototha.

Pon jume cowũtsina bapontha, jopa bapana jũntũ natsepanayae tsane”, jei Nacom.

**10** Tamonae pam, paxam pomonae irũ painya nejume cowũtsiwixae Jesucristo. Maisa bichocono tajũntũ coyenewatha ichichipan daxota bichocono Nacomtha tsipaeban judiomonae nexa, xua barapomonae pecapanenebiyaenexa tsainchi abe pia peexanae cuiru coyenein weya. <sup>2</sup>Barapomonae yabara paeban xua barapomonae judiomonae bequein ichichipa nawita xua Nacom petanacuichiwatsi, daichitha jopa yaputaeyo xua pocotsiwa Nacom xaniwaicha ichichipa xua barapomonae peexanaewa. <sup>3</sup>Barapomonae jopa yabara yaputaeyo xua pocotsiwa poxonae Nacom jũntũ coyene xanepana exana jiwitha xua jopa xeinaeyo penatsicuentisiwa Nacomtha xua abe peexanaexae. Barapomonae jũjũta xua icha barompaya pia cui coyenyatha exanaena xua bapoxonae pexeinaenexa tsane pejũntũ coyene xanepanaewa Nacomtha xua jopa penatsicuentisiwa xua abe peexanaexae. Barapomonae jopa exanaeyo be pocotsi coyene Nacom itoroba jiwitha xua Cristo pejume cowũtsixaetsi xua bapoxonae jiwi pexeinaenexa pejũntũ coyene xanepanaewa Nacomtha. <sup>4</sup>Barapomonae jopa yabara yaputaeyo xua po coyene Cristo jopa ainya cui cana exanaeyo Moisés pia peitorobi coyenewa tatsi. Daxota anoxuae jiwi jopa cana matawenonaeyo barapo Moisés pia peitorobi coyenewa tatsi xua po peitorobi coyenewa bequein jiwi yabara nanta xeina xua pinae poxonae yabara jume cuiya exanaena pinae xeinaena pejũntũ coyene xanepanaewa.

<sup>5</sup>Caena bayatha Moisés yabara paeba xua pinae pia peitorobi coyene tatsi itacupatsi xua jiwi jũntũ coyene

xanepana exanatsi Nacomtha xua jopa petsita natsicuentisiwa xua abe peexanaexae. Moisés jeye: “Pon daxita yabara jume cuiya eexanaponaena barapo taitorobi coyenewa xua tinan, bapoxonae bapon bara ataya tsitecaeya poponaena peajũntũyapusũ coyenewatha”, jei Moisés. <sup>6</sup>Nacom Pejume Diwesitha yabara paeba pomonae jopa xeinaeyo penatsicuentisiwa Nacomtha pejume cowũtsixae Cristotha. Nacom jeye: “Jopa pananthũthũ yainyabinde, jopa pajande: ‘¿Jintam metha itaboco beicha ponaena xua Cristo pecatsicaenexa tsainchi barapo cae pin nacuathe tsique xua wanaca yawenaenexa?’ jopa pajande. <sup>7</sup>Mataũtano jopa pajande: ‘¿Jintam metha ira bereca ponaena xua Cristo pecatsinaenexa tsainchi barapo cae pin nacuathe xua petũpae cuiru coyene weya?’ jopa pajande”, jei Nacom. <sup>8</sup>Nacom equeicha pejume diwesitha pejũntũ coyene xanepanaewa yabara jeye: “Tajume diwesi bara imoxoyo dubena xua paca itacũpa painya necueicueijeinexa barapo diwesi. Mataũtano paca itacũpa xua painya neyabara nanta xeinaewa barapo diwesi”, jei Nacom xua pejume diwesitha. Barapo diwesi bara najũpabe po diwesi xua yabara paca cuidubatsi xua painya nejume cowũtsiwa. <sup>9</sup>Icha paichichipame xua Nacom painya nepaca capanenebiwa bewa paexanaename barapo coyenewabe: Bewa ichamonaetha payabara paebim xua Jesús painya Nepacacanamateinaein. Mataũtano bewa pajume cowũtsim painya nejũntũ coyeneintha xua Nacom Jesús equeicha asũ exanatsi petũpae cuiru coyene weya. Bapoxonae Nacom paca capanenebiyaena abe painya neexanae coyenewan weya. <sup>10</sup>Poxonae jiton jume cowũnta pia jũntũ coyenewatha

Jesustha bapoxonae jopa Nacom tsita natsicuenta xua abe petsita exanaexaetsi. Poxonae jiton yabara cueicueije xua Jesucristo apara pia Pecanamataxeinaeinchi, bapoxonae Nacom capanepa bapon abe pia peexanae cuiru coyenewan weya.

<sup>11</sup>Nacom Pejume Diwesitha jeye: “Pon jume cowanta Cristotha, Cristo yawenaena xua daxota jopa bapana juntu coyene natsepanayae tsane”, jei Nacom, xua peete diwesitha.

<sup>12</sup>Nacom jopa tsita seicayatsi daxita jiwi, bara saya tsita najupatsi, bequein bara metha judiomonae tsipae iruno metha bequein jopa dapomonae tsipae pomonae jopa judiomonae naexanaeyo. Bapon Cristo Pecanamataxeinaein exanatsi daxita jiwi nexa. Yawano bapon Cristo Wanacanamataxeinaein jopa juniya catsiyo daxita piawan pomonaetha pomonae pewuca jiwixaetsi.

<sup>13</sup>Tsipei Nacom Pejume Diwesitha jeye: “Daxita pomonae wuca pontha pon jiwi Pecanamataxeinaein, pon Cristo, xua pecapanenebiyaenexa tsainchi, barapomonae bara capanenebiya tsainchi”, jei Nacom. <sup>14</sup>Jiwi jopa itacupaetsi xua petsipaebiwa pontha pon jiwi Pecanamataxeinaein icha jopa jume cowantsiyo bapontha. Matautano jopa itacupaetsi xua pejume cowantsiwa pontha pon jiwi Pecanamataxeinaein icha jopa bapana yabara jume yaputae bapontha. Matautano jiwi jopa itacupaetsi xua peyabara jume yaputaewa bapon icha ichamonae jopa capanaeyo barapo diwesi xua pecueicueijeinexa barapo jiwitha, xua peyabara paebiwatsi pon jiwi Pecanamataxeinaein.

<sup>15</sup>Matautano jiwi jopa itacupaetsi xua pecueicueije xua po diwesi pon jiwi Pecanamataxeinaein peyabara paebiwatsi icha dapomonae ajibi

pomonae itoroba barapomonaetha xua barapomonae pecueicueijeinexa. Nacom Pejume Diwesitha yabara jei baxua: “Maisa bichocono daxua wuna xua poxonae jiwi pata xua pecueicueijeinexa Nacom pia pexeinya jume diwesi xua Cristo peyabara paebiwatsi”, jei Nacom Pejume Diwesitha.

<sup>16</sup>Daichitha jopa daxita jiwiyo xua ichichipa pejume taewa barapo pexeinya jume diwesi. Baxua Isaías yabara jei Nacom Pejume Diwesitha: “Tanecanamataxeinaem ¿jintam jume cowanta pocotsiwa papaeban? Saya be conotha jiwi, pomonae jume cowanta xua pata tacayabara paebiwatsi”, jei Isaías. <sup>17</sup>Daxota jiwi jume cowanta poxonae jume tane barapo pexeinya jume diwesi. Po pexeinya jume diwesi jiwi jume cowanta apara po diwesi xua Cristo yabara.

<sup>18</sup>Tacoya nayainyaban. Nabaran, janje: ¿Metha bara barapomonae judiomonae barapo pexeinya jume diwesi jopa jume taeyo jampa? ¿Jume apara, apara bara jume tane barapo pexeinya jume diwesi! najan. Nacom Pejume Diwesitha baxua yabara jeye:

“Nacom piamonae tatsi capona Nacom Pejume Diwesi tajü beya.

Po diwesin xua barapomonae paeba tajü beya

jume pichapapona daxita barapo cae pin nacuathe”, jei Nacom Pejume Diwesitha.

<sup>19</sup>Equeicha nayainyaban, janje: ¿Metha bara barapomonae judiomonae jopa yaputaeyo xua barapo diwesi ichamonae jume cowantsina? najan. ¿Jume! ¿Apara bara yaputane! najan. Barapomonae yaputane tsipei Moisés baxua caena bayatha copiya yabara tsiwuna muxu duta. Moisés tatina Nacom, xua Nacom jeye: “Ichamonae capanenebiyan pomonae jopa judiomonae naexanaeyo.

Paxam paca exanatsi xua barapomonae pauwame.

Ichamonae capanenebiyan pomonae jopa bichocono peyaputae jiwi.

Paxam paca exanatsi xua baxua paca anaepana

exana, jei Nacom”, xua Moisés tatina.

<sup>20</sup>Bapoxonae iru pirapae Isaías at-saquiya yabara tsiwunae muxu duta Nacom nexa xua Nacom jeye:

“Pomonae jopa nejeichiyo bara necaxiba.

Pomonae jopa neyabara yainyabiyo bara barapomonae cana exanan xua barapomonae

neyaputane”, jei Nacom, xua Isaías tatina.

<sup>21</sup>Equeicha Isaías yabara tsiwunae muxu duta judiomonae Nacom nexa, xua Nacom jeye: “Daxita matabi wabeiban barapomonae. Ichitha barapomonae jopa exaneibiyo pocotsiwa itorobeiban tsipei barapomonae tanejume torobabeibi jiwi xua jopa, tanejume cowuntsiwa”, jei Nacom, xua Isaías tatina.

**Meje yabara xua Nacom itapeta judiomonaepiwi pomonae Israel pon caena bayatha tupa bapon piamonae tatsi**

**11** Equeicha nayainyaban najan: ¿Metha bara Nacom torota daxita piamonae israelmonae jampa? najan. Jume apara, tsipei apara xan barapo israelmonae jiwana pin, daxota jopa netorotsiyo, Abraham pia saineiwimonae jiwana tatsin apara, matautano Benjamín pia pemomoxi susato jiwi jiwana tatsin apara. <sup>2</sup>Nacom jopa torotsiyo piamonae pomonae xua caena bayatha peitapetsixae xua cana exana be piamonae tatsi. Paxam payaputaneme xua Nacom Pejume Diwesitha paeba, po diwesitha ichaxota Elías tsipaeba Nacomtha. Elías pon

Nacom pia peitorobi jume pepaebin pon caena bayatha tupa. Elías anaya yabara paeba israelmonae, jeye: <sup>3</sup>“Nacom ponxaem Tanecanamataxeinaem, barapo israelmonae juteba, jutebatsi pomonae jinya neitorobi jume pepaebiwi. Matautano barapo

israelmonae cayatsiya abe exana pocotsiwan iboton xua xuan xota duwei yubeibiya jutebathopeiba xua poxonae catsita tuxusi exana. Xan compan napaeban xua pomonae beta necajume cowuntsiwi barapomonae jiwana. Iruru barapomonae ichichipa nebexubarú”, jei Elías poxonae tsipaeba Nacomtha. <sup>4</sup>Ichitha Nacom Elías jume notatsi. Nacom jeye: “Awiya cataunxuae xeinan siete mil pebiwi xua tamonae, pomonae tanejume cowuntsi jiwi. Barapomonae jopa pentabocototha umenaeyo xua

poxonae wunae pejainchinexa ibo nacom, po ibo nacom pewun Baal”, jei Nacom. <sup>5</sup>Nama anoxuae awiya barichi israelmonae be conotha pomonae jume cowunta Nacomtha pomonae Nacom peitapetsiwi, pia peantobexae barapomonae. <sup>6</sup>Nacom itapeta barapomonae, pomonaetha pomonae peichichipaexae xua peyawenaewa barapomonaetha pia peantobexae. Baxua Nacom amanaya exana barapomonaetha. Nacom jopa itapetsiyo barapomonae, xua peyabara cui matomatsinexa xua peexanaexae pocotsiwa xanepana. Tsipei icha Nacom saya itapeta jiwi, xua peyabara cui matomatsinexa xua barapo jiwi peexanaexae barapoxonae Nacom be jopa bapana amanaya exanaeyo jiwi nexa.

<sup>7</sup>Daxota yaputainchi xua pinmonae xua barapo israelmonae jiwana jopa catsibichi pejuntu coyene xanepanaewa xua bequein baxua tsixana nawita po coyenein Moisés itoroba. Jame

Nacom cata barapo coyene pomonaetha pomonae peitapetsiwixae, xua pomonae israelmonae jiwana. Barapomonae, pomonae israelmonae jiwana barapomonae Nacom jopa catsibiyo barapo pejuntũ coyene xanepanaewa. Nacom copata xua barapomonae pejuntũ coyenewatha xaina pejume torobabi coyenewa. <sup>8</sup>Nacom Pejume Diwesitha Moisés yabara paeba barapomonae. Moisés jeye: “Nacom copata xua barapomonae xeinaena po juntũ coyene jopa itacupaetsi xua peyaputaewa. Bequein barapomonae yoroba xua pejume xainyei coyenewa daichitha jopa yaputaeyo. Matauta bequein barapomonae jume tane pexainyei jume daichitha jopa jume cowũntsiyo. Barapo coyenein anoxuae cataunxuae baxuan eexanapona”, jei Moisés xua Nacom Pejume Diwesitha. <sup>9</sup>Irũrũ David yabara paeba israelmonae poxonae Nacom tapaebatsi. David jeye: “Barapomonae beitatemaya juntũ coyene weiweinapona pin penabanaewantha. Barapomonae nanta xaina xua jopa catsita natsicuentsiyo xua abe peexanaexae. Poxonae barapomonae cataunxuae eexanapona baxua barabũ xam Nacom jemeicha atene cana exanaename barapomonae, jopa pia necajume cowũntsixae. <sup>10</sup>Daxota barabũ copatsiname xua barapomonae israelmonae jopa yaputaeyo po coyene xua barapomonae catsita natsicuenta abe necatsita exanaexae. Matautano barabũ copatsiname xua barapomonae xeinaena po peatene coyenewa anthũthurewe cana exanatsi xua ataya, abe peexanaexae”, jei David, israelmonae yabara,

Nacom Pejume Diwesitha.

**Meje yabara xua pomonae jopa judiomonae naexanaeyo Nacom jume cowũntatsi**

<sup>11</sup>Equeicha tacoya nayainyaban, najan: Poxonae judiomonae, pomonae israelmonaexae, Nacom nawepu tsabatsi, jopa pejume cowũntsixaetsi ¿metha bara Nacom itawetsina barapomonae xua ataya tsane jampa? ¡Jume apara! ¡Barapara Nacom jopa itawetsi tsane xua bara ataya tsane! Nacom capanenebiyaena icha judiomonae bexa tsane. Bequein anoxuae Nacom jopa capanenebiyaeyo barapomonae judiomonae, apara bara capanenebiya abe pia peexanae cuiru coyenein weya tatsi pomonae jopa judiomonae naexanaeyo. Nacom baxua exana xua judiomonae peuwinexa, xua uwatsi pomonae jopa judiomonae naexanaeyo xua barapomonae Nacom pecapanepaexae. <sup>12</sup>Poxoru judiomonae Nacom nawepu tsabatsi daxota Nacom xanepana exana ichamonaetha, xua daxita carepaya barapo cae pin nacuathe. Judiomonae jopa Nacom pejume cowũntsixaetsi daxota Nacom xanepana exana, pomonaetha pomonae jopa judiomonae naexanaeyo xua Cristo pejume cowũntsiwaxaetsi. Bexa tsane Nacom xanepana exanaena judiomonaetha pocotsiwa bichocono daxita nacuanpiwi tsita xanepanatsi, xua beyacaincha poxonae xanepana exana pomonaetha pomonae jopa judiomonae naexanaeyo. Baxua Nacom cana exanaena poxonae judiomonae irũ Cristo jume cowũntsinchi.

<sup>13</sup>Anoxuae paca tsipaebatsi pomonae pam pomonae jopa judiomonae naexanaeyo pam. Yaitama Nacom taneitorobixae pomonaetha pomonae jopa judiomonae naexanaeyo, pomonae icha paichim, daxota tsitsipaebaponan

Nacom Pejume Diwesi. Barapo tatanacuichiwa Nacom bichocono netsita ainya cui. <sup>14</sup>Beexanaein xua tamonaē judiomonaē paca uwa, xua bapoxonaē barapomonaē pejume cowuntsinexa icha paichim. Yawano barapoxonaē barapo tamonaē jiwana Nacom capanenebiya tsane taexanaexae Nacom nexa. <sup>15</sup>Tsipei poxonaē Nacom itaweta barapomonaē judiomonaē bapoxonaē Nacom itapeta ichamonaē pomonaē barapo cae pin nacuapiwi jiwana xua pecanaexanaenexa pia jiwimonaē tatsi. Poxonaē judiomonaē irū cana exanaeinchi Nacom pia jiwimonaē tatsi Cristo pejume cowuntsixaetsi baxua bichocono wūnaē tsane be poxonaē jiwī equeicha asū exanatsi petūpae cuiru coyene weya. <sup>16</sup>Ainya pecayabara jūta pepaebi diwesiyo be paca tsipaebatsi. Poxonaē jiwī ba pentabū tsequeta xua cae pan exana pecatsinexa Nacomtha barapo pan matabūyo bara Nacom piawa tatsi. Barichi pepa matabū barapara Nacom piawa tatsi. Barichi poxonaē jiwī ba paeba xua pinae nae petabū opina catsina Nacomtha bara Nacom piawa tatsi. Barichi pepa maxūranan barapara Nacom piawa tatsi. Icha barapocotsi naxobe coyenewabe cana ichiya exana jiwī, barapocotsi jūta coyeneya Nacom cana exana jiwitha. Poxoru Abraham irū pomonaē Nacom peitorobi jume pepaebiwi barapomonaē Nacom piamonaē tatsi daxota irū pia pexui tatsi irū Nacom piamonaē tatsi.

<sup>17</sup>Equeicha pecayabara jūta pepaebi diwesiyo paca tsipaebatsi. Jiwi itacupatsi xua olivo nae jiwana maxūranan weucuboba po nae ūbanota pabitha xua bebai. Icha olivo nae maxūranan jiwana weucuboba, po nae untha uncuā. Barapo maxūranan wantha japateita cutsiya duba po naetha po nae uncuā pabitha, po nae copiya jiwana maxūranan be-

bai. Barapo nae tabū opinan aisa cana exana xua barapo maxūranan beta nacoita tsipei mene nota barapo nae tabū opina tsina. Bara jūta coyeneya ichi, icha olivo naetha cana ichichi, Nacom jiwī barapocotsi coyeneya cana ichi. Nacom jiwana torota po judiomonaē jopa pejume cowuntsixaetsi xua bapoxonaē Nacom paca cana exana piamonaē tatsi pam. Nacom paca cana exana xua peajūntūyapusuwa painya nex-einaewa painya ne jume cowuntsixae Jesucristo. Barapo coyene icha be poxonaē pemaxūranan cana ichichi poxonaē aisa cana exainchi pemene notsixaē petabū opinan tsina, xua beta xu xuwa exana pena maxūranatha.

<sup>18</sup>Daxota jopa paatsaquiya aebiya nanta xeinaeinde xua ainya cui jiwī pam xua Nacom painya nepaca wabixae beyacaincha icha judiomonaē pomonaē Nacom torota. Payabara nanta xeinare barapo olivo nae xua pecayabara jūta paebiwa. Barapo maxūranan jopa apara nacoita exanaeyo barapo nae tabū opina deca. Jame apara barapo nae tabū opina nacoita exaneina barapo maxūranantha.

<sup>19</sup>Metha papaebichipame, pajam tsipae: “Nacom torota judiomonaē xua wanaca exanaenexa piamonaē tatsichi, xua icha jiwī cana ichi olivo naetha”, pajam tsipae. <sup>20</sup>Metha moyā bara xainyei tsipae. Bara Nacom torota barapomonaē judiomonaē jopa pejume cowuntsiwixaetsi Jesucristo. Paxam Nacom piamonaē tatsi paca cana exana, tsipei saya apara pajume cowuntame Jesucristo, saya meisa baxuaxae. Jopa pana najūntū coyene yabara atsacande xua painya nex-einaexae pocotsiwa Nacom paca cata. Jame saya dota pam xua jopa xanepanaeya pajume cowuntsim Jesucristo xua daxota Nacom painya nepaca torotsiwa tsane. Jiwi pemaxūranan ucubobiya bebai po nae pabitha uncuā. <sup>21</sup>Bara jūta

coyene ichi, Nacom torota judiomonaе pomonaе copiya piamonaexae tatsi jopa pejume cowuntsixae Jesucristo. Nacom bara paca ichipae paca torotsipa icha jopa pajume cowuntsipaem. <sup>22</sup> Anoxuae waxainchi yaputainchi xua Nacom yawena jiwi, peantobexae. Yawano yaputainchi xua Nacom ayapube taexana ichamonaе pomonaetha pomonaе abe peexanae jiwixae. Nacom daunweya yabara paeba penatsicuentisiwa pomonaе xua jopa pejume cowuntsiwichi. Ichitha Nacom beta xanepanaya paca cana exana. Nacom baxua paca cana exanaena icha awiya pajume cowunta dubenanaebiyaename. Ichitha icha awiya jopa pajume cocowuntaponaem tsane Nacom paca torotsina. <sup>23</sup> Matautano Nacom itacupatsi xua equeicha caewa cana exana piamonaе judiomonaе, pomonaе Nacom bayatha copiya bequein petorotsixae. Nacom baxua cana exanaena icha jame barapomonaе Cristo jume cowuntsinchi. Nacom baxua cana exanaena icha jiton ichi xua equeicha caewa pecoutha japateita cutanota wantha pemaxurana, po maxurana bequein ucuibiya xuba. <sup>24</sup> Paxam pomonaе jopa judiomonaе naexanaeyo pam, Nacom paca cana exana piamonaе tatsi pam, bequein copiya jopa piamonaе tatsi pam. Nacom bara paca cana ichi, icha be pocotsi coyeneya pebin ichi xua unupi olivo nae maxurana ucuiba. Equeicha barapo maxurana icha olivo nae maxurana wantha japateita cutsiya duta po olivo nae pabitha ubanota. Bapoxonaе barapo unupi olivo nae maxuranatha pexeinya thei xuwa. Ichitha icha pebin equeicha pita po maxurana xua ucuiba pepa olivo nae weya yawa equeicha caewa pecoutha japateita cutanota wantha, barapo maxurana beta xuwa beyacaincha

xua xuwa unupi olivo nae maxurana poxonaе japateita cutanota wantha. Icha pebin ichi, Nacom bara itacupatsi cana exana judiomonaetha. Nacom tayapu xanepanatsi xua equeicha exana piamonaе tatsi pomonaе copiya torota pomonaе judiomonaе.

**Meje yabara xua Nacom bexa tsane israelmonaе capanenebiya tsainchi**

<sup>25</sup> Tamonaе pam, paxam pomonaе iru painya nejume cowuntsiwixae Jesucristotha. Maisa ichichipan xua paxam yabara painya neyaputaewa tsane xua moya peyawun xeinaewa po coyene xua Nacom yabara po coyene ichamonaе jopa yaputaeyo. Tsipei jopa ichipaeinyo xua painya coutha painya nenayabara nanta xeinaewam xua peyaputae jiwi pam. Meje baxue xua moya peyawun xeinaewan: Anoxuae israelmonaе xeina pejuntu coyenewatha po coyene xua Nacom pejume torobabi coyenewatsi xua daxota Nacom jopa pejume cowuntsiwatsi. Ichitha jame bexa poxonaе abu daxita carepaya jume cowuntsina Nacom pomonaе jopa judiomonaе naexanaeyo pomonaе Nacom itapeta, bapoxonaе equeicha judiomonaе jume cowuntsina.

<sup>26</sup> Bapoxonaе daxita israelmonaexae pomonaе judiomonaexae pomonaе Nacom itapeta, capanenebiya tsainchi abe pia peexanae cuiru coyenewan weya tatsi. Nacom baxua yabara jeye pejume diwesitha:

“Pon jiwi Pecapanenebiyaеin patopaena israelmonaе jiwanaatha pomonaе Sion tomara wunmonaе.

Bapon juntu coyene wepichina Jacob pia pemomoxi susato jiwi tatsi abe pia peexanae cuiru coyenewan tatsi, pomonaе israelmonaexae.



<sup>27</sup> Juntũ coyene wepichin barapo judiomonaẽ  
 abe pia peexanae cuiru coyenewan tatsi.  
 Barapoxonaẽ cayabara jume weta  
 exanaein  
 pocotsiwa caena bayatha yabara  
 tsiwunaẽ  
 muxu dutan barapomonaẽ pia pamo  
 susato jitontha  
 tatsi pon pewũ Jacob, pon Israelxæ”,  
 jei Nacom Pejume Diwesitha.

<sup>28</sup> Ichamonaẽ xua israelmonaẽ  
 jiwana anoxuae barapomonaẽ Nacom  
 pia peaitafaetabi jiwichi tsipei  
 barapomonaẽ jopa jume cowũtsiyo  
 Nacom pia pexeinya jume diwesi  
 tatsi po diwesi Cristo pepatopaewa  
 yabara. Tsipei barapomonaẽ baxua  
 exana, daxota paxam pomonaẽ jopa  
 judiomonaẽ naexanaeyo pam, bara paca  
 itacupa xua painya nejume cowũtsiwa  
 Cristo. Ichitha barapo israelmonaẽ  
 Nacom caena bayatha copiya itapeta.  
 Barapo israelmonaẽ awiya Nacom  
 antobe, pia pamo susato jiwĩ tatsi  
 copiya peitapetsixaetsi. <sup>29</sup> Tsipei  
 Nacom jopa ichawa beya paebiyõ.  
 Pocotsiwa Nacom cata equeicha jopa  
 caewa pichiyo. Pomonaẽ Nacom  
 itapeta equeicha jopa itawetsiyo.  
<sup>30</sup> Paxam pomonaẽ jopa judiomonaẽ  
 painya nenaexanaewi pam, copiya  
 paxam jopa painya neexanae jiwĩ  
 pam pocotsiwa Nacom paca itoroba.  
 Daichitha anoxuae judiomonaẽ  
 jopa peexanaexaẽ pocotsiwa Nacom  
 itoroba, daxota Nacom wunaeya  
 paca yabara nanta xeina pia nepaca  
 cayawenaewa tsane. <sup>31</sup> Ichitha anoxuae  
 bequein barapomonaẽ judiomonaẽ  
 jopa exanaeyo pocotsiwa xua Nacom  
 ichichipa, bexa tsane barapomonaẽ  
 judiomonaẽ jume cowũtsina. Poxonaẽ  
 baxua exanaena Nacom, xua wunaeya  
 paca yabara nanta xeina pia nepaca  
 cayawenaewa tsane irũ wunaeya yabara

nanta xeinaena peyawenaenexa tsane  
 xua barapomonaẽ peyawenaenexatsi  
 pia peantobewixae. Nacom baxua  
 exanaena barapomonaetha icha bayatha  
 pacata ichi xua poxonaẽ Nacom pacata  
 exana. <sup>32</sup> Nacom bara copata xua daxita  
 jiwĩ bara najupa xua penatsicuentisiwa  
 xua jopa pejume cowũtsixaetsi. Nacom  
 bara baxua copata, xua penanta jupiya  
 yawenaenexa daxita jiwĩ, peantobexaẽ.

<sup>33</sup> ¡Maisa jopa juniya Nacom  
 yawenaeyo jiwitha! ¡Maisa Nacom jopa  
 juniya xeinaeyo peyabara yaputae  
 coyenewan po coyene xua xaniwaicha  
 pecayabara exanaewa! ¡Maisa Nacom  
 jopa juniya yabara tsiwunaẽ yaputaeyo  
 peyaputae coyenein xua bexa exanaena!  
 ¡Dapon ajibi pon itacupatsi xua  
 pecayabara yaputaeya paebiwã  
 pocotsiwa Nacom cuita yabara exana!  
 ¡Barichi dapon ajibi pon itacupatsi xua  
 peyaputaewa Nacom pia cui coyenewan  
 tatsi! <sup>34</sup> Nacom Pejume Diwesitha tatsi  
 yabara jeye baxua: “Dapon ajibi, pon  
 yaputane pocotsiwa Nacom nanta  
 xeina pon jiwĩ Pecanamataxeinaeinxæ.  
 Matautano dapon ajibi, pon xua Nacom  
 pecuidubiwatsi. <sup>35</sup> Matautano dapon  
 ajibi pon cata Nacomtha xua daxota  
 xuya bewa Nacom matomatsina”, jei  
 Nacom Pejume Diwesitha tatsi. <sup>36</sup> Apara  
 daxita coyenein Nacom forota. Nacom  
 canamataxeina pia peayapusũ itorobi  
 coyenewatha daxitan pocotsiwan xua  
 xuan exana. Daxitan bara piawa tatsi.  
 ¡Barabũ Nacom wunaẽ jainteibatsi xua  
 ataya tsaibi tsane! ¡Je, bara ichi tsane!

### Meje yabara xua wajinompawea wataexanaenexa Nacom

**12** Tamonaẽ pam, paxam  
 pomonaẽ irũ painya nejume  
 cowũtsiwixae Jesús. Paxam  
 payaputaneme xua Nacom bichocono  
 naca yawena pia wanaca antobexaẽ.  
 Daxota paca itorobatsi daxita pam.

Pana najuntũ coyene doure Nacomtha painya nenacuichinexa pocotsiwa Nacom paca itoroba. Baxua bara be poxonae jiton ovejiyo asu cata xua pebexubinexa Nacom nexa. Poxonae pana najuntũ coyene doutame Nacomtha barapo coyene Nacom tsita xanepanatsi. Barapocotsi coyenewatha bewa wũnae pajaintsiname Nacom painya jũntũ coyeneintha. <sup>2</sup>Jopa bara paichiponaende xua abe paexanaponaeme po coyenewan icha ichi xua exana dubenanaebiya pomonae barapo cae pin nacuathe jinompa. Jame maisa bara pacopare xua Nacom paca necanaexanaenexa xua icha jũntũ coyene paxename xua beta painya nenanta xeinaponaenexam tsane. Bapoxonae payaputaename xua bara painya neexanaewa pocotsiwa Nacom ichichipa. Pocotsiwa Nacom peichichipaewa xua apara painya neexanaponaewa tsane xua meje: pocotsiwa bara wũnae, matautano pocotsiwa Nacom pejũntũ coyene weiweina exanaewatsi, matautano pocotsiwa daxita bichocono matapaecha xanepana.

<sup>3</sup>Nacom taneantobexae necata barapo peayapusu itorobi coyenewa xua tapaca itorobiwatsi pocotsiwa yabara bewa paexanaename. Daxota baxua paca tsi-paebatsi xua paxam jopa bewa pana nayabara nanta xeinaem xua peainya cui jiwi pam beyacaincha poxonae Nacom pia coutha ainya cui paca cana exana. Nacom paca catsiba pejume cowũntsiwa daxita carepaya paxamtha. Daxota bewa daxita paxam xainyeya pana nayabara nanta xeinaem pocotsiwa painya neexanaexae xua icha be pocotsi coyeneya Nacom painya nepaca itorobixae pocotsiwa bewa paexanaename. <sup>4</sup>Wapepontha nawita xeinatsi xua wanaca cueyatsiwan, bara bequein cae pepontsi. Daxita barapo wanaca cueyatsiwan wapepon-

tha jopa nanta jupae coyeneya exanaeyo. <sup>5</sup>Waxainchi bara ichichi bara bequein pinmonaetsi ichitha waxainchi be cae pepontsi Cristotha. Ichitha apara daxitatsi bara caemonae naexainchi wajume cowũntsixae Cristo. Caemonae wanaexanaexae Cristotha, daxota nantia nayawenatsi.

<sup>6</sup>Nacom daxita carepaya barompaya naca catsiba wajũntũ coyeneya waexanae coyenewan, peichichipaexae xua naca yawenaena wanaca antobexae. Barapo jũntũ coyeneyatha waxainchi barompaya bewa beta taexanaetsi Nacom wanaca catsixae barapo coyene. Ichamonaetha Nacom naca jiwana catatsi po coyene xua peyabara yaputaeya cueicueijei coyenewa Nacom Pejume Diwesi. Bapoxonae barapomonaewas bewa cueicueijei barapo diwesi jiwitha. Barapomonaewas bewa exanae baxua daxita po pejume cowũntsiwatha Nacom barapomonaetha cata. <sup>7</sup>Ichamonaetha Nacom naca jiwana catatsi, po coyene xua ichamonaewas peyawenaewatsi. Barapomonaewas bewa moya ichamonaewas bara beta yawenaetsi. Ichamonaewas Nacom naca jiwana catatsi po coyene xua ichamonaewas pecuidubiwatsi. Pomonaewas yaputane xua pecuidubiwa ichamonaetha, bewa moya bara beta cuidubina ichamonaetha. <sup>8</sup>Ichamonaetha Nacom naca jiwana catatsi peyaputae coyenewa po coyenewa xua pejũntũ cui coyene tsacabinexa pejume cowũntsiwi xua jũntema pejinompaenexa. Pomonaetha Nacom cata barapo peyaputae coyenewa barapomonaewas bewa moya bara beta jũntũ cui coyene tsacabina ichamonaewas. Ichamonaetha Nacom naca jiwana catatsi peyaputae coyenewa po coyenewa xua piawan peroutsiwa ichamonaetha. Barapomonaewas bewa jopa asiwiyo, moya bara bewa amanya

doutsina ichamonaetha. Ichamonaetha Nacom naca jiwana catatsi peyaputae coyenewa po coyenewa xua piamonae canamataxeinaeya itoroba. Bapomonae bewa moya bara saya daunweya beta canamataxeinaeya itorobaponae. Ichamonaetha Nacom naca jiwana catatsi peyaputae coyenewa po coyenewa xua yawena peacopeibi jiwi. Bapomonae bewa moya juntu coyene weiweinaeya yawenae.

**Meje yabara xua pocotsiwa  
bewa exanae pomonae  
pejume cowuntsiwi Cristo**

<sup>9</sup>Poxonae pana naantobem xaniwaicha nantiya caemonae pana naantobeinde. Panaitemare abe peexanae coyenewan. Saya naitomatsiya paexanaponde pocotsiwa pexanepanae coyenewan. <sup>10</sup>Bewa caemonae nantiya pana naantobem, icha caepi jiwi ichi xua yatsicaewa naantobe xua cae peweicho jiwi. Bewa ichamonae pabarũ cui itura jinaem xua barapomonae peainya cui jiwi beyacaincha paxam.

<sup>11</sup>Juntu coyene daunweya patanacuire pon jiwi Pecanamataxeinaein. Jopa paacoyenefaetabinde poxonae pata nacuitame. Antũ-coyenyapusya bapon patanacuire, bichocono painya neichichipaexae.

<sup>12</sup>Painya newunaewatsixae pocotsiwa xua Nacom paca catsibapaeba bexa daxota pajuntu coyene weiweinaeya jinompare. Poxonae ichamonae jopa xapain pacata exanaeyo, xua paca cana exana xua paajuntũcoyenetanem, bara saya juntepa pajinompare. Jopa paaitaconaeinde. Jopa pana cui barapentsinde xua painya tsipaebiwi Nacom.

<sup>13</sup>Nacom piamonae xua irũ pomonae Nacom pejume cowuntsiwixaetsi payawende pocotsiwa xua barapomonae nantawenona. Pantenta weyataeya

wabeibare painya bontha pomonae painya nepaca casiwa poneibiwi, pomonae pejume cowuntsiwi Nacom pomonae jopa painya yaitaibi jiwi.

<sup>14</sup>Pomonae paca atene exana painya nejume cowuntsixae Jesucristo barapomonae patawucare Nacomtha xua Nacom peyawenaewa tsane barapomonae. Nacom jopa patsipaebinde xua abe pecana exanaewa tsane barapomonaetha.

<sup>15</sup>Irũ pajuntu coyene weiweineibare poxonae ichamonae juntu coyene weiweineiba. Ichacuiitha pajuntu coyene wecoyei tsaibindeno poxonae ichamonae juntu coyene wecoyei tsaibi.

<sup>16</sup>Peburũya nanta cui jurũya pajinompare xua juntepa nantiya pana nabarũ dubenanaebiyame. Jopa ichamonae paaebinde. Pacana exande painya jiwi xua be pomonae pecui pawi jiwi. Jopa pana nayabara nanta xeinaeinde xua painya neyaputae jiwi pam.

<sup>17</sup>Poxonae ichamonae abe pacata exana jopa xuya abe pata exanaeinde barapomonaetha. Jame maisa pananta xeinare xua daxita jiwi xaniwaicha painya netaexanaewa tsane pocotsiwa barapomonae tsita cui xanepanatsi.

<sup>18</sup>Paexanaponde daxita pocotsiwan paca itacũpa, xain bapoxonae juntepa pana nabarũ jinompame daxita jiwi.

<sup>19</sup>Tamonae pam paxam pomonae tapaca caantobe jiwichi pam irũ painya nejume cowuntsi jiwixae Jesucristo. Paxam jopa bewa xuya panayantomateibim tsane poxonae ichamonae abe pacata exaneiba. Jame bara saya pacopare xua bara Nacom peyantomatsiwa exanaena pomonaetha pomonae abe pacata exana. Tsipei Nacom Pejume Diwesitha tatsi baxua yabara jeye: "Jame xan saya ba tacoyan xua jiwi atene exanan abe peexanaexae ichamonaetha.

Xan peyantomatsiwa xuya exanaein pomonaetha pomonae paca abe exana jei pon Pecanamataxeinaein jiwi”, jei Nacom Pejume Diwesitha. <sup>20</sup>Jopa xuya payantomateibim tsane. Jame paexande xua Nacom Pejume Diwesitha tatsi jeye: “Icha painya nepaca caaitafaetabi jiton jainpa, paapare pexaewa. Yawano icha meratsipano, paapare pocotsiwa xua peapaewa. Poxonae baxua pataxanaename, bapoxonae barapon pin ura paca tsita xeinaena xua bayatha abe pia pacata exanaexae”, jei Nacom Pejume Diwesitha. <sup>21</sup>Jopa pacopatsinde xua ichamonae abe pia paca exanae coyenein tatsi paca juntu coyene amanayaba xua daxota abe paexaname barapomonaetha pomonae painya nepaca caaitafaetabi jiwi. Jame maisa beta exanaeya pata exande poxonae bequein ichamonae abe pacata exana. Bapoxonae pacoyene amanayabame po coyenein abe peexanae coyenewan.

**13** Daxita jiwi bewa exanae pocotsiwa itorobatsi pomonae itorobiya pecanamataxeinae jiwi pomonae peayapusu itorobi coyenewa xeina. Jiwi jopa itacupaetsi xua pecanamataxeinaewa ichamonae xua peitorobinexa icha Nacom jopa yabara copatsiyo baxua. Tsipei jiwi pomonae peayapusu itorobi coyenewa xeina xua pacanamataxeinaewatsi ichamonae saya meisa Nacom bara yabara cui copaba xua barapo jiwi bara pecanamataxeinaewa tsane ichamonae. <sup>2</sup>Daxota icha ichun jume naitemata xua pocotsiwa itorobatsi xua itoroba pon piamonae itorobiya pecanamataxeinaein barapara bapon barichi jume naitemata po coyene xua Nacom exana xua poxonae cana exana xua barapomonae pecanamataxeinaewa ichamonae. Pocotsimonae xua baxua exana xua pejume naitematsiwa, barapocotsimonae apara bara Nacom

tsita natsicuentatsi xua barapo abe coyenewa peexanaexae. <sup>3</sup>Pomonae beta peexanae jiwi jopa bewa cuitaya junuwi tsane xua pecuitaya junuwiwatsi pomonae itorobiya pecanamataxeinaewi. Jame saya meisa pomonae abe peexanae jiwi bewa cuitaya junuwina xua pecuitaya junuwiwatsi pomonae itorobiya pecanamataxeinae jiwi. Icha jopa paichichipaem xua junuwa painya nepaca exanaewa pon itorobiya pecanamataxeinaein, moya jame beta patsita exande. Bapoxonae bapon bara patsita xanepanaename. <sup>4</sup>Tsipei apara pon itorobiya pecanamataxeinaein jiwi tanacuita Nacom xua painya nepaca cayawenaewa tsane. Ichitha icha paxam abe paexaname moya bara bewa pajunuware, tsipei bapon pon itorobiya pecanamataxeinaein jiwi, xeina po peayapusu itorobi coyenewatha peitacupaewatsi xua atene paca exana. Bapon tanacuita Nacom. Daxota bapon Nacom taexainchi xua pomonae abe peexanaewi atene tsane xua penatsicuentatsixae xua abe peexanaexae Nacomtha. <sup>5</sup>Daxota bewa paexanaename pocotsiwa paca itoroba pon itorobiya painya nepaca canamataxeinaein. Jopa apara bewa paexanaem tsane baxua xua poxoru Nacom atene painya nepaca exanaeyainwa, jame apara poxoru xua painya juntu coyenetha payabara yaputaneme xua bewa beta painya neexanaewa tsane. <sup>6</sup>Daxota xain barapomonae pacatsibame pematomatsi paratixi pocotsi paratixi jiwi bewa catsibina pomonaetha pomonae itorobiya pecanamataxeinae jiwi. Tsipei barapomonae nantawenona paratixi xua beta pe-eexanaponaewa tsane poxonae Nacom tanacuitapoinchi.

<sup>7</sup>Daxita barapomonae barompa paratixi pacatsibare po paratixi bewa

pacatsibim barapomonaē. Pomonaē painya nepaca canamataxeinaewi pacatsibare daxita po coyenein peyabara matomatsiwan xua xuan paca wūca. Daxita pomonaē pecanamataxeinaē jiwī pabarū cui itura jinare, xua daxota betiya painya nebaru cueicueijiwa tsane.

<sup>8</sup>Painya xoba ichamonaē pantoma amanayabeibame. Jame saya cae coyene bewa paxeinaem po coyene xua nantiya painya nenaantobewam. Tsipei pon antobe ichamonaē bapon jume cowūntsiya exana daxita pocotsiwa xua Moisés itoroba pia peitorobi coyenewatha. <sup>9</sup>Moisés pia peitorobi coyenewatha jeye: “Jopa pichinde ichūn piseuri tatsi. Jopa bexubinde ichamonaē. Jopa caibinde xua ichamonaē piawan. Jopa yabara uwinde pocotsiwa ichūn xeina”, jei barapo itorobi coyenewatha. Barapo coyenein xuaunxuae paeban, irūno daxita icha peitorobi coyenewano be cae peitorobi coyenewa jume naexanabe ichaxota xua po jumetha jeye: “Ichamonaē antobeinde icha ichim xua jinya coutha naantobem”, jei barapo peitorobi coyenewatha. <sup>10</sup>Pon ba beta antobe tsaibi ichamonaē bapana jopa abe taexanaeyo barapomonaētha. Daxota icha antobetsi ichamonaē bapoxonaē barapara jume cowūntsiya exainchi daxita pocotsiwa Nacom itoroba Moisés pia peitorobi coyenewatha.

<sup>11</sup>Daxita baxuan bewa paexanaename tsipei payaputaneme xua anoxuae po dapaetha pajinompare bichocono peayapube dapae. Barapo dapaetha tsaca pajinompame, tsipei imoxoyo naca itiya pona po mataqueitha Nacom naca capanenebiyaena. Barapo matakabi imoxoyo beyacaincha xua poxonaē aena jume cowūntatsi Jesucristo.

<sup>12</sup>Pequireiwa ba bewayo caewanaya poxoru matakabi dawetsina. Bara jūta coyeneya ichi poxonaē pomonaē ba abe peexanaewi bara apara pequireitha abe exana. Barapomonaē barapenta xua abe exana poxonaē matakabi tsuxubi. Barichi waxainchi bewa barapentichi xua abe waexanaē coyenewa icha barapomonaē ichi xua saya merawi abe exana ichitha mataqueitha jopa exanaeyo. Waxainchi bewa beta exanaetsi icha pomonaē ba ichi pomonaē jinompa mataqueitha xua beta exana. Baxua exanatsi poxonaē najūntū coyene wūnaetatsi xua najūntū coyene ayapusū exanatsi abe waexanaeyainwa. Baxua icha be poxonaē ba soldadopin ichi poxonaē matakabitha nacui wūnaeta penabinexa. Bapon penaintontha nayaitata xua daxita pepontha xua pebexotsiyainwatsi. <sup>13</sup>Barabū beta xanepanaya dubenanaebiyatsi, icha jiwī ichi xua beta dubenanaebiya mataqueithaxae. Jopa bewa nacūpa exanaē dubenanaebiyae tsainchi xua peamenetsaxawa. Matautano jopa bewa ponaeinchi po penabanaewan xua ichaxota pinmonaē penacaetutsiwa yawa abe exana. Jopa bewa nasi cui exanaē tsainchi. Matautano jopa bewa tanotsichi ichamonaē piseuri jiwī tatsi. Yawano jopa bewa nantiya jume daunweya najume matsontsonobi tsainchi. Matautano jopa bewa nauwi tsainchi. <sup>14</sup>Jame ichawa bewa paexanaename. Bewa Jesucristo patsipaebiname xua painya nepaca yaitatsinexa pon jiwī Pecanamataxeinaein, xua abe painya exanaeyainwa tsane. Bapoxonaē jopa paexanaeinde po coyene xua abe painya exanaewam pocotsiwa painya jūntū coyenein ichichipa xua peexanaewa.

**Meje yabara xua jopa bewa  
abeya yabara paebichi po  
coyene xua pejinompaewa**

**pomonae iru pejume cowuntsiwa**

**14** Icha ichun juntũ coyene faefaena pejume cowuntsiwa Cristotha, bapon pacana exande be painyamonae jiwi jiwana pomonae painya nejume cowuntsi jiwixae pam. Jopa bapon yabara pajume matsontsonobinde xua pia pecayabara nanta xeinaewatsi xua po coyeneya bapon bewa exanae xuano xua ichacuitha po coyeneya xua bapon jopa bewa exanae. <sup>2</sup>Ichamonae ba nanta xeina xua itacupatsi penabanaewa xua daxita coyenein pexaewan. Ichamonae ba pomonae juntũ coyene faefaena xua pejume cowuntsiwa Cristotha barapomonae ira pipexaewa xane jopa pewi xaeyo. <sup>3</sup>Pon penabanaein daxita coyeneya pexaewan, bapon jopa bewa paebi tsane ichuntha pontha pon xua jopa penabanaeinxae pewi. Jopa bewa paebi tsane “Abe exaname jopa nenabanaexae pewi”, jopa bewa jei tsane. Barichi pon pewi jopa penabanaein, bapon jopa bewa paebi tsane pontha pon pewi penabanaeinxae: “Abe exaname nenabanaexae pewi”, jopa bewa jei tsane. Tsipei pon daxita coyeneya penabanaein pexaewa Nacom yabara nanta xeina xua bara iru pexanto tatsi, icha ichi pon jopa penabanaein pewi. <sup>4</sup>Xam jopa bewa daxua paebim tsane xua pon ichun tanacuitatsi xua bapon natsicuenta pontha pon pecanamataxeinaeinchi abe peexanaexae. Po pebin xua Nacom tanacuitatsi bapon nantauta pon jiwi Pecanamataxeinaein. Bapon jopa nantawenonaeyo xua iru xam canamataxeiname bapon. Saya meisa Nacom itacupatsi xua yabara paeba poxona po coyene icha bapon wunae exana xuano xua icha jopa xapain exanaeyo. Ichitha bapon xanepanaya ex-

anaena tsipei Nacom itacupatsi xua cana exana, xua pia petanacuichi jiwi tatsi xanepanaya peexanaewa.

<sup>5</sup>Ichamonae nanta xeina xua caentaqueitha bichocono peainya cui matababi beyacaincha xua icha matababi tsipei barapo matababitha xua Nacom wunae pejainchiwatsi. Ichamonae nanta xeina xua daxita matababin bara najupa xua peainya cui matababin xua Nacom wunae pejainchiwanexatsi barapo matababintha. Daxita barapomonae bewa barompaya pia juntũ coyenewatha yabara nanta xeinae xua barapara pexainyeiwa po coyenewa xua peyabara nanta xeinaexae. Jopa bewa nanta xeinae po coyenewa ichun yabara nanta xeina. <sup>6</sup>Pon jopa nacuichiyo po mataqueitha xua peainya cui matababi, bapon baxua exana xua Nacom wunae pejainchinexatsi pon jiwi Pecanamataxeinaein. Barichi pon xua penabanaein daxita coyeneya pewi, apara xua Nacom wunae pejainchinexatsi, pon jiwi Pecanamataxeinaein, tsipei bapon jeye: “Nacom maisa juntũ coyene weiweinan xua tanecatsiwam daxita coyeneya pexaewan”, jei. Irano pon jopa pewi xaeyo, bapon barapara xua Nacom wunae pejainchinexatsi pon jiwi Pecanamataxeinaein, tsipei bapon jeye: “Nacom maisa juntũ coyene weiweinan xua tanecatsiwam ira pipexaewa”, jei bapon.

<sup>7</sup>Tsipei dapon ajibi pon waxainchi jiwanatsi pomonaexaetsi pomonae wajume cowuntsiwichi, xua pon pepoponaewa penacanaexanaewa xua be pocotsi coyeneya bapon ichichipa. Jame apara popona icha be pocotsi coyeneya bara Cristo pon jiwi Pecanamataxeinaein ichichipa xua pepoponaewa tsane. Barichi icha bapon tupaetsipa apara saya poxoru Jesucristo pon jiwi Pecanamataxeinaein bara copata xua

bapon petupaewa tsane. <sup>8</sup>Icha Nacom pon jiwi Pecanamataxeinaein copata xua awiya wajinompaewatsi bewa beta jinompaetsi xua daxota jiwi Nacom wunae pejainchinexatsi. Icha Nacom pon jiwi Pecanamataxeinaein copata xua bara watupaewa tsane barapo coyene bewa cana exanaetsi xua jiwi wunae pejainchiwa Nacom. Daxota bequein icha waxainchi jinompaetsipatsi, yawano poxonae bequein icha tupaetsipatsi bara barapara barapo coyeneinya waxainchi bewa cana exanaetsi xua jiwi Nacom wunae pejainchinexatsi pon jiwi Pecanamataxeinaein poxoru waxainchi piamonae tatsichi. <sup>9</sup>Daxota Cristo tupa, yawano equeicha asu popona xua penaexanaenexa tsane pon jiwi Pecanamataxeinaeinchi xua daxita jiwi nexa pomonae werapa iruno pomonae cataunxuae jinompano.

<sup>10</sup>Daxota dapon ajibi pon paxam jiwana pam pon bewa yabara pae-bina pomonaetha pomonae iru pejume cowuntsiwi Cristo, xua pejeiwa: “Barapomonae Nacom tsita natsicuentatsi abe peexanaexae bapontha”, xua pejeiwa. Matautano ichamonae paxam jiwana jopa bewa yabara paebi tsane pomonaetha pomonae iru pejume cowuntsiwi, xua jei: “Maisa barapomonae jopa peyaputaewi xua jopa peainya cui jiwi”, jopa bewa jei. Tsipei poxoru daxita waxainchi bexa tsane umenaeinchi Cristo peitabaratha. Cristo daxita naca yabara pae-bina xua wanatsicuentasiwa xua abe waexanaexae Nacomtha. <sup>11</sup>Tsipei Nacom Pejume Diwesitha jeye: “Xan bara xaniwaicha yabara paca tsiwunae muxu dutatsi xua daxita jiwi patsina xua pentabocototha peumenaenexa taitabaratha tanewunae jainchinexa. Daxita jiwi neyabara pae-bina jei tsane:

‘Apara barapon yatsicaewa pepa Nacom’, jei  
tsane”, jei Nacom pon jiwi  
Pecanamataxeinaein xua Pejume  
Diwesitha.

<sup>12</sup>Bapoxonae barapo mataqueitha yabara cueicueijeji tsainchi Nacomtha pocotsiwa xua caena bayatha exanatsi xua barapo cae pin nacuathe icha bara metha wunae exainchi yawano icha bara metha abe exainchi.

**Meje yabara xua jopa bewa exanaetsi pocotsi coyeneya pomonae pejume cowuntsiwi abe peexanaewa tsane**

<sup>13</sup>Daxota waxainchi jopa bewa yabara nantiya namuxutainyabichi pocotsiwa waexanaexae. Jame bewa paexanaem xua meje: Painya xoba pacana exaname painyamonaе pomonae iru pejume cowuntsiwi xua pocotsi coyeneya barapomonae peexanaewa tsane xua daxota jopa pejume cowuntsiwa tsane Nacom. <sup>14</sup>Tsipei xan tajume cowuntsixae Jesús pon jiwi Pecanamataxeinaein daxota bara yatsicaya yaputan, xua dapocotsiwa ajibi po pexaewa tanejuntu coyene taxobiwa xua icha taxaewa tsane. Ichitha icha ichun yabara nanta xeina xua po pexaewa betaxobichipatsi icha xaetsipa bapoxonae bara tsita xainyeichi, betaxobichipatsi icha xaetsipa. <sup>15</sup>Ichitha icha paxaetsipame pocotsiwa xua painya jiton jopa ichichipaeyo xua pexaewa, pon iru pejume cowuntsin bapoxonae peantobe coyenewa jopa patsita xeinaem bapon. Painya xoba paexaname pocotsi coyenetha xua ichun baraxuba Nacom xua poxoru pocotsiwa painya nexaexae. Tsipei apara Cristo bayatha tsitupa bapon. <sup>16</sup>Paxam pananta xeiname xua bara wunae paexaname po coyenein ichamonae tsita abetsi pejuntu coyenein taxobixaetsi. Bequein baxua payabara

nanta xeinaetham tsipae ichitha jopa paexanaemtsipae barapo coyenein. Tsipei icha paexanaetsipame barapo coyenein, ichamonae yabara jei tsipae barapo coyenein: “Maisa po coyenein barapomonaе exana bichocono abe”, jei tsipae. <sup>17</sup>Nacom ichichipa xua waxainchi peburaya junteма wajinopaewa. Daxota poxonaе Nacom naca itoroba po coyene yabara po coyeneya bewa nabaru jinompaeinchi, jopa yabara paeби tsainchi xua po peitorobi coyenein xua waxaewa yawa waapaewa yabara. Jame po coyenein yabara naca itoroba xua apara jame pinae bewa Nacom tsita xeinaeinchi pejuntu coyene xanepanaewa. Matautano bewa pinae junteма nabaru jinompaeinchi Nacom nexa. Matautano bewa juntu coyene weiweinaeya jinompaeinchi. Daxita barapo coyenein xeinatsi wanaca catsibixae Nacom pia Pejumope tunaxu tatsi. <sup>18</sup>Poxonaе barapo coyeneya Cristo taexainchi bapoxonaе Nacom tsita xanepanatsi pocotsiwa xua exainchi. Matauta jiwu naca yabara paeба xua pinae bara beta exainchi.

<sup>19</sup>Daxota bewa waxainchi exaneibinchi pocotsi coyenein xua junteма nabaru jinompatsi exanatsi. Yawano bewa exaneibinchi pocotsi coyeneintha xua nantiya jume cocowuntaponatsi naexainchi. <sup>20</sup>Jopa bewa paxaem ichun peitabaratha pon painyamonae jiwana pocotsiwa xua bapon yabara nanta xeina xua jopa bewa xae. Icha paxaetsipame bapon peitabaratha, bapon iru metha xaetsipa barapo pexaewa. Bapoxonaе bapon nanta xeinaetsipa xua bapon pomonaе jiwana pomonaе penatsicuentisiwa Nacomtha xua abe peexanaexae. Painya xaexae bapon pacana exaname xua jopa beta pejume cowuntsiwa Nacom. <sup>21</sup>Jame pocotsiwa xua xanepanaya

painya neexanaewa tsane meje baxue: Jopa bewa paxaem pewi. Matautano jopa bewa paapaem peamenetsaxawa. Matautano jopa bewa paexanaem pocotsi coyenewatha painya jiton exanaena pon iru pejume cowuntsin Cristo xua abe peexanaewa tsane. <sup>22</sup>Icha paxam pajume cowuntame xua bara Nacom paca copata xua bara painya nenabanaewan daxita coyeneya pexaewan, po pexaewan jopa paca juntu coyene taxobiyo saya jame meisa Nacomtha yabara patsipaebare baxua. Painya xoba ichamonae yabara patsipaebame pexaewa po pexaewa barapomonaе jopa bapana xae. ¡Maisa juntu coyene weiweina pon daxita coyeneya pexaewa penabanaein pon pia juntu coyenewa jopa tsipaebichi xua pinae penatsicuentisiwa xua abe peexanaewaxae Nacomtha poxonaе barapo pexaewa xane! <sup>23</sup>Pon yabara ainya unthuton xeina xua pocotsiwa penabanaewan, bapon barapara pia coya natsicuenta Nacomtha xua abe exana xua poxonaе daichitha xane barapo pexaewa. Daxota daxita pocotsiwan waxainchi exanatsi icha jopa beta yabara jume cowuntichi xua waexanaewa pocotsiwa Nacom ichichipa bapoxonaе barapara abe exanatsi, poxonaе baxuan exanatsi.

**Meje yabara xua pocotsiwa  
bewa exanaetsi xua  
ichamonae tsita xanepanatsi**

**15** Waxainchi pomonaetsi pomonaе ajuntucoyenesutsi xua wajume cowuntsiwa Cristotha. Daxota bewa yawenaetsi pomonaе xua juntu coyene faefaena xua pejume cowuntsiwa Cristotha xua barapomonaе awiya jume cowuntsina. Jopa meisa bewa exanaetsi pocotsiwa xua waxainchi wacoya ichichipatsi. <sup>2</sup>Daxita waxainchi bewa exanaetsi pocotsi coyenewa tsita coyene



xanepanatsi pomonae ichamonae pomonae iru pejume cowuntsiwi pocotsi coyenetha xua barapomonae yawenatsi xua pejume cocowuntaponaenexa. <sup>3</sup>Tsipei Cristo jopa exanaeyo xua pia coya ichichipa pocotsiwa tsita coyene xanepanatsi. Jame saya bapon yabara jume cui copatatsi xua jiwi bapon atene peexanaewatsi poxonae abe yabara paebatsi. Jiwi Cristo bara barapo coyeneya cana exanatsi icha be pocotsi coyeneya caena bayatha Cristo yabara paebatsi Nacom Pejume Diwesitha xua Cristo jeye Nacomtha: “Poxonae jinya necaaitafaetabi jiwi abeya cayabara paeba, barichi barapara xan berena abeya neyabara paeba”, jei Cristo Nacomtha. <sup>4</sup>Daxita xua pocotsiwan caena bayatha tina Nacom Pejume Diwesitha, baxuan yabara tina xua wanaca cuidubinexa Nacom yabara. Baxuan naca cuiduba xua Cristo wawunaewatsinexa. Xeinatsi baxua poxoru Nacom Pejume Diwesi naca cana exana xua jopa dapo coyene xeinaetsi xua bepijawa aitaconaetsi xua bequein ichamonae abe nacata exana. Yawano barapo diwese naca cana exana xua najuntũ coyene tsacabatsi xua wajume cowunta dubenanaebiyawa. <sup>5</sup>Nacom bapon naca cana exana xua jopa bepijawa aitaconaetsi yawano xua naca juntũ coyene tsacaba exana. Barabũ barapon Nacom paca yawena xua peburũya nanta jũpiya pananta xeiname xua painya nabaru exanaewa tsane, icha be pocotsi coyeneya Cristo Jesús exana. <sup>6</sup>Barabũ be caemonae pana nabaru wunaewatsinexa Nacom, pon Jesucristo Paxa tatsi, pon Jesucristo Wanacanamataxeinaein.

**Meje yabara xua po coyene pomonae jopa judiomonae naexanaeyo tsipaebatsi Nacom pia pecapanenebiyae diwesi jume**

<sup>7</sup>Daxota icha Cristo naca ichi xua naca matenta weyataeya waba, paxam bara paichinde. Nantiya pana nantenta weyataeya wabeibare xua bapoxonae jiwi wunaewatsinexa Nacom painya neexanaewamxae baxua. <sup>8</sup>Xan paca tsipaebatsi xua Cristo patopa xua judiomonae peyawenaenexatsi. Cristo baxua exana xua tsita itapeinya xeina xua Nacom bara exana pocotsiwa bapon exanapaeba. Matautano Cristo baxua exana pia nayabara jume cui wetsinexa pocotsiwa bayatha Nacom yabara tsiwunaewatsinexa muxu duta wamo susato jiwitha. <sup>9</sup>Yawano Cristo daxota patopa xua pomonae jopa judiomonae naexanaeyo wunaewatsinexa Nacom xua Nacom wunaewatsinexa peyabara nanta xeinaexae xua peyawenaenexa barapomonae. Nacom Pejume Diwesitha baxua yabara jeye xua Cristo paeba paxatha: “Wunaewatsinexa cajaintatsi daxita nacuan jiwitha pomonae jopa judiomonae naexanaeyo pia xantha tatsi. Wunaewatsinexa cajaintatsi xua poxonae cata naxunatsi”, jei Nacom Pejume Diwesitha xua Cristo Paxatha paeba. <sup>10</sup>Equeicha Nacom Pejume Diwesitha jeye: “Barabũ daxita nacuan jiwi caemonae nabaru juntũ coyene weiweinaena pomonae Nacom itapeta xua pecana exanaenexa piamonae tatsi”, jei Nacom Pejume Diwesitha. <sup>11</sup>Equeicha Nacom Pejume Diwesitha jeye: “Barabũ daxita pam pomonae jopa judiomonae naexanaeyo pam wunaewatsinexa pajainchiname

pontha pon jiwi Pecanamataxeinaein.  
Matautano barabũ daxita nacuanpiwi  
wũnae jainchina bapontha”, jei  
Nacom Pejume Diwesitha.

<sup>12</sup>Equeicha Nacom Pejume Diwesitha  
xua Isafas tatina, jeye:

“Pebin patopaena pon Isai pia  
pemomoxi

susato jiwi jiwana tatsi,  
pon David paxa tatsi.

Bapon Nacom cana exana xua bapon  
itorobiya

pecanamataxeinaenexa tsane pomonae  
jopa judiomonae naexanaeyo.

Barapomonae jume cowuntsiya wũnae  
ewatsina

xua barapon barapomonae  
pecapanenebiwa

tsainchi abe pia peexanaexae cuiuru  
coyenein weya tatsi”, jei Isafas

Nacom Pejume Diwesitha.

<sup>13</sup>Barabũ Nacom pon naca cana ex-  
ana xua wawũnae ewatsiwa Cristo bi-  
chocono paca jũntũ coyene weiweina ex-  
anaena. Matautano barabũ Nacom jũn-  
tema jinompa paca cana exanaena. Na-  
com baxua pacata exana painya nejume  
cowuntsixae bapon. Bapoxonae barabũ  
Nacom paca cana exana xua jopa juniya  
painya newũnae eewatoponaewa tsane  
Cristo. Nacom pia Pejumope tũnaxũ tatsi  
baxua paca cana exana pia peayapusũ  
itorobi coyenewatha.

<sup>14</sup>Tamonae pam, paxam pomonae iru  
painya nejume cowuntsixae Jesucristo.  
Bara xaniwaicha beta yaputan, xua  
paxam beta painya neexanaewam  
po peantobewa xuaunxuae yabara  
paca tsitinatsi. Matautano paxam  
payaputaneme daxita xua pocotsiwa  
bewa paexanaename. Matautano  
payaputaneme xua po coyene bewa  
nantiya pana namuxuwetsim. <sup>15</sup>Barapo  
cartathe pecono jumeyotha atsaquiya  
pacata tinatsi. Baxuan xua pocotsiwan  
pacata tinatsi jopa ichipaeinyo xua

painya nejũntemainawa. Daxota  
atsaquiya pacata tinatsi baxuan  
Nacom tanebarũ cui itura jinaexae  
poxonae necata barapo tanacuichiwa.

<sup>16</sup>Nacom neitoroba xua Jesucristo  
tatanacuichinexa tayawenaenexa  
pomonae jopa judiomonae naexanaeyo.  
Tanacuitan Nacom poxonae cueicueijan  
Nacom pia pecapanenebiyae diwesi  
jume pomonaetha pomonae jopa  
judiomonae naexanaeyo. Barapomonae  
pejume cowuntsixae Cristo, Nacom  
pia Pejumope tũnaxũ tatsi cana exana  
xua barapomonae pejũntũ coyene  
xanepanaewa Nacomtha. Po coyene  
exanan baxua be po coyene icha  
sacerdotemonaepin ichi. Poxonae bapon  
duwei jiwi tsitautatsi abe pia peexanae  
coyenein nexa tatsi bapoxonae barapo  
jiwi Nacom petsita jũntũ coyene  
xanepanaewichi.

<sup>17</sup>Tajume cowuntsixae Cristo Jesús  
daxota bichocono netsita xanepana xua  
tataexanaexae barapo penacuichiwa  
xua Nacom nexa. <sup>18</sup>Jopa yabara  
paebinyo xua Cristo exana ichamonae  
nexa. Saya meisa bichocono netsita  
xanepana pocotsiwa xua Cristo  
exana xan nexa. Cristo neyawena  
xua pomonae jopa judiomonae  
naexanaeyo pejume cowuntsinexa  
Nacom. Barapomonae Nacom jume  
jejeichi poxonae jume tane pocotsiwa  
cueicueijan xuano xua tane pocotsiwan  
xua exananno. <sup>19</sup>Nacom neexana  
xua pia Pejumope tũnaxũ tatsi pia  
peayapusũ itorobi coyenewatha exanan  
pexeinya petsita itubi coyenewan po  
coyene jiwi jũntũ coyene nabenaeca  
cana exainchi. Daxota poxonae  
Jerusalén tomara wewarapiyan daxita  
jiwitha cueicueijan tsoponae Nacom  
pia pecapanenebiyae diwesi jume xua  
Cristo yabara. Baxua exanan beya  
Iliria nacuaatha yacui jopan. <sup>20</sup>Daxota  
ichichipeiban xua tacueicueijejewa

Nacom pia pecapanenebiyae diwesi jume xua Cristo yabara ichaxota cataunxuae jiwi jopa yabara jume taeyo Cristo. Jopa becueicueijanyo Nacom Pejume Diwesi ichaxota ichamonae copiya bayatha cueicueijei barapo diwesi. <sup>21</sup>Poxonae xan baxua exanan, exanan be pocotsiwa bayatha Nacom Pejume Diwesitha pepaebixae, xua Cristo yabara jeichichi:

“Pomonae cataunxuae jopa tsipaebichi po diwesi xua bapon peyabara paebiwatsi, barapomonae jume taena, xua bapon yabara jume taeinchi. Bapoxonae barapomonae yaputaena po diwesi xua bapon peyabara paebiwatsi xua daxota bapon jume cowuntsinchi”, jei Nacom Pejume Diwesitha tatsi.

**Meje xua poxonae Pablo paeba xua pinae beponaena Roma tomara beya**

<sup>22</sup>Ichamonae tatsipaebaponaexae barapo diwesi jopa neitacupaeyo xua tapaca casiwa ponaewatsi. Bequein bayatha ichichipeiban xua tapaca casiwa ponebiwa tsainchi ichitha jopa neitacupeibiyo. <sup>23</sup>Ichitha anoxuae wetan barapo penacuichiwa daxita barapo nacuanthe. Caena bayatha ainya wei ichichipeiban xua tapaca casiwa ponebiwatsi. <sup>24</sup>Anoxuae ichichipan xua tapaca casiwa ponaewa tsainchi poxonae warapaein España nacua beya. Poxonae paxam panejuntũ coyene weiweina cana exanaenameba xua tapaca casiwa ponaexaetsi equeicha warapaein España nacua beya. Ichichipan xua tapanayawenaewam tsane pocotsiwa nantawenonan tawarapaewanexa poxonae painya tomara weya ponaein. <sup>25</sup>Ichitha anoxuaetha copiya ponaein Jerusalén

tomara beya. Capanaein pocotsiwa xua barapo Jerusalén tomarathapiwi peyawenaewatsi, pomonae irũ pejume cowuntsiwi Cristo. <sup>26</sup>Macedonia nacuapiwi irũ Acaya nacuapiwi pomonae pejume cowuntsiwixae Cristo daxita barapomonae pia coya juntucuru exana po coyene tsita coyene xanepanatsi. Barapomonae taitoroba paratixi Jerusalén tomarapiwi nexa, pomonae peacopeibiwi pomonae irũ jume cowunta Jesús icha paxam paichim. <sup>27</sup>Barapo pejume cowuntsiwi pomonae Macedonia nacuapiwi irũ Acaya nacuapiwi barapomonae juntucuru nanta xeina pia coya xua peexanaewa baxua. Barapomonae jopa itorobichi ichũ. Ichitha barapomonae bewa yawenaena pomonaetha pomonae acopeibiwi. Barapomonae pomonae jopa judiomonae naexanaeyo jume tane Nacom pia pecapanenebiyae diwesi jume poxoru bayatha judiomonae yawena pecueicueijeixae barapo diwesi barapomonaetha. Daxota anoxuae pomonae jopa judiomonae naexanaeyo bewa xuya yawenae barapomonaetha judiomonaetha pocotsiwantha xua barapomonae pexeinaexae Nacom weya. <sup>28</sup>Daxota poxonae wetsin barapo penacuichiwa xua catsin daxita barapo paratixi Jerusalén tomarapiwitha, bapoxonae ponaein España nacua beya. Paca siwa ponaeinchi copiya, bapoxonae bara beya warapaein España nacua beya. <sup>29</sup>Bara xaniwaicha yaputan xua poxonae paca siwa ponaeinchi, Cristo necatsina po diwesi paxam nexa po diwesi bichocono paca tsita juntũ coyene xanepana xua daxota painya nejuntũ coyene weiweinaewa tsane.

<sup>30</sup>Tamonae pam, paxam pomonae irũ painya nejume cowuntsiwixae Jesucristo. Paca wũcatsi xua be caemonae panaexande xua ajumesũya daunweya painya pana nebaru

tsipaebinxaxa Nacomtha xua bapon tana neyawenaewa tsane xua tatanacuichiwa bapon. Baxua paca wucatsi iru painya jume cowuntsixae Jesucristo pon Wanacanamataxeinaeinxae. Barichi paca wucatsi iru painya xeinaexae po peantobe coyenewa Nacom pia Pejumo pe tunaxu tatsi naca cata. <sup>31</sup>Nacomtha painta tsipaebare xua jopa abe tana neexanaenexa pomonae Judea nacuatha pejinompaewi, pomonae jopa pejume cowuntsiwi. Matautano Nacomtha painta tsipaebare xua barapo Jerusalén tomarapiwi pomonae pejume cowuntsi jiji tanententa cobe wenotsinexa barapo paratixi. <sup>32</sup>Bapoxonae icha Nacom ichichipaena juntu coyene weiweinaya paca siwa patopaeinchi. Matautano nafifina caewatsin xua tapaca casiwa ponaewatsixae tsainchi. <sup>33</sup>Barabu Nacom pon junte ma jinompa naca cana exana paca baru poponaena daxita. Je, bara ichi tsane.

**Meje yabara poxonae Pablo  
jacobae Roma tomarapiwi**

**16** Anoxuae yabara paca tsipaebatsi powa pewun Febe, powa beta peexanaewayo. Bapowa paca siwa ponaena. Bapowa be wamcho watsicotaewa iru pejume cowuntsixae Jesús. Barapowa Nacom tanacuitatsi xua yawenatsi pomonae pejume cowuntsi jiji Cencrea tomaratha. <sup>2</sup>Barapowa wunaeya pantenta weyataeya wabare Jesucristo piamonae jiwanaxae pon Wanacanamataxeinaein. Baxua bewa paexanaem icha pomonae pejume cowuntsiwi ichi xua bewa nantiya nantenta weyataeya wabeibina. Barapowa payawende xua pocotsiwa barapowa nantawenona, tsipei barapowa bayatha yawena nawita pin bicheitomonae. Yawano barapowa bayatha iru neyawena.

<sup>3</sup>Painta jacobare powa pewun Prisca. Iru painta jacobare, pia pebin tatsi, Aquila, tsipei baru nacuitanbe barapo tanacuichiwa po coyenein exanan Cristo Jesús nexa. <sup>4</sup>Baraponbe bara muxu petupaebe tana necapanepaenexabe poxonae ichamonae juntucuru muxu tana nebexubi. Daxota xan baranbe: “Maisa juntu coyene weiweinaxa xua tapaneyawenaemxabe”, jan. Barichiru daxita pomonae Nacom pejume cowuntsiwichi pomonae jopa judiomonae naexanaeyo pomonae Nacom petsita nacauteibiwichi xua wunae pejainteibinxatsi, jeye: “Maisa pajuntu coyene weiweinaxa xua paxambe pana neyawenaxa xua Pablo jopa petupaewa”, jei. <sup>5</sup>Iruno painta jacobare pomonae nacaetuta Prisca pia pebinbe pia botha tatsibe. Matautano painta jacobare Epeneto pon tajiton, pon bichocono antobein. Bapon pon copiya jume cowunta Cristo Asia nacuatha. <sup>6</sup>Matautano painta jacobare María. Barapowa powa bichocono pacata nacuita. <sup>7</sup>Matautano painta jacobarebe Andrónico iru Junias ponbe iru judiomonaepinbe icha xan ichin. Baponbe neyawa baru muxuna etabe jiji pecubi botha. Matautano baponbe Jesucristo pia peitorobi jiji tatsi jiwana. Jiji beta yaputaena xua baponbe bara Jesucristo pia peitorobi jiji jiwana tatsi. Baponbe caena bayatha netsiwana jume cowuntabe Cristo.

<sup>8</sup>Painta jacobare Ampliato pon tajiton, pon bichocono antobein, pon iru pejume cowuntsixae pontha pon jiji Pecanamataxeinaein. <sup>9</sup>Painta jacobare Urbano, pon xua naca baru muxuna tanacuita Cristo. Matautano painta jacobare Estaquis, pon tajiton, pon bichocono antobein. <sup>10</sup>Painta jacobare Apeles, pon tsita itapeinya xeineiba xua bapon bara xaniwaicha

Cristo pejume cowuntsiwatsi poxonaē bequein abe taexaneibatsi ichamonaē. Matautano painta jacobare Aristóbulo piamonaē tatsi. <sup>11</sup>Matautano painta jacobare Herodión pon iru judiomonaepin icha xan ichin. Iru painta jacobare Narciso piamonaē tatsi pomonaē pejume cowuntsixaerū pontha pon jiwi Pecanamataxeinaein. <sup>12</sup>Iru painta jacobare powa Trifena irūno powa Trifosa. Barapowayobe, powayobe iru tanacuitabe xua pon jiwi Pecanamataxeinaein tanacuitatsibe. Iru painta jacobare Pérsida powayo tajitowayo, powayo antobein iruru pejume cowuntsixaerū. Barapowa iruru nawita daunweya tanacuitaru xua pon jiwi Pecanamataxeinaein daunweya tanacuitatsi. <sup>13</sup>Iru no painta jacobare pon Rufo. Bapon pon jiwi Pecanamataxeinaein itapeta, Rufo itapetatsi xua xanepanaya petanacuitsinexatsi. Iru no painta jacobareno bapon Rufo pena tatsi, powa iru be taena tsicotan. <sup>14</sup>Iru painta jacobare pon Asíncrito, irūno pon Flegonte, irūno pon Hermes irūno pon Patrobas, irūno pon Hermas. Iru no painta jacobare daxita pomonaē iru pejume cowuntsiwixae Cristo pomonaē xua barū jinompatsi barapomonaē. <sup>15</sup>Matautano painta jacobare pon Filólogo. Iru no painta jacobare powa Julia. Iru no painta jacobare pon Nereo, irūno Nereo pamcho tatsi. Iru no painta jacobare pon Olimpas. Matautano painta jacobare daxita pomonaē iru pejume cowuntsiwixae Cristo, pomonaē barū jinompatsi barapomonaē.

<sup>16</sup>Betiya painta nantiya pana nacobe najacobare painya neantobewaxae Cristo. Daxita barapomonaē pomonaē Cristo pejume cowuntsiwichi pomonaē xote jinompe, daxita barapomonaē paca jacobā.

<sup>17</sup>Tamonaē pam, paxam pomonaē iru painya nejume cowuntsiwixae Jesucristo. Paxam paca muxuwetatsi xua dota pam painya necui naitae-watsinexa pomonaē xua tsana paca necaexanaē jiwi xua ainya bicheitobe paca cana exana. Barapomonaē pacata ayapube exana xua painya nejume cowuntsiwa Cristo. Barapomonaē catsawa yabara jume toxeinchiya exana xua Jesucristo pia pecuidubi coyenewa tatsi xua bayatha pocotsiwa pana nacuidubame. Maisa barapomonaē tajū pajume cuitaya ponde. <sup>18</sup>Barapomonaē jopa tanacuichiyo xua Jesucristo jopa tanacuichichi pon Wanacanamataxeinaein. Barapomonaē saya nacuita xua saya pia coutha peexanaenexa xua pocotsiwa barapomonaē ichichipa xua peexanaewa. Barapomonaē muxujainyaba nawita pomonaetha pomonaē be conotha peyaputae jiwi xua abe peexanaē coyene yabara. Baxua exana po jumeintha xua pexeinya jumein yawa po jumeintha itara mexeya bara jume xanepana, ichitha jopa pexainyei jume. <sup>19</sup>Daxita jiwi paca yaputane xua paxam paexaname pocotsiwa Nacom paca itoroba pejume diwesitha. Daxota bichocono juntu coyene weiweinan. Ichichipan xua painya nexainaewa tsane painya neyaputae coyenewan po coyenewan xua pexanepanaē coyenein painya neexanaenexa. Matautano ichichipan xua jopa painya neexanaewa tsane icha be ichi xua poxonaē exana pomonaē jopa peyaputaewi, xua jopa abe painya neexanaewa tsane. <sup>20</sup>Nacom bapon apara pon juntema jinompa naca exana. Barapon aunxuae paca yawenaena xua painya neamanayabiwa tsane pon bichocono abe peexanaein, bapon Satanás. Barabu Jesús, pon Wanacanamataxeinaein, paca yawenaena pia paca nacaantobexae.

<sup>21</sup> Irũno Timoteo paca jacobã pon nebarũ nacuitã Jesucristo nexã. Matautano pon Lucio, irũno pon Jasón, irũno pon Sosípater, barapoyobe paca jacobã. Barapoyobe irũ judiomonaepinbe, ichã xan ichin.

<sup>22</sup> Xan Tercio, barapo cartẽ saya tatinã Pablo. Xan bapon irũrũ paca jacobãtãsi irũrũ taantobexãe pon jiwi Pecanamataxeinaein.

<sup>23</sup> Irũrũ pon Gayo bapon paca jacobã. Xan Pablon bapon Gayo pia bothã tatsi anoxuãe poponan. Baxota pia bothã tatsi tanacaetutatsi pomonãe pejume cowũntsi jiwi, Nacom wũnae pejainchinexatsi. Irũno Erasto paca jacobãrũ pon paratixi peenaein Corinto tomaratha xua Corinto tomarapiwi pia paratixi tatsi. Irũno Cuarto bapon paca jacobã, pon irũ pejume cowũntsin Cristo.

<sup>24</sup> Barabũ Jesucristo, pon Wanacana-mataxeinaein, daxita paxam paca yawenaena pia paca necãantobexãe. Je, barã ichi tsane.

**Meje xua Pablo Nacom wũnae  
jaintatsi poxonãe najume  
opi dutã exana barapo cartẽ**

<sup>25</sup> Barabũ wũnae jaintatsi Nacom. Nacom itacupatsi xua paca

ajũntũyapũshya canã exana xua beta painya nejume cowũntsinexã barapo pexeinya pecapanenebiyãe diwesi jume coyenewathaxãe. Barapo diwesi Jesucristo yabara cueicueijan. Caena bayatha poxonãe Nacom aena nacua forota, barapo pexeinya pecapanenebiyãe diwesi jume cataunxuãe jopa tsita jume itapeinya xeinaeyo, tsipei abũ be namicha jume yawũn xeina xua jiwi jopa yaputaeyo. Ichithã anoxuãe Nacom tsita jume itapeinya xeina barapo diwesi. <sup>26</sup> Barapo pexeinya pecapanenebiyãe diwesi jume, anoxuãe jiwi barapo diwesi yaputane, Nacom pia peitorobi jume pepaebiwĩ peyabara tinaexãe barapo pexainyeyi jume diwesi. Matautano jiwi yaputane poxorũ Nacom peitorobixãe, pon xua ataya tsitecaeya popona. Barapo diwesi Nacom jume tane exana daxita nacuanpiwithã, xua barapo jiwi pejume cowũntsinexã Cristo. Matautano jume tane exana xua barapo jiwi peexanaewa tsane pocotsiwa Nacom itoroba.

<sup>27</sup> Barabũ Nacom wũnae jaintatsi, pon meisa compã yatsicaewa daxita peyaputaein. Jesucristo naca canã exana xua Nacom wũnae wajainchiwa xua ataya nexã. Je, barã ichi tsane.

Baja Pablo.

## Meje Po Carte Copiya Tatina Pablo Corinto Tomarapiwi Tatinatsi

### Meje poxonae Pablo tatina Corinto tomarapiwi

**1** Xan, Pablon, pacata tinatsi Nacom peichichipaexae xua tana newabiwa xua tana neexanaewa Jesucristo pia peitorobi jiwu jiwana tatsin. Irano Sóstenes pon iru pejume cowuntsin Jesucristo, baponbe panbe pacata tinatsi. <sup>2</sup>Paxam pomonaе painya nejume cowuntsi jiwu pam Corinto tomaratha. Barapomonaе pam pacata tinatsi pomonaе Nacom piamonaе tatsi pam painya neyawa jinompaexae Cristo Jesús. Nacom paca waba painya nenajuntu coyene wunaе exanaenexa Nacomtha. Pacata tinatsi daxita nacuapiwi pam, pomonaе iru painya nejume cowuntsiwixae pam Jesucristo, xua pomonaе painya newun ununeibiwi Jesús pewun poxonaе pawuqueibame Nacomtha. Bapon Jesucristo Wanacanamataxeinaein iruru daxita nacuanthapiwi pomonaе pejume cowuntsiwi barapomonaе pia Pecanamataxeinaeinchi tatsi. <sup>3</sup>Barabu Nacom Waxa, iru Jesucristo pon jiwu Pecanamataxeinaein junteма jinompa paca exanaena. Matautano barabu baponbe paca yawenaena pia paca necaantobewaxae.

### Meje poxonae Pablo tawuca Nacomtha Corinto tomarapiwi

<sup>4</sup>Daxita matabi tsaibi Nacomtha pacata tsipaеibatsi, jan tsaibin: “Nacom maisa juntu coyene weiweinan xua barapomonaе tana neyawenaewa xua Cristo Jesús peantobexae barapomonaetha”, jan tsaibin. <sup>5</sup>Painya neyawa muxuna jinompaexae Cristo,

daxota Nacom peayapusuwa jopa juniya paca catsiyo xua xaniwaicha painya nepaеbiwa pejume diwesi. Barapon Nacom paca cata po coyene beta yabara painya neyaputaewa bapon. <sup>6</sup>Po diwesi paca tsipaebatsi Cristo yabara xua bapon paca cana exana painya nejinompaewa bapon nexa baxua anoxuae xaniwaicha paexanaponame. <sup>7</sup>Paxam paxeiname pocotsiwa Nacom pia Pejumope tunaxu tatsi paca cata, daxita xua pocotsiwan panantawenoname xua betiya painya nejinompaewa tsane Nacom nexa. Daxita baxuan paxeina dubenanaеbiyaename poxonaе cataunxuae pawunaе ewatsiname xua poxonaе Jesucristo po mataqueitha equeicha patopeicaena pon Wanacanamataxeinaein. <sup>8</sup>Nacom paca yaweneibina xua paajuntusuya jinompaename beya poxonaе Jesucristo equeicha patopaetsica. Dapon xain aibi tsane pon paca yabara paeba xua painya nenatsicuentiwa xua аbe painya neexanaexae Nacomtha xua poxonaе equeicha patopaetsica pon Wanacanamataxeinaein Jesucristo. <sup>9</sup>Nacom bara ataya exaneiba pocotsiwa pia petsiwunaе muxu dutsiwan. Barapon Nacom paca waba painya neyawa muxuna jinompaenexa tsane Jesucristo pon Wanacanamataxeinaein, Nacom Pexanto tatsi.

### Meje poxonae Pablo yabara paeba po coyene pomonaе pejume cowuntsiwi Cristo xua natsaba nacana exana

<sup>10</sup>Tamonaе pam, paxam pomonaе iru painya nejume cowuntsiwixae Jesucristo. Jume daunweya paca tsipaebatsi tajuntu coyenetha tsipei daxita paxam Jesucristo piamonaе tatsi pam pon Wanacanamataxeinaein. Caemonaе peburuya cuita pacueicueijan tsurubenaеbiyama. Jopa pana

najume matsontsonobinde xua daxota painya nenatsabiwam tsipae. Jame maisa peburuya pananta xeinare xua be bara caemonae pam. <sup>11</sup>Tamonae pam, pomonae iru painya nejume cowantsiwixae Jesucristo. Daxota baxua paca tsipaebatsi, yaitama yabuyo powa pewan Cloé piamonae tatsi netsipaeba pinae paxam nantiya pana najume matsontsonoba dubenanaebiyame. <sup>12</sup>Jume tan xua paxam jiwana xua barompaya tsanaya paeba, jeye: “Pablo yabara jume cowantan pocotsiwa cuiduba”, jei. Ichamonae jeye: “Apolos yabara jume cowantan pocotsiwa cuiduba”, jei. Ichamonae jeye: “Pedro yabara jume cowantan pocotsiwa cuiduba”, jei. Ichamonae jeye: “Cristo yabara jume cowantan pocotsiwa cuiduba”, jei. <sup>13</sup>Daxita paxam jopa bewa barapo coyene paexanaem xua ainyamonaein pana naexaname. Cristo jopa pia coutha nanantarubiya exanaeyo tsipei Cristo apara bara caein. Xan, Pablon, jopa apara paca tsitupaetsi naetotha. Jopa apara paca bautisabichi tawuntha xua daxota tamonae painya nenaexanaenexam. <sup>14</sup>¡Pai jaibo! ¿Incane metha barichipaein? ¿Incane metha bautisabichipan? Daxota Nacom tsipaeban janje: “Nacom maisa juntu coyene weiweinan xua barapomonae jopa tabautisabiwa”, jan. Saya meisa bautisaban Crispo iruru Gayo. <sup>15</sup>Daxota dapon aibi pon itacupatsi xua pejeiwa: “Xan nebautisaba Pablo pewuntha”, xua pejeiwa. <sup>16</sup>Jaina iruru Estéfnas piamonae tatsi bautisaban. Ichitha ichamonae jopa yabara nanta xeinaeyo xua tabautisabiwa bayatha. <sup>17</sup>Cristo jopa neitorobiyo xua tabautisabinexa jiwi. Jame saya Cristo neitoroba xua yabara tacueicueijainexa pecapanenebiyae diwesi. Ichitha jopa cueicueijanyo icha be ichi pon bichocono cueicueijei

poxoru bichocono peyaputaexae. Ichi baxua exanaetsipan jiwi jopa yabara yaputaetsipae Jesucristo pia pecapanenebiyae diwesi xua poxonae Cristo naetotha tsitupa jiwi.

**Meje poxonae Pablo yabara paeba  
xua Cristo xeina Nacom pia  
peyapusuwa tatsi xuano Nacom pia  
peyaputae coyenewano tatsi**

<sup>18</sup>Ichamonae jopa beta yabara nanta xeinaeyo po diwesi xua Cristo petsitupaewa naetotha jiwi. Barapomonae yawa muxuna weraweracaena abe peexanaewan. Barapomonae jopa pejume cowantsixae Jesucristo daxota nanta xeina xua barapo diwesi be tsita penamitacueinchi diwesi jumetsi. Ichitha ichamonae beta yabara nanta xeina barapo diwesi. Barapomonae Nacom capanenebiyaena abe pia peexanae cuiru coyenein tatsi weya. Barapomonae yaputane xua barapo diwesi bichocono peyapusu diwesi xua Nacom weya. <sup>19</sup>Nacom Pejume Diwesitha baxua yabara paeba. Nacom jeye:

“Weraweraca exanaein peyaputae coyenewan, po  
peyaputae coyenewan xeina pomonae  
peyaputaewi.

Pecuidubi coyenewan beban tsane,  
po pecuidubi coyenewan xeina  
pomonae peyaputaewi”, jei Nacom.

<sup>20</sup>Pon xua peyaputaein iru pon xua pecuidubin, iru pon jume daunweya yabara cueicueijei po nacuathe, barapomonae Nacom jopa tsita ainya cuichi. Nacom cui capona peyaputae coyenewan, po peyaputae coyenewan xeina pomonae peyaputae jiwi barapo cae pin nacuathe. <sup>21</sup>Nacom xainyeya xeina peyaputae coyenewa. Nacom jopa copatsiyo jiwi xua peyaputaewatsi bapon, peyaputae coyenewatha po peyaputae coyenewa



xeina pomonae jinompa barapo cae pin nacuathe. Jame Nacom ichichipa xua capanepa jiwi abe pia peexanae cuiuru coyenein weya pejume cowuntsixaetsi poxonae pacueicueijan Nacom Pejume Diwesi. Barapo diwesi ichamonae tsita penamitacueinchi diwesichi. <sup>22</sup>Judiomonae ichichipa tane nawita Nacom pia pexeinya petsita itutsi coyenewan xua pejume cowuntsinexa tsane Nacom Pejume Diwesi. Seicaya nama griegomonae yabara jeita nawita barapo irathe pia peyaputae coyenewan xua pejume cowuntsinexa tsane Nacom Pejume Diwesi. <sup>23</sup>Ichitha paxan payabara cueicueijan Mesías pon naetotha tsitupa xua jiwi abe pia peexanae cuiuru coyenein tatsi. Barapo diwesi judiomonae jopa be jume jejeyo poxoru tsita ajumebetsi. Seicaya nama pomonae jopa judiomonae naexanaeyo tsita penamitacueinchi diwesichi barapo diwesi. <sup>24</sup>Ichitha pomonae Nacom waba pomonae bara metha bequein judiomonae tsipae iruru pomonae metha bequein jopa judiomonae naexanaeyo tsipae barapomonae jame Jesucristo jume cowuntatsi. Barapomonae nanta xeina xua Mesías xeina Nacom pia peyapusu coyenewa tatsi matautano xua Nacom pia peyaputae coyenewa tatsi xua jiwi pecapanenebiyaenexa tsainchi. <sup>25</sup>Pocotsiwa jiwi tsita penamitacueinchi diwesichi xua Nacom exana baxua apara bara jame Nacom bichocono tsita peyaputae coyenewatsi, beyacaincha po peyaputae coyenewa jiwi xeina barapo cae pin nacuathe. Matautano pocotsiwa jiwi jopa tsita peyapusutsi xua Nacom xeina baxua apara bara jame Nacom tsita peyapusu coyenewatsi bichocono, beyacaincha po peyapusu coyenewa jiwi xeina barapo cae pin nacuathe. <sup>26</sup>Tamonae pam, paxam pomonae iru painya nejume

cowuntsiwixae Jesucristo. Paxam bewa pana nacayabara nanta xeinaem xua eta po jiwi pam xua poxonae Nacom aena paca waba. Bapoxonae pananta xeiname xua saya paxam caeyobe pam pomonae peyaputae jiwi pam. Barichi paxam saya caeyobe pam pomonae peyapusuya itorobi jiwi pam. Matautano paxam saya caeyobe pam pomonae peainya cui jiwi pam. <sup>27</sup>Nacom itapeta pomonae xua ichamonae yabara jeichi: “Barapomonae apara pomonae jopa peyaputae jiwi”, jei. Ichitha barapomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi, pomonae bichocono peyaputaewi. Barapomonae pomonae pia coutha peyaputaewi penaexanaewixae aura tsane, tsipei yaputaena xua pomonae Nacom pia peitapetsiwixae tatsi xaniwaicha barapomonae peyaputaewi. Matautano Nacom itapeta pomonae xua ichamonae yabara jeichi: “Apara barapomonae pomonae pejuntu coyene faefaenaewi pejume cowuntsiwatha”, jei. Ichitha barapomonae pomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi pomonae pia coutha penayabara nanta xeinaewa xua bichocono pexeinaewa peajuntucoyenesuwa. <sup>28</sup>Nacom itapeta pomonae barapo cae pin nacuathepiwi jiwana, pomonae pecui pawu jiwi xua piamonae peexanaenexa. Barapomonae pomonae ichamonae abe peyabara paebiwichi, matautano xuano pomonae ichamonae jopa petsita ainya cui jiwichi. Nacom itapeta pomonae jopa peainya cui jiwi xua penajume tsita itapeinya xeinaenexa xua Nacom jopa peitapetsiwa pomonae pia coutha penacayabara nanta xeinaewa xua peainya cui jiwi. <sup>29</sup>Daxota dapon

aibi pon peitacupaewatsi xua Nacom peitabaratha atsaquiya penayabara paebiwa xua peainya cui jitonxae. <sup>30</sup>Nacom paca exana xua painya neyawa jinompaewa Cristo Jesús pia peajüntuyapuswa tatsi. Matautano Nacom naca exana xua xeinatsi Cristo Jesús pia peyaputae coyenewa tatsi wayaputaenexa Nacom. Matautano Cristo naca cana exana xua wajüntu coyene xanepanaewa xua jopa wanatsicuentsiwa xua abe waexanaexae Nacomtha. Matautano Cristo naca exana xua watanacuichinexa Nacom, bapon piamonaexae tatsichi. Nacom naca yantomata xua Jesucristo naca tsitupa naetotha wanaca capanenebiyaenexa abe waexanae cuiuru coyenein weya. <sup>31</sup>Daxota Nacom Pejume Diwesitha paeba jeye: “Jiwi jopa bewa pia coutha atsaquiya nayabara paebi xua peainya cui jiwixae. Bũ jame moya barapo jiwi bewa saya atsaquiya yabara paebina po coyene Nacom pia peainya cui coyenewa tatsi pon jiwi Pecanamataxeinaeinchi”, jei Nacom Pejume Diwesitha.

### Meje xua Cristo petupaewa diwesi yabara

**2** Tamonae pam, paxam pomonae irũ painya nejume cowuntsiwixae Jesucristo. Patopan painya xantha tapaca catsipaebinxatsi Nacom pia pexainyei diwesi jume. Bapoxonae jopa paca tsipaebichi po diwesi ayapube xua tacueicueiweiwa xua poxonae icha ichi xua paeba pon peyaputaen bichocono. <sup>2</sup>Poxonae poponan painya xantha, saya meisa Jesucristo yabara nanta xeinan xua tapaca catsipaebinxatsi. Matautano yabara tapaca catsipaebinxatsi po coyene poxonae bapon naetotha tupa. <sup>3</sup>Poxonae paxamtha naitutan nayabara nanta xeinan xua neita coxana xua beta

tacueicueiweiwa. Matautano tajunuwi unthuthũ deideijan. <sup>4</sup>Poxonae paca tsipaebatsi Nacom Pejume Diwesi jopa paca tsipaebichi po jumein ayapube xua icha ichi poxonae cueicueiwei pon bichocono peyaputaen. Ichitha seicaya nama paca tsipaebatsi tana neitorobixae Nacom pia Pejumope tũnaxũ tatsi yawano Nacom pia peayapusũ itorobi coyenewathano. <sup>5</sup>Daxota poxonae pajume cowuntame Jesucristo apara poxoru jopa painya nejume cowuntsixae jiwi pia peyaputae coyenewa. Apara jame poxoru Nacom painya nepaca yawenaexae pia peayapusũ itorobi coyenewatha daxota pajume cowuntame.

### Meje yabara xua Nacom naca yaputane exana pia Pejumo petũnaxũta tatsi

<sup>6</sup>Paxan pacueicueijan pomonaetha pomonae bichocono pejume cowuntsiwi Nacomtha xua Nacom pia peyaputae coyenewa tatsi. Nacom pia peyaputae coyenewa tatsi jopa apara barapo cae pin nacuathe weya ponaeyo. Matautano jopa apara barapo coyene xua po coyene jopa ponaeyo pomonae piamonae itorobiya pecanamataxeinaewi weya. Pomonae anoxuae piamonae itorobiya pecanamataxeinaewi werapaena, yawano weraweracaena pia peyaputae coyenewan tatsi. <sup>7</sup>Po coyene xua paca tsipaebatsi apara Nacom pia peyaputae coyenewa tatsi. Barapo coyene caena bayatha Nacom namicha yawũn xeina xua jiwi jopa yabara yaputaeyo beya anoxuae Nacom najume tsita itapeinya xeina. Caena bayatha pewũnaeya poxonae Nacom nacua forotsina bapon nanta xeina xua naca capanepaena. Baxua apara Nacom pia peyaputae coyenewa tatsi xua matapainya naituta. <sup>8</sup>Barapomonae pomonae piamonae itorobiya pecanamataxeinaewi

jopa yabara yaputaeyo Nacom pia peyaputae coyenewa tatsi. Icha metha barapomonaе yaputaetsipa metha jopa Jesucristo naetotha tupa exanaetsipaetsi, pon jiwi Pecanamataxeinaein, pon pexeinya peitupanae coicha pexeinaein. <sup>9</sup>Nacom Pejume Diwesitha baxua yabara jeye:

“Nacom bayatha jiwi tsiwunaeta po jiwi peantobewixaeysi pocotsiwan xua bichocono

pewunaewan xua exana barapo jiwi nexa.

Barapocotsiwan jiwi jopa yabara yaputaeyo,

matautano jopa yabara jume taeyo.

Matautano Nacom tsiwunaeta pocotsiwa xua jiwi jopa bapana yabara nanta xeinae

jopa juniya pewunaexae”, jei Nacom Pejume Diwesitha.

<sup>10</sup>Nacom yabara naca yaputane exana baxuan pia Pejumope tunaxutha tatsi. Nacom pia Pejumope tunaxu tatsi daxita yaputaeya necota pocotsiwa naca yaputane exana, beya yawa muxunano naca yaputane exana pocotsiwa Nacom namicha yawun xeina.

<sup>11</sup>Jiton dapon aibi pon itacupatsi xua yaputane ichun pia pejuntu coyene tatsi. Saya jame meisa ichun itacupatsi xua pia coutha najuntu coyene yaputane. Bara juta ichi meisa Nacom pia Pejumope tunaxu tatsi yaputane xua Nacom pia pejuntu coyenewa tatsi. <sup>12</sup>Nacom jopa naca copatsiyo xua bara wacoutha wayaputaewa tsane xua be pocotsi coyene Nacom pia penanta xeinaewa tsane. Aparajame seicaya naca cata pia Pejumope tunaxu tatsi, wanaca yaputane exanaenexa xua pocotsiwan yabara Nacom wanaca catsiwa wanaca antobexae. <sup>13</sup>Waxainchi diwesi cueicueijeichi pomonaetha pomonaе Nacom pejume cowuntsiwi

po coyenetha Nacom pia Pejumope tunaxu tatsi naca yaputane exana. Jopa apara barapo diwesi cueicueijeichi xua saya barapo cae pin nacuathepiwi pia coyenetha tatsi xua saya ba wacoutha wananta xeinaewa. Daxota yabara paebatsi pocotsiwan xua Nacom pia Pejumope tunaxu tatsi ichichipa paeba pomonaetha pomonaе Jesús pejume cowuntsiwixaeysi. Barapomonaе yaputane barapocotsiwan.

<sup>14</sup>Nama pon jopa pejume cowuntsin Jesús jopa yaputaeyo pocotsiwan wacueicueijeiwa, pocotsiwan Nacom pia Pejumope tunaxu tatsi naca yaputane exana. Tsipei bapon tsita penamitacueinchi jumetsi. Bapon jopa yaputaeyo barapo diwesi tsipei jopa xeinaeyo Nacom pia Pejumope tunaxu tatsi xua peyawenaenexatsi xua peyaputaewanexa. <sup>15</sup>Jame pon pejume cowuntsin Nacom, bapon yawenatsi Nacom pia Pejumope tunaxu tatsi xua yabara peyaputaewa daxitan. Ichamonae jopa itacupaetsi xua bapon peyabara paebiwatsi xua penatsicuentisiwa xua abe peexanaexae.

<sup>16</sup>Nacom Pejume Diwesitha barapo coyene yabara jeye: “¿Jintam yaputane Nacom pia penanta xeinaewa tatsi xua pecuidubinexa tsane Nacomtha pon jiwi Pecanamataxeinaein? Jume apara, apara dapon aibi”, jei Nacom Pejume Diwesitha. Waxainchi nanta xeinatsi icha be pocotsi coyeneya Cristo ichi xua penanta xeinaewa.

**Meje xua Pablo yabara paeba  
pomonaе penabarũ  
nacuichiwi Nacom nexa**

**3** Tamonaе pam, paxam pomonaе irũ painya nejume cowuntsiwixae Jesucristo. Jopa neitacupaeyo xua tapaca catsipaebiwa tsainchi icha bichocono pajume cowuntame Nacomtha icha be pocotsi jiwimonaе

ichi pomonae bichocono jume cowanta Nacom. Ichitha daxota paca tsipaebatsi tsipei paxam be barapocotsi jiwimonae pam pomonae jopa bichocono Nacom yabara yaputaetsi. Paxam paca tsipaebatsi be pexui pam xua aena pajume cowantame Cristo. <sup>2</sup>Pocotsi coyene xua ayapube jopa paca cuidubichi, icha be coxiwa ichi xua poxona apata mito pexuyo poxona cataunxuae jopa yaputaeyo xua xane pexaewa. Cataunxuae jopa neitacupaeyo xua tapaca cuidubinexatsi po diwesi bichocono daunwei poxoru awiya jopa payaputaem. Paxam be barapocotsi pexui pam xua po pexui cataunxuae jopa itacupaetsi xua pewito pexaewa. <sup>3</sup>Paxam cataunxuae painompame icha be ichi poxona jinompa pomonae jopa pejume cowuntsiwi Nacom. Poxona paxam nantiya pana nauwa dubenanaebiyame, yawa nantiya pana naba dubenanaebiyame, painompame icha be ichi xua jinompa xuano abe exana dubenanaebiya pomonae jopa pejume cowuntsiwi Nacom. <sup>4</sup>Ichamonae pomonae paxam jiwana pam, jeye: “Pablo yabara jume cowantan pocotsiwa cuiduba”, jei. Ichun jeye: “Apolos yabara jume cowantan pocotsiwa cuiduba”, jei. Poxonae papaebame baxua bapoxonae bara pajinompame icha jiwi ichi poxonae jinompa pomonae jopa pejume cowuntsiwi Nacom.

<sup>5</sup>Daxota paca tsipaebatsi: Xan Pablo jopa taainya cui jiton, barichiru Apolos. Apra paxanbe saya ponbe amanaya pata tanacuichinbe Nacom. Nacom Apolos pana neitorobabe xua pata cueicueijeinexabe Nacom Pejume Diwesi. Apolos baxua pata exanaeabe daxota pajume cowantame Jesucristo pon jiwi Pecanamataxeinaein. <sup>6</sup>Xan Pablon paca cuidubatsi Nacom

Pejume Diwesi. Apolos xuya equeicha ichawa paca cuiduba Nacom yabara. Ichitha nama Nacom apra bapon, pon paca yawena xua painya nejume cocowantaponaenexa. Barapo coyene icha be nae ichi xua peubi nae. Ichun ubanota. Ichun mera mata epababapona. Ichitha nama Nacom, apra bapon, pon exana xua xaniwaicha xuwa. <sup>7</sup>Ichun copiya uba iru ichun xuya mata epababa meratha. Pon peubixae jopa ainya cui jitonyo. Iru pon xuya pemata epababaponaexae meratha, bapon jopa ainya cui jitonyo. Jame saya meisa Nacom ainya cui, tsipei Nacom daxita xuwa exana naewan. Daxota Nacom bichocono ainya cui beyacaincha xua barapo pebinbe. Barichi Apolos iru xan Pablon jopa ainya cui jitonyo panbe. Jame Nacom bichocono ainya cui beyacaincha paxanbe. <sup>8</sup>Pomonae xua uba iru pomonae xuya meratha mata epababapona barapomonae Nacom tsita najupatsi. Nacom pentoma cata barapomonaetha be pocotsi coyeneya xua barapomonae petanacuichiwa. Pon xua abeya petanacuichixae, be conotha matoma catsinchi. Pon xua wunaeya petanacuichixae, wunaeya matoma catsinchi. <sup>9</sup>Paxan pana nabaruru yawa tanacuitan Nacom xua pata cueicueijejiwa Nacom Pejume Diwesi poxonae paca cuidubatsi xua painya nejume cowuntsiwa tsane Nacom. Barapocotsi juta coyeneya paexanan poxonae Nacom Pejume Diwesi paca cuidubatsi icha pebin ichi poxonae uba pabitha xua petanaforotsinexatsi pexaewa. Nacom paca exana xua beta painya nejume cocowantaponaewa bapon xua beya bichocono painya nejuntu coyene xanepanaewa tsane. Baxua Nacom paca cana exana, icha be pocotsi juta coyeneya ichi poxonae pebin bomuru acabapona xua beya

poxonae bichocono pexeinya bo.  
<sup>10</sup>Nacom necopata xua ponxaein copiya matha tapaca cayawenaewatsi xua painya nejume cowuntsinexa bapon. Nama bapoxonae xuya ichamonae paca cuidubapona Nacom Pejume Diwesi xua painya nejume cocowuntaponaenexa. Barapocotsi juta coyeneya exanan poxonae tapaca cayawenaewatsi, icha pebin ichi pon peyaputaen xua bo peacabiwa poxonae bo acaba po bo ibo bo. Bapon copiya matha tsicobe nobabareca po iboton beta petabu caumenaewa xua ichamonae tsicobe nobabarecatsi. Athawetsica xuya ichamonae exanapona. Daxita pomonae acaba barapo ibo bo bewa beta xanepanaya exanaena icha jiwi ichi xua poxonae bewa beta taexanaena xua pocotsiwa taexana Nacom nexa.  
<sup>11</sup>Poxonae jiton ibo bo acaba bapon copiya beta noba po iboton xua copiya nanta caumena. Bapoxonae ichun bewa icha iboton beta cuaranobi barapo iboton pecoyoreca xua bo pexeinya bo petsuncuaenexa. Barapocotsi juta coyeneya ichi, poxonae paca cuidubatsi Jesucristo pejume diwesi. Ichun bewa beta yabara paca cuidubina icha coyene xua baxua painya nejume cowuntsinexa.  
<sup>12</sup>Po pebin ibo bo acaba barapo pebin itacupatsi xua jebabapona ichawa barapo ibotontha, po ibotontha copiya nanta caumena. Pocotsiwan bapon itacupatsi xua jebabapona bichocono ayapusu be pocotsiwa pewun oro nain, yawano pocotsiwa xua pewun plata nain yawa pocotsiwa be iboton po iboton xua bichocono ainya matoma. Ichacuitha barapo pebin itacupatsi xua barapo ibotontha jebabapona pocotsiwan xua pepawi be naepawa, yawa be naepanaewan yawa be musuriboton. Bara juta ichi, pebin itacupatsi xua yawenaena ichamonaetha.

Ichacuitha beta cuidubina pomonae xua jume cowunta Jesucristotha pocotsiwa xua bichocono ayapusu. Ichacuitha cuidubina pocotsiwa xua pepawi pomonae xua jume cowunta Jesucristotha xua jopa ayapusuyo.  
<sup>13</sup>Jopaena matabi po mataqueitha Nacom yabara paebina jiwi xua penatsicuentisiwa xua abe peexanaexae. Barapo mataqueitha Nacom taena po coyene xua jiwi taexana Nacom. Nacom bichocono tsita xanepanatsi pocotsiwa xua bichocono ayapusu po coyenein jiwi taexana bapon nexa. Ichitha nama Nacom naitemata po coyene jopa tsita xanepanaetsi xua pocotsiwa bequein jiwi taexana bapon nexa.  
<sup>14</sup>Icha pebin exana pocotsiwa xua bichocono ayapusu xua Nacom nexa, Nacom matoma catsina bapontha.  
<sup>15</sup>Ichitha icha ichun taexana Nacom pocotsiwa Nacom jopa tsita xanepanaetsi, daxita barapo coyenein Nacom naitemata po coyene bequein bapon Nacom taexanatsi. Ichitha bapon capanepatsi poxonae Nacom naitemata po coyene bapon exana, icha pebin ichichi xua capanepatsi isoto weya bequein daxita tataxotsi xua pocotsiwa xeina.

<sup>16</sup>Barapara paxam payaputaneme xua painya juntu coyene Nacom tsitatsi xua bara be Nacom pin pia bo tatsi tsipei Nacom pia Pejumope tunaxu tatsi popona painya juntu coyenetha.  
<sup>17</sup>Icha ichun saraboba Nacom pin pia bo, Nacom xuya weraweraca exanaena barapo jitontha. Nacom pin pia bo tatsi, bara po bo Nacom tsita xanepanatsi poxorua pia Pejumope tunaxu tatsi pepoponaexae barapo botha. Icha Nacom ichi xua weraweraca cana exana pontha pon petasarabobixaetsi pin pia bo tatsi, barichi xuya Nacom weraweraca cana exanaena pontha pon paca juntu coyene itoroba xua abe painya neexanaewa tsane. Nacom baxua exana tsipei Nacom pia Peju-

mope tñaxu tatsi popona painya jũntu coyenetha.

<sup>18</sup>Jopa pacopatsinde xua painya coutha pana namuxitorobame. Icha ichũn pia coutha nacayabara nanta xeina xua bichocono peyaputaen icha barapo cae pin nacuathepiwi ichi, bewa bapon pia coutha equeicha caewa naexanae be pocotsin jopa peyaputaen. Bapoxonae bapon bara Nacom tsita be pon pepa peyaputaenchi. <sup>19</sup>Nacom tsita penamitacueinchi jumetsi po peyaputae coyenewan yaputane jiwi pomonae barapo cae pin nacuathe jinompa. Nacom Pejume Diwesitha barapo jiwi yabara jeichi: “Nacom tsitatsi xua apara xeina penatsicuentisiwa xua abe peexanaexae pocotsi jiton peyaputaen, peexanaexae barompaya pia peyaputae coyenewatha”, jei Nacom Pejume Diwesitha. <sup>20</sup>Matautano Nacom Pejume Diwesitha baxua yabara jeino: “Nacom yaputane po coyenein nanta xeina pomonae peyaputaewi. Barapocotsi coyenein Nacom tsita penamitacueinchi jumetsi”, jei Nacom Pejume Diwesitha. <sup>21</sup>Pomonae pejume cowũntsiwi Jesucristo jopa bewa atsaquiya pana neyabara paebi tsane xua pejiwa: “Pon jume cowũntan pocotsiwa cuiduba bapon bichocono peyaputaen beyacaincha ichũn pon peyaputaen”, xua pata taneyabara jeiwa pomonae pejume cowũntsiwi. Tsipei paxan pomonae pecuidubiwi pan saya pebiwi pan xua jopa bichocono peyaputaewi pan. Dapocotsiwa aibi xua pocotsiwa payaweraweracame xua jopa paxeinaem. Daxita pomonae painya nepaca cuidubiwi, iruno daxita coyenein pocotsiwa Nacom forota, bara Nacom exana paxam nexa painya nepaca cayawenaewa tsane. <sup>22</sup>Xan Pablon Nacom neitoroba, irũ Apolos itorobatsi, irũ Pedro itorobatsi xua pata

paca cayawenaenexatsi. Nacom paca cata daxita xua barapo ira piawan, xua painya nepaca yawenaenexa. Matautano yabara paca yaputane exana xua peajuntuyapusuwa, po coyenewano petupae coyenewa, matautano po coyene anoxuae piawa yabara, po coyenewano bexa piawa yabara xua painya nepaca yawenaenexa. <sup>23</sup>Baraxuan daxita paxeiname Cristo piamonae jiwi tatsi pamxaem. Barichi Cristo barapara Nacom Pexanto tatsi.

#### **Meje xua Jesucristo pia peitorobi jiwi tatsi taexana, Nacom taexanatsi**

**4** Paxam bewa pana neyabara nanta xeinaename xua paxan meisa saya barapomonae pan xua pomonae Cristo amanaya pata tanacuichi jiwi pan. Paxan yabara pacuiduban Nacom moya pia peyawũn xeinaewa tatsi po coyene copiya bequein bayatha moya yawũn xeina xua jiwi jopa yabara yaputaeyo. Barapo coyene xua moya peyawũn xeinaewa, anoxuae Nacom najume yabara copata xua jiwi bara peyaputaenexa. <sup>2</sup>Pon tanacuita pia pecanamataxeinaenchi, barapon bewa bara xaniwaicha exanaena pocotsiwa pia pecanamataxeinaenchi tsipaeba xua bepa exanaena pinae xua daxota pejume cowũntsinexatsi pia pecanamataxeinaenchi xua bara xaniwaicha exana. <sup>3</sup>Jopa netsita ainya cuiyo xua paxam tapaneyabara paebiwam xua tacuidubiwa yabara xua icha metha bara exanan pocotsiwa Nacom neitoroba. Matautano jopa netsita ainya cuiyo xua jiwi taneyabara paebiwa xua barapo coyene xua icha metha bara exanan. Barichi tacoutha jopa nayabara nanta xeinaenyo xua icha metha barapo coyene jopa exanaenyo, xua daxota tanatsicuentisixae abe taexanaexae Nacomtha. <sup>4</sup>Tajuntũ coyene netsipaeba

xua bara pinae xanepanaya taexanaewa. Bequein tajuntũ coyene baxua netsipaeba ichitha jopa nayaputaeyino xua metha apara abe taexanaewa xua daxota Nacom tsita natsicuantan. Nacom pon jiwi Pecanamataxeinaein bapon apara pon taneyabara paebin xua tanatsicuentisiwa xua abe taexanaexae. Bapon meisa nejuntũ coyene yaputane icha bara metha tsita xeinan xua tanatsicuentisiwa xua abe taexanaexae. <sup>5</sup>Jopa bepijawa payabara paebinde ichamonae xua abe pia peexanaewa. Abũ tsane beya poxonae patopaetsica pon jiwi Pecanamataxeinaein bapoxonae payabara paebiname abe pia peexanaewa. Barapon Nacom tsita itutsina po coyene xua jiwi pia pejuntũ coyenewatha namicha xeina po coyene xua ichamonae jopa taeyo. Bapon Nacom pon jiwi Pecanamataxeinaein itutsina po coyenein jiwi namicha xeina pejuntũ coyeneintha xua penatsicuentisiwan po coyenein xua Nacom petsita exanaewatsi. Daxita barompaya jiwitha Nacom yabara paebina po coyene pia petaexanaewichi. Pontha pon xanepanaya petanacuitsinchi Nacom wũnae jainchina bapontha. Nacom jopa wũnae jainti tsane pon jopa xanepanaya petanacuitinchi.

<sup>6</sup>Tamonae pam, paxam pomonae irũ painya nejume cowũntsiwixae Jesucristo. Yabara paca tsipaebatsi barapo coyenein po coyenein paexanan, xanepanaya painya nejinompaenexa. Barichi paca tsipaebatsi Apolos yabara irũ xua xan yabara painya nenacuidubinexam pocotsiwa paexanan. Bapoxonae painya neexanaewa tsane icha paichin poxonae xua paexanan. Pajinompa dubenanaebiyama icha be pocotsi coyeneya Nacom Pejume Diwesitha paeba. Jopa painya neexana dubenanaebiyaenexa

pocotsiwa jopa paebiyo Nacom Pejume Diwesitha. Painya xoba atsaquiya pacayabara nanta xeiname ponbe Nacom petanacuiinchibe, xua ichũn bichocono peainya cui jiton beyacaincha ichũn. <sup>7</sup>Nacom jopa paca exanaeyo xua peainya cui jiwi pam beyacaincha xua ichamonae pomonae irũ pejume cowũntsiwi Nacom. Pocotsiwa paxeiname jopa apara pana nacatsim painya coutha barapocotsiwa. Apara jame daxita baxuan paxeiname pocotsiwa Nacom paca catsiba. Daxota jopa bewa atsaquiya pana nayabara paebim painya coutha. Poxonae baxua papaebame apara pajuntemainame pocotsiwa xua Nacom painya nepaca catsibiwa daxita.

<sup>8</sup>Itara mexeya daxita painya nexeinea jiwi pam po coyenein xua paichichipame painya neyaputaewa Nacom yabara daichitha jopa barapomonae pam. Pananta xeiname icha pomonae copei pexeinaewi ichi irũ icha ichi pomonae jiwi itorobiya pia pepa peewatsiwichi xua xeina daxita xua ichichipa yawa daxita xua xuan pocotsiwa pecanantawenonaewa. Paxan jopa nama bara paichinyo. Maisa anoxuae bequein pana ita cui jicha xua yatsicaewa paxam pomonae painya neyaputae jiwi pam daxita xua Nacom Pejume Diwesi yabara xua bapoxonae pata tana nebaru yaputaewam tsane daxita Nacom Pejume Diwesi. <sup>9</sup>Paxan Jesucristo pia peitorobi jiwi tatsi pan. Xan nanta xeinan xua Nacom bara be copata pata tana cana exanaewa xua jiwi pata tana necui caponaewa xua poxoru imoxoyo pata werapaewa tsane. Paxan be pocotsi jiwimonae pecui pawu jiwimonae pan xua daxota daxita nacuanpiwi irũ matatsunpiwi pana ichichi xeica. <sup>10</sup>Jiwi pana neyabara nanta xeina xua paxan pata nemuxxenae jiwi pan, yaitama paxan

Cristo payabara cueicueijan. Jaina maisa paxam jiwi paca yabara nanta xeina xua paxam beta yabara painya neyaputae jiwi pam Cristo. Paxan nama jopa pana daichibenaeyno. Paxan jiwi pana yabara nanta xeina xua pajuntu coyene faefaenabenan. Jaina nama pana nayabara nanta xeiname xua pajuntu coyene daunwam Nacomtha. Jaina maisa jiwi paca baru cui itura jina, jopa pana daichibenaeyno. Nama atsaquiya abeya pana yabara paebe. <sup>11</sup>Caena bayatha beya anoxuae, paxan bichocono pajainpan. Matautano pameratsipanno bichocono. Matautano painta paparuwan bichocono jonopa. Jiwi pana neba bichocono. Yawano jopa bo paxeinaeyno. <sup>12</sup>Pana nacobe fifinatontan, patain pata nacuichixae bichocono. Bequein jiwi tsumu jumetha pana casebeiba daichitha barapomona Nacomtha patawuequeiban xua barapomona peyawenaenexa tsaiibi tsainchi. Poxonae jiwi pana atene exaneiba bara saya pacui copatan. <sup>13</sup>Bara bequein jiwi abeya pana neyabara paebeiba ichamonaetha, daichitha baxua jopa pajume naitaewatsinyo. Saya jame xanepanaya patsipaeban barapomonaetha. Jiwi pana neyabara nanta xeina xua pinae peabe jiwi pan. Barapo jiwi pana itaweta icha be poxonae jiton ichi poxonae piawa basuratha xuba. Baxua jiwi painta exanapona beya anoxuae.

<sup>14</sup>Jopa baxua pacata tinaetsi xua paca aura exanatsi. Jame pacata tinatsi xua pata cayawenaenexatsi xua painya nexanaenexa pocotsiwa bewa paexanaename. Paxam be tapexui pam, tsipei bichocono paca antobetsi. <sup>15</sup>Bequein icha bara metha paxeinaetsipame diez mil poyobe pomonaey painya cacuidubi jiwi po coyene xua Cristo yabara, ichitha saya pacata compa pon be painya axa natsicotane. Saya meisa xan compan

copiyan pon be painya axa tapacata natsicotaeinchi, tsipei paxam copiya Cristo Jesús pajume cowuntame poxonae paca cuidubatsi Nacom Pejume Diwesi. <sup>16</sup>Daxota bichocono paca muxu jechi, paexanaponde icha xan ichin xua exanaponan.

<sup>17</sup>Daxota pacata itorobatsi Timoteo pon bichocono antobein. Bapon bara be taxanto, tsipei yawenan xua pejume cowuntsiwa Jesucristo pon jiwi Pecanamataxeinaein. Bapon exaneiba pocotsiwa itorobeiban. Bapon Timoteo paca tsipaebina xua tana neyabara paebiwa tsane po coyene xua xanepanaya tapoponaewa tajume cowuntsixae Cristo Jesús. Barapo coyenein cuidubeiban ichaxota poneiban daxita i dapocotsi penacaetutsi bon jiwitha pomonaey Nacom pejume cowuntsiwichi. <sup>18</sup>Ichamonaey pomonaey paxam jiwana pam, bichocono juntu coyene yucatsi xua ichamonaey peabiwatsi. Baxua exana tsipei barapomonaey nanta xeina xua xan jopa tapaca siwa ponaewa tsainchi. <sup>19</sup>Icha Nacom pon jiwi Pecanamataxeinaein copatsina xua bara taponae tsane aunxuae paca siwa ponaeyinchi. Bapoxonae taeyn pomonaey xua ichamonaey peabiwichi icha metha barapomonaey xeina Nacom pia peayapusu itorobi coyenewa tatsi. Ichacuitha metha tsipae apara metha saya paebe. <sup>20</sup>Jiwi jopa patsi tsane Nacom pia peitorobi nacua beicha xua poxoru wunaey pepaebixae tsane pia coutha. Apara jame jiwi patsina bara beicha pexeinaexae Nacom pia peayapusu itorobi coyenewa tatsi. <sup>21</sup>¿Eta xua painyatsi? ¿Paca tsicapatinchi naewan xua xota paca beinchi? Jume apara. Ichacuitha metha tsipae ¿paichichipame xua tapaca casiwa ponaewatsi tapaca caantobexaetsi? ¿Matautano beta pacata exanaeyinchi xua jopa taanaepanaexae? Aa jame baxua.



### Meje xua poxonae Pablo itaweta pon penowa tsiperu nacoyoba

**5** Ichun netsipaeba xua pinae caein pon paxam jiwana pam pinae bichocono abe exana. Pinae bapon penowa tsiperu nacoyoba powa paxa tatsi bayatha baru pozona. Barapo peexanae coyenewa bichocono abe. Pomona bequein jopa peyabara yaputaewa Nacom barapo coyene jopa copatsiyo xua jiw peexanaewa tsane baxua. <sup>2</sup>Paxam pomona painya nenanta xeinae jiw pam xua peainya cui jiw pam xua daxota jopa panantawenonaem xua painya neitawetsiwa bapon. Jame bewa baxua payabara juntu coyene wecoyam. Pon painya xantha pita penowa powa paxa tatsi xeina bewa patorotsim painya xainya weya. <sup>3</sup>Bequein jopa yatsicaewa paca baru ecaetsi ichitha paca yabara nanta xeineibatsi be poxonae paca baru ecatsi yatsicaewa. Bara bapon yabara paeban xua penatsicuentisiwa xua abe peexanaexae tsipei yabara paeban Jesucristo pia peayapusu itorobi coyenewatha tatsi, pon Wanacanamataxeinaein. Baxua exanan icha be poxonae yatsicaewa tapaca baru ecaewatsi. <sup>4</sup>Poxonae panacaetutame daxita pam, pomona painya nejume cowuntsi jiw Jesús, paca yabara nanta xeineibinchi icha be poxonae tapaca baru ecaewatsi yatsicaewa. Matautano Jesús pon jiw Pecanamataxeinaein pia peitorobiwa tatsi xua peayapusuwa tatsi paxeina dubenanaebiyama. <sup>5</sup>Pon xua awiya abe exanapona barapo jiton bara pacopare Satanastha pon caurimonae pia pentacaponaeinthatsi. Bapoxonae barapo caurimonae pia pentacaponaeinthatsi atene cana exanaena bapontha xua saya pia peponthatsi poxoru barapo jiton ichichipa xua abe peexanaewa. Bapoxonae barapo pebin equeicha jume

cowuntsina Nacom po pebin copiya abe peexanaexae. Pia pejumope tunaxu tatsi Nacom capanepaena po mataqueitha poxonae Jesús patopeicaena, pon jiw Pecanamataxeinaein.

<sup>6</sup>Paxam jopa bewa atsaquiya pajinompaem xua poxoru pocotsiwa painya neexana dubenanaebiyaxae. Icha caein payabara cui copatame xua bara abe exanapona painya xantha pon abe peexanaein bequein xua saya conotha exana, bapoxonae pinmonae painyamona abe exanapona. Bara paxam payaputaneme pocotsi diwesiyo ba jiw yabara canauta jutsiya paeba baxua yabara xua pejeiwa: “Levadura matawun xoyo bequein peyauyo baxoyo daxita pantha cotowa exana”, xua pejeiwa. <sup>7</sup>Painya xainya weya patorore pon abe peexanaein abe peexanaeyainwa daxita painyamona xua icha bapon ichi xua abe exana. Barapo coyene icha be ichi poxonae jiw levadura bebai, po levadura peru levadura abe peexanaeyainwa pan matabutha. Poxonae bapo pebin patorotame bapoxonae painyamona pomona pejume cowuntsiwi xanapanaya jinompaena. Caena bayatha judiomonae juteba oveja xua poxonae pewunaeya tsane poxonae Egipto nacia weya pona. Bapoxonae Nacom yabara juntemaina judiomona abe pia peexanae cuiru coyenein tatsi poxonae cordero bexotsi xua oveja pebto penun. Nacom tsitatsi xua Cristo bara be cordero poxonae tupa naetotha. Cristo naca tsitupa xua abe waexanae cuiru coyenein icha cordero ichi xua tsitupa xua judiomona abe pia peexanae cuiru coyenein tatsi. <sup>8</sup>Waxainchi jopa bewa peabe coyenewa exanaetsi. Jame bewa xaniwaicha juntu coyene xanapanaya jinompa dubenanaebiyaetsi Jesucristo pia pejume cowuntsiwichixaetsi.

<sup>9</sup>Icha cartatha paca tsipaebatsi xua jopa bewa painyamonaе jiwi pacana exanaem pomonaе pesi cui weiweinae jiwi xua bequein jopa piseuri jiwi. <sup>10</sup>Barapomonaе pomonaе pesi cui weiweinae jiwi pomonaе jopa pejume cowuntsiwi Jesús apara jopa paca tsipaebichi barapomonaе yabara. Pomonaе jimun jiwi xua ichichipa copei xeinaewi naexana xua beyacaincha ichamonaе pomonaе jopa pejume cowuntsiwi Jesús apara jopa paca tsipaebichi barapomonaе yabara. Pomonaе jopa pejume cowuntsiwi Jesucristo pomonaе pecaibi jiwi apara jopa paca tsipaebichi barapomonaе yabara. Pomonaе ibo nacomun wunaе pejainchiwi apara jopa paca tsipaebichi barapomonaе yabara. Barapomonaе pexainya weya painya newarapaenexa maisa jame bewa pawarapaem barapo cae pin nacia weya, xua ichaxota po nacia jiwaibi beya xua bara beya painya newarapaenexa. <sup>11</sup>Pocotsiwa aunxuae paca tsipaebatsi baraxua icha cartatha bayatha pacata tinatsi. Jan: “Jopa bewa payawa muxuna jinompaem pomonaе abe peexanae jiwi bequein paeba xua pinae jume cowunta Jesucristo. Barapomonaе jopa bewa payawa muxuna jinompaem pomonaе pesi cui weiweinae jiwi, iruno pomonaе jimun jiwi xua ichichipa copei xeinaewi naexana beyacaincha xua ichamonaе iruno pomonaе ibo nacomun wunaе pejainchiwi, iruno pomonaе nacupa penaexanaewi, iruno pomonaе jiwi pebiataewi, iruno pomonaе pecaibi jiwi daxita barapomonaе jopa bewa pabaruxaem bequein paca wabitha tsipaeno xua painya nenanabanaewa tsane”, jan. <sup>12</sup>Xan jopa neitacupaeyo xua jiwi tayabara paebiwa xua penatsicuenta siwa Nacomtha xua abe peexanaexae pomonaе jopa jume cowuntsiyo. <sup>13</sup>Jame apara meisa Nacom yabara

paeba xua penatsicuenta siwa xua abe peexanaexae pomonaе jopa Nacom pejume cowuntsiwichi. Ichitha bewa payabara paebim xua penatsicuenta siwa pomonaе penacaetutsi jiwi pomonaе pejume cowuntsiwi xae xua abe peexaneibixae poxonaе. Daxota bewa paxam patorotsim pon abe exana painya xantha pon penowa tsiperu wenacoyoba xua awiya baru jijinapona.

**Meje yabara pomonaе pejume  
cowuntsiwi Jesucristo xua  
peponaewa pontha pon jiwi yabara  
paeba xua penatsicuenta siwa  
xua abe peexanaexae**

**6** Poxonaе ichamonaе pomonaе pejume cowuntsiwi jiwana pacata abe exana painya xoba paponame ichaxota eca pon jiwi yabara paeba xua penatsicuenta siwa xua abe peexanaexae. Jamaisa baxua paexaname xua pawncame pon jopa pejume cowuntsin pon jiwi yabara paeba xua penatsicuenta siwa xua bapon peitawetsinexa pomonaе abe peexanaewi. Bapoxonaе painya pia bapon paca tsipaebichi xua barapomonaе paca tsita natsicuenta xua abe peexanaexae. Jame bewa paponaname ichaxota nacaetuta pomonaе pejume cowuntsiwi Jesucristo. Bapoxonaе barapomonaе yabara paebina pomonaе xua penatsicuenta siwa xua abe peexanaexae paxamtha. <sup>2</sup>Paxam payaputaneme xua pomonaе pejume cowuntsiwi Jesucristo, barapomonaе yabara paebina pomonaе xua penatsicuenta siwa xua abe peexanaexae pomonaetha pomonaе barapo nacuathepiwi. Barichi bexa tsane poxonaе Cristo patopeicaena payabara paebiname pomonaе barapo nacuathepiwi xua penatsicuenta siwa xua abe peexanaexae. Daxota anoxuae bewa paexanaem xua payabara paebiname

xua penatsicuentisiwa xua bequein bara conotha abe peexanaexae pomonaetha pomonae pejume cowuntsiwi Jesucristo po coyenein bara bequein bichocono jopa abeyo. <sup>3</sup>Waxainchi yaputainchi xua bexa tsane wayabara paebiwa matatsunpiwi penatsicuentisiwa xua abe peexanaexae Nacomtha. Baxua exanaeinchi poxonae Cristo patopeicaena. Daxota anoxuae paca itacupa xua painya neyabara paebiwa xua penatsicuentisiwa xua abe painya nepaca tsita exanaexae pomonaetha pomonae pejume cowuntsiwi xua wajinompawewa yabara barapo cae pin nacuathe. <sup>4</sup>Ichaxota paxeiname po coyenein xua abe pacata exana pomonae iruru pejume cowuntsiwi, jopa bewa paponam ichaxota pon jiwi peyabara paebin jiwi xua penatsicuentisiwa xua abe peexanaexae pon jopa pejume cowuntsin. <sup>5</sup>Baxua paca tsipaebatsi xua painya neuramnexa tsane. Pon ba peyaputaein bapon ba itacupatsi xua jiwi peyabara paebiwa pomonaetha pomonae xua penatsicuentisiwa xua abe peexanaexae, xua ichamonaetha abe peexanaexae pomonaetha pomonae iru pejume cowuntsiwixae Jesucristo. Ichitha poxonae paponame ichuntha pontha pon jiwi peyabara paebin xua penatsicuentisiwa xua abe peexanaexae, pon jopa pejume cowuntsin, apara jopa xapain paexanaem. ¿Metha bara painyamonae jiwana pin dapocotsin yatsicaewa aibi jampa pon jiwi peyabara paebin xua penatsicuentisiwa xua abe peexanaexae jampa? <sup>6</sup>Ponbe paxam jiwana pam, ponbe pejume cowuntsinbe Jesucristo, baponbe nababe. Ichun xua baponbe jiwana pona ichaxota pon jiwi peyabara paebin pon jopa pejume cowuntsin, xua peyabara paebinexatsi pon abe peexanaexae ichuntha.

<sup>7</sup>Poxonae paxeineibame po coyenein xua pana nabeibame xua daxota paponeibame pontha pon jiwi peyabara paebin baxua abe paexaname. Poxonae ichamonae abe pacata exana saya bara pacui yabara copabare. Jame baxua pacata xanepana. Bapoxonae jopa painya nenantawenonaewa xua painya neponaewa pontha pon jiwi peyabara paebin xua penatsicuentisiwa xua abe peexanaexae. Barichino poxonae ichamonae paca caiba saya bara pacopare xua jopa abe painya neexanaenexa tsane bapomonaetha. <sup>8</sup>Payopitame xua pinae painyamonae pacata abe exana, yawa xua pinae paca caiba. Ichitha apara paxam bara paichim abe paexaname, xua poxonae paponame pomonaetha pomonae jopa pejume cowuntsiwi xua peyabara paebinexatsi pomonae abe pacata exana.

<sup>9-10</sup>Paxam payaputaneme xua pomonae abe peexanaewi jopa patsi tsane Nacom pia peitorobi nacua beicha. Painya xoba pana nayabara cui copatame xua painya coutha painya nenamuxitorobiwa barapo coyene yabara xua daxota pananta xeiname xua barapomonae apara patsina Nacom pia nacua beicha. Pomonae jopa patsi tsane Nacom pia peitorobi nacua beya xua peexanaexae po coyenein xuaje: Pomonae pesi cui weiweinae jiwi, pomonae wuna pejainchiwi ibo nacomun, iru pomonae penotsiwi yabuxi powaxi bara bequein pia pebiwi xeina, iru po pebiwi cae pebiwi penaisa maichiwi, iru pomonae pecaibi jiwi, iru pomonae jimun jiwi xua ichichipa copei xeinaewi naexana beyacaincha xua ichamonae, iruru pomonae nacupa penaexanaewi, peatsaxa meran, iruno pomonae jiwi pebiataewi, iruno pomonae peyabara muxitorobi jiwi pecaibinexa. <sup>11</sup>Copiyatha paxam be barapocotsi jiwimonae pam

xua poxonae matha aena pajume cowuntame xua abe painya neexanae jiwi pam. Daichitha Nacom paca yabara junte maina abe painya neexanae cuiru coyenein. Matautano Nacom paca yabara caunuta jeye: “Tapexuimonae jiwi”, paca yabara jei. Matautano Nacom jopa painya tsita natsicuentisiwa xua abe painya neexanaexae. Nacom pia Pejumo pe tunaxu tatsi iru Jesucristo pacata exana baxua xua poxonae pajume cowuntame Jesucristo pon jiwi Pecanamataxeinaein.

### Meje xua Pablo jei:

#### “Wapepon Nacom piawa”, jei

<sup>12</sup>Jiwi ba jeye: “Xan necopata xua bara taexanaewanexa pocotsiwa xua ichichipan”, jei. Bara bequein xainyei jiwi xua pepaebiwa, ichitha ichacuitha barapo jiwi jopa xapain pia coutha nata exanaetsipae. Bequein barichin bequein necopata xua bara daxita taexanaewa, daichitha ichacuitha jopa xapain nata exanaeinchipae xua poxonae icha nanta xeinaetsipan xua jopa neitacupaeyo xua bara tana necui copatsiwa. <sup>13</sup>Bara jiwi ba xainyeya paeba poxonae jeye: “Pexaewa wuna xua pecotsoro nexa, iru pecotsoro wuna xua pexaewa nexa”, jei. Ichitha bexa tsane Nacom weraweraca cana exanaena barapo naxobe jumebe. Nacom apara jopa nacata exanaeyo wapepon xua wapepon abe wanata exanaewa xua wanasi cui taetaewa. Wapepon Nacom exana xua pia coutha natsixana, xua watanacuichinexa bapon, pon jiwi Pecanamataxeinaein. Nacom yawena xua wapepon yawenatsi xua pia wanaca capanepaenexa. <sup>14</sup>Icha Nacom ichi xua asu exana petupae cuiru coyene weya pon jiwi Pecanamataxeinaein Jesucristo, Nacom bara naca ichi tsane, asu naca exanaena petupae

cuiru coyene weya pia peayapusu itorobi coyeneyatha.

<sup>15</sup>Paxam Corinto tomarapiwi pam. Payaputaneme xua daxita carepaya paxam Cristo piamona jiwana tatsi pam, pomona pejuntu coyene xanepanae jiwi. Xan iru barapo pejuntu coyene xanepanae jiwi piamona jiwana tatsin. Daxota jopa benatsiperu jayababinyo powaxitha powaxi pesi cui weiweinaewaxi, tsipei tapepon apara Cristo tatanacuichinexa bapon. <sup>16</sup>Paxam payaputaneme icha pebin natsiperu jayababa powatha powa penasi cui matacaetsiwa baraponbe bara be caeinbe naexanabe. Nacom Pejume Diwesitha jeye: “Poxonae pebin piowa pita bara be caein naexanabe”, jei Nacom Pejume Diwesitha. <sup>17</sup>Poxonae ichun cae juntu coyene naexana Cristotha pon jiwi Pecanamataxeinaein, bapon bara apara caein naexana Cristotha pia pejuntu coyenewatha.

<sup>18</sup>Painya xoba paexanaename icha pocotsi coyeneya ichi xua peexanaewa pomona pesi cui weiweinaewi. Daxita po coyenein pebiwi exana xua abe peexanaewa apara jopa pia coutha abe nacana exanaeyo. Apara jame ichuntha abe exana. Saya jame poxonae pebiwi pesi cui weiweinaewi bapoxonae barapo pebiwi pia coutha abe nacana exana. <sup>19</sup>Paxam payaputaneme xua Nacom pia Pejumo pe tunaxu tatsi paca baru jinompa pia paca nacana jumope tunaxu catsixae paxantha. Icha barapo Nacom pia Pejumo pe tunaxu tatsi ichi xua paca baru jinompa, barichi barapo Nacom pia Pejumo pe tunaxu tatsi popona Nacom pin pia botha tatsi. Tsipei anoxuae Nacom piamonaexae tatsi pam, apara paxam jopa painya coutha painya nenacanamataxeinaewi jiwi pam. <sup>20</sup>Nacom bayatha pacata pematomatsiwa exana xua poxonae Jesus naetha painya nepaca tsitupaewa xua abe painya ne-

exana cuiru coyenein. Daxota beta pajume cowũntsiya jinompare ichamonae petitũtha tatsi. Bapoxonae barapomonae Nacom baru cui itura jinatsi xua pon xanepanaya peexanaein poxonae paca cui tane xua xanepanaya pajinompame.

### Meje xua Pablo yabara muxuweta xua jitha peenaewa yabara

**7** Anoxuae paca jume notatsi po peyainyabiwa pana yainyabame cartatha. Icha pebin jopa jitha beecaeyo bu bara moya jopa jitha ecae tsane, bequein bara baxua taxanepanatsi bapon. <sup>2</sup>Ichacuitha poxonae pebin jopa jitha ecaeyo besi cui weiweinaena powatha xua bequein pia pebin xeina. Daxota pecuiyainwa barapo coyene bapon bewa jitha ecaena, xua barompaya piowa tatsi. Barichi daxita yabuxi bewa barompaya seicaya notsina pia pebiwi. <sup>3</sup>Pebin bewa bara exanaena piowatha xua poxonae peisa maitecae coyenewa. Barichiru yabũyo bewa bara exanaena pia pebintha xua poxonae petsicuaru maitecae coyenewa. <sup>4</sup>Petsiriwa powa jitha eca, jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara pia pebin tatsi pia perũto tatsiru. Barichi pebin jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara piowa tatsi pia perũto tatsiru. <sup>5</sup>Petsiriwa jopa bewa aichaxaibi tsane xua isa maiteca pia pebin. Pebin iru jopa bewa aichaxaibi tsane xua piowa peisa maitecaewatsi. Poxonae pebin piowabe eenatsibe caentacabiyobetha xua Nacomtha wũcauyabe bapoxonae baponbe itacũpatsi xua itompa exanaenabe xua peexanaewa po coyene penaisa maitecae cui coyenewa. Saya caentacabiyobetha baxua bewa itompa

exanaena po coyene xua penaisa maitecae cui coyenewa. Jame poxonae po mataqueitha najume wetsina xua Nacomtha pewũcaewabe bapoxonae jame bara bewa exanaenabe equeicha penaisa maitecae cui coyenewa. Baxua bewa exanaenabe xua jopa pejũntũ coyene jũjũtsinexa tsainchibe caurimonae pia pentacaponaein tatsi xua abe peexanaenexa tsanebe xua naitompa penaexanaeaxebe.

<sup>6</sup>Saya baxua paca muxuwetatsi apara xua jitha painya neenaewa xua daxota jopa abe painya neexanaewa tsane. Jopa apara paca itorobichi daxita pam xua jitha painya neenaewa. Bara moya jitha ecaena pon ichichipa. <sup>7</sup>Ichichipan xua daxita jiwi jinompa dubenanaebiyaena icha po coyeneya ichin xua poxonae poponan xua jeinya ecan. Daichitha Nacom cata daxita jiwitha xua daxita jiwi barompaya pia cui coyenewan xexeina tsiniya. Po coyenein xua Nacom cata daxita barompaya jiwitha jopa nacui coyene jupaeyo.

<sup>8</sup>Pomonae pemisa dubenaewi pam iru powaxi painya seuriwi painya necacuenta werapaewaxichi pam, daxita barapomonae pam paca tsipaebatsi. Bara wũnae tsipae icha jopa jitha paenaemtsipae icha be xan ichin xua jopa jitha taecaewa. <sup>9</sup>Ichitha icha jopa paca itacũpaeyo xua painya nejeinya enaewa moya bara jitha bewa paenaem. Jame baxua pacata xanepana xua jitha paename xua daxota jopa painya nesi cui weiweinaewa.

<sup>10</sup>Ichitha pomonae xua bayatha jitha painya neenaewi pam barapomonae pam paca itorobatsi. Jopa apara taitorobi coyeneya paca tsipaebichi. Jame apara Nacom taneitorobixae xua po coyeneya tapaca catsipaebinexatsi. Paca jeichi: "Yabũyo jopa bewa cuenta warapaena pia pebin xua pexubinexa", paca jeichi. <sup>11</sup>Powa punaxuba pia

pebin, barapowa bara misa ecaena. Jopa pitsi tsane icha pebin equeicha. Metha jame xanepanaetsipa icha bapowa caewa pichapa pia pebin. Barichi pebin jopa bewa punaxubi tsane piowa.

<sup>12</sup>Anoxuae nama icha coyene paca tsipaebatsi po coyenewa jopa Nacom neitorobiyo saya xua tacoutha tananta xeinaewa. Icha pebin pon pejume cowuntsin xeina piseuri powa jopa pejume cowuntsiwayo bapon jopa bewa punaxubi tsane bapowa icha bapowa ichichipa xua bapon pebaru poponaewatsi. <sup>13</sup>Barichi icha yabuyo powa jume cowanta xeina pebin pon jopa pejume cowuntsin bapowa jopa bewa punaxubi tsane icha bapon ichichipa xua bapowa pebaru poponaewatsi. <sup>14</sup>Po pebin bequein jopa jume cowuntsiyo, Nacom tsitatsi xua po coyene barapon penacoyobiwa bara xanepana, tsipei bapon piowa xeina powa pejume cowuntsiwayo. Barichi powa jopa bequein pejume cowuntsiwayo, Nacom tsitatsi xua po coyene barapowa jitha peecaewa bara xanepana, tsipei bapowa xeina pia pebin pon pejume cowuntsin. Icha Nacom barapocotsi coyeneya jopa exanaetsipae nexata painya pexui be pomonae jopa Nacom pejume cowuntsiwi pia pexui tatsi tsipae. Ichitha poxoru barapo coyene painya netsita xeinaexae Nacom daxota Nacom yawa muxuna tsitatsi xua barapo painya pexui barapoxi juntu coyene xanepanena. <sup>15</sup>Ichacuitha pebin pon jopa pejume cowuntsin ichichipa punaxuba piowa powa pejume cowuntsiwayo. Bapoxonae bapowa bara copata xua pepunaxubiwatsi pia pebin. Barichi ichacuitha yabuyo powa jopa pejume cowuntsiwayo ichichipa punaxuba pia pebin pon pejume cowuntsin. Bapoxonae bapon bu

bara copata xua pepunaxubiwatsi pia petsiriwa. Nacom copata barapomonae jopa pejume cowuntsiwixaetsi xua piseuriwi pepunapentsiwa tsipei ichichipa xua junte miya wanabaru jinompaewa tsane saya. <sup>16</sup>Yabuyom icha ewatsiwatham tsipae xua jinya pebin pejume cowuntsinexa, daichitha jopa jume cowuntsipae Nacom. Barichi pebin icha ewatsiwatham tsipae xua jinseuri pejume cowuntsinexa, daichitha jopa jume cowuntsipae Nacom.

<sup>17</sup>Daxita paxam bewa xanepanaya pajinompaname icha pocotsi coyeneya Nacom painya nepaca catsixae tsane. Baxua bewa paexanaename xua po coyene Nacom paca yabara tsiwaba bara bequein painya seurixi paxeiname ichacuitha bara metha bequein jopa paxeinaem tsane painya seurixi. Baxuan cuiduban daxita carepaya penacaetutsi bontha pomonae Nacom pejume cowuntsiwichi. <sup>18</sup>Ichacuitha Nacom waba xua pebin wabatsi pejume cowuntsinexa tsane. Icha barapo pebin caena bayatha wi thabatsi bu saya barabu tsane baxua. Barichi ichacuitha Nacom waba xua pebin wabatsi pejume cowuntsinexa tsane. Barichi icha barapocotsi pebin caena bayatha jopa wi thabichi bu saya barabu tsane baxua xua jopa pewi thabinexatsi. <sup>19</sup>Bapana Nacom jopa tsita ainya cuichi, metha bequein pebin bayatha wi thabatsi, ichacuitha metha bequein jopa wi thabichi. Po coyene xua peainya cui coyene xua jiwi bewa exanaena, jame maisa bewa jiwi jume cowuntsiya exanaena pocotsiwa Nacom itoroba. <sup>20</sup>Daxita paxam bewa jupa paexana dubenanaebiyaname icha copiya paichim xua paexana dubenanaebiyame poxonae copiya aena Nacom paca waba. <sup>21</sup>Poxonae Nacom waba pon paxam jiwana pam xua poxonaeru bapoxonae

amanaya tanacuita pia pentacaponaein, bapon jopa bewa yabara nantũ exabi baxuan xua pia saya poponaetsi. Ichitha icha bapon itacũpatsi xua saya pepoponaewa bũ moya saya popona xua jopa penantawenonaenexa tsane xua amanaya petanacuichiwa ichũn. <sup>22</sup>Barichi ichacuitha pon bayatha exanatsi xua amanaya petanacuichinexa ichũn bapon jume cowũnta Jesús. Bapoxonae bapon naexana pon saya pepoponaein pia pentacaponaein weya, peexanaenexa pocotsiwa Cristo itoroba. Barichi ichacuitha pon saya pepoponaein xua jopa amanaya tanacuichiyo ichũn bapon jume cowũnta Jesucristo. Bapoxonae bapon naexana pon Jesús amanaya pia petanacuitinchi tatsi tsipei exana pocotsiwa Cristo itoroba. <sup>23</sup>Nacom pin matomatha pacata matomata poxonae Jesús naetotha paca tsitũpa abe painya neexanae cuiru coyenein nexa. Painya xoba pacopatame xua jiwi equeicha caewa painya nepaca itorobiwa xua abe painya neexanaewa. <sup>24</sup>Tamonae pam daxota paca itorobatsi xua painya nejume cowũnta dubenanaebiyaenexa Nacom, icha paichim xua pajume cowũnta dubenanaebiyame poxonae copiya Nacom aena paca waba.

<sup>25</sup>Jopa xeinaeyo po jumetha xua tacueicueijiwa po coyenewa xua Nacom pon jiwi Pecanamataxeinaein neyaputane exana xua pomonae piseuriwi penotsiwi nexa. Saya apara paca tsipaebatsi po coyeneya xua saya tacoutha tananta xeinaewa. Ichitha paxam paca itacũpa xua pata tana nejume cowũntsiwam tsipei Nacom necata barapo peyaputae coyenewa tana neantobexae. <sup>26</sup>Xan tacoya nanta xeinan xuaje: Bara bewa saya jiwi jeinya enaena. Jopa jitha peenaewa tsane, tsipei anoxuae barapo dapaetha xeinatsi nawita po

coyenein bichocono nacata ayapube tsounae xua wanapapeichiwatsi. <sup>27</sup>Icha jitha paename painya xoba pana napunapentame. Barichi icha pajeyina ename painya xoba pasi cui weiweiname. <sup>28</sup>Icha jitha paename jopa apara bara abe paexanaem. Iru icha yabũyo jitha eca bapowa apara jopa abe exanaeyo. Daichitha pomonae jitha peenaewi bichocono taayapubetsi xua pejinompaewa nexa barapo cae pin nacuathe. Xan ichichipan paca yawenatsi daxota baxuan yabara paca tsipaebatsi xua pacata ayapubeyainwa xua jitha painya neenaewaxae tsipae.

<sup>29</sup>Tamonae pam, paxam pomonae irũ painya nejume cowũntsiwixae Jesucristo. Po coyenewa xua ichichipan tapaca tsipaebiwatsi tsainchi xua meje xua janje: “Waxainchi pin dapae jopa xeinae tsainchi po mataqueitha poxonae Jesús patopeicaena”, jan. Daxota pomonae jitha ena bewa jinompa dubenanaebiyae icha be poxonae ichi poxonae xua jinompa dubenanaebiya pomonae jeinya peenaewi xua xaniwaicha Nacom daunweya petanacuichiwatsi. <sup>30</sup>Daxita jiwi bewa eenaetsi xua Nacom petanacuita dubenanaebiyaewatsi. Daxota pomonae anthũthũtane xua pewecoyeixae bũ barapomonae jinompa icha ichi xua jinompa pomonae jopa anthũthũtaneyo xua jopa pewecoyeixae xua daunweya penacuichixae Nacom nexa. Barichi pomonae xua bichocono jũntũ coyene weiweina bũ barapomonae jinompa icha ichi xua jinompa pomonae jopa jũntũ coyene weiweinaeyo xua daunweya penacuichixae Nacom nexa. Barichi pomonae xua pecomoca dubenanaebiyaewi bũ barapomonae jinompa icha ichi xua jinompa pomonae jopa pecomoca dubenanaebiyaewi xua daunweya penacuichixae Nacom nexa. <sup>31</sup>Poxonae cataunxuae pajinompame barapo cae pin nacuathe

jopa paichichipa dubenanaebiyaeinde pocotsiwan xua barapo cae pin nacuathe xeina. Tsipei pocotsiwa barapo cae pin nacuathe xeina daxita weraweracaena.

<sup>32</sup> Ichichipan xua bichocono jopa painya neyabara nanta xeinaewa pocotsiwa barapo cae pin nacuathe xeina xua paca jüntu deideije exana. Po pebin jeinya eca itacupatsi xua penajüntu coyene eena exanaewa xua petaexanaewatsi Nacom pon jiwi Pecanamataxeinaein. Barapo coyene Nacom jüntu coyene weiweina exanatsi.

<sup>33</sup> Po pebin jitha eca bapon bichocono yabara eenatsi nawita xua yabara nanta xeina nawita xua po coyeneya piseuri peewatsiwa xua daxota bapowa piseuri peyabara baru jüntu coyene weiweinaenexa. <sup>34</sup> Barapon barapo naxobe coyenewabe muxuna yawa nanta xeina. Barichi yabuxi powaxi jeinya ena iruru powaxi jitha ena barompaya tsanaya piawan yabara nanta xeina. Powa xua bapana jopa jitha ecae bapowa itacupatsi xua penajüntu coyene eena exanaewa xua petaexanaewa po coyene Nacom ichichipa pon jiwi Pecanamataxeinaein. Barapowa ichichipa exana xua Nacom pejüntu coyene weiweina exanaewatsi tsainchi pocotsiwa xua bapowa peexanaewaxae xuano bapowa pocotsiwa penanta xeinaewaxae. Ichitha nama powa jitha eca bapowa bichocono yabara eenatsi nawita xua yabara nanta xeina nawita xua po coyeneya pia piseuri peewatsinexa xua daxota bapon piseuri peyabara bara jüntu coyene weiweinaenexa.

<sup>35</sup> Baxua paca tsipaebatsi tsipei ichichipan xua tapaca cayawenaewatsi. Apará jopa paca itorobichi xua jopa painya nenotsiwa tsane painya seuriwi. Ichichipan xua beta painya nejinompawea xua painya netanacuita

dubenanaebiyaeinexa Nacom daxita painya jüntu coyeneintha.

<sup>36</sup> Pebin iru yabuyo nanta xeinabe xua penapichinexa tsanebe. Ichitha cataunxuae ewatabe xua penapichiwa tsanebe. Bapon ichichipa nawita xua pepichiwa bapowa, iru petsiriwa bayatha wei weta. Daxota moya bara bewa napichinabe. Baxua jopa abeyo po coyene baponbe exanabe. <sup>37</sup> Ichitha icha pebin itacupatsi xua jopa nantawenonaeyo xua pepichinexa pecotsiwa, xuano juntu-curu jopa pichi tsane pecotsiwa, bara jemba tsane icha bapon pecotsiwa jopa pichi tsane. Bara saya jeinya ecaena. Bapoxonae bapon bara saya beta exana. <sup>38</sup> Pon pecotsiwa pita beta exana bequein. Ichitha nama pon jopa jitha ecaeyo bapon jame bichocono beta exana beyacaincha pon pecotsiwa pita.

<sup>39</sup> Petsiriwa powa jitha eca powa pejume cowuntsiwa bewa piseuri cuicuinaena poxonae cataunxuae jopa tatupaetsi piseuri. Icha pia pebin tatupatsi barapowa itacupatsi xua pichina icha pebin pon saya pejume cowuntsin. <sup>40</sup> Jame metha bapowa bichocono yatsicaewa jüntu coyene weiweinaetsipa icha jopa equeicha pichipae icha pebin. Bapoxonae bapowa bichocono jüntu coyene weiweinaetsipa beyacaincha poxonae pita icha pebin. Baxua nanta xeinan xua saya tananta xeinaewa. Matautano iruru barichin jume cowuntan xua Nacom pia Pejumo po tunaxu tatsi tana nebaru poponaewa. Daxota neitacupa xua yabara tapaebiwa barapo coyenein.

**Meje xua Pablo peyabara  
paebiwa pexaewa po pexaewa  
jiwi tajeba ibo nacomun**

**8** Anoxuae ichichipan xua pexaewa yabara tapacata tinaewatsi po pexaewa jiwi tajeba ibo nacomun poxonae jiwi wunae jainteiba ibo nacomun. Be-



quein xainyei xua baxuan yabara yaputainchi, daichitha barapo peyaputae coyenewan naca atsaca exana. Ichitha jame po peantobe coyenewa xeinatsi apara naca yawena xua beta wanabaru jinompaewatsi. <sup>2</sup>Pon xua nanta xeina xua pinae yaputane bichocono bapon apara taacoibichi pocotsiwa xua bapon bewa yaputaena. <sup>3</sup>Ichā ichūn Nacom antobetsi bara Nacom jūntū coyene yaputane bapontha.

<sup>4</sup>Daxota equeicha pexaewa yabara paca tsipaebatsi, po pexaewa jiwi tajeba ibo nacomūn. Barapo pexaewa xuya ichamonae xane cotacaya. Waxainchi yaputainchi xua ibo nacomūn jopa xaniwaicha xeinaeyo peyapusūwa xua apara saya jiwi pecobetha forota. Jame nama yaputainchi pepa Nacom, pon compa. <sup>5</sup>Jiwi jume cowūnta xua pinae pinmonae jinompa, pomonae nacomūn, itabocotha, barapo cae pin nacuaatheno. Barichino xua pinae pentacaponae wi jinompa itabocotha barapo cae pin nacuaatheno. <sup>6</sup>Nama waxainchi yaputainchi xua compa popona Nacom, pon Waxa. Daxita coyenein Nacom pia xainya werena tapichipapoinchi, bara bequein daxita baxuan Cristo forota Waxa nexa. Matautano Nacom naca cana exana pia watanacuichinexa bapon. Barichi meisa compa popona pon pepa jiwi Pecanamataxeinaein, bapon Jesucristo. Bapon Jesucristo daxita forota Nacom nexa. Waxainchi xeinatsi peajūntūcoyenesūwa, po peajūntūcoyenesūwa xua bapon naca cata.

<sup>7</sup>Ichamonae pomonae pejume cowūntsiwi Nacom, jopa yabara yaputaeyo xua ibo nacomūn. Barapomonae awiya nanta xeina xua ibo nacom peyapusūwa xeina bequein anoxuae barapomonae jume cowūnta Nacom. Barapomonae bayatha pia cui xeina xua pexaewa tajebeiba ibo nacomūn poxonae wūnae jainteiba

barapo ibo nacomūn. Barapomonae abetha nanta xeina jeye: “Ichā xaetsipan pewi po pewi ichamonae tajebe ibo nacomūn metha neajūntūcoyenebe cana exanaetsipa poxoru barapo pewi ibo nacomūn piawa”, jei xua abetha nanta xeina. Bequein barapomonae jume cowūnta Nacom ichitha jopa yaputaeyo xua ibo nacomūn pia pexaewa jopa itacūpaetsi xua ajūntūcoyenebe cana exanatsi barapomonae ichā jiwana xaetsipa barapo ibo nacomūn pia pexaewa. <sup>8</sup>Pexaewa jopa naca yawenaeyo xua wanajūntū coyene xanepana exanaewatsi xua daxota Nacom wanaca weyataewa tsane. Ichā waxainchi nabūnatsi pexaewa jopa naca yawenaeyo xua Nacom tsita jūntū coyene xanepanatsi beyacaincha xua poxonae jopa nabanaetsi. Barichi ichā najainbotatsi baxua jopa naca yawenaeyo xua Nacom tsita jūntū coyene xanepanatsi beyacaincha xua poxonae nabūnatsi. <sup>9</sup>Paca itacūpa xua paxaneme xua pocotsiwa painya neichichipaewa. Ichā pajiwana xaneme po pexaewa jiwi tajeba ibo nacomūn, baxua jopa paca tsita abeyo. Ichitha poxonae paexaname baxua pomonae ainya ūnthuton pexeinaewi, aena pejume cowūntsiwixae, barapomonae tsita ayapubetsi. Ichā barapomonae xaena barapo pexaewa painya neexanaewaxae bequein barapomonae tsitatsi xua abe peexanaewi poxonae xane barapo ibo nacomūn pia pexaewa tatsi. Daxota painya xoba paexaname po coyene painya neichichipaewa. <sup>10</sup>Metha beya paca taetsipa pon pejume cowūntsin poxonae panabaname pexaewa po pexaewa jiwi tajebeiba ibo nacomūn poxonae wūnae jainteiba barapo ibo nacomūn. Irūru metha beya tsipae bapon naxaetsipa barapo pexaewa poxonae bapon paca jain tane. Paxam pomonae painya

neyabara yaputaewi pam barapo pexaewa. Payaputaneme xua barapo pexaewa apara jopa itacupaetsi xua jiwi ajuntucoyenebe cana exanatsi. Ichitha pomonae ainya unthuton pexeinaewi aena pejume cowuntsiwixae jopa yaputaeyo baxua yabara icha paxam paichim. Barapomonae awiya nanta xeina jeye: “Icha barapo pexaewa xaein neajuntucoyenebe exanaena”, jei. <sup>11</sup>Ichacuiitha paxaneme barapo pexaewa bequein payabara yaputaetham xua jopa abe paca cana exanaeyo. Painya neexanaexae baxua xua paxaneme barapo pexaewa daxota bichocono abe paexaname pontha pon ainya unthuton xeina, pon abetha nanta xeina, jeye: “Icha barapo pexaewa xaein neajuntu coyenebe exanaena”, jei. Daxota bapon payabara nanta xeinare xua apara iru Cristo tsitupa bapon icha ichi xua paca tsitupa. <sup>12</sup>Pacata jopa abeyo xua poxonae paxaneme barapo pexaewa. Jame apara abe paexaname poxonae iruru xane barapo pexaewa pomonae ainya unthuton xeina. Poxonae abe paexaname barapomonaetha apara bara iru abe paexaname Cristotha, tsipei apara barapomonae pomonae iru pejume cowuntsiwixae Cristo. <sup>13</sup>Metha beya xaetsipan pewito pocotsi wito xua ichun, pon iru pejume cowuntsin yabara nanta xeineiba xua jopa bapana xae po pewi xua jiwi tajebeiba ibo nacomun. Poxonae bapon nejain tane, bapon iru xane, najuntu coyene taxoba. Bapoxonae abe exana cana exanan. Daxota metha xanepanaetsipa icha bapana jopa xaetsipaein equeicha barapocotsi wito xua jopa taexanaewanexa xua bapon abe peexanaewa tsane.

**Meje po coyenein yabara pomonae  
Jesús pia peitorobi jiwi tatsi  
itacupaetsi xua peexanaewa**

**9** Tajuntu coyene jopa netsipaebiyo xua abe taexanaewa icha xaein barapo pexaewa xua jiwi tajebe ibo nacomun. Ichun jopa itacupaetsi xua yabara tana neitorobiwa barapo pexaewa tsipei xan Jesús pia peitorobi jiwi jiwana tatsin. Xan bara yatsicaewa tan Jesús, pon Wanacanamataxeinaein. Paxam pajume cowuntame Jesús daunweya tatanacuichixae pon jiwi Pecanamataxeinaein. <sup>2</sup>Ichamonae jopa neyabara tsaqueinaeyo xua xan Jesús pia peitorobi jiwi jiwana tatsin. Jame paxam pana neyabara yaputaneme xua xan Jesús pia peitorobi jiwi jiwana tatsin. Painya nejume cowuntsixae pon jiwi Pecanamataxeinaein ichamonae patsita itapeinya xeiname xua xan bara ponxaein Jesús tana neitorobin.

<sup>3</sup>Baraxua jume notan pomonaetha pomonae yabara neyainyaba xua pinae icha bara metha yatsicaewa pon Jesús tana neitorobin. <sup>4</sup>Barapomonaetha janje: Bernabé iru xan bara pana neitacupabe xua pata wecobe noteibiwabe pocotsiwa xua jiwi pata necatsibiwabe pexaewa. Matautano pana neitacupabe xua pata wecobe noteibiwabe pocotsiwa paapan xua poxonae patanacuita ducuanabiyanbe Jesús. <sup>5</sup>Matautano icha jitha ecaetsipan bara neitacupaetsipa xua tabaru ponaewa taseuri icha Jesús pia peitorobi jiwi tatsi ichi xua itacupaetsi xua peexanaewa baraxua xua piseuriwi baru warapa. Iruru barichi Jesucristo pon jiwi Pecanamataxeinaein pia peweicho jiwi tatsi baxua exana. Iru Pedro exana baxua xua piseuri baru pona. <sup>6</sup>Poxonae ichamonae paca tsipaeba Nacom Pejume Diwesi, payawename barapomonae

pocotsiwa penantawenonaewa. Paxanbe Bernabé iru xan panacuitanbe paxam nexa poxonae Nacom Pejume Diwesi paca tsipaebatsi. Ichitha jopa pana neyawenaem pocotsiwa panantawenonanbe. Paxanbe bewa panacuichinbe icha penacuitsiwa yawa pata comocaenexa pocotsiwa panantawenonanbe. Meisa paxanbe baxua paexananbe, ichamona jopa daichiyu. <sup>7</sup>Soldadomonaepin poxonae ba naba pia pentacaponaein nexa jopa ba natamatomatsiyo pia pexaewa. Pon ba jame itoroba apata pexaewa pia soldadomona. Barichi pon ba uva pabi nacuita itacupatsi xua yawa uva cuei xaexaepona. Barichiru pon ba vaca yapu eena bapon ba itacupatsi mipi yuyucapona vaca xua peapaponaenexa. <sup>8</sup>Saya jopa meisa jiwi yabara nanta xeinaeyo baxua xua pon tanacuita itacupatsi yawa xane. Apara iru Moisés pia peitorobi coyenewatha baxua yabara paebaru. <sup>9</sup>Moisés tina po diwesi pia peitorobi coyenewathaxae, xua jeye: “Poxonae po duwein pon pewun buey nanacuitapona xua pexu xu taxunaunabapona, bapoxonae pebin jopa copatsiyo xua pecoibo acatsiwa xua jopa pexaenexa. Saya bara copatsina xua yawa xaexaeponaena poxonae nacuitapona”, jei. Nacom jopa yabara paebiyo baxua xua saya meisa poxoru peyabara nanta xeinaexae buey. Jame saya apara poxoru peyabara nanta xeinaexae jiwi. <sup>10</sup>Nacom pana necayabara juta paeba poxonae buey yabara paeba. Baxua painta exana xua pata taneyawenaenexa. Pon ba nacobe weta xua uba pabitha, iruru pon xuya nota poxonae naweta, baponbe xeinaenabe pexaewa xua penawetsiwa. <sup>11</sup>Paxan paca cuidubatsi Nacom Pejume Diwesi. Tsipei paca yawenatsi daxota bewa xuya pana necatsibim pocotsiwa xua panantawenonan xua pata

jinompaewanexa. <sup>12</sup>Paxam pacatsibame pocotsiwa xua nantawenona ichamona pomona Nacom Pejume Diwesi paca cuiduba, ichitha paxan paca yawenatsi beyacaincha xua barapomona paca yawena. Daxota bewa pana necatsibeibim icha paca wuqueibichipatsi beyacaincha xua pacatsibeibame ichamona.

Ichitha baxua jopa paexanaeinyo xua pata cawucaewatsi. Paxan bichocono paatanein xua jopa pata xeinaexae pocotsiwa xua pata nantawenonaewa pata jinompeibiwana bequein jopa paca wuqueibichi. Jopa paca wucaetsi tsipei jopa paichipaeinyo xua jopa painya nejume cowuntsiwa Cristo pia pexeinya jume diwesi. Jopa paca wucaetsi poxoru metha pananta xeinaetsipame xua paxan apara pata paratixichi paca tsipaebatsi Nacom Pejume Diwesi. <sup>13</sup>Paxam payaputaneme xua pomona ba nacuita Nacom pin pia botha barapomona ba apatutsi pexaewa Nacom pin pia botha. Barichiru pomona ba nacuita ichaxota iboto uncua po ibototha duwein bexuba xua tauta xua petuxusi exanaenexa Nacom nexa barapomona ba itacupatsi xua xuya penabanaewa barapo duwein xua saya jiwana xane. <sup>14</sup>Barichi Nacom pon jiwi Pecanamataxeinaein jeye: “Pomona inta nacuita xua paeba dubenanaebiya tacapanenebiyae diwesi jume, barapomona apatatsi pexaewa xua poxonae ichamona apateiba be pematomaqueibiwatsi tsipei barapomona cueicueijei tsurubenanaebiya tajume diwesi”, jei Nacom. <sup>15</sup>Ichitha jopa bapana wucaeinyo jiwi xua tana apatsinexa pexaewa xua be tanamatomatsiwa. Pacata tinatsi xua jopa tapaca wucaewatsi. Ichichipan xua tatupaewa tsane pewunaeya xua poxonae tapaca wucaewatsi tsainchi. Bichocono juntu

coyene weiweinan poxonaē tapaca tsipaebiwaṣi Nacom Pejume Diwesi. Yaitama jopa pana necatsibeibim xua be pata tanematomaqueibiwaṣ, daxota atsaquiya paca tsipaebatsi.

<sup>16</sup>Jopa neitacupaeyo xua atsacan xua tacueicueijeixae Nacom pia pecapanenebiyae diwesi jume. Nacom neitoroba xua bewa tacueicueijeiwā tsane barapo diwesi. ¡Ichitha xan tsocuaein tsipae icha jopa cueicueijan tsipae barapo diwesi! <sup>17</sup>Bequein icha Nacom jopa neitorobichipaē xua saya xan tacoutha tsipaebaponaetsipan Jesucristo pia pexeinya diwesi nexata ewatsipan xua jiwi tanematomatsinexa tacueicueijeixae barapo diwesi. Ichitha jame tsipaebaponan pexeinya jume diwesi Nacom tana neitorobixae. Jume cowuntaponan be pocotsi coyeneya Nacom neitorobapona. <sup>18</sup>Daxota xua be tanematomatsiwa apara xua poxonaē juntu coyene weiweinan tapaca tsipaebixaetsi barapo Nacom Pejume Diwesi bequein metha jopa pana catsibeibichipaem xua patanematomatsiwaṣ, matautano metha poxonaē bara tapanecatsibeibichipaem pocotsiwa tapanematomatsiwaṣ. Paxam jopa pana necatsim pocotsiwa be pata nematomatsiwaṣ. Jopa paca wucaetsi bequein bara neitacupa xua tapaca wucaewatsi pocotsi matoma bewa panecatsibeibim. Bara pocotsi matoma jiwi bewa catsina pomonaetha pomonaē Nacom Pejume Diwesi tsipaebatsi xua pejinompeibiwa tsane.

<sup>19</sup>Bequein jopa bewa amanaya tanacuichin tsane ichun, ichitha tacoutha nacana exanan be pon amanaya tanacuichin daxita jiwi nexa. Barapo coyene exanan xua pinmonaē pejume cowuntsinexa Cristo. <sup>20</sup>Poxonaē poponan judiomonaē pia xantha tatsi, exana ducuaenaebiyā icha be barapo judiomonaē ichi xua

exana dubenanaebiya pocotsiwa Moisés itoroba pia peitorobi coyenewatha. Bara pocotsi coyenein exanan xua Moisés itoroba, bara bequein jopa bewa exanaein tsane. Saya exanan tsipei ichichipan xua tayawenaewa xua barapomonaē pejume cowuntsinexa Cristo Jesús. <sup>21</sup>Poxonaē poponan pexantha tatsi pomonaē jopa exanaeyo pocotsiwa Moisés pia peitorobi coyenewatha itoroba, bapoxonaē popona ducuaenaebiyā icha barapomonaē ichi xua jinompa dubenanaebiya. Bapoxonaē jopa exanaein yō pocotsiwa Moisés pia peitorobi coyenewatha itoroba, xua barapomonaē tayawenaenexa, xua pejume cowuntsiwanexa Jesús. Jopa paca tsipaebichi xua tajume naitematsiwa Nacom xua tana neitorobiwa. Jame bara exanan pocotsiwa Cristo neitoroba. <sup>22</sup>Poxonaē poponan pexantha tatsi pomonaē juntu coyene faefaena Nacomtha xua pejume cowuntsiwa xua aena pejume cowuntsixae bapoxonaē exana ducuaenaebiyā icha barapomonaē ichi xua exana dubenanaebiya tayawenaenexa xua equeicha bichocono mataropeicha pejume cowuntsiwanexa Jesucristo. Daxita carepaya jiwitha peitatha poponeiban, poxonaē be pocotsi coyeneya jinompeiba barapo jiwi tayawenaenexa xua equeicha bichocono mataropeicha pejume cowunteibinexa Jesucristo. <sup>23</sup>Daxita baxuan exana ducuaenaebiban tacueicueijeī tsaibinexa Nacom pia pecapanenebiyae diwesi jume, matautano tsipei ichichipan xua tajuntu coyene weiweinaewa tsane poxonaē barapomonaē jume cowuntsina Jesucristo.

<sup>24</sup>Paxam payaputaneme poxonaē jiwi ba namtotha cuinaepona saya caein meisa copiya patopa. Bapon ba

catatsi pocotsiwa pematomatsiwatsi copiya pepatopaexae xua beta cuinaepona. Bara pocotsi juta coyeneya ichi, beta pata exanaponde Jesucristo pia petanacuichiwa tatsi xua painya nepaca catsibinexa xua painya nepaca matomacaewan.  
<sup>25</sup> Pomonae ba xua nactu wunaeta xua penaxenacaenexa ichawa jopa exanaeyo pocotsiwa taayapubetsi poxonae pecuinaeponaenexa. Barapomonae ba baxua exana pia xeinaetsi pocotsiwa pecui yabara matomacaewatsi. Barapo pentoma noxu tepa pocotsiwa xua saya caena naxuba xua weraweraca. Nama waxainchi beta exanapoinchi Nacom pia petanacuichiwa tatsi, xua Nacom wanaca catsibiwa tsane pocotsiwa wanaca yabara cui matomacaewa, pocotsiwa xua ataya ayapusu xua jopa weraweracaeyo.  
<sup>26</sup> Daunweya exanaponeiban Nacom pia petanacuichiwa tatsi be poxonae xua bichoina cuinaeponan xua tatoxeincha patopaewa. Jopa exanaeyo icha ichi xua pon naitacueinchiya jiraba.  
<sup>27</sup> Ichitha nama seicayiya exanan xua tapepon daunweya tacoya naitoroban xua daxota jopa abe exanaeyo. Tapepon itoroban xua tana nejume cowuntsiwa xua peexanaewa pocotsiwa itoroban. Antuyapusuya tanacuitan Nacom tajunuwixae xua jopa beta taexanaewa xua bequein bara ichamonae cuidubithan barapo coyenein. Icha jopa beta exanaeinchipae Nacom jopa tsita xanepanaeinchipae xua daxota taneitawetsiwa tsipae.

**Meje xua Pablo muxuweta pomonae wunaeyo jainta ibo nacomun**

**10** Tamonae pam, paxam pomonae iru painya nejume cowuntsiwixae Jesucristo. Ichichipan xua painya neyaputaewa tsane po coyene xua poxonae wamo

susato jiwitha pecana exanaewatsi. Barapomonae Egipto nacua weya pona. Bapoxonae tsaquinaebowa matatsun dubenapoinchi. Barapo tsaquinaebowa barapomonae matacapoinchi xua ichaxota ichichipa peponaewa barapomonae. Daxita barapomonae icha muxunene beepa uncababiya po pin pucua pewun Mar Rojo wun pucua. Barapo pin bicheito epatauta iyapona xua poxonae Nacom tsewa taexaniya xua be namto taexaniya.  
<sup>2</sup> Barapomonae tsaquinaebowa be caemonae matatsun dubenapoinchi. Matauta barapomonae be caemonae Mar Rojo wun pucua epatauta iya pona. Barapoxonae be caemonae naexana Moiestha xua Moisés pematacapanaenexa barapomonae. Barapomonae barapocotsi juta coyeneya exana icha be poxonae jiton ichi xua poxonae bautisabatsi mentha caemonae penaexanaenexa Cristotha, xua Cristo pecanamataxeinaenexa bapontha.  
<sup>3</sup> Daxita barapomonae xane po pexaewa Nacom taitorobica itaboco wetsica.  
<sup>4</sup> Yawano barapomonae apa po mera xua Cristo itoroba ira xuepana susato tsurucuae nacua. Barapo mera iboton weya mene pichapa. Cristo barapo mera apatapona poxonae yanta xua barapomonae yantatsi.  
<sup>5</sup> Daichitha pin bicheitomonae xua barapomonae jiwana jopa exanaeyo pocotsiwa Nacom ichichipa. Daxota Nacom copata xua barapomonae bara pejiwana werapaponaewa tsane barapo ira xuepana susato tsurucuae nacua.  
<sup>6</sup> Baxua exana xua nacata yabara canauta jutsiya exana. Jopa bewa waichichipaewa tsainchi pocotsiwa jopa nacata wunaeyo xua icha barapomonae ichi poxonae pia coutha abe nata exana.  
<sup>7</sup> Daxota jopa bewa wunaeyo pajainchim ibo nacomun icha be barapomonae jiwana ichi. Barapomonae wunaeyo

jainta ibo nacomun. Nacom Pejume Diwesitha barapomonaе yabara jeichi: “Barapomonaе ena xua pexaenexa yawa xua peapaenexa. Bapoxonaе yatsicaewa barapomonaе nawiraba ibo nacom tsita nawirabatsi”, jei Nacom Pejume Diwesitha. <sup>8</sup>Waxainchi jopa bewa exanaetsi xua nasi cui weiweina exanatsi icha be barapomonaе jiwana ichi. Barapomonaе jiwana nasi cui exana yabuxitha xua jopa piseurixi. Daxota caentaqueitha veintitres mil pebiwi werapa abe peexanaexae. <sup>9</sup>Matautano jopa bewa najuntu coyene jujuta exanaetsi Nacomtha xua wanaca baru anaepanaenexa, icha barapomonaе jiwana ichi. Barapomonaе najuntu coyene jujuta exana Nacomtha. Daxota Nacom copata xua barapomonaе werapa poxonaе jomon sinebatsi barapomonaе. <sup>10</sup>Jopa bewa Nacom anaepanaya baru paebichi, icha be barapomonaе jiwana ichi. Barapomonaе Nacom anaepanaya baru paebatsi, daxota Nacom copata xua barapomonaе weraweraca poxonaе matatsunpin juteba po matatsunpin jiji pejutebin.

<sup>11</sup>Nacom exana daxita baxuan barapomonaetha, xua wanaca muxuweta exanaenexa xua jopa waraichiwanexa icha barapomonaе ichi. Moises yabara tina barapomonaе xua yaputane wanaca exanaewa xua bara nama imoxoyo barapo nacue weraweracaena. <sup>12</sup>Daxota tsipaeban pon paxam jiwana pam pon xua nayabara nanta xeina xua pinae bichocono pejume cowuntsixae peajuntucoyenesuwa xeina Nacomtha. Janje: “Dota jinya xoba abe exaname. Poxoru icha metha nanta xeinaetsipame xua jopa abe exanaem, bapoxonaе metha abe exanaetsipame”, jan. <sup>13</sup>Jopa meisa paxam caurimonaе pia pentacaponaein tatsi paca juntu coyene jujutsiyo. Barapara iru ichamonaе

pomonaе pejume cowuntsiwi barichichi juntu coyene jujutatsi abe peexanaenexa. Paxam paca itacupa xua pajuntu coyene amanayabame barapo caurimonaе pia pentacaponaein tatsi. Baraxua paexaname icha barapomonaе ichi xua juntu coyene amanayaba barapo caurimonaе pia pentacaponaeintha tatsi. Daichitha paca itacupa xua payabara jume cowuntame Nacom xua bara bapon paca yawenaena. Nacom jopa copatsiyo xua caurimonaе pia pentacaponaein tatsi bichocono paca juntu coyene jujutsina xua pocotsiwa bichocono pacata ayapube xua daxota abe painya neexanaewa tsane. Ichitha poxonaе caurimonaе pia pentacaponaein tatsi paca juntu coyene jujuta, Nacom paca yawenaena xua painya nerucupaewa bapon weya xua daxota jopa abe painya neexanaenexa.

<sup>14</sup>Tamonaе pam paxam pomonaе iru painya nejume cowuntsiwixae Jesu-cristo. Paxam pomonaе tapaca caantobe jiwichi pam. Painya xoba wunae pajaintame ibo nacomun. <sup>15</sup>Paca tsipaebatsi paxam pomonaе painya neyaputae jiji pam. Paxam payaputaneme xua painya neyabara nanta xeinaewa pocotsiwa paca tsipaebatsi icha metha bara xaniwaicha paeban. <sup>16</sup>Waxainchi nacaetutatsi wayabara juntanainaenexa xua Cristo wanaca tsitupaewa naetha. Bapoxonaе apatsi vino mera yawa xainchi pan. Barapo vino mera Cristo pia pejana tatsi yabara caunutatsi. Matautano barapo pan Cristo pia pepon tatsi yabara caunutatsi. Poxonaе apatsi barapo vino mera Nacom tsipaebatsi barapo vino mera nexa po vino mera tsijunta eca corotiyotha. Jeichichi: “Maisa Nacom painta pexeinya coyene exaname”, jeichichi. Bapoxonaе be caemonaе naexainchi Cristotha waapaexae barapo vino mera. Barichi pox-

onae pan janacatsi be caemonae naexainchi Cristotha waxaexae barapo pan.<sup>17</sup> Bequein waxainchi pinmonaetsi xua cae pan nabaru xainchi, ichitha waxainchi be caemonaetsi bapon Cristotha tsipei bara cae pan nabaru xainchi.

<sup>18</sup> Payabara nanta xeinare xua judiomonae pomonae Israel nacuamonaepiwi. Barapomonae judiomonae xane po duwein ichamonae tauta xua petuxusi exanaewa Nacom nexa. Bapoxonae barapomonae be caemonae naexana Nacomtha.<sup>19</sup> Jopa apara paca tsipaebichi xua ibo nacom xeina peajuntuyapusuwa. Matautano jopa paca tsipaebichi xua po wi jiwi tajeba ibo nacomun ainya cui barapo wi beyacaincha xua icha pewi.

<sup>20</sup> Paca tsipaebatsi xua jiwi tajeba pewi ibo nacomun pomonae jopa yaputaeyo Nacom. Barapomonae tajeba barapo pewi caurimonae. Jopa apara tajebyo Nacom. Jopa ichichipaeinyo xua caemonae pana naexaname caurimonae pijimonaetha. Metha baraxua paexanaetsipame poxonae panabaru xaneme pomonae nacaetuta pexaenexa po wi jiwi tajeba ibo nacomun.<sup>21</sup> Paxam panabaname pon jiwi Pecanamataxeinaein pia penabanaethopaewatha tatsi yawa xua paapameno. Jopa paca itacupaeyo xua panabaname yawa xua paapameno ichaxota exanompa cauri pia cui coyene pomonae jopa pejume cowuntsiwi.

<sup>22</sup> Icha waxainchi wunae jaintatsi caurimonae poxonae xainchi po pewi jiwi tajeba ibo nacom bapoxonae waxainchi exanatsi xua pon jiwi Pecanamataxeinaein naca caseba pia wanaca asiwixae. Waxainchi jopa xeinaetsi po peayapusuwa xua bichocono daunwei xua beyacaincha Nacom.

**Meje xua Pablo yabara paeba  
xua bewa jiwi yabara nanta  
xeinae pewi poxonae xane**

<sup>23</sup> Baraxua bequein xainyei poxonae jiton jeye: “Neitacupa xua taexanaewa pocotsiwa ichichipan”, jei bapon. Daichitha jopa daxita nacata wunaeyo xua pocotsiwa exanatsi. Bequein waxainchi naca itacupa xua waexana dubenanaebiyawa pocotsiwa xua waichichipaewatsi. Daichitha daxita baxuan jopa naca yawenaeyo xua wajume cowunta dubenanaebiyawa Jesús.<sup>24</sup> Jopa bewa payabara nanta xeinaem xua saya painya coutha nexa xua painya nenayawenaenexam. Jame bewa payabara nanta xeinaem xua apara iru ichamonae painya neyawenaenexaru.

<sup>25</sup> Po pewi pacomoqueibame po wi jiwi caenaeta pecaenaetsi bontha, painya xoba matha payabara yainyabeibame barapo pewi. Jopa payainyabinde icha metha xua apara po wi bayatha jiwi tajeba ibo nacom. Jame bara saya itatemaya paxaibare. Xain bapoxonae painya juntu coyene jopa paca tsipaebiyo xua apara abe paexaname.<sup>26</sup> Nacom Pejume Diwesitha jeye: “Barapo cae pin nacue yawa xua xuan xeina barapo cae pin nacuathe Nacom pon Pecanamataxeinaein bapon piawan”, jei Nacom Pejume Diwesitha.<sup>27</sup> Poxonae jiton pon jopa pejume cowuntsin Jesús, paca tsiwaba pexaewa xua pia paca baru xaetsi, icha paichichipame moya pana napuna xaema. Paxaema pocotsiwa xua pexaethopaewatha bobena. Jopa payabara yainyabinde barapo pexaewa icha metha barapo pewi ibo nacom werena capona. Xain bapoxonae painya juntu coyene jopa paca tsipaebiyo xua apara abe paexaname.<sup>28</sup> Ichacuitha metha ichun

paca tsipaebichipa, xua jeye: “Apara barapo pewi jiwi tajeba ibo nacom poxonae wūnae jainta barapo ibo nacomtha”, jei bapon. Bapoxonae painya xoba paxaneme barapo pewito. Tsipei icha barapo pewi pajiwana xaename abe exana pacana exaname pontha pon xua yabara paca tsipaeba barapo pewi. Poxoru ichamonae pomonae pejume cowuntsiwi Nacom, yabara nanta xeina xua apara jiwi abe exana icha barapo wi xane. Daxota bapon junuwa xua abe exana icha pexaewa tsane barapo pewito. Icha jopa baxua peitutha paexanaem tsane bapoxonae bapon jūntū coyene xanapanaya poponaena Nacomtha.<sup>29</sup> Yabara paca tsipaebatsi po coyene xua ichūn yabara nanta xeina barapo pewi pejūntū coyenewatha. Jopa apara yabara paca tsipaebichi po coyene paxam xua payabara nanta xeiname barapo pewi painya jūntū coyenewatha.

Ichitha metha ichūn neyainyabichipa, jei tsipae: “¿Eta pocotsiwa metha nantawenonan xua taexanaewa pocotsiwa ichūn yabara nanta xeina barapo pewi?” jei tsipae.<sup>30</sup> Equeicha metha bapon jei tsipae: “Poxonae pexaewa nabanān Nacomtha tsipaeban barapo pexaewa nexa, janje: Nacom, maisa jūntū coyene weiweinān xua barapo pexaewa tanecatsiwam, jan. Icha baxua exanan ¿eta pocotsiwa metha nexata ichamonae abe neyabara paeba poxonae xan barapo pexaewe?” jei tsipae.<sup>31</sup> Yabara paca tsipaebatsi baraxuan daxita xua xuan painya neapaewan yawa daxita xua xuan painya nenabanaewan yawa daxita icha coyeneinno xua xuan painya neexanaewan daxita bara pocotsi coyenein beta paexaneibare xua daxota poxonae jiwi paca cui taibina bapoxonae jiwi wūnae jainteibina Nacom.<sup>32</sup> Jopa paexanaeinde pocotsiwa

xua abe paexaname xua pocotsiwa daxota ichamonae jūpa exanaena. Baraxua jopa paexanaeinde judiomon-aetha, irū pomonaetha pomonae jopa judiomonae naexanaeyo, irū pomonaetha pomonae Nacom pejume cowuntsiwichi jiwānamonae.<sup>33</sup> Xan ichichipan beta taexanaewa po coyene xua ichamonae tsita xanapanatsi. Jopa exanaeinyo pocotsiwa xua tacoutha taichichipaewa. Saya meisa beta exanan po coyene ichamonae tsita xanapanatsi xua po coyenewatha barapomonae peyawenaenexatsi xua pecapanenebiyaenexatsi abe pia peexanae cuiru coyenein weya.

**11** Paexanaponde icha be pocotsi coyeneya ichin poxonae exanaponan, tsipei exanan pocotsiwa Cristo exanapona.

**Meje xua Pablo yabūxi yabara  
paeba powaxi poxonae ena  
penacaetutsi botha xua poxonae  
wūnae jainta Nacom**

<sup>2</sup>Tamonae pam paca weyatainchi tsipei paneyabara nanta xeinaponame xua daxita coyeneyatha. Paxam paexana dubenanaebiyame pocotsiwa xua paca cuidubatsi.<sup>3</sup> Ichitha ichichipan xua painya neyaputaewa xua Cristo canamataxeina daxita pebiwitha. Barichiru daxita pebiwi barompaya piseuriwi canamataxeina. Barichi Nacom Cristo canamataxeinatsi.<sup>4</sup> Icha pebin nantasipa acata poxonae Nacomtha tsipaeba xuano poxonae cueicueijei Nacom Pejume Diwesi, barapon Cristo jopa barū cui itura jinaetsi. Saya pia coutha ainya cui nacana exana.<sup>5</sup> Jame icha yabūyo jopa nantasipa acatsiyo xua poxonae cueicueijei Nacom Pejume Diwesi, xuano poxonae Nacomtha tsipaeba, bapowa pia pebin jopa barū cui itura jinaeyo poxonae jopa nantasipa



acatsiyo paparuwatha. Bapowa tsita itapeinya xeina xua jopa exanaeyo pocotsiwa pia pebin itorobatsi. Baraxua jupa icha be poxonae ichi xua daxita matana sibatsi abe peexanaexae. <sup>6</sup>Icha jopa yabuyo nantasipa acatsiyo bewa barapowa daxita nanta sibina. Ichitha icha barapowa aura xua penanta sibiwa daxota bewa nanta acatsina. <sup>7</sup>Poxonae Nacom exana pebin barapo pebin Nacom cui jupatsi. Daxota barapo pebiwi xeinaru barapo pecanamataxeinae coyenewa po coyenewa Nacom xeina. Pebin jopa bewa nantasipa acatsina poxonae Nacomtha tsipaeba, xuano poxonae Nacom Pejume Diwesi cueicueijeji xua daxota pebaru cui itura jinaenexa xua Nacom pebaru cui itura jinaenexatsi. Ichitha yabuyo bewa baru cui itura jinae pia pebin, tsipei pia pebin canamataxeinatsi. <sup>8</sup>Poxonae Nacom forota jopa Nacom exanaeyo pebin yabuyo weya. Saya jame Nacom exana yabuyo pebin pexainya weya tatsi. <sup>9</sup>Nacom jopa forotsiyo xua pebin yabuyo tsixanatsi. Jame Nacom forota xua yabuyo pebin tsixanatsi. <sup>10</sup>Daxota yabuyo bewa nanta acatsina penacaetutsi botha. Bapoxonae bapowa tsita itapeinya xeina matatsunpiwimonaetha xua bapowa baru cui itura jina pia pebin pecanamataxeinaexaetsi. <sup>11</sup>Daichitha pomonae Nacom pejume cowuntsiwixae, pebin nantawenona yabuyo, iru yabuyo nantawenona pebin. <sup>12</sup>Bequein Nacom exana yabuyo pebin peyene weya tatsi, ichitha pebiwi ba nowaeumenapona yabuxi weya. Barapo naxobe coyenewabe Nacom forota, pebin yawa yabuyo.

<sup>13</sup>Pananta xeinare xua icha bara xaniwaicha xua yabuyo jopa nanta acatsiyo poxonae Nacomtha tsipaeba penacaetutsi botha xua poxonae

wunae pejainchinexa Nacom. <sup>14</sup>Wacui coyenewa ba naca yaputane exana xua pebiwichi jopa bewa antanapiya naexanaetsi. Baxota ba aura naca exana. <sup>15</sup>Barichiru wacui coyenewa ba naca yaputane exana xua yabuxi wunae exana poxonae nantana copaba xua antanapiya. Bapoxonae yabuyo pia pentanantha nantasipa acata. <sup>16</sup>Pon ichichipa xua yabara pana nejume matsontsonoba baxuan, pajanje bapontha: “Barapo coyene pacuiduban. Matauta daxita penacaetutsi bonmonae jiwi pomonae Nacom pejume cowuntsiwi peburuya pana nabaru jupaya nanta xeinan tsipei icha coyene jopa payaputaeyo”, pajan.

**Meje xua Pablo yabara paeba xua abe exana pomonae pejume cowuntsiwi Nacom poxonae nainya xane po penabanaewa cayabara nanta xeina xua Jesús pia petsitupaewa jiwi**

<sup>17</sup>Pacata tinatsi anoxuae xua po coyenein yabara xua jopa tana neitacupaewa xua tapaca tsipaebiwatsi xua beta painya neexanaewa. Bequein pana nabaru nacaetutame ichitha painya juntu coyene jopa paca cana exanaeyo xua paayapusu tsoponaem. Maisa apara abe paexaname. <sup>18</sup>Copiya matha paca tsipaebatsi janje: “Ichun netsipaeba xua pinae poxonae pana nabaru nacaetutame, wunae painya nejainchinexa Nacom, pinae ainyamonaein tsanaya pana natsabame. Bapoxonae pinae pana najume matsontsonobame”, jan. Nanta xeinan xua apara xainyei po coyene ichamonae netsipaeba xua paca yabara paeba. <sup>19</sup>¡Moya ainya bicheiton pana naexande xain bapoxonae pana najume matsontsonobame! ¡Xain bapoxonae ichamonae tane xua ichamonae petaenexatsi pomonae jopa iru najume matsontsonobiyo pomonae

xua beta peexanaewi! <sup>20</sup>Bequein pana nabaꝛu nacaetuteibame xua painya xaenexa pexaewa poxonaꝛ pacayabara nanta xeiname xua pon jiwi Pecanamataxeinaein paca tsitupa, daichitha saya paxaneme. Apará jopá pacayabara nanta xeinaem barapo coyene. <sup>21</sup>Daxita paxam carepaya barompaya pia pexaewa nainya xane. Jopá pawunaꝛ ewateibim ichamonae xua painya nenabaꝛu xaenexa. Daxota ichamonae jainpa pomonae cotacaya pata. Ichamonae bichocono tonsana beya poxonaꝛ nacupa exana peatsaxa meran xua apa poxonaꝛ muxuna xane pexaewa. <sup>22</sup>Apará paxename painya bon ichaxota paca itacupa xua pana napena jubame. Baraxua be paaichaxaibim pomonae Nacom pejume cowuntsiwichi pomonae penacaetutsi bomonae jiwi poxonaꝛ baxua paexaname. Aura paexaname pomonaetha pomonae peacopeibiwi pomonae jopá itacupaetsi xua capana pexaewa, pomonae cotacaya pepatsixae. ¿Eta paca yabara jumichicuae tsainchi? Paca yabara jei tsainchi: ¿Bará beta xanepanaya paexaname jan tsane? ¡Jume! Baxua jopá neitacupaeyo xua tapaca yabara paebiwatsi.

**Meje xua Pablo yabara cuiduba  
pexaewa po pexaewa poxonaꝛ jiwi  
cayabara nanta xeina Jesús**

*(Mt 26.26-29; Mr 14.22-25; Lc 22.14-20)*

<sup>23</sup>Po coyene xua paca cuidubatsi baxua copiya Nacom necuiduba. Paca jeichi: Po merawitha Jesús caenaetatsi pon jiwi Pecanamataxeinaein, barapo merawitha Jesús pan pita pecobetha. <sup>24</sup>Poxonaꝛ najume weta xua paxa tsipaeba xua jei: “Axa maisa juntu coyene weiweinán xua tanecatšiwam pan”, jei, bapoxonaꝛ pan epa janaca. Bapon barai pijimonae jeye: “Panore pan yawa paxaemano. Barapo pan

neyabara caunuta xua tapepon. Tapepon inta atene exanaeinchi painya nepaca cayawenaenexa tsane xua painya tanejume cowuntsiwaxaem tsane. Poxonaꝛ baxua paexaneibame xua paxaibame panecayabara juntanaineibare painya juntu coyenewatha”, jei Jesús xua pijimonae tsipaeba. <sup>25</sup>Barichiya exana poxonaꝛ najain weta. Bapoxonaꝛ corotiyó pita pecobetha yawa jeye: “Pena petsiwunaꝛ muxu dutsi coyenewa paca tsipaebatsi. Barapo uva mera po mera xua corotiyótha tsijunta eca, barapo uva mera yabara caunuta tajana xua jana othoparenaein poxonaꝛ tupaein. Barapo jana tsita itapeinya xeinaena xua jiwi pinmonae yabara junteinaein abe pia peexanaꝛ cuiru coyenein tatsi. Daxita coyeneintha poxonaꝛ baxua paexaneibame xua paapeibame barapo uva mera, bapoxonaꝛ panecayabara juntanaineibare painya juntu coyenewatha xua tapaca catsitupaewaxaetsi”, jei Jesús, xua pijimonae tsipaeba. <sup>26</sup>Daxita tsaibi poxonaꝛ paxaibame pan yawa paapeibameno barapocotsi uva mera xua tsijunta eca corotiyótha, jiwi patsita itapeinya xeiname xua Cristo pacui yabara juntanainame xua painya nepaca tsitupaewa. Baxua paexaneibare beya poxonaꝛ equeicha Jesús patopaetsica, pon jiwi Pecanamataxeinaein.

**Meje yabara xua poxonaꝛ jiwi bewa  
beta exanaꝛ xua poxonaꝛ  
xane po pexaewa poxonaꝛ  
cayabara nanta xeinatsi Jesús**

<sup>27</sup>Pon xane barapo pan xuano apa barapo uva mera xua tsijunta eca corotiyótha xua Jesucristo cayabara nanta xeinatsi icha bapon jopá juntu coyene xanepanaeyo Nacomtha, apará abe exana Cristótha. Bapoxonaꝛ bapon Nacom tsita xeinatsi xua

penatsicuentisiwa xua abe peexanaexae Cristo pepontha tatsi xuano xua pia pejanathano tatsi tsipei bapon jopa baru cui itura jinaeyo barapo coyene. <sup>28</sup>Daxota daxita jiwi bewa barompaya matha pewunaeya najuntu coyene cayabara nanta xeinaena. Barapo jiwi bewa nanta xeinaena icha metha bara xanepanaya exana beya poxonaexaena barapo pan xuano poxonaexa apa barapo uva mera xua tsijunta eca corotiyotha. <sup>29</sup>Pon xane barapo pan xuano xua apa barapo uva mera xua tsijunta eca corotiyotha xua Jesucristo peyabara xaenexa ichacuitha bapon natsicuenta Nacomtha abe peexanaexae. Bapon natsicuenta Nacomtha tsipei matha jopa yabara nanta xeinaeyo barapo pexaewa xua apara bichocono ainya cui coyenewa xeina beyacaincha icha pexaewa. <sup>30</sup>Daxota pinmonae pajiwana atenem xuano jopa xeinaeyo peajuntu yapuswa. Daxota ichamonae bayatha pajiwana werapame. <sup>31</sup>Poxonaexa apatsi uva mera xuano poxonaexa xainchi pan po pexaewa poxonaexa Cristo cayabara nanta xeinatsi, matha bewa najuntu coyene cayabara nanta xeinaetsi, xua icha metha bara wunaexa waexanaewa. Bapoxonaexa xain Nacom jopa naca atene exanaeyo xua wanatsicuentiswaxae xua abe waexanaexae. <sup>32</sup>Bequein baxua Nacom nacata exana wanaca cuidubinexa xua equeicha xanepanaya waexanaenexa tsane. Nacom baxua nacata exanaena xua jopa wanaca yabara jeinexa: “Paxam abe paexaname icha ichi pomonaexa jinompa barapo cae pin nacuathe pomonaexa bichocono abe peexanaewi, pomonaexa jopa pejume cowuntsiwi”, xua jopa pewanaca yabara jeinexa.

<sup>33</sup>Daxota tamonaexa pam poxonaexa pana nacacetutame xua painya nabaru xaenexa po pexaewa xua poxonaexa Jesucristo

cayabara nanta xeinatsi, matha abu ichamonae paewateibare. <sup>34</sup>Icha ichun jainpa bu bapon matha pia botha xane pewunaeya xua poxonaexa napatopaena penacacetutsi botha xua poxonaexa wunaexa jainta Nacom. Bapoxonaexa itacupatsi xua bapon penaxaewa po pexaewa poxonaexa Jesucristo cayabara nanta xeinatsi. Bapoxonaexa Nacom jopa peraxa jubi tsane bapon xua abe peexanaexa poxonaexa nanacacetuta pomonaetha pomonaexa Nacom pejume cowuntsiwi. Poxonaexa paca siwa ponaeinchi xua tapaca taenexa tsainchi, bapoxonaexa paca cuidubinchi pocotsiwan xua yabara pana neyainyabame.

**Meje xua pejuntu cui coyenein  
yabara po pejuntu coyenein  
Nacom pia Pejumope tunaxu  
tatsi amanaya cata daxita  
carepaya pomonaetha pomonaexa  
Nacom pejume cowuntsiwi**

**12** Tamonaexa pam, paxam pomonaexa iru painya nejume cowuntsiwi xae Jesucristo. Yabara paca tsipaebatsi po coyene ichichipan xua painya neyaputaewa. Nacom pia Pejumope tunaxu tatsi cata pejuntu cui coyenein daxita barompaya carepaya pomonaetha pomonaexa Nacom pejume cowuntsiwi. <sup>2</sup>Paxam payaputaneme xua abe paexaname pewunaeya poxonaexa pajume cowuntame. Pacopatame xua bara ichamonae ichawa beya paca matacapona xua wunaexa painya nejainchinexa ibo nacomun, po ibo nacomun jopa cueicueijeiyoy. <sup>3</sup>Daxota ichichipan xua painya neyaputaewa tsane xua poxonaexa jeye: Dapocotsin aibi, pon itacupatsi xua jeye: “Jesús apara jopa Nacom Pexanto tatsi”, xua poxonaexa jei, icha bapon xeina Nacom pia Pejumope tunaxu tatsi pia peayapusu itorobi coyenewa tatsi. Barichi dapocotsin aibi pon itacupatsi

xua poxonae jeye: “Bapon Jesús apara pon jiwi Pecanamataxeinaein”, xua poxonae jei, icha bapon jopa xeinaeyo Nacom pia Pejumope tñaxu tatsi pia peyapusu itorobi coyenewa tatsi.

<sup>4</sup>Jiwi itacupatsi xua daxita carepaya barompaya pexeinaewa ainya juntu cui coyenein pomonae pejume cowuntsiwixae Nacom. Barapo juntu cui coyenein jopa nacui coyene jupaeyo. Bequein daxita jiwi xaina barapo coyenein daichitha bara saya compa pon pecatsixae apara bapon Nacom pia Pejumope tñaxu tatsi.

<sup>5</sup>Jiwi pomonae pejume cowuntsiwixae Nacom, itacupatsi xua daxita carepaya barompaya pexeinaewa ainya petanacuichi coyenewan Nacom nexa. Ichitha meisa saya bapon Nacom compa pon jiwi Pecanamataxeinaein daxitatsi waxainchi tanacuitatsi bapon.

<sup>6</sup>Jiwi pomonae Nacom pejume cowuntsiwixaetsi itacupatsi xua pexeinaewa ainya cui coyenein po coyeneinya xua Nacom petanacuichi watsi. Ichitha daxita barapo coyenein jopa nacui coyene jupaeyo. Saya compa Nacom pon daxita barapo jiwi cana exanatsi xua peexanaewa daxitan barapo coyeneinyatha.

<sup>7</sup>Nacom pia Pejumope tñaxu tatsi tsita itapeinya xaina Nacom pia peyapusu itorobiwatsi. Baxua exana poxonae Nacom barompaya naca cana exana xua beta waexanaewa wayawenaenexa tsane daxita jiwitha. <sup>8</sup>Ichamonae jiwanaetha, Nacom pia Pejumope tñaxu tatsi cata rejuntu cui coyenewa xua po coyene barapomonae rejuntu coyeneitha beta yaputane xua peexanaenexa pocotsiwa pecueicueijejewa ichamonaetha.

Barichi ichamonae jiwanaetha Nacom pia Pejumope tñaxu tatsi cata rejuntu cui coyenewa po coyene xua beta pecuidubiwa po coyene peyaputaewa xua daunwei yabara

yaputane pecana exanaenexa xua ichamonae yabara yaputane pecana exanaenexatsi. <sup>9</sup>Ichamonae jiwanaetha Nacom pia Pejumope tñaxu tatsi cata peyabara jume cowuntsi coyenewa xua daxota bapomonae nanta xaina xua bara itacupatsi xua peexanaewa daxita coyenein xua Nacom itoroba xua bapomonae peyawenaexaetsi Nacom. Barichi ichamonae jiwanaetha Nacom pia Pejumope tñaxu tatsi cata xua po coyenewatha peatenewi axaibi peexanaewatsi. <sup>10</sup>Ichamonae

jiwanaetha, Nacom pia Pejumope tñaxu tatsi cata po coyenewatha pexeinya petsita itutsi coyene peexanaewa. Ichamonae jiwanaetha, Nacom pia Pejumope tñaxu tatsi cata po coyeneya xua pecueicueijejewa Nacom Pejume Diwesi. Ichamonae jiwanaetha Nacom pia Pejumope tñaxu tatsi cata po coyeneya beta peyaputaewa xua po coyene poxonae Nacom pia Pejumope tñaxu tatsi jiwi cueicueijejewa exanatsi yawa po coyene poxonae jiwi cueicueijejewa exanatsi caurimonae. Ichamonae jiwanaetha Nacom pia Pejumope tñaxu tatsi cata po coyeneya xua ichamonae pecueicueijejewa icha jumeintha, po jumein bequein jopa nacuidubiyo. Ichamonae jiwanaetha Nacom pia Pejumope tñaxu tatsi cata po coyeneya xua barapomonae xuya jume yaputane exana po jumein xua ichamonae paeba po jumein xua ichamonae bequein jopa nacuidubiyo.

<sup>11</sup>Daxita barapo juntu coyenein exana ducuaenaebiya pon Nacom pia Pejumope tñaxu tatsi. Barapo jumope daxita coyenein meisa compa exana, po jumope Nacom pia Pejumope tñaxu tatsi. Barapo pejumope daxita carepaya jiwitha cata icha be pocotsi coyeneya barapo jumope peichichipaexae xua pecatsiwa.

**Meje yabara xua daxitatsi  
be caemonaetsi Jesustha**

<sup>12</sup>Pepon bequein caein ichitha nawita xeina xua pia pecueyabiwatsi, petaxube, pesitobeno, pemaxubeno yawa ichawanno. Barapo pepon pecueyabiwatsi bequein ainyawan daichitha daxita bara caewa ompin naexana pepontha. Barapocotsi juta coyeneya ichi, Cristo pinmonae xeina pia pejume cowuntsiwichi bequein bara barapon Jesús caein. <sup>13</sup>Barapocotsi juta coyeneya ichi, waxainchi seicaya jiwichi. Daichitha daxita waxainchi be caemonaetsi jiwichi wajume cowuntsixae Jesús. Ichamonaetsi waxainchi jiwantsi judi monaetsi. Ichamonaetsi pomonaetsi pomonaetsi amanaya tanacuitatsi ichamonaetsi nexa. Ichamonaetsi pomonaetsi saya wajinompawewi xua saya wawan wanata exanaetsi jiwichi. Daichitha daxita waxainchichi naca bautisaba. Waxainchi be caemonaetsi naexanatsi Nacom pia Pejumope tūnaxū tatsi wanaca baru jinompaxae. Nacom daxita waxainchi barompaya carepayatsi naca cata barapo pejumope tūnaxū, pon bara saya meisa caein.

<sup>14</sup>Pepon jopa xeinaeyo bara caewa xua pecueyatsiwatsi. Apra nawita xeina xuan pecueyabiwatsi. <sup>15</sup>Metha petaxu jei tsipae: “Xan apra jopa pecobeinyo, daxota xan pepon nexa aibi”, jei tsipae. Bequein baxua paebichipa daichitha apra bara pepon cueyatatsi icha itacupatsi xua paeba. <sup>16</sup>Metha pemuxuyoroto jei tsipae: “Xan apra jopa peitamaiqueitunyo daxota xan pepon nexa aibi”, jei tsipae. Bequein baxua paebichipa daichitha apra bara pepon cueyatatsi icha itacupatsi xua paeba. <sup>17</sup>Icha daxita wapepon ꞥ peitacuereto tsipae, jopa naca itacupaeyo xua wajume

taewa tsipae. Barichi icha wapepon daxita ꞥ pemuxuyoroto tsipae, jopa naca itacupaeyo xua watuxubiwa tsipae. <sup>18</sup>Ichitha Nacom pitacuiya duba xua ichaxota ichichipa duba daxita baxuan xua pocotsiwan pepon pecueyabiwatsi. <sup>19</sup>Icha daxita baxuan saya ꞥ najupaetsipa, bapoxonae jopa xapain xeinaetsipaetsi pepon. <sup>20</sup>Bequein anoxuae nawita xeinatsi xuan wanaca cueyabiwan wapepontha, daichitha awiya bara cae pepontsi.

<sup>21</sup>Peitacuereto jopa itacupaetsi xua pejeiwa pecobetha: “Xam jopa cacana matawenaetsi”, jopa pejeiwa. Barichi pentasipa jopa itacupaetsi xua pejeiwa petaxubetha: “Paxambe jopa paca cana matawenaetsibe”, jopa pejeiwa. <sup>22</sup>Po wanaca cueyatsiwa wapepontha xua jopa naca tsita ainya cuiyo, apra bara baxua ainya cui wacanamatawenaetsi. <sup>23</sup>Wapepon xua wanaca cueyatsiwa xua jopa naca tsita ainya cuiyo, paparuwatha nama acatatsi xua wabarꞥ itura jinaenexatsi. Pocotsiwa wanaca cueyatsiwa xua wapepontha xua pocotsiwa jiwichi jopa benaca taeyo, naacabatsi paparuwantha wapin uraxae. <sup>24</sup>Po wanaca cueyatsiwa wapepontha pocotsiwa jiwichi nacata tane baxuan jopa ainya cuiyo xua waacabinexa paparuwatha xua jopa waauraxaetsi. Nacom nacata exana pepon xua waxainchi beta nayaawatatsi paparuwatha, po wanaca cueyatsiwa wapepontha xua bichocono pecanantawenaetsi baxua. <sup>25</sup>Nacom baxuan exana xua jopa baxuan penawepu tsabinexa pepon weya. Daxita baxuan xua wanaca cueyabiwan eenatsi xua nantiya penayawenaetsi tsane icha pomonaetsi Nacom pejume cowuntsiwichi ichi xua nantiya bewa nayawenaetsi. <sup>26</sup>Icha barapo wanaca cueyabiwan caewa jiwana wepu atene, bara barichi pepon daxita ateneru. Matauta icha baxuan caewa jiwana

ainya cui cana exanatsi bara daxita nabaŕu weiweinaya dubena pepontha.

<sup>27</sup>Paxam Jesucristo piamonae tatsi jiwana pamxaem, caemonae pananaexaname, icha Jesucristo ichi xua xeina pia pecueyabiwatsi pia pepontha. Bequein bara caemonae pananaexaname ichitha carepaya barompaya patanacuitame Cristo.

<sup>28</sup>Nacom itapeta xua pomonae pejume cowantsiwichi xua pomonae pia petanacuichinexa tsainchi. Copiya itapetatsi pomonae Jesucristo pia peitorobi jiwi tatsi. Bapoxonae iruru itapetatsi pomonae Nacom pia peitorobi jume pepaebiwi. Equeicha bapoxonae iruru itapetatsi pomonae jiwi pecuidubiwi Nacom Pejume Diwesi. Bapoxonae iruru itapetatsi pomonae pexeinya petsita itutsi coyenewan exana. Bapoxonae iruru itapetatsi pomonae axaibi peexanaewi peatenewi. Iruru bapoxonae itapetatsi pomonae jiwi peyawenaewi. Bapoxonae iruru itapetatsi pomonae peitorobiwi pomonaetha pomonae pejume cowantsiwi. Iruru bapoxonae itapetatsi pomonae cueicueijeji icha jumeintha, po jumein bequein jopa nacuidubiyo.

<sup>29-30</sup>Nacom jopa apara daxita piamonae exanaeyo pomonae Jesús pia peitorobi jiwi tatsi. Matautano Nacom jopa apara daxita piamonae exanaeyo pomonae Nacom pia peitorobi jume pepaebiwi. Barichi Nacom jopa apara daxita piamonae exanaeyo pomonae jiwi pecuidubiwi Nacom Pejume Diwesi. Barichi jopa apara daxita jiwiyo pomonae exana pexeinya petsita itutsi coyenewan. Matautano jopa apara daxita jiwiyo pomonae axaibi peexanaewi peatenewi. Barichi jopa apara daxita jiwiyo pomonae cueicueijeji icha jumeintha po jumein bequein jopa nacuidubiyo. Barichi jopa apara daxita jiwiyo pomonae xuya piamonae yabara

yaputane exana po jumein ichamonae cueicueijeji po jumein bequein jopa nacuidubiyo. <sup>31</sup>Ichitha paxam bewa paichichipaenama po juntu cui coyenein xua bichocono wunaŕe po coyenein xua Nacom amanaya cata piamonaetha.

### Meje xua Pablo yabara paeba peantobe coyenewa

Ichitha anoxuae yabara paca cuidu-binchi icha juntu cui coyenewa po juntu cui coyenewa bichocono toxeinchiya wunaŕe beyacaincha xua po juntu cui coyenein aunxuae yabara paeban.

**13** Metha icha bequein neitacupaetsipa xua tacueicueijejiw ainya jumein po jumein ichamonae cueicueijeji, xuano po jumein matatsunpiwi cueicueijeji. Bequein metha neitacupaetsipa daichitha icha jopa ichamonae tsita xeinaeinyo peantobe coyenewa, bapoxonae saya apara pin busi jumein exanan poxonae saya cueicueijan. <sup>2</sup>Metha xan Nacom pia peitorobi jume tacueicueijan tsipae, matautano metha yaputaetsipan daxita po coyenein Nacom moya yawun xeina xua bexa Nacom exanaena, matautano metha yaputaetsipan daxita peyaputae coyenewan, matautano metha beta jume cowantsipan xua taneitacupaewa xua tsipaeban demxuwatha xua peponaenexa. Bequein metha xeinaetsipan daxita barapo coyenein ichitha came jopa xeinaeinchipae peantobe coyenewa barapoxonae jopa ainya cui jitonyo. <sup>3</sup>Icha peacopeibi jiwitha catan daxita pocotsiwa xeinan, yawano icha caenaetan tapepon xua tanetautsinexa tatupaein tajume cowantsixae, ichitha awiya came jopa xeinaeinchipae peantobe coyenewa daxita jiwi nexa, Nacom jopa tsita ainya cuiyuno.

<sup>4</sup>Jame pon xua peantobe coyenewa xeina daxita jiwi nexa bapon jame

jüntema popona poxonaē bequein ichamonae abe taexanaetha xua bapon bequein abe taexanaethatsi. Barichi pon peantobe coyenewa xeina, bapon jame amanaya yabara nanta xeinaeya yawena ichamonae. Bapon jame jopa peyabara uwin pocotsiwa ichamonae xeina. Matautano bapon jame jopa pia coutha penayabara nanta xeinaein xua peainya cui jiton. Matautano jame bapon jopa peabēin jiwī. <sup>5</sup>Barichi bapon jame jopa atsaquiya pepaēbin. Matautano bapon jame jopa peyabara nanta xeinaein xua saya ɯ piawa nexa. Bapon jame jopa peanaepanaein ichamonaetha. Bapon jame xuya jopa peyantomateibin xua xuya peexanaenexa abe bapontha. <sup>6</sup>Barichi bapon jame jopa jüntu coyene weiweinaeyo poxonaē ichamonae abe exana. Saya bapon jame jüntu coyene weiweina poxonaē ichamonae bara xainyeya exana. <sup>7</sup>Pon ba jame peantobe coyenewa xeina ichamonae nexa, bapon jame exanapona beta bequein ichamonae daunweya ayapubeya taexanaetha xua bapon daunweya ayapubeya taexanaethatsi. Bapon ba jame yabara jume cowüntapona ichamonae xua barapomonaē pomonaē ichamonaexae itacupatsi xua xanepanaya peexanaewa. Matautano bapon jame yabara jume cowüntsiya ewatapona xua ichamonae bexa beta peexanaewa tsane bequein abe peexanaewi. Matautano bapon ba saya jüntema popona bequein bapon abe taexanaethatsi ichamonae.

<sup>8</sup>Po coyene xua jiwī antobe ichamonae barapo coyenewa bapana jopa weraweracae tsane. Jopaena matabi po matabitha jopa nantawenonaē tsane xua pomonaē pecueicueijeī jiwī Nacom nexa pocotsiwa Nacom yaputane exana. Barichino jopa cueicueijeī tsane icha jumeintha po jumein barapomonaē

jopa bequein nacuidubiyo. Matautano jopa nantawenonaē tsainchi po coyene peyaputae coyenewa. <sup>9</sup>Anoxuae wayaputae coyenewa nacata seica daxota be conotha yaputainchi. Matautano Nacom yabara wacueicueijeīwa nacata seica daxota be conotha yabara cueicueijeīchi Nacom. <sup>10</sup>Ichitha poxonaē Cristo patopaetsica pon daxita coyenein peyaputaēin bapoxonaē bapon naca yaputane exanaena po coyene xua nacata seica xua wayabara cueicueijeīwa bapon, xuano xua bapon yabara yaputainchi. Barapo ainya coyenebe weraweracaena bapoxonaē.

<sup>11</sup>Poxonaē xan awiya pexuyon cueicueijan xua najume pexuinan. Yawano nanta xeinan icha pexuyo ichi. Matautano yaputan xua pexuyoxaein. Ichitha poxonaē pinyonba nacui baraxuban pocotsiwa exanaponaē poxonaē pexuyon. <sup>12</sup>Bara juta coyeneya ichi anoxuae. Saya be conotha Nacom yabara yaputainchi. Baraxua be icha be pocotsi juta coyeneya ichi poxonaē tsabocototha nayatainchi xua dudana xua daichitha jopa nataetsi. Ichitha bexa tsane yatsicaewa Nacom pentha taeinchi peitabara. Anoxuae be conotha Nacom yabara yaputan. Ichitha bexa tsane xaniwaicha daxita beta yaputaēin icha anoxuae Nacom neichi xua tanejüntu coyene yaputaewa. <sup>13</sup>Acoibi po coyenewabe ataya ayapusu tsane. Meje barapo acoibi po jume coyenewabe xuaje: Pejume cowüntsi coyenewaru Nacomtha, barichi peyabara jume cowüntsiya ewatsi coyenewaru Nacomtha, matautano peantobe coyenewaru. Jame po jume coyenewa bichocono toxeinchiya ainya cui beyacaincha xua icha coyenewa barapo coyenewa jame apara xua peantobe coyenewa, xua ichamonae waantobe coyenewatsi. Barapo jume

coyenewa bichocono toxechinchi ainya cui.

**Meje xua Pablo yabara paeba xua ainya jumein pepaebiwa yabara po jumein bequein jopa nacuidubiyo**

**14** Bewa paichichipaename xua painya nexechaewa peantobe coyenewa. Barapoxonae bewano paichichipaename icha juntu coyenein pocotsi juntu cui coyenein Nacom amanaya paca cata. Po juntu cui coyene xua bichocono wunaey beyacaincha xua icha juntu cui coyenewa, apara barapo juntu cui coyeneitha pacueicueijam Nacom pia peitorobi diwesi. Baxua jame bewa paichichipaename. <sup>2</sup>Pon ba icha jumetha cueicueijeji po jumeintha xua bapon bequein jopa nacuidubiyo bapon apara tsipaeba Nacomtha. Bapon apara jopa tsipaebiyo jiwitha tsipei jiwi jopa yaputaeyo pocotsiwa paeba bapon. Pocotsiwa bapon paeba apara Nacom pia Pejumope tunaxu tatsi cueicueijeji exana. Bapon apara paeba pocotsiwa Nacom moya yawun xeina, pocotsiwa xua bequein jiwi jopa yaputaeyo. <sup>3</sup>Ichitha nama seicaya pon jame Nacom Pejume Diwesi cueicueijeji jiwitha, jiwi yaputane exanaechinchi Nacom yabara. Matautano bapon poxonae Nacom Pejume Diwesi cueicueijeji yawena ichamonaetha xua barapomonae juntu cui coyene tsacabatsi xua Nacom pejume cowuntsiwatsi. Barichi poxonae cueicueijeji Nacom Pejume Diwesi juntu coyene sadujei exana pomonae anthuthurewe xua anthuthutane. <sup>4</sup>Pon ba cueicueijeji ainya jumeintha po jumeintha bequein bapon jopa nacuidubiyo, bapon ba saya pia coutha nayawena xua peyabara yaputaewa Nacom. Ichitha pon ba cueicueijeji jiwitha Nacom nexa po coyene Nacom yaputane exana, bapon jiwi yaputane

exainchi Nacom yabara pomonae xua Nacom pejume cowuntsiwichi.

<sup>5</sup>Ichichipan xua daxita paxam painya necueicueijejiwa icha jumeintha, po jumein bequein jopa panacuidubim. Jame yatsicaewa bichocono ichichipan xua painya necueicueijejiwa Nacom Pejume Diwesi ichamonaetha. Pon ba xua Nacom Pejume Diwesi cueicueijeji ichamonaetha, bapon ba jame wunaey exana beyacaincha pon icha jumeintha cueicueijeji. Ichacuitha bapon pon icha jumeintha paeba itacupatsi xua yabara jume yaputane exana jiwitha po jumein xua pipato pepaebi jumein. Ichha bapon barapo coyene exana bapoxonae bapon yawena pomonae pejume cowuntsiwi Nacom xua beta mataropeicha pejume cocowuntaponaenexa Cristo. <sup>6</sup>Tamonae pam, icha poxonae paca siwa ponaetsipatsi paca tsipaebichipatsi po jumeintha jopa nacuidubinyo tacoutha, bapoxonae apara jopa paca yawenaetsipaetsi. Ichitha icha paca tsipaebichipatsi po diwesi Nacom neyaputane exana, baxua jame paca yawenaetsipa xua beta painya nejume cowuntsiwa Nacom. Ichitha icha ichacuitha paca tsipaebichipatsi pocotsiwa xua nacuiduban baxua jame paca yawenaetsipa. Matautano icha ichacuitha paca tsipaebichipatsi pocotsiwa xua Nacom Pejume Diwesi paeba pocotsiwa bexa Nacom exanaena, baxua jame paca yawenaetsipa. Ichacuitha icha paca cuidubichipatsi Nacom Pejume Diwesi baxua paca yawenaetsipa.

<sup>7</sup>Jiwi ba tanbaba po petanabiwa arpa matawun, xuano ba oba po peobiwa pewun flauta. Ichitha icha barapo ainya pecajume exanaewan jopa xapain busi pichapaetsipae bapoxonae jiwi jopa xapain yaputaetsipae po wei xua icha jiwi wei tanbaba. <sup>8</sup>Barichi poxonae ba jiwi naba ichamonaetha bapoxonae ba



oba xua penajunutsiwa. Ichitha icha barapo busi, busi caewa, jiwi jopa xapain busi taeyo. Bapoxonae jiwi jopa itacupaetsi xua penacui wunaetsiwa xua penabinexa. <sup>9</sup>Barichi paxamtha. Icha icha jumeintha papaebichipame jiwitha, po jumeintha bequein jopa panacuidubim, xuano iru barapo jiwi jopa nacuidubiyo bapoxonae jiwi jopa xapain paca yaputaetsipae. Baraxua apara be saya poxonae sito patsipabame. <sup>10</sup>Metha beya tsipae xua barapo nacuathe ainya jumein xeinaetsipa xua jiwi barompaya tsanaya pijumeintha paeba. Daxita barompaya pia matabuxumonaen tsiniya xeina po jumein xua yaputane barapomonaen. <sup>11</sup>Ichitha icha xan jopa yaputaeyo po jumetha xua ichun netsipae bapoxonae xan be tsita tana nanapaincha poponaen xua be icha nacua werena taponaein iru bapondu be netsita penanapaincha poponaen xua be icha nacua werena peponaein. <sup>12</sup>Paxam paichichipame po juntu cui coyenein Nacom pia Pejumope tunaxu tatsi amanaya cata piamonaetha. Yaitama baxuan paichichipame daxota bichocono pawucare barapo Nacom pia Pejumope tunaxu tatsi xua painya nepaca catsibinexa po juntu cui bichocono wunae. Baxua pawucare xua painya neyawenaenexa pomonaen pejume cowuntsiwi Nacom, xua beta pejume cocowuntaponaenexa Nacom.

<sup>13</sup>Daxota pon icha cueicueijeji icha jumetha po jumetha bequein bapon jopa nacuidubiyo, bapon bewa wucaena Nacomtha xua Nacom bapontha yabara jume yaputane pecana exanaenexa barapo jume. Bapoxonae bapon itacupatsi xua yabara yaputane exana barapo jume xua ichamonae yaputane exanatsi. <sup>14</sup>Icha icha jumetha tsipaeban Nacomtha po jume bequein jopa yaputaeyo saya apara tajumope tunaxu tsipaeba

Nacomtha. Tajuntu coyene jopa yaputaeyo xua tatsipaebiwa Nacom. Barichi ichamonae jopa yaputaeyo xua tatsipaebiwa Nacom. <sup>15</sup>¿Eta xua bewa exanocuaein? Jame, bewa wucaein Nacom tajumope tunaxutha po jumein jopa yaputaeyo. Matautano bewa wucaein Nacom tajuntu coyenewatha po jumein yaputan. Barichi bewa naxunaen Nacomtha tajumope tunaxutha po jumein jopa yaputaeyo. Matautano bewa naxunaen tajuntu coyenewatha po jumein yaputan. <sup>16</sup>Ichacuihtha metha icha jumetha wunae jainchipame Nacom xua nejumope tunaxu cueicueijeji cacana exana. Pomonaen xua cajume taetsipa jopa cajume yaputaetsipae. Daxota jopa itacupaetsipaetsi xua peburuya necajume notsiwa Nacom nexa, xua pejeinexa: “Bara ichi tsane”, xua pejeiwa. <sup>17</sup>Poxonae bequein Nacomtha wucaetsipame icha jumetha bara bequein wunae pocotsiwa xua paebame, daichitha ichun jopa yawenaetsipaetsi xua beta pejume cowuntsiwa Nacom. <sup>18</sup>Nacomtha tsipaeban paxam yabara, janje: “Nacom maisa juntu coyene weiweinan, xua icha jumeintha tacatsipaebi watsi, beyacaincha daxita barapomonaen xua icha jumeintha catsipaeba”, jan. <sup>19</sup>Ichitha poxonae pomonaen Nacom pejume cowuntsiwichi nacuetuta penacuetutsi botha bara saya wunae tsipae xua icha saya cinco po jumebe tacuidubiwa tsipae xua jiwi peyaputaewa tsane. Baxua beyacaincha xua poxonae icha metha cueicueijan tsipae diez mil po jumebe, po jume xua jopa nacuidubinyo. Bequein barapo diez mil po jumebe paebichipan daichitha jiwi jopa yaputaetsipae xua tacueicueijejiwa.

<sup>20</sup>Tamonae pam, paxam pomonaen iru painya nejume cowuntsiwixae Jesucristo. Painya xoba pananta

xeiname icha pexui ichi poxona nanta xeina. Jame pajinompa dubenanae-biyama icha pexui ichi poxi pencuetixi xua jopa abe exanaeyo. Maisa jame pananta xeina dubenanaebiyama icha pomona pinyon ichi xua nanta xeina dubenanaebiya. <sup>21</sup>Nacom jeye pia peitorobi jume diwesitha: “Paebin barapo judiomonaetha poxona cueicueijeji cana exanaein pomona penanapaincha jinompaewi xua icha nacuapiwi po jumein xua jopa yaputaeyo pomona xua petsipaebixaetsi. Bequein baxua exanaein ichitha cataunxuae barapo judiomona jopa nejume tae tsane”, jei pon jiwi Pecanamataxeinaein pia peitorobi jume diwesitha. <sup>22</sup>Daxota xua pecueicueijejiwa icha jumeintha tsita itapeinya xeina xua pomonaetha pomona jopa pejume cowuntsiwi xua apara Nacom atene exanaena barapomona jopa pejume cowuntsixae. Barapo jumein jopa apara nexiyo pomona xua bayatha pejume cowuntsiwi, poxoru Nacom jopa atene exanae tsane barapomona. Ichitha xua cueicueijeji Nacom Pejume Diwesi, baxua tsita itapeinya xeina pomonaetha pomona pejume cowuntsiwi xua apara Nacom yawenaena barapomona peantobexae tsipei barapomona Nacom jume cowuntatsi. Barapo Nacom Pejume Diwesi pecueicueijejiwa jopa apara nexiyo pomona jopa pejume cowuntsiwi poxoru Nacom jopa yawenae tsane barapomona jopa pejume cowuntsixae Nacom. <sup>23</sup>Ichacuitha metha patsipa painya nenacaetutswatha xua poxona Nacom wuna pajaintame pomona jopa yabara yaputaeyo poxona ichamona pecueicueijejiwa icha jumeintha, iruru pomona jopa pejume cowuntsiwi Nacom. Icha metha daxita paxam barompaya papaebichipame icha

jumeintha barapomona jopa paca yaputaetsipae. Bapoxona barapomona paca yabara nanta xeinaetsipa xua apara painya nepacamatajemabi jiwi pam. <sup>24</sup>Ichitha metha pebiwi patsipa painya nenacaetutswatha xua poxona Nacom wuna pajaintame pomona jopa yabara yaputaeyo poxona ichamona pecueicueijejiwa icha jumeintha, iru pomona jopa pejume cowuntsiwi Nacom. Poxona daxita paxam Nacom Pejume Diwesi papaebichipame barapomona paca yaputaetsipa xua papaebame. Bapoxona barapomona najuntu coyene cayabara nanta xeinaetsipa xua abe peexanaewa. Matautano barapomona yaputaetsipa xua Nacom petsita natsicuentswathi xua abe peexanaexae xua poxona painya necajume taexae poxona papaebame Nacom Pejume Diwesi. <sup>25</sup>Nacom exana xua barapomona peyaputaewa po coyene xua Nacom daxita beta yabara yaputane po coyene xua barapomona nanta xeina pejuntu coyenewatha. Bapoxona barapomona yaputaena xua bara Nacom junteina barapomona abe pia peexanae cuiru coyenein tatsi. Bapoxona pentabocotha umenaena xua Nacom wuna pejainchinexa tsainchi. Barapomona jei tsane paxamtha: “¡Jaina, maisa deta Nacom paca baru jinompa!” paca jei tsane barapomona.

**Meje xua Pablo jeye: “Beta xanepanaya paexanaponde penacaetutswi bontha poxona wuna pajainteibame Nacom”, jei**

<sup>26</sup>Tamona pam, paxam pomona iru painya nejume cowuntsiwixae Jesucristo. Paca tsipaebatsi xuaje: Poxona pana nacaetutame, ichamona painyamonae jiwana barabu naxunaena peweixi xua wuna pejainchinexa Nacom. Ichamona iru barabu

cuidubina ichamonaetha. Ichamonaē irū barabū cuidubina po coyenein Nacom yaputane exana. Ichamonaē irū barabū icha jumeintha cueicueijeī tsane po jumein bequein jopa nacuidubiyo. Ichamonaē irū barabu xuya barapo jumein yabara jume yaputane exanaena daxita jiwitha po jumein ichamonaē paeba. Daxita po coyenein xua paexaname bara wūnaē paexande poxonaē panacaetutame wūnaē painya jaintsinexa Nacom xua daxota xanepanaya mataropeicha painya nejume cocowanta dube-nanaebiyaenexa Nacom.<sup>27</sup> Poxonaē icha jumeintha pacueicueijam bewa saya cueicueijeī nacueyatabe poyobe ichacuitha poxonaē acoibi poyobe. Ichitha ichamonaē ajibi tsane. Barapo acoibi poyobe bewa xuya cotacaya barompaya tsana cueicueijeī tsoponae tsane. Bewa bapoxonaē xuya ichūn cotacaya yabara jume yaputane exanaē pocotsiwan xua barapo acoibi poyobe barompaya seicaya paeba.<sup>28</sup> Ichūn dapocotsin aibi pon itacūpatsi xua xuya cotacaya peyabara jume yaputane exanaewa, jopa bewa barapo acoibi poyobe icha jumeintha paebi tsane penacaetutsi jiwitha xua poxonaē Nacom wūnaē pejainchinexa. Saya bewa moya pia coutha cueicueijeī Nacomtha.<sup>29</sup> Bara wūnaē tsipae icha saya pacopatsipame nacueyatabe poyobe xua pecueicueijeīwa Nacom Pejume Diwesi xua ichacuitha poxonaē saya acoibi poyobe. Ichamonaē bewa jume taena icha metha bara xaniwaicha paeba barapo acoibi poyobe.<sup>30</sup> Icha ichūn eca baxota pon Nacom yaputane exana po jumein bewa cueicueijeī tsane bapoxonaē pon xua copiya asiya uncua bewa moya ecaena xua daxota barapon pon ichūn itacūpatsi xua cueicueijeī po jumein Nacom yaputane exana.<sup>31</sup> Daxita paxam paca

itacūpa xua painya necueicueijeīwa Nacom Pejume Diwesi, painya necana exanaenexa xua daxita barapomonaē penacuidubinexa. Matautano paca itacūpa painya necueicueijeīwa painya nejūntū cui tsacabinexa daxita jiwi pejume cowūntsinexa Nacom. Ichitha jame paxam barompaya tsanaya xuya patamropatsiya cueicueijam tsoponeibim tsane.<sup>32</sup> Pomonaē Nacom Pejume Diwesi pecueicueijeīwi barapomonaē itacūpatsi xua penajūntū coyene itorobiwa. Daxota barapomonaē ewata xua ichūn matha pecueicueijeīnexa, xua bapoxonaē bara pecueicueijeīnexa tsane ichamonaetha.<sup>33</sup> Tsipei Nacom jopa ichipaeyo xua jiwi ajumeyaexa poxonaē daxita jiwi pebūrya cueicueijeī Nacom Pejume Diwesi. Jame Nacom ichichipa xua pomonaē pejume cowūntsiwi jūntema penabarū jinompaewa poxonaē nacaetuteiba xua wūnaē pejainchinexa Nacom.

Daxita pomonaē xua nacaetuta pejume cowūntsixae Jesucristotha, exana xuaje:<sup>34</sup> Yabūxi bewa saya moya poxonaē nacaetuta pomonaē Nacom pejume cowūntsiwi xua Nacom Pejume Diwesi pecueicueijeīnexa. Nacom baxua jopa copatsiyo xua yabūxi pecueicueijeīwa baxota. Barapo yabūxi bewa jume cowūntsiwa pia seuriwi pocotsiwa itorobeibatsi icha be pocotsi coyeneya bayatha Moisés pia peitorobi coyenewatha paeba.<sup>35</sup> Icha barapo yabūxi ichichipa xua peyaputaewa pocotsiwa ichamonaē paeba, bewa barapowaxi pia boxitha yainyabi pia seuriwi. Tsipei jopa wūnaē tsipae icha yabūyo cueicueijeī penacaetutsimonaetha pomonaē Nacom pejume cowūntsiwichi xua poxonaē yainyaba pia pebiwi.

<sup>36</sup> Paxam bewa payaputaename xua Nacom Pejume Diwesi jopa copiya matha tamropata pitabiyo painya xan-

tha. Matautano jopa paxam compa pam pomonae meisa paxeiname Nacom Pejume Diwesi. <sup>37</sup>Ichamonae pomonae paxam jiwana pam nanta xeina xua xeina po jüntu coyenewatha pecueicueijejiwa Nacom Pejume Diwesi. Barapo jüntu coyene xua Nacom pia Pejumope tñaxu tatsi amanaya cata. Matautano ichamonae pomonae paxam jiwana pam nanta xeina xua xeina icha jüntu coyenewa po jüntu coyene Nacom cata. Daxita paxam bewa payaputaename xua po coyenein yabara pacata tinatsi xua apara Nacom wanaca itorobiwa. <sup>38</sup>Icha pebin jopa bejume cowuntsiyo pocotsiwa paeban, bapoxonae painya xoba pajume cowuntame pocotsiwa bapon paeba.

<sup>39</sup>Tamonae pam, paxam pomonae iru painya nejume cowuntsiwixae Jesucristo. Bewa jame paichichipaename xua painya necueicueijejiwa Nacom Pejume Diwesi. Painya xoba pajume itawetame poxonae ichamonae cueicueijejiwa jumein po jumein bequein jopa nacuidubiyo. <sup>40</sup>Daxita beta xanapanaya paexanaponde poxonae pana nacaetutame penacaetutsi botha xua poxonae wuna painya nejainchinexa Nacom, xua barompaya tsanaya patamropatsiya exanaponde.

**Meje xua Pablo yabara paeba  
poxonae Cristo equeicha asu exainchi**

**15** Tamonae pam, paxam pomonae iru painya nejume cowuntsiwixae Jesucristo. Ichichipan xua pacayabara nanta xeiname po diwesi pecapanenebiyae diwesi jume, po diwesi paca tsipaebatsi. Barapo pecapanenebiyae diwesi pajume cowuntame, xua daxota beta pajume cowuntsiya jinompame Nacomtha. <sup>2</sup>Painya nejume cowanta dubenanae-biyaexae barapo pecapanenebiyae diwesi, anoxuae painya nepaca

capanenebiyae jiwi pam abe painya neexanae cuiru coyenein weya. Barapo coyene paxeina dubenanaebiyaename icha beta payabara jñtanainame pocotsiwa paca cuidubatsi xuanu icha xaniwaicha pajume cowuntame baxuan. Icha copiya jopa pajume cowuntsim tsane painya jñntu coyenetha bapoxonae pecapanenebiyae diwesi bapoxonae Nacom jopa paca capanenebiyae tsane.

<sup>3</sup>Copiya paca cuidubatsi pocotsiwa xua ichun necuiduba xua Cristo yabara. Paca cuidubatsi xua Cristo naca tsitupa abe waexanae cuiru coyenein nexa icha be pocotsi coyeneya bayatha Nacom Pejume Diwesitha yabara paeba baxua. <sup>4</sup>Poxonae Jesucristo tupa bapoxonae muthutha xotsi. Ichitha poxonae acoibi po matabibibe jopa, barapo mat-acabitha equeicha asu exanatsi, icha be pocotsi coyeneya bayatha Nacom Pejume Diwesitha yabara paeba baxua. <sup>5</sup>Bapoxonae Pedro tsita naitutatsi Jesucristo. Bapoxonae equeicha Jesucristo tsita naituta pia peitorobi jiwi tatsitha pomonae doce poyobe. <sup>6</sup>Bapoxonae caena equeicha Jesucristo tsita naituta pomonaetha pomonae pia pejume cowuntsi jiwixaetsi, pomonae beyacaincha quinientos poyobe jiwi. Awiya pinmonae barapo bicheito jiwana monae jinompa anoxuae pomonae xua Jesús tainchi bequein ichamonae werapa bayatha, pomonae barapomonae jiwana. <sup>7</sup>Bapoxonae equeicha Santiago tsita naitutatsi Jesucristo. Bapoxonae equeicha Jesús tsita naituta daxita pomonaetha pomonae pia peitorobi jiwi tatsi.

<sup>8</sup>Bapoxonae nama matapainya xan Pablon netsita naituta Jesucristo. Nacom necana exana pon pia peitorobi jiwi jiwana tatsin, xua pon tabu ducuan. Xan be pon xua nainya jemeicha jume cowuntan icha be pocotsi coyeneya ichi poxonae pexuyo pena nainya jemeicha tsiperu wenaexana. <sup>9</sup>Xan wepu be

conotha ainya cuin pomonae Jesucristo pia peitorobi jiwī tatsi. Ichamonae pomonae Jesucristo pia peitorobi jiwī tatsi bichocono ainya cui beyacaincha xua xan. Bequein Nacom neyabara caunuta xua xan Jesucristo pia peitorobi jiwī tatsi jiwanan ichitha auran tsipei bichocono abeya exanan pomonaetha pomonae penacaeutsimonae jiwitha pomonae pejume cowuntsiwi Nacom. Pebaraxuaxae jopa bewa neyabara caunutsi baxua.<sup>10</sup> Ichitha xan nama anoxuae seicayiya exanan Nacom taneyawenaexae. Bapon tana neantobexae jopa abeya taexanaeinyo. Jame nama seicaya bichocono ayapusuya nacuitan Jesucristo nexa beyacaincha ichamonae pomonaexae Jesucristo pia peitorobi jiwī tatsi. Ichitha xan jopa tacouthinyo xua tanacuichiwa, apara jame Nacom neyawena tana neantobexae.<sup>11</sup> Jopa ainya cuiyiyo pomonae bayatha paca cuiduba Nacom Pejume Diwesi. Jopa ainya cuiyiyo icha ichamonae pomonae Jesús pia peitorobi jume pepaebi jiwī bayatha paca cuiduba. Matautano jopa ainya cuiyiyo icha xan bayatha paca cuidubatsi. Saya jame ainya cui xua daxita paxan nanta jupaya tapaca cuidubiwatsi barapo Nacom pia pecapanenebiyae diwesi jume xuano xua painya nejume cowuntsiwa baxua.

**Meje xua Pablo yabara paeba pomonae xua equeicha asu exanatsi petupae cuiru coyene weya**

<sup>12</sup>Paca cuidubatsi xua Cristo equeicha asu exanatsi petupae cuiru coyene weya. Daichitha pomonae paxam jiwana pam paeba xua pinae Nacom jopa equeicha asu exanaeyo jiwī petupae cuiru coyene weya. ¿Eta xua nexata metha baxua paeba painyamonaē jiwana? Bara bayatha payabara yaputane-meba.<sup>13</sup> Icha jiwī jopa equeicha asu

exanaetsipaetsi petupae cuiru coyene weya, bara nexata Cristo barichipaetsi, jopa equeicha asu exanaetsipaetsi petupae cuiru coyene weya.<sup>14</sup> Icha Cristo jopa equeicha asu exanaetsipaetsi petupae cuiru coyene weya, bapoxonae jopa ainya cui tsipae pocotsiwan paca cuidubatsi. Bapoxonae baxua be xua pejumexaei tsipei jopa paca yawenaetsipae. Matautano barichi painya nejume cowuntsiwa jopa ainya cui tsipae jopa painya nepaca yawenaexae tsipae.<sup>15</sup> Icha baxua xaniyei paxan be pomonae pemuxuitorobi jiwī pan tsipaein pocotsiwa Nacom payabara pae-ban, tsipei paxan apara papaeban xua Cristo equeicha asu exanatsi petupae cuiru coyene weya. Papaeban xua Nacom equeicha Cristo asu exanatsi petupae cuiru coyene weya ichitha baxua jopa xainyeyo icha jiwī jopa equeicha asu exanaetsi petupae cuiru coyene weya.<sup>16</sup> Icha petupae jiwī jopa equeicha asu exanaetsipaetsi petupae cuiru coyene weya, barichi Cristo bayatha jopa equeicha asu exanaetsipaetsi petupae cuiru coyene weya.<sup>17</sup> Icha Cristo jopa equeicha asu exanaetsipaetsi petupae cuiru coyene weya bapoxonae jopa paca yawenaetsipae xua painya nejume cowuntsiwa. Daxota awiya paexana dubenanaebiyaetsipame abe painya neexanae cuiru coyenein.<sup>18</sup> Icha baxua xainyei tsipae xua Cristo jopa asu exanaetsipaetsi petupae cuiru coyene weya bapoxonae pomonae xua bayatha werapa bequein jume cowuntsitha tsipae Jesús, ichitha weraweracaetsipa xua abe peexanaexae.<sup>19</sup> Waxainchi jume cowuntsiya wunaē ewatatsi xua bexa tsane Cristo naca asu exanaena poxonae werapaeinchi. Ichitha icha saya jume cowunta dubenanaebiyaetsipatsi xua Nacom wanaca yawenaewa tsane barapo cae pin nacuathe, bapoxonae wajume cowuntsiwa jopa naca yawe-

naetsipae xua po coyene Nacom bexa asu wanaca exanaewa tsane poxonae werapaeinchi. Bapoxonae jiwi pomonae jopa pejume cowuntsiwi naca yabara jei tsipae: “;Pai barapomonae tsobenae beyacaincha ichamonae bequein jume cowantsitha tsobenae!” xua wanaca yabara jeichiwa tsipae.

<sup>20</sup>Ichitha pocotsiwa xua yatsicaya jame xainyei, apara jame xua Cristo bara yatsicaya asu exanatsi petupae cuiru coyene weya. Bapon Cristo copiya jiwi asu canamata exanatsi xua petupae cuiru coyene weya pomonae xua ataya tsitecaeya peasunexa xua jopa weraweracaeyo. <sup>21</sup>Jiwi abe peexanae cuiru coyenein peexanaexae daxota werapa, tsipei jiton copiya abe canamata exana, bapon Adán. Nama jiwi equeicha asu exanatsi, tsipei jiton copiya asu canamata exanatsi, bapon Jesucristo. <sup>22</sup>Jiwi werapaena icha Adán ichi abe peexanaexae. Daxita pomonae Cristo piamonae tatsi equeicha asu exanaeinchi petupae cuiru coyene weya icha Cristo cana ichichi xua asu exanatsi xua petsitecaenexa. <sup>23</sup>Nacom iche tsane xua poxonae exanaena xuaje: Copiya matha Cristo asu exanatsi. Bexa tsane pomonae Cristo piamonae tatsi asu exanaeinchi petupae cuiru coyene weya poxonae Cristo equeicha patopaetsica barapo irathe tsique. <sup>24</sup>Cristo weraweraca exanaena daxita, xua peitorobi coyenewan. Matautano muxuna weraweraca exanaena xua nacuan peewatsi coyenewan. Matautano muxuna weraweraca exanaena peayapusya itorobi coyenewa po peayapusu itorobi coyenewa xua jopa Nacom pia coyenewa tatsi. Bapoxonae poxonae wetsina daxita, Cristo pia peayapusu itorobi coyenewa Paxa caewa catsina, pon Nacom. <sup>25</sup>Tsipei Cristo bewa tsiwanaya exanaponaena

daxita jiwitha be pon jiwi itorobiya pia pepa peewatsinchi. Baxua bewa exanaena beya poxonae Nacom weraweraca exanaena pomonae Cristo pia peaitafaetabi jiwichi. <sup>26</sup>Po coyene Nacom cotacaya exanaena xua apara piamonae asu cana exanaena xua bapana jopa peweraweracaewa tsane. <sup>27</sup>Tsipei Nacom Pejume Diwesitha paeba xua pinae Nacom itorobina Pexanto pon Jesucristo xua itorobiya pecanamataxeinaenexa daxitantha. Bequein bara Jesucristo daxitantha itorobiya canamataxeinaena saya Paxatha meisa jopa itorobiyo tsane. <sup>28</sup>Copiya Nacom exanaena xua Cristo itorobiya canamataxeinaena daxitantha. Bapoxonae Cristo Nacom Pexanto tatsi pia coutha nacana exanaena xua Paxa itorobiya pecanamataxeinaenexa tsainchi. Bapoxonae Nacom xaniwaicha itorobiya canamataxeinaena daxitantha. <sup>29</sup>Ichacuitha ichamonae bautisabatsi pomonae pewerapaewi tsibautisabatsi xua barapomonae equeicha peasunexa pepatsinexa Nacom pia nacuatha. Icha pewerapaewi jopa equeicha asu exanaetsi petupae cuiru coyene weya bapoxonae barapomonae pomonae pewerapaewi jopa yawenaetsi bequein petsibautisabithatsi xua ichamonae bautisabatsi xua peasunexa pomonae werapa. <sup>30</sup>Daxita matabi jinompeibatsi xua naca peipeita ichamonae xua naca abe exana wajume cowuntsixae. Icha jopa equeicha asu naca exanaetsipae jopa ainya cui tsipae xua wacueicueijejei tsurubenanaebiwa Nacom Pejume Diwesi. <sup>31</sup>Tamonae pam, paxam pomonae iru painya nejume cowuntsiwixae Jesucristo. Daxita matabi muxu tatupeibi xua ichamonae tanepipeita exaneibixae. Baraxua xaniyei icha ichi xua xaniyei xua juntu coyene weiweinan xua Jesucristo pon Wanacanamataxeinaein

xanepanaya peexanaexae painya xantha. <sup>32</sup>Xan bara imoxoyo tatupae poxonae Efeso tomarapiwi inta abe exana. Barapomonae baraxua necana exana icha neuthu ichi poxonae ichun waetabatsi. Bequein barapomonae baxua necana exana xua muxu tatupae ichitha jopa asu neexanaetsipae petupae cuiru coyene weya icha jiwi equeicha jopa asu exanaetsipaetsi. Icha jopa equeicha caewa asu naca exanaetsipae bara saya exana dubenanaebiyaetsipatsi pocotsiwa ichichipatsi. Poxonae baraxua exanatsi jupa exanatsi icha ichamonae ichi pomonae jopa peyabara jume cowuntsiwa xua bara asu peexanaewatsi. Barapomonae jeye: “Anoxuae nabanaeinchi yawa apaeinchi, tsipei baya werapaeinchi jopa naca tsita ainya cuiyo”, jei barapomonae, pomonae jopa pejume cowuntsiwi.

<sup>33</sup>Painya xoba pacopatame xua bara ichamonae painya nepaca muxuitorobeibiwa. Jiwi ba pia pecayabara juta pepaebi diwesiyo ba jei: “Pomonae abe peexanaewi cuiduba ichamonaetha pomonaetha pomonae ichipa beta exana, xua barapomonae abe peexanaenexa”, ba jei barapo diwesiyo. <sup>34</sup>Equeicha caewa paexande po juntu coyene xua bichocono Nacom tsita xanepanatsi. Painya xoba equeicha abe paexaname. Ichamonae paxam jiwana pam jopa Nacom yaputaetsi. Baxua paca tsipaebatsi xua painya neuranaxa.

**Meje po coyeneya xua Nacom  
exanaena poxonae jiwi equeicha  
asu exanaeinchi petupae  
cuiru coyene weya**

<sup>35</sup>Metha ichun yainyabina, jei tsane: “¿Eta po coyeneya Nacom exanaena poxonae pewerapaewi equeicha asu exanaeinchi? ¿Eta pocotsi

pepon barapomonae xeinaena?” jei tsane. <sup>36</sup>Barapo peyainyabiwa saya pejumexaei. Poxonae paubame peubi xuto, barapo xuto bupana bocareca iratha xua pexu nantafobabinexa poxonae xua nae pexuwinexa. <sup>37</sup>Poxonae paubame jopa apara pepaboto paubim xua pepa nae pexuwinexa. Jame apara ba pexu paubame, metha beya xua trigo xuto tsipae, ichacuiha metha icha pexuton tsipaeno. <sup>38</sup>Cotacaya Nacom exana xua barapo pexu xuwa icha be pocotsi coyeneya Nacom ichichipa. Daxita peubi xuton tsanaya seicaya pia cui barompa poxonae xuwa. <sup>39</sup>Barichi jiwi pepon daxita jopa najupaeyo. Jiwi pia pepon seicaya tsanaya barompa. Duwei unupiwi pia pepon seicaya tsanaya barompa. Duwei menepiwi seicaya pia pepon tsanaya barompa. Pepupunaewi seicaya pia pepon tsanaya barompa. <sup>40</sup>Peitabocotha xeina ainya pepon po ainya pepon peitabocotha pejinompaewi nexa. Barichi barapo irathe xeina ainya pepon pomonae barapo irathe pejinompaewi nexa. Po pepon pexeinya peitupanae coicha xeina xua peitabocotha jinompa barapo pepon bichocono pexeinya pepon. Barichi wapepon pexeinya pepon po pepon xeinatsi po cae pin nacuathe. <sup>41</sup>Xometo poto atsato pia pexeinya peitupanae coicha barompa. Barichi jomocoichato pia peitupanae coicha barompa. Opiteino pia peitupanae coicha barompa. Icha opitei pia peitupanae coicha jopa nacoicha jupaeyo icha opiteiontha po opiteiton pia peitupanae coicha xeina. <sup>42</sup>Barapocotsi juta coyeneya ichi pomonae xua equeicha asu exanatsi petupae cuiru coyene weya. Poxonae pomonae pewerapaewi iratha muthacatsi equeicha caewa tsorobo naexana petsabanaexae. Bapoxonae

equeicha Nacom asu exanaena pena pepon xua petsitecaenexa. Barapo pena pepon bapana jopa tupa tsane equeicha, jopa petsabanaexae tsane. <sup>43</sup>Barapo peru pepon jopa xeinaeyo peitupanae coicha poxona muthutha xotsi. Ichitha jame barapo pena pepon xeina pexeinya peitupanae coicha. Barapo peru pepon jopa xeinaeyo peaswa poxona muthutha boca. Ichitha jame barapo pena pepon xeina peaswa. <sup>44</sup>Barapo peru pepon saya barapo cae pin nacuathe nexa. Daxota poxona tupa, tsabana naexana, tsorobo equeicha caewa penaexanaenexa. Ichitha poxonae barapo pepon asu exanaeinchi, bapoxonae pena pepon naexanaena pejumope tunaxu nexa xua Nacom pia nacuathe peponaenexa. Icha jiji xeina peru pepon xua barapo cae pin nacuathe nexa, barichi pena pepon xeinaena xua Nacom pia nacuatheicha nexa.

<sup>45</sup>Nacom Pejume Diwesitha jeye: “Po jiton copiya Nacom forota, bapon Adán. Bapon peaswa xeina xua pepopon-aenexa barapo cae pin nacuathe”, jei Nacom. Ichitha Cristo Adán bichocono toxecha ainya cuichi equeicha caewa asu peexanaexaetsi. Daxota bapon Cristo itacupatsi xua ichamonaetha cana exana xua pexeinaewa peajuntuyapuswa xua po peajuntuyapuswa ataya tsiteca. <sup>46</sup>Copiya jopa xeinaetsi po pepon Nacom pia nacuathe nexa. Saya copiya xeinatsi po pepon barapo cae pin nacuathe nexa. Ichitha cotacaya bexa tsane xeinaeinchi po pepon pena pepon Nacom pia nacuathe nexa. <sup>47</sup>Po jiton copiya exanatsi, pon tsorobo weya exanatsi, bara bapon apara saya barapo cae pin nacuathe nexa. Po jiton xua cotacaya patopa bapon apara Cristo pon itaboco wepatopeica. <sup>48</sup>Po jiji xua barapo nacuathe jinompe pia pepon exanatsi icha Adán ichichi xua pia

pepon tsorobo weya exanatsi. Ichitha pomonae Jesucristo piamonae tatsixae barapomonae xeinaena pepon icha ichi xua pocotsi pepon xeina Cristo, pon xua itaboco wetsica pona. <sup>49</sup>Anoxuae wapepon werapaena icha Adán pia pepon tatsi ichi xua bayatha tupa. Ichitha poxonae Nacom pia nacuathe patinchi wapepon xeinaeinchi pocotsi pepon icha Cristo pia pepon tatsi ichi xua pexeinya peitupanae coicha xeina.

<sup>50</sup>Tamona pam paxam pomonae iru painya nejume cowuntsiwixae Jesucristo, yabara paca tsipaebatsi po pepon yawa jinompatsi. Barapo pepon jopa naca itacupaeyo xua wayawa patsiwa Nacom pia peitorobi nacuatheicha xua ataya tsitecaeya wajinompaenexa tsane, tsipei barapo pepon tupa. <sup>51</sup>Paca tsipaebatsi pocotsiwa xua namicha xua jiji jopa yabara yaputaeyo xua Nacom moya yawun xeina. Daxita pomona waxainchi jiwanaetsi jopa weraweracae tsainchi xua ataya tsane. Ichitha daxita waxainchi xeinaeinchi icha pepon. <sup>52</sup>Poxonae trompeta matawun asiya obina xua poxonae Nacom daxita wetsina, bapoxonae Nacom jemeicha nainya asu exanaena pomonae pewerapaewi pomona pejume cowuntsiwixae Cristo. Baxua nainya exanaena icha be pocotsi jita coyenya ichi poxona jiton nainya naichaquetabiya necotaba. Pewerapaewi asu exanaeinchi xua equeicha bapana jopa peweraweracaenexa tsane. Bapoxonae waxainchi pomonaetsi cataunxae jinompatsi nainya icha pena pepon xeinaeinchi. <sup>53</sup>Wapepon po pepon tsorobo weya naexana bewa naexanaena icha pepon xua jopa weraweraca exanaetsi. Wapepon xua itacupatsi xua pewerapaewa, bewa pepon naexanaena po pepon xua jopa werapaeyo. <sup>54-55</sup>Wapepon xua



weraweracaena Nacom equeicha asu exanaena pena pepon po pepon jopa weraweracae tsane. Poxonae baxua exanaena jopa weraweracaeyo. Yawa barapo pepon itacupatsi xua werapa ichitha barapo pepon naexanaena po pepon xua jopa werapaeyo. Bapoxonae baxua naybara jume cui weta xua exana pocotsiwa bayatha Nacom Pejume Diwesitha tsiwunae yabara muxu duta. Nacom Pejume Diwesitha jeye: “Poxonae Nacom pena pepon cana exanaena piamonae, bapoxonae Nacom amanayabina pontha pon jiwu tupa peexanaein”, jei Nacom Pejume Diwesitha.<sup>56</sup> Pocotsiwa xua naca amanayaba, apara xua wawerapaewa abeya waexanaexae. Pomonae exanaetha pocotsiwa Moisés pia peitorobi coyenewatha itoroba, barapomonae awiya werapa poxoru barapomonae awiya abe peexanaexae.<sup>57</sup> Paxan pajan Nacomtha: “Nacom, maisa pajuntu coyene weiweinan xua pata tanecatsum jinya neayapusu itorobi coyenewa pata amanayabinexa abe peexanae cuiru coyenein. Barapo coyene pana catame xua poxonae Jesucristo pon pata Necanamataxeinaein naetotha pata tana tsitupaexae”, pajan.

<sup>58</sup> Tamonae pam, paxam pomonae tapaca caantobe jiwichi pam. Painya neamanayabixae abe painya neexanae cuiru coyenein, pana najuntu ayapusu exande Nacomtha. Painya xoba payabara cui copatame xua bara ichamonae paca cana exanaena xua icha coyeneya painya neexanaewa tsane. Ataya beta panacuita dubenanaebiyama Nacom nexa. Tsipei paxam payaputaneme po penacuichiwa Nacom pata tanacuita dubenanaebiyame, bara Nacom tsita xanepanatsi.

**Meje xua Pablo paratixi yabara  
paeba po paratixi jiwu catsiba  
ichamonaetha pomonaetha pomonae  
pejume cowuntsiwi Nacom**

**16** Yabara paca tsipaebatsi paratixi po paratixi penacaetutsimonae jehebapona ichamonae nexa pomonae pejume cowuntsiwi Nacom. Paexande icha pomonae penacaetutsi jiwimonae ichi xua exana pocotsiwa itoroban pomonae Galacia nacuamonaepiwi.<sup>2</sup> Daxita domingo wun matacabintha paxam daxita barompaya painya paratixi pajiwana wetsabiya pajehebaponaename pocotsi matoma pana busi matoma xeineibame. Pomonae pin matoman nabusi matoma xeineiba bewa ainya paratixi jehebaponaena. Pomonae tsiqui matomaxi nabusi matoma xeineiba bewa cae paratixi jehebaponaena. Aba paratixi pajebare xua jopa painya neexanaewa tsane baraxua xua poxonae equeicha patopaein.<sup>3</sup> Poxonae patopaein bapoxonae paitapetsiname pebiwi po pebiwi pecaponaenexa carta. Barapo pebiwi Jerusalén tomara beya caitorobin carta. Barapomonae carta caponaena yawa muxuna caponaena paratixi po paratixi pajehebaponaename Jerusalén tomarapiwi nexa pomonae pejume cowuntsiwi Nacom.<sup>4</sup> Icha nanta xeinaein xua yapu wunaein paratixi penawichixae metha moyu bara ponaetsipan Jerusalén tomara beya. Bapoxonae barapomonae nepuna ponaena.

**Meje xua Pablo yabara nanta  
xeina, xua pewarapaewa tsane**

<sup>5</sup> Poxonae ponaein, bewa Macedonia nacua iyan tsane. Bapoxonae cotacaya paca siwa ponaeinchi Corinto tomaratha.<sup>6</sup> Metha beya paca baru ecaetsipatsi be caentacabiyobetha.

Ichacuitha metha poxonaē awūbo paca barū ecaetsipatsi. Bapoxonaē poxonaē weta xua awūbo, paca itacupa xua pata neyawenaewam pocotsiwa nantawenonan poxonaē warapaein icha tomara beya. <sup>7</sup>Jopa ichipaeinyo xua saya bara caetha tapaca siwa ponaewatsi. Jame ichichipan xua be pecono daepayobe tapaca barū ecaewatsi tsainchi poxonaē patopaein. Baxua exanaein icha Nacom baxua inta copatsina. <sup>8</sup>Ecan xote Efeso tomaratha beya poxonaē matabi jopaena po matabi pewun Pentecostés. Barapo matabi po matabi jiwī yabara jūntanaina xua poxonaē matha Nacom pia Pejumope tūnaxū tatsi patopa penacaetutsi jiwitha pomonaetha pomonaē pejume cowūntsiwi. <sup>9</sup>Anoxuae neitacupa xua bichocono tatanacuichiwa Nacom xua jiwī pinmonaē pejume cowūntsinexa barapo tomaratha. Ichitha ayei jiwī ichichipa abe necana exana xua jopa taexanaenexa tsane.

<sup>10</sup>Icha Timoteo patopaena painya xantha, pantenta weyataema xua bapon jūntema pepoponaenexa painya xantha. Baxua pata exande poxoru bapon exana pocotsiwa Nacom ichichipa, icha xan ichin xua exanan pocotsiwa Nacom ichichipa. <sup>11</sup>Daxita paxam jopa payabara jande: “Apara bapon Timoteo pewowin, jopa apara peyaputaēin”, jopa payabara jande. Jame maisa bapon payawende xua equeicha jūntema caewa peponaenexa taxainya berena. Baxua paexande tsipei xan irū ichamonae pomonaē irū pejume cowūntsiwixae Jesucristo, panabarū wūnaē ewatan bapon xua Timoteo paewatan.

<sup>12</sup>Apolos pon irū pejume cowūntsin matowa tsipaeban xua painya nepaca cataenexa xua bapon pecueyabinexa tsainchi ichamonae pomonaē irū pejume cowūntsiwixae Jesucristo. Ichitha bapon

nanta xeina xua anoxuae jopa yapu jūpaetsi xua peponaewa tsane xua painya nepaca siwa ponaewa. Bapon ponaena ichitha poxonaē tayapu jūpaeinchi.

### **Meje poxonaē Pablo najume wetsiya paeba**

<sup>13</sup>Dota pam, pomonaē xua abe pacata exana. Beta paajūntusuya pajume cowūnta dubenanaebiyama. Paexana dubenanaebiyama icha pebiwi ichi xua jopa cunuwiya exana dubenanaebiyayo xua beta peexanaewa. <sup>14</sup>Daxita pocotsiwan xua paexaneibame, peantobe coyeneyatha paexaneibare ichamonaetha.

<sup>15</sup>Tamonaē pam, paxam pomonaē irū painya nejume cowūntsiwixae Jesucristo. Paxam payaputaneme xua Estéfnas piamonaē tatsi copiya jume cowūnta Jesucristo Acaya nacuatha. Barapomonaē bichocono yawena ichamonaetha pomonaetha pomonaē irū pejume cowūntsi jiwī Nacom.

<sup>16</sup>Paca tsipaebatsi xua paxam xuya paexana dubenanaebiyama pocotsiwan barapomonaē paca itoroba. Pabarū nacuire barapomonaē xuano ichamonae irū pabarū nacuitame pomonaē jūpaeya exana icha barapomonaē ichi. <sup>17</sup>Maisa bichocono jūntū coyene weiweinan xua Estéfnas irū Fortunato irū Acaico xote pate. Barapomonaē inta exana pocotsiwa jopa paca itacupaeyo xua painta exaname xua jopa xote tapaca barū ecaexaetsi. <sup>18</sup>Barapomonaē nejūntū cui coyene tsacaba exana xua xaniwaicha tapoponaenexa Nacom nexa. Barichi irū baxua pacata exana. Beta paweyataename barapocotsi jiwimonaē.

<sup>19</sup>Pomonaē penacaetutsimonaepiwi, pomonaē pejume cowūntsiwi Nacom, pomonaē Asia nacuatha jinompa, barapomonaē paca jacobā. Aquila irū piowa tatsi Prisca, irū pomonaē

petanacaetutsi dubenanaebiyae  
 jiwichi pia botha tatsi, barapomona  
 bichocono paca jacobae peantobe  
 jiwixae xua peantobexaetsi pon  
 jiwí Pecanamataxeinaein. <sup>20</sup>Daxita  
 pomona pejume cowantsiwixae Cristo  
 pomona xote jinompe daxita paca  
 jacobae. Betiya paina nantia pana  
 najacobare paina neantobewaxae  
 Cristo.

<sup>21</sup>Xan Pablon pacata tinatsi po diwe-  
 siyo xua cotacaya opi ducua. Yatsicaya  
 tacoutha tacobe couya pacata tinatsi  
 tapaca jacobinexatsi.

<sup>22</sup>Icha ichun jopa Jesucristo antobetsi  
 pon jiwí Pecanamataxeinaein barabú

Nacom itawetsina pexainya weya, xua  
 bapon be pon abe peexanae jiton  
 tsane. ¡Xam ponxaem Pata Necana-  
 mataxeinaem nainya antha patopare!

<sup>23</sup>Barabú Jesucristo pon jiwí  
 Pecanamataxeinaein paca yawenaena  
 pia paca nepaca caantobewaxae xua  
 xanepanaya paina nejinompaenexa.  
<sup>24</sup>Daxita paxam pacata itorobatsi  
 po coyene xua tapaca caantobe  
 coyenewatsi taantobewaxae Cristo  
 Jesús.

Baja Pablo.

## Meje Po Carte Cotacaya Pablo Tatina, Corinto Tomarapiwi Tatinatsi

### Meje poxonae Pablo tamropata pitaba xua tatina pomonaetha pomona Corinto tomarapiwi

**1** Xan Pablon pacata tinatsi. Nacom peichichipaexae bapon necana exana xua Jesucristo pia peitorobi jiwi jiwana tatsin. Xan iru Timoteo pon pejume cowuntsin baponbe panbe pacata tinatsi. Paxam pomona iru painya nejume cowuntsixae Jesucristo pana nacaetutame penacaetutsi botha Corinto tomaratha xua wuna painya nejainchinexa Nacom. Matautano pata tinanbe pomona iru Nacom piamona tati xua Acaya nacuatha jinompa. <sup>2</sup>Barabu Nacom pon Waxa iru Jesucristo pon jiwi Pecanamataxeinaein baponbe paca yawenaena pia paca necaantobexae. Matautano barabu baponbe paca cana exanaena xua juntea painya nejinompaewa tsane.

### Meje yabara xua poxonae Pablo atene exanatsi

<sup>3</sup>Bara Nacom wuna jaintatsi pon Wanacanamataxeinaein Paxa tati xua Jesucristo Paxa tati. Bapon Nacom Waxa naca yabara nanta xeina xua wanaca yawenaewa tsane. Bapon Nacom naca itanuwe matateica wanaca antobexae. <sup>4</sup>Daxita xua xuan ichamona pana atene exana, xuan Nacom pana cui matateiqueiba, baxua Nacom painta exana xua xuya iru ichamona pata cui matateicaenexa tsaibi tsane pomona poxonae atene exaneibatsi ichamona. Paxan ichamona pacui matateican icha Nacom pana ichi xua pana cui matateica. <sup>5</sup>Icha Cristo ichichi poxonae atene exanatsi ichamona, barichi ichamona

pana atene exana pata jume cowuntsixae Jesucristo. Nacom, Cristo cui matateicatsi poxonae atene exanatsi ichamona. Bara pana ichi Nacom pana cui matateiqueiba poxonae ichamona pana atene exaneiba. <sup>6</sup>Ichamona pana anthuthutane exana. Bequein baxua painta exana, daichitha awiya pana itacupa xua tapaca cayawenaewatsi poxonae paca cui matateicatsi. Matautano pana atene exana pata paca cuidubixaetsi painya nepaca capanenebiyaenexa abe painya neexanae cuiru coyenein weya. Nacom pana cui matateica xua paxan xuya pata paca cui matateicaenexatsi. Baxua paca cana exanatsi poxonae awiya juntea pajinompa dubenanaebiyame bequein poxonae ichamona paca atene exana icha barapomona pana ichi xua pana atene exana. <sup>7</sup>Paxan ajuntusuya paca cui yabara jume cowuntsiya ewatatsi xua paxam bara beta pajinompa dubenanaebiyaename poxonae bequein ichamona paca atene exana. Paxan payaputan xua paxam iruru paajuntucoyentanem poxonae ichamona pana atene exana. Barichi Nacom paca cui matateica icha pana ichi xua pana necui matateica.

<sup>8</sup>Tamona pam, paxam pomona iru painya nejume cowuntsiwixae Jesucristo. Paichichipan xua painya neyaputaewa xua ichamona bichocono painta ayapube exana Asia nacuatha. Baxua bichocono ayapusuya pana juntu coyene jujuta, beya poxonae awatha muxu jopa juntea pata dubenanaebiyawa. Ichacuitha pananta xeineiban xua jopa pana itacupaeyo xua pata panenebiwa xua pata asuwa tsane. <sup>9</sup>Ichacuitha pananta xeinan xua bara metha pata werapaewa tsane. Ichitha baxua Nacom saya bara copata xua pata yabara jume cowuntsiwa tsane xua meisa Nacom bara compa pia coutha pata taneyawenaewa tsane xua jopa

pata tana nayawenaewa tsane pata coutha. Nacom apara pon equeicha asu exana pewerapaewi petupaecuiru coyene weya.<sup>10-11</sup> Nacom pana necapanenebiya ichamonae weya poxona barapomona bichocono abe painta exana poxona awatha muxu pata werapae. Matautano awiya Nacom baxua painta exanapona. Yatsicaewa Nacom payabara jume cowntan xua bexa tsane pana necapanenebiyaenano icha awiya painta wucaponame Nacomtha. Nacom pana neyawena poxona pinmonae painta tsipaebina Nacomtha. Bexa poxona Nacom pana necapanenebiyaena barapoxona pin bicheitomona jei tsane: “Nacom maisa pajuntu coyene weiweinan xua neyawenaewa Pabloaru xua jopa pewerapaewa neantobexae poxonae jiwi pin bicheito cawuca barapomona nexa”, jei tsane barapo pin bicheitomona.

**Meje poxona Pablo jopa  
yapu jupaetsi xua peponaewa  
Corinto tomara beya**

<sup>12</sup> Pajuntu coyene weiweinan, daxota atsaquiya pata jeiwa pocotsiwe: Daxita pocotsiwa paexanan po cae pin nacuathe, xuano poxona pata paca baru jinompaewatsi, pata juntu coyene bara pana tsipaeba xua pinae bara beta paexanan. Pajuntu coyene xanepanan Nacomtha. Matautano bara xainyeya paexanan daxita coyenein. Nacom pana neyawena xua beta pata jinompaewa tsane pata antobexae Nacom. Apra baxua jopa paexanaeinyo barompaya pata tayaputae coyenewatha.<sup>13</sup> Daxita xua pacata tinatsi jopa icha diwesi pacata yawa muxuna tinaetsi. Pocotsiwa pacata tinatsi saya pocotsiwa painya nepaca itacupaewa xua painya neyrobiwa tsane xuano xua painya nejume copi

yaputaewa tsane. Ichichipan xua betiya painya neyaputaewa tsane daxita pocotsiwa xua pacata tinatsi.<sup>14</sup> Anoxuae daxita pam be conotha pana neyaputaneme. Poxona Jesus pon Wanacanamataxeinaein equeicha patopaetsica, pana neyabara juntu coyene weiweinaename icha paichin tsane xua paca yabara juntu coyene weiweinaeinchi.

<sup>15</sup> Poxoru pana neyabara juntu coyene weiweiname daxota nanta xeinan xua tapaca siwa ponaewatsi tsainchi. Bapoxona icha neitacupa equeicha bexa paca siwa ponaeinchi xua daxota ainya cuiyobetha paca siwa ponaeinchi tapaca cayawenaewa tsainchi.<sup>16</sup> Bayatha paca tsipaebatsi janje xuaje: “Poxonae ponaein Macedonia nacua beya copiya ichichipan xua matha tsiwanaeya tapaca siwa ponaewatsi tsainchi. Equeicha paca taeinchi poxonae caewa denan tsane Macedonia nacua werena. Bapoxona paca itacupa xua tapana neyawenaewam poxona warapaein Judea nacua beya”, paca jeichi.<sup>17</sup> Bequein baxua paeban, daichitha baxua jopa neitacupaeyo xua taexanaewa baxua. Poxona baraxua paeban pana nejume cayabara cananta xeiname xua xan apara pon ichawa beya tapaebin xua be pocotsi jiton pon saya exana pocotsiwa bapon ichichipa xua ichawa beya ba paeba. Xan baxua jopa exanaeinyo. Jopa ba paca jeichi “Aja”, jopa paca jeichi. Ichacuitha jopa ba paca jeichi “Jume”, jopa paca jeichi xua poxonae cae coyene yabara paca tsipaebatsi.<sup>18</sup> Nacom bapon bara xaniwaicha tana neyabara paebin pocotsiwa taexanaewa. Bapon Nacom netane xua jopa ichawa beya tapaebiwa. Saya poxona, ba “aja”, pejeinexa, ba “aja”, jan. Matautano saya poxona ba “jume” pejeinexa, ba “jume”, jan.<sup>19</sup> Timoteo iru Silvano iru

xan paca cuidubatsi Nacom Pejume Diwesi po coyene xua Cristo Jesús yabara, pon Nacom Pexanto tatsi. Bapon Cristo jopa bapana jei tsaibiyo bara caetha: “Jume”, yawa “Aja”, jopa bapana jei tsaibiyo. Saya jame ba jei: “Aja”, ba jei tsaibi. <sup>20</sup>Cristo bara daxita exana pocotsiwa Nacom Pexanto yabara tsiwunae muxu duta. Bara Cristo “Je” jei xua peexanaenexa pocotsiwa Paxa itorobatsi. Daxota waxainchi barichichi jei tsaibichi: “Je, barichi tsane bara Cristo Jesús exanaena baxua”, jei tsaibichi waxainchi poxonae Nacom wunae jainteibatsi. <sup>21</sup>Bapon Nacom pana ajuntucoyenesu exana xua beta pata jume cowuntsinexa Cristo. Matautano iru bara paca ichi Nacom, paca yawena. Bapon Nacom naca itapeta watanacuichinexa bapon. <sup>22</sup>Barapon Nacom naca cana exana xua wanaca baru jinompaewa pia Pejumope tunaxu tatsi wanaca yaputaenexa xua piamonae jiwichi. Baraxua Nacom naca tsita itapeinya xaina xua bexa tsane naca catsina ichawan.

<sup>23</sup>Nacom neyabara juntu coyene yauptane xua xainyeya paeban. Bequein juntucuru nanta xeinan xua paca siwa ponaeinchi ichitha jopa ponaeyo. Jopa paca siwa ponaetsi Corinto tomaratha tsipei jopa daunweya bepaca tsipaebichi xua paca juntu coyene wecoyeyi exanaetsipatsi. <sup>24</sup>Jopa bepaca yabara itorbichi xua pocotsiwa bewa painya nejume cowuntsiwa tsane. Tsipei barapara ayapusuya pajume cowunta dubenanaebiyame. Pocotsiwa jame paichichipan apara xua pata paca baru nacuichiwatsi jame, painya nejuntu coyene weiweinaenexa.

**2** Daxota juntucuru nanta xeinan xua jopa equeicha tapaca siwa ponaewa tsainchi, tsipei jopa bepaca wecoyeyi exanaetsi. <sup>2</sup>Icha paca juntu wecoyeyi exanaetsipatsi, dapomonae aibi

tsipae pomonae nejuntu coyene weiweina exana. Jame meisa paxam paca itacupa xua tapana nejuntu coyene weiweina exanaewam. Ichitha icha paxam saya pajuntu coyene wecoyam tsipae jopa pana nejuntu coyene weiweina exanaemtsipae. <sup>3</sup>Daxota bayatha pacata tinatsi icha carta tsipei jopa bepaca siwa ponaetsi icha saya paca juntu coyene wecoyeyi exanatsi poxonae yabara paca muxuwetatsi pocotsiwa paexaname xua abe paexaname. Apra jame paxam pomonae bewa pana nejuntu coyene weiweina exanaem. Xan nanta xeinan icha juntu coyene weiweinan paxam bara paichim tsane pajuntu coyene weiweinaename. <sup>4</sup>Poxonae bayatha po carta pacata tinatsi bichocono unthuthu wecoyan, tsipei bichocono paca yabara najuntu coyene eena exanatsi pocotsiwa painya neexanaexae beya poxonae yatsicaewa wecoyan xua yatsicaewa taitacuere mene jujuincaewa. Jopa ichipaeinyo xua tapaca wecoyeyi exanaewatsi. Jame ichichipan xua painya neyaputaewa xua tapaca caantobewichi bichocono.

**Meje poxonae Pablo itoroba xua  
Corinto tomarapiwi peyabara  
juntemainawa tsane pocotsiwa  
exana pon penowa pita**

<sup>5</sup>Caein pon paxam jiwana pam abe exana ichamonaetha. Bapon juntu coyene wecoyeyi exana ichamonaetha. Bapon jopa meisa apra compa nejuntu coyene wecoyeyi exanaeyo. Barichi bapon bara iru paca juntu coyene wecoyeyi exana daxita paxam bequein saya bapon abe exana pon painyamonae jiwana jiton. <sup>6</sup>Pon yabara icha cartatha pacata tinatsi pon abe peexanaein, peburuya nanta jupaya paitawetame bapon xua pepatopaeyainwa painya nenacaetutsiwatha poxonae wunae pajaintame Nacom. Anoxuae bapon nacui baraxuba

xua abe peexanaewa. Baraxua bara w̄nae. Painya xoba equeicha paitawetame bapon. <sup>7</sup>Anoxuae paxam bewa pacui yabara j̄ntemainaem abe pia peexanae cuiru coyene tatsi. Matautano bewa pacui matateicaename xua peaurayainwa. Icha jopa baxua paexanaemt-sipae, bapoxonae bapon metha jopa juniya bichocono j̄ntu coyene wecoyei tsipae, xua daxota anaya pia coutha penacabetsiwa xua pebaraxubixae xua pejume cow̄ntsiwa. <sup>8</sup>Daxota paca tsipae-batsi, bapon patsita itapeinya xeinare xua peantobe coyenewa painya netsita xeinaewa bapon. <sup>9</sup>Bayatha yabara pacata tinatsi xua bewa pamuxuwetsim bapon. Paca j̄ntu coyene j̄j̄utatsi xua tayaputaenexa icha metha bara xaniwaicha pana nejume cow̄ntame daxita pocotsiwa paca itorobatsi, bara bayatha pamuxuwetame bapon. <sup>10</sup>Icha paxam ich̄n pacui yabara j̄ntemainame abe pia peexanae cuiru coyenein tatsi, barichin tsane ir̄u bapon cui yabara j̄ntemainaem abe pia peexanae cuiru coyenein tatsi. Tsipei icha ich̄n cui yabara j̄ntemainan abe pia peexanae cuiru coyenein apara poxoruru copiya painya necui yabara j̄ntemainaexae abe pia peexanae cuiru coyenein tatsi. Baxua exanan Cristo tana neitorobixae. Baxua Cristo necui tane xua exanan. <sup>11</sup>Waxainchi ichamonae abe pia peexanae cuiru coyenein tatsi yabara j̄ntemainatsi xua caurimonae pia pentacaponaein tatsi jopa wanaca cui amanayabinexa. Cui yaputainchi xua bapon bichocono daunweya j̄wi j̄ntu coyene j̄j̄utatsi xua abe peexanaenexa.

**Meje poxonae Pablo Tito  
bichocono yabara naj̄ntu coyene  
exabatsi Troas tomaratha**

<sup>12</sup>Poxonae Troas tomaratha patopan xua tacueicueijeinexa Cristo pejume diwesi bara inta yapu w̄nae xua

tanacuichinexa Nacom nexa, pon j̄wi Pecanamataxeinaein poxoruru barapo tomarapiwi bara beta nejume tane. <sup>13</sup>Ichitha bichocono jopa j̄ntema poponaeyino poxoruru bichocono yabara naj̄ntu exaban Tito pon ir̄u pejume cow̄ntsin Jesucristo, yaitama jopa caxinaeyino bapon. Daxota Troas tomarapiwi napeyaban. Bapoxonae ponan Macedonia nacua beya.

**Meje yabara po coyeneya xua Cristo  
naca yawena xua waamanayabinexa  
caurimonae pia pentacaponaein tatsi**

<sup>14</sup>Nacom patsipaeban, pajan: “Nacom maisa paj̄ntu coyene weiweinan xua painta exaname”, pajan. Nacom pana cana exana xua Cristo betiya pana canamataxeina poxonae Nacom Pejume Diwesi pacueicueijan. Matautano Nacom pana cana exana xua pata amanayabiwa caurimonae pia pentacaponaein tatsi poxonae j̄wi yaputane pacana exanan xua peyabara yaputaewatsi Cristo. Daxita nacuantha ichaxota paponeiban, bapon payabara paebeiban. Barapo pexeinya jume diwesi xua papaebeiban taj̄u beya pajume pichipaponan, icha be poxonae petuxuei tuxusi ichi xua taj̄u tuxusi pona. <sup>15</sup>Nacom ichipa nawita poxonae beta patacueicueijan xua Cristo payabara cueicueijan icha be poxonae ichi poxonae bichocono tuxusi ichichipa incienso tuxusi mataw̄n. Barichi po diwesi xua Cristo payabara cueicueijan, taj̄u pajume pichipaponan pomonaetha pomonae Cristo capanenebiya ducuanabiya xuano pomonaetha pomonae weraweracaponae jopa pejume cow̄ntsixae Cristo. <sup>16</sup>Poxonae j̄wi jopa jume cow̄ntsiyo barapo diwesi po diwesi pacueicueijan be tsita tuxusichi xua po tuxusi tuxusi barapomonae t̄pa peexanaewatsi. Ichitha poxonae j̄wi jume cow̄nta,

bapoxonae barapo diwesi tsita muxu wunaetsi icha xua jiwi ichi poxonae po tuxusi tuxune bichocono ponxo tuxusi wunaetsi. Barapomonae pejuntu coyenetha yaputane xua barapo jume diwesixae Nacom cata barapomonaetha peajuntu yapuswa po peajuntu yapuswa ataya tsiteca. ¿Jintam metha itacupatsi xua barapo Nacom pia petanacuichiwa tatsi peexanaewa xua pia coutha compa exana? Apra dapon ajibi. <sup>17</sup>Paxan jopa paexanaeyo icha be jopa ichamonae ichiyo xua poxonae barapomonae pia paratixichi paeba dubenanaebiya Nacom Pejume Diwesi. Paxan po pebiwi pan xua xaniwaicha pata tsipaebi jiwi pan ichamonaetha, Nacom pata taneitorobixae. Daxota Nacom Pejume Diwesi papaeban caemonae wanaexanaeatsi Cristotha.

**Meje poxonae Pablo yabara paeba  
Nacom pia pena petsiwunae  
muxu dutsiwa tatsi**

**3** Poxonae baxua pacata tinatsi, metha pana neyabara nanta xeinaetsipame xua paxan pomonae ainya cui jiwi pata naexanae jiwi pan. Nama ichamonae cartan capona po cartantha piamonae beta yabara tina barapomonae, xua painya necopatsiwa tsane xua bara pia paca tsipaebeibichi Nacom Pejume Diwesi poxonae barapomonae pateibina painya tomaratha. Metha paxam pana neyabara nanta xeinaetsipame xua xan iru barichindu icha ichamonae ichi xua poxonae barapo carta capona pia xua painya necopatsiwa tsane xua bara pia paca tsipaebeibichi Nacom Pejume Diwesi. Bequein metha pana neyabara nanta xeinaetsipame xua xuya painta tinaetsipame xua paxan yabara ichitha jopa apra paca wucaetsi baxua. <sup>2</sup>Poxonae daxita jiwi paca cui tane xua beta painya jinompaewa Nacom nexa, bapox-

onae jiwi pana neyabara nanta xeina xua bara beta pata exanaewa xua pata paca yawenaexaetsi xua painya nejume cowuntsiwa. Pata juntu coyenewan pana tsipaeba xua bara pinae pajume cowuntame Cristo. Poxonae jiwi paca cui tane xua beta painya nejinompaewa Nacom nexa, barapo jiwi pana nejuntanaina xua beta pata paca cayawenaexaetsi. Baxua be poxonae jiwi yoroba pexeinya carta xua paxan yabara xua daxota jopa nantawenonaeyo xua xuya painta petinaenexa carta. <sup>3</sup>Cristo ichichipa xua jiwi tane xua bapon bichocono wunae exana paxam nexa po jumein weya xua paxan paca tsipaebatsi. Ichitha bapon Cristo jopa tinaeyo carta peanaincuitontha xua jiwi petanenexa pejumein itaneton. Matautano jopa tinaeyo peitaneton xua ibo panawatha ichi Moisés ichi. Jame Nacom pia Pejumope tunaxu tatsi icha juntu coyene paca cata xua daxota jiwi tsita itapeinya xeinatsi xua Cristo beta exana paxam nexa.

<sup>4</sup>Paxan pana itacupa xua baxua papaeban Cristo pata neyawenaexae xua pata jume cowuntsiwa Nacom. <sup>5</sup>Ichitha jopa pana neitacupaeyo xua pata coutha pata exanaewa baxua. Daxita pocotsiwan pana itacupa xua pata exanaewa apra Nacom pata taneyawenaexae. <sup>6</sup>Nacom pana necana exana xua pomonae yatsicaewa pata yabara cueicueijeji jiwi pan Nacom pia pena petsiwunae muxu dutsiwa coyenewa. Nacom pia pena petsiwunae muxu dutsi coyenewa jiwitha jopa xeinaeyo xua tina ainya coyenein xua jiwi peitorobi coyenewatsi xua jiwi bewa exanaena. Barapo Nacom pia pena petsiwunae muxu dutsi coyenewa paeba xua saya meisa xua beta pejinompaenexa. Nacom pia Pejumope tunaxu tatsi itacupatsi xua naca cata pena pejuntu coyenein. Nama Moisés pia peitorobi coyenewa seicaya



paeba xua bequein jiwi exana xua Moisés itoroba, barapomonaē awiya werapaena abe peexanaexae. Nama seicaya Nacom pia Pejumope tñaxu tatsi peajuntuyapusūwa naca cata.

<sup>7</sup>Moisés pia peitorobi coyenewa ibo panawantha tina. Barapo coyene jiwi cana exanatsi xua pewerapaewa abe peexanaexae. Poxonae barapo coyenewa Moisés cata israelmonaetha barapomonaē israelmonaē jopa itacupaetsi xua Moisés peitabarataewatsi tsipei Nacom pia pexeinya peitupanae coicha tatsi bichocono pentha Moisés peitabaratha. Ichitha barapo Nacom pia pexeinya peitupanae coicha tatsi Moisés pia xainya weya tatsi bewayo caewanaya. <sup>8</sup>Po pena jñntu coyene Nacom pia Pejumope tñaxu tatsi naca cata bichocono wñnae tsipei jiwi cana exanatsi xua pexeinaewa peajuntuyapusūwa po peajuntuyapusūwa ataya tsiteca. Barapo pena jñntu coyene bichocono wñnae beyacaincha po peitorobi coyene Moisés itoroba. <sup>9</sup>Bequein Moisés pia peitorobi coyenewa wñnae, barapo coyenewaxae Nacom tsitatsi xua jiwi penatsicuentsiwa xeina xua abe peexanaexae. Nama bichocono wñnae Nacom pia pena jñntu coyenewa po jñntu coyenewa jiwi catatsi beyacaincha Moisés pia peitorobi coyenewa. Barapo Nacom pia jñntu coyenewaxae, jopa tsitatsi xua piamonae tatsi pexeinaewa xua penatsicuentsiwa xua abe peexanaexae. <sup>10</sup>Moisés pia peitorobi coyenewa tatsi copiya bichocono wñnae, nama anoxuae jopa peraichiwa, tsipei jopa naca yawenaeyo. Nama Nacom pia pena petsiwñnae muxu dutsi coyenewa tatsi jame barapo coyene jiwi bichocono yawenatsi. Daxota barapo coyene yatsicaewa wñnae beyacaincha Moisés pia peitorobi coyenewa tatsi. <sup>11</sup>Poxonae Moisés cata pia peitorobi

coyenewa israelmonaetha bapoxonae barapomonaē tane Moisés peitabaratha tatsi Nacom pia pexeinya peitupanae coicha tatsi. Barapo pexeinya peitupanae coicha caewanaya. Nama Nacom pia pena petsiwñnae muxu dutsi coyenewa jopa caewanaiyo. Nama ataya ayapusūya tsiteca barapo coyene.

<sup>12</sup>Tsipei pajume cowñntsiya ewatan xua Nacom exanaena daxita pocotsiwa bayatha yabara pana netsiwñnae muxu duta, daxota jopa paaurinyo xua pata yabara paebiwa daxitan. <sup>13</sup>Paxan jopa paexanaeinyo icha Moisés ichi. Bapon Moisés naitabara acata paparuwatha xua israelmonaē jopa peyaputaenexa xua poxonae barapo pexeinya peitupanae coicha caewanaya. <sup>14</sup>Barapo israelmonaē jopa yaputaeyo Moisés pia peitorobi coyenewa tatsi. Nacom copata xua barapomonaē jopa peyaputaewa pia jñntu coyeneintha barapo coyenewa. Barichi anoxuae poxonae barapo israelmonaē yoroba Moisés pia peitorobi coyenewa tatsi, cataunxuae came jopa yabara yaputaeyo baxua. Baraxua icha poxonae Moisés ichi poxonae naitabara acata paparuwatha poxonae barapomonaē jopa yaputaeyo xua barapo coicha caewanaya. Matauta anoxuae barapomonaē jopa yaputaeyo xua icha jiwi jume cowñntsina Cristo saya meisa bapoxonae barapo jiwi itacupaetsi xua peyaputaewa Moisés pia peitorobi coyenewa. <sup>15</sup>Israelmonaē beya nama anoxuae, came jopa yaputaeyo Moisés pia peitorobi coyenewa tatsi poxonae yoroba. Barapomonaē jopa peyaputaewa Moisés pia peitorobi coyenewa tsipei najñntu coyene ararana jopa be peyaputaewaxae. <sup>16</sup>Ichitha poxonae jiwi jume cowñnta Jesucristo pon jiwi Pecanamataxeinaein, bapoxonae Nacom cana exana xua pejñntu coyeneintha

peyaputaewa Moisés pia peitorobi coyenewa tatsi. <sup>17</sup>Jesucristo pon jiwi Pecanamataxeinaein iru Nacom pia Pejumope tunaxu tatsi najuntu coyene jupabe. Pomonae ba Nacom pia Pejumope tunaxu tatsi xeina jopa nantawenonaeyo xua peexanaewa pocotsiwa Moisés pia peitorobi coyenewatha itoroba xua daxota Nacom jopa atene peexanaewa tsane barapomonaetha. <sup>18</sup>Daxita waxainchi wajume cowuntsixae Jesucristo pon jiwi Pecanamataxeinaein, jiwi tsita itutatsi xua bara Nacom pia Pejumope tunaxu tatsi jopa juniya naca yawenaeyo. Jopa daichichi icha Moisés ichi poxonae paparuwatha naitabara acata xua jopa peichichipaexae xua peitabara taewatsi ichamonae, tsipei bichocono itabara daedaena xua Nacom pia peitupanae coicha tatsi. Jame waxainchi jinompatsi xua ichamonae naca juntu coyene tane, xua jiwi beta peyaputaenexa xua bara Nacom pon bichocono pexeinaein pejuntu coyene xanepanaewa. Nacom pia Pejumope tunaxu tatsi naca yawena ducuaenaebiyaena bexa tsane xua waxeinaepanaewa tsane pena juntu coyenewan. Icha Jesucristo ichi pia juntu coyenewatha, barichi tsainchi xua wajuntu coyenewantha xua poxonae jinompatsi.

**4** Nacom pata tanaantobexae pana cata barapo penacuichiwa. Daxota paxan jopa bapana paajuntucoyene-faetabiya cueicueijanyo Nacom Pejume Diwesi. <sup>2</sup>Jopa paexanaeyo xua pata yabara cueicueijejiwa po coyene ba jiwi aura exanatsi po coyene jiwi moya yawun xeina. Matautano jopa paexanaeyo po coyene xua pata muxujainyabiya paebiwa. Barichi jopa payabara jume toxechiya exanaeyo Nacom Pejume Diwesi xua poxonae ichamonae pata cana exanaenexa xua Jesús pejume cowuntsiwatsi. Nama

apara seicaya papaeban pexainyei jume diwesi. Daxota poxonae daxita jiwi pana nejume tane pia juntu coyenein tsipaebatsi xua bara xainyeya papaeban. Nacom pana jume tane daxita pocotsiwa papaeban. <sup>3</sup>Poxonae Nacom pia pecapanenebiyae diwesi jume pacueicueijan, icha jiwi jopa yaputaeyo baxua, apara poxoru barapomonaeweraweracaena, jopa pejume cowuntsixae. <sup>4</sup>Jiton ba pon peitata quirein jopa itacupaetsi xua petawea. Bara pocotsi juta coyeneya ichi pomonae weraweracaena jopa itacupaetsi xua pejume cowuntsiwa Nacom. Caurimonae pia pentacaponaein tatsi jiwi juntu coyene itorobatsi barapo cae pin nacuathe. Bapon barapomonaeweraweracaena xua jopa peyaputaewa. Daxota jopa Cristo jume cowuntsichi. Matautano bapon jopa copatsiyo xua barapomonaeweraweracaena xua jopa peyabara jume cowuntsiwa Nacom pia pecapanenebiyae diwesi tatsi. Barapo diwesi bichocono wunae xua yabara caunuta xua Cristo pexeinya peitupanae coicha xeina. Bapon Cristo bara Nacom cui jupatsi. <sup>5</sup>Poxonae pacueicueijan, apara jopa pata coutha pana nayabara cueicueijanyo. Apra Jesucristo payabara cueicueijan xua bapon yatsicaya pepa Wanacanmataxeinaein. Paxan amanaya panacuitan paxam nexa pata taantobexae Jesús. <sup>6</sup>Nacom pon xua jeye: “Barabu pecoicha ba pentha pequireiwatha”, jei. Bapon Nacom exana xua pepatopaewa pata juntu coyeneintha pia pexeinya jume diwesi tatsi, po diwesi copiya jopa pata yaputaewa. Pata juntu coyeneintha pata xeinaexae barapo diwesi pana itacupa xua pata yabara yaputaewa Nacom pia pexeinya peitupanae coicha xua paxan patan, xua Jesucristo pata itabara taewa.

**Meje xua Pablo yabara paeba xua  
pejinompaeya coyenewa xua  
pejume cowuntsi coyeneyatha**

<sup>7</sup>Paxeinan pata juntu coyeneintha peyaputae coyenewa po peyaputae coyenewa pana cana exana xua pata yabara yaputaewa Nacom pia pexeinya peitupanae coicha. Pata pepon saya bichoina weraweraca icha juruwato ichi xua bichoina weraweraca. Pata xeinaexae Nacom pia peyaputae coyenewa, daxota ichamonae patsita itapeinya xeinan xua peayapusu itorobi coyenewa paxeinan xua Nacom pana cata. Daxota apara Nacom piawa, jopa apara patawiyo. <sup>8</sup>Bequein jiwi ichawa beya pana juntu coyene jujuta xua abe pata exanaenexa poxonae abe painta exana, ichitha awiya pana itacupa xua pata panenebiwa bara weya. Bequein bichocono yabara pana najuntu coyene exaban pocotsiwa jiwi painta exana, ichitha awiya jopa paajuntucoyenefaetabinyo. <sup>9</sup>Bequein jiwi pana nepu baraina pia abe pata neexanaetsi ichitha Nacom jopa pana copabiyo xua compa pan xua pata necuenta ponaewa. Bequein barapomonae iratha pana bebai xua pata tanejutebiwa tsane, ichitha Nacom jopa pana copabiyo xua barapomonae pata tanejutebiwa. <sup>10</sup>Daxita nacuantha ichaxota paponeiban jiwi abe pana exaneiba. Barapomonae pana wan dubeiba pata tanejutebeibiwa tsane icha Jesús ichichi xua bexotsi. Poxonae jopa pabobenaeyino xua ichamonae jopa pata tanejutebiwa, baxua patsita itapeinya xeinan jiwi xua apara Jesús asu pon pata taneyawenaexae pia peayapusu coyenewatha. <sup>11</sup>Poxonae cataunxuae pajinompan barapo cae pin nacuathe jiwi ichichipa pata tanejutebeibiwa pata yabara paebi dubenanaebiyaexae Jesús. Daxota baxua jiwitha patsita itapeinya xeinan xua xaniwaicha bara Jesús pana yantsiya popona pox-

onae jiwi pana wan tane xua poxonae bequein muxu pata bobeneibi. <sup>12</sup>Pata yabara paebixae Jesucristo jiwi muxu pata tanejutebeibi. Ichitha pata yabara paebixae Jesucristo daxota peajuntuyapusuwa paxeiname po peajuntuyapusuwa ataya tsiteca.

<sup>13</sup>Nacom Pejume Diwesitha jeye: “Jume cowuntan daxota cueicueijan”, jei. Paxan pajume cowuntan icha David ichi xua poxonae baxua paeba. Iruru paxandu pajume cowuntan daxota pacueicueijan. <sup>14</sup>Payaputan xua Nacom Jesús asu exanatsi xua petupae cuiru coyene weya pon jiwi Pecanamataxeinaein. Barichi tsane Nacom asu naca exanaena petupae cuiru coyene weya, caemonae waexanaexaetsi Jesustha. Paxan iru paxamdu Nacom naca caponaena pia xainya beicha. <sup>15</sup>Daxita pocotsiwan xua ichamonae pana necana exana xua paatanein baxuan paca yawena xua painya nejume cowuntsinexa. Poxonae jiwi equeicha mataropeicha jume cocowuntaponaena Cristo, bapoxonae ayei jiwi Nacom wunae jainchinchichi, jei tsane: “Nacom maisa pajuntu coyene weiweinan xua pata taneyawenaewam pata taneantobexaemxae”, jei tsane. Bapoxonae jiwi bichocono wunae jainchina Nacom xua bapon bara beta peexanaexae.

<sup>16</sup>Daxota jopa bapana paajuntucoyenefaetabiya jinompaein. Pata pepon fifinapona. Ichitha pata juntu coyene equeicha mataropeichiya asuya ayapusu tso poneibi daxita matacabin. <sup>17</sup>Po coyenein xua barapo cae pin nacuathe ichamonae atene pata tana neexanaewa jopa pana netsita ainya cuiyo tsipei saya bara caeto pana atene exana. Barapo atenewa pata tana neexanaewa pana neyabara nacui wunaeta xua bexa tsane Nacom pata tana necatsibiwa tsane po coyenein

xua bichocono wūnae xua po coyene ataya pata xeinaewa tsane po coyene xua pexeinya peitūpanae coichaxae. <sup>18</sup>Jopa bichocono pacayabara nanta xeineibinyo po coyenein painta daunwei xua jiwi atene pata tana neexaneibixae barapo cae pin nacuathe. Jame maisa bichocono pacayabara nanta xeinan po coyenein xua Nacom pana jūntū coyene weiweina exanaena. Pocotsiwan xua jiwi pana necana exana barapo cae pin nacuathe weraweracaena. Nama xua pocotsiwan Nacom painta exanaena baxua ataya ayapusū tsoponae.

**5** Pata pepon xua saya pata yawa jinompaenexa barapo cae pin nacuathe nexa icha bouto ichi xua saya pecuenta werapaenexa barapo cae pin nacuathe. Poxonae pawerapaen pata pepon weraweracaena icha bouto ichi. Bapoxonae payaputan xua Nacom icha pepon painta xeina xua pena pepon pia nacuatheicha. Barapo pepon ataya payawa jinompaen. Barapo pena pepon Nacom exana, jiwi jopa exanaeyo. <sup>2</sup>Anoxuae bichocono pana najūntū coyene exaban tsipei bichocono bepaxeiaen icha pena pepon po pena pepon Nacom xeina pia nacuatheicha. <sup>3</sup>Barapo pena pepon Nacom pana cata xua jopa pata jinompaenexa athabeicha poxonae jopa paxeiaeninyo pepon. <sup>4</sup>Poxonae cataunxuae barapo pepon payawa jinompan barapo cae pin nacuathe bichocono pana najūntū coyene exaban tsipei jiwi painta ayapube exana pata pepontha. Ichitha jopa paichichipaeinyo xua pata jinompaewa be poxonae jopa paxeiaeninyo barapo peru pepon xua pata bebeixae. Jame paichichipan xua pata yawa jinompaewa pena pepon. Po pepon anoxuae payawa jinompan saya werapaena. Paichichipan xua equeicha pata xeinaewa pena pepon po pena pepon xua ataya asūya pata yawa

jinompaewa tsane. <sup>5</sup>Nacom pana necui yabara wūnaeta xua barapo pena pepon pana catsina. Nacom pana cata pia Pejumope tūnaxū tatsi xua pana netsita itapeinya xeina xua bexa tsane Nacom pena pepon xaniwaicha pana catsina.

<sup>6</sup>Daxita matacabin ajūntūsūya pajume cowūntsiya coyeneyatha Jesús, xua bapon exanaena pocotsiwan bapon paeba, bequein cataunxuae jopa pana nebarū jinompaeyo itabocotheicha. Apra jopa pajinompaeninyo xua pata tataewaxae ichawa. <sup>8</sup>Ajūntūsūya pajume cowūnteiban Nacom. Paichichipan pata bebeiwa barapo peru pepon xua po pepon anoxuae payawa jinompan pata jinompaenexa ichaxota Jesús popona pon jiwi Pecanamataxeiaen. <sup>9</sup>Bichocono paichichipan xua pata exanaewa pocotsiwa bapon Jesús pon jiwi Pecanamataxeiaen ichichipa bequein barapo pepon payawa jinompan barapo cae pin nacuathe, matautano ichacuitha metha bequein poxonae painompan Nacom pia nacuaitha. <sup>10</sup>Bexa tsane daxita waxainchi bewa umenaenichi Cristo peitabaratha. Bapoxonae barapo mataqueitha bapon yabara paebina jiwi xua penatsicuentisiwa xua abe peexanaexae Nacomtha. Daxita barompaya matoma xeinaena pocotsiwa pia peexanaexae poxonae cataunxuae jinompa barapo cae pin nacuathe. Pomonae wūnaeya tanacuita xuya wūnaeya matoma catsibinchi. Pomonae jopa xapain tanacuichiyo xuya antomabeya catsibinchi.

**Meje xua Pablo yabara  
paeba xua juntema  
pejinompae coyenewa yabara**

<sup>11</sup> Yaitama payaputan xua bewa pacunuwin Nacom pon jiwi Pecanamataxeinaein pata baru cui itura jinaenexa bapon. Daxota pamuxuwetan jiwi xua bewa jume cowuntsina Jesús. Nacom pana juntu coyene yaputane xua xainyeya bepataexanaein. Barichi paichichipan xua paxam pana juntu coyene yaputaneme beta. <sup>12</sup> Paxan jopa paichichipaeinyo xua pata coutha pata nayabara paebiwa xua pata paca catsipaebiwa tsainchi xua pata ainya cui jiwixae xua daxota pata tanebaru cui itura jinaewam tsane. Jame nama paca tsipaebatsi po coyene xua pana nayabara paeban xua painya pata taneweyataenexa. Matautano paca tsipaebatsi xua ichamonaen painya nejume noteibinexa poxonae ichamonaen abeya pana neyabara paebeiba. Barapomonaen pia coutha atsaquiya nayabara paeba xua daxita xanepanaya peexanaexae po coyenein xua jiwi cui tane. Ichitha barapomonaen jopa najuntu coyene yabara tsaqueinaeyo xua po juntu coyenein xeina pia juntu coyeneintha po juntu coyene jopa wunaeyo. <sup>13</sup> Barapomonaen pana neyabara nanta xeina xua paxan pomonaen pata tanentsiyabi jiwi pan xua poxonae pata cueicueijeixae Nacom Pejume Diwesi. Icha barapomonaen baxua pana neyabara nanta xeina apara poxoru Nacom pata taantobexae. Icha barapomonaen jopa pana yabara nanta xeinaeyo xua paxan pomonaen pata tanentsiyabi jiwi pan, apara poxoru saya pata paca yawenaexaetsi. <sup>14</sup> Cristo pata tana neantobexae paichichipan xua pata tatanacuichiwanexa bapon. Bara xaniwaicha payaputan xua Cristo tsitupa daxita jiwi pomonaen pia pejume

cowuntsiwichixaetsi. Daxota Nacom patsitan xua paxan be pomonaen pata werapaewi pan abe pata exanaexae. <sup>15</sup> Cristo tsitupa daxita jiwi, xua daxita jiwi pejinompaenexa Cristo nexa peexanaexae pocotsiwa bapon tsita xanepanatsi. Barapoxonaen jopa jinompae tsane po coyeneya poxonae tsita xanepanatsi barapomonaen. Jame barapomonaen bewa jinompae Cristo nexa pon naetha tupa xvano xua equeicha asu exanatsi. <sup>16</sup> Anoxuae jopa payabara nanta xeinaeyo xua pata yaputaewa jiwi pia pejuntu coyenein tatsi xua saya poxonae pacui tan poxonae po coyenein exana icha pomonaen jopa pejume cowuntsiwi ichi. Barapomonaen nanta xeineiba xua jiwi pejuntu coyene yaputaenexatsi xua saya poxonae cui tainchi xua exaneiba. Bequein copiya bayatha Cristo jopa wunaeya payabara nanta xeinaeyo, ichitha anoxuae jopa baxua paraichinyo poxoru anoxuae bara xaniwaicha payaputan bapon. <sup>17</sup> Pon caein naexana Cristotha pejume cowuntsixae bapon pena juntu coyene xeina. Po coyenein xua bayatha exana xua peru juntu coyenein weraweracaena. Anoxuae equeicha icha pena juntu coyenein exanaena.

<sup>18</sup> Daxita barapo pena juntu coyenein Nacom werena pona. Nacom naca cana exana xua piamonaen jiwi tatsichi pomonaexaetsi bequein copiya Nacom pia peitaefaetabi jiwi tatsichi. Baxua Nacom naca cana exana Cristo wanaca tsitupaexae. Matautano Nacom pana itoroba xua paxan xuya ichamonaetha pata cana exanaenexa Nacom piamonaen tatsi pomonaexae bequein copiya Nacom pia peitaefaetabi jiwichi. <sup>19</sup> Pocotsiwa xuaunxuae paca tsipaebatsi xua apara meje: Nacom juntema jinompa cana exana barapo cae pin nacuathe

pomonae copiya pia peaitafaetabi jiwichi poxonae barapomonae yabara jume cowanta xua Cristo tsitupa barapo jwi. Bapoxonae Nacom jopa tsitatsi xua barapo jwi penatsicuentiwa xua abe peexanaexae. Matautano Nacom pana cata penacuichiwa po penacuichiwa xua pata cueicueijeinexa jiwitha. Po diwesi yabara xua Nacom piamonae cana exana jwi, pomonae bequein copiya pia peaitafaetabi jiwichi, barapo diwesi pacueicueijan. <sup>20</sup>Paxan pomonae Cristo pata taneitorobi jwi pan pata cueicueijeinexa bapon nexa. Bequein bara paxan paca tsipaebatsi, apara jame yatsicaewa Nacom paca tsipaeba poxonae paca tsipaebatsi. Cristo patacucueijeijan poxonae jume daunweya paca jeichi: “Pana nacui barapende abe painya neexanae cuiru coyenein. Pajume cowunde Cristo caemonae painya nenaexanaenexa Nacomtha”, paca jeichi. <sup>21</sup>Cristo bapana jopa abe exanae. Ichitha Nacom tsitatsi xua Cristo penatsicuentiwa xua poxoru abe waexanaexae. Bapoxonae Nacom naca cana exana xua caemonae wanaexanaewa bapontha xua wajuntu coyenein xanepanaenexa Cristo pia peexanaexae poxonae naca tsitupa. Bapoxonae Nacom tsitatsi xua jopa watsita natsicuentiwa bequein abe waexanaethatsi.

**6** Nacom pata tana nebaru nacuita dubenanaebiyaxae, jume daunweya paca muxu tsipaebiya jeichi: “Painya xoba panaitematame po diwesi xua Nacom paca cata paca nacaantobexae. Barapo diwesi apara xua Nacom juntu coyene xanepana exana jwi pomonae pejume cowuntsixae”, paca jeichi. <sup>2</sup>Tsipei Nacom, pewanaeya poxonae xua jwi yabara cui cananta xeinaeinchi peyawenaenexa tsainchi, Nacom Pejume Diwesitha namchi, jeye:

“Po matacabi jwi yabara cui cananta xeinaein tayawenaenexa tsane, barapo mataqueitha paca jume taeinchi.

Po matacabitha jwi capanenebiyaein paxam yawa paca yawenaeinchi”, jei Nacom Pejume Diwesitha.

Anoxuae apara barapo matacabi jopa, po mataqueitha Nacom naca yabara cui cananta xeina wanaca yawenaenexa.

<sup>3</sup>Poxonae Nacom patanacuita dubenanaebiyen paichichipan xua daxita jwi xaniwaicha pata tatsita jinompaewa, xua daxota daxita jwi pejume cowuntsiwanexa. Jopa abe paexanaeinyo bequein xua tsiwiyo xua abe pata exanaewa xua jwi pata nejume aebiyainwa Nacom Pejume Diwesi poxonae patsipaeban.

<sup>4</sup>Jame apara daxita beta paexana dubenanaebiyen jwi pata tsita itapeinya xeinaewa xua apara jwi pata taneyaputaenexa xua Nacom patanacuitan. Baxua paexanan poxonae awiya saya juntepa pajinompan poxonae bequein ichamonae atene pana exana, xuano bequein painta seica pocotsiwa panantawenonan, xuano bequein poxonae bichocono painta yapu daunwei tsaibi poxonae paexaneiban. <sup>5</sup>Ichacuitha jwi pana beiba bichocono. Matautano ichacuitha jwi pana cuaranobeiba jwi pecubi bontha. Matautano ichacuitha jwi ayei jwi anaepanaya pana netsaquibabeiba poxonae jwi ayei acucu. Poxonae panacuiteiban, bichocono ayapusuya panacuiteiban. Ichacuitha merawitha jopa pamaiteibinyo tsipei saya paexaneiban Nacom pia penacuichiwa tatsi. Ichacuitha tsaibi bichocono pajainpeiban. <sup>6</sup>Jwi patsita itapeinya xeinan xua paxan pomonae Nacom pia petanacuichi jwi tatsi pan xua Nacom pata tsita juntu coyene xanepanaexae, matautano tsipei poxoru payaputan pocotsiwa pexainyei jume, matautano

jopa pata casebixae pomonae bequein painta abe exana, xuano xua xanepanaya pata taexanaexae ichamonae, matautano Nacom pia Pejumo pe tunaxu tatsi pata tanebaru jinompaexae, xuano xua ichamonae xaniwaicha pata taantobexae. <sup>7</sup>Bara xaniwaicha payabara paeban po coyene pexainyeiwa. Paxan paxeinan Nacom pia peayapusu itorobi coyenewa tatsi. Pata Nacom pata tsita juntu coyene xanepanaexae, paxeinan pocotsi coyenewa xua panantawenonan xua pata tacueicueijeinexa Nacom. Paxan panacui wetan xua Nacom patanacuitan. <sup>8</sup>Ichacuitha jiwi pana nebaru cui itura jineiba, ichamonae jopa pana tsita daicheibiyo. Ichacuitha ichamonae wunaeya pana neyabara paebeiba. Ichacuitha ichamonae abeya pana neyabara paebeiba. Ichamonae pana neyabara paebeiba xua paxan pomonae jiwi pata muxuitorobi jiwi pan. Ichamonae pana neyabara paebeiba xua paxan pomonae aparta xaniwaicha pata paebi jiwi pan. <sup>9</sup>Ichacuitha ichamonae jopa ichipaeyo xua pata taneyabara yaputaewa xua paxan Jesús pia peitorobi jiwi tatsi pan. Pana yabara nanta xeina xua saya jiwi pan bequein daxita jiwi bara xaniwaicha pana neyaputane xua paxan Jesús pia peitorobi jiwi tatsi pan. Ichacuitha ichamonae pana neyabara nanta xeineiba xua paxan bara imoxoyo muxu pata bobeneibi, ichitha awiya asuya pajinompeiban. Jiwi pana neatene exaneiba, ichitha jopa pana nejutebeibiyo. <sup>10</sup>Bequein ichacuitha bara pajuntu coyene wecoyan pata painta exanaexae ichamonae, daichitha awiya pajuntu coyene weiweinaya jinompeiban. Metha bequein paxan be pomonae peacopeibiwi pan tsipae ichitha paxeinan nawita Nacom weya pocotsiwan xua payawenan ichamonae.

Bapoxonae barapo ichamonae be pomonae copei pexeinaewi naexana tsipei jume cowanta Nacom Pejume Diwesi xua papaeban. Bequein bara be pomonae jopa pata xeinae jiwi pan pocotsiwa xeina po cae pin nacuathe, daichitha aparta bara paxeinan daxita po coyenein Nacom pana cata po coyenein xua jopa peweraweracaewa.

<sup>11</sup>Tamonae pam, paxam pomonae Corinto tomarapiwi pam. Daxita xua po coyenein tajuntu coyenewatha nanta xeinan baxuan paca tsipaebatsi. jBichocono tajuntu coyenewatha paca antobetsi! <sup>12</sup>Amanaya bichocono jopa juniya paca antobetsi. Ichitha nama paxam barapomonae pam, pomonae pam jopa paichichipaem xua painyamonaе jiwi tapana neexanaewam. <sup>13</sup>Xan paca tsipaebatsi xua be poxonae icha coxiyup ichi xua tsipaeba pia pexuyotha. Paca jeichi: “Xuya daxita painya nejuntu coyenewatha paneantobeinde icha paca ichichi xua tapaca antobewatsi bichocono”, paca jeichi.

**Meje poxonae Pablo jeye: “Icha Nacom ichi xua popona pia pin botha barichi Nacom pana nebaru jinompa”, jei**

<sup>14</sup>Jopa caemonae pana naexanaeinde pomonaetha pomonae jopa pejume cowantsi jiwi. Tsipei pon pejuntu coyene xanepanaein jopa itacupaetsi xua pecueyatsiwa pontha pon peajuntucoyenebein. Barichi xua pequireiwatha peyonoyoneiwa jopa itacupaetsi xua quirei tsanaya baxota, awiya peyonoyoneixae. <sup>15</sup>Barichi Cristo pon xanepanaya peexaneibin jopa itacupaetsi xua pecueyatsiwa caurimonae pia pentacaponaeinthatsi, pon abe peexaneibin. Barichi pon pejume cowantsin jopa itacupaetsi xua pecueyatsiwa pontha pon jopa pejume

cowantsin, poxoru jopa jupaeyo xua nanta xeinabe. <sup>16</sup>Barichi Nacom pin pia botha jiwi jopa bewa wunae jainchina ibo nacomun. Saya meisa bewa wunae jainchina Nacom barapo botha. Nacom patsitan xua paxan bara be Nacom pin pia bo tatsi. Icha Nacom ichi xua popona pia pin pia botha, barichi Nacom naca baru jinompa, pon ataya asuya popona. Nacom caena bayatha baxua yabara jeye:

“Barapomonaē baru poponaēin yawa cweyata ducuaēnabiyāēin.

Matautano barapomonaē pia Nacomun tatsin tsane.

Barapomonaē tamonaē naexanaēna”, jei Nacom.

<sup>17</sup>Daxota Nacom pon Pecanamatax-einaēin jiwi, equeicha yabara paēba pomonaē jopa pejume cowuntsiwi. Nacom piamaētha jeye:

“Barapomonaē pia xainya weya paponare.

Jopa caēmonaē pana nayawa exanaēinde barapomonaē.

Jopa paexanaēinde peabe coyene po coyene barapomonaē exana.

Nexata xan paca matenta weyataēya wabinchi.

<sup>18</sup>Xan naexanan xua xan painya Axan.

Matautano paxam taxanton jiwi pam tsane,

xuano iru taxantixi jiwi pamdu”,

jei Nacom piamaētha pon daxita peayapusu

itorobi coyenewan pexeinaēin.

**7** Tamonaē pam, paxam pomonaē tapaca caantobe jiwichi pam. Xu-aunxuae po diwesi paca tsipaebatsi baraxuan apara Nacom yabara naca tsiwunae muxu duta xua pocotsiwa wanaca cana exanaēwa. Daxota waxainchi bewa daxita abe waexanaē cuiru coyenewan pentichi po coyenewan xua wapepon exana, xuano xua wajuntu coyene nanta xeinano. Matautano bewa

xua Nacom junuwiya wabarū cui itura jinaewatsi tsainchi. Matautano bewa xanepanaya exanaponaētsi beya poxonaē bichocono Nacom watsita juntu coyene xanepanaēwa tsane xua jopa wanatsicuēntsiwa xua abe waexanaēxae bapontha.

**Meje xua poxonaē Corinto  
tomarapiwi icha juntu coyene xaina  
xua Jesús pejume cowuntsixaētsi**

<sup>2</sup>Equeicha caēwa pana neantobeinde tsipei paxan jopa abe pacata exanaētsi. Paxan jopa abeya pamatacaponaēinyo ichamonaē xua xuya abe peexanaēnēxa. Matautano ichamonaē jopa pamuxu-jainyabeibinyo. <sup>3</sup>Jopa baraxua paca tsipaebichi xua paca yabara paebatsi xua abe painya neexanaēwam. Bayatha copiya paca tsipaebatsi, paca jeichi: “Tajuntu coyenewatha bichocono paca antobetsi, bequein metha poxonaē paca baru werapaētsipatsi, xuano metha bequein poxonaē paca baru jinompaētsipatsino”, paca jeichi. <sup>4</sup>Bara bichocono paca yabara jume cowuntatsi xua po coyene tapaca catsipaēbiwatsi tsainchi pocotsiwa tajuntu coyenewatha nanta xeinan xua pocotsiwa painya neexanaēnēxa tsane. Matautano paca yabara wunae jaintatsi poxonaē ichamonaē tsipaēban poxoru tapaca cui yabara paēbixaētsi. Bequein ichamonaē atene neexana, daichitha poxonaē jume tan pocotsiwa paexaname pana nejuntu coyene tsacaba exaname xua juntema tapoponaēwa. Matautano barichi bichocono panejuntu coyene weiweina exaname.

<sup>5</sup>Poxonaē po mataqueitha weya papatan Macedonia nacua weya jopa cuinaya juntema painompaeinyo xua jiwi abe pata tana necana exanaēwa daxita coyeneintha. Pomonaē jopa pejume cowuntsiwi bichocono pana casebeiba pata natsipei cueicueijeixae Jesús pejume diwesi. Barichi pomonaē pe-



jume cowũntsiwi junuwiya payabara najũntũ coyene exabeiban nawita xua jopa xanepanaya pejinompaewa tsipae.<sup>6</sup> Dai-chitha Nacom pana jũntũ cui coyene tsacaba xua jũntema pata jinompaewa poxona bequein paatanein tsaibi. Barapon Nacom apara pon jiwi cana exanatsi xua jũntema pejinompaewa poxona bequein jũntũ coyene wecoyei. Baxua Nacom pana necana exana poxona Tito patopa pata xantha.<sup>7</sup> Pajũntũ coyene weiweinan xua bapon pepatopaexae. Ichitha jame yatsicaewa pana nejũntũ coyene tsacabame xua poxona bapon pana netsipaeba xua pinae xanepanaya pata exaname bapon. Bapon pana netsipaeba paxam yabara xua pinae pajam: “Maisa Pablobarũ bepataebenaen. Bichocono pawecoyan yaitama Pablobarũ abe exanatsi ichamonae. Daxota payabara najũntũ coyene exaban bapon”, pinae pajam. Poxona baxua jume tan bichocono jũntũ coyene weiweinan.

<sup>8</sup>Bequein xan paca jũntũ coyene wecoyei exanatsi xua po cartatha copiya pacata tinatsi, daichitha anoxuae baxua jopa yabara auranyo bequein copiyatha yabara auran baxua. Barapo carta saya bara caeto paca jũntũ coyene wecoyei exana.<sup>9</sup> Ichitha anoxuae jũntũ coyene weiweinan xua jopa apara poxoru painya nejũntũ coyene wecoyeixae poxona payorobame barapo carta, saya apara jame poxoru Nacom icha jũntũ coyene painya netsita xeinaexae. Paxam pajũntũ coyene wecoyam icha be pocotsi coyeneya Nacom peichichipaewa xua abe painya neexanaexae. Daxota paxan jopa abe pacata exanaetsi.<sup>10</sup> Poxona jiwi jũntũ coyene wecoyei icha be pocotsi coyeneya Nacom ichichipa, barapo peitanuwetha jiwi cana exanatsi xua peurawa abe peexanaexae bapoxona barapo jiwi

Nacom jume cowũntatsi. Bapoxona Nacom jopa tsita natsicuentichi xua abe peexanaexae. Barapomona icha jũntũ coyenein xeina poxona barapomona capanenebiyatsi abe pia peexanae cuiru coyenein weya tatsi. Bapoxona barapomona jopa bewa aura tsane xua copiya jũntũ coyene wecoyei. Ichamonae pomona jopa pejume cowũntsiwi Nacom, poxona barapomona wecoyei xua jopa peuraxae poxona abe exana, ichitha barapo itanuwetha barapomona jopa yawenaetsi. Apara saya barapomona werapaena Nacom petsita abe exanaexaetsi.<sup>11</sup> Po itanuwe Nacom pacata copata bayatha jame barapo itanuwe paca yawena. Barapo itanuwe paca exana xua paca jũntũ coyene tsacaba xua beta painya neexanaenexa. Matautano paca exana xua pacui yabara nanta xeiname pon abe peexanaein. Bapoxona nainya paitawetame bapon, abe peexanaexae. Barichi be patsita itapeinya xeiname Nacom xua paxam jopa panatsicuentisim xua jopa be barapocotsi coyenewiyo pocotsi coyenewa xua bapon exana. Matautano paauram xua painya necopatsiwa bapon xua bara abe peexanaewa. Matautano pajunuwame xua Nacom atene paca exana poxoru bapon abe peexanaexae. Bapoxona be pabebam painya xainya weya po coyene xua bichocono abe. Daxota paitawetame bapon. Daxita beta paexaname. Painya netsita itapeinya xeinaewa Nacomtha xua apara daxita paxam jopa abe paexanaem. Saya meisa bapon abe peexanaexae.<sup>12</sup> Bayatha pacata tinatsi po carta xua paca itanuwe exana xua Nacom painya tsita itapeinya xeinaenexa xua xaniwaicha bara pana neantobem painya neexanaexae pocotsiwa paca itorobatsi. Apara jopa pacata tinaetsi xua saya poxoru tayabara nanta

xeinaexae pon abe exana, xuano iru pon coseuri pitatsi, xua tayawenaewa tsane. <sup>13</sup>Pata taneantobemxaem pana nejuntu coyene tsacabame xua tajuntu coyene weiweinaewa.

Barichiru daxita paxam Tito pajuntu coyene cui tsacabame daxita pocot-siwantha xua beta painya paebixaem bapontha. Jame yatsicaewa bapoxonae bichocono pajuntu coyene weiweinan xua poxonae Tito pacana exaname, beyacaincha poxonae pana necana exaname xua poxonae pajuntu coyene weiweinan. <sup>14</sup>Poxonae Tito taxainya weya bara muxu peponaeba matha beta paca yabara paebatsi bapontha, janje: “Maisa Corinto tomarapiwi pomonae pejume cowuntsiwi weyatan xua bichocono pejuntu coyene xanepanaexae Nacomtha”, jan. Paxam jopa panejuntu coyene aura exanaem. Xua ba paca tsi-paeibatsi baraxua bara pexainyeiwa tsaibi. Matautano pocotsiwa paca yabara paebatsi Titotha baxua apara bara pexainyeiwano iru. <sup>15</sup>Bapon Tito bichocono paca antobe anoxuae beyacaincha poxonae cataunxuae jopa paca siwa pon-aeyo. Bapon paca yabara juntanaina xua paxam pabaruru jume jejam tsaibi pocot-siwa paca itorobeiba. Matautano bapon pantenta weyataeya wabame painya baru itura jinaexae bapon. Matautano pajunuweibame xua abe painya neexanaeyainwa bapon. <sup>16</sup>Maisa bichocono juntu coyene weiweinan xua tapaca yabara jume cowuntsiwatsi xua daxita coyenewan painya neexanaewaxae po coyene xua wuna.

**Meje xua poxonae Pablo yabara  
paeba xua Cristo piamonae  
tatsi paratixi pecacomocae  
paratixi jehebapona pomonae  
peacopeibiwi nexa**

**8** Tamonae pam, paichichipan xua painya neyabara yaputaewa xua

Nacom pia peyawenaewa jiwi, pia peantobexae. Ichichipan xua tapaca tsipaebiwatsi po coyene Nacom tsita itapeinya xeina barapo pia peantobe coyenewa pomonaetha pomonae pejume cowuntsiwichi, pomonae penacaetutsi bonmonae jiwi xua pomonae wuna pejainteibiwi Nacom pomonae xua Macedonia nacuatha jinompa. <sup>2</sup>Bequein barapomonae bichocono daunweya juntu coyene jujutatsi poxonae ichamonae abe taexana barapomonaetha, daichitha awiya cataunxuae barapomonae juntu coyene weiweina. Bequein barapomonae peacopeibi jiwi, daichitha barapomonae catsibeiba nawita paratixi pecacomocae paratixi petaitorobinexa pomonaetha pomonae peacopeibi jiwi Jerusalén tomarapiwi be poxonae yatsicaewa pepa copei pexeinaewi. <sup>3</sup>Xan tan xua barapomonae cata nawita be po coyeneya xua daxita itacupatsi xua pecatsibiwa. Matautano ichawano catsiba beyacaincha xua poxonae itacupatsi xua pecatsibiwa. <sup>4</sup>Barapomonae bichocono pana muxu fayacotsiya jeye: “Bara pana copare xua bara Jerusalén tomarapiwi patacatsibinexa paratixi pecacomocae paratixi pomonae iru pejume cowuntsiwi, pomonae peacopeibi jiwi”, pana jei. <sup>5</sup>Barapomonae baxua exana beyacaincha xua pocotsiwa pananta xeinan xua barapomonae itacupatsi xua pocotsi coyeneya pecatsibiwa tsane. Matautano barapomonae juntucuru nanta xeina xua bara petanacuichinexa tsane Nacom nexa daxita pejuntu coyeneinyatha. Bapoxonae juntucuru nanta xeina xua barapomonae bara pata taneyawenaenexa tsane be pocotsi coyeneya Nacom ichichipa. <sup>6</sup>Daxota Tito paitoroban xua nacui wetsina xua penonotaponaewa tsane paratixi pecacomocae paratixi, tsipei bapon

bayatha caena tamropata pitaba xua penonotaponaewa paratixi painya xantha. Poxonae barapo paratixi pacatsibaponaewa bara pexeinya coyene paexanaponaewa peacopeibiwitha painya neantobewaxae. <sup>7</sup>Paxam bichocono jopa juniya paxeinaem po coyenein xua painya neexanaewa. Bichocono pajume cowantame Nacom. Matautano betiya pacueicueijam Nacom Pejume Diwesi, xuano bichocono payabara yaputaneme Nacom Pejume Diwesi. Matautano bichocono painya juntu coyenewatha paichichipame xua ichamonaewa painya neyawenaewa. Matautano bichocono pana neantobem. Daxota bichocono jopa juniya toxinchiyi paexanaeinde xua painya neyawenaewa xua poxonae paratixi pacatsibame pomonaetha pomonaewa iru pejume cowantsiwixae. Baraxua paexande painya neantobexae barapomonaewa.

<sup>8</sup>Poxonae baxua paca tsipaebatsi jopa paca itorobichi xua painya neexanaewanexa. Saya apara jame paca tsipaebatsi baxua xua tayaputaenexa icha bara metha paxam bichocono paantobem ichamonaewa icha Macedonia nacuamonaepiwi ichi. Barapomonaewa bichocono antobe ichamonaewa daxota yawena nawita. <sup>9</sup>Paxam payaputaneme xua Jesucristo naca antobe pon Wanacanamataxeinaein. Jesucristo poxonae Paxatha popona copiya daxita xeina be poxonae yatsicaewa copei pexeinaein. Daichitha bapon pia coutha nacana exana be pocotsin jopa copei pexeinaein poxonae paxa cuenta pona. Poxonae jiton pia coyeneya nacana exana bapoxonae acopeibi nacana exana pia paca necaantobewaxae. Daxota xuya nawita painya nexeinai jiji pam tsane xua po coyenewa Jesucristo xeina.

<sup>10</sup>Paca tsipaebatsi baxua painya tapaca cayawenonaexaetsi. Nanta xeinan xua paxam bewa panacui yabara wetsiname pocotsiwa xua bayatha icha weitha patamropata notarucupame xua paratixi painya nejehebaponaewa Jerusalén tomarapiwi nexa. Baxua bayatha paexaname painya juntu coyeneintha bichocono painya neichichipaexae xua painya neexanaewa baxua. <sup>11</sup>Icha copiya paichim xua paichichipame nawita xua painya neexanaewa baxua, paexanaponde beya poxonae panacui yabara wetsiname. Padodoutaponde xua be pocotsi coyene paca cui jupa xua pocotsi matoma paxeineibame xua pajiwana tsabeibiname paratixi. <sup>12</sup>Icha pebin ichichipa xua pecatsiwa paratixi Nacomtha bapon bara nata jiwana wetsatsina paratixi xua catsina be pocotsi coyene xua cui jupatsi xua pecatsiwa. Pocotsiwa bapon cata bara Nacom wecobe pita. Saya poxoru Nacom jopa pewucaexae poxonae pebin bequein jopa xeinaeyo taethatsi. Saya jame icha jiji cui jupatsi xua pecatsiwa poxonae xeina, bapoxonae jame Nacom wecobe pita.

<sup>13</sup>Jopa paca tsipaebatsi xua ichamonaewa bewa payawenaenama xua painya necatsibiwa daxita xua paxeinama xua beya poxonae daxota painya neacopeibiwa tsane. <sup>14</sup>Saya jame paca tsipaebatsi xua paxam copei pexeinaewi pam iru peacopeibiwi Jerusalén tomarapiwi bewa peburuya jupaeya paxeinaenama. Metha anoxuae paxeinama nawita, ichitha barapomonaewa jopa xeinaeyo. Daxota paxam pomonaewa nawita painya nexeinai jiji pam bewa pacatsibiname pomonaetha pomonaewa jopa xeinaeyo pocotsiwa barapomonaewa nantawenona. Metha bexa tsane barapomonaewa xeinaena nawita ichitha paxam jopa

paxeinaem tsane. Bapoxonae bewa barapomonae xuya paca catsibina pocotsiwa panantawenoname. Bapoxonae daxita pam nanta jupaeya paxeinaename. <sup>15</sup>Nacom Pejume Diwesitha baxua yabara jeye: “Pon nawita pexeinaein copiya, beyacaincha xua pocotsiwa nantawenona, bapon jiwana wecata ichuntha pocotsiwa xua jopa pecanantawenonaexae. Pon xua tsiwiyo xeina copiya xua daxota taseicatsi pocotsiwa nantawenona, pirapae xeina pocotsiwa pecanantawenonaewa poxoru pon nawita xeina piawa jiwana wecata bapontha”, jei Nacom Pejume Diwesitha.

**Meje xua Tito yabara iru pomonae pia peyanabiwatsiru**

<sup>16</sup>Tsipaeban Nacom, janje: “Nacom maisa juntu coyene weiweinan xua Tito pejuntu coyenewatha yabara nanta xeina ducuaenaebiya Corinto tomarapiwi xua peyawenaenexa barapomonae icha xan ichin”, janje. <sup>17</sup>Bapon Tito juntu coyene weiweina poxonae patsipaeban xua pia paca necayawenonaewa tsane. Daxota anoxuae bapon pia coutha paca siwa ponaena peichichipaexae xua pia paca yawenaetsi.

<sup>18</sup>Ichundu paitoroban pon pejume cowuntsindu xua Tito pepuna ponaenexatsi. Daxita pomonae pejume cowuntsiwi pomonae penacaetuteibi jiji xua wuna pejainteibiwi Nacom barapomonae bapon beta yabara nanta xeinatsi, tsipei pinae bapon beta xanepanaya cuiduba Nacom pia pecapanenebiyae diwesi jume. <sup>19</sup>Jopa meisa pebaxuaxae. Jame yawa matautano barapomonae pomonae pejume cowuntsiwi peitapetsixae barapo pebin xua bapon pata tanebaru ponaenexa poxonae pacapanan paratixi peacopeibiwitha pata antobexae

barapomonae. Barapo penacuichiwa pata exanaexae pabarui itura jinan Nacom pata exanaexae pocotsiwa bapon pana itoroba. Matautano poxonae baxua paexanan patsita itapeinya xeinan xua paichichipan xua nantiya pata tanayawenaewa. <sup>20</sup>Paichichipan xua xaniwaicha beta paexanan poxonae pin paratixi cun pacapanan xua jiji abe pata neyabara paebiyainwa. <sup>21</sup>Paichichipan nawita xua xainyeya pata exanaewa Nacom peitabaratha tatsi xuano xua jiji peitutha tatsino.

<sup>22</sup>Barichino ichunno paitoroban pon pejume cowuntsindu xua baponbe Tito pepuna ponaenexa tsainchibe. Bapon pon cotacaya paitoroban, pajuntu coyene jujutan pata yaputaenexa icha bara metha beta nacuita Nacom nexa. Bara bapon beta jume cowunta ducuaenaebiya. Daxota bapon iru paitoroban. Bapon ichichipa nawita xua pia paca yawenaewa tsane pia paca yabara jume cowuntsixae xua bara beta paexaname. <sup>23</sup>Icha ichun paca yabara yainyaba Tito pana nejume cayabara jume jande bapontha xua janje: “Bapon taneyantsin. Bapon neyanta xua penacuichiwa po penacuichiwa xua tapaca yawenaewatsi. Ponbe Tito puna poinchibe baponbe itorobatsibe pomonae pejume cowuntsiwi. Baponbe tsita itapeinya xeinabe barapomonaetha xua bara xaniwaicha pejume cowuntsinbe Cristo, xua daxota barapomonae wuna pejainchinexa Nacom”, pana nejume cayabara jande. <sup>24</sup>Barapo acoibi poyobe xaniwaicha pantenta weyataeya wabare poxonae patsina painya xantha. Bapoxonae poxonae baxua paexaname patsita itapeinya xeinaename pomonae pejume cowuntsiwi xua xaniwaicha bara paantobem barapo acoibi poyobe. Bapoxonae barapomonae paca yabara

cui yaputaena, xua paxan xaniwaicha papaeban xua poxonae jũntũ coyene weiweinaya atsaquiya tapaca yabara paebiwatsi xua painya nejume cowuntsixae.

**Meje xua paratixi pejebaponaewa yabara pomonae pejume cowuntsi jiwi nexa, pomonae peacopeibi jiwi xua pomonae Jerusalén tomarapiwi**

**9** Jopa nantawenonaeyo xua equeicha tayabara tinaewa xua painya neyawenaenexa ichamonaepomonae irũ jume cowũnta xua painya necatsibinexarũ paratixi pomonae Jerusalén tomarapiwi. <sup>2</sup>Bara yaputanba bayatha xua bichocono painya neichichipaewa xua painya necatsibiwa paratixi. Paca yabara paeibatsi Macedonia nacuamonaepiwitha, janje: “Bayatha icha weitha Acaya nacuapiwi najũntũ cui coyene wũnaeta xua jejebaponaena paratixi peacopeibiwi nexa”, jan. Barapo Macedonia nacuapiwi, najũntũ cui coyene tsacaba xua irũ pebarichinexarũ pejume taexae xua pinae paxam paichichipame nawita po coyene painya neyawenaewa. <sup>3</sup>Barapo acoibi poyobe itoroban xua ichamonaepjopa taneyabara paebinexa tsane xua tanaerabiwa xua bayatha tapaca yabara paebixae. Daxota bewa pana nacui wũnaetsiname xua painya nejebaponaewa paratixi xua painya necatsibinexa ichamonaetha. <sup>4</sup>Metha barapo Macedonia nacuamonaepiwi jiwana nebarũ ponaena poxonae paca siwa ponaeinchi. Metha barapomonae paca taetsipa xua jopa pana nacui yabara wũnaetsim xua painya nejebaponaewa paratixi xua painya necatsibiwa ichamonaep. Bapoxonae bichocono paauran tsipae tsipei bayatha paca yabara paebatsi xua paxam pacatame nawita. Irũrũ paxam paauram tsipae. <sup>5</sup>Nanta xeinan xua bewa

copiya itorobin barapo acoibi poyobe xua bara poyobe copiya paca siwa ponaena beya poxonae xua paca siwa ponaeinchi. Barapoxonae barapoyobe painya nepaca yawenaenexa xua penotaponaewa paratixi. Bayatha pana nemuxu tsipaebame xua pinae paichichipame painya necatsibiwa ichamonaep barapo paratixi. Po paratixi panotaponame panacui yabara wetsiname, baxua patsita itapeinya xeiname xua saya jopa apara poxoru bewa pacatsibim. Saya poxoru painya coutha painya neichichipaexae xua painya necatsibiwa.

<sup>6</sup>Payabara nanta xeinare po diwesi ba xua jeye: Pon ba conotha ũba ba conotha jota pocotsiwan xua penawetsiwan. Pon ba jopa juniya ũbiyo ba jopa juniya jotsiyo pocotsiwan xua penawetsiwan.

<sup>7</sup>Daxita pomonae pejume cowũntsiwi bewa catsibeibina be pocotsi coyeneya nanta xaina pejũntũ coyenewatha. Jopa bewa asiwiya catsibeibi icha aichaxaibi xua pecatsibiwa. Matautano jopa bewa catsibeibi poxoru ichũn pecui itorobixae xua pecatsibeibiwa tsane. Nacom tsita jũntũ coyene xanepanatsi nawita pon jũntũ coyene weiweinaya douteiba ichamonaetha. <sup>8</sup>Nacom bara itacũpatsi xua daxita painya nepaca catsibiwa pocotsiwan panantawenoname, matautano ichawano xua bichocono nawita beyacaincha pocotsiwa xua panantawenoname. Bapoxonae paxeinaename pocotsi coyeneya xua paca cui jũpa xua pajũntũ coyene weiweinaya catsibiname ichamonaetha. <sup>9</sup>Nacom Pejume Diwesitha pon nawita pecatsibin jiwi bapon yabara jeichichi, jeye:

“Pon catsibeiba poneiba nawita pomonaetha pomonae peacopeibi jiwi Nacom jopa juniya xuya catsibeibi tsane bapontha, xanepanaya

peexanaexae”, jei Nacom Pejume Diwesitha.

<sup>10</sup>Apara Nacom pon catsibeiba jiwi po pexu xua jiwi peubinxexa. Matautano apara Nacom pon catsibeiba pexaewa xua jiwi pexaenexa. Barichi Nacom paca catsibeibina beyacaincha xua pocotsiwa panantawenoname.

Bapoxonae paca cui jupaena xua ichamonae painya necatsiba dubenanaebiyaewa tsane nawita, pocotsiwa jopa panantawenonaem. <sup>11</sup>Nacom nawita paca catsibina xua daxota paca itacupaena xua ichamonae pacatsiname nawita. Poxonae pacaponaein barapo paratixi xua pata itorobame peacopeibi jiwi nexa, Jerusalén tomaratha, bapoxonae barapomonae Nacomtha jeye tsane: “Nacom maisa pajuntũ coyene weiweinan xua painta exaname xua daxota barapo Corinto tomarapiwi painta itoroba paratixi”, jei tsane.

<sup>12</sup>Poxonae barapo paratixi pacatame barapo pejume cowũntsi jiwitha, bara barapomonae pacatame pocotsiwa barapomonae penantawenonaewa. Matautano painya neexanaexae baxua barapomonae wũnae jainteiba Nacom.

<sup>13</sup>Barapomonae wũnae jainta Nacom painya nejejeixae xua paexaname po coyene Cristo pia pecapanenebiyae diwesitha paca itoroba. Matautano barapomonae Nacom wũnae jainchinchĩ, painya neyawenaexae poxonae pacatame paratixi nawita barapomonaetha xuano xua daxita ichamonaetharu. <sup>14</sup>Barapomonae Nacomtha pacata wũcaena pia paca necaantobewaxae poxoru barapomonae patsita itapeinya xeiname xua Nacom bichocono paca yawena pia paca necaantobewaxae.

<sup>15</sup>Nacomtha patsipaeban, pajanje: “Nacom maisa pajuntũ coyene weiweinan xua nexanto painta amanaya itorobicame pata xantha. Baxua pocotsiwa xua painta

exaname bichocono jopa juniya xanepanaeyo xua jopa pana itacupaeyo xua po jumetha pata yabara paebiwa”, pajan.

### Meje xua Pablo yabara paeba pia peitorobi coyenewa

**10**Xan Pablon paca jume fayacotatsi. Paca tsipaebatsi icha be pocotsi coyeneya Cristo ichi poxonae paeba. Bapon tsipaeba jiwitha pebaru cui itura jinae coyenetha xuano peantobe coyenyatha. Paxam pinae pana neyabara paebame pinae pajam: “Poxonae Pablo pozona pata xantha saya jopa jume daunweyo poxonae pana netsipaeba. Ichitha poxonae taju wepainta tineibarena jume daunweya painta tineibarena”, pinae pana neyabara jam. <sup>2</sup>Poxonae paca siwa ponaeinchi jopa paexanaeinde pocotsiwa xua daxota bewa paca tsipaebinchi pocotsi jumeintha xua daxota jume daunweya tapaca catsipaebiwa tsainchi. Ichamonae paxam jiwana pana neyabara paeba xua pinae abe paexanan poxonae paexanan pocotsiwa Nacom pana itoroba icha pocotsi jiwimonae ichi pomonae jopa pejume cowũntsiwi. Bewa jume daunweya tsipaebin barapomonaetha xua baxua yabara xua taneyabara paebiwa. <sup>3</sup>Bara xaniwaicha xua paxan apara saya jiwi pan. Bequein paxan pajinompan barapo cae pin nacuathe, ichitha poxonae pacuiduban Nacom Pejume Diwesi jopa paexanaeinyo icha barapo cae pin nacuathepiwi ichi poxonaeba yabara naba peexanaenexa pocotsiwa ichichipa. <sup>4</sup>Jopa paxeinaeinyo xua pesojeiwan xua pata nabinexa xua pocotsiwa barapo cae pin nacuathepiwi xeina. Daichitha paxeinan Nacom pia peayapusũ itorobi coyenewa tatsi xua baraxota pata nayaewatsinexa.

Barapon Nacom pia peayapusu itorobi coyenewa tatsi pana necana exana xua paamanayaban po peayapusuwa barapo cae pin nacuathepiwi xeina xua saya caurimonae pia pentacaponaein tatsi pia peayapusuwa tatsi. <sup>5</sup>Ichamonae najume matsontsonoba poxonaе pacueicueijan Nacom Pejume Diwesi jopa peichichipaexae xua Nacom peyaputaewa tsainchi. Barapomonae pajume amanayaban poxonaе najume matsontsonoba. Barichi pomonaе atsaquiya penayabara paebiwi pia coutha poxoru jopa ichipaeyo xua Nacom peyaputaewa tsainchi, barapomonae pacui amanayabundu. Paxan pacopatan xua bara Cristo pata tanecanamataxeinaewa daxita pata tananta xeinaewatha, xua daxota pata exanaewa pocotsiwa Cristo pana itoroba. <sup>6</sup>Paxan panacui wunaetan xua pata muxuwetsiwa pomonaе jume feba Nacom pomonaе painyamonaе jiwana pamxaem. Baxua paexanaein barapomonaetha poxonaе paxam matha tsiwanaya xaniwaicha pajume jejам tsurubenaеbiyam tsane xua paexana dubenanaеbiyame pocotsiwa Cristo ichichipa.

<sup>7</sup>Paxam paca tsitatsi xua paxan be pomonaе jopa peainya cui jiji pan poxonaе saya pana taneme. Jopa pana nejuntu cui coyene yaputaem po coyene xua paxeinan pata juntu coyeneintha. Icha ichun xaniwaicha pia coutha nayabara nanta xeina xua bapon Cristo piamonaе jiwana tatsi, bapon bewa barichi xua bewa pana yabara juntanainae xua paxan bara Cristo piamonaе jiwana tatsi pan icha bapon ichi. <sup>8</sup>Jopa auranyo xua pata coutha pata nayabara paebiwa baxua bequein pata coutha atsaquiya pana nayabara paeban xua janje baxue: “Apara Nacom pana cata pia peayapusu itorobi coyenewa xua pata paca

cayawenaenexa tsainchi xua painya nejuntu coyene xanepanaponaenexa. Apara jopa pana catsiyo barapo peayapusu itorobi coyenewa xua pata paca abe exanaewatsi tsainchi”, xua jan. <sup>9</sup>Jopa ichipaeinyo xua pata taneяabara nanta xeinaewam xua pana pata tanejume cunuwiwam xua pacata tinatsi cartan. <sup>10</sup>Ichamonae neyabara paeba, jeye: “Pablo pia cartantha xua taju wenacata tineibarena bichocono ayapube xua wayabara jume cowuntsiya exanaewa yawa bichocono jume daunwei tsaibi. Ichitha poxonaе bapon patopa waxantha pia pepon saya pecui pawi xuano poxonaе cueicueijeji jopa naca tsita ainya cuiyiyo”, jei barapomonae. <sup>11</sup>Barapomonae apara bara bewa pana neyaputaena xua paexanaein pocotsiwa xua cartantha papaeban poxonaе papatsin barapomonae pia tomaratha tatsi.

<sup>12</sup>Pata coutha jopa pana nayabara nanta xeinaeinyo xua paxan pacui jupan xua pomonaе pia coutha penayabara nanta xeinaewi xua peainya cui jiji naexana. Saya barapomonae pia coutha nayabara nanta xeina xua bara betiya exana daxita, beyacaincha ichamonae pomonaе piamonaе tatsi. Barapomonae apara jopa peyaputaе jiji, poxoru saya jeita nawita xua po coyene beyacaincha piamonaе tatsi exana. <sup>13</sup>Paxan saya tsiwiyo atsaquiya yabara papaeban po coyene xua Nacom pata tanecui copatsiwa xua bara pata tanacuichiwa Nacom. Jopa toxeinchiya atsaquiya papaebinyo xua beyacaincha xua poxonaе Nacom pana copata xua pata exanaewa tsane. Saya paexanan po penacuichiwa xua Nacom pana cata. Nacom pana copata xua papatan ichaxota paxam Corinto tomaratha xua pata paca cayawenaenexatsi Nacom Pejume Diwesi. <sup>14</sup>Jopa patoxeinchiya

exanaeinyo po coyene Nacom pana itoroba poxonae paca siwa poinchi. Paxan pomonae pan pomonae copiya papatan painya xantha xua pata paca catsipaebinexatsi Cristo pia pexeinya jume diwesi. <sup>15</sup>Ichamonae pomonae paxam jiwana pam jume cowanta Cristo pejume diwesi pecuidubixaetsi ichamonae. Barapomonae pomonae pejume cowantsiwi Cristo pejume diwesi, jopa atsaquiya bepabayara janyo: “Barapomonae jume cowanta apara poxoru barapomonae pata cuidubixae”, jopa bepajanyo. Jame xua paichichipan xua paxam bewa mataropeichiya pajume cowanta dubenanaebiyaename. Bapoxonae pana itacupa xua mataropeichiya pata nacuichiwa painya xantha. Saya meisa bewa paexanaein pocotsiwa Nacom pana itoroba. <sup>16</sup>Paichichipan pata cuidubiwa ichamonae Nacom Pejume Diwesi xua taju beya xua painya tomara weya poxonae pawetan xua pata paca cuidubiwatsi Nacom Pejume Diwesi. Ichitha jopa paichipaeinyo xua pata cuidubiwa Nacom Pejume Diwesi ichaxota iru ichamonae cuidubaru barapo Nacom Pejume Diwesi yawano xua jiwi jume cowanta barapo diwesi. Tsipei barapo pejume cowantsiwi jopa paichichipaeinyo xua pata yabara jeinexa: “Barapomonae taju weya jume cowanta barapo Nacom Pejume Diwesi pata cueicueijeixae barapo diwesi”, jopa bepabayara janyo.

<sup>17</sup>Ichu ichun ichichipa atsaquiya penayabara paebiwa xua pinae beta exana, jame bara bewa moya bara atsaquiya yabara paebi po coyene Nacom pia peyaputae coyenewan tatsi yabara xua petsita itapeinya xeinaenexa xua apara Nacom beta peexanaein. <sup>18</sup>Pocotsiwa xua pebin pia coutha nayabara wanae jainta xua beta peexanaexae baxua Nacom jopa tsita ainya cuichi. Pocot-

siwa xua Nacom yabara nanta xeina xua barapo pebin yabara nanta xeinatsi baxua jame Nacom tsita ainya cuichi.

**Meje xua Pablo yabara paeba pomonae xua muxuitorobiya pejeiwa: “Paxan Jesús pia peitorobi jiwi tatsi pan”, pomonae pejeiwa**

**11** Ichichipan xua jopa painya neaitaconaewa xua tapana nejume yabara ewatsiwam xua tapaebiwa pocotsi jume xua po diwesiyo xan yabara. <sup>2</sup>Tsipei yaitama bichocono paca asiwatsi icha Nacom pana ichi xua pana asiwa. Paxan paca doutatsi Nacomtha xua painya nejume cowantsinexa Cristo. Barapocotsi coyeneya paca cana exanatsi icha be pocotsi coyeneya pebin ichi poxonae ba pexantiyo douta xua ichun pepichinexa powa bayatha ichun jopa pichiyo. Bapowa antobe pia pebin. Paxam bewa bara paichim, bewa Cristo pantobem. <sup>3</sup>Caurimonae pia pentacaponaein tatsi pon pia coutha naexana be jomo, bapon Eva muxuitorobatsi peajuntucoyenebewatha. Pajunuwan xua bapon paca muxuitorobina barapo juntu coyenewatha. Bapon paca cana exanaena xua painya nenanta xeinaewa Cristo jopa beta peyabara nanta xeinaewatsi, xua equeicha jopa xanepanaya painya neantobewa tsane Cristo, meisa xua bapontha painya neantobenexa. <sup>4</sup>Paca yabara junuwatsi poxoru pajume naitaewatame pocotsi diwesi xua daxita jiwi paeba. Paxam itapeta pajume naitaewatame ichuntha pontha pon peyabara paebin Jesús xua ichun xua pon pepa Jesús aibi. Paxam payabara jume naitaewatame icha jumope xua po jumope jopa xapain Nacom pia Pejumope tunaxu tatsi. Matautano yabara pajume naitaewatame icha diwesi po diwesi xua jopa xapain



Nacom pia pecapanenebiyae diwesi jume xua po diwesi jume copiya pajume taneme. <sup>5</sup>Pomonae baxuan paca tsipaeba, barapomonae pia coutha nayabara nanta xeina, jeye: “Paxan Jesús pia peitorobi jiwi tatsi pan, xua pata peainya cui jiwi pan”, jei. Ichitha jopa yabara nanta xeinaeinyo xua barapomonae netoxeincha peainya cui jiwi beyacaincha xua xan. <sup>6</sup>Xan saya taepato cueicueijan Nacom Pejume Diwesi tatsi. Jopa bichocono wnae tacueicueijiwa jopa be bapocotsinyo be pocotsin xua beta pecueicueijiwa. Daichitha bara yaputan xua yabara tacueicueijiwa. Paca tsita itapeinya xeineibatsi xua bara tayaputaewa, xua poxonae daxita pocotsiwantha paca tsipaebibatsi.

<sup>7</sup>¿Metha bara abe exanan jampa poxonae jopa paca wucaetsi pocotsiwa nantawenonan xua tacueicueijeixae Nacom pia pecapanenebiyae diwesi? Jume apara, apara jopa abe exanaeinyo. Tacoutha acopeibi naexanan xua tacui pawi naexanan xua saya meisa ainya cui paca cana exanatsi poxonae paca cuidubatsi Nacom Pejume Diwesi. <sup>8</sup>Ichamonae pomonae pejume cowantsiwi pomonae penacatuteibi jiwi, xua pomonae wnae pejaiteibiwi Nacom barapomonae wecobe pitan paratixi tanecatsixae. Barapo paratixitha comocan pocotsiwa xua nantawenonan poxonae tapaca baru ecaewatsi xua amanaya tapaca cayawenonaenexatsi. <sup>9</sup>Poxonae cataunxuae paca baru ecatsi bapoxonae inta acobi pocotsiwa tacanantawenonaewa. Jopa wucaeiinyo painyamonae jiton xua pocotsiwa daunweya pacata exainchi xua saya painya tana necatsibiwaxaem. Pomonae Macedonia nacuamonaepiwi pomonae pejume cowantsiwi barapomonae inta carendena pocotsiwa xua

tacanantawenonaewa. Bayatha jopa paca wucaetsi xuano xua equeicha bexa jopa paca wucaetsi tsainchi xua daxota jopa pacata daunwei exanae tsainchi xua daxita coyenewantha. <sup>10</sup>Tajuntu coyenewatha xeinan Cristo pia pexainyei coyenewa tatsi. Dapon aibi xua neexana xua taitompa exanaewa xua yabara tacueicueijiwa baxua xua jopa paratixi paca wucaetsi. Baxua cueicueijan daxita Acaya nacuatha. <sup>11</sup>¿Eta xua metha baxua paca tsipaebatsi? ¿Metha poxoru jopa tapaca antobewatsi? Ajibi apara, Nacom yaputane xua bichocono tapaca antobewatsi.

<sup>12</sup>Ichitha awiya exanaponaein pocotsiwa xua anoxuae exanaponan xua jopa tapaca wucaponaewatsi paratixi. Baxua exanan xua tajume cui matawentsinexa, pomonae xua naerabiya atsaquiya paeba, xua jeye: “Paxan jupa paexanan icha Pablobaru ichi xua paratixi nonotapona be pentoma xua pecueicueijeixae Cristo pejume diwesi”, jei. <sup>13</sup>Barapomonae pemuxuitorobi jiwi xua pinae barapomonae Jesús pia peitorobi jiwi tatsi. Barapomonae jiwi muxujainyaba pia penacuichiwa coyenewatha. Barapomonae be natsicotane Jesús pia peitorobi jume pepaebi jiwi tatsi. <sup>14</sup>Pocotsi coyeneya xua barapomonae nacana exana jopa yabara najuntu coyene cabenaecaieinyo. Payaputan xua barapomonae apara Satanás piamonae tatsi tsipei barapomonae pia coutha nacana exana xua itara mexeya beta peexanaewi icha bapon ichi. Satanás pon caurimonae pia pentacaponaein tatsi pia coutha nacana exana xua itara mexeya pon xanepanaya peexanaein icha matatsunpin ichi xua pexeinya peitupanae coicha xeina Nacom weya. <sup>15</sup>Daxota jopa bewa najuntu coyene cabenaecaetsi xua poxonae

Satanás pia petanacuichi jiwimonaе tatsi exana icha Satanás ichi poxonae exana. Barapomonaе natsicotane be pocotsimonaе xua beta peexanaewi. Daxota poxonae Nacom yabara paebina barapomonaе xua penatsicuentsiwa xua abe peexanaexae, barapomonaе bichocono atene exanebinchi xua be pocotsi coyeneya bichocono abe peexanaexae.

**Meje xua poxonae Pablo  
pia coya nayabara paeba  
xua atene exanatsi Jesús pia  
peitorobi jiwi jiwana tatsixae**

<sup>16</sup> Equeicha paca tsipaebatsi: Jopa paneyabara nanta xeinaeinde xua xan be pon tanentajemabin bequein cueicuei-jeithan barapo coyeneya. Ichitha icha panecayabara nanta xeiname baxua bara saya beitatemaya amuxuya pana ne-  
jume taema pocotsiwa xua cueicueijan icha be pocotsin pon pematajemabinchi ichi. Bapoxonaе xan tacoutha atsaquiya conotha nayabara paebin icha ichamonaе ichi xua pia coutha atsaquiya nayabara paeba. <sup>17</sup> Apara jopa pae-  
binyo xua tana itorobixae Jesús pon jiwi Pecanamataxeinaein. Apara saya tacoutha atsaquiya nayabara paeban icha pon matajemabatsi ichi xua pia coutha natsipaeba. <sup>18</sup> Tsipei ayei jiwi at-  
saquiya yabara paeba pocotsiwa barapo cae pin nacuathe xeina. Daxota xan barichin tacoutha atsaquiya nayabara paeban. <sup>19</sup> Pananta xeiname xua daxita pam painya neyaputae jiwi pam. Ichitha jopa peyaputaewi pam. Bara saya pacui yabara copatame xua pajume naito-  
matame pomonaetha pomonaе be pematajemabi jiwi pomonaе naerabiya paeba xua poxonae jeye: “Paxan Jesús pia peitorobi jiwi pan”, jei. <sup>20</sup> Matautano bara saya pacui yabara copatame xua bara amanaya painya netanacuichinexa tsane ichamonaе. Matautano saya pacui

yabara copatame xua bara ichamonaе amanaya paratixi painya nepaca cobe wenoteibiwa xua saya barapomonaе nexa. Matautano saya pacui yabara copatame xua bara ichamonaе paca yabara muxuitoroba painyawan xua painya nepacata notsiwa. Barichi bara saya pacui yabara copatame xua bara ichamonaе painya nepaca aebiwa xua barapomonaе ainya cui jiwi beyacaincha paxam. Matautano saya pacui yabara copatame xua bara painya nepaca itabara cuainchiwa. <sup>21</sup> Bequein auran xua paca tsipaebatsi baxua, ichitha jopa padaunwan tsoberaеinyo icha paichim poxonae ichamonaе pacata abe exana!

Icha daxita jiwi ichi xua atsaquiya nayabara paeba, xan barichin iru atsaquiya nayabara papaeban tacoutha icha pon pematajemabinchi ichi xua poxonae nayabara paeba. <sup>22</sup> Barapomonaе atsaquiya nayabara paeba xua barapomonaе pinae judiomonaepiwi. Xan iruru apara barichin judiomonaepin. Matautano pinae barapomonaе Israel pon bayatha tupa pia pemomoxi susato jiwi tatsi. Xan apara iruru barichin barapon Israel pia pemomoxi susato jiwi jiwana tatsin. Matautano barapomonaе atsaquiya nayabara paeba xua pinae Abraham pia pemomoxi susato jiwi tatsi. Xan apara iruru barichin Abraham pia pemomoxi susato jiwi jiwana tatsin. <sup>23</sup> Matautano barapomonaе atsaquiya nayabara paeba xua pinae Cristo pia petanacuichi jiwichi tatsi. Nama apara xan iruru barichin Cristo pia petanacuichin tatsin beyacaincha barapomonaе. Poxonaе baxua paeban apara icha pocotsin ichi pon pematajemabinchi xua pia coutha nayabara paeba. Xan bichocono daunweya ayapusuya nacuitan Cristo nexa beyacaincha barapomonaе. Jiwi matowa nejebeiba jiwi pecubi bontha beyacaincha barapomonaе. Ichamonaе

bichocono nebeiba beyacaincha barapomonaē. Matowa muxu tatapeibi xua ichamonae inta exana. <sup>24</sup>Daxota cinco po coyenewathabe judiomonaē newaetaba pia tanecuainchinexa. Daxita coyenewatha necuainta barapomonaē treinta y nueve po cuiyobetha copabeiba xua nejuma cuainta xua xota cuainta xua duwein peru muto. <sup>25</sup>Ichacuitha tsaibi acoibi po cuiyobetha necuainteiba iwatontha. Cae coyenewatha ibotontha necuinbabeiba. Acoibi po coyenewathabe jeratha ponaetha pin naetha payothopan poxonaē pawarapan xua jera bunareca. Cae merawitha yawa cae mataqueithano xoyopan pin mar mentha. <sup>26</sup>Matowa warapeiban tacaponaenexa Cristo pejume diwesi xua jiwi tatsipaebinxexa. Ichacuitha inta daunwei xua icha muxunene beya mene iya tapatebiwa tsane poxoru metha awubo tsipae. Ichacuitha inta daunwei poxonaē poneiban namtontha xua metha pomonaē pecaibi jiwi tawanaetha jinompeiba xua tanecaibiwa tsane pocotsiwa xeinan. Ichacuithano inta daunwei poxonaē tanacuamonaepiwi metha inta abe exaneibichipa. Ichacuitha inta daunwei poxonaē pomonaē jopa pejume cowuntsiwi metha abe tana neexanaewa tsipae. Ichacuitha inta daunwei poxonaē jiwi tomarantha metha abe tana neexanaewa tsipae. Ichacuitha inta daunwei poxonaē ira xuepana susato tsurucuae nacuatha taponeibiwa xua metha abe tana neexanaewa tsipae. Ichacuitha inta daunwei poxonaē pin mene mar mentha metha abe tana neexanaewa tsipae poxonaē jeratha ponan po nae pin naetha. Ichacuitha inta daunwei poxonaē metha abe tana neexanaewa tsipae pomonaē naerabiya pepaebiwi xua pinae pejume cowuntsiwi. <sup>27</sup>Xeinan

penacuichiwa po penacuichiwa inta bichocono daunwei xua neatene exana. Matautano ainya merawin tsaibi xua jopa maiteibinyo. Matautano tain atenein tsaibi. Matautano bichocono tameratsi tsaibi. Matautano ainya maticabin inta pexaewa ajibi tsaibi. Matautano bichocono aquein tsaibi poxonaē inta seiqueiba paparuwa.

<sup>28</sup>Matautano iru icha coyeneinno xua seica xua tapaca tsipaebiwatsi. Matautano xeinan icha coyene po coyene xua neajuntucoyenerewe exana xua poxonaē yabara nanta xeineiban pomonaē Nacom pejume cowuntsiwichi poxonaē ne-eena xua tayawenaenexa barapomonaē. <sup>29</sup>Icha ichan pon barapo penacaetutsi bonmonae jiwapanin, icha bapon juntu cui coyene faefaena xua pejume cowuntsiwa Nacom, nantanuweya yabara nanta xeinan bapon. Icha ichan juntu coyene jujutatsi xua abe peexanaenexa auran bapon nexa, yawano caseban pontha pon pejuntu coyene jujutsixae. <sup>30</sup>Icha bewa atsaquiya nayabara paebin, bapoxonaē atsaquiya yabara paebin pocotsiwa xua jiwi tsita itapeinya xeinan xua xan faefaenan xua jopa neitacupaeyo xua tacoutha tana nayawenaewa. <sup>31</sup>Nacom neyaputane xua xaniwaicha bara yabara paeban po coyenein xua inta daunwei. Nacom Jesucristo Paxa tatsi, pon Wanacanamateaxeinaein. Barapon jiwi bewa wunaē jainteibina ataya. <sup>32</sup>Caena bayatha Damasco tomaratha poponan. Bapoxonaē pon canamateaxeina barapo tomaratha, bapon itoroba soldadomonaē xua tomara peyacaincha toxorotsi dutsiwa coibototha peumenaenexa. Barapo soldadomonaē tomara coibotontha umena xua pia tanewaetabichi poxonaē tomara wewarapiyan xua tanecaponaenexa jiwi pecubi botha.

Barapon pon canamataxeina barapo tomaratha bapon tanacuitatsi pon yatsicaewa nacua peewatsin bapon tanacuitatsi, pon pewun Aretas. <sup>33</sup>Bequein barapo soldadomonae bepa newaetabei, ichitha jopa ponaeinyo tomara coiboto iya. Ichamonae neyacote yoreca ventana wereca xua pepa tomara juma deca. Bara panepataban.

**Meje xua Pablo yabara paeba xua  
petsita itubiwatsi xua abe  
poxonae camaita pocotsiwan  
Nacom tsita ituteiba bapontha**

**12** Bewa tacoutha atsaquiya paca tsita nayabara paebichi, xua painya neyaputaenexa xua bara beta taexanaewa. Daichitha jopa xapain neyawenaeyo baxua. Jame apara awiya paca tsipaebatsi xua pocotsiwan Nacom netsita ituta xua be poxonae camaitan. Matautano paca tsipaebatsi pocotsiwan xua Nacom neyaputane exana xua bapon pia peyabaraxae. <sup>2-3</sup>Caena bayatha ainya wei xua poxonae copiya tajume cowuntsiwa Cristo. Caena bayatha catorce po weibe yapucaewa xua poxonae necapona jemeicha peitaboco beicha po itaboco bichocono tajū beicha ichaxota Nacom popona. Jopa taeyo icha metha pepon daxita necaicha ichacuitha saya metha moya nejumope caicha. Xan jopa baxua yaputaeyo saya meisa compa Nacom yaputane. <sup>4</sup>Xan yaputan xua necaicha paraiso matawun nacua beicha. Poxonae patopan barapo nacuatheicha jume tan baxoteicha po jume xua nameicha moya yawun xeina xua jiwi jopa yabara yaputaeyo. Nacom jopa yabara necopatsiyo xua bara barapo jume tatsipaebiwa tsane ichamonaetha. <sup>5</sup>Bequein neitacupa xua atsaquiya tayabara paebiwa xua pocotsiwan wunae xua xuan tataexae,

daichitha jopa barapo coyeneya exanaeyo. Saya meisa atsaquiya yabara paeban pocotsiwan xua inta ayapube xua po coyene tatsita itapeinya xeinaewa xua apara nefaefaena exana xua daichitha Nacom neyawena. <sup>6</sup>Bara neyabara cui copata xua bara atsaquiya tanayabara paebian tsane pocotsiwan xua beta taexanaewan. Poxonae baxua exanan jopa paebinyo icha be pocotsin pematajemabinchi ichi, xua nayabara paeba tsipei paeban pocotsiwan xua pexainyewian. Ichitha xan jopa baxua atsaquiya nayabara cui paebinyo, tsipei jopa ichipaeinyo xua ichamonae taneyabara nanta xeinaewa xua xan bichocono taainya cuin, beyacaincha xua pocotsiwa barapomonae necui tane xua exanan, xuano xua beyacaincha nejume tane xua cueicueijan. <sup>7</sup>Pocotsiwa xua Nacom neyaputane exana bichocono wunae nawita. Nacom copata xua bara saya atenein tsaibi tsane xua atsaquiya tapaebiyainwa pocotsiwan xua Nacom yabara neyaputane exana. Barapo peatene coyenewa caurimonae pia pentacaponaein tatsi, pon Satanás, itoroba xantha xua atene tana necana exanaenexa. Barapo peatenewa bichocono atenein tsaibi be poxonae xua xane eto nexatempa. <sup>8</sup>Acoibi po jumeyothabe tsaibi Nacom jume fayacotsiya wūqueiban xua taneperaxa capanepaenexa barapo peatene coyenewa weya. <sup>9</sup>Ichitha Nacom netsipaeba, jeye: “Jume, jopa caaxaibi exanaetsi. Jame cata itorobatsi Tajumope tūnaxū jinya necayawenaenexa daxita tacaantobetsixaetsi. Saya meisa baxua nantawenoname. Po jiton ba axaibiya popona bara itacupatsi xua daxita pia coutha peexanaewa. Jopa ba canantawenonaeyo taayapusū coyenewa. Ichitha nama pon ba taayapubetsi

xua pia coutha beta peexanaewa bapon jame canantawenona taayapusu coyenewa. Bara bapon yawenan”, jei Nacom. Daxota ichichipan poxonaе inta ayapube tsaibi xua jopa tana neitacupaewa xua daxita beta taexanaewa tacoutha. Bapoxonaе jiwi tanetaenexa xua bara Cristo neyawena pia peayapusu coyenewatha.<sup>10</sup> Daxota juntu coyene weiweinan poxonaе inta ayapube tsaibi xua beta taexanaewa. Matautano juntu coyene weiweinan poxonaе jiwi abe neyabara paebeiba. Matautano juntu coyene weiweinan bequein jopa xeinaeinyo pocotsiwa xua tanantawenonaewa. Barichino juntu coyene weiweinan poxonaе bequein jiwi neatene exaneiba tajume cowuntsixae Cristo. Matautano juntu coyene weiweinan poxonaе bequein jiwi inta ayapube exaneiba. Daxita baxuan nejuntu coyene weiweina exana, poxonaе inta ayapube tsaibi xua beta taexanaewa xua ichamonae inta daunwei peexanaexae. Bapoxonaе bara xaniwaicha asun tsipei Cristo tana neyawenaexae.

**Meje poxonaе Pablo yabara najuntu coyene eena exana nawita Corinto tomarapiwi**

<sup>11</sup> Cueicueijan icha ichi poxonaе cueicueijej pon pematajemabinchi xua atsaquiya nayabara paeba. Ichitha paxam pana necana exaname xua atsaquiya tanayabara cueicuejeiwa. Jame apara paxam barapomonaе pam pomonaе bequein bewa xanepanaya pana neyabara paebim. Bequein xan jopa peainya cuiyinyo, ichitha barapomonaе jopa peainya cui jiwi beyacaincha xua xan pomonaе pajume naitaewatame. Barapomonaе naerabiya paeba xua pinae barapomonaе bichocono peainya cui jiwi pomonaе Cristo pia peitorobi jiwi jiwana tatsi.

Ichitha barapomonaе xainwaicha bichocono jopa peainya cui jiwi.<sup>12</sup> Poxonaе cataunxuae paca baru popoinchi paca tsita itapeinya xeinatsi xua xan yatsicaya Jesucristo pia peitorobi jiwi jiwana tatsin. Matautano jopa aitaconaеyiya exanaeinyo poxonaе bequein ichamonae inta daunwei exana poxonaе abe neyabara paeba. Jame saya junteма exana ducunaеbiyan petsita itutsi coyenewan painya xantha bequein ichamonae abe neyabara paeba. Matautano exana ducunaеbiyan pocotsiwan jiwi nabenaeca exainchi. Daxita baxuan exanan Nacom pia peayapusu itorobi coyenewatha tatsi.<sup>13</sup> Paca yabara nanta xeinatsi xua paxam metha pananta xeiname xua paxam jopa peainya cui jiwi pam. Matautano metha pananta xeiname xua meisa icha penacaetsi bonmonae jiwi pomonaе wunaе pejume cowuntsiwi Nacom bichocono peainya cui jiwi beyacaincha paxam. Metha pananta xeiname baxua poxoru jopa paca wucaetsi xua tapana neyawenaexam tsane pocotsiwatha tanantawenonaewa pocotsiwatha xua ayapube pacata exainchi.

<sup>14</sup> Anoxuae naci yabara wunaetan xua tapaca siwa ponaewatsi tsainchi equeicha xua nama acoibi po cuiyobetha tsane. Caena bayatha copiya nacueyatabe po cuiyobetha paca siwa poinchi. Ichitha jopa paca wucaetsi xua pocotsiwatha tapana neyawenaexam tsane xua pacata ayapube exainchi. Ichitha jopa paca yabara siwa ponaetsi taichichipaexae pocotsiwa xua paxeiname. Apara saya paxam cuita paca siwa poinchi. Pexui ba jopa nantawenonaeyo xua paxeiji juntana jeba paratixi, jame saya ba coxiyeiwi bewa pia pexui juntana jebi paratixi. Barapocotsi juta coyeneya ichin bewa paca yawenaеinchi. Jopa panantawenonaem xua tapana

neyawenonaewam. <sup>15</sup> Juntũ coyene weiweinan xua paca catsinchi daxita xua xeinan. Barichi copatan xua bara ichamonaе atene tana neexanaewa tapaca cayawenaenexatsi. Poxonaе bequein matowa toxeinchiya paca antobe tsoponaetsi daichitha be conotha xuya pana neantobem.

<sup>16</sup> Ichamonaе pomonaе painyamonaе jiwana pam naerabiya neyabara jei: “Bara xaniwaicha Pablo jopa painta ayapube exanaeyo xua pana newca paratixi bapon nexa. Daichitha ichacuitha tsipae metha apara bapon naca muxuitorobiya wecobe notsipa paratixi”, jei. <sup>17</sup> ¿Metha paratixi paca yabara muxuitorobiya wecobe notsinchi poxonaе pebiwi itorobin painya xantha? ¡Jume apara! ¡Jopa baxua exanaeinyo! <sup>18</sup> Tito itoroban xua painya nepaca siwa ponaewa tsane, irũno ichũno itoroban pon irũ pejume cowũntsin xua Tito pecueiyatsiwa tsainchi. ¿Metha Tito bara paca yabara muxuitorobiya wecobe notsina paratixi? ¡Jume apara! Paxam bara payaputaneme bara Tito betiya xaniwaicha pananta jũpaya paexananbe, xuano pana najũntũ coyene jũpanbe.

<sup>19</sup> Jopa payabara nanta xeinaeinde barapo jumein xua pata paca catsipaebiwaetsi xua saya poxoru pata ichichipaexae xua paxam paca tsita xanepanatsi. Jopa baxua paexanaeinyo. Jame po jume xua Cristo ichichipa xua patapaebiwa, apara barapo jume cui coyeneya papaeban. Daxita baxuan pacueicueijan Nacom peitũtha xua xanepanaya mataropeicha beta Nacom painya nejume cocowũntaponaewa tsane. Baxua paexanan tsipei paxam tamonaе pam, pomonaе pata paca caantobe jiwichi pam. <sup>20</sup> Junuwan xua poxonaе tapaca siwa ponaewa tsainchi xua metha pajinompaetsipame be pocotsimonaе aichaxaibin tataewa

poxoru metha aichaxaibin tsipae pocotsiwa xua paexaname. Matautano metha paneyabara nanta xeinaetsipame xua xan jopa paca cui jũpaetsi xua poxonaе pocotsiwa exanan. Barichi junuwanno xua poxonaе tapaca siwa ponaewa tsainchi xua metha nantiya pana najume matsontsonobame. Matautano junuwan xua nantiya pana yabara uwame pocotsiwan paxeiname, xuano xua nantiya pana nacasebame. Matautano junuwan xua nantiya pana naasiwam xua ichamonaе jopa bepayawenaem. Matautano junuwan xua nantiya pana nabiaetsipame xuano xua nantiya tsumũ jumeja pana nacui yopitsipame pocotsiwan xua paexaname. Junuwanno xua nantiya pana naaebichipame painya neyaputaexae pocotsiwan xua paexaname, xuano xua nantiya pana natsaquibabame poxoru painya neanaepanaexae. <sup>21</sup> Matautano junuwan xua poxonaе equeicha tapaca siwa ponaewatsi tsainchi, Tanacom neexana xua paca yabara auratsi. Bichocono unthũthũ wecoyan tsane pomonaе nexa pomonaе xua caena bayatha abe peexanaexae. Barapomonaе cataunxuae jopa acuiuriyo pocotsiwan xua abe eexanapona xua poxonaе barapomonaе yabũxi nata nota xua bequein jopa piseurixi xuano poxonaе yabũxi nota pebiwi poxonaе jopa piseuriyo. Matautano barapomonaе atsaquiya abe eexanapona.

**Meje poxonaе Pablo  
napeyabiya najume weta**

**13** Anoxuae equeicha paca siwa ponaeinchi xua nama acoibi po cuiyobetha tsane xua taponaeewa tsane bara beya. Icha ichũn ichichipa cui yopita xua ichũn abe peexanaexae Nacom pia peitorobi coyenewa baxua yabara naca tsipaeba, naca

jeye: “Poxonae jiwi cui yopita xua ichun abe peexanaexae bewa acoibi poyobe yabara paebina bapontha, xua abe peexanaexae bapon. Ichacuitha saya nacueyatabe poyobebe yabara paebichipa bapontha bapoxonae jiwi tsita itapeinya xeinatsi xua bara bapon abe peexanaein”, jei Nacom pia peitorobi coyenewatha tatsi. <sup>2</sup>Bayatha poxonae paca siwa poinchi yabara paca tsipaebatsi pomonae xua abe peexanaewi pomonae painyamonae jiwana pam xua iru ichamonae. Anoxuae bequein cataunxuae taju paca cuenta poponatsi, equeicha paca tsipaebatsi xua bayatha pocotsiwa paca muxuwetatsi, janje: “Poxonae equeicha paca siwa ponaeinchi ayapube taexanaein pomonaetha pomonae xua awiya abe peexanaponaewi”, jan. <sup>3</sup>Baxua paca cana exanaeinchi yaitama paichichipame xua paca tsita itapeinya xeinaeinchi xua pocotsiwa Cristo neitoroba tacueicueijeinexa bapon nexa. Paca muxuwetsinchi Cristo nexa tapaebixae bapon nexa. Cristo jopa jume faefaenaeyo poxonae yabara paca muxuwetatsi painya abe exanae cuiru coyenein. Jame apara bapon jume daunweya paca tsipaeba. <sup>4</sup>Poxonae Jesucristo tupa naetotha jiwi yabara nanta xeina xua bapon Cristo saya juntu coyene faefaena, tsipei jopa pia coutha nayawenaeyo. Ichitha anoxuae Jesucristo asu popona Nacom pia peayapusu itorobi coyenewatha tatsi. Bequein pajuntu coyene faefaenan anoxuae, daichitha poxonae paca itawetinchi bapoxonae jopa pajuntu coyene faefaenaein tsane. Jame asu pajinompaein. Bapoxonae Nacom pia peayapusu itorobi coyenewatha ayapusuya paca itawetsina.

<sup>5</sup>Incane painya coutha pana najuntu coyenein jujure icha bara xaniwaicha metha beta pajume cowuntsiya jinom-

pame. Icha bara xaniwaicha pana nayaputaneme xua bara yatsicaewa Jesucristo piamonae tatsi pam, barapoxonae pana nayaputaename xua bara apara Jesucristo paca baru jinompa. Icha jopa Jesucristo piamonae tatsi pam, bapoxonae Jesucristo jopa paca baru jinompaeyo. <sup>6</sup>Ichichipan xua paxam payaputaneme xua paxan Cristo pana baru popona. Paxan jopa pemuxuitorobi jiwi pan xua poxonae pata jeiwa: “Paxan Jesucristo pia peitorobi jiwi tatsi pan”, poxonae pata jeiwa. <sup>7</sup>Pawucan Nacomtha xua jopa abe painya neexanaewa tsane. Jopa Nacomtha baxua payabara wucaeyno xua paca tsita itapeinya xeinaeinchi xua paxan Jesucristo pia peitorobi jiwi tatsi pan xua daxota beta painya neexanaewa tsane. Ichitha pacata wucatsi Nacom xua awiya u meisa pexeyno coyene painya neexanaponaewa tsane bequein metha pana neyabara nanta xeiname xua paxan jopa pomonae Jesucristo pia peitorobi jiwi tatsi panyo. Bequein paxan jopa paca tsita itapeinya xeinaetsi xua bara Cristo pia peitorobi jiwi tatsi pan. <sup>8</sup>Paxan jopa paichichipaeinyo xua pata yabara jume toxeynchiya exanaewa pocotsiwa itoroba barapo Nacom pia pexayneyi diwesi jume. Jame apara itapeta paexanan pocotsiwa itoroba barapo pexayneyi jume diwesiya. <sup>9</sup>Daxota pajuntu coyene weiweinan poxonae ichamonae pana neyabara paeba xua pinae jopa daunweya papaebinyo. Saya paichichipan xua beta painya nejume cowuntsiwa tsane. Awiya Nacomtha pacata wucatsi xua paxam xaniwaicha painya nejuntu coyene xanapanaponaewa tsane Nacomtha xua jopa patsita natsicuentisim tsane abe painya neexanaexae bapontha. <sup>10</sup>Pewunaeya xua poxonae tapaca siwa ponaeawa tsainchi, matha barapo carte pacata tinatsi. Daxota tinan xua jopa bewa paca tsipaebi tsainchi pocot-

siwa pacata ayapube exanatsi poxonae paca siwa ponaeinchi. Bapoxonae jopa nantawenonaein tsane xua tapaca itorobiwa tsainchi xua taxeinaexae Nacom pia peitorobi coyenewa tatsi po peitorobi coyenewa Nacom necata. Nacom necata barapo peitorobi coyenewa xua painya nejüntü coyene xanepana ponaenexa Nacomtha. Apra jopa baxua necatsiyo xua abe tapaca exanaenexatsi.

<sup>11</sup>Tamonae pam, bara wetan anoxuae barapo carte. Ichichipan xua painya nejüntü coyene weiweinaya jinompaewam tsane. Itapeta pajume jejande pocotsiwa xua paca muxuwetatsi xua daxota beta mataropeicha painya neexanaponaewa tsane. Pana najüntü coyene tsacabare xua daxota peburüya caemonae pana

nabarü nanta xeinaeya jinompare. Jüntema panabarü jinompare. Bapoxonae Nacom pon jüntema pepoponaein, xuano xua peantobe tsurucuaeibiyaein, barapon paca barü poponeibina. <sup>12</sup>Betiya painta nantiya najacobare painya neantobewaxae Cristo. <sup>13</sup>Daxita pomonae xote jinompe pomonae pejume cowüntsiwi Jesucristo barapomonae paca jacobae.

<sup>14</sup>Barabü Jesucristo pon jiwü Pecana mataxeinaein paca yawenaena pia paca necaantobexae. Barabü Nacom pia peantobe coyenewatha tatsi pajinompae-name. Matautano barabü Nacom pia Pejumope tünaxü tatsi daxita pam paca barü jinompaena.

Baja Pablo.



## Meje Po Carte Pablo Tatina, Galacia Nacuapiwi Tatinatsi

### Meje yabara poxonae Pablo tamropata pitaba xua tatina pomonaetha pomona Galacia nacuapiwi

**1** Xan, Pablon, Jesucristo pia peitorobi jiwi jiwana tatsin. Apra ichun jopa neitapetsiyo yawa pebiwi jopa neitorobiyo. Apra jame Jesucristo bapon neitoroba, yawa Nacom, Waxa, neitoroba, pon Pexanto asu exana petupae coyene weya. <sup>2</sup>Xan, iruru ichamonae pomona pejume cowuntsiwi daxita barapomona pan paca jacobatsi. Barapo carte pacata tinatsi pomona Nacom piamona tatsi pam, painya nejume cowuntsixae Jesucristo pomona Galacia nacuatha painya nejinompaewa. <sup>3</sup>Barabu Nacom, pon Waxa, iru Jesucristo, pon jiwi Pecanamataxeinaein, baponbe amanaya paca yawenaena pia paca necaantobexae. Yawano barabu Nacom juntea jinompa paca exanaena. <sup>4</sup>Bapon Jesucristo naca tsitupa xua wanaca capanenebiya exanaenexa barapo abe waexanae coyene weya xua po abe exanae coyene exana pomona jinompa po cae pin nacuathe. Nacom pon Waxa ichichipa naca capanepa daxita barapo coyenein weya. <sup>5</sup>Barabu Nacom wunae jaintatsi jiwi xua ataya tsane!

### Meje yabara xua ajibi icha pecapanenebiyae coyenewa

<sup>6</sup>Najuntu coyene benaegan xua nainya papentame Nacom, pon paca waba. Tsipei apra bapon paca yawena po peantobe coyenewatha Cristo iruru xaina waxainchi nexa. Yawa najuntu coyene benaegan xua pajume

cowuntame icha jume diwesi xua be pecapanenebiyae diwesi jume xua saya jiwi paeba. <sup>7</sup>Bara xaniwaicha, xua icha pecapanenebiyae diwesi aibi. Pocotsiwa xua ichamonae paca cana exana baxua paca juntu coyene tsacaba xua painya nejume cowuntsinexa icha diwesi, xua toxeinchiya painya nejume cowuntsinexa Cristo pia pecapanenebiyae diwesi jume tatsi. <sup>8</sup>Icha ichun toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene barabu Nacom bapontha cabeta exanaena abe peexanaexae. Metha bara bequein xan tsipaein, ichitha Nacom necabetsipa. Ichacuiitha metha bara bequein matatsunpin tsipae pon itaboco wetsica pona, ichitha Nacom cabetsipa bapontha. <sup>9</sup>Baxua bayatha paca tsipaebatsi ichitha equeicha baxua paca tsipaebatsi. Paca jeichi: Icha ichun toxeinchiya ichawiya yabara paca tsipaeba xua pocotsiwa bayatha paca tsipaebatsi pecapanenebiyae diwesi coyene barabu Nacom bapontha cabeta exanaena abe peexanaexae, paca jeichi.

<sup>10</sup>Poxonae paeban baxua jopa cueicueijanyo pocotsiwa jiwi beta tana neyabara nanta xeinaewa. Apra jame cueicueijan Nacom wunae tana neyabara nanta xeinaexae. Icha saya nanta xeineibichipan xua exanan po coyeneyatha xua jiwi beta tana neyabara nanta xeineibiwa tsane bapoxonae xan jopa Cristo pia peitorobi jiwi jiwana tatsin tsipae.

### Meje yabara xua poxonae Pablo Jesucristo pia peitorobi jiwi jiwanapin tatsi cana exainchi

<sup>11</sup>Tamona pam, pomona iru painya nejume cowuntsiwixae Jesucristo. Ichichipan xua painya neyaputaewa xua po diwesi pecapanenebiyae

diwesi xua po diwesi cueicueijan, barapo diwesi apara jopa jiwi pia diwesiyo tatsi. <sup>12</sup>Matauta barapo diwesi apara xua jopa jiton netsipaebiyo. Yawa matautano dapon aibi xua pon necuiduba barapo diwesi. Apra saya Jesucristo neyaputane exana poxonaе netsita ituta pia coutha.

<sup>13</sup>Paxam pajume taneme xua pocotsiwa bayatha exanan, xua poxonaе cataunxuae eexanaponan xua po coyene judiomonaе exana pia pejume cowuntsiwa xua abe yabara, yawa pejinompae coyene yabara. Bayatha payaputaneme xua bichocono abe cana exanan pomonaetha pomonaе Nacom piamonaе tatsi daxita pomonaе pejume cowuntsiwixaetsi Cristo. Ichichipan xua daxita weraweraca taexanaewa. <sup>14</sup>Xan bichocono yabara nacuidubaponan po coyene judiomonaе pia pejume cowuntsiwa tatsi. Yawa yabara nacuidubaponan po coyene pia pejinompae coyene tatsi. Bichocono nacuidubaponan beyacaincha xua ichamonaе nacuidubapona pomonaе tanacuapiwi pomonaе tana newei jupaewi. Bichocono ichichipan xua taexanaewa po coyene tamo susato jiwi exana, beyacaincha xua ichamonaе exana. <sup>15</sup>Ichitha caena bayatha Nacom neitapeta xua tajume cowuntsiwa tsane bapon pewunaeya poxonaе beya tanaexanaewa tsane. Daxota Nacom newaba, bichocono petana neantobexae. <sup>16</sup>Bapon Nacom yabara neyaputane exana Pexanto tatsi, pon Jesucristo. Baxua Nacom inta exana Pexanto tatsi tayabara cueicueijeinexa tsane pomonaetha pomonaе jopa judiomonaе naexanaeyo. Poxonaе barapo coyeneya necana exana jopa baxua yabara paebinyo ichamonaetha. <sup>17</sup>Matautano jopa ponaeinyo Jerusalén tomara beya xua baxua tayabara paebinxexa Jesucristo pia peitorobi

jiwitha tatsi pomonaе bayatha netsiwana cana exainchi Jesucristo pia peitorobi jiwi tatsi. Seicaya nama xan nainya ponan Arabia nacua beya. Bapoxonaе pirapaeyo Damasco tomara beya ponan.

<sup>18</sup>Jopa nainya ponaeinyo Jerusalén tomara beya. Saya bara beya ponan poxonaе acoibi po weiyobe yapucaewa. Bapoxonaе Pedro tan, yawa baxota naecan quince po matacabibe. <sup>19</sup>Jopa taeinyo daxita pomonaе Jesucristo pia peitorobi jiwi tatsi. Saya meisa Santiago tan pon Jesús pia peitorobi jiwi jiwianapin tatsi, pon jiwi Pecanamataxeinaein bapon peweicho tatsi. <sup>20</sup>Bara xaniwaicha tinan. Nacom yaputane xua jopa naerabinyo pocotsiwa pacata tinatsi.

<sup>21</sup>Nexata bapoxonaе Siria nacua beya ponan, yawano Cilicia nacua beya ponan. <sup>22</sup>Nama pomonaе jinompa Judea nacua, pomonaе Cristo pejume cowuntsiwi, cataunxuae barapomonaе jopa xaniwaicha neyaitaeyo. <sup>23</sup>Saya barapomonaе jume tane xua ichamonaе neyabara jeye: “Apra bapon, pon caena bayatha abe naca cana exana wajume cowuntsixae Cristo. Anoxuae bapon yabara cueicueijejе tsurucuaеbiya Jesucristo pia pejume cowuntsi diwesi, bequein copiya ichichipa weraweraca cana exana ichamonaе pomonaе pejume cowuntsiwi Jesucristo”, neyabara jei. <sup>24</sup>Barapomonaе wunaе jainteiba Nacom poxoru anoxuae wunaе exanan Nacom nexa.

**Meje yabara poxonaе Jesús pia peitorobi jiwi tatsi Pablo caemonaе nabaṛu naexanatsi**

**2**Jerusalén tomara weya ponan xua jiwi tatsipaebinxexa Nacom Pejume Diwesi icha nacuantha. Poxonaе catorce po weibe yapucaewa bapoxonaе

Bernabé equeicha paponanbe Jerusalén tomara beya. Yawa iru Tito baru ponan. <sup>2</sup>Bara beya ponan tsipei Nacom netsita ituta xua bewa ponaein. Baraxota Jerusalén tomaratha pomonae pecanamataxeinaewi Nacom piamonae tatsi daxita pomonae pejume cowuntsixaetsi Cristo. Barapomonaetha pomonae jopa judiomonae naexanaeyo. Baraxua exanan tsipei jopa ichipaeinyo xua barapo diwesi pejumexaei tsane po diwesi bayatha tsipaeba ducuaeteiban yawa xua anoxuae tsipaeban pomonaetha jopa judiomonae naexanaeyo. <sup>3</sup>Tito baxota nabaru ecan. Bequein bara bapon griego nacuamonaepin ichitha jopa itorobichi xua pewi thabiwatsi xua ichaxota pebiwi nareixacaena. Bequein ichamonae baxua ichichipa xua baxua Tito pecana exanaewatsi, ichitha jopa baxua cana exanaetsi. <sup>4</sup>Ichamonae pomonae Cristo Jesús jopa xapain jume cowuntsichi, barapomonaetha namicha pata poxonae pana nacaetutan. Barapomonaetha ichichipa xua Tito pewi thabiwatsi xua ichaxota pebiwi nareixacaena. Barapomonaetha namicha pata poxoru ichichipa yaputane xua icha paxan jopa paexanaeinyo pocotsiwa Moisés pia peitorobi coyenewatha itoroba xua anoxuae pata jume cowuntsixae Cristo Jesús. Barapomonaetha ichichipa xua equeicha bewa paexanaein pocotsiwa Moisés pia peitorobi coyenewatha yabara itoroba xua penawi thabi coyene. <sup>5</sup>Matautano bara caetono barapomonaetha jopa pajume cowuntsiya taeinyo. Yawano jopa paexanaeinyo pocotsiwa xua barapomonaetha pana neitoroba xua jame saya poxoru apara painya neyaputaewa tsane pexainyeiwa xua po coyene

Nacom pia pecapanenebiyae diwesi jume xeina.

<sup>6</sup>Jerusalén tomaratha tsipaeban pomonae pecanamataxeinaewi Nacom piamonae tatsi daxita pomonae pejume cowuntsixaetsi Cristo. Nayabara paeban barapomonaetha pomonae Nacom piamonae tatsi pecanamataxeinaewichi po coyene Nacom Pejume Diwesi tsipaeban pomonaetha pomonae jopa judiomonae naexanaeyo. Ichitha barapo matabitha barapomonaetha pomonae Nacom piamonae tatsi pecanamataxeinaewichi jopa neitorobiyo xua tamuxuna cueicueijejiwa xua icha diwesi xua Jesucristo yabara poxonae cueicueijeji ducuaeteiban po diwesi xua yabara paeban pomonaetha pomonae jopa judiomonae naexanaeyo. Jopa inta ainya cuiyo xua barapomonaetha bichocono peainya cui jiwi xua pecanamataxeinaewi xua nama xan jopa daichinyo, tsipei Nacom daxita tsitatsi xua xan iru barapomonaetha penajupae jiwi pan. <sup>7</sup>Barapomonaetha jopa necatsiyo pena pecuidubiwa xua tacueicueijejinexa. Barapomonaetha yaputane xua Nacom neitoroba tacueicueijejinexa pia pecapanenebiyae diwesi pomonaetha pomonae jopa judiomonae naexanaeyo pomonae jopa pewi thabiwichi. Icha Nacom ichi xua Pedro itorobatsi xua pecueicueijejiwa tsane barapo pecapanenebiyae diwesi judiomonaetha, barichi Nacom neitoroba xua tacueicueijejiwa tsane barapo diwesi pomonaetha pomonae jopa judiomonae naexanaeyo. <sup>8</sup>Nacom Pedro exainchi Jesucristo pia peitorobi jiwi jiwanaepin tatsi xua pomonae judiomonae nexa. Barichi Nacom neexana xua Jesucristo pia peitorobi jiwi jiwanaepin tatsin xua pomonae jopa judiomonae naexanaeyo nexa.

<sup>9</sup>Santiago, iru Pedro iru Juan barapo acobi poyobe jiwi yabara

nanta xeina xua barapo acoibi poyobe pepa pecanamataxeinaewi xua canamataxeinatsi pomonae Nacom piamonae tatsi daxita pomonae pejume cowantsixaetsi Cristo. Barapo acoibi poyobe yaputane xua Nacom necata barapo penacuichiwa. Bapoxonae barapo acoibi poyobe necobe jayaba xua patsita itapeinya xeinan xua peburuya cuita pata nanta xeinaewa xua xan barapoyobe jiwana poyobe xua Nacom Pejume Diwesi cueicueijeji jiwitha. Barapo acoibi poyobe iru Bernabé cobe jayabatsi. Barapomonae baxua exana poxoru pata jiwimonae pana naexanan, yawano poxoru barapomonae peburuya nanta xeina, xua paxanbe Bernabé panbe paponaeinbe ichaxota pomonae jopa judiomonae naexanaeyo xua iruru poxonae barapomonae nabaru nacuichina pomonae judiomonaetha.<sup>10</sup> Barapo acoibi poyobe pana itoroba, pana nejei: “Pananta xeinare xua painya neyawenaewa tsane peacopeibi jiwi Jerusalén tomaratha”, pana jei. Baxua bichocono ichichipan xua taexanaewa tsane.

**Meje yabara poxonae  
Pablo muxutainyaba,  
Pedro muxutainyabatsi  
Antioquía tomaratha**

<sup>11</sup>Nexata poxonae Pedro Antioquía tomaratha patopa, bapon itabara taeya muxutainyaban tsipei bapon bayatha abe exana. <sup>12</sup>Pocotsiwa bapon exana baxue: Copiya bapon Pedro naxane pomonaetha pomonae jopa judiomonae naexanaeyo, pomonae xua jopa ba wi thabichi xua ichaxota pebiwi pia penareixacaenaewa bequein bapon judiomonaepin. Ichitha poxonae pata pebiwi, po pebiwi Santiago baru popona, bapoxonae Pedro tsana xane jopa equeicha naxaeyo pomonaetha pomonae jopa judiomonae naexanaeyo.

Baxua Pedro exana poxoru Santiagobaru unuwatsi xua poxoru Santiagobaru paeba xua pinae bewa daxita pebiwi wi thabichi, metha bequein tsipae pomonae pepa judiomonae, matautano metha bequein tsipae pomonae jopa judiomonae naexanaeyo. <sup>13</sup>Bapoxonae ichamonae icha judiomonae pomonae pejume cowantsiwi Jesucristo, barichi jupa exana icha Pedro ichi xua tsana xane. Bequein barapo ichamonae yaputane xua jopa bewa itorobi xua pewi thabiwatsi pomonae pejume cowantsiwi, ichitha awiya barapomonae paeba xua bewa pinae wi thabichi pomonae pejume cowantsiwi. Barichi Bernabé bara jutiya ichi iru exana xua tsana wepu xane pomonae jopa judiomonae naexanaeyo. <sup>14</sup>Ichitha poxonae tan xua barapomonae jopa xapain exanaeyo pocotsiwa xua Nacom pia pecapanenebiyae jume diwesitha paeba bapoxonae Pedro tsipaeban peitabaratha tatsi daxita pomonae Nacom piamonae tatsi pejume cowantsixaetsi Cristo pomonae nacaetuta. Janje: “Xam bequein judiomonaepim ichitha poponame icha ichi poxonae popona pon jopa judiomonae naexanaeyo. Jopa exanaem icha ichi poxonae exana pon judiomonaepin. Xam jopa bewa itorobim pomonae jopa judiomonae naexanaeyo xua bewa exanaena icha judiomonae ichi xua poxonae exana”, jan.

**Meje yabara xua judiomonae xuano  
pomonae jopa judiomonae  
naexanaeyo xua iru capanenebiya  
tsainchi xua Jesucristo  
pejume cowantsiwixaetsi**

<sup>15</sup>Waxainchi judiomonae naexanatsi. Ichitha waxainchi jopa abe waexanae jiwichi xua jopa icha ichamonae ichiyo pomonae jopa judiomonae naexanaeyo,

tsipei barapomonaē abe peexanaewi.  
<sup>16</sup>Waxainchi yaputainchi xua bequein exanatsi pocotsiwa Moisés pia peitorobi coyenewatha itoroba, ichitha jopa juntu coyene xeicaetsi Nacomtha xua jopa Nacom watsita natsicuentisiwa tsane abe waexanaexae bapontha. Jiwi ba juntu coyene xeica poxonae Jesucristo jume cowuntatsi. Waxainchi juntu coyene xeicatsi poxoru jume cowuntatsi Jesucristo xua poxoru jopa wajume cowuntsiya exanaexae pocotsiwa Moisés pia peitorobi coyenewatha itoroba. Dapon aibi pon pejuntu coyene xeicaein xua pejume cowuntsiya exanaexae pocotsiwa Moisés pia peitorobi coyenewatha itoroba.

<sup>17</sup>Waxainchi ichichipatsi xua wajuntu coyene xeicaē jiwichi wanaca yawenaexae Cristo. Ichitha icha waxainchi nacuidubaponatsi xua xeinatsi peajuntucoyenebewa xua bequein Cristo naca yawena, bapoxonae jopa naca yawenaeyo Cristo. Matautano bapoxonae bapon abe naca cana exana. ¡Jume, baxua apara Cristo jopa bapana nacata exanae! <sup>18</sup>Nacom tsitan xua tatsita natsicuentisiwa abe taexanaexae bapontha icha equeicha jiwi caewa itoroban xua bewa exanaena pocotsiwa Moisés naca itoroba pia peitorobi coyenewatha wanaca capanenebiyaenexa abe waexanae coyenewa weya. <sup>19</sup>Barapo Moisés pia peitorobi coyene jopa neyawenaeyo xua necana exana xua tajuntu coyene xanepanaewa Nacomtha. Saya necana exana xua tatupaewa tsane, poxoru awiya tanatsicuentisiwa xeinan. Ichitha anoxuae Cristo tana netsitupaexae neitacupa xua tapoponaewa Nacom nexa. Matauta anoxuae jopa neitorobiyo Moisés pia peitorobi coyenewa tatsi poxoru jopa xeinaeyo peayapusu itorobi coyenewa xua tana necapanepaewa tsane abe taexanae coyenewa weya. <sup>20</sup>Poxonae Cristo tupa naetotha inta

yawa muxuna tupa abe taexanae coyenewan. Daxota anoxuae xan be ichun, tsipei Cristo neyawa popona. Po peajuntuayapusuwatha poponan, barapo peajuntuayapusuwa Nacom necata tajume cowuntsixae Cristo. Bapon Cristo, pon Nacom Pexanto, bichocono neantobe, daxota inta tsitupa abe taexanae coyenewan. <sup>21</sup>Jopa benaitematsinyo Nacom pia peantobewa tatsi. Icha nanta xeinan xua jiwi najuntu coyene xeica exana Nacomtha peexanaexae pocotsiwa Moisés pia peitorobi coyenewa itoroba, xua daxota bapoxonae Cristo jopa nantawenonaeyo xua jiwi petsitupaewatsi bara be poxonae xuban Nacom pia peantobewa tatsi.

### Meje yabara xua Moisés pia peitorobi coyenewa tatsi

**3** ¡Eta bichi tsobenae Galacia nacupawi! ¿Jintam pon mara pexeinaein paca baru xuajei xua jopa painya nejume cowuntsiwa Nacom pia pejume xainyeiwa tatsi? Poxonae paca tsipaebatsi paca yaputane exainchi xua Jesucristo tsitupa jiwi naetotha xua jiwi tsitupatsi. <sup>2</sup>Baraxua pana nejume nore: ¿Nacom paca cata pia Pejumope tunaxu tatsi painya neexanaexae pocotsiwa Moisés pia peitorobi coyenewatha itoroba? Jume. Nacom paca cata pia Pejumope tunaxu tatsi painya nejume cowuntsixae po coyene xua yabara paca tsipaebatsi xua pejume cowuntsiwa Jesucristotha. <sup>3</sup>¡Maisa bichoconocai! ¿Eta pomonaē pam tsobenaem? Poxonae copiya pajume cowuntame Nacom pia Pejumope tunaxu tatsi paca yawena xua Nacom painya netsita xeinaewa pejuntu coyene xeicaewa. ¿Anoxuae pananta xeiname xua bichocono pejuntu coyene xeicaewa paxeiname beyacaincha xua copiyatha paxeiname, xua Moisés pia peitorobi

coyewewa painya exanaexae? Ajibi, jopa bewa baxua pananta xeinaem. <sup>4</sup>Ichamonae bichocono paca atene exana Jesucristo pexeinya jume diwesi painya nejume cowuntsixae. Jopa bewa pana nacui barapentsim xua painya nejume cowuntsiwa Jesucristo pejume diwesi, po diwesi yabara xua ichamonae atene paca exaneiba. Tsipei icha pana nacui barapentsipame xua painya nejume cowuntsiwa Jesucristo pejume diwesi jopa pexainyei jume tsipae pocotsiwa xua papaebame. <sup>5</sup>Nacom paca cata pia Pejumope tunaxu tatsi. Matautano Nacom pexeinya petsita itubi coyewewa exana painya xantha. ¿Eta pocotsiwa metha Nacom baxua exana? Baxua Nacom jopa pacata exanaeyo xua poxoru painya neexanaexae pocotsiwa Moisés pia peitorobi coyewewatha itoroba. Apara jame baxua pacata exana poxoru painya nejume cowuntsixae po diwesi xua pajume taneme.

<sup>6</sup>Abraham pon caena bayatha popona yabara jume cowanta xua Nacom exanaena pocotsiwa Abraham yabara tsiwuna muxu dutatsi. Daxota Nacom tsitatsi xua bapon Abraham bara pejuntu coyene xanepanaein xua jopa Nacom tsita xeinaetsi penatsicuentsiwa xua abe peexanaexae. <sup>7</sup>Daxota paxam bewa payaputaename xua pomonae xaniwaicha Jesucristo pejume cowuntsiwichi, Nacom tsitatsi xua barapomonae bara be yatsicaewa Abraham pia pemomoxi susato jiwitatsi bequein bara jopa yatsicaewa Abraham pia pemomoxi susato jiwiyotatsi. <sup>8</sup>Caena bayatha Nacom Pejume Diwesi paeba, xua Nacom capanenebiya tsane pomonae jopa judiomonae naexanaeyo xua jopa peatenenexa tsane xua abe peexanaexae. Baxua Nacom exana, icha ichichi pomonae judiomonae xua capanenebiya

tsainchi. Daxita pewunaeya baxua Nacom paeba pia pexeinya jume diwesitha xua Abrahamtha jeye Nacom: “Daxita nacuanpiwi juntu coyene weiweina exanaein tana nejume cowuntsixaemxae”, jei Nacom. <sup>9</sup>Daxota daxita pomonae jume cowanta, juntu coyene weiweina, xua Abraham muxuna, xua iru Abraham pejume cowuntsixae.

<sup>10</sup>Pomonae bequein jume cowuntsiya eexanapona pocotsiwa Moisés pia peitorobi coyewewatha itoroba xua pecapanenebiyaewa tsainchi, barapomonae bexa atene tsane xua Nacom exanaena abe peexanaexae. Tsipei Nacom Pejume Diwesitha jeye: “Pomonae jopa exanaeyo daxita po coyene itoroba Moisés pia peitorobi coyewewatha, daxita barapomonae atene tsane xua Nacom exanaena abe peexanaexae”, jei. <sup>11</sup>Yaputainchi beta, dapon ajibi pon pexeinaein xua po coyene pejuntu coyene xanepanaewa, xua daxota Nacom tsitatsi xua jopa penatsicuentsiwa abe peexanaexae. Tsipei bequein ichichipa xua peexanaewa xua po coyene Moisés pia peitorobi coyewewatha itoroba, daichitha jopa itacupaetsi xua exana daxita xua Moisés itoroba. Ichitha Nacom Pejume Diwesitha jeye: “Pon xua Nacom juntu coyene xanepana exana pon pejume cowuntsixaetsi, barapon bara ataya asu poponaena”, jei. <sup>12</sup>Jiton jopa nantawenonaeyo xua Jesucristo jume cowantatsi peexanaewa tsane daxita pocotsiwa Moisés pia peitorobi coyewewatha itoroba. Barapo peitorobi coyenetha jeye: “Bewa exanaename daxita pocotsiwa xua barapo peitorobi coyewewatha paeba ayapusya nepoponaewa tsane”, jei.

<sup>13</sup>Cristo naca capanepa poxonae naetha naca tsitupa wanaca yantomatsixae xua abe peexanae

coyene waexanaexae po peabe exanae coyene Moisés pia peitorobi coyenewatha yabara paeba. Cristo baxua exanatsi xua tupa be pon xua bichocono abe peexanaein xua abe waexanae cuiru coyene peyawa tupaexae. Baxua yabara Nacom Pejume Diwesitha jeye: “Pon petupaein naetotha ducua bapon Nacom tsita abetsi xua bapon abe peexanaexae”, jei. <sup>14</sup> Cristo Jesús naetotha petupaexae daxota Nacom catsina pomonaetha pomonae jopa judiomonae naexanaeyo po coyene xua bayatha Nacom Abraham tsiwunae yabara muxu dutatsi. Nacom Abraham tsiwunae yabara muxu dutatsi xua pecatsinexatsi peantuyapuswa. Matautano Nacom Abraham tsiwunae yabara muxu dutatsi xua Nacom pia Pejumope tñaxu tatsi naca yawa jinompaena poxonae jume cowuntatsi Jesucristo.

**Meje yabara xua Nacom pia  
petsiwunae yabara  
muxu dutsiwa tatsi**

<sup>15</sup> Tamonae pam, pomonae iru painya nejume cowuntsiwixae Jesucristo. Paca tsipaebatsi tsica diwesiyo juta coyeneyatha xua pocotsiwa jiwi ba exana. Poxonae ba nacueyatabe pebinbe peburaya nanta xeinabe xua nantiya penata exanaenexabe yawa daxota nawun dutabe paperatha, bara baponbe bewa exanaenabe po coyene baponbe tsiwunae yabara muxu dutabe. Ichun jopa itacupaetsi xua ichawa equeicha mataropata tina icha bayatha nawun tinabe. <sup>16</sup> Nacom exana pia petsiwunae yabara muxu dutsiwa Abrahamtha yawa iru Abraham pia pemomoxi susato jiwi jiwapanintha tatsi. Nacom Pejume Diwesitha jopa jeyo: “Pia pemomoxi susato jiwitha”, jopa jeyo. Jame meisa caeintha yabara jei: “Pia pemomoxi susato jiwi jiwapanintha”, jei. Baxua

yabara paeba xua Cristo yabara caunutatsi. <sup>17</sup> Baxua paca tsipaebatsi meje: Poxonae Nacom yabara tsiwunae muxu duta Abrahamtha, bapoxonae poxonae cuatrocientos po weibe yapucaewa bapoxonae Moisés pia peitorobi coyenewa tatsi patopa. Moisés pia peitorobi coyenewa tatsi jopa ainya cuiyiyo beyacaincha Nacom pia peyabara tsiwunae muxu dutsiwa tatsi xua daxota jiwi jopa nantawenonaeyo barapo Nacom pia peyabara tsiwunae muxu dutsiwa tatsi. <sup>18</sup> Icha jiwi itacupaetsi xua panenebiya abe pia peexanae cuiru coyene weya xua peexanaexae pocotsiwa Moisés pia peitorobi coyenewatha itoroba, bapoxonae ainya cui aibi po peyabara tsiwunae muxu dutsiwa Nacom yabara tsiwunae muxu duta Abrahamtha. Ichitha poxoru jiwi jopa itacupaetsi xua pepanenebiwa abe pia peexanae cuiru coyene weya poxonae bequein exanaetha pocotsiwa Moisés pia peitorobi coyenewatha itoroba, daxota bichocono ainya cui po peyabara tsiwunae muxu dutsiwa, Nacom amanayiya yabara tsiwunae muxu duta Abrahamtha.

<sup>19</sup> ¿Eta xua metha canamatawenonatsi Moisés pia peitorobi coyenewa? Nacom naca cata baxua abe waexanaexae beya poxonae Cristo patopa, pon Abraham pia pemomoxi susato jiwi jiwapanin tatsi pon yabara tsiwunae muxu duta Nacom. Nacom cata pia peitorobi coyenewa matatsunpiwitha xua barapomonae xuya Moisés catatsi jiwi nexa. <sup>20</sup> Ichitha poxonae Nacom yabara tsiwunae muxu duta Abrahamtha, bapoxonae dapon aibi pon capona barapo peyabara tsiwunae muxu dutsiwa Abrahamtha Nacom weya. Jame saya meisa Nacom compa yabara tsiwunae muxu duta Abrahamtha.

**Meje yabara xua daxota  
Nacom itoroba Moisés pia  
peitorobi coyenewa tatsi**

<sup>21</sup> Paca yainyabatsi: ¿Moisés pia peitorobi coyenewa abe cana exana Nacom pia peyabara tsiwūnae muxu dutsiwa tatsi? Jume, apara tsipei Nacom jopa capanenebiyae tsane jiwi peexanaexae Moisés pia peitorobi coyenewa tatsi. Icha jiwi itacūpaetsipatsi xua capanenebiyatsi abe pia peexanae coyenein weya peexanaexae po coyene Moisés pia peitorobi coyenewatha itoroba, bapoxonae jiwi jūntū coyene xanepanaetsipa Nacomtha peexanaexae po coyene Moisés pia peitorobi coyenewatha itoroba. <sup>22</sup> Nacom Pejume Diwesitha jeye: “Daxita jiwi bewa atene tsane abe peexanae coyenein peexanaponaexae xua jopa itacūpaetsi xua penacui barapentsiwa. Daxota daxita pomonae Jesucristo pejume cowūntsiwichi Nacom cana exanaena jiwi po coyene xua bayatha yabara tsiwūnae muxu duta xua bepa pinae jiwi capanenebiya tsainchi Jesucristo pejume cowūntsixaetsi”, jei.

<sup>23</sup> Pewūnaeya xua poxonae Cristo pepatopeicaewa tsane po peitorobi coyenewa Nacom Moisés catatsi naca yaputane exana xua poxonae Cristo patopeicaena bapoxonae waxainchi bara bewa jume cowūntichi Cristo. Barapo peitorobi coyenewa yabara naca yaputane exanano xua po coyenewa waxainchi wacoutha nata exainchi. Jopa naca exanaeyo xua Nacom wanaca capanenebiwa. Daxota po diwesi Nacom Moisés catatsi barapo diwesi naca jūntū coyene yawenapona beya poxonae Cristo patopaetsica. <sup>24</sup> Moisés pia peitorobi coyenewa naca yawena xua wayaputaewa Cristo. Barapo Moisés pia peitorobi coyenewa tatsi naca yawena

xua najūntū coyene xanepana exainchi Nacomtha wajume cowūntsixae Cristo. <sup>25</sup> Anoxuae jume cowūntatsi Cristo, daxota jopa nantawenonaetsi Moisés pia peitorobi coyenewa tatsi. <sup>26</sup> Paxam painya nejume cowūntsixae Cristo Jesús, daxota daxita paxam Nacom pia pexui tatsi pam. <sup>27</sup> Daxita paxam poxonae bayatha ichamonae paca bautisaba caemonae pana naexaname Cristo Jesustha, Cristo pijimonae tatsi pamxaem. Daxota paxam pacoyene jupame Cristo. <sup>28</sup> Nacom daxita jiwi tsita najūpatsi. Daxota Nacom jopa tsita ainya cuichi metha bequein judiomonae pam tsipaem, irū metha bara bequein griegomonae pam tsipaem pomonae jopa judiomonae naexanaeyo. Matautano jopa tsita ainya cuichi metha bequein pomonae amanaya painya nepaca busi cui tatayebeibiwi pam tsipaem, irū bara bequein pomonae jopa amanaya painya netanacuichi jiwi pam tsipaem. Matautano jopa tsita ainya cuichi metha bequein bara pebiwi pam tsipaem, irū metha bequein yabūxi pam tsipaem. Nacom tsitatsi xua paxam be caemonae jiwi pam xua caemonae pana nabarū exaname Cristo Jesustha. <sup>29</sup> Icha paxam Cristo pijimonae pam, bara nexata paxam Abraham pia pemomoxi susato jiwi pam. Po coyene Nacom Abraham yabara tsiwūnae muxu dutatsi bara baxua paxam nexa.

**4** Xua ichichipan xua tapaebiwa baxua meje: Icha pexuyo paxa cuenta tūpatsi poxonae cataunxuae pexuyo tsecae barapoyo jopa bepijawa catichi ichamonae pocotsiwa xua coxiyūn pecopaniwa tatsi tsipei cataunxuae pexuyo tsecae. Barapo pexuyo bewa exaneibina pocotsiwa peitorobeibixaetsi pomonae wichtiya pebarū jinompaewichi icha ichi xua poxonae exana pomonae amanaya petanacuichiwi ichamonae nexa.



<sup>2</sup>Barapo pexuyo nantaŭta pomonae peyawenaewichi, pomonae bapon wichitiya pebaru jinompaewichi. Matautano pexuyo itorobatsi pocotsiwa barapo pexuyo bewa exanaena. Barapomonae ewata xua barapo pexuyo catsibina poxonae pinyo tsane be po coyeneya bayatha coxiyŋn paeba. <sup>3</sup>Waxainchi bara pocotsi juta coyeneya ichichi beya poxonae Cristo patopeica. Waxainchi be pexui natsicotainchi tsipei pemayainwa exanatsi pocotsiwa Moisés pia peitorobi coyenewatha naca itoroba. <sup>4</sup>Poxonae barapo matacabi patopa, po mataqueitha xua Nacom ichichipa xua Pexanto itorobica, bapoxonae barapo mataqueitha Nacom Pexanto itorobica xua yabuyo petsiperu wenaexanaenexatsi barapo cae pin nacuathe. Bapon yacuiya naexana judiomonaepin. Matautano bewa exanae pocotsiwa judiomonae ba itoroba xua pocotsiwa pepaebixae Moisés pia peitorobi coyenewa tatsi. <sup>5</sup>Bapon patopa xua jopa wanantawenonaenexa xua waexanaewa tsane pocotsiwa Moisés pia peitorobi coyenewatha naca itoroba, xua bapoxonae Nacom wanaca cana exanaewa tsane xua Nacom pia pexuichi. <sup>6</sup>Nacom pia pexui tatsi painya nenaexanaexae, daxota pacata itorobica pia Pejumoŋe tunaxu tatsi pia painya nepaca cayawenaewa tsane poxonae paca juntu coyene tsipaeba. Barapo Nacom pia Pejumoŋe tunaxu tatsi naca cana exana xua wajeiwa: “Axa”, xua wajeiwa Nacomtha. <sup>7</sup>Anoxuae paxam jopa barapocotsimonae pam pocotsimonae xua amanaya tanacuita caurimonae pia pentacaponaein tatsi nexa icha be pocotsimonae ichi xua pocotsimonae pebusi cui tatayebebiwichi. Nacom paca exana pia pexui tatsi. Tsipei paxam Nacom pia pexui tatsi pam, daxota Nacom paca

catsibina daxita po coyenein Nacom xeina pia pexui tatsi nexa.

**Meje yabara poxonae Pablo yabara nanta xeineiba pomonae pejume cowantsiwi Jesucristo**

<sup>8</sup>Pewunaeya xua poxonae payaputaename Nacom, copiya paxam be barapocotsimonae pam be pocotsimonae bewa exanae xua pia nacomŋn itorobeibatsi, po nacomŋn xua saya jiwi pia coya cana exana xua jopa pepa nacomunyo. <sup>9</sup>Ichitha anoxuae Nacom payaputaneme, yawa paca tsipaebatsi xua Nacom paca yaputane. Jopa bewa equeicha caewa pana naexanaem xua paexaname pocotsiwa Moisés pia peitorobi coyenewatha paca itoroba xua pocotsiwa caena bayatha copiya paexaname poxonae cataunxuae jopa pajume cowantsim Nacom. Barapo Moisés pia peitorobi coyenewa jopa paca yawenaeyo xua painya nepatsiwa Nacom beya. Bewa paexanaename po coyene barapo peitorobi coyene itoroba. Poxonae saya u painya neexaneibi barapo coyene barapoxonae be barapocotsimonae pam be pocotsimonae xua bewa amanaya exaneibina pocotsiwa itorobeibatsi pia pecanamataxeinaeinchi tatsi. <sup>10</sup>Paxam awiwa cataunxuae paxename pocotsi coyenewan xua judiomonae itorobatsi Moisés pia peitorobi coyenewatha. Barapo coyenewa itoroba xua matacabin yabara yawa xua xometon yabara yawa xua wei yabara, po coyene jiwi bewa exanaena penajainbotsi yabara, yawa xua pin penabanaewa peexanaewa matacabin yabara. Barapocotsi coyenein paexaname painya nenanta xeinaexae xua painya nenajuntu coyene xanepana exanaenexa Nacomtha. <sup>11</sup>Tsipei cataunxuae baxua paexaname, daxota juntu coyene wecoyan, poxoru pocotsiwa xua paca

cuidubatsi jopa paca yawenaeyo, tsipei paexanaponame pocotsiwa xua caena bayatha paexanaponame xua abe paexanaponame.

<sup>12</sup>Tamonae pam, pomonae iru painya nejume cowuntsiwixae Cristo. Paca itorobatsi xua painya coutha pana naexande xua jopa paexanaeinde pocotsiwa Moisés pia peitorobi coyenewatha paca itoroba, icha xan ichin xua tacoutha naexanan xua jopa exanaeinyo pocotsiwa Moisés pia peitorobi coyenewatha itoroba. Bara bequein xan judiomonaepin, ichitha Nacom necapanepa xua jopa tanantawenonaewa tsane xua jopa taexanaewa tsane pocotsiwa Moisés pia peitorobi coyenewatha itoroba, icha paxam paichim xua jopa panantawenonaem xua jopa paexanaem pocotsiwa Moisés pia peitorobi coyenewatha itoroba. Paxam pomonae jopa judiomonae panaexanaem. Bayatha paxam jopa painta abe exanaem, daxota nanta xeinan xua bara pana nejume taneme pocotsiwa paca itorobatsi. <sup>13</sup>Payaputaneme poxonae copiya paca tsipaebatsi Nacom pia pecapanenebiyae diwesi, tsipei atenein daxota jopa warapaeyo. <sup>14</sup>Bequein pacata ayapube xua poxonae pana netaneme xua atenein, ichitha jopa pana necui capanaeya itawetsim. Seicaya paexaname, bara beta pana nententa weyataeya wabame icha be poxonae matatsunpintha paichipaem poxonae patopa po matatsunpin Nacom pia matatsunpin tatsi, pon peainya cuin, yawano xua icha be poxonae pacana ichipaem Jesucristo poxonae patopaetsipa. <sup>15</sup>Copiya bayatha bichocono pajuntu coyene weiweiname, anoxuae jopa paraichim. Bequein baxua paexaname daichitha awiya wunaee paca yabara paebatsi ichamonaetha xua paxam bichocono pana neantobem.

Matautano bichocono jopa juniya pana neantobem pata tana neyawenaexaem tsane xua beya poxonaeno pana naitacuere jucame xua pata tana neantobexaem. <sup>16</sup>Anoxuae pana neexaname be pata tana neaitafaetabi jiwim, tsipei yabara paca tsipaebatsi pexainyei jume diwesi.

<sup>17</sup>Po judiomonae jiwi pecuidubiwi barapomonae naemata wunaeya paca tsipaeba, ichitha peajuntucoyenebe jiwi. Daxota barapomonae baxua pacata exana pia painya tana nepenticham pia bapoxonae xuya painya ichichipaetsi barapomonae. <sup>18</sup>Baraxua bara bequein wunaee xua ichamonae paca ichichipa, daichitha saya jame poxonae juntu coyene wunaee. Barapomonae bewa daxita matakabi paca yaweneibina jopa meisa metha poxoru ecaeinchipae. Matautano bara bewa paca yawenaena poxonae jopa ecaeinyo. <sup>19</sup>Tamonae pam, paxam be pomonae tapexui pam. Paxam nexa bichocono ajuntucoyenerewein xua anthuthutanein, icha be poxonae yabuyo ichi poxonae bichocono atene poxonae beya pexuyo pabeta. Baraxua cataunxuae exanaponaein beya poxonae pajuntu coyene wunaem tsane icha Cristo ichi xua juntu coyene wunaee. <sup>20</sup>Maisa ichichipan bichocono xua tapaca baru ecaewatsi anoxuae xua tapaca tsipaebinxatsi icha jumetha, xua jume wunaeya tapaca tsipaebinxatsi! Tajũ taecaexae xan jopa yaputaeyo xua eta bichin xua tapaca yabara nanta xainaewatsi xua tapaca yawenaenexatsi.

### **Meje yabara xua yabuyobe Agar iru Sara**

<sup>21</sup>Paxam pomonae pam pomonae painya neichichipaewa xua painya neexanaewa pocotsiwa Moisés pia peitorobi coyenewatha itoroba.

Pana nejume nore. ¿Paxam jopa pajume taem xua barapo peitorobi coyenewatha paeba? <sup>22</sup>Barapo peitorobi coyenewatha paeba jeye: Abraham xeina ainya pexantobe. Abraham icha pexanto exana powatha xua powa Abraham pia botha tanacuitatsi amanaya, powa pebusi cui taetaexae. Icha pexanto exana powatha powa yatsicaya Abraham piowa tatsi powa xua jopa amanaya petanacuichiwatsi. <sup>23</sup>Powa Abraham tanacuitatsi amanaya, bapowa pexanto tanaexanatsi bara jupa icha be ichi xua poxonae ichamonae tanaexanatsi pexui. Powa Abraham pepa piowa tatsi, powa xua jopa pebusi cui taetaewatsi, Nacom cana exana xua bapowa pexanto tanaexanatsi tsipei bayatha Nacom Abraham yabara tsiwūnae muxu dutatsi. <sup>24</sup>Baraxua be pacata exanatsi xua peyabara caunutsiwa. Barapo ainya petsiriwabe baraxua yabara caunuta xua Nacom pia ainya petsiwūnae muxu dutsiwabe tatsi. Agar pexanto tatsi bapon pia pemomoxi susato jiwi tatsi bewa exanae xua Moisés itoroba pia peitorobi coyenewatha tatsi. Barapo peitorobi coyenewa Nacom Moisés catatsi ichaxota demxuwa, po demxuwa pewun Sinaí. Barapon, Agar pexanto tatsi yacuiya naexana xua pon pebusi cui taetaeinchi. Barichi barapon pia pemomoxi susato jiwi tatsi barapo coyeneya yacuiya naexanumenapona. Daxota barapomonae bewa exanaponae po peitorobi coyene Moisés itoroba. <sup>25</sup>Barapowa Agar caunuta po demxuwa pewun Sinaí xua Arabia nacuatha, po demxuwa Arabia nacuamonae pijumetha: “Agar”, jei. Barapowa Agar xaniwaicha yabara caunutatsi anoxuae po tomara Jerusalén tomara, poxoru barapo tomarapiwi nanta xeina xua bewa exanaena Moisés pia peitorobi coyenewa tatsi icha Agar ichi xua bewa

exanae pocotsiwa Abraham itoroba xua powa pebusi cui taetaewatsi pecana exanaexaetsi. <sup>26</sup>Icha Jerusalén tomara, po tomara seicaya Nacom pia nacuatheicha eca xua Nacom pia tomara, barapo tomara yabara caunuta pocotsiwa xua bichocono xanepana. Barapo Jerusalén tomarapiwi jopa bewa exanae tsane Moisés pia peitorobi coyenewa tatsi. Waxainchi apara barapo tomarapiwichi. <sup>27</sup>Nacom Pejume Diwesitha Sara tsipaebatsi, jeichichi:

“Petsiriwa powa mawecowam, xam powa

jopa xeinaem pexui, juntu coyene weiweinare.

Juntu coyene weiweinaya najume tsebare,

tsipei xam jopa xeinaem pocotsiwa peatenewa.

Po petsiriwa jopa pexui xeinaeyo, barapo petsiriwa

bichocono ayei jiwi xeinaena pexui beyacaincha

po petsiriwa piseuri baru popona”, jei Nacom Pejume Diwesitha.

<sup>28</sup>Tamonae pam, paxam pomonae iru painya nejume cowantsiwixae Jesucristo. Waxainchi Nacom naca cana exana icha Isaac ichichi pon Abraham pexanto tatsi, pon bayatha Nacom Abraham yabara tsiwūnae muxu dutatsi. Waxainchi barapo pexuichi, po pexui Nacom yabara tsiwūnae muxu duta wajume cowantsixae. <sup>29</sup>Po pexanto Agar tanaexanatsi xua pon naexana bara jupa icha be ichi xua poxonae ichamonae pexui tanaexanatsi be pon pewun Ismael. Bapon Isaac taayapube exainchi, pon naexana poxoru Nacom pia Pejumope tūnaxu tatsi peitorobixae. Bara jutiya ichi anoxuae pomonae xua Nacom pia Pejumope tūnaxu tatsi pexeinaewi taayapube exainchi xua ichamonae

exana, pomonae peexanaponaewi po coyene Moisés pia peitorobi coyenewatha itoroba.<sup>30</sup> Ichitha pajume taema xua Nacom Pejume Diwesitha paeba, jeye: “Powa amanaya jinya necatanacuichiwa powa nebusi cui taetaexae jinya botha itawere yawa muxuna itawere pia pexanto tatsi. Tsipei barapo pexanto tatsi jopa itacupaetsi xua pexeinaewa pocotsiwa coxiyɨn pecopaniwa tatsi xua saya cuiwa pepa pexanto tatsi nexa powa jopa pebusi cui taetaewatsi amanaya”, jei Nacom Pejume Diwesitha.<sup>31</sup> Tamonae pam, paxam pomonae iru painya nejume cowuntsiwixae Jesucristo. Jopa dapomonaetsi icha be ichi po pexui powa pebusi cui taetaewatsi amanaya pia pexui tatsi pomonae bewa exanaena pocotsiwa Moisés itoroba. Waxainchi jame barapomonaetsi icha be ichi po pexui powa jopa pebusi cui taetaewatsi amanaya pia pexuichi. Daxota waxainchi jopa nanta wenonaetsi xua waexanaewa po coyene Moisés itoroba.

**Meje xua Pablo yabara paeba xua jopa bewa equeicha exanae Moisés pia peitorobi coyenewa**

**5** Cristo naca yawena xua equeicha jopa wanantawenonaewa tsane xua waexanaewa pocotsi coyenewan Moisés pia peitorobi coyenewatha itoroba xua Nacom jopa watsita xeinaewa tsane xua watsita natsicuentisiwa xua abe waexanaexae. Beta ajuntuyapusuya pajume cowuntaponde Nacom, xua bapoxonae jopa painya necopatsiwa tsane xua ichamonae paca itorobina xua painya neexanaewa pocotsiwa Moisés itoroba.

<sup>2</sup>Xan, Pablon, pana nejume taema. Jopa equeicha pacopatsinde xua bara judiomonae paca wi thabina, pomonae pebiwi pam, ichaxota panareixacaename. Tsipei icha baxua paexanaetsipame bapoxonae

Cristo jopa paca yawenaetsipae po coyene bapon nepaca juntu coyene xanepana exanaewa tsane Nacomtha.<sup>3</sup> Equeicha ichichipan xua tapaca tsipaebiwatsi. Po pebin xua wi thabatsi xua judiomonae exana, barapo pebin bara be judiomonaepin naexana. Bapoxonae bapon bewa daxita matapaeicha coyenein exanaena pocotsiwa Moisés pia peitorobi coyenewatha itoroba.<sup>4</sup> Paxam pomonae pananta xeiname xua paca juntu coyene xanepana exanaena Nacomtha painya neexanaexae pocotsiwa Moisés pia peitorobi coyenewatha itoroba, apara paxam Cristo papentame. Yawa panaitematame Nacom pia peantobewa tatsi.<sup>5</sup> Nama jume cowuntsiwa ewatatsi xua Nacom naca juntu coyene xanepana exanaena xua jopa watsita xeinaewa tsane wanatsicuentisiwa xua abe waexanaexae. Nacom pia Pejumope tɨnaxɨ tatsi baxua nacata exana wajume cowuntsixae Nacom.<sup>6</sup> Waxainchi caemonae peburuya Cristo Jesús piamonae wanaexanaexaetsi jopa naca yawenaeyo icha ichamonae naca wi thaba xua judiomonae wanaexanaewa tsane. Ichacuitha icha jopa naca wi thabiyo baxua iruru jopa naca yawenaeyo. Jame pocotsiwa xua wanaca yawenaewa bewa jame jume cowuntichi Cristo Jesús. Barapo pejume cowuntsiwa naca exana xua antobeya wajinompawea.

<sup>7</sup>Bayatha copiya beta pajinompage painya nejume cowuntsiwitha. ¿Jintam metha pacata ayapube exana xua daxota jopa painya neexanaewa pocotsiwa Nacom pia pejume xainyeiwatha paeba? <sup>8</sup>Apara Nacom jopa pacata exanaeyo baxua xua pacata ayapube exana pon paca waba. <sup>9</sup>Payabara nanta xeinare po diwesiyo xua jeye: “Levadura ba peyauyo xoyo atsaxa tsecae daxita carepaya matapaeicha atsaxa exana

pantha”, jei. Barapo coyene icha be ichi poxonae abe peexanae coyene po coyene bewayo painya xainya bejojopa tsiniya. <sup>10</sup>Jume cowúntan Nacomtha pon jiwi Pecanamataxeinaein xua jopa painya neitapetsiwa tsane icha painya barompaya nenanta xeinaewa xua icha be jopa ichiyo pocotsiwa nanta xeinan. Icha ichún paca jüntu coyene tsacaba xua paca itoroba xua abe painya ne-xanaewa tsane Nacom atene exanaena bapontha. Jopa Nacom tsita ainya cuiy-otsi metha bequein pon jopa peainya cuiyo, matautano metha bequein pon peainya cuin jiton, ichitha awiya atene cana exanaena.

<sup>11</sup>Tamonae pam, paxam pomonae iru painya nejume cowúntsiwixae Jesucristo. Icha cueicueijan tsipae xua bewa jiwi wi thabichi metha judiomonae jopa inta abe exanaetsipae. Yawa bapoxonae barapo judiomonae jopa aichaxaibi tsipae Nacom Pejume Diwesi, po diwesi xua Cristo yabara paebatsi po coyene xua naetotha tupa. <sup>12</sup>Pomonae xua paca jüntu coyene cui tsacaba xua paca itoroba xua paca wi thaba barapomonae pin jumetha yabara janje: “Jame maisa bu moya bara pia coutha natobu jucaena xua daxota jopa ichamonae peitorobiwa tsainchi xua penawi thabiwa tsane”, jan.

<sup>13</sup>Tamonae pam, paxam pomonae iru painya nejume cowúntsiwixae Jesucristo. Nacom paca itapeta xua jopa painya nenantawenonaenexa tsane xua jopa equeicha painya neexanaewa tsane pocotsiwa Moisés pia peitorobi coyenetha itoroba xua Nacom jopa painya netsita xeinaewa tsane painya tsita natsicuentsiwa xua abe painya neexanaeae. Poxoru jopa painya nenantawenonaemxae xua painya exanaewa barapo Moisés pia peitorobi coyenewa tatsi painya nepaca capanenebiyaenexa tsane daxota jopa paexanaeinde pocotsiwa xua abe,

pocotsiwa xua jiwi pia coutha ichichipa exana. Jame paexande pocotsi coyene xua ichamonae payawende xua nantiya caemonae painya nenaantobexae. <sup>14</sup>Paxam paexaname daxita pocotsiwa Moisés pia peitorobi coyenewatha itoroba poxonae paexaname barapo cae coyenewa xua jeye: “Antobeinde jinya necatsicuarabu enaewi, icha ichim xua naantobem jinya coutha”, jei. <sup>15</sup>Icha paxam bichocono nantiya atene pana naexaname, yawa icha bichocono nantiya daunwei pana nata exaname, dota pam pepu painya nenaaitafaetabi jiwi pam tsipae xua jopa beta painya nejume cowúntsiwa Nacom.

**Meje xua Pablo yabara paeba  
pomonae yawa jinompa Nacom  
pia Pejumope tñaxu tatsi**

<sup>16</sup>Xua pocotsiwa paca tsipaebatsi meje baxue: Nacom pia Pejumope tñaxu tatsi payawa jinompare. Bapoxonae jopa paexanaem tsane xua abe paexaname pocotsiwa xua saya jiwi ichichipa pia coutha exana.

<sup>17</sup>Po coyene xua wacoutha wajüntu coyenetha najüntu coyene xeinatsi xua abe waexanae coyenewa baraxua Nacom pia Pejumope tñaxu tatsi jopa ichichipaeyo. Po coyene Nacom pia Pejumope tñaxu tatsi naca itorobeiba xua pexeinya coyene waexaneibinexa baraxua, barapo abe wananta xeinaewa jopa ichipaeyo barapo coyene, po coyene Nacom pia Pejumope tñaxu tatsi naca itoroba. Bapoxonae wajüntu coyene iru Nacom pia Pejumope tñaxu tatsi pia pejüntu coyene tatsi jopa peburuya jupaeya nanta xeinaebe. Daxota bequein paichichipame xua painya neexanaewa xua pexeinya peexanaewan ichitha jopa paexaneibim po coyenein pexeinya coyenein.

<sup>18</sup>Ichitha icha Nacom pia Pejumope tñaxu tatsi itorobiya paca mata

cainompa bapoxonae jopa bewa pananta xeinaem xua Nacom paca capanenebiyaena abe painya neexanae coyenein weya painya neexanaexae po coyene Moisés paca itoroba pia peitorobi coyenewatha tatsi.

<sup>19</sup>Pocotsiwan jiwi ichichipa pia coutha exana xua abe meje baxue: Ichamonae nata siwa xeina xua bequein jopa piseuri jiwi. Ichamonae bichocono nanta xeineiba pocotsiwa bichocono xua abe, yawa xua pecui tsacatsacapae coyenewa xua weiweina. <sup>20</sup>Ichamonae wūnae jainta ibo nacomun. Barichi ichamonae maratha cataerubenanaebiya xua icha jiwi maratha cataerubenanaebiyatsi. Ichamonae caemonae nantiya naita aenae-aenei. Ichamonae nantiya naba. Ichamonae nantiya nauwa. Ichamonae nantiya nacaseba. Ichamonae asiwa piawan. Ichamonae natsatabe exana. Ichamonae pia matabuxumonaenacana exana be pomonae seicaya barompaya penanta xeinaewi. <sup>21</sup>Ichamonae yabara uwa pocotsiwa xua ichamonae xeina. Ichamonae juteba xua icha jiwi pejutebiwatsi. Ichamonae cupatsi. Ichamonae penajainjubi jiwi bichocono. Ichamonae ichawan exana xua peabe coyenewan. Yabara paca tsiwūnae muxu dutatsi xua jupa be po coyeneya bayatha paca tsipaebatsi, po jiwi bapocotsiwan exana barapomonaenae jopa patsi tsane Nacom pia peitorobi nacua beicha tatsi.

<sup>22-23</sup>Ichitha nama pocotsi coyenewan Nacom pia Pejumope tūnaxū tatsi cana exanaena jiwi pejūntū coyenetha tatsi baxuanje: Peantobewa ichamonaetha, yawa pejūntū coyene weiweinaewa pejume cowūntsixae Nacom, yawa xua jūntema pejinompaewa, yawa xua jūntema pejinompaewa xua bepijawa jopa aitaconaeayo poxonae bequein ichamonae abe exana, yawa xua beta peexanaewa

ichamonaetha, yawano xua peyawenaewa ichamonae pejūntū coyene xeaewaxae, yawano xeina xua bichocono pejume cowūntsiwa Nacom, yawa bichocono pia coutha jopa penayabara nanta xeinaewa, xua saya yabara nanta xeina ichamonaetha, yawa po coyene xua penaitorobiwa pia coutha. Icha peitorobi coyenewa aibi po peitorobi coyenewa xua yabara paeba xua daxita barapo coyenewan pinae abe. <sup>24</sup>Waxainchi pomonaetsi xua Jesucristo piamonae tatsichi, jeichichi: “Poxonae Jesucristo naetotha cobe matatabarutatsi, wajūntū coyene, po jūntū coyene jopa wūnaeyo, nacata yawa muxuna tupa. Bapoxonae nacata aichurubenaenae exana po coyene xua abe waexanaewa”, jeichichi waxainchi. <sup>25</sup>Waxainchi jinompatsi wanaca yawenaexae Nacom pia Pejumope tūnaxū tatsi. Daxota bewa bara copatichi xua Nacom pia Pejumope tūnaxū tatsi bara naca matacarucua ducua-naebiyaena xua ichaxota daxita pocotsiwantha xua exaneibatsi.

<sup>26</sup>Jopa bewa waxainchi ichamonae aebichi. Matautano jopa bewa nantiya naanaepana exanaetsi. Matautano jopa bewa nantiya nauwichi.

**Meje yabara poxonae Pablo jeye:  
“Nantiya pana nayawende”, jei**

**6**Tamonae pam, paxam pomonae irū painya nejume cowūntsiwixae Jesucristo. Icha ichūn pacui taneme xua abe exana, pon pejume cowūntsin Jesucristo, bapon payawende xua equeicha beta peponaewa tsane Nacomtha. Payawende bapon paxam jiwana pomonae pam Nacom pia Pejumope tūnaxū tatsi pajume cowūntsiya jinompame. Jopa anaya bichocono pamuxuconaeinde xua abe peexanaexae. Ichitha dota pam, xua irūru paca jūntū coyene cana exana xua abe painya neexanaewa tsane. <sup>2</sup>Nantiya

caemonae pana nayawende xua poxonae ichamonae ajuntucoyenerewe tsaihi pocotsiwa xua ajuntucoyenetane exanatsi. Poxonae nantiya caemonae pana nayawenae bapoxonae bara paexanaename pocotsiwa Cristo itoroba xua poxonae jeye: “Nantiya caemonae pana naantobeinde”, jei.

<sup>3</sup>Pon pia coutha nayabara nanta xeina xua jopa abe exanaeyo xua daxota jopa nantawenonaeyo xua peyawenae-watsi tsainchi, bapon pia coutha namuxitoroba. <sup>4</sup>Jiton bewa pia coutha nacui yabara nanta xeinae xua exana, bapoxonae barapon juntu coyene weiweina icha piawa beta exana. Bapon jopa bewa yabara nanta xeinae pocotsiwa xua ichun exana xua bichocono wuna xua beyacaincha bapon exana. Daxita jiwi carepaya bewa barichi bewa pia coutha nacui yabara nanta xeinae icha metha bara wuna xua pocotsiwan exana. <sup>5</sup>Daxita jiwi carepaya barompaya bewa exanaena pia penacuichiwan Nacom nexa be pocotsi coyeneya xua Nacom itoroba.

<sup>6</sup>Pon xua nacuiduba Nacom Pejume Diwesi, bapon bewa xuya catsina ichawa pocotsiwa xua penantawenonaewa pontha pon xua pecuidubinchixaetsi xua be pematomatsi coyenewa exana.

<sup>7</sup>Jopa painya coutha pana namuxitorobinde. Dapon ajibi pon itacupatsi xua Nacom muxitorobatsi. Pocotsiwa xua pebin exana bara barapocotsi coyenetha cuita yabara cana exanatsi. Icha bapon abeya exana barichi bara abeya cuita yabara cana cui matomatatsi. Matautano icha bapon xanepanaya exana bara xanepanaya cuita yabara cana cui matomatatsi. <sup>8</sup>Icha ichun exana pocotsiwa xua pia coutha ichichipa exana pocotsiwa xua jopa xanepanaeyo, bapoxonae bapon xuya cuita xeinaena pocotsiwa xua abe xua jiwi tupa exanatsi. Ichitha

icha bapon exana pocotsiwa xua Nacom pia Pejumope tunaxu tatsi ichichipa, bapoxonae barapo Nacom pia Pejumope tunaxu tatsi bapon catinchi peajuntuyapusuwa xua ataya tsiteca. <sup>9</sup>Jopa bewa ajuntucoyenefaetabi tsainchi po coyenewa xua beta waexanaewa Nacom nexa. Icha jopa ajuntucoyenefaetabi jinompa tsainchi xua beta waexanaewa Nacom nexa, bapoxonae po mataqueitha Nacom daxita wetsina Nacom naca catsina pentoma pocotsiwa wuna xua xanepanaya waexanaexae. <sup>10</sup>Daxota poxonae daxita coyeneintha naca itacupa xua exanaeinchi pocotsiwa xanepana bara bewa exaneibinchi ichamonaetha pocotsiwan xanepana. Baraxua bewa exaneibinchi daxita jiwitha. Nacom tsitatsi xua bichocono ainya cui xua yawenatsi pomonae Jesucristo pejume cowuntsiwichi, beyacaincha poxonae yawenatsi pomonae jopa pejume cowuntsiwi.

### **Meje yabara xua Pablo najume wetsiya paeba**

<sup>11</sup>Pataema xua matapainya tacoutha tinan, daxota pin itaneton tsica. <sup>12</sup>Pomonae judiomonae xua paca itoroba xua painya nepaca wi thabiwa tsane, barapomonae saya baxua exana pia icha judiomonae wuna yabara nanta xeinaetsi barapomonaetha. Yawa barapomonae pomonae xua paca itoroba pomonae judiomonaexae naerabiya nanta xeinaeya jeye: “Poxonae Cristo Pejume Diwesi cueicueijeichi pomonaetha pomonae jopa judiomonae naexanaeyo, bara muxuna itorobatsi xua barapomonae bara bewa pebiwi wi thabinchi ichaxota nareixacaena. Bapo coyenewa icha waxainchi exanatsi baxua wamonae pomonae judiomonae juntu coyene weiweinaena. Bapoxonae barapomonae

jopa nacata abe exanae tsane, bequein tsipaebatsi pomonaetha, pomonae jopa judiomonae naexanaeyo xua Cristo naca tsitupa naetotha”, jei xua naerabiya nanta xeina. <sup>13</sup>Bequein barapomonae paca itoroba xua paca wi thaba ichitha jopa exanaeyo pocotsiwa Moisés pia peitorobi coyenewa itoroba. Barapomonae ichichipa xua paca wi thaba ichamonae, pia barapomonae paca yabara paebichi ichamonaetha xua barapomonae paca itoroba. Barapo judiomonae ichichipa xua icha judiomonae yabara nanta xeina xua pomonae paca itoroba bara beta exana pia paca cui itorobixae barapo penawi thabi coyenewa. <sup>14</sup>Ichitha xan aichaxaibin xua tacoutha atsaquiya nayabara paeban ichamonaetha. Saya meisa bichocono atsaquiya yabara paeban xua Jesucristo petupaewa naetotha pon Wanacacanamataxeinaein. Cristo naetotha netsitupa daxota pocotsi coyenein xua xeina po irathe jopa netsita ainya cuiyiyo, xua taxei naenexa yawa xan jopa tsita ainya cuiyinyo barapo cae pin nacuathepiwitha. <sup>15</sup>Jopa naca yawenaeyo icha naca wi thaba. Barichino jopa naca yawenaeyo icha jopa naca wi thabiyo. Jame pocotsiwa ainya cui xua bewa Jesucristo tsita

xeinaetsi pena juntũ coyene. <sup>16</sup>Barabũ Nacom paca cata juntema painya nejinompaewa. Matautano barabũ Nacom nantanuweya paca yabara nanta xeinaena pia painya nepaca yawenaenexa. Barabũ Nacom daxita paxamtha barapo coyenebe paca cana exanaena pomonae pam paexaname po coyenewa barapo peitorobi coyenewa paeba, po peitorobi coyenewa xua yabara paeba paca pena juntũ coyenewa, yawano barabũ Nacom paca cana exanaena daxita paxamtha pomonae pam xaniwaicha painya nejume cowũntsiwi pam Nacom.

<sup>17</sup>Anoxuae yawano xua bexa tsaneno jopa ichichipaeinyo xua ichũn inta aya-pube exanaena xua poxonae neyabara paeba xua po coyene pinae Nacom jopa neitorobiyo xua tacueicueijejewa tsane bapon nexa. Tsita itapeinya xeinan xua Nacom xaniwaicha bara neitoroba tsipei ichamonae newan duba taperũtotha tajume cowũntsixae Jesús.

<sup>18</sup>Tamonae pam, paxam pomonae irũ painya nejume cowũntsiwixae Jesucristo. Barabũ bapon pon Wanacanamataxeinaein, paca juntũ coyene weiweina exanaena pia painya nepaca antobexae. Je bara ichi tsane.

Baja Pablo.



## Meje Po Carte Pablo Tatina, Efeso Tomarapiwi Tatinatsi

### Meje yabara poxonaе Pablo tamropata pitaba xua tatina pomonaetha pomonaе Efeso tomarapiwi

**1** Xan, Pablon, pacata tinatsi. Nacom necana exana xua Cristo Jesús pia peitorobi jivi jiwana tatsin xua bapon peichichipaexae. Pacata tinatsi pomonaе pam pomonaе Nacom piamonaе pamxaem, pomonaе pajinompame Efeso tomaratha. Paxam beta xanepanaya pajume cowunteibame Cristo Jesús xua Nacom caemonaе painya nepaca exanaexae Cristo Jesustha. <sup>2</sup>Barabu Nacom, pon Waxa iru Jesucristo, pon jivi Pecanamataxeinaein, baponbe paca yawenaena pia paca necaantobexae. Matautano barabu baponbe peburuya junteма jinompa paca cana exanaena.

### Meje yabara xua poxonaе Nacom wanaca yawenaewa, wanaca antobexae

<sup>3</sup>Barabu waxainchi tsipaebatsi Nacomtha, Jesucristo Wanacanamataxeinaein, pia Nacom tatsi xuano xua Paxa tatsi. Jeichichi: “Nacom maisa pajuntu coyene weiweinan jinya pata taneyawenaewaxaem”, jeichichi. Daxita waxainchi Nacom caemonaе wanaca cana exanaexae Cristotha, daxota Nacom naca yawena. Nacom bara tsitecaeya naca cata daxita carepaya pejuntu coyenein po pejuntu coyenein xeina pia nacuatheicha. Bapo juntu coyenein naca catsiba xua wanantawenonaewatsi xua wanaca ajuntucoyenesu exanaenexa beta xua Nacom watsita jinompaenexatsi. <sup>4</sup>Caena bayatha pewunaeya xua

poxonaе nacua forotsina, Nacom naca wun duba xua piamonaе tatsi wanaca exanaenexa tsane poxoru Cristo caemonaе wanaca exanaewa tsane bapontha. Matautano Nacom naca wun duba xua bichocono watsita juntu coyene xanepanaenexa tsane bapon xua matauta jopa watsita natsicuentiswatsi tsane xua abe waexanaexae bapontha. <sup>5</sup>Nacom pia wanaca antobewaxae caena bayatha naca yabara nanta cui yapu weta xua pia pexui tatsi wanaca cana exanaewa tsane. Baxua Nacom naca cana exana xua pocotsiwa Jesucristo pia wanacata exanaexae. Nacom ichichipa exana baxua petsita xanepanaexaetsi. <sup>6</sup>Daxota barabu Nacom wunaе jainteibatsi pon bichocono pexeinya coyenewa exana poxonaе naca yawena wanaca antobexae. Matautano Nacom bichocono wanaca antobexae amanaya daxitatsi caemonaе naca cayawa exana Pexantotha, po Pexanto bichocono antobe. <sup>7</sup>Nacom pia pin wanaca antobexae naca capanenebiya exana abe waexanae cuiru coyenein weya. Nacom tsitatsi xua jopa watsita natsicuentiswatsi xua abe waexanaexae, yawa naca cayabara cui junteма maina barapo cui. Baxua exana poxoru Nacom Pexanto tatsi jana pichapabarena poxonaе bexotsi, poxonaе abe waexanae cuiru coyene naca yabara tsitupa naetotha. <sup>8</sup>Nacom naca tsita itapeinya xeina xua bichocono jopa juniya naca antobeyo. Matautano naca cana exana xua wayabara yaputaewatsi bapon. <sup>9</sup>Nacom bayatha exana pocotsiwa xua caena bayatha juntuuru exana. Nacom naca yaputane exana xua wayaputaewa pocotsiwa bapon moya yawun xeina xua jivi jopa yabara yaputaeyo po coyene xua bapon ichichipa peexanaewa. Baxua xua pocotsiwa moya yawun xeina caena bayatha Nacom juntuuru nanta xeina

xua Pexanto peitorobiwa tsane po cae pin nacuathe tsique pon pewun Jesucristo. <sup>10</sup>Caena bayatha Nacom cayabara nanta xeina pocotsiwa xua exanaena. Barapo coyene exanaena po coyene xua daxita caetutsina pocotsiwan Cristo pecanamataxeinaewa tsane picoya xua xuan peitabocotha piawan xvano xua xuan po irathe piawan. Baxuan exanaena poxona jopaena barapo matabi xua poxona po mataqueitha Nacom ichichipa beexanaena baraxua.

<sup>11</sup>Daxita po coyenein Nacom exana, bapon exana po coyeneya xua ichichipa. Daxota caena bayatha Nacom pana wun duba pata tanaexanaewa tsane piamonae tatsi poxoru Cristo caemonae wanaca exanaewa tsane bapontha. Daxita pocotsiwan xua Nacom pana cana exana caena bayatha bapon tsiwanaya juntucuru nanta xeina xua exanaena baxuan tsipei Nacom exana daxita xua pocotsiwan tsita wunaetsi. <sup>12</sup>Paxan, judiomonae pan, pomonae pan xua copiya pawuna ewatan xua Cristo pepatopaewa tsane. Barabu daxota Nacom bichocono wuna pejainchin pexeinya peitupanaewa peexanaein. <sup>13</sup>Pocotsiwa xua pexainyei jume diwesi, barapo diwesi apara Nacom pia pecapanenebiyae diwesi tatsi. Poxona barapo pexainyei jume diwesi pajume taneme Nacom paca cana exana piamonae tatsi painya nejume cowuntsixaem Cristo painya nepaca capanenebiyaenexa. Bapoxonae Nacom tsita itapeinya xeina xua paxam piamonae tatsi pam poxona paca cata pia Pejumo pe tunaxu tatsi. Bayatha Nacom yabara paca tsiwuna muxu duta xua pinae paca catsina barapo pia Pejumo pe tunaxu tatsi. <sup>14</sup>Nacom pia Pejumo pe tunaxu tatsi naca cata wanaca baru poponaenexa. Baxua naca tsita itapeinya xeina

xua daxota xaniwaicha yaputainchi xua bexa ichawan xua Nacom naca catsina pocotsiwan yabara naca tsiwuna muxu duta xua naca catsina. Nacom baxua exanaena poxona daxita cana exanaena piamonae tatsi, pomonae daxita bewa jume cowuntsina Jesucristo. Bapoxonae jiwi wuna jainchina Nacom bichocono pexeinya peitupanaewa peexanaein.

**Meje yabara poxona Pablo  
Nacomtha tawuca pomonae  
pejume cowuntsi jiwi xua  
Nacom yaputane pecana  
exanaewa tsane barapomonae  
pomonae pejume cowuntsiwi**

<sup>15</sup>Paca yabara jume tainchi xua paxam pinae beta pajume cowuntame Jesús, pon jiwi Pecanamataxeinaein. Matautano paca yabara jume tainchi xua pinae beta paantobem pomonae iru pejume cowuntsiwi. <sup>16</sup>Daxota ataya pacata wunqueibatsi Nacom, janje: “Nacom maisa juntu coyene weiweinan xua Efeso tomarapiwi neyawenaewa, pomonae necajume cowuntsiwi”, jan. <sup>17</sup>Wucan Nacom, Jesucristo Wanacanmataxeinaein, pia Nacom tatsi, pon Waxa pon bichocono pexeinya peitupanaewa peexanaein. Wucan xua painya nepaca cacatsinexa pia Pejumo pe tunaxu tatsi painya neyaputaewa tsane pocotsiwan xua xainyei xua Nacom yabara. Matautano wucan xua painya beta neyaputaeponaenexa Nacom. <sup>18</sup>Nacom wucan xua painya neyaputaenexa painya juntu coyeneintha. Bapoxonae paca itacupaena xua payaputaename pocotsiwa Nacom yabara paca tsiwun duba xua painya nexainaenexa pocotsiwa yabara paca tsiwuna muxu duba. ¡Maisa bichocono jopa juniyiyo xua pocotsiwa Nacom catsina pomonaetha pomonae pia pejume

cowũntsi jiwithaxaetsi pocotsiwa bapon juntana jeba barapomonae!  
<sup>19</sup>Matautano wũcan xua painya neyabara yaputaewa tsane Nacom pia peayapusũ itorobi coyenewa, po peayapusũ coyenewa bichocono wũnae xua jopa wetsiyo. Barapo peayapusũya itorobi coyeneyatha Nacom naca yawena wajume cowũntsiwixae.  
<sup>20</sup>Barapo peayapusũ itorobi coyenewa jupa po peayapusũ itorobi coyenewatha Cristo asũ exainchi petũpae cuiru coyene weya xua Nacom exana. Barapo pia peayapusũ itorobi coyenewatha Nacom Pexanto cuareta pia pecoxa weya xua peitabocothicha xua Pexanto ainya cui cana exana. <sup>21</sup>Nacom Pexanto cana exana xua Jesucristo toxeincha canamataxeina pomonaetha daxita pomonae ichamonae canamataxeinatsi itabocotha, matautano xua barapo cae pin nacuathe. Matautano bapon canamataxeina daxita pomonaetha pomonae nacuan peewatsiwi, barichino pomonaetha pomonae piamonae pematacaponaewichi. Cristo canamataxeina pia peayapusũ itorobi coyenewatha, po peayapusũ itorobi coyenewatha bichocono ayapusũ beyacaincha ichamonae pia peitorobi coyenewan tatsi. Po wũn xua Jesucristo xeina xua “Cristo”, jeichichi barapo wũn yabara matawũn dutatsi pia peexanaewa. Barapo wũn bichocono peainya cui wũn, beyacaincha ichamonae pewũnxi, po wũnxi xua yabara matawũn dubatsi xua peexanaewa pomonae anoxuae jinompa irũ pomonae bexa jinompaenano. <sup>22</sup>Nacom exana xua daxita coyenewantha Cristo itoroba pia peayapusũ itorobi coyenewatha. Matautano Nacom exana xua Cristo daxita pepa pecanamataxeinaein piamonae daxita pomonae pejume cowũntsiwixae. <sup>23</sup>Pomonae pejume

cowũntsiwi Cristo barapomonae be bara Cristo pia pepon tatsi tsipei Cristo cana exana xua barapomonae caemonae naexana bapontha. Dapocotsiwa ajibi pocotsiwa Cristo petaseicaewatsi tsipei nantauta pomonae pejume cowũntsiwichi. Barichi dapocotsiwa ajibi pocotsiwa petaseicaewatsi pomonae Cristo pejume cowũntsiwichi tsipei Cristo ataya tsitecaeya baru ppona barapomonae daxita nacuantha.

**Meje yabara poxonae xua  
Nacom naca capanenebiya,  
wanaca antobexae**

**2** Copiya bayatha poxonae jopa pajume cowũntsim Nacom bichocono abe paexana dubenanaebiyame. Matauta pajumefebame Nacom poxoru paxam be pomonae pewerapaewi pam jopa painya yawa jinompaexae Nacom pia Pejumope tũnaxũ tatsi. <sup>2</sup>Bayatha jopa xapain painompaem. Painompame icha barapo cae pin nacuathepiwi ichi xua bichocono abe exana dubenanaebiya. Paexaname bayatha xua caurimonae pia pentacaponaein tatsi painya nepaca cui itorobixae. Bapon canamataxeina caurimonae po caurimonae jinompa itabocotha barapo nacue matatsuntha xua beyano Nacom pia nacia beicha tatsino. Barapo caurimonae pia pentacaponaein tatsi, pomonae Nacom jumefebatsi, barapomonae jũntũ coyene itorobatsi xua abe peexanaewa tsane. <sup>3</sup>Caena bayatha waxainchi barichichi exana dubenanaebiyatsi barapocotsi coyenein xua abe. Exainchi pocotsiwa xua ichichipatsi xua wajũntũ coyenewa naca cui itoroba xuano xua wapepon naca cui itoroba. Tsipei waxainchi jiwichi xua yacuiya naexanatsi xua abe waexanaewa, daxota bayatha Nacom anaya nanta xeina xua naca atene exana icha ichamonae ichichi

xua atene exanatsi abe peexanaexae. <sup>4</sup>Daichitha Nacom jopa juniya naca matateicaeyo xua wanaca yawenaewa bichocono wanaca antobexae. <sup>5</sup>Bequein poxonae cataunxuae bichocono abe exana dubenanaebiyatsi waxainchi, xua daxota be petupaewi jinompatsi abe waexanaexae, bapoxonae Nacom naca yawena. Baraxua be bapon naca baru ajuntucoyenesu xua Cristo wanaca cana exanaexae xua caemonae naexainchi bapontha. Nacom naca capanenebiya saya apara poxoru wanaca antobexae. <sup>6</sup>Wajume cowuntsixae Jesucristo, waxainchi Nacom tsitatsi xua apara be bara bayatha bapon naca asu exana petupae coyene weya icha Cristo Jesús ichichi xua asu exanatsi petupae coyene weya. Matautano waxainchi tsitatsi xua apara be bara bayatha naca exana xua waenaewa ichaxota Cristo Jesús eca pia nacuatheicha. <sup>7</sup>Nacom juntucuru baxua exana petsita itapeinya xeinaenexa xua xeina pia pin peantobe coyenewa xua waxainchi nexa xua daxita maticabintha tsoponae tsane. Nacom naca tsita itapeinya xeina xua bichocono naca antobe poxonae naca exana xua caemonae naexanaeinchi Cristo Jesththa. <sup>8</sup>Tsipei Nacom paca antobe daxota paca capanenebiya poxonae pajume cowuntame bapon. Apra jopa baxua painya coutha paexanaem, apra Nacom jame baxua amanaya paca cana exana. <sup>9</sup>Nacom apra jopa baxua paca cana exanaeyo xua painya nenacuichixae. Icha paca itacupa xua poxonae payabara nacuichipame xua painya nepaca capanenebiyaenexa bapoxonae be painya neatsacae jiwi pam tsipae xua poxonae ichuntha pajam: “Beta paexanan daxota Nacom pana capanenebiya”, pajam. <sup>10</sup>Nacom naca exana xua pena juntu coyenewatha jinompatsi Cristo Jesús nexa xua

beta xanepanaya waexaneibinexano bapon nexa poxonae jinompatsi. Caena bayatha baxuan Nacom yabara nanta xeina xua naca juntu coyene cana cui weta exana xua po coyeneya waxainchi beta wataexanaewa tsane ichamonae.

**Meje yabara po juntu coyenetha  
Nacom naca cana exana xua juntema  
wajinompawea caemonae  
wanaexanaexae Cristotha**

<sup>11</sup>Poxonae panaexaname jopa panaexanaem judiomonae. Paxam pomonae jopa judiomonae painya nenaexanae jiwixaem pana nacui yabara jantanainare xua eta po jiwi pamda caena bayatha poxonae jopa pajume cowuntsim. Judiomonae paca yabara jei: “Barapomonae jopa pewi thabiwichi xua ichaxota pia penareixacaenaewa xua petsita itapeinya xeinaewa tsane xua barapomonae Nacom piamonae”, paca yabara jei. Judiomonae pia coutha nayabara jei: “Waxainchi pomonaetsi, pomonae naca wi thaba xua ichaxota wanareixacaenaewa watsita itapeinya xeinaewa tsane xua Nacom piamonaetsi”, nayabara jei. Barapo pewi thabi coyene xua ichaxota pebiwi penareixacaenaewa saya jiwi pia coya nacanautsiya exana. <sup>12</sup>Bayatha barapo dapaetha poxonae cataunxuae jopa pajume cowuntsim jopa Cristo payabara yaputaem. Matautano paxam be painya nenanapaincha jinompawei pam xua icha nacia werena painya neponaewi xua jopa Israel nacuapiwi jiwana pam. Po petsiwunae yabara muxu dutsi coyenewan xua Nacom juntucuru nanta xeina xua caemonae naexana piamonaetha, xua judiomonaetha, barapo coyenein apra jopa paxam nexa. Matautano pajinompame barapo cae pin nacuathe ichitha jopa pawunae ewatsim xua pocotsiwa xua wunae xua Nacom

exanaena paxam nexa cataunxuae jopa painya nejume cowuntsixae. Tsipei jopa painya neyabara yaputae jiwi pam Nacom. <sup>13</sup>Ichitha anoxuae Cristo Jesús paca exana xua caemonae pana naexaname bapontha. Paxam pomonae bayatha jopa Nacom painya nejume cowuntsi jiwi pam xua jopa painya yabara yaputaexaem bapon. Ichitha anoxuae pajume cowuntame painya neyabara yaputaexae Cristo Jesús, pon naetotha painya abewan paca yabara tsitupa, poxonae jana pichapabarena poxonae bexotsi. <sup>14</sup>Cristo meisa bapon naca cata po juntu coyenewatha xua ichamonaetha xuya juntea jinompa exanatsi. Cristo exana xua caemonae naexana pomonae xua judiomonae iru pomonae jopa judiomonae naexanaeyo. Cristo cui weraweraca exana po juntu coyenein xua judiomonae iru pomonae jopa judiomonae naexanaeyo penaitafaetabi jiwi naexana xua saya be caemonae penaexanaewa tsane. Baxua exana poxonae naetotha tsitupa jiwi. <sup>15</sup>Poxonae Cristo naetotha tupa bapoxonae bapon cana exana xua Moisés pia peitorobi coyenewa tatsi jopa equeicha xeinaeyo peayapusu itorobi coyenewa xua jiwi peitorobiwatsi pocotsi coyenein jiwi bewa exanae. Bapon Cristo cana exana xua barapomonae Cristo caemonae pebaru naexanaewa tsainchi pomonae xua copiya pia peaitafaetabi jiwixaetsi. Poxonae Cristo baxuan cana exana bapoxonae barapo bicheitomonaebe juntea nabaru jinompa cana exana. <sup>16</sup>Petupaexae naetotha Cristo exana xua equeicha barapomonaebe jopa nabiyoy. Matautano bapoxonae Cristo naita coxone exana xua barapomonaebe juntea pejinompaewa Nacomtha xua icha be jopa ichiyo xua poxonae copiya jinompa xua Nacom pia peaitafaetabi jiwichi. Cristo exana xua

barapomonaebe Nacom caemonae exainchi.

<sup>17</sup>Cristo patopa po cae pin nacuathe tsique. Bapon daxita paxam paca tsipaeba Nacom pia pexeinya jume diwesi tatsi. Barapo juntu coyenewatha jiwi equeicha caewa Nacom ita coxonatsi xua Nacom juntea petsita jinompaewa tsainchi. Daxita paxamtha paca tsipaeba barapo diwesi pomonaetha iru pam pomonae copiya jopa Nacom payabara yaputaem, xua pomonae jopa judiomonae pam. Iru tsipaebatsi pomonae yatsicaya judiomonae pomonae Nacom yaputainchi pejume cowuntsixae.

<sup>18</sup>Cristo jiwi petsitupaexaetsi abe pia peexanae coyenewan tatsi daxota Nacom pia Pejumope tunaxu tatsi yawena xua pomonae judiomonae iru pomonae jopa judiomonae naexanaeyo be caemonae naexanabe xua cae axa xeina, bapon Nacom. <sup>19</sup>Daxota anoxuae jopa be painya nenanapaincha jinompaewi pam xua be icha nacua werena painya neponaewi. Paxam iru ichamonaeb pomonae Nacom pejume cowuntsiwiru be pomonae cae nacupiwipi pam. Paxam Nacom piamonae jiwana tatsi pam. <sup>20</sup>Poxonae ba jiwi Nacom pin pia bo acaba copiya matha beta noba po iboton xua iratha tabu caumena. Nexata beta nota po iboto xua ainya cui xua po iboto bo daunweya babatanota po iboto xua epatauta botabiyaya. Bapoxonae nanta cajejebabapona icha iboton, xua pepa bo exana. Icha pebiwi ichi poxonae bo acaba, Nacom piamonae bara cana jutsiya cana ichi. Pomonae Cristo pia peitorobi jiwi tatsi iru pomonae Nacom pia peitorobi jume pepaebiwipi barapomonae be bara pocotsi iboton xua tabu caumena tsipei barapomonae copiya paca cuiduba Nacom Pejume Diwesi tatsi. Iru Jesucristo be

barapocotsi ainya cui iboto po iboto daunweya babatanota po iboto epatauta botabiya, tsipei Cristo paca yawena xua painya nejume cowuntsiwa bapon. Irũ paxam be po iboton xua jiwi nanta cajejebabapona, pomonae penanta carubenaē jiwi pam, tsipei cotacaya painya nejume cowuntsixae. <sup>21</sup> Cristo piamonae bara cana jutsiya ichiya cana exana, icha po iboto ichi xua ainya cui xua bo daunweya babatanota exana. Cristo pon jiwi Pecanamataxeinaein, exana xua piamonae tatsi pinmonae tsoponae xua xanepanaya caemonae nabaru jijinapona, pomonae Nacom tsita jũntũ coyene xanepanatsi. <sup>22</sup> Poxonae jiwi weta barapo pin bo, bapoxonae cana exana xua barapo bo apara Nacom pia bo tatsi ichaxota Nacom popona. Nacom paca cana exana xua paxam irũ daxita ichamonae pomonae irũ pejume cowuntsiwi Nacom, caemonae pana naexaname xua Nacom pia Pejumope tũnaxũ tatsi pia paca baru jinompaenexa icha Nacom ichi xua pia pin botha popona.

**Meje yabara poxonae Nacom Pablo  
itorobatsi xua pecueicueije  
Nacom Pejume Diwesi  
pomonaetha pomonae jopa  
judiomonae naexanaeyo**

**3** Xan, Pablon, jiwi pecubi botha ecan yabara tanatsipei cueicueijeixae Cristo Jesús poxonae bapon yabara tapaca cuidubiwatsi pomonae pam jopa judiomonae panaexanaem. <sup>2</sup> ¡Bara pajume taneme xua Nacom necata barapo tatanacuichiwa xua inta bichocono wũnae! ¡Nacom neitoroba tana neantobexae xua tapaca cuidubinexatsi tapaca yawenaenexatsi! <sup>3</sup> Nacom itũta xua po coyene xua moya yawũn xeina po coyene xua Nacom capanenebiyaena jiwi xua jiwi copiya jopa yabara yaputaeyo. Nacom

neyaputane exana barapo coyene xua moya peyabara cui yawũn xeinaewa po coyene bexa exanaena xua jiwi jopa yabara yaputaeyo. Baxua bayatha yabara pacata tinatsi xua imoxoyo diwesi tsecae. <sup>4</sup> Poxonae barapo carte payorobiname payaputaename xua bara xan yaputan po coyene xua Cristo moya yabara cui yawũn xeinatsi po coyene xua bexa Nacom exanaena xua jiwi jopa yabara yaputaeyo. <sup>5</sup> Bayatha jiwi jopa yaputaeyo po coyene xua Nacom Cristo moya yabara cui yawũn xeinatsi po coyene xua Nacom exanaena. Ichitha anoxuae Nacom pia Pejumope tũnaxũ tatsi baxuan yaputane cana exana pomonaetha pomonae pia coya Nacomtha nacana exana xua Nacom petanacuichiwa tsainchi pomonae Cristo Jesús pia peitorobi jiwixae tatsi, matautano Nacom pia peitorobi jume pepaebi jiwitha tatsi. <sup>6</sup> Meje baxue xua pocotsiwa moya peyawũn xeinaewa: Pomonae jopa judiomonae naexanaeyo barapomonae irũ xeinaena po coyene xua Nacom cata judiomonaetha po coyene bichocono wũnae xua bayatha Nacom juntana jeba. Barapomonae pomonae jopa judiomonae naexanaeyo Jesucristo pejume cowuntsixaetsi caemonae nanaexana pepa judiomonaetha pomonae irũrũ Cristo Jesús pejume cowuntsiwixaetsi. Barapomonae irũ xeinaena po coyene Nacom yabara tsiwũnae muxu duta judiomonaetha xua Cristo Jesús yabara. Barapomonae pomonae jopa judiomonae naexanaeyo daxita baxuan irũ xeinaena poxorũ jume cowũntaru Nacom pia pecapanenebiyae diwesi jume.

<sup>7</sup> Nacom neitoroba xua tacueicueijejiwa barapo pexeinya jume diwesi amanaya tatanacuichixae Cristo. Nacom necata barapo tatanacuichiwa pia tana neantobexae xua tayawenaewa

tsane ichamonaē. Matautano Nacom necata pia peayapusu itorobi coyenewa xua tacueicueijeīwa tsane barapo pexeinya jume diwesi. <sup>8</sup>Pomonaē xua be conotha ainya cui xua Cristo piamonaē tatsi barapomonaē ainya cui beyacaincha xua xan. Daichitha Nacom necata barapo tatanacuichiwa xua inta bichocono wūnaē. Nacom neitoroba xua tacueicueijeīwa tsane pia pexeinya jume diwesi pomonaētha pomonaē jopa judiomonaē naexanaeyo. Cueicueijan po pexeinya jume diwesi xua Cristo bichocono peantobexaē jopa juniya yawenaeyo barapomonaē pomonaē jopa judiomonaē naexanaeyo. <sup>9</sup>Matautano Nacom neitoroba xua daxita jiwitha yabara yaputane taexanaewa tsane po coyene xua Nacom exanaena bexa tsane, po coyene Nacom moya yawūn xeina. Barapo coyene Nacom pon daxita peforotsin, caena bayatha moya nayawūn xeina xua jiwi jopa peyaputaewa tsane xua pocotsiwa bapon exanaena. <sup>10</sup>Anoxuae Nacom yaputane exana matatsunpiwi, pomonaē itoroba itabocotha, matautano pomonaē pecanamataxeinaewa itabocotha. Barapomonaē Nacom yaputane exana pocotsiwa bapon moya yawūn xeina caena bayatha xua jiwi jopa yabara yaputaeyo. Barapo itabocopiwi nacuiduba xua bara Nacom bichocono yaputane daxita carepaya coyenewan. Baraxua yaputane poxonaē tane xua pomonaē judiomonaē matautano pomonaē jopa judiomonaē naexanaeyo daxita barapomonaē caemonaē naexana pejume cowūntsiwichixaetsi Cristo Jesús. <sup>11</sup>Nacom exana baxua icha be pocotsi coyeneya caena bayatha yabara nanta xeineibapona. Bapon baxua exana Jesucristo pon Wanacanamataxeinaein petūpaexaē naetha. <sup>12</sup>Naca itacūpa xua watsipaēbiwatsi Nacom wajume cowūntsixaē Cristo.

Waxainchi yaputainchi xua bapon bara naca jume tane caemonaē wanaexanaexaē Cristotha, daxota cui tsacatsacapiya watsipaēbiwa Nacom. <sup>13</sup>Daxota jopa ichichipaēinyo xua paajuntūcoyenerewiya jinompame xua ichamonaē atene tana neexanaexaē paxam nexa. Ichitha jame bewa baxua paichichipaem tsipei baxua jame paca yawena.

### Meje yabara xua Cristo jiwi peantobewatsi

<sup>14</sup>Poxonaē yabara nanta xeinan xua po coyenewa xua Nacom exana bapoxonaē tantabocototha uncuan xua tatsita itapeinya xeinaewa tsane xua barū cui itura jinan Waxa pon itabocotha pepoponaēin. <sup>15</sup>Daxita Nacom piamonaē pomonaē pejume cowūntsiwichi, pomonaē itabocopiwi irū pomonaē po irathepiwi, daxita barapomonaē Nacom tsitatsi xua barapomonaē be caemonaē naexana. Bapon daxita barapomonaē paxa tatsi. <sup>16</sup>Nacomtha pacata wūcatsi. Tsipei Nacom pexeinaexaē peitaboco beicha pocotsiwa jopa juniyiyo xua bichocono wūnaē daxota jan: “Nacom care Efeso tomarapiwi xua bichocono jinya neayapusu itorobi coyenewa. Barapomonaē nejumopetha jūntū coyene daunweya jinompa exande. <sup>17</sup>Barabū Cristo barū poponeibina barapomonaē pejume cowūntsixaetsi. Barabū barapomonaē bichocono antobe jiwi bichocono pejūntū coyene yūcaewaxaetsi peantobe coyenewa. <sup>18</sup>Barabū barapomonaē beta yabara yaputaena Cristo pia peantobe coyenewa tatsi xua irū daxita ichamonaerū yaputaena pomonaē pejume cowūntsiwi. Barapon Cristo pia peantobe coyenewa tatsi bichocono ayei xainto jūntū coyenewa. <sup>19</sup>Cawūcatsi Nacom xua barapomonaē

barabũ yaputaena barapo coyene po coyene Cristo pia peantobe coyenewa tatsi, xua po peantobe coyenewa ayei xainto jũntũ coyenewa xua jiwi jopa itacũpaetsi xua peyabara yaputaewa. Cawũcatsi xua barapomonaе nejuũntũ coyene yũca exanaenexa daxita jinya nejuũntũ coyenewatha.

<sup>20</sup>“Wũnae cajaintatsi poxoru caitacũpa xua bichocono pata tana neyawenaewam beyacaincha xua pata tacawũcaewatsi, xuano beyacaincha pata nanta xeinaewa. Baxua painta exaname poxonaе jinya neayapusũ itorobi coyenewa nacuita pata jũntũ coyenewatha. <sup>21</sup>Barabũ daxita pomonaе pejume cowũntsiwi pomonaе caemonaе naexana Cristo Jesustha wũnae cajainchina xua ataya petsitecaeponaewa tsane. Je bara ichi tsane”, jan xua pacata wũcatsi Nacomtha.

**Meje yabara xua Nacom pia  
Pejumope tũnaxũ tatsi cana  
exana xua caemonaе naexana  
Nacom piamonaе tatsi**

**4** Tatanacuichixae Jesucristo pon jiwi Pecanamataxeinaein daxota jiwi neeta jiwi pecubi botha. Pecono jumetha paca muxuwetatsi xua beta xanepanaya painya nejinompaewa xua Nacom itapeta painya nepaca wũn dubixae painya nejume cowũntsixae bapon icha be pocotsi coyeneya xua Nacom tsita xanepanatsi. <sup>2</sup>Ita ururanaya pajinompeibare xua jopa painya neatsacaewa tsane. Matautano jume xanepanaya nantiya pana natsipaebeibare xua jopa paantutsaxande. Matautano saya jopa paaitaconaеinde xua daxota jũntema painompaename poxonaе bequein ichamonaе abe pacata exana. Matautano patsita itapeinya xeinare xua nantiya pana nacui yabara antobem

pocotsiwa bequein jopa pana nacui coyene jũpaem. <sup>3</sup>Nacom pia Pejumope tũnaxũ tatsi paca cana exana xua caemonaе painya nenaexanaewa tsane. Daxota peajũntũcoyenesũwatha paexande daxita coyeneya xua caemonaе jũntema painya nenabarũ jinompaewam tsane. <sup>4</sup>Paxam pomonaе painya nejume cowũntsi jiwixae Cristo Jesús daxota caemonaе paca exana. Bequein daxita carepaya paxam barompaya paxename Nacom pia Pejumope tũnaxũ tatsi, ichitha barapo pejumope saya bara caein. Nacom yabara paca wũn duba xua daxita paxam painya nexainaewa tsane cae coyenewa xua po coyene peburũya pana nabarũ wũnae ewatame pocotsiwa xua bexa Nacom exanaena. <sup>5</sup>Matautano bara caein pon jiwi Pecanamataxeinaein. Matautano cae coyenewa xeinatsi po coyenewa xua wajume cowũntsiwa Cristo. Matautano saya cae wũntha nabautisabatsi xua Cristo pewuntha tatsi. <sup>6</sup>Matautano bara caein Nacom pon Waxa xua daxitatsi waxainchi. Bapon daxita jiwi canamataxeinatsi, matautano daxita carepaya nacuantha popona. Matautano daxita waxainchi carepaya naca barũ popona.

<sup>7</sup>Daxita waxainchitha seicaya cabarompaya naca cana jũntũ cui coyene duba exana pocotsi coyeneintha xua watsita exanaewa tsane bapon. Barapo coyenein Cristo naca catsiba po coyenein jiwana xua bapon nawita xeina icha bapon ichichipa. <sup>8</sup>Daxota Nacom Pejume Diwesitha jeye Cristo yabara:

“Bapon athabe juinya taju beicha. Poxonaе athabe juinya barũ juinya pomonaе pia peaitafaetabi jiwichi petsita itapeinya xeinaenexa xua amanayaba barapo peaitafaetabi jiwichi.



Matautano bapon pia pejume cowantsiwichi catsiba po juntu cui coyenewantha xua barapomonaе Nacom petsita exanaexatsi”, jei Nacom Pejume Diwesitha.

<sup>9</sup>¿Eta xua metha baxua caunuta poxonaе paeба xua “athabe juinya tajū beicha”? jei. Baxua caunuta xua copiya matha Cristo po irathe patopeica xua bapoxonaе equeicha caibe juinya athabeicha itaboco beicha. <sup>10</sup>Pon xua po irathe patopeica, barichi bapon athabe juinya tajū beicha xua bapon pepoponaewa tsane daxita nacuantha xuano daxita itabocotha. <sup>11</sup>Cristo catsiba jiwitha xua seicaya barompaya pejuntu cui coyenein. Ichamonaetha cana exana pomonaе pia peitorobi jiwixae tatsi. Ichamonaetha cana exana pomonaе pecuecuijei jiwi pia peitorobi jume diwesi tatsi. Ichamonaetha cana exana pomonaе xua pecuecuijei dubenanoutsivi Nacom pia pexeinya jume diwesi tatsi xua pecapanenebiyae diwesi jume. Ichamonaetha cana exana pomonaе eena jiwi pomonaetha pomonaе pejume cowantsi jiwi. Ichamonaetha cana exana pomonaе xua pecuidubi jiwi pomonaetha pomonaе pejume cowantsivi. <sup>12</sup>Poxonaе barapo coyene Cristo exana, piamonaе cana juntu coyene wetsiya cana exana xua beta petaxanaewa tsainchi pia petanacuichiwa tatsi. Bapoxonaе daxita piamonaе tatsi mataropeichiya ajuntuyapusuya jume cocowantapona pomonaе piamonaexae tatsi pomonaе bara be Cristo pia pepon tatsi. <sup>13</sup>Baxua Cristo exana xua beya waxainchi caemonaе wanaexanaewa tsainchi xua caemonaе wanabaru jume cowantsixaetsi Cristotha. Bapoxonaе naexanatsi xua pebruya caemonaе

wanabaru yabara yaputaewa tsainchi Nacom Pexanto tatsi. Matautano bapoxonaе yatsicaya beta jume cowantatsi, bapoxonaе jinompatsi be pomonaе bayatha pinyontsi xua pocotsimonaе itacupatsi xua Nacom beta petsita jinompaewatsi. Bapoxonaе wajuntu coyene naca cayabara cui wetsiya exana xua wajuntu coyene xanepanaewa icha Cristo ichi xua bichocono pejuntu coyene xanepanaewa. <sup>14</sup>Bapoxonaе jopa be pexui natsicotae tsainchi equeicha. Pexui ba ainya muxu xeina ichawa beya ba jume cowanta xua pocotsi coyenein xua poxonaе nacuidubeiba xua poxonaе cuiduba pomonaе jiwi pemuxuitorobiwi. Barapo pemuxuitorobi jiwi yaputane nawita po juntu coyeneintha xua jiwi pemuxujainyabiwatsi. <sup>15</sup>Jame bewa pexainyei jume tsipaebichi ichamon-aetha po coyeneya xua barapomonaе yaputane xua waxainchi antobetsi barapomonaе. Bapoxonaе beta xanepanaya exanaeinchi wanajuntu coyene xanepana exanaponaenexatsi daxita coyenewantha xua icha be Cristo ichi. Bapon canamataxeina pomonaе pia pejume cowantsiwichi. Bapon bara be pentasipa pomonaе pejume cowantsiwichi be bapon pepon tatsi. <sup>16</sup>Cristo canamataxeina pia pejume cowantsiwichi. Matautano cana exana xua barapomonaе barompaya xeina pia petanacuichiwantsi. Bequein barapomonaе piawan barompaya xeina ichitha Cristo cana exana xua caemonaе nantiya nayawena be caemonaе naexana. Poxonaе barapomonaе barompaya piawa beta exanapona pia penacuichiwan, bapoxonaе be caemonaе beta naajuntucoyenesu xanepana eexanapona, nantiya penaantobexae.

**Meje yabara po pena juntu  
coyewatha wajinompawea  
wajume cowuntsixae Cristo**

<sup>17</sup> Anoxuae paca tsipaebatsi xua painya tapaca muxuwetsinexatsi, Cristo pon jiwí Pecanamataxeinaein taneitorobixae: Jopa bewa pajinom-paem icha barapo cae pin nacuathepiwi ichi xua poxonaé jinompa poxonaé jopa Nacom yaputaetsi. Pocotsiwa xua barapomonaé pia penanta xeinaé coyewanan tatsi, jopa ainya cuiyo. Jopa pejuntu coyene yawenaexaetsi barapo penanta xeinaé coyewanantha. <sup>18</sup> Barapomonaé pia peyaputae coyewanan tatsi jopa xapain pepa peyaputae coyewaniyo. Barapomonaé jopa xeinaeyo peajuntucoyenesuwa pocotsi peajuntucoyenesuwa Nacom cata piamonaé. Barapo coyene barapomonaé jopa xeinaeyo poxoru aichaxaibi xua Nacom peyabara peyaputaewatsi, xuano poxoru barapomonaé najuntu coyene ararana xua jopa peichichipaexae xua Nacom peyabara jume taewatsi. <sup>19</sup> Barapomonaé jopa ajuntucoyeneuriyo poxonaé abe exana. Matautano barapomonaé atsaquiya abe eexanapona, xua pecupaewatsi atsaxa mera yawa weiweina ichamonaé piseurixitha tatsi. Barapomonaé cui xeica xua daxita coyewanan abe peexanaponaewa. <sup>20</sup> Ichitha poxonaé ichamonaé yabara paca cuiduba Cristo, jopa apara paca cuidubiyo barapo coyene xua abe painya neexanaewa tsane. <sup>21</sup> Xaniwaicha yabara pajume taneme Cristo, xuano piamonaé tatsi painya nenaexanaewa poxonaé ichamonaé paca cuiduba po pexainyei jumein xua pexeinya jume diwesi xua Jesucristo yabara. <sup>22</sup> Pana nacui barapende po juntu coyene xua bayatha paexaname poxonaé jopa cataunxuae pajume cowuntsim. Barapo juntu cui

coyene bichocono abe, tsipei paca cana exana xua paexaname pocotsiwan xua painya coya paichichipame poxonaé paca muxuitoroba exana xua daxota abe painya neexanaewam. <sup>23</sup> Pacopare xua bara Nacom paca juntu coyene xanepana exanaponaena, xua daxota pena coyene painya nenanta xeinaponaewa tsane. <sup>24</sup> Painompare pena juntu coyenetha, po juntu coyene Nacom exana xua painya paca catsibinexa. Bapoxonaé paxeinaename be pocotsi juntu coyene Nacom xeina. Poxonaé paxeiname barapo juntu coyene po juntu coyene xua pexainyeiwa, bapoxonaé beta nantiya pana nabaru jinompame yawa xua bichocono paca tsita xanepana Nacomtha.

<sup>25</sup> Daxota anoxuae jopa nantiya bewa pana namuxuitorobim. Bewa daxita pam xanepanaya patsipaebim pomonaetha pomonaé iru pejume cowuntsiwi, tsipei waxainchi daxitatsi caemonaé naexanatsi Cristotha.

<sup>26</sup> Icha paanaepaname jopa pacopatsinde xua painya juntu coyene paca itoroba xua anaya anaepanaya abe painya neexanaewa ichuntha. Icha paanaepaname jopa abe paexanaeinde. Came jopa paanaepana dubenanaebiyaeinde xua beya quirei tsanaicha, saya jame bara caetotha pande. <sup>27</sup> Jopa pacopatsinde xua bara caurimonaé pia pentacaponaein tatsi paca juntu coyene jujuta abe painya neexanaewa tsane.

<sup>28</sup> Pon xua pecaibin, bu jopa equeicha caibeibiyo. Bewa jame bapon tsinacuichina pocotsiwa xua xainyeya yabara nacuita xua jopa naerabiyo. Bapoxonaé bapon itacupatsi xua ichamonaetha xuya catsina pomonaetha xua acopeibiwi pomonaé jopa xeinaeyo xua pocotsiwa nantawenona.

<sup>29</sup>Jopa ajumebeya pacueicueijam tsurubenanaebiyaeinde. Jame maisa jume xanepanaya pacueicueijam tsurubenanaebiyama. Papaebare pocotsi jumeintha xua ichamonae jume cocowuntapona exanatsi po jumeintha xua jiwi muxu xeica exanatsi xuano xua yawenatsi po jumein xua paca jume tane. <sup>30</sup>Nacom pia Pejumope tñaxu tatsi jopa pajuntu coyene wecoyei exanaeinde xua painya nepaca cui taexae xua paexaname. Tsipei paca baru popona Nacom pia Pejumope tñaxu tatsi, baraxua tsita itapeinya xeina xua bara xaniwaicha Nacom piamonae tatsi pam. Nacom pia Pejumope tñaxu tatsi naca juntu coyene ararana wanaca yawenaenexa beya poxonae po mataqueitha Jesucristo naca capanenebiya exanaena.

<sup>31</sup>Jopa paxeinaeinde painya juntu coyenein weya po coyenein xua ichamonae payabara juntu ajom xua came bichocono painya neyabara nanta xeinaexae xua ichamonae abe pia pacata exanaexae. Matautano jopa paxeinaeinde po coyene xua jemeicha anaya paexaname. Matautano jopa paxeinaeinde po coyene xua saya bichocono panthuthu anaepaneibame. Matautano jopa paxeinaeinde po coyene xua tsumu jume pabarü paebame ichamonae. Barichi jopa paxeinaeinde po coyene xua ichamonae pabiataneme. Matautano daxita jopa paxeinaeinde po coyenein xua bichocono paaitafaetabim ichamonae. <sup>32</sup>Jame seicaya maisa nantiya caemonae xanepanaya pana nata exande. Matautano nantiya pana naweyataema xua nantiya painya nenayawenaewam tsane. Matautano nantiya pana nacui yabara juntemainare xua abe nantiya pana nata exaname, icha Nacom paca yabara ichi xua paca cayabara juntemaina abe painya neexanae cuiru coyenein Cristo painya

nepaca tsitupaexae poxonae naetotha tupa exanadutatsi poxonae bexotsi.

**Meje yabara xua po juntu  
coyenyatha bewa jinompaena  
Nacom pia pexui tatsi**

**5** Tsipei paxam Nacom pia pexui tatsi pam xua bapon bichocono painya nepaca caantobe jiwi pam, daxota bewa pacui jontsiya jinompae-name icha bapon ichi poxonae popona. <sup>2</sup>Nantiya pana naantobeya jinompare icha Cristo ichi xua naca antobe. Bapon Cristo pia pepon nacaenaeta xua naca tsitupa xua abe waexanae cuiru coyenein poxonae bexotsi. Baxua be poxonae icha duwei ichichi xua poxonae jiwi tsibexotsi xua daxota barapo jiwi jopa penatsicuentsiwa xua abe peexanaexae Nacomtha. Bapoxonae Nacom tsita xanepanatsi barapo jiwi. Barichi xua Cristo exana Nacom tsita xanepanatsi icha be pocotsi duwei tuxusi xeicaewa ichi xua poxonae jiwi duwei tauta xua Nacom pecatsinexatsi.

<sup>3</sup>Tsipei paxam Nacom pia pexui tatsi pam, daxota jopa bewa paexanaem po coyenein xua daxota ichamonae pomonae painyamonae paca yabara paeba xua abe paexaname. Matautano jopa bewa pana nasi cui matacaetsim xua paweiweiname xua jopa bequein painya seuri jiwi. Jopa bewa payabara paebim po jume xua jiwi aura exanatsi. Matautano jopa bewa bichocono painya ita copeichi xua payabara uwame xua ichamonae xeina. <sup>4</sup>Jopa nantiya pana nayabara yuyujande. Matautano jopa nantiya pana najume cui caponaeinde po jumein xua jopa wunaeyo. Matautano jopa nantiya tsumu jume pana nayabara paebinde. Daxita barapo coyenein bichocono abe. Jame maisa bewa itapeta Nacom wunaeyo pajainchim painya nepaca capanenebiyaexae barapo coyenein weya. <sup>5</sup>Tsipei paxam

bayatha payaputaneme xua Nacom cana exanaena pomonaetha pomonae meje: Pomonae xua penasi cui matacaetsiwa xua jopa poxonae piseuri jiwi, yawano pomonae xua yabara paeba po jume xua jiwi aura exanatsi, yawano pomonae bichocono pitacopeichi xua yabara uwa xua ichamonae xeina. Nacom tsita abetsi barapo coyenein icha tsita ichichi xua poxonae jiton bichocono beita cui jichatsi xua wnae jainta ibo nacom. Pomonae barapo coyenein exana bapomonae bapana jopa itacupaetsi xua jiwi itorobiya peewatsiwatsi xua ichaxota Cristo itorobiya pecanamataxeinaewa jiwi xua iru ichaxota barichi Nacom.<sup>6</sup> Jopa pacopatsinde xua ichamonae paca necamuxutorobiwa peyabara paebixae barapo coyenein, po jumeintha xua jopa xainyeyo. Poxoru jiwi peexanaexae barapo abe peexanae coyenein daxota Nacom anaya peraxa exanaena barapomonaetha. Nacom anaya peraxa exanaena barapomonaetha tsipei jopa jume jejeyo pocotsiwa xua Nacom itoroba.<sup>7</sup> Barapomonaetha jopa imoxoyo pacuicuinaeinde, pomonae Nacom jopa jume jejeichi.

<sup>8</sup> Paxam copitha abe paexaname jopa painya yabara yaputaexaem Nacom. Baxua be poxonae pomonae pona pequireiwatha jopa beta ponaeyo jopa beta penecotsixae. Ichitha anoxuae beta paexaname painya yabara yaputaexaem Nacom pon jiwi Pecanamataxeinaein. Baxua be poxonae pomonae pona, poxonae pentha, beta pona beta pia petaexae. Pajinompare beta painya nejinompaenexa Nacom nexa icha pomonae ichi poxonae pona poxonae pentha.<sup>9</sup> Pomonae yawa jinompa Nacom barapomonae beta jinompa icha pomonae ichi xua poxonae beta jinompa poxonae pentha. Barapomonae peyawa jinompaexae Nacom

exaneiba pocotsiwa xua wnaeya peexanaewa yawa xua pocotsiwa tsita xanepanatsi Nacom, yawa xua pocotsiwa pexainyeyiwa.<sup>10</sup> Incane pana nacuidubare pocotsiwa xua Nacom pon jiwi Pecanamataxeinaein ichichipa pocotsiwa Nacom tsita xanepanatsi.<sup>11</sup> Jopa paexanaeinde pocotsiwa jopa ainya cuiyo pocotsiwa ichamonae exana pomonae xua be poxonae pequireiwatha jinompa poxoru Nacom jopa peyabara yaputaexaetsi. Jame maisa barapomonae patsita itapeinya xeinare pocotsiwan xua barapomonae abe peexanaewanxae.<sup>12</sup> Icha payabara paebichipan po coyenein barapomonae abe peexanaewa, bichocono aura pana exanaetsipa pocotsiwa namicha peexanaewa barapomonae tsipei bichocono abe.<sup>13</sup> Poxonae pecoicha pentha exana poxonae quirei bapoxonae daxita pichiwan beta pataneme pentha perubenaexae. Barichi poxonae barapomonae jume tane po jumein xua yaputane exainchi, bapoxonae tsita itapeinya xeinaeinchi xua pocotsiwa namicha exana, apara deta cou abe. Bapoxonae barapomonae itacupatsi xua naexanaena Nacom piamonae tatsi.<sup>14</sup> Daxota Nacom piamonae tatsi ichun yabara jeichi:

“Nacui cayabara cananta xeinatabare, tsipei xam be pon abe neexanaein. Natsixire pia xainya weya tatsi pomonae be petupaewi pejinompaewi jopa tana nejume cowuntsi jiwixae. Cristo cacana exanaena xua yabara neyaputaewa bapon pocotsiwa xua pia pexainyeyi coyenewa tatsi”, jei xua ichun yabara paebatsi.

<sup>15</sup> Dota pam, xua abe painya neexanaewa. Jame maisa xanepanaya pajinompare. Jopa pajinompaende icha be ichi poxonae jinompa pomonae Nacom jopa jume cowuntsiya yaputaetsi. Barapomonae jopa

peyaputaewi. Jame maisa pajinompare icha be ichi poxonae jinompa pomonae jume cowũntsiya peyaputaewi Nacom. Barapomonae peyaputaewi. <sup>16</sup>Beta pa-eexanaponde daxita coyeneya xua paca itacupa poxonae cataunxuae anoxuae pajinompame, tsipei barapo maticabintha jiwí abe bichocono peexanaewi. <sup>17</sup>Jopa pajinompaende icha be ichi poxonae jinompa pomonae amameibatsi jopa Nacom peyabara yaputaexaetsi. Jame maisa payaputaeya exanaponde pocotsiwa xua Cristo ichichipa, pon jiwí Pecanamataxeinaein. <sup>18</sup>Jopa pana nacupa exanaeinde peatsaxa meran xua jiton acoyenebeya exanaeya exainchi. Jame maisa Nacom pia Pejumope tunaxu tatsi pacopabeibare xua daxita bara paca jũntu coyene itorobeiba xua beta painya neexaneibiwa tsane. <sup>19</sup>Nantiya pana natsipaebare pocotsiwa xua Nacom paca jũntu coyene weiweina exana. Nantiya pana nabaru naxunare David pia weixi, po weixi pewun salmos. Matautano panaxunare po wei pomonae pejume cowũntsiwi pia weixi tatsi xua pewunae jainchi weixi Jesucristo, pon jiwí Pecanamataxeinaein. Panaxunare painya jũntu coyene weya po weixi xua Nacom wunae pejainchiwatsi. <sup>20</sup>Nacom pon Waxa bapontha pajacobeibare, pajan tsaibinde: “Nacom maisa pajũntu coyene weiweinan xua pocotsiwa daxita pata tana necatsixaemxae. Paca wucatsi Jesucristo pata Tanecanamataxeinaein pabuxuna bobenounan”, pajan tsaibinde.

**Meje yabara po coyene xua pebin piseuribe bewa nabaru poponaenabe ponbe pejume cowũntsinbe**

<sup>21</sup>Daxita pam bewa bara pacopatsim xua nantiya pana nacanamataxeiname xua painya neexaneibinexa pocotsiwa

xua nantiya pana nacui itorobeibame. Bapoxonae xua painya itapeinya xeinaenexa xua painya nebaru itura cui jinaewa pocotsiwa Cristo paca cui itoroba.

<sup>22</sup>Yabuxi pam, bewa bara pacopatsim xua painya seuriwi paca canamataxeina xua painya neexaneibiwa pocotsiwa painya seuriwi paca cui itorobeiba. Baraxua paexande icha paichim poxonae Cristo pon jiwí Pecanamataxeinaein paca cui itoroba. <sup>23</sup>Tsipei pebin canamataxeina piowa, icha Cristo ichi xua canamataxeina piamonae pomonae pia pejume cowũntsiwichixaetsi. Bapon Cristo barapomonae pia Pecapanenebiyaeinchi tatsi. Barapomonae pomonae pejume cowũntsiwi bara be Cristo pia pepon tatsi. Cristo bara be pentasipa pecanamataxeinaexae barapomonae. <sup>24</sup>Icha barapomonae ichi pomonae Cristo pejume cowũntsiwichi xua pichichi xua peexanaewa pocotsiwa Cristo itoroba, yabuxi bewa barichi. Bewa exanae daxita pocotsiwa piseuriwi itorobatsi.

<sup>25</sup>Pebiwi pam paantobeinde painya seuri jiwí, icha Cristo ichi xua antobe daxita xua i dapomonae pomonae pejume cowũntsiwichixaetsi. Cristo pia peantobexae barapomonae tsitupa poxonae naetha tupa exanadutatsi poxonae bexotsi. <sup>26</sup>Cristo tsitupa barapomonae xua daxita i dapomonae pomonae peyabara jume cowũntsiwixatsi po coyene xua Cristo jũntu coyene xanepana pecana exanaenexa Nacom nexa. Baxua exana xua barapomonae jopa pexeinaewa tsane xua penatsicuentisiwa xua abe peexanaexae. Baxua Cristo cana exana poxonae barapomonae tabautisabatsi meratha, xuano xua poxonae paeba xua pinae jume cowũnta Nacom Pejume Diwesi. <sup>27</sup>Cristo baxua

exana daxita pomonaetha pomonae pia pejume cowuntsiwichi xua pecuaranobinexa tsane pia itabaratha, xua yawa pemuxuna cuaranobinexa pia pexeinya peitapanae coicha. Poxonae barapomonae umenaena Cristo peitabaratha jopa yawa umenae tsane peabe coyenewan. Matautano jopa yawa umenae tsane pocotsiwa xua barapomonae abe exanatsi. Barapomonae pejuntũ coyene xanepanaewi tsane Nacomtha xua jopa xeinaeyo xua penatsicuentisiwa xua abe peexanaexae. <sup>28</sup> Pebiwi bewa antobe pia seuriwi, pecui untabexae icha barapo pebiwi ichi xua pia pepon natsiuntabe. Pon pia coutha natsiuntabe bapon piowa antobe xua be caein penaexanaewa tsanebe. <sup>29</sup> Dapon ba ajibi pon pia coutha naaitafaetabi. Saya jame naapatsina pexaewa yawano naewatsina beta. Cristo bara jũta ichiya cana ichi pomonae Nacom piamonae tatsi daxita xua i dapomonae pomonae Cristo pejume cowuntsiwichixaetsi. <sup>30</sup> Cristo beta eena barapomonae tsipei barapomonae be pia pepon tatsi. Waxainchi yaputainchi baxua tsipei barapomonae jiwantsi. Waxainchi pomonaetsi xua caemonae wanaexanae jiwichi Cristotha. <sup>31</sup> Xua pebin yawa piseuri caein naexanabe Nacom Pejume Diwesitha baxua yabara jeye: “Daxota pebin paxa wepu natsata, yawa pena wepu natsata xua piseuribe penaperu cuicuinaenexabe. Bapoxonae baponbe piseuribe be caein naexanabe”, jei Nacom Pejume Diwesitha. <sup>32</sup> Barapo Nacom Pejume Diwesi xua pebin piseuribe yabara baraxua bara be Nacom moya yawun xeina xua po coyene bichocono ainya cui xua jiwi jopa yabara yaputaeyo. Barapo diwesi yabara caunuta xua Cristo irũ Nacom piamonae tatsi pomonae pejume cowuntsiwichi, daxita be caemonae

naexana icha pebin piseuribe ichi xua be caeinbe naexanabe. <sup>33</sup> Barichi barapo diwesi paca yabara caunuta. Daxita pebiwi pam bewa paantobem painya seuriwi, icha paichim xua painya coutha pana natsiuntabem. Barichi daxita yabuxi pam painya seuriwi bewa paca yabara baru cui itura jinaena.

**6** Pexui pam, paxam pomonae painya nejume cowuntsi jiwi pam Cristo. Painya neantobemxae pon jiwi Pecanamataxeinaein daxota paxam bewa pajume baru jejam pocotsiwa painya axeiwi paca itoroba, tsipei baxua pexeinya cui coyene. <sup>2-3</sup> Moisés pia peitorobi coyenewa ainya coyenewan xeina. Po peitorobi coyenewa copiya po peitorobi coyene xua ichaxota muxuna xeina xua peyabara tsiwunae muxu dutsiwa, barapo coyenewatha baxua jeye: “Axa cui baru itura jinare, yawa ena cui baru itura jinare, xua painya jũntũ coyene xanepanaya jinompaenexa, matautano xua painya nejinompaenexa ainya wei dapaein barapo cae pin nacuathe”, jei Moisés pia peitorobi coyenewatha.

<sup>4</sup> Paxam pomonae coxiyei jiwi pam, jopa anaepanaya paitorobeibinde xua daxota painya pexui paca caseba. Jame maisa bewa antobeya pawichitim pocotsi coyeneya Jesucristo, pon jiwi Pecanamataxeinaein, tsita xanepanatsi. Pacuidubare painya pexui xua beta pejinompaenexa. Matautano pamuxuwere xua peexanaenexa pocotsiwa bewa exanae.

<sup>5</sup> Pomonae amanaya painya nepaca cabusi tatayebeibi jiwi pam xua poxonae ichamonae pata nacuitame pajume baru jejannde pocotsiwa xua painya nepaca canamataxeinaewi paca itoroba barapo cae pin nacuathe. Barapomonae pabarũ cui itura jinare, yawano pacui cunuware barapo painya nepaca canamataxeinaewi xua abe painya nepaca exanaeyainwa.

Matautano yatsicaya jume xainyeya pata exande. Barapomonae beta patanacuire icha poxona paichim poxonae Cristo patanacuitame.<sup>6</sup> Daunweya patanacuire bequein painya nepaca canamataxeinaewi jopa paca taeyo. Jopa saya daunweya patanacuichinde xua barapomonae painya nepaca taexae. Poxona baxua paexaname apara saya poxoru painya pia nepaca canamataxeinaewi xanepanaya paca yabara nanta xeinaetsi. Jame maisa patanacuire icha paichim poxona painya ichichi xua amanaya painya netanacuichiwa painya nepaca canamataxeinaein nexa Cristo. Bichocono daunweya panacuire pocotsiwa xua Nacom tsita xanepanatsi pocotsiwa xua bapon ichichipa.<sup>7</sup> Poxona pata nacuitame pomonae painya nepaca canamataxeinaewi weiweinaya panacuire icha be poxona paichim xua poxona pata nacuitame pon jwi Pecanamataxeinaein, pon Cristo Jesús. Jopa bara paichinde xua poxona jopa xapain patanacuichim pomonae xua poxoru saya jiwixae.<sup>8</sup> Paxam payaputaneme pocotsiwa xua daxita beta paexaname bara Nacom paca busi cui matomata. Baraxua Nacom pon jwi Pecanamataxeinaein jupa barapocotsi matoma paca cata, poxona bequein amanaya painya nepaca busi cui tatayebeibi jwi pam xua poxona ichun pata nacuitame, xuano xua saya poxona bequein paratixi patsinacuitame.

<sup>9</sup>Paxam pomonae pecanamataxeinaein jwi pam, bewa beta pata exanaem xuya barapo amanaya painya nebusi cui tatayebeibi jwi. Jopa yabara pamuxuwetsinde xua painya necuainchiwa tsane icha jopa xapain exanaeyo barapomonae. Pananta xeinare xua barapomonae bewa exanae pocotsiwa itoroba pon jwi

Pecanamataxeinaein icha paichim xua iru bewa paexanaename pocotsiwa bapon paca itoroba, pon eca itabocotha. Bapon daxita tsita najupatsi jwi poxona yabara paeba peyaputaenexa icha barapomonae natsicuenta xua abe peexanaexae.

**Meje yabara xua pomonae pejume cowuntsiwi Cristo po coyeneintha bewa amanayabi caurimonaetha**

<sup>10</sup>Tamonae pam, anoxuae wetan pocotsiwa xua tapaca tsipaebiwatsi. Ajuntusuya pajinompore pon Pecanamataxeinaein jwi pia peayapusu itorobi coyenewatha tatsi caemonae painya nenaexanaexae bapontha.

<sup>11</sup>Painya juntu coyene pana naewatsiya yawenare daxita po coyenewantha xua Nacom paca cata xua xota pana nayaawatame painya juntu coyenewa. Bapoxona paca itacupa xua caurimona pia pentacaponaein tatsi paamanayabame poxona paca juntu coyene jujuta xua abe painya neexanaenexa.

<sup>12</sup>Tsipei anoxuae jopa nabetsi xua pepa jiwitha. Jame apara anoxuae penabi coyene exanatsi pomonaetha pomonae peinya pejinompaewi xua caurimonaetha. Barapo caurimona xaina pia peayapusuwa yawa peitorobi coyene xua jwi canamataxeinatsi barapo cae pin nacuathe tsique, pomonae abe peexanae jwi. Matautano jinompa barapo cae pin nacua matatsunthe.

<sup>13</sup>Daxota paxeinare daxita pocotsi juntu coyenein xua Nacom paca cata pocotsi coyeneintha xua pana nayaawatame. Anoxuae pana najuntu coyene wunaere xua painya juntu coyene amanayabi dubenanaebiyaenexa tsane barapo peinya pejinompaewi. Baxua paexande xain awiya bichocono pajuntu coyene daunwam poxona po mataqueitha paca juntu coyene jujutsina xua abe

painya neexanaewa tsane. Bequein paca jujutsina, awiya ajuntucoyenesuya pajinompaename.

<sup>14</sup>Pana nacui wunare icha soldadomonaе ichi xua yabara nacui wunaeta penabinexa ichamonaetha. Painya juntu coyenewatha paxeinare Nacom pia pexainyei coyenewa painya tsita itapeinya xeinaenexa baraxua xua bara xainyeya pata exaname Nacom. Barapocotsi juta coyeneya paichinde icha be soldadomonaе ichi xua poxonaе yabara nacui wunaeta penabinexa ichamonaetha bapoxonaе naepa caturuba paparuan xua tsita itapeinya xeina xua bapomonaе nacui wunaeta xua bara xainyeya penabinexa xua pon pentacaponaein peitorobixae. Matautano pejuntu coyene xanepanaewa Nacom patsita xeinare painya juntu coyenetha, painya nenayaewatsinexa icha be poxonaе soldadomonaе ichi xua xeina po penaintotha xua nantacari acaba poxonaе nacui wunaeta xua penabinexa. <sup>15</sup>Pana najuntu coyene wunaere xua painya necueicueijeі tsurubenaеbiyaenexa Nacom pia pexeinya jume diwesi xua po diwesi yabara xua jiwi junteма pejinompaewa. Barapocotsi juta coyeneya bara paichinde icha be poxonaе soldadomonaе ichi, xua poxonaе nataxu wunaetaduba sapaton xua penacui wunaetsinexa xua naba. <sup>16</sup>Matautano pamuxuna xeinare xua bichocono painya nejume cowuntsiwa Nacom, xua pana najuntu coyene yawename poxonaе caurimonaе pia pentacaponaein tatsi paca juntu coyene jujuta. Barapocotsi juta coyeneya bara paichinde icha be soldadomonaе ichi xua pemaxantha duba peperacae nain xua naita arababa. Poxonaе pia peaitafaetabi jiwi cawababatsi pocotsiwantha xua peopi sojeiwantha

xua iso itere xeina, bapoxonaе barapo peperacae naintontha naita arababa barapomonaе, yawano baxota itaxubaba iso itere. <sup>17</sup>Pacopare xua bara Nacom paca capanenebiyaena painya paca juntu coyene araranaenexa caurimonaе pecuiyainwa. Barapocotsi juta coyeneya bara paichinde icha be soldadomonaе ichi xua penain yoreitha nanta acaba. Nacom Pejume Diwesi painya juntu coyenetha paxeinare xua po jume Nacom pia Pejumope tunaxu tatsi paca cata xua po jumetha painya nenayaewatsinexa painya nepaca caaitafaetabi jiwi pecuiyainwa. Barapocotsi juta coyeneya bara paichinde icha be soldadomonaе ichi xua capona cusi penayaewatsinexa pia peaitafaetabi jiwichi pecuiyainwa. <sup>18</sup>Nacomtha matowa patsipaebeibare daxita matabintha be pocotsi coyeneya paca yawena Nacom pia Pejumope tunaxu tatsi. Nacomtha pawuqueibare daxita painya newucaе coyenewatha tsaibi pocotsiwan xua panantawenoname. Xain daxita matabintha tsaibi tsaca painompeibame, matauta bapana jopa paajuntucoyenefaetabinde xua pawucame Nacom. Bichocono matowa patawucare daxita pomonaе Nacom piamonaе tatsi. <sup>19</sup>Barichi painta wucare Nacomtha xua bapon tanecatsinexa po jume diwesitha xua tacueicueijeinexa. Matautano painta wucare xua tana neitacupaewa xua cui tsacatsacapiya tacueicueijeinexa, xua jiwi yabara yaputane taexanaenexa pocotsiwa xua Nacom moya yawun xeina po coyene yabara xua Nacom capanepa exana pomonaе jopa judiomonaе naexanaeyo. <sup>20</sup>Nacom neitoroba icha nacuantha xua tacueicueijeinexa Nacom Pejume Diwesi bapon nexa. Daxota anoxuae ichamonaе neeta jiwi pecubi botha tacueicueijeixae Nacom



nexa. Painta Nacomtha wucare xua cui tsacatsacapiya tacueicueijeinexa tsane poxonae icha bewa cueicueijan tsane.

**Meje yabara poxonae Pablo najume wetsiya paeba barapo cartathe**

<sup>21</sup> Tíquico pon paxan paantobein, pon iru pejume cowuntsin Jesucristo bapon pacata itorobatsi. Bapon Tíquico bara xainyeya exana poxonae pana neyawena Nacom pia petanacuichiwa tatsi pon jiwi Pecanamataxeinaein. Bapon daxita paca tsipaebina xua neyabara paebina, yawano pocotsiwa xua exanan baxua yabara paca tsipaebina. <sup>22</sup> Bapon Tíquico pacata itorobatsi yaitama ichichipan xua bapon yabara paca tsipaebina xua pata jinompaewa. Bapoxonae bapon paca juntu coyene tsacabina, juntu coyene weiweinaya sadujei painya

nejinompaewa tsane xua bara beta tapoponaexae.

<sup>23</sup> Barabu Nacom, pon Waxa, iruru Jesucristo, pon jiwi Pecanamataxeinaein, baponbe juntea jinompa cana exanaenabe pomonaetha daxita pomonae pia pejume cowuntsiwixaetsi. Matautano barabu exanaenabe xua barapomonaе nantiya naantobe tsane. Matautano barabu exanaenabe xua barapomonaе ajuntucoyenesuya jume cowunta dubenanaebiyaena. <sup>24</sup> Matautano barabu Nacom peantobexae yawenaena daxita pomonaetha pomonaе peantobewi Jesucristo pon Wanacanamataxeinaein. Bapoxonaе barapomonaе pexeinaenexa tsane po coyene antobe ichamonaetha po coyenewa xua ataya tsiteca.

Baja Pablo.

## Meje Po Carte Pablo Tatina, Filipos Tomarapiwi Tatinatsi

### Meje poxonae Pablo tamropata pitaba xua tatina, Filipos tomarapiwi tatinatsi

**1** Xan, Pablon, iru Timoteo, paxanbe ponbe amanaya pata tanacuichinbe Jesús pata taichichipaexaebe. Barapo carte patatinanbe pomonaе jinompa Filipos tomaratha. Patatinanbe daxita pomonaе Cristo Jesús pejume cowuntsi-wichi, pomonaе yatsicaewa Nacom pi-amonae tatsi. Matautano iru patatinanbe pomonaе pecanamataxeinaewi pejume cowuntsi jiwi. Matautano iru patatinanbe pomonaе peyawenaewi pejume cowuntsi jiwitha, poxonaе yawena peatenewitha, xuano xua poxonaе apata pexaewa peacopebiwitha. Barapomonaе Nacom piamonae tatsi, yawa barapomonaе caemonaе naexana Cristo Jesustha. <sup>2</sup>Barabu Nacom, pon Waxa, amanaya paca yawenaena painya pia paca necaantobexae, yawa xua junteма jinompa paca exanaena. Iru barabu Jesucristo pon jiwi Pecanamataxeinaein baxua pacata exanaena.

### Meje yabara poxonae Pablo tawuca Nacomtha pomonaе Nacom pejume cowuntsiwi

<sup>3</sup>Poxonaе paca yabara nanta xeineibatsi Tanacom tsipaеbeiban paxam yabara. Jan tsaibinje: “Nacom juntu coyene weiweinan xua barapomonaе betiya necatsita dubenanaebiyaexae”, jan tsaibin. <sup>4</sup>Poxonaе Nacom pacata wuqueibatsi bichocono juntu coyene weiweinaeya pacata wuqueibatsi xua daxita paxam. <sup>5</sup>Nacomtha yabara tsipaеban xua paxam tapana nebaru nacuichiwam Nacom Pejume Diwesi xua poxonaе

aena pajume cowuntame xua beya anoxuae. <sup>6</sup>Bara xaniwaicha yaputan xua Nacom tamropata pitaba xua xanepanaya beta paca cana juntu coyene exana. Baxua Nacom paca cana juntu coyene exana ducuanaebiyaena beya poxonaе Nacom xanepanaya paca cana juntu coyene wetsina poxonaе po mataqueitha Jesucristo patopaetsica. <sup>7</sup>Baxua jame inta xanepana xua tapaca yabara nanta xeinaewatsi, tsipei bichocono paca antobetsi. Poxonaе bequein anoxuae jiwi pecubi botha neeta, yawano poxonaе bequein caena bayatha pecapanenebiyaе diwesi jume yabara jume yawenaeya cueicueijan jiwitha, yawano xua jiwitha tsita itapeinya xeinan xua barapo diwesi bara pexainyei diwesi jume, bapoxonaе bara pana nebaru atenem. Daxota poxonaе Nacom amanaya neyawena poxonaе atene neexana ichamonaе pia taneantobexae Nacom, iruru Nacom amanaya paca yawena pia paca necaantobexae poxonaе paca atene exana ichamonaе. <sup>8</sup>Nacom yaputane xua bichocono bara paca antobetsi daxita paxam, icha Jesucristo ichi xua daxita paca antobe. <sup>9</sup>Yawano Nacom paca tsiwucatsi xua equeicha matowa mataropeicha painya nepaca catsinexa peantobewa. Yawa muxuna wucan xua Nacom paca cana exanaena xua painya neyabara yaputaewa daxita coyenewan. Matautano muxuna wucan xua Nacom paca cana exanaena xua painya neitapetsiwa pocotsi coyene xua betiya paca cana exanaena. <sup>10</sup>Bapoxonaе payaputaename xua itapetsiya paexanaename pocotsi coyene bichocono xanepana. Bapoxonaе bichocono pajuntu coyene xanepanaya jinompaename. Yawano poxonaе Cristo patopaetsica bapon jopa paca yabara paebi tsane xua panatsicuentame abe painya neexanaewan. <sup>11</sup>Paca

tsiwacatsino xua Jesucristo paca necajuntũ coyene yuca exanaenexa, xua po juntũ coyene bichocono xanepana, xua daxota painya neexanaenexa pocotsiwa xua bichocono Nacom tsita xanepanatsi. Poxonae jiwi baxua paca cui taena bapoxonae jiwi Nacom wunaec jaintsinchi jei tsane: “Maisa Nacom paca baru cui itura jinatsi, xua jinya neexanaexae barapo jiwi pia juntũ coyenetha tatsi”, jei tsane barapo jiwi.

**Meje poxonae Pablo namchi:  
“Xua tapoponae coyenewa  
bara apara Cristo nexa”, jei**

<sup>12</sup>Tamonae pam, pomonae irũ painya nejume cowantsixae Jesús, ichichipan xua painya neyaputaewa tsane xua po coyene poxonae necana exana ichamonae xua jiwi pecubi botha neeta tayabara cueicueijeixae Jesucristo. Baxua tana necana exanaexae ichamonae jiwi tajũ jume tane Nacom pia pecapanenebiyae diwesi jume tatsi. <sup>13</sup>Daxota daxita soldadomonae pomonae xote umene pomonae peyapu eenaewi pepa pentacaponaein pia bo tatsi irũ seicayano ichamonaerũ, daxita barapomonae yaputane xua xan jiwi pecubi botha neeta tapaebi ducuaenaebiyaexae Cristo nexa. <sup>14</sup>Pin bicheito, pomonae pejume cowantsiwi Nacom, barapomonae netane xua jiwi pecubi botha ecan. Daxota barapomonae bichocono ichichipa xua pecueicueijejiwa Nacom Pejume Diwesi. Barapomonae jopa junuwiyo xua cui tsacatsacapiya pecueicueijejiwa Nacom Pejume Diwesi, tsipei bichocono jume cowantatsi pon jiwi Pecanamataxeinaein.

<sup>15</sup>Ichamonae Cristo yabara cueicuei-jeichi apara poxoru saya tana neuwixae, tsipei ichichipa xua jiwi baru cui itura jinaena barapomonaetha, beyacaincha xua tana nebaru cui itura jinaewa tsane

barapo jiwi. Ichitha jame, ichamonae beta xaniwaicha yabara paebatsi Cristo, pejuntũ coyene xanepanaexae. <sup>16</sup>Barapomonae baxua exana taneantobexae peyaputaexae xua jiwi pecubi botha ecan tayabara jume yawenaeya cueicueijeixae Cristo pia pexeinya jume diwesi tatsi poxonae ichamonae abe yabara paeba barapo diwesi. <sup>17</sup>Pomonae Cristo yabara paebatsi tana neuwixae, saya apara poxoru peasiwixae xua ichamonae tana nepuna ponaewa tsane. Baxua exana poxoru ichichipa inta bichocono ayapube exana tsipei anoxuae ecan jiwi pecubi botha. <sup>18</sup>Bequein jiwi Cristo xainyeya yabara paebatsi poxoru tana neantobexae, ichacuihitha metha tsipae poxoru tana neuwixae baxuan bapana jopa netsita ainya cuiyiyo. Saya jame poxonae ba jiwi Cristo yabara paebatsi, baxua ba jame bichocono nejuntũ coyene weiweina exana.

<sup>19</sup>Yawa equeicha bichocono nejuntũ coyene weiweina exanaponaena, tsipei yaputan xua painta wucame nawita Nacomtha. Yawa yaputan xua Jesucristo pia Pejumope tunaxũ tatsi neyawena, pebaxuaxaebe bara Nacom necapanepaena pomonae tana neaitafaetabi jiwi weya. <sup>20</sup>Pocotsiwa xua taichichipaewa yawano pocotsiwa xua tawunaewatsiwa, xua bapana jopa tacoutha naacauran tsane tajunuwixae xua tayabara cueicueijejiwa Cristo. Jame bewa yabara cui tsacatsacapiya cueicueijan tsane Cristo, anoxuae, yawa xua bexa tsaneno. Ichichipan xua jiwi beta jume cowantsina xua poxonae netane xua beta tapoponaewa Cristo nexa. Bapoxonae jiwi Cristo baru cui itura jinaeinchi poxonae necui taena xua beta xanepanaya poponan Cristo nexa. Baxua jiwi exanaena poxonae bequein asũ poponaethan tsane, xua Cristo tatsita poponaewa yawa poxonae bequein tupaethan tsane xua Jesucristo

tayabara cueicueijeixae. <sup>21</sup>Jame pocotsiwa netsita xanepana apara xua jiwí Cristo barũ cui itura jinatsi, xua Cristo tatsita poponaewaxae. Ichitha icha tũpaein Cristo taein, baxua netsita xanepana bichocono, beyacaincha xua poxonae abu cataunxuae poponan, tsipei Cristo taein. <sup>22</sup>Awiya cataunxuae poponan daxota neitacũpa xua awiya tanacuichiwa pocotsiwa pexanepanae coyenewa pon jiwí Pecanamataxeinaein nexa. Jopa yaputaeyinyo xua barapo naxobe coyenewabe jiwana itapetocuaein. <sup>23</sup>Inta bichocono ayapube xua barapo naxobe coyenewabe jiwana itapetan. Ichacuitha saya betũpaein xua tapoponaenexa tsane ichaxota Cristo popona, tsipei baxua jame inta bichocono xanepana. <sup>24</sup>Daichitha ichacuitha jame bichocono inta ainya cui xua awiya tapoponaewa tapaca cayawenaenexatsi. <sup>25</sup>Ichitha yaputan bara, xua awiya poponan xua tapaca yawenaenexatsi xua awiya painya nejume cowũta dubenanaebiyenexa Cristo. Matautano yaputan xua bichocono equeicha matowa painya nejũntũ coyene weiweina tsozonaenexa tsane. <sup>26</sup>Daxota poxonae paca siwa ponaeinchi Cristo Jesús wũnae pajainchiname xua equeicha tapaca casiwa ponaexaetsi tsainchi.

<sup>27</sup>Saya beta xanepanaya painompare wanaca itorobixae Cristo pejume diwesi tatsitha. Daxota icha bequein paca siwa ponaeinchi, ichacuitha icha tajũ ecan, maisa ichichipan xua ichũn yabara benetsipaebina xua beta painya nejinompaewa. Bejume taein xua xanepanaya beta ajũntũyapũsũya pajume cowũta dubenanaebiyame Nacom. Matautano bejume taein xua caemonae pebũrũya jume daunweya pana nabarũ cueicueijam painya nejume cowũtsiwa Cristo. <sup>28</sup>Jopa pajunuwinde

poxonae imoxoyo abe paca exaneiba painya nepaca caaitafaetabi jiwí. Baxuan barapomonae exana be tsita itapeinya xeina xua barapomonae weraweracaena xua poxonae po mataqueitha poxonae Nacom yabara paebina jiwí xua penatsicuentisiwa abe peexanaexae xua irũ Nacom paca capanenebiyaena barapo mataqueitha. <sup>29</sup>Nacom pexeinya coyene paca cata painya netanacuichinexa Cristo xua poxonae pajume cowũntame bapon, matautano xua poxonae ichamonae paca atene exana poxonae ichamonae abe paca yabara paeba painya nejume cowũntsixae bapon. <sup>30</sup>Waxainchi bara nanta jũpaya jume cowũntsiya daunweya paebatsi Nacom Pejume Diwesi. Baxua exanatsi icha be pocotsi coyeneya ichi poxonae bayatha pana netaneme xua poxonae jume daunweya paeban Nacom Pejume Diwesi, matautũ xua poxonae bara pana neyabara jume taneme xua awiya cataunxuae exanaponan barapo coyeneya.

**Meje yabara xua Cristo peacopeibin pia coutha naexana, xua jopa peainya cui jityno**

**2** Payaputaneme xua Cristo paca jũntũ coyene tsacaba xua beta painya nejinompaenexa. Matautano payaputaneme xua Cristo paca matateica pia painya nepaca caantobexae poxonae ichamonae abe pacata exana. Matautano payaputaneme xua Nacom pia Pejumope tũnaxũ tatsi paca barũ jinompa. Matautano payaputaneme xua bapon paca antobe. Matautano payaputaneme xua Cristo nantanuweya paca yabara nanta xeina pia paca necayawenaenexa. <sup>2</sup>Ichaxo daxita barapo pexainyei coyenein payaputaneme, bichocono pana nejũntũ coyene weiweina exande. Baxua painta exanaename poxonae caemonae

jüntema pajinompame, xua caemonae nantiya pana naantobem. Matautano baxua painta exanaename poxonae xua caemonae nanta jupaya pana nabaru nanta xeiname yawano poxonae nanta jupaya ichipaeya paexaname. <sup>3</sup>Jopa paexanaeinde xua pocotsiwa be paasiwam xua saya meisa painya coutha nexa. Jopa paxeinaeinde po cui coyene xua jiwi peaebi coyene. Jame maisa painya coutha pana nayabara nanta xeinare xua pomonae pecui pawi jiwi pam. Jame maisa sayano ichamonae pacui yabara nanta xeinare xua pepa peainya cuimonae xua beyacaincha paxam. <sup>4</sup>Jopa bewa panantausim painyamonaе jiton pon saya ichichipa nawita xua saya meisa penata exanaewa pexanepanae coyene. Jame bewa muxuna bapon taexanae ichamonae pocotsiwa xua ichamonae tsita pexeinya coyenetsi. <sup>5</sup>Paxam beta peburuya pananta jupaya nanta xeinare icha Cristo Jesús ichi xua poxonae beta ba nanta xeina. Bapon bara iche: <sup>6</sup>Bapon Cristo peyacuiya jinaein Nacom. Bapon bequein barapara Nacom, daichitha bapon jopa pia coutha ichichipaeya daunweya botsiyo barapo coyenewa xua peyacuiya jupae jinaein icha Nacom ichi poxonae patopeica po cae pin nacuathe tsique. <sup>7</sup>Daichitha barapo coyene naitematsiya cuenta pona. Bapon Cristo be jiton yacuiya naexana po cae pin nacuathe tsique xua Nacom amanaya petanacuichinexatsi xua pia coya peichichipaexae. <sup>8</sup>Poxonae bapon naexana po cae pin nacuathe tsique bara yatsicaya be jiton coyene. Bapoxonae pia coutha nacana exana be pon

peacopeibin xua jopa peainya cui jityno. Bapon exana pocotsiwa Nacom itoroba poxonae jejei xua tupa pecana exanaewatsi ichamonae, bequein barapo petupaewa bichocono pin ura exanatsi xua tupa naetotha. <sup>9</sup>Daxota Nacom, Cristo bichocono baru cui itura jinatsi poxonae Nacom athabe juinya exana xua Cristo athabe juinya exanatsi. Matautano Nacom baru cui itura jina, Cristo baru cui itura jinatsi poxonae Nacom bapontha wun duta, po wun xua jei: “Pepa Pecanamataxeinaein”, jei. Barapo wuntha Jesús copatatsi xua bara pecanamataxeinaenexa pia peayapusu itorobi coyenewatha daxita carepaya jiwi, matatsunpiwithano. <sup>10</sup>Nacom barapo wun cata xua daxota daxita jiwi poxonae jume taena barapo wun pentabocotontha umenaena, xua Jesús wunae pejainchinexa tsainchi, pepa Pecanamataxeinaeinxae itabocopiwi, iruru po irathepiwi, iruru pomonae jinompa ira buxupana wetsina. <sup>11</sup>Daxita barapomonae Nacom wunae jainchinchinchi pon Nacom, Waxa, jei tsane: “Maisa, Nacom paca baru cui itura jinatsi, tsipei bapon Jesucristo bara yatsicaya pon pepa Pecanamataxeinaein jiwi”, jei tsane daxita barapomonae.

**Meje yabara xua ichamonae,  
Nacom pejume cowantsiwi  
beta cui yaputainchi**

<sup>12</sup>Tamonae pam paxam pomonae bichocono tapaca caantobewichi

pam. Tsipei bayatha pana nejume cowanteibame pocotsiwa paca itorobeibatsi poxonae paca baru ecatsi, daxota anoxuae nama bichocono pana nejume cowande beyacaincha xua poxonae imoxoyo paca baru ecatsi bequein tajū ecan. Awiya cataunxuae carepaya daxita paxam barompaya paexana dubenanaebiyama pocotsiwa xanepana xua pocotsiwa Nacom ichichipa xua Nacom painya nepaca capanepaexae. Pana najuntū coyene aura exande xua jopa paatsacande. Yawano pana najuntū coyene junuwa exande Nacomtha, abe painya neexanaeyainwa. <sup>13</sup>Bapon Nacom paca cana juntū coyene yawena xua painya juntū coyene, jume baru jejei pocotsiwa Nacom paca itoroba. Matautano Nacom paca yawena xua painya neexanaewam pocotsiwa Nacom ichichipa.

<sup>14</sup>Daxita coyewanan poxonae paexaneibame jopa paexanaeinde pocotsiwa anaya painya juntū coyewatha payabara paebame ichamonae. Matautano jopa payabara najume matsontsonobinde baxua poxonae Nacom pata exaneibame. <sup>15</sup>Bapoxonae poxonae jiwi paca cui taena, barapo jiwi jopa abeya paca cui yabara paebi tsane xua painya nenatsicuentsiwa xua abe painya neexanaexae. Matautano paca cui taena xua jopa ajuntūcoyenebeyapa jinompaem. Jame maisa painompare be Nacom piamonae tatsi coyeneya. Matauta jopa abe paexanaeinde xua icha pomonae anoxuae paca baru jinompa pomonae pemuxuitorobiwi xua pomonae peantucuiruyapubewi xua poxonae abe exana dubenanaebiya. Icha paxam beta pajinompame barapomonae peitūtha tatsi, bara paca tane xua bara beta pajinompame bequein abe peexanae jiwi nataetha, icha be pocotsi juta coyeneya ichi xua

opitei ba poton pentha tsurubenae poxonae quirei tsuncuae, bara ba jiwi tane barapo opiteiton bequein quirei tsuncuae taetha. <sup>16</sup>Daunweya pajume cowanta dubenanaebiyama po diwesi jiwi ajuntūyapusu exanatsi. Daxota poxonae Cristo patopaetsica bichocono paca weyataeinchi tajuntū coyewatha beta xaniwaichiya painya nejinompaexae Nacom nexa. Bapoxonae yaputaecin xua xaniwaicha bara beta paca yawenatsi xua painya nejume cowuntsiwam. <sup>17</sup>Bequein metha jiwi nebexubina xua tapaca cayawenaexaetsi, xua painya nejume cowuntsinexa, daichitha awiya juntū coyene weiweinan, irurū paxam paca cayawa juntū coyene weiweinaeinchi. <sup>18</sup>Daxota paxam bewa pana nebaru juntū coyene weiweinaename, bequein tūpaein xua tapaca cayawenaexaetsi xua painya nejume cowuntsinexa.

**Meje Timoteo yabara iru  
xua Epafrodito yabara**

<sup>19</sup>Icha Jesús pon jiwi Pecanamatax-einaein ichichipaena, methaunxuae itorobin Timoteo painya nepaca cataenexa tsane. Bapoxonae juntū coyene weiweinaein xua poxonae paca yabara jume taeinchi xua netsipaebina Timoteo. <sup>20</sup>Tsipei ichun ajibi pon paca siwa yabara nanta xeina icha xan ichin. Saya meisa bapon Timoteo bichocono paca siwa yabara nanta xeina xua beta painya nejinompaey coyenewa icha xan ichin xua bichocono paca siwa yabara nanta xeinatsi. <sup>21</sup>Ichamonae saya itapetsiya yabara nanta xeineiba barompaya pia peexanae coyewanan. Barapomonae jopa nanta xeinaeyo xua pocotsiwa Jesucristo pia petaxanaewatsi coyewanan tatsi. <sup>22</sup>Paxam pataneme xua Timoteo neyawena xua pecueicueijeiwa Nacom Pejume Diwesi, icha be

coxiyũn ichichi xua poxonae pexanto yawenatsi. <sup>23</sup>Xua poxonae yaputaein xua ichamonae necana exanaena, bapoxonae beitorobin Timoteo xua pia paca necataenexa. <sup>24</sup>Jume cowũntan pon jiwi Pecanamataxeinaein xua necopata xua irũ methaunxuae paca siwa ponaeinchi.

<sup>25</sup>Matautano nanta xeinan xua bewa pacata itorobinchi Epafrodito, pon be taeweicho tatsicotaein, irũ pejume cowũntsixae Jesús, pon taneyawenaein xua cueicueijan Nacom Pejume Diwesi. Bapon jume daunweya pacuidubanbe poxonae bequein ichamonae abe yabara paeba Nacom Pejume Diwesi. Bapon Epafrodito, pon bayatha painta itorobame xua taneyawenaewa tsane pocotsiwa nantawenonan. <sup>26</sup>Maisa bichocono bapon bepaca taena daxita paxam. Bapon bichocono jũntũ coyene wecoyei tsipei pinae paxam payabara nanta xeiname, pinae pajam: “Maisa bichocono Epafrodito nacata atene tsocuae”, pinae pajam. <sup>27</sup>Bara xainyei, bapon bayatha bichocono atene bara muxu petũpae. Daichitha Nacom nantanuweya yabara nanta xeina xua Epafrodito axaibi peexanaewa tsainchi. Matautano Nacom irũ nantanuweya neyabara nanta xeina xua jopa bichocono tajũntũ coyene wecoyeiwa tsane icha bapon petũpaexae tsipae, xua beyacaincha jũntũ coyene wecoyan poxonae xua copiya, xua poxonae saya atene. <sup>28</sup>Daxota bichocono ichichipan xua bapon nainya pacata itorobinchi. Bapoxonae pajũntũ coyene weiweinaename xua equeicha painya netaexae tsane bapon. Matautano bapon itorobin xua jopa tapaca yabara jũntũ coyene wecoyexatsi. <sup>29</sup>Moya bara bichocono pantenta jũntũ coyene weiweinaeya jacobare Epafrodito xua pepatopaexae, pon jiwi Pecanamataxeinaein peitorobixae. Epafrodito

beta pabarũ cui itura jinare. Bara paichinde ichamonaetha, pabarũ cui itura jinare pocotsimonae icha bapon ichi. <sup>30</sup>Bapon bara muxu pebexubichi xua Cristo petanacuichixaetsi. Bapon penapepeichiwatha naexana, inta pewetsinexa pocotsiwa xua jopa paca itacũpaeyo xua painta exaname.

### Meje yabara xua po coyene pepa pejũntũ coyene xanepanaewa

**3** Tamonae pam, pomonae irũ painya nejume cowũntsixae Jesús, pajũntũ coyene weiweinare pon jiwi Pecanamataxeinaein pia pacata exanaexae. Jopa afaetabinyo xua equeicha jupa matowa tapacata tinaewatsi pocotsiwa bayatha pacata tinatsi. Bara apara baxua paca yawena xua beta painya netsita jinompaenexa Nacom. <sup>2</sup>Dota pam pomonae peantũcoyenebe jiwi yawano xua abe peexanaewi. Matauta dota pam pomonae judiomonae pia cui coyeneyatha tatsi paca itoroba xua painya nenawi thabiwam po coyene xua pawu thabame pebiwi xua ichaxota nareixacaena. Barapomonae nanta xeina xua icha baxua exanaena Nacom capanenebiya exanaena. <sup>3</sup>Waxainchi xaniwaicha barapomonaetsi pomonae yatsicaewa Nacom watsita jũntũ coyene xanepanaewichi, tsipei Nacom pia Pejumoŋe tũnaxũ tatsi naca yawena xua jume cowũntatsi watanacuichinexa Nacom. Matautano wajume cowũntsixae Cristo Jesús, daxota bapontha wũnae jaintatsi pia wanacata exanaexae. Waxainchi jopa nanta xeinaetsi xua poxonae ichamonae naca wi thaba, barapo coyene naca jũntũ coyene xanepana exana Nacomtha. <sup>4</sup>Icha pebiwi itacũpaetsipatsi xua jume cowũnta xua pia coutha nacapanenebiya, barapoxonae irũ xan neitacũpaetsipa

xua jume cowuntan xua tacoutha tanacapanepaewa beyacaincha xua barapo pebiwi. Ichitha pebiwi iru xan, jopa pana neitacupaeyo xua pana nacapanenebiyan pata coutha. <sup>5</sup>Caena bayatha tacoutha nanta xeinan xua tacoutha tana nacapanepaewa pocotsiwe taexanaexae. Poxonae naexanan ocho po matababitha newi thaba. Matautano xan bara israelmonae pia saineiwi jiwanan. Matautano Benjamín piamonae tatsi jiwanan tsipei pia pemomoxi susato jiwi jiwana pin tatsin. Matautano yacuiya naexanan xua hebreo jume tacueicueijejwa, taxa iru taena hebreo jume pepaebiwixae. Matautano bayatha fariseomonaepin naexanan, xua daxota daxita coyeneya beta xanepanaya exanan be pocotsi coyeneya Moisés pia peitorobi coyenewatha itoroba. <sup>6</sup>Bichocono jume cowuntan pocotsiwan fariseomonaepia pecuidubi coyenewan tatsi. Daxota abe exanan pomonaetha pomonae Jesús pejume cowuntsiwichi. Tsipei daxita coyenein exanan pocotsiwa Moisés pia peitorobi coyenewa itoroba, daxota nanta xeinan xua yatsicaewa juntu coyene xanepanan Nacomtha xua jopa xainaeyo tanatsicuentisiwa xua abe taexanae coyenewa. <sup>7</sup>Daxita po coyenein xua bayatha inta netsita ainya cui, porucae jopa daichiyo. Anoxuae netsita acoyenebe barapo coyenein, tajume cowuntsinexa Cristo. <sup>8</sup>Matautano daxita inta newepu napuxana pocotsiwa xua bayatha nanta xeinan. Xua yaputan Cristo Jesús Tanecanamataxeinaein, baxua jame inta wunae bichocono beyacaincha xua daxita pocotsi coyenewan copiya bayatha xeinan. Cristo Pejume Diwesi tacueicueijeixae daxita newepu napuxana pocotsi coyenewan bayatha

xeinan. Barapo coyenein yabara nanta xeinan, xua barapo coyenein abe, be pocotsiwa jiwi xuba pocotsiwa abe. Po coyenein xua copitha xeinan barapo coyenein pentan tanantausinxaxa Cristo pon Tanecanamataxeinaein. <sup>9</sup>Ichichipan xua be caein naexanan Cristotha xua tajuntu coyene Nacom petsita xanepanaenexatsi bapon pia tana necana exanaexae barapo coyene. Barapo coyene necana exana Nacom, jopa poxoruyo xua tajume cowuntsixae Moisés pia peitorobi coyenewa xua daxota tajuntu coyene xanepana Nacomtha. Jame barapo coyene necana exana Nacom xua be caein naexanan Cristotha, poxonae jume cowuntan, poxoru Nacom tanecatsixae pejuntu coyene xanepanaewa. Barapocotsi coyenewa ba Nacom cata jiwitha pomonaetha pomonae pejume cowuntsiwixaetsi. <sup>10</sup>Pocotsiwa taichichipaewa baraxua xua apara jame tayaputaewa Cristo. Matautano be yaputaein peayapusu itorobiwa, po peayapusu itorobi coyenewatha Jesús asu exainchi barapo petupa cuiru coyene weya. Bequein ichamonae atene neexanaena, icha Cristo ichichi xua poxonae atene exanatsi ichamonae, daichitha awiya cataunxuae ichichipan xua taexanaewa pocotsiwa xua Nacom ichichipa. Poxonae Jesús tsitupa jiwi, barapara exana pocotsiwa Nacom ichichipa, jopa exanaeyo xua pocotsiwa bapon pia coutha ichichipa. Xan bara juta ichiya ichichipa exanan xua pocotsiwa Nacom ichichipa. <sup>11</sup>Yawano ichichipan xua baxuan exanaein beya poxonae Nacom asu neexanaena po mataqueitha Nacom asu exanaena petupa cuiru coyene weya pomonae iru pejume cowuntsiwixaetsi.



**Meje yabara xua po pentoma  
Nacom pia wanaca catsiwa,  
jüntema beta waexanaexae**

<sup>12</sup>Jopa paebinyo xua xeinan barapo coyene, po coyeneyatha xua Nacom asu neexana petupae cuiru coyene weya. Matautano jopa paebinyo xua Nacom bayatha xaniwaicha jüntu coyene xanepana neexana xua jopa daxota abe taexanaewa. Daichitha awiya yabara nacuichiya exana ducuaenaebiyen xua taxei naenexa barapo coyenewa tsipei Cristo Jesús copiya neexana be piamae jiton tatsin. <sup>13</sup>Tamae pam, pomae iru painya nejume cowuntsixa Jesús, paca tsipaebatsi xua jopa cataunxuae baxua wetsinyo xua tajüntu coyene bara xaniwaicha bayatha nejüntu coyene xanepana exana xua jopa xei naeyo peabe coyenewiyo. Ichitha bara saya cae coyene exanan. Jüntemai na xua pocotsiwan bayatha exanan, saya meisa bichocono yabara nacuitan pocotsiwa be xa tsane xei naein. <sup>14</sup>Bichocono ajüntuyapusu exana ducuaenaebiyen xua pocotsiwa Nacom ichichipa, be xa taxei naenexa po pentoma pocotsiwa Nacom naca catsina poxona naca wabina pia naca beicha cae nae wayawa jinompaexae Cristo Jesús.

<sup>15</sup>Daxita waxainchi, pomaetsi xua bayatha beta yabara yaputaetaepoinchi wajume cowuntsiwa Nacom, waxainchi be xa yabara nanta xei naetsi po coyene xua waxainchi cataunxuae abu jopa xei naetsi po jüntu coyene xua yatsicaya xanepana xua daxota jopa abe exanaetsi. Daichitha icha paxam, icha coyeneya payabara nanta xei name pocotsiwa xu-aunxuae paca tsipaebatsi, bapoxona Nacom yabara paca yaputane exanaena baxua. <sup>16</sup>Daichitha waxainchi be xa awiya jume cowunta dubenanaebiyaetsi

pocotsiwa bayatha Nacom naca yaputane exana.

<sup>17</sup>Tamae pam, pomae iru painya nejume cowuntsixa Cristo Jesús, paexanapone icha ichin pocotsiwa xua exanaponan. Beta pacui taema poxonae pomae xua jinompa xua poxonae exanapona, icha pocotsi coyeneya paichin poxonae paca cuidubatsi. <sup>18</sup>Bayatha matowa paca tsipaebatsi. Anoxuae equeicha paca tsipaebatsi, be xa nama wecoyeya paca tsipaebatsi. Paca jeichi: “Pinmae jinompa pomae aichaxaibi po diwesi po coyene xua Cristo naetotha tsitupa jiwu”, paca jeichi. <sup>19</sup>Nacom barapomae weraweraca exanaena. Barapomae saya yabara nanta xei neiba penabanaewa xua matautano pocotsiwa Moisés pia peitorobi coyenewatha itoroba xua barapo pexaewa yabara. Barapomae yabara atsaca pocotsi coyene bequein barapomae be xa ita aura tsane baxua. Daichitha barapomae jopa yabara ita auriyo baxua. Saya barapomae yabara nanta xei na nawita pocotsiwan xua xei na po irathe. Jopa yabara nanta xei naeyo pocotsiwan xua Nacom nexa. <sup>20</sup>Ichitha nama waxainchi Nacom pia naca tatsipiwichi. Anoxuae waxainchi ewatatsi xua patopaetsica itaboco wetsica pon jiwu Pecapanenebiyaen, pon jiwu Pecanamataxeinaen, bapon Jesucristo. <sup>21</sup>Wapepon, po pepon jopa wunaetsi, po pepon atene yawa xua tupaena bapon equeicha icha pepon naca exanaena, pocotsi pepon icha Cristo ichi xua po pia pepon tatsi bichocono xei na pexei nya peitupanae coicha, xua po pia pepon tatsi jopa ateneyo, yawa xua jopa tupaeyo. Baxuan Cristo nacata exanaena pia peayapusu itorobi coyenewatha, po peayapusu itorobi

coyewatha itacupatsi xua daxita pecanamataxeinaewa.

**Meje yabara xua Pablo jei: “Ataya pajuntũ coyene weiweineibare pon jiwi Pecanamataxeinaeintha”, jei**

**4** Tamonae pam, pomonae iru painya nejume cowuntsixae Cristo Jesús, paxam pomonae bichocono tapaca caantobewichi pam. Bichocono ichichipan xua tapaca cataewa tsainchi. Paxam pomonae bichocono pana nejuntũ coyene weiweina exaname. Matautano paxam pomonae Nacom necata painya nejume cowuntsinexa Jesustha xua be tana nematomatsiwa, xua neyaputane exana xua bara exanan pocotsiwa xanepana poxonae tanacuitan bapon. Tamonae pam, paxam pomonae tapaca caantobewichi pam. Awiya beta pajume cowunta dubenanaebiyama pon jiwi Pecanamataxeinaein.

<sup>2</sup>Itoroban powa pewun Evodia, ich-awayono xua powa pewun Síntique xua barapowayobe equeicha penaita coxon-aenexabe xua be yatsicaewa caemonae jitowayo penaexanaenexabe pon jiwi Pecanamataxeinaein piamonae jitoway-obexae tatsi. <sup>3</sup>Xam ponxaem yatsicaewa tanebaru nacuichim Nacom Pejume Di-wesi, caitorobatsi xua barapowayobe neyawenaenexa tsane. Barapowayobe bayatha neyawenabe poxonae cueicuei-jan Nacom pia pecapanenebiyae di-wesi. Barapoxonae barapowayobe, iru Clemente iru ichamonaeno daxita barapomonae daunweya nebaru nacuita. Daxita barapomonae wun dubatsi diborotha po diborotha xua Nacom capanenebiya tsaibi jiwi xua jiwi pecatsibeibinexatsi peajuntuyapusawa poxonae wun dubeiba barapo diborotha, xua Nacom pia diboro tatsi.

<sup>4</sup>Paca jeichi: “Ataya patsita juntu coyene weiweineibare pon jiwi

Pecanamataxeinaein”, paca jeichi. Equeicha paca jeichi: “Ataya patsita juntu coyene weiweineibare”, paca jeichi. <sup>5</sup>Barabu beta pajinompaename xua daxita jiwi painya pia paca yabara yaputaenexa xua bara paxam pomonae pejuntũ coyene xanepanaewi pam, tsipei imoxoyo patopaetsica pon jiwi Pecanamataxeinaein.

<sup>6</sup>Jopa payabara nanta xeinaeinde nawita pocotsiwa ba paca juntu deidei-jei exana. Jame maisa Nacom patsipae-beibare daxita coyenein yabara. Nacom yabara pawuqueibare daxita coyenein. Matautano payabara jacobebare Nacom poxonae pocotsiwan paca catsibeiba pocotsiwan xua panantawenoname. <sup>7</sup>Barapoxonae Nacom paca juntu coyene junte miya jinompa exanaena. Barapo junte miya jinompa coyenewa jiwi ba jopa yabara yaputaeyo, tsipei bichocono pexeinya coyenewa. Barapo junte miya jinompa coyenewa paca juntu coyene eenaena. Matautano paca eenaena xua daxota beta painya nenanta xeinaewa tsane. Baxua paca cana exana paca necayawa jinompaexae Cristo Jesús.

**Meje yabara poxonae Pablo jei: “Payabara nanta xeinare daxitan pocotsiwan xua wunae”, jei**

<sup>8</sup>Tamonae pam, pomonae iru painya nejume cowuntsixae Jesús, paca tsipae-batsi nama anoxuae pocotsiwa xua tabu ducua paca tsipaebatsi pocotsiwa xua nama wetan. Payabara nanta xeinare daxitan meje xuaje po coyenein: po coyenein xua pexainyeyiwan, matautano po coyenein xua jiwi yabara nanta xeina xua pexanepanawan, matautano po coyenein xua xaniwaichiya pecana exanawan, matautano po coyenein xua Nacom patsita exanaewatsi pexeinya juntu coyenein, matautano xua po coyenein pexeinya peitupanae coye-

newan, matautano po coyenein xua jiwí peyabara barú cui itura jinaewan. Matapainya payabara nanta xeinare daxita coyenein po coyenein Nacom tsita coyene xanepanatsi, matautano daxita po coyenein jiwí bewa wúnae jainchina xua barapo coyenein pexanepanaexae.

<sup>9</sup>Paexanaponde po coyene xua paca cuidubatsi xua daxota panejume jejám. Paexanaponde po coyene xua panejume taneme xua cueicueijan. Matautano paexanaponde po coyene xua pana necuí taneme xua exanan. Bara baxuan paexanaponde bapoxonae Nacom pon peyawa jinaein jüntema pepoponae jüntu coyenewa, bara bapon paca yawa poponaena.

### **Meje yabara paratixi po paratixi jiwí cata Pablo nexa**

<sup>10</sup>Tsita jüntu coyene weiweinan pon jiwí Pecanamataxeinaein xua matapainya equeicha tapana neyabara nanta xeinaewam. Bayatha bequein pana neyabara nanta xeiname, daichitha jopa paca itacupaeyo xua tapana neyawenaexam. <sup>11</sup>Jopa paca tsipaebichi xua ichawa yabara pocotsiwa tanantawenonaewa, tsipei bayatha tacoutha yabara nacuiduban xua jüntema tapoponaewa pocotsiwa xua xeinan bequein inta acoibi ichawa. <sup>12</sup>Yaputan xua beta poponan poxonae bequein be pon taacopeibin. Matautano yaputan xua beta poponan poxonae nawita taxeiaein. Bayatha nacuiduban xua jüntema tapoponae coyenewanexa tsane bequein tonsanan, yawano bequein ichacuitha jainpeiban. Nacuiduban xua jüntema tapoponae coyenewanexa tsane bara bequein xeineiban beyacaincha pocotsiwa tanantawenonaewa, yawano ichacuitha bequein inta aibi pocotsiwa xua tanantawenonaewa. <sup>13</sup>Neitacupa xua daxita taexanaewa tsipei Cristo necata

pia peantuyapusúwa. <sup>14</sup>Daichitha paxam bichocono wúnae painta exaname poxonae pana neyawenename tapana nesiwamxae poxonae ichamonae jopa xanepanaya necana exanaeyo.

<sup>15</sup>Paxam Filipos tomarapiwí pam, payaputaneme poxonae copiya tamropata pitaban xua cueicueijan Nacom Pejume Diwesi, barapoxonae meisa paxam paratixi pana necataponame poxonae Macedonia nacua weya ponan. Icha tomarapiwí pomonae pejume cowúntsiwí jopa necatsiyo paratixi. Barapo paratixi pana necataponame be pentoma painta exaname yabara tapana netsipaebinexam po coyene xua tapaca cayawenaewatsi painya nejume cowúntsiwanexa Nacom. <sup>16</sup>Poxonae cataunxuae Tesalónica tomaratha poponan, paxam painta itorobame paratixi. Bapoxonae equeicha cotacaya painta itorobame icha paratixi xua tacana nantawenonaenexa. <sup>17</sup>Paca tsipaebatsi baxua jopa poxoruyo xua saya taichichipaexae equeicha xua tapanecatsiwam tsane icha paratixi. Jame apara poxoru ichichipan xua paxam bexa paxeinaename po pentoma xua Nacom paca catsina tapana neyawenaemxaem. <sup>18</sup>Bayatha matowa pana necatame beyacaincha pocotsiwa xua nantawenonan. Pocotsi paratixi painta itorobame xua inta capona Epafrodito, baxua inta bichocono nawita beyacaincha xua pocotsiwa nantawenonan. Barapocotsiwa pocotsiwa painta itorobame, Nacom bichocono ichichipa. Nacom baxua ichichipa icha ichi poxonae bichocono ichichipa po petuxusi tuxueiwa jiwí tuxusi exana Nacom nexa, yawa xua poxonae po duwei petautsiwa xua tuxusi exana Nacom nexa. Barapo pecana exanae coyenewabe Nacom tsita coyene xanepanatsi, yawa jüntu coyene weiweina exanatsi. <sup>19</sup>Tanacom

daxita paca catsina pocotsiwa xua panantawenoname, tsipei bapon bichocono copei pexeinaein pocotsiwa xua bichocono peitupanaewa. Paca catsina baxua painya neyawa jinompaexae Cristo Jesús. <sup>20</sup>¡Barabu jiwi, Nacom pon Waxa, ataya wanae jainchinchí! Je, bara ichi tsane.

**Meje yabara xua Pablo najume weta barapo carte**

<sup>21</sup>Painta jacobare pomonae baxotiya jinompa pomonae Jesucristo pejume cowantsiwichi pomonae yatsicaewa Nacom piamonae tatsi. Iru pomonae nebaru jinompa xote pomonae xua iru pejume cowantsiwichi Cristo

Jesús, barapomonae paca jacobae. <sup>22</sup>Iruru daxita pomonae Jesús pejume cowantsiwichi pomonae yatsicaewa Nacom piamonae tatsi, pomonae po tomarathepiwi, barapomonae paca jacobaru. Iruru paca jacobae pomonae romanomonae itorobiya pia pepa peewatsinchi pia botha tatsi tanacuitatsi. Barapomonae bichocono paca jacobae, beyacaincha ichamonae poxonae paca jacobae.

<sup>23</sup>Barabu Jesucristo, pon Wanacanamataxeinaein, daxita paxam paca juntu coyene yawenaena pia paca nacaantobexae.

Baja Pablo.

## Meje Po Carte Pablo Tatina, Colosas Tomarapiwi Tatinatsi

### Meje yabara poxonaē Pablo tamropata pitaba xua tatina pomonaē Colosas tomarapiwi tatinatsi

**1** Xan, Pablon, irū Timoteono, pon be painya neyapin jiton patsicotaneme xua xanno irū pon be tayapin tsicotan. Baponbe, panbe, paca jacobatsi. Xan, Pablon, Cristo Jesús pia peitorobiwi tatsi jiwanan xua Nacom peichichipaewaxae.

<sup>2</sup>Barapo carte pacata tinatsi pomonaē painya neenaewi Colosas tomaratha, pomonaē Cristo pajume cowuntame, irū pomonaeno yatsicaewa xanapanaya Cristo peitabaratha painya nejinom-paewino. Barabū Nacom pon Waxa, paca yawenaena pia paca necaantobexae, yawano jūntema jinompa paca exanaena.

### Meje yabara poxonaē Pablo Nacomtha tawuca pomonaē Jesús pejume cowuntsiwi

<sup>3</sup>Poxonaē Timoteo panbe pacata wūqueibatsi Nacomtha, pon Jesucristo Paxa tatsi, pon Wanacanamataxeinaein, pajan tsaibinbe: “Nacom maisa pajūntū coyene weiweinanbe xua barapomonaē necajume cowuntsixae”, pajan tsaibinbe. <sup>4</sup>Baxua papaebeibanbe tsipei bayatha Timoteo panbe Epafraſ pana netsipaeba. Epafraſ namchi: “Colosas tomaramonaē Cristo Jesús jume cowunta, —jei— yawa antobe ichamonaeno pomonaē pejume cowuntsiwi Jesucristo”, jei Epafraſ. <sup>5</sup>Paantobem ichamonaē, pomonaē pejume cowuntsiwi Jesús, yawa xua pajume cowunta dubenanaebiyame. Baxua paexaname tsipei payaputaneme xua bexa tsane Nacom paca catsina xua pia nacuatheicha xeina, xua

peantuyapusūwa po peantuyapusūwa jopa weraweracaeyo. Caena bayatha yabara paca tsiwūnaeya muxu duta poxonaē Nacom Pejume Diwesi pajume taneme. Baxua anoxuae cataunxuae paewatame. <sup>6</sup>Po diwesi xua pajume taneme Nacom pia pecapanenebiyae diwesi, barapo diwesi pejume xainyeiwa. Matautano barapo diwesi jiwi foforotapoinchi xua jume cocowuntapona, daxita carepaya tomarantha barapo cae pin nacuathe. Icha paxam paichim bayatha, barapo diwesi paca foforotapona xua pajume cocowuntaponame poxonaē aena pajume taneme barapo diwesi. Barichi payaputanemeno xua Nacom paca necaantobewa xua awiya cataunxuae paexanaponame. <sup>7</sup>Barapo Nacom pia pecapanenebiyae diwesi xaniwaicha caena bayatha Epafraſ paca tsipaeba. Bapon Epafraſ paantobein. Bapon Epafraſ xaniwaicha Cristo yabara cueicueijeichi. Bapon baxua painta exanapona xua pana yawenapona xua Timoteo panbe pata ecaexaebe jiwi pecubi botha. <sup>8</sup>Epafraſ xote patopa. Bapon Epafraſ Timoteobe, pana netsipaebabe xua pinae paxam paantobem daxita pomonaē Jesús pejume cowuntsiwi Nacom pia Pejumoſe tūnaxū tatsi painya nepaca yawenaexae.

<sup>9</sup>Bara caena poxonaē aena, poxonaē pajume tanbe xua pinae Jesucristo pajume cowuntame, pomonaē Colosas tomarapiwi pam, Nacomtha pacata wūqueibatsi. Jopa seica paexaneibinyobe xua pacata wūqueibatsi Nacomtha, pajan tsaibinbe: “Nacom, yawende Colosas tomarapiwi yabara neyaputae exanaenexa xua peexanaewa tsane pocotsiwa ichichipame. Yawa care barapomonaē daxita peyaputae coyenewan po coyenewan nejumope tūnaxū cata

jiwitha”, pajan tsaibinbe Nacomtha. <sup>10</sup>Ichá paxam payaputaneme po coyene xua pocotsiwa Nacom ichichipa pon jiwi Pecanamataxeinaein xua pocotsiwa painya neexanaewa, bapoxonae beta pajjinaponaename Nacom pia paca necayawenaenexa. Bara be Nacom pia pexuí pana natsicotaneme tsipei baxua Nacom unthuthu jopa xua unthuthu weiweina. Jiwi paforotaponame xua Jesucristo jume cocowuntapoinchi. Daxota baxua Nacom unthuthu jopa xua unthuthu weiweina. Paca anthuthuyapusu exana. Matautano yabara paca yaputane exana xua painya neexanaewa tsane pocotsiwa Nacom ichichipa. <sup>11</sup>Timoteo iru xanno Nacomtha patsipaibeibanbe xua Nacom pia paca catsinexa tsane pia peitupanaewa xua peayapuswa, icha Nacom ichi xua xeina barapo peitupanaewa xua peayapuswa. Barapo peayapuswa paca yawena xua pajumefebame xua poxonae ichamonae paca itoroba xua abe painya neexanaewa. Yawa paca yawena xua juntu coyene weiweinaya paexaname xua jopa paaitaconaem, xua poxonae bequein ichamonae abe pacata exana. <sup>12</sup>Poxonae Nacom patsipaebame, juntu coyene weiweinaya pajacobare tsipei bapon Nacom paca yabara junteina abe painya neexanae cuiru coyenein. Bapoxonae Nacom tsita xanepanatsi painya juntu coyenein barompaya painyawan painya nexainaenexa pocotsiwa Nacom paca juntana jeba pia nacuatheicha xua painya nejume cowuntsixae bapon. Paca catsibina poxonae paxam bara xoteicha papatsiname. <sup>13</sup>Waxa, Nacom, wanaca capanepaexae Satanás pia peayapusu itorobi coyene weya tatsi, daxota anoxuae cauri pia pentacaponaein tatsi jopa equeicha cana exanaetsi xua wanaca canamataxeinaewa tsane.

Apara jame Nacom yatsicaewa naca cana exana xua bapon piamonae tatsi naexainchi pomonaexaetsi xua Pexanto tatsi pon Jesús itorobiya naca ewata, po Pexantoxae bichocono antobe. <sup>14</sup>Nacom Pexanto tatsi naca capanepa, naetotha wanaca tsitupaexae. Daxota daxita abe waexanae cuiru coyenein Nacom naca cayabara junteina.

**Meje yabara xua waxainchi  
pomonaetsi junteina jinompatsi  
Cristo wanaca tsitupaexae naetotha**

<sup>15</sup>Nacom bapon peinya pepoponaein, pon jopa pataeinyo. Ichitha Jesucristo bapon paxa yatsi itapeinya xeina, pon yatsicaewa patan. Caena bayatha poxonae aena bapon Jesucristo popona xua pewunaeya poxonae Nacom daxita forota barapo cae pin nacuathe. <sup>16</sup>Nacom daxita forota barapo cae pin nacuathe poxonae Jesucristo saya paxa taexana. Yawa daxita forota itabocotha. Matautano forotano xua jopa penatsita itapeinya xeinaewa, xuano xua penatsita itapeinya xeinaewa. Nacom exana daxita peitorobi coyenewan xua pomonae pentacaponaei nexa. Ichamonae jiwi itoroba nawita, ichamonae be conotha itoroba jiwi, daichitha daxita barapo coyenein Nacom exana xua barapo peitorobi coyenein. Jesucristo penacui yaputaexae xua ichichipa daxota daxita forota yawa bapon nata exana. <sup>17</sup>Caena bayatha bapon Cristo ataya popona poxonae cataunxuae jopa bapon foforotaponaeyo daxita. Cristo canamataxeina daxita daxota nacua xanepanaya wunaeya ducua. <sup>18</sup>Daxita pomonae Cristo jume cowunta be caein naexana. Bapon Cristo barapomonae pia Pecanamataxeinaeinchi tatsi. Baxua caunuta xua Cristo canamataxeina barapomonaetha pomonae pia pejume cowuntsiwixaetsi. Bapon

Cristo antujumopeyapusu exana pomonae pejume cowuntsiwichi. Bapon Jesucristo copiya asu nanta canaxanatsi petupaewatha. Daxota bapon canamata exanatsi xua canamataxeina daxita coyenein. <sup>19</sup>Nacom, Waxa, unthuthu weiweina bichocono poxonae Pexanto cui tane xua cui jupatsi Pexanto tsipei daxita xeina icha bapon ichi xua daxita xeina. <sup>20</sup>Daxita pomonae jinompa po cae pin nacuathe ita coxanatsi Nacomtha. Iruru pomonae jinompa athabeicha ita coxanatsi Nacomtha. Daxota Nacom Pexanto itoroba xua petsitupaenexa naetotha pomonae po cae pin nacuathepiwi, iruru pomonae athabeicha jinompa nexa, xua bapoxonae Nacom peita coxonaewa tsainchi yawa petsita najuntu coyene xanepana exanaewa tsainchi.

<sup>21</sup>Paxam copiya Nacom jopa paita coxonaem, be pomonae penanapaincha jinompaewi patsita naexaname Nacomtha. Yawa Nacom pia peaitafaetabi jiwichi pam, abe painya neexanae dubenanaebiyaexae painya juntu coyenewatha. <sup>22</sup>Ichitha nama anoxuae payaputaneme xua Cristo bayatha tupa naetotha xua poxonae bara jiton cuiru coyeneya. Daxota anoxuae Cristo paca cana exana xua Nacom paita coxoname pomonae pam pomonae copiya Nacom pia peaitafaetabi jiwichi pam. Poxonae Cristo tupa pia paca exanaenexa pomonae pam pomonae Nacom peitutha tatsi penthuthu cui xanepanae jiwi pam. Matauta paca cana exana xua ichamonae painya jopa nepaca yabara paebiwa xua abe painya neexanaewa. <sup>23</sup>Cristo paca exana xua xanepanaya painya nejinompaewa tsane Nacom peitabaratha. Baxua paca cana exana icha beta pajume cowunta dubenanaebiyaename Nacom pia

pexeinya pecapanenebiyae diwesi jume. Yawa jopa papentsinde xua paewatame xua pinae Nacom paca catsibapaeba, xua bayatha pajume taneme. Nacom paca catsina pocotsiwa pia nacua beicha xeina xua peantuyapusuwa xua jopa weraweracaeyo xua caena bayatha yabara paca tsiwunae muxu duta Nacom. Barapo pexeinya pecapanenebiyae diwesi bayatha Jesucristo pia pejume cowuntsiwi tatsi cueicueijeji xua daxita nacuan yajupaya. Iru xan, Pablon, paebaponandu barapo diwesi.

**Meje yabara poxonae Pablo  
Nacom Pejume Diwesi tsipaeba  
pomonaetha pomonae Jesucristo  
pejume cowuntsiwichi**

<sup>24</sup>Xan, Pablon, anoxuae juntea weiweinyaya poponan bequein neperaxa exana paxam nexa. Icha Cristo ichi poxonae peraxa exanatsi jiwi nexa, barichin xan neperaxa eexanaponaena paxam nexa pomonae Cristo pijimonae pamx-aem. Atenein beya poxonae wetsin pocotsi coyene cuiru Cristo bewa ajuntu-coyenetane tsoponae tsane pomonae pia pejume cowuntsiwichinexa. Bapoxonae Cristo pia coutha paebina xua xan eque-icha jopa atenein tsane. <sup>25</sup>Xan, Pablon, Nacom Pejume Diwesi tacueicueijeji jiton tana neitorobixae Nacom tapaca cayawenaenexatsi xua iru daxita carepaya jiwi pejume taetaeponaewa tsane barapo Nacom Pejume Diwesi. <sup>26</sup>Barapo diwesi caena bayatha Nacom moya yawun xeina xua jiwi jopa yabara yaputaeyo. Ichitha anoxuae barapo diwesi matapainya Nacom yabara yaputane exana pomonaetha pomonae pejume cowuntsi jiwixaetsi. <sup>27</sup>Barapo pexeinya jume diwesi Nacom caena bayatha moya yawun xeina xua jiwi jopa yabara yaputaeyo, ichitha anoxuae ichichipa iru yabara yaputane exana barapo pexeinya

jume diwesi pomonaetha pomonae jopa judiomonae naexanaeyo. Barapo Nacom moya peyawun xeinaewa xua apara Cristo paca yanaba. Daxota paewatame xua bexa Cristo paca catsina, xua caena bayatha yabara paca tsiwunae muxu duta Nacom.

<sup>28</sup>Daxota pacueicueijan barapo diwesi po diwesi xua Cristo yabara. Daxita jiwi pamuxu jan. Daxita jiwi pacuiduban Nacom pia peyaputae coyenetha tatsi, tsipei paichichipan xua Nacomtha xaniwaicha yajuntu coyene xanepanaya patsina xua be caemonae penaexanaewa tsane Cristotha.

<sup>29</sup>Daxota daunweya nacuitan Cristo tana necatsixae pia peyapusuwa xua bichocono ayapusu tacueicueijeinexa tsane Nacom Pejume Diwesi poxonae barapomonae tsipaeban. Barapo peyapusuwa jiwi tsita itutan poxonae daunweya nacuitan.

**2** Baxua paca tsipaebatsi pomonae painya nejume cowuntsiwa Jesucristo tsipei ichichipan xua painya neyaputaewa xua bichocono tapaca antobewatsi. Daxota bichocono pacata wuwacaponiebatsi Nacomtha. Iruno pomonae Jesucristo jume cowunta, pomonae jinompa Laodicea tomaratha, barapomonae iru tawucan. Iruru daxita ichamonae pomonae jopa netaeyo, tawucan. <sup>2</sup>Antuyapusuya Nacomtha pacata wucatsi, xua painya nepaca cajuntu coyene tsacarabi exanaenexa xua juntea painya nejinompaenexa xua caemonae nantiya painya nenaantobenexa. Matautano pacata wucatsi xua painya neyaputaenexa xua daxita peyaputae coyene xua daxota painya neyaputaewa tsane po coyene xua copiya Nacom moya yawun xeina po coyene xua Cristo yabara. <sup>3</sup>Cristo pon peyaputaen, pon daxita coyenein yaputane. Icha caein jiwana paxam, icha bapon ichichipa xua pexeinaewa

barapo peyaputae coyene, bu jame wuca. <sup>4</sup>Baxua paca muxu jeichi, tsipei jopa ichipaeinyo xua ichamonae paca cui caranababa xua naerabiya paca muxujainyaba po jumeintha xua naemata beta paeba. <sup>5</sup>Paca yabara cananta xeineibatsi, be natsicotan xua be paca baru popoinchi bequein taju ecan. Juntu coyene weiweinan xanepanaya jume cowuntsiya painya nejinompaexae Cristo, yawa juntu coyene weiweinanno xua painya nenacui xainwaetsiya jinompaexae Cristotha.

### Meje yabara xua jiwi pena juntu coyene xeina Cristotha

<sup>6</sup>Mexeya poxoru painya neyabara jume cowuntsixae xua pinae Jesucristo pon painya Nepacacanamataxeinaein, daxota bewa bara paraichim bewa caemonae pana naexanaem Cristotha xua xaniwaicha painya nejinompaenexa bapontha. <sup>7</sup>Paitacoxonaya yaputaeponde Cristo painya pewunaein jiton. Matowa yabara pana nacuidudubaponde Cristo pocotsiwa bayatha exana. Matowa paexande xua pocotsiwa bapon paca itoroba. Mataropeicha payaputaeponde xua pexainyeiwa jume, icha matha ichi xua ichun paca cuiduba poxonae pajume cowuntame Jesucristo. Yawa matowa pajande: “Nacom, maisa pajuntu coyene weiweinan xua painta exaname”, pajan tsaibinde.

<sup>8</sup>Dota pam tsipei jopa ichipaeinyo xua ichamonae paca cui caranababa xua naerabiya paca muxujainyaba xua painya neexanaewa tsane xua naemata beta paeba. Pomonae xua paca cuiduba pia peitorobi coyenein, baraxua apara jopa Cristo pia peitorobi coyenewa tatsi. Apra saya pon pepawi, bapon pia peitorobi coyenein tatsi, apra saya nacua pia peitorobi coyenein tatsi.



<sup>9</sup>Nacom Pexanto cana nayawa exana xua Cristo xeina daxita i dapo coyenein, po coyenein Nacom xeina. Barapo coyenein bapon Cristo xeina pon pepa pebin naexana Nacom Pexanto tatsi. <sup>10</sup>Apara Cristo piamonae tatsi pam. Cristo, bapon compa yatsicaya Pecanamataxeinaein cana exanatsi xua daxita canamataxeinatsi pomonae itabocotha peitorobiwi pia peayapusuwatha. Poxonae Cristo panantautame, jopa ichauyo pacata seicaeyo xua paxeiname xua pocotsiwa Cristo juntema popona paca exana. <sup>11</sup>Paxam anoxuae icha juntu coyene paxeiname Cristo painya nejume cowuntsixaemxae, yawano poxoru painya nenantu cui barapentsixaemxae xua abe paexaname. Icha judiomonae ichi xua nawi thaba ichaxota pebiwi nareixacaena bapana baxua jopa paca juntu coyene capanepae abe painya neexanae cuiuru coyenein weya. Jame xua Jesucristo naetotha tupa, baxua jame paca unthuthu coyene capanepa abe painya neexanae cuiuru coyenein weya. <sup>12</sup>Poxonae ichun paca bautisaba, be paca muthutha penta, icha Cristo ichichi poxonae muthutha xotsi. Bara paca juta ichi. Yawa poxonae xua pamatawunname be equeicha asu pajinompame, icha Cristo ichichi poxonae Nacom asu exana Pexanto poxonae equeicha itowan popona. Bara paca juta ichi painya nejume cowuntsixae Nacom. <sup>13</sup>Caena bayatha paxam jopa paichichipaem xua painya neexanaewa pocotsiwa Nacom paca itoroba poxoru saya abe painya neexanae jiwi pam. Daxota Nacom be pomonae pewerapae jiwi patsita jinompame. Saya u abe peexanae cuiuru coyenein painya nenanta xeina dubenanaebiyaxaemxae, poxoru saya abe painya neexanaewi. Baxua paexaname poxoru barapo peabewa

paca itata cadopiteiba xua abe painya neexanaewa tsaibi tsane. Jopa Nacom pajeichim poxoru paxam barapocotsimonae pam, pomonae jopa judiomonae naexanaeyo pam po judiomonae nawi thaba ichaxota pebiwi nareixacaena, Nacom paca exana xua anthuthucoyenesuya painya nejinompaewa xua Cristo painya neyawa jinompaewa. Bapon Nacom nacata juntemaina xua daxita abe waexanae cuiuru coyenein. <sup>14</sup>Nacom jopa naca yabara paebiyoy xua abe exainchi poxonae bara bequein jopa exanaetsi po peitorobi coyenein judiomonae exana xuano xua naca cui itoroba xua po peitorobi coyenein bequein Nacom itoroba. Daxota Nacom jopa naca yabara paebiyoy xua abe exainchi tsipei Cristo naetotha cobe matatabarutatsi xua pentoma nacata exana xua wanaca capanenebiya exanaenexa abe waexanae cuiuru coyenein weya. <sup>15</sup>Poxonae Cristo naetotha tupa, Cristo pecui pawu cana exana po pentacaponawewi xua abe peexanaewi xua barapomonae peamanayabixaetsi. Daxota barapomonae jopa xeinaeyo peitorobi coyene xua peayapusu coyene. Pin bicheito itabaratha Cristo aura exana pentacaponawewi. Anoxuae Cristo pentacaponaein exanatsi xua daxita barapo jiwi pecanamataxeinaenexatsi.

**Meje yabara xua jei: “Itapeta payabara nanta xeinare xua pocotsiwa Nacom juntana jeba jiwi, pia nacuatheicha”, jei**

<sup>16</sup>Daxota dapon ajibi pon itacupatsi xua painya nepaca yabara paebiwa xua abe painya neexanaewa xua pocotsiwa painya nexaexae, xuano xua pocotsiwa painya neapaexae. Matautano bapon jopa itacupaetsi xua painya nepaca yabara paebiwa xua abe

painya neexanaewa po matcabitha poxonaе jiwi tsinacacetuta pin pexaewa xua penabanaewa tsane, matautano xua paexaname po mataqueitha poxonaе jomocoichato aena equeica, matautano po matcabintha poxonaе pentaquei seicaе matcabin poxonaе jiwi jopa nacuichiyo. <sup>17</sup>Caena bayatha barapo peitorobi coyenein judiomonaе cuidubatsi Nacom, xua saya u pejume. Barapo jumeintha judiomonaе cuidubatsi Nacom, xua yabara yaputane peexanaenexa tsainchi pocotsiwa bexa Cristo exanaena. Aparа bayatha Cristo patopeica. Icha paxam paichichipame xua painya nenaexanaewa tsane Nacom piamonaе tatsi bewa paexanaem pocotsiwa Cristo paca itoroba. <sup>18</sup>Jopa pacopatsinde xua ichamonaе paca yabara paeba xua pana natsiaenae cuentame xua jopa painya neexanaexae icha barapomonaе ichi. Barapomonaе paca aeba poxoru tane petsita itubi coyenewan po coyenewan xua ichamonaе jopa taeyo. Barapomonaе paca itoroba xua pepawi jiwi painya nenaexanaewa tsane painya coutha icha barapomonaе ichi xua bequein jumexaeya paeba xua pinae pecui pawi jiwi. Matautano barapomonaе paca itoroba xua matatsunpiwi wunaе painya nejainchiwa tsane icha bapomonaе ichi. <sup>19</sup>Barapomonaе jopa Cristo peyawa jinompaewichi, pon Wanacanamataxeinaein xuano xua pon asu jinompa naca exana. Matautano bapon caemonaе naca cana exana bapontha wajume cowuntsixaе. Nacom naca cana exana xua beta wajume cocowuntaponaewa, icha be pocotsi coyeneya xua pejume diwesitha paeba, icha poxonaе jiwi ichi xua poxonaе pia pexui wichatapona pexaewa peapatsixaе.

<sup>20</sup>Tsipei Cristo bayatha paca cayawa tupa. ¿Eta xua came awiya payabara

nanta xeiname? Poxonaе Cristo tupa bapon paca cana exana xua pana nacapanenebiyam abe painya neexanae cuiru coyenein weya. Matautano paca capanenebiya exana po peitorobi coyene weya xua jiwi exana pia nacapanenebiyaetsi. Poxonaе baxua paca cana exana, Nacom tsitatsi xua bara be Cristo payawa werapame. Daichitha awiya paichichipame xua paexaname barapo peitorobi coyene, bequein barapo peitorobi coyenein jopa paca capanepaeyo abe painya neexanae cuiru coyenein weya. Aparа saya jame Cristo paca capanepa, naetha petupaexae. <sup>21</sup>Judiomonaе ainya peitorobi coyenewan xeina xua pia peitorobi coyenewanxae pocotsiwa be iche: “Jopa jayabinde baxua. Jinya ebato opitha jopa panaeinde baxua. Jopa baxua necobetha pichinde”, jei.

<sup>22</sup>Barapocotsi coyenein po coyenein xua jopa bewa pinae paexanaem tsane barapo coyenein, bapana jopa paca yawenae xua beta painya neexanaewa pocotsiwa Cristo paca itoroba. Barapocotsiwa jopa pajume naitaewatsinde, poxoru barapo pecuidubi coyenein apara pia peitorobi coyenein tatsi pomonaе saya jiwi. Aparа barapo peitorobi coyenewan saya nainya weraweraca icha pexaewa ichi xua nainya weraweraca poxonaе jiwi xane. <sup>23</sup>Paxam pananta xeiname xua barapo peitorobi coyenewa xeina peantuyapusuwa poxoru be paca exana xua xanepanaya pajinom-pame, yawa be paca exana xua Nacom wunaе pajaintame. Barapomonaе judiomonaе pia abe exaneibi pia coutha naperaxa exaneiba pia juntemainaetsi xua abe exana. Ichitha awiya yabara nanta xeina pocotsiwa abe exana poxoru barapo peabewa ita cui dopitatsi xua baxua peexanaewa tsane. Barapomonaе saya u pepaеbeibi, ichitha cataunxuae jopa xanepanaya jinompaeyo.

**3** Tsipei Cristo bayatha paca cayawa asu, daxota panaitomare xua painya neexanaewa xua Cristo pocotsiwa ichichipa. Bapon Cristo eca Nacom pia nacuatheicha tatsi. Paxa pecoxa weya eca bapon. <sup>2</sup>Saya panaitomtsiya nanta xeinare Jesucristo pia peitorobi coyenewan tatsi. Jopa payabara nanta xeinaeinde xua copei pexeinae coyenein pocotsiwa barapo cae pin nacuathe xeina. <sup>3</sup>Tsipei bayatha paxam paca cayawa tupa Cristo, daxota jopa paexanaeinde pocotsiwa barapo cae pin nacuathe xeina. Painya neantujumopeyapuswan jiwi jopa taeyo tsipei Nacom Cristo paca cayawa itacafetsiya xeina pia nacuatheicha. Mexeya poxoru Cristo peyawa poponaexae Nacom, daxota waxainchi poxonae yawa jinompatsi Cristo barapara iruru yawa jinompatsi Nacom. Baxua jiwi jopa paca cui yaputaeyo. <sup>4</sup>Bapon Cristo naca jumope antujumopeyapusu exana. Poxonae Cristo equeicha patopaetsica paca cayawa baru naitutsina jiwitha pexeinya peitupanae coichatha.

**Meje yabara xua peru juntu coyene, xuano xua pena juntu coyene**

<sup>5</sup>Po coyenein xua jiwi exana pia pepontha bara pana cui barapende. Painya xoba pana nasi cui matacaetame xua paweiweiname. Painya xoba paexaname po coyene abe po coyene ba aura exana poxonae paexaname. Painya xoba pacui yabara nanta xeiname xua abe painya neexanaewa tsane. Painya xoba paichicha xeicame xua ichamonae xeina. Bu bichocono pacui yabara nanta xeiname beyacaincha xua poxonae pacui yabara nanta xeiname Nacom. Baxua icha be poxonae paichim poxonae ibo nacom paantobem beyacaincha xua Nacom paantobem. <sup>6</sup>Pomona xua barapocotsiwa exana,

Nacom casebina barapomonaetha. Bexa tsane Nacom itawetsina xua jopa petapatsiwa tsainchi pia nacuatheicha, poxoru barapomona xua jume feba nawita pocotsiwa Nacom itoroba. <sup>7</sup>Icha barapomona xua jume feba, xua abe exana, paxam bara paichim caena bayatha barapocotsiwa paexaname poxona xua jume feba Jesucristo pajume feba cowuntsim. <sup>8</sup>Ichitha anoxuae daxita pana cui barapende xua daxita peabe coyenein: xua peanaepanae coyenewan, xua juniya pejei coyenewan, xua jopa xanepanaya peexanae coyenein, xua saya abeya peyabara cueicueijejiwa coyenewan, xua peyuyujejiwa coyenewan. <sup>9</sup>Jopa caemona xua jume feba pana namuxuitorobeibinde, anoxuae pena juntu coyenein painya nexinae xua jume feba tsipei peru juntu coyenein bayatha papentame. Tsipei barapo peru juntu coyenein jiwi ba ajumebeya cui itorobatsi xua abe exana. <sup>10</sup>Tsipei anoxuae pena juntu coyenein paxeiname tsipei Nacom exana barapo pena juntu coyenein. Barapo pena juntu coyenein paca ita coxone exanapona Nacomtha. <sup>11</sup>Poxona xua jume feba jiwi pena juntu coyenein xeina pejume cowuntsixae, bapoxona xua jume feba Nacom tsita najupatsi, metha bara bequein griegomonaepin tsipae, iru metha bequein judiomonaepin tsipae, iru metha bequein pon xua pewi thabinchi tsipae xua ichaxota pebiwi nareixacaena, iru metha bequein pon jopa pewi thabinchi tsipae xua ichaxota pebiwi nareixacaena, iru metha bequein pon penanapaincha poponaepin tsipae, iru metha bequein pon unupin tsipae, iru metha bequein pon pebusi cui taetaeinchi tsipae, iru metha bequein pon pepu copatinchi tsipae xua bara piawa penata exanaewa tsane. Aparajume feba meisa bapon Cristo ainya cui

peexanaeinchi. Matautano Cristo baru peopona pomonae peantobewixaetsi.

<sup>12</sup>Nacom paca itapeta xua piamonae tatsi pia paca necaexanaenexa pia paca necaantobexae. Daxota nantanuweya pacui yabara cananta xeinare ichamonae xua painya neyawenaewa tsane. Yawa betiya payawende ichamonae. Yawa jopa ichamonae patsita atsacande xua icha coyene painya neexanaenexa. Yawa jopa paaebinde ichamonae. Yawa jopa paaitaconae tsaibinde poxonae bequein ichamonae abe pacata exaneiba.

<sup>13</sup>Nantiya pana natsita xeinare po juntu coyene xua jopa painya neaitaconaewa xua poxonae bequein ichamonae abe pacata exana. Pacui yabara juntemainare poxonae ichamonae pacata abe exana, icha Cristo ichi pon jiwi Pecanamataxeinaein exanatsi xua daxita paca cui yabara juntemaina xua abe paexaname. Bara paichinde pana nacui yabara juntemainare daxita pocotsiwa abe pana nata exaname.

<sup>14</sup>Barapo coyenein paexande, yawa mataropeichiya paexandeno xua bichocono nantiya pana naantobeinde. Poxonae baxua paexanaename xua painya nenaantobewam, bapoxonae xaniwaicha paexaname pocotsiwa bayatha paca itorobatsi xua bewa paexanaem icha paxename pexanepanae cui unthuthun. Ichitha poxoru painya nenaantobexae daxota bapo coyenein paexaname. <sup>15</sup>Saya pacopare xua bara Cristo painya juntu coyeneintha pacata itorobina juntema pia pepoponaewa tatsi xua daxota juntema painya nejinompaewa tsane. Tsipei Nacom paca necajainchixae: “Caemonae painya nenaexanaewi pam”, paca necajainchixae. Paxeinare po coyene xua pajam tsaibi: “Nacom, maisa pajuntu coyene weiweinan xua

painta exaname”, xua po coyene pajam tsaibi.

<sup>16</sup>Po diwesi Cristo paca tsipaeba xua yawa paca itoroba, moya paexaneibare. Icha Cristo ichi xua paca cuiduba pejume diwesitha, barichi xuya ichamonae pacuidudubaponde. Matautano nantiya pana nacui tsacarabare xua xanepanaya painya nejinompaewa tsane xua poxonae pajume taneme Cristo pejume diwesi. Nacom patanaxunare daxita weixi. Juntu coyene weiweinan patsita naxunare Nacom. <sup>17</sup>Pocotsiwa paichichipame xua painya nepaebiwa tsane, moya papaebare pocotsi pepaebiwa ichichipa Jesús. Yawano pocotsiwa paichichipame xua painya neexanaewa tsane, moya paexande xua pocotsi peexanaewa ichichipa Jesús pon jiwi Pecanamataxeinaeinxae. Bapontha pajande: “Jesús inta Axatha jande: ‘Maisa juntu coyene weiweinan xua bapon yawename’, inta, jande”, pajande Jesustha.

**Meje yabara xua pocotsiwa bewa  
exanae pomonae Jesucristo  
pejume cowantsiwi**

<sup>18</sup>Yabuxi pamxaem paca tsipaebatsi. Pajume taema. Painya seuriwi pajume jejan tsaibinde xua paca itorobeiba. Baxua paexaneibare tsipei pejume cowantsi jiwi pam Jesús pon jiwi Pecanamataxeinaein. <sup>19</sup>Pebiwi pamxaem paca tsipaebatsi. Pajume taema. Painya seuriwi paantobe tsaibinde. Baxua paexaneibare. Poxonae paitorobeibame, bichocono jopa pajan tsaibinde.

<sup>20</sup>Pexui pamxaem paca tsipaebatsi. Painya axa jiwi xua iru painya ena jiwi beta pajume naitaewateibiya exaneibare pocotsiwa paca itorobeiba tsipei baxua Jesús pon jiwi Pecanamataxeinaein tsita ita cui xanepanatsi. <sup>21</sup>Coxiyei jiwi pam, xua saya pebiwi jiwi pam paca tsipa-

batsi. Painya xoba painya pexui pamux-utainyabame xua jopa beta exanaeyo. Icha baxua paexaname pexui jopa beta jinompaetsipae.

<sup>22</sup>Pomonaе amanaya pebusi cui taetaewichi pam, beta pajume naitaeware painya nepacacanamataxeinaewi, pomonaе paca itoroba, pomonaе xua po cae pin nacuathe jinompa. Jopa metha bepa meisa beta pajume naitaewatsipaem poxonaе paca tane pomonaе painya nepacacanamataxeinaewi. Apra jame beta painya nejume naitaewatsinexa poxonaе pomonaе painya nepacacanamataxeinaewi jopa imoxoyo paca taeyo. Jopa metha bepa meisa painya wunaе taexanaetsi pomonaе painya nepacacanamataxeinaewi. Apra jame painya wunaе taexanaetsi iru Jesús pon jiwi Pecanamataxeinaein, tsipei paxam pomonaе Jesucristo painya nejume cowantsi jiwi pam. <sup>23</sup>Daxita i daxuan xua paexaname xanepanaya paexanare. Saya u pacananta xeinaeya exaneibare xua Cristo nexa, pon jiwi Pecanamataxeinaein. Jopa meisa saya pananta xeinaeya taexaneibinde xua pon painya nepacacanamataxeinaein, pon saya pepawi, xua saya jiton. <sup>24</sup>Bayatha payaputaneme xua bexa Cristo pon jiwi Pecanamataxeinaein paca catsibina xua paca juntana jeba pia nacuatheicha xua painya newetsixae pocotsiwa bapon paca itoroba. Paxam Cristo pia petanacuichi jiwichi pam pon yatsicaya jiwi pepa Pecanamataxeinaein. <sup>25</sup>Ichitha pon jopa xanepanaya exanaeyo, bapon xeinaena pentoma xua jopa pexanepanae matoma. Nacom jiwi jopa natoxeincha necotsiyo. Pomonaе pebusi cui taetaewichi, barapomonaе Nacom nanta jupaya tane, icha pomonaе pentacaponawewi ichi xua poxonaе Nacom nanta jupaya tane.

Daxota pon jopa xanepanaya exanaeyo, bapon xeinaena pentoma xua jopa pexanepanae matoma.

**4** Pomonaе pentacaponawewi pam, xanepanaya pacana exande pomonaе painya nebusi cui taetaeibi jiwi, tsipei paxam paxename painya pepa Nepacacanamataxeinaein itabocotheicha.

<sup>2</sup>Nacomtha cuitiya pana cui babatsiya wuca dubenanaebiyama. Poxonaе Nacomtha pawuqueibame, pajan tsaibinde: “Nacom, maisa pajuntu coyene weiweinan xua pata tanecatsiwaxaem yawa xua painta exaname beta”, pajan tsaibinde.

<sup>3</sup>Yawano painta wucare Nacom xua Jesús pon jiwi Pecanamataxeinaein pata tana neyawenaewa tsane xua pata cueicueijeinexa bapon pejume diwesi tatsi daxita coyeneintha xua ichaxota pata ichipaewa xua pata paebeibiwa tsane. Barapo diwesi caena bayatha jiwi jopa yaputaeyo tsipei Nacom moya yawun xeina xua jiwi jopa yabara yaputaeyo. Ichitha anoxuae Nacom ichichipa xua jiwi yaputaena barapo diwesi. Barapo diwesi xua anoxuae apra xua Cristo naca yanaba. Jiwi pecubi botha neeta tana natsipei cueicueijeixae barapo diwesi. <sup>4</sup>Painta wucare Nacom, xua xanepanaya tacaununaya cueicueijeinexa tsane Cristo pijume diwesi xua jiwi beta tana nejume taewa tsane pocotsiwa xua bewa cueicueijan tsane, pocotsiwa Nacom ichichipa.

<sup>5</sup>Dota pam, xanepanaya beta jume wunaeya pajinompare, tsipei paca tane pomonaе jopa jume cowantsiyo Jesucristo. Barapomonaе patsipaebebare xua pocotsiwa Nacom ichichipa xua poxonaе po mataqueitha cataunxuae paca itacupa xua painya netsipaebiwa. <sup>6</sup>Poxonaе ichamonaе patsipaebame, beta

xanepanaya patsipaebare. Yawano bewa xanepanaya pajume notsim daxita jiwi.

**Meje yabara poxonae Pablo  
najume weta po carte**

<sup>7</sup>Daxita Tíquico neyabara diwesi paebina xua paca tsipaebina. Bapon be wayapin watsicotaein tsipei Jesucristo pejume cowuntsin. Bapon paantobein. Irũ bapon Tíquico Jesús pon jiwi Pecanamataxeinaein pia petanacuichin tatsi. Bapon Tíquico neyaweneiba xua Jesucristo pijume diwesi cueicueijejei tsaibi. <sup>8</sup>Daxota Tíquico painya xainya beya itoroban painya neyaputaenexa xua paxan xanepanaya bara jũntema pajinompan. Yawa bapon paca necacui tsacarabinexa xua jũntema painya nejinompaewa tsane. <sup>9</sup>Tíquico bara beya pona irũ ichũn napon, pon pewũn Onésimo, pon be pata tayapin patsicotan pejume cowuntsixaerũ Jesucristo, yawano bapon paantobein. Barapon beta xanepanaya pepoponaein Nacomtha. Tíquico irũno Onésimo, baponbe daxita yabara paca tsipaebina xua pocotsiwa xote exananje.

<sup>10</sup>Irũ Aristarco tajiton, pon jiwi pecubi botha paecanbe, bapon paca jacoba. Irũ Marcos paca jacob, pon Bernabé pamoyo tatsi. Tsipei bayatha payaputaneme xua Marcos pepatopaewa tsane. Paca itorobatsi bapon yabara. Icha patopaena bara beya, bapon pantenta weyataeya wabare. <sup>11</sup>Irũ Jesús paca jacob, pon icha wũnno, Justo. Po acoibi poyobe, poyobe xuaunxuae paca jacob, meisa saya barapoyobe neyawena xote poyobe xua jiwana judiomona, po judiomona Jesucristo pejume cowuntsiwichi jiwana. Barapo acoibi poyobe neyawenabe xua yabara cueicueijeibe Nacom Pejume Diwesi po diwesi xua Nacom waba jiwi xua petanaexanaenexatsi piamona tatsi

petajume cowuntsixaetsi Pexantotha. Barapoyobe nejũntũ cui tsacarababe xua jũntema tapoponaewa tsane. <sup>12</sup>Irũ Epafra paca jacob, pon painyamonae jiwana. Bapon Epafra Cristo Jesús pia petanacuichin tatsi. Bapon jume daunweya pacata wũqueiba Nacomtha, xua Nacom xanepanaya paca necaantũyapũsũya daunweya exanaenexa tsane. Xaniwaicha painya neyaputaenexa pocotsiwa painya neexanaenexa, pocotsiwa Nacom ichichipa. <sup>13</sup>Xan bara yatsicaewa tacui taewa xua Epafra pacata jume daunweya wũqueiba Nacomtha. Po coyene xua bapon baxua exana xaniwaicha, apara paxam nexa, irũ Laodicea tomaramonaepiwi nexa, irũ Hierápolis tomaramonaepiwi nexa. <sup>14</sup>Irũ Lucas paca jacob, pon jiwi peyawũbin, pon bichocono antobetsi xua jiwi antobe. Irũ Demas paca jacob.

<sup>15</sup>Painta jacobare Jesucristo pejume cowuntsiwichi, pomona Laodicea tomaratha ena. Irũ painta jacobare powa pewũn Ninfa. Irũ painta jacobareno pomona pejume cowuntsiwi, pomona nacaetuteiba Ninfa pia botha tatsi. <sup>16</sup>Poxona barapo carte payorobame equeicha ichũn pacare xua pecaponaenexa Laodicea tomara beya, xua xuya peyorobinexa barapo carte pomonaetha pomona pejume cowuntsiwi poxona nacaetuta. Yawa poxona Laodicea tomaramona pia carta tatsi papitame painya xainya berena barapo carta xuya payorobare painya penacaetutsi botha xua Colosas tomaratha. <sup>17</sup>Paxam Arquipo pabarande: “Taema Arquipo, xaniwaicha baxua exande xua bayatha Jesucristo pon jiwi Pecanamataxeinaein pocotsiwa caitoroba xua wũnaeya xanepanaya nacui yabara jume wetsiname xua exaname”, pajande.

<sup>18</sup>Xan, Pablon, paca jacobatsi. painta wəqueibare. Barabə Nacom  
 Baxoyo tacobe couyeje, xoyo tinaxuban. jəntema jinompa paca exana pia paca  
 Jopa pajəntemainaeinde xua jiwi necaantobexae.  
 pecubi botha taecaewa. Nacomtha Baja Pablo.

## Meje Po Carte Copiya Pablo Tatina, Tesalónica Tomarapiwi Tatinatsi

### Meje yabara poxonaē Pablo tamropata pitaba xua tatina pomonaetha pomonaē Tesalónica tomarapiwi

**1** Xan, Pablon, iru Silvano, iru Timoteo, barapoyobe pan, barapo carte pacata tinatsi. Pacata tinatsi paxam pomonaē Tesalónica tomarapiwi pamxaem pomonaē painya nejume cowuntsiwixae Jesucristo. Paxam pomonaē pam pomonaē painya neyawa jinompaewi Nacom, pon Waxa, xua matautano Jesucristo, pon jiwi Pecanamataxeinaein. Barabu Nacom, Waxa, iru Jesucristo, pon jiwi Pecanamataxeinaein, paca yawena xua juntu coyene weiweinyaya painya nejinompaewa tsane xuano beta xanepanaya juntea painya nejinompaenexa.

### Meje yabara xua Pablo yabara paeba xua Tesalónica tomarapiwi pinae beta jume cowunta

<sup>2</sup>Pacata tsipaēbeibatsi Nacomtha, pajan tsaibi Nacomtha: “Nacom maisa pajuntu coyene weiweinan xua daxita Tesalónica tomarapiwi beta jinompa, pomonaē pecajume cowuntsiwi”, pajan tsaibi Nacomtha. <sup>3</sup>Pajan tsaibi Nacomtha: “Pata Taxam, Nacom, maisa barapo Tesalónica tomarapiwi bichocono cajume cowuntsiya cata exana dubenanaēbiya. Matautano, bichocono ncaantobexae daxota ayapusuya cata nacuita dubenanaēbiya. Maisa bichocono barapomonaē wunaē ewateiba xua Jesucristo pia pepatopeicaewanexa tsane, pon Pata Tanecanamataxeinaein”, pajan

tsaibi Nacomtha. <sup>4</sup>Paxam pomonaē painya nejume cowuntsiwi pam Nacom. Bara payaputan xua Nacom bichocono paca antobe, yawa caena bayatha paca itapeta pia piamonaē paca exanaetsi. <sup>5</sup>Poxonaē Nacom pia pecapanenebiyae diwesi jume paca tsipaebatsi jopa saya meisa u pata jume. Jame apara Nacom pia Pejumope tunaxu tatsi pia peayapusu itorobi coyenewatha tatsi pana yawena, xua pata cueicueijiwa. Barapo diwesi bara xaniwaicha jume cowuntatsi xua barapo diwesi bara pexainyei jume. Bara beta payaputaneme xua bara beta pajinompan painya itutha xua pata paca ajuntucoyenesu exanaenexatsi xua iru juntu coyene xanepanaya painya nejinompaenexa.

<sup>6</sup>Paxam paexanaponaē icha paichin xua pocotsiwa paexanaponaē. Matautano beta paexanaponaē icha ichi poxonaē beta exanaponaē pon jiwi Pecanamataxeinaein. Bequein ichamonaē atene paca exana painya nejume cowuntsixae Jesucristo, ichitha barapo diwesi awiya juntu coyene weiweinyaya pajume cowuntame. Barapo pejuntu weiweinaē coyene Nacom pia Pejumope tunaxu tatsi paca cata. <sup>7</sup>Baxuan painya neexanaexae daxota ichamonaē pomonaē pejume cowuntsiwi Jesucristo, pomonaē Macedonia nacuapiwi, barapomonaē exana pocotsiwa paexaname. Iruru baxuan exana pomonaē Acaya nacuanpiwi. <sup>8</sup>Jesucristo, pon jiwi Pecanamataxeinaein, pia pecapanenebiyae diwesi jume pacueicueijam ichamonaetha. Barapo diwesi Macedonia nacuapiwi iru Acaya nacuapiwi jume tane. Jopa meisa barapo nacuabepiwi bara apara daxita nacuanpiwi iruru jume taneru. Daxita barapo jiwi paca yabara yaputane xua painya nejume cowuntsiwa Nacom.



Daxota jopa panantawenonaeinyo xua paca yabara paebatsi ichamonaetha. <sup>9</sup>Nama barapomonaē pana neyabara paeba xua paxam panententa weyataeya wabame. Matautano barapomonaē paca yabara paeba xua pinae paxam ibo nacom̄n po ibo nacom̄n copiya wūnae pajainteibame pabebam painya nejume cowuntsixaē Nacom. Matautano paca yabara paeba xua baroxonaē patamropatarūcupame xua pata taexaname Nacom pia petanacuichiwa tatsi, pon yatsicaewa pepa Nacom, pon ataya tsitecaeya asū pepoponaēin. <sup>10</sup>Matautano barapomonaē pana netsipaeba xua pinae paxam Jesús pawūnae ewatame xua pepatopeicaewa peitaboco wetsica. Barapon Jesús Nacom Pexanto tatsi, po Pexantoxae Nacom asū exana petūpae coyene cuiuru weya. Barapon Jesús naca napaeba exanaena Nacom beya, poxonaē Nacom copatsina xua jiwi bichocono peraxa jubebinchi abe peexanaexae.

**Meje yabara po coyeneya Pablo tanacuīta Tesalónica tomarapiwi**

**2** Patamonae paxam pomonaē pam pomonaē irū painya nejume cowuntsiwi Jesucristo icha paxan paichin. Payaputaneme xua tapaca siwa ponaewatsi baxua wūnae pata cayawenaexaetsi. <sup>2</sup>Poxonaē Filipos tomaratha paponan, barapomonaē abe pana exana. Yawa tsūmū jumeya pana tsipaeba. Bequein barapomonaē baxua pana cana exana ichitha payaputaneme xua Nacom pana yawena tapata catsipaebinxatsi barapo Nacom pia pecapanenebiyae diwesi jume. Baxua paexanan xua jopa jūntū deideijeya paca tsipaebichi barapo diwesi bequein barapomonaē pana jume matawenta. <sup>3</sup>Poxonaē paca tsipaebatsi Nacom Pejume Diwesi jopa apara paca tsipaebichi po jume xua

jopa xainyeyo xua po jume pejumexaei. Matautano jopa paca tsipaebichi po jūntū coyene wajūntū coyene abeya naca tsipaeba. Matautano jopa paca muxujainyabichi xua daxota abe painya neexanaenexa. <sup>4</sup>Nama Nacom patsita jūntū coyene xanepanan xua xainyeya pata tacueicueijeixaē. Daxota Nacom pana neitoroba xua pata tapaebinxea pia pecapanenebiyae diwesi jume. Apra jopa baxua paexanaēinyo xua daxota jiwi pata taneweyataenexa. Jame apra baxua paexanan xua Nacom pata taneweyataenexa. Barapon pana nejūntū coyene yaputane xua poxonaē paexaneiban. <sup>5</sup>Paxam bayatha payaputaneme xua jopa paca tsipaebichi po jume ba jiwi piraichi jume wūnaeya paeba xua bepa pia weyataetsi. Matautano payaputaneme xua jopa pacueicueijanyo pata paratixichi. Nacom bara pana tane xua jopa baxua bara paexanaēinyo. <sup>6</sup>Jopa bapana paichichipaeinyo xua jiwi wūnae pata tanejainchiwa, xua poxonaē metha bequein bara barapomonaē pam, ichacuītha xua poxonaē bequein ichamonaē irū. <sup>7</sup>Bequein paxan pana itacūpa xua pata caitorobiwatsi, bequein bara Cristo pia peitorobi jiwi tatsi pan, daichitha jopa paexanaēinyo barapo coyene. Nama apra saya bewayo paca yayawenaponatsi, icha be pocotsi coyeneya petsiriwa ichi poxonaē pia pexui bewayo wichitiya yayawenapona. <sup>8</sup>Bichocono paca antobetsi, daxota paichichipan xua pata paca catsiwatsi Nacom Pejume Diwesi. Jopa meisa xua poxonaē daxota barapo coyenewa, bara yawa daxita muxuna paca yawenatsi daxita pata jūntū coyeneintha. ¡Bara jopa juniya pata paca antobewatsi! <sup>9</sup>Patamonae pam, paxam pomonaē irū painya nejume cowuntsixaē Jesucristo. Paxam payaputaneme xua

bichocono panacuitan pata xeinaenexa pocotsiwa panantawenonan xua pata nabanaewanexa. Jopa juniya panacuiteibinyo maticabintha, yawa merawinthano. Daxota jopa panantawenonaem xua pana catame xua pocotsiwa pata nantawenonaewa pata jinompaewanexa. Jopa paichipaeinyo xua paca nacui matowa xeina exanatsi poxonae paca cuidubatsi Nacom Pejume Diwesi.

<sup>10</sup>Paxam pomonae painya nejume cowantsixaemxae Jesucristo pana yaputaneme iru Nacom pana yaputane xua juntu coyene xanepanaya pata jinompaewa painya xantha daxita carepaya paxamtha. Matautano Nacom patsita juntu coyene xanepanan, xua penatsicuentisiwa jopa bapon patsita xeinaeinyo. Daxota ichamonae jopa pana neyabara paebiyo xua abe pata pacata exanaewatsi. <sup>11</sup>Matautano payaputaneme xua paca itorobatsi xua beta pajinompame. Matautano yawa payaputaneme xua paca juntu tsacabatsi xua xanepanaya painya nejinompaenexa. Matautano bara payaputaneme xua daxita paxam paca cui matateicatsi xua poxonae bichocono paanthuthutanem tsaibi xua abe painya nepacata exanaexae ichamonae. Daxita barapo coyenein bara paexanan icha be pocotsi coyeneya coxiyan cana ichiya exana pia pexuitha. <sup>12</sup>Paca itorobatsi xua bewa beta pajinompaem, icha pomonae Nacom pejume cowantsiwi ichi xua bewa beta jinompaem. Baraxua paexande poxoru Nacom paca wun duba piamonae painya paca exanaenexa xua painya nebaru itorobinexa tsane jiwi Nacom pia peitorobi nacua beicha tatsi. Nacom pia peitorobi coyenewa xua jiwi peitorobi coyenewatsi bichocono peitupanae coyenewa.

<sup>13</sup>Matautano paxan Nacomtha patsipaeban pajanje: "Nacom maisa

pajuntu coyene weiweinan xua Tesalónica tomarapiwi cajume cowanta poxonae patsipaeban jinya jume diwesi. Barapomonae nanta xeina xua po diwesi patsipaeban barapara jinya jume diwesi. Jopa nanta xeinaeyo xua barapo diwesi apara saya jiwi pia diwesi", pajan Nacomtha. Xaniwaicha barapo diwesi apara Nacom Pejume Diwesi painya paca cana exanaexae xua icha juntu coyene painya nexeiawa pomonae painya nejume cowantsixae Jesucristo. <sup>14</sup>Patamonae pam. Ichamonae atene paca exana pomonae painyamonaxae. Baxua paca cana exana, icha Judea nacuapiwi ichichi pomonae pejume cowantsiwi Cristo Jesús. Daxita barapomonae ajuntucoyenetane exainchi pomonae piamonaxae pomonae judiomonaxae. <sup>15</sup>Caena bayatha judiomonae pia pamo susato jiwi tatsi juteba, pomonae Nacom pia peitorobi jume pepaebiwi tatsi jutebatsi. Cotacaya icha judiomonae Jesús pon jiwi Pecanamataxeinaein tupa exanadutatsi naetho. Matapainya anoxuae icha judiomonae pana yotaba pata penacaetutsi bo weya. Pocotsiwan barapomonae exana Nacom baxuan jopa tsita xanepanaetsi. Barapomonae nacana exana pomonae daxita jiwi pia peitaetafeta tabi jiwichi. <sup>16</sup>Paichichipan xua patsipaeban Nacom Pejume Diwesi pomonaetha pomonae jopa judiomonae naexanaeyo xua iru Nacom pecapanenebiyaenexa tsane bequein judiomonae pata tanejume itawetsiwatha tsane poxonae patsipaeban Nacom Pejume Diwesi. Poxonae judiomonae barapo abe peexanae coyene pana tsixana bapoxonae opi duta wetsiya exana daxita po peabe coyenewan xua bayatha itacupatsi xua eexanapona. Daxota anoxuae nama matapainya Nacom bichocono anaepana barapomonaetha.

Nacom juntucuru peraxa juba exanaena barapomonaē, penatsicuentisixae abe peexanaexae bapontha.

**Meje yabara xua equeicha  
Pablo besiwa ponaena  
Tsalónica tomarapiwi**

<sup>17</sup>Paxam pomonaē patamonaē pam, poxonaē bequein paxan tajū paca cuenta enatsi, xua saya bara caethotha jopa imoxoyo paca taetsi, ichitha paca yabara nanta xeineibatsi pata paca itaxaneibixaetsi. Bichocono paichichipan xua pata paca cataewatsi.

<sup>18</sup>Paxan matowa paichichipan xua caewa pata paca siwa ponaewatsi. Xan, Pablon, ichacuiitha matowa nanta xeineiban xua paca siwa poneibinchi. Ichitha caurimonaē pia pentacaponaein tatsi, Satanás, pana necui yancababeiba.

<sup>19</sup>Ichichipan paca siwa ponatsi poxoru paxam pana necana exaname xua pajūntū coyene weiweinan. Barichi paxam pomonaē pana necana exaname xua pawūnaē ewatan. Barichi paxam pomonaē pana necana exaname xua matowa payabara paeban pocotsiwa xua paexanan poxonaē paca cuidubatsi. Poxonaē Jesucristo pon jiji Pecanamataxeinaein equeicha caewa patopeicaena bapontha paca yabara paebinchi po coyene xua paxam pana necana exaname. <sup>20</sup>Xaniwaicha paxam pomonaē pam pana nejūntū coyene weiweina cana exaname. Matautano paxan pomonaē pana necana exaname xua paca yabara wūnaē jainchinchī Jesucristo peitabaratha poxonaē bapon peitabaratha tatsi paca baru umenaēinchi beta painya neexanaexae.

**3**<sup>1-2</sup>Jopa pana itacupaeyo xua awiya equeicha pata ewatsiwa xua pata paca yabara yaputaewa tsainchi. Daxota juntucuru pananta xeinan xua paitoroban Timoteo pon jume cowūnta Nacom painya pia

paca necataenexa tsanebe. Matautano juntucuru pananta xeinan xua Silvano compa paecaeinbe Atenas tomaratha. Timoteo paitoroban, tsipei bapon beta tanacuita Nacom nexa. Barapon Timoteo pana yawena poxonaē pacueicueijan Cristo pia pexeinya jume diwesi tatsi. Bapon Timoteo itacupatsi xua ajūntūcoyenyapusu paca cana exana. Matautano itacupatsi xua paca jūntū cui tsacaba exana xua awiya mataropeichiya painya nejume cowūntaponaenexam Nacom.

<sup>3</sup>Bapoxonaē dapon aibi tsane paxam jiwana pon ajūntūcoyenefaetabiya jume cowūnta xua ichamonaē abe peexanaexae bapontha. Paxam bayatha payaputaneme xua daxota bewa ichamonaē atene naca exanaena wajume cowūntsixae Jesucristo.

<sup>4</sup>Matautano poxonaē cataunxuae paca baru enatsi, paca tsipaebatsi xua daxota bewa ichamonaē naca atene exanaena poxonaē nacata abe exana. Bara baxua bayatha exana barapomonaē icha be pocotsi coyeneya bayatha paca tsipaebatsi, xuano payaputanemeno. <sup>5</sup>Tsipei xan jopa neitacupaeyo xua equeicha taewatsiwa xua tapaca yabara yaputaewa tsainchi, daxota Timoteo itoroban. Bapon inta paca yainyabiya jei: “¿Bara awiya pajume cowūnta dubenanaebiyame Jesucristo?” jei. Baxua beyaputaēin tajunuwixae xua caurimonaē pia pentacaponaein tatsi pon jiji pejūntū coyene jūjūtsin paca cui jūjūtsipa xua abe painya neexanaewa tsane. Bapoxonaē pocotsiwa xua pata tapacata nacuichiwatsi jopa paca yawenaetsipae xua jopa xapain painya nejume cowūntsixaem tsipae.

<sup>6</sup>Ichitha bayatha bapon Timoteo caewa patopa xua bara werena xua painya tomara werena. Bapon yabara pana tsipaeba, bichocono jume

xanepana xua pinae awiya pajume cowunta dubenanaebiyame Jesucristo. Matautano yabara pana tsipaeba xua pinae nantiya pana naantobe tsurubenanaebiyam. Matautano yabara pana tsipaeba xua pinae pana neyabara antobeya nanta xeiname matauta xua pinae bepana netaename, icha paichin xua bena tapaca taewatsi tsainchi. <sup>7</sup>Patamonaе pam, paca tsipaebatsi bequein ichamonaе painta ayapube exana yawa pana atene exana, ichitha pajuntu coyene sadujan poxonaе pajume tan xua pinae beta pajume cowunta dubenanaebiyame Jesucristo. <sup>8</sup>Poxonaе paxam awiya beta pajume cowunta dubenanaebiyame Jesucristo, pon jiwi Pecanamataxeinaein, baxua pajuntu coyene sadujan pata jinompaewatha Nacom nexa. <sup>9</sup>Anoxuae pana itacupa xua pata jeiwa: “Nacom maisa pajuntu coyene weiweinan Tesalónica tomarapiwi beta necajume cowuntsixae”, pata jeiwa. Paxam pomonaе pana nejuntu coyene weiweina cana exaname poxonaе Nacom patsipaeban. <sup>10</sup>Matacabintha, merawinthano Nacomtha pacata wuqueibatsi. Nacom pawuqueiban xua bara pata necopatsinexa xua pata tapaca casiwa ponaenexa tsainchi. Paichichipan xua pata paca yawenaewatsi xua beta painya nejume cowuntsiwa Jesucristo pocotsiwa yabara pacata seica xua painya yabara neyaputaewa Jesucristo.

<sup>11</sup>Paichichipan xua Nacom pon Waxa iru Jesús pon jiwi Pecanamataxeinaein pana yawenaena xua pata paca casiwa ponaenexatsi. <sup>12</sup>Matautano paichichipan xua Jesús, pon jiwi Pecanamataxeinaein, paca cana exanaena xua equeicha bichocono toxeinchiya paxeinaponaename peantobe coyenewa xua nantiya painya nenaantobexaem tsane.

Matautano paichichipan xua barapo peantobe coyenewa daxita jiwi painya tsita xeinaenexa icha paca ichichi xua bichocono paca antobetsi. <sup>13</sup>Matautano paichichipan xua Nacom pon Waxa, painya nepaca cana exanaenexa xua bichocono painya nejuntu coyene xanepanaewa. Matautano paichichipan xua Nacom pon Waxa bichocono ajuntayapusya paca cana exanaena. Bapoxonaе paxam bichocono Nacom tsita juntu coyene xanepanaeinchi. Bapoxonaeno jopa patsita natsicuentisim tsane abe painya neexanaexae bapontha. Barapocotsi juta coyene awiya paexanaponaename beya poxonaе Jesús pon Wanacanamataxeinaein, piamonaе baru patopeicaena daxita.

**Meje yabara po juntu coyeneya bewa jiwi tajinompae Nacom po coyene xua Nacom tsita xanepanatsi**

**4** Patamonaе pam anoxuae jume daunweya paca jeichi, yawa paca itorobiya jeichi: “Tsipei Jesús pon jiwi Pecanamataxeinaein, pana necayawa popona daxota paca itorobatsi. Pocotsiwa paca cuidubatsi paxam bara paichinde. Bayatha paca cuidubatsi xua bewa equeicha mataropeichiya payajuntu coyene jinompaem po juntu coyene xua Nacom tsita xanepanatsi. Matautano anoxuae equeicha matowa paexanaponde barapo coyenein, po coyenein xua anoxuae paexanaponaе”, paca jeichi.

<sup>2</sup>Paxam payaputaneme po pecuidubiwana paca cuidubatsi apara barapo pecuidubiwana Jesús pana itoroba, pon jiwi Pecanamataxeinaein. <sup>3</sup>Xua jame Nacom pocotsiwa ichichipa xua paxam bewa bichocono juntu coyene xanepanaya pajinompaem Nacom peitabaratha xua daxota ichamonaе patsita itapeinya xeiname

xua bara Nacom painya neantobe jiwī pam. Jopa panasi cui exana dubenanaebiyaeinde ichamonae pia seurixitha tatsi. <sup>4</sup>Pebin bewa yaputaena xua beta cuicuinaena piseuritha po coyeneya xua Nacom tsita xanepanatsi xuano xua jiwī tsita xanepanatsi. Matautano bapon bewa barū cui itura jinaena piowa pia peantobexae. Daxita barompaya pebiwi pam bewa irū bara paichim tsane. <sup>5</sup>Barichi barapo pebin jopa bewa exanae tsane barapowatha po coyene xua saya pia penaquenta exanaetsi. Tsipei ichamonae pomonae jopa Nacom yaputaeyo, barapomonae abe nanta xeina nawita xua yabūxi yabara xua penaquentsiwa yabara. Barapo coyene painya xoba paexaname. <sup>6</sup>Jopa paexanaeinde barapo abe peexanae coyenewatha pontha pon irūru pejume cowūntsin Nacom. Jopa bewa papichim barapon piowa tatsi. Icha baxua paexanaetsipame pon jiwī Pecanamataxeinaein bichocono atene paca cana exanaetsipa abe painya neexanaexae. Bayatha barapocotsiwa paca muxuwetatsi. <sup>7</sup>Nacom jopa naca wūn dubiyo piamonae wanaca exanaenexa xua abe waexanaponaewa tsane. Jame apara Nacom naca wūn duba xua jūntū coyene wūnaeya wajinompaenexa Nacom peitabaratha tatsi xua daxota ichamonae tsita itapeinya xeinatsi xua bara Nacom pijimonae tatsi wanaexanaenexatsi. <sup>8</sup>Pon jume itaweta po coyene xua ichūn pepichiwa yabara xua ichūn piowa tatsi, apara bara bapon jume itaweta Nacom pia pecuidubi coyenewa tatsi. Jopa apara jume itawetsiyo pebin pia pecuidubi coyenewa tatsi. Barapon Nacom paca cata pia Pejumo pe tūnaxū tatsi xua painya yawa jinompaenexa. <sup>9</sup>Po peantobewa xeina pomonae pejume cowūntsiwi Nacom, xua nantiya caemonae penaantobewa, xan jopa

nantawenonaeyo xua yabara tapacata tinaewatsi barapo coyene. Tsipei Nacom pia coya paca cuiduba po coyene xua nantiya painya nenaantobewam tsane. <sup>10</sup>Bara baxua paexaneibame xua paantobe tsurubenanaebiyam daxita pomonae jinompa Macedonia nacuatha, pomonae pejume cowūntsiwi Nacom. Ichitha paxam patamonae pam painya nejume cowūntsiwixae Nacom, paca itorobatsi xua awiya mataropeicha paantobe tsurubenanaebiyama equeicha matowa. <sup>11</sup>Bichocono paichichipare xua painya neexanaewa xua po coyene meje: Jūntema parubenanaebiyama, xua jopa pana najume matsontsonoba dubenanaebiyam. Matautano painya xoba patsipaeibame ichamonaetha po coyenein barapomonae bewa exanae. Matautano barompaya painya penacuichiwan pana natsiexana dubenanaebiyama icha be pocotsi coyeneya bayatha paca tsipaebatsi. <sup>12</sup>Icha barapocotsiwa paexanaename ichamonae pomonae jopa Nacom pejume cowūntsiwi paca barū cui itura jinaena xua bara beta painya neexanaexaem. Matautano jopa panantawenonaem xua ichamonae pawūcame pocotsiwa xua panantawenoname.

**Meje yabara poxonae Jesucristo pon jiwī Pecanamataxeinaein equeicha caewa patopaetsica**

<sup>13</sup>Patamonae pam, paichichipan xua painya neyaputaewa po coyene pexainyei coyene, xua petūpaewi yabara. Matautano jopa paichichipaeinyo xua be wecoyeya pajinompame icha be ichamonae ichi pomonae jopa pejume cowūntsiwi Nacom. Barapomonae be wecoyeya jinompa jopa xanepanaya pewūnae ewatsixae po coyene xua poxonae petūpaewi equeicha asū tsane. <sup>14</sup>Waxainchi jume cowūntatsi xua Jesús

tupa naetotha xuano equeicha Nacom asu juina exana. Icha Nacom pexanto cana ichi, waxainchi jume cowuntatsi xua Nacom bara cana ichi tsane pomonaetha pomonae bayatha werapa. Barapomonae pejume cowuntsixae Jesús, poxonae werapa asu jujuina exanaeinchi xua Nacom exanaena. Nacom barapomonae baru jujuinya exanaeinchi Jesús, xua Jesús pemuxuna caponaenexatsi Nacom pexainya beicha.

<sup>15</sup>Daxota paca tsipaebatsi pocotsiwa xua Jesús pana netsipaeba pon jiwi Pecanamataxeinaein. Yabara paca tsipaebatsi xua pomonae cataunxuae asu jinompa poxonae patopaena pon jiwi Pecanamataxeinaein barapomonae copiya jopa jujuinya exanae tsainchi xua Jesús pecaxibinexa tsainchi athabeicha. Jame copiya matha asu jujuina exanaeinchi pomonae bayatha werapa. <sup>16</sup>Jesús pon jiwi Pecanamataxeinaein patopaetsica peitaboco wetsica. Barapo mataqueitha jiwi jume taena peajumeyapusu itorobi wawaiwa, xuano xua cueicueijei matatsunpiwi pia pentacaponaein tatsi, xuano xua trompeta jume busi xubina Nacom pia trompeta tatsi. Bapoxonae pomonae Cristo jume cowuntatsi xua pomonae bayatha yacui werapaeya othopa bapomonae copiya asu jujuina exanaeinchi. <sup>17</sup>Bapoxonae cotacaya waxainchi pomonae cataunxuae asu jinompatsi, pomonae wajume cowuntsiwi Jesús naca cayawa muxuna caetucaetsiya caponaena pomonae copiya pewerapaewi. Daxita barapomonaetsi Nacom naca caponaena xua naca caponaena tsacquinaebowatha xua Jesús pon jiwi Pecanamataxeinaein waxaxibiyaenexa tsainchi athabeicha. Baxoteicha ataya tsitecaeya daxita waxainchi Jesús pon jiwi Pecanamataxeinaein, naca baru jinompeibina. <sup>18</sup>Daxota barapo jumetha

caemonae nantiya pana najuntu coyene tsacabare xua painya neyaputaewa tsane, po coyene xua pewerapaewi yabara.

**5** Patamonae pam, jopa nantawenonaeinyo xua yabara pacata tinatsi maticabi, yawa dapae yabara xua poxonae Jesucristo pepatopeicaewa tsane. <sup>2</sup>Bayatha payaputaneme xua equeicha patopeicaena pon jiwi Pecanamataxeinaein. Matautano payaputaneme xua bapon patopaetsica poxonae xapain jopa nanta xeinae tsainchi, icha pon pecaibin ichi xua jemeicha patopa merawitha. <sup>3</sup>Poxonae jiwi jei tsane: “Maisa junte ma jinompatsi tsipei daxita wuna tsurucuae”, jei tsane, bapoxonae patopaena jemeicha po dapaetha poxonae jiwi bichocono atene exanaeinchi. Jiwi jopa itacupae tsainchi xua panenebiyaena barapo peatenewa weya. Jiwi atene exanaeinchi icha yabuyo ichi xua bichocono bewa atene tsane xua pexuyo poxonae naexanaena. <sup>4</sup>Patamonae pam, paxam jopa dapocotsimonae pam, pocotsimonae jopa jume cowuntsiyo Nacom. Poxonae equeicha patopaetsica, pon jiwi Pecanamataxeinaein jopa pana nabenaecaem tsane, icha jopa be ichiyo poxonae jiwi nabenaeca xua pecaibin jemeicha patopa. <sup>5</sup>Paxam pomonae Nacom payabara yaputaneme. Daxota beta painompame icha be ichamonae ichi, xua mataqueitha beta taeya jinompa xua pentha petsuncuaexae. Waxainchi jopa dapomonaetsi xua icha be ichi pomonae abeya jinompa jopa pejume cowuntsi jiwixae Nacom. Barapocotsimonae be pomonae poxonae jinompa pequireiwatha, jopa beta jinompaeyo pequirei tsuncuaexae. <sup>6</sup>Pomonae jopa pejume cowuntsiwichi Jesucristo barapomonae jopa tsaca jinompaeyo xua pewuna ewatsinexa

Jesucristo pia pepatopeicaewa tsica tsane. Barapomonaē be pocotsimonaē xua maita, xua jopa itacupaetsi xua penacosabiwa. Ichitha jame bewa waxainchi wacoutha barompaya juntu coyene coxonaetsi xua tsaca wajinompawea poxonaē wūnaē ewatatsi Jesucristo pia pepatopeicaewa tsica tsane. <sup>7</sup>Pomonaē ba xua maita, bara merawi maita. Iruru pomonaē ba cupatsi peatsaxa mera, bara merawi cupatsi. Daxita barapomonaē jopa xapain Jesucristo wūnaē ewatichi. <sup>8</sup>Ichitha waxainchi wajume cowūntsixaetsi Jesucristo, daxota bewa juntu coyene coxonaetsi xua tsaca jinompatsi xua wawūnaē ewatsiwa Jesucristo. Waxainchi xanepanaya bewa beta jume cowūntichi Nacom. Matautano bewa beta nantiya naantobetsi. Barapo coyenebe naca juntu coyene yaitata xua jopa abe exanaetsi, icha soldadomonaēpin ichi xua nayaitata penaintotha xua nantacari xatata xua pecawatsiyainwatsi dejonatha. Barichi waxainchi bewa jume cowūntsiya wūnaē ewatichi xua Nacom naca capanenebiya tsane. Barapo coyeneya naca yaitata xua abe waexanaeyainwa icha soldadomonaēpin ichi xua nantasipa yaitata penain yoreitha xua peantasipabe exanaeyainwatsi. <sup>9</sup>Nacom jopa naca itapetsiyo xua wanaca atene exanaenexa wanatsicuentiswaxae abe waexanaexae bapontha. Saya apara naca itapeta wanaca capanenebiyaenexa xua Jesucristo wanaca tsitupaexae naetotha pon Wanacanamateaxinaein. <sup>10</sup>Jesucristo naca tsitupa naetotha wanaca baru jinompawea tsane pia nacuatheicha, bequein waxainchi bayatha werapatsi, yawano ichacuitha bequein waxainchi awiya asu jinompatsi, poxonaē bapon patopaetsica. <sup>11</sup>Daxota paxam bewa awiya daxita nantiya pana najuntu

coyene tsacabim. Matauta bewa nantiya pana naajuntucoyenesu exanaem beta painya nejume cowūntsinexa icha paichiponaem xua anoxuae paexanaponame.

**Meje yabara xua Pablo muxuweta  
pomonaē Jesucristo  
pejume cowūntsiwichi**

<sup>12</sup>Patamonaē pam, paca muxuwetatsi xua pabarū cui itura jinare pomonaē painya xantha Nacom tanacuitatsi xua pomonaē paca matakapona. Barapomonaē paca muxuweta xua Jesucristo pon jiwi Pecanamataxeinaein pecui itorobixae abe painya neexanaeyainwa. <sup>13</sup>Bewa barapomonaē beta pabarū cui itura jinaem peainya cui jiwixae. Matautano bewa bichocono paantobem xua barapomonaē betiya painya nepaca mataxeinaexae. Daxita pam nantiya junteama jinompa pana naexande.

<sup>14</sup>Patamonaē pam, paca itorobatsi xua jume daunweya pamuxuwere pomonaē afaetabi xua penacuichiwa. Pajuntu coyene cui tsacabare pomonaē juntu coyene junuwiya jinompa ichamonaē atene peexanaexae barapomonaetha. Matautano payawende pomonaē jopa ajuntucoyenesuya jinompaeyo Nacomtha. Bewayo payawende barapomonaē xua jopa painya neaitaconawam.

<sup>15</sup>Painya xoba ichamonaetha abe pata exaname, xua copiya abe pia pacata exanaexae. Seicaya jame incane beta xanepanaya daunweya pajujuteibare xua nantiya painya nenata exaneibinexa, xuano iru daxita jiwino.

<sup>16</sup>Barabu tsitecaeya pajuntu coyene weiweina dubenanaebiyama. <sup>17</sup>Daxita matakabi Nacomtha patsipaeibare matowa. <sup>18</sup>Daxita pocotsiwa pacata exana bequein jopa pacata wūnaeyo,

ichitha awiya barapocotsiwan yabara Nacomtha patsipaeibare, pajam tsaibinde: “Nacom maisa pajuntu coyene weiweinan xua pata tana neyawenaewam poxona bequein painta daunwei tsaibi”, pajam tsaibinde. Poxona baxuan papaebame bichocono Nacom tsita xanepanatsi painya neexanaexae pocotsiwa Nacom ichichipa Cristo Jesús pia paca baru jinompaexae.

<sup>19</sup> Jopa paitawetsinde Nacom pia Pejumo pe tunaxu tatsi poxona paca itoroba pocotsiwa bewa paexanaem. <sup>20</sup> Jopa pajume itawetsinde po diwesi xua ichamonae paeba pomonae Nacom Pejume Diwesi pepaebiwi. <sup>21</sup> Incane pajume taema daxita po diwesi xua barapomonae paeba icha bara metha xaniwaicha po diwesi pona Nacom weya. Saya paitapere po coyene xua pexainyeiwa. <sup>22</sup> Daxita po coyenein peabe coyenein panaitemare xua jopa painya neexanaewam abe peexanae coyenein.

<sup>23</sup> Bara Nacom, pon junte ma jinompa naca exana, barabu barapon paca juntu coyene ayapusu exanaena xua jupa paca cana exanaena icha bapon ichi xua juntu coyene xanepana. Matautano barabu Nacom paca juntu coyene xanepana exanaena painya nejinompaewa tsane bapon nexa xua jopa painya nexeia-

wam penatsicuentisiwa xua abe painya neexanaexae bapontha. Barabu Nacom beta paca jumope eenaena, yawano xua painya juntu coyenewa, matautano xua painya pepon xua Jesucristo nexa pon Wanacanamataxeinaein xua beya poxona bapon patopaetsica. <sup>24</sup> Nacom ponxae xua paca wun duba pia paca exanaenexa piamonae tatsi, bapon xainyeya pepaebin. Matautano bapon exanaena pocotsiwa xua bayatha yabara paca tsiwunae muxu duta.

### **Meje yabara xua Pablo najume wetiya paeba**

<sup>25</sup> Patamonae pam, painta Nacomtha wuqueibare.

<sup>26</sup> Antobeya painta jacobare daxita pomonae patamonae pomonae Jesucristo pejume cowuntsiwichi.

<sup>27</sup> Xan paca itorobatsi tsipei Jesucristo, pon jiwi Pecanamataxeinaein neitoroba. Paca jeichi: “Barapo carte painta yorobare daxita pomonaetha pomonae Jesucristo pejume cowuntsiwichi”, paca jeichi.

<sup>28</sup> Jesucristo, pon Wanacanamataxeinaein, barabu paca yawena pia paca necaantobewaxae.

Baja Pablo, iru Silvano, iru Timoteono ponbe necueyatabe.



## Meje Po Carte Cotacaya Pablo Tatina, Tesalonica Tomarapiwi Tatinatsi

### Meje yabara poxonaе Pablo tamropata pitaba xua tatina pomonaetha pomonaе Tesalónica tomarapiwi

**1** Xan Pablon, iru Silvano, iru Timoteo, bara poyobe pan, barapo carte pacata tinatsi. Pacata tinatsi pomonaе Tesalónica tomarapiwi pam, pomonaе panacaetutame xua wunaе painya nejainchinexa Nacom. Paxam iru pomonaе pejume cowuntsi jiwi pam, pomonaе painya neyawa jinompaewi Nacom, pon Waxa. Matauta paxam pomonaе xua painya neyawa jinompaewi Jesucristo, pon jiwi Pecanamataxeinaein. <sup>2</sup>Barabu Nacom, Waxa, iru Jesucristo, pon jiwi Pecanamataxeinaein, paca yawenaena pia paca necaantobewaxae xua juntu coyene weiweinaya painya nejinompaewa tsane. Matautano barabu betiya xanepanaya junteмиya jinompa paca cana exanaena.

### Meje yabara xua poxonaе Nacom yabara paebina jiwi xua penatsicuentisiwa xua abe peexanaexae poxonaе Cristo equeicha patopaetsica

<sup>3</sup>Patamonaе pam paxam pomonaе iru painya nejume cowuntsi jiwixae Jesucristo. Bewa pacata wuґcaponeibinchi Nacom, xua pata jei tsaibiwa: “Nacom maisa pajuntu weiweinan xua Tesalónica tomarapiwi beta xanepanaya cajume cowunta”, xua pata jei tsaibiwa tsane Nacomtha. Baxua painta wunaе xua paexanan, tsipei equeicha matowa mataropeichiya pajume cocowuntaponame. Matautano equeicha matowa nantiya pana naantobem tsopon-

aem xua daxita paxam. <sup>4</sup>Daxota juntu coyene weiweinaya paca yabara paeбatsi Nacom piamonaetha xua ichamonaе matabuxu. Paca yabara jeichi: “Maisa Tesalónica tomarapiwi jume cowunta beta, yawa saya beta dubenanaebiya poxonaе bequein atene exanatsi abeya peyabara paebeibixaetsi ichamonaе. Matautano barapomonaе beta exana dubenanaebiya xua bequein atene exanatsi xua poxonaе ichamonaе abe peexaneibixaetsi”, paca yabara jeichi barapomonaetha. <sup>5</sup>Baxuan tsita itapeinya xeina xua poxonaе bequein Nacom yabara paeba jiwi xua penatsicuentisiwa yawa peraxa jubitha barapo jiwi, barapara xanepanaya exana. Tsipei barapo jiwi natsicuenta Nacomtha abe peexanaexae. Daxota Nacom bara paca yabara cui copata xua painya patsinexa pia peitorobi nacua beicha tatsi, tsipei bichocono paatenem painya nejume cowuntsixaem bapon.

<sup>6</sup>Pomonaе xua paca atene exana, bexa tsane Nacom xuya cana exanaena xua barapomonaе peraxa jubinchi. Barapara Nacom baxua beta exana pia abe pacata exanaexae barapomonaе. <sup>7</sup>Nacom paca nafifina capanenebiya exanaena xua paca yabara cui opi ducua exanaena xua ichamonaе atene paca exana. Iruru paxantha barichi tsane Nacom, xua poxonaе Jesús patopaetsica, pon jiwi Pecanamataxeinaein. Bapon Jesús baru patopeicaena pia matatsunpiwi, xua matatsunpiwi peayapusuwatha patsicaena. Matautano Jesús muxuna patopeicaena pexeinya peitupanae coicha xua be isoto. <sup>8</sup>Jesús patopaetsica xua atene peexanaenexa jiwitha abe peexanaexae pomonaе jopa yaputaeyo Nacom, penaitematsixaetsi. Matautano atene exanaeinchi pomonaе jopa jume cowuntsiyo Jesús pia pecapanenebiyae jume diwesi tatsi, pon Wanacanamataxeinaein. <sup>9</sup>Barapo jiwi

ataya tsitecaeya ajuntucoyenetane tsane tsana penobixae tsainchi taju beya xua bapon pon jiwi Pecanamataxeinaein pia xainya weya tatsi. Matautano barapo jiwi jopa tae tsane pon jiwi Pecanamataxeinaein pia pexeinya peitupanae coicha tatsi, xuano xua pia peayapusu itorobiwa tatsi xua bichocono pexeinya coyene.

<sup>10</sup>Baxuan Nacom exanaena po matabitha abu poxonaе patopeicaena pon jiwi Pecanamataxeinaein, xua daxita piamonae pebaru cui itura jinaenexa tsainchi. Matautano bapon daxita piamonae nabenaecaeya wunae jainchinci pomonae pejume cowuntsiwichixaetsi. Paxam bara paichim tsane barapo matabitha painya nejume cowuntsixaemxae po diwesi jume bayatha paca tsipaebatsi.

<sup>11</sup>Daxota ataya paca yabara wuqueibatsi Nacomtha. Pajan: “Nacom yawende barapomonae xua jinompaena po coyeneya icha xua xam ichichipame poxonaе wun dubame barapomonae xua penaexanaenexa jinyamonae. Matautano yawende barapomonae pewetsinexa tsane jinya neayapusu itorobi coyenewatha po coyene xua wunae, po coyene barapomonae ichichipa xua peexanaewa. Matautano yawende barapomonae pewetsinexa po penacuichiwa exana necajume cowuntsixae”, pajan Nacomtha.

<sup>12</sup>Icha beta pajinompame, jiwi wunae jainchina Jesús, pon Wanacanamataxeinaein, painya nejume cowuntsixae tsane bapontha. Matautano Jesús cana exana xua barapo jiwi wunae paca jainchina painya paca cataxae tsane xua Nacom paca yawena, pia paca necaantobewaxae, xuano xua Jesucristo paca yawenaru pia paca necaantobewaxae pon jiwi Pecanamataxeinaein.

### Meje yabara xua equeicha patopaetsica pon jiwi Pecanamataxeinaein

**2** Patamonae pam, anoxuae nama yabara bepaca tsipaebinchí xua Jesucristo, pon Wanacanamataxeinaein, equeicha pepatopaewa tsica. Matautano ichichipan yabara xua tapaca tsipaebiwatsi xua wanaca baru nacaetutsiwa bapon. Daxota jume daunweya paca tsipaebatsi baxua.

<sup>2</sup>Icha ichamonae paca tsipaeba xua pinae anoxuae matabi jopa, po mataqueitha xua Jesucristo, pon jiwi Pecanamataxeinaein bayatha patopa, painya xoba bepijawa payabara najuntu coyene cabenaecaename xua daxota jopa beta pananta xeinaem. Jopa bichoina payabara jume cowuntsinde bequein paebitha tsane xua pinae baxua barapomonae tsipaebatsi Nacom pia Pejumope tunaxu tatsi. Matautano painya xoba payabara jume cowuntame bequein paebitha tsane xua pinae baraxua yabara paebandu. Matautano painya xoba payabara jume cowuntame bequein paebitha tsane xua pinae barapomonaetha baraxua payabara tinandu.

<sup>3</sup>Jopa pacopatsinde xua ichamonae yabara paca muxuitoroba baxua bequein pinmonae paca tsipaebitha tsane baxua. Tsipei baxua pewunaeya tsane xua poxonaе barapo matabi jopaena, bewa matha patopaena xua po coyene jiwi Nacom naitematínchi. Bapoxonaе pebin patopaena pon bichocono jopa juniya abe exanaeyo. Bapon apara pon Nacom weraweraca exana isototha po isototha bapana cuinaya jopa ataya tsitecaeya itacounayiyo.

<sup>4</sup>Bapon Nacom abe yabara paebinchí. Bapon jopa tsita ainya cuiyo tsainchi daxita pocotsiwa jiwi wunae jainta. Matautano bapon jopa tsita ainya cuiyo tsainchi bequein

po nacomun jiwi exana. Bapon pia coutha penacanamataxeinaein naexana xua peewatsiwa daxita pocotsiwan Nacom piawa, xua pia wuna jaintichi, xua jiwi wuna jainchina. Matauta bapon ecaena Nacom pin pia botha xua pia coya Nacom najainta.

<sup>5</sup>Bara baxuan yabara caena bayatha paca tsipaebatsiba poxonaecatunxuae paca baru popoinchi! ¿Bara pajuntemainame jampa? <sup>6</sup>Anoxuae paxam payabara yaputaneme po coyene xua peayapusu itorobi coyenewa bapon cui matawentsi xua pepatopaewa. Saya beya jume patopaetsica poxonaebarapo matabi tsane xua bapon copatinchi xua pepatopaewa tsica tsane. <sup>7</sup>Pinmonae anoxuae bichocono abe exanapona. Saya waxainchi yabara yaputaenchi baxua Nacom pia wanaca yaputane exanaexae wajume cowuntsixae. Nama pomonae jopa jume cowuntsiyo jopa yabara yaputaeyo baxua. Saya meisa acoibi xua pitinchi pon xeina barapo peayapusu itorobi coyenewa xua pecui matawentsiwatsi pontha pon bichocono abe peexanaein.

<sup>8</sup>Saya bapoxonae naitutsina bapon pon bichocono abe peexanaein. Ichitha poxonae Jesús, pon jiwi Pecanamataxeinaein patopaetsica, bapon bexubina pon bichocono abe peexanaein bexubinchi poxonae ofutarabina, xua ataya weraweraca pecana exanaenexa pexeinya peitupanae coicha peyawa naitutsiya patopeicaexae tsane. <sup>9</sup>Pewunaeya tsane xua poxonae Jesús bexubina pontha pon bichocono abe peexanaein, Satanás pon caurimonae pia pentacaponaein tatsi, bapontha catsina pia peayapusu itorobi coyenewa xua catinchi pon abe peexanaein. Bapon pon bichocono abe peexanaein bichocono peayapusuwa yawa patopaena. Matautano bapon daxita coyeneintha pexeinya petsita

itubiwana exanaena peayapusuwatha xua jopa xainyeyo xua jiwi pemuxujainyabinexatsi. <sup>10</sup>Bapon exanaena daxita peabe coyenewan xua daxita jiwi pemuxujainyabinexa tsainchi. Nacom exanaena xua barapo jiwi weraweracaena jopa peichichipaexae xua pejume cowuntsiwa pexainyei jume diwesi po diwesi xua barapomonae pecapanenebiyaenexa tsainchi.

<sup>11</sup>Daxita barapo coyeneinxae daxota Nacom bara saya yabara cui copata xua barapo jiwi bara muxujainyabinchi xua daxota jume cowuntsina barapo penaerabi diwesi jume. <sup>12</sup>Pomonae jopa bejume cowuntsiyo pexainyei diwesi jume barapomonae saya ichichipana wita xua peabe coyenewan exana. Barapomonae Nacom caununaya itawetsina poxonae yabara paebina xua barapomonae Nacom tsita natsicuentatsi xua abe peexanaexae.

### **Meje yabara pomonae Nacom itapeta pecapanenebiyaewa tsane**

<sup>13</sup>Patamonae pam, paxam pomonae pam pomonae paca antobe pon jiwi Pecanamataxeinaein. Paxan bewa daxita matabi pacata wuqueibinchi Nacomtha. Bewa pajan tsaibin tsane: “Nacom maisa pajuntu coyene weiweinan beta necajume cowuntsixae Tesalónica tomarapiwi”, bewa pajan tsaibin tsane. Daxota baxua papaeban Nacomtha tsipei bayatha caena paca itapeta painya nepaca capanenebiyaenexa xua tsiwanaya poxonae aena Nacom forota barapo cae pin nacuathe. Nacom baxua exana pia peayapusuwatha po peayapusuwa pia Pejumope tunaxu tatsi xeina ponxae paca juntu coyene xanepana exana Nacom nexa. Matautano baxua exana poxoru painya nejume cowuntsixae pexainyei diwesi jume. <sup>14</sup>Daxota Nacom bayatha paca waba

bapon painya nejume cowuntsinexa poxonaē paca cuidubatsi Nacom pia pecapanenebiyae diwesi jume. Daxotano paca waba xua Jesucristo pon Wanacanamataxeinaein painya nenabarū xeinaenexa pia pexeinya peitūpanae coyenewan.

<sup>15</sup>Patamonaē, daxota pajume cowanta dubenanaebiyama equeicha matowa. Painya xoba pajuntemainame po pecuidubiwan xua ichamonaē pana cuiduba xua xuya anoxuae yatsicaewa paca cuidubatsi, xua yawa cartano pacata tinatsi. <sup>16-17</sup>Nacom Waxa, pia wanaca antobexae naca yawena. Bapon ataya tsitecaeya naca matateica pia pexeinya juntu coyenewatha. Matautano Nacom naca cata xua wawūnaē ewatsiwa pocotsiwa xua bapon naca catapaeba, pocotsiwa xua wūnaē. Paca yabara paebatsi bapontha. Matautano paca yabara paebatsi Jesucristo tha pon Wanacanamataxeinaein. Pajan baponbetha: “Barabū payawenaenamebe Tesalónica tomarapiwi. Barabū pajuntu coyene cui tsacabinamebe barapomonaē. Matautano barabū juntu coyene jume cowuntsiya ayapusūya pacana exanaenamebe barapomonaetha, xua pia pepaēbeibinexa pocotsiwa wūnaē xuano pia peexaneibinexa pocotsiwa xanepana”, pajan baponbetha.

**Meje yabara poxonaē Pablo namchi:  
“Painta Nacomtha wūcare”, jei**

**3** Patamonaē, paxam pomonaē pam pomonaē irū painya nejume cowuntsixae Nacom. Anoxuae paca tsipaebatsi pocotsiwa xua pawetan xua pata paca tsipaēbiwatsi. Paca jeichi xua painta Nacomtha wūcare xua xain pon jiji Pecanamataxeinaein pejume diwesi tatsi awiya nainya tajū patsipaebaponaein daxita nacuantha. Matautano painta wūcare xua xain

ichaxota patsipaeban barapo diwesi daxita jiji beta jume barū jejei peainya cui diwesixae, icha paichim poxonaē pajume taneme barapo diwesi. <sup>2</sup>Matautano Nacom painta wūcare xua xain Nacom jopa copatsiyo xua painta abe exana pomonaē bichocono ajuntūcoyenebe. Tsipei jopa daxita jijiyo pomonaē beta jume cowanta po diwesi patsipaeban. <sup>3</sup>Ichitha jame bara ita coxoinchi xua wajume cowuntsiwa pon jiji Pecanamataxeinaein tsipei bara bapon xainyeya naca yawena. Matautano bapon paca juntu ayapusūya exanaena. Matautano bapon paca ita ararana xua abe paca exanaeyainwa pon bichocono abe peexaneibin. Paca yawenaena xua jopa painya neexanaenexa abe peexanaē cuiru coyenewan. <sup>4</sup>Bara paca yabara jume cowuntatsi xua bara bapon pon jiji Pecanamataxeinaein paca yawena. Bapon paca yawenaena xua paexaname, xuano xua paexana dubenanaebiyaename pocotsiwan xua paca itorobatsi. <sup>5</sup>Barabū bapon pon jiji Pecanamataxeinaein, paca yawenaena xua bichocono painya neyabara yaputaenexa Nacom pia paca antobe coyenewa tatsi. Matautano barabū paca yawenaena xua awiya antūcoyenesūya painya nejume cowanta dubenanaebiyaenexa tsane. Bapoxonaē bequein ichamonaē abe pacata exanaetha tsane jopa paaitaconaem tsane. Bara paichim tsane icha Cristo ichi xua poxonaē jiji barapocotsi coyene exana jopa aitaconaejo.

**Meje yabara poxonaē Pablo yabara  
paēba xua jiji bewa nacuichina**

<sup>6</sup>Patamonaē pam, paca itorobatsi tsipei Jesucristo Wanacanamataxeinaein pana cata pia peitorobi coyenewa. Painya xoba imoxoyo

pabarũ jinompame peafaetabi jiwi pomonae aichaxaibi nacuita, xua pomonae irũ pejume cowũntsiwixae. Barapomonae jopa yabara jume cuiya exanaeyo po pecuidubi coyenein xua Jesucristo weya bayatha, xuano xuya barapomonaetha pacuiduban. <sup>7</sup>Paxam payaputaneme, xua bewa xanepanaya betiya pajinompaem, icha bayatha paichin. Poxonae paca barũ jinompatsi jopa paacoyenefaetabinyo, apara panacuitan nawita. <sup>8</sup>Poxonae paxaiban painya xantha bara pentoma paexaneiban pexaewa nexa. Jopa amanaya panabaneibinyo. Jame apara daunweya panacuiteiban merawintha maticabinthano xua jopa daunweya pata pacata exanaewatsi tsainchi. Jopa panantawenonaem xua painta comocame pexaewa. <sup>9</sup>Bequein pana yabara cui copata xua pata paca wũcaewatsi pata neyawenaenexam tsane, ichitha bara pana netaneme xua pexaewa pana natsiũpain nacuitan, xua irũ bara painya neichinexaru. <sup>10</sup>Tsipei poxonae paca barũ enatsi baxua yabara paca tsipaebatsi xua barapo peitorobiwe paca jeiche: “Pon jopa benacuichiyo bũ jopa xae tsane”, paca jeiche. <sup>11</sup>Ichamonae pana tsipaeba xua painyamonae jiwana yabara, xua pinae painyamonae jiwana jopa natsiũpain nacuichiyo pexaewa. Saya pinae dubenanaebiya. Barapomonae saya pinae ichamonae yabara yũyũjeichi. Barapomonae jopa pinae exanaeyo piawa. Saya pinae penabarũ yũyũjei poxonae ichamonae eneibatsi poxonae nacuiteiba. <sup>12</sup>Barapomonae pomonae saya dubenanaebiya, paitoroban pajanje: “Tsipei Jesucristo pana cata pia peitorobi coyenewa pon jiwi Pecanamataxeinaein, daxota pecono jumeyotha paca tsipaebatsi. Bara panacuire painya nenacuichiwa xua pexaewa painya natsiũpain

nacuichinexa. Jopa ichamonae payabara nabaru yũyũjande”, pajanje.

<sup>13</sup>Ichitha paxam patamonae pam, pomonae pam irũ pajume cowũntame jopa paajũntũcoyenefaetabinde xua xanepanaya painya neexanaewam. Awiya xanepanaya paexanaponde. <sup>14</sup>Ichitha ichũn painyamonae jiwana jiton jopa exanaeyo pocotsiwa paca tsipaebiya tinatsi barapo cartathe barapo pebin pacui naitaware painya necui yaputaenexa. Barapo pebin jopa pabarũ jinompaeinde, xain bapoxonae aura xua jopa peexanaexae xua barapo cartathe papaeban. <sup>15</sup>Ichitha jopa bapon pacana exanaeinde be pon painya nepaca caaitafaetabi jiton. Saya jame maisa pamuxuwere xua bapon maisa penacuichinexa. Mataũta maisa bapon patsipaebare icha paichim poxonae patsipaebame pontha pon pejume cowũntsin.

#### **Meje yabara xua Pablo najume wetsiya paeba**

<sup>16</sup>Jesucristo pon jiwi Pecanamataxeinaein xua jũntema popona peyacuiya jinaein, bũ bara barapo jũntema pejinompae coyene paca catsina daxita maticabin tsaibi poxonae bequein ichamonae abe pacata exaneiba. Barabũ bapon pon jiwi Pecanamataxeinaeinxae daxita paxam paca barũ jinompaena.

<sup>17</sup>Xan Pablõn saya meisa barapo couye tacoutha bara tinan, po jumeyo xua paca jacobatsi. Baxua tsita itapeinya xeinan xua barapo carte apara bara tacarta. Daxita tacartantha barapo jume couxi wetsiya tineiban icha barapo carte ichi. <sup>18</sup>Pon Wanacanamataxeinaein, Jesucristo, barabũ daxita paxam bichocono paca yawenaena pia paca antobexae.

Baja Pablo, irũ Silvano, irũ Timoteono ponbe necueyatabe.

## Meje Po Carte Copiya Pablo Tatina, Timoteo Tatinatsi

### Meje yabara poxonae Pablo tamropata pitaba xua tatina, Timoteo tatinatsi

**1** Jaco Timoteo. Xan, Pablon, Jesucristo pia peitorobi jiwi jiwana tatsin. Nacom pon Wanacapanenebiyaein neitoroba. Matautano Jesucristo, pon Pecanamataxeinaein jiwi, pon wūnae ewatatsi iruru neitoroba. <sup>2</sup>Timoteo, xam cata tinatsi barapo carte, xam bara xaniwaicha be taxantom canatsicotainchi, tsipei cayawenatsi xua nejume cowūntsiwa Nacom. Ichichipan xua Nacom pon Waxa, iru Cristo Jesús, pon Wanacanamataxeinaein, baponbe bara amanaya cayawenaena pia necaantobexaebe. Matautano ichichipan xua baponbe nantanuweya cayabara nanta xeinaenabe pia necayawenaenexabe. Matautano ichichipan xua jūntema popona jinya necaxanaenexabe.

### Meje yabara xua Pablo yabara muxuweta pomona abeya pecuidubiwi pia pecuidubi coyenewa tatsi pecuiyainwa

<sup>3</sup>Poxonae matha cain muxu taponae Macedonia nacia beya, bapoxonae jume daunweya cajeichi, janje: “Ecare Efeso tomaratha jinya necui itorobinexa tsane pomona abeya pecuidubiwi pia pecuidubi coyenewatha. Barapomona seicayiia cuiduba ichi be jopa paxan ichiyo pomona Jesucristo pia peitorobi jiwi tatsi panxaein. Itorobare xua barapomona jopa cuidubi tsane ichamonaetha barapo coyene po coyene xua jopa xainyeyo. <sup>4</sup>Matautano barapomona jopa bewa jūntu coyene

ena tsainchi po diwesin xua pia pamo susato jiwi tatsi paeba po diwesin xua pejema diwesin, matautano po ayei diwesinno, xua pia pamo susato jiwi tatsi yabara”, cajeichi. Barapo diwesin saya jiwi najume matsontsonoba exana. Barapo diwesin jopa naca yawenaeyo xua beta wacanamataxeinaewa Nacom piamona wajume cowūntsixae Nacom.

<sup>5</sup>Xua tapaebixae xua barapo peitorobi coyenewatha paeba apara xua daxita jiwi nantiya caemona penaantobenexa tsane. Barapo peantobe coyenewa jiwi pia jūntu coyene wetsina pona poxonae pia jūntu coyenein xanepana xua jopa xeinaeyo peabe coyenewa yawa poxonae barapo jiwi pia coutha najūntu coyene tsipaeba xua jopa peexanaenexa peabe coyenewa Nacomtha. Yawa barapo peantobewa jiwi pia jūntu coyene wetsina pona poxonae barapo jiwi xaniwaicha jume cowūnta Nacomtha. <sup>6</sup>Ichamona jopa xeinaeyo barapo peantobe coyenewa poxoru jume itaweta, matautano poxoru najūntu coyene eena exana penajume matsontsonobi diwesin. <sup>7</sup>Barapomona ichichipa becuidubina Nacom pia peitorobi diwesi jume. Bequein barapomona baxua exana, ichitha jopa beta exanaeyo tsipei jopa yabara yaputaeyo Nacom pia peitorobi diwesi jume. Matautano barapomona jopa yabara yaputaeyo po coyeneya xua atsaquiya yabara cuiduba ichamona Moisés pia peitorobi diwesi jume.

<sup>8</sup>Bara yaputainchi xua Moisés pia peitorobi diwesi wūnae jiwi nexa, icha po jiwi cuiduba barapo diwesi, bara xaniwaicha cuiduba icha be pocotsi coyeneya xua Nacom ichichipa. <sup>9-10</sup>Waxainchi matautano yaputainchi xua Nacom pia peitorobi diwesi jume jopa barapomona nexiyo pomona bayatha pejūntu coyene xeicaewi tsipei daxita coyenein ba beta

peexanaewi. Jame barapo Nacom pia peitorobi jume, barapomonaе nexa pomonaе meje: pomonaе jopa exanaeyo pocotsiwa Nacom pia peitorobi diwesi jumetha itoroba; pomonaе jopa jume cowantsiyo Nacom; pomonaе jopa ichipaeyo Nacom; pomonaе abe peexanaewi; pomonaе jopa juntu coyene xanepanaeyo Nacomtha; pomonaе aichaxaibi Nacom pia peitorobi diwesi jume; pomonaе pia paxeiwi pebewi; pomonaе pia pena jiwi pebewi; pomonaе jiwi pejutebiwi; pomonaе penata siwa xeinaewi yabuxitha xua jopa piseuri jiwi; pomonaе cae pebiwi penaisamaichi jiwi xua be yabuxi penatsicotae jiwi; pomonaе paratixi xeineiba xua ichamonaе pejiwana noteibixaetsi poxonaе equeicha caewa pejiwana canawibeibixaetsi; pomonaе jiwi pemuxitorobiwi; pomonaе naerabiya jume daunweya paeba xua ichamonaе naerabiya peyabara paebiwatsi. Barapo peitorobi jume iruru barapomonaе nexa daxita pomonaе seicayiya yabara jume toxechiya exana po coyene xua Jesucristo pia pexeinya pecuidubi coyenewa. <sup>11</sup>Barapo pexeinya pecuidubi coyenewa, bara najume jupabe Nacom pia pexeinya jume diwesi tatsi, po diwesi yabara po coyene xua Nacom bara bichocono pexanepanaein, xuano bichocono pejuntu coyene weiweinaein. Barapo diwesibe Nacom itoroba xua tacueicueijiwa tsane.

**Meje yabara poxonaе Pablo juntu coyene weiweina Jesucristo**

<sup>12</sup>“Juntu coyene weiweinan tanecat-sixaemxae peantuyapuswa”, jan Jesucristo, pon Wanacanamataxeinaein. Bapon necata peantuyapuswa tacueicueijiwa tsane jiwitha Nacom pia Pexeinya jume diwesi tatsi. Bapon neyabara nanta xeina xua bara beta jume cowun-

tan, daxota necana exana xua xan pia petanacuichin tatsin. <sup>13</sup>Bapon baxua inta exana bequein bara bayatha bapon abeya yabara paeban. Matautano bapon piamonaetha tatsi abeya tacana exanan. Matautano abeya tayabara paeban barapo pijimonaе tatsitha pomonaetha pomonaе pia pejume cowantsi jiwixaetsi. Ichitha Nacom nantanuweya neyabara nanta xeina pia tana neyawenaena, tsipei bapoxonaе jopa jume cowantsiyo Jesucristo poxonaе abe exanan. Matautano jopa yaputaeyo pocotsiwa xua bayatha exanan. <sup>14</sup>Daxota Nacom pon Wanacanamataxeinaein bichocono amanaya neyawena tanean-tobexae. Nacom nejuntu coyene yuca exana po pejume cowantsiwa xuano xua po peantobewa tsita xeinatsi Cristo Jesús.

<sup>15</sup>Cristo Jesús patopeica po cae pin nacuathe tsique pecapanenebiyaenexa tsainchi pomonaе abe peexanae jiwi, xua capanenebiyatsi abe pia peexanae cuiru coyenein weya. Pomonaе abe peexanae jiwi barapomonaе jiwanan xua bichocono abe taexanaein beyacaincha barapomonaе poxonaе abe exana. Baxuan apara xainyei pocotsiwa xua yabara paeban. Jiwi bewa jume cowantsina baxuan. <sup>16</sup>Bequein bichocono abe taexanaein, daichitha Nacom nantanuweya neyabara nanta xeina pia tana neyawenaewa tsane. Tsipei xan pon Jesucristo nenaituta exana jiwitha, xua bayatha tana necui yabara ewatsixae xua tajume cowantsiwa tsane Jesucristo xua poxonaе jopa aitaconaeyo. Daxota ichamonaе poxonaе netaena Nacom exanaena xua barapomonaе Jesucristo pejume cowantsiwa tsainchi, pexeinaenexa peantuyapuswa po peantuyapuswa xua ataya tsiteca. <sup>17</sup>Nacom, wunaе paca jaintatsi: “¡Xam Nacom pon ataya jiwi itorobiya pepa Nee-watsin! ¡Xam Nacom pon bapana jopa

tupaem tsane! ;Xam pon xua jiwi jopa itacupaetsi xua necataewa! ;Xam yatsicaewa compam pepa Nacomum! ;Ataya paca tsita baru cui itura jinatsi! ;Barabu ataya jiwi wuna cajainchina! Je bara ichi tsane”, paca jeichi Nacom.

<sup>18-19</sup>Xam, Timoteom, bara xaniwaicha be taxantom canatsicotainchi. Caitorobatsi ichi be pocotsi coyeneya bayatha Nacom pia peitorobi jume pepaebiwi caitoroba poxona cayabara tsiwuna muxu duta xua bexa cuidubiname jiwitha Nacom pia pexeinya jume diwesi. Xan caitorobatsi icha be pocotsi coyeneya bayatha barapomona caitoroba. Cajechi: Jume daunweya antuyapusya beta exande Nacom pia petanacuichiwa tatsi. Poxona baxua exaname, beta jume cowuntsiya exande, yawa pexeinya juntu coyene xinare po juntu coyene xua xainyeya natsipaebame, xua jopa abe exanaem Nacomtha, cajechi. Ichamona bequein beta natsipaeba pijuntu coyeneintha, ichitha barapomona najuntu coyene barapenta po coyene Jesucristo pejume cowuntsiwatsi tsipei jopa jume cowuntsiyo pocotsiwa pia juntu coyene tsipaebatsi. <sup>20</sup>Barapocotsi coyene Himeneo exana iruru Alejandro exanaru. Baponbe caenaetanbe pon caurimona pia pentacaponaeintha tatsi pon Satanás beya poxona baraponbe nacuidubinabe xua jopa bewa abe yabara paebi tsanebe Nacomtha.

**Meje yabara xua Pablo yabara  
cuiduba po coyene  
xua Nacomtha petsipaebiwa**

**2** Copiya caitorobatsi baxuanje xua exanaename: Nacomtha tsipaebare daxita jiwi nexa; Nacomtha wucare xua Nacom peyawenaenexa daxita jiwi; yawa jande Nacomtha: “Nacom, maisa juntu coyene

weiweinan xua daxita xanepanaya jinya netaexanaewam jiwi”, jande. <sup>2</sup>Bewa Nacomtha tawucaename daxita nacua peewatsiwimona. Matautano bewa Nacomtha tawucaename daxita pentacaponawimona. Baxua bewa exanaename xua juntema beta wajume cowunta dubenanaebiyaenexa Nacomtha, yawa juntema wajinompaenexa jiwi peitutha. Barapo juntema wajinompawea bara bewa Nacom tsita xinaeinchi barapo coyene, yawa bara jiwi xaniwaicha naca cui tane xua bara beta xaniwaicha jinompatsi daxita carepaya coyene cuintha. <sup>3</sup>Barapo coyenein jame Nacom tsita wunaetsi pon Wanacacapanenebiyaein. <sup>4</sup>Nacom bichocono ichipa xua daxita jiwi pecapanenebiwa tsainchi abe pia peexanae cuiru coyenein weya. Matautano Nacom ichichipa xua jiwi yaputaena pocotsiwa xua pexainyei coyenewa. <sup>5</sup>Meisa compa Nacom pon pepa Nacom, bapon meisa popona. Barichi saya meisa caein pon itacupatsi xua jiwi yabara jume yawenatsi Nacomtha, apara barapon Jesucristo. <sup>6</sup>Jesucristo copata xua bara naetotha tsitupa xua daxita jiwi yantomatatsi xua jiwi pecapanenebiyaenexa tsainchi abe pia peexanae cuiru coyenein weya tatsi. Poxona Jesús tupa naetotha, baxua tsita itapeinya xaina xua Nacom Pexanto itoroba po mataqueitha Nacom peichichipaexae xua daxita jiwi pecapanenebiwa tsainchi. <sup>7</sup>Daxota Nacom newun duta, jeye: “Bapon apara pon tajume diwesi pecaponaein yawa bapon taitorobi jiwi jiwapanin”, jei Nacom. Bara xaniyeya paeban, jopa naerabinyo. Daxota Nacom neitoroba tacuidubinexa pomonaetha pomona jopa judiomona naexanaeyo xua Nacomtha pejume cowuntsiwa yabara yawano xua Nacom pia pexainyeiwa yabarano tatsi.



<sup>8</sup>Daxota ichichipan xua daxita nacuanpiwi Nacom pewucaewa tsainchi. Poxonae wucaena Nacomtha bewa namaxu yoichaena xua yatsicaewa pexeinaexae tsane pejuntu coyene xanepanaewa. Matautano jopa bewa yajuntu coyeneya paebi tsane xua peita aenae-aeniwa ichuntha. Matautano jopa bewa yajuntu coyeneya paebi tsane xua penajume matsontsonobi coyenewa. <sup>9</sup>Ichichipan xua yabuxi nama xatabina pocotsi paparuwa be conotha wunae. Saya uuranaya jinompaena xua bichocono jopa atsaqui tsane xua pebaru yuyujeiwa pebiwitha. Jopa bichocono wunaeya nantana fabi tsane. Jopa bichocono nantana pepena exanae tsane pocotsiwatha xua bichocono ainya matoman, pocotsiwa pewun oro, matautano pocotsiwa pewun perlan. Matautano jopa namaxatabi tsane pocotsi paparuwa bichocono ainya matoma. <sup>10</sup>Jame yabuxi bewa exanaena pocotsiwa jiwi tsita coyene xanepanatsi, xua pocotsi coyene jiwi yawenatsi. Baxuan jame bichocono wunae xua yabuxi exana, po yabuxi xaniwaicha jume cowuntsiya jinompa xua Nacom pejume cowuntsiwatsi. <sup>11</sup>Yabuxi bewa saya moya jume naitawatsiya jume taena pocotsiwa xua nacuiduba. Saya bewa moya jume jejei tsane. <sup>12</sup>Tsipei yabuxi jopa copatsinyo xua cuidubina Nacom Pejume Diwesi pin bicheito itabaratha. Matautano jopa copatsinyo xua yabuxi pentacaponaei penaexanaewa tsane pebiwi nexa. Jame bewa yabuxi saya moya enaena poxonae pejume cowuntsiwi nacaetuta xua Nacom wunae pejainchinexatsi. <sup>13</sup>Tsipei Nacom copiya exana pebin pon pewun Adán, bapoxonae yabuyo exainchi powa pewun Eva. <sup>14</sup>Caena bayatha Adán jopa muxujainyabichi pon caurimonae pia pentacaponaein

tatsi xua abe peexanaewa tsane. Aparajame bapowa Eva muxujainyabatsi, daxota bapowa abe exana. <sup>15</sup>Bequein yabuyo atene poxonae tanaexanatsi pexuyo, ichitha Nacom capanepaena bapowa icha bapowa jume cowuntsiya poponaena Nacomtha, yawa icha antobeya poponaena, yawa icha betiya poponaena xua yatsicaewa Nacom nexa, yawa icha ita uuranaya poponaena Nacomtha.

**Meje yabara xua bewa exanaena pomonae pecanamataxeinaewi pejume cowuntsiwi**

**3** Baraxua bara xainyei xua paca tsipaebatsi. Icha pebin ichichipa naexanaena xua pomonae Nacom pejume cowuntsiwichi pecanamataxeinaewatsi, bara baxua bara xanepana. <sup>2</sup>Daxota pon pomonae Nacom pejume cowuntsiwi canamataxeinatsi, bapon bewa xanepanaya beta poponaena xua bapon jopa abe peyabara paebinexa tsainchi ichamonae. Bapon bewa saya cae piseuri baru jijinaena. Matautano bapon jopa bewa bichocono apae tsane xua vino mera pia beta penanta xeinaenexa. Bapon bewa beta nayaputane exanaena, xua daxota xanepanaya peexanaewa tsane, xua bapoxonae ichamonae bapon xanepanaya peyabara nanta xeinaewa tsainchi. Bapon bewa matenta weiweinaya wabeibina pomonae petapateibeibixaetsi pia botha. Bapon ba pia cui xeina xua beta cuidubina ichamonaetha. <sup>3</sup>Bapon jopa bewa nacupa exanae tsane peatsaxae mera. Yawano jopa bewa bapon naba exanae tsane, saya jame bewa juntea poponaena. Bapon jopa bewa najume matsontsonoba exanae tsane. Yawano bapon jopa bewa pitaparaticixi xua paraticixi peasiwiwa. <sup>4</sup>Bapon bewa beta itorobiya canamataxeinaena pia

bomonaе matabuxyo. Matautano bapon bewa pia pexui jume naitaewatichi poxonaе itorobeiba pia pexui. Yawa pia pexui bewa tsita xeinaetsi pebaru itura jinae coyenewa. <sup>5</sup>Icha barapocotsi jiton ita coxanatsi xua beta itorobiya canamataxeina pia bomonaе matabuxyo, bapon nexata jopa itacupaetsi xua canamataxeina Nacom nexa pomonaе Nacom pejume cowuntsiwi xaetsi. <sup>6</sup>Pebin jopa bewa naexanae tsane xua pomonaе Nacom pejume cowuntsiwichi pecanamataxeinaewatsi poxonaе cataunxuae abu pena pejume cowuntsin Jesucristo. Icha bapon pena pejume cowuntsin tsipae Jesucristo, metha bapon aebichipa nawita jiwitha, bapoxonaе Nacom cana exanaetsipa bapontha, icha be pocotsi coyeneya ichi poxonaе caurimonaе pia pentacaponaein tatsi itawetatsi, xua Nacom itaweta pia nacia weya, xua Nacom peabixaetsi. <sup>7</sup>Matautano bapon bewa beta poponaena, xua pomonaе jopa pejume cowuntsiwi Nacom bapon beta peyabara nanta xeinaenexa tsainchi. Icha bapon jopa beta poponaе tsane, bapoxonaе jiwi abeya yabara paebina, bapon abeya yabara paebinchi. Yawano metha bapon exanaetsipa pocotsiwa caurimonaе pia pentacaponaein tatsi cui jujuta xua po cui coyeneyatha bapon peexanaenexa.

**Meje yabara pomonaе jiwi  
peyawenaewi pomonaetha  
pomonaе pejume cowuntsiwi**

<sup>8</sup>Barichiru pomonaе jiwi peyawenaewi pomonaetha pomonaе pejume cowuntsiwi, xua peyawenaewi peatenewitha, xua muxunano peapatsiwano peacopeibiwatha, barapomonaе bewa beta jinompae, xua jiwi pebaru cui itura jinaenexa barapomonaetha. Matautano barapomonaе jopa bewa icha caununaya paebi tsane. Jopa

barapomonaе nacupa exanae tsane peatsaxae meran. Matautano jopa bewa pitaparatixichi tsane xua paratixi peasiwiwa. <sup>9</sup>Barapomonaе bewa beta jume cowuntsi Jesucristo po coyene xua Nacom yabara tsita ituta xua wajume cowuntsiwa, yawano barapomonaе bewa muxuna xeinae po juntu coyenetha beta xaniwaicha natsipaebatsi xua jopa abe exanaetsi Nacomtha. <sup>10</sup>Bara matha bu ichamonaе cui jujutsina barapomonaetha icha beta xaniwaicha jinompa yawa icha ichamonaе jopa abeya yabara paebiyо barapomonaetha. Bapoxonaе barapomonaе cana exanaeinchi pomonaе jiwi peyawenaewi pomonaetha pomonaе pejume cowuntsiwi, xua peyawenaewi peatenewitha, xua muxunano peapatsiwano peacopeibiwitha. <sup>11</sup>Barichi yabuxi bewa beta jinompaena xua barapowaxi pebaru cui itura jinaewa tsainchi jiwi. Jopa bewa bapowaxi abe yabara paebi tsane ichamonaetha, xua ichamonaе abe peexanaexae. Matautano bapowaxi jopa bewa bichocono apae tsane vino meran. Matautano bapowaxi bewa beta jinompae, xua ichamonaе peyabara jume cowuntsiya nanta xeinaenexa xua pocotsiwa bapowaxi daxitan exana pocotsiwan bayatha exanapaеbeiba. <sup>12</sup>Barapocotsi jiwi jiwana jiton pomonaе peyawenaewi pomonaetha pomonaе pejume cowuntsiwi, bapon bewa saya cae piseuri baru jijinaena. Matautano bapon bewa beta itorobiya canamataxeinaena pomonaе pia bomonaе matabuxyo xua daxota bewa beta itorobiya canamataxeinaena pia pexui. <sup>13</sup>Tsipei barapocotsi jiwi pomonaе peyawenaewi pomonaetha pomonaе pejume cowuntsiwi poxonaе barapomonaе beta exana pia petanacuichiwa, bapoxonaе ichamonaе barapomonaе wunaе jaintatsi beta

pia petanacuichi waxae. Matautano barapomonaē ichamonaetha cui tsacsatsacapiya yabara paeba xua pia pejume cowuntsiwa xua Cristo Jesús pejume cowuntsiwatsi.

**Meje yabara po coyene xua naituta  
xua po coyene copiya moya  
peyawun xeinaewa po coyene  
xua wajume cowuntsiwa**

<sup>14-15</sup> Bequein ichichipan xua methaunxuae cataeinchi, daichitha daxota cata tinatsi xua icha pirapaeyo tapatopaewa tsane, bapoxonaē yaputaename po coyene xua jiwi bewa exanaena. Barapo coyene beta xanepanaya penabarū jinompae coyenewa Nacom peitabaratha tatsi, pomonaē Nacom piamonaē tatsi. Apara yabara paeban pomonaē Nacom piamonaē tatsi, pomonaē Jesucristo pejume cowuntsiwichi, pomonaē nacaetuta xua Nacom wanaē pejainchiwa tsainchi, po Nacom ataya asu pepoponaēin. Barapomonaē yajuntu coyeneya jinompa Nacom pia pexainyei coyenewa tatsi. Matautano barapomonaē yabara jume yawena Nacom pia pexainyei jume diwesi poxonaē ichamonaē abeya yabara paeba barapo pexainyei jume diwesi.

<sup>16</sup> Waxainchi paebatsi jeichichi: “Pocotsiwa jume cowuntatsi Jesucristo, maisa bichocono xanepana bara be po coyenewa xua moya peyawun xeinaewa, po coyenewa jiwi jopa yaputaeyo”, jeichichi. Wayabara jume cowuntsiwa baxua meje:

Nacom naexana be jiton pia juntu coyeneya tatsi, xua barapara bapon Cristo. Nacom pia Pejumo pe tūnaxū tatsi yabara paeba, xua bapon yabara paebatsi, xua bara bapon yatsicaewa bara Nacom.

Iru matatsunpiwi tane, xua bapon tainchi.

Bapon yabara cueicueijeichi jiwi yabara cueicueijeji daxita nacuanpiwitha.

Daxita nacuanpiwi jiwana monaē, bapon yabara jume cowuntatsi.

Yawano equeicha bapon peitaboco becaichatsi.

**Meje yabara xua pomonaē naerabiya  
pecuidubi jiwi pomonaē seicaiya  
cuiduba xua ichi be jopa paxan ichiyo**

**4** Nacom pia Pejumo pe tūnaxū tatsi beta xaniwaichiya jeye xua poxonaē po dapae tabū ducuaena xua poxonaē po dapaetha Nacom daxita wetsina, bapoxonaē pomonaē pejume cowuntsi jiwi jiwana Nacom pentinchi xua Nacom pejume cowuntsiwatsi. Yawa barapomonaē napuna ponaena caurimonaē po caurimonaē jiwi muxuitorobiya muxujainyabatsi. Matautano barapomonaē exanaponaena po pecuidubiwa caurimonaē pia pecuidubiwa tatsi. <sup>2</sup> Matautano barapomonaē jume naitaewatsiya jume taena pocotsiwa paeba pomonaē jiwi pemuxuitorobi jiwi. Barapo pemuxuitorobi jiwi cui nacopata xua bara abe exana nawita, po pejuntu coyenetha xanepanaya natsipaeba poxonaē abe exana. Daxota barapomonaē jopa yaputaeyo po juntu coyene xanepana. <sup>3</sup> Barapomonaē pomonaē pemuxuitorobi jiwi, jiwi cui matawentsi xua jitha peenaewa. Matautano jiwi jain matawentsi xua jopa xae tsane icha penabanaewan, bequein taetha xua barapo penabanaewan Nacom tsijain exana jiwi. Pomonaē pejume cowuntsiwi xuanō pomonaē peyaputaewi Nacom pia pexainyei coyenewa tatsi, poxonaē barapomonaē najume weteiba xua natsijain jacobeiba Nacomtha, jei tsaibi:

“Nacom maisa jũntũ coyene weiweinan xua tana necatsiwaxaem pexaewa”, jei tsaibi, bapoxonae barapomonae bara xane barapo penabanaewan. <sup>4</sup>Daxita xua pocotsiwan Nacom forota baxuan wũnae. Jopa bewa naitematsi tsainchi pocotsiwa xua Nacom naca cata. Saya jame bewa noteibichi, yawano bewa Nacom natsijain jacobebichi xua jei tsaibichi: “Maisa Nacom jũntũ coyene weiweinan xua tana necatsiwaxaem pexaewa”, xua jei tsaibi tsainchi. <sup>5</sup>Nacom naca tsijain betsina barapo penabanaewan, matha wayorobixae Nacom Pejume Diwesi, yawa wanatsijain jacobebixae Nacomtha xua jei tsaibichi: “Nacom maisa jũntũ coyene weiweinan xua tana necatsiwaxaem pexaewa”, wajei tsaibixaetsi.

**Meje yabara xua pon  
Jesucristo beta tanacuitatsi**

<sup>6</sup>Daxita barapo coyenein xuaunxuae catsipaebatsi, icha barapo coyenein tsipaebiya cuidubame ichamonaetha pomonae irũ pejume cowũntsi jiwi Cristo, bapoxonae xam pon beta netanacuichim tsane Jesucristo. Bapoxonae ichamonae cacui taena xua xam bara bichocono jinya coutha jume cowũnta na-eexanaponame, yawano xua neexanaexaeno pocotsiwan cacuidubatsi po pecuidubiwa bichocono pexeinya coyene. <sup>7</sup>Jume naitemare po diwesi xua saya jiwi cueicueijei xua jopa Nacom pia diwesiyo tatsi, po diwesi xua pejemai diwesi xua jopa xapain wũnaeyo. Jinya coutha nacuidubare, xua nenajũntũ coyene cana exanaenexam tsane icha be Nacom pia jũntũ coyene ichi. <sup>8</sup>Bequein penacui jũjũtsiwa xanepana xua pepon daunwei penaexanaenexa, ichitha jame xua penajũntũ coyene xanepana exanaewa Nacomtha, baxua jame

bichocono xanepana beyacaincha xua penacui jũjũtsiwa. Tsipei barapo penajũntũ coyene xanepana exanaewa Nacomtha naca yawena anoxuae poxonae cataunxuae awiya jinompatsi po cae pin nacuathe, yawa xua bexa tsaneno naca yawenaena Nacom pia nacuatheicha. <sup>9</sup>Baraxua yatsicaya apara xainyei. Daxota daxita jiwi bewa yabara jume cowũntsi po coyene xua penajũntũ coyene xanepana exanaewa Nacomtha. <sup>10</sup>Barapocotsi coyene waxainchi ajũntũyapusya daunweya exanatsi. Ichamonae naca atene exaneiba xua poxonae abe naca yabara paebeiba, tsipei waxainchi jume cowũntsiya wũnae ewatatsi Nacom, pon ataya pepoponaein. Barapon Nacom ichichipa xua daxita jiwi pecapanenebiwa tsainchi abe pia peexanae cuiru coyenein weya tatsi. Bapon jiwi Pecapanenebiyaein abe pia peexanae cuiru coyene weya tatsi xua pomonae pia pejume cowũntsi jiwixaetsi.

<sup>11</sup>Barapo coyenein bewa ichamonae cui itorobiname, xua necuidubiwam pocotsiwa barapomonae peexanaewa tsane. <sup>12</sup>Jopa jume naitaewatsinde xua ichamonae cayabara paeba xua poxonae jopa cabarũ cui itura jinaeyo xua poxoru nepewowixaem. Jame bewa beta exanaponae xua necacui taeponaenexa pomonae pejume cowũntsiwi Jesucristo. Xua barapomonae tsita exaname, xua irũ barapocotsi coyeneya peexanaenexaru. Beta cueicueijande, matautano beta poponde, yawa matautano antobe tsurucuaenbiyama jiwi xua ichamonae necacui taenexa. Yawa matauta beta poponde xua bichocono jume cowũntame Jesucristo xua ichamonae necacui taenexa. Yawa beta poponde xua nenajũntũ coyene bichocono xanepana Nacomtha xua ichamonae necacui taenexa. <sup>13</sup>Poxonae cataunxuae jopa patopaein

tsane, jiwi peitabaratha yorobeibare Nacom pia pexeinya jume diwesi tatsi. Barapo diwesi yabara cueicueijande, matautano cuidubareno pomonae pejume cowuntsiwi Jesucristo. <sup>14</sup>Caena bayatha pitiri jiwi, po pitiri jiwi pejume cowuntsiwi jiwanaomae, canta jayabiya caitoroba xua necueicueijiwa tsane Nacom pia pexeinya jume diwesi tatsi. Barapo pitiri jiwi canta jayaba Nacom peitorobixae. Barompaya jinya nexanae coyenewatha jopa yabara toxinchiya exanaeinde po cui coyenewa Nacom bayatha cacata poxonae barapo pitiri jiwi canta jayaba, po cui coyeneyatha neexanaewa tsane pocotsiwa Nacom ichichipa.

<sup>15</sup>Daxita barapo coyenein naitematsiya eexanaponde xua ichamonae necacui taenexa xua bara xanapanaya jume cocowuntaponame.

<sup>16</sup>Dotam xua nejuntu coyenewa cananta xeiname. Matautano dotam xua pocotsiwa necuidubiwam. Awiya beta ajuntuyapusuya jume cowanta ducuaaebiyama. Icha baxua exanaename jinya coutha nacapanepa exanaename xua Nacom cacapanepaena petupae cuiru coyene weya. Iru barichim tsane capanenebiya exanaename xua Nacom capanenebiyaena pomonae necajume naitaewatsiwi.

**Meje yabara xua pocotsiwa Timoteo  
bewa cuidubina pomonae  
Jesucristo pejume cowuntsiwichi**

**5** Jopa jume itawetsinde pon pitirin. Jame saya bewayo muxuwere icha be ichim xua poxonae axa bewayo muxuwetame. Barichinde pewowi saya bewayo muxuwere icha be ichim xua poxonae eweicho jiwi saya bewayo muxuwetame. <sup>2</sup>Pitiriwaxi saya bewayo cuidubare icha be ichim xua poxonae ena saya bewayo cuidubame. Matau-

tano saya bewayo cuidubare penawaxi icha be ichim xua poxonae amcho jiwi saya bewayo cuidubame xua tsita auram. Juntu coyene xanapanaya yabara nanta xeinare barapowaxi, xua jopa abe neexanaewam.

<sup>3</sup>Nacom piamonae, pomonae pejume cowuntsiwi, barapomonae bewa yawenaena powaxi pecuenta werapaewaxichi piseuriwi, saya jame poxonae barapowaxi jopa xeinaeyo piamonae tatsi, pomonae peyawenaewichi. <sup>4</sup>Icha ichawayo powayo pecuenta tupaewayotsi piseuri, icha bapowa pipexui xeina yawa ichacuitha icha xeina pia pemomo jiwi, barapomonae bewa yawenaena barapowatha. Barapomonae copiya bewa nacuidubina xua Nacom cui itoroba xua bewa ba tsita baru cui itura jinaena bapowatha. Barapo coyene tsita exaneibina xua poxonae yaweneibina bapowatha. Barapomonae bewa yawenaena bapowatha xua bapowa piamonaexae tatsi. Bapoxonae bapowa jopa nantawenonae tsane xua ichamonae bapowa peyawenaewatsi. Barapomonae bewa antobeya apatsina xua bapowa antobeya apatsinchi be pentoma xua caena bayatha copiya pia peantobeya apatsixaetsi poxonae pexui. Jame barapo coyene Nacom tsita coyene xanapanatsi, matautano barapo coyene Nacom juntu coyene weiweina exanatsi.

<sup>5</sup>Powa bara xaniwaicha pecuenta tupaewayotsi piseuri, powa xaniwaicha compa, powa jopa xeinaeyo piamonae matabuxu pomonae peyawenaewichi, bapowa jume cowuntsiya wnae ewata xua Nacom yawenaena xua bapowa yawenaeinchi. Pebaxuanexa tsane bapowa wuqueiba Nacomtha merawintha, yawa matababintha. <sup>6</sup>Ichitha nama powa pecuenta tupaewayotsi piseuri, powa saya pia coutha nayabara nanta xeina nawita

xua penasiwaimeinchiwa pebiwitha, bapowa saya jopa nanta xeinaeyo xua jume cowuntsiya wūnae ewatsina Nacomtha, xua peyawenaewa tsainchi. Daxota bapowa pia juntu coyene tatsi be tupa, xua Nacom be tsita tūpatsi bara bequein bapowa pozona.<sup>7</sup> Daxota xua ichamonae jopa abeya peyabara paebinxaxa pomonaetha pomonae pejume cowuntsiwi, cuidubare barapo peyawenaewa coyenewa barapomonaetha pomonae pejume cowuntsiwi.<sup>8</sup> Meje xua pocotsiwe baxue: Icha pon jopa yabara nanta xeinaeyo xua piamonae peyawenaewa tsane, bapon apara bara exana be poxona jopa jume cowuntsiyo. Bapon apara bichocono ajuntucoyeneyapubeya exana, beyacaincha pon jopa jume cowuntsiyo, pon daichitha piamonae yawena.

<sup>9-10</sup> Barapo paperatha, po paperatha ichaxota saya wūn dubatsi powaxi pecuenta werapaewaxichi piseuriwi, barapo paperatha wūn tinadubare. Saya wūn tinadubare powaxi xua beyacaincha sesenta po weibe xeina, powaxi xua caena bayatha cae pebintha cuicuina, matautano wūn tinare powaxi xua ichamonae yabara paeba xua pinae bapowaxi xanapanaya exana. Pocotsi coyenein xua poxona barapowaxi xua xanapanaya exana baxue meje: Bapowaxi beta wichita pia pexui; yawa bapowaxi beta matenta weiweinaya apateiba pomonae petapateibiwichi pia bontha; yawa bapowaxi taxu quiateiba pomonae pejume cowuntsiwi Cristo pomonae petapateibiwichi pia bontha; yawa bapowaxi yaweneiba pomonae peacopeibi jiwi; yawa bapowaxi daxita carepaya coyeneintha exaneiba po coyenein bichocono jiwi tsita xanapanatsi.

<sup>11</sup> Ichitha jopa wūn tinaeinde powaxi cataunxuae taacoibichi xua xeina sesenta po weibe. Tsipei ichacuitha

bapowaxi junteinaetsipa pocotsiwa bayatha Cristo yabara tsiwūnae muxu duta xua jopa equeicha penotsiwa icha pebiwi. Bexa barapowaxi equeicha icha pebiwi benotsipa.<sup>12</sup> Barapowaxi Nacom yabara paeba xua pinae barapowaxi barapara natsicuenta xua abe peexanaexae, poxoru jopa exanaeyo pocotsiwa bayatha yabara tsiwūnae muxu duba Cristotha pocotsiwa xua exanapaeba.<sup>13</sup> Matautano barapowaxi fifina, jopa ichichipaeyo xua penacuichiwa daxota saya daxita bontha siwa poneiba, matauta saya cueicueijeji tsurubenaebiya xua ichamonae peyabara paebiwatsi pocotsiwa xua jopa xapain pexeinya diwesiyo. Matautano barapowaxi fayacota dubenanaebiya ichamonaetha.<sup>14</sup> Daxota powaxi piseuriwi pecuenta werapaewaxichi, powaxi xua penawaxi, xan saya nanta xeinan xua barapowaxi barabu moya jitha enaena equeicha. Barabu moya equeicha xexeinaponaena pexui, yawa moya barabu xua pia boxi bara beta ewatsina. Matautano barapowaxi jopa bewa abe exanae xua daxota ichamonae pomonae jiwi peaitafaetabi jiwi abe yabara paebina xua abe yabara paebinchi pomonae pejume cowuntsiwi.<sup>15</sup> Barapowaxi jiwana powaxi penawaxi powaxi pecuenta werapaewaxichi piseuriwi, barapowaxi bayatha bara apara exana dubenanaebiya pocotsiwa xua caurimonae pia pentacaponaein tatsi cui itoroba, pon Satanás.

<sup>16</sup> Icha petsiriwa, powa pejume cowuntsiwayo Jesucristo, icha bapowa tapopoinchi pia botha pijimonae jiwawayo tatsi powayo pecuenta tupaewayotsi piseuri, barapo pejume cowuntsiwayo bewa yawenaena bapowatha. Barapo pejume cowuntsiwayo jopa bewa copatsi tsane xua pomonae pejume cowuntsiwi

apatsina pexaewa bapowatha, powa pecuenta tupaewayotsi piseuri. Bapoxonae pejume cowuntsiwi itacupatsi xua yawenaena powaxi xua xaniwaicha pecuenta werapaewaxichi piseuriwi xua powaxi jopa pexeinaexae piamonae matabuxu jiwi tatsi pomonae peyawenae jiwichi.

<sup>17</sup> Pomonae pejume cowuntsiwi bewa bichocono xanepanaya baru cui itura jinaena xua pitiri jiwi baru cui itura jinaeinchi, po pitiri jiwi betiya xanepanaya canamataxeinatsi pomonae pejume cowuntsiwi. Po pitiri jiwi cueicueijei Nacom Pejume Diwesi, matautano xua cuiduba barapo diwesi, barapo pitiri jiwi bewa bichocono xanepanaya baru cui itura jinaetsi yawa bewa pentoma catsibichi beyacaincha icha pitiri jiwi. <sup>18</sup> Nacom Pejume Diwesitha jeye: “Duwein pon pewun buey, pon pexu xu tanacaponaxua poxonae nacuitapona jopa wano atsinde pocotsiwa bapon taayapubetsi poxonae nabusi matoma xaexaepona pentacona”, jei. Equeicha Nacom jeye: “Ponba tanacuita ichun bapon nantawenona xua xeina pia petanacuichiwa matoma”, jei Nacom.

<sup>19</sup> Jopa cui yopichinde pitirin xua abe exana pon pomonae pejume cowuntsiwi canamataxeinatsi icha jopa xeinaem dos poyobe xua iruru cui taneru xua ichacuitha tres poyobe xua iruru cui taneru pocotsiwa barapo pitirin xua baxua bara exana.

<sup>20</sup> Ichitha pitirin pon cataunxuae abe exanapona, bewa cui yopichiya itawetsim bapon xua daxita pomonae pejume cowuntsiwi peitabaratha tatsi, xua bapoxonae iru ichamonae pejunuwinexa xua abe peexanaewa, icha be poxonae xua bapon ichi.

<sup>21</sup> Caitorobatsi Nacom peitabaratha tatsi yawa Jesucristo peitabaratha tatsi. Matautano caitorobatsi matatsunpiwi

peitabaratha tatsi, po matatsunpiwi Nacom itapeta. Exanaponde barapo tacaitorobi coyenewantsi ichitha jopa xeinaeinde po juntu coyenewatha xua nanta xeiname xua caein pebin bichocono peainya cuin beyacaincha ichun. Icha barapocotsi juntu coyenewatha cayabara nanta xeinaeya exanaetsipame jopa xainyeya exanaetsipaem. <sup>22</sup> Abu bepijawa jopa mata jayabinde pitirin, xua pecanamataxeinaenexatsi pomonae pejume cowuntsiwi, tsipei icha bapon abe exanaetsipa aparta baxua be iru xam yawenama xua bapon abe peexanaewa. Dotam jinya coutha beta xanepanaya najuntu coyene eenare xua abe neexanaeyainwa.

<sup>23</sup> Bichocono necotsoroxaewa, yawa bichocono neparaxaewa, jopa saya u meisa apaeinde mera. Jame moya tsiwiyo yawa muxuna apare vino merayo.

<sup>24</sup> Ichamonae cui taneme abe pia peexanae cuiru coyenewan tatsi, pewunaeya xua po mataqueitha poxonae Nacom yabara paebina xua jiwi penatsicuentiwa xua abe peexanaexae. Ichitha nama anoxuae jopa ichamonae cui taem abe pia peexanae cuiru coyenewan tatsi, aparta jame bexa yaputaename po mataqueitha poxonae Nacom yabara paebina jiwi xua penatsicuentiwa xua abe peexanaexae. <sup>25</sup> Barichi pocotsiwa jiwi xanepanaya exana ichamonae nexa, baxua ba jiwi anoxuae cui tane. Bequein ichacuitha barapocotsi xanepanaya peexanae coyenewan jiwi jopa cui taeyo anoxuae, ichitha bexa tsane jiwi taena barapo coyenewan, tsipei poxoruru barapo coyenein jopa bapana ataya tsitecaeya moya peyawun xeinaewa.

**6** Pomonae ba pebusi cui tatayebeibiwichi, pomonae pejume cowuntsiwi Jesucristo, xua pomonae amanaya tanacuita pia pecanamataxeinaewichi,

po pecanamataxeinaewichi jopa jume cowuntsiyo Jesucristo, barapomona ba bewa baru cui itura jinae pia pecanamataxeinaewichi. Bewa baxua exanaena xua barapomona pomona pecanamataxeinaewi jopa abe peyabara paebinexa Nacom pia cui coyenewa tatsi, matautano xain jopa abe peyabara paebinexa pata pecuidubiwa xua pocotsiwa pacuiduban Jesús yabara.<sup>2</sup> Ichamona pomona pebusi cui tatayebeibiwichi, pomona pejume cowuntsiwi Jesús, barapomona xeina pia pecanamataxeinaewichi, pomona iru jume cowunta Jesucristo. Barapo pebusi cui tatayebeibiwichi jopa bewa exanae po coyene xua poxona jopa xeinaeyo pebaru cui itura jinae coyenewa pia pecanamataxeinaewitha, xua be cae peweicho penatsicotae jiwixae xua pejume cowuntsixae Cristo. Jame barapo pebusi cui tatayebeibiwichi bewa baru cui itura jinae pia pecanamataxeinaewichi. Matautano bewa beta tanacuichi barapocotsimona, beyacaincha ichamona pomona jopa jume cowuntsiyo Jesucristo pomona pebusi cui tatayebeibiwichiru pia pecanamataxeinaewichi. Barapo pebusi cui tatayebeibiwichi bewa beta tanacuichina pia pecanamataxeinaewichi, peyawenaenexa barapomona pomona iru jume cowuntaru Jesucristo. Matautano bewa beta tanacuichina tsipei Nacom antobe barapomona, xua antobetsi barapomona pomona pia pecanamataxeinaewichixaetsi.

**Meje yabara xua waxeinaewa pepa pexainyei coyenewa xua apara wajume cowuntsiwa**

Barapo cui coyene cuidubare jiwitha xua jiwi beta peexanaewa tsane: <sup>3</sup>Ichacuitha ichun cuiduba

pocotsi coyenewa xua penaerabiwa. Matautano jopa yabara baru jume jejeyo po pexeinya pecuidubi coyenewa Jesucristo pia pecuidubi coyenewa tatsi, pon Wanacanmataxeinaein. Matautano bapon pon ichun jopa yabara baru jume jejeyo po pecuidubi coyenewa xua Nacom juntu coyene xanepana exana jiwitha. <sup>4</sup>Pon ba bara pocotsi coyenewa exana bara apara pon jowi peabin xua peyaputaexinae. Bapon apara ichitha jopa peyaputaein. Bapon naemata yainyaba nawita ichamonaetha pia xua jiwi penajume matsontsonobinexa bapontha. Daxota barapomona nantiya nauwa. Matautano barapo jiwi nantiya naba. Matautano barapo jiwi nantiya abeya nayabara paeba. Matautano nantiya abeya nayabara nanta xeina. <sup>5</sup>Po pebiwi jopa xanepanaya nanta xeinaeyo, barapo pebiwi najume matsontsonoba nawita. Barapomona jopa yaputaeyo pocotsiwa pexainyei coyenewa. Bapomona najei pia coutha: “Icha jan tsane: ‘Jume cowuntan Jesucristo’, jan tsane bapoxona xain copei nawita xeinaein”, najei barapomona pia coutha. <sup>6</sup>Bara xaniyei, poxona Jesucristo jume cowuntatsi baxua bara bichocono naca yawena. Ichitha saya naca yawena icha waxainchi muxuna xeinatsi wajuntu coyeneintha xua beta juntea wajinompawea bequein xua naacopeibi taethatsi. <sup>7</sup>Tsipei poxona naexanatsi jopa cayawa naexanaetsi barapo copei po cae pin nacuathe. Matautano tsipei poxona werapaeinchi jopa barapo copei cawerapae tsainchi. <sup>8</sup>Ichitha icha xeinatsi pexaewa, yawa paparuwan bara bapoxona bewa juntea jinompaeinchi. <sup>9</sup>Seicaya nama pomona bichocono ichichipa xua copei pexeinaewa, barapomona exana pocotsiwa caurimona pia pentacaponaein tatsi juntu coyene



jujuta. Daxota barapomonaē exana pocotsiwa xua ichichipa, xua jopa wunaeyo, xua pocotsi coyenewatha abeya pia coutha nacana exana. Baxuan exana pocotsi coyenewatha xua barapomonaē peweraweracaewa tsane. <sup>10</sup>Poxonaē jiwī bichocono ichichipa paratixi, bapoxonaē tamropata notarucupa xua bichocono abe peexanaponaewa. Barapo peichichipae coyenewa paratixi, jiwī cana exanatsi xua pepentsiwa po coyene xua Jesucristo pejume cowuntsiwatsi. Daxota barapomonaē be pia coutha najuntū coyene jopojopei exana xua saya peyabara nanta xeinaexae paratixi, xua peichichipaexae paratixi.

**Meje yabara xua bewa Timoteo  
beta ajuntuyapusūya jume  
cowanta ducuaenaebiyana**

<sup>11</sup>Tsipei xam Timoteom Nacom piamonaē tatsi jiwanam, baxuan cuitaya naetsiriware, pocotsiwa po coyenewatha weraweraca necaexanaewa. Beta poponde Nacom nexa xua nejuntū coyene xanepanaewa tsane Nacomtha. Eexanaponde pocotsiwa Nacom ichichipa. Jume cowanta ducuaenaebiyama Nacom, yawano antobe tsurucuaenaebiyama Nacom, yawa jiwithano. Matautano saya juntema poponaeya exana ducuaenaebiyama pocotsiwa Nacom caitoroba poxonaē ichamonaē bequein cata abe exana. <sup>12</sup>Xanepanaya antuyapusūya jume cowuntsiya exana ducuaenaebiyama pocotsiwa Nacom ichipa. Peantuyapusūwa po peantuyapusūwa ataya tsiteca, barapo peantuyapusūwa jopa copatsinde xua necajuntū coyene weaichurucuaewa. Barapo peantuyapusūwa Nacom cacata. Xam baxua xanepanaya yabara paebame pin bicheitha. <sup>13</sup>Catsipaebatsi Nacom peitabaratha,

pon pia peantuyapusūwa cata daxitan coyeneintha. Matautano catsipaebatsi Jesucristo peitabaratha, pon beta jume nota, xua pon Poncio Pilato beta jume notatsi. <sup>14</sup>Caitorobatsi xua neexanaewa tsane pocotsiwa catsipaebatsi. Beta xeinare Nacom pia peitorobi coyenewa xua jopa icha coyeneya yabara cuiya exanaem tsane. Exande barapo peitorobiwa xua jopa Nacom abeya necayabara paebiwa tsane xua abe neexanaewam. Baxua eexanaponde, beya poxonaē Jesucristo equeicha patopeicaena pon Wanacanamataxeinaein. <sup>15</sup>Poxonaē po mataqueitha Nacom ichichipaena bapoxonaē barapo mataqueitha Jesucristo naitutsina jiwitha. Jiwī yaputaena xua bapon Nacom meisa compa xeina daxita peayapusū itorobi coyenewan. Bapon meisa compa peyawa jinaein pejuntū coyene weiweinaē coyenewa. Bapon pon jiwī itorobiya pia pepa Peewatsinchi tatsi pia peayapusū itorobi coyenewa xeina beyacaincha xua ichamonaē xeina pomonaē jiwī itorobiya pia pepa peewatsiwichi xua irū xeina pia peayapusū itorobi coyenewa. Matautano bapon pon jiwī pia pepa Pecanamataxeinaeinchi pia peayapusū itorobi coyenewa xeina beyacaincha xua ichamonaē xeina pomonaē jiwī pecanamataxeinaewichi. <sup>16</sup>Barapon Nacom meisa compa peyacuiya jinaein peantuyapusūwa po peantuyapusūwa xua ataya jopa peweraweracaewa. Barapo Nacom pecoicha yawa popona po pecoicha bichocono daunweya pentha. Baxota jiwī jopa itacupaetsi xua imoxoyo peponaewa xua bichocono pecoicha pexeinaexae. Dapon aibi, pon bayatha tainchi Nacom. Matautano dapon aibi pon itacupaetsi xua Nacom petawatsi tsainchi. Barabū jiwī Nacom barū cui itura jinaeinchi, xua ataya

tsane. Matautano barabu Nacom itorobina jiwitha pia peayapusu itorobiwatha xua bara ataya tsane. Je bara ichi tsane.

<sup>17</sup> Pomonae xua bichocono copei pexeinae jivi itorobare xua jopa ichamonae aebi tsainchi. Matautano itorobare xua jivi jopa pecayabara nanta xeinaewa tsane paratixi xua barapo paratixitha peyawenaenexa tsainchi xua daxota barapomonae jopa Nacom canantawenonae tsainchi. Tsipei paratixi saya bichoina nacaewita daxota barapomonae bewa jume cowuntsina Nacom, pon jopa juniya naca cataponaeyo daxita pocotsiwa xua po coyenein nantawenonatsi xua wanaca juntu coyene weiweina exanaenexa.

<sup>18</sup> Cui itorobare barapomonae pomonae copei pexeinaewi xua xanapanaya peexanaewa tsane. Matautano barapomonae itorobare xua nawita pexeinaewa tsane pocotsiwan xua xanapanaya peexanae coyenewan, icha be juta coyeneya ichi poxonae copei nawita xeina. Barapomonae bewa piawa jiwana wecaenaetsina xua ichamonae pecatsibiwa tsainchi pomonaetha pomonae xua jopa xeinaeyo xua pocotsiwan nantawenona. Matautano

barapomonae bewa yawenaena piamonae. <sup>19</sup> Icha barapomonae barapo coyenein exana, bapoxonae barapomonae pia coutha nayawena xua nacui wunaeta pocotsi coyenewa xua bexa tsane, xua daxota bapoxonae pexeinaewa tsane peajuntuyapusuwa, po peantuyapusuwa xua ataya tsiteca.

### **Meje yabara xua Pablo najume wetsiya paeba**

<sup>20</sup> Xam Timoteom, xaniwaicha xeinaeya capoponde po pecuidubiwa Nacom cacata. Jopa jume naitae-watsinde po jumein xua bapana jivi jopa yawenaetsi. Matautano jopa jume matsontsonoba exanaeinde ichamonaetha pomonae yabara cueicueijeji pocotsiwa xua peyaputae coyenewa, po peyaputae coyenewa jopa xaniwaicha peyaputae coyenewiyo.

<sup>21</sup> Pomonae jume cowunta pocotsiwa poxonae yabara cueicueijeji peyaputae coyenewa, barapomonae jiwana nacui barapenta po coyene xua Jesucristo pejume cowuntsiwatsi.

Barabu Nacom pon jivi Pecanamataxeinaein, bichocono cayawenaena pia necaantobexae.

Baja Pablo.

## Meje Po Carte Cotacaya Pablo Tatina, Timoteo Tatinatsi

### Meje yabara poxonae Pablo tamropata pitaba xua tatina, Timoteo tatinatsi

**1** Jaco Timoteo, xan Pablon, Cristo Jesús pia peitorobi jiwi jiwana tatsin. Nacom neitoroba poxoru bapon baxua peichichipaewa. Xan Cristo Jesús pia peitorobi jiwi jiwana tatsin, tsipei Nacom bayatha peexanaexae pocotsiwa bayatha tsiyabara wunae muxu duta jiwitha. Po peyabara tsiwunae muxu dutsiwa, xua Nacom catsina jiwitha peajüntuyapusuwa, po peajüntuyapusuwa ataya tsiteca. Barapo peajüntuyapusuwa jiwi catsibeibinchi poxonae jiwi jume cowunteibina Cristo Jesús. <sup>2</sup>Xam, Timoteom, barapo carte cata tinatsi, xam be taxantom catsicotainchi. Xam bichocono caantobetsi. Ichichipan xua Nacom pon Waxa, iru Jesucristo, pon Wanacanamataxeinaein, baraponbe barabu amanayiya cayawenaenabe pia necaantobexaebe. Matautano baponbe nantanuweya cayabara nanta xeinaenabe pia necayawenaenexa tsanebe. Matautano ichichipan xua baponbe jüntema popona caexanaena.

### Meje yabara xua Pablo yabara paeba xua Timoteo bewa jume cowunta ducuaenaebiyaena

<sup>3</sup>Poxonae Nacom tsipaebeiban jan tsaibinje: “Nacom, maisa jüntu coyene weiweinan xua Timoteo neyawenaewam”, jan tsaibin. Barapon Nacom tanacuitan, tsipei tajuntu coyene netsipaeba xua pinae bara beta exanan. Barichi tamo susato jiwi tanacuita barapon Nacom. <sup>4</sup>Xam cayabara nanta xeineibatsi xua poxonae matha cain

bichocono nesiwa wecoyam poxonae cacuenta warapatsi. Maisa be cataeinchi merawintha, yawa matakabintha xua bichocono tajuntu coyene weiweinaewa tsane. <sup>5</sup>Xan nanta xeineiban xua xam bara xaniwaicha beta jume cowuntsiya poponame Nacom. Po pejume cowuntsiwa xam Nacom tsita xeiname, barapo pejume cowuntsiwa copiya matha acue Loida, iru ena Eunice Nacomtha tsita xeinabe, beya poxonae xam iru jume cowuntame. Bara beta yaputan xua xam iru barapo pejume cowuntsi coyenewa Nacom tsita xeiname anoxuae.

<sup>6</sup>Daxota catsipaebatsi, beta najuntu coyene tsacabare, xua yabara nanta xeiname po cui coyenewa Nacom cacata xua po cui coyeneyatha xua xanepanaya neexanae ducuaenaebiyaenexa pocotsiwa Nacom caitoroba. Barapo cui coyene bayatha Nacom cacata poxonae canta jayabatsi. <sup>7</sup>Tsipei Nacom poxonae naca cata pia Pejumope tunaxu tatsi, barapo pejumope tunaxu tatsi jopa jiwi junuwa cana exanaetsi. Jame Nacom naca cata barapo pejumope tunaxu tatsi, xua waxeinaewa tsane peayapusu itorobi coyenewa. Matautano Nacom naca cata barapo pejumope xua waxeinaewa tsane po cui coyene peantobe coyenewa xua watsita xeinaewa tsane Nacom matautano xuano jiwithano. Matautano Nacom naca cata barapo jumope xua waxeinaewa tsane po cui coyene beta penayabara nanta xeinae coyenewa xua beta peexanaewa tsane. <sup>8</sup>Jopa aurande poxonae yabara cueicueijam Jesucristo, pon Wanacanamataxeinaein, xua poxonae bequein ichamonae cacui capona. Matautano jopa neyabara aurande xua jiwi pecubi botha taecaewa. Baxua necana exana tayabara cueicueijeixae Jesucristo, xua jiwi catsawiya taneyabara nanta

xeinaexae xua pinae abe exanan. Cui barũ jejande xua ichamonae bara canthũthũ jopojopeya atene exana, icha xan ichin xua yabara cui copatan xua bara ichamonae atene tana neexanaewa tsane. Baxua cacana exana neyabara cueicueijeixae Nacom pia pexeinya diwesi jume. Nacom cacata peayapuswa baxua nexa, xua jopa nejunuwiwa tsane poxonae caatene exana. <sup>9</sup>Nacom naca capanepa abe waexanae cuiru coyenein weya. Matautano Nacom naca waba xua Nacom watsita najũntũ coyene xanepana exanaewa tsainchi. Aparajopa naca wabiyo poxoru xanepanaya waexanaexaetsi. Aparajame naca waba, tsipei caena bayatha yabara nanta xeina baxua, beya poxonae forota barapo cae pin nacue xua amanayiya pia wanaca yawenaetsi pia wanaca antobexae. Nacom naca yawena caemonae peburũya wanabarũ jinompaexae Cristo Jesustha. <sup>10</sup>Nacom naca tsita itũta pia peantobewa poxonae itorobicatsi Jesucristo, pon Wanacacapanenebiyaetin. Bapon weraweraca cana exana po peayapuswa xua xota jiji tũpa exanatsi. Matautano naca tsita itũta po coyenewatha xeinatsi peantũyapuswa, po peantũyapuswa ataya tsiteca wajume cowũntsixae Nacom pia pexeinya jume diwesi tatsi, po diwesi xua Jesucristo yabara.

<sup>11</sup>Nacom newaba xua tacueicueijeinexa barapo pia pexeinya diwesi jume tatsi. Matautano neitorobano xua tana necana exanaenexa Jesucristo pia peitorobi jiji jiwana tatsin xua tacuidubinexa pomonae jopa judiomonae naexanaeyo. <sup>12</sup>Taexanaexae baxua, daxota atene neexana ichamonae. Daichitha jopa aurinyo xua tayabara cueicueijejewa Cristo, poxonae bequein ichamonae atene neexana,

tsipei yaputan pontha pon tajume cowũntsixae xua peitacũpaewatsi xua tana neyawenaewa. Bara beta yaputan xua bapon xeina peayapuswa xua tana neyawenaewa. Bapon neyawena xua tacueicueijejẽ tsurucuaenaebiyaenexa tsane pocotsiwa bayatha bapon neitoroba, beya poxonae barapo matacabi tsane, po matacabitha poxonae patopeicaena Jesucristo.

<sup>13</sup>Necui coyene jũpaeya exana ducuaenaebiyama, po pecuidubiwa bichocono xanepana xua bayatha catsipaebatsi. Jume cowũntsiya poponare, matautano antobeya poponde Nacom, irũ jiwithano, caemonae peburũya wanabarũ jinompaexae Cristo Jesustha. <sup>14</sup>Cateiteichiya yawa muxuna poponde pexainyei coyenewa, po pexainyei coyenewa Nacom pia Pejumope tũnaxũ tatsi cacata, po pejumope tũnaxũ tatsi naca barũ jinompa.

<sup>15</sup>Bayatha yaputaneme pomonae Asia nacuatha jinompa daxita barapomonae nepunapenta. Pomonae nepunapenta, barapomonae jiwana ichũn pewũn Figelo, ichũn pewũn Hermógenes. <sup>16</sup>Barabũ Nacom pon jiji Pecanamataxeinaein yabara nantanuweya nanta xeinaena pomonae Onesiforo piamonae tatsi, xua Nacom peyawenaewa tsane barapomonae. Bapon Onesiforo nejuũntũ tsacaba poxonae beta xanepanaya neyaweneiba. Bapon jopa neacauriyo xua jiji pecubi botha taecaewa. <sup>17</sup>Poxonae bapon patopa Roma tomaratha bapon matowa newenawenei tsurucuaenaebiya beya poxonae matapainya necaxina. <sup>18</sup>Barabũ Nacom pon jiji Pecanamataxeinaein, bapontha nantanuweya yabara nanta xeinaena peyawenaenexa tsane, poxonae po mataqueitha Nacom yabara paebina jiji xua penatsicuentisiwa xua abe peexanaexae. Xam yaputaneme bara,

xua bapon neyawena nawita Efeso tomaratha.

**Meje yabara xua Pablo yabara paeba  
xua ponba beta tanacuita  
pia pecanamataxeinaeinchi**

**2** Xam Timoteom, be taxantom catsicotainchi. Najuntũ coyene cui tsacabare xua nenanta xeinaenexa xua Nacom amanayiya jinya necayawenaewa tsane pia necaantobexae. Nacom baxua cata exana caemonae peburuya jinya nenaexanaexae Cristo Jesustha. <sup>2</sup>Pocotsiwa xua bayatha nejume taneme xua cueicueijan pin bicheito itabaratha, bapocotsiwa xuya cuidubare pebiwitha, po pebiwi xua xuya jume cowuntsiya xaniwaicha cuidubina ichamonaetha pocotsiwa xua cueicueijan.

<sup>3-4</sup> Yabara baru cui copare xua bara ichamonae atene necaexanaewa tsane, nejume cowuntsixae Jesucristo icha xan ichin xua yabara cui copatan xua bara ichamonae atene tana neexanaewa tsane. Poxonae baxua exaname, xam bara juta coyene ichim icha be soldadomonaepin ichi. Bapon ba atene exanatsi poxonae naba, xua peexanaexae pocotsiwa itorobatsi pia pentacaponaein. Soldadomonaepin ba dapocotsin aibi pon natsixana piawa poxonae cataunxuae awiya naba exana ichamonae aetha, tsipei bapon bewa baxua exanaena xua pon pentacaponaein peitorobixae. <sup>5</sup> Barapocotsi juta coyeneya ichi, pon ba xua penaxenacaewa. Bapon jopa itacupaetsi xua xeinaena pocotsiwa pe-matomatsiwatsi xua poxonae bichoina cuinaepona icha jopa beta yabara exanaeyo pocotsi coyene xua peitorobi coyenewa barapo penaxenacaewa. <sup>6</sup> Pon ba bichocono nacuita pabitha bapon ba copiya bewa xeinaena xua pocotsiwa copiya penawetsiwa. <sup>7</sup> Beta yabara nanta xeinare xuaunxuae catsipaebatsi.

Pon jiji Pecanamataxeinaein cayawenaena xua yaputaename daxita.

<sup>8</sup> Jesucristo yabara nanta xeinare. Bapon Jesucristo pon naexana xua David pia pemomoxi susato jiji jiwana tatsi, po David Israel nacuapiwi itorobiya pia pepa peewatsinchi. Bapon Jesucristo equeicha Nacom Pexanton asu exana petupae cuiru coyene weya. Nacom pia pexeinya jume diwesi tatsi, po diwesi xua Cristo yabara, barapo diwesi cueicueijan jiwitha. <sup>9</sup> Barapo diwesi tacueicueijeixae daxota ichamonae atene neexana, beya poxonae penaintotha necuba. Xan be pocotsin xua abe bichocono taexanaein nenatsicotane. Ichitha jopa itacupaetsi xua jume yancataba Nacom Pejume Diwesi xua ajumetsurucuae pecana exanaewa tsane xua poxonae jiji pecubi botha tana neetsixae. Tsipei awiya cataunxuae jiji jume tane barapo diwesi. <sup>10</sup> Daxota jopa junuwinyo xua ichamonae atene tana neexanaewa, matautano bara copatan xua bara moya necana exanaena baxua. Daxota baxua bara copatan pomonae Nacom pia peitapetsi jiji tatsi barapomonae nexa, xua barapomonae irũ pecapanenebiyaenexa tsainchi xua Cristo Jesús capanenebiyaena. Poxonae barapomonae barapo diwesi xeinaena, po diwesi pecapanenebiyae coyenewa, bapoxonae muxuna xeinaena pexeinya peajuntuyapusuwa, po peajuntuyapusuwa ataya tsiteca xua Nacom pia nacuatheicha tatsi.

<sup>11</sup> Baraxue bara xainyei xua jei: Icha copatatsi xua bara ichamonae naca atene exana wajume cowuntsixae Cristo beya poxonae naca tupa exana, icha poxonae Cristo cana ichichi, bapoxonae yawa muxuna jinompaeinchi Cristo xua pia nacuatheicha.

<sup>12</sup> Icha waxainchi awiya jume cowunta dubenanaebiyatsi xua poxonae bequein ichamonaе naca atene exana, icha Cristo cana ichichi, bapoxonae barapo coyenewa yawa muxuna waxainchi Cristo, baru canamataxeinaeinchi jiwitha, waitorobiya ewatsinexa tsane barapo jiwi. Icha waxainchi itawetsiya yabara jeichichi Cristo: “Bapon jopa yaputaеinyo”, jeichichi, bapon xuya itawetsiya naca yabara jei tsane:

“Bapomonaе jopa yaputaеinyo”, naca yabara jei tsane Cristo.

<sup>13</sup> Icha jopa beta xaniwaicha jume cowuntsiya jinompaetsi, daichitha bapon cataunxuae exana ducuaenaebiyaena pocotsiwa xua bayatha jiwi yabara paebatsi. Baxua exana, tsipei Nacom jopa itacu-paetsi xua exana pocotsiwa jopa be pia cuiyiyo tatsi.

**Meje yabara xua pon beta petanacuichin xua ichun beta petanacuichiwatsi**

<sup>14</sup> Xuaunxuae catsipaebatsi baraxua paebare ichamonaetha yawano cui itorobare baraxua barapomonaе Nacom peitabaratha tatsi. Jande barapomonaetha: “Jopa yabara pana najume matsontsonoba exanaeinde xua po diwesin ichamonaе pepaebixae”, jande. Barapo penajume matsontsonobiwa barapo coyenewatha bapana jopa naca yawenaе. Barapo coyenewa saya abe cana exana pomonaetha pomonaе jume tane. <sup>15</sup> Exande daxita pocotsiwan

pexanepanae coyenewa xua Nacom nexa, xua Nacom jinya necacui taenexa xua bara beta tanacuitame Nacom. Bapoxonae xam jopa nayabara acauram tsane pocotsiwa xua beta xaniwaicha necaunutsiya paebixaem Nacom Pejume Diwesi, po diwesi pejume xainyei jume. <sup>16</sup> Jopa yabara najume matsontsonoba exanaeinde po jumein xua pejumexaei, po jumein xua saya yabara cueicueijeji pocotsiwa xeina barapo cae pin nacuathe, po jumein xua bapana jiwi jopa yawenaetsi. Tsipei pomonaе bapocotsiwan paeba, eexanapona pocotsiwan abe peexanae cuiru coyenewan. <sup>17</sup> Barapomonaе abeya pia pecuidubi coyenewan tatsi tajū nayoyotapona, icha be ichi xua tsuweto xua bupana putsuna xua beya tajū putsuna pona. Barapocotsi coyene xua tajū nayoyotapona, exanabe pon pewun Himeneo iru pon pewun Fileto. <sup>18</sup> Baraponbe jume naitematabe pocotsiwa pexainyei coyenewa. Baponbe naerabiya jeibe: “Bayatha Nacom nacui weta xua asu exana, xua jiwi equeicha jopa asu peexanaewa tsainchi pomonaе bayatha werapa”, jei baponbe xua naeraba paebabe. Baponbe ainya muxu cana exanabe ichamonaetha xua barapomonaе jopa xapain pejume cowuntsiwa tsane Nacomtha. <sup>19</sup> Nacom pia pexainyei coyenewa, peayapuswa, xua icha cui coyeneya jopa naexanaeyo. Barapon Nacom pia pexainyei coyenewa tatsi jeye: “Nacom pon jiwi Pecanamataxeinaein yaputane pomonaе piamonaexae tatsi”, jei. Matautano equeicha jeye: “Daxita pomonaе xua nawun duba xua jei: ‘Paxan Cristobaru pan, pon jiwi Pecanamataxeinaein’, jei, bewa barapomonaе naitematsina abe peexanae cuiru coyenewan”, jei Nacom pia pexainyei coyenewatha.

<sup>20</sup> Botha ba ichaxota pin bo, barapo bo xeina penain coroton pocotsiwa pewun oro nain, yawano icha penainwan pocotsiwa pewun plata nain. Matautano ba muxuna xeina napae coroton. Matautano ba xeina tsorobo coroton pocotsiwan be juruwaton. Po coroton xua pexeinya coroton, barapo coroton pecanamatawenonaenexa penabarũ itata weiweinae matakabintha. Po coroton xua saya pexeinya coroton aibi, barapo coroton pecanamatawenonaenexa daxita matakabintha. <sup>21</sup> Bara jutiya ichi, icha pebin ichichipa exana xua pocotsiwa pexanepanae coyenewa pon jiwi Pecanamataxeinaein nexa, bapon bewa naitematsina abe peexanae cuiru coyenewa xua Nacom pejuntũ coyene xanepana exanaenexa bapontha. Bapoxonae bapon itacupatsi xua peexanaewa daxita carepaya coyenein pocotsi coyenein Nacom tsita xanepanatsi.

<sup>22</sup> Xam naitemare pocotsi coyenewan pewowi exana xua poxonae abe exana. Exana ducuaenaebiyama pocotsiwa pexeinya juntu coyenewa. Matautano beta jume cowunta ducuaenaebiyama. Matautano antobe tsurucuaenaebiyama Nacom, matautano jiwithano. Matautano juntema popona ducuaenaebiyama. Xam itapeta napuna ponde pomonae pejuntũ coyene xanepanaewi poxonae Nacomtha tsipaeba pon jiwi Pecanamataxeinaein. <sup>23</sup> Naitemare po peyabara najume matsontsonobiwa jopa xapain wunaeyo xua jopa xapain peyaputae coyenewiyo, tsipei xam yaputaneme xua jiwi barapocotsi jumetha ba yabara naba. <sup>24</sup> Pon nama Nacom pon jiwi Pecanamataxeinaein, amanaya tanacuitatsi jopa bewa bapon jume matsontsonobi tsane. Jame bewa bapon xanepanaya wunaeya exanaena xua daxita carepaya coyene cuintha

daxita jiwitha. Matautano bewa bapon beta cuidubina ichamonae. Matautano bapon bewa saya juntema poponaena poxonae bequein abe taexanatsi ichamonae. <sup>25</sup> Matautano bapon bewa saya bewayo juntu coyene wunaeya muxuwetsina pomonaetha pomonae peacuiitafaetabiwichi xua bapon xainyeya pia pecuidubiwa ichamonaetha. Matautano bapon bewa abũ ewatsina xua icha metha Nacom copatsina xua barapomonae icha juntu coyene pexeinaenexa xua peauraxae xua abe exana. Matautano barapon bewa abũ ewatsina xua barapomonae peyaputaewa tsane pocotsiwa xua Nacom pia pexainyei coyenewa tatsi. <sup>26</sup> Poxonae baxua yaputaena, bapoxonae barapomonae, pomonae copiya pemuxufebiwi itacupaeinchi xua beta nanta xeinaena pejuntũ coyenewatha. Barapomonae yaputaena xua deta cou eexanapona pocotsiwa caurimonae pia pentacaponaein tatsi jujuta, xua pocotsiwa abe peexanaewa, pocotsiwa bapon peitorobixae. Bapoxonae barapomonae itacupaeinchi xua panenebiyaena bapon weya, matautano xua tamropata notaracupaena xua exana pocotsiwa Nacom ichichipa.

**Meje yabara xua po coyeneya  
jiwi exanaena poxonae po  
matakabitha opi ducuaena**

**3** Ichichipan xua neyaputaewa tsane xua poxonae po matakabintha opi dubenaena barapo matakabin jiwi taayapube tsainchi. <sup>2</sup> Jiwi barapo matakabintha bichocono pia coutha naantobe tsane. Barapo jiwi bichocono u pitaparatiwichi tsane. Yawano matautano aebina ichamonaetha. Matautano bichocono atsaca tsaneno. Matautano biataenano ichamonaetha, matautano Nacom biataeinchi.

Matautano barapomonae jopa jume jejei tsaibi tsane paxeiwi. Matautano barapomonae jopa wecobe jacobiya noteibiyo tsane poxonae ichamonae catsibeiba. Matautano abe yabara nanta xeineibina pocotsiwa Nacom piawa tatsi. <sup>3</sup>Matautano piamonae jopa tsita xeinae tsane peantobe coyenewa. Matautano ita aenae-aenei tsurubenaebiyae tsane ichamonaetha. Matautano yopita dubenanaebiyaena xua ichamonae pocotsiwa abe peexanaewa. Matautano jopa itacupae tsainchi xua najuntu coyene itorobina xua xanepanaya peexanaewa tsane. Matauta barapomonae bichocono anaepanaena xua ichamonae beinchi. Matautano barapomonae bichocono aichaxaibi tsane pocotsiwan xanepana. <sup>4</sup>Barapomonae pomonae jiwi pecaenaetsi jiwi tsane. Jopa matha copiya yabara nanta xeineibi tsane pocotsiwan xua exana. Barapomonae pia coya nacayabara nanta xeinaena xua peainya cui jiwi tsane. Saya barapomonae itapetsiya naitomatsina xua pocotsiwa cui xeica penaexanaewa. Barapomonae naitematsina pocotsiwa Nacom pia pexainyei coyene tatsi. <sup>5</sup>Bequein barapomonae xanepanaya exana dubenanaebiyaena icha be ichi xua poxonae pomonae xaniwaicha pejume cowuntsiwi, daichitha barapomonae jopa xaniwaicha jume cowuntsiyo xua icha juntu coyene pexeinaewa tsane.

Jopa bewa bara pocotsimonae imoxyo napuna ponaem xua barapomonae necuiyainwam. <sup>6</sup>Barapomonae jiwana pomonae bomuxuntha pateibina muxujainyabeibinchi yabuxi, po yabuxi jinompa barapo bomuxuntha, po yabuxi xua anacaura xua penacui yaputaexae xua abe exana bayatha. Barapowaxi awiya came jopa xanepanaya exanaeyo, poxoru saya exana pocotsiwa pia

coutha ichichipa exana. <sup>7</sup>Barapo yabuxi jume naitaewata nawita, daxita carepaya po coyenein xua jiwi paeba, bara bequein jopa xanepanaya paebiyo. Daxota barapo yabuxi jopa itacupaetsi xua peyaputaewa pocotsiwa xua Nacom pia pexainyei coyenewa tatsi. <sup>8</sup>Caena bayatha pon pewun Janes, iru ichun pewun Jambres, baponbe mara pexeinaeinbe, baponbe cui matawentabe Moiestha, xua Moisés pia peexanae coyenewatha. Icha baponbe ichi, barichi barapomonae yabara jume matawenta Nacom pia pexainyei coyenewa tatsi. Barapomonae saya yabara nanta xeina nawita pocotsiwa peabe coyenewa. Barapomonae taseicatsi pejume cowuntsiwa, po pejume cowuntsiwa pexainyei jume. <sup>9</sup>Barapomonae jopa beta dubenanaebiyae tsane, tsipei daxita nacuanpiwi cui yaputaena xua barapomonae apara pomonae jopa xanepanaya peexanaewi, icha be ichi poxonae caena bayatha jiwi cui tane xua Janes iru Jambres jopa beta exanaeyobe.

**Meje yabara po diwesi xua  
Pablo najume wetsiya paeba  
poxonae Timoteo itorobatsi**

<sup>10</sup>Ichitha xam bara beta exanaponame pocotsiwa tacuidubiwa. Matautano necui taneme xua bara beta poponan. Matautano necui taneme xua tacoutha yaputan pocotsiwa taexanaewa tsane Nacom nexa. Matautano necui taneme xua bara beta jume cowuntsiya poponan Nacomtha. Matautano necui taneme xua saya awiya beta juntema poponan poxonae bequein ichamonae jopa xapain necana exanaeyo. Matautano necui taneme xua bara antobeya poponan jiwi, matautano Nacomtha. Matautano necui taneme xua bara awiya Nacom tanacuitan.



<sup>11</sup>Xam yaputaneme xua jiwi bichocono abe necana exana tajume cowuntsixae Cristo. Matautano neyaputaneme xua jiwi bichocono atene neexana Antioquia tomaratha, Iconio tomarathano, Listra tomarathano. Ichitha pon jiwi Pia Pecanamataxeinaeinchi neyawena xua necapanepa barapomonaē pia xainya weya. <sup>12</sup>Bara xaniwaicha, daxita pomonaē ichichipa xua najuntū coyene xanepana exana dubenanaebiya Cristo Jesustha, barapomonaē irū atene exanaeinchi ichamonaē. <sup>13</sup>Ichitha pomonaē peajuntūcoyenebe jiwi, irūru pomonaē pemuxujainyabi jiwi, daxita barapomonaē bichocono abe eexanaponaena beyacaincha xua copiya. Barapomonaē muxujainyabiya canamataxeina ichamonaē, xua abe peexanaenexarū, matautano xua barapo ichamonaē irū xuya pemuxujainyabiya canamataxeinaenexa ichamonaē, xua abe peexanaenexarū.

<sup>14</sup>Ichitha xam awiya beta exana ducuaenaebiyama pocotsiwa xua nacuidubame, xuano xua bichocono nejume cowuntsiwa. Xam bayatha yaputaneme pomonaē xua cacuiduba barapo coyenein, pomonaē pejuntū coyene xanepanaewi. <sup>15</sup>Poxonaē pexuyotham yaputaneme Nacom Pejume Diwesi. Barapo diwesi itacupatsi xua necacuidubiwa xua necapanepaewanexa abe jinya neexanaē cuiuru coyene weya nejume cowuntsixae Cristo Jesús. <sup>16</sup>Daxita carepaya Nacom Pejume Diwesiin tatsi, barapo diwesiin Nacom ayapusū diwesiin exana. Daxita barapo diwesiin xanepana xua jiwi pecuidubiwa tsainchi. Matautano daxita barapo diwesiin xanepana xua jiwi yaputane peexanaenexatsi poxonaē abe exana. Matautano daxita barapo diwesi xanepana xua jiwi pemuxuwetsinexatsi xua xanepanaya

peexanaewa tsane. Matautano daxita barapo diwesiin xanepana xua jiwi peyawenaenexatsi xua pejuntū coyene xanepana dubenanaebiyaenexa Nacomtha. <sup>17</sup>Barapo diwesiin jiton xanepanaya canacui weta exanatsi xua beta peexanaewa tsane pon Nacom piamonaē jiwana jiton tatsi. Barapo diwesiintha daxita coyenein xeina xua barapon nantawenona, pocotsi coyeneintha xua bapon Nacom petanacuitsinexatsi, daxita carepaya po penacuichiwan xanepana.

**4** Nacom peitabaratha tatsi yawa Cristo Jesús peitabaratha tatsi, baponbe peitabaratha tatsi caitorobatsi. Bapon Cristo Jesús patopaetsica be pon jiwi itorobiya pia pepa Peewatsinchi. Matautano bapon yabara paebina jiwi xua penatsicuentisiwa xua abe peexanaexae, pomonaē xua anoxuae cataunxuae asū jinompa, irūno pomonaē xua bayatha werapa. <sup>2</sup>Caitorobatsi xua cueicueijande Nacom Pejume Diwesi. Beta jume daunweya cueicueijam tsaibinde Nacom Pejume Diwesi poxonaē jiwi ichichipa cajume taibina, matautano poxonaē bequein jiwi jopa ichichipaeyo xua necajume taewa. Barapomonaē juntū coyene yaputane exande xua barapomonaē petaseicaewatsi pejuntū coyene xanepanaewa Nacomtha. Matautano barapomonaē yabara muxuwere abe pia peexanaē cuiuru coyenein tatsi. Matautano barapomonaē juntū coyene cui tsacabare xua Jesucristo pejume cowuntsiwa tsainchi. Matautano bapana barapomonaē jopa tsita xeinaeinde peaitaconaewa. Matautano bapana jopa nacui copatsim tsane xua necuidubaponaewa barapomonaē, xua bequein barapomonaē jopa Jesucristo pejume cowuntsiwichi taetham tsane. <sup>3</sup>Tsipei jopaena matabi poxonaē po matabitha jiwi jopa

jume cowuntsi tsane barapo pexainyei cuidubi jume. Barapomonaе saya ы jeichina po pecuidubiwi saya cuiduba pocotsiwa xua jivi ichichipa jume tane.

<sup>4</sup>Barapomonaе saya naitemapenta xua aichaxaibi pejume taewa pocotsiwa pexainyei jume. Saya barapomonaе ы jume naitaewatsina ainya diwesin, po diwesin xua saya pejemai diwesin. <sup>5</sup>Ichitha xam dotam. Najuntу coyene babare xua neexanaeyainwa pocotsiwa barapomonaе exana. Jopa junuwinde xua ichamonaе poxonaе caatene exanaena nejume cowuntsixae Jesucristo. Ichitha xam exana ducuaanaere jinya nenacuichiwa xua Nacom pia pexeinya jume diwesi necueicueijeі ducuaanaetsiwa. Daxita wetsiya exanare pocotsiwa jinya netanacuichiwa Nacom.

<sup>6</sup>Bara nama imoxoyo nebexubina tajume cowuntsixae Cristo. Matautano bara nama imoxoyo xua po mataqueitha tsane ponaein Nacom pia nacuatheicha.

<sup>7</sup>Ajuntуcuiyapusya amanayaban caurimonaetha Jesucristo nexa, icha soldadomonaе ichi xua poxonaе amanayaba pia peaitaetaewiwichi. Bayatha nacui wetan pocotsiwa xua bayatha Nacom neitoroba, icha jiton ichi xua patopa poxonaе penaxenaewa. Matautano jume cowuntsiya poponan Jesús, icha be pocotsi coyeneya ichi poxonaе jiton beta yapu eena pocotsiwa itorobatsi pia pecanamataxeinaeинchi.

<sup>8</sup>Anoxuae ewatan po pentoma Nacom necatsina xua tajuntу coyene xanepanaexae bapontha. Pon jivi Pecanamataxeinaeин, pon xua yatsicaewa xainyeya jivi yabara paebatsi xua penatsicuentsiwa xua abe peexanaexae, bapon pentoma necatsina po mataqueitha poxonaе bapon patopeicaena. Saya meisa jopa compa necatsi tsane, iru barichi tsainchi baxua

catsibinchi pomonaе wunaе ewatsiya ichichipa xua pia pepatopaewa tsane bapon.

### Meje yabara xua Pablo waba xua Timoteo wabatsi

<sup>9</sup>Nainya nesiwa ponde poxonaе caitacupa. <sup>10</sup>Pon Demas, bapon nepunaxuba, tsipei bapon saya copei yabara cananta xeina nawita pocotsiwa po cae pin nacuathe xeina. Bapon Tesalónica tomara beya pona. Pon Crescente, bapon Galacia nacua beya pona. Pon Tito, bapon Dalmacia nacua beya pona. <sup>11</sup>Meisa pon Lucas, bapon xote baru ecan. Wenawenande Marcos, cabaru dena tsane, tsipei bapon itacupatsi xua tana neyawenaewa tsane. <sup>12</sup>Pon Tíquico bapon Efeso tomara beitorobian. <sup>13</sup>Poxonaе nesiwa denam, inta carenande po paparuwa aitiyу, po paparuwa cuentan pon Carpo, bapon pia botha tatsi Troas tomaratha. Diboronno inta carenande, yawa paperanno inta carenande xua inta ainya cui pocotsiwa.

<sup>14</sup>Pon Alejandro, pon penain penacuichin, bapon inta abe exana. Pon jivi Pecanamataxeinaeин, bapon Alejandro pentoma catsinchi po pentoma po pecayabara matomatsiwatsi xua abe peexanaexae. <sup>15</sup>Dotam xua bapon, tsipei bapon aichaxaibi pocotsiwa po diwesin cueicueijeichi.

<sup>16</sup>Poxonaе tacoutha nayabara jume yawenaeya cueicueijan pentacaponaei peitabaratha, dapon aibi pon tana neyabara jume yawenaewa tsane. Daxita nepunapenta. Ichichipan xua Nacom bu jopa cabetsi tsane barapomonaetha xua tana nepunapentsixae. <sup>17</sup>Daichitha Nacom pon jivi Pecanamataxeinaeин, neyawena poxonaе bequein ichamonaе nepunapenta. Bapon peantуyapusuwa necata xua beta tacueicueijeinexa

pijume diwesi xua pejume taewa tsane daxita pomonae jopa judiomonae naexanaeyo. Bapoxonae Nacom neyawena xua jiwi jopa necabetsiyo xua tatupaewa. <sup>18</sup>Bapon pon jiwi Pecanamataxeinaein, bapon necana exana xua tapanepaewa daxita carepaya abe peexanae cuiru coyenein weya, xua daxota patopaein pia peitorobi nacua beicha. Barabũ jiwi ataya wũnae jainchina Nacomtha. Je bara ichi tsane.

**Meje yabara xua Pablo  
najume wetsiya paeba**

<sup>19</sup>Inta jacobare powa Prisca, irũ pia pebin tatsi, bapon Aquila. Irũ

inta jacobare pon Onesíforo piamonae matabũxũyo tatsi. <sup>20</sup>Pon Erasto bapon eca Corinto tomaratha. Pon Tróximo, bapon cuenta ponan Mileto tomaratha yaitama atene. <sup>21</sup>Jũjũre xua patopare xua pewũnaeya poxonae beya awũbo tsane. Pon Eubulo, irũ pon Pudente, irũ pon Lino, irũ powa Claudia, irũ daxita pomonae pejume cowũntsiwi, daxita barapomonae cajacoba.

<sup>22</sup>Barabũ Jesucristo, pon jiwi Pecanamataxeinaein cabarũ poponaena. Barabũ Nacom amanayiya cayawenaena jinya necaantobexae.

Baja Pablo.

## Meje Po Carte Pablo Tatina, Tito Tatinatsi

### Meje yabara poxonaē Pablo tamropata pitaba xua tatina, Tito tatinatsi

**1** Xan, Pablon, pon Nacom tatanacuichin matautano Jesucristo pia peitorobi jiton tatsin. Jesucristo neitoroba xua tayawenaewa tsane jiwi xua barapomonaē pejume cowuntsinexa Nacom. Pewunaeya copiya Nacom itapeta barapomonaē, xua pejume cowuntsiwa tsainchi. Matautano neitoroba xua barapomonaē yaputane taexanaenexa Nacom pia pexainyei jume diwesi xua daxota barapomonaē Nacom peitabaratha xanepanaya pejinompaewa tsane. <sup>2</sup>Poxonaē barapomonaē jume cowunta Nacom, barapomonaē ewata xua Nacom catsina pia peajuntuyapusuwa po peajuntuyapusuwa ataya tsiteca. Bapon Nacom bapana jopa penaerabin. Barapo peajuntuyapusuwa po peajuntuyapusuwa ataya tsiteca, caena bayatha Nacom yabara tsiwunaē muxu duta jiwi poxonaē cataunxuae jopa nacua forotsiyo. <sup>3</sup>Ichitha anoxuae nama Nacom peichichipaexae barapo matabitha daxota jiwi yabara yaputane exainchi xua pia pexeinya jume diwesi tatsi. Nacom necopata xua bara tacueicueijejiwa tsane barapo diwesi daxita jiwitha. Nacom pon xua jiwi Pecapanenebiyaein neitoroba xua tacueicueijejiwa barapo diwesi poxonaē necata barapo pia penacuichiwa tatsi xua tatanacuichinexa bapon. <sup>4</sup>Barapo carte cata tinatsi Titom, ponxaem be yatsicaewa taxantom catsicotainchi iru nejume cowuntsixae Jesucristo. Barabu Nacom pon Waxa, iru Jesucristo pon Wanacapanenebiyaein petupae

cuiru coyene weya, cayawenaenabe pia necaantobewaxaēbe. Matautano juntema popona caexanaenabe.

### Meje yabara xua Tito Creta tunaeto nacuatha nacuita

<sup>5</sup>Caena bayatha Creta nacua tunaetho cacuentapoinchi xua neyawenaenexa Jesucristo pejume cowuntsiwi pocotsiwa xua nacata seicabe. Daxota cacuentapoinchi xua neitapetsinexa pitiri jiwi xua barapomonaē pecanamataxeinaenexa pomonaē pejume cowuntsi jiwi Nacom. Baxua eexanaponde daxita i dapo tomarantha icha be pocotsi coyeneya bayatha caitorobatsi. <sup>6</sup>Bayatha catsipaebatsi xua pon barapocotsi pitiri jiwi jiwanapin bewa poxonaē poponaena bewa iche: Bapon bewa xanepanaya poponaē xua ichamonaē jopa petsita natsicuentinexa tsainchi xua abe peexanaexae bapon. Matautano bapon saya bewa cae petsiriwa xeinaē. Matautano pia pexui tatsi bewa jume cowuntsi Nacom. Matautano pia pexui tatsi xanepanaya bewa jinompae xua daxota ichamonaē jopa peyabara paebiwa tsane xua abe exana barapo pexui. Barichi matautano xua ichamonaē jopa peyabara paebiwa tsane xua barapo pexui jopa jume jejeyo pocotsiwa coxiyun itoroba. <sup>7</sup>Po pitiri jiwi canamataxeina pomonaē pejume cowuntsiwi Nacom, barapomonaē tanacuita Nacom piawa. Daxota ainya cui xua barapomonaē xanepanaya bewa jinompae. Barapomonaē jopa bewa jumefebi pocotsiwa xua Nacom itoroba. Matautano jopa bewa exanaē pocotsiwa jiwi nainya bichoina anaepanaya jume nota. Yawano jopa bewa nacupa exanaē, yawano jopa bewa nacayatsi. Yawano jopa bewa pitaparaticixi poxonaē jopa xapain exanaeyo penacuichiwa. <sup>8</sup>Jame bewa barapomonaē matenta

weiweinaya wabeibi pomonae pesiwa poneibiwichi pia bontha. Yawa bewa ichichipae pocotsiwa xua wūnae. Yawa bewa xanepanaya cayabara nanta xeinae. Yawa bewa beta exanae ichamonaetha. Yawa bewa exanae pocotsiwa Nacom itoroba. Yawa bewa yaputae xua pia coutha najuntū coyene itoroba xua beta peexanaewa. <sup>9</sup>Bewa ajuntūcoyenesūya jume cowūntsina Nacom pia pexainyei jume diwesi tatsi po diwesi barapomonae cuidubatsi. Bapoxonae barapomonae itacūpatsi xua xuya ichamonae juntū coyene tsacaba xua pejume cowūntsiwa tsainchi poxonae cuiduba barapo pexainyei jume diwesi. Matautano barapomonae itacūpatsi xua jume jejei cana exana pomonaetha pomonae bequein copiya pejume itawetsixaetsi pocotsiwa xua barapomonae cuiduba.

<sup>10</sup>Tsipei judiomonae jiwānapiwi bichocono pinmonae pomonae pejume-febiwi xua Nacom itoroba. Bichocono pinmonae pomonae jiwi peitorobiwi xua pebiwi bewa wi thabinchi ichaxota penareixacaenaewa. Pocotsiwa barapomonae cuiduba ichamonaetha saya pejumexaei. Yawano jiwi muxuitorbatsi nawitano. <sup>11</sup>Barapomonae bewa pajume matawentsim xua jopa pepaebiwa tsane barapo jumein, yaitama barapomonae cana exana xua jopa jume cowūntsiyo pomonae xua daxita matabūxūmonaein tsiniya. Baxua exana poxonae cuiduba pejemai diwesi po diwesi jopa bewa cuidubi, jiwi peyamuxujainyabiya wūcaenexatsi paratixi.

<sup>12</sup>Caena bayatha popona pon Creta tunaetopiwi jiwānāpin, pon piamonae yabara jeichi: “Wanacom pia peitorobi jume pepaebin tatsi”, jei. Barapon yabara cueicuei jei Creta tunaetopiwi pomonae piamonaexae.

Bapon yabara jeye piamonae: “Maisa Creta tunaetomonae, barapomonae jiwi muxuitorobeiba, yawa be unupiwi pomonae peaitoisa jiwi yawa napenajuba nawita yawa fifina nawita”, jei bapon. <sup>13</sup>Poxonae bapon baxua paeba barapara jume xainyeya paeba. Daxota xam Titom barapomonae bichocono jume matawende xua barapomonae xaniwaicha jūntema pejinompaewa tsane xua Jesucristo pejume cowūntsiwatsi. <sup>14</sup>Matautano cui matawende barapomonae xua jopa equeicha pejume naitawetsinexa judiomonae pia pejemai diwesi tatsi. Matautano cui matawende xua jopa pejume naitawetsinexa pomonaetha pomonae xua jiwi peitorobiwatsi xua jiwi pejume itawetsiwa tsane Nacom pia pexainyei jume diwesi tatsi.

<sup>15</sup>Pomonae yabara jume cowūnta xua Cristo tsitūpa barapomonae, barapomonae jame pejuntū coyene xanepanaewi. Barapomonae daxita po coyenein xua tane tsita xanepanatsi. Seicaya nama pomonae jopa yabara jume cowūntsiyo xua Cristo tsitūpa xua barapomonae tsitūpatsi, barapomonae apara peajuntūcoyenebewi. Barapomonae daxita po coyenein xua tane tsita abetsi. Barapomonae pia penanta xeinaewan jopa xaexaenaecaeyo, yawa pia juntū coyenein tatsi po juntū coyenein itorobeibatsi xua poxonae peexaneibinexa, bichocono jopa xaexaenaecaeyo. <sup>16</sup>Barapomonae jei: “Nacom pajume cowūntan”, jei. Daichitha poxonae exaneiba, icha coyene exaneiba icha ichi pomonae jopa pejume cowūntsiwi Nacom. Bara barapomonae Nacom tsita abetsi pejumefebixaetsi pocotsiwa itoroba. Matautano jopa itacūpaetsi xua exana pocotsiwa xua pexeinya penacuichiwa.

**Meje yabara pocotsiwa Nacom pia pexainyei jume diwesi tatsi**

**2** Ichitha xam Titom pocotsiwa cuidubame bewa cayabara cuita cananta xeineibim xua Ꞇ pocotsiwa Nacom pia pexainyei jume diwesi tatsi. <sup>2</sup>Pitiri jiji muxuwere xua jopa bewa nacupa naexanae peatsaxa meran. Matautano muxuwere xua xaniwaichiya pejinompaewa tsane xua daxota ichamonae pebaru cui itura jinaewa tsane, xua barapo pitiri jiji pebaru cui itura jinaewa tsainchi. Matautano muxuwere xua penajuntũ coyene itorobeibinexa xua peexaneibinexa po coyenein xua wũnae. Matautano muxuwere xua xaniwaichiya pejume cowũnta dubenanaebiyaewa tsane xua Nacom xaniwaicha pejume cowũnta dubenanaebiyaewa tsainchi. Yawano muxuwere xua piamonae peantobe tsurubenanaebiyaenexa. Yawano muxuwere xua ayapusũya jume cowũntsina poxonae bequein ichamonae abe taexanatsi. <sup>3-4</sup>Barichi pitiriwaxi muxuwere xua xanepanaya pejinompaewa tsane, icha be ichi poxonae jinompa powaxi jume cowũnta Nacom. Matautano barapowaxi jopa bewa cueicueijeĩ tsane po jumein xua abe xua ichamonae yabara pæbatsi. Yawa jopa bewa nacupa naexanae peatsaxa meran. Matautano barapo pitiriwaxi muxuwere xua piseuriwi peantobe nexa tsaibi tsane, xua daxota irũ xuya penawaxi pebarichinexa xua peexanaenexa po coyene wũnae xua peantobe nexa tsaibi tsane piseuriwi yawa pia pexuithano. <sup>5</sup>Matautano muxuwere barapo pitiriwaxi xua penajuntũ coyene itorobeibinexa xua peexaneibinexa po coyenein xua wũnae. Matautano muxuwere xua penajuntũ coyene xanepana exanaenexa. Matautano muxuwere

xua xanepanaya peewatsinexa pia boxi. Matautano muxuwere xua peyabara cui cananta xeinaenexa xua peyawenaenexa pomonaetha pomonae pia botha petajinompaewichi. Yawa muxuwere barapo pitiriwaxi xua jume jejei tsaibi tsane poxonae itorobeibatsi piseurixi xua ichamonae jopa abe peyabara pæbinexa Nacom Pejume Diwesi.

<sup>6</sup>Matautano barichi pewowi muxuwere xua penajuntũ coyene itorobeibinexa xua peexaneibinexa po coyenein xua wũnae. <sup>7</sup>Xam Titom barapo pewowi peitũtha tatsi xanepanaya eexanaponde daxita coyenein poxonae exaneibame. Barapoxonae barapo pewowi xua pebarichinexa xanepanaya peexanaenexa po coyenein wũnae. Poxonae pewowi cuidubame xainyeya cuidubare nejuntũ coyene wetsina. Matautano xanepanaya beta cuidubare. <sup>8</sup>Xanepanaya betiya cueicueijande xua ichamonae jopa abe necayabara pæbiwa tsane. Daxota barapomonae aura tsaibi tsane xua abe necayabara pæbeibiwa beta neexanaexae. Bapoxonae barapomonae jopa itacupæ tsainchi xua abe wanaca yabara pæbiwa.

<sup>9</sup>Tsipæbare pomonaetha pomonae pebusi cui tatayebeibiwichi xua amanaya tanacuita xua poxonae ichamonae tanacuitatsi, jande: "Paexande daxita xua painya nepaca canamataxeinaewi paca itoroba. Matautano xanepanaya patsita exande painya nepaca canamataxeinaewi. Jopa pin jumetha pajume noteibinde poxonae paca itorobeiba painya nepaca canamataxeinaewi", jande. <sup>10</sup>Yawa jande: "Jopa pacaibinde, jame saya beta pata exande painya nepaca canamataxeinaewi, xua daxita jiji painya nepaca cui yaputaenexa xua

bara paexaname pocotsiwa Nacom paca cuiduba pia pexeinya jume diwesi tatsi, pon Wanacacapanenebiyaein abe waexanae cuiru coyene weya”, jande.

<sup>11</sup>Nacom bayatha naca yaputane exana xua bara naca yawena pia wanaca antobexae. Naca yawena poxonae naca capanenebiya. Barapo pecapanenebiyaey coyene daxita nacuanpiwi nexa. <sup>12</sup>Barapo coyene xua Nacom pia pewayenae coyene jiwitha pia peantobewaxae, naca cuiduba xua wanacui barapentsiwa tsane abe waexanae cuiru coyenein. Yawano naca cuiduba xua wapentsinexa xua po coyenein cayabara cananta xeinatsi po coyenein exana pomonae jopa pejume cowuntsiwi, xua pomonae jinompa po cae pin nacuathe. Matautano naca cuiduba xua najuntu coyene itorobeibinchi xua waexanebinexa po coyenein xua wunaey barapo cae pin nacuathe yawa xanapanaya wajinompa dubenanaebiyaenexa xuano xua xainyeya waexana dubenanaebiyaenexa pocotsiwa Nacom itoroba. <sup>13</sup>Yawa naca cuiduba xua wawunaey ewatsiya jinompaewa xua equeicha caewa patopaetsica pon xua bayatha Nacom yabara naca tsiwunaey muxu duta. Waxainchi ewatatsi xua Jesucristo pia pepatopaewa pexeinya peitupanae coichatha. Bapon barapara wapepa Nacom xuano xua Wanacacapanenebiyaein. <sup>14</sup>Jesucristo nacaenaeta xua naca tsitupa wanaca capanenebiyaenexa daxita coyenein weya xua abe waexanae cuiru coyenein. Matautano nacaenaeta wanaca juntu coyene xanepana exanaenexa poxonae naca yabara junteina abe waexanae cuiru coyenein. Baxua Jesucristo exana xua piamonae tatsi pia wanaca exanaenexa, xua pomonaetsi xua waichichipaewatsi xua waexanaewa pocotsiwa wunaey.

<sup>15</sup>Xam Titom barapo coyenein bewa cuidubim. Juntu cui coyene tsacabare xua barapomonae junteina pejinompaewa tsane. Matautano muxuwere daxita barapo Creta tunaetopiwi xua bara xanapanaya peexanaewa tsane daxita peitorobi coyenyatha po peitorobi coyene xua Nacom cacata. Jinxoba barapomonae peitatha exaname po coyenewa xua daxota barapomonae tsita pecui pawinaexanaewa.

**Meje yabara po coyene bewa  
exanaey pomonae Nacom  
pejume cowuntsiwichi**

**3** Xam Titom barapo Creta tunaeto nacupapiwi equeicha caewa yabara nanta xaina exanare xua bewa barapomonae jume jejei xua peexanaewa tsane pocotsiwa barapomonae itorobeibatsi pomonae barapomonae pia peyanacua ewatsiwichi xuano pocotsiwa barapomonae itorobeibatsi pomonae pia pentacaponawewichi. Matautano muxuwere xua bewa barapomonae najuntu cui wunaetsiya exaneibina xua peexanaenexa tsaibi tsane pocotsiwa xua wunaey. <sup>2</sup>Matautano muxuwere xua bewa barapomonae jopa abe paebi tsane xua ichamonae abe peyabara paebiwatsi. Matautano muxuwere xua barapomonae jopa bewa jume matsontsonobi ichamonaetha. Matautano muxuwere xua barapomonae bewa juntu coyene xanapanaya cueicueijeji ichamonaetha. Matautano muxuwere xua bewa barapomonae baru cui itura jina dubenanaebiyaena daxita jiwi.

<sup>3</sup>Caena bayatha copiya waxainchi jopa wajume cowuntsiwi, jopa Nacom wayaputaexae. Yawa jopa wajume jejei jiwi pocotsiwa Nacom naca itoroba. Yawa waxainchi naca

itaxanumena. Waxainchi wajuntũ coyene naca itoroba xua waexanaewa pocotsiwa waichichipaewa pocotsiwa xua abe. Matautano naca itoroba xua bewa exanaetsi po peabe coyene naca weiweina exana icha ichi pomonae jinompa po nacuathepiwi. Matautano abe peexanae cuiro coyenein exana dubenanaebiyatsi, xuano xua peuwi juntũ coyenein jinompa dubenanaebiyatsi. Matautano ichamonae naca ita aenae-aenei tsurubenanaebiya, yawano xua waxainchi nantiya naita aenae-aenei tsurubenanaebiyatsi. <sup>4</sup>Ichitha Nacom pon Wanacacapanenebiyaein yabara naca yaputane exana xua po coyene bapon naca juntũ coyene xanepana exana, xuano xua wanaca antobewa poxona naca capanenebiya abe waexanae cuiro coyenein weya. <sup>5</sup>Naca capanenebiya, apara jopa poxoruyo xua xanepanaya waexanaexae bapon nexa, apara poxoru nantanuweya naca yabara nanthũ coyene xeina pia wanaca yawenaenexa. Poxonae naca bautisaba meratha baraxua saya yabara caunuta xua Nacom pia Pejumope tunaxũ tatsi naca juntũ coyene xanepana exana. Poxonae baxua naca cana exana bapoxonae pena juntũ coyene xeinatsi, xua poxonae Nacom pia Pejumope tunaxũ tatsi naca juntũ cui coyene yabara cajuntemaina abe waexanaewan. <sup>6</sup>Jesucristo pon Wanacacapanenebiyaein nacata itorobica Nacom pia Pejumope tunaxũ tatsi pia jopa juniya wanaca yawenaenexa. <sup>7</sup>Poxonae Nacom naca juntũ coyene xanepana exana, bapoxonae naca cana exana xua jopa wanatsiaenae cuentsinexatsi bapontha. Bapon naca yawena pia wanaca antobexae. Daxota waxainchi ewatatsi xua Nacom wanaca

catsibiwa tsane peajuntũyapusuwa, po peajuntũyapusuwa ataya tsiteca, tsipei bapon pia pexuichi.

<sup>8</sup>Baxua jame xainyeya pepaebiwa. Ichichipan xua xam jume daunweya tsipaebiname barapomonae xua bewa barapomonae barapo coyene exanaena pomonae xua pejume cowantsiwixae Nacom. Bapoxonae barapomonae cui enatsi xua peyabara nanta xeinaewa po penacuichi coyenein xua ichamonae tsita xanepanatsi. Barapo petanacuichi coyenein jame xanepana, yawa barapo coyenein jiwi yawenatsi. <sup>9</sup>Dotande xua necuiyainwande xua ichamonae yabara necabarũ najume matsontsonobiwa tsane po diwesin xua pejemai diwesin. Matautano cuiyainwande xua yabara necabarũ cueicueijejiwa judiomonae pia pamo susatopiwi tatsi pia wunxi tatsi. Matautano cuiyainwande xua penajume matsontsonobiwa xuano xua anaya peyabara pepaebiwa Moisés pia peitorobi coyene tatsi. Tsipei ba poxonae barapo coyene exana jiwi, jopa yawenaetsi xua xaniwaichiya pejinompaewa xua jiwi jopa pexainyewanxae.

<sup>10</sup>Icha ichũn cana exana xua pomonae Nacom pejume cowantsiwichi, cana exanatsi xua barapomonae pomonae Nacom pejume cowantsiwi be pomonae jopa penayaitae jiwi penaexanaewa tsane xua penaita aenae-aeneiwa, bara bapon muxuwere. Icha equeicha jopa xapain exanaeyo equeicha muxuwere. Icha equeicha jopa beta exanaeyo bapoxonae bapon itawere painya xainya weya. <sup>11</sup>Yaputaneme xua barapon pia coutha najuntũ coyene matanonoxuba xua abe peexanae cuiro coyene peexanaewa. Daxota abe peexanaexae pia coutha natsicuenta exana Nacomtha.



**Meje yabara xua Pablo muxu tsipaeba  
pocotsiwa bewa Tito exanaena**

<sup>12</sup>Poxonae nexainya beya cata itorobatsi Artemas, ichacuiha tsipae icha cata itorobatsi Tíquico, nexata bapoxonae yacuinaya ponare Nicópolis tomara beya. Nexata barapo tomarathiya netaename, tsipei bayatha nanta xeinan xua baxotiya taecaewa tsane awubotha. <sup>13</sup>Zenas pon jiwu yaweneibatsi peyabara yaputaenixae peitorobi coyenein, iruru pon pewun Apolos pon xua casiwa ponabe baponbe yawendebe. Bara exande be pocotsi coyeneya xua caitacupa xua yawename. Baponbe carebe pocotsiwa xua canantawenonabe poxonae pewara-

paenexabe xua jopa petaseicaenexa tsainchibe. <sup>14</sup>Barabu wajiwimonae xanepanaya exanaponaena xua daxota peyawenaenexa xua peyawenaenexatsi pomonae peacopeibiwi pocotsiwa xua canantawenona. Bapoxonae pia juntu coyenein tatsi Nacom tsita xanepanatsi.

**Meje yabara xua Pablo  
najume wetsiya paeba**

<sup>15</sup>Pomonae taxantha ena barapomonae cajacoba. Painta jacobare pomonae Jesucristo pejume cowuntsiwichi, pomonae bichocono paantobein pejume cowuntsixae. Barabu Nacom paca yawenaena daxita paxam pia paca necaantobexae.

Baja Pablo.

## Meje Po Carte Pablo Tatina, Filemon Tatinatsi

### Meje poxonae Pablo tamropata pitaba xua tatina, Filemón tatinatsi

**1** Xan Pablon, ponxaein jiwi pecubi botha taneetsin xua tanatsipei cueicueijeixae Cristo Jesús yabara. Iru Timoteo, pon iru pejume cowuntsin Jesús, baponbe panbe barapo carte pacata tinatsi. Xam Filemón ponxaein bichocono paca antobetsi tsipei pana yantame xua cueicueijam Nacom Pejume Diwesi. <sup>2</sup>Iru pata tinanbe pomonaetha pomonae pejume cowuntsiwi Jesús pomonae jinya botha nacaetuteiba. Iru barapo carte yabuyo nexa powa pewun Apia, powa be wamcho watsicotaewa pejume cowuntsixaeru Jesús. Iru barapo carte pebin nexa pon pewun Arquipo, pon daunweya pana nebaru nacuita xua poxonae pata cueicueijejwa Nacom Pejume Diwesi. <sup>3</sup>Barabu Nacom Waxa iru Jesucristo pon jiwi Pecanamataxeinaein paca yawenaena pia paca nacaantobexae, xuano xua juntea jinompa paca exanaena.

### Meje yabara xua Filemón Cristo antobetsi xuano xua jume cowuntano

<sup>4</sup>Poxonae Nacomtha tsipaebiban cayabara nanta xeineibatsi jan tsaibin: “Axa, Nacom cawuna jaintatsi tsipei Filemón nejuntu coyene weiweina exana”, jan tsaibin. <sup>5</sup>Daxota baxua caunuteiban, yaitama jume tan xua pinae jume cowuntame Jesús pon jiwi Pecanamataxeinaein. Matautano jume tan xua pinae antobem Jesús xua iruno pinae antobem daxita pomonae pejume cowuntsiwi. <sup>6</sup>Nacomtha tawucan xua pomonae Jesús pejume cowuntsiwi xua barapomonae taena xua

waxainchi be nacaemonaetsi wajume cowuntsixae. Matautano Nacomtha tawucan xua barapomonae xanepanaya peyaputaenexa xua Nacom naca cana exana pocotsiwa bichocono nacata xanepana poxoru be nacaemonaetsi wajume cowuntsixae Cristo Jesús. <sup>7</sup>Taneantobemxae nejuntu coyene tsacarabame yawa nejuntu coyene weiweina exaname xua xaniwaicha juntea tapoponaewa tsane. Xam ponxaein be tayapin canatsicotainchi iru nejume cowuntsixae Jesús. Beta nepoponaexae daxota beta jinompa daxita pomonae pejume cowuntsiwi Cristo Jesús.

### Meje xua Pablo Filemón wucatsi xua Onésimo tawucatsi, pon Filemón pia pebusi cui taetaeinchi

<sup>8-9</sup>Bequein bara taitorobi coyene xeinan xua po coyeneya bewa exanaename xua xan Cristo pia peitorobi jiwi jiwana tatsixaein, ichitha ichichipan xua xam neexanaewa tsane xua tacaantobexaetsi. Xan Pablon bara nama bichocono perun tsecaein matautano anoxuae jiwi pecubi botha neeta tanatsipei cueicueijeixae Cristo Jesús yabara. <sup>10</sup>Cacui itorobatsi xua neyawenaenexa Onésimo. Bapon taxanto be tatsicotaein taneyawenaexae xua cueicueije Jesús yabara poxonae cataunxae xote ecanje jiwi pecubi botha. Bapon bayatha nexainya weya nametaba, pon bayatha amanaya necata nacuichin.

<sup>11</sup>Bequein caena bayatha Onésimo amanaya jinya nebusi cui taetaeinchi, daichitha jopa xanepanaya cata nacuichiyo. Ichitha anoxuae bara xanepanaya penacuichin xam nexa yawa xan nexano Jesucristo pejume cowuntsixaetsi. <sup>12</sup>Caewa cata itorobatsi bapon. Poxonae bapon Onésimo patopiya, weyataeya jacobare tsipei

bapon bichocono antobein. <sup>13</sup>Xan ichichipan xua bapon taxantha eca xua barapon tana neyawenaenexa po penacuichiwa inta exaname xua iru poxonae cataunxuae jiwí pecubi botha neeta tanatsipei cueicueijeixae Jesucristo pejume diwesi. <sup>14</sup>Ichitha jopa ichipaeinyo xua Onésimo tana neyawenaewa tsane icha jopa becopatsim. Saya ichichipan xua xam exanaename pocotsiwa jinya coutha ichichipame xua jopa neexanaenexa pocotsiwa tacaitorobiwatsi. <sup>15</sup>Metha bayatha Onésimo nametaba nexainya werena saya be caethotha nexa xua anoxuae bara tsitecaeya nebaru poponaenexa tsane. <sup>16</sup>Anoxuae nama bapon jopa bewa yabara nanta xeinaem xua bapon be pon pebusi cui taetaeinchi jitontsi. Anoxuae nama bewa catsita tsane xua bapon peainya cui jiton, beyacaincha be pon pebusi cui taetaeinchi. Baxua jei pon bichocono peantobe jitontsi pejume cowuntsixae Cristo Jesús. Xan bapon Onésimo bichocono antobein. Ichitha xam nama bapon bewa bichocono antobem jinya necata nacuichixae jame yawano be neyapin tsicotaema iru pejume cowuntsixae Jesucristo, pon jiwí Pecanamataxeinaein.

<sup>17</sup>Jinya eweicho tana necana exanaemxaem iru tajume cowuntsixae Jesús, daxota moya beta weyataeya matenta wabare Onésimo, icha be neichim poxonae nententa weiweinaya wabame. <sup>18</sup>Icha bapon cata abe exana, icha ichauyo cantoma amanayaba moya newucare xua barapo matoma taca-

catsinexatsi. <sup>19</sup>Xan Pablon cata tinatsi xua barompaya tacobetha yawano xua tacobe cou itaneto, xuaje: Bexa tsane pentoma cacatsinchi. Bequein jopa cawucaetsi pentoma po matoma xua tanematoma amanayabiwam xua bayatha tacayawenaexaetsi xua nejume cowuntsiwa Jesús. <sup>20</sup>Bara barichinde, be pon taeweicho tacanatsicotaeinchi nejume cowuntsixaeru Cristo. Inta exande xua caitorobatsi Jesús, pon jiwí Pecanamataxeinaein, pia pejume cowuntsiwi pia pejuntu cui coyeneya. Nejuntu coyene tsacarabare xua juntema xaniwaicha tapoponaewa tsane.

<sup>21</sup>Daxota cata tinatsi tsipei yaputan xua jume jejam pocotsiwa caitorobatsi xuano xua equeicha nawita exanaename beyacaincha xua tacacui itorobiwatsi. <sup>22</sup>Bapoxonae inta bo tutu netsiwunaere. Tsipei bexa tsane paca taeyopiyaeinchi xua bayatha Nacom painya newucaexae xua tapaca taeyopiyawatsi tsainchi.

### **Meje yabara xua ichamonae Filemón jacobatsi**

<sup>23</sup>Epafras cajacoba pon iru xota eque jiwí pecubi botha penatsipei cueicueijeixae Cristo Jesús yabara. <sup>24</sup>Matautano iru Marcos, iruno Aristarco, iruno Demas, iruno Lucas, daxita barapomone matabuxuyo neyawena xua tacueicueijejiwa Jesucristo yabara.

<sup>25</sup>Barabu Jesucristo pon jiwí Pecanamataxeinaein, paca yawenaena daxita paxam pia paca necaantobexae.

Baja Pablo.

## Meje Po Carte Po Carta Nacom Pia Jiton Tatsi Tatina, Hebreomonaē Tatinatsi

### Meje yabara xua Nacom Pexanto itoroba jiwitha petacueicueijeinexatsi

**1** Caena bayatha Nacom itoroba pia peitorobi jume diwesi petacueicueijeji jiwichi. Barapomonaē Nacom tacueicueijeichi xua poxonae tsipaebatsi wamo susato jiwi. Barapomonaē matowa tacueicueijeji tsaibi xua Nacom tacueicueijeji tsaibichi matautano ainya coyeneintha tsipaeba xua Nacom tatsipaebatsi. <sup>2</sup>Ichitha nama anoxuae matapainya barapo maticabinthe po maticabin opi dubena Nacom itorobica Pexanto wanacata cueicueijeinexa, yawa wayabara yaputaenexa Nacom. Barapon Nacom Pexantoxae tatsi caena bayatha barapo nacue forota. Matautano Nacom Pexanto caena barapoxonae cana exana xua Pexanto tatsi pecanamataxeinaenexa daxita coyeneintha. <sup>3</sup>Nacom Pexanto tatsi pexeinya peitupanae juntu coyenein xeina po juntu coyenein Nacom xeina. Bapon Nacom Pexanto cui coyene jontatsi. Matautano bapon Nacom Pexanto tatsi pia pejume ayapusu itorobiwatha babatiya exana daxita carepaya nacuan. Nacom Pexanto tatsi nacui yabara jume weta xua Nacom Pexanto peyabara paebixae pejume diwesitha. Baxua exana poxonae naca tsitupa xua wanaca juntu coyene xanepana exanaenexa. Bapon naca capanepa abe waexanae cuiru coyenein weya. Bapoxonae bapon itaboco beicha pona penacuaresinexa pexeinya peecaethopeibiwatha Nacom pia coxa weya tatsi xua itaboco beicha xua

Nacom pia peecaethopeibiwatha tatsi beicha.

### Meje yabara xua Nacom Pexanto tatsi peainya cuin beyacaincha matatsunpiwi

<sup>4</sup>Nacom Pexanto ainya cui cana exana beyacaincha matatsunpiwi. Nacom baxua tsita itapeinya xeina xua poxonae wun duta Pexanto xua po wun jei: “Nacom Pexanto”, jei, po wun bichocono ainya cui beyacaincha matatsunpiwi pewun. <sup>5</sup>Tsipei Nacom bapana jopa jeiyo matatsunpintha:

“Xam Taxantom, anoxuae jiwi tsita itapeinya

xeinan xua xan jinya axan”, jopa bapana jei Nacom matatsunpintha. Matautano bapana jopa jei matatsunpin yabara:

“Xan bapon pia paxa tatsin tsane, bapon bara taxanto tsane”, jopa bapana jei Nacom xua matatsunpin peyabara paebiwatsi.

Saya ba meisa Nacom Pexantotha yabara paeba barapo jume.

<sup>6</sup>Matautano poxonae Pexanto itorobica po cae pin nacuaonaepiwitha tsique, pon yatsicaya compa tatsi, Pexanto yabara jei:

“Barabu daxita tamatatsunpiwimonae Taxanto wunae jaintinchi”, jei Nacom.

<sup>7</sup>Nacom yabara jei matatsunpiwi:

“Tamatatsunpiwi itoroban xua nainya inta

nacuita icha joibo ichi xua nainya pona poxonae itoroban barapo joibo.

Barichi barapomonaē itoroban xua inta daunweya nacuita icha nawa coicha ichi xua

daunweya taxua poxonae itoroban barapo nawa”,

jei Nacom.

<sup>8</sup>Ichitha nama Nacom Pexantotha jei:

“Jaina, xam ponxaem Nacom, ataya tsitecaeya

itorobiya ewatsiname xua  
itorobathopequeibame jiwi.  
Jinya neitorobiya ewatsi coyenewa  
bara ataya pexainyei coyenewa.  
<sup>9</sup>Xam ichichipame pocotsiwa exana  
pomona xanepanaya peexanaewi.  
Matautano bichocono aitaetaabim  
pocotsiwa exana pomona abe  
peexaneibiwi.  
Daxota xan Nacom ponxaein, jinya  
Nacom  
bichocono cajuntũ coyene weiweina  
exanatsi, beyacaincha xua jinya  
jiwimona  
juntũ coyene weiweina exanan”,  
jei Nacom Pexantotha.  
<sup>10</sup>Equeicha Nacom Pexantotha jei:  
“Xam pon pepa Necanamataxeinaem  
jiwi,  
caena bayatha forotame barapo cae  
pin nacua poxona aena.  
Jinya coya exaname peitaboco.  
<sup>11</sup>Daxita baxuan pocotsiwan xua jinya  
neexanaewam weraweracaena.  
Tsipei daxita baxuan saya peruwan  
tsane,  
icha be poxona paparuwa ichi xua  
peruwa tsane xua tsapatsapaca.  
Ichitha xam nama ataya  
tsitecaeya poponaename.  
<sup>12</sup>Barapo cae pin nacua irũ barapo  
itaboco  
poxoru peruwa tsane pichiname xua  
nexubinexa, xua pena ira equeicha  
neexanaenexa yawa xua itaboco.  
Barapocotsi jũta coyeneya exanaename  
icha be poxona pebin ichi xua peruwa  
nama xuena xua xuba, xua  
penawa penamaxatatsinexa.  
Ichitha xam nama ataya tsitecaeya  
poponame.  
Matautano jinya nepopona coyenewa  
ataya jopa weraweracae tsane”,  
jei Nacom Pexantotha.  
<sup>13</sup>Nacom bapana jopa jeiyo  
matatsunpintha:

“Xam tacoxa weya ecare, beya poxona  
abũ  
caexanaeinchi xua itorobiname jinya  
necaaitaetaabi jiwi”, bapana jopa jeiyo  
Nacom matatsunpintha.  
Saya meisa Pexantotha baxua paeba.  
<sup>14</sup>Daxita matatsunpiwi peinya pejinom-  
paewi jiwitha. Barapo matatsunpiwi  
exana dubenanaebiya pocotsiwa Nacom  
itoroba. Nacom itoroba barapomona  
xua petayawenaenexa tsainchi  
pomonaetha pomona bexa Nacom  
capanenebiyaena pomona pejume  
cowũntsi jiwixaetsi.

**Meje yabara xua poxona naca  
muxuweta xua jopa bewa pepawi  
cana exanaetsi Nacom pia  
pecapanenebiyae coyenewa tatsi**

**2** Nacom Pexanto ainya cui cana  
exana beyacaincha matatsunpiwi.  
Daxota bewa matowa itapeta jume  
naitaewatichi pocotsiwa bapon yabara  
xua jume tainchi. Bapoxona jopa  
wayabara jũntemainaponae tsainchi po  
coyene xua Nacom pia pecapanenebiyae  
coyenewa tatsi. <sup>2</sup>Po peitorobi coyenein  
caena bayatha matatsunpiwi Nacom  
tacueicueijeichi, barapo coyenein bara  
xainyei. Pomona jopa jume cowũntsiyo  
barapo peitorobi coyenein xuano  
xua abe exanaponano, barapomona  
atene exanaeinchi xua canacui  
matajũpiya cana exanatsi. <sup>3</sup>Cristo  
naca cana exana xua panenebiyatsi  
abe waexanae cuiuru coyenein weya.  
Cristo pia pecapanenebiyae coyenewa  
bichocono ainya cui coyenewa. Icha  
Cristo pia pecapanenebiyae coyenewa  
cayabara nanta xeinatsi xua pepawi  
xua jopa ainya cuiyiyo, waxainchi  
bapana jopa naca capanenebiyae tsane  
xua poxona jiwi atene exanaeinchi  
abe peexanaexae. Barapon Cristo  
pon jiwi Pecanamataxeinaein barapo  
pecapanenebiyae coyenewa yabara

tsipaeba copiya. Bapoxonae xuya barapo pecapanenebiyae coyenewa naca tsipaeba pomonae jume tane pocotsiwa xua bapon paeba pon jiwi Pecanamataxeinaein. <sup>4</sup>Nacom tsita itapeinya xeina xua barapomonae bara xaniwaicha yabara paeba Nacom pia pecapanenebiyae coyenewa. Baxua exana poxonae Nacom cana exana xua barapomonae pexeinya petsita itubi coyenewan muxuna exana poxonae cueicueijei. Matautano baxua exana poxonae cana exana xua barapomonae muxuna exana pocotsiwa bichocono wunae xua jiwi nabenaeca cana exanatsi. Matautano baxua exana poxonae cana exana xua barapomonae pexeinya peayapusu itorobi coyenewan muxuna cueicueijei. Matautano Nacom tsita itapeinya xeina xua bara barapomonae xaniwaicha cueicueijei poxonae Nacom pia Pejumope tunaxu tatsi itoroba barapomonae pia juntu coyeneintha tatsi xua pecatsibinexa po cui coyeneya peexanaenexa daxita barompaya tsiniya. Baxua exana barapo Nacom pia Pejumope tunaxu tatsi icha be pocotsi coyenewa Nacom ichichipa xua barapomonae barapo cui coyeneya exanaena.

**Meje yabara xua Jesucristo  
be jiton coyeneya naexana**

<sup>5</sup>Nacom jopa copatsi tsane xua matatsunpiwi canamataxeinaena barapo pena nacuatha po nacua yabara xuaunxuae pacata tinatsi. <sup>6</sup>Jame nama Nacom Pejume Diwesitha ichun yabara jeye xua pomonae barapo pena nacua pecanamataxeinaewa tsane, jeye: “Nacom xam jiwi toxeincha bichocono pin juntu coyene xeiname. ¿Eta xua metha yabara nanta xeiname jiwi xua ainya cui exaname xua pecanamataxeinaenexa tsane ichamonae?

<sup>7</sup>Nacom copiya saya caetotha exaname xua

jiwi be conotha ainya cui. Baxua exaname poxonae matatsunpiwi toxeinchiya

ainya cui exaname beyacaincha jiwi. Ichitha cotacaya exaname xua jiwi ainya cui naexana.

Jiwi cana exaname xua pexeinya peitupanae coicha xeina yawa catame barapomonae peayapusu itorobi coyenewa xua icha jiwi pecanamataxeinaewa tsainchi.

<sup>8</sup>Po jiwi cajume cowunta barapo jiwitha catame peayapusu itorobi coyenewa daxita xua

pecanamataxeinaenexa xuantha xua forotame”, jei xua ichun tsipaeba Nacomtha.

Poxonae Nacom cana exana jiwi xua canamataxeinaena daxita xua xuan forota, dapocotsi coyenewa aibi xua jiwi jopa itacupaetsi xua pecanamataxeinaewa. Daichitha

awiya cataunxuae jopa jiwi cui taetsi xua daxita pecanamataxeinaewa.

<sup>9</sup>Ichitha waxainchi Jesús yaputainchi pontha pon Nacom saya caetotha cana exana xua jopa ainya cuiyo.

Matatsunpiwi conotha ainya cui beyacaincha xua Jesús xua poxonae caetotha cana exanatsi xua jopa ainya cuiyo xua poxonae popona be

jiton. Nacom bichocono peantobexae daxita jiwi daxota bapon copata xua Cristo tsitupaena daxita jiwi abe

pia peexanaexae. Anoxuae equeicha Nacom ainya cui cana exana xua Jesús ainya cui cana exanatsi. Matautano

Nacom cana exana xua Jesús jopa juniya ainya cuiyiyo xua jiwi itorobiya peewatsiwatsi. Matautano Nacom Jesús

catatsi pexeinya peitupanae coicha. Nacom baxua exana xua Jesús pia petsitupaexae jiwi.

<sup>10</sup>Nacom forota daxita coyenein. Matautano daxita baxuan Nacom nata exana. Matautano Nacom ichichipa xua daxita piamonae tatsi pexeinaewa tsane pia pexeinya peitupanae coicha tatsi peponaenexa tsane pia nacuatheicha tatsi. Daxota Nacom tsita xanepanatsi xua poxonae Jesucristo atene exanatsi beta yatsicaewa pejuntũ coyene wunaetsinexatsi xua jiwi pecanamataxeinaenexatsi Nacom pia nacuatheicha. Baxua Nacom exana poxonae Jesucristo atene exanatsi poxonae tsitupa xua jiwi pecapanenebiyaenexatsi abe pia peexanae cuiru coyenein weya tatsi. <sup>11</sup>Tsipei daxita pomonae juntũ coyene xanepana exanatsi Nacomtha, irũrũ Jesús pon cana exana baxua barapomonaetha, daxita barapomonaenantaũta caein Paxa pon Nacom. Daxota Nacom Pexanto tatsi jopa auriyo poxonae naca yabara jei: “Tayapin jiwi pam”, poxonae jei. <sup>12</sup>Nacom Pexanto tatsi pon Jesucristo, caena bayatha Nacom Pejume Diwesitha xua salmos penaxũnae weixi diwesintha jeye Nacomtha: “Cayabara paebinchi tayapinmonae jiwitha.

Cata naxũnaeinchi pewei xua wũnae tacajainchinexa poxonae nanabaru nanacaetutsin jinya botha pomonae cajume

cowũnta”, jei Jesucristo Nacomtha.

<sup>13</sup>Ichacuitha caena bayatha Jesucristo jeye xua Isaías pia diborotha:

“Xan jume cowũntsiya wũnae ewatsin Nacom xua tana neyawenaewa”, jei.

Equeicha Jesucristo jeye:

“Xote ecan, baru ecan tapexui pomonae tana

nejume cowũntsiwi pomonae Nacom necata”, jei Jesucristo.

<sup>14</sup>Pexui ba bara xeina pejana yawa pewito icha be coxiyeiwi ichi tsipei

jiwixae. Barichi Jesús xeina jiton pia pepon tatsi pexeinaexae jiwi pia pewito tatsi xuano xua jiwi pia pejana tatsi. Jesús baxua xeina xua petsitupaenexa jiwi. Daxota itacũpatsi xua peamanayabiwa pontha pon xua peayapusũ itorobi coyenewa xeina xua jiwi pejutebiwatsi. Bapon apara pon caurimonae pia pentacaponaein tatsi.

<sup>15</sup>Jesús baxua nacata exana wanaca capanenebiyaenexa wajunuwi coyene weya xua poxonae yabara junuwatsi xua wawerapaewa tsane. Jiwi daxita matababin junuwiya jinompeiba xua pewerapaewayainwa. <sup>16</sup>Bara xaniyei Jesús jopa tsipatopeicaeyo xua peyawenaenexa tsane matatsunpiwi.

Apara jame Jesús tsipatopeica peyawenaenexa tsane Abraham pia pemomoxi susato jiwi tatsi xua yatsicaewa jiwi. <sup>17</sup>Daxota

Jesús poxonae naexana bewa yawa naexanaena daxita coyeneya icha jiwi pia pepon tatsi ichi. Bapon bewa baxua yawa naexanaena pia penaexanaenexa pepa wasacerdotepin pocotsin nacata paebeiba Nacom beicha. Matautano bapon Jesús pon pepa wasacerdotepin xainyeya taexana po coyene xua ba sacerdotemonae pia petaexanae coyenewa xua Nacom tsita exanatsi. Bapon Jesús naca weyatane xua wanaca yawenaenexa, xua jiwi petsitupaenexatsi xua Nacom jiwi pejuntũ coyene yabara junteinaenexa tsaibi tsainchi abe pia peexanae cuiru coyenein tatsi. <sup>18</sup>Jesús atene exanatsi poxonae caurimonae pia pentacaponaein tatsi juntũ coyene jũjutatsi petanenexa tsainchi icha abe exana. Daxota anoxuae bapon Jesús itacũpatsi xua peyawenaewa pomonaetha pomonae irũrũ juntũ coyene jũjutatsi caurimonae xua abe peexanaewa tsane.

**Meje yabara xua Jesús peainya  
cuin beyacaincha Moisés**

**3** Nacom iru paca wun duba poxonae itapeta pomonae pepatsinexa tsane pia nacuatheicha tatsi. Tamonae pam, paxam jiwana pam pomonae pejume cowantsiwi Jesucristo, pomonae pam Nacom paca juntu coyene xanepana exana xua piamonae tatsi painya paca cana exanaenexa. Daxota Cristo Jesús pacayabara nanta xeinare. Bapon Jesús Nacom pia peitorobin tatsi pon naca tsipaeba Nacom nexa. Matautano bapon wapepa sacerdotepin pon wanacata paebeibin Nacom beicha. Bapon payabara cueicueijan ichamonaetha wajume cowantsixae bapon. <sup>2</sup>Jesús bara xainyeya exana Nacom pia petanacuichiwa tatsi Nacom peyabara tsiwunae muxu dutsixae bapon barapo penacuichiwanexa xua Nacom pia peitorobin tatsi tsane yawa wapepa sacerdotepin tsane. Jesús beta xainyeya taexana, icha matha Moisés ichi xua poxonae daxita coyene beta xainyeya taexana Nacom piamonaetha xua Nacom nexa. <sup>3</sup>Jesús pecapanepaexae jiwi bewa bichocono toxeincha baru cui itara jinaetsi bapon beyacaincha xua baru cui itara jinatsi Moisés. Barapocotsi juta coyeneya ichi, bewa Jesús cana exanaetsi icha be poxonae jiton ichi xua bewa baru cui itura jinaeinchi xua ainya cui exanatsi peacabixae bo beyacaincha xua bo xua ainya cui tsuncuae. <sup>4</sup>Daxita ba bon tsoponae poxoru apara jiton peexanaexae. Ichitha jame pon yatsicaewa nama daxita coyenewan exana apara bapon Nacom. <sup>5</sup>Bayatha Moisés apara pon petanacuichinchi Nacom. Bapon xainyeya daxita exana Nacom pia botha pocotsiwa Nacom itoroba. Bapon Moisés pia penacuichiwa tatsi saya xua

yabara tsiwunae caunuta pocotsiwan xua bexa Nacom exanaena. <sup>6</sup>Ichitha nama Cristo Nacom Pexantoxae tatsi xainyeya daxita exana Nacom nexa tsipei cana exana xua bapon canamataxeina daxita pomonae Nacom piamonae tatsi. Waxainchi Nacom piamonaetsi icha ajuntuyapusuya jume cowantapoinchi Cristo beya xua poxonae tupaeinchi. Matautano waxainchi Nacom piamonaetsi icha juntu coyene weiweinaya wunae ewatatsi pocotsiwa bexa Nacom wanaca tsiexanaewa tsane.

**Meje yabara xua nafina  
caewata Nacom piamonae tatsi**

<sup>7</sup>Cristo ainya cui peexanaexaetsi beyacaincha xua Moisés ainya cui exanatsi daxota Nacom pia Pejumope tñaxu tatsi naca itoroba xua bewa jume taetsi Cristo. Baxua paebe Nacom pia Pejumope tñaxu tatsi. Nacom Pejume Diwesitha, jeye:

“Anoxuae pana nejume taema pocotsiwa paca tsipaebatsi ponxaein Nacomxaein.

<sup>8</sup>Painya xoba pana nejumefebame painya

juntu coyenewatha xua daxota jopa painya tana nejume cowantsiwam. Jopa bara paichinde icha pomonae ichi xua poxonae bayatha nejume matawenta

xua exanan poxonae jinompa ichaxota ira xuepana susato tsurucuae nacuathe. Barapomonae nefayacoteiba poxonae nejuntu coyene jujuteiba beya poxonae anaepanan barapomonaetha poxonae jopa xapain exaneibiyo.

<sup>9</sup>Barapomonae pomonae nejuntu coyene

jujuta, apara painya amo susato jiwi. Barapomonae baxua inta exana poxonae jopa nejume cowantsiyo.

Baxua exaneiba beya poxonae cuarenta po



weibe tsuxubi bequein taiba pocotsiwa xua taexaneiban barapomonae xua beya cuarenta po weibetha.

<sup>10</sup>Daxota barapomonae caseban yawa yabara

jan barapomonae: ‘Barapomonae jopa benejume

cowuntsiyo pejuntũ coyeneintha yawa jopa beyaputaeyo pocotsiwa ichichipan taexanan barapomonae’, jan.

<sup>11</sup>Barapomonae caseban.

Tacoutha jume daunweya najan: ‘Barapomonae bapana jopa patsi tsane tanacuatha ichaxota po nacuatheicha nafifinacaewatsina pomonae tana nejume

cowuntsiwi’, najan”, jei Nacom pia Pejumope tũnaxũ tatsi, Nacom Pejume Diwesitha.

<sup>12</sup>Tamonae pam, pomonae irũ painya nejume cowuntsi jiwixae Jesucristo. Painya xoba paxeiname po jũntũ coyene bichocono abe, po jũntũ coyene jopa ichipaeyo xua pejume cowuntsiwa Nacom, pon xua asũ popona. <sup>13</sup>Jame maisa daxita matababin nantiya pana najũntũ coyene tsacabare xua ajũntũyapusũya painya nejinompaewa tsane. Daxita pam baxua paexande anoxuae poxonae cataunxuae po dapaetha anoxuae petain paca itacũpa xua paexaname baxua. Mataũtano baxua paexande xua jopa pata tana nejumefebiwam painya jũntũ coyenewatha. Icha pana nejumefebame painya coutha pana namuxujainyabichipame xua daxota abe painya neexanaewa tsane.

<sup>14</sup>Bewa xanepanaya ayapusũya jume cowũnta dubenanaebiyaeinchi Nacom xua beya poxonae tũpaeinchi. Icha baxua betiya ayapusũya jume cowũnta dubenanaebiyaeinchi icha ichichi poxonae aena jume cowũntatsi, bapoxonae nayawa muxuna xeinaeinchi

Nacom pia nacuatheicha pocotsiwa Cristo xeina.

<sup>15</sup>Daxota equeicha paca tsipaebatsi xuaunxuae po diwesi paca tsipaebatsi xua Nacom Pia Pejumope tũnaxũ tatsi cueicueijeji, jeye:

“Anoxuae pana nejume taema pocotsiwa paca

tsipaebatsi, ponxaein Nacomxaein.

Icha pana nejume taneme bapoxonae painya xoba

pana nejumefebame painya jũntũ coyenewatha

xua daxota jopa pata tana nejume

cowũntsiwam tsane.

Jopa bara paichinde icha pomonae ichi xua

poxonae nejume matawenta poxonae jinompa

ichaxota ira xuepana susato tsurucuae nacuatha”,

jei Nacom pia Pejumope tũnaxũ tatsi.

<sup>16</sup>Payabara nanta xeinare pomonae jume tane xua Nacom pejume tatsi xua bapoxonae Nacom jume matawentatsi. Daxita bapomonae apara pomonae Moisés mata cawarapa Egipto nacua weya. <sup>17</sup>Payabara nanta xeinare Nacom xua caseba xua beya cuarenta po weibetha tsuxubi. Bapomonae apara israelmonae pomonae xua abe exana poxonae jinompa ichaxota ira xuepana susato tsurucuae nacua beya, xuano xua baxota werapano. <sup>18</sup>Payabara

nanta xeinare pomonae Nacom daunweya yabara paeba, xua jei: “Barapomonae bapana jopa patsi tsane tanacuatha ichaxota po nacuatheicha nafifinacaewatsina pomonae tana nejume cowuntsiwi”, jei. Bapomonae apara israelmonae pomonae xua jopa exanaeyo pocotsiwa Nacom itoroba.

<sup>19</sup>Bara yaputainchi xua barapomonae jopa itacũpaetsi xua pepatsiwa Nacom pia nacuatheicha tsipei jopa Nacom jume cowuntsichi.

**4** Waxainchi yabara jume cowunta dubenanaebiyatsi xua Nacom naca tsiwuna muxu duta. Nacom naca tsiwuna muxu duta xua bara wanaca itacupaewa tsane xua wapatsiwa pia nacuatheicha po nacua xua Nacom pia penafinacaewatsi nacua. Daxota poxona cataunxuae naca itacupa xua wapatsiwa tsane barapo nacua bewa yabara najuntu coyene exabichi xua paxam jiwana jopa itacupaetsipaetsi xua pepatopaewa Nacom pia nacua. <sup>2</sup> Waxainchi barichichi jume tainchi barapo Nacom pia pecapanenebiyae diwesi, icha bayatha barapomona ichi xua jume tane barapo diwesi. Ichitha barapo diwesi jopa yawenaetsi barapomona xua pejume cowuntsinexa Nacom, tsipei jopa jume cowuntsiyo barapo diwesi. <sup>3</sup> Waxainchi nama barapomonaetsi xua wajume cowuntsiwi barapo pecapanenebiyae diwesi. Daxota naca itacupa xua wapatsiwa Nacom pia nacuatheicha ichaxota bapon naca baru nafinacaewatsina baxoteicha. Nacom wamo susato jiwu yabara paebatsi xuaunxuae paca tsipaebatsi. Jeye: “Barapomona caseban. Tacoutha jume daunweya najan: ‘Barapomona bapana jopa patsi tsane tanacuatha ichaxota po nacuatheicha nafinacaewatsina pomona tana nejume cowuntsiwi’, najan”, jei Nacom Pia Pejumope tunaxu tatsi. Bequein baxua Nacom paeba ichitha caena bayatha weta barapo nacua ichaxota jiwu nafinacaewatsina poxonae nacobe weta xua daxita forota barapo cae pin nacuathe. <sup>4</sup> Po matacabi pewun “siete matacabi”, jei, barapo matacabi Nacom Pejume Diwesitha yabara paeba. Bapon jeye: “Nacom nacuita seis po matacabibe. Bapoxonae nafinacaeca po mataqueitha

pewun ‘siete matacabi’, jei”, jei Nacom Pejume Diwesitha. <sup>5</sup> Equeicha Nacom Pejume Diwesitha jeye: “Barapomona bapana jopa patsi tsane tanacuatha ichaxota po nacuatheicha nafinacaewatsina pomona tana nejume cowuntsiwi”, jei Nacom. <sup>6</sup> Ichitha cataunxuae acoibi ichamona pomona xua bexa tsane Nacom copatsina xua nafinacaewatsina ichaxota bapon nafinacaewata. Barapomona jume cowuntsina xua Nacom paeba. Pomona copiya bequein jume taetha Nacom pia pecapanenebiyae jume barapomona Nacom caena bayatha jopa copatsiyo xua barapomona nafinacaewata tsipei jopa jume cowuntsiyo pocotsiwa Nacom paeba. <sup>7</sup> Daxota Nacom nanta xeina xua equeicha pena matacabi exana. Barapo matacabi xua wun duta “anoxuae” jei xua pena coyene. Barapo matacabitha xua piamona tatsi petaitacupaewatsi tsainchi xua nafinacaewatsina. Baxua Nacom exana caena bayatha poxona David popona xua ainya wei pirapae poxona jinompa pomona jopa copatsichi xua nafinacaewata. Anoxuae Nacom bapocotsiwa naca tsipaeba pocotsiwa bayatha tsipaeba piamona jiwitha, poxona David popona, pon jeye: “Icha anoxuae pajume naitawatame pocotsiwa Nacom paca tsipaeba jopa pajumefebinde painya juntu coyenewatha xua daxota jopa Nacom painya nejume cowuntsiwam”, jei David caena bayatha Nacom nexa. <sup>8</sup> Josué caena bayatha wamo susato jiwu matacapoinchi Canaan nacua berena pomona Israel piamonaexae tatsi. Apra jopa matacaponaeyo ichaxota po nacua Nacom yabara paeba xua

barapomonae nafifinacaewatsina. Icha Josué bayatha matacaponae sipa barapomonae barapo nacuatha bapoxonae Nacom jopa nantawenonaetsipae xua exanaena icha matabi po matabitha poxonae barapomonae itacupatsi xua pepatsiwa tsane barapo nacuatha, po nacia ichaxota Nacom yabara paeba. <sup>9</sup>Daxota cataunxuae awiya barapo matabi tsonae po matabitha poxonae Nacom piamonae tatsi nafifinacaewatsina Nacom pia nacuatheicha. <sup>10</sup>Tsipei pon weta pia penacuichiwa pocotsiwa Nacom itoroba bara itacupatsi xua nafifinacaewata ichaxota Nacom nafifinacaewata. Bapon baxua exanaena icha Nacom ichi poxonae nafifinacaeca, poxonae nacobe weta pia penacuichiwa xua poxonae forota daxitan. <sup>11</sup>Daxota bewa ajuntusuya jume cowanta dubenanaebiyaeinchi xua wanafinacaewatsinexa tsane ichaxota Nacom nafifinacaewata. Baxua exanaeinchi xua ichamonae waxainchi jiwantsi jopa peyaseicaewa tsane xua nafifinacaewata. Waxainchi jopa ichipaetsi xua icha ichamonae ichi xua jopa nafifinacaewatsiyo jopa pejume cowantsixae pocotsiwa Nacom paeba.

<sup>12</sup>Nacom Pejume Diwesi peajuntuyapusu diwesi xuno peayapusu itorobi coyene xeina. Barapo Nacom Pejume Diwesi barapocotsi jata coyeneya ichi xua icha ba cusi ichi xua po wato nantia baru ducube. Barapo cusi taju uncuiya pebaruwa xua pepontha. Barapoxonae barapo cusi itapeinya xeina daxita pocotsiwan xeina wan iya xua matha iya dubeinya bupaniya. Ichitha Nacom Pejume Diwesi ayapusu beyacaincha cusi tsipei barapo Nacom Pejume Diwesi itacupatsi taju bereca pona wajuntu coyenewatha ichaxota nanta xeinatsi. Barapo diwesi naca yaputane exana po coyenein xua wajuntu coye-

newatha xeinatsi. Naca yaputane exanano po coyenein yabara nanta xeinatsi wajuntu coyeneintha. <sup>13</sup>Dapocotsiwan aibi barapo cae pin nacuathe xua Nacom forota pocotsiwan xua xuan nantiyatarubena Nacom peitabaratha pocotsiwan xua bapon jopa taeyo. Daxitan naitatarubena xuno xua Nacom itacupatsi xua beta petaewa daxita coyenein. Nacomtha bexa yabara tsipaebinchi xua pocotsiwan bayatha exainchi.

### Meje yabara xua Jesús pepa sacerdotepin

<sup>14</sup>Jesús apara Nacom Pexanto tatsi. Bapon wasacerdotepin, pon pepa sacerdotepin, pon bichocono yatsicaya peainya cuin. Bapon bayatha patopa Nacom peitabaratheicha tatsi. Daxota bewa ajuntuyapusu jume cowanta dubenanaebiyaetsi bapon, pon yabara cueicueijeichi ichamonaetha. <sup>15</sup>Barapo wasacerdotepin pon pepa sacerdotepin, naca weyatane xua wanaca yawenaenexa poxonae juntu coyene faefaenouneibatsi abe waexanaexae. Bapon baxua nacata exana, tsipei bapon barichichi juntu coyene jujutatsi xua abe peexanaenexa. Caurimonae pia pentacaponaein tatsi juntu coyene jujuta icha naca ichi. Daichitha nama bapon Jesús bapana jopa abe exanae. <sup>16</sup>Daxota bewa ajuntuyapusu wucaetsi Nacom pon bichocono naca antobe. Jopa bewa junuwi tsainchi xua wacueicueijejiwa Nacomtha. Bapoxonae Nacom naca weyataena wanaca yabara junteinaenexa xua abe waexanae cuiru coyenein. Matautano bapon wanaca antobexae naca yawenaena poxonae po matabitha canantawenoneibatsi, poxonae naca juntu coyene jujuta.

**5** Jiwi ba barompaya pia xantha tatsi jiwana taitapetsi pomonae xua daxita cana exanatsi pepa

sacerdotepiwi. Barapo sacerdotepiwi itorobatsi xua barapo sacerdotepiwi caunuta jiwi yabara poxonaе cueicueijei Nacom peitabaratha xua jiwi nexa. Matautano barapo sacerdotepiwi yabara tsiwun dubatsi po coyene jiwi petaexaneibiwa tsainchi Nacomtha pocotsiwan xua jiwi amanaya pecatsiwan Nacomtha abe peexanaexae. Matautano barapo sacerdotepiwi yabara tsiwun dubatsi po coyene xua jiwi petaexaneibiwa tsaibi tsainchi xua poxonaе duwei pejutebiwa pocotsi duwein xua jiwi amanaya pecatsiwa Nacomtha abe peexanaexae. <sup>2</sup>Barapo sacerdotepiwi ichacuitha juntu coyene faefaenouneiba, poxonaе juntu coyene jujuteibatsi caurimonae pia pentacaponaein tatsi xua abe peexanaenexa. Tsipei barapomonaе nacui yaputane xua poxonaе juntu coyene jujuteibatsi, daxota bara itacupatsi xua peyawenaewa ichamon-aetha. Itacupatsi xua peyawenaewa pomonaetha pomonaе abe peexanaewi xua bequein jopa yaputaeyo xua abe exana, iruru pomonaе yatsicaewa nacui yaputane xua abe exana. <sup>3</sup>Barapo sacerdotepiwi iruru abe exaneiba xua pejuntu coyene faefaenaexae poxonaе juntu coyene jujuteibatsi caurimonae pia pentacaponaein tatsi. Daxota bewa iruru pia coutha nata exanae po coyene xua duwei penata tautsinexa Nacom nexa icha poxonaе jiwi tacana ichichi poxonaе abe peexanaexae. <sup>4</sup>Dapon ajibi xua pia coutha naexana pon pepa sacerdotepin. Jame ba Nacom bapocotsin yabara tsiwun duta xua penaexanaenexa pepa sacerdotepin. Matautano bapontha Nacom cata barapo peainya cui yabara matawun dutsiwa icha bayatha Nacom cana ichi pon pewun Aaron pon copiya pepa sacerdotepin naexana. <sup>5</sup>Cristo bara cana ichichi. Bapon Cristo pia coutha

jopa naexanaeyo pon pepa sacerdotepin xua peainya cuin penaexanaenexa. Apra jame Nacom cata barapo peainya cui yabara matawun dutsiwa xua pepa sacerdotepin penaexanaenexa. Bayatha Nacom yabara paeba Pexanto pejume diwesitha, barapo peainya cui yabara matawun dutsiwa xua penaexanaenexa pepa sacerdotepin, xua jeye:

“Xam apra taxantom.

Anoxuae xan jinya axaxaein.

Yabara catsiwan dutatsi barapo jinya nenacuichiwanexa”, jei Nacom.

<sup>6</sup>Equeicha Nacom Pejume Diwesitha xua Pexanto yabara paeba, jeye:

“Xam pon sacerdotepim, xua bara ataya tsitecaeya tsane, icha Melquisedec matha

ichi pon caena bayatha popona.

Bapon pepa sacerdotepin naexana xua ataya tsitecaeya pepoponaein”, jei Nacom.

<sup>7</sup>Poxonaе cataunxuae Cristo popona po cae pin nacuathe bichocono jume daunweya tsipaebeiba Nacomtha xuano jume daunweya wuqueibano beya poxonaе bichocono wecoyei. Cristo wuqueiba Nacomtha, pon bequein itacupatsi xua Cristo peyawenaewatsi xua jopa petupaewa. Mexeya poxoru bapon itapetsiya peexanaexae pocotsiwa Nacom ichichipa daxota bara Nacom jume tane pocotsiwa

Cristo wuca. <sup>8</sup>Bequein Cristo Nacom Pexanto tatsi, ichitha naciduba xua Paxa jume jejei xua exana pocotsiwa Paxa itorobatsi xua poxonaе atene exanatsi xua ichamonae exana.

<sup>9</sup>Bapon pia coutha daxita najuntu cui yabara wunaeta poxonaе atene xua penaexanaenexa pepa sacerdotepin. Daxota bapon Cristo exana xua jiwi capanenebiyatsi abe pia peexanae cuiru coyenein weya xua ataya tsitecaeya tsane daxita pomonaе pia pejume cowuntsiwichixaetsi. <sup>10</sup>Nacom

yabara tsiwun duta xua Cristo pepa sacerdotepin naexana, icha matha Melquisedec ichichi xua yabara tsiwun dutatsi xua pepa sacerdotepin naexana, pon caena bayatha popona.

**Meje yabara xua poxonae  
muxuwetatsi pomona Nacom  
pejume cowuntsiwi xua  
pebarapentsiyainwa po coyene xua  
pejume cowuntsiwa Nacom**

<sup>11</sup> Waxainchi xeinatsi nawita xua po coyene wayabara natsipaebinexa Cristo xuaunxuae anoxuae paca tsipaebatsi. Daichitha bichocono ayapube xua paca yaputane exainchi tsipei painya coutha jopa pana nayabara copatsim xua bara painya neyabara yaputaewa tsane baxuan. <sup>12</sup>Caena bayatha bewa pana naexanaem pomona jiji painya necuidubi jiji pam. Daichitha cataunxuae panantawenoname xua ichamona equeicha caewa yabara paca cuiduba Nacom Pejume Diwesi pocotsiwan xua jiji nantawenona copiya nacuiduba poxona aena jume cowanta. Paxam pomona equeicha caewa pajuntu coyene faefaename, xua painya nejume cowuntsiwa. Barapo coyene icha be poxona pexui ichi xua nantawenona mito, jopa peitacupaexatsi xua pexaewa pewito. <sup>13</sup>Pexui poxi isainatsi ba nantawenona mito poxoru pewito jopa xaeyo. Barapocotsi juta coyeneya paichim. Paxam jopa paca itacupaeyo xua painya neyabara yaputaewa Cristo pia pecuidubiwa xua po coyene xanapanaya painya nejinompawea. <sup>14</sup>Nama pewi jopa apara pexui nexiyo poxi isainatsi, jame apara ba pomona pinyon nexa. Barapocotsi juta coyeneya ichi pomona ba xaniwaicha jume cowanta pia juntu coyeneintha barapomona jopa abe exanaeyo. Barapomona nacuiduba xua

yabara yaputane po coyene abe yawano po coyene wuna.

**6** Barabu nacui barapentatsi xua nayabara cueicueijeichi pocotsi coyenein xua copiya naca cuiduba xua Cristo yabara poxona aena jume cowuntatsi. Jame barabu nanta xeinatsi, po coyene pepa pena coyene icha pomona pinyon ichi xua pocotsiwan nanta xaina pomona beta jume cowanta. Po coyenein xua bayatha copiya naca cuiduba xua Cristo yabara, jopa nantawenonaetsi xua equeicha wanacuidubiwatsi po coyenein xua abe waexanaexae bewa aura tsainchi xua daxota nacui barapentatsi po coyenein abe, po coyenein xua ba naca wepu tsana exana Nacom weya. Matautano jopa nantawenonaetsi xua jume cowuntsinchi Nacom. <sup>2</sup>Barapocotsiwanje jopa nantawenonaetsi xua equeicha caewa nayabara cueicueijeichi tsainchi tsipei bayatha payaputaneme. Matautano jopa equeicha nantawenonaetsi xua caewa nayabara cueicueijeichi tsainchi xua bewa bautisabinchi. Matautano jopa nantawenonaetsi xua equeicha caewa nayabara cueicueijeichi tsainchi xua poxona Nacom pejume cowuntsiwi pecobetha pemataboco jayabiwatsi xua pexeinaenexa pejuntu cui coyenein po pejuntu coyene Nacom pia Pejumope tunaxu tatsi cata. Matautano jopa nantawenonaetsi xua equeicha caewa nayabara cueicueijeichi tsainchi xua equeicha jiji asu peexanaewatsi petupae cuiru coyene weya. Barichi jopa nantawenonaetsi xua equeicha caewa nayabara cueicueijeichi tsainchi xua poxona Nacom yabara paebina jiji xua penatsicuentisiwa xua abe peexanaexae Nacomtha. Barapoxona Nacom itawetsina xua bara ataya tsitecaeya tsane abe peexanaexae. <sup>3</sup>Jame barabu nayabara cueicueijeichi

tsoponaē tsainchi icha coyenein xua pena coyene icha Nacom bara naca cui yabara copatsina.

<sup>4</sup>Ichamonae penta xua Cristo pejume cowantsiwatsi. Daxota jopa neyapucupaeyo xua equeicha tacuidubiwa Nacom Pejume Diwesi barapomonaetha. Barapomonaē Nacom pia pejume xainyeiwa nacuiduba, xuano yaputane Cristo pon Nacom itoroba po cae pin nacuathe tsiue. Matautano barapomonaē xeina po pejuntū coyenein Nacom pia Pejumope tūnaxū tatsi cata. <sup>5</sup>Matautano barapomonaē yabara jume cui jūjūta Nacom Pejume Diwesi xua daxota yaputane xua barapo diwesi bara xanepana. Matautano barapomonaē tane po peyapusū itorobi coyenewa Nacom pia Pejumope tūnaxū tatsi cata jiwitha xua barapo jiwi barapo coyenewatha exana pexeinya petsita itūbi coyenewan beya poxonae Cristo equeicha patopaena. <sup>6</sup>Icha daxita barapo coyenein barapomonaē equeicha nacui barapenta xua jopa Nacom pejume cowantsixaetsi, bapoxonae nama jopa itacupaetsi xua equeicha caewa pejume cowantsiwa Nacom. Poxonae Nacom equeicha pentatsi baxua be barapomonaē equeicha Jesús caewa bexotsi naetha. Barapomonaē exana xua jiwi Nacom Pexanto tatsi yabara jume cui caponatsi tsipei jopa Nacom jume cowantsichi. Baxua icha be poxonae ichamonae ichi poxonae matha Jesús naetha bexotsi xua daxota daxita jiwi Jesús cui caponatsi. <sup>7</sup>Pabi ba po iratha ema mū jojoneca poxonae ema duneiba barapo iratha, barapo pabitha jiwi pexaewa ūba. Nacom exana barapo iratha xua pexaewa xaniwaicha taxainwaetsina xua pomonaē peubimonaē taxainwaetatsi. <sup>8</sup>Ichitha icha icha pabi saya ū pesoiwan xuwa, barapo pabi jopa wūnaeyo poxoru jiwi jopa yawenaetsi poxonae

ūba barapo pabitha. Daxota Nacom exana xua barapo pabi jiwi tautsina xua pesoiwan daxita tūpa peexanaenexa. Icha Nacom cana ichi pabintha bara jūta cana ichiya exana jiwitha. Icha jiwi Nacom jume cowanta dubenanaebiya, bara Nacom beta exanaena barapo jiwi. Ichitha icha barapo jiwi Nacom pentatsi, Nacom jopa yawenaē tsane barapo jiwi. Saya jame Nacom itoroba xua barapo jiwi petautsiwa tsainchi po isototha xua bapana jopa itacounayiyo.

**Meje yabara xua wawūnaē ewatsiwa  
xua pocotsiwa Nacom yabara  
wanaca tsiwūnaē muxu dutsiwa**

<sup>9</sup>Tamonae pam, paxam pomonaē tapaca caantobe jiwichi pam. Bequein baxuan yabara paca tsipaebatsi, xua jiwi petautsiwatsi ichitha paca yabara yaputainchi xua jopa papentsim Nacom. Yaputan xua bara beta paexaname Nacom painya nepaca capanenebiyaexae. <sup>10</sup>Tsipei Nacom bara xainyeya exana. Nacom jopa paca yabara jūntemainae tsane pocotsiwan xua bayatha paexaname. Matautano jopa paca yabara jūntemainae tsane xua ichamonae painya neyawenaewa pomonaē irū pejume cowantsiwi Nacom. Baxua patsita itapeinya xeiname xua painya neantobexae Nacom. Baxuan caena bayatha paexanaponame, awiya cataunxuae baxuan paexanaponame. <sup>11</sup>Bequein baxua paexaname daichitha paichichipan xua daxita paxam awiya payawenaponaname ichamonae. Ajūntūyapusūya pawūnaē ewataponare pocotsiwa Nacom yabara paca tsiwūnaē muxu duta xua beya payacuiya werapaeya othopaename. <sup>12</sup>Jopa paichichipaeinyo xua payabara ajūntūcoyenefaetabim xua pawūnaē ewatame baxua tsipei jopa pana nayabara copatsim xua painya

neyabara yaputaewa tsane baxua. Jame maisa bara jūtiya paichiponaeinde, icha ichamonae ichi xua poxonae bichocono jume cowūnta Nacom. Matautano barapomonae jopa bepijawa aitaconaeyo xua wūnae ewata pocotsiwa Nacom yabara tsiwūnae muxu duta.

<sup>13</sup>Poxonae Nacom yabara tsiwūnae muxu duta Abrahamtha, Nacom pia wūnthā yabara tsiwūnae muxu duta Abrahamtha. Baxua Nacom pia wūnthā paeba tsipei dapon aibi pon bichocono ainya cui xua beyacaincha Nacom. Nacom ataya jume xainyei paeba daxota Nacom jopa icha wūnthā paebiyō.

<sup>14</sup>Nacom jeye Abrahamtha: “Bara xaniwaicha bichocono cayawenaeinchi. Jinya nemomoxi jiwi pia pemomoxi susato jiwi tatsi pinmonae exanaein”, jei Nacom. <sup>15</sup>Abraham abū saya beitatemaya wūnae ewatapona pocotsiwa Nacom yabara tsiwūnae muxu duta, jopa aitaconaeyo. Bapoxonae pirapae Abraham catatsi pocotsiwa Nacom bayatha yabara tsiwūnae muxu duta baponthā.

<sup>16</sup>Poxonae jiwi ba yabara natsiwūnae muxu duta xua pocotsiwa bepa pinae exaneibina, pewūnthā paeba, po wūn xua ichūn pewūn tatsi pon xua bichocono ainya cui beyacaincha xua barapomonae. Barapomonae baxua exana xua ichamonae peyaputaenexa xua bara xaniwaicha xainyeya peexaneibinexa pocotsiwa xua penayabara tsiwūnae muxu dubeibixae. Bapoxonae ichamonae jopa itacūpaetsi xua baxua yabara jume matsontsonoba barapomonaetha. <sup>17</sup>Nacom ichichipa xua tsita itapeinya xeina piamonaetha, pomonaetha pomonae pecatsixae tsane pia petsiwūnae muxu dutsiwa xua jopa equeicha ichawa nanta xeinae tsane xua pocotsiwa exanaena. Nacom ichichipa xua barapomonae peyaputaewa tsane

xua bapon xaniwaicha exanaena pocotsiwa bayatha yabara tsiwūnae muxu duta Abrahamtha. Daxota Nacom yabara tsiwūnae muxu duta pia wūnthā.

<sup>18</sup>Ainya coyenewabe Nacom exana po coyenewabe xua jopa itacūpaetsi xua ichawa yabara jume toxeinchiya exana. Meje baxue: Icha coyenewa Nacom yabara tsiwūnae muxu duta; icha coyenewano xua Nacom pia wūnthā yabara paeba xua pocotsiwa exanaena. Nacom jopa itacūpaetsi xua peyabara naerabiwa barapo naxobe coyenebe. Waxainchi pomonaetsi xua pentatsi po coyenein barapo nacue pia coyenein, po coyenein xua abe exanatsi naca cana exana. Matautano jume cowūntsiya wūnae ewatatsi xua Nacom wanaca yawenaewa tsane xua naca capanenebiya abe waexanae coyenewa weya. Barapocotsiwa bayatha naca yabara tsiwūnae muxu duta. <sup>19</sup>Waxainchi wūnae ewatatsi xua Nacom bexa naca capanenebiya tsane. Wajume cowūntsixae baxua daxota naca jūntū coyene ayapusū exana. Naca itacūpa xua wayabara jume cowūntsiwa. Wawūnae ewatsixae baxua naca yawena xua beta jinompatsi Nacom nexa. Baraxua icha be poxonae jera ichi xua tuwūthā babatabaruta pocotsiwa xua xota bichocono arewe xua jera beta perucuaenexa. Tsipei xaniwaicha wūnae ewatatsi pocotsiwa Nacom exanapaeba, baxua naca cana exana xua nacaewabatsi Nacomtha xua caemonae nanaexanatsi baponthā. Nacom itaboco beequiya, paparuwa peūma werena pia botha eca xua tututhiya xua pin botha ichaxota wapatsiwa tsane. <sup>20</sup>Jesús itaboco beicha naca tsiwūnae patopiya Nacom pexainya beicha tatsi. Bapon copiya bewa bara bepatopiyaena xua wanaca matakaponaenexa xua irū wanaca itacūpaewa tsane xua wapatsiwa tsane

bara beicha Nacomtha. Daxota poxonae baxua exana Jesús naexana pepa sacerdotepin icha matha Melquisedec ichi pon caena bayatha popona.

**Meje yabara xua Jesús pepa sacerdotepin naexana, icha matha Melquisedec ichi**

**7** Bapon Melquisedec caena bayatha Salem tomarapiwi itorobiya pia pepa peewatsinchi. Matautano bapon sacerdotepin pon petsipaebin Nacomtha jiwí nexa, pon Nacom xua itaboco beequiya. Abraham caibe nawirena xua poxonae nawabchuta xua poxonae yotaba ainya nacuanpiwi pomona jiwí itorobiya pia pepa peewatsiwichi xuano xua poxonae Abraham juteba barapomona. Bapoxonae Melquisedec matenta iya, Abraham matenta iyatsi. Melquisedec Abraham jeichichi: “Barabũ Nacom beta cayawenaena”, jei Melquisedec. <sup>2</sup>Abraham nota pocotsiwan xaina pomona jiwí itorobiya pia pepa peewatsiwichi xua peamanayabixae poxona juteba. Abraham ainyawan capana, xua diez xuanbe. Jiwana wetsatsaba tsiniya xua Melquisedec pecatsinexatsi sacerdotepinxae. Bapon Melquisedec hebreomona pijumetha yabara wun caunuta xua jei: “Bapon jiwí itorobiya pia pepa peewatsinchi pon xua beta peexanaein”, jei. Bapon Melquisedec Salem tomarapiwi itorobiya pia pepa peewatsinchi. Barichi barapo Salem wun hebreomona pijumetha yabara wun caunuta xua jei: “Jũntema popona”, jei. Daxota barapo naxobe wunbe yabara wun caunutatsi xua jeye: “Pon jiwí itorobiya pia pepa peewatsinchi xua beta peexanaein xuano xua jũntema popona”, jei xua hebreo jumetha. <sup>3</sup>Nacom Pejume Diwesitha Melquisedec paxa tatsi pewun jopa yabara yopitichi.

Matautano pena tatsi jopa yabara yopitichi. Barichi jopa yabara yopitichi pia pamo susato jiwí tatsi. Matautano bapon jopa yabara paebichi ichaxota naexana. Matautano jopa yabara yopitichi ichaxota bapon naxuba. Bapon apara sacerdotepin xua ataya tsitecaeya pon petsipaebin Nacomtha jiwí nexa. Bapon sacerdotepin xua ataya tsitecaeya icha ichi pon Nacom Pexanto tatsi pon pepa sacerdotepin.

<sup>4</sup>Payabara nanta xeinare xua bapon Melquisedec bichocono Abraham tsita ainya cuichi. Abraham pon wamo susatopin bapontha cata xua bayatha diez xuanbetha caewan jiwana wetsatsaba tsiniya. Baxua xua xuan Abraham cata apara xua bayatha yabara amanayaba pomonaetha pomona jiwí itorobiya pia pepa peewatsiwichi xua poxonae Abraham juteba. <sup>5</sup>Moisés pia peitorobi coyenewatha jeye: “Sacerdotepiwi pomona Leví pia pemomoxi susato jiwí tatsi, itacupatsi xua bara nota caewan pocotsiwa xua jiwí catsiba xua poxonae jiwí diez xuanbe caewan jiwana wetsaba pocotsiwan xua xuan xaina”, jei Moisés pia peitorobi coyenewatha. Barapo sacerdotepiwi baxuan exana barapo jiwitha yaitama piamona tatsi. Matautano exaneiba yaitama barapo jiwí Abraham pia pemomo susato jiwí tatsi icha barapo sacerdotepiwi ichi. <sup>6</sup>Ichitha Melquisedec jopa Leví pia pemomoxi susato jiwí tatsi. Bequein bapon jopa dapomonaeyo daichitha Abraham catsiba bapontha poxonae caewan jiwana wetsaba tsitsiniya daxita xua diez xuanbetha jiwanan. Abraham xaina peyabara tsiwunae muxu dutsiwan, po peyabara tsiwunae muxu dutsiwan bayatha Nacom yabara tsiwunae muxu duta. Bequein Abraham xaina po peitorobi coyenewa xua itacupatsi xua jeye ichamonaetha:



“Barabũ Nacom beta cayawenaena”, xua jei, ichitha Melquisedec baxua Abraham tsipaebatsi. <sup>7</sup>Jiwi ba yaputane xua ba bichocono ainya cui pon xua jeye: “Barabũ Nacom beta cayawenaena”, pon jei. Bapon bichocono ainya cui beyacaincha pon xua pebaraunchixaetsi. Daxota yaputainchi xua Melquisedec bichocono ainya cui beyacaincha xua Abraham tsipei Melquisedec tsipaeba Abraham xua Abraham tsipaebatsi. <sup>8</sup>Anoxuae po dapaethe sacerdotepiwi pomonae pomonaetha xua jiwi catsibeiba xua poxonae diez jiwana wetsabeiba, barapo sacerdotepiwi saya jiwi xua saya pewerapaewa tsane. Ichitha nama Nacom Pejume Diwesitha Melquisedec yabara paebatsi pon xua ataya tsitecaeya pepoponaein xua jopa petupaewa. <sup>9-10</sup>Metha jame be icha iche: Poxonae Abraham cata Melquisedectha poxonae caewan jiwana wetsaba diez xuanbe jiwana, bapoxonae cataunxuae abu Leví jopa naexanaeyo. Matautano Leví pia pexui tatsi cataunxuae jopa naexanaeyo. Barichi cataunxuae pia pemomoxi susato jiwi tatsi cataunxuae jopa naexanaeyo. Bapon Leví pon matapainya pepa sacerdotepin canamata canaexana poxonae cotacaya ichamonae irũ sacerdotemonae naexana. Bapoxonae sacerdotepiwi naexanumenapona. Bapon tsipaebeiba Nacomtha jiwi nexa. Poxonae Abraham catsiba Melquisedectha xua poxonae caewan jiwana wetsaba diez xuanbe Nacom be tsitatsi xua apara be Leví irũ cata xua irũ be bara Leví pia pemomoxi susato jiwi tatsi catsiba. Poxonae Abraham cata Melquisedectha xua diez xuanbe caewan jiwana wetsaba, bapoxonae yawa muxuna cata pia pemomoxi susato jiwi tatsi nexa bequein barapomonae jopa cataunxuae naexanaeyo.

<sup>11</sup>Sacerdotepiwi po sacerdotepiwi Leví canamata canaexana sacerdotepin, barapo sacerdotepiwi israelmonae catatsi Moisés pia peitorobi coyenewa tatsi. Daxita barapo sacerdotepiwi Aarón pia pemomoxi susato jiwi tatsi. Barapo sacerdotepiwi jopa itacupaetsi xua jiwi cana exanatsi xua penajuntũ coyene xanepana exanaewa Nacomtha xua penatsicuentisiwa yabara xua abe peexanaexae Nacomtha. Bequein sacerdotepiwi exanapona pocotsiwa itoroba barapo Moisés pia peitorobi coyenewatha ichitha awiya jopa itacupaetsi xua jiwi yawenatsi. Daxota jiwi equeicha canamatawenona icha sacerdotepin. Barapo sacerdotepin jopa bewa exanae icha Aarón pia pemomoxi susato jiwi tatsi jiwana ichi. Jame barapo sacerdotepin bewa exanaena icha Melquisedec ichi. <sup>12</sup>Poxonae Nacom icha sacerdotepin cana exana be pocotsin icha Melquisedec ichi bapoxonae yawa muxuna bewa exanaena pena peitorobi coyenewa. <sup>13</sup>Barapo pena sacerdotepin pon Wanacanamataxeinaein, bapon baxua yabara paebatsi Nacom Pejume Diwesitha. Bapon apara Israel pemomoxi susato jiwi jiwana pin pomonae jiwana xua doce po bicheitobe. Ichitha bapon naexana icha bicheito dena xua Judas pia bicheito dena po bicheito dena bayatha bapana jopa jiwana naexanaeyo sacerdotepin. <sup>14</sup>Daxita jiwi yaputane xua barapon pon Wanacanamataxeinaein naexana Judá barompaya pia pemomoxi susato jiwi dena tatsi. Poxonae Moisés yabara paeba sacerdotepiwi Moisés jopa yabara paebiyo xua Judá pia pemomoxi susato jiwi jiwana tatsi naexanaena sacerdotepin.

<sup>15</sup>Daxota waxainchi xaniwaicha bara yaputainchi xua barapo pena sacerdotepin naexana icha sacerdotepiwi

yaiwi, icha Melquisedec ichi pon pepa sacerdotepin.<sup>16</sup> Bapon Cristo jopa naexanaeyo sacerdotepin xua poxoru Moisés pia peitorobi coyenewatha pepaebixae xua Leví pia pemomoxi susato jiwi jiwana tatsi bewa naexanaena sacerdotepin. Jame apara Cristo sacerdotepin naexana Nacom pia peayapusu itorobi coyenewatha xua pexeinaexae peajuntucoyenesuwa po peajuntucoyenesuwa ataya tsiteca xua jopa itacupaetsi xua peweraweracaewa.<sup>17</sup> Nacom Pejume Diwesitha Cristo baxua yabara jeichichi: “Xam sacerdotepim naexaname ataya xua petsitecaenexa, barapo sacerdote yajiwim icha Melquisedec ichi xua sacerdotepin”, jei Nacom Pejume Diwesitha, xua Cristo yabara paebatsi.

<sup>18</sup>Nacom cana exana xua Moisés pia peitorobi coyenewa tatsi jiwi jopa canantawenonaeyo tsipei barapo coyenewa jopa xeinaeyo peayapusuwa xua jiwi cana exanatsi xua jopa pexeinaewa penatsicuentisiwa xua abe peexanaexae Nacomtha. Matautano jopa itacupaetsi xua jiwi pecanaexanaewatsi xua pecapanenebiwatsi abe pia peexanae cuiru coyene weya.<sup>19</sup> Barapo Moisés pia peitorobi coyenewa tatsi bapana jopa itacupaetsi xua jiwi juntu coyene xanepana exanatsi Nacomtha. Daxota anoxuae pena coyenewa xeinatsi xua ainya cui beyacaincha po coyene xua copiya. Barapo pena coyenewa naca cana exana xua wunaewatatsi pocotsiwa Nacom exanapaeba xua barapo pena coyenewaxae daxota anoxuae Nacom naca yaputane xua piamonaexae tatsichi.

<sup>20</sup>Nacom xainyeya yabara tsiwunaemuxu duta pia pewuntha xua Cristo naexanaena sacerdotepin xua ataya tsitecaeya. Jopa nama Nacom pia pewuntha yabara tsiwunaemuxu

dutsiyo xua sacerdotepiwi penaexanaenexa pomonae Leví pia pemomoxi susatopiwi tatsi.<sup>21</sup> Ichitha poxonae Cristo pon jiwi Pecanamataxeinaein sacerdotepin naexana, bapoxonae ichun, Cristo yabara paebatsi Nacom Pejume Diwesitha, jeye:

“Nacom pia pewuntha yabara tsiwunaemuxu duta, ichawa jopa toxecha yabara exanae tsane.

Poxonae Nacom yabara tsiwunaemuxu duta,

bapon jeye Pexantotha: ‘Xam sacerdotepim

xua ataya petsitecaenexa’, jei Nacom”,

jei ichun xua Nacom tapaebatsi

Nacom Pejume Diwesi.

<sup>22</sup>Poxoru Nacom tsiwunaemuxu duta xua Jesús naexanapaeba sacerdotepin daxota Nacom tsita itapeinya xeina xua exanaena xua bayatha paeba barapo pena coyenewatha.<sup>23</sup> Bayatha sacerdotepiwi pinmonae tsoponae. Ichitha barapo sacerdotepiwi naitapataya werapouneiba, yawa ichamonae naexana sacerdotepiwi. Dapon aibi barapo sacerdotepiwi jiwana pon itacupatsi xua pewetsiwa pia peexanae coyenewan tsipei daxita werapouneiba.<sup>24</sup> Ichitha poxoru Jesús ataya asu pepoponaexae daxota ataya tsitecaeya exanaena pia peexanae coyenewa icha pepa sacerdotepin ichi. Jopa nantawenonaeyo xua ichun Jesús pecoutha tanacuitatsi pon xuya sacerdotepin naexana.<sup>25</sup> Daxota bapon ataya tsitecaeya itacupatsi xua jiwi ataya pecapanenebiwatsi pomonae xua pepatsiwa tsane Nacomtha pomonae xua Nacom peyaputaewi pejume cowuntsi jiwixae Jesús. Jesús baxua exana ataya tsitecaeya asu pepoponaexae xua pewucaenexa Nacomtha xua barapo jiwi peyawenaenexatsi.

<sup>26</sup>Nacom tsita xanepanatsi xua Jesús pepa sacerdotepin naexana

xaniwaicha, po sacerdotepin wacana-matawenonaexae. Yatsicaewa bapon bichocono pejuntũ coyene xanepanaein Nacomtha. Bapon Jesús jopa abe exanaeyo ichamonaetha. Nacom tsitatsi xua Jesús jopa natsicuentisiyo poxoruru abe jopa exanaeyo Nacomtha. Bapon Jesús seicaya exana ducuaenaebiya. Jopa exanaeyo icha be ichi pomonae abe peexana dubenanaebiyaewi. Bapon Jesús Paxa capoinchi po itaboco tajũ beicha po itaboco beyacaincha xua necoichatsi xua Jesús barapo itaboco beicha Paxa ainya cui exanatsi. <sup>27</sup> Pepa sacerdotepiwi ba bewa exaneibina po coyene xua duwei jutebeiba iboto matatsuntha xua tuxusi exaneiba Nacom nexa, daxita matacabintha tsaibi. Baxuan nata exaneiba copiya abe pia peexanae coyenewan nexa. Bapoxonae cotacaya jivi taexaneibatsi abe pia peexanae coyenewan nexa. Nama Jesús jopa barichiyo. Nama seicayiya icha coyeneya exana. Bapon Jesús pia pepon nata caenaeta xua tupa exanatsi saya bara cae cui coyenetha daxita carepaya jivi nexa xua jivi abe pia peexanae cuiru coyenewan tatsi nexa. <sup>28</sup> Moisés pia peitorobi coyenewa tatsi canacui coyene exanatsi xua bara saya jivi naexana pepa sacerdotepiwi. Barapo pepa sacerdotepiwi abe exana xua saya pecui pawĩ. Barapomonae jopa pejuntũ cui coyene xanepanae jivi Nacomtha. Ichitha Nacom yabara tsiwũnae muxu duta pia wuntha xua Pexanto cana exana pepa sacerdotepin, po sacerdotepin yatsicaewa ataya tsitecaeya bichocono pejuntũ coyene xanepanaeinxae Nacomtha. Baxua Nacom exana xua yabara tsiwũnae muxu duta xua pepuya weya tatsi poxonae Moisés catatsi peitorobi coyenewa.

### Meje yabara xua Jesús pon pejume yawenaein jivi Nacomtha

**8** Anoxuae xua pocotsiwa xua bichocono peainya cui coyenewa meje baxue: Waxainchi xeinatsi yatsicaya pepa wasacerdotepin, pon yatsicaewa bichocono pejuntũ coyene xanepanaein Nacomtha xuaunxuae yabara paca tsi-paebatsi. Bapon eca pia peitupanae ecaethopaewatha Nacom pia pecoxa weya tatsi, peitabocotha. <sup>2</sup> Anoxuae Jesús nacuita Nacom pia xanthe-icha tatsi po penacuichi coyeneya sacerdotepiwi exana Nacom pia botha tatsi xua itabocotha. Barapo bo yatsicaewa Nacom pia pexainyei bo tatsi ichaxota popona xua itabocotha. Nacom pon jivi Pecanamataxeinaein exana barapo bo. Jivi jopa exanaeyo barapo bo.

<sup>3</sup> Nacom daxita carepaya pepa sacerdotepiwi yabara tsiwũn dubatsi xua jivi petaexanaenexa tsaibi tsainchi po coyene pocotsiwa xua jivi amanaya pecatsiwa Nacomtha. Matautano barapo pepa sacerdotepiwi yabara tsiwũn dubatsi xua jivi petaexanaenexa tsaibi tsainchi po coyene xua duwei pejutebiwa pocotsi duwein xua jivi amanaya pecatsiwa Nacomtha xua abe peexanaexae. Daxota Jesús irũ bewa bara ichiya exanae xua Nacom taexanatsi ichi sacerdotepiwi ichi poxonae Nacom taexanatsi. <sup>4</sup> Icha metha barapo dapaetha Jesús poponaetsipa barapo irathe poxonae irũ jinompa barapo sacerdotepiwi po sacerdote Aarón yaiwi jopa itacupaetsipaetsi xua cana exainchi pepa sacerdotepin. Tsipei cataunxuae barapo irathe sacerdotepiwi yaiwi exanapona pocotsiwa Nacom nexa xua Moisés pia peitorobi coyenewatha pecui itorobixae. <sup>5</sup> Ichitha barapo sacerdotepiwi tanacuita be pocotsiwa

xua saya penajupae coyenewa xua jopa pexainyei coyenewa. Pocotsiwa jame xua pexainyei coyenewa, baxua jame Jesús exana peitabocotha. Pocotsiwa xua barapo sacerdotepiwi tanacuita saya be penajupae coyenewa ichitha xaniwaicha jopa najupaeyo xua be pocotsiwa Jesús exana peitabocotha. Baxua yaputainchi poxonae Nacom Moisés tsipaebatsi. Poxonae Moisés muxu pecuaranotsi anseraboco xua ichaxota jiwi wunae jainteibina Nacomtha bapoxonae Nacom Moisés tsipaebatsi. Nacom jeye: “Yabara nanta xeinare xaniwaicha xua daxita beta neexanaenexa anseraboco xua bayatha pocotsiwa yabara catsita itapeinya xeinatsi demxuwatha. Barapocotsi anserabocotontha seicaya jiwi newunae jainchina”, jei Nacom. <sup>6</sup>Nama Cristo, yatsicaya pon wasacerdotepin, bapon exana itaboco beicha pocotsiwa xua yatsicaewa bichocono peainya cui coyenewa. Barapo coyene bichocono ainya cui beyacaincha po coyenewa xua peru coyenewa xua po coyeneya icha sacerdotepiwi exaneiba barapo irathe. Cristo jiwi yabara jume yawenatsi Nacom beicha xua jiwi pepatsinexa Nacomtha. Barapo pena coyenewa Nacom yabara tsiwunae muxu duta xua bichocono wunae beyacaincha barapo peru coyenewa po coyenewa pocotsiwa sacerdotepiwi exaneiba. Barapo pena coyenewa jiwi juntũ coyene xanepana exanatsi Nacomtha. Ichitha barapo peru coyenewa jopa daichiyo.

<sup>7</sup>Bayatha peru petsiwunae yabara muxu dutsiwa Nacom Moisés yabara tsiwunae muxu dutatsi. Icha barapo coyenewa xeinaetsipa peayapusuwa xua daxota jiwi beta juntũ coyene xanepana exanatsi Nacomtha, metha jopa nantawenonaetsipae icha pena petsiwunae muxu dutsiwa. <sup>8</sup>Ichitha Nacom tane xua barapo jiwi jopa

pejuntũ coyene xanepanae jiwi bapontha poxonae barapo peru peyabara tsiwunae muxu dutsiwa xeina. Daxota ichun Nacom Pejume Diwesitha jeye:

“Nacom jeye: Maticabin othopaena, po maticabintha

pena petsiwunae muxu dutsiwa ex-  
anaein Israel

nacuapiwi pia pemomoxi susato jiwitha  
tatsi

iru Judea nacuapiwi pia pemomoxi  
susato jiwitha tatsiru.

<sup>9</sup>Jopa bara juta coyeneya ichin tsane  
poxonae

matha icha ichin painya amo susato  
jiwitha.

Barapo coyene barapomonaetha catan  
poxonae

matacaponan Egipto nacua weya.

Daichitha barapomonae jopa nacui  
yabara

wunaetsiyo xua peexanaenexa  
pocotsiwa

itoroban poxonae catan barapo  
peyabara

tsiwunae muxu dutsiwa  
barapomonaetha.

Daxota barapomonae punapentan, xua  
jopa

tayawenaewa tsane, jei Nacom”, jei  
ichun.

<sup>10</sup>Equeicha ichun jeye:

“Nacom jeye: Barapo peyabara tsiwunae  
muxu

dutsiwa Israel nacuamonaetha, poxonae  
barapo

maticabin wetsina bara baxua exanaein.  
Janje: Jiwi pejuntũ coyenewatha

ichaxota

nanta xeina taitorobi coyenewa baxota  
dubin.

Bapoxonae barapomonae neyaputaena  
yawa

nejume cowantsiya jejei tsane.

Tacoutha barapomonae pia Nacom

tatsi naexanaein.

Barapomonaē tamonaē naexanaena.

<sup>11</sup>Dapon aibi pon bewa cuidubina ichuntha xua

xan yabara, xuano xua cuidubina pia jitontha

xua xan yabara, matautano xua cuidubina

peweicho xua xan yabara

petana neyaputaewanexa tsane.

Jopa bewa cuidubi tsane barapomonaē tsipei

daxita jiwi neyaputaena pomonaē pecui pawī

jiwi, iruno pomonaē peainya cui jiwi.

<sup>12</sup>Xan barapomonaē cui yabara jūnteminaein

abe pia peexanaē cuiru coyenein tatsi, xua

jopa pexeinaewa tsane xua tana netsita natsicuentaē xua abe peexanaewaxae.

Bapana ataya equeicha jopa yabara nanta

xeinaein tsane barapo abe peexanaē cuiru coyenein, jei Nacom”, jei ichun

Nacom Pejume Diwesitha xua saya

Nacom tapaebatsi.

<sup>13</sup>Nacom yabara paeba pena peyabara tsiwūnaē muxu dutsiwa tsipei po peyabara tsiwūnaē muxu dutsiwa copiya Moisés yabara tsiwūnaē muxu dutatsi saya peru jume. Pocotsiwa ba peru coyenewa ba saya weraweraca. Daxota barapo peru peyabara tsiwūnaē muxu dutsiwa saya irū weraweraca.

**Meje yabara xua Nacom pin pia bo tatsi po bo xua itabocothēicha uncuā xuano irurū po bo xua po irathe tsique uncuā**

**9** Nacom copiya Moisés yabara tsiwūnaē muxu dutatsi. Barapo peyabara tsiwūnaē muxu dutsiwa peitorobi coyenein xeina xua pocotsi coyeneya israelmonaē bewa exanaena poxonaē nacaetuta xua wūnaē

pejainchinexatsi Nacom. Matautano barapo peyabara tsiwūnaē muxu dutsiwa itoroba xua jiwi xeina po bo xua Nacom pia bo tatsi xua po irathe.

<sup>2</sup>Barapo Nacom pia bo jiwi exana duwein pebocoton xua be anseraboco. Barapo anseraboco ainya tutube xeina. Po tutu copiya dena pewūn: “Nacom pia tutu po tutu ainya cui tutu xua jopa pexeinaewa peabe cuiru”, jei. Barapo tututha uncuā penainto po penaintotha itanatanota penasiwa. Matautano barapo tututha uncuā xua pexaethopaewa po pexaethopaewatha xua baxota jeba pan, po pan xua Nacom catatsi.

<sup>3</sup>Paparuwa xua dutsica barapo paparuwa peūma werena icha tutu xeina po tutu pewūn: “Yatsicaewa Nacom pia tutu po tutu bichocono pepa peainya cui tutu xua jopa xeinaeyo peabe cuiru”, jei. <sup>4</sup>Barapo tututha uncuā xua be pecaxaethopaewa xua ꞥ penainto xua oro wūn nainto. Baraxota yūbeibiya tauteibathopa petuxueiwa po petuxueiwa tuxusi tuxuei benata poxonaē tauta. Matautano barapo tututha uncuā xua be caja po caja pewūn: “Nacom pia peyabara tsiwūnaē muxu dutsi caja”, jei. Barapo caja peūma weya daxita matapaeicha caxueba oro naintontha. Barapo caja juntututha eca coroto xua oro nainto. Barapo corototha tsijuntutu boca po pexaewa pewūn maná matawūn xua itaboco pia pexaewa. Matautano barapo caja juntututha boca penacobenababi naewa po penacobenababi naewa bayatha Aarón xeina. Barapo naewa bayatha Nacom xuwa exana xua tsiwixi pirururūjei poxonaē pexeinya petsita itutsi coyene exana pia peayapusū itorobi coyenyatha. Matautano barapo caja juntututha bobena iboton po ibotontha mata tinaduba Moisés pia peitorobi coyenewa. <sup>5</sup>Barapo caja pemata xatatsiwa jumatha nacueyatabe

ecabe ainya querubinbe matawunbe xua jumope canaxobiya exana oro naintotha, ponbe be matatsunpinbe. Barapo ainya querubinbe matawunbe yabara caunuta xua Nacom baxota eca. Barapo ainya querubinbe matawunbe naitama taecabe yawa nacuarafe yeyetecabe xua itata barapo caju pemata xatatsiwa. Matautano irabe tayecarecabe ichaxoya pejana nunubabareca po jana duwein jana. Barapo duwein sacerdotepin bexuba jiji abe pia peexanae cuiru coyenein tatsi nexa. Anoxuae baxua yabara equeicha jopi bepaca tsipaebichi.

<sup>6</sup>Daxita nacui wunaeta pocotsiwa xua barapo tutubetha nexa. Bapoxonae sacerdotepiwi jojoneibeibiya daxita matakabi po tututha xua copiya dena. Barapo sacerdotepiwi barapo tututha exaneiba pia penacuichiwa. <sup>7</sup>Ichitha nama po tutu dabeya saya meisa joniyeiba pon pepa sacerdotepin xua saya caetha tsaibi xua daxita weithan tsaibi. Poxonae barapo pepa sacerdotepin barapo tutu iya joniya bewa nata cajoniyaena duwein jana. Barapo jana nunubaba ichaxota querubinbe matawunbe itabarayo deca xua bapon abe pia peexanae cuiru coyenewan tatsi nexa xuano xua iru jiji abe pia peexanae cuiru coyenewan tatsi nexa xua poxonae jiji jopi nacui yabara yaputaeyo. <sup>8</sup>Peyabara exanaewa daxita baxuan Nacom pia Pejumope tunaxu tatsi naca cuiduba xuaje: Poxonae cataunxae sacerdotepiwi taexana dubenanaebiya Nacom po tututha xua copiya dena, jiji jopi copatsichi xua pata po tutu dabeya ichaxota Nacom popona. <sup>9</sup>Daxita pocotsiwan barapo anserabocototha caena bayatha exana yabara caunuta xua anoxuae wayabara yaputaenexa baxua xua pocotsiwa anoxuae exana. Jiji Nacom wuna jainteibatsi poxonae

sacerdotepin exaneiba pocotsiwa xua jiji pecatsiwa Nacomtha xuano xua poxonae exaneibano xua duwei pejutebiwa xua tuxusi exana Nacom nexa. Bara bequein jiji baxua exaneiba ichitha cataunxae pia juntu coyenein tatsi cana exanatsi xua awiya yabara nanta xaina dubenanaebiya abe pia peexanae cuiru coyenein tatsi. Barapo coyene po coyene jiji exana jopi beta juntu coyene xanepana exanaetsi xua jopi penatsicuentisiwa tsane Nacomtha xua abe peexanae. <sup>10</sup>Barapo peru peitorobi coyenewa xua Moisés pia peitorobi coyenewa tatsi jiji jopi yawenaetsi xua penajuntu coyene xanepana exanaewa Nacomtha. Saya apara yabara paeba xua jiji bewa pocotsiwa xaibina poxonae nabaneiba, matautano xua xuan pocotsiwa bewa apeibina. Matautano jiji itorobatsi xua po coyenein yabara xua jiji beta penaperu xainwaetsiya nowaewa yabara pia wuna jainteibichi Nacom. Barapo coyenein xua saya jiji bewa cana exanae pia pepontha beya xua anoxuae Nacom pena coyenewa equeicha exana.

<sup>11</sup>Nama Cristo patopa pon pepa sacerdotepin. Bichocono yatsicaewa pexeinya coyenewa xua pena coyenewa nacata capatopa po coyenewa xua anoxuae waxainchi xeinatsi. Po tutu ichaxota bapon nacuiteiba icha pepa sacerdotepin ichi xua itabocotoheicha bichocono wuna tsipei Nacom daxita matapaeicha wetsiya exana. Barapo tutu bichocono wuna beyacaincha po tutu ichaxota sacerdotepiwi tanacuita Nacom xua barapo cae pin nacuathe. Jiji jopi acabiyo barapo tutu xua itabocotoheicha tsipei barapo tutu jopi apara po cae pin nacuathe tsique nexiyo. <sup>12</sup>Cristo joniya ichaxota yatsicaewa Nacom pia xantha. Bara xoteicha Cristo jopi caponaeyo duwein

jana po duwein pewn chivo, xuano xua vaca jana jopa caponaeyo xua penen jana, xua pebto jana. Saya jame Cristo Nacom tsita itutatsi xua bapon jiji tsitupatsi xua abe pia peexanae coyenewan tatsi. Bapon Cristo saya bara cae coyenewatha joniya baxoteicha xua daxita carepaya jiji nexa. Daxota bapon Cristo bara ataya tsitecaeya naca capanepa. <sup>13</sup>Sacerdotepiwi ba nota vaca pebton pia pejanan, yawa chivo pia pejana xuano ipuna xua poxona tautatsi vaca pesowatiyo peweinyo. Sacerdotepiwi mata wenunubaba jiji daxita baxuantha pomonaetha pomonae xua abe peexanae cuiru coyenein peexanaewixae. Bara bapoxonae barapo coyene jiji itacupatsi xua cana exanatsi xua jopa penataxobiwa pia pepontha bequein awiya xaina penatsicuentisiwa. <sup>14</sup>Bequein bara baxuan barapo jiji tsiwiyo yawenatsi xua jopa petaxobiwatsi pia pepontha ichitha nama Cristo pia pejana tatsi barapomona bichocono yawenatsi. Cristo pejana bichocono peayapusu coyenewa xaina beyacaincha xua duwein pejana. Nacom pia Pejumope tunaxu tatsi po jumope ataya tsitecaeya popona barapo pejumope tunaxu tatsi Cristo yawenatsi poxonae saya Cristo nayabara cui copata xua bara pebexubinexatsi poxonae pejana pichapabarena pewan weya petupaewatha. Bapon Cristo jopa bapana exanaeyo peacoyenebewa. Cristo wanaca tsitupaexae Nacom naca juntu coyene xanepana exana. Daxota Nacom jopa tsita natsicuentichi abe waexanaexae. Wajuntu coyene equeicha jopa yabara wanaca tsipaebinexa abe waexanae coyene. Daxota jopa bewa ponae tsainchi ichaxota ataya atene tsaibi pomonae jopa pejume cowantsiwi. Anoxuae jame naca itacupa xua ajuntusuya taexana

dubenanaebiyatsi Nacom pon xua ataya tsitecaeya asu pepoponaein.

<sup>15</sup>Daxota bapon Cristo naexana pon nacata paeba Nacomtha yawa pon naca tsipaeba Nacom nexa. Bapon Cristo nacata catsica Nacom pia pena peyabara tsiwunae muxu dutsiwa tatsi. Bapon naca cana exana xua daxitatsi caemonae naexanatsi Nacomtha. Poxonae naca tsitupa Nacom yabara juntemaina abe peexanae cuiru coyene po peabe exanae cuiru coyenein xua jiji caena bayatha exana poxonae cataunxuae exanapona po coyene bayatha Nacom Moisés yabara tsiwunae muxu dutatsi xua peru peyabara tsiwunae muxu dutsiwa. Daxita pomonae Nacom pewabixae barapomonae catsibinchi peajuntuyapusuwa po peajuntuyapusuwa xua ataya tsitecaeya tsane xua bayatha Nacom peyabara tsiwunae muxu dutsixae barapomonaetha. <sup>16</sup>Poxonae pebin ba ichichipa cata pia pecopiniwa ichamonaetha xua poxonae tupaena, copiya matha yabara caununaya wun tinaduba paperatha pomonae xua pecopiniwa xainaewa tsainchi. Pomonae xua pecopiniwa xainaewa tsainchi barapomonae bewa tsita itapeinya xainaena xua barapo pebin xaniwaicha bara tupa xua poxonae beya pewunaeya tsane xua pecopiniwa notsinexatsi pon xua tupa. Bapoxonae barapomonae bara itacupatsi xua pexeinaewa pocotsiwa xua bapon xaina pon tupa. <sup>17</sup>Barapo papera, po paperatha bayatha pebin nacopiniwa yabara jume tinaduba cataunxuae jopa ainya cuiyiyo poxonae abu cataunxuae bapon popona tsipei jopa copiniwa notichi barapomonae. Saya jame poxonae bapon yatsicaewa tupa bapoxonae jame ainya cui barapo papera, tsipei barapomonae itacupatsi xua pexeinaewa tsane pocotsiwa

bapon xeina. <sup>18</sup> Barichi barapo copiya peyabara tsiwūnae muxu dutsiwa. Pewūnaeya tsane xua poxonae jiwi xeinaena pocotsiwa bayatha Nacom Moisés yabara tsiwūnae muxu dutatsi sacerdotepin bewa matha duwein bexubina xua bapoxonae barapo coyene jiwi pexeinaewa tsane. <sup>19</sup> Moisés daxita pia peitorobi coyenewan yabara paeba daxita jiwitha. Nexata bapon pena xua oveja na xua tsobia naewiyotha opi yarabaxuba, po naewiyotha pewūn hisopo naeyo. Bapon mene muxunaxuba vaca jana poyo peweinyo pebtiyo xuano xua muxunaxuba chivo jana. Bapoxonae baxuan bapon Moisés nūnūbaba Nacom Pejume Diwesitha. Matautano daxita jiwitha mata wenūnūbaba. <sup>20</sup> Bapoxonae Moisés daxita jiwitha jeye: “Barapo jana po janatha paca mata wenūnūbabatsi apara Nacom itoroba xua tapacata exanaewatsi tsainchi. Baxua paca tsita itapeinya xeina xua Nacom xaniwaicha bara pacata exanaena pocotsiwa pia peyabara tsiwūnae muxu dutsiwa”, jei Moisés. <sup>21</sup> Barichino Moisés exana xua anseraboco mata wenūnūbaba pejanatha. Matautano muxuna mata wenūnūbaba xua xuan barapo anserabocotha tututha umena pocotsiwan sacerdotepiwi canacuiteiba poxonae jiwi nacaetuteiba xua Nacom wūnae pejainchinexatsi. <sup>22</sup> Moisés pia peitorobi coyenewantha tatsi itoroba xua bara imoxoyo daxita coyeneinthu bewa pejanantha mata wenūnūbabi xua daxita baxuan Nacom jopa petsita nataxobinexatsi. Nacom jopa yabara jūntemainaeyo jiwi abe pia peexanae cuiru coyenein tatsi icha jopa pejana epa-epacaeyo xua barapo jiwi nexa.

**Meje yabara xua Cristo tsitupa  
jiwi abe pia peexanae  
cuiru coyenewan tatsi**

<sup>23</sup> Sacerdotepiwi bewa jutebina duwei pemata wenūnūbabinexa pejanatha anseraboco. Bapoxonae Nacom petsita xanepanaenexatsi xua jopa nataxobiyo barapo anseraboco xuano xua xuan tututha umena. Barapo coyene saya yabara caunuta xua yatsicaewa pepa coyenewa Cristo exana peitabocotha. Ichitha nama barapo yatsicaewa pepa coyenewatha peexanaenexa peitabocotha jame bewa pejana epa-epacae pejana pon pejūntu coyene xanepanaein pon peainya cuin pia pejana tatsi xua Nacom tsita jiwi xanepanatsi xua jopa penatsicuentisiwa xua abe peexanaexae Nacomtha. Barapo jana bichocono ainya cui beyacaincha duwein jana po jana xua sacerdotepiwi nūnūbaba po cae pin nacuathe. <sup>24</sup> Poxonae Cristo joniya Nacom pin pia botha tatsi xua itabocotha jopa joniyaeyo po bo saya jiwi exana po cae pin nacuathe xua Nacom pin pia bo tatsi. Barapo bo xua Nacom pin pia bo saya yabara caunuta xua yatsicaewa peitabocotha xeina pepa Nacom pin pia bo tatsi. Jame Cristo joniya Nacom pin pia botha tatsi, xua Nacom pia nacuatheichu tatsi xua itabocotha. Baxoteicha anoxuae Cristo naituta Nacomtha xua wanacata tsipaebinexa Nacom peitabaratha. <sup>25</sup> Pon pepa sacerdotepin bewa joniyaena bara saya caetotha tsaibi xua daxitan weithan tsaibi ichaxota po tutu yatsicaewa Nacom pia tutu xua po tutu bichocono yatsicaewa peainya cui tutu xua barapo anserabocotha. Barapon pejana capaneiba barapo tututha xua duwein jana xua jopa barompaya pia pejana tatsi. Nama Cristo jopa nantawenonaeyo xua nayabara cui



copata xua matowa tupa pecana exanaewatsi xua jiji abe peexanae cuiru coyenein tatsi nexa. <sup>26</sup>Icha baxua tsipae bapoxonae bapon matowa tupa exaneibichipatsi xua bexubeibatsi xua poxonae Nacom aena barapo cae pin nacue forota xua beya anoxuae. Ichitha nama anoxuae weta xua peru dapae tsipei bapon Cristo patopeica barapo cae pin nacuathe petupaenexa xua saya bara cae coyenewatha ataya petsitecaenexa tsane. Bapon Cristo naetotha tsitupa jiji xua Nacom jiji peyabara cui junteinaenexatsi abe pia peexanae cuiru coyenein tatsi. <sup>27</sup>Daxita jiji ba werapouneibina saya caetotha. Bapoxonae pirapae Nacom yabara paebina daxita jiji xua penatsicuentisiwa xua abe peexanaexae. <sup>28</sup>Barichiru, icha jiji ichi Cristo saya caetotha tsitupa jiji pinmonae, xua Nacom jiji abe pia peexanae cuiru coyenein tatsi pecayabara junteinaenexa tsainchi. Equeicha bexa tsane patopeicaena po cae pin nacuathe. Jopa tsipatopeicae tsane xua equeicha petsitupaewa tsane jiji abe pia peexanae cuiru coyenein tatsi. Jame tsipatopeicaena xua pecapanenebiyaenexa pomonaetha pomonae pia pewnae ewatsi jiwixaetsi xua bapon pepatopaewa po cae pin nacuathe tsique.

**10** Moisés pia peitorobi coyene tatsi, baxua saya yabara caunuta xua yaputane wanaca exanaenexa po coyene xua wuna po coyene xua bexa Nacom exanaena itabocotha. Barapo coyene, jopa pepa coyenewiyo poxoru jopa jupaeyo po coyene xua Nacom yatsicaewa xeina itabocotha. Moisés pia peitorobi coyenewa tatsi jopa itacupaetsi xua jiji pejuntu coyene xanepana exanaewatsi Nacomtha pomonae wuna jainteiba Nacom. Bequein

pepa sacerdotepiwi daxita weitha exaneiba xua duwei jutebeiba jiji abe pia peexanae cuiru coyenein tatsi nexa daichitha cataunxuae jopa itacupaetsi xua jiji juntu coyene xanepana exanatsi xua jopa pexeinaenexa xua penatsicuentisiwa xua abe peexanaexae Nacomtha. <sup>2</sup>Icha Moisés pia peitorobi coyene tatsi jiji juntu coyene xanepana exanaetsipatsi Nacomtha bapoxonae sacerdotepiwi jopa equeicha nantawenonaetsipae xua equeicha pejutebeibiwa duwei jiji abe pia peexanae cuiru coyenein tatsi nexa. Icha jiji caetotha juntu coyene xanepanaetsipa Nacomtha, bapoxonae jiji jopa natsicuentisiwa xua abe peexanaexae Nacomtha. <sup>3</sup>Ichitha poxonae barapo sacerdotepiwi jutebeiba duwei jiji abe pia peexanae cuiru coyenein tatsi nexa bequein baxua exana cataunxuae jiji cana exanatsi xua yabara jantanaina barapo abe pia peexanae cuiru coyenein tatsi. Jiji yabara jantanaineiba baxuan daxita weitha poxonae duwein jutebeibatsi barapo jiji nexa. <sup>4</sup>Vaca pebto pia pejana tatsi yawa chivo pia pejana tatsi jopa bapana jiji juntu coyene wenotichi abe pia peexanae cuiru coyenein tatsi xua jopa penatsicuentisiwa nexa Nacomtha xua abe peexanaexae.

<sup>5</sup>Daxota poxonae Cristo patopa po cae pin nacuathe tsique, Cristo jeye Nacomtha:

“Xam jopa ichichipaem po coyene xua duwein

pebexubiwa jiji abe pia peexanae cuiru coyenein tatsi nexa.

Matautano jopa ichichipaem xua po coyenein

xua jiji amanaya necacatsiwa.

Jame pebaxuanexa yatsicaewa pepa jiton necana exaname xua naexanan, tatsitupaenexa jiji abe pia peexanae

cuiru coyenein tatsi nexa.

<sup>6</sup>Xam jopa cajuntũ coyene weiweina exanaeyo poxonaē duwein ompin tautatsi xuano xua pexaewa tauta petuxusi exanaenexano xua xam neyabara jũntemainaenexa jiwi abe pia peexanae cuiru coyenein tatsi.

<sup>7</sup>Bapoxonaē xan Cristo, janje: ‘Xam Tanacom. Xan xote po nacuathe patopeicanje taexanaenexa xua pocotsiwa ichichipame be pocotsi coyeneya necui yabara tina jinya diwesitha’, jan”, jei Cristo.

<sup>8</sup>Copiya Cristo paeba xua jeye: “Xam jopa ichichipaem yawa jopa cajuntũ coyene weiweina exanaeyo po coyene xua poxonaē jiwi bexuba duwein xuano poxonaē exaneiba po coyene poxonaē jiwi amanaya cacatsibeiba. Matautano jopa ichichipaem poxonaē duwein ompin tautatsi xua jiwi abe pia peexanae cuiru coyenein tatsi nexa”, jei Cristo. Baxua Cristo paeba tsipei Moisés pia peitorobi coyenewatha itoroba xua jiwi bewa exanaena barapo coyenein Nacom nexa. <sup>9</sup>Equeicha bapoxonaē Cristo cotacaya jeye: “Xan xote po cae pin nacuathe patopeicanje taexanaenexa pocotsiwa ichichipame”, jei. Poxonaē Cristo baxua caunutsiya paeba copiducua cana exana po coyene peru coyene. Cristo anoxuae equeicha pecoutha pena coyene exana poxonaē naetotha tsitupa jiwi abe pia peexanae cuiru coyenein tatsi. <sup>10</sup>Nacom naca jũntũ coyene xanepana exana wanaca cana exanaenexa piamonaē tatsi poxoru Jesucristo exana pocotsiwa Nacom peichichipaexae. Jesucristo pia pepon nacaenaeta Nacomtha xua naetotha petsitupaenexa daxita jiwi abe pia peexanae cuiru coyenein tatsi xua bara cae

coyenewatha xua ataya petsitecaenexa tsane.

<sup>11</sup>Daxita sacerdotepiwi pomonaē judiomonaē daxita matacabi exaneiba xua duwein pebexubiwa, bequein barapo coyenewa jopa itacupaetsi xua jiwi jũntũ coyene wenotatsi abe pia peexanae cuiru coyenein tatsi. <sup>12</sup>Nama Jesucristo bara cae coyenewatha exana poxonaē naetotha tsitupa jiwi abe pia peexanae cuiru coyenein tatsi, xua bara ataya tsane. Poxonaē Cristo baxua nacui weta Nacom pia pecoxatheicha tatsi equiya xua itabocothaicha. <sup>13</sup>Baxoteicha Cristo abũ ewata beya poxonaē abũ tsane poxonaē Nacom cana exanaena xua Cristo cana exanaeinchi xua pecanamataxeinaenexa pia peaitafaetabi jiwichi. <sup>14</sup>Cristo piamonaē jũntũ coyene xanepana exana xua ataya tsane poxonaē naetotha tsitupa cae coyenewatha. Barapomonaē pomonaē xua Nacom tsitatsi xua jopa xeinaeyo penatsicuentsiwa pomonaē piamonaexae tatsi. <sup>15</sup>Nacom Pia Pejumo pe tunaxu tatsi baxua yabara irũ naca tsipaeba bayatha Nacom Pejume Diwesitha, jeye:

<sup>16</sup>“Matacabin othopaena po matacabintha xan tayabara tsiwũnae muxu dutsiwa xua pena coyenewa exanaein barapomonaetha. Jiwi pia jũntũ coyenewantha xua ichaxotanta xeina taitorobi coyenewa baxota dubin”, jei Nacom pia Pejumo pe tunaxu tatsi.

<sup>17</sup>Bapoxonaē equeicha Nacom pia Pejumo pe tunaxu tatsi jeye: “Bapana ataya equeicha jopa yabara jũntanainaēin tsane jiwi abe pia peexanae cuiru coyenein tatsi”, jei Nacom pia Pejumo pe tunaxu tatsi, Nacom Pejume Diwesitha.

<sup>18</sup>Daxota poxonaē Nacom yabara jũntemaina jiwi abe pia peexanae

cuiru coyenein tatsi, equeicha jopa nantawenonaeyo xua jiwi duwein pebexubiwa xua tuxusi exana Nacom nexa xuano xua po coyene exaneiba xua po coyene Nacom amanaya pecatsibeibiwatsi.

**Meje yabara xua waxainchi bewa wajuntũ coyeneyatha nanta xeinaetsi xua bara apara imoxoyo itiya jinompatsi Nacom**

<sup>19</sup>Tamonae pam, daxota anoxuae naca itacupa xua jopa junuwiya patsi tsainchi itabocothicha ichaxota yatsicaewa Nacom pia tutu, po tutu bichocono peainya cui tutu. Daxota baxua naca itacupa tsipei Nacom yabara copata xua bara Jesucristo naca tsiwanaya patopa barapo tututha pejana pichapabarenaexae poxonae naetotha naca tsitupa. <sup>20</sup>Anoxuae naca itacupa xua wapatsiwa Nacomtheicha pena juntũ coyene waxeinaexae po pena juntũ coyene ataya ayapusũ xua poxonae Cristo wanaca tsitupaexae. Baraxua be poxonae metha Cristo nacata pataxubichipa paparuwa po paparuwa yacaincha ducua Nacom pia tutu po tutu yatsicaewa peainya cui tutu. Daxota joniyaieinchi wajinompaenexa Nacomtha. <sup>21</sup>Bapon Jesús, yatsicaewa wasacerdotepin, pon canamataxeina Nacom pia bo tatsi xua itabocothicha. <sup>22</sup>Daxota bewa wajuntũ coyeneyatha nanta xeinaetsi xua bara apara imoxoyo itiya jinompatsi Nacom, xua yatsicaewa xainyeya wajuntũ coyene xanepanaexae bapontha. Matautano bewa wajuntũ coyeneyatha nanta xeinaetsi xua bara apara imoxoyo itiya jinompatsi Nacom xanepanaya wajume cowantsiya jinompaexae. Matautano bewa wajuntũ coyeneyatha nanta xeinaetsi xua bara apara imoxoyo itiya jinompatsi Nacom tsipei jopa juntũ coyene auratsi xua jopa watsita

natsicuentisixae xua abe waexanaexae. Matautano bewa wajuntũ coyeneyatha nanta xeinaetsi xua bara apara imoxoyo itiya jinompatsi Nacom tsipei poxonae ichamonae naca bautisaba meratha tsita itapeinya xeinatsi xua Nacom bayatha naca juntũ coyene xanepana exana. <sup>23</sup>Barabũ naajuntũcoyenesũ exainchi xua jopa junuwiya wayabara paebiwa tsainchi wawũnae ewatsiwa. Baxua exanaponaieinchi tsipei bara yaputainchi xua Nacom bara exanaena pocotsiwa bayatha yabara naca tsiwũnae muxu duta xua jopa yabara ainya unthutontsi. <sup>24</sup>Barabũ yabara nanta xeinaieinchi po coyenewa xua nantiya nacui tsacabinchi xua wanayawenaewatsi. Bapoxonae nantiya naantobe tsainchi, matautano xua xanepanaya beta nantiya nata exanaieinchi. <sup>25</sup>Jopa bewa bara juta coyeneya ichiya exanaetsi be pocotsimonae waxainchi jiwanatsi pomonae jopa patebiyo poxonae nacaetuteibatsi xua poxonae Nacom wawũnae jainchinexa. Ichitha jame bewa nantiya najuntũ coyene tsacabichi xua juntema wajinompaewatsi. Barapo coyene bewa exanaponaetsi beyacaincha xua po cui coyene copiya bayatha. Baxua exanatsi tsipei anoxuae yaputainchi xua matabi jopaena, po mataqueitha pon jiwi Pecanamataxeinaein patopaetsica.

<sup>26</sup>Tsipei icha ichamonae waxainchi jiwanatsi icha barapomonae awiya abe exanapona xua pocotsiwa peichichipaexae xua abe exana xua poxonae bequein peyaputaewatha po coyene pexainyei jume, nama icha coyenewa ajibi, xua ichũn equeicha petsitupaenexa barapo peabe coyenewa. <sup>27</sup>Saya jame meisa tanacopatatsi pomonae awiya abe exanapona xua matabi cunuwa po mataqueitha poxonae Nacom yabara paebina

jiwi xua penatsicuentisiwa xua abe peexanaexae. Matautano tanacopatatsi xua isoto yabara cunuwa, po isoto bichocono atou, po isototha Nacom weraweraca cana exanaena daxita pomonae pia peaitafaetabi jiwichi. <sup>28</sup>Po pebin jumefeba po coyene Moisés itoroba pia peitorobi coyenewatha, xua poxonae nacueyatabe pebinbe ichacuiitha poxonae acoibi poyobe baponbe yabara paebabe: “Bapon pajume tan poxonae jumefeba”, jei, bapoxonae bapon bewa tupaena. Tsipei pomonae bapon yabara paebatsi xua penatsicuentisiwa xua abe peexanaexae, barapomonae tsita itapeinya xeinatsi xua bara bapon xainyeya abe exana. Daxota bapon bewa tupaena tsipei barapomonae jopa yabara nanta xainaeyo xua bapon peyawenaewatsi. <sup>29</sup>Xuaje payabara nanta xeinare: Nacom bichocono atene exana pomonaetha pomonae Pexanto tatsi itaweta. Matautano atene exana pomonaetha pomonae abe yabara paeba xua pinae Jesús pejana jopa ainya cuiyo bequein Jesús tsitupa jiwi. Jesús petsitupaexae daxota Nacom yabara tsiwuna muXu duta xua jiwi pejuntu coyene xanepana exanaenexatsi Nacom. Matautano barapomonae jopa natsicuentisi tsane xua abe peexanaexae. Matautano Nacom atene exana pomonaetha pomonae Nacom pia Pejumope tunaxu tatsi tsumu jumeya baru paebatsi po pejumope jiwi yawenatsi pia peantobexaetsi. Barapomonae nama bichocono atene exanaeinchi beyacaincha xua ichamonae atene exanaeinchi pomonae jopa exanaeyo pocotsiwa Moisés itoroba. <sup>30</sup>Waxainchi yaputainchi xua Nacom bayatha jeye: “Xan tacoya exanaein pentoma xua jiwi atene tsane abe peexanaexae”, jei Nacom. Equeicha Nacom Pejume Diwesitha jeye: “Nacom yabara paebina

piamonae xua penatsicuentisiwa xua abe peexanaexae”, jei. <sup>31</sup>Po pebin abe exana bichocono junuwa cana exanatsi poxonae Nacom yabara paebina bapon tsipei barapo pebin Nacom tsitatsi xua bapon bara penatsicuentisiwa xua abe peexanaexae. Bapoxonae Nacom, pon ataya asu pepoponaein, bichocono jopa juniya atene cana exanae tsane bapontha.

<sup>32</sup>Bara ataya payabara juntanainare po dapaetha poxonae bequein aena pajume cowuntame Nacom, xua ichitha beta paexaname. Bapoxonae awiya ichitha juntea parubenanaebiyame poxonae bequein ichamonae pacata abe exana. <sup>33</sup>Ichamonae xua paxam jiwana pam barapomonae tsumu jumeya biatainchi xuano jiwi itutha atene exaneibatsi. Iruru ichamonaeru pomonae paxam jiwana pam barapomonae nacayabara nanta xaina xua barapara iruru atene exaneibatsi poxonae ichamonae atene exaneibatsi. <sup>34</sup>Paxam painya antobexae pacayabara nanta xeiname pomonae jiwi pecubi botha jebatsi xua painya neyawenaenexa. Bequein bara ichamonae daunweya pacata nota xua xuan daxita paxeiname, daichitha awiya cataunxuae pajuntu coyene weiweiname. Bara payaputaneme xua paxeiname itabocotheicha pocotsiwa bichocono yatsicaewa wuna beyacaincha pocotsiwa po cae pin nacuathe paxeiname. Baxua xua pocotsiwa paxeiname itabocotheicha ataya tsitecaeya paxainaename baxua. <sup>35</sup>Jopa pana nacui barapentsinde xua payabara jume cowunta dubenanaebiyame xua painya nepaca catsinexa pocotsiwa bayatha Nacom yabara paca tsiwuna muXu duta. Tsipei wajume cowunta dubenanaebiyaxae tsane Nacom, baxua nexa Nacom pentoma naca catsibina xua bichocono

nawita xua pia nacuatheicha.

<sup>36</sup>Paxam panantawenoname xua ajuntuyapusya parubenanaebiyama awiya xua jopa paaitaconaem bequein ichamonaе pacata abe exana xua painya neexanaenexa pocotsiwa Nacom ichichipa. Bapoxonaе Nacom paca catsibina pocotsiwa xua bayatha yabara paca tsiwunaе muxu duta. <sup>37</sup>Nacom Pejume Diwesitha jeye:

“Methaunxuae patopaetsica, pon bewa patopeicaena.

Jopa bayathiyо tsane.

<sup>38</sup>Pon bara netsita pejuntu coyene xanepanaein, bapon bara ataya poponaena tana nejume cowanta ducuaanaebiyaxae.

Ichitha icha bapon equeicha caewa jopa nejume cowantsiyo jopa xanepanaya beyabara

juntu coyene weiweinaeinyo, pocotsiwa bapon peexanaexae”, jei Nacom.

<sup>39</sup>Ichitha nama waxainchi jopa be barapomonaetsi, pocotsimonaе equeicha caewa jopa jume cowantsiyo Nacom. Barapomonaе Nacom weraweraca exanaena. Nama waxainchi pomonaetsi awiya jume cowanta dubenanaebiyatsi Nacom beya poxonaе wajuntu coyenewa nacata capanepa exanaeinchi.

### **Meje yabara xua Nacom pejume cowantsiwatsi**

**11** Pon jume cowanta ducuaanaebiya Nacom, bapon bara xaniwaicha yaputane xua xeinaena pocotsiwa wunaе ewata. Matautano pejuntu coyene tsita najume itapeinya xeinatsi xua barapara xainyei po coyene xua barapon yabara jume cowanta bequein cataunxuae yatsicaewa jopa taeyo. <sup>2</sup>Wamo susato jiwi xanepanaya beta yabara paeбatsi xua Nacom beta yabara paeba ayaпusya pejume cowantsiwaxaetsi.

<sup>3</sup>Waxainchi wayabara jume cowantsixae xua Nacom naca yawenapaeba daxota yaputainchi xua barapo cae pin nacue iru barapo itaboco susato forotatsi, Nacom peitorobixae. Pocotsiwan xua anoxuae tainchi, Nacom forota pocotsiwan weya xua bapana jopa taetsi, pocotsiwan xua peinyaxae.

<sup>4</sup>Abel pon caena bayatha popona yabara jume cowanta xua Nacom yawenapaeba. Daxota bapon duwein bexuba xua tuxusi exana Nacom nexa. Nacom tsita xanepanatsi pocotsiwa Abel exana. Daxota Nacom yabara paeba xua bara bapon pon pejuntu coyene wunaein. Iruru Cain Abel pentapin tatsi, bapon iruru bequein pexaewa exana po coyene xua Nacom pecatsiwatsi. Daichitha barapo coyene Nacom jopa tsita xanepanaetsi. Nacom bichocono beita cui jichatsi pocotsiwa Abel exana, beyacaincha xua pocotsiwa Cain exana. Nacom baxua beita cui jichatsi tsipei Abel peyabara jume cowantsixae pocotsiwa Nacom exanapaeba. Bequein Abel bayatha tupa ichitha naca itacupa xua awiya wayabara nacuidubapon-aewatsi pocotsiwa Nacom exanapaeba poxonaе yabara yorobatsi Abel pia pejume cowantsiwa tatsi.

<sup>5</sup>Enoc pon caena bayatha popona yabara jume cowanta xua Nacom yawenapaeba. Daxota bapon Enoc pichicatsi. Nacom pichica xua bapon pecapanaenexatsi itabocotheicha, xua bapon Enoc jopa petupaenexa bara po cae pin nacuathe. Enoc piamonaе jopa caxinaetsi, poxoru Nacom pichica. Nacom Pejume Diwesitha paeba xua poxonaе pewunaeya tsane xua pichicaeinchi Enoc, Nacom tsita xanepanatsi pocotsiwa Enoc peexanaexae. <sup>6</sup>Jopa itacupaetsi xua jiwi Nacom tsita xanepanatsi icha barapo jiwi jopa beta jume cowantsiyo

Nacom. Pon xua ichichipa imoxoyo itiya popona Nacomtha jame bewa matha yabara jume cowuntsina xua Nacom bara xaniwaicha popona. Matautano jame bewa yabara jume cowuntsina xua Nacom bara cata pocotsiwa bayatha yabara tsiwunae muxu duta pomonaetha pomonae pia pejeichiwichi xua pejume cowuntsinexatsi. Barapomonae Nacom yaputainchi.

<sup>7</sup>Noé pon caena bayatha popona yabara jume cowunta xua Nacom yawenapaeba. Daxota Noé piamonae tsixana pin jera nae xua piamonae matabuxuyo pebaru nacapanepaenexa. Nacom Noé pewunaeya yabara muxuwetatsi xua pocotsiwa bexa exanaena pocotsiwa Noé bapana bayatha jopa taeyo, xua pin awubo tsane xua Nacom itorobina. Noé bara jume cowuntsiya exana pocotsiwa Nacom itoroba poxonae pin jera nae exana xua piamonae matabuxuyo pebaru nacapanepaenexa. Noé pejume cowuntsixae Nacom, bapon tsita itapeinya xeina xua pomonae barapo cae pin nacuepiwi apara abe exana poxonae jopa yabara jume cowuntsiyo xua Nacom itorobapaeba pin awubo. Nacom tsitatsi xua barapo jiwí atene tsane penatsicuentiwaxae jopa pejume cowuntsixaetsi. Jame Noé Nacom juntu tsita coyene xanepanatsi pejume cowuntsixaetsi bapon. Daxota Nacom Noé piamonae matabuxuyo baru capanepatsi.

<sup>8</sup>Abraham pon caena bayatha popona yabara jume cowunta xua Nacom yawenapaeba. Daxota poxonae Nacom pewabixae, bapon bara exana pocotsiwa Nacom itoroba. Bapon Abraham pia nacua weya pona xua peponaenexa icha nacuatha, po nacua bayatha Nacom yabara tsiwunae muxu duta, xua bapon catapaebatsi. Bapon Abraham pia

ira weya pona xua icha nacua beya pona po nacua bequein jopa yaputaeyo ichaxota pona. <sup>9</sup>Abraham peyabara jume cowuntsixae Nacom, bapon popona po iratha xua bayatha Nacom yabara tsiwunae muxu duta. Bapon Abraham be pon penanapaincha poponaein xua icha nacua werena poponaexae xua poxonae icha nacuatha popona. Bapon Abraham poponeiba anserabocon bomuxuxitha icha Isaac ichi iru icha Jacob ichi poxonae poponeibabe anserabocon bomuxuxitha. Abraham, iru Isaac, iru Jacob barapoyobe Nacom tsiwunae yabara muxu duta barapo ira xua Nacom pecatsinexa. <sup>10</sup>Abraham nacui yabara wunae ewata xua patopaena po tomaratha ichaxota xua pepu umenae bon xua Nacom pia nacuatheicha. Apra Nacom bapon pon yabara nanta xeina xua forotsina barapo tomara po tomara xua Nacom pia coya bara exana.

<sup>11</sup>Barichi Sara Abraham piseuri tatsi yabara jume cowunta xua Nacom yawenapaeba. Bequein bapowa acue xua jopa peitacupaewatsi xua pexeinaewa pexui awiya jume cowunta Nacom. Sara pejume cowuntsixae, Nacom cata barapowa catatsi peajuntuyapusuwa, xua barapowa pepabetsinexa pexuyo. Baxua barapowa taexanatsi tsipei barapowa jume cowunta pocotsiwa Nacom taexanaena bapowatha xua bayatha Nacom yabara tsiwunae muxu duta. <sup>12</sup>Bara barichi Abraham. Bapon bichocono amo tsecae xua bara imoxoyo petupaewaba tsane xua jopa itacupaetsi xua peexanaewa pexui. Daichitha Nacom copata xua bapon pexanto xeina xua daxota bapoxonae bapon pia pemoxi jiwí tatsi bichocono pinmonae naenaexanapona. Barapo bicheito bichocono pinmonae icha opiteimonae ichi xua bichocono nawita. Matautano barapomonae icha taetowa beno ichi xua bichocono beno cucujei xua mar

mene itapatha. Jopa itacupaetsi xua barapo jiji peununaewatsi icha taetowa beno ichi.

<sup>13</sup>Daxita pomonaе jume cowunta Nacom barapomonaе yajume cowantsiya werapa. Abu cataunxuae jopa catsibichi pocotsiwa bayatha Nacom yabara tsiwunaе muxu duta xua pocotsiwa bapomonaе catsibapaebatsi. Daichitha barapomonaе yabara jume cowunta xua pocotsiwan bexa xeinaena xua Nacom bexa catsibina. Barapomonaе baxuan yabara jume cowantsiya tsita xanepanatsi. Barapomonaе nantiya nayabara nanta xeina, jeye: “Waxainchi pomonaе be wananapaincha jinompaewichi barapo pena nacuathe xua be icha nacua werena waponae wi, pomonaetsi xua awiya jeita dubenanaebiyatsi po nacua yatsicaewa pepa wanacua”, jei daxita barapomonaе. <sup>14</sup>Tsipei barapomonaе baxua paeba, naca yaputane exana xua awiya jeitapona po nacua yatsicaewa pia nacua tatsi. <sup>15</sup>Barapomonaе jopa apara yabara caunutsiyo ichaxota copiya po nacua weya Abraham pona. Icha metha baxua yabara paebichipa metha bara itacupaetsipatsi xua caewa pewarapaewa pia nacuathe ichaxota copiya bayatha jinompa. <sup>16</sup>Ichitha barapomonaе ichichipa po nacua xua bichocono wunaе beyacaincha xua icha nacuan. Baraxua xua po nacua ichichipa, apara Nacom pia nacua tatsi. Daxota Nacom jopa auriyo xua barapomonaе yabara paebatsi xua pinaе Nacom barapomonaе pia Nacom tatsi. Daxota Nacom barapomonaе tsiwunaetatsi tomara.

<sup>17</sup>Nacom Abraham juntu coyene jujutatsi peyaputaenexa icha bara metha yatsicaya jume cowuntatsi. Daxota Nacom Abraham itorobatsi xua pexanto pebexubiwa tsane icha be pocotsi coyeneya ichi xua poxonaе

duwein bexuba Nacom nexa. Abraham pejume cowantsixaе Nacom daxota pexanto capana atororo beya pon yatsicaewa compa tatsi pon pewun Isaac. Abraham muxu pexanto pebexubi icha be pocotsi coyeneya ichi xua poxonaе duwein bexuba Nacom nexa. Bapon baxua exana bequein Nacom yabara tsiwunaе muxu duta barapo Abraham pexanto tatsi, jeye: <sup>18</sup>“Barapo nexanto Isaacxae nantauntsiname nemomoxi susato jiji”, jei Nacom. <sup>19</sup>Abraham jume cowunta xua icha Isaac tupaetsipa Nacom itacupatsi xua equeicha Isaac caewa asu exanatsi poxonaе bequein pexanto bexubichipa. Poxonaе Abraham muxu pexanto pebexubi, apara bara be xua bayatha tupa, matautano apara be xua Abraham pexanto equeicha caewa asu taexainchi.

<sup>20</sup>Barichi Isaac yabara jume cowunta xua Nacom yawenapaeba. Daxota bapon Isaac pexantobe tsipaeba, jeye: “Barabu Nacom paca yawenaena pia paca necaantobexaеbe”, jei Isaac pexantobetha, Jacob iru Esau.

<sup>21</sup>Barichi Jacob yabara jume cowunta xua Nacom yawenapaeba. Daxota poxonaе bapon juntucuru imoxoyo tupaenaba barompaya tsipaebabe José pia pexantobetha tatsi xua pia pemomobexaе tatsi. Bapon jeye: “Barabu Nacom paca yawenaenabe pia paca necaantobexaеbe”, jei Jacob José pia pexantobetha tatsi. Bapoxonaе bapon Nacom wunaе jaintatsi poxonaе naewatha nabuxu babatanotsiya yuyutanota tsipei bichocono amo tsecae.

<sup>22</sup>Iru José yabara jume cowunta xua Nacom yawenapaeba. Daxota poxonaе bara imoxoyo tupaenaba yabara paeba israelmonaе. José yabara paeba xua bexa tsane Israel pia pemomoxi susato jiji tatsi warapaena Egipto nacua weya, xua po nacuathe beya po nacua bayatha Nacom yabara tsiwunaе muxu duta

xua Nacom catapaeba. Matautano José pia pexui cui itoroba, xua José pia pexui piwa capanaeinchi Egipto nacua weya po nacua beya ichaxota israelmonae warapaena po nacua xua Nacom yabara tsiwūnae muxu duta xua Nacom catapaeba.

<sup>23</sup> Moisés pena tatsi irū paxa tatsi yabara jume cowūnta xua Nacom yawenapaeba. Daxota Moisés matsiyatatsi botha acoibi po xometobe poxonae aena naexana. Moisés pena yabara nanta xeinatsi yawa paxa yabara nanta xeinatsi xua Moisés itubūn tsecae. Baponbe jopa yabara jume cuitaya junuwiyoibe xua po coyene cui itoroba Faraón pon Egipto nacuapiwi itorobiya pia pepa peewatsinchi xua pinae daxita pexui pebin wūtixi bewa jutebinchi.

<sup>24</sup> Irūru Moisés yabara jume cowūnta xua Nacom yawenapaeba. Daxota poxonae bayatha pinyoba Moisés jume aichaxaibiya naitemata, jeye: “Xan barapowa jopa pexanton tatsin powa Faraón pexantiyo tatsi”, jei Moisés. <sup>25</sup> Saya jame bapon Moisés itapetatsi xua irū yawa muxuna atene exanaeinchi Nacom piamonae tatsi xua poxonae barapomonae atene exanaeinchi xua ichamonae atene exanaena pomonae Egipto nacuamonae. Moisés ichichipa xua pecana exanaewa tsainchi icha piamonae tatsi tacana ichichi. Moisés jopa benaexanaeyo xua daxitan pexeinaewa tsane pecoutha pocotsiwan xua Faraón xeina. Icha baxuan xeinaetsipa Moisés jūntū coyene weiweina exanaetsipatsi barapo nacuatha xua saya caepatiyo nexa tsi-pae po coyene xua jiwi weiweina exanatsi xua abe peexanaponaewa. Moisés piamonae jopa benaitematsiyo daxota jopa benotsiyo Faraón pecopiniwa tatsi. <sup>26</sup> Ichamonae Moisés tsumū jumetha bitainchi xua ajūntūcoyenetane exanatsi icha Mesías ichichi pon Nacom itoroba. Poxonae Moisés nayabara jume tane

baxua tsita coyene xanepanatsi, beyacaincha xua poxonae barapo copei pexeinaewa tsane Egipto nacuatha. Baxua Moisés itapeta tsipei ichichipa xua pexeinaewa po pentoma bexa tsane Nacom catsina bapontha peatenexae po pentoma bayatha Nacom yabara tsiwūnae muxu duta.

<sup>27</sup> Moisés yabara jume cowūnta xua Nacom Moisés yawenapaebatsi. Daxota najūntū coyene weta xua pewarapaewa tsane Egipto nacua weya. Moisés jopa junuwiyo bequein yaputane xua Faraón bara casebina. Bapon Moisés bara saya amsiya pona bara be xaniwaicha tane Nacom xua be yatsicaewa barū poinchi pon peinya peponaein xua jiwi jopa itacūpaetsi xua petaewa. <sup>28</sup> Moisés pejume cowūntsixae Nacom, piamonae cui itoroba xua peexanaenexa penabanaewa xua Pascua wūn matakabi nexa. Matautano bapon cui itoroba piamonae xua pejanantha pecapibinexa daxita bomūxū pecoibotontha. Barapo Moisés piamonae tatsi pomonae Israel pia pemomoxi susato jiwixae tatsi baxuan exana xua daxota matatsunpin jopa tūpa exanaeyo piamonae. Barapo matatsunpin merawī patopaena xua pejutebiwa tsane matapin jiwi pomonae pia bontha jopa xeinaeincho po jana xua Moisés cui itoroba xua jiwi bomūxū pecoibotontha pecapibiwa tsane.

<sup>29</sup> Barapo Israel pia pemomoxi susato jiwi tatsi yabara jume cowūnta xua Nacom yawenapaeba. Daxota Mar Rojo mene mentha icha muxunene beya panenebiya xua epatauta iya pona be poxonae xua ira tsewa iya peponaewa. Ichitha poxonae Egipto nacuamonae baraxoya iyiya daxita bunothopa.

<sup>30</sup> Israel pia pemomoxi susatopiwi tatsi yabara jume cowūnta xua Nacom yawenapaeba. Daxota matawacaicha tocuecueniya enaponeiba pemūxūbūru iya siete po matakabibe xua barapo



Jericó tomara peyacaincha toxorotsi dutsiwa xua be iboton. Barapoxonae barapo Jericó tomara peyatorotsiya yacaincha dutsiwa baxua iratha jopiya. <sup>31</sup> Bayatha yabuyo powa Jericó tomarapiwayo Rahab yabara jume cowunta Nacom pon Israel pia pemomoxi susato jiwí tatsi pia Nacom tatsi. Daxota bapowa jopa baru tupaeyo piamonae xua pia tomarapiwixae poxonae tomarapiwi werapa jopa pejume cowuntsixae Nacom pon Israel pia pemomoxi susato jiwí tatsi pia Nacom tatsi. Bapowa Rahab powa copiya bayatha pesi cui weiweinaewa pebiwitha. Poxonae Israel pia pemomoxi jiwanamonae namicha pata xua pecui amanayabiya taenexa Jericó tomaratha, bapoxonae barapowa Rahab matenta weyataeya waba, xua barapo israelmonae jiwanamonae wabatsi pia botha tatsi.

<sup>32</sup> Jopa equeicha paebinyo xua equeicha pinmonae tayabara paebiwa pomonae pejume cowuntsiwi Nacom. Jopa neyapu jupaeyo xua jopa taxeiawa matakabi xua tacueicueijeinexa Gedeón yabara, iruno Barac yabara, iruno Sansón yabara, iruno Jefté yabara, iruno David yabara, iruno xua Samuel yabara, iruno pomonae Nacom pia peitorobi jume petapaebiwi tatsi yabara. <sup>33</sup> Daxita barapomonae jume cowunta Nacom. Ichamonae barapomonae jiwana, amanayaba ainya nacuanpiwitha, pejume cowuntsixae xua Nacom yawenaena. Ichamonae pejume cowuntsixae Nacom daxota jiwitha beta xaniwaicha canamata itoroba. Ichamonae pejume cowuntsixae Nacom barapomonae catsibatsi pocotsiwan xua bayatha Nacom yabara tsiwuna muxu duta. Ichamonae pejume cowuntsixae Nacom, Nacom exana xua coibo acaba neuthun, xua barapomonae

jopa atene peexanaenexatsi barapo neuthun. <sup>34</sup> Matautano ichamonae pejume cowuntsixae, daxota Nacom yawena barapomonae poxonae Nacom itaxutaba exana po isoto bichocono pin isoto xua barapomonae po isototha tautatsi. Barichi ichamonae pejume cowuntsixae daxota Nacom capanenebiya tsaibi barapomonae poxonae muxu pejutebeibichi peopi sojeiwantha xua be cusi. Matautano pomonae faefaena, equeicha Nacom daunwei exana. Daxota barapomonae daunwei poxonae naba. Ichamonae Nacom peyawenaexae amanayaba pia peaitafaetabi jiwichi xua ainya soldadomonaein bicheitontha. <sup>35</sup> Barichi ichamonae yabuxi pejume cowuntsixae equeicha caewa piamonae xeina, pomonae equeicha caewa taasutsi petupaewa weya.

Ichamonae itacupatsi xua panenebiya xua jopa werapae tsane xua icha poxonae Nacom itawetatsina. Nama barapomonae jopa bepaebiyo baxua daxota barapomonae werapa poxonae bichocono caitacueintatsi ichamonae. Barapomonae, pomonae pewerapaewi yaputane xua pejume cowuntsixae Nacom, daxota Nacom equeicha asu exanaena xua barapomonae pepatsiwa tsane Nacom pia nacuatheicha. <sup>36</sup> Ichamonae pejume cowuntsixae Nacom, bichocono ajuntucicoyenetane tsipei bichocono cui capanebatsi ichamonae. Matautano ichamonaeru cuaintebatsi. Ichamonaeru penain mutontha cubebatsi. Ichamonaeru jiwí pecubi bontha cuaranobatsi. <sup>37</sup> Ichamonae pejume cowuntsixae Nacom, ibotontha tupa exanatsi poxonae cuinbabatsi. Matautano ichamonae werapa poxonae epa nantarabobiya thabebatsi seruchotha. Iruru ichamonae pejume cowuntsixae jutebatsi peopi sojeiwantha xua cusin.

Ichamonaeru pejume cowuntsixae Nacom, taseicatsi pexaewa, yawa taseicatsi bon, xua daxota saya dubenanaebiya, yawa naxataba oveja bocoton xuano xua cabra bocoton. Barapomonaе acopeibiwi tsobenae, barainebatsino abe taexanebatsino. <sup>38</sup> Pomonaе barapo cae pin nacuathepiwi Nacom pejume cowuntsiwi yabara paebatsi, yabara jeichiche: “Jopa be cui copatichi xua barapomonaе pejinompaewa tsane watomaratha”, yabara jeichichi. Ichitha barapomonaе Nacom tsita ainya cuichi beyacaincha barapomonaе pomonaе barapo cae pin nacuathepiwixae. Barapo Nacom pejume cowuntsiwi dubenanaebiya ichaxota ira xuepana susato tsurucuae nacuatha. Matautano barapomonaе demxuwantha dubenanaebiya, muthunthano jinompa, xuano xua duwei pia muthuntha jinompano.

<sup>39</sup> Bequein Nacom yabara paeба barapomonaе xua beta peexanaexae pejume cowuntsixaetsi, daichitha cataunxuae abu barapomonaе jopa catsibichi pocotsiwa Nacom bayatha yabara tsiwunaе muxu duta barapomonaе, matautano xua caeinthano. <sup>40</sup> Barapomonaе cataunxuae abu jopa catsibichi baxua tsipei Nacom naca yabara nanta xeina xua bexa tsane iru naca catsibina pocotsiwa bapon tsita xanepanatsi. Pocotsiwa bapon catsibina xua apara barapomonaе Nacom naca cayawa muxuna juntu coyene xanepana exanaena.

**Meje yabara xua waxainchi  
bewa exanaponaetsi icha  
Jesús ichi poxonaе exanapona**

**12** Pomonaе xuaunxuae yabara pacata tinatsi barapomonaе bichocono pin bicheitomonaе, pomonaе pejume cowuntsiwi po coyene xua Nacom yawenapaeba. Barapomonaе naca tsita itapeinya xeina xua

awiya xanepanaya jume cowunta dubenanaebiya bequein atene exanatsi ichamonaе. Baxua naca cuiduba xua iru bewa xanepanaya jume cowunta dubenanaebiyaeinchi bequein naca atene exana ichamonaе. Barabu waxainchi daxita nacui barapentinchi abe waexanaе cuiru coyenein pocotsi coyenein xua jopa naca yawenaeyo xua Nacom beta wataexanaewatsi. Barabu waxainchi beitatemaya ajuntusuya awiya exanapoinchi pocotsiwa Nacom naca cui itoroba. <sup>2</sup> Saya meisa Jesús juntanainaeya jinompatsi wanaca yawenaenexa. Bapon copiya bichocono pejume cowuntsixae Nacom daxota bapon wanaca canamataxeinaein xua wajume cowuntsinexa. Matautano bapon betiya naca exana xua beta wajume cowuntsiwa poxonaе cataunxuae awiya wajinompaewa barapo cae pin nacuathe. Jesús bara saya copata xua atene exanadutatsi naetotha ichamonaе poxonaе tupa exanatsi. Bapon jopa auriyo bequein naetotha tupa exanatsi jiwi peitutha tatsi. Ichamonaе ba bichocono aura xua poxonaе petupae exanaewatsi naetotha. Nama bapon Jesús jopa auriyo poxoru nayabara yaputane xua pirapae poxonaе nacana cui wetinchi xua atene exanatsi, xuano xua poxonaе tupa exanatsi naetotha, bapoxonaе bichocono juntu coyene weiweinaena. Anoxuae bapon Jesús eca pia pexeinya peecaethopeibiwitha xua Nacom pia pecoxa weya tatsi xua itabocotheicha ichaxota Nacom eca pia pexeinya peecaethopeibiwitha.

<sup>3</sup> Jesús pacayabara juntanainaponde xua bayatha po coyene Jesús abeya exanatsi pomonaе abe peexanaе jiwi. Jesús awiya beitatemaya saya popona poxonaе bequein bichocono atene exanatsi barapomonaе pomonaе abe peexanaewi. Daxota jopa paraichinde

xua poxonae jopa pana najuntũ coyene tsacabim. Matautano jopa paajuntũcoyenefaetabinde xua poxonae daxota jopa beta painya taexanaewa Nacom. <sup>4</sup>Painya juntu coyenewatha pajume torobabame abe peexanae cuiru coyenein xua painya neexanaeyainwa barapo coyenein. Bapoxonae jopa panaitematsim xua painya nejume cowuntsiwa Nacom. Bequein bara baxua daunwei paexaname ichitha awiya cataunxuae jopa pawerapaem xua barapo coyene painya neexanaexae icha bayatha Cristo ichi xua tupa xua bichocono daunweya peexanaexae barapo coyene. <sup>5</sup>Paxam pajuntemainame xua bayatha Nacom paca muxuweta xua paxam bara Nacom pia pexui tatsi pam. Baxua yabara Nacom Pejume Diwesitha paca jeye:

“Tapexui pam, jopa amsiya payabara nanta xeinaeinde pocotsiwa yabara paca muxuwetatsi tapaca cuidubinexatsi.

Poxonae atene paca exanatsi jopa ajuntũcoyenefaetabiya pajinompaeinde xua

yabara tapana nejume cowuntsiwam.

<sup>6</sup>Tsipei muxuwetsiya cuiduban pomonaetha pomonae antobein.

Matautano atene exananno pomonaetha pomonae tapexui tsicotan”, jei Nacom Pejume Diwesitha.

<sup>7</sup>Awiya juntea pajinompare poxonae bequein Nacom paca atene exana xua paca necacuidubixae. Baxua Nacom pacata exana tsipei paca nacana exana pia pexui tatsi pam. Dapo pexuyo ajibi, po pexuyo jopa paxa muxuwetsiya cuidubichi xua poxonae icha bichocono antobetsi paxa. <sup>8</sup>Nacom pia pexui muxuwetsiya cuiduba.

Icha Nacom jopa paca muxuwetsiya cuidubichipae, bapoxonae paxam jopa Nacom pia pexui tatsi pam tsipae. Saya be catsa pexui pam tsipae icha be pocotsi pexui ichi po pexui seicaya icha paxa barompa. <sup>9</sup>Matautano caena bayatha poxonae cataunxuae pexuichi waxeiwi naca atene exana wanaca muxuwetsiya cuidubixae. Daichitha waxeiwi baru cui itura jinatsi. Waxainchi bewa ichichipaetsi xua waexanaewatsi pocotsiwa naca cui itoroba pon Waxa Nacom, pon itabocotha poxona. Barapocotsiwa bewa exanaeichi beyacaincha pocotsiwa exanatsi xua poxonae waxeiwi naca cui itoroba poxonae jinompatsi barapo cae pin nacuathe. Baxua bewa exanaeichi Waxa Nacom pon itabocotha poxona wanaca catsinexa peajuntũyapusũ coyenewa. <sup>10</sup>Waxeiwi poxonae pexuichi barapo cae pin nacuathe saya caepatiyo naca muxuwetsiya cuiduba. Baxua nacata exana icha be pocotsi coyeneya xua ichichipa xua tsita xanepanatsi. Ichitha nama Nacom naca muxuwetsiya cuiduba wanaca yawenaewa tsane. Matautano baxua nacata exana xua wanaca cana exanaewa tsane xua bichocono wajuntũ coyene xanepanaewichi, icha Nacom ichi xua bichocono pejuntũ coyene xanepanaein. <sup>11</sup>Poxonae naca atene exana bara bapoxonae nanta xeinatsi xua jopa nacata xaexaenaecaeyo, tsipei bara xaniwaicha naca atene exana. Ichamonae yabara cui copaba xua bara nacuiduba xua poxonae bequein Nacom atene exana, pemuxuwetsiya cuidubixae. Barapomonae jame jopa natsicuenti tsane xua abe peexanaexae bapontha. Barapomonae xeinaena pejuntũ coyene xanepanaewa Nacomtha xuano juntea dubenanaebiyaena.

**Meje yabara xua poxonaē  
Nacom naca muxuweta xua  
jopa bewa Nacom itawetichi**

<sup>12</sup> Yaitama pajuntũ coyene faefaename, xua painya nejume cowũntsiwa daxota painya coutha pana najuntũ coyene tsacabare xua beta painya nejume cowũntsiwa tsane Nacom. Matautano xua payabara ajuntũcoyenerewem tsaibi ichawan. Pana najuntũ coyene itorobare xua awiya ayapusuya painya neexanaponaewa tsane. <sup>13</sup> Painya xoba icha diwesi pajume cowuntame po diwesi xua jopa Nacom Pejume Diwesi tatsi. Ũ meisa paexanare pocotsiwa Nacom Pejume Diwesitha yabara paeba xua beta painya nejume cowũntsiwa. Icha baxua paexanaetsipame irũ ichamonae barichipae. Bequein barapomonaē copiya jũntũ coyene faefaenaetsipa pejume cowũntsiwatha ichitha bapoxonaē beta exanaponaetsipa xua pejume cowũntsiwa pia paca cui taexae.

<sup>14</sup> Nantiya daxita jiwi ajuntũyapusuya betiya pana nabarũ jũntemiya jinompare. Bichocono pana najuntũ coyene xanepana exande Nacomtha xua jopa painya nenatsicuentisnexa xua abe painya neexanaexae bapontha, xua painya netaenexa bapon. Tsipei pomonaē jopa xeinaeyo barapo coyene jopa itacũpaetsi xua Nacom petaewatsi tsainchi. <sup>15</sup> Dota pam xua ichamonae pomonaē paxam jiwana pam pia xoba jopa ichipaeyo po coyenewa Nacom yawena barapomonaetha pia peantobewaxae. Matautano barapo ichamonae pomonaē painyamonae jivanaxae pia xoba abe exana ichamonae peitũtha tatsi xua daxota irũ ichamonae pebarichinexa xua abe peexanaewa. <sup>16</sup> Ichamonae pomonaē paxam jiwana pam, pia xoba nota icha yabuxitha, powaxi jopa xapain

barompaya pia seurixi. Matautano dota pam xua ichamonae paxam jiwana pam jopa tsita pecui pawĩ tsainchi po coyenewan xua Nacom piawan tatsi. Barapo coyene Esaũ exana pon caena bayatha tũpa. Bapon Esaũ jopa tsita ainya jume cuiyotsi pocotsiwa bayatha Nacom yabara tsiwũnaē muxu duta xua bepa pinaē Nacom Esaũ yaweneibichi. Barapon Esaũ piyainxae peyapintha Jacobtha cata po coyene xua pia coya pecanamataxeinaē coyenewa po coyene matapin ba xeina. Tsipei Esaũ jopa jume cowũntsiyo Nacom daxota nata caenaeta barapo coyenewa xua nata matomata pexaewa xua saya cae penabanaewiyo. <sup>17</sup> Paxam payaputaneme xua bapon Esaũ pirapaeyo ichichipa xua equeicha caewa pexeinaewa tsane xua po coyene peainya cui coyene po coyene matapin ba xeinaena xua paxa catatsi. Barapo coyene po coyene xua coxiyũn tawũca pexanto pon matapin xua Nacom peyawenaewa tsane. Ichitha bapon Esaũ peyapin cata barapo coyene xua matomata pũpara. Bequein bara bapon auranaya caunutsiya wecoyeya paeba, ichitha jopa itacũpaetsi xua caewa xeinaena barapo coyene po coyene xua ba matapin xeina.

<sup>18</sup> Caena bayatha pia Nacom caquita ponaetsi Israel pia pemomoxi susato jiwi tatsi demxuwa itabaratha umena poxonaē Nacom Moisés catatsi pia peitorobi coyenewa. Barapomonaē jume tane pocotsiwa Nacom paeba yawa tane demxuwa. Ichitha nama paxam jopa beparaichim. Jopa panantawenonaem xua paumenaename demxuwa itabaratha xua painya necaquita ponaenexa Nacom. Poxonaē Israel pia pemomoxi susato jiwi tatsi umena barapo demxuwa itabaratha, baxoyo pin isoto uncueica barapo demxuwatha. Matautano bapoxonaē

bichocono quirei, yawano nobonno. Matautano pin joibo baxoyo uncueica. Ichitha jopa bara paichim, jopa pataem baxuan. <sup>19</sup>Paxam jopa pajume taem peobiwa jume po peobiwa pewun trompeta nain matawun, icha poxona barapo Israel pia pemomoxi susato jiwi tatsi ichi xua jume tane barapo trompeta jume. Paxam jopa pajume taem Nacom pejume poxona Nacom cueicueiji barapo Israel pia pemomoxi susato jiwitha tatsi barapo demxuwatha. Pomona jume tane barapo jume, barapo israelmonaexae Moisés jume itorobatsi xua bepa pinae Nacom equeicha jopa pepaebiwa tsane. <sup>20</sup>Barapomona baxua Nacom jume matawentatsi tsipei bichocono pijunuwi xua pocotsiwa Nacom itorobina. Poxona itoroba Nacom jeye: “Pon nataxuna jayata barapo demxuwa bewa bapon pabexubim ibotontha. Jopa ainya cuiyo bequein icha metha duwein tsipae, xuano icha metha bequein jiton tsipae”, jei Nacom. <sup>21</sup>Barapomona bichocono junuwa pocotsiwa xua tane barapo demxuwatha iru Moisés bichocono junuwa. Daxota paeba, jeye: “Bichocono tajunuwi jijiyen”, jei Moisés.

<sup>22</sup>Jame anoxuae painya nejume cowantsixae Nacom, bapon paca yabara cui copata xua painya nepatsiwa tsane bapon pia tomaratha tatsi, po tomara pewun Jerusalén tomara. Barapo tomara eca ichaxota po demxuwa pewun Sión. Barapo tomara Nacom pia tomara tatsi pon ataya tsitecaeya asuya pepoponaein. Barapo tomara xua pepa Jerusalén tomara Nacom pia nacuatheicha tatsi eca. Matautano papatsiname baxoteicha ichaxota jinompa ayeimona matatsunpiwi, xua weiweinaeya nanacaetsina xua pia nanabarun wunae jainchinexa Nacom. <sup>23</sup>Matautano pajume cowuntame Jesús

xua painya nepatsinexa ichaxota Nacom piamona tatsi nacaetuta pomona Nacom pia diborotha wun dubena xua itabocotha. Barichi papatsiname Nacomtha, pon yabara paebina daxita jiwi xua penatsicuentisiwa xua abe peexanaexae. Matautano papatsiname ichaxota jiwi pia jumopein tunaxu tatsi jinompa pomona xua beta exana xuano xua Nacom beta cana juntu coyene wetsiya xanapanaya exana. <sup>24</sup>Matauta papatsiname ichaxota Jesús popona pon jiwi peyabara jume yawenaen Nacomtha xua jiwi pepatsiwa tsane Nacomtheicha. Matautano bapon nacata catsica Nacom pia pena peyabara tsiwunae muxu dutsiwa tatsi. Bapon pia pejana tatsi xua barapo jana pepichapabarenaexae Nacom naca yabara juntu coyene junteina abe waexanae cuiru coyenein. Barapon pia pejana tatsi jiwi beta cana exanatsi beyacaincha Abel pia pejana tatsi. Tsipei poxona bapon bexotsi, jopa nantawenonaeyo xua bapon peyantomatsiwatsi. Ichitha poxona Abel bexotsi, nantawenona xua peyantomatsiwatsi.

<sup>25</sup>Dota pam. Jopa bewa pajume itawetsim Cristo pon wanaca tsipae-bixae Nacom yabara. Pomona bayatha Nacom jume itawetatsi poxona bequein Moisés muxuweta jiwi barapo irathe Nacom nexa, barapomona jopa Nacom capanenebiyaeyo xua atene abe pia peexanaexae. Waxainchi jopa naca itacupaeyo xua panenebiyatsi xua atenetsi abe waexanae coyenewantha icha jopa Nacom jume naitaewatichi xua itaboco wetsica wanaca tsipaebiwa. Waxainchi bichocono nama atenetsi, beyacaincha barapomona xua atene abe pia peexanae coyenewantha pomona Moisés baru popona. <sup>26</sup>Caena bayatha Nacom tsipaeba barapo irathepiwi tsique poxona

Moisés popona, Nacom pia jumetha ira jijiyata exana. Ichitha anoxuae Nacom tsiwanaya jeye: “Abu equeicha bara caeto tsane ira jijitsin yawano itabocotheichano jijitsin”, jei Nacom. <sup>27</sup>Poxonae Nacom jei: “Abu equeicha bara caeto tsane”, jei, naca yaputane exana xua Nacom aichurucuae exanaena pocotsiwan xua barapo cae pin nacuathe xeina pocotsiwan itacupatsi xua pejiyatsiwatsi. Saya meisa jopa aichurucuae exanae tsainchi pocotsiwan xua jopa itacupaetsi xua pejiyatsiwatsi xua pocotsiwan Nacom piamonaetha peyabara tsiwunae muxu dutsi coyenewa. <sup>28</sup>Nacom pia nacua, ichaxota Nacom itoroba, yawano xua waxainchi baxota itorobatsi, barapo nacua jopa itacupaetsi xua jijiyatatsi xua aichurucuae peexanaenexatsi. Daxota bewa jeichichi Nacomtha: “Nacom, maisa pajuntu coyene weiweinan pebaxuaxae”, bewa jeichichi. Poxonae Nacom wunae jaintinchi waxainchi bewa yabara nanta xeinaetsi pia pejuntu coyene xanepanae coyenewa tatsi. Matautano bewa bapon cunuwiya wunae jaintichi pia peyapusuwa pexeinaexae. <sup>29</sup>Wanacom weraweraca cana exana jiwi, pomonaetha pomonae jopa pejume cowuntsiwichi. Nacom baxua exanaena icha be poxonae nawa ichi xua poxonae daxita powa poxonae taxua.

**Meje yabara xua pocotsiwa bewa exanaetsi xua pocotsiwa Nacom tsita xanepanatsi**

**13** Jopa pana nacui barapentsinde xua caemona nantiya painya nenaantobewam pomonae be painya eweicho jiwi painya nenatsicotae jiwi pam painya nejume cowuntsixae Jesucristo. <sup>2</sup>Jopa pajuntemainaeinde xua beta painya netaexaneibiwa tsane pomonae pateiba painya bontha

pomonae iru pejume cowuntsiwi Nacom tsipei metha beya jemeicha barapomonae tsipae pomonae Nacom itoroba xua beta painya nepacata exanaenexa. Caena bayatha ichamonae pexaewa apata poxonae matha jemeicha pia botha tapatatsi, xua poxonae jopa xapain yaputaeyo xua deta cou aparta matatsunpiwi.

<sup>3</sup>Payabara nantu coyene xinare pomonae jiwi pecubi botha cuaranobebatsi painya neyawenaenexa barapomonae icha be poxonae paichim xua iru jiwi pecubi botha paca cuaranobaru. Payabara nantu coyene xinare pomonae peraxa jubebatsi xua ichamonae exana painya neyawenaenexa barapomonae. Tsipei paxam iru jiwi pam, paca yabara itacupatsi xua ichamonae paca necaperaxa jubuwa.

<sup>4</sup>Paxam bewa beta pananta xeinaem poxonae jitha paename xua barapo coyene paca tsita ainya cui. Daxota jopa bewa ichawa beya panasi cui weiweina exanaem poxoru painya seurixi bayatha paxename. Tsipei Nacom yabara paebina jiwi xua penatsicuentiwa xua abe peexanaexae pomonaetha pomonae jopa xapain exanaeyo xua be poxonae yabuxi jeita xua po coyene jiwi jopa yabara copatsiyo. Matautano barichi Nacom yabara paebina jiwi xua penatsicuentiwa xua abe peexanaexae pomonaetha pomonae nasi cui weiweina exana poxonae bequein pia seurixi xeina.

<sup>5</sup>Jopa bichocono paichichipaeinde paratixi. Jame maisa pajuntu coyene weiweinare painya nexenaexae pocotsiwa Nacom paca catsiba. Baxua paexande tsipei Nacom jeye: “Bapana jopa compa capopona exanae tsainchi. Bapana jopa cacuenta ponae tsainchi”, jei Nacom. <sup>6</sup>Daxota naca itacupa xua jume cowuntsiya jeichichi:

“Nacom, pon jiwi Pecanamataxeinaein, bapon pon xua tana neyawenaein. Jopa junuwinyo poxonae jiton xua abe tana exanaewa”, jeichichi.

<sup>7</sup>Payabara cui jantanainare painya nepaca canamataxeinaewi pomonae bayatha paca cuiduba Nacom Pejume Diwesi. Barapomonae pacui taema, tsipei barapomonae beta jume cowuntsiya jinompa beya poxonae barapomonae yacuiya werapa. Paxam beta pajume cowuntsiya jinompare icha barapomonae ichi xua beta jume cowuntsiya jinompa.

<sup>8</sup>Jesucristo saya tsitecaeya pepu jupa exanaponae. Baxua exana caena bayatha, anoxuaeno, xuano xua bara ataya tsitecaenano xua jiwi beta peyawenaewatsi. <sup>9</sup>Daxota jopa pacopatsinde xua ichamonae painya nepaca cuidubiwa icha pecuidubi diwesin po diwesin pia diwesin barompa, po diwesin jopa Cristo pia diwesin tatsi. Jame ainya cui xua naajuntuyapusu exainchi Nacom pia peantobe coyenewatha. Po coyenein xua itoroba xua penabanaewa yabara barapo coyenein jopa naca ajuntuyapusu exanaeyo Nacomtha. Barapo peitorobi coyenewan bapana jopa yawenaetsi pomonae bequein xua exanapona barapo coyenewan.

<sup>10</sup>Waxainchi xeinatsi barompaya wacoyene po coyene be poxonae xua tuxusi exanatsi Nacom nexa poxonae caein naetotha naca tsitupa xua daxota Nacom jopa tsitatsi xua penatsicuentisiwa xeinatsi xua abe waexanaexae. Baxua apara xua poxonae Cristo tupa naetotha abe waexanae cuiru coyenein nexa. Po sacerdotepiwi xua nacuita Nacom pia tututha anserabocototha xua caena bayatha barapocotsi coyene jopa itacupaetsi xua pexeinaewa barapo coyene tsipei barapo sacerdotemonae cataunxuae jutebeiba duwei jiwi abe

pia peexanae cuiru coyenein tatsi nexa. <sup>11</sup>Caena bayatha pon pepa sacerdotepin, duwein jana capaneiba ichaxota po tutu yatsicaewa Nacom pia tutu tatsi po tutu bichocono peainya cui tutu. Bapon baxua exana xua Nacom peyabara jantemainaenexa jiwi abe pia peexanae coyenewan tatsi. Bapoxonae barapo duwein ompin tautatsi tomara cuariya beya. <sup>12</sup>Cristo barichichi. Tomara cuariya beya tupa exanadutatsi naetotha, xua daxita jiwi pejuntu coyene xanepana exanaenexa tsainchi Nacom. Cristo pejana pichapabarenaexae poxonae tupa, Nacom jopa tsitatsi xua jiwi penatsicuentisiwa xua abe peexanaexae. <sup>13</sup>Ichamonae Jesús aura exanatsi poxonae tomara cuariyatha tupa exanadutatsi naetotha. Barabu copatatsi xua ichamonae iru naca aura exana wajume cowuntsixae Jesús xua daxota naca atene exana icha Jesús ichichi. <sup>14</sup>Barapo cae pin nacuathe jopa xeinaetsi tomara, po tomara ataya tsitecaeya ayapusu tsuncuae. Jame wunaeya ewatatsi, po tomara xua bexa patopaetsica Nacom pia nacua wetsica tatsi. <sup>15</sup>Daxota waxainchi bewa wunae jainteibichi Nacom tsipei Jesucristo naca tsitupa. Poxonae Nacom wunae jaintatsi wajumetha baxua icha be poxonae ichi poxonae duwein tautatsi poxonae tuxusi exanatsi Nacom nexa. Nacom wunae jaintatsi jeichichi: “Nacom maisa bichocono nejuntu coyene xanepanaein”, jeichichi. <sup>16</sup>Jopa pajantemainaende po coyene xua beta painya taexanaewa ichamonae. Painyawan panata jiwana wetsabare pocotsiwan xua paxename xua painya necatsibinexa pomonae xua jopa xeinaeyo. Tsipei poxonae baxua paexaname, bichocono xanepana icha be ichi poxonae paexaname poxonae duwein patautame xua patuxusi

exaname Nacom nexa pocotsiwa Nacom tsita xanepanatsi.

<sup>17</sup> Paexande pocotsiwa paca cui itoroba pomonae painya nepacacanamataxeinaewi. Matautano saya barapomonaetha pajume naitaeware. Pabarũ cui itura jinare barapomonaetha tsipei barapomonaetha paca jũntũ coyene eeniya ewata. Barapomonaetha yaputane xua bexa tsane Nacom barapomonaetha yabara pæbina xua penatsicuentisiwa xua abe peexanaexae icha barapomonaetha jopa beta paca jũntũ coyene eeniya ewatsiyo. Bara pacopare xua barapomonaetha jũntũ coyene weiweina exanatsi poxonae paca jũntũ coyene eeniya ewata xua jopa pejũntũ coyene wecoyeyinexa xua abe painya neexanaexae. Tsipei icha barapomonaetha jũntũ coyene wecoyeyi baxua xapain jopa paca yawenaeyo.

<sup>18</sup> Nacomtha painta wũcare. Bara payaputan xua pata jũntũ coyene pana netsipaeba xua pinae bara beta paexanan. Paxan paichichipan xua awiya beta pata exanaewa daxita coyenewan. <sup>19</sup> Paca wũcatsi xua painya inta wũcaenexam tsane Nacomtha xua Nacom bara inta pecopatsinexa xua methaunxuae tapaca siwa ponaewa tsainchi equeicha.

### **Meje yabara xua najume wetsiya pæba pon tina**

<sup>20</sup> Nacom, barapon peyajũntũ coyene jinaein xua jũntema pepoponaewa. Barapon Nacom Jesús caewa asũ exanatsi petũpaewa weya pon Wanacanamataxeinaein. Bapon Jesucristo pon pepa Peewatsin xua daxita carepaya jiwĩ peewatsinchi icha be pocotsin oveja beta peewatsin

ichi. Bapon Jesucristo pejana pichapabarenaexae poxonae tũpa, canacui wetsiya exana po coyene xua bayatha Nacom yabara tsiwũnae muxu duta po coyene xua ataya tsitecaeya tsane. <sup>21</sup> Barabũ barapon Nacom paca jũntũ coyene xanepana exanaena xua jopa painya nenatsicuentisinexa xua abe painya neexanaexae. Matautano bũ bara paca catsina xua daxita pocotsiwan panantawenoname xua xuan xanepanaya painya exanaenexa po coyenein Nacom ichichipa. Barichi barabũ Jesucristo pia peayapuswa naca cana exanaena xua exanaeinchi po coyene Nacom tsita xanepanatsi. jBarabũ jiwĩ Cristo ataya wũnae jaintinchi pexeinaexae peayapusũ coyenewan! Je, bara ichi tsane.

<sup>22</sup> Tamonaetha pam, pomonaetha pam irũ painya nejume cowũntsixae paca itorobatsi xua bepijawa jopa payabara jume cui aitaconaeinde po jumein paca muxuwetatsi, barapo tsica cartiyo po cartiyo imoxoyo jume tsecae. <sup>23</sup> Maisa ichichipan xua painya neyaputaewa tsane xua Timoteo bayatha copatatsi jiwĩ pecubi bo weya. Barapon be wayapin watsicotaein pejume cowũntsixaerũ Jesucristo. Ichaunxuae bapon taxantha patopaena bapon methaunxuae nebarũ iya tsane painya xainya beya xua equeicha tapaca siwa ponaewa tsainchi.

<sup>24</sup> Painta jacobare daxita pomonaetha painya nepaca canamataxeinaewi. Irũno painta daxita jacobare pomonaetha pejume cowũntsiwirũ Jesucristo. Italia nacua-monaepiwi barapomonaetha paca jacobae, pomonaetha irũ pejume cowũntsiwi.

<sup>25</sup> Barabũ Nacom daxita pam bi-chocono paca yawenaena pia painya nepaca caantobewaxae.



## Meje Po Carte Santiago Tatina, Pomonaes Jesucristo Pejume Cowuntsiwi Tatinatsi

### Meje yabara poxonaes Santiago tamropata pitaba xua tatina pomonaetha pomonaes pejume cowuntsiwi pomonaes xua taju jinompa

**1** Xan, Santiago ponxaein Nacom amanaya pia petanacuichin tatsin iru Jesucristo pon jiwi Pecanamataxeinaein amanaya pia petanacuichin tatsinno. Paca jacobatsi pomonaes Israel pia saineiwi tatsi pam, pon caena bayatha tupa. Israel doce po pexantobe xeina, pomonaes caena bayatha werapa.

Paxam barapo doce po bicheito matabuxumonaebe pia sainei jiwi tatsi pam, pomonaes pam xua anoxuae taju nacayatsiya pajinompame daxita nacuantha xua painya pepa nacua weya.

### Meje yabara xua po peyaputae coyene Nacom pia peyaputae coyenewa tatsi

<sup>2</sup>Tamonaes pam pomonaes iru painya nejume cowuntsi jiwi pam Cristo, bewa juntu coyene weiweinaya pajinompam poxonaes bequein pacata ayapube tsaibi tsane ichauxi. <sup>3</sup>Poxonaes pacata ayapube tsounibi ichauxi ichitha beitemaya awiya ayapusuya pajume cocowuntaponame, bapoxonaes payaputaneme xua paantuyapusuya amanayabame pocotsiwa xua paca atene exana. <sup>4</sup>Bara saya beitemaya payabara cui copare barapo coyene xua ayapusuya jume cocowuntapona paca necana exanaenexa beya poxonaes painya juntu coyene Nacom petsita xanepanaenexatsi. Bapoxonaes painya juntu coyeneintha jopa paxeinaem tsane

pocotsiwa pacata seica. <sup>5</sup>Icha caein paxam jiwana pam taseicatsi peyaputae coyene xua jopa yaputaeyo pocotsiwa Nacom ichichipa bapon bewa Nacomtha tsipaebina xua pecatsinexatsi peyaputae coyene pocotsiwa bapon ichichipa. Nacom amanaya catsina nawita barapo peyaputae coyene. Matautano Nacom jopa aenae-aeneya itawetsiyo poxonaes cata. <sup>6</sup>Daichitha jame bewa jume cowuntsiya pawucaename. Matauta jopa bubujeya pawucaeinde Nacomtha. Tsipei pon bubujeya wuca Nacomtha, bapon ichawa beya tamropata nanta xeinapenteiba icha be pocotsi coyene juta ichi poxonaes ba maratsaca joibo ichawa beya caya tsaibi icha muxunene beya. <sup>7</sup>Pon barapocotsi coyeneya exana, Nacom ba jopa catsiyo bapocotsi jitontha, tsipei jopa jume cowuntsiya wucaeyo Nacom pon jiwi Pecanamataxeinaein. <sup>8</sup>Bapon jopa xeinaeyo pocotsiwa Nacom cata tsipei bapon anoxuae caewa yabara nanta xeina. Baya equeicha ichawa yabara nanta xeina. Jopa itacupaetsi xua xanepanaya pepoponaewa.

<sup>9</sup>Pon xua Jesucristo pejume cowuntsin, bapon bequein saya tsiwiyo copei xeina, bapon bewa junte miya juntu coyene weiweinaeya poponaena tsipei bapon Nacom peitabaratha ainya cui penaexanaein. <sup>10-11</sup>Matautano pon copiya copei pexeinaein pontha pon bequein Nacom cui yabara copata xua bapon peacopeibin naexana, bewa junte miya poponaena pejume cowuntsixae Nacom. Poxonaes bapon tupaena, bapana jopa cuenta tupaes po coyene xua bapon pejume cowuntsiwa. Ichitha icha bapon jopa jume cowuntsiyo copei pexeinaexae, bapon saya caeto nacuita ducuaenaebiya bapoxonaes cuenta tupa copei poxonaes nacuita ducuaenaebiya. Barapo coyene icha be pocotsi juta

coyene ya ichi xua pentono. Bara caeto matono weiweinaeya umena. Cotacaya xometo ecoina yawano atsa bichocono, naepanaewan tsaquiwa, pentononno othopeica. Weraweraca xua matono itupana. Pon copei pexeinaein bapon tupaena, saya weraweracaena icha pentono ichi xua weraweraca.

**Meje yabara poxonaе jiwi pemuxujainyabiwatsi xua abe peexanaewa tsane**

<sup>12</sup>Nacom jujuta pomonaetha pomonaе pejume cowuntsiwichi pia yaputaetsi icha barapomonaе xaniwaicha antobetsi. Pon xua acuiyapusuya jume cowuntsiya popona poxonaе bara bequein Nacom juntu coyene jujuta, jame bapon juntu coyene weiweinaeya popona. Poxonaе yapucaewa xua bapon juntu coyene jujutatsi bapoxonaе Nacom yabara wunaе muxu dutsina xua bexa bapon Nacom pia nacia beicha peajuntucoyenyapusuwatha ponaena. Barapo peyabara tsiwunaе muxu dutsiwa Nacom cata pomonaetha pomonaе peantobewixaetsi. <sup>13</sup>Poxonaе ichun matowa juntu coyene jujutatsi xua abe peexanaenexa, bapon jopa bewa nanta xeinae xua metha baxua Nacom cana exana bapontha. Tsipei Nacom bapana jopa jichipae xua abe peexanaewa tsane. Matauta Nacom ichamonaetha jopa bapana cana exanaeyo xua pejuntu coyene jujutsiwa xua barapomonaе abe peexanaewa tsane. <sup>14</sup>Apara jame nama pon juntu coyene jujutatsi abe peexanaenexa, bapon copiya pejuntu coyenetha nanta xeinaeya popona xua abe peexanaenexa. Bapoxonaе poxonaе xaniwaicha juntu coyene jujutatsi xua abe peexanaenexa bara bapon exana xua abe exana. <sup>15</sup>Pon xua abe exana bapon exana po peabe exanaе cuiru

coyene copiya yabara nanta xeina. Icha bapon awiya abe exana ducuaenaеbiya matapainya tupa abe peexanaе cuiru coyene peexanaexae bichocono.

<sup>16</sup>Tamonae pam paxam pomonaе tapaca caantobewichi pam. Jopa painya coutha pananta xeinaeinde xua pajam: “Nacom nemuxujainyaba xua abe taexanaewa tsane”, jopa pajande. <sup>17</sup>Daxita xua wunaе, saya meisa baxuan Nacom nacata itorobica peitaboco wet-sica. Bapon Nacom exanaduba daxitan xua pocotsiwa yonoyonojei tsurubenaе peitabocotha. Nacom jopa bapana ichawa beya pepaеbiya exanaein. Bapon peyapenthiya jinaein mataqueitha yawa merawithano. Jopa exanaeyo icha barapo pecoichan ichi xua pentha tsaibi yawa quirei tsaibi. Dapon aibi pon itacupatsi xua itorobatsi Nacom xua icha coyene ya peexanaewa xua pocotsiwa bapon pia coya ichichipa exana. <sup>18</sup>Poxoru saya Nacom pia coutha ichichipa daxota naca cata peantuyapusuwa po peantuyapusuwa ataya tsiteca. Baxua naca cata poxonaе jume cowuntsiya jume tainchi Nacom pia pexainyei jume diwesi tatsi. Poxonaе Nacom baxua naca cana exana bara waxainchi piamonae jiwi tatsichi xua waxainchi ichamonae toxeinchiya jume cowuntatsi. Xua copiya wajume cowuntsixae, Nacom naca cana exana xua pomonaetsi pomonaе wajuntu coyene xanepanaе jiwichi Nacom nexa. Daxota Nacom tsita be painya cui jiwichi beyacaincha ichamonae.

**Meje yabara pomonaе xaniyeya pepa pejume cowuntsiwi Nacom**

<sup>19</sup>Tamonae pam pomonaе bichocono tapaca caantobe jiwichi pam pacayabara nanta xeinare barapo diwesi xua jeye: Daxita paxam bewa pewunaeya pana najuntu coyene wunaeteibim painya

nenamnaewateibinexa Nacom Pejume Diwesi. Jopa bewa paxainxainyam xua painya cueicueijeinexa barapo diwese ichamonaetha poxonae cataunxuae jopa paexanaem pocotsiwa barapo diwesi itoroba. Yawa jopa bichocono anaepanaya pacueicueijande. <sup>20</sup>Tsipei pon anaepana, Nacom jopa taexanaetsi pexeinya coyene po coyene xua Nacom tsita xanapanatsi. <sup>21</sup>Bara pabarapende po coyene abe peexanae cuiru coyene pocotsiwa pananta xeiname, xuano xua pocotsiwa ichamonaetha pata exaname. Matautano pana cui barapende po peabe exanae cuiru coyene bichocono nawita pocotsiwa ichamonaetha pata exaname. Matautano painya juntu coyeneintha ita ururaquiya pajume cowunde Nacom pia pexainyei jume diwesi tatsi. Tsipei barapo pexainyei jume diwesi xeina peayapuswa xua paca cana exana xua pajuntu coyene panenebiyam abe painya neexanae cuiru coyenein weya.

<sup>22</sup>Itapeta paexande, pocotsiwa Nacom Pejume Diwesitha paeba. Jopa metha bepa saya pajume taemtsipae. Tsipei paxam painya coutha pana namuxuitorobeibichipame icha jopa paexaneibim pocotsiwa xua pajume taibame. <sup>23</sup>Pon xua saya jume tane Nacom Pejume Diwesi yawa jopa exanaeyo pocotsiwa Nacom paeba, bapon be pocotsi jiton tsabocototha nayaitane. <sup>24</sup>Bara nayaitane. Poxonae bapon pona caena bapon yacuina naitabara itaxananaya. <sup>25</sup>Nacom Pejume Diwesi bichocono xanepana. Barapo peitorobi diwesi naca juntu coyene capanepa exana abe waexanae cuiru coyene weya. Ichitha pon jopa junteinaeyo xua pocotsiwa Nacom Pejume Diwesitha paeba, xuano xanepanaya exana ducuaaebiya pocotsiwa barapo diwesi itoroba, bapon

juntu coyene weiweina xua pocotsiwa peexanaexae.

<sup>26</sup>Icha pebin nanta xeina xua daxita jume cowuntsiya exana Nacom nexa, xua daichitha jopa naebato yatacutsiyo poxonae ichamonae catsawiya yabara paebatsi, bapon pia coutha namuxuitoroba. Matautano pocotsiwa jume cowuntsiya exanapona Nacom nexa saya pejumexaei. <sup>27</sup>Pomona xainyeya pepa pejume cowuntsiwi Nacom, barapomona jopa abe exanaeyo Nacom peitabaratha, pon Waxa. Pomona xanepanaya exana bewa iche: Bewa yawenae pomona peacoibi jiwi, yawa bewa yawenaeno powaxi pecuenta werapaewaxichi piseurixi. Matauta jopa bewa exanae pocotsi coyene exana pomona jopa pejume cowuntsiwi Nacom.

### **Meje yabara xua poxonae jiwi bewa daxita tsita najupaetsi**

**2** Tamona pam, pomona iru painya nejume cowuntsixae Jesucristo pon Wanacanamataxeinaein. Bapon Jesucristo pon bichocono pejuntu coyene xanepanaein. Jopa bewa paexanaem painya xantha painya nejume cowuntsixae xua ichun bichocono peainya cuin wnae penaexanaeinxae beyacaincha ichun xua jopa wnae penaexanaeinxae xua daxota bapon catsapin pacana exaname. <sup>2</sup>Ichacuitha metha be pocotsi coyeneya tsipae, xua meje: Metha poxonae paxam panacaetutsipame, bapoxonae iruru pebinbe patopaetsipabe. Metha baponbe joniyaetsipabe baxota. Ichun nacobesi xataba aniyon pocotsiwan daedaena. Matautano paparuwa nama xatata xua mu daedaena. Nama iru ichun acopeibi, nama dapon saya pia penama xatatsiwa taabetsi. <sup>3</sup>Metha pon copei pexeinaein pantenta weyataeya wabichipame. Metha pajam tsipaem bapontha:

“Xote ecare ichaxota pexeinya peecaewatha”, pajam tsipaem. Ichitha nama pontha acopeibi, jopa pantenta weyataeya wabichipaem. Bapontha pajam tsipae: “Bara beuncuiyama, ichacuitha bara saya iratha ecare”, pajam tsipaem. <sup>4</sup>Icha metha baxua paexanaetsipame bapoxonae abeya pananta xeinaetsipame xua jiwi jopa najupaeyo. Bapoxonae paxam pana nacana exaname be pomonae jiwi painya neyabara paebi jiwi pam xua penatsicuentisiwa yabara xua abe peexanaexae.

<sup>5</sup>Tamonae pam pomonae iru painya nejume cowuntsixae Jesucristo, bichocono paca antobetsi. Incane pajume taema, xuaje: Nacom itapeta pomonae peacopeibiwi xua barapomonae bichocono pejume cowuntsinexa. Matautano Nacom catsibina barapomonaetha pocotsiwa bayatha juntana jeba pia peitorobi nacuatheicha pia peantobewixaetsi. <sup>6</sup>Ichitha nama jopa paweyataem pon barapo peacopeibin. ¿Eta xua metha baxua paraichim? Pomonae ba copei pexeinaewi pomonae paweyataneme barapomonae ba daunweya paca itoroba nama. Matautano barapomonae ba pentacaponae peitabaratha paca capona xua abeya pia paca necayabara paebinexa. <sup>7</sup>Barapomonae pomonae copei pexeinaewi apara Jesucristo abe yabara paebatsi, pontha pon waxainchi wajume cowanta dubenanaebiyaxaetsi, naca jei, “Cristobarumonae”, naca jei.

<sup>8</sup>Icha ichichipa paexaname Nacom peitorobi jume coyenewa, moya pejume coya paexande xua Nacom Pejume Diwesitha jeye: “Paantobeinde ichamonae, pomonae painya nepaca tsicuarabu enaewi icha paichim xua painya coutha pana naantobem”, jei xua barapo diwesitha. Moya bara beta

paexanaename. <sup>9</sup>Poxonae ichamonae ainya cui pacana exaname xua beyacaincha ichamonae, bapoxonae paxam apara abe paexaname. Matautano apara paxam pomonae abe painya neexanaewi, tsipei jopa paexanaem pocotsiwa Nacom penajume caitorobi coyenewatha paeba. <sup>10</sup>Icha ichun jume jejei xua peexanaewa tsane pocotsiwa Nacom penajume caitorobi coyenewatha paeba, daichitha bara caewiyo seicanaya xua peexanaewa tsane, bapon Nacom tsita natsicuentatsi xua abe peexanaexae. Bara bequein saya caewiyo seicanaya, barapara Nacom tane xua daxita tsita abetsi. <sup>11</sup>Nacom namchi: “Jopa panasi cui wainmeinchinde poxonae jitha painya neenaewatha”, jei Nacom. Yawa namchino: “Jopa bexubinde ichun”, jei Nacom. Ichitha icha bequein jopa panasi cui wainmeinchim, daichitha pabexubame ichun baraxua be poxonae daxita abe pacayabara exaname Nacom penajume caitorobi coyenewa. <sup>12</sup>Paxam bewa beta xanepanaya papaebim. Matautano bewa beta pajinompam. Tsipei bexa tsane Nacom paca yabara paebina painya nenatsicuentisiwa abe painya neexanaexae bapontha. Paxam jopa payabara jume cuiya exanaem pocotsiwa Nacom itoroba penajume caitorobi coyenewatha. Icha barapo coyene exanatsi naca cana exana xua wapanenebiwatsi Nacom beya. <sup>13</sup>Pomonae jopa yabara nantanuweya nanta xeinaeyo xua ichamonae peyawenaenexa tsainchi xuya Nacom bara jutiya ichane barapomonaetha. Ichitha pomonae xua yabara nantanuweya nanta xeina xua ichamonae peyawenaenexa tsainchi, xuya Nacom bara jutiya ichane po matababitha jiwi yabara paebinchi xua penatsicuentisiwa xua abe peexanaexae.

**Meje yabara xua Nacom pejume  
cowuntsiwichi pia pexeinya  
peexanae coyenewan tatsi**

<sup>14</sup>Tamonae pam, iru pomonae painya nejume cowuntsixae Jesucristo. ¿Eta xua metha tsipae? Metha ichun jei: Xan Nacom Pejume Diwesi jume cowuntan, jei, ichitha jopa betiya xanepanaya exanaeyo. ¿Bara metha bapon najuntu coyene capanepaetsipa Nacom beya? Aparajume tsipae, jopa najuntu coyene capanepaetsipae. <sup>15-16</sup>Ichacuitha metha tsipae, metha panantautsipame pomonae pejume cowuntsiwi Jesucristo painya xantha. Barapomonae metha taaibichipaetsi paparuwan xua pocotsiwa aque nexa, yawa xua taseicatsi pexaewa penabanaewanexa. Metha ichun pon painyamonaе jiwana jiton bapomonaetha jeye: “Bara junteма panawibiyama, paparuwa panama xatabareno, bara beta panabanareno”, jei. Daichitha bapon jopa catsiyo barapomonaetha pocotsiwa barapomonae nantawenona xua pejinompaewa nexa. Baxua bapana ba ichamonae jopa yawenaetsi icha saya ba u xua paebatsi. <sup>17</sup>Barichi xua pon pejume cowuntsin Nacom Pejume Diwesi. Icha bapon jopa yawenaeyo ichuntha pontha pon nantawenona ichawa xua pia peponaewa nexa, bapoxonae bapon pia pejume cowuntsiwa Nacomtha be cayabara juntemaina.

<sup>18</sup>Ichacuitha jiton jeye: “Ichamonae bichocono jume cowunta pocotsiwa Nacom itoroba bequein jopa yawenaeyo ichamonae. Seicaya ichamonae bichocono beta yawena ichamonae bequein jopa beta jume cowuntsiyo pocotsiwa Nacom itoroba”, jei. Xan ponxaein Santiago jume notsin bapontha: “Pon beta jume cowunta jopa itacu-paetsi xua netsita exana xua bapon

xaniwaicha jume cowunta pocotsiwa Nacom itoroba poxonae bequein jopa beta yawenaeyo ichamonae. Bapoxonae xan tsita exanan bapontha xua xaniwaicha jume cowuntan pocotsiwan Nacom itoroba poxonae exanan pocotsiwa Nacom neitoroba xua poxonae yawenan ichamonae”, jan tsane. <sup>19</sup>Xam jume cowuntame xua bara compa pepa Nacom popona, xua ichun bapocotsin aibi. Baraxua bara beta nanta xeiname. Ichitha baxua iru caurimonae jume cowunta yawa bichocono pijunuwi jijiyei. <sup>20</sup>Xam bapocotsim pocotsin ba jopa peyaputaеin, incane jume taema. Pon paeба xua pinae jume cowunta pocotsiwa xua Nacom itoroba, xua dai-chitha jopa beta exanaeyo ichamonae nexa, bapon pia pejume cowuntsiwa bara be cayabara juntemaina. <sup>21</sup>Nacom tsita juntu coyene xanepanatsi Abraham, pon wamo susatopin, pon caena bayatha tupa. Bapon Abraham Nacom jopa tsita natsicuentisichi xua abe peexanaexae, ichitha yabara jume cowuntsiya peexanaexae pocotsiwa Nacom itoroba. Bapon pexanto isoto beya capona, petautsinexa xua petuxusi exanaenexa Nacomtha, po pexanto tatsi pewun Isaac. <sup>22</sup>Anoxuae payaputaneme xua Abraham jume cowuntsiya exana pocotsiwa Nacom itoroba. Daxota bapon tsita itapeinya xeina xua poxonae exana baxua xua yatsicaewa bara xeina pepa pejume cowuntsi coyenewa. <sup>23</sup>Nacom exana xua caena bayatha Pejume Diwesitha jeye: “Abraham jume cowuntsiya exana pocotsiwa Nacom itoroba. Daxota Nacom tsita juntu coyene xanepanatsi jopa penatsicuentisixae xua abe peexanaexae bapontha”, jei Nacom Pejume Diwesi. Barapo Nacom Pejume Diwesi tatsi xainyei, tsipei Nacom exana baxua. Daxota caena bayatha Abraham yabara jeichichi: “Apara Abraham Nacom pia jiton tatsi”, jeichichi.

<sup>24</sup>Anoxuae bara payaputaneme pocotsiwa Nacom tsita juntu coyene xanepanatsi xua jopa tsita natsicuentisichi xua abe peexanaexae pon exana pocotsiwa Nacom itoroba, jopa meisa metha poxoru pejume cowantsixae. <sup>25</sup>Bara cana ichiru Nacom petsiriwatha powa nasi cui matacaeta pebiwatha, pia paratixichi, powa pewun Rahab, powa caena bayatha popona. Nacom tsita juntu coyene xanepanatsi barapowatha xua poxona peyawenaexae icha pebinbetha ponbe peitorobinchibe xua poxona peyantabinexabe tomara. Barapowa barapo pebinbe bupana etatsibe pia botha poxona baponbe jeitompatsibe ichamona. Bapoxona pirapaeyo bapowa baponbe capanepatsibe icha namto iya xua tomara weya. <sup>26</sup>Daxota anoxuae paca tsipaebatsi, icha pepon ba jopa xeinaeyo pejumope, ba pepon tupa. Barichi icha pebin jume cowanta Nacom daichitha jopa exanaeyo pocotsiwa Nacom itoroba bapoxona pia pejume cowantsiwa bara be cayabara junte maina.

### Meje yabara pocotsiwa xua peebatotha pepaebiwa

**3** Tamona pam pomona iru painya nejume cowantsixae Jesucristo. Paxan pajume tan xua pinmonae painyamonae jiwana ichichipa xua penaexanaewa pomonaewi pecuidubiwi Nacom Pejume Diwesi. Daichitha pinmonae jopa bewa naexanae pomonaewi pecuidubiwi. Bayatha daxita paxam payaputaneme xua paxan pacueicueijan tsurubenanaebiyon Nacom Pejume Diwesi xua jiwu jopa bewa abe exanaena. Daxota poxona baxua pacueicueijan xua daichitha abe paexanan bapoxona Nacom bichocono pana peraxa jubina beyacaincha xua poxona bapon cana

exanaena ichamonaetha. <sup>2</sup>Daxita waxainchi ichichipatsi nawita xua abe waexanaewa. Anoxuae payaputaema, icha ichun jopa abe exanaeyo xua poxona paeba bapon jame penthuthu yapu xanepanaein. Matautano bapon itacupatsi xua najuntu coyene itoroba daxita pia pepontha xua xanepanaya peexanaewa abe peexanaeyainwa. <sup>3</sup>Poxona waxainchi cawayu wano atatsi penainto xua wanaca cui jejeinexa baraxua apara xua wacafebabinxaxa daxita pepon ichaxota waponawa. <sup>4</sup>Barichi payabara nanta xeinare jera po nae pin nae. Bara bequein bichocono pin nae yawano bara bequein po joibo pin joibo capubabiya tsaibi, daichitha pon tafecaeca bapon cafebabecapona ichawa beya xua ichaxota ichichipa peponawa xua xoyotha tsiwiyo tsecae xoyo ira werucueina. <sup>5</sup>Icha jera ichi po nae pin nae xua dapocotsiwiyotha cafebabecapona, barichi peebato xua dapocotsi ebatiyo tsecae pepon nexa. Daichitha barapo ebatiyotha itacupatsi xua yabara eetaponaeya paeba pia peexanaewa poxona ichamona aebatsi. Barichi unu itacupatsi xua petaxuiwa dacotsi iteretiyotha. <sup>6</sup>Icha nawa iteretiyo cana ichi unu, peebato bara ichiya exana daxita coyeneintha. Bequein waebato peyauyo tsecae xua wapepon jiwana xua pin xaintotsi, ichitha bara itacupatsi xua bichocono abe exanatsi naca cana exana. Waebato naca cana exana xua waexanaewa daxita abe waexanae cuiru coyenein xua poxona wacueicueijexae waebatotha xua caurimona pia pentacaponaein tatsi wanaca cui itorobixae. <sup>7</sup>Jiton ba itacupatsi xua ita coxone exana daxita duweimona, pepupunaewi, jomon yawa menepipichiwanno. Daxita baxua i daxua jiton ba ita coxone exana. <sup>8</sup>Nama peebato jopa be baraichichi. Jopa wanaca yapu xanepanaewa xua

waebato cuidubatsi xua jopa abe jume pepaebiwa tsane. Waebato bichocono abe tsecae. Itacupatsi xua jiwi cana exanatsi xua ichamonae pejumetaya anthuthutanewa, icha jomo ichi xua jiwi ba atene exanatsi pewanatha xua ichacuitha ba jiwi tupa exanatsi xua pewano tsapa pexeinaexae. <sup>9</sup>Barapo ebatatha wunaie jaintatsi Nacom pon Waxa. Matautano abe yabara paebatsi pebiwi barapo ebatatha. Ichitha barapo pebiwitha Nacom caena bayatha forota daxota barapo jiwi pia juntu coyene tatsi jupa icha Nacom pia juntu coyene tatsi ichi. <sup>10</sup>Matautano barapo coibototha jume pichapa xua wunaie pejainchiwa Nacomtha, xuano xua abeya pepaebiwa. Tamonae pam pomonae iru painya nejume cowuntsixae Jesucristo. Jopa bewa barapocotsi coyenewa paexanaem xua poxonae Nacom wunaie pajaintame xuano xua jiwi abe payabara paebame. <sup>11</sup>Po mera natsibotarucua ira buxupana wetsina, poxonae mene jujuina barapoxonae caena yawa jopa muxuna jujuinaeyo po mera xeica yawa po mera atsaxa. <sup>12</sup>Tamonae pam bara pocotsi juta coyeneya ichi poxonae waxainchi ubatsi. Higuera nae jopa ba nacoichiyo olivo nae thei, po pethei aceituna thei matawun. Yawano uva unbototha jopa ba nacoichiyo higuera nae thei. Barichi barapo mene po mera mene natsibotarucua poxonae mene jujuina barapoxonae caena yawa jopa muxuna jujunaeyo po mera xeica yawa po mera atae. Barichi waebatotha jopa bewa xeinaetsi ainya jume coyenewabe po jume wunaie yawa po jume abe.

**Meje yabara xua pepa pexainyeiwa xua peyaputae coyenewa**

<sup>13</sup>Icha painya xantha popona pon bichocono peyaputaein xua yawa pecoxonaein bapon bara bewa moya

xanepanaya beta poponae yawa bara bewa moya ita ururaquiya poponae. Beta peexanaexae jiwi peitutha, bapoxonae jiwi tane xua bara bapon pon bichocono pepa peyaputaein. <sup>14</sup>Metha painya juntu coyenetha paxeiname peuwiwa xua paca juntu coyene atsaca exana ichamonae. Yawa metha painya coutha pana nata exaname painyawan pia jiwi wunaie paca yabara paebichi xua pia ainya cui paca exanaetsi xua beyacaincha ichamonae. Icha paxeiname barapo peyaputae coyenebe bapoxonae painya xoba paaebame ichamonae painya pepa neyaputae jiwi pamxaem. Poxonae baxua papaebame apara saya panaerabame xua jopa paxainyam. <sup>15</sup>Apara barapo peyaputae coyene xuaunxuae po peyaputae coyene yabara paca tsipaebatsi barapo coyene apara jiwi nanta xeina barapo cae pin nacuathe pomonae jopa pejume cowuntsiwi Nacom. Barichi barapo peyaputae coyene cauri nanta xeina. Apara barapo peyaputae coyene Nacom werena jopa ponaeyo. <sup>16</sup>Daxota poxonae ba jiwi pejume uwiwa xeina ichamonaetha yawa u penata exanae coyene piawan bapoxonae ba jiwi jopa xanepanaya penanta xeinaewa yawa exana daxita abe peexanae cuiru coyenein. <sup>17</sup>Nama pomonae xua peyaputae coyene xeina xua po peyaputae coyene Nacom werena pona, barapomonae copiya juntu coyene xanepanaya jinompa yawano barapomonae jopa naita aenae-aeneyo saya juntea pejinompaexae. Yawa barapomonae yabara jume baru cui itura jina pocotsiwa ichamonae paeba. Yawa jume jejei xua peexanaewa pocotsiwa ichamonae itoroba. Matautano nantanuweya yabara najuntu coyene xeina peyawenaenexa tsaiibi tsane ichamonae. Matautano

barapomonae wūnaeya xanepanaya exaneiba ichamonae nexa xua jopa ichawa beya nanta xeinaeyo xua saya xaniwaichiya exana. <sup>18</sup>Pomonae xua bichocono ichichipa xua jūntema pejinompaewa barapomonae cana exana ichamonaetha, xua ichamonae jūntema jinompa xua daxota barapo ichamonae bichocono xanepanaya betiya exana dubenanaebiya.

**Meje yabara pomonae ichichipa  
naexana pomonae jopa pejume  
cowūntsiwi piamonae tatsi**

**4** ¿Eta werena pona barapo coyene xua pana najume matsonobame? ¿Yawano eta werena pona barapo coyene xua pana nabame? Apra barapo coyenebe naforoba painya jūntū coyeneintha ichaxota paichichipame xua abe painya nenanta xeinaewa. <sup>2</sup>Ichawa paichichipame ichitha jopa paxeinaem daxota ichūn anaya pabexubame. Ichawa payabara cui uwame, ichitha jopa paca itacūpaeyo xua paxeiname daxota anaya pana nayabara bame. Jopa paxeinaem pocotsiwa paichichipame tsipei Nacomtha jopa pawūcaem. <sup>3</sup>Poxonae Nacomtha payabara wūcame pocotsiwa paichichipame, jopa Nacom paca catsiyo tsipei jopa xanepanaya pawūcaem, saya painya nata wūcaexae pocotsiwa xua abe painya neexanaewa tsane. <sup>4</sup>¡Maisa paxam caurimonae pia pepuna jinompaewichi pam! Payaputaneme xua pomonae ichichipa naexana pomonae jopa pejume cowūntsiwi Nacom piamonae tatsi, barapomonae apra ba Nacom peaitafaetabiwichi. Daxota poxonae paichichipame xua panaexaname barapo cae pin nacuamonaepiwi piamonae tatsi, apra panaexaname Nacom pia peaitafaetabiwichi tatsi pam. <sup>5</sup>Daxota Nacom Pejume Diwesi

jeye: “Nacom asiwiya antobe po jumope tūnaxū naca cayawa exanaeya jinompa exana”, jei. <sup>6</sup>Ichitha Nacom pia peantūyapusūwatha naca yawena xua jopa abe waexanaewa tsainchi. Nacom Pejume Diwesitha jeye: “Nacom jopa yawenaeyo pomonaetha pomonae jiwi peabiwi. Ichitha pia peajūntūyapusūwatha yawena pomonaetha pomonae ita ururanaya jinompa xua jopa atsaquiyo”, jei. <sup>7</sup>Pajume jejande xua Nacom paca itoroba yawa paexande. Jopa pamuxu jejande cauri pia pentacaponaein tatsi xua paca tsipaeba. Bapoxonae bapon naetsiricuaena painya xainya weya. <sup>8</sup>Nacomtha patsipaebare, bapoxonae Nacom paca yawenaena. Paxam pomonae abe peexanae jiwi pam, tsipei Nacom paantobem yawa pamuxuna antobem po peabe exanae coyenewa barapo cae pin nacuathepiwi exana. Bara panacui barapende barapo abe painya exanae coyene. Yawano Nacom patsita najūntū coyene xanepana exande. <sup>9</sup>Abe painya neexanaexae, pana najūntū coyene acaurande, pawecoyande, yawa panantū exabare. Poxonae pajūntū coyene weiweiname xua painya neexanaexae pocotsiwa barapo cae pin nacuathepiwi exana, bara equeicha caewa pajūntū coyene wecoyande xua painya neauraxae. <sup>10</sup>Nacom pon jiwi Pecanamataxeinaein pabarū cui itura jinare xua jopa ainya cui pana nacana exanaem. Bapoxonae Nacom ainya cui paca cana exanaena.

**Meje yabara xua jopa bewa  
ichamonae yabara paebichi  
tsainchi xua penatsicuentsiwa  
xua abe peexanaexae**

<sup>11</sup>Pomonae painya nejume cowūntsi jiwi pam Jesucristo, jopa bewa ichamonae yabara paebichi tsainchi xua penatsicuentsiwa xua abe peexanaexae.



Pon abe yabara paeba pontha pon Cristo pejume cowuntsindɛ, bapon muxuna abe yabara paeba Nacom pia peitorobi diwesi. Bapon jopa jume cowuntsiyo pocotsiwa xua barapo diwesi itoroba xua pinae jopa bewa abe yabara paebichi ichɛn xua xeina penatsicuentisiwa xua abe peexanaexae. Bapoxonae bapon natsicuenta Nacomtha barapo coyenetha tsipei abe paeba nawita. Poxonae bapon abe yabara paeba Nacom pia peitorobi diwesi bapoxonae bapon be jopa exanaeyo po coyene Nacom pia peitorobi coyenewatha itoroba.<sup>12</sup> Apara meisa bapon Nacom pon naca cata pia peitorobi coyenewa. Matautano bapon compa pon jiwi peyabara paebin xua penatsicuentisiwa xua abe peexanaexae. Meisa saya bapon itacɔpatsi xua jiwi capanepatsi pia nacuatheicha, xua ichacuitha ba jiwi itawetatsi pia nacua weya xua abe peexanaexae. Nama paxam apara jopa paca itacɔpaeyo xua payabara paebame xua ichamonae pia peexanae coyenewa tatsi. Matautano jopa paca itacɔpaeyo xua jiwi pacapanepame Nacom pia nacua beicha tatsi, xuano xua jiwi ba ichacuitha paitawetame Nacom pia nacua weya tatsi abe peexanaexae.

**Meje yabara xua cataunxuae  
jopa nayaputaeyo pocotsiwa  
xua baya nexa tsane**

<sup>13</sup> Anoxuae pajume taema xuaje, xua paxam ba pajam: “Anoxuae, ichacuitha icha jopa anoxuae tsipae, baya tsane paponaein icha tomaratha. Ichacuitha icha jopa barapo tomaratha tsipae, paponaein icha tomaratha. Baxota pata tha cae wei yapu othopaetsi, pata caenaeta dubenanaebiyaetsi, yawa pata paratixi caetuba dubenanaebiyaetsi”, xua pajam.<sup>14</sup> Jopa baxua pananta xeinaeinde tsipei jopa payabara

yaputaem pocotsiwa baya painya nejinompaewa tsane. Barapocotsi jɔta coyeneya pana natsicotaneme, icha nobo ichi, xua ba caeto nobo tsuncuae equeicha caewanaya. Barichi jiwi bara caeto jinompa, equeicha werapa.<sup>15</sup> Jame bewa pocotsiwa papaebim xua jeye: “Icha Nacom pon jiwi Pecanamataxeinaein ichichipa xua wajinompaewa, moyo jinompaeinchi, yawa exanaeinchi pocotsiwa xuaje, ichacuitha xua ichawano”, xua bewa jei.<sup>16</sup> Ichitha nama paxam, jopa baxua papaebim pocotsiwa icha Nacom ichichipa. Saya paaebame poxoru paichichipame xua painya neexanaewa pocotsiwa painya coutha paichichipame. Icha poxonae paichimje xua poxonae paaebame bapoxonae bara apara abe peexanae cuiru coyene paexaname.<sup>17</sup> Pon xua yaputane xua beta peexanaewa, xua daichitha jopa baxua exanaeyo, apara bapon bara abe peexanae cuiru coyene exana.

**Meje yabara xua pemuxuwetsi  
coyene pomonaetha  
pomonae copei pexeinaewi**

**5** Pomonae copei pexeinaewi pam, pajume taema xuaje: Payabara siwa wecoyande yawa pana nantanuweya namtsebare xua painya nepaca tsita jopaexae pocotsiwa xua jopa xaexaenaecaeyo, pocotsiwa xua paca atene exana.<sup>2</sup> Daxita xua xuan paxename baxuan daxita tsabana, yawa painya pexeinya pabɔbɔrɔn xua pemɔ itane wɔnaewan baxuan daxita ofon xane.<sup>3</sup> Painyawan xua pocotsiwa pewɔn oro nain yawa xuano pocotsiwa pewɔn plata nain, daxita baxuan tasibounatsi. Baxua paca tsita naitapeinya xeina xua paxam jopa pacatsim ichamonae saya asiwiya pantaropeicha xexeinaponame barapo copei. Barapo copei pajebame anoxuae. Ichitha po mataque-

itha poxonae Nacom yabara paebina jiwī xua penatsicuentisiwa xua abe pe-exanaexae bapontha, barapo matabi imoxoyo tsane. Nacom weraweraca exana barapo copei xua painya copei, icha isoto ichi xua tauta exana xua topowa. Bichocono copei pacaetubame bequein jopa baxua paca yawenaeyo painya nepanenebiyaewa po mataqueitha nexa po mataqueitha Nacom yabara paebina pocotsiwa jiwī pia peexanae coyenewan ichacuiitha xua metha wunaē, ichacuiitha xua metha abe. <sup>4</sup>Jopa pantomatsim pomonaetha pomonaē pacata nacuita poxonaē pacata naweta pexaewa. Painya caibixae barapo pentoma barapomonaē paca yabara namtsebiya wawai. Yawa Nacom pon jiwī Pecanamataxeinaein, pon daxita pia peitorobi coyene pexeinaein bapon daxita baxua jume tane xua barapomonaē namtsebiya wawai. <sup>5</sup>Barapo irathe bichocono copei paxeina dubenanaebiyame, matautano paexana dubenanaebiyame pocotsiwa xua paca jūntu coyene weiweina exana. Bichocono copei paacabem po mataqueitha poxonaē Nacom paca jutebina, icha jiwī ichi xua natsixuruwei naxinyaba exana vaca xua bexa pebexubinexa tsane. <sup>6</sup>Paxam pomonaē copei pexeinaē jiwī pam abe payabara pae-bame pomonaē pejūntu coyene xeicaē jiwī. Yawano pajutebame barapomonaē, bequein jopa itacūpaetsi xua pia coutha penayawenaewa.

**Meje yabara poxonaē Santiago  
jei: “Jopa paaitaconaēinde  
poxonaē bequein ichamonaē  
abe pacata exana”, jei**

<sup>7</sup>Tamonaē pam pomonaē irū Jesucristo painya nejume cowūntsixae. Beitatemaya pawūnaē eware pon jiwī Pecanamataxeinaein, pon Cristo. Jopa paaitaconaēinde poxonaē pawūnaē ewatame xua poxonaē bequein

ichamonaē abe pacata exana. Barapo coyene baxua bara paichinde, icha pon pabi pexeinaein ichi poxonaē beitatemaya ewata xua naweta xua naxainwaeta. Bapon jopa aitaconaeyo poxonaē beitatemaya ewata xua ema taatsanaeinchi pia pabi. <sup>8</sup>Paxam irū bara paichinde. Jopa paaitaconaēinde poxonaē pawūnaē ewatame pon jiwī Pecanamataxeinaein. Pana najūntu coyene tsacabare xua jūntema painya nejinompaewa tsane, tsipei pon jiwī Pecanamataxeinaein bara nama imoxoyo pewūnaeyo tatsoponaetsi xua pepatopaewa.

<sup>9</sup>Tamonaē pam pomonaē irū Jesús painya nejume cowūntsixae. Jopa caemonaē nantiya aitaconaeya pana nayabara paebinde xua abe painya nenata exana dubenanaebiyaxae. Icha baxua paexaname paxam panatsicuentame Nacomtha tsipei Nacom pon jiwī peyabara paebin xua penatsicuentisiwa xua abe peexanaexae. Nama imoxoyo tsoponaē poxonaē Nacom itorobina xua jiwī peraxa jūbebinchi pomonaē abe peexanaewi.

<sup>10</sup>Tamonaē pam matha pataema po diwesi yabare: Pomonaē Nacom peitorobi jume pepaebiwi pomonaē caena bayatha jinompa, barapomonaē bichocono atene exanatsi ichamonaē. Bequein bara barapomonaē atene, daichitha awiya jopa aitaconaeyo poxonaē abe taexanatsi ichamonaē. Awiya barapomonaē pomonaē Nacom peitorobi jume pepaebi jiwī ba cueicueijeji tsaibi Nacom nexa, pon jiwī Pecanamataxeinaein. <sup>11</sup>Waxainchi ba yabara nanta xeinatsi barapomonaē, xua bichocono jūntu coyene weiweina poxonaē beitatemaya awiya jume cowūntsiya exana dubenanaebiyaxae poxonaē bequein abe taexanatsi ichamonaē. Bayatha caena pajume taneme xua pinaē pon pewūn Job

jopa aitaconaeyo Nacomtha poxonae bequein Nacom yaperaxaeya jume cowũnta ducuaanaebiyatsi. Mataũtano payaputaneme xua Job equeicha matapainya beta taexainchi Nacom, pon jiwi Pecanamataxeinaein tsipei Nacom jiwi nantanuweya peyabara nantũ coyene xeinaeinchi xua jiwi peyawenaenexatsi.

<sup>12</sup>Jame xuaje ainya cui: Jopa Nacom pawũn caunutsinde xua bapon painya nepaca taewa tsane xua xaniwaicha painya nepaebiwa poxonae yabara pana natsiwana wũnae paebame ichamonaetha pocotsiwa bexa painya exanaetsi. Poxonae pajam: “Je”, pam, bara bara paichinde. Poxonae pajam: “Bara”, pam, bara moya bara jopa paexanaeinde. Bapoxonae jopa Nacomtha panatsicuentisim tsane abe painya neexanaexae. Barichi jopa itaboco pawũn caunutsinde, yawa irano jopa pawũn caunutsinde, mataũtano jopa icha wũnno pawũn caunutsinde.

<sup>13</sup>Icha ichũn pon painyamonaе jiwana jiton ajũntũcoyenetane xua abe petaexanaexaetsi ichamonaе, barabũ bewa bapon Nacomtha wũcaena xua peyawenaewa tsainchi. Icha ichũn jũntũ coyene weiweina, barabũ bewa bapon peweixi naxũnae xua Nacom wũnae jainchiya peyabara naxũnaewatsi. <sup>14</sup>Icha ichũn atene, bewa pawabim penapatae jiwi, pomonaе pecanamataxeinaewi xua canamataxeinatsi pomonaе Nacom pejume cowũntsiwi. Bapoxonaе barapomonaе bewa tawũcaena xua pon peatenein petawũcaewatsi xua Nacom axaibi peexanaenexa. Bapoxonaе barapomonaе bewa juinya penasiwatha mata caxuebina Cristo pewũnta pon jiwi Pecanamataxeinaein. <sup>15</sup>Poxonaе barapomonaе Nacomtha wũca bewa yabara jume cowũntsiya wũcaena xua bara Nacom pon

jiwi Pecanamataxeinaein axaibi exana bapontha. Bapoxonaе pon atene jume tsane. Mataũtano pon Wanacanamataxeinaein, bapon pon atene axaibi exanaeinchi. Icha pon atene abe peexanae cuiu coyene exana baxua Nacom cayabara jũntemainaena. <sup>16</sup>Daxota paxam, caemonaе nantiya pana natsipaеbeibare xua poxonaе abe nantiya pana nata exaneibame, pajam tsaibinde: “Pin uran, yaitama jopa xapain cata exanaetsi necayabara jũntemainare”, pajam tsaibinde. Pon Nacom peitabaratha tatsi jũntũ coyene xanepanaya popona, poxonaе bapon Nacomtha wũca bichocono peayapusũwa xeina xua daxota Nacom beta cana exana bapontha. <sup>17</sup>Nacom peitorobi jume pepaеbin Elías, bapon bara jiton bara wanaca cui jũpaein, pon caena bayatha popona. Poxonaе bapon Nacomtha matowa wũca xua jopa peruneicaewa tsane, bapoxonaе jopa duneicaeyo tres po weibe yawa equeicha bara caeto nama. Bapoxonaе barapo nacuatha pin jainbo nacua tsurucuae. <sup>18</sup>Bapoxonaе, poxonaе equeicha Nacomtha wũca, bapoxonaе equeicha duneica yawa pexuwiwan xanepanaya nawetsiya xua.

<sup>19</sup>Tamonaе pam metha ichũn pon paxam jiwana abe exanapona bequein yaputane xua bewa exanaena pocotsiwa pexainyeiwan. Icha ichũn yawena bapontha xua equeicha caewa beta peexanaewa tsane bapon, pon yawena, bara beta exana. <sup>20</sup>Pon yawena bewa yaputaena xuaje: Po jiton xua cana exana ichamonaе xua penacui barapentsiwa abe peexanae cuiu coyenein, xua equeicha pejume cowũntsinexa Nacom, barapon jũntũ coyene capanepa exana barapomonaе petũpae cuiu coyene weya. Mataũtano bapon jũntũ coyene yawena xua Nacom peyabara jũntemainaewa xua barapomonaе abe pia peexanae

cuiru coyenein tatsi xua bequein bi-  
chocono nawita.

Baja Santiago.

## Meje Po Carte Copiya Pedro Tatina, Pomonae Jesucristo Pejume Cowuntsiwi Tatinatsi

### Meje yabara poxonae Pedro tamropata pitaba xua tatina pomonaetha pomonae Jesucristo pejume cowuntsiwichi

**1** Xan, Pedron, Jesucristo pia peitorobi jiwi jiwana tatsin. Daxita barapomonae pam pacata tinatsi pomonae painya nacua nacayatsiya pawu jinompame xua ichamonae painya nepaca yotabixae. Pomonae painya nejinompaewi pam Ponto nacuatha, iruru pomonae painya nejinompaewi pam Galacia nacuatha, iruru Capadocia nacuatha painya nejinompaemdu, iruru Asia nacuatha painya nejinompaewi pamdu, iruru Bitinia nacuatha painya nejinompaewi pamdu. <sup>2</sup>Caena bayatha poxonae aena, bapoxonae Nacom paca itapeta. Barapon Nacom, pon Waxa, paca yaputane xua pia pexui tatsi pana naexaname. Nacom pia Pejumope tunaxu tatsi paca exana xua bichocono pajuntu coyene xanepaname Nacomtha painya neexanaenexa pocotsiwa Nacom paca itoroba. Poxonae Jesucristo paca tsitupa naetotha jana pichapabarena painya nejume cowuntsinexa Jesucristo pocotsiwa bapon paca itoroba. Bapoxonae pajuntu coyene xanepaname Nacomtha. Barabu Nacom bichocono paca yawenaena pia paca ncaantobewaxae. Matautano barabu barapon juntema jinompa paca exana.

### Meje yabara xua po coyeneya bewa beta jinompaetsi Jesucristo nexa

<sup>3</sup>Nacom wunae jaintatsi pon Jesucristo Paxa tatsi. Jesucristo bapon pon Wanacanamateinaein. Nacom jeichichi: “Nacom maisa pajuntu

coyene weiweinan xua pena juntu coyenein patanecatsibiwam xua poxoru bichocono nantanuweya pana yabara nanta xeiname. Baxua painta exaname poxonae Jesucristo equeicha asu exaname petapae cuiru coyene weya”, jeichichi. Jesucristo naca cana exana xua wunaeya jume cowuntsiya ewatatsi xua Nacom naca catsina peajuntuayapusuwa. <sup>4</sup>Bara Nacom paca catsibina pocotsiwa paca juntana jeba pia nacuatheicha pocotsiwa xua jopa itacupaetsi xua peweraweracaewa xua matauta jopa abe caquiyo. Matauta jopa abe tsoponaeyo xua jopa daichiyo icha pentono ichi. <sup>5</sup>Nacom paca yapu eena pia peayapusuwatha painya neyabara jume cowuntsixae bapon. Barapon Nacom paca capanepa xua jopa painya neatenenexa xua abe painya neexanaexae xua poxonae daxita barapo nacie weraweracaena.

<sup>6</sup>Daxota pajuntu coyene weiweiname, bara bequein saya cae dapaeyobetha paca ajuntucoyenerewe exana xua ichamonae abe painya nepacata exanaexae matowa. <sup>7</sup>Barapo painya nepaca caajuntucoyenerewe exanaewan piraichi pacata exana baxua xua pia yaputaetsi icha xaniwaicha bara metha pajume cowuntame Jesucristo. Po penainto pewun oro nainto, jiwi ba piraichi isototha tauta peyaputaenexa icha bara metha pepa oro nainto. Po pejume cowuntsiwa jiwi xeina bichocono daunwei beyacaincha oro nainto bequein ichamonae juntu coyene jujuta xua abe peexanaenexa. Barapo oro nainto weraweraca. Barapoxonae poxonae Jesucristo patopaetsica xua awiya beta painya nejume cowunta dubenanaebiyaexae daxota Nacom wunae paca jainchina. Matautano paca cana exanaena xua peainya cui jiwi pam. Matautano paca cana exanaena

xua jiwi paca baru cui itura jinaena painya nejume cowuntsiwixae.

<sup>8</sup>Paxam paantobem Jesucristo bara bequein jopa bapon pataem. Matautano anoxuae pajume cowuntame bequein jopa bapon anoxuae pataem. Paxam bichocono pajuntu coyene weiweiname. Bara bequein barapo pexeinya pejuntu coyene weiweinae coyenewa bayatha payabara paebame daichitha awiya pacata seica xua po jumetha beta payabara paebame barapo peajuntucoyenesuwa. Daxota bichocono pajuntu coyene weiweiname tsipei pananta xeiname xua painya nexainaewa tsane pebaru cui itura jinaewa Nacom pia nacuatheicha.

<sup>9</sup>Painya nejume cowuntsixae Jesucristo, Nacom paca juntu coyene capanepaena xua jopa painya neatenenexa xua abe painya neexanaexae.

<sup>10</sup>Caena bayatha pomonae Nacom pia peitorobi jume pepaebiwi yabara jejeitaponeiba nawita barapo pecapanenebiyae diwesi, xuano yabara yainyabeiba nawita. Barapomonae yabara paeba pecapanenebiyae diwesi, xua Nacom paca catsibina barapo diwesi pia paca necaantobexae.

<sup>11</sup>Nacom pia Pejumope tunaxu tatsi, po jumope Cristo weya pona, barapo jumope cueicueije barapomonae pejuntu coyenewatha tatsi. Nacom pia Pejumope tunaxu tatsi cueicueije barapomonaetha, jeye: “Payabara tinare xua bexa tsane Cristo, pon Nacom itorobina, atene tsane. Matautano bapon Cristo xeinaena pexeinya peitupanae coicha”, jei. Barapomonae nayainyaba, jeye: “¿Eta bichi tsane jiwitha poxonae baxua exanaena? ¿Yawa eta poxonae metha baxua exanaena?” najei barapomonae.

<sup>12</sup>Ichitha Nacom, barapomonae yabara yaputane exainchi xua po diwesi barapomonae xua Jesucristo

yabara tsiwunaee paebatsi apara jopa barapomonae nexa. Aparajame barapo diwesi paxam nexa. Po diwesi xua caena bayatha barapomonae yabara paeba barapo diwesi jupa po diwesi xua anoxuae ichamonae yabara paca tsipaeba. Barapo diwesi xua pecapanenebiyae diwesi barapomonae paca tsipaeba Nacom pia Pejumope tunaxu tatsi pia peayapusu itorobi coyeneyatha tatsi po jumope itorobatsi itaboco wetsica. Barapomonae yabara paeba barapo pecapanenebiyae diwesi po diwesi matatsunpiwi bequein iru ichichipa yabara yaputane.

**Meje yabara xua Nacom naca itoroba xua bewa xeinaetsi pepa pejuntu coyene xanepanaewa**

<sup>13</sup>Daxota pana najuntu coyene wunaere Nacom nexa xua pana najuntu coyene itorobare xua barompaya painya nenanta xeinaewatha. Ajuntuyapusuya payabara jume cowuntsiya eware pocotsiwa Nacom paca catsibina pia paca necaantobewaxae xua poxonae Jesucristo patopaetsica. <sup>14</sup>Paexande icha pexui ichi xua ba exana pocotsiwa coxiyun itoroba. Jopa paichichipaeinde xua abe paexaname po coyenewa icha be paichim copiya xua abe paexaname poxonae cataunxuae jopa payabara yaputaem Nacom. <sup>15</sup>Seicaya pajinompare pepa painya nejuntu coyene xanepanaewatha, tsipei Nacom pon paca waba bichocono pepa pejuntu coyene xanepanaein. <sup>16</sup>Baxua paexande poxoru Nacom Pejume Diwesitha jeye: “Paxam daxita bichocono pajuntu coyene xanepande, tsipei bichocono tajuntu coyene xanepanaein”, jei.

<sup>17</sup>Nacom Waxa, pon jiwi peyabara paebin xua penatsicuentisiwa xua abe pe-exanaexae, barapon Nacom jopa nanta xeinaeyo xua ichun bichocono peainya cuin beyacaincha ichun. Icha paxam

barapo Nacomtha pajam: “Axa”, pajam, xua pia painya nepaca yawenaenexa bapoxonae pajunuware xua abe painya neexanaeyainwa Nacomtha. Matautano barapon Nacom bichocono paantobeinde daxita matacabin poxonae pajinompame po irathe. <sup>18</sup> Jesucristo paca capanepa painya abeya nejinompae wa. Poxonae Jesucristo paca yantomata xua paca capanenebiya, jopa catsiyo po penainto pewun oro nainto. Matautano jopa catsiyo po penainto pewun plata nainto. Barapo naxobe penaintobe saya weraweraca. Barichino payaputaneme xua Jesucristo jopa paca capanepaeyo tsipei bara paichim xua paexaname icha painya amo susato jiwi ichi xua barapo abeya juntu coyenewatha jinompa. Baxua paca yawena aibi. <sup>19</sup> Saya meisa Cristo naca yantomata abe waexanae cuiru coyenein weya. Baxua apara xua poxonae Jesucristo naca tsitupa naetotha, icha caena bayatha oveja ichichi xua poxonae bexotsi xua tupa exanatsi xua Nacom peyabara junte mainaenexa jiwi abe pia peexanae cuiru coyenein tatsi. Barapo oveja pexeinya oveja xua jopa matauta xeinaeyo wanyo, icha Cristo ichi xua jopa xeinaeyo peabe coyenewa tsipei pejuntu coyene xanepanaein. <sup>20</sup> Nacom itapeta xua Cristo itapetatsi petupaenexa tsane naetotha caena bayatha poxonae cataunxuae jopa forotsiyo po cae pin nacue. Nacom paca tsita ituta bapon Cristo barapo petabu ducuae matacabitha. <sup>21</sup> Cristo painya nepaca tsitupaexae naetotha xua abe painya nexanae cuiru coyenein daxota Nacom pajume cowuntame. Nacom equeicha Cristo asu exanatsi petupae cuiru coyene weya. Matautano Nacom pia nacuathe-icha cana exana bapontha xua xeina pepa peainya cui coyenewa. Daxota anoxuae pajume cowuntame Nacom. Matautano pajume cowuntsiya ewatame

Nacomtha xua bexa Nacom paca catsina pocotsiwa xua bayatha yabara paca tsiwunae muxu duta.

<sup>22</sup> Anoxuae pajume cowuntame Nacom pia pexainyei diwesi jume xua Nacom pia Pejumope tunaxu tatsi paca tsipaeba. Daxota paca itacupa xua pana najuntu coyene wunae exaname Nacomtha xua xaniwaicha painya neantobenexa ichamonae pomonae iru pejume cowuntsiwi Nacom. Daxota bewa bichocono nantiya pana naantobem daxita painya nejuntu coyene daunweyatha. <sup>23</sup> Paxam icha juntu coyene paxeiname tsipei be pena jiwi pana naexaname, xua pajuntu coyene xanepaname. Jopa panaexanaem xua pocotsiwa peweraweracaewa werena. Anoxuae nama panaexaname pocotsiwa xua jopa peweraweracaewiyo werena. Ichitha pena jiwi pana naexaname painya nejume cowuntsixae Nacom Pejume Diwesi, po jume diwesi jopa weraweracaeyo, xua ataya tsitecapona. <sup>24</sup> Nacom Pejume Diwesi jeye:

“Naepanaewa ba tsewa tsoponae yawa pentono ba othopeica.

Icha naepanaewa ichi jiwi ba barichi, ba werapa.

Matautano pocotsiwa jiwi exana xua bequein

tsita ainya cuichi ichitha weraweracaena.

<sup>25</sup> Ichitha nama Nacom Pejume Diwesi ataya

ayapusu tsoponae”, jei Nacom Pejume Diwesitha.

Barapo diwesi apara pecapanenebiyae diwesi xua po diwesi paca tsipaebatsi.

**2** Daxota daxita pana nacui barapende daxita abe peexanae cuiru coyenein, yawano xua pemuxuitorobi coyenewan, yawano xua naerabiya peexanae coyenewan xua naemata wunae pepaebiwa, yawano xua peyabara uwi coyenewan xua ichun xeina, yawano

xua abe peyabara paebiwa ichamon-aetha xua ichun peyabara paebiwatsi. <sup>2</sup>Pexui ba poxi anoxuaetha naexana ba jeita mito pia apaetsi xua pewichibinexa peapaexae mito. Icha pexui ichi, barapocotsi juta coyeneya paichinde. Saya u meisa Nacom Pejume Diwesi payorobare nawita xua painya nejume cowunta dubenanaebiyaenexa tsane, matautano xua painya nepaca capanenebiyaenexa tsane Nacom. <sup>3</sup>Icha paita coxoneme Nacom, painya juntu coyenetha bara payaputaneme xua pon jiwí Pecanamataxeinaein bichocono bara pewunaein.

**Meje yabara iboto,  
po iboto peainya cui iboto**

<sup>4</sup>Jesucristo pajume cocowuntaponde, pon jiwí Pecanamataxeinaeinchi, pon xua ataya tsitecaeya ajuntuyapusuya pepoponaein. Barapon Jesucristo yabara caunutatsi be pocotsi iboto xua copiya boca xua poxonae bomuxu exana. Icha jiwí ichi xua barapo iboto xuba jiwí barichi Jesucristo pentatsi. Ichitha Nacom itapeta xua Jesucristo itapetatsi, tsipei bapon Jesucristo Nacom tsita ainya cuichi. <sup>5</sup>Poxonae jiton ibo bo exana xua Nacom pin pia bo nexa, itapeta po iboton wuna. Bara jutiya ichi Nacom itapeta jiwí, xua pomonae piamonae tatsi cana exana pomonae pejume cowuntsi jiwichixaetsi. Painya coutha pana najuntu coyene doure Nacomtha beta painya netanacuichinexa icha sacerdotemonae ichi xua najuntu coyene douda Nacomtha poxonae beta tanacuita. Poxonae baxua paexaname bara baxua Nacom tsita xanepanatsi xua Jesucristo painya nejume cowuntsixae. <sup>6</sup>Nacom Pejume Diwesitha jeye: “Pajume taema, itorobarecan Jesucristo Sión tomaratha tana nejume cowuntsiwi taitorobarecan. Bapon itapetan xua bichocono peainya cuixae, icha iboto ichi, po iboto

babatanota bomuxu.

Pon Jesucristo jume cowuntatsi bapon jopa

aura tsane xua bapon Jesucristo pejume cowuntsixaetsi”, jei Nacom Pejume Diwesitha.

<sup>7</sup>Painya nejume cowuntsixae bapontha, daxota payaputaneme xua bapon bichocono asiwiya paantobem. Ichitha pomonae jopa bapon jume cowuntsichi barapomonae canacui yabara jume wetatsi be pocotsi coyeneya bayatha Nacom Pejume Diwesi paeba, xua Jesucristo yabara caunutatsi, jeye:

“Po iboto xua jiwí naitemata xua pomonae

ibo bon peacabiwi, barapo iboto pecanamatawenonae ibotatsi naexana”, jei Nacom Pejume Diwesi, xua Jesucristo yabara caunutatsi.

<sup>8</sup>Nacom Pejume Diwesitha equeicha jeye:

“Barapo ibotiyotha jiton taxu autabatsi. Matautano barapo iboto, ichacuitha jiton xuirapopa exainchi”, jei Nacom Pejume Diwesi.

Jiton ba xuirapopa poxoru jopa taeyo barapo iboto. Po iboto Nacom yabara paeba barapo iboto Jesucristo yabara jutsiya canautapaebatsi. Jiwi jopa beta exanaeyo poxoru jopa jume cowuntsiyo xua Nacom Pejume diwesitha Jesucristo yabara paebatsi. Caena bayatha Nacom pewunaeya yabara cui yaputane xua barapomonae peexanaewa tsane baxua.

<sup>9</sup>Paxam Nacom painya nepaca itapetsi jiwí pam. Paxam po sacerdotemonae pam xua pata nacuitame Nacom pon jiwí itorobiya pia pepa Peewatsinchi. Matautano paxam pomonae Nacom patsita juntu coyene xanepaname jopa painya tsita natsicuentisixae bapon. Matautano Nacom pia pepa piamonae tatsi pam. Nacom baxuan pacata exana pia painya yabara netacueicueijeinexa xua pia



pexeinya petsita itubi coyenewan tatsi. Barapon Nacom paca waba abe painya neexanae cuiru coyenein weya. Paca waba pia painya yabara neyaputaenexa Nacom xua xeina pexeinya peitupanae coicha. <sup>10</sup>Copiya paxam jopa Nacom piamonae tatsi pam, ichitha anoxuae nama Nacom piamonae tatsi pam. Matautano copiyatha jiji jopa paca yabara nantanuweya nanta xeinaeyo xua pia paca necayawenaewa tsane. Ichitha anoxuae Nacom paca yabara nantanuweya nanta xeina xua pia paca necayawenaewa tsane.

**Meje yabara xua jiji bewa  
beta jinompae xua Nacom  
petanacuita dubenanaebiyenexatsi**

<sup>11</sup>Tamonae pam, pomonae tapaca caantobe jiwichi pam. Paxam pomonae be penanapaincha jinompawei pam xua icha nacua werena painya neponaewi. Daxota paca itorobatsi xua jopa painya neexanaewa tsane pocotsiwa abe pocotsiwa xua painya juntu coyenewatha ichichipa xua peexanaewa. Barapo abe peexanae cuiru coyenein paca juntu coyene itoroba bichocono xua painya neexanaenexa po coyenein abe peexanae cuiru coyenein.

<sup>12</sup>Beta pajinompare Nacom nexa xua peitutha tatsi pomonae Nacom jopa jume cowuntsichi. Icha barapomonae abe paca yabara paebichipa be pomonae abe painya neexanae jiji pam tsipae bichocono daichitha barapomonae taena xua beta painya neexanaewa. Bapoxonae barapomonae Nacom wunae jaintinchi wunae painya neexanaexae xua po mataqueitha Nacom yabara paebina jiji xua penatsicuentiwa xua abe peexanaexae.

<sup>13</sup>Painya nejume cowuntsixae pon jiji pepa Pecanamataxeinaeinchi bara paexande pocotsiwa paca itoroba daxita pomonae pecanamataxeinaewi painya

nacua. Matauta paexande pocotsiwa paca itoroba pon romanomonae itorobiya pepa peewatsinchi. Jame Nacom ichichipa xua waexanaewa baxua. <sup>14</sup>Paexande pocotsiwa paca itoroba pomonae nacuan peewatsiwi pomonae xua tanacuitatsi pon romanomonae itorobiya pepa peewatsinchi. Nacom itoroba barapomonaetha pomonae nacua peewatsiwi xua barapomonae cuainchina pomonaetha pomonae abe peexanaewi. Matautano Nacom itoroba barapomonaetha xua wunae jainchina pomonaetha pomonae beta peexanaewi. <sup>15</sup>Nacom ichichipa xua beta painya neexanaewa tsane pomonaetha pomonae xua jopa Nacom yabara yaputaetsi xua barapomonae pemoyanexa xua jopa abe painya nepaca yabara paebinexa.

<sup>16</sup>Pajinompare, icha be ichi pomonae jopa nantawenonaeyo xua ichamonae amanaya petanacuichiwatsi. Ichitha jopa abe paexanaeinde xua poxoru saya painya nejinompaexae. Beta pajinompare, icha be ichi pomonae Nacom amanaya tanacuita dubenanaebiyatsi. <sup>17</sup>Beta payabara nanta xeinare daxita jiji. Matautano paantobeinde ichamonae pomonae iru pejume cowuntsiwi Jesucristo. Nacom pacunuware xua abe painya nepaca exanaeyainwa, xua abe painya neexanaexae. Pabarũ cui itura jinareno pon romanomonae itorobiya pepa peewatsinchi.

**Meje yabara po coyene xua  
Cristo atene peexanaewatsi**

<sup>18</sup>Paxam pomonae amanaya painya netanacuichi jiji pam ichamonae barapomonae pam paca tsipaebatsi. Bewa pajume baru cui jejam tsaibim tsane pomonae xua paca itorobeiba pomonae painya nepaca canamataxeinaewi. Baxua paexande

poxonae bequein ichamonae wūnae peexaneibiwi, matautano xua poxonae ichamonae bequein abe peexaneibiwi poxonae paca itoroba. <sup>19</sup>Baxua Nacom tsita wūnaetsi xua pabarū cui itura jiname barapomonae pomonae painya nepaca canamataxeinaewi xua poxonae bequein paca cuainta barapomonae xua xaniwaicha painya neexanaexae painya nejume cowūntsixae Nacom. <sup>20</sup>Ichā abe paexaname xua daxota paca cuainta, baxua Nacom jopa tsita coyene xanepanaetsi xua bequein saya beitemaya moya paumename poxonae paca cuainta. Ichitha icha jame paca cuainta xua wūnae painya neexanaexae xūano xua icha beitemaya moya paumename baxuan jame Nacom tsita coyene xanepanatsi. <sup>21</sup>Xua ichamonae atene painya nepaca caexanaexae daxota Nacom itapeta paca waba. Ichamonae Jesucristo atene exainchi waxainchi nexa. Jesucristo cana caunutsiya exanatsi xua waxainchi bewa exanaetsi icha bapon ichi xua pocotsiwa exana. <sup>22</sup>Bapon Jesucristo bapana jopa abe exanae. Matautano bapana jopa muxuitorobi ichamonaetha. <sup>23</sup>Poxonae ichamonae Jesucristo biatainchi jopa xuya jume barabotsiyo Jesucristo. Poxonae Jesucristo bātsi, jopa Jesucristo jeyo, “Aunxuae xuya paca cuaintinchi”, jopa jeyo. Ichitha Jesucristo jume cowūnta Nacom xua pocotsiwa poxonae Nacom exanaena barapomonaetha pocotsiwa xua be Jesucristo peyantomatsiwatsi. Tsipei Nacom xaniwaicha beta yabara paeba jiwi, xua penatsicuentisiwa xua abe peexanaexae. <sup>24</sup>Cristo pia pepontha yawa muxuna tūpa abe waexanae cuiru coyenein poxonae tūpa naetotha. Poxonae bapon Jesucristo nacata exana barapo coyene, waxainchi abe waexanae cuiru coyenein weya panenebiyatsi xua jopa equeicha

waexanaewa tsane abe waexanae cuiru coyenein, yawano xua beta jūntū coyene xanepanaya jinompaeinchi Nacomtha. Daxota Cristo wan exanatsi xua equeicha jopa abe painya neexanaenexa tsane. <sup>25</sup>Ichacuitha oveja itaxanuncuatsi, pipato pepoponaexae jopa penantausixae pon peenaen ovejan. Icha oveja ichi paxam bara pocotsi jūta coyeneya paichim. Copiya jopa xanepanaya painompaem, jopa painya nenantausixae Jesucristo. Ichitha anoxuae xanepanaya pajinompame, tsipei anoxuae Jesucristo panantautame pon paca yawena. Bapon nepaca eenaen, icha be ichi pon oveja peenaen. Yawano bapon Cristo paca jūntū coyene canamataxeina.

### Meje yabara xua po coyeneya bewa jinompae pomonae jitha peenaewi

**3** Paxam powaxi jitha painya neenaewaxi pam, paexande pocotsiwa painya seuriwi paca itoroba. Painya pebiwi ichacuitha jopa jume cowūntsiyo Nacom. Painya neexanaexae pocotsiwa painya seuriwi paca itoroba barapo painya seuriwi jume cowūntsiyo Nacom painya nepaca cui taexae bara bequein Jesucristo jopa payabara paebim. <sup>2</sup>Barapo painya seuriwi paca taena xua Nacom paantobem. Yawano xua paca taena xua jūntū coyene xanepanaya painompame. <sup>3</sup>Jopa metha meisa painya pepon pexeinyowa pana naexanaemtsipaem, xua daxota jiwi painya nepaca yabara paebeibiwa, xua pexeinyowaxi pam. Jopa matowa pana mata cachetsinde xua bichocono pexeinyowa pana naexaname. Jopa pana napepenaende po penaintotha pewūn oro nainto. Matautano jopa pana nama xatabinde po paparuwan bichocono ainya matoman xua bichocono pexeinyowaxi pana naexaname. <sup>4</sup>Ichā pexeinyowaxi

ichichipa pana naexaname moya maisa pana najuntũ coyene wũnae exande. Barapo pexeinyowa coyenewa bũpana xeina jiji pejuntũ coyenewatha. Barapo pexeinyowa coyenewa jopa itacũpaetsi xua peweraweracaewa. Painya pexeinyowa coyenewa bewa payabara ita ururanaya pajinompæem, yawano jũntema pajinompæeno. Baxuan jame bichocono tsita coyene xanepanatsi Nacom. <sup>5</sup>Barapo pexeinyowa coyenewa caena bayatha xeina po yabũxi xua bichocono pepa pejuntũ coyene xanepanaewaxi. Barapo yabũxi jume cowũntsiya ewata Nacomtha, xua Nacom exanaena pocotsiwa yabara tsiwũnae muxu duta. Matautano barapo yabũxi exana pocotsiwa piseuriwi itorobatsi. <sup>6</sup>Petsiriwa powa pewũn Sara bara jũtiya ichiya exana. Barapowa exaneiba pocotsiwa piseuri itorobeibatsi pon pewũn Abraham. Barapowa piseuritha jeye: “Tanecanamataxeinaem”, jei bapowa. Paxam bara paichim tsane icha barapowa Sara ichi icha beta paexanaename, yawano xua jopa pajunuwim, bequein painya seurixi jopa xanepanaya paca itorobeibiyo.

<sup>7</sup>Barichi pam pebiwi pam, po pebiwi painya seuriwi painya nexinae jiji pam. Beta payabara cui yaputaema painya seuriwi. Yawano painya seuriwi pabarũ cui itura jinare tsipei yabũxi jopa acucoyenesũyo icha jopa be pebiwi ichiyo. Pananta xeinare xua pebin piseuribe xeinabe po peajuntũyapusũwa jopa bapana weraweracae, po peajuntũyapusũwa Nacom cata piamaenaetha pomonae pia peantobewixaetsi. Baxua paexande painya seuriwitha xua wũnae painya neexanaewa xua Nacom bara beta painya nepaca jume taenexa poxonae pawũcæame.

### Meje yabara xua jiji atene pomonae xua beta peexanaewixae

<sup>8</sup>Matapainya paca tsipeabatsi nantiya beta jinompa pana naexande. Yawano nantiya beta pana nayabara nanta xeinare xua painya nenayawenaexaem tsane. Nantiya pana naantobeinde painya nejume cowũntsixae Nacom, icha be ichi poxonae barompaya painya eweicho jiji nantiya pana naantobem. Pomonae jiji peyawena jiji pana naexande xua painya neantobexae barapo jiji. Matautano jopa bichocono painya coutha pana nayabara nanta xeinaeinde. Jame maisa ichamonae itapeta bichocono payabara nanta xeinare. <sup>9</sup>Poxonae ichamonae abe pacata exana xuya jopa paexanaeinde. Yawano poxonae ichamonae paca biatane jopa xuya pabiataeinde. Seicaya nama paexande. Jame Nacomtha patawũcare barapomonae xua Nacom pecana exanaenexa xua barapomonae pejuntũ coyene weiweinaenexa. Daxota Nacom paca waba xua xuya pacata exana tsipei barapomonae beta pacana exaname. <sup>10</sup>Tsipei Nacom Pejume Diwesitha jeye:

“Pon xua antobe xua po coyene cataunxuae pepoponaewa, xuan xua daxita matacabi jũntũ coyene weiweina poneiba, bapon bewa peebatotha jopa peabi tsane peabe jumeyo. Matautano peopiratotha jopa bewa peabi tsane xua ichamonae naerabiya peyabara peabiwatsi.

<sup>11</sup>Bewa tajũ beya paponæm xua peabe coyenewan weya. Yawano saya bewa beta paexanaem. Itapeta paexande pocotsiwa xua jiji jũntema jinompa exainchi.

Bara ajuntuyapusya paexanaponde baxua.

<sup>12</sup>Tsipei Nacom, pon jiwī Pecanamataxeinaein, yawena pomonaetha pomonae pejuntu coyene xanepanaewi.

Yawano Nacom jume tane xua pewucaewatsi.

Ichitha Nacom jopa yawenaeyo pomonae abe peexanaewi”, jei Nacom Pejume Diwesitha.

<sup>13</sup>Dapon aibi pon itacupatsi xua abe pacata exana icha saya paexaneibame pocotsiwa xua wūnae.

<sup>14</sup>Bequein icha ichamonae pacata abe exanaena juntu coyene xanepanaya painya nejinompaexae, daichitha Nacom paca cana exana xua pajuntu coyene weiweinaya jinompame. Jopa ichamonae pacunuwinde, yawano jopa pacuitaya juntu deideijande. <sup>15</sup>Jame maisa Cristo bichocono payabara nanta xeinare painya juntu coyenetha xua bapon bichocono ainya cui. Pajande: “Pon jiwī Necanamataxeinaem”, pajande. Pana najuntu coyene wūnaeteibare xua painya nejume noteibinexa pomonae paca yainyabiya jeye: “¿Eta pocotsiwa pajume cowuntsiya ewatame xua Jesucristo bexa paca capanepaena?” paca jei.

<sup>16</sup>Ichitha saya ita ururaquiya pajume noteibare, jopa paaebeibinde. Yawano pajunuware Nacomtha xua abe painya nepaca exanaeyainwa Nacom, abe painya neexanaexae. Pajinompare xua painya juntu coyenewa paca tsipaeba xua wūnae bara paexaname. Bapoxonae icha ichamonae abe paca yabara paeba, barapomonae aura tsane xanepanaya painya nejume cowuntsiya jinompaexae Cristo.

<sup>17</sup>Icha Nacom ichichipa xua ichamonae atene paca exana, beta painya neexanaexae, baxua jame

wūnae, beyacaincha xua poxonae atene paca exana poxoru abe paexaname.

<sup>18</sup>Tsipei Cristo atene exanatsi poxonae tsitupa abe waexanae cuiru coyenein daxita xua poxonae cae coyenetha tupa. Cristo bapana jopa abe exanae. Ichitha bapon Cristo naca tsitupa pomonae abe waexanae jiwichi. Baxua Cristo nacata exana, xua wanaca exanaenexa xua wapatsiwa tsane Nacom beicha. Bapon Cristo bequein tupa pepon ichitha equeicha asu exanatsi pia pejumo pe tūnaxu tatsi. <sup>19</sup>Bapoxonae Jesucristo pia pejumo pe tūnaxu tatsi pona ichaxota jiwī pia pejumo pein tatsi be cubathopeibatsi pomonae xua caena bayatha werapa. Barapon Jesucristo pia jumope tūnaxu tatsi yabara cueicueijejei barapo jumopeintha xua Nacom pia pecapanenebiyae diwesi tatsi. <sup>20</sup>Caena bayatha barapomonae jopa jume cowuntsiyo Nacom poxonae po mataqueitha Noé popona po irathe. Nacom beitatemaya ewateiba barapomonae, ainya dapaen xua pejume cowuntsinexatsi poxonae xua cataunxuae Noé cobe naemata xua pin jera nae exana. Ichitha saya ocho poyobe jiwī panenebiya poxonae bichocono awūbo xua butuxuba po cae pin nacue. <sup>21</sup>Barapo awūbo caunuta xua be naca bautisaba. Poxonae naca bautisaba apara jopa wanaca peru iquicaenexa tsane xua tsoreichi, apara jame daxota naca bautisaba Nacom, wanaca capanepaexae abe waexanae cuiru coyenein weya. Yawano Nacom wūcatsi xua wanaca juntu coyene xanepana exanaewa tsane. Bapoxonae wajuntu coyene naca tsipaeba xua bara beta exanatsi. Waxainchi naca itacupa xua wanaca bautisabiwa tsipei Jesucristo equeicha asu exanatsi petupae cuiru coyene weya. <sup>22</sup>Jesucristo peitaboco beicha pona. Bapon Jesucristo eca Nacomtha,

xua Nacom pia pecoxa weya tatsi. Matatsunpiwi, iruru pomonae itoroba itabocotha barapomonae exana pocotsiwa Jesucristo itoroba.

**Meje yabara xua jiwi bewa beta  
tanacuichi Nacom icha be po  
coyeneya Nacom cata jiwi barompaya  
pia peexanae coyenewan tatsi**

**4** Yaitama copiya Cristo atene exanatsi ichamonae, waxainchi daxota bewa nanta xeinaetsi xua iru naca atene exanaena ichamonae. Pon atene exanatsi ichamonae bapon abe pia peexanae cuiru coyenein wepu pona xua bichocono pejume cowuntsixae Jesucristo. <sup>2</sup>Paxam jopa bewa paexanaem pocotsiwa xua paichichipame xua abe painya neexanaewa poxonae cataunxuae pajinompame. Ichitha cataunxuae paexanaponde pocotsiwa Nacom ichichipa poxonae cataunxuae pajinompame barapo cae pin nacuathe. <sup>3</sup>Caena bayatha paexaname pocotsiwa xua ichamonae exana pomonae jopa yaputaeyo Nacom. Barapomonae abe exaneiba xua nasi cui exana icha yabuxitha xua jopa piseuriwi. Yawano exaneiba xua pocotsiwa abe yabara nanta xeina pejuntu coyeneintha. Yawano nacupa exaneiba peatsaxae meran. Yawano pin penabanaewan exaneiba po penabanaewantha jiwi weiweinaya abe exana xua napenajuba yawa bichocono cupatsi. Yawano ibo nacomun wunae jainteibatsi. <sup>4</sup>Pomonae jopa yaputaeyo Nacom, barapomonae paca cui yabara nanta xeina, jeye: “¿Eta xua metha jopa naca baru exanaeyo xua waxainchi abe exanatsi?” najei barapomonae. Barapomonae paca cui capana yawa daxota abe paca yabara paeba. <sup>5</sup>Payabara nanta xeinare pomonae abe exana. Barapomonae bewa yabara caununaya jume notsina

Nacomtha pocotsiwa xua abe exana. Nacom yabara paebina pomonaetha pomonae xua cataunxuae jinompa yawa pomonaetha pomonae bayatha werapa xua penatsicuentisiwa xua abe peexanaexae. <sup>6</sup>Daxota Nacom Pejume Diwesi bayatha cueicueijei pomonaetha pomonae bequein bayatha werapa xua barapo pewerapae jiwi pejumope tunaxun pejinompaenexa tsane icha Nacom ichi xua popona. Bayatha Nacom yabara paeba barapomonae xua penatsicuentisiwa xua abe peexanaexae barapo cae pin nacuathe xua daxota pia pepon tatsi werapa icha daxita jiwi ichouneibi.

<sup>7</sup>Bara nama imoxoyo po dapaetha poxonae Nacom daxita weraweraca exanaena barapo cae pin nacue. Daxota painya coutha pana najuntu coyene itorobare xua xanepanaya paexaname Nacomtha beta painya wucaenexa tsane. <sup>8</sup>Pocotsiwa xua ainya cui xua jame bewa bichocono nantiya pana naantobeinde. Poxonae ichun paantobem, pajuntemainame poxonae bequein xua bapon abe pacata exana. <sup>9</sup>Paxam nantiya pana nantenta weyataeya wabeibare painya boxitha xua painya nenaapateibinexa tsane, xua jopa pana naita aenae-aenande. <sup>10</sup>Daxita barompaya paxam Nacom paca cana exana xua painya nexenaewa barompaya painya neexanae coyenewan. Paxam nantiya pana nayawende barapo cui coyenetha, bapoxonae paxam pomonae beta painya neexanae jiwi pam tsane pocotsi coyenewatha xua Nacom paca cana exana. <sup>11</sup>Icha ichun cueicueijei, bu bara cueicueijei pocotsiwa Nacom cueicueijei exana bapon. Icha pebin yawena xua ichun yawenatsi bu bara barapo pebin yawena ichuntha po peayapusuwatha xua Nacom cata. Daxita pocotsiwan xua paexaname bara beta paexande xua

jiwi wūnae pejainchinexa Nacom xua beta painya neexanaexae xua Jesucristo peyabaraxae. Bū bara Jesucristo ataya xeinaena peainya cui coyenewa, yawano xeinaena xua peayapusu itorobi coyenewa. Je bara ichi tsane.

**Meje yabara po coyeneya xua bewa exanaetsi wajume cowūntsixae Cristo xua poxonaē bequein ichamonae atene naca exana**

<sup>12</sup>Tamonae pam painya tapaca caantobetsi jiwichi pam irū painya nejume cowūntsixae Jesucristo. Jopa yabara pana nabenaecaēinde poxonaē bichocono atene paca cana exana ichamonae painya nejume cowūntsixae Jesucristo. Jopa pananta xeinaēinde xua baxua pocotsiwa jopa bewa pacata exanaē tsane. <sup>13</sup>Jame seicaya pajūntū coyene weiweinare xua painya nepaca itacūpaewa xua ichamonae atene paca exana icha Cristo ichichi xua atene exanatsi. Yawano bexa pajūntū coyene weiweinaename poxonaē Jesucristo yawa patopaetsica pia peainya cui coyenewa. <sup>14</sup>Icha ichamonae paca muxucona painya nejume cowūntsixae Cristo saya pajūntū coyene weiweinare, tsipei Nacom pia Pejumoēpe tūnaxū tatsi, po jumope pexeinya peitūpanae coicha yawa popona, barapo pejumoēpe paca yawa popona. <sup>15</sup>Jopa bewa paexanaem tsane xua ichamonae pajutebame xua daxota ichamonae paca atene exana. Matautano jopa bewa paexanaem tsane xua ichamonae piawan tatsi pacaibame xua daxota ichamonae paca atene exana. Matautano jopa bewa paexanaem tsane xua ichamonae pajūntū coyene anaepana exaname xua daxota ichamonae paca atene exana. Matautano jopa bewa paexanaem tsane xua ichūn pajūntū coyene itorobame xua abe peexanaewa tsane xua daxota ichamonae atene paca exana. <sup>16</sup>Icha

ichūn atene exanatsi ichamonae, pejume cowūntsixae Jesucristo jopa bewa bapon aura tsane. Ichitha jame bapon bewa wūnae jainchina Nacom tsipei atene exanatsi pejume cowūntsixae Jesucristo.

<sup>17</sup>Po matabitha aena Nacom tamropata pitaba xua Nacom yabara pae-bina daxita jiwi xua penatsicuentisiwa xua abe peexanaexae, apara barapo matabitha bayatha patopa. Barapo matabitha Jesucristo piamonae tatsi ume-naena Nacom peitabaratha xua Nacom peyabara paebinexa tsane xua penatsicuentisiwa xua barapomonae abe peexanaexae. Yaitama Nacom baxua nacata exana nama yatsicaya jopa Nacom juniya exanaeyo pomonaetha pomonae jopa pejume cowūntsiwi Nacom pia pecapanenebiyae diwesi tatsi. <sup>18</sup>Daunwei nawita pon capanepatsi abe pia peexanae cuiuru coyenein weya pon wūnae peexanaein. Ichitha nama bichocono tadaunweichi xua pon capanepatsi abe pia peexanae cuiuru coyene weya pon bichocono abe peexanaein. <sup>19</sup>Poxonaē ichamonae paca atene exana, bara awiya beta paexande icha bara baraxua xua pocotsiwa Nacom cuita jichipa. Bewa pajume barū jejam tsane Nacom xua paexaname bara bequein paayapube taetham. Nacom paca necaforot-sixae yawa peexanaexae xua pocotsiwa yabara paca tsiwūnae muxu dubeiba xua exana paebeiba, daxota Nacom pia coya canamataxeina painya jūntū coyene.

**Meje yabara xua Pedro muxuweta pomonaetha pomonae pejume cowūntsi jiwi**

**5** Ichichipan xua tamuxu wetsiwa penapatae jiwi pomonae paxam jiwana pam pomonae painya nejume cowūntsi jiwi pam. Xan irū bichocono penapataein icha barapomonae ichi. Xan natan poxonaē Cristo naetotha tūparu-

cua exanatsi. Xan irũ yawa xeinaein po peainya cui coyenewa Cristo xeina poxonaē patopaetsica. <sup>2</sup>Beta pa-eeinare pomonaetha xua Nacom paca cana exana xua pamatacaponame, icha pon oveja peyapu eenaēin ichi xua beta yapu eena ovejamonaē. Jopa meisa baxua paexanaēinde xua poxoru Nacom pia paca necaitorobixae. Jame maisa baxua paexande xua poxoru painya coutha painya neichichipaexae. Baxua jame Nacom ichichipa. Matautano jopa baxua paexanaēinde xua poxoru paratixi painya neichichipaexae, ichitha poxoru Nacom painya neantobexae bichocono. <sup>3</sup>Jopa atsaquiya pamatacaponaeinde pomonaē xua pamatacaponame. Jame saya maisa beta pamatacaponde xua painya necacui taenexa xua bara jũta ichiya peexanaenexa. <sup>4</sup>Nexata poxonaē patopaetsica pon jiwi itorobiya pepa Peewatsin, bapon Jesucristo paca catsina po pematomatsiwa peainya cui coyenewa, po peainya cui coyenewa xua bapana jopa weraweracaeyo.

<sup>5</sup>Barichi pomonaē pewowi jiwi pam, bewa paexanaem pocotsiwa xua penapataē jiwi paca itoroba. Daxita paxam bewa nantiya pana naantobem, yawa bewa nantiya pana nayabara ita ururanaya jinompaem. Baxua paexande tsipei Nacom Pejume Diwesitha jeye:

“Nacom aichaxaibi pomonaē peabiwi ichamonaetha.

Ichitha Nacom yawena xua peantobexae pomonaē

baru ita ururanaya jina ichamonaē”, jei.

<sup>6</sup>Daxota papende po coyene xua paebame ichamonaē. Paexande pocotsiwa xua Nacom pecobetha paca ita cowai pia peayapusũ itorobiwatha xua Nacom ainya cui paca necaexanaenexa tsane poxonaē Jesucristo equeicha patopaetsica. <sup>7</sup>Bara pacopare xua Nacom bara daxita paca wepichina daxitan po coyenein

xua jũntũ coyene natsepa paca cana exana tsipei Nacom paca yabara nanta xeina nawita xua painya nepaca cayawenaewa tsane.

<sup>8</sup>Painya coutha pana najũntũ coyene itorobare xua beta pajinompare. Tsaca pajinompare poxoru caurimonaē pia pentacaponaein tatsi ichichipa paca abe exana. Bapon pacata exana icha neũthũ ichi xua ba piyain fiba poxonaē jeita ducuaeta pon ichichipa bexaena.

<sup>9</sup>Dota pam panaitemare bapon xua beta painya nejume cowũntsiwatha. Pananta xeinare xua daxita nacuanpiwi jiwana pomonaē pejume cowũntsiwi Jesucristo barapomonaē atene exanatsi icha paca ichi. <sup>10</sup>Ichitha bexa tsane xua caeto poxonaē paca atene exanaena ichamonaē, bapoxonaē Nacom paca jũntũ coyene xanepana exanaena. Yawano Nacom paca exanaena xua beta painya nejume cowũntsiwa tsane. Yawano paca exanaenano xua bichocono painya neajũntũcoyenesuwam tsane. Barapon Nacom painya nepaca antobexae paca waba pia paca catichi po peainya cui coyenewa xua ataya tsiteca xua Jesucristo xeina. <sup>11</sup>Bũ bara Jesucristo ataya xeinaena peainya cui coyenewa, yawano xua peayapusũ itorobi coyenewa. Je bara ichi tsane.

### **Meje yabara poxonaē Pedro najume wetsiya paeba**

<sup>12</sup>Pon pewun Silvano, pon be tayapin tatsicotaein irurũ pejume cowũntsixae Jesucristo, bapon cobe itoroban xua inta tina barapo peya cartiyo xua bapoxonaē tapacata itorobinexatsi xua tapaca muxuwetsinexatsi. Barapo cartatha paca jũntũ coyene tsacaba exanatsi xua Nacom xaniwaicha painya nepaca cayawenaewa tsane painya nepaca caantobexae. Daxota baxua awiya pajume cowũntsiya jinompare.

<sup>13</sup>Pomonae Babilonia tomaratha jinompa pomonae Nacom pejume cowantsiwichi, barapomonae paca jacobae. Barapomonae pomonae Babilonia tomarapiwi Nacom itapeta icha paca ichi xua paca itapeta. Iru Marcos paca jacobae be pon taxanto tatsicotaein tsipei yawenan xua pejume

cowantsiwa Jesucristo. <sup>14</sup>Paxam nantiya pana najacobare painya nenaantobexae.

Paxam pomonae Cristo piamonae tatsi pam barapomonae pam bara Nacom junta tema jinompa paca exana. Je bara ichi tsane.

Baja Pedro.



## **Meje Po Carte Cotacaya Pedro Tatina, Pomonae Jesucristo Pejume Cowuntsiwi Tatinatsi**

### **Meje yabara poxonae Pedro tamropata pitaba xua tatina pomonaetha pomonae Jesucristo pejume cowuntsiwichi**

**1** Xan, Simón Pedro, pon Jesucristo amanaya tanacuitan. Xan ponxaein Jesucristo pia peitorobi jiwi jiwana tatsin. Pacata tinatsi barapo carte painya nexeiaexae xua pejume cowuntsiwa Jesucristo xua bichocono wūnae icha paxan paichin. Barapo pejume cowuntsi coyenewa Nacom werena pichapa, pon bichocono pejuntū coyene xanepanaewa pexeinaein. Yawano barapo pejume cowuntsi coyenewa Jesucristo werena pichapa pon irū bichocono pejuntū coyene xanepanaewa pexeinaein. Bapon jiwi Pecapanenebiyaein abe pia peexanae cuiru coyenein weya. <sup>2</sup>Barabū Nacom paca yawenaena pia paca necaantobexae. Yawano barabū Nacom paca catsina jūntema pejinompae coyenewa. Barabū barapo naxobe coyenewabe bichocono paxeinaponaename xua poxonae payabara yaputaeponaename Nacom xuano xua payabara yaputaeponaename Jesucristo pon Wanacanamataxeinaein.

### **Meje yabara pocotsi coyenewano bewa exanaena Cristo piamonae tatsi**

<sup>3</sup>Nacom naca cata daxita pocotsiwa nantawenonatsi xua jūntema wajinompawanaxa yawa xua xanapanaya wajinompawanaxa Nacom nexa. Daxita baxuan Nacom naca cata pia peayapusū itorobi coyenewatha. Poxonae yabara yaputaeponaeinchi Nacom, nacuidubatsi xua bapon

naca waba xua irū waxeinaenexa peainya cui coyenewa, xuano xua irū waxeinaenexa Nacom pia pexeinya peexanae coyenewa. <sup>4</sup>Poxonae Nacom naca cata pia peainya cui coyenewa, yawano pia pexeinya peexanae coyenewa bapoxonae nama naca cata pia peyabara naca tsiwūnae muxu dutsiwan. Nacom pia peyabara naca tsiwūnae muxu dutsiwan bichocono ainya cui xua jiwi jopa itacupaetsi xua pecomotsiwa. Barapo peyabara naca tsiwūnae muxu dutsiwan painya necacatsixae anoxuae paxeiname xua Nacom pia peajuntūyapusūwa xua jopa weraweracaeyo. Yawano barapo peyabara naca tsiwūnae muxu dutsiwan painya nexeiaexae paca itacupa xua papanenebiyam abe painya neexanae cuiru coyenewa weya xua barapo cae pin nacuathepiwi po coyene ichichipa abe exana. <sup>5-7</sup>Bequein pajume cowuntame ichitha panantawenoname xua muxuna paexaname xua beta painya nejinompae coyenewan. Poxonae beta pajinompame, bapoxonae panantawenoname xua muxuna paexaname xua Nacom payabara yaputaneme. Poxonae Nacom payabara yaputaneme, bapoxonae panantawenoname xua muxuna paexaname xua painya coutha pana nenajuntū coyene itorobiwam. Poxonae painya coutha pana najuntū coyene itorobame, bapoxonae panantawenoname xua muxuna paexaname xua jūntema pajinompame bequein ichamonae abe pacata exana. Poxonae jūntema pajinompame xua bequein ichamonae abe pacata exana, bapoxonae panantawenoname xua muxuna paexaname xua paantobeya jinompame Nacom. Poxonae paantobeya jinompame Nacom bapoxonae panantawenoname xua muxuna paexaname xua paantobem

pomonae pejume cowuntsiwi Jesucristo. Poxonae paantobem pomonae pejume cowuntsiwi Jesucristo, bapoxonae panantawenoname xua muxuna paexaname xua paantobem daxita jiji.

<sup>8</sup> Icha paxename daxita barapo coyenewan yawa xua paexanaponame daxita baxuan bapoxonae beta painya neexanae jiji pam tsane Nacom nexa. Yawano beta payabara yaputaneme Jesucristo pon Wanacanamataxeinaein. <sup>9</sup> Ichitha icha pebin jopa yabara exanaeyo barapo coyenein, bapon be pon naita tsaqueta poxoru jopa ichipaeyo xua peyabara yaputaewa barapo coyene. Daxota bapon junteina xua bayatha wejunteina exanatsi abe pia peexanae cuiru coyenewan tatsi xua Nacom wejunteina exana. <sup>10</sup> Tamonae pam paxam pomonae be tayapin jiji tapaca canatsicotae jiwichi pam iruru painya nejume cowuntsixae Jesucristo. Daxota paca tsipaebatsi xua xaniwaicha pana naexande xua daxota patsita itutsiname xua paxam pomonae Nacom pia pewabiwi tatsi jiwana pam. Yawano paxam pomonae Nacom pia peitapetsiwi tatsi jiwana pam. Poxonae baxuan paexanaponame jopa equeicha abe paexanaem tsane po coyene xua daxota paitawetame Nacom. <sup>11</sup> Bapoxonae Nacom bara paca matenta weiweinyaya copata xua painya nepatsinexa tsane Nacom pia peitorobi nacua beicha tatsi. Nacom pia peitorobi nacua ataya ayapusu tsoxonae ichaxota Jesucristo jiji itorobiya ewatatsi, pon Wanacanamataxeinaein, xua pon Pecanenebiyaein jiji.

<sup>12</sup> Bequein baxua bayatha payaputaneme, ichitha equeicha paca tsipaebatsi xua jopa painya junteinaenexa. Anoxuae paxam ajuntuyapusuya pajume cowuntame pexainyei jume Jesucristo yabara. <sup>13</sup> Poxonae cataunxuae poponan yabara

nanta xeinan xua ainya cui xua baxuan yabara tapata catsipaebiwa tsainchi. <sup>14</sup> Yaputan tsipei Jesucristo, pon Wanacanamataxeinaein, netsipaeba xua bara nama imoxoyo tupaen. <sup>15</sup> Daxota xaniwaicha pacata tinatsi xua baxuan jopa yabara painya nejunteinaewa tsane poxonae tupaen. Bapoxonae bexa tsane pana necui yabara junteinaenae pocotsiwan yabara paca tsiwunae muxu dutatsi.

### **Meje yabara xua pomonae tane Cristo pia peainya cui coyenewa tatsi**

<sup>16</sup> Poxonae paxan paca tsipaebatsi Jesucristo pia peayapusu itorobi coyenewatha yawano xua pepatopeicaewa yabara pon Wanacanamataxeinaein, apara jopa paca tsipaebichi po diwesi pejemai diwesi po diwesi xua saya jiji paeba. Bara pana natan Jesucristo pia pexeinya peitupanae coicha tatsi pon jiji Pecanamataxeinaein. <sup>17</sup> Pana natan poxonae Jesucristo ainya cui exanatsi xua Nacom Pexanto ainya cui exana, pon Jesucristo Paxa tatsi. Yawa pana natan xua Nacom Pexanto cata pexeinya peitupanae coicha. Bapoxonae Nacom pejume pajume tan pexeinya peayapusu jume, jeye: “Bapon apara Taxanto, pon bichocono antobein, pon itapetan. Bapon bichocono nejuntu coyene weiweina exana”, jei Nacom. <sup>18</sup> Paxan baxua pajume tan xua Nacom cueicueije peitaboco wetsica poxonae Jesucristo pon jiji Pecanamataxeinaein demxuwa tha pana nebaru pona po demxuwa ichaxota Nacom cueicueije itaboco wetsica.

<sup>19</sup> Daxita baxuan naca yawena po diwesin xua Nacom pia peitorobi jume pepaebiwi tina xua barapo diwesin pexainyei jume diwesin. Pajume naitaeware pocotsiwan xua barapomonae paeba, beya poxonae yatsicaewa payaputaename pocotsiwa barapomonae paeba.

Barapo pejumein jume xanepana. Bi-chocono naca yawena icha pecoicha ichi xua pentha exana poxonae quirei xua ba naca yawena. Barapo pecoicha waxainchi jopa nantawenonaetsi poxonae jarawato ecoina xuano poxonae matakabi pentha tsina. Barichi poxonae Jesucristo patopaetsica jopa cana matawenonae tsainchi barapo diwesin tsipei bayatha patopeicaena Jesucristo.<sup>20</sup> Matha copiya bewa payaputaem xua meje: Nacom pia peitorobi jume diwesitha dapo jumein aibi pocotsiwa pia coya ichichipa paeba barapo Nacom pia peitorobi jume pepaebiwi.<sup>21</sup> Tsipei Nacom pia peitorobi jume pepaebiwi jopa cueicueijeiy pocotsiwa ichichipa pia coutha paeba xua poxonae tina Nacom Pejume Diwesi. Ichitha barapomonae tatina pocotsiwa Nacom ichichipa, xua Nacom pia Pejumope tñaxu tatsi peitorobixae.

### Meje yabara xua pomonae naerabiya pecuidubi jiwi

**2** Caena bayatha israelmonae jiwana jinompa pomonae naerabiya peitorobi jume diwesi pepaebiwi. Barichi painya xantha patsina pomonae naerabiya pecuidubi jiwi. Barapomonae cuidubina po diwesin xua paca weraweraca exanaena. Barapomonae nameicha nacuita xua naerabiya paca cuiduba. Pon jiwi pia Pecanamataxeinaeinchi pon Jesucristo, barapomonae itawetsinchi xua Jesucristo itawetsina, pon xua bayatha barapomonae tsitupatsi. Nacom nainya weraweraca exanaena barapomonae, abe peexanaexae.<sup>2</sup> Pin bicheitomonae exanaena xua abe exana pocotsiwa xua barapomonae cuiduba pomonae naerabiya pecuidubi jiwi. Barapomonae pomonae naerabiya pecuidubi jiwi naerabiya pecuidubixae tsane pin bicheito abe yabara paebiya exanaena

pocotsiwa Nacom pia pexainyei jume diwesi tatsi.<sup>3</sup> Barapomonae paca muxuitorobina nawita, yawano paca itorobina xua painyamona amanaya paitorobiname pedoutsinexa paratixi barapomonaetha pomonae naerabiya pecuidubi jiwi. Ichitha caena bayatha Nacom yabara paeba barapomonae, jeye: “Barapomonae bichocono abe peexanae jiwi, daxota bewa werapaena tsipei bichocono abe peexanaexae”, jei Nacom.

<sup>4</sup> Nacom bayatha jopa yabara jñntemainaeyo po peabe coyenewan matatsunpiwi exana. Ichitha Nacom bebai ichaxota be pucua xua isoto xua jopa itacounayiyo. Yawano Nacom napenta exana peita quirei nacuatha beya poxonae barapo matatsunpiwi umenaena Nacom peitabaratha poxonae po mataqueitha Nacom yabara paebina daxita jiwi xua penatsicuentisiwa xua abe peexanaexae.<sup>5</sup> Barichi Nacom jopa bayatha yabara jñntemainaeyo po peabe coyenewa jiwi exana pomonae caena bayatha jinompa. Barapo matakabintha Nacom itoroba pin awũbo xua bunothopa peexanaenexa pomonae abe peexanae jiwi. Meisa saya Noé irũno piamonae tatsi xua siete poyobe tatsi daxita barapoyobe capanenebiyatsi barapo awũbotha. Barapon Noé cuiduba jiwitha xua jiwi bewa jñntũ coyene xanepanaya jinompaena Nacomtha.<sup>6</sup> Pomonae Sodoma tomarapiwi irũno Gomorra tomarapiwino, barapomonae abe peexanaewi. Barapo tomarabemonae yawa tomarabe Nacom yabara paeba xua pinae abe exana daxota Nacom weraweraca exana isototha beya poxonae daxita saya u ipunan naexana. Barapo coyenein Nacom tsita itũta xua bapon bexa jupa exanaena pomonaeintha pomonae abe exana dubenanaebiya.<sup>7</sup> Ichitha meisa saya Nacom capanepa barapo pin isoto weya pon pewũn Lot. Bapon Lot pe-

juntũ coyene xanepanaein Nacomtha. Lot cuitaya unthũthũ deideijeĩ pocotsiwa jiwi abe exana.

<sup>8</sup>Bapon Lot, pon pejuntũ coyene xanepanaein Nacomtha, barũ popona pomonae peajuntũcoyenebe jiwi. Daxita matacabi bapon bichocono anthũthutane xua pejuntũ coyene xanepanaexae Nacomtha xua poxonae bapon taiba yawano xua poxonae jume taiba xua jiwi abe exaneiba. <sup>9</sup>Ichitha Nacom pon jiwi Pecanamataxeinaein yaputane xua peyawenaewa pomonae peantobewixaetsi poxonae barapomonae bichocono juntũ coyene jujũteibatsi caurimonae pia pentacaponaein tatsi. Yawano Nacom yaputane xua atene peexanaewa pomonaetha pomonae jopa pejume cowũntsiwichi. Nacom baxua exanaena beya abũ poxonae barapomonae umenaena Nacom peitabaratha poxonae Nacom yabara paebina daxita jiwi xua penatsicuentisiwa xua abe peexanaexae.

<sup>10</sup>Pomonae xua abe exana pocotsiwa xua saya jiwi ichichipa exana yawano aichaxaibi exana pocotsiwa pon jiwi Pecanamataxeinaein itoroba daxita barapomonae Nacom atene exanaena. Barapomonae bichocono atsaca yawa ichamonae aebatsino. Jopa junuwiyo xua abe peyabara paebiwa xua matatsunpiwi abe peyabara paebiwatsi. <sup>11</sup>Matatsunpiwi xeina peayapusuwa yawano xeina peitorobi coyenewa xua beyacaincha pomonae naerabiya pecuidubi jiwi. Ichitha barapo matatsunpiwi jopa abe yabara paebiyõ xua barapomonae pomonae naerabiya pecuidubi jiwi poxonae barapo matatsunpiwi cueicueijeĩ tsumenae Nacom peitabara tatsi, pon jiwi Pecanamataxeinaein.

<sup>12</sup>Barapomonae pomonae abe peyabara paebi jiwi, barapomonae exana xua icha duwei ichi, xua duwei

ba jopa beta nanta xeinaeyõ, xua ba saya jiwi tsicobe naexanatsi xua jiwi peteicaenexa yawa pebexubinexa pexaenexa. Barapo pebiwi abe yabara paeba pocotsiwa jopa yaputaeyõ. Barapomonae werapaena pia abewantha icha duwei icha xua werapa. <sup>13</sup>Barapomonae xuya atene tsane abe peexanaexae ichamonaetha. Barapomonae jopa auriyo xua abe peexanaewa mataqueitha. Barapomonae paca muxuitoroba abe peexanaexae bequein naxaiba poxonae pin penabanaewan paexaneibame. Ichamonae paca abe yabara paeba abe peexanaexae barapomonae yawa aura paca necaexanaexae.

<sup>14</sup>Barapomonae ichichipa nawita xua peyacaibiwa yabũxi daxita xua powaxi taiba. Jopa juniya abe eexanaponaeyõ xua abe exana. Barapomonae nantaũta pia pepuna ponaewichi pomonae pejuntũ coyene faefaenaewi Nacomtha. Barapomonae ichichi xeica nawita pocotsiwan xua tane daxita. Barapomonae yacuiya naexana xua abe peexanaewa. Daxota barapomonae Nacom bichocono atene cana exanaena.

<sup>15</sup>Barapomonae jopa Nacom yabara yaputaetsi pejume naitematsixae po coyene xua Nacom pejuntũ coyene xanepana exanaewa barapomonae. Barapomonae barapo canauta jũtsiya eexanapona icha Balaam ichi xua pocotsiwa exana. Bapon caena bayatha popona. Bapon Balaam, Beor pexanto tatsi. Bapon Balaam abe exana pexeinaenexa paratixi. <sup>16</sup>Balaam

pon naerabiya peitorobi jume diwesi pepaebin, poxonae ichichipa abe peexanaewa, cui matawentatsi xua abe exana. Po duwein pewũn burra, bapon cui matawenta, Balaam cui matawentatsi. Burra cueicueijeĩ icha jiton ichi, xua saya jiton cueicueijeĩ. Barapo duwein jopa copatsiyõ xua

Balaam abe peexanaponaewa xua exanapona icha be ichi xua exanapona pon pematajemabinchi. Daxota Balaam cui matawentatsi poxonae ichichipa abe peexanaponaewa.

<sup>17</sup> Barapo pebiwi po pebiwi naerabiya pecuidubi jiwi, jopa yawenaeyo ichamonaetha, icha be feto mene ichi xua weitha bichocono ameneibi xua ba jiwi jopa yawenaetsi. Yawano barapomonaе icha be tsquinaebowa ichi xua ba saya dubenapona xua joibo capana, xua ba cuinaya jopa duneicaeyo, yawano xua ba jiwi jopa yawenaetsi xua peruneicaenexa. Nacom itaweta barapomonaе xua barapomonaе itawetatsi ichaxota ataya pejinompaenexa peita quirei nacuatha. <sup>18</sup> Barapomonaе bichocono atsaca poxonae cueicueijei. Yawano barapomonaе pia jume, barapo jume jopa jiwi yawenaetsi. Yawano barapomonaе naemata jume wunaeya tsipaeba pomonaetha pomonaе aena pejume cowuntsi jiwi Jesucristo xua barapomonaе iru abe peexanaenexa pocotsiwa bequein barapomonaе aichaxaibi exana xua jiwi pia cui coyenewa tatsi xua pocotsiwa bayatha copiya exana xua abe. <sup>19</sup> Barapomonaе wunaе tsimuxu duta ichamonaetha xua ichamonaе beta pejinompaenexa. Ichitha barapomonaе pia coutha exana be pomonaе xua caurimonaе pia pentacaponaein tatsi amanaya petanacuitsiwatsi. Tsipei daxita jiwi pia cui xeina xua barompaya amanaya tanacuita pontha xua bara copata xua bara juntu coyene itorobatsi. <sup>20</sup> Barapo cae pin nacuathe ichamonaе jinompa pomonaе capanenebiyatsi abe pia peexanaе cuiru coyenein weya xua po abe peexanaе cuiru coyene po cae pin nacuathepiwi exana. Barapomonaе baxua exana poxonae jume cowunta Jesucristo,

pon jiwi Pecanamataxeinaein, xuano xua pon jiwi Pecapanenebiyaein. Ichitha icha barapomonaе equeicha abe exana xuano xua icha awiya exana dubenanaebiya baxuan, bapoxonaе barapomonaе bichocono abe beyacaincha xua poxonae copiya exana xua pewunaeya poxonae jume cowunta Jesucristo. <sup>21</sup> Icha barapomonaе jume cowunta yawano icha penta Nacom peitorobi coyenewa, bapoxonaе barapomonaе bichocono abe exana Nacomtha. Ichitha icha barapomonaе copiyatha jopa jume taetsipae barapo peitorobi coyenewa, bapoxonaе barapomonaе saya be conotha abe exanaetsipa Nacomtha. Ichitha poxoru barapomonaе pejume taexae barapo peitorobi jume yawa pejume cowuntsixae, daxota barapomonaе Nacom bichocono atene cana exana, beyacaincha xua poxonae jopa jume taeyo barapo diwesi. <sup>22</sup> Barapomonaе equeicha caewa yabara jume cuiya exana xua abe exana po coyenein bequein copitha nacui barapenta. Bara barapomonaе nacui yabara jume weta xua po tsica diwesiyotha jeye: “Auri ba xua nacabeta iratha equeicha caewa xane. Bequein marrano ba matawainchi pemene itaranaе meratha ichitha equeicha caewa nairainyaba xota tsorei”, jei tsica diwesiyo xua Nacom Pejume Diwesitha paeba.

### Meje yabara xua Jesucristo equeicha pia pepatopeicaewa tsica tsane

**3** Tamonaе pam, pomonaе tapaca caantobewichi pam, iru painya nejume cowuntsixae Jesucristo. Ainya cartabe pacata tinatsi. Barapo carte, po carte cotacaya tinan xua barapo ainya cartabe. Barapo ainya cartabeta ichipan xua beta painya neyabara nanta xeinaewa tsane pocotsiwan xua paca tsipaebatsi. <sup>2</sup> Pananta

xeinare pocotsiwa xua Nacom pia peitorobi jume pepaebiwi paeba poxonae caena bayatha. Yawano jopa pajuntemainaeinde po peitorobi coyenewa naca cuiduba Jesucristo pia peitorobi jiwi tatsi. Barapo peitorobi coyenewa Cristo pon jiwi Pecanamataxeinaein xuano xua pon jiwi Pecapanenebiyaein pia peitorobi coyenewa tatsi.

<sup>3</sup>Copiya matha pananta xeinare xua meje: Pewunaeya poxonae po matcabitha Nacom ira weraweraca exanaena, barapo matcabitha patsina jiwi xua po jiwi cui capanaena pocotsiwa Nacom pia pejume xainyeiwa tatsi. Barapomonae exanaena pocotsiwa saya ichichipa xua abe exana. <sup>4</sup>Barapomonae yainyabiya jei tsane xua Cristo yabara: “Bapon bayatha paca tsiwuna muxu duta xua equeicha patopaetsica. ¿Eta xua metha awiya bapon pawnae ewatame bara jopa patopeicaeyoba? ¿Incane bapon? Bequein wamo susato jiwi jume cowunta xua pinae bapon patopaetsica ichitha jopa daichiyo beya nama poxonae barapomonae werapa cataunxuae bapon jopa patopaeyo. Bara saya jujupapona wanacuatha xua bapon jopa patopeicaeyo xua poxonae Nacom nacua forota beya anoxuae”, jei tsane barapomonae. <sup>5</sup>Ichitha barapomonae jopa ichipaeyo xua yabara jume juntanaina xua caena bayatha Nacom pepaebixae daxota itaboco ducua xua caena bayatha yawa xua ira exana poxonae mene buxupana weyotsina. Barapo ira Nacom mentha exana. <sup>6</sup>Yawano barapomonae jopa ichipaeyo xua juntanaina xua caena bayatha xua poxonae Noé popona Nacom itoroba pin awabo xua equeicha ira mene buxupana boca yawa xua daxita pocotsiwa barapo iratha weraweraca. <sup>7</sup>Ichitha barapo itaboco xua anoxuae tainchi yawa ira xua ichaxota anoxuae jinom-

patsi Nacom dubena exana daxita baxuan poxonae Nacom cueicueijeji pia peayapusu itorobi coyenewatha. Nacom baxuan duba beya abu poxonae weraweraca exanaena daxita baxuan pin isototha barapo pia peayapusu itorobi coyenewatha. Baraxuan Nacom weraweraca exanaena daxita poxonae po mataqueitha Nacom yabara paebina daxita jiwi xua penatsicuentisiwa xua abe peexanaexae.

<sup>8</sup>Tamonae pam pomonae tapaca caantobewichi pam, iru painya nejume cowuntsi jiwixae Jesucristo. Jopa pajuntemainaeinde po coyene xua daxita bara Nacom tsita najupatsi pon jiwi Pecanamataxeinaein. Caentacabi tsita najupatsi xua mil po weibe. Matautano mil po weibe Nacom tsita najupatsi xua caentacabi. Bequein mil po weibe bichocono ainya wei ichitha Nacom saya be tsita caetotsi. <sup>9</sup>Nacom jopa apara bewayo exanaeyo pocotsiwa yabara naca tsiwuna muxu duta bequein ichamonae nanta xaina xua Nacom jopa nainya exaneibiyo. Ichitha Nacom jopa aitaconaeayo daxota paca ewata painya nejume cowuntsinexa. Bapon ichichipa xua dapon aibi tsane pon weraweracaena. Jame Nacom ichichipa xua maisa daxita jiwi peuranea tsane abe peexanaexae xua icha juntu coyene pexinaenexa tsane po juntu coyenein xua Nacom tsita xanepanatsi.

<sup>10</sup>Ichitha po mataqueitha pon jiwi Pecanamataxeinaein patopaetsica barapo matcabitha jiwi jopa wuna ewatsi tsane. Bapon pon Wanacanamataxeinaein jemeicha patopeicaena icha be ichi pon pecaibin xua poxonae namicha patopa. Peitaboco weraweracaena poxonae pin busi tsurucuae tsane. Jomocoichato, xometono, opiteino, daxita baxuan tautinchi isototha. Yawa barapo ira

tautinchí, yawano muxuna tautinchí xua barapo iratha xeina.

<sup>11</sup>Tsipei daxita baxuan tautinchí daxota bewa pajinompam be pomonae pejuntũ coyene xanepanaewi Nacomtha pomonae jopa Nacom tsita xeinaetsi penatsicuentisiwa xua abe peexanaexae. Beta pajinompam icha Nacom ichi xua beta popona. <sup>12</sup>Paeware xua po mataqueitha daxita Nacom wetsina. Yawano paexande pocotsiwa xua yawenatsi xua pepatopeicaewa tsane bichoina barapo matacabi. Barapo mataqueitha itaboco tautsina isototha. Jomocoichato, xometono, opiteino, daxita baxuan tautsina pin isototha. <sup>13</sup>Ichitha waxainchi ewatatsi xua Nacom nacata exanaena pena ira yawa pena itaboco xua bayatha Nacom yabara naca tsiwũnae muxu duta. Barapo pena ira yawa barapo pena itaboco daxita wũnae exanaena pocotsiwa pexainyeyiwanexa tsane.

<sup>14</sup>Tamonae pam, pomonae tapaca caantobewichi pam, irũ painya nejume cowũntsixae Jesucristo. Paca tsipaebatsi baxua xua daxota poxonae cataunxuae paewatame baxuan, xua pocotsiwa Nacom exanaena bara beta paexande. Bapoxonae Nacom paca caxinaena xua jũntema pajinompame, matautano xua jopa paxeinaem peabe coyenewa painya jũntũ coyenewatha, yawano xua ichamonae jopa paca yabara paebi tsane xua abe painya neexanaewa. <sup>15</sup>Yawano payaputaneme xua caena bayatha Nacom pon Wanacanamataxeinaein beitematema naca ewata xua wajume cowũntsinexa xua pia wanaca

capanenebiyaewa tsane. Yawano irũ Pablo baxua yabara pacata tina. Bapon Pablo, pon waantobein, pon irũ jume cowũntaru Jesucristo. Pablo yaputane exainchi baxuan yabara xua Nacom yaputane exana. <sup>16</sup>Bapon Pablo daxita pia cartantha baxuan yabara paca tsipaeba. Ichitha ichawan daunwei xua painya neyaputaewa. Ichitha pomonae jopa beta peyaputae jiwi irũ pomonae pejuntũ coyene faefaenaewi Nacomtha, barapomonae seicaya toxinchiya exana pocotsiwan xua Pablo paeba. Barichi yabara jume toxinchiya exana ichawa pocotsiwa Nacom Pejume Diwesitha paeba. Barapomonae pia coutha nanatsiexana xua abe exana xua peweraweracaewa tsane, xua Nacom exanaena.

<sup>17</sup>Tamonae pam, pomonae tapaca caantobewichi pam, irũ painya nejume cowũntsixae Jesucristo. Painya neyaputaexae baxuan pewũnaeya xua Nacom exanaena baxuan, daxota dota pam pomonae abe pacata necaxanae jiwi xua jopa paca necantacapanawa tsane. Jopa pacopatsinde xua barapomonae baxua pacata exana xua jopa painya nepentsiwa tsane Nacom.

<sup>18</sup>Bichocono pana najuntũ wũnae exanaponde Wanacanamataxeinaein pia peantobewathaxae. Jesucristo beta payabara yaputaeponde, pon Wanacapanenebiyaein. ¡Barabũ bapon ataya xeinaena peainya cui coyenewa anoxuae yawa xua bexa tsaneno! Je bara ichi tsane.

Baja Pedro

**Meje Po Carte Juan Copiya  
Tatina, Pomonae Jesucristo  
Pejume Cowuntsiwi  
Tatinatsi. Barapo Carte  
Peopi Carucuae Carta.**

**Meje yabara po diwesi xua pon  
naca ajuntuyapusuya exana**

**1** Pacata yabara tinatsi pon pewun “Pejume”, baraichi, pon jiwi ajuntuyapusuya exainchi. Bapon asu caena bayatha poxona Nacom abu cataunxuae jopa exanaeyo wanacua. Poxona bapon naexana wanacuatha, bapoxona bexa poxona bapon cueicueije diwesi bara bapoxona barapon pajume tan. Barapon bara yatsicaya patan. Yawa bapon bara pacobe jayabeiban. <sup>2</sup>Barapo peajuntuyapusuwa Nacom exana, po peajuntuyapusuwa xua ataya tsiteca, xua pata yabara yaputaewa baxua. Barapon Nacom Pexanto tatsi xeina barapo peajuntuyapusuwa, matautano patan barapon. Daxota yabara paca tsipaebatsi bapon. Yawano daxota yabara paca tsipaebatsi barapo peajuntuyapusuwa xua bapon xeina, pon Paxatha peecaexae. <sup>3</sup>Paca tsipaebatsi xua bayatha patan yawa xua pajume tanno, caemona painya naexanaenexa paxantha, peburuya wajume cowuntsixae Jesucristo. Icha paxan paichin xua Nacomtha Waxatha caemona panaexanan yawa Pexantotha pon Jesucristo, bara paichinderu. <sup>4</sup>Daxota bara po coyenein pacata tinatsi xua bichocono pata tajuntu coyene weiweinaewa tsane.

**Meje yabara xua Nacom pexainyei  
juntu coyene peyacuiya jinaein**

<sup>5</sup>Po diwesi Jesucristo pana cuiduba barapo diwesi xuya paca tsipaebatsi xua Nacom pexainyei juntu coyene peyacuiya jinaein. Bapon jopa xeinaeyo

peacuirube coyenewa pejuntu coyenewatha, tsipei bapon bichocono pejuntu coyene xeicaein. <sup>6</sup>Icha jeichichi: “Waxainchi Nacom yawa jinompatsi, be caemona peburuya nacayawa jinompatsi Nacomtha”, jeichichi, daichitha caena poxona saya abe exanatsi, bapoxona saya apara naerabatsi xua pocotsiwa wapaebiwa baxua, yawa naerabatsi xua exanatsi. Matautano jopa yawa muxuna jinompaetsi Nacom pia pexainyei coyenewa tatsi. <sup>7</sup>Ichitha icha cajinompaetsipatsi Nacom Pejume Diwesi wajuntu coyeneintha yawa xua exanaetsipatsi pocotsiwa xua Nacom ichichipa bara nexata peburuya caemona naexanatsi. Jesucristo jana pichapabarena poxona tupa, pon Nacom Pexanto tatsi. Barapon pon Nacom Pexanto tatsi petupaexae naetha, daxota Nacom naca juntu coyene wejuntemaina exana daxita abe waexanae cuiru coyenein.

<sup>8</sup>Icha jeichichi: “Jopa abe taexanaewa”, jeichichi, apara bara wacoutha namuxujainyabatsi pocotsiwa wapaebixae. Matautano wajuntu coyeneintha jopa xeinaetsi pexainyei coyenewa. <sup>9</sup>Ichitha icha Nacomtha yabara tsipaebatsi xua abe waexanaewa, xua jeichichi: “Nacom auran yaitama abe exanan”, jeichichi, bapoxona Nacom naca juntu coyene wejuntemaina exana abe waexanae cuiru coyenein xua daxita naca wexuba. Baxua Nacom exana, tsipei bapon yabara baru jume cui cowuntatsi xua peexanaewa tsane pocotsiwa pepaebiwa. Matautano tsipei bapon bara xaniwaichiya peexanaein. <sup>10</sup>Icha jeichichi: “Jopa abe exanaetsi”, jeichichi, apara bara yabara jume cuiya exanatsi xua Nacom pon jiwi pemuxitorobin, tsipei Nacom naca yabara jei: “Barapomona abe peexanaewi”, naca yabara jei. Yawano



Nacom Pejume Diwesi jopa xeinaetsi wajuntũ coyeneintha.

**Meje yabara xua Cristo pon wanaca yabara jume yawenaein Nacomtha**

**2** Pomonae be tamonae tapaca canatsicotaewichi pam, irũ painya nejume cowuntsixae Jesucristo, yabara pacata tinatsi barapo coyene xua abe painya neexanaeyainwa. Daichitha icha waxainchi abe exanatsi barapara waxainchi nantautatsi Jesucristo pon wanaca yabara jume yawenaein Nacomtha xua Paxathaxae. Bapon matauta jũntũ coyene xanepanaya peexanaein. <sup>2</sup>Barapon Jesucristo petũpaexae naca yantomata daxota Nacom naca capanepa abe waexanae cuiru coyenein weya. Jopa meisa waxainchi nexa apara bara irũ daxita barapo cae pin nacuanthapiwi tatsitũpatsi abe pia peexanae cuiru coyenein tatsi.

<sup>3</sup>Icha jume cowuntsiya exanatsi pocotsiwa Nacom pia peitorobi jume diwesitha paeba, nexata bara yaputainchi, xua bara xaniwaicha wayaputaewaba Nacom. <sup>4</sup>Icha ichũn jei: “Xan Nacom yaputan”, jei, xua daichitha jopa exanaeyo pocotsiwa Nacom pia peitorobi jume diwesi paeba, apara bapon pon jiwi pemuxuitorobin, yawa pejũntũ coyenewatha jopa xeinaeyo pexainyei coyenewa. <sup>5</sup>Seicaya nama pon exana pocotsiwa xua Nacom itoroba pon waxainchi jiwanatsi, nexata bara yaputainchi xua bapon xanepanaya antobe Nacom. Daxota waxainchi nayaputainchi xua bara peburũya caemonae nacayawa jinompatsi Nacomtha. <sup>6</sup>Pon xua jei: “Nacom yawa poponan, caemonae peburũya nacayawa poponan Nacom”, jei, bapon bewa yajũntũ coyene wũnaeya poponae, icha bayatha Jesucristo ichi

xua bapon beta xanepanaya yajũntũ coyeneya popona.

**Meje yabara xua Nacom pia pena peitorobi diwesi jume**

<sup>7</sup>Tamonae pam pomonae bichocono tapaca caantobewichi pam, irũ painya nejume cowuntsixae Jesucristo, anoxuae pacata tinatsi barapo peitorobi diwesi xua jopa pena diwesiyo, tsipei caena bayatha barapo diwesi paxeiname poxonae aena pajume cowũntame. Barapo peru itorobi diwesi jume caena bayatha pajume taneme. <sup>8</sup>Ichitha po diwesi xua anoxuae pacata tinatsi, barapo diwesi be pena diwesi naexana. Barapo peitorobi diwesi Cristo bara tsita pexainyei diwesichi, irũrũ paxam paca tsita pexainyei diwesi jume. Tsipei jiwi, copitha jopa yaputaeyo barapo Nacom pia pena peitorobi coyenewa tatsi ichaxota xua jei: “Nantiya pana naantobeinde”, jei. Icha be pocotsi coyeneya jũta ichi poxonae jiwi jopa beta taeyo poxonae quirei. Ichitha anoxuae jiwi yaputane barapo Nacom pia pena peitorobi coyenewa tatsi daxota bara itacũpatsi xua xanepanaya pejinompawea, icha be pocotsi coyeneya jũta ichi poxonae jiwi beta jinompa mataqueitha.

<sup>9</sup>Icha ichũn jei: “Xan Nacom yaputan”, jei, xua daichitha ita aenae-aeneya caseba nawita pontha xua irũ jume cowũntarũ Cristo, bapon apara cataunxuae jopa yaputaeyo Nacom. <sup>10</sup>Pon antobe pontha xua irũ jume cowũntarũ Cristo, bapon apara jame yaputane Nacom. Daxota bapon jopa exanaeyo po coyenein xua abe peexanaewa xua irũ ichamonae peexanaewa tsane. <sup>11</sup>Ichitha pon ita aenae-aenei pontha xua irũ jume cowũnta Cristo, bapon acuicoyenebeyaya popona be pocotsin jopa yaputaeyo Nacom. Bapon jopa xanepanaya poponayeo, icha be pocotsi coyene

juta ichi poxonae pon peitata nacutsin catsawa pona poxoru jopa xapain taeyo.

<sup>12</sup>Pomonaе pexui pam, pacata tinatsi tsipei Nacom paca juntu wejuntemaina exana abe painya neexanae cuiru coye-newan xua Jesucristo painya nejume cowantsixaе. <sup>13</sup>Pomonaе pinyon pam, pacata tinatsi tsipei payaputaneme Nacom, pon Waxa, pon ataya pepoponaеin, pon copiya popona poxonaе aena daxita forota. Pomonaе pewowi jiwі pam, pacata tinatsi, tsipei caurimonaе pia pentacoponaеin tatsi paamanayabame poxonaе paca juntu coyene jujuta xua abe painya neexanaewam tsane.

<sup>14</sup>Pomonaе pexui pam, pacata tinatsi, tsipei payaputaneme Nacom, pon Waxa. Pomonaе pinyon pam, pacata tinatsi tsipei payaputaneme Nacom, pon ataya popona, pon copiya popona poxonaе aena daxita forota. Matautano pewowi jiwі pam, pacata tinatsi tsipei bichocono paajuntucoyenesum, yawano xanepanaya pajume cowuntame Nacom Pejume Diwesi, matautano tsipei pajuntu coyene amanayabame caurimonaе pia pentacoponaеin tatsi.

<sup>15</sup>Jopa bichocono paichichipaeinde pocotsiwa xua abe po cae pin nacuathe. Matautano jopa bichocono pacayabara nanta xeinaeya ichichipaeinde xuan pocotsiwan xeina pomonaе jopa pejume cowantsiwi pomonaе jinompa po cae pin nacuathe. Icha ichun saya ichichipa bichocono xua xuan xeina pomonaе jopa pejume cowantsiwi bapon jopa apara antobeyo Nacom, pon Waxa. <sup>16</sup>Penasi cui tatae coyene Nacom jopa itorobiyo xua barapo cae pin nacuathe tsique nexa. Apara pomonaе jopa pejume cowantsiwi pia coutha exana barapo penasi cui tatae coyene. Matautano Nacom jopa itorobiyo xua abeya peichichipae coyene xua peuwiya tae coyene. Matautano Nacom jopa itorobiyo

po coyenein xua peabi coyenein ichamonaetha, xua pexeinaexae copei. Barapocotsi coyenein Waxa Nacom werena jopa pichipaeyo. Saya apara pomonaе jopa pejume cowantsiwi pia coyene tatsi. <sup>17</sup>Barapo cae pin nacue weraweracaena, yawano muxuna weraweracaena xua xuan abe peexanae cuiru coyenein. Ichitha pon exana pocotsiwa Nacom ichichipa bapon jame ataya poponaena Nacomtha.

### **Meje xua pexainyeiwa yabara, yawa xua penaerabiwa yabara**

<sup>18</sup>Pomonaе pexui pam, bara nama imoxoyo tsane po matacabi Nacom daxita weraweraca exanaena barapo cae pin nacua. Bayatha pajume taneme xua jei: “Imoxoyo patopaena pon Cristo pia peaitafaetabinchi”, jei. Ichitha bayatha pata pinmonae, pomonaе Cristo pia peaitafaetabiwichi. Daxota yaputainchi xua bara nama imoxoyo tsane po mataqueitha Nacom weraweraca exanaena barapo cae pin nacue. <sup>19</sup>Barapomonaе pomonaе Cristo pia peaitafaetabiwichi copiya naca baru nacaetuta poxonaе nacaetuteibatsi, ichitha anoxuae bara weya naca wepu pona. Icha xaniwaicha barapomonaе waxainchi jiwana tsipaetsi metha awiya cataunxuae naca baru nacaetuta dubenanaebiyaetsipa. Barapomonaе waxainya weya pona, xua daxota jiwі taena xua barapomonaе bara jopa wamonae jiwіyo xua jopa pejume cowantsi jiwixae Cristo.

<sup>20</sup>Ichitha paxam Cristo paca cata Nacom pia Pejumope tunaxu tatsi pia painya nepaca baru jinompaenexa. Daxota paxam daxita yabara paca yaputane exana pexainyei coyenewa. <sup>21</sup>Paxam pacata tinatsi tsipei payaputaneme xua pexainyeiwa. Icha jopa payaputaetsipaem baxua, jopa pacata tinaetsipaetsi. Paxam

payaputaneme pon ba xua xaniwaicha pepaebin jopa ba naerabiya paebiyo.<sup>22</sup> ¿Jintam pon pemuxitorobinda? Pon xua jei: “Jesús apara Mesías aibi, pon Nacom itoroba”, jei, bapon apara pon pemuxitorobin. Bapon Cristo pia peaitafaetabi jitontsi tsipei jume matawenta poxonae jiwi paeba xua pinae Cristo Nacom Pexanto tatsi xuano xua Nacom Cristo Paxa tatsi.<sup>23</sup> Pomonae xua Nacom Pexanto tatsi jume itawetatsi xua pejume cowantsiwa, barapomonae jopa nantautsiyo Nacomtha xua be Paxa tatsi. Ichitha pon Nacom Pexanto tatsi xanepanaya yabara paebatsi, xua jei: “Jesús apara Mesías pon Nacom itoroba”, jei, jame bapon nantauta Nacom be Paxa tatsi.

<sup>24</sup> Daxota painya jüntu coyeneintha pajume xeinare Nacom Pejume Diwesi xua bayatha pajume taneme poxonae aena pajume cowuntame. Icha painya jüntu coyeneintha pajume xeiname xua pajume taneme bayatha, nexata bapoxonae peburuya caemonae pana naexanaename Pexanto tatsitha yawa coxiyüntha, xua Nacomtha.<sup>25</sup> Matautano Jesucristo yabara naca tsiwünae muxu duta, naca jei: “Peajüntuyapusüwa paca catinchi po peajüntuyapusüwa xua ataya tsiteca”, naca jei.

<sup>26</sup> Yabara pacata tinatsi barapo coyenein pomonae xua painya nepaca muxujainyabiwa.<sup>27</sup> Ichitha paxam Nacom pia Pejumope tünaxu tatsi paxeiname, po pejumope tünaxu tatsi paca cata Jesucristo. Bapoxonae jopa nantawenonaeyo xua ichamonae paca cuiduba poxoru barapo Nacom pia Pejumope tünaxu tatsi paca cuiduba daxita coyenein. Po coyenein Nacom pia Pejumope tünaxu tatsi paca cuiduba baraxua pexainyeiwa, matautano jopa pemuxitorobiwa. Bara

paichinde caemonae peburuya pana naexande Cristotha, icha Nacom pia Pejumope tünaxu tatsi ichi xua yabara paca cuiduba xua po coyene painya neexanaewa tsane.

<sup>28</sup> Pomonae pexui pam, antubüsüya caemonae peburuya pana naexande Cristotha xua jopa wajunuwinexa xua poxonae bapon patopaetsica barapo cae pin nacuathe. Yawa caemonae pana naexande Cristotha xua jopa waaura tsane barapon peitabaratha xua abe waexanaexae poxonae patopaetsica.<sup>29</sup> Bayatha payaputaneme xua Jesucristo pon jüntu coyene xanepanaya peexanaein. Barichi bewa payaputaename pomonae jüntu coyene xanepanaya peexanaewi, barapomonae barapara Nacom pia pexui tatsi.

### Meje yabara xua Nacom pia pexuimonae tatsi

**3** Maisa Nacom Waxa jopa juniya naca antobeyo. Daxota Nacom copata xua naca yabara jei: “Nacom pia pexui tatsi”, naca yabara jei. Jopa jume, bara barapomonaetsi. Daxota barapo cae pin nacuepiwi jopa naca yaputaeyo xua Nacom pia pexuimonaetsi, tsipei barapomonaetsi jopa bayatha yaputaeyo Nacom.<sup>2</sup> Pomonae tapaca caantobewichi pam xua iru painya nejume cowantsixae Nacom, waxainchi bara Nacom pia pexuimonaetsi. Anoxuae cataunxuae jopa nayaputaetsi xua bexa tsane eta po coyeneya naca cana exanaena. Ichitha yaputainchi xua poxonae Jesucristo patopaetsica, waxainchi naexanaeinchi icha barapon jüta coyeneya ichi. Tsipei bapon bara yatsicaewa taeinchi.<sup>3</sup> Pomonae Jesucristo wünae ewatatsi xua pepatopae wünae, barapomonaetsi najüntu coyene xanepana exana, xua jopa xeinaeyo peabe coyenewa, icha Jesucristo ichi xua bichocono pejüntu

coyene xanepanaein xua jopa xeinaeyo peabe coyenewa.

<sup>4</sup>Daxita pomonae abe peexanaewi, barapomonae Nacom yabara paebina xua penatsicuentiwa abe peexanaexae bapontha. Tsipei poxonae abe exana taacoibichi xua exana pocotsiwa Nacom pia peitorobi diwesi jume paeba. <sup>5</sup>Paxam payaputaneme xua Jesucristo patopeica barapo cae pin nacuathe, wanaca jüntü coyene jüntemaina exanaenexa abe waexanae cuiru coyenein. Matautano payaputaneme xua bapon jopa abe exanaeyo.

<sup>6</sup>Daxita pomonae peburüya caemonae naexana Cristotha, barapomonae jopa abe exana dubenanaebiyaeyo. Ichitha nama pomonae abe exana dubenanaebiya, barapomonae jopa Jesucristo yaputaetsi, matautano jopa pijimonae tatsichi. <sup>7</sup>Pomonae pexui pam, jopa pacopatsinde xua bara ichamonae paca muxujainyabina. Pon ba xanepana exana bapon ba bichocono pejüntü coyene xanepanaein, icha Jesucristo ichi xua bichocono pejüntü coyene xanepanaya exanaein. <sup>8</sup>Ichitha pon ba xua abe exana ducuaenebiya, apara bapon ba caurimonae pia pentacaponaein tatsi pijimonae jiwanaein tatsi. Tsipei caena bayatha, poxonae aena Nacom daxita forota, caurimonae pia pentacaponaein tatsi bapon abe peexanaein. Nacom Pexanto tatsi patopeica xua cana coyene weraweraca peexanaenexa caurimonae pia pentacaponaein tatsi pia coyenewan tatsi.

<sup>9</sup>Pomonae Nacom pia pexui tatsi barapomonae jiwana dapon ba aibi pon ba abe exana ducuaenebiya, tsipei bapon yajüntü cui coyeneya popona Nacom pia cui coyenewa tatsi. Bapon jopa itacupaetsi xua abe exana ducuaenebiya tsipei Nacom pia pexui tatsi jiwanaein tatsi. <sup>10</sup>Daxota yaputainchi pomonae

Nacom pia pexui tatsi, matautano yaputainchi pomonae caurimonae pia pentacaponaein tatsi pia pexui tatsi. Yabara yaputainchi pomonae jopa xanepanaya exanaeyo, barapomonae jopa Nacom pia pexui tatsi. Matautano yabara yaputainchi pomonae jopa antobeyo ichamonae pomonaetha pomonae irü pejume cowüntsiwi, barapomonae jopa Nacom pia pexui tatsi.

**Meje yabara xua poxonae jei:  
“Caemonae peburüya bara  
nantiya naantobe tsainchi”, jei**

<sup>11</sup>Poxonae aena pajume cowüntame, xua beya anoxuae, pajume taneme Nacom Pejume Diwesi. Barapo diwesitha jeye: “Caemonae peburüya bara nantiya naantobe tsainchi”, jei barapo diwesitha. <sup>12</sup>Waxainchi jopa bewa naexanaetsi icha ichi pon pewün Caín, pon caena bayatha tupa. Bapon Caín caurimonae pia pentacaponaein tatsi pia jiton tatsi. Bapon peweicho bexuba. ¿Eta xua metha Caín peweicho bexuba? Caín peweicho uwiya bexuba, tsipei pocotsiwa Caín exana Nacom nexa, Nacom tsita abetsi. Ichitha nama pocotsiwa Caín peweicho tatsi exana Nacom nexa baxua jame Nacom tsita xanepanatsi.

<sup>13</sup>Tamonae pam, pomonae irü painya nejume cowüntsixae Jesucristo. Painya xoba panantü exabame icha ichamonae paca ita aenae-aenei pomonae jinompa po cae pin nacuathe, pomonae jopa pejume cowüntsiwi. <sup>14</sup>Waxainchi yaputainchi xua bewa werapaeinchi abe waexanaexae. Ichitha anoxuae peajüntüyapusüwa xeinatsi, po peajüntüyapusüwa ataya tsiteca waantobexae pomonaetha pomonae irü pejume cowüntsixae. Pon xua jopa antobeyo piamonae jiwanaein tatsi, pon irü pejume cowüntsin Nacom, bapon bequein popona ichitha jopa xeinae tsane peajüntüyapusüwa.

<sup>15</sup> Pon ita aenae-aeneya caseba ichamonae pomonaetha pomonae iru pejume cowuntsiwiru Nacom, bapon Nacom tsitatsi be pon jiji pejutebin. Payaputaneme xua pon jiji pejutebin bapana jopa xeinae peajuntuyarusuwa pejuntu coyenewatha, po peajuntuyarusuwa ataya tsiteca. <sup>16</sup> Waxainchi yabara yaputainchi xua Nacom wanaca antobewa, tsipei Jesucristo naca tsitupa naetotha wanaca antobexae. Daxota bewa copatinchi xua bara ichamonae naca atene exanaena, xua bequein beya poxona tupa naca exanaena ichamonae nexa pomonae iru pejume cowuntsiwiru. <sup>17</sup> Pebin ba xeina nawita xuan pocotsiwa ba nantawenona xua junte ma popona penaexanaewa tsane. Bapon cui tane pia jiton pon iru pejume cowuntsindu Nacom xua pon jopa xeinaeyo pocotsiwa nantawenona. Icha bapo pebin jopa pia jiton yabara nantanuweya nanta xeinaeyo xua peyawenaenexa, barapo pebin apara jopa Nacomtha tsita xeinaeyo peantobewa, po peantobewa Nacom xeina jiji nexa. <sup>18</sup> Tamonae pam, pomonae iru painya nejume cowuntsixae Jesucristo. Jopa bewa saya ichamonaetha jeichi: “Paca antobetsi”, jopa bewa saya jeichi, poxona jopa yawenaetsi barapomonae. Jame bewa xaniwaicha yawenaetsi barapomonae, bapoxona jame yatsicaewa antobe tsainchi barapomonae.

**Meje yabara xua wajume  
cowuntsiya jinompaewa Nacomtha**

<sup>19-20</sup> Poxona yawenatsi ichamonae bapoxona yaputainchi xua bara xeinatsi po coyene pexainyei coyenewa. Xaniwaicha yaputainchi xua Nacom ichichipa pocotsiwa waxainchi exanatsi, bara bequein wajuntu coyene naca jei: “Jamaisa jopa beta exanaem”,

bequein naca yabara jei. Waxainchi yaputainchi xua Nacom bichocono ainya cui, beyacaincha wajuntu coyene poxonae abe naca yabara paeba, tsipei Nacom daxita yaputane. <sup>21</sup> Tamonae pam, paxam pomonae tapaca caantobe jiwichi pam, painya nejume cowuntsixae Jesucristo. Bequein wajuntu coyene jopa abeya naca yabara jeiyo: “Jamaisa jopa beta exanaem”, jopa jeiyo, daxota awiya Nacom jume cowuntatsi xua waexanaewa pocotsiwa Nacom ichichipa. <sup>22</sup> Yawa Nacom naca cata pocotsiwa wucatsi wajume cowuntsixaetsi pia peitorobi diwesi jumein tatsi, yawano poxoru waexanaexae pocotsiwa Nacom ichichipa. <sup>23</sup> Yawa Nacom pia peitorobi diwesi jume naca itorobiya jeye: “Taxanto Jesucristo pajume cowunde, yawa nantiya pana naantobeinde”, naca jei. <sup>24</sup> Daxita pomonae ba exana pocotsiwa Nacom pia peitorobi diwesitha paeba, barapomonae Jesucristo yawa jinompa, barichi barapomonae Jesucristo baru jinompatsi. Waxainchi yaputainchi xua bapon naca yawena ducuaenaebiya, tsipei nanajumope cata waxantha wanaca cuidubinexa barapo coyene.

**Meje yabara xua Nacom pia  
Pejumope tunaxu tatsi, iru pomonae  
Jesucristo abe peyabara paebiwichi**

**4** Tamonae pam, pomonae tapaca caantobe jiwichi pam, iru painya nejume cowuntsixae Jesucristo. Jopa pajume cowuntsinde xua daxita pomonae paca jei: “Paxan Nacom peitorobi jume pata paebiwu pan”, paca jei. Jame maisa pajujure saya barapomonae painya neyaputaenexa barapomonae icha metha bara Nacom itoroba barapomonae. Tsipei barapo cae pin nacuathepiwi jiji ayei pomonae penaerabiwi, pomonae jei: “Paxan Nacom peitorobi jume pata paebiwu

pan”, jei. <sup>2</sup>Ichitha paca itacupa xua payaputaneme pomonae xeina Nacom pia Pejumope tñaxu tatsi. Icha barapomonae paca jei: “Nacom Pexanto tatsi, pon Jesucristo, pepa jiton naexana barapo cae pin nacuathe”, jei, bapoxonae payaputaneme xua barapomonae apara Nacom pia Pejumope tñaxu tatsi yawa jinompa. <sup>3</sup>Icha ichamonae paca jei: “Nacom jopa itorobiyo Pexanto barapo cae pin nacuathe xua penaexanaenexa pepa jiton pewun Jesús”, paca jei, bapoxonae paxam payaputaneme xua barapomonae ba jopa yawa jinompaeyo Nacom pia Pejumope tñaxu tatsi. Barapomonae ba seicaya xeina icha pejumope tñaxu po jumope tñaxu Cristo ita aenae-aeneichi. Paxam bayatha pajume taneme xua barapo pejumope tñaxu bewa patopaetsica po cae pin nacuathe tsique. Bara xainyei bara bayatha barapo jumope tñaxu patopa po cae pin nacuathe tsique.

<sup>4</sup>Tamonae pam, paxam Nacom pijimonae tatsi pam. Paxam pacui coyene amanayabame barapo penaerabi jiwitha. Tsipei po pejumope tñaxu paca yawa popona xua Nacom pia Pejumope tñaxu tatsi, barapo pejumope tñaxu bichocono peayapusu itorobiya coyenewa pexeinaein, beyacaincha po pejumope tñaxu po cae pin nacuathepiwi juntu coyene itoroba dubenanaebiyatsi xua abe peexanaenexa. <sup>5</sup>Barapo jiwi apara barapo cae pin nacuathepiwi, daxota barapomonae yabara cueicueijei pocotsiwan barapo cae pin nacuathe xeina. Ichamonae iru pomonae po cae pin nacuathepiwixae barapo coyene baxuan jume naitaewatsiya exana. <sup>6</sup>Ichitha waxainchi Nacom piamaetsi. Pomonae Nacom yaputainchi, barapomonae bara naca jume naitaewata. Ichitha nama pomonae jopa

Nacom yaputaetsi, barapomonae jopa naca jume naitaewatsiyo. Daxota naca itacupa xua wayaputaewa pomonae cueicueijei pexainyei jume. Matautano naca itacupa xua wayaputaewa pomonae cueicueijei pemuxuitorobi jume.

**Meje yabara xua Nacom peyawa  
cui jinaein xua bichocono  
peantobe coyenewa**

<sup>7</sup>Tamonae pomonae tapaca caantobewichi pam, iru painya nejume cowuntsixae Nacom. Bewa waxainchi nantiya naantobe tsainchi. Tsipei barapo peantobe coyenewatha Nacom naca cana exana xua waxeinaewa waantobe coyenewa. Daxita pomonae xua antobe ichamonae apara barapomonae bara Nacom pia pexui tatsi naexana. Matautano barapomonae bara Nacom yaputainchi. <sup>8</sup>Nacom ba peyacuiya jinaein peantobe coyenewa. Daxota pon jopa tsita xeinaeyo ichamonae peantobe coyenewa apara poxoru jopa yaputaeyo Nacom, tsipei Nacom peyacuiya jinaein peantobe coyenewa. <sup>9</sup>Poxonae Nacom Pexanto itoroba Nacom naca tsita ituta pia peantobe coyenewa. Nacom Pexanto itoroba pon yatsicaya compa tatsi, barapo cae pin nacuathe tsique waxeinaenexa tsane peantuyapusuwa, po peantuyapusuwa ataya tsiteca. <sup>10</sup>Barapo yatsicaewa pepa peantobe coyenewa meje baxue: Poxonae ba Nacom antobetsi, baraxua ba jopa pepa peantobe coyenewiyo. Jame ba Nacom naca antobe baraxua ba jame yatsicaewa pepa peantobe coyenewa. Poxoru Nacom itorobica Pexanto wanaca wejuntemaina exanaenexa abe waexanae cuiru coyenein. Barapo coyene jame yatsicaewa pepa peantobe coyenewa.

<sup>11</sup>Tamonae, pomonae tapaca caantobe jiwichi pam, iru painya nejume cowantsixae Nacom. Tsipei Nacom bichocono naca antobe, daxota xuya waxainchi bewa nantiya naantobe tsainchi. <sup>12</sup>Dapon ba aibi pon bayatha Nacom tainchi. Ichitha icha waxainchi nantiya naantobe tsainchi, bapoxonae Nacom naca yawa poponaena. Nacom beta xaniwaichiya cana exana pia peantobe coyene wajuntu coyene berena. <sup>13</sup>Waxainchi natsita itapeinya xeinatsi, xua bara Nacom yawa jinompatsi, yawa xua Nacom naca yawa popona, tsipei Nacom nanajumope tunaxu cata waxantha. <sup>14</sup>Paxan patan Jesucristo poxonae Nacom Pexanto itorobica. Daxota pajan: “Bara xainyei xua Nacom Pexanto itorobica, xua barapon pecapanenebiyaenexa po cae pin nacuathepiwi xua abe pia peexanae cuiru coyenein weya tatsi”, pajan. <sup>15</sup>Pon ba xua jeye: “Bapon Jesús Nacom Pexanto tatsi”, jei, bapon apara bara yawa popona Nacom, iru Nacom yawa popona bapon.

<sup>16</sup>Daxota waxainchi Nacom yaputainchi, yawa jume cowantatsi xua xaniwaicha bara Nacom naca antobe. Nacom apara pon peyanthuthuya jinaein xua pocotsiwa bichocono peantobe coyenewa. Pon xua bichocono antobe ichamonae, bapon apara bara yawa popona Nacom, iru Nacom yawa popona bapon. <sup>17</sup>Daxota waxainchi yabara nacuiduba dubenanaebiyatsi xua bichocono peantobe coyenewa. Poxonae matacabi tsuxubi tsane po mataqueitha Nacom jiwu yabara paebina xua penatsicuentisiwa Nacomtha, barapo matacabitha jopa junuwi tsainchi. Jume cowantinchi xua Nacom jopa wanaca yabara paebiwa tsane xua abe waexanaexae. Icha Jesucristo ichi xua jopa abe exana ducuaenaebiyaeyo poxonae popona po cae pin nacuathe, waxainchi

barapocotsi coyeneya ichichi poxonae jinompatsi po cae pin nacuathe. <sup>18</sup>Poxonae antobetsi ichamonae barapo juntu coyenewatha ba jopa cunuwichi barapomonae. Tsipei barapo peantobe coyenewatha torotatsi pocotsiwa xua pejunuwiwa xua wajuntu coyene weya. Tsipei pon junuwa nayaputane xua atene tsaneba, penayaputaexae xua abe exana. Pon ba junuwa jopa xeinaeyo peantobe coyenewa, po peantobe coyenewa Nacom weya.

<sup>19</sup>Waxainchi daxota Nacom antobetsi tsipei bapon copiya pewunaeya naca antobe. <sup>20</sup>Icha pebin jei: “Xan Nacom antobein”, jei, xua daichitha caena ita aenae-aeneya caseba pia jiton pontha xua iru jume cowuntaru Nacom, apara barapo pebin pon jiwu pemuxu-itorobin. Icha jopa antobeyo pia jiton pon peyaitaexae, barichi bapon jopa antobeyo Nacom pontha xua jopa yaitaeyo. <sup>21</sup>Nacom nacata itoroba pia peitorobi diwesi jume. Barapo diwesitha naca jeye: “Pon ba xua Nacom antobetsi, bapon ba bewa muxuna antobe tsane pia jiton pontha xua iru jume cowuntaru Nacom”, naca jei barapo diwesitha.

### **Meje yabara poxonae xua waxainchi juntu coyene amanayabatsi pomonae jopa pejume cowantsiwi**

**5** Pon ba bichocono tsita xeina pejume cowantsiwa Jesús pon xua jei: “Jesús apara bara bapon pon Nacom itorobica, pon Mesías jeichichi”, jei, bapon jame Nacom Pexanto tatsi naexana. Daxita pomonae antobe Nacom xua paxatha, barichi barapomonae muxuna antobe Nacom pia pexui tatsi pomonae iruru pejume cowantsixae. <sup>2</sup>Poxonae waxainchi Nacom antobetsi xuano exainchi pocotsiwa Nacom pia peitorobi coyenewantha itoroba, bapoxonae yaputainchi xua bara antobetsiru

Nacom pia pexui tatsi. <sup>3</sup>Poxonae Nacom antobetsi, bapoxonae jume cowuntsiya exanatsi pocotsiwa paeba Nacom pia peitorobi diwesi jumeintha. Nacom pia peitorobi diwesi jumein jopa ayapubeyo xua yabara jume cui cana exana. <sup>4</sup>Daxita pomonae Nacom piamonae tatsi, barapomonae juntu coyene amanayaba pontha pon jiwi juntu coyene itorobatsi po cae pin nacuathepiwi xua abe peexanaewa tsane. Wajume cowantsi coyenewa Nacomtha, barapo coyenewatha naca yawena xua wajuntu coyene amanayabiwa pontha pon jiwi juntu coyene itorobeibatsi po cae pin nacuathepiwi xua abe peexanaewa tsane. <sup>5</sup>Saya pomonae jame jume cowunta, xua pejeiwa: “Jesús apara Nacom Pexanto tatsi”, jei, jame barapomonae juntu coyene amanayaba bapontha pontha pon jiwi juntu coyene itorobeibatsi po cae pin nacuathepiwi xua abe peexanaewa tsane.

**Meje yabara xua po diwesi  
Nacom Pexanto tatsi yabara**

<sup>6</sup>Bapon Jesucristo patopeica po cae pin nacuathe tsique. Poxonae bapon bautisabatsi, yawa poxonae naetha tupa exanatsi, xua poxonae jana pichapabarena, barapo naxobe cui coyenebe naca yaputane exana xua bapon Jesucristo, apara bara Nacom Pexanto tatsi. Saya meisa jopa naca yaputane exanaeyo xua poxonae bautisabatsi, bara yawa iru naca yaputane exana xua poxonae naetha tupa exanatsi, yawa xua poxonae jana pichapabarena. Nacom pia Pejumope tunaxu tatsi yabara paeba daxita baxua. Barapo Nacom pia Pejumope tunaxu tatsi bara xaniyeya pepaebin. <sup>7</sup>Nacom naca yaputane exana xua Jesucristo bara Nacom Pexanto tatsi poxonae cueicueijejei acoibi po jumeoyobe peitaboco wetsica. <sup>8</sup>Barapo

jume apara poxonae Nacom naca tsi-paeba wajuntu coyenewatha. Yawano barapo jume po jume xua cueicueijejei poxonae Jesús bautisabatsi. Yawano barapo jume po jume xua cueicueijejei poxonae bara nama imoxoyo tupaena Jesús. Barapo acoibi jumeoyobe peburaya cuita caunuta xua jei: “Bapon Jesús apara Nacom Pexanto tatsi”, jei. <sup>9</sup>Ba jume cowuntatsi po jumein jiwi paeba. Ichitha po jume nama Nacom Pexanto yabara paeba, barapo jume jame bichocono peainya cui jume, beyacaincha po jumein xua jiwi paeba. Daxota bewa jume cowuntichi po coyene xua Nacom Pexanto yabara paeba. <sup>10</sup>Pon ba Nacom Pexanto tatsi jume cowuntatsi, bapon ba pia juntu coyenewa tsi-paebatsi xua bara bapon ba Jesucristo yatsicaewa Nacom Pexanto tatsi. Pon jopa Nacom jume cowuntichi, bapon nanta xeina xua Nacom naeraba xua pon jiwi pemuxuitorobin, tsipei bapon jopa jume cowuntsiyo po coyene Nacom Pexanto yabara paeba. <sup>11</sup>Barapo jume, po jume Nacom Pexanto yabara paeba, barapo jume wajuntu coyenewatha jume tainchi, naca jeye: “Nacom peajuntuyapusuwa naca cata po peajuntuyapusuwa ataya tsiteca, po peajuntuyapusuwa Nacom Pexanto tatsi pia xainya werena tapichapatsi”, jei barapo jume. <sup>12</sup>Pon ba Nacom Pexanto tatsi yawa popoinchi, bapon xeina barapo peajuntuyapusuwa. Ichitha pon Nacom Pexanto tatsi, jopa yawa poponaetsi, bapon jopa xeinaeyo barapo peajuntuyapusuwa, po peajuntuyapusuwa ataya tsiteca.

**Meje yabara poxonae Juan  
muxu tsipaeba, poxonae  
imoxoyo nacobe weta xua tina**

<sup>13</sup>Pacata tinatsi paxam, pomonae pajume cowuntame, Nacom Pexanto tatsi. Po coyenein xua pacata tinatsi, apara xua painya neyaputaenexa xua bara pax-



einame peantuyapusuwa, po peantuyapusuwa xua ataya tsiteca.

<sup>14</sup> Waxainchi bichocono yabara jume cowuntatsi Nacom xua wanaca yawenaewa tsane. Tsipei yaputainchi poxonaе wucatsi pocotsiwa Nacom ichichipa, bapoxonaе Nacom bara naca jume tane pocotsiwa yabara xua wawucaexae. <sup>15</sup> Tsipei yaputainchi xua Nacom naca jume tane poxonaе wucatsi, daxota yaputainchi xua bara xeinatsi pocotsiwa wucatsi Nacom.

<sup>16</sup> Icha taneme xua ichun abe exana pon iru jume cowunta, xua ichitha pocotsiwa bapon exana jopa tupa naexanaeyo, bapoxonaе Nacomtha tawucare bapon. Bapoxonaе Nacom cana exana xua bapon xeina peantuyapusuwa. Ichitha icha jiton abe exana pocotsiwa xua tupa naexana jopa catsipae-bichi xua Nacomtha tawucame bapon. <sup>17</sup> Daxita pocotsiwan jiwi abe exana daxita baxuan Nacom tsita abetsi. Dai-chitha barapo abe peexanae coyene jiwana xua icha abe peexanae coyenewa barapo abe peexanae coyene jopa tupa naca cana exanaeyo.

<sup>18</sup> Yaputainchi pon yawa popona Nacom xua pia Paxaxae, bapon jopa exanae ducuaenaebiyaeyo abe peexanae cuiru coyenein, tsipei Nacom Pexanto tatsi yawena xua bapon yawenatsi. Matautano caurimonaе pia pentacaponaein tatsi jopa itacupaetsi xua bapon peitorobiwatsi xua abe peexanaewa tsane. <sup>19</sup> Yaputainchi xua bara Nacom piamonaе tatsichi, yawa yaputainchi xua caurimonaе pia pentacaponaein tatsi itoroba daxita po cae pin nacuathepiwi xua abe peexanaewa tsane. <sup>20</sup> Yaputainchino xua Nacom Pexanto tatsi bayatha patopeica barapo cae pin nacuathe, yawa naca tsipaeba Nacom Pejume Diwesi wayaputaenexa Nacom, pon pexainyein. Matautano yawa jinompatsi Nacom Pexanto tatsi, pon pexainyein, pon Jesucristo. Barapo Nacom pexainyein pon naca cata peantuyapusuwa, po peantuyapusuwa xua ataya tsiteca. <sup>21</sup> Tamonaе pam, jopa pajume cowuntsinde ibo nacomun.

Baja Juan.

**Meje Po Carte Juan Epatotha  
Tatina, Pomonae Jesucristo  
Pejume Cowuntsiwi Tatinatsi.  
Barapo Carte Epatowa Carta.**

**Meje xua pexainyei diwesi yabara,  
yawano peantobe diwesi yabara**

**1** Xan Juan, pon bayatha pitirin naexanan, pacata tinatsi barapo carte pomonae pam pomonae panacaetutame Nacom painya nejume cowuntsixaem. Nacom paca itapeta painya paca exanaenexa piamonae. Iru tatinan pomonae paca baru nacaetuta pomonae be painya pexui natsicotane. Xaniwaicha betiya paca antobetsi painya neyaputaexae pexainyeiwa. Matautano ichamonae paca antobe pomonae yaputane pexainyei jumein. <sup>2</sup>Xan bichocono paca antobetsi poxoru painya nejume cowuntsixae Nacom pia pexainyei diwesi tatsi. Barapo pexainyei diwesi wajuntu coyenewantha cajinompeibatsi anoxuae, matautano xua ataya tsane. <sup>3</sup>Cajinompatsi Nacom pia pexainyei coyenewa tatsi pia peantobe coyenewa tatsino. Daxota Nacom Waxa iru Jesucristo Wanacanamataxeinaein pon Nacom Pexanto tatsi baponbe naca yawenabe. Baponbe naca yawenaena, matautano amanayiya baponbe naca yabara nantanuweya nanta xeinaena pia wanaca yawenaenexa. Matautano baponbe juntea jinompa naca exanaena.

<sup>4</sup>Juntu coyene weiweinan tsipei painyamonae jiwana cui tan, xua beta pejinompaewa. Barapo painyamonae exana po coyenewa xua pexainyei coyenewa, icha be pocotsi coyeneya xua Nacom Waxa naca cui itoroba. <sup>5</sup>Paxam, iru painya nejume cowuntsixae Nacom, paca tsipaebatsi bewa waxainchi

nantiya naantobe tsainchi. Po peitorobi coyenewa pacata tinatsi jopa pena peitorobi coyenewiyo. Barapo peitorobi coyenewa copiya xeinatsi poxonae aena jume cowuntatsi. <sup>6</sup>Icha waxainchi Nacom antobetsi, barapoxonae bewa jume cowuntsiya jinompaeinchi icha be pocotsi coyeneya Nacom naca itoroba pia peitorobi diwesi jumetha. Barapo peitorobi diwesi jume pajume taneme poxonae aena pajume cowuntame. Barapo peitorobi diwesi jume naca jeye: “Nantiya pana naantobeinde”, jei.

**Meje yabara pomonae jiwi  
pemuxujainyabi jiwi**

<sup>7</sup>Po cae pin nacuathe jiwi ayei jinompa, pomonae jiwi pemuxujainyabi jiwi. Barapomonae jeye: “Nacom jopa itorobiyo Pexanto barapo cae pin nacuathe, pon pewun Jesucristo xua pepa jiton naexana”, jei barapomonae. Pomonae xua bapocotsiwa paeba, bapomonae apara pomonae jiwi pemuxujainyabi jiwi yawa bapomonae Cristo abe peyabara paebiwichi. <sup>8</sup>Dota pam bu caurimonae paca juntu coyene jujuta, abe painya neexanaewa tsane, xua daxota Nacom painya nepaca catsinexa pentoma xua abe painya neexanaexae. Maisa jame beta xanepanaya paexande, xua Nacom painya nepaca catsinexa daxita barapo pentoma xua beta painya neexanaexae.

<sup>9</sup>Pon xua equeicha ichichipa icha coyenewa xua pecuidubiwa beyacaincha xua Cristo pia pecuidubi coyenewa tatsi, bapon jopa nantaustiyo Nacom xua be Paxa. Ichitha jame pon exana ducuaenaebiya pocotsiwa xua Jesucristo pia pecuidubi coyenewatha paeba, bapon jame nantauta Nacom be Paxa, matautano nantauta Jesucristo pon Nacom Pexanto tatsi. <sup>10</sup>Icha ichun paca siwa pona pia nepaca cuidubinexa icha coyenewa xua pecuidubiwa xua Na-

com yabara, po pecuidubi coyenewa xua jopa Jesús pia pecuidubi coyenewa tatsi bapoxonae bapon jopa matenta weiweinaya pajacobinde painya bo berena. <sup>11</sup> Tsipei pon matenta weiweinaya waba pontha pon pecuidubinexatsi icha pecuidubi coyenewatha, bapon apara irurū abe exanarū icha be bapon ichi pon ichun pon pia botha petapatopaexaetsi.

**Meje yabara poxonae xua  
Juan opi wetaba po carte**

<sup>12</sup> Ainya diwesin bequein cataunx-  
uae xeinan xua tapaca camuxu tsipae-

biwa tsainchi, ichitha jopa beyabara tinaeinyo paperatha barapo diwesin. Daichitha ewatan xua tapaca cataewa tsainchi bexa, matautano xua tapaca catsipaebiwa tsainchi. Bapoxonae wajuntū coyene weiweinaenexa tsainchi bichocono.

<sup>13</sup> Pomonae irū Nacom pejume cowantsiwi icha paxam paichim, pomonae irū Nacom itapeta, barapomonae paca jacobae.

Baja Juan.

**Meje Po Carte Juan Cotacaya  
Tatina, Pomonae Jesucristo  
Pejume Cowuntsiwi  
Tatinatsi. Barapo Carte  
Petabũ Carucuae Carta.**

**Meje yabara poxonae Juan jũntũ  
weiweinaya tatina, Gayo tatinatsi**

**1** Jaco Gayo, pon tacaantobetsi jitom. Xan, pon bayatha pitirin naexanan. Barapo carte cata tinatsi, yaitama bichocono xaniwaicha caantobetsi, jinya nejume cowuntsixae Nacom pia pexainyei diwesi jume tatsi.

<sup>2</sup>Pon tacaantobetsim, pon be tayapin tacanatsicotaeinchi irũ nejume cowuntsixae Nacom. Nacomtha cata wũcatsi xua jũntema nepoponaewa tsane xuano xua axaibiya nepoponaewa tsane, icha be ichim xua beta xaniwaicha poponame Nacom peitabaratha tatsi.

<sup>3</sup>Bichocono jũntũ coyene weiweinan poxonae ichamonae pomonae pejume cowuntsiwi jiwana taxantha pata yawa netsipaeba. Barapomonae cayabara paeba xua pinae yajũntũ coyeneya popona ducuaaebiyame Nacom pia pexainyei coyenewa tatsi. Bara xainyei bara barapo coyenewa exaname.

<sup>4</sup>Dapocotsiwa aibi pocotsiwa jume tan pocotsiwa xua nejũntũ coyene weiweina exana beyacaincha xua poxonae jume tan xua tajiwimonae xaniwaicha beta jinompa Nacom peitabaratha tatsi pejume cowuntsixae Jesucristo.

<sup>5</sup>Pon tacaantobetsim, pon be tayapin tacanatsicotaeinchi irũ nejume cowuntsixae Jesucristo. Bichocono xanapanaya exaname xua Nacom nexa xua poxonae yawename pomonae Jesucristo pejume cowuntsiwichi, matautano poxonae yawename pomonae icha nacuan werena

pepatsiwi, pomonae bequein jopa neyaitae jiwi. <sup>6</sup>Barapomonae pomonae icha nacuan werena pepatsiwi pomonae Jesucristo pejume cowuntsiwichi jeichichi: “Maisa bichocono pana antobe Gayo tsipei pana yawena”, jei barapomonae. Cawũcatsi xua barapomonae equeicha neyawenaenexa xua pocotsiwa barapomonae nantawenona xua poxonae warapaena jinya neexanaenexa po coyenewa Nacom ichichipa bichocono. <sup>7</sup>Barapomonae ponarũcũpa xua Jesucristo petanacuichiwa tsainchi. Barapomonae jopa wũcaeyo pomonaetha pomonae jopa pejume cowuntsiwi Nacom xua peyawenaenexatsi pocotsiwa penantawenonaewa. <sup>8</sup>Daxota bewa barapomonae yawenaetsi xua bapoxonae barapara irũ barapomonae nanabarũ cueicueijeichi pexainyei jume diwesi.

**Meje yabara po diwesi xua  
Diótreres abe exana xuano  
irurũ Demetrio beta exana**

<sup>9</sup>Xan caena bayatha icha coyenewiyo tatinan Jesucristo pejume cowuntsiwichi. Daichitha Diótreres jopa jume cowuntsiyo taitorobi coyenewa, tsipei barapomonae pomonae Jesucristo pejume cowuntsiwichi pia xantha tatsi Diótreres ichichipa naexana be pon pecanamataxeinaein. <sup>10</sup>Daxota icha ponaein nexainya beya, yabara catsipaebinchi bapon tsipei bapon catsawa neyabara paeba, peabe jumetha. Barapon jopa beta exanaeyo tsipei jopa wũnae weyataeya wabeibiyo pomonaetha pomonae Jesucristo pejume cowuntsiwichi. Irurũ pomonae jiwi pententa weyataibiya wabeibiwi, baxuan cui matawentatsi, yawa bapon barapomonae itaweta pomonae Jesucristo pejume cowuntsiwichi itawetatsi.

<sup>11</sup> Pon tacaantobetsim, pon be tayapin tacanatsicotaeinchi iru nejume cowuntsixae Jesucristo jopa acuicoyenebeya poponaeinde icha poxonae ichun ichi xua acuicoyenebeya popona. Saya jame maisa beta exanaponde icha poxonae ichun ichi xua beta exanapona. Pon ba beta exana pocotsiwa Nacom itoroba apara bara Nacom piamonae jiwu jiwana tatsi. Ichitha pon ba abeya popona, apara jopa poxoru yaputaeyo Nacom.

<sup>12</sup> Daxita jiwu Demetrio xanepanaya yabara paebatsi. Pocotsiwa xua bapon exana, naca yaputane exana xua bara bapon xainyeya peexanaein. Iruru xan xanepanaya yabara paeban Demetrio. Matautano yaputaneme xua pocotsiwa paeban bara xainyei.

### **Meje yabara xua Juan opi wetaba po carte**

<sup>13</sup> Xam Gayo ainya diwesi bequein cataunxuae xeinan xua tacamuxu tsipaebiwa tsainchi, daichitha jopa beyabara tinaeinyo paperatha barapo diwesi. <sup>14</sup> Bara nama methaunxuae catayopiyaeinchi nexata bapoxonae wanatsipaebiwa tsanebe.

<sup>15</sup> Bara Nacom jantema popona caexanaena. Pomonae xote jinompa pomonae be jinya jiwimonae, barapomonae cajacoba. Inta jacobare daxita wajiwimonae.

Baja Juan.

## **Meje Po Carte Judas Tatina Pomonaetha Pomonae Jesus Pia Pejume Cowuntsiwichi**

### **Meje poxonae Judas tamropata pitaba xua tatina pomonaetha pomona bayatha Nacom waba xua pia pejume cowuntsinexatsi**

**1** Xan, Judas, ponxaein tanacuitan amanaya Jesucristo tacoya taichichipaexae. Xan Santiago peweicho tatsin. Barapo carte pacata tinatsi pomona pam, pomona bayatha Nacom Waxa itapetsiya paca waba, xua painya nejume cowuntsinexa. Nacom bichocono paca antobe. Nacom Pexanto tatsi pon Jesucristo beta paca yapu eena xua beta painya nejume cowuntsinexa Nacom. <sup>2</sup>Barabu Nacom jopa juniya paca yabara nanta xeinae tsane xua nantanuweya paca yabara nanta xeineibina pia paca cayawenaenexa. Matautano barabu Nacom bichocono juntea jinompa paca exanaena. Matautano barabu Nacom paca catsibina pia peantobe coyenewa painya neyawa muxuna jinompaenexa.

### **Meje yabara xua pomona pemuxujainyabiya cuidubi jiwi**

<sup>3</sup>Paxam pomona bichocono tapaca caantobewichi pam. Maisa bichocono ichichipan xua yabara tapacata tinaewatsi pecapanenebiyae coyenewa xua po coyenewatha Nacom paca capanepa abe painya neexanae cuiru coyenein weya. Barapo coyenewatha Nacom necapaneparu barapo coyene weya. Bequein ichichipan yabara pacata tinatsi baxua, daichitha anoxuae jopa neitacupaeyo. Jame bewa copiya yabara pacata tinaeinchi xua painya nejume cowuntsiwa. Paca itorobatsi xua naitomatsiya jume daunweya yabara

painya paebinexa painya nejume cowuntsiwa, bequein ichamona paca atene exana painya nejume cowuntsixae Jesús. Barapo pejume cowuntsiwa Nacom caena bayatha caetotha nacui coyene cata pijimona, xua barapomona xuya penacui coyene cacataponaenexa ichamonaetha. <sup>4</sup>Bara barapocotsiwa paca tsipaebatsi, tsipei jiwi namichiya jinompa painya xantha pomona pemuxujainyabiya cuidubi jiwi xua jopa pacui yaputaem pocotsiwa barapomona exana. Caena bayatha barapomona Nacom Pejume Diwesitha yabara tinatsi xua barapomona pinae bewa atene tsane abe peexanaexae. Barapomona peajuntucoyenebe jiwi. Matautano barapomona jiwi muxujainyabiya cuidubatsi xua pinae Nacom amanayiya capanepa jiwi pia peantobexae. Nacom peantobexae jiwi, daxota pinae Nacom copata xua jiwi bara abe peexanaenexa. Barapomona yabara jume itaweta, poxonae po jumetha ba jiwi jeye: “Jesucristo, bapon yatsicaya compa pon Wanacaitorobin xuano Wanacanamataxeinaein”, jei.

<sup>5</sup>Bequein payaputaneme xua bayatha Nacom, pon jiwi Pecanamataxeinaein exana, daichitha ichichipan xua equeicha yabara tapaca tsipaebiwatsi baxuan. Nacom exana xua piamona tatsi Egipto nacua wepanenebiya xua Israel nacua bepanenebiya. Bequein Nacom baxua cana exana daichitha pirapaeyo Nacom cana exana xua barapo israelmonae jiwamonae jutebatsi pomona jopa pejume cowuntsiwixaetsi.

<sup>6</sup>Matautano payaputaneme xua Nacom cana exana matatsunpiwitha. Barapo matatsunpiwi nacui barapenta pia peitorobi coyenewan bequein Nacom cata. Matautano barapomona Nacom pia nacua weya tatsi pona xua nacou tomara cuenta warapa xua itaboco

weyaxae. Daxota Nacom itoroba xua barapo matatsunpiwi peyamaxu cubiya jebinxatsi pequirei nacuatha beya, beya abu poxona po matabi tsane poxona atene tsane poxona Nacom yabara paebina daxita jiwi xua penatsicuentisiwa xua abe peexanaexae. Barapo matatsunpiwi penaintontha maxu cubebatsi, po penainton jopa weraweracaeyo. <sup>7</sup>Pacayabara nanta xeinare xua poxona po tomarabeta Nacom cana exana, po tomara pewun Sodoma yawa xua Gomorra, yawano xua poxona ichaxota po tomarantha xua cuariyatha ena. Barapo tomaranpiwi abe exana xua poxona cana siwainyameinta exana pebiwitha xua jopa be ichiyo xua pocotsi coyenewatha ba pebiwi cana exana yabuxitha. Nacom caunutsiya yabara paeba barapomona xua barapomona ataya tsitecaeya peraxa exainchi abe peexanaexae. Barapomona naca tsita itapeinya xaina xua Nacom bara cana ichi tsane daxita jiwitha icha barapo tomarabepiwi cana ichichi.

<sup>8</sup>Ichitha pomona anoxuae yabara paca tsipaebatsi, pomona pemuxujainyabiya cuidubi jiwi, barapomona abeya nanta xaina dubenanaebiya, xua poxona baxua yabara amachinae tsurubenanaebiya. Daxota barapomona pia pepon abeya taxoba exana dubenanaebiya. Barapomona itaweta Nacom pia peitorobi coyenewa pon jiwi Pecanamataxeinaein. Matautano barapomona abe yabara paeba Nacom pia matatsunpiwi. <sup>9</sup>Nacom pia matatsunpin, po matatsunpin matabapana icha matatsunpiwi, bapon pewun Miguel. Bapon Miguel najume matsontsonobabe caurimona pia pentacaponaein tatsi. Yabara najume matsontsonobabe xua Moisés pia pepon xua jintam metha pinae

xeinaena. Miguel jopa nanta xeinaeyo xua xuya anaepanaya jume nota xua pejeiwa: “Maisa abe exaname daxota Nacom pon jiwi Pecanamataxeinaein atene cacana exanaena”, jopa jeyo, bara bequein itacupatsi xua pepaebiwa baxua. Saya jame Miguel jei: “Barabu Nacom caitawetsina”, jei Miguel. <sup>10</sup>Ichitha barapomona pomona pemuxujainyabiya cuidubi jiwi abe yabara paeba pocotsiwa barapomona jopa yaputaeyo. Matautano barapomona exana icha be pocotsi coyeneya ichichipa xua abe peexanaewa. Barapomona baxua exana bequein jopa pexanepanayeo taetha, icha duweimona ichi xua poxona exana be pocotsi coyeneya ichichipa. Daxota barapomona pia coutha naajuntucoyenebe cana exana.

<sup>11</sup>Jaiibo, barapomona tsobernae! Tsipei barapomona Nacom jopa bejume cowuntichi icha be ichi pon pewun Cain, pon caena bayatha peweicho bexuba, peweicho peuwixae. Matautano barapomona catsibatsi paratixi xua ichamona catsiba xua barapomona abeya coyeneya pecuidubixae. Tsipei barapomona bichocono pitaparatixichi icha be poxona ichi pon pewun Balaam poxona paratixi catsibatsi xua ichamona catsiba xua Balaam abeya coyeneya pecuidubixae. Matautano barapomona jiwi juntucoyene tsacabatsi xua jiwi naba peexanaenexa Nacomtha daxota barapomona werapaena. Baxua exana icha be poxona pon pewun Coré ichi poxona jiwi juntucoyene tsacabatsi xua jiwi naba peexanaenexa Moisestha, xua bapoxona Coré tupa xua bexotsi. <sup>12</sup>Poxona paxam paexaname xua jiwi nacaetuta painya nenabanaenexa painya nenaantobexaem, barapomona pomona pemuxujainyabiya cuidubi

jiwi paca caxinta pia peexanae coyeneintha. Barapomonaе atsaquiya nabane, yawa atsaquiya apa. Saya jopa yabara nanta xeinaeyo ichamonaе. Saya meisa barapomonaе nayabara nanta xeina nawita. Poxonaе barapo coyene exana, barapomonaе abe paca cana exana. Po tsaquinaebowan ba xua jopa jiwi catichi mera, xua equeicha pin joibo tabu torota peira tsewi weya xua jopa peruneicaenexa tsane, barapo tsaquinaebowan ba jiwi jopa catichi mera, jiwi jopa yawenaetsi. Bara juta ichi barapomonaе pomonaе pemuxujainyabiya cuidubi jiwi. Bequein barapomonaе pia coutha beta nayabara paeba, daichitha jiwi jopa yawenaetsi. Po naein ba xua jopa nacoichiyo pia matabacabintha xua poxonaе nacoiteiba barapo naein jiwi ba yatabaca jona tsipei jopa naein penacoichixae. Bara juta ichi barapomonaе pomonaе pemuxujainyabiya cuidubi jiwi, jiwi jopa beta xapain jinompa cana exanaetsi. Daxota jiwi itaweta barapomonaе. <sup>13</sup>Ichamonaе aura exanatsi poxonaе barapomonaе abeya cuiduba xua jopa jiwi peyawenaexaetsi. Barapomonaе bichocono abe exana icha pin maratsaca doriton ichi xua pitapa beya bebeya xua thamthamei xua bichocono petsoreixae. Bara juta ichi barapomonaе saya jiwi aura exanatsi abe peexanaexae daxota jiwi cuenta pona barapomonaе. Poxonaе opiteiton ba poton pia namton weya itaxanumeinyatsi saya pipato dubenanaebiya ataya ichaxota pequireiwatha. Bara juta ichi barapo pemuxujainyabiya cuidubi jiwi, jopa xapain jinompaeyo po cae pin nacuathe. Daxota Nacom bebai tsane barapomonaе pia xainya weya ichaxota

pequireiwatha xua bara ataya tsitecaeya tsane abe peexanaexae.

<sup>14</sup>Barapomonaе pomonaе pemuxujainyabiya cuidubi jiwi yabara paebatsi, xua ichun yabara paeba pon pewun Enoc. Adan xeina seis poyobe pia pemomo susatopiwi xua napuna naexanapona beya poxonaе bapon naexana pon Enoc. Bapon Enoc pon caena bayatha Nacom pia nacua beicha caichatsi. Bapon Enoc yabara paeba barapomonaе pomonaе pemuxujainyabiya cuidubi jiwi, poxonaе cueicueije pocotsiwa Nacom yaputane exana. Bapon Enoc jeye: "Tan pon jiwi Pecanamataxeinaein. Bapon tan xua pia matatsunpiwi baru patopeica, bichocono pin bicheito matatsunpiwi. <sup>15</sup>Bapon baru patopeica matatsunpiwi xua jiwi atene peexanaewa tsainchi. Bapon yabara paebina daxita jiwi xua penatsicuentsiwa xua abe peexanaexae. Matautano bapon yabara paebina xua pocotsiwa bapomonaе abe exana Nacomtha. Matautano bapon yabara paebina pocotsiwa barapomonaе Nacom abe peyabara paebiwatsi", jei Enoc. <sup>16</sup>Barapomonaе pomonaе pemuxujainyabiya cuidubi jiwi ichawa beya daxita coyeneintha abeya yabara paeba. Xua daxita coyenein petsita aitacoyenebexaetsi daxota barapomonaе jopa juntu coyene weiweinaya jinompaeyo. Matautano meisa yabara nanta xeina xua piawan meisa penata exanaewan. Barapomonaе peatsacae jiwi bichocono. Bara bequein barapomonaе beta paeba ichamonaetha, saya poxoru xua peyabara muxujainyabinexa xua ichamonaе peyabara muxujainyabinexatsi pocotsiwa xeina.



**Meje yabara xua Judas muxuweta  
pomonaetha pomonae  
pejume cowuntsiwi  
xua pejume cowuntsiyainwa  
pemuxitorobi diwesi**

<sup>17</sup> Equeicha paca tsipaebatsi pomonae bichocono tapaca caantobewichi pam. Paxam bewa payabara jūntanainaeim pocotsiwa bayatha paeba pomonae Jesucristo pon jiwi Pecanamataxeinaein pia peitorobi jiwi tatsi. <sup>18</sup> Barapomonae paca jeye: “Pewunaeya tsane poxonae po dapaetha Nacom yabara paebina jiwi xua penatsicuentiwa xua abe peexanaexae copiya patsina pomonae cui caponaena, pocotsiwa Nacom piawa tatsi baxua cui caponaeinchi. Matautano barapomonae ichichipaeya exana dubenanaebiyaena icha be pocotsi coyeneya ichichipa xua abe peexanaewa”, jei barapomonae pomonae Jesús pia peitorobi jiwi tatsi. <sup>19</sup> Pocotsimonae baxua exana xua abe exana, bapocotsimonae tsaba exana piamonaetha xua barapo bicheitobe nacasebabe. Barapomonae pomonae abe peexanaewi exana xua pocotsiwan ichichipa peexanaewa. Barapomonae jopa exanaeyo pocotsiwa Nacom ichichipa, tsipei jopa yawa jinompaeayo Nacom pia Pejumope tunaxu tatsi.

<sup>20</sup> Ichitha nama paxam pomonae bichocono tapaca caantobewichi pam. Bayatha painya nejume cowuntsixaem Nacom, daxota awiya pana najuntu coyene tsacabare. Awiya mataropeichiya painya nejume cocowuntaponaenexa po pejume cowuntsi coyeneya Nacom weya pona. Nacom pia Pejumope tunaxu tatsi pia peayapusuwatha tatsi pawucare Nacom. <sup>21</sup> Beta payajuntu coyeneya jinompare Nacom pia peantobe coyenewa tatsi. Pawunaeware po matabitha poxonae Jesucristo Wanacanamataxeinaein

naca catsina peajuntuayapusuwa, po peajuntuayapusuwa ataya tsiteca. Baxua naca catsina tsipei Nacom nantanuweya naca yabara nanta xeina pia wanaca yawenaenexa tsane.

<sup>22</sup> Ichamonae pomonae yabara ainya muxu pexeinaewi pemuxujainyabi diwesi barapomonae payabara nantanuweya yawende painya neantobexae xua jopa pejume cowuntsinexa barapo pemuxujainyabi diwesi. <sup>23</sup> Ichamonae muxu pejume cowuntsi barapo pemuxujainyabi diwesi. Nainya payawende barapomonae painya neantobexae xua Nacom pecapanenebiyaenexa bapo abe peexanae cuiru coyene weya pejume cowuntsixae tsane Nacomtha. Panantanuweya yabara nanta xeinde ichamonae, painya neyawenaenexa tsane painya neantobexae xua iru pejume cowuntsinexa tsane Nacom. Ichitha dota pam xua abe painya neexanaeyainwa icha poxonae xua barapomonae ichi xua poxonae abe exana.

**Meje yabara xua Judas najume  
wetsiya wuna jainta Nacom**

<sup>24-25</sup> Anoxuae nama yabara paca tsipaebatsi Nacom pon pepa Nacom pon nacata compa. Bapon bichocono peyaputaen. Barapon Nacom Wanacacapanenebiyaen. Barapon pia peayapusu itorobiya coyenewatha paca yapu eenaena xua jopa abe painya neexanaewa tsane. Matauta Nacom paca cana exanaena xua juntu coyene xanepanaeya painya neumenaenexa tsane bapon peitabaratha tatsi. Matautano bapon paca cana exanaena xua bichocono painya nejuntu coyene weiweinyaya neumenaenexa tsane bapon pia pexeinya peitupanae coicha itabaratha tatsi. Barapon Nacom waxainchi wuna jaintatsi

Jesucristo pon Wanacanamataxeinaein petupaexae. Waxainchi jeichichi Nacomtha: “Barabũ ataya tsitecaeya xeinaeya poponaename jinya pexeinya itupanae coicha yawa jinya neainya cui coyenewa. Matautano barabu ataya xeinaeya poponaename jinya neayapusũ itorobi coyenewa, xuano

xua jinya neayapusũ exanae coyenewa. Daxita baxuan caena bayatha xeiname poxonae aena, xuano xua anoxuaeno xeiname yawano xua bexa tsane bara ataya xeinaename”, jeichichi Nacomtha. Je, bara ichi tsane.  
Baja Judas.

**Meje Po Diboro Juan Tina  
Xua Yabara Tsiwanaya  
Tsita Itutatsi Pocotsiwa  
Exanaena Po Cae Pin Nacuathe**

**Meje yabara po diwesi pocotsiwan  
xua Jesucristo Paxa tsita itutatsi xua  
pocotsiwan xuya Juan tsita itutatsi**

**1** Barapo diboroje xan Juan tinan. Pocotsiwan yabara tinan xua Nacom Jesucristo tsita itutatsi. Bara pocotsiwan Jesucristo xuya pijimonaetha tsiwanaeya tsita ituta pocotsiwan xua imoxoyo bara exanaenaba. Jesucristo pia matatsunpin inta itoroba xua xan Juan xuya tatsita itutsinexa daxita baxuan xua imoxoyo bara exanaenaba. <sup>2</sup>Daxota xan xuya xainwaichiya yabara tinan daxita xua pocotsiwa tan. Matautano tinanno xua jume tan xua Nacom paeba iruno xua Jesucristo paeba.

<sup>3</sup>Pon xua yorobina jiwitha po diwese pomonaetha pomonae Nacom pejume cowuntsiwichi tatsi, bapon juntu coyene weiweina exanaeinchi xua Nacom juntu coyene weiweina exanaena. Iruno pomonae jume tane barapo diwese yawano xua exanano xua pepaebixae barapo diwese, barapomonae juntu coyene weiweina exanaeinchiru. Daxota barapomonae juntu coyene weiweina tsipei baxuan imoxoyo exanaenaba.

**Meje yabara xua Juan  
tatina pomonae pejume  
cowuntsiwi, pomonae siete po  
matabuxumonaebe, pomonae  
nacaetuta xua Nacom  
wunae pejainchinexatsi**

<sup>4</sup>Xan, Juan, pacata tinatsi pomonae painya nejume cowuntsiwi pam pomonae siete po matabuxumonaebe pam xua painya nenacaetutsi jiwipam, xua wunae painya nejainchinexa

Nacom. Paxam pomonae Asia nacuatha pajinompame. Paca tsipaebatsi xua Nacom anoxuae popona yawa caena bayatha popona yawa bexa ataya poponaena. Pacata wucatsi Nacomtha xua painya nepaca juntu coyene weiweina exanaenexa tsane. Yawa pacata wucatsi xua Nacom paca yawenaena pia painya nepaca caantobexae. Yawa pacata wucatsi Nacom pia Pejumope tunaxu tatsi beya xua bapon baxuan pacata exanaena tsipei Nacom pia Pejumope tunaxu tatsi siete po pexeinya juntu coyenebe pexeinaein. Barapo Pejumope tunaxu Nacom peitabaratha tauncuatsi ichaxota Nacom eca pia pexeinya peecaethopaewatha. <sup>5</sup>Yawano pacata wucatsi Jesucristotha xua bapon baxuan pacata exanaena. Barapon Jesucristo ataya xaniwaicha pepaebin. Bapon copiya equeicha asu naexana. Bapon asu canamata canaexana jiwipetupae coyene weya. Yawa bapon itoroba pomonaetha pomonae itorobiya pepa peewatsiwi ichamonae po cae pin nacuathe. Cristo naca antobe daxota naca tsitupa naetotha wanaca juntu coyene junteinaenexa abe waexanae cuiru coyenewan. <sup>6</sup>Matautano Jesucristo naca exana xua piamonae tatsichi. Yawano sacerdotemonae naca cana exana watanacuichinexa tsainchi Nacom, pon Jesucristo Paxa tatsi. ¡Barabu Nacom ataya xeinaena xua pexeinya juntu coyene xua peainya cui coyenewa! ¡Yawano barabu Nacom ataya xeinaena xua pia peayapusu itorobi coyenewa! Je, bara ichi tsane.

<sup>7</sup>¡Matha pataema!  
Cristo patopeicaena tsaquinaebowatha. Daxita jiwitadena bapon xua bapon taeinchi. Iruru pomonae bapon cobe matatabarutatsi naetotha bapon taeinchi.

Daxita nacuanpiwi, pomonae bapon jopa jume cowantichi, daxita barapomonae juntu coyene wecoyei tsane poxonae bapon taeinchi. Je bara ichi tsane.

<sup>8</sup>Nacom jeye: “Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano daxita coyenein wetsin tsipei ataya tsitecaeya bara tapoponaeawa tsane”, jei Nacom pon jiwi Pecanamataxeinaein, pon itoroba pia peayapusu itorobi coyenewatha daxita nacuanmonae jiwitha. Bapon Nacom anoxuae popona, caena bayatha popona, yawa bexa tsane ataya poponaena.

**Meje yabara poxonae Cristo  
pia peitapanae tsita itutsi  
coyenewatha tatsi Juan tsita itutatsi**

<sup>9</sup>Xan Juan ponxaein be pon painya eweicho nanatsicotan Jesús pijimonaexaetsi. Icha jiwi paca ichi xua paca anthuthurewe exana xua poxonae jopa xapain pacata exanaeyo, anoxuae bara neichi. Jiwi anthuthurewe neexana tsipei waxainchi Nacom piamonaetsi jiwantsi pomonae Nacom itorobiya ewata. Tsipei Jesucristo paca yawena daxota cataunxuae pajume cowanta dubenanaebiyame Nacom, iru xandu barichin. Jiwi pecubi botha Patmos tunaetotha neeta tapaebixae Nacom Pejume Diwesi yawano Jesús pejume diwesino tapaebixae. <sup>10</sup>Caentaqueitha, po mataqueitha peseicae mataqueitha bichocono Nacom pia Pejumope tunaxu tatsi nejuntu coyene yuca exana. Tauma werena jume tan pejume xua bichocono jume daunweya ajumetsaca be poxonae icha xua oba po peobiwa pewun trompeta. <sup>11</sup>Nejei xua netsipaeba: “Xam yabara tinare diborotha daxita xua taneme.

Barapo diboro bapoxonae caitorobare pomonaetha pomonae tana nejume cowantsiwitha pomonae siete po matabuxumonaebe pomonae nacaetuta xua Nacom wunae pejainchinexatsi. Barapomonae jinompa Asia nacuaetha. Barapo siete po matabuxumonaebe nacaetuta barompaya pia tomarantha tsiniya. Barapomonae meje: Efeso tomarapiwi, iru Esmirna tomarapiwi, iru Pergamo tomarapiwi, iru Tiatira tomarapiwi, iru Sardis tomarapiwi, iru Filadelfia tomarapiwi, iru Laodicea tomarapiwi”, nejei Jesucristo.

<sup>12</sup>Bapoxonae napatomeicha necotaban tayaputaenexa pon xua netsipaeba. Poxonae necoyan bapoxonae tan siete xoyobe penainwan xua po nain pewun oro nain xua pentatutuntha itanacanoba. <sup>13</sup>Barapo siete xoyobe xua ichaxota pentatutuntha itanacanoba baxoyo pia xainya deca pon be pebin taenotan. Pon uncua apara ponxae itaboco wetsica pona, pon Nacom itapeta. Bapon naxatata paparuwa, po paparuwa apiya deca bichocono yawa taxu jayarecatsi. Yawa naepa cuta paparuwa po paparuwa bichocono pereca yawa juntacari jayatsinatsi yawa bichocono daedaena icha be oro nain ichi. <sup>14</sup>Pentanan tatsi bichocono inyapana icha be papu ichi, yawa icha be main axuto ichi. Yawano peitamaiqueitobe be isoto itareto. <sup>15</sup>Petaxu bichocono taxu daedaena icha be bronce nainto ichi xua bichocono nain daedaena poxonae cataunxuae isototha nain boquiya. Pejume bichocono ajumetsa be poxonae xua ainya menein busin. <sup>16</sup>Pemaxu coxa iya xeina siete po opiteitobe. Yawa pecoiboto tsina pichapeina cusi xua nantiya baru ducuabe. Peitabara bichocono daedaena icha be poxonae xometo ichi poxonae xua pentha xua poxonae atsa.

<sup>17</sup>Poxonae bapon Jesucristo tan, imoxoyo iratha nabotaban bapon peitabaratha. Bara be tatupaeyo nabotaban. Bapoxonae bapon pecobetha nejayaba po cobe pecoxa weya. Yawa Jesucristo nejei: “Jopa junuwinde. Xan ponxaein xua daxita tafortsin xua poxonae aena. Yawano xan ponxaein xua tawetsin tsane daxita xua bexa tsane. <sup>18</sup>Xan ponxaein xua copiya bayatha tapoponaein. Bequein bayatha tapan ichitha equeicha anoxuae asu poponan xua ataya petsitecaenexa. Nacom necata taitorobi coyenewa xua petupaewi taitorobeibinexa petupaeyo coyene nacua beya. <sup>19</sup>Daxota yabara tinare xuaunxuae pocotsiwa taneme. Yawano yabara tinare xua aunxuae taeponaename. <sup>20</sup>Barapo siete opiteitobe xua taneme tacobe coxa weya yabara caunutatsi xua pomonae Nacom Pejume Diwesi pepaebiwi, pomonae Nacom pejume cowantsiwichi pecanamataxeinaewichi. Yawa barapo siete xoyobe xua pentatutuntha itanacanoba xua baxoyo pia xainya deca uncuan baxua yabara caunutatsi pomonae siete po tomarabe matabuxu jiwi, pomonae Nacom pejume cowantsiwichi”, jei Jesucristo pon xua uncua.

**Meje yabara xua po diwesi  
Juan tatina Efeso tomarapiwi**

**2** Jesucristo, pon xua uncua nejei: “Tatinare pon Nacom Pejume Diwesi pepaebin pomonaetha tana nejume cowantsiwi pomonae Efeso tomaramonae xua bapon petayorobinexa xua barapomonae petayorobinexatsi. Jande: ‘Meje xua paeba pon pecobe coxa weya tatsi siete po opiteitobe tauncuatsi xuano xua uncua siete xoyobe pia xainya deca xua ichaxota pentatutuntha itanacanoba. <sup>2</sup>Bapon jeye: Yaputan xua painta

exaname po penacuichiwa xua daunwei xua jopa pabarapentsim. Yawano paca cui yaputainchi xua paaichaxaibim xua exana pomonae peajuntucoyenebewi. Yawano bara yaputan xua jopa paca itata cui xainyei tsaibiyo poxonae xua ichamonae atsaquiya paca jei: Paxan Jesús pia peitorobiwi tatsi pan, jei. Bara paxam payaputaneme xua barapomonae pemuxitorobiwi. <sup>3</sup>Beta pana najuntu wunaetame. Matauta jopa paacoyenefaetabim, bequein ichamonae bichocono abe paca exana painya inta nacuichixaem. <sup>4</sup>Ichitha paca cui yaputainchi xua cae coyene paexaname xua po coyene aichaxaibin. Anoxuae be conotha pana neantobem. Jopa be ichiyo poxonae copiya matha pana neantobem nawita. <sup>5</sup>Payabara nanta xeinare xua poxonae copiya pana nejume cowuntame xua poxonae bichocono pana neantobem. Icha juntu coyene paxeinare. Painta exanare icha paichim xua poxonae matha copiya beta painta exaname. Icha jopa pana neantobem tsane, nainya patopaein, yawa pichin painyawa xua pocotsiwa ichaxota pentatutuntha paitanacanobame, xua pichin painya tomara weya. Aparaxua jan, daxita painya nenacaetutsi jiwi pam pana nenepentaponaename xua pata tana nejume cowantsiwam xua daxota jopa pana nejume cowantsim tsane jan. <sup>6</sup>Daichitha cae coyenewa ichichipan xua paexaname. Juntu coyene weiweinan tsipei pananta xeiame icha ichin xua pocotsiwa nanta xeinan. Paxam paaichaxaibim pocotsiwa nicolaitamonae xua exana, pomonae bichocono abe peexanaewi. Xan iruru aichaxaibin xua pocotsiwa exana barapomonae. <sup>7</sup>Paxam pomonae painya nejume cowantsi jiwi pam. Icha pamuxu dubename, pajume naitaeware xua pocotsiwa Nacom pia Pejumope

tunaxu tatsi paca tsipaeba. Bapon jeye: Pomonae xua Jesucristo jume cowunta dubenanaebiyaeinchi beya xua yacuiya werapaeya othopaena barapomonae catsin Nacom pia peitorobi nacua beicha peajuntuyapusuwa, po peajuntuyapusuwa xua jopa weraweracaeyo, jei Nacom pia Pejumope tunaxu tatsi, jei Nacom Pexanto', jande", nejei Jesucristo pon xua uncuu barapo siete xoyobe xua pentatutuntha itanacanoba xua baxoyo pia xainya deca tatsi.

### **Meje yabara po diwesi Juan tatina Esmirna tomarapiwi**

<sup>8</sup>Pon Jesucristo xua uncuu equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Esmirna tomaramonae, xua bapon petayorobinexa xua barapomonae petayorobinexatsi. Jande: 'Meje xua paeba pon xua daxita forota poxonae aena. Yawano bapon daxita wetsina xua bexa tsane. Bequein bapon bayatha tupa ichitha equeicha asu popona xua ataya tsitecaeya tsane. <sup>9</sup>Bapon jeye: Yaputan daxita xua pocotsiwan paexaname. Bara paca tainchi xua paanthuthutanem poxonae xua ichamonae pacata abe exana. Bequein paca tainchi xua pacopeibim ichitha apara bara paxeinaename pocotsiwa bexa Nacom paca catsibina. Daxota paxam be copei pexeinae jiwi pam. Yaputan pomonae atsaquiya najei: Paxan judiomonae pan, jei. Barapomonae abe paca yabara paeba. Daichitha barapomonae u caurimonae pia pentacaponaein tatsi bapon piamonae tatsi. <sup>10</sup>Jopa pajunuwinde xua pocotsiwa ichamonae paca anthuthutane exanaena xua tsipei pacata abe exanaena. Caurimonae pia pentacaponaein tatsi itorobina ichuntha xua piraichi paca jiwana capanaena jiwi pecubi bo beya xua daxota daxita

paxam painya nenacui barapentsiwa tsane xua painya nejume cowuntsiwa Nacom. Paxam paanthuthutanem tsane diez po matabibibe. Daichitha pana najuntu coyene daunweya wunaere beya poxonae payacuiya werapaeya othopaename. Bapoxonae paxam paca catsibinchi xua be pentoma xua peantuyapusuwa po peantuyapusuwa xua jopa weraweracaeyo. <sup>11</sup>Paxam pomonae painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba. Bapon jeye: Pomonae xua Jesucristo jume cowunta dubenanaebiyaeinchi beya xua yacui werapaeya othopaena, Nacom jopa copatsi tsane xua barapomonae equeicha jopa ateneya werapae tsane, jei Nacom pia Pejumope tunaxu tatsi, jei Nacom Pexanto', jande", nejei Jesucristo pon xua uncuu.

### **Meje yabara xua po diwesi Juan tatina Pérgamo tomarapiwi**

<sup>12</sup>Pon Jesucristo xua uncuu equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Pérgamo tomaramonae xua barapon petayorobinexa xua barapomonae peyorobinexatsi. Jande: 'Meje xua paeba pon pecoiboto tsina tapichapeinatsi cusi po wato nantiya baru ducube. <sup>13</sup>Bapon jeye: Bara yaputan xua daxita paexaname. Yawano yaputan xua painompame ichaxota caurimonae pia pentacaponaein tatsi itorobeiba xua barapo tomarapiwi itorobeibatsi. Daichitha awiya pana nejume cowunta dubenanaebiyame. Jopa pabarapentsinde xua pata tana nejume cowuntsiwam. Antipas bichocono nejume cowunta. Bequein bapon bexotsi painya xantha,

daichitha awiya pana nejume cowunta dubenanaebiyame. Pomonae barapo tomaratha jinompa pomonae xua caurimonae pia pentacaponaein tatsi itorobeiba barapomonae Antipas bexotsi. <sup>14</sup>Daichitha paca cui yaputainchi xua icha coyenein paexaname, po coyenein xua jopa ichichipaeinyo. Paxeiname Pérgamo tomaratha pomonae xua painyamonae jiwana, pomonae barichi xua abe exana xua daxota jopa ichichipaeयो xua pepentsiwa xua pecuidubiwa pocotsiwa Balaam pia pecuidubi coyenewa tatsi. Bapon Balaam cuiduba, Balac cuidubatsi xua xuya Balac pecuidubinexa xua israelmonae pecuidubinexatsi xua israelmonae abe peexanaenexa. Po peabe coyene Balac cuiduba xua pinae israelmonae itacupatsi xua xane duwein po duwein poxonae bexuba ibo nacom nexa. Yawano Balac cuiduba xua pinae barapo israelmonae jopa abe exanaeyo poxonae nata siwa xeina dubenanaebiya yabuxi. <sup>15</sup>Barichi pomonae painyamonae jiwana pomonae abe exana, barapomonae ichichipa po pecuidubiwa pocotsiwa nicolaitamonae pia pecuidubi coyenewa tatsi. Barapo nicolaitamonae pia pecuidubi coyenewa tatsi bichocono aichaxaibin. <sup>16</sup>Daxota icha juntu coyene paxeinare. Icha jopa icha juntu coyene paxeinaem, nainya jemeicha baxota patopaein yawa paca beinchi cusitha, po watotha xua tacoiboto pichapeina. <sup>17</sup>Paxam pomonae painya nejume cowuntsi jiwu pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba. Bapon jeye: Pomonae xua Jesucristo jume cowunta dubenanaebiyaeinchi beya xua yacui werapaeya othopaena, barapomonae catsin po pexaewa pewun

maná, po pexaewa namicha boca xua ichamonae jopa yabara yaputaeyo. Yawa barapomonae catsin iboto, po iboto inyapana, barapo ibototha tinaena pena wun xua ichamonae jopa wun taeyo. Saya meisa wun yaputaena pon xua catsin barapo iboto, jei Nacom pia Pejumope tunaxu tatsi, jei Nacom Pexanto', jande", nejei Jesús pon xua uncua.

### **Meje yabara po diwesi Juan tatina Tiatira tomarapiwi**

<sup>18</sup>Jesucristo pon uncua equeicha nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Tiatira tomaramonae xua bapon petayorobinexa xua barapomonae petayorobinexatsi. Jande: 'Meje xua paeba Nacom Pexanto tatsi, pon peitamaiqueitobetha be isoto itareto tarucuatsi. Yawano bapon bichocono taxu daedaena be penainto, pocotsi nainto pewun bronce. <sup>19</sup>Bapon jeye: Yaputan daxita xua po coyene paexaname, yawano yaputan xua paxam pana neantobem. Yawano yaputan pocotsiwa painya tana nejume cowuntsiwam. Yawano yaputan xua pocotsiwa payawename ichamonae. Yawano yaputan xua saya beitemaya juntea painompame poxonae bequein ichamonae pacata abe exana. Yawano yaputan xua anoxuae nawita paexanaponame beyacaincha xua poxonae copiya paexaname. <sup>20</sup>Daichitha paca cui yaputainchi xua pocotsiwa paexaname xua pocotsiwa aichaxaibin, xua jopa paitawetsim powa pewun Jezabel. Powa jei: Nacom nexa tapaebiwayon, jei. Daichitha tana nejume cowuntsi jiwu muxuitorobatsi. Barapowa Jezabel tamonae cuidubatsi xua bara nata siwa xeineibina yabuxi. Yawa bapowa cuidubano po coyene

aichaxaibin xua tamonaē jain itorobatsi xua tamonaē xaena duwein, po duwein poxonaē bexuba ibo nacom nexa. Barapo duwein jiwī cata ibo nacomtha poxonaē wūnaē jainta pia ibo nacom. <sup>21</sup>Caena bayatha ewatan xua bapowa icha jūntū coyene pexeinaenexa, ichitha bapowa baxua jopa beexanaeyo. Bapowa jopa juniya exanaeyo xua abe exanaponeiba. <sup>22</sup>Xan exanaein xua nainya bapowa atene tsanaya tsane, xua camatha pebocaenexa, abe peexanaexae. Iruru pomonaē xua bapowa abe nanabarū exainchi barapomonaē atene tsane exanaein xua icha barapomonaē jopa nacui barapentsi tsane pocotsiwa bapowa cuiduba. <sup>23</sup>Yawano bapowa pia pexui tatsi tajutebin. Bapoxonaē daxita pomonaē Nacom pejume cowūntsiwichi neyaputaena po coyene xua xan deta cou jiwī tanthūthū yaputaēin daxita xua poxonaē exaneiba yawa daxita poxonaē xua nanta xeineiba. Bapoxonaē daxita paxam barompaya paca catsibinchi be xua pentoma. Pomonaē xua xanapanaya paexaname, xua wūnaē paca catsibinchi. Pomonaē xua abe paexaname, xua peatenewa paca catsibinchi. <sup>24</sup>Paca tsipaebatsi daxita pam pomonaē Tiatira tomarapiwi jiwana pam, xua pomonaē jopa paexanaem pocotsiwa xua Jezabel paca cuiduba, saya ichamonaē paxam jiwana pam, baxua exana. Paca tsipaebatsi pomonaē pam pomonaē jopa pananabarū nacuidubim pocotsiwa caurimonaē pia pentacaponaein tatsi pia coyenewan tatsi. Tsipei jopa paexanaem barapo coyenewa daxota jopa paca itorobi tsainchi icha coyene xua painya neexanaewa tsane, po coyene bichocono ayapube. <sup>25</sup>Daichitha awiya pana nejume cowūnta dubenanaebiyama beya poxonaē equeicha patopeicaein. <sup>26</sup>Awiya

pajume cowūnta dubenanaebiyama Nacom painya amanayabinexa tsane caurimonaē. Yawa awiya paexana dubenanaebiyama pocotsiwa xua xan ichichipan xua beya payacui werapaeya othopaename. Pomonaē baxua exanaena, barapomonaē catsin taayapusū itorobi coyenewa xua peitorobeibinexa tsane po cae pin nacuathepiwi. <sup>27</sup>Paca catsibinchi taitorobi coyenewa icha Taxa neichi xua necata pia peitorobi coyenewa. Icha pebin ichi xua poxonaē barapon daunweya wacataxuba juruwato penaintotha xua peexanaenexa pepurūwixi, bara jūta ichi tsane pomonaē nejume cowūnta. Barapomonaē daunweya itorobina barapo cae pin nacuathepiwi beya poxonaē daxita weraweracaena abe peexanaexae. <sup>28</sup>Bapoxonaē yawa paca catsibinchi po coyene xua tapaca barū poponaewatsi. Barapo coyene bichocono wūnaē tsane, icha jarawato ichi xua jiwī bichocono tsita wūnaetsi potō mataquei pewūnaeya ecoina. <sup>29</sup>Paxam pomonaē painya nejume cowūntsi jiwī pam. Icha pamuxu dubename, moya pajume naitaeware xua pocotsiwa Nacom pia Pejumope tūnaxū tatsi paca tsipaeba, jei Nacom Pexantō', jandē", nejei Jesús, pon xua uncua.

### Meje yabara po diwesi Juan tatina Sardis tomarapiwi

**3** Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: “Barichinde tatinare pon Nacom Pejume Diwesi pepaebin pomonaetha tana nejume cowūntsiwi pomonaē Sardis tomaramonaē xua bapon petayorobinexa xua barapomonaē petayorobinexa. Jandē: ‘Meje xua paeba Jesucristo pon xua



xeina siete po pexeinya juntu coyenebe, po coyenebe xua Nacom pia Pejumope tunaxu tatsi Jesucristo catatsi. Yawa bapon xeina siete po opiteitobe pecobe weya, po cobe pecoxa weya. Bapon jeye: Yaputan daxita xua paxam paexaname. Bequein jiwi paca yabara nanta xeina xua paxam painta beta exaname, daichitha apara jopa painta beta exanaem. Daxota paxam netsita be pomonae pewaterpae jiwi pam. <sup>2</sup>Pana najuntu coyene tsacabare. Payawende pomonae tana nejume cowuntsiwi xua pejuntu coyene wuna nexa, tsipei barapomonae be pewaterpae wi pejuntu coyene natsepaexae. Paca tainchi xua pocotsiwa paexaname. Baxua jopa Nacom tsita wunaetsi. <sup>3</sup>Daxota pananta xeinare xua pocotsiwa bayatha paca cuiduba. Bapoxonae bapocotsiwa paexande yawano bapoxonae icha juntu coyene paxeinare Nacomtha xua equeicha caewa painya nejume cowuntsiwa tsane. Icha jopa baxua paexanaem tsane, bapoxonae nainya jemeicha patopaein paxamtha poxonae jopa payaputaem xua patopaein. Exanaein icha be pocotsin pon pecaibin ichi xua jemeicha patopa. <sup>4</sup>Daichitha paxeiname barapo tomaratha, Sardis tomaratha, pomonae tana nejume cowuntsiwi. Barapomonae penthuthu xeicae jiwi. Jopa xeinaeyo po coyene xua peajuntucoyenebewa tsipei jopa abe exanaeyo. Barapomonae nebaru jinompaena. Yawa nama xatabina paparuwan, po paparuwan inyapana tsipei barapomonae exana dubenanaebiya pocotsiwa xua itoroban. <sup>5</sup>Pomonae xua nejume cowunta dubenanaebiyaena xua beya yacui werapaeya othopaena barapomonae nama xatabina po paparuwan inyapana. Yawa pomonae wun dubena Nacom pia diborotha xua pomonae ataya pejinompaenexa tsane xua jopa

weraweracaeyo, barapomonae jopa wun iquicaein tsane. Yawano wun yaputane exanaein Taxa Nacomtha yawano Nacom pia matatsunpiwi tatsi peitabarathano. <sup>6</sup>Paxam pomonae painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesús pon xua uncuu.

### **Meje yabara po diwesi Juan tatina Filadelfia tomarapiwi**

<sup>7</sup>Equeicha Jesucristo pon xua uncuu nejei: "Barichinde tatinare pon Nacom Pejume Diwesi pepaebin pomonaetha tana nejume cowuntsiwi pomonae Filadelfia tomarapiwi xua bapon petayorobinexa xua barapomonae petayorobinexatsi. Jande: 'Nacom Pexanto tatsi, bapon bichocono pejuntu coyene xanepanaein Nacomtha xua jopa penatsicuentiwa Nacomtha xua abe peexanaexae. Yawa bapon bara xaniwaicha pepaebin. Yawa bapon pon naca yawena xua patinchi Nacom pia peitorobi nacua beicha. Bapon naca yawenaena icha matha pon peboupa peewatsin ichi xua poxonae David yawenatsi. Bapon pon peboupa peewatsin David taewatatsi pia pexeinya peecaethopeibi bo tatsi. Bapon David pon caena bayatha Israel nacuamonae itorobiya pia pepa peewatsinchi. Bapon pon peboupa peewatsin pia peitorobi coyenewa xeina xua poxonae bapon peboupa saranaxuba ichun jopa itacupaetsi xua peboupa xatataba. Yawa poxonae bapon peboupa xatataba ichun jopa itacupaetsi xua saranaxuba. Icha bapon ichi, barichi Nacom Pexanto tatsi pia peitorobi coyenewa xeina. Bapon copata xua pijimonae tatsi patsina Nacom pia nacua beicha. Yawano

jopa copatsiyo xua ichamonaē patsina Nacom pia nacua tatsi beicha. Ichun jopa itacupaetsi xua ichawa paeba Nacom Pexanto tatsi beya. Anoxuae nama Nacom Pexanto paca tsipaeba, jeye: <sup>8</sup>Yaputan xua daxita paexaname. Xan copatan xua tajume diwesi pacaponaē ichamonaētha. Ichun jopa itacupaetsi xua paca jume itaweta xua daxota jopa painya necaponaewa barapo diwesi. Bequein saya tsiwiyo paajuntacuicoyenesum, daichitha awiya tajume diwesi pacueicueijam yawa jopa pana nepentsim xua painya tana nejume cowuntsiwam. <sup>9</sup>Ichitha pomonaē naerabiya jei: Paxan, judiomonaē pan, jei, barapomonaē, Satanás, caurimonaē pia pentacaponaēin tatsi bapon piamonaē tatsi tsipei jopa benejume cowuntsiyo. Xan exanaēin xua barapomonaē patsina paxamtha pentabocototha peumenaenexa tsane painya itabaratha wūnaē painya nepaca jainchinexa tsane. Bapoxonaē barapomonaē yaputaena xua xan tapaca caantobewichi pam. <sup>10</sup>Pajume cowuntsiya exana dubenanaēbiyama po coyene xua paca itorobatsi xua beitemaya painompame xua jopa painya neaitaconaewa poxonaē bequein ichamonaē paca yabara abe exana. Daxota barapo matacabi, po mataqueitha poxonaē caurimonaē pia pentacaponaēin tatsi daxita barapo cae pin nacuathe jiwī juntu coyene jujutinchi, poxonaē jiwī bichocono atene exanaēinchi bara paca capanenebiya exanaēinchi. Caurimonaē pia pentacaponaēin tatsi juntu coyene jujutsina pomonaētha pomonaē Nacom pejume cowuntsiwichi poxonaē bichocono atene exanaēinchi xua daxota Nacom jopa pejume cowuntsiwa tsainchi. <sup>11</sup>Imoxoyo patopeicaēin. Xaniwaicha beta paxeinare pocotsiwa xua tapanā nejume cowuntsiwam xua

bexa Nacom paca catsina pocotsiwa paca juntana jeba pia nacuatheicha beta painya tana nejume cowunta dubenanaēbiyaexaemxae. Jopa pacopatsinde xua ichun paca exanaena xua abe painya neexanaewa tsane xua daxota jopa painya nexenaewa tsane pocotsiwa paca juntana jeba pia nacuatheicha. <sup>12</sup>Pomonaē xua nejume cowunta dubenanaēbiyaena barapomonaē bichocono juntu coyene ayapusya daunweya exanaēin xua pepatsinexa tsane Nacom pia nacua beicha. Bapoxonaē bapana jopa ponae tsane Nacom pia nacua weya. Bapoxonaē barapomonaētha catsin po wun Taxa Nacom pewun, xua jiwī peyaputaenexa xua barapomonaē apara Nacom piamonaē tatsi. Yawa catsin po wun pena Jerusalén tomara pewun, po tomara Nacom pia tomara tatsi ichaxota jinompa pomonaē peantobewichi Nacom. Barapo Jerusalén tomara itaboco wetsica pona ichaxoteicha xua Tanacom popona. Yawano catsin barapomonaētha tawun, po wun pena wun. <sup>13</sup>Paxam pomonaē painya nejume cowuntsi jiwī pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesús pon xua uncua.

### **Meje yabara po diwesi Juan tatina Laodicea tomarapiwi**

<sup>14</sup>Jesucristo, pon xua uncua siete xoyobe pia xainya deca xua ichaxota pentatutuntha itanacanoba, equeicha nejei: "Barichinde tatinare pon Nacom Pejume Diwesi pepaēbin pomonaētha tana nejume cowuntsiwi, pomonaē Laodicea tomarapiwi xua bapon petayorobinexa xua barapomonaē petayorobinexa. Jande: 'Meje xua paeba pon xaniwaicha pepaēbin pon

xua xaniwaicha beta naca yabara caunutsiya paeba Nacomtha. Pon xua caena bayatha daxita forota. <sup>15-16</sup>Yaputan daxita pocotsiwa paxam paexaname. Paxam paca tsipaebatsi xua be paichimje: Ichamonae ba aichaxaibi xua apa poxonae po mera mene tuna xuano xua poxonae aque aibi yawa poxonae atou aibi. Bapoxonae mene sutabina. Paxam be barapocotsi mera pana nacayabara tsicotaneme. Paxam conotha pana nejume cowuntame. Jopa panepentsim xua pata tana nejume cowuntsiwam. Matautano jopa bichocono paichichipaem xua painya neexanaewa pocotsiwa paca itorobatsi. Daxota anaya paca xubinchi tsipei conotha pana nejume cowuntame icha xua pebin ichi xua anaya mene sutabina tsipei mene tuna. <sup>17</sup>Payabara paebame po coyene xua copei painya nexenaewi pam. Yawa payabara paebame po coyene xua painya coutha pana nayaweneibame xua jopa pacata acoibi tsaibiyo xua pocotsiwan panantawenoname. Ichitha jopa payaputaebenaem xua pocotsiwa paca yabara nanta xeinatsi xua pebiwi tsobenae, paca yabara jeichi. Matautano jopa payaputaem xua paxam be pomonae peacopeibiwi pana natsicotaneme. Yawano be pomonae peitata nacutsi jiwi pana natsicotaneme. Yawano be pomonae tamasaina pana natsicotaneme. Apra xua jan: Paxam be barapomonae pam tsipei jopa beta painya juntu coyenewatha pana nejume cowuntsim. Yawa jopa beta painta nacuichim, jan. <sup>18</sup>Daxota paca tsipaebatsi. Pana necomocare po penainwan pewun oro nain po nain xua daunwei xua poxoru isotha pesetsixae xua pexubinexa pocotsiwa abe. Bapoxonae xaniwaicha bara copei painya nexenaewi pam tsane. Yawano pana necomocare po

paparuwan inyapana tha tapaca cajuma xatabinexa tsane, tha tapaca cajuma acabinexatsi xua pajumasainame xua painya neauraxae. Matautano pana necomocare pewuwa tabotsinexa painya itamaiqueitha bapoxonae beta pataename. Apra xua jan: Pana newucare xua poxonae po coyene xua beta paca juntu coyene exanaeinchi xua jopa painya nexenaewam tsane painya juntu coyeneintha, pocotsiwa xua abe, jan. <sup>19</sup>Pomonae xua antobein cui itawetan xua abe exana. Equeicha cuiduban xua jopa peexanaenexa baxuan. Yawano bichocono pana nejume cowunde yawano icha juntu coyene paxeinare. <sup>20</sup>Pataema bo coibototha uncuan yawa wawan. Icha pebin nejume tane yawa inta coibo sarana xorena bara joniyan yawa bara pana nabaru xanbe pia bothaxae. <sup>21</sup>Taxa jume cowunta ducuaenaebiyon xua neitoroba beya xua poxonae bayatha tupan. Daxota Taxa necopata xua taecaenexa imoxoyo ichaxota Taxa pia pexeinya peecaethopeibiwa tatsi tauncuatsi. Icha Taxa neichi baxua, barichin tsane pomonaetha pomonae tana nejume cowuntsiwi. Pomonae nejume cowunta dubenanaebiyaena xua itoroban, xua beya yacui werapaeya othopaena, barapomonae copatsin xua peenaenexa ichaxota imoxoyo pexeinya taequeibithopeibiwa inta uncua. <sup>22</sup>Paxam pomonae painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba, jei Nacom Pexanto', jande", nejei Jesús pon xua uncua.

**Meje yabara po diwesi xua xuan  
Juan tsita naitutatsi peitabocotha**

**4** Poxonae baxua weta, tan peitabocotha be bo boupa xua boupa

yeyetanota. Yawano jume tan pejume, po jume xua copiya jume tan, po jume xua bichocono jume daunweya ajumetsaca be poxonae xua oba po peobiwa pewun trompeta. Bapon Jesús nejei: “Anetha tsinande taxainya betsina. Catsita itatsinchi xua pocotsiwa bexa tsane exanaena”, nejei Jesús.

<sup>2</sup>Bapoxonae nama bichocono Nacom pia Pejumope tunaxu tatsi nejuntu yuca exana. Peitabocotha tan xua ducua pocotsiwa pexeinya peenaethopeibiwa, yawano tan pon xua equiya baxota.

<sup>3</sup>Pon xua equiya baxoteicha bichocono itabara daedaena icha iboto ichi pocotsi iboto xua bichocono daedaena pocotsi iboto xua bichocono ainya matoma, po iboto pewun jaspe, yawa be pocotsi iboto pewun cornalina. Yawano matawacaicha matatsun uncueicatsi coinwawa. Barapo coinwawa bichocono sũjeya pentha exana icha iboto ichi pocotsi iboto pewun esmeralda.

<sup>4</sup>Barapo pexeinya peecaethopeibiwa pia matawacaicha tatsi, tan icha peenaethopeibiwan veinticuatro po peenaethopeibiwan xoyobe. Barapo peenaethopeibiwantha ena pitiri jiwí xua matauta veinticuatro poyobe. Yawano barapo pitiri jiwí nama xataba paparuwan, po paparuwan inyapana yawano nanta xataba pocotsiwa be tepa xua penainwan, po penainwan pewun oro nain. <sup>5</sup>Barapo pexeinya peecaethopeibiwa weya be yamuxu busi xua jurujurei. Yawano jerajerei. Yawano barapo peecaethopeibiwa peitabaratha tatsi umena pecoicha be xua pocotsiwa banaxu. Barapo siete banaxutobe coichabe yabara caunuta xua Nacom pia Pejumope tunaxu tatsi xeina siete po pexeinya juntu coyenebe. <sup>6</sup>Barapo peecaethopeibiwa peitabaratha ducua xua pocotsiwa pentha pocotsiwa icha pin mene mar

ichi xua mene itarana yawa icha bosibu muxupawa ichi xua penthiya.

Barapo peecaethopeibiwa baxota imoxoyo umena cuatro poyobe pocotsiwa xua asu. Barapo cuatro poyobe nantiyan itamaiquei dubena peitabara weyano yawa peuma werenano. <sup>7</sup>Barapo cuatro poyobe jiwana xua xuan asu, pon copiya be neuthu itabara, iru ichun be vaca pebto itabara, iru ichun be jiton itabara, iru ichun be cotsara itabara, pon pepupunaein. <sup>8</sup>Barapo cuatro poyobe daxita barompaya xeina seis po cuarafeinbe. Matautano barompaya ainya itamaiquei xeina daxita matapaeicha pepontha yawano matha iya itamaiquei dubeinya. Mataqueitha, merawithano jopa cuinaya najume copababiyo xua cueicueijeí Nacomtha pon xua eca barapo pia peecaethopeibiwatha, jeye:

“¡Xam pon bichocono nejuntu coyene xanepanaem,  
xua bapana jopa nexeiaewa abe peexanaewa!

¡Xam pon jiwí Necanamataxeinaem!

¡Xam Nacom, pon neayapusu itorobi coyenewa xeiname!

¡Xam pon caena bayatha poponeibame xuano

xua anoxuae poponeibame xuano xua bexa

ataya tsitecaeya poponaename!”

jei barapo cuatro poyobe poxonae cueicueijeí Nacomtha.

<sup>9</sup>Pon xua pexeinya pia peecaethopeibiwatha eca, pon xua ataya popona, bapon wunaie jaintatsi, barapo cuatro poyobe wunaie jainta. Baxua exana tsipei bapon pexeinya juntu coyene pexeinaein, matautano tsipei bapon ainya cui coyenewan peexanaein. Matautano bapon jeichichi: “Maisa pajuntu coyene weiweinan pocotsiwan pata tana

necatsixaemxae”, jeichichi bapon.  
<sup>10</sup>Poxonae barapo cuatro poyobe wūnae jainta, bapoxonaerū pitiri jiwi xua veinticuatro poyobe xua barompaya pia peenaethopeibiwatha ena, barapomonae irū pentabocototha umena xua wūnae pejainchinexatsi pon ataya pepoponeibin. Yawa barapo veinticuatro poyobe nanta tepa wejonapenta. Bapoxonae jeba pon ataya pepoponaen peitabaratha tatsi. Bapoxonae jeye:

<sup>11</sup>“Pata Tanecanamataxeinaem, yawano xam pata Nacom.

Maisa wūnae xua paexana dubenanaebiyān ichamonaetha pata yabara cueicueijeinexa

jinya pexeinya jūntū coyene yawa jinya pexeinya ainya cui coyenewan, yawano jinya neayapusū itorobi coyenewa.

Baxuan paexanan tsipei xam daxita forotame.

Tsipei xam neichichipaexae daxota baxuan

forotame”, jei barapo pitiri jiwi.

### **Meje yabara po diwesi xua poxonae Juan tane Nacom pia diboro**

**5** Bapoxonae tan diboro pecobe weya, po cobe pecoxa weya xua pon xua eca peecaethopeibiwatha. Barapo diboro quiyontsiya matūba yawano barapo diboro nantiyabe muxunene tina yawa catsababa siete xoyobe xua pocotsiwa pecatsababiwa.  
<sup>2</sup>Yawano tan matatsunpin pon peitorobi coyenewa xeina. Yawano jume daunweya yainyaba jeye: “¿Jintam Nacom tsitatsi pon pejūntū coyene xanepanaein pontha pon xua Nacom daxota copatsina xua barapo pecatsatabiwa petsitsinaxubiwa tsane xua pepataxubiwa tsane barapo diboro?” jei bapon.  
<sup>3</sup>Ichitha dapocotsin aibi pon itabocotha popona, irū pon xua

popona po irathe, irū pon popona po ire peūma bereca. Tsipei dapon aibi pon bichocono pejūntū coyene xanepanaein xua pontha pon Nacom copata xua peitacupaewatsi xua pepataxubiwa tsane yawa xua peyorobiwa tsane barapo diboro.  
<sup>4</sup>Bapoxonae bichocono wecoyan tsipei dapon aibi pon xua bichocono pejūntū coyene xeicaein xua pon itacūpatsi pepataxubiwa tsane yawa xua peyorobiwa tsane barapo diboro.  
<sup>5</sup>Bapoxonae caein barapo pitiri jiwi, nejei: “Jopa equeicha wecoyande. Tsipei pon uncuā pon wūn dutatsi: ‘León’, jei xua po wūn jei: ‘neuthū’, jei bapontha Nacom copata xua exana baxua tsipei pia peayapusū itorobiwa canamataxeina. Apra bapon Judá piamonae jiwi jiwana tatsi, pon Judá caena bayatha tūpa. Barichi bapon apra David pia pemomoxi susato jiwana tatsi, pon David Judea nacuapiwi itorobiya pia pepa peewatsinchi caena bayatha. Saya meisa bapontha Nacom copata xua itacūpatsi xua tsitacutsina barapo siete xoyobe xua catsataba barapo diboro peamanayabixae xua poxonae equeicha caewa asū poxonae tūpa naetotha”, jei pitirin.

<sup>6</sup>Bapoxonae tan Cordero xua oveja pebto penūn, pon uncuā Nacom pia pexeinya peecaethopeibiwatha peitabaratha tatsi yawa xua barapo cuatro poyobe peitabaratha tatsi xua xuan asū, yawano pitiri jiwi pia xainya deca tatsi. Barapo Cordero uncuā bequein wan xeina xua poxonae bayatha tsibexotsi jiwi abe pia peexanae cuiru coyenein tatsi. Barapo Cordero siete po itamaiqueitobe xeina matautano siete pontetobe xeina. Barapo siete itamaiqueitobe yabara caunuta siete po pexeinya jūntū coyenebe xua Nacom pia Pejumope tūnaxū tatsi xeina. Nacom najumope itoroba daxita

irantha. <sup>7</sup>Barapo Cordero wecobe pita barapo diboro pecobe weya, po cobe pecoxa weya tatsi pon xua eca pia pexeinya peecaethopeiwiwatha. <sup>8</sup>Poxonae Cordero pita barapo diboro, bapoxonae barapo veinticuatro pitiri jiwi, iru cuatro poyobe xua xuan asu daxita barapomona pentabocottha umena barapo Cordero peitabaratha tatsi. Daxita barapo pitiri jiwi barompaya xeina xua pocotsiwan pexeinya petaunbabiwan pocotsiwan pewun arpa. Yawano barompaya xeina pocotsiwan pecaapaewan xua pocotsiwan pewun oro nain. Yawa barapo pecaapaewixitha wunba xua pocotsiwan petuxueiwan pocotsiwa tuxusi benata poxonae tauta. Barapo petuxueiwa yabara caunuta xua pocotsiwa poxonae pewucaewa Nacomtha pomona xua Nacom piamona, pomona pia peantobewichi tatsi. <sup>9</sup>Barapomona pena wei naxuna, jeye:  
 “Xam maisa pon bichocono nejuntu coyene  
 xanepanaein xua netsitsinaxubiwa barapo siete  
 xoyobe xua catsataba barapo diboro.  
 Tsipei bayatha pana netsitupame poxonae  
 painta pentoma exaname pata naexanaenexa  
 tsane Nacom piamona tatsi.  
 Yawano jiwana itapetame, pomona tsicamonaexi  
 xua daxita carepaya tsicamonaexitha xua  
 necajume cowantsiwa tsane.  
 Matautano jiwana itapetame daxita i dapomona,  
 pomona barompaya icha jume penatsipaebiwa.  
 Matautano daxita carepaya tomaranpiwi jiwana itapetame.  
 Matautano daxita carepaya nacuanpiwi

jiwana itapetame.

<sup>10</sup>Pana necana exaname be pomona jiwi itorobiya  
 pia pepa peewatsiwichi tatsi pan.  
 Yawa pana exanamenno be pomona sacerdotemonaepiwi pan xua Nacom pata tanacuichinexa.  
 Yawano pana exaname pata itorobiya ewatsinexa po cae pin nacuathepiwi”,  
 jei barapomona poxonae naxuna.

<sup>11</sup>Bapoxonae necotan, yawan jume tan xua bichocono pinmona juinya pomona Nacom pia matatsunpiwi, xua juinya barapo pexeinya peecaethopeiwiwatha matawacaicha umena, yawa xua juinya barapo pitiri jiwi matawacaicha umeinchi, yawa xua juinya matawacaicha umeinchi barapo cuatro poyobe xua xuan asu. Pomona jume tan bichocono ayei jiwi cucujei. <sup>12</sup>Bapoxonae barapomona bichocono jume daunweya paeba, jeye:

“iCordero, po Cordero bayatha jiwi tsibexotsi  
 abe pia peexanae coyenewan tatsi,  
 maisa barapo Cordero Nacom tsita juntu coyene xanepanatsi!  
 Daxota Nacom copata xua bapon xeina pia peayapusu itorobi coyenewa.  
 Matautano Nacom copata xua bapon xeina  
 daxita pocotsiwan xua Nacom xeina.  
 Yawano xeina pia peyaputae coyenewan.  
 Yawano xeina pia peayapusuwa xua daunweya peexanaewa.  
 Matautano jiwi bewa baru cui itura jinaena barapon pon Cordero.  
 Matautano jiwi bewa wunae jainchina barapon pon Cordero.  
 Matautano jiwi bewa beta exanae juntu coyene weiweina peexanaenexatsi bapon xua  
 petsitupaexae jiwi abe pia peexanae cuiuru

coyenein tatsi”, jei barapo matatsunpiwi.

<sup>13</sup>Yawano equeicha jume tan daxita pomonae caena bayatha Nacom forota: pomonae peitabocotha forotatsi, iruno pomonae po cae pin nacuathe forotatsi, iruno pomonae po ire peñma wetsina forotatsi. Yawano jume tan xua pocot-siwan pin mene mar mentha jinompa. Daxita baxuan carepaya Nacom forota. Jume tan xua jeye:

“Xam Nacom, pon ecame jinya pexeinya neecaethopeibiwatha iruno xam

Corderom,

barabũ ataya jũntũ coyene weiweina paca exanaenabe xua jiwi jũntũ coyene weiweina paca exanaenabe xua pocotsiwa painya neexanaexaebe. Barabũ daxita jiwi paca barũ cui itura jineibinabe.

Yawano barabũ daxita jiwi wũnae paca jainteibinabe.

Yawano barabũ paxeineibinamebe peayapusũwa

xua daunweya painya neexaneibiwabe. Daxita barapo coyenein ataya tsitecaeya paxeineibinamebe”, jei daxita barapomonae, pomonae Nacom forota.

<sup>14</sup>Barapo cuatro poyobe xua xuan asũ, jeye: “¡Bara bara, bara baxua exanaena!” jei. Pitiri jiwi, pomonae veinticuatro poyobe, pentabocotha umena, xua Nacom wũnae pejainchinexatsi, pon ataya tsitecaeya popona.

### **Meje yabara po diwesi xua siete xoyobe xua xuan pecatsababiwan**

**6** Bapoxonae tan poxonae Cordero tsitsinaxuba caewa xua catsataba. Bapoxonae caein jiwana pomonae cuatro poyobe xua xuan asũ jume tan xua daunweya paeba xua be yamũxũ busi, nejei: “¡Anetha, taema!” jei. <sup>2</sup>Bapoxonae tan cawayu pemañyan. Pon cawayutha equeica, bapon bicheibi caequeica. Bapon pexeinya

tepa catatsi penamata xatatsinexa. Bapon cawayutha ponataba xua beta penabinexa. Bapon amanayaba pia peaitafaetabiwichi.

<sup>3</sup>Poxonae Cordero equeicha tsitsinaxuba icha pecatsatabiwa, bapoxonae barapo cuatro poyobe jiwana xua xuan asũ jume tan, nejei: “¡Anetha, taema!” jei. <sup>4</sup>Equeicha patopa ichũn cawayu petsobian. Pon tsijuma equeica, bapon catatsi peayapusũ itorobi coyenewa xua jiwi pejũntũ coyene wepuxana exanaenexatsi po coyene xua jũntema pejinompaewa. Yawano peexanaenexa xua pebiwi penajutebinexa. Matautano bapon pin dejona catatsi.

<sup>5</sup>Poxonae Cordero equeicha tsitsinaxuba icha pecatsatabiwa, bapoxonae equeicha barapo cuatro poyobe jiwana xua xuan asũ jume tan, nejei: “¡Anetha, taema!” jei. Equeicha cawayu tan petsaebian. Pon tsijuma equeica, bapon comaequeica pocotsiwa pepesabiwa. <sup>6</sup>Bapoxonae barapo cuatro poyobe pia xantha jume tan xua nejei: “Saya cae kilo trigo xu cae denario nantomatsina, pocotsi paratixi xua nantomata caentaqueitha poxonae nacuita. Yawano tres po kilobe cebada beno cae denario nantomatsina pocotsi paratixi xua nantomata caentaqueitha poxonae nacuita. Ichitha jopa copatsin tsane xua abe exanaena aceite mera yawano vino mera”, jei pon jume tan.

<sup>7</sup>Barapoxonae barapo cuatro poyobe xua opi ducuanaya jume tan yawa nejei: “¡Anetha, taema!” jei. <sup>8</sup>Bapoxonae cawayu ichũn tan pon na daena. Pon tsijuma equeica wũn dutatsi: “Pon Petũpaein”, jei. Barapo cawayu peputha tapoinchi ichũn cawayu. Pon tsijuma equeica wũn dutatsi: “Petũpaewa Nacua”, jei. Pon tsijuma equeicabe baponbe catatsibe Cordero pia peayapusũ

itorobi coyenewa tatsi xua baponbe pejiwana bexubinexabe poxonae cuatro poyobe necotabe pomonae po cae pin nacuathe jinompe, yawano xua pejutebinexabe poxonae jiwi naba, yawano pejutebinexabe poxonae jiwi piyain poxoru pexaewa aibi tsane, yawano pejutebinexabe poxonae jiwi atene, yawano pejutebinexabe unupiwi xua xuan bichocono anaepana.

<sup>9</sup>Poxonae Cordero tsitsinaxuba ichaxota xua cinco po cuiyobe xua pecatsatabiwa, bapoxonae tan xua be pexaethopaewa ichaxota tauteiba duwei xua tuxusi exaneiba Nacom nexa. Baraxua xua be pexaethopaewa juma bereca tan pomonae bayatha jutebatsi ichamonae, pecaponaexae Nacom Pejume Diwesi xua amsiya awiya pecueicueijeixae. <sup>10</sup>Pomonae xua bayatha jutebatsi ichamonae, barapomonae jume daunweya paeba, jeye: “Nacom ponxaem pepa Necanamataxeinaem daxita jiwi, Nacom ponxaem bichocono nejuntu coyene xeicaem. Xam ponxaem pocotsiwan yabara tsiwunae muxu dubame baxuan xaniwaicha exaname. ¿Eta poxonae exanaename xua poxonae jiwi yabara paebiname xua penatsicuentisiwa xua abe peexanaexae, xuano xua pana yantomatsiname xua nejutebinexa pomonae jinompa po cae pin nacuathe copiya pata tana nejutebixae?” jei barapomonae. <sup>11</sup>Bapoxonae barapomonae juma xatabatsi paparuwan, po paparuwan inyapana. Yawano barapomonae baraichichi: “Abu cataunxuae paeware beya poxonae yacui opi ducuiya weraweracaena xua cataunxuae jujutebaponaeinchi pomonae iru Cristo pejume cowuntsiwi. Barapomonae jujutebaponaeinchi pecueicueijeixae Cristo pejume diwesi, icha xua poxonae paichim”, jei Nacom.

<sup>12</sup>Poxonae Cordero tsitsinaxuba pecatsatabiwa xua seis po cuiyobetha, bapoxonae tan xua bichocono ira jijiyata. Xometo bichocono tsaebia tsanaya icha paparuwa ichi, pocotsi paparuwa bichocono tsaebia. Jomocoichato bichocono tsaebia tsanaya icha pejana ichi. <sup>13</sup>Opitei xua peitabocotha dubena othopeica po irathe tsique, icha be joibo ichi xua jubaba higuera nae xua pethei othothepeica. <sup>14</sup>Peitaboco aichurucuae icha be poxonae ichun ichi xua poxonae mata quiyontaba papera. Matautano demxuwan, petunaetonno equeicha ichawa bepoinya poxonae ira jijiyata. <sup>15</sup>Bapoxonae daxita pomonae jiwi itorobiya pia pepa peewatsiwichi tatsi xua barapo cae pin nacuathe, barapomonae nantsiyaba. Iru pomonae pentacaponaewi iru pomonae copei pexeinaewi, iru pomonae soldadomonae pia pentacaponaewi xua pomonae jiwi peamanayabeibi jiwi daxita barapomonae nantsiyaba. Daxitaru pomonae pebusi cui tatayebeibiwichi iru pomonae xua saya penata exanaewi piawan nantsiyabarũ. Ichamonae barapomonae jiwana ibo muthuntha nantsiyaba. Ichamonae barapomonae jiwana nantsiyaba po ibotontha xua saya bobena xua demxuwan itapatororon tsica. <sup>16</sup>Barapomonae demxuwan beya yawa iboton beya jeye: “Pana mataperababare xua pata werapaewa tsane xua daxota pon xua eca pia pexeinya peecaethopeibiwatha jopa pata tana netaewa tsane, yawa xua barapo Cordero pecuiyainwa xua pata neperaxa jubiya exanaeyainwa xua abe pata exanaexae. <sup>17</sup>Tsipei barapo matabi patopa po mataqueitha daxita jiwi peraxa jubebinchi. Dapon aibi pon panepa barapo mataqueitha”, jei pomonae nantsiyaba.



**Meje yabara po diwesi xua Nacom  
itapa tina Israel pia pexui  
tatsi pia pemomoxi susato  
jiwanapiwi tatsi xua peyaitaenexa**

**7** Bapoxonae cuatro poyobe tan matatsunpiwi xua iratha umena. Ichun uncua ichaxota pocotsiwa xometo weecoina, ichun uncua ichaxota pocotsiwa xometo bejopiya, ichunbe epatautiya uncuabe. Barapo matatsunpiwi jopa copatsiyo xua joibo pejojondenaewa barapo iratha dena, yawa xua pin mar menein dena, yawano naeintha denano. <sup>2</sup>Barichi ichun tan ichun matatsunpin pon pocotsiwa wetsina pona ichaxota pocotsiwa xometo weecoina. Barapo matatsunpin capona Nacom piawa xua pocotsiwa peyaputaewa piawaxae, pocotsiwa pecatinaewa pon Nacom peyapusu itorobi coyenewa pexeinaein. Barapo matatsunpin jume daunweya wawai icha matatsunpiwi beya xua cuatro poyobe, po cuatro poyobe pia peyapusu itorobi coyenewa xeina xua itacupatsi xua abe exanaena pin mene mar mentha yawa iratha. <sup>3</sup>Barapo matatsunpin jeye: “Jopa abe paexanaeinde iratha yawa pin mene mar mentha, paeware abu beya poxonae jiwi paitapa tinaein Nacom pia pejume cowuntsiwichi, pon pata Nacom”, jei barapo matatsunpin.

<sup>4</sup>Jume tan barapomonae yabara, xua ichun jeye: “Ciento cuarenta y cuatro po jiwimonaebe paitapa tinan xua Israel pia pemomoxi susatomonae jiwana tatsi”, jei. <sup>5</sup>Barapo Israel pon icha wun Jacob. Bapon xeina doce po pexantobe tatsi pomonae caena bayatha werapa. Israel pia pexanton tatsi pia pemomoxi susato jiwi tatsi xeina. Pon Judá, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Rubén, barapon

pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Gad, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>6</sup>Pon Aser, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Neftalí, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Manasés, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>7</sup>Pon Simeón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Leví, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Isacar, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. <sup>8</sup>Pon Zabulón, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon José, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe. Pon Benjamín, barapon pia pemomoxi susato jiwanapiwi tatsi Nacom itapa tina saya doce mil pomonae matabuxumonaebe.

**Meje yabara po diwesi xua pomonae  
juma xatabatsi pemainya paparuwan**

<sup>9</sup>Bapoxonae equeicha tan ichamonae pomonae bichocono jiwi ayei. Daxita nacuanpiwi jiwamonae, yawano daxita carepaya tsicamonaexi jiwamonae, yawano daxita carepaya icha jumexitha pepaebiwi jiwamonae, yawano daxita carepaya tomaran jiwamonae. Daxita barapomonae umena ichaxota imoxoyo

Nacom pia pexeinya peecaethopeibiwa, yawa xua Cordero peitabaratha tatsi. Barapomonae bichocono pin bicheito xua ichamonae jopa itacupaetsi peununaewa. Daxita barapomonae juma xatabatsi pemainya paparuwan. Yawano barapomonae pecobetha cajjinca xua be coichaxu axu.<sup>10</sup> Daxita barapomonae jume daunweya jeye: “¡Wanacom pon xua eca pia pexeinya peecaethopeibiwatha yawano Cordero pon uncuca, naca capanepa xua jopa waatenewa tsane xua abe waexanaexae!” jei barapomonae.

<sup>11</sup> Barapo matatsunpiwi matawacaicha yatoroto umena xua pitiri jiwi matawacaicha yatoroto umeinchi. Yawa pitiri jiwi matawacaicha yatoroto umena xua xuan cuatro poyobe xua xuan asu matawacaicha yatoroto umeinchi. Yawano cuatro poyobe xua xuan asu matawacaicha yatoroto umena xua Nacom pia pexeinya peecaethopeibiwa matawacaicha yatoxoyoroto umeinchi. Bapoxonae barapo matatsunpiwi irabe taeumendeca barapo pexeinya peecaethopeibiwa peitabaratha. Yawano Nacom wuna jaintatsi.

<sup>12</sup> Barapo matatsunpiwi jeye: “¡Barabu Nacom juntu coyene weiweina exaneibatsi pocotsiwa xua beta waexanaewa! ¡Bara ichi tsane! ¡Barabu daxita jiwi wuna jainteibina Nacom! ¡Matautano barabu Nacom xeineibina pia peyaputae coyenewa! ¡Matautano barabu jiwi jei tsaibi: ‘Nacom maisa pajuntu coyene weiweinan xua amanaya pata tana neyawenaemxae’, jei tsaibi jiwi!

¡Barabu daxita jiwi cayabara baru cui itura jineibina! ¡Matautano barabu xeineibiname jinya neyapusu itorobi coyenewa, xuano xua xeinaename jinya neyapusuwa xua daunweya neexanae coyene! ¡Baxuan barabu ataya xeinaename! ¡Je bara ichi tsane!” jei barapo matatsunpiwi.

<sup>13</sup> Barapo pitiri jiwi jiwana caein neyainyaba, nejei: “¿Jintam barure pomonae pemainya paparuwa nama xataba? ¿Eta werena pona?” nejei pitirin. <sup>14</sup> Jume notan, janje: “¡Pon pentacaponae, apara xam yaputaneme jame!” jan. Barapoxonae nejei: “Barapomonae apara pomonae werena pona ichaxota poxonae po mataqueitha jiwi bichocono atene exaneibatsi. Barapomonae abe pia peexanae coyenewan tatsi Nacom tajuntemaina, tsipei barapomonae jume cowuntatsi xua pon tsitupa barapomonae, pon ‘Cordero’ baraichichi. Barapomonae juntu coyene wuna exanatsi Nacom. Yawa pemainya paparuwa jume xatabatsi”, nejei pitirin.

<sup>15</sup> Equeicha nejei pitirin: “Daxota barapomonae umena ichaxota imoxoyo Nacom pia pexeinya peecaethopeibiwa. Barapomonae tanacuita dubenanaebiya Nacom mataqueitha, yawa merawithano Nacom pia pin botha tatsi xua pia nacuatheicha tatsi.

Pon xua eca pia pexeinya peecaethopeibiwatha bapon eenequeibina barapomonae, tsipei baru popona. <sup>16</sup> Bapoxonae barapomonae jopa piyainyo, yawa jopa pia meratsino,

yawa jopa tsaquiwichi xometotha xua bichocono jainchi.

<sup>17</sup>Barapo coyene jopa abe exanaeyo barapomonaetha, tsipei Cordero Nacom Pexanto tatsi, pon uncua ichaxota imoxoyo Nacom pia pexeinya peecaethopeibiwatha, bapon yawena xua barapomonaeyawenatsi. Barapon Cordero barapomonaey beta yapu eenaeinchi, icha be poxonae pon ovejan peewatsin ichi poxonae pia ovejan matacapona beta ichaxota penaton mene, po meran mene xeica, xua peaswa tsane. Bapoxonae barapomonaey Nacom itacuere mene tsewa exanaena xua pewecoyeixaey", nejei pitirin.

### **Meje yabara po diwesi xua siete po pecatsatabiwa xua tabu ducua**

**8** Poxonae Cordero tsitsinaxuba siete po cuiyobetha xua barapo diboro catsataba, bapoxonae peitaboco moya ducua saya be ainya dapaeyobe. <sup>2</sup>Bapoxonae tan siete poyobe matatsunpiwi, pomonaey xua umena Nacom peitabaratha tatsi. Barapo matatsunpiwi daxita barompaya catsibatsi siete xoyobe xua pocotsiwan pecaobiwan, po pecaobiwan pewun trompeta. <sup>3</sup>Bapoxonae pirapaeyo patopa ichun matatsunpin. Barapo matatsunpin capatopa xua be coroto xua pocotsiwa oro nain coroto. Barapo oro nain corototha boca petuxuei tsapato xua petautsinexa Nacom nexa. Barapoxonae barapo matatsunpin yutabotsiya tautabota xua ichaxota pocotsiwa be pexaethopaewa, bichocono tuxuei tsurucuae. Barapo matatsunpin uncua ichaxota pocotsiwa be pexaethopaewa ichaxota tauteiba petuxueiwan, po petuxueiwan xua tuxusi exaneiba

Nacom nexa. Bapoxonae barapo matatsunpin catatsi nawita xua petuxueiwan. Pomonaey Nacom peantobewixaetsi poxonae tsipaebeyba Nacom, barapo jumein yawa muxuna jujuinya Nacom beicha barapo petuxueiwa xua poxonae tauta. Baraxua xua be pexaethopaewa ichaxota xua tauteiba petuxueiwan, baxua Nacom pia pexeinya peecaethopaewa itabaratha tatsi uncua. <sup>4</sup>Barapo petuxuei tuxusi mureiwa matatsunpin pia maxu wetajujuinyatsi Nacom peitabara beya yawa athabe muxuna jujuinya pejume, po jume xua jiwu poxonae tsipaeba Nacom. <sup>5</sup>Bapoxonae barapo matatsunpin barapo oro nain coroto pita, yawa barapo corototha bichocono wunca exana iso itere, po itereton xua taxua barapo petuxusi exanathopeibiwatha. Bapoxonae daxita baxua po irathe xuba, bapoxonae yamuxu busi, yawa jerajerei, yawa ira jijiyatano po cae pin nacuatha tsique.

### **Meje yabara po diwesi xua trompeta xua pecaobiwan**

<sup>6</sup>Barapo siete poyobe matatsunpiwi daxita barompaya nacui wunaeta pia trompetan xua peobinexa.

<sup>7</sup>Pon xua copiya, bapon oba pia trompeta. Bapoxonae othopeica be ibotixi, pocotsiwa xua benata ichaxota po eman bichocono aque. Yawano muxuna iso itere othopeica. Yawa muxuna othopeica pocotsiwa be pejanan. Daxita baxuan matatsunpin iratha bebaichica. Bapoxonae ichaxota acoibi po iranbe tsitsiniya, cae iran jiwana wetataxua tsiniya ainya irabe jopa daichiyo. Matautano taxua ichaxota acoibi po unube tsitsiniya, cae unun jiwana wetataxua tsiniya ainya unube jopa daichiyo. Matautano naepanaewan ichaxota acoibi po wexuabe tsitsiniya, cae wexua jiwana

wetataxua tsiniya ainya wexuabe jopa daichiyo.

<sup>8</sup>Bapoxonae equeicha ichun matatsunpin oba pia trompeta. Bapoxonae pocotsiwa be demxuwa taxuapona. Barapo demxuwa xubatsi pin mar mentha, yawano pin mene mar pejana mene tsanaya. Dos po pin mar menebe jopa daichiyo. <sup>9</sup>Po pin mar mentha pejana tsanaya baxota duwei werapa, po duwei jinompa baxota. Matautano jeran fobaba pocotsi naein bichocono pin naein.

<sup>10</sup>Bapoxonae equeicha icha matatsunpin xua tres poyobetha, bapon pia trompeta oba. Bapoxonae opiteito, pototo pinto jopeica itaboco wetsica po irathe tsique, yawa taxuayecapona icha banaxuto ichi. Barapo pin opiteito jopeica mentha xua yawa jopeica ichaxota ira buxupana mene mene natsibotaruca. Saya xua daxita mentha aibi. Saya poxonae tres po menebe bara cae mentha jopeica, yawa jopeica xua cae ira buxupana mentha. Icha ira buxupana menthabe jopa daichiyo. <sup>11</sup>Barapo pin opiteito wun dutatsi “Amargura”, jei, po jume xua “Atsu”, jei. Daxota poxonae jopeica barapo mentha mene atsu tsanaya. Pinmonae jiwi werapa poxorupa apa barapo peatsu mera.

<sup>12</sup>Bapoxonae equeicha icha matatsunpin xua cuatro poyobetha pia trompeta oba. Bapoxonae jiwana muxunene weabe exana xometo. Ainya muxunenepabe jopa daichiyo. Yawa jiwana muxunene weabe exana jomocoichato. Ainya muxunenepabe jopa daichiyo. Yawa jiwana weabe exana opitei. Icha opitei nacopaba. Poxonae acoibi po opiteibe dudubena tsiniya, bapoxonae cae opiteito jiwana weabe eexana tsiniya. Yawa ainya opiteitobe jopa abe eexana tsiniyaeyo. Po opitei abe exanatsi jopa xanepanaya pentha

tsurubenaeyo. Yawano jomocoichato muxunenepa, po muxunenepa abe exanatsi, jopa pentha tsurucuaeyo. Yawa xometo muxunenepa, po muxunenepa abe exanatsi, barapo muxunenepa jopa xanepanaya pentha tsurucuaeyo. Daxota mataqueitha tsiwiyo quiriquirica, yawa merawi bichocono nama.

<sup>13</sup>Bapoxonae pirapaeyo tan matatsunpin pon be cuiyausi xua juinya pupuna ducuaenaebiya itabocotha. Bapon jume daunweya jeye: “¡Pai jiwi tsobernae xua barapo jiwi abe exanaeinchi pomonae jinompa po iratha deque xua poxonae jume taena xua poxonae matatsunpiwi obina trompetan, tsipei acoibi poyobe matatsunpiwi cataunxuae jopa obiyobe anoxuae!” jei bapon, pon be cuiyausi.

**9** Bapoxonae equeicha icha matatsunpin xua cinco poyobetha oba pia trompeta. Bapoxonae tan pon xua be opiteito jopeica iratha bayatha, xua peitaboco wejopeica. Bapon catatsi po coyenetha itacupatsi xua pecoibo saranaxubiwa tsane barapo pin muthu deca xua ira bereca. <sup>2</sup>Bapoxonae bapon coibo saranaxuba. Barapo muthu coiboto tsina be pin tsuxu jujuina, po tsuxu icha pabi coicha tsuxu ichi poxonae pin pabi. Barapo tsuxu po irathe naquitaba exana yawa xometo naquitaba exanano.

<sup>3</sup>Barapo tsuxu weya pupuna sure, xua daxita iranthe pupuna. Barapo sure catatsi, pocotsi coyene icha puto ichi xua poxonae naca cawata. <sup>4</sup>Barapo sure itorobatsi xua jopa abe peexanaewa tsane naepanaewatha xua wexotha kuwa yawa xua tsica naexi. Yawano xua jopa abe peexanaewa tsane naeintha. Saya jame itorobatsi xua abe peexanaewa tsane jiwitha pomonae Nacom jopa itapa tinaeyo. <sup>5</sup>Ichitha jopa copatsiyo xua jiwi pejutewiwatsi tsainchi. Saya jame copata xua saya jiwi atene exanaeinchi beya poxonae cinco po xometiyobe tsane.

Barapo peatenewa bichocono atene icha be poxonae ichi xua poxonae ichun cawatatsi puto.

<sup>6</sup>Barapo mataqueitha, po mataqueitha jiwa bichocono atene tsane, cuinaya bewerapabenaena ichitha jopa cuinaya werapabenaena tsane.

<sup>7</sup>Sure be cawayumonaen nacui wunaeta xua penabinexa. Barapo suremonaen mataina pocotsiwan be tepan be pocotsiwan penainton xuan pewun oro nain. Matauta peitabaran be jiwa itabaran. <sup>8</sup>Pentanan bichocono antanapiiya be yabuxi, pewanon awanoyei be neuthu wanon. <sup>9</sup>Pia pepon tsebocon dubena be penain xuan baxota penayaewatsinexa, po penain pewun hierro nain matawun. Pecuarafein busin be cawayu busin poxonae cawayu cacuinaejjinca ainya naein xua cawayu pecaponaen naexi xua penabiwa tsane.

<sup>10</sup>Pebosoton be puton bosoton xua e dubena. Pia pebosotontha itacupatsi xua abe peexanaewa jiwitha xua beya poxonae cinco po xometobe. <sup>11</sup>Barapo suremonaen xeina pia pentacaponaen, po pentacaponaen peewatsin barapo pia pin muthu, po muthu ira bemuthu taerucuaeca. Barapo matatsunpin pon suremonaen pia pentacaponaen tatsi hebreo jume wuntha “Abadón”, jei. Seicaya griego jume wuntha “Apolión”, jei. Barapo jume wuntha jeye: “Pon Pecaewitaxubin daxita”, jei.

<sup>12</sup>Baxua weta xua copiya abe peexanaewan, ichitha awiya seica ainya peabe coyenewabe.

<sup>13</sup>Bapoxonae equeicha icha matatsunpin xua seis poyobetha oba pia trompeta. Bapoxonae jume tan xua cueicueijejei cuatro po pentetobe weya. Barapo cuatro po pentetobe umena pemuxuburutha xua be pexaethopaewa xua ichaxota tauteiba petuxueiwa xua tuxusi exaneiba Nacom nexa. Baraxua xua be pexaethopaewa daxita matapaeicha juma catsababa oro

nain. Baraxua Nacom pia pexeinya peecaethopeibiwa itabaratha tatsi uncua. <sup>14</sup>Barapo matatsunpin xua pon seis poyobetha xua pon pia trompeta xeina barapo jumetha tsipaebatsi barapon. Barapo matatsunpin jeichichi: “Barapo cuatro poyobe matatsunpiwi pomonaen maxu cubebatsi maxu isacapende xua pomonaen umena ichaxota po mene pin mene, po mene pewun Eufrates”, jei. <sup>15</sup>Bapoxonae barapo cuatro poyobe sorobabatsi, xua jiwa pejutebiwa tsainchi. Icha bicheito jutebatsi. Dos po bicheitobe jopa jutebichi. Barapo cuatro poyobe bayatha cui wunaetatsi xua po horathe nexa, yawa xua po maticabithe nexa yawa xua po xometothe nexa yawa po weithe nexa xua poxonae pesorobabiwatsi tsainchi. <sup>16</sup>Jume tan xua pia soldadomonaen yabara paeba xua pomonaen bichocono ayei xainto bicheiton, jeye: “Bapon doscientos millones xeina po soldadomonaen cawayutha pona”, jei.

<sup>17</sup>Xua xuan tan cawayumonaen iche: Pomonaen cawayutha eneica pentacaritha cajjinca penain bocoton, petsobiwanno, yawa pesujeiwanno, yawa pedaedaenaewanno. Barapo cawayumonaen peitabaran be neuthu itabaran. Barapo cawayumonaen pecoiboton tsina iso itereton tajujuinatsi xua tsuxu tsobia, yawano icha tsuxuno xua coicha szej. Yawano icha coicha po tsuxu coicha daena. <sup>18</sup>Pin bicheitomonaen werapa tsipei barapo cawayumonaen pecoiboton tsina tajujuinatsi iso itere, petsuxuno xua szej, yawa icha tsuxu po coicha bichocono coicha daena. Dos po bicheito cuntiyobe jopa daichiyo. <sup>19</sup>Barapo cawayumonaen pecoiboton tajujuinatsi pia peayapusawan tatsi yawano pebosoton tsinano. Barapo cawayumonaen bosoton be jomon matanaen. Barapo jomo matanaenitha jiwa abe exainchi.

<sup>20</sup>Ichitha ichamonae pomonae jopa werapaeyo barapo pewerapaewantha, barapomonae jopa pentsiyo abe pia peexanae coyenewan. Matautano jopa barapentsiyo xua antobeya wūnae pe-jainchiwa caurimonaetha. Matautano jopa barapentsiyo po nacom oro nainto nacom, yawa plata nainto nacom, yawa bronce nainto nacom. Yawano wūnae jainta ibo nacom. Yawano wūnae jainta nae nacom. Barapo nacomūnmonae jopa itacūpaetsi xua penecotsiwa. Yawa jopa itacūpaetsi xua pe-jume taewa. Yawa jopa itacūpaetsi xua peponaewa. <sup>21</sup>Matautano jopa barapentsiyo xua ichamonae pejutewiwatsi. Yawano matauta jopa barapentsiyo po coyene xua mara peexanaewa pia coyenewan tatsi. Yawano jopa barapentsiyo xua penata siwa xeinaewa yabūxitha. Matautano jopa barapentsiyo pecaibi coyenewan.

**Meje yabara po diwesi xua matatsunpin capona tsica dibiriyo**

**10** Xan ponxaein Juan, bapoxonae equeicha tan icha matatsunpin pon bichocono peayapusūn xua peitaboco wetsica pona po irathe tsique. Barapo matatsunpin tsaquinaebowa muxuna dederaquiya duneica. Yawano matatsun uncueicatsi coinwawa. Peitabara bichocono itabara pentha icha xometo ichi poxonae pentha. Yawa pesitobe be isoto coicha xua bichocono coicha tsobia. <sup>2</sup>Tsica dibiriyo pecobetha capona xua itūtaduta. Po sito xua pecoxa weya pin mar mentha uncuā, yawa po sito petsocona werena iratha uncuā. <sup>3</sup>Bapoxonae bapon jume daunweya wawai be poxonae neūthū jume daunweya fiba. Poxonae bapon wawai, bapoxonae jume tan xua be jurujurei yamūxū siete po jumeyobe xua paeba. <sup>4</sup>Poxonae baxua najume weta xua be jurujurei yamūxū siete po

jumeyobe xua paeba, pontaban xua tatinaenexa xua baxua paeba. Ichitha jume tan pon peitaboco wenetsipaebica. Nejei: “Moya yawūn xeinare yawa jopa tinaeinde xua barapo siete jumeyobe xua be jurujurei yamūxū”, nejei.

<sup>5</sup>Bapoxonae barapo matatsunpin pon xua po sito pecoxa weya uncuā pin mar mentha yawa xua po sito petsocona weya uncuā iratha, bapon namaxū yoicha peitaboco beicha po maxū xua pecoxa weya. <sup>6</sup>Matatsunpin pon namaxū yoicha peitaboco beicha po maxū pecoxa weya, bapon jeye: “Nacom, pon ataya popona, bapon itaboco forota. Bapon irano forota, pin mar meneno forota. Daxita ichawan muxuna forotano, pocotsiwa itabocotha dubena yawa pocotsiwa irathano xeina yawa pocotsiwa pin mar menthano jinompa. Barapon peitabaratha tatsi uncuā. Bara xaniwaicha paeban bapon peitabaratha tatsi. Yabara tsiwūnae muxu dutan: ‘Equeicha daxua aibi xua peewatsiwa’, jan”, jei matatsunpin. <sup>7</sup>Equeicha barapo matatsunpin jeye: “Poxonae matakabi patopaena po mataqueitha icha matatsunpin obina pia trompeta xua siete poyobetha, bapoxonae Nacom nacui jutsina xua daxita wetsina. Nacom wetsina xuan pocotsiwan caena bayatha Nacom yabara tsiwūnae muxu duta piamonae tatsitha, pomonae Nacom peitorobi jume pepaebiwi. Barapocotsiwan xua Nacom yabara tsiwūnae muxu duta, baxuan jiwi jopa yaputaeyo poxorū jopa Nacom yatsicaewa tsita itūtasiyo jiwitha”, jei barapo matatsunpin.

<sup>8</sup>Barapo jume pon xua itaboco wenetsipaebica, bapon equeicha netsipaeba, nejei: “Ponare yawa pire barapo dibiriyo xua po dibiriyo naitatarucua. Barapo dibiriyo pire, po dibiriyo barapo matatsunpin comauncua. Barapo matatsunpin pon po sito pecoxa weya uncuā pin mar mentha, yawa uncuā iratha po

sito petsocona weya”, nejei. <sup>9</sup>Bapoxonae matatsunpin beya ponan yawa wacan barapo dibiriyo, janje: “Necare barapo dibiriyo”, jan. Nejume nota, jeye: “Moya pire, moya yawa xaema barapo dibiriyo. Poxonae barapo dibiriyo xaename necoibotha catsijain xeicaena be banto tsane. Ichitha necotsorotha atsu tsane”, nejei matatsunpin.

<sup>10</sup>Bapoxonae barapo matatsunpin wecobe pitan barapo dibiriyo yawa xan. Poxonae xan netsicoibo xeica be banto ichitha tacotsorotha bichocono atsu tsanaya. <sup>11</sup>Bapoxonae netsipaeba, nejei: “Xam bewa equeicha yabara tsiwunae muxu dutsiya paebiname po coyene bayatha Nacom yabara paeba jiwi, xua ainya nacuanpiwi, yawa pomonae barompaya pijume pepaebiwi, yawano pomonae jiwi itorobiya pia pepa peewat-siwichi”, je i xua pon netsipaeba.

**Meje yabara po diwesi xua dos  
ponbe, ponbe yatsicaewa Nacom  
pia petapaebinchibe xua  
petaexaebe pocotsiwa Nacom exana**

**11** Bapoxonae necata naeto pocotsiwa xua peepa canaubiwa. Yawano matatsunpin nejei xua Nacom tapaebatsi: “Asiya uncuare yawano pire barapo naetiyo. Bapoxonae Nacom pin pia bo beya ponare, yawa bara po bo epa canaubare. Yawano epa canaubare xua be pexaethopaewa ichaxota tauteiba xua petuxueiwa xua tuxusi exaneiba Nacom nexa. Yawano ununare pomonae baxota Nacom wunae jointatsi, pomonae yatsicaewa Nacom peantobewichi. <sup>2</sup>Ichitha jopa pana epa canaubinde, po pana pesato beya boca ichaxota Nacom pia pepa pin pia bo tatsi uncua. Tsipei barapo pana ichamonae catatsi pomonae penanapaincha jinompaewi xua icha nacuan werena peponaewi, pomonae Nacom jopa pejume cowuntsiwichi.

Barapomonae abe exanaena Nacom pia pexeinya tomara tatsi po tomara xua barapo cae pin nacuathe xua beya cuarenta y dos po xometobe yacui nacui wetsiya jopaena. <sup>3</sup>Xan itorobin dos poyobe, ponbe xua inta yatsicaewa paebinate xua petaexaebe xua pocotsiwa exanan. Baponbe inta yabara tsiwunae muxu dutsiya paebinate jiwitha xua beya un mil doscientos sesenta po matakabinbetta tsane. Baponbe jume xatatsinbe pocotsi paparuwa xua axun, xua jiwi nama xatabeiba poxoru wecoyei”, nejei matatsunpin xua Nacom tapaebatsi.

<sup>4</sup>Barapo pebinbe ponbe xua inta paebabe, baponbe ichawa yabara caunutatsibe. Caena bayatha Nacom pia peitorobi jume pepaebin, pon pewun Zacarias yabara tina olivo naebe, yawa yabara tina ainyawabe pocotsiwa petabuyubeibiwa pecoichan. Barapocotsiwanbe caunuta xua ponbe inta paebabe. Barapo ainya olivo naebe yawa barapo ainyawabe xua pecoichan petabuyubeibiwa umena pentacaponaein peitabaratha tatsi, pon po cae pin nacuepiwi pia Pecanamataxeinaeinchi tatsi. <sup>5</sup>Icha ichamonae ichichipa xua baponbe abe peexanaewatsibe baponbe itacupatsibe xua weraweraca peexanaewabe barapomonae pecoiboto tsina icha be pocotsi coyeneya metha ichipabe xua poxonae daxita weraweraca exanabe poxonae be isoto tajuinatsibe. Barapo isototha baponbe omeicha tautabe pia peaitafaetabiwichi jiwitha. Barichi werapaena pomonae ichichipa xua baponbe abe peexanaewatsibe. <sup>6</sup>Baraponbe xeinabe pia peitorobi coyenewa xua itacupatsibe peitaboco acatsiwa tsanebe xua jopa ema peruneicaewa tsane. Baxua itacupatsibe xua exanabe poxonae baponbe po matakabitha cataunxuae Nacom

tapaebi ducuaenaebiyatsibe. Matauta baponbe pia peitorobi coyene xeinabe xua meratha equeicha pejana tsanaya exanabe. Matautano baponbe itacupatsibe xua exanabe poxi xua abe exana iratha. Ainya coyenein baponbe exanabe xua xuan be pocotsi coyeneya ichichipabe xua peexanaewabe.

<sup>7</sup>Poxonae baponbe nacui wetsinabe xua tapaeba ducuaenaebiyabe xua Nacom tapaeba ducuaenaebiyatsibe, bapoxonae juinaena po muthu pin muthu tsina pon ayei pon bichocono abe peexanaein. Baraponbe be xua butsi natsicotainchi yawa amanayabinchibe xua tupa peexanaenexatsibe. <sup>8</sup>Petupaeinbe saya pesatotha bocaenabe tomara namtotha, po pepa tomaratha ichaxota matha naetotha tupa exanadutatsi pon jiwi Pecanamataxeinaein xua baponbe pia Pecanamataxeinaeinchibe tatsi. Jiwi barapo pepa tomara yabara jeichiya jeye: “Barapo Jerusalén tomarapiwi apara be ‘Sodoma tomarapiwi’, jei, yawa barichi be ‘Egipto nacuapiwi’, jei”, jei jiwi. Jiwi barapo Jerusalén tomarapiwi yabara caunutsiya paeba tsipei caena bayatha Sodoma tomarapiwi abe peexanaewimonae. Yawa iru Egipto nacuamonaepiwi abe peexanaewimonae, icha barapo pepa tomaramonae ichi xua Jerusalén tomara xua abe exana. <sup>9</sup>Daxita pomonae tomarapiwi jiwana, iruno tsicamonaeyo jiwana, iruno pomonae barompaya icha jumexitha pecueicueijeji jiwi jiwana, iruno daxita pomonae nacuanpiwi jiwana, daxita barapo jiwimonae taeumenaena barapo petupaeinbe. Baponbe petupaeinbe bocaenabe acoibi po matababibe yawa xua equeicha bara caetono. Daxita barapomonae pomonae taeumena,

jopa copatsi tsane xua ichamonae bara petupaeinbe pemuthuthu xubiwa tsainchibe. <sup>10</sup>Pomonae xua jinompaena po irathe jantemiya jinompaena xua petupaexaebe baponbe. Daxota daxita barapomonae juntu coyene weiweinaena, yawano daxota barapomonae nantiya nacatsibina pocotsiwan amanaya penacatsibiwan. Barapomonae baxua exanaena tsipei ajumeitafaetabi tsane pocotsiwa paebabe Nacom nexa, ponbe Nacom peitorobi jume pepaebinbe.

<sup>11</sup>Ichitha poxonae yapu caewinaba acoibi po matababibe yawa xua equeicha bara caeto bocaenabe, bapoxonae equeicha Nacom asu exanaenabe. Bapoxonae asiya uncuaenabe. Daxita pomonae xua poxonae baponbe taeinchibe, bichocono junuwina. <sup>12</sup>Bapoxonae baponbe jume taenabe xua pon itaboco wetsica jume daunweya baraunchi tsainchibe, jei tsainchibe: “¡Bara wepajuinamebe!” jei tsainchibe. Bapoxonae baponbe itaboco beicha juinyaenabe tsaquinaebowatha yawa pu taeumenaeinchibe pia peitafaetabi jiwichi. <sup>13</sup>Barapoxonae caena ira jijiyatsina bichocono. Ichaxota diez po bonbe uumena tsiniya cae bon jiwana othopa jujuincaena, nueve po bonbe tsiniya jopa daichi tsane. Siete mil po pebiwi matabuxumonaebe werapaena ira pejijiyatsixae tsane. Pomonae jopa werapae tsane bichocono junuwina daxota Nacom wunae jainchinchichi, po Nacom itaboco beequiya.

<sup>14</sup>Bayatha nacui weta xua dos xoyobe xua daxita jiwi atene tsane bichocono. Ichitha imoxoyo equeicha methaunxuae tsane ichawa pocotsiwa acoibi po cuiyobe nexa pocotsiwa xua jiwi bichocono atene tsane.



**Meje yabara po diwesi poxonae xua  
matatsunpin xua pon siete  
poyobetha oba pia trompeta**

<sup>15</sup> Barapo matatsunpin xua pon siete  
poyobetha pia trompeta oba. Bapoxonae  
pejume itaboco wetsica jume daunweya  
jeye:

“Po coyene xua jiwi itorobiya  
peewatsiwatsi  
barapo cae pin nacuathe, anoxuae  
barapo peitorobi

coyenewa Nacom pon  
Wanacanamataxeinaein

piawa iruno Mesías pon Nacom pia  
peitorobarecaein, bapon piawa tatsi.

Baponbe daxita jiwi itorobiya  
ewatsinchi

barapo cae pin nacuathe xua ataya  
tsane”,

jei pomonae xua itabocotha jume  
daunweya wawai.

<sup>16</sup> Bapoxonae tan barapo pitiri jiwi,  
po pitiri jiwi veinticuatro poyobe.  
Barapo pitiri jiwi ena pia pexeinya  
peenaethopeibiwatha, Nacom  
peitabaratha tatsi. Barapo pitiri jiwi  
pentabocototha irabe taeumendeca  
xua Nacom wɯnae pejainchinexatsi.

<sup>17</sup> Barapo pitiri jiwi jeye Nacomtha:

“Xam pata Nacom, ponxaem jiwi  
Necanamataxeinaem pajuntɯ coyene  
weiweinan xua pocotsiwa painta  
neexanaexae.

Xam barapo pata Nacom, pon  
neayapusɯ itorobi coyenewantha  
neexanaein.

Xam pon anoxuae ataya poponeibiname  
yawa

xua caena bayatha ataya  
poponeibameno,

yawano xua bexa tsane ataya  
poponeibinameno.

Tsipei anoxuae po mataqueithe nama  
tamropata

pitabame jinya neayapusɯ itorobi  
coyenewa

xua tsita itutame xua poxonae daxita  
carepaya nacuanpiwi itorobiname.

<sup>18</sup> Daxita nacuanpiwi cacaseba, ichitha  
anoxuae matababi patopa, po  
mataqueitha

bichocono anaya atene exanaename  
barapomonae abe peexanaexae.

Yawano barapo mataqueitha daxita jiwi  
yabara paebiname xua

penatsicuentsiwa pomonae xua wɯnae  
peexanaewi irɯ pomonae xua abe  
peexanaewi.

Daxita barapomonae bayatha werapa.

Barapo mataqueitha irɯ pomonae xua  
cata

nacuita, pomonae jinya neitorobi jume  
pepaebiwi,

irɯ pomonae xua pejuntɯ coyene  
xanepanaewi,

barapomonae matabɯxɯmonaebe  
catsibiname

pocotsiwan xua bayatha juntana jebame  
xua nematomatsiwan.

Barichi catsibiname pomonaetha  
pomonae jopa

judiomonae naexanaeyo pomonae be-  
quein bara

ichamonae saya pecui pawimonae,  
matautano

bequein bara ichamonae peainya cui  
jiwimonae.

Ichitha xam saya bara catsita najupa.

Matautano barapo mataqueitha daxita  
omeicha

atene exanaename pomonae abe  
peexanaewi

barapo cae pin nacuathe”,

jei barapo pitiri jiwi.

<sup>19</sup> Bapoxonae Nacom pin pia bo tatsi  
nacoibo saranaxuba xua itabocotheicha.  
Barapo Nacom pin pia botha jiwi tane  
pocotsiwa xua ichawa yanta xatabab-  
ota xua be caja. Barapo cajatha boca Na-  
com petinae diwesi, pocotsiwa xua Na-

com yabara tsiwunaē muxu duta pomonaetha pomonaē pia petanacuichiwichi pocotsiwa bexa Nacom taexanaena xua barapomonaē taexanaeinchi. Bapoxonaē yamuxu busi xua be jurujurei yawa jerajerei. Matautano ira jijiyata, yawano nawita othopeica xua dederawa, pocotisiwan benata poxonaē po eman ichaxota bichocono aque.

**Meje yabara po diwesi xua petsiriwa yawa pon pinyo, pon be jomowabi, bapon pon be Joyoinya**

**12** Bapoxonaē itabocotha naituta xua pocotsiwa bexa exanaena po cae pin nacuathe tsique. Tan petsiriwa powa nama xatata po paparuwa bichocono wunaē, icha be xometo ichi poxonaē pentha. Bapowa nataxu yutūuncua jomocoichatotha. Barapowa mataina tepa, po tepatha doce xoyobe xeina opitei. <sup>2</sup>Bapowa yaporowa jina pexuyo. Bapowa wawai tsipei atene, poxoru pexuyo naexana imoxoyo. <sup>3</sup>Bapoxonaē itabocotha equeicha naituta ichawa. Tan pon pinyo, pon be jomowabi, pon be Joyoinya. Bapon pon be Joyoinya bichocono tsobia yawa siete po pentasipabe xeina yawa diez po pentetobe xeina. Daxita carepaya pentasipantha mataina tepan. <sup>4</sup>Pebosototha ira bereca bebairca opitei. Ichaxota acoiibi po opiteitonbe dudubena tsiniya cae opiteiton jiwanan abe eexana tsiniya. Barapon pon be Joyoinya ewatuncua, yabūyo ewatuncuatsi, powa xua imoxoyo exanaena pexuyo. Bapon pon be Joyoinya ichichipa xane pexuyo poxonaē naexanaena. <sup>5</sup>Barapo petsiriwa tanaexanatsi pexuyo pebin wūto. Barapo pexuyo, po pexuyo poxonaē wichaba itorobiya ewata pomonaē jinompa po cae pin irathe xua daxita carepaya nacuantha. Bapon daunweya beta ewata barapomonaē

icha pon oveja peewatsin ichi xua poxonaē daunweya beta ewata ovejan. Bapon exana baxua naewa xua be naebarupato. Poxonaē barapo pexuyo naexana, pitatsi yawa capoinchi Nacom pia pexeinya peecaethopaewatha beicha. <sup>6</sup>Bapoxonaē barapo petsiriwa naetsiriwa ira xuepana susato tsurucuae nacua beya. Baxotiya Nacom tsiwunaeta xua pia ira nexa yawa xua bapowa pexaewa peapatsinexatsi mil doscientos sesenta matakabibetha.

<sup>7</sup>Bapoxonaē itabocotha matatsunpiwi naba. Matatsunpin pon pewun Miguel, bapon matakapona pia matatsunpiwi. Iruru pon be Joyoinya, bapon pia matatsunpiwi matakapona. Daxita barapo bicheito nantiya naba. <sup>8</sup>Ichitha pon be Joyoinya iru pia matatsunpiwi tatsi jopa cui jupaetsi xua Miguel peamanayabaxubiwatsi yawa xua pia matatsunpiwi tatsithano. Daxota pon be Joyoinya yawa pia matatsunpiwi tatsino jopa cui jupaetsi xua peitabocotha pejinompaewa tsipei amanayabapentatsi. <sup>9</sup>Bapon pon be Joyoinya yawa pia matatsunpiwi tatsino itawetsicatsi po irathe tsique. Bapon pon be Joyoinya pon caena bayatha yabara paebatsi xua jeye: “Bapon apara jomo”, jei. Bapon caurimonaē pia pentacaponaēin tatsi xua icha wun pewun Satanás. Bapon pon jiwi pemuxujainyabeibin pomonaetha pomonaē jinompa daxita po cae pin irathe tsique.

<sup>10</sup>Bapoxonaē itabocotha pejume jume tan pon xua jume daunweya wawai, jeye:  
 “Anoxuae Nacom naca capanepa exana pia  
 peayapusu itorobi coyenewatha xua pon be  
 Joyoinya jopa  
 wanacanamataxeinaenexa.  
 Yawano anoxuae Wanacom itorobiya ewata  
 daxita carepaya nacuantha pomonaē

jinompa po cae pin irathe tsique.  
 Yawano anoxuae Nacom Mesías catatsi  
 pia peayapusu itorobi coyenewa pon  
 Nacom pia peitorobin tatsin.  
 Daxita barapo coyenein anoxuae pata,  
 tsipei pon be Joyoinya itawetsicatsi  
 po cae pin irathe tsique.  
 Pon Nacom itawetsica, bapon  
 wajiwimonaetha,  
 pomonae jume cownta Nacom, abeya  
 muxujainyabeibatsi merawitha yawa  
 mataqueithano xua Nacom peitatha  
 tatsi.  
<sup>11</sup> Wajiwimonaes pomonae iru xua  
 pejume  
 cowntsiwi Nacom, barapomonae  
 amanayaba  
 bapontha pejume cowntsixae xua  
 Mesías tsitupa barapomonae.  
 Bapon pon Cordero, xua pon oveja pebto  
 penun.  
 Yawano amanayaba bapomonae tsipei  
 Mesías  
 yabara paeba dubenanaebiyatsi  
 pocotsiwa  
 bapon barapomonae taexainchi.  
 Barapomonae amanayaba, tsipei najei:  
 ‘Bequein  
 bapon pon be Joyoinya ichichipa naca  
 juteba  
 ichitha jopa junuwichi xua  
 werapaeinchi.  
 Awiya jume cownta  
 dubenanaebiyaeinchi  
 Nacom’, najei.  
<sup>12</sup> ¡Pajuntu coyene weiweinare pomonae  
 itabocotha painya nejinompaexae!  
 ¡Daichitha tsobenae pomonae jinompa  
 po cae pin nacuathe deque, yawano  
 xua xuan pin mar mentha jinompa,  
 tsipei Satanás bara bereca  
 bichocono anaepanaya patopareca!  
 Bapon Satanás yaputane xua jopa  
 bayatha tsaibi tsane poxonae abe  
 exaneibina po cae pin nacuathe deque”,  
 jei.

<sup>13</sup> Poxonae barapon pon be Joyoinya,  
 pon Satanás itawetsicatsi po cae pin  
 irathe tsique, bapoxonae yabũyo  
 barainatsi, powa xua bayatha pexuyo  
 exana pebin wuto. <sup>14</sup> Ichitha Nacom,  
 barapowa pecuarafe catatsi, ainya  
 cuarafebe xua cuiyausi piawan.  
 Daxota Nacom cata xua bapowa  
 taju beya pepupunaenexa ichaxota  
 po ira beya xua Nacom bayatha  
 tsiwunaeta, xua pepupunaenexa pon  
 be Joyoinya weya. Barapowa pupuna  
 barapo ira xuepana susato tsurucuae  
 nacua beya. Nacom apata bapowatha  
 pexaewa tres po weibetha yawa xua  
 seis po xometobetha. <sup>15</sup> Bapon pon  
 be Joyoinya pecoiboto tsina mene  
 sutaba xua peawubonexa xua bapowa  
 pemonoxubinexa tsainchi awubotha.  
<sup>16</sup> Ichitha ira bapowa yaweinchi.  
 Barapo ira, naira yetaxuba yawa mene  
 apaxoreca, po mene bayatha sutaba  
 bapon pon be Joyoinya. <sup>17</sup> Bapoxonae  
 bapon pon be Joyoinya bichocono  
 anaepana bapowatha. Daxota bapon  
 nainya pona bapowa piamonae tatsi  
 beya tatsi xua penabinexa. Bapon  
 ba xua butsi pomonae jume cownta  
 Nacom penajume caitorobi diwesi  
 xuano xua paeba dubenanaebiya Jesús  
 pejume diwesi. <sup>18</sup> Bapoxonae bapon  
 pon be Joyoinya, pon be jomowabi,  
 pin mar mene itapa taetabotha uncu  
 xua pewabinexa ichamonae xua  
 peyawenaenexatsi.

**Meje yabara po diwesi pon ayei, pon  
 be Corei, iruno xua ichun pon  
 ayei, pon be Metsametsawa**

**13** Bapoxonae ichun tan pon pin  
 mar mene juina pon ayei,  
 pon be Corei. Bapon xeina siete po  
 pentasipabe yawa diez po pentetobe.  
 Daxita carepaya pentetontha mataina  
 tepan. Daxita carepaya pentasipantha  
 tinaduba pewunxi, po wunxi xua Nacom

abe yabara paebatsi. <sup>2</sup>Barapon pon be Corei be neuthu xua yaquiquibia. Petaxu be tson taxu. Pecoiboto be neuthu coiboto. Pon petsobian, bapon pon be Joyoinya cata pia peayapusu coyenewa, pon be Corei catatsi. Yawano muxuna catatsi pia pexeinya peeaethopaewa. Yawano catatsi pia peayapusu itorobi coyenewa. <sup>3</sup>Cae matasipatha xua pon be Corei matasipa, wan ducua be poxona xua pocotsin tupaena. Ichitha barapo matasipa naawanxaebi exana. Daxita barapo irathe nacuanpiwi nabenaeca, tsipei naawanxaebi exana barapo matasipa. Daxota po irathe nacuanthepiwi jume cowunta bapon, pon be Corei jume cowuntatsi. <sup>4</sup>Barapon pon be Joyoinya wunae jaintatsi, jiwi wunae jainta, tsipei barapon cata pia peayapusu itorobi coyenewa pontha pon be Corei. Barichi pon be Corei wunae jaintatsi, jiwi wunae jainta. Jiwi jeye: “Maisa barapon, pon be Corei ainya cui, peayapusu itorobi coyenewa pexeinaein. Dapon aibi pon pecui jupaewatsi xua bapon peamanayabixubiwatsi”, jei jiwi.

<sup>5</sup>Yawano barapon, pon be Corei copatatsi xua Nacom abe peyabara paebatsi. Yawano barapon, pon be Corei copatatsi xua jiwitha peitorobinexa cuarenta y dos po xometobetha. <sup>6</sup>Bapoxona xua barapon, pon be Corei bara baxua exana, xua copatatsi. Bapon Nacom abe yabara paebatsi. Matautano Nacom pin pia bo tatsi abe yabara paebatsi. Matautano Nacom piamona tatsi, pomona jinompa itabocotha abe yabara paebatsi. <sup>7</sup>Yawano barapon, pon be Corei copatatsi, xua bena xua beinchi pomona Nacom pejume cowuntsiwichi, beya xua poxona barapomona amanayabapentsinchi. Yawano barapon, pon be Corei catatsi

peitorobi coyenewa, xua daxita jiwi peitorobiwatsi xua pomona daxita carepaya tsicamonaexi peitorobiwatsi. Matautano catatsi xua daxita carepaya tomaranpiwi peitorobiwatsi. Matautano catatsi xua daxita carepaya pomona icha jumeintha pecueicueijeiji peitorobiwatsi. Matautano catatsi xua daxita carepaya nacuanpiwi peitorobiwatsi. <sup>8</sup>Barapon, pon be Corei wunae jaintatsi xua daxita carepaya po cae pin irathe nacuanpiwi wunae jainta. Barapomona xua jopa wun dubenaeyo diborotha, po diboro pon Cordero xena pecobetha, pon Mesias pon naetotha tupa. Barapo diborotha Nacom wun duba pejume cowuntsiwichi caena bayatha poxona Nacom aena forota nacua. Pomona xua wun dubena barapo diborotha jopa weweracaeyo.

<sup>9</sup>Paxam pomona painya nejume cowuntsi jiwi pam. Icha pamuxu dubename, moya pajume naitaeware xua pocotsiwa Nacom pia Pejumope tunaxu tatsi paca tsipaeba xua meje:

<sup>10</sup>“Pomona xua ichun waetabatsi xua atene

peexanaenexatsi barapomona xuya bara teicaeinchi

ichamona atene peexanaenexatsi tsane.

Pon xua cusitha namawainta xua ichun bexubatsi,

bapon xuya cusitha bexubinchi”, paca jei

Nacom pia Pejumope tunaxu tatsi.

Daxota pomona pejume cowuntsiwi Nacom bewa saya juntu coyene daunweya jinompa xua xuya jopa taexanae tsane ichamonaetha xua bequein abe taexanaeinchi ichamona. Yawano bewa jume cowunta dubenanaebiyaena Nacomtha.

<sup>11</sup>Bapoxona tan ichun pon ayei pon be Metsametsawa. Bapon ira wejuina. Yawa mate ducua icha Cordero ichi pon oveja pebto penun. Daichitha pox-

onaе cueicueijeі, be poxonae cueicueijeі pon be Joyoinya. <sup>12</sup>Bapon xeina peayapusu itorobi coyenewa, po peayapusu itorobi coyenewa xeina pon be Corei. Bapon pon be Metsametsawa, daxita jiwi itorobatsi xua wnae pe-jainchinexatsi pon be Corei, pon pia coutha nantasipa awanxaeibi exana. <sup>13</sup>Yawano pon be Metsametsawa exana nawita xua pexeinya petsita itutsi coyenewa. Yawano bapon exana xua itorobica itaboco wetsica xua pocotsiwa be isoto xua po cae pin iratha tsique xua jiwi petaenexa. <sup>14</sup>Barapon pon be Metsametsawa petsita itutsi coyenewa exana pon be Corei peitabaratha tatsi. Barapo petsita itutsi coyenewantha bapon muxujainyaba xua muxujainyabatsi pomonae jinompa daxita carepaya nacuantha xua barapo cae pin nacuathe. Bapon pon be Metsametsawa itoroba jiwitha xua peexanaenexa ibo nacom xua canaxobiya exana pon be Corei, pon xua xeina pentasipatha xua dejona wan, pon bequein wan ducua, ichitha jopa tupaeyo. <sup>15</sup>Barapon pon be Metsametsawa peitorobi coyene catatsi xua asu exana barapo ibo nacom pon be Corei. Poxonae barapo ibo nacom asu tsane, cueicueijeі tsane yawa jutebina daxita pomonae jopa wnae jainchichi. <sup>16</sup>Yawano bapon itoroba ichantha xua daxita cobe juma tinaeinchi po cobein pecoxa weya, yawa xua ichacuiitha itapa tinaeinchi, xua pomonae jopa ainya cuiyiyo, iruru pomonae xua peainya cui jiwi, iru pomonae xua copei pexeinae jiwi, iru pomonae peacopeibi jiwino, yawano pomonae pia coutha penata exanae jiwi, iruno pomonae xua pebusi tatayebeibiwichi. <sup>17</sup>Dapon aibi pon itacupatsi xua piawan comoca yawa xua caenaeta piawan icha jopa xeinaeyo barapo pecobe juma tinaewa. Barapo pecatinaewa pon be Corei pewun tatsi, ichacuiitha barapo pecatinaewa saya

número xua pewun tatsi pia número tatsi.

<sup>18</sup>Beta pananta xeinare xua yabara painya neyaputaenexa baxuan. Pon xua yaputane baxua bu bapon yabara nanta xeina xua pon be Corei pia número tatsi. Barapo número jupa xua pebin pewun. Barapon pon be Corei pia número tatsi baxue: seiscientos sesenta y seis.

**Meje yabara po diwesi xua pomonae naxuna 144, 000 po bicheitomonae matabuxube**

**14** Bapoxonae tan Cordero xua oveja pebto penun xua uncuа demxuwatha, po demxuwa pewun Sión. Barapo Cordero baru uncuа ciento cuarenta y cuatro mil po bicheitomonae matabuxube. Barapo ciento cuarenta y cuatro mil po bicheitomonae matabuxube daxita carepaya itapa tinatsi barapo Cordero pia wun tatsi, yawano xua Paxa tatsi pia wun tatsino. <sup>2</sup>Bapoxonae jume tan pejume itaboco wetsica. Barapo pejume bichocono jume daunwei be poxonae xua ainya pin menein busin xua poxonae tajut wemene othopeica. Yawano be poxonae xua yamuxu nameta, yawa be poxonae ainya busin xua pinmonae tanbaba. <sup>3</sup>Barapomonae pomonae tanbaba pexeinya wei naxuna Nacom pia pexeinya peecaethopaewa itabaratha tatsi, xuano xua barapo cuatro poyobe peitabaratha tatsi xua xuan asu, yawano xua pitiri jiwi pia peitabaratha tatsi. Ichamonae jopa itacupaetsi barapo wei xua peyaputaewa xua po wei naxuna barapomonae. Saya jame barapomonae, pomonae ciento cuarenta y cuatro mil po bicheitomonae matabuxube yaputane barapo wei xua pomonae po irathepiwi jiwanamonae, pomonae bayatha Cordero capanenebiya abe pia peexanaewan weya poxonae tsitupa barapomonae. <sup>4</sup>Barapomonae jopa

nataxobiyo xua penasi cui exanaewa xua yabuxitha pejeinya enaexae. Yawano barapomonaе exaneiba daxita xua pocotsiwan Cordero itoroba xua poxonaе barapomonaе napuna poneiba ichaxota Cordero poneiba. Barapomonaе capanenebiyatsi, Nacom capanenebiya xua daxita carepaya jiji jiwana monaе tatsi xua bapomonaе pecana exanaenexatsi pomonaе bichocono pepa pejuntu coyene xanepanaewi Nacomtha iruno Cordero tha pomonaе xua copiya, pomonaе xua Nacom pejume cowuntsiwichi. <sup>5</sup>Barapomonaе jopa penaerabiwi tsipei barapomonaе bichocono pepa pejuntu coyene xanepanae jiji, Nacom peitabaratha tatsi. Barapomonaе jopa xeinaeyo xua penatsicuentisiwa Nacom peitabaratha tatsi xua abe peexanaexae.

**Meje yabara po diwesi  
xua cuEICUEIJEI acoibi  
poyobe matatsunpiwi**

<sup>6</sup>Bapoxonaе tan ichun matatsunpin xua pupuna itabocotha. Barapo matatsunpin capana pexeinya jume diwesi po diwesi xua ataya tsiteca, po diwesi xua jiji pecapanenebiwatsi abe pia peexanaewan weya. Barapo diwesi daxita carepayan jiji nexa: pomonaе daxita nacuanmonaеpiwi nexa, iruno pomonaе tsicamonaеxipiwi nexa, iruno pomonaе barompaya icha jumein pecueicueiweiwi nexa, iruru daxita tomanpiwi nexano. <sup>7</sup>Barapon jume daunweya paeba, jeye: “Pacunuwiya jinompare Nacom xua beta painya nejume cowuntsiwa. Yawano Nacom wunaе pajainde. Tsipei anoxuae nama barapo matacabi patopa po mataqueitha Nacom yabara paebina jiji xua penatsicuentisiwa xua abe peexanaexae. Wunaе pajainde pon exana itaboco, xuano xua exana pin mar mene,

yawa exana ira buxupana mene”, jei barapon pon jume daunweya paeba.

<sup>8</sup>Ichun matatsunpin cotacaya patopa, bapon jeye: “;Bayatha Babilonia tomara-piwi wetaxotsi po tomara pepa tomara, tsipei barapo tomarapiwi bichocono abe exana! ;Barapomonaе cuiduba ichamonaе xua ichamonaе abe peexanae coyene peexanaexa xua penasi cui exanaewa tsane yabuxitha, xua iru pebiwitha!” jei matatsunpin.

<sup>9</sup>Bapoxonaе ichun matatsunpin patopa, bapon jume daunweya jeye: “Icha ichun wunaе jainta ibo Corei nacomtha xua saya canaxoba yawa icha itapa tinatsi, yawa ichacuitha xua icha cobe juma tinatsi, bapoxonaе Nacom bichocono casebina bapon xua bapon casebinchi. <sup>10</sup>Bapoxonaе Nacom bichocono abe exanaena bapon. Baxua Nacom exanaena xua bayatha bapon peyabara nacui wunaetsixaetsi. Jopa juniya exanae tsane poxoru bichocono Nacom yabara anaepana. Barapon bichocono atene tsane poxonaе Nacom tautsina barapon isototha, yawa xua po tsuxu, tsuxu daena, po tsuxu pewun azufre matawun. Nacom baxua exanaena pia matatsunpiwi peitabaratha tatsi yawa Cordero peitabaratha tatsi. <sup>11</sup>Po isototha Nacom tautsina bapon, barapo iso tsuxu athabe jujuneibiyaena ataya. Barapo petautsiwa jopa itacupae tsainchi xua pewetsiwa mataqueithano, yawa merawithano. Barapo isototha tautinchi pomonaе pon be Corei wunaе jaintatsi xuano xua barapo ibo Corei nacom wunaе jaintatsi, yawano xua barapomonaе itapa tinatsi barapo Corei pia wuntha tatsi”, jei matatsunpin.

<sup>12</sup>Pomonaе exana dubenanaebiya po coyene Nacom itoroba pia peitorobi coyenewantha, yawano xua Jesus beta jume cowunta dubenanaebiyatsi, barapomonaе para xaniwaicha

Nacom piamonae tatsi. Barapomonae tsita itapeinya xeina xua Nacom piamonaetsi tsipei barapomonae bepijawa jopa aitaconaeyo xua peewatsiwa pocotsiwa bexa Nacom exanaena pomonaetha, pomonae abe exana Nacom piamonaetha tatsi.

<sup>13</sup>Bapoxonae jume tan pejume xua peitaboco wenebaraichica. Nejei: “Baxua tinare: ‘Bū bara jūntū coyene weiweina pomonae jume cowantsiya werapaena Jesustha, pon jiwi Pecanamataxeinaein’, jei”, nejei.

Nacom pia Pejumope tūnaxū tatsi jeye: “Aa baxua. Yawa wetsina pia penacuichiwan po penacuichiwan Nacom taexainchi yawa nafifina ewatsina Nacom pia nacuatheicha. Po coyene xua barapomonae jūntū coyene xanepana dubenanaebiya, yawa po coyene xua barapomonae beta taexana dubenanaebiya xua ichamonae taexana dubenanaebiyatsi, barapo jūntū coyene barapomonae yawa ponaena Nacom pia nacua beicha tatsi”, jei Nacom pia Pejumope tūnaxū tatsi.

**Meje yabara po diwesi xua  
matatsunpiwi cusin caucuboba po  
cae pin irathe tsique**

<sup>14</sup>Bapoxonae equeicha tan tsaquinaebowa xua inyapana. Barapo tsaquinaebo jumatha eca ponxae itaboco wetsica pona, ponxae Nacom peitapetsinxae. Bapon mataina tepa, yawa comaeca pocotsiwa be cusi xua xuiyoi. <sup>15</sup>Bapoxonae icha matatsunpin Nacom pin pia bo weya pona. Bapon jume daunweya wawai pon tsaquinaebo jumatha eca beya, jeye: “¡Barapo cusi caucubobare yawa jore pocotsiwa xua naweta tsipei barapo matabi patopa, po mataqueitha naweta po cae pin irathe deque!” jei matatsunpin. <sup>16</sup>Bapoxonae pon tsaquinaebowatha eca yawa xua cusi comaeca, barapo cusi caucuboba po

cae pin irathe, daxita canacui wetsiya exana.

<sup>17</sup>Bapoxonae equeicha ichūn matatsunpin Nacom pin pia bo weya pona xua itaboco weya. Barapo matatsunpin cusi capona, po wato bichocono xuiyoi.

<sup>18</sup>Bapoxonae equeicha icha matatsunpin pocotsiwa be pexaethopaewa weya pona ichaxota duwei tauteiba xua tuxusi exaneiba Nacom nexa. Barapo matatsunpin canamataxeina xua tauta pecana exanaewa. Barapo matatsunpin irū cusi xeina, po wato xuiyoi. Yawa bapon jume daunweya wawai icha matatsunpin beya pon irū pia wato xeina cusi. Bapon jeye: “¡Barapo cusi caucubobare yawa nore uva peparun xua po cae pin irathe deque dubena tsipei bayatha naweta!” jei barapo matatsunpin.

<sup>19</sup>Nexata barapoxonae barapo matatsunpin cusi caucuboba yawa nota uva peparun. Yawa barapo uva peparun bebaireca pin pecacubi fetotha xua pemene yucaenexa barapo uva cuei. Icha jiton ichi xua bichocono daunweya cuba uva cuei, bara jūta ichi Nacom jiwitha, xua poxonae bichocono atene exanaena jiwitha xua abe peexanaexae jiwi. <sup>20</sup>Barapo uva cuei tomara juma beya cuba. Barapo pecacubi fetowetsina jujuina petsobia mera, be pocotsiwa pejana, beya xua cawayu ponxo jayeichatsi yawa xua iratha iya xua tajū beya xua trescientos po kilómetrobe. Icha jiton ichi uva cuei xua tomara juma beya cuba Nacom jiwitha barichi tsane bichocono atene exanaena pomonaetha pomonae abe peexanaewitha, beya poxonae pejanan tajū ayei tsoponae tsane.

**Meje yabara po diwesi xua  
matatsunpiwi capana siete po  
coyenewabe xua po coyenewa  
peabe cui coyenewa**

**15** Bapoxonae equeicha tan peitabocotha icha pin petsita itutsi coye-

newa xua nebenaeca. Tan siete poyobe matatsunpiwi yawa xua cajjinca siete po cui coyenewabe xua po coyenewa peabe coyenewan. Poxonae weta xua exana barapo matatsunpiwi barapo si-ete po peabe cui coyenewabetha bapoxonae Nacom nacui weta xua poxonae anaya bichocono atene exana jiwu abe peexanaexae.

<sup>2</sup>Bapoxonae tan pocotsiwa be pin mene mar, po pin mene mar copiya tan. Barapo pin mene mar icha be bosibu muxupawa ichi xua penthiya. Yawa tan xua muxunaxuba pocotsiwa be isoto xua itadudubiya. Yawa tan pomonae amanayaba xua pon be Corei amanayabatsi. Barapomonae jopa wunae jainchiyo pon be Corei yawa pon be ibo Corei nacom, yawano jopa itapa tinaetsi pon be Corei pewuntha. Barapomonae imoxoyo caquita umena barapo pin mar mene. Yawano barapomonae caumena arpa matawun xua pocotsiwa pecatanbabiwan xua Nacom catsiba. <sup>3</sup>Barapomonae naxuna Moisés pia wei tatsi, pon Nacom pia penacuichiwa tatsi taexainchi. Yawano barapomonae naxuna Cordero pia wei tatsi, barapo naxobe weibe jeye:

“Pata Nacom, pon jiwu Necanamataxeinaein, daxita xam exaname bichocono peainya cui

coyenewa yawano bichocono wunae. Xam pon, daxita neayapusu itorobiya coyenewan xeiname.

Jinya coyenewan bara pexainyeiwan poxoru beta exaname.

Xam itorobiya neewatsin daxita carepaya nacuanpiwi.

<sup>4</sup>Xam pon jiwu Necanamataxeinaein.

Daxita jiwu junuwiya cabaru cui itura jinaena.

Yawano daxita jiwu wunae cajainchina tsipei

saya meisa xam nejuntu coyene xeicaem.

Daxita carepaya nacuanpiwi patsina xua wunae necajainchinexa tsipei barapomonae bayatha tane pocotsiwa xua betiya xanepanaya exaname”, jei barapomonae.

<sup>5</sup>Bapoxonae equeicha tan peitabocotha Nacom pin pia bo. Po boyo tututha uncu barapo Nacom pin pia botha tatsi po boyotha ichaxota Nacom popona, barapo tutu nacoibo saranaxuba.

<sup>6</sup>Barapo tutu weya matatsunpiwi pona pomonae xua siete poyobe yawa capona siete po coyenewabe xua peabe cui coyenewan. Yawano nama xataba paparuwan, po paparuwan bichocono inyapana yawano daedaena. Yawa naepa paba pocotsiwan be coreinya bocoton xua beya juntacari jayabeinatsi. <sup>7</sup>Bapoxonae tan caein, xua jiwana barapo cuatro poyobe xua xuan asu. Bapon barapo siete poyobe matatsunpiwi catsibatsi coroton xua wunba po coyenewan peabe cui coyenewan pocotsiwan Nacom exanaena, pon ataya popona. <sup>8</sup>Bapoxonae barapo tututha, bichocono petsuxu wunca. Barapo tsuxu Nacom pia xainya weya tatsi tapichapatsi pon peainya cuin yawa xua peayapusu itorobi coyenewa pexeinaein. Dapon aibi pon pecopatsiwatsi xua pejoniyawa barapo tututha poxonae cataunxuae jopa wetsiyo barapo siete po coyenewabe po coyenewan peabe cui coyenewan xua matatsunpiwi capona.

**Meje yabara po diwesi xua barapo corototha xeina siete po coyenewabe po coyenewa xua peabe cui coyenewan**

**16** Bapoxonae jume tan xua jume daunweya wawai barapo tutu weya, xua wawai barapo siete poyobe matatsunpiwi beya, jeye: “Paponare po cae pin irathe deque, yawa barapo si-



ete po coyenewabe po coyenewan xua peabe cui coyenewan xua xeina barapo coroton juntututha baxua paepababare bara bereca. Po coyenewan xua corotontha tsijuntutha xeina baraxuan po coyenein xua Nacom bichocono atene exanaena jiwi penatsicuentisixae xua abe peexanaexae Nacomtha”, jei.

<sup>2</sup>Matatsunpin pon xua ichaxota ba “uno”, jei, bapon copiya piawa epataba. Bapoxonae pomonae itapa tinatsi xua pon be Corei pewun tatsi, xuano xua wunae jainta ibo Corei nacom, bapomonae barapoxonae nainya xeina xua peaperubewan xua bichocono aperutane.

<sup>3</sup>Bapoxonae equeicha icha matatsunpin pon ichaxota ba jei “dos”, jei, bapon piawa epataba pin mar mentha. Bapoxonae barapo pin mar mene bichocono mene janowanaya be poxonae xua petupaein boca. Barapo pin mar mentha daxita werapa xua xuan baxota jinompa.

<sup>4</sup>Bapoxonae equeicha ichun matatsunpin pon xua ichaxota ba jei: “tres”, jei, bapon piawa epataba meneintha yawa ira buxupana meneintha, bapoxonae barapo menein be pejanan tsanaya.

<sup>5</sup>Bapoxonae jume tan barapo matatsunpin xua yapucauncua barapo menein. Bapon jeye:

“Nacom maisa xaniwaicha betiya yabara paebame poxonae atene exaname jiwi xua

penatsicuentisixae xua barapomonae bichocono abe peexanaewi.

Bapana jopa abe exanaem.

Xam nejuntũ coyene xeicaem,

yawa xua pon anoxuae nepoponaem,

yawa xua pon caena bayatha nepoponaemno.

<sup>6</sup>Tsipei barapomonae jinyamonae jutebatsi,

yawano tsipei jutebatsi pomonae

neitorobi jume pepaebiwi.

Daxota barapomonae xuya werapa exaname,

peyantomatsiwa exaname abe peexanaexae copiya”,

jei barapo matatsunpin Nacomtha.

<sup>7</sup>Equeicha ichun jume tan pon cueicueijeji pon uncua ichaxota pocotsiwa be pexaethopaewa xua ichaxota tauteiba duwei xua tuxusi exaneiba Nacom nexa, bara weya jeye: “Xam, Nacom pon jiwi Necanamataxeinaem daxita peayapusũ itorobi coyenewan nexainaem. Tsipei xam yabara paebame xua jiwi penatsicuentisiwa xua abe peexanaexae daxota bewa atene tsane. Pocotsiwa xua exaname bara xaniwaicha betiya exaname, tsipei bapana jopa abe exanaem”, jei pon xua paeba.

<sup>8</sup>Bapoxonae equeicha icha matatsunpin pon ichaxota ba jei “cuatro”, jei, bapon piawa epataraba xometotha. Barapo matatsunpin xometo catatsi po coyene xua xometo exanaena xua jiwi petautsinexatsi xua xota bichocono atsa.

<sup>9</sup>Bichocono daxita carepaya jiwi taxuatsi. Ichitha barapomonae icha juntũ coyene jopa xeinaeyo matautano Nacom jopa wunae jainchichi, yawa barapomonae Nacom abe yabara paebatsi yaitama Nacom xeina peayapusũwa xua itoroba barapo coyenewan po coyenewan xua peabe cui coyenewa.

<sup>10</sup>Bapoxonae equeicha icha matatsunpin pon ichaxota ba jei: “cinco”, jei, bapon piawa epataraba pon be Corei pia peecaethopaewatha tatsi. Yawano barapon pon be Corei po coyene xua itoroba piamonae jopa xapain piamonae matabaponaeyo be pon xua pona poxonae quireitha. Daxota piamonae tatsi juntũ coyene deideijeji. Barapomonae peparaxaewa nawano sine.

<sup>11</sup>Jopa juniya exanaponaeyo barapo coyenewan po coyenewan xua peabe cui coyenewan, yawano cataunxuae barapomonae exanapona xua Nacom abe

yabara paebatsi po Nacom itabocotha eca. Daxota barapomonae Nacom abe yabara paebatsi yaitama Nacom barapo peatene cui coyenewa itoroba yawano xua itoroba peaperutanewan.

<sup>12</sup>Bapoxonae equeicha icha matatsunpin pon ichaxota ba jei “seis”, jei, bapon piawa epataraba po pin mene mentha pewun Eufrates. Barapo Eufrates mene namto naexaniya xua pepatsinexa pomonae pocotsiwa werenepiwi pomonae jivi itorobiya pia pepa peewatsiwichi.

<sup>13</sup>Nexata bapoxonae tan xua pon be jomowabi, pon Joyoinya. Iru tan pon ayei, pon be Corei. Iru tan pon xua naerabiya jeye: “Xan Nacom peitorobi jume tapaebin”, pon jei. Daxita barapomonae barompaya pia coiboton tsina tajujinatsi acoibi poyobe cauri xua xuan be pocotsiwan cuei. <sup>14</sup>Barapo caurimonae exana pexeinya petsita itutsi coyenewan. Barapo caurimonae ponarucupa xua penacaetuta exanaenexa daxita pomonae jivi itorobiya pia pepa peewatsiwichi. Baxua exana xua naba peexanaenexa po mataqueitha Nacom nabenabe pon jomowabi pon Joyoinya. Barapon Nacom daxita peayapusu itorobi coyenewan pexeinaein.

<sup>15</sup>Nacom jeye: “Taema, jemeicha patopaein icha be pon pecaibin ichi poxonae jemeicha patopa. Juntu coyene weiweina pon xua yoyoca tsipei nama xatata paparuwa xua jopa petamsa ponaenexa jivi itutha xua bapon petaewatsi daxita pia pepon”, jei Nacom.

<sup>16</sup>Daxita pomonae jivi itorobiya pia pepa pecanamataxeinaewichi, barapomonae nacaetuta ichaxota po iratha pewun Armagedón xua hebreo jumetha. Barapo iratha nacaetuta xua naba peexanaenexa xua po mataqueitha

Nacom nabenabe pon be jomowabi, pon Joyoinya.

<sup>17</sup>Bapoxonae equeicha ichun matatsunpin pon ichaxota ba jei “siete”, jei, bapon piawa epataba barapo irathe matatsun susatotha. Bapoxonae itabocotha xua tutu wetsica ichaxota Nacom pia pexeinya peecaethopaewatha baxota jume tan pon xua jume daunweya cueicueijeiya jeye: “Bara bayatha nacui xainwaetaba”, jei pon xua paeba.

<sup>18</sup>Bapoxonae bichocono jerajerei itabocotha, yawa pejumein, yawa bichocono jurujurei. Matautano bichocono ira jijiyata beyacaincha xua poxonae ira jijiyateiba poxonae copiya jivi aena naexana po cae pin nacuathe xua beya anoxuae. <sup>19</sup>Po tomara, pepa tomara barapo tomara ainya wanbe exanabe poxonae baxua ira jijiyata. Icha iranthe barichi baxota tomaran abe exana. Nacom yabara nanta xeina Babilonia tomara tsipei barapo tomariwi abe peexanaewi. Daxota Nacom barapo pepa tomara abe exana poxoru bichocono anaepana barapomonae aetha. <sup>20</sup>Daxita petunaeton yawano daxita demxuwan aichurubenae xua ira pejijiyatsixae. <sup>21</sup>Barichino itaboco weothopeica xua jivi matatsun othopeicatsi pocotsiwan dederawa xua xuan benata ichaxota po eman bichocono aque. Barapo pedederawiwun bichocono arewe. Bapoxonae barapo jivi Nacom bichocono abe yabara paebatsi yaitama Nacom itoroba barapo pedederawiwun pocotsiwa bichocono abe barapomonae nexa.

**Meje yabara po diwesi xua Nacom itaweta powa xua bichocono penasi cui matacaetsiwa xua weiweina pia paratixichi powa xua yabara caunutatsi Babilonia tomara**

**17** Nexata bapoxonae taxantha patopa caein matatsunpin

jiwana, po matatsunpiwi siete poyobe yawa xua siete xoyobe matauta capona coroton. Bapon nejei: “Anetha catsita itutinchí xua yabũyo powa bichocono penasi cui matacaetsiwa xua weiweina. Barapowa eca ichaxota pin mar mene, powaxae xua yabara caunutatsi Babilonia tomara. <sup>2</sup>Pomonae jiwi itorobiya pia pepa peewatsinchi barapo cae pin nacuathe barapomonae yawa muxuna abe nanabaru exana bapowa. Matautano daxita carepaya pomonae po cae pin irathe jinompa barapo coyene exana bara jũpa, icha barapomonae ichi. Barapowa cana exana xua barapo jiwi abe exana, tsipei barapo jiwi ichichipa po penasi cui matacaetsiwa bapowa exana”, nejei matatsunpin.

<sup>3</sup>Poxonae cataunxuae Nacom pia Pejumo pe tũnaxu tatsi netsita ituta baxua, bapoxonae matatsunpin necapana ira xuepana susato tsurucuae nacua beya. Baxotiya petsiriwa tan xua eca pon ayei pon be Corei bapon pejumatha, xua pon tsobia. Bapon daxita carepaya pepontha tinaduba po jumein xua Nacom abe yabara paebatsi. Yawano bapon siete po matasipabe xeina yawa diez po pentetobe xeina. <sup>4</sup>Bapowa nama xatata paparuwa, po paparuwa mũ sujei yawa mũ tsobia. Bapowa yawa napepena xua pocotsiwan pewũn oro nain, yawano be ibotixi xua pocotsiwan ainya matoman, yawano po warowa xu inyapana xua po warowa xu pewũn perla. Barapowa pecobetha xeina coroto penain coroto xua oro nain yawa wũnta pocotsiwan xua be mara, yawa barapowa pia penasi cui matacaetsi coyene xua weiweina. <sup>5</sup>Powa xua yabara caunutatsi Babilonia tomara, barapowa peitapatha tinaduta pewũn, po wũn jiwi jopa yabara yaputaeyo. Barapo wũn jeye: “Powa xua yabara caunutatsi pepa Babilonia tomara, bapowa be coxiwa nat-sicotane, xua powaxi nasi cui matacaeta

xua weiweina barapowaxi pena tatsi. Matauta bapowa daxita pomonae xua bichocono abe peexanaewi barapomonae pena tatsi”, jei xua tinaduta. <sup>6</sup>Pirapaeyo jume tan xua barapo Babilonia tomara-piwi yabara jeichi: “Icha pebin ichi xua peatsaxae mera bichocono cũpatsi, barapo Babilonia tomarapiwi barapocotsi coyeneya jũta ichiya exana. Baxua exana, tsipei barapo Babilonia tomarapiwi juteba pinmonae pomonae Nacom pijimonae tatsi, irũ pomonae Jesús pejume diwesi pepaebiwi”, yabara jeichi barapo Babilonia tomarapiwi.

Poxonae tan xua barapo tomarapiwi be cũpatsi bichocono, yabara nabenaecan bapoxonae. <sup>7</sup>Bapoxonae matatsunpin nejei: “¿Eta xua metha nabenaecame? Yabara cayaputane exanaeinchi bapowa xua pocotsiwa jopa yaputaem. Yawano yabara cayaputane exanaeinchi barapon pon be Corei, pontha xua bapowa eca peumatha. Bapon siete po pentasipabe xeina xuano xua diez po pentetobe xeina. <sup>8</sup>Barapon pon be Corei pon taneme caena bayatha popona barapo cae pin nacuathe. Anoxuae jopa poponaeyo. Ichitha bexa tsane juinaena po mũthũ bichocono pin mũthũ tsina. Bapoxonae nama yatsicaewa weweracaena. Bapoxonae jinompaena jiwi barapo cae pin irathe. Barapomonae jopa wũn dubenaeyo Nacom pia diborotha tatsi, po diborotha xua jei: ‘Pomonae wũn dubena barapo diborotha jopa weweracae tsane’, jei. Barapo jiwi caena bayatha jopa wũn tinaetsi barapo diborotha. Barapo jiwi poxonae taena barapon xua taeinchi pon be Corei bichocono najũntũ coyene cabenaecaena. Daxota najũntũ coyene cabenaecaena tsipei caena bayatha popona, xua anoxuae ajibi ichitha equeicha bexa patopaena xua peponaewa tsane barapo cae pin irathe”, nejei matatsunpin.

<sup>9</sup>Equeicha matatsunpin nejei: “Meje tha xua paebichi xua ichamonae itacupatsi peyabara yaputaewa baxua: Barapo siete po pentasipabe xua pon be Corei, barapo siete matasipabe demxuwan yabara caunuta xua po matasipantha ichaxota barapowa peumatha eca, powa xua Babilonia tomara yabara caunutatsi. Barichi barapo siete po pentasipabe xua pon be Corei, yabara caunutatsi pomonae jiwi itorobiya pia pepa peewatsiwichi.

<sup>10</sup>Cinco poyobe barapomonae pomonae jiwi itorobiya pia pepa peewatsiwichi bayatha naitapataya werapoinca. Caein anoxuae barapo siete poyobe jiwana matacapona po cae pin irathepiwi, ichun bexa tsane patopaena xua matacaponaena barapo cae pin irathepiwi. Ichitha poxonae bapon patopaena jopa ainya dapaen matacapoponae tsane po cae pin irathepiwi. <sup>11</sup>Bapon pon be Corei pon caena bayatha popona xua anoxuae jopa poponaeyo, bapon ichaxota ba jei: ‘ocho’, jei, bapon pon jiwi itorobiya pia pepa peewatsinchi naexanaena po cae pin irathepiwi nexa, bequein bapon caena bayatha tupa xua barapo siete poyobe jiwana. Bapoxonae nama equeicha weweracaena poxonae tupaena”, nejei matatsunpin.

<sup>12</sup>Equeicha matatsunpin nejei: “Barapo diez po pentetobe xua taneme xua po penteton yabara caunutatsi pomonae jiwi itorobiya pia pepa peewatsiwichi, barapomonae cataunxuae jopa patsiyo xua itorobiya peewatsinexatsi po cae pin irathepiwi. Ichitha po peitorobi coyenewa barapomonae catsibinchi xua saya bara caeto itorobiya ewatsinchi po cae pin irathepiwi xua iru barapon pon be Corei itorobiya ewatsina. <sup>13</sup>Barapo diez poyobe pomonae piamonae itorobiya pepa peewatsiwi peburaya nanta

xeinarucupa. Matautano barapo diez poyobe pomonae piamonae itorobiya pepa peewatsiwi pia peayapusya exanaewan pon be Corei catatsi, yawano peayapusu itorobi coyenewa catatsi. <sup>14</sup>Daxita barapomonae pomonae diez poyobe, pomonae piamonae itorobiya pepa peewatsiwi iru pon be Corei, Cordero butsi. Ichitha barapo Cordero amanayabina daxita barapomonaetha. Tsipei barapon pon jiwi pia pepa Pecanamataxeinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pecanamataxeinaewichi. Matautano bapon pon Corderoxae jiwi itorobiya pia pepa Peewatsinchi tatsi pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Pomonae Cordero nabaru yawenatsi xua poxonae amanayaba barapomonaetha, Nacom waba barapomonae poxoru Nacom pia peitapetsiwichi tatsi, matautano tsipei exana pocotsiwa Nacom itoroba”, nejei matatsunpin.

<sup>15</sup>Equeicha barapo matatsunpin nejei: “Xua xam po menein taneme mar menein xua ichaxota yabayo eca pon be Corei peumatha, barapo mar menein yabara caunutatsi be tomaramonaepiwi, xua yabara caunutatsi tsicamonaexipiwi, yawano yabara caunutatsi pomonae icha jumeintha pecueicueijejiwi, yawano yabara caunutatsi daxita nacuanpiwi. <sup>16</sup>Bayatha taneme barapon pon be Corei diez po pentetobe, po penteton yabara caunutatsi diez poyobe pomonae jiwi itorobiya pia pepa peewatsiwichi. Barapomonae pomonae jiwi itorobiya pia pepa peewatsiwichi barapowa bichocono casebinchi powa pesi cui weiweinaewa. Yawano wecobe pitinchi

xua bapowa pia peitorobi coyenewa tatsi yawano jumasa xubinchi. Yawano barapomonaē wi xaena, xua bapowa wi xaeinchi. Bapoxonaē bapowa pia pepon tautinchi isototha. <sup>17</sup>Nacom itoroba xua barapomonaē pia pejuntu coyenetha peexanaewa tsane xua pocotsiwan Nacom ichichipa. Daxota barapomonaē pomonaē jiji itorobiya pia pepa peewatsiwichi pomonaē diez poyobe, peburuŋya nanta xeinaruŋpa xua barapomonaē pia peayapusu itorobi coyenewanxae tatsi pon be Corei catsinchi. Baxuan catsina beya abu poxonaē wetsina pocotsiwa Nacom bayatha paeba. <sup>18</sup>Petsiriwa powa taneme xua powa nasi cui matacaeta xua weiweina, bapowa cayabara caunutatsi: ‘Po tomara pepa tomara’, jei. Pon itorobiya pepa peewatsin xua barapo pepa tomaratha, bapon itoroba daxita ichamonaē pomonaē jiji itorobiya pia pepa peewatsiwichi pomonaē barapo cae pin nacuathepiwi itorobiya ewatatsi”, nejei matatsunpin.

**Meje yabara po diwesi xua  
daxita omeicha cayabara  
wetapentatsi Babilonia tomarapiwi  
xua muxuna tomarano**

**18** Bapoxonaē equeicha tan ichun matatsunpin xua pon peitaboco wetsica pona po cae pin irathe tsique. Barapo matatsunpin xeina ainya peayapusu itorobi coyenewan. Bapoxonaē bapon exana xua ira bichocono pentha tsurucuae xua pia pepon weya cueicha pona. <sup>2</sup>Yawano bapon jume daunweya wawai, jeye:

“iBayatha Babilonia tomarapiwi wetapentatsi yawa tomara abe exanatsi, po tomara pepa tomara!  
iYawano anoxuae caurimonaē baxota jinompa!

<sup>3</sup>Tsipei daxita carepaya nacuanthapiwi bichocono abe exana, po abe peexanaē

coyenewa pocotsiwa xua barapo Babilonia tomarapiwi exana.

Yawano pomonaē jiji itorobiya pia pepa peewatsiwichi barapomonaē cuiduba piamonaē

xua abe peexanaewa tsane icha barapo Babilonia tomarapiwi ichi xua abe exana.

Yawano pomonaē pecaenaetsiwi pi-awan, bapomonaē

xuya copei pexeinaewi naexana, tsipei barapo

tomarapiwi copei ayei ichichipa xua beta

pejinompaewa tsane”, jei matatsunpin.

<sup>4</sup>Bapoxonaē equeicha ichawa jume tan xua wawai itabocotha, jeye:

“Pomonaē tamonaepiwi pam, barapo tomara weya

paponaruŋpare, xua jopa abe painya neexanaenexaru icha barapo tomarapiwi

ichi xua bichocono abe peexanaewi.

Bapoxonaē Nacom jopa paca atene exanaē tsane

icha bayatha ichichi xua atene exainchi barapo Babilonia tomarapiwi.

<sup>5</sup>Tsipei barapo abe peexanaē coyenewan xua barapo tomarapiwi exana bichocono ayei xua daxota Nacom pon itabocotha peecaein tane baxuan.

Daxota Nacom yabara nanta xeina xua atene exana barapomonaetha.

<sup>6</sup>Barabu ichamonaē jupa exanaena barapomonaetha, icha be pocotsi coyeneya

xua bapomonaē abe taexana ichamonaetha.

Barabu barapomonaē pentoma catsibinchi

xua po pentoma equeicha mataropataba xua peatenewa.

Barabu barapomonaē bichocono atene tsane,

icha be pocotsi coyeneya xua poxonaē

barapomonaē atene taexana  
ichamonaetha.

<sup>7</sup>Pocotsiwa xua bapomonaē exana xua  
atsaca

naexana xua penasi cui matacaetsi jivi  
naexana,

barabū barapomonaē bichocono atene  
tsane,

yawa wecoyei tsane.

Tsipei bapomonaē pia coutha natsi-  
paeba, jeye:

‘Waxainchi xote enatsi.

Waxainchi jopa dapomonaetsi pomon-  
aetsi pomonaē

waseuri jivi wanaca cuenta werapaewi.

Matautano waxainchi pomonaē jivi  
itorobiya pia pepa peewatsi jiwichi, jopa  
bichocono atene tsainchi’, jei  
bapomonaē.

<sup>8</sup>Daxota saya caentaqueitha tsane  
jopaena po

coyene xua abe peexanaewa tsainchi  
bapomonaē,

xua bichocono peperaxa jubwi tsainchi,  
matautano xua pejainpaewa tsane  
bichocono,

yawano xua petautsiwa tsainchi xua  
werapaena.

Tsipei Nacom pon pepa Pecanamatax-  
einaein jivi

peayapusū itorobi coyenewa xeina,  
yawano

bapon pia coutha yabara paebina po  
coyene xua

tsitatsi xua bapomonaē natsiaenaē  
cuenta

abe peexanaexae”, jei matatsunpin.

<sup>9</sup>Pomonaē jivi itorobiya pia pepa  
peewatsiwichi xua po cae pin irathe,  
pomonaē xua bayatha irurū abe exana  
poxonaē barapo Babilonia tomarapiwi  
abe exana, barapomonaē bichocono we-  
coyei tsane poxonaē xua taena iso  
tsuxū xua poxonaē barapo Babilonia  
tomarapiwi tautsinchi. <sup>10</sup>Barapomonaē  
tajū wetaeumeinyaena poxoru cunuwa

xua pocotsiwa Nacom cana exanaena  
barapo Babilonia tomarapiwi. Bara-  
pomonaē pomonaē jivi itorobiya pia  
pepa peewatsiwichi najei tsane:

“¡Pai jaibo Babilonia tomarapiwi pam  
tsobenaē!

¡Babilonia tomara tsocuaem!

Bequein pepa tomara tsocuaem, ichitha  
saya

bara cae horatha barapo tomaram  
omeicha

Nacom cawetaxubina”, najei tsane  
barapomonaē.

<sup>11</sup>Daxita pomonaē caenaeta piawan  
barapomonaē bichocono wecoyei  
tsane xua barapo Babilonia tomara  
siwa wecoyeichi tsainchi tsipei  
barapomonaē jopa xeinaē tsane xua  
comocaeinchi xua pia pecaenaetsiwan.

<sup>12-13</sup>Barapomonaē xua pocotsiwan  
caenaeta dubenanaebiya baxue:  
xua pocotsiwan pewun oro nain  
matawun, yawano xua pocotsiwan  
penainwan xua plata nain matawun,  
yawano xua ira buxupana iboton xua  
bichocono ainya matoman, yawano xua  
pocotsiwan be warowaxu pocotsiwan  
perla matawun, yawano papaburu  
pocotsiwan bichocono ainya matoman  
pocotsiwan seda matawun, yawano po  
paparuwan mu sūjei, yawa xua xuan  
mu tsobia; yawano napaewan, po naein  
xua bichocono tuxuei; yawano xua  
ichawan weya forobano xua pocotsiwan  
marfil matawun, yawano xua ichawan  
weya forobano xua naewan xua po  
naewan bichocono ainya matoman,  
yawano xua ichawan weya forobano  
xua pocotsiwa bronze nain matawun,  
yawano xua ichawan weya foroba xua  
penainton, po penainton hierro nain  
matawun, yawano xua ichawan weya  
foroba xua iboton, po iboton mármol  
ibo matawun; yawano capana po  
petuxueiwan canela tseboco matawun,  
yawano ichawanno capana xua ichawan

xua petuxueiwan; yawano capana icha petuxueiwan xua incienso xua po tuxusi tuxueiwa benata poxonae taxua exana, yawano icha petuxueiwa pocotsiwan be mauto xua jiwi tauta petuxusi tuxuei exanaenexa, yawano icha petuxueiwanno; yawano vino meran, yawano penasiwan, yawano pebenon xua trigo xu benon, yawano pepa xu xua trigo xu; yawano jota duweimonaein, ovejamonaein, cawayumonaein, yawa caronaemonaein, xua cawayu pecaponae naexi, yawano jiwino capoinchi pecaenaetsinexatsi xua pomonae jiwi pebusi cui tatayebeibiwichi peexanaenexa tsainchi. <sup>14</sup>Barapomonae jei tsane xua barapo Babilonia tomarapiwi yabara jei tsainchi:

“¡Anoxuae jopa paxeinaem pethei, po pethei

ainya matoman po pethei paichichipame bichocono!

¡Anoxuae nama pacata aichurubena xua

copei xeina painya nenaexanaewam xua bara ataya tsane!” jei tsane.

<sup>15</sup>Pomonae xua caenaeta dubenanae-biya pocotsiwan xua ainya matoman yawa xua cobe caewita paratixi xua barapo tomarapiwi cobe caewitatsi, barapomonae tajũ wenewatumendena xua abe peexanaeyainwatsi xua Nacom exanaena. Barapomonae bichocono wecoyei tsane. <sup>16</sup>Barapomonae jei tsane:

“¡Pai jaibo pepa Babilonia tomara tsobenae!

Xam Babilonia tomaram bichocono pexeinya

tomaram, icha yabũyo ichi xua pexeinyawayo

poxonae paparuwa nama xatata po paparuwa

bichocono sũjei yawa bichocono tsobia.

Yawano bapowa napepena xua pocotsiwa pewũn

oro nain yawa xua be ibotixi xua pocotsiwan

ainya matoman yawano po warowa xu xua

inyapana xua pewũn perla.

<sup>17</sup>¡Saya bara cae horatha daxita aichurubena

xua xuan barapo tomara xeina!”

jei tsane barapomonae.

Pomonae jera pecanamataxeinaewi, yawano pomonae xua napona xua warapa icha tomaratha nexa, irũ pomonae petanacuichiwi barapo jera naeintha, irũno pomonae nacuita jeratha, daxita barapomonae tajũ wenecotumendena. <sup>18</sup>Poxonae

barapomonae tane xua iso tsũxu xua barapo Babilonia tomara tautatsi, barapomonae jume daunweya wawai, jeye: “Icha pepa tomara aibi po tomara wũnae pocotsi tomara icha Babilonia tomara ichi”, jei. <sup>19</sup>Barapomonae pia cui xeina xua tsorobotha nantatsaeba poxoru bichocono wecoyei. Wawaya jeye:

“¡Pai pepa Babilonia tomara tsocuae!

¡Anoxuae jopa peraichiwa xua pocotsiwan bayatha

jera wũnbatsi xua copei xeina naexainchi

xua poxonae naca comoca barapo tomarapiwi!

¡Daxita baxuan caayawachurucuae exainchi tomara!” jei barapomonae.

<sup>20</sup>Ichitha paxam pomonae itabocotha painya nejinompaewi pam irũ pomonae tamona xua, irũ pomonae Jesús pia peitorobiwi tatsi pam, irũ pomonae Nacom

peitorobi jume pepaebiwi pam.

Daxita barapomonae pam, pajũntũ coyene

weiweinare xua pacata peaichurucuaexae

barapo Babilonia tomara.  
Nacom xuya abe exana barapo Babilonia tomara tsipei bayatha barapo tomarapiwi  
pacata abe exana.

<sup>21</sup> Bapoxonae matatsunpin pon bichocono pia peayapusu itorobiwa xeina, bapon pita iboto, po iboto bichocono pin iboto xua be pocotsi ibototha jiwi cuba trigo xu. Bapoxonae barapo matatsunpin xuba barapo iboto pin mar mentha. Bapon jeye:

“Icha barapo iboto ichin xua xuban barapo pin mar mentha, Nacom barichi wetaxuba barapo Babilonia tomara xua equeicha jiwi jopa petaewa tsane.

<sup>22</sup> Yawano bapana equeicha jiwi jopa jume tae tsane xua petanbabiwan busin xuan pewun arpa matawun, yawano xuan po peobiwa jumein pewun flauta matawun, yawano icha peobiwan jumein xuan pewun trompeta matawun.

Matautano jopa tae tsane pomonae xua barompaya piawan penata exanae jiwi. Matautano jopa busi tae tsane barapo pin tomaratha xua busi xu yacatoyeraba trigo xu xua pin ibototha.

<sup>23</sup> Matautano jopa yonoyonei tsane pecoichan.

Matautano jopa jume tae tsane xua pin penabanaewa exana xua poxonae pebin pecotsiwa pita.

Pomonae pecaenaetsiwi barapo pin tomaratha

bichocono copei pexeinaewi xua daxota daxita nacuanpiwi yabara cui yaputane xua barapomonae peainya cui jiwi.

Barapomonae pomonae Babilonia tomarapiwi

itacupatsi xua daxita nacuanpiwi muxuitorobatsi mara peexanaewi pia coyeneyatha xua daxota iru abe

peexanaenexa tsane, icha barapo Babilonia tomarapiwi ichi xua abe exana”, jei matatsunpin.

<sup>24</sup> Nacom weraweraca exanaena barapo tomara. Barapo tomarapiwi Nacom tsitatsi xua barapomonae penatsicuentisiwa xeina xua ichamonae pejutebixaetsi, pomonae Nacom pia peitorobi jume pepaebiwi, iru pomonae Nacom pejume cowuntsiwichi tatsi yawano daxita pomonae bayatha jutebatsi po cae pin nacuanthepiwi xua ichamonae juteba icha tomarantha.

**19** Bapoxonae peitabocotha jume tan xua juinya pinmonae jeye: “¡Barabũ Nacom wunae jainatsi, Nacom naca capanepa abe waexanae coyenewan weya!

¡Maisa Nacom pexeinya juntu coyene pexeinaein!

¡Maisa Nacom bepa juniya xeinae peayapusu itorobi coyenewa!

<sup>2</sup> Nacom wunae jaintatsi tsipei bapon Wanacom.

Poxonae yabara paeba jiwi xua penatsicuentisiwa xua abe peexanaexae, bara beta xaniwaicha exana.

Yawano bapon bichocono atene exana barapowa powa xua penatsicuentisiwa xeina xua abe peexanaexae.

Bapowa penasi cui matacaetsiwa xua weiweina pebiwitha pia paratixichi.

Barapowa yabara caunutatsi Babilonia tomara

po tomaramonae xua penatsicuentisiwa xeina xua

abe peexanaexae icha bapowa ichi.

Bapowa bayatha cuiduba barapo cae pin nacuapiwi xua iru abe exana icha xua barapowa ichi.

Tsipei bapowa Nacom pijimonae tatsi jutebatsi daxota xuya Nacom pijimonae yantomata xua poxonae bapowa bexotsi powa



peyabara caunutsixaetsi Babilonia tomarapiwi”, jei xua juinya pinmonae.

<sup>3</sup>Barapo pin ayei jiwi jeye:

“¡Barabũ Nacom wũnae jaintatsi!

¡Iso tsuxũ xua bapomonae tautatsi barabũ

bapana jopa athabe jujuinae tsane xua pepu

ataya tsane!” jei barapomonae xua juinya pinmonae.

<sup>4</sup>Bapoxonae veinticuatro poyobe pomonae pitiri jiwi, irurũ cuatro poyobe xua xuan asũ daxita barapomonae

irabe taeumenareca xua Nacom wũnae pejainchinexa tsainchi, jeye:

“¡Je bara ichi tsane! ¡Barabũ Nacom wũnae jaintatsi!” jei daxita barapo

matabũxũmonaebe. <sup>5</sup>Bapoxonae Nacom pia pexeinya peecaethopeibiwatha, jume tan pejume, xua jeye:

“¡Daxita pam, pomonae Nacom pata exaname,

Nacom pon pata Nacom, wũnae pajainde!

¡Irurũ pomonae paexaname pocotsiwa Nacom

paca itoroba, Nacom wũnae pajainde!

¡Irurũ pomonae peacopeibi jiwi irurũ

pomonae copei pexeinae jiwi, daxita

paxam Nacom wũnae pajainde!”

jei pejume xua paeba.

**Meje yabara po diwesi xua poxonae jiwi tsinacaetuta pexaewa penabanaenexa poxonae Cristo, pon Cordero, pecotsiwa nacueyaba**

<sup>6</sup>Yawano jume tan peitabocotha xua pejumein be pin bicheitomonae be poxonae xua ainya pin mar menein busin, yawano be xua xuan yamũxũ jurujurei. Barapo jumein jeye:

“¡Barabũ Nacom wũnae jaintatsi

pon jiwi Pecanamataxeinaein!

Bapon nama anoxuae tamropata pitaba

xua daxita carepaya nacuanthapiwi

itorobiya ewatsinchi.

Bapon xeina daxita coyenewan xua pia peayapusũ itorobi coyenewan.

<sup>7</sup>¡Juntũ coyene weiweinatsi yawano

jacobatsi, jeichichi: ‘Maisa pexeinya

juntũ coyene pexeinaein’, jeichichi!

Baxua bewa exanaetsi tsipei patopa maticabi

poxonae po maticabitha jiwi tsinacaetuta

pexaewa penabanaenexa poxonae pon

Cordero, piowa nacueyaba.

Barapon pon Cordero, pecotsiwa tatsi nacui

xainwaeta, poxonae po maticabitha jiwi pin penabanaewa tsinacaetuta xua

penabanaewa tsane.

<sup>8</sup>Barapowa copatatsi xua penama xatatsinexa

paparuwa, po paparuwa bichocono

pexeinya paparuwa.

Barapo paparuwa bichocono inyapana yawa

xua bichocono mũ daedaena.

Barapo pexeinya paparuwa caunuta xua po

coyenein Nacom pia peantobewichi tatsi exana

xua po coyenein Nacom tsita xanepanatsi.

Barapo yabũyo yabara caunutatsi Nacom

pijimonae tatsi, pomonae Nacom pejume

cowantsixaetsi”, jei barapo pin bicheitomonae.

<sup>9</sup>Bapoxonae matatsunpin nejjei:

“Tinare xuaje: ‘Bichocono juntũ coyene weiweina pomonae Nacom waba

poxonae pin penabanaewa tsinacaetuta xua penabanaewa tsane poxonae pon

Cordero, nacueyaba pecotsiwa’, jande poxonae xua tiname”, nejjei barapo

matatsunpin. Equeicha nejjei: “Daxita po jumein xua catsipaebatsi barapo

jumein xaniwaicha Nacom paeba”, nejjei barapo matatsunpin.

<sup>10</sup>Bapoxonae barapo matatsunpin petaxutha irabe taeuncuarecan xua wūnae tajainchinexa. Ichitha bapon nejei: “¡Bara! Jopa baxua neexanaeinde. Apra xan iru ponxaein Nacom piawa taexanaein, icha xam ichim xuano xua icha jinya jiwimonae ichi pomonae Nacom pejume cowūntsiwichi, xuano xua jume cowūnta dubenanaebiya pocotsiwan xuan Jesús paeba. Jame Nacom bapon wūnae jainde”, nejei matatsunpin.

Baxuan xuan pocotsiwan Jesús paeba xua xuan pexainyeiwan, baxuantha yawenatsi nawita pomonae Nacom peitorobi jume pepaebiwi.

**Meje yabara po diwesi xua pebin equeica cawayutha, pon pemainyan**

<sup>11</sup>Bapoxonae peitabocotha tan xua naitaboco yausaranaxuba. Baxota naituta cawayu, pon pemainyan. Pon xua cawayutha equeica, wūn dutatsi, jeichichi: “Pon xua pejume cowūnta ducuaebiyaein, yawano xua xaniwaicha pepaebin”, jeichichi. Bapon xainyeya betiya yabara paeba jiwi xua penatsicuentisiwa xua abe peexanaexae. Matautano bapon xainyeya betiya exana poxonae naba ichamonaetha. <sup>12</sup>Bapon peitamaiqueito be isoto itareto xua yonoyonei. Yawano bapon nantatsun etounya pentasipatha ainya tepan. Yawano bapon tinaduta pewūn po wūn xua saya meisa bapon wūn yaputane.

<sup>13</sup>Yawano nama xatata paparuwa, po paparuwa pejanan dubena be poxonae xua jautuxuba pejanatha. Bapontha Nacom wūn duta: “Nacom Pejume”, jei. <sup>14</sup>Bapon puna poinchi soldadomonae itabocopi soldadomonae, pomonae Nacom pia soldadomonae tatsi. Barapo soldadomonae pexeinya paparuwan nama xataba xua xuan mū inyapana, yawa xua axuiruibi. Yawano barapomonae eneica

cawayumonaeintha xua xuantha pemainyawantha. <sup>15</sup>Barapon pon mata capana pia soldadomonae pecoiboto tsina tapichapeinatsi cusi, po wato bichocono xuiyoi. Bapon barapo watotha ucuboba xua jiwi ucubobatsi, pomonae po irathe jinompe. Yawano bapon ajumeyapusya itorobi ewatsina jiwi. Yawano bapon daunweya yabara paebina jiwi xua penatsicuentisiwa xua abe peexanaexae, icha jiton ichi xua daunweya nataxu tsapabatouba uva cuei xua vino mera pia exanaetsi. Bapon bichocono atene cana exanaena pomonaetha pomonae jopa pejume cowūntsiwichi, tsipei bichocono Nacom caseba barapomonae. Barapon Nacom pia peayapusu itorobi coyenewan xeina xua jiwi peperaxa exanaewatsi. <sup>16</sup>Bapon nawūn tinaduta pia pejumainaewatha, yawa nawūn duta pethutotha xua po wūn jeye: “Pon Corderoxae jiwi itorobiya pia pepa Peewatsinchi tatsi, pia peayapusu itorobi coyenewa xeina beyacaincha xua ichamonae xeina pomonae jiwi itorobiya pia pepa peewatsiwichi xua iru xeina pia peayapusu itorobi coyenewa. Matautano bapon pon jiwi pia pepa Pecanamataxeinaeinchi pia peayapusu itorobi coyenewa xeina beyacaincha xua ichamonae xeina pomonae jiwi pia pepa pecanamataxeinaewichi”, jei barapo wūn.

<sup>17</sup>Bapoxonae matatsunpin tan xua xometo coichatha uncuwa, bapon jume daunweya wawai peyapupunaewi beya xuan jinompa itabocotha, jeye: “Anetha xua painya nexaewa tsane Nacom pin pia penabanaewa. <sup>18</sup>Barapo penabanaewan paxaema, xua pomonae jiwi itorobiya pia pepa peewatsiwichi pewi, yawano soldadomonae pia pentacaponaeewi tatsi barapomonae pewi, yawa pomonae peamanayabeibi jiwi barapomonae pewi, yawa cawayu pewi,

yawa pomonae xua eneica pewi. Daxita xua iruru ichamonaeno barapomonaewi. Iru pomonaewi penata exanaewi pia coutha barapomonaewi, ichacuitha xua iru pomonaewi amanaya petanacuichi jiji barapomonaewi. Iruno pomonaewi jiji pebusi cui tatayebebiwichi barapomonaewi, iruno pomonaewi copei pexeinaewi barapomonaewi pewi”, jei matatsunpin.

<sup>19</sup>Bapoxonae tan pon ayei pon be Corei, yawano tan pomonaewi jiji itorobiya pia pepa peewatsiwichi xua baru pona pia soldadomonaewin. Daxita barapomonaewi nacaetuta xua nantiya penabinexa tsane pontha pon pia soldadomonaewin matacapona xua yawa pia soldadomonaewintha tatsi petanabinexa tsainchi. <sup>20</sup>Barapon pon ayei, pon be Corei, bapon maxu cubiya waetabatsi iru maxu cubiya waetabatsi pon naerabiya jeye: “Xan Nacom peitorobi jume tapaebin”, jei, pon xua petsita itutsi coyenewan exana xua pon be Corei taexanatsi xua pon be Joyoinya pia peayapusu itorobi coyenewatha tatsi. Barapo petsita itubiwantha bapon jiji muxuitorobatsi xua barapo jiji peitapa tinaewa tsainchi barapon pon be Corei pewantha tatsi. Yawano jiji itorobatsi xua wunaewi pejainchiwa tsane ibo Corei nacom. Barapon pon be Corei iruru pon xua naerabiya jeye: “Xan pon Nacom peitorobi jume tapaebin”, jei baponbe Nacom cana exana xua itowa pexubiwa tsainchibe ichaxota isoto pucuatha. Barapo pucua ataya tsitecaeya taxuncua bichocono aitareyapusu tsuncuae po peitare pewun azufre matawun. <sup>21</sup>Iruru daxita ichamonaeru jutebatsi cusitha, po watotha xua pecoibotha tapichapeinatsi pon xua matacapona pia soldadomonaewi. Daxita pepupunaewi bichocono tonsana pewi xaexaetsi pomonaewi xua jutebatsi.

**Meje yabara po diwesi xua  
Cristo itorobiya ewatsina  
jiwi mil po weibetha**

**20** Bapoxonae tan matatsunpin xua peitaboco wetsica pona, bapon catatsi po coyenetha xua itacupatsi xua pecoibo saranaxubiwa tsane barapo pin muthu deca xua ira bereca. Yawa bapon capona pecobetha penainto, po penainto xua pewun cadena xua bichocono pin nainto. <sup>2</sup>Barapo matatsunpin waetaba, pon be Joyoinya waetabatsi, pon po jomo xua poxonae copiya jiji muxu jainyabatsi. Bapon apara caurimonaewi pia pentacaponaein tatsi. Bapon icha wun Satanás. Barapon Satanás maxu cubiya waetabatsi cadenatha xua mil po weibe nexa. <sup>3</sup>Yawano barapon Satanás xorecatsi barapo pin muthu deca. Bichocono yauxatatabotatsi muthutha. Yaucateitabotatsino bichocono, xua jopa equeicha pemuxujainyabeibiwa tsane xua jopa equeicha pemuxujainyabeibiwa tsainchi po irathepiwi xua beya poxonae abu yapu caewina mil po weibe. Bapoxonae isanaxubinchi xua saya bara caeto tsane.

<sup>4</sup>Bapoxonae tan xua pexeinya peenaethopebiwan. Baxota ena pomonaewi xua bayatha catsibatsi peitorobi coyenewan xua jiji peyabara paebiwa tsainchi daxita xua penatsicuentiwa xua abe peexanaexae. Bapomonaewi pomonaewi xua bayatha wisi ucubobebatsi xua ichamonaewi namawainta, apara xua barapomonaewi peyabara cueicueijeixae Nacom Pejume Diwesi, xua peyabara cueicueijeixaeno po coyene xua Jesús pejume cowuntsiwatsi. Barapomonaewi bayatha jopa wunaewi jainchiyo pon be Corei. Matautano jopa wunaewi jainchiyo barapo ibo Corei nacom. Matautano

barapomonaē jopa copatsiyo xua peitapa tinaewatsi tsainchi pon be Corei pia wuntha tatsi ichacuitha xua pecobe juma tinaewatsi. Barapomonaē tan xua equeicha asu exainchi. Barapomonaē iru Cristo, nabaru caemonaē xua barapomonaēbe barapo cae pin nacuepiwi itorobiya ewatatsi xua cien po weibetha tsane. <sup>5</sup>Ichitha nama ichamonaē pomonaē xua caena bayatha werapa cataunxuae jopa asu exanaetsi. Barapomonaē asu exanaeinchi beya abu poxonaē yapu caewina mil po weibe. Barapo peasu coyenewa xua apara copiya nanta carucua xua copiya matha Nacom exana xua jiwi asu exaneibatsi petupaewa weya. <sup>6</sup>¡Maisa bichocono juntu coylene weiweina pomonaē equeicha Nacom asu exana petupae coylene weya po peasu coyenewa xua copiya! Barapomonaē Nacom piamonaē tatsi. Barapomonaē jopa werapae tsane poxonaē equeicha jiwi caewa werapaena po jiwi jopa pejume cowuntsiwi. Saya barapomonaē exanaeinchi Nacom pia sacerdotemonaepiwi tatsi xua iru Cristo pia sacerdotepiwi tatsi. Matautano barapomonaē nabaru caemonaē xua barapomonaē barapo cae pin nacuepiwi itorobiya ewatatsi mil po weibetha tsane.

**Meje yabara poxonaē caurimonaē  
pia pentacaponaein tatsi xotsi**

<sup>7</sup>Poxonaē yapu caewina mil po weibe bapoxonaē barapo Satanás isanaxubinchi xua peponaewa tsane muthu weya. <sup>8</sup>Poxonaē bara weya pona jiwi muxujainyabinchi nawita daxita nacuantha. Yawano muxujainyabinchi nawita Gog nacumonaepiwi, iruno muxujainyabinchi nawita Magog nacuapiwi. Barapo Satanás cana exana xua barapo naxobe nacuapiwi penacuettsiwa tsane pia soldadomonaē

tatsi xua penabinexa pomonaetha pomonaē Nacom piamonaē tatsi. Barapo naxobe nacuapiwi pomonaē soldadomonaēxae barapomonaē bichocono pin bicheitonmonaein icha taetowa purun ichi xuan taetabotha bobena xuan acucu xua mar mentha bobena.

<sup>9</sup>Barapo pin bicheiton pomonaē soldadomonaēxae, pana beiyiya daxita yaira jupa beya poxonaē yacaincha matawacaicha umeinchi ichaxota Nacom piamonaē tatsi jinompa, yawano xua po tomarapiwi Nacom jume cowuntatsi. Ichitha bapoxonaē Nacom pin isoto itoroba deca peitaboco wereca, daxita barapo soldadomonaēin taxuatsi omeicha. <sup>10</sup>Barapon Satanás, pon be Joyoinya, pon caurimonaē pia pentacaponaein tatsi, pon xua barapo soldadomonaēin muxujainyabatsi, bapon Nacom xuba isoto pucuatha, po pucuatha ichaxota ataya tsitecaeya taxuncua xua bichocono aitareyapusu tsuncuae po peitare pewun azufre matawun. Barapo pucuatha caena bayatha xotsi pon be Corei iru pon xua naerabiya jeye: “Xan Nacom peitorobi jume tapaebin”, jei. Barapomonaē baxota bichocono atene tsaiibi tsane, mataqueitha yawa merawithano tsaiibi tsane xua bara ataya tsane.

**Meje yabara po diwesi xua  
Nacom yabara paeba jiwi  
xua penatsicuentsiwa  
poxonaē eca pia pexeinya  
ecaethopeibiwatha, po pexeinya  
ecaethopeibiwa xua pemainyawa**

<sup>11</sup>Bapoxonaē tan xua pexeinya peecaethopeibiwa xua pemainyawa. Muxuna tan xua pon eca barapo pexeinya peecaethopeibiwatha. Bapon peitabaratha tan ira xua po ire yawa itaboco, baxua daxita aichurubenaē, equeicha jopa naitutsiyo.

<sup>12</sup>Bapon Nacom peitabaratha tatsi umena pomonae xua caena bayatha werapa xua pomonae peacopeibi jiwi iruno pomonae copei pexeinae jiwi. Bapoxonae diboron patapenta, yawano pataxuba po diborotha ba nacapanenebiya tsaibi pomonae Nacom pia peantobewichi poxonae wun tinadubatsi barapo diborotha. Pomonae xua caena bayatha werapa daxita itawetatsi. Barapomonae yabara cui jupiya exanatsi be po coyeneya bayatha abe exana xua barapo diborotha pecui yabara tinaexatsi xua poxonae barapomonae abe exana. Daxota barapomonae atene tsane. <sup>13</sup>Barichi pomonae iru pin mar mentha notatsi, barapomonae Nacomtha pata. Iru pomonae iratha bobena ira wejjuina xua Nacomtha pepatsinexa. Daxita barapomonae Nacom peitabaratha tatsi umena xua baxota peyabara paebinxatsi xua Nacom yabara paebina xua penatsicuentsiwa xua abe peexanaexae Nacomtha. Barapomonae atene exanaeinchi xua Nacom bayatha pecui yabara tinaexae po coyene xua abe exana. <sup>14</sup>Nacom cana exana po coyenewa xua jiwi tupa pecana exanaewatsi, xua barapo coyenewa isoto pucuatha xotsi xua nacaewita cana exanatsi. Barichi Nacom cana exana xua po nacia pomonae pewerapeibiwi pia nacia tatsi xua barapo nacia xotsi isoto pucuatha xua nacaewita cana exanatsi po pucuatha ichaxota ataya tsitecaeya taxuncua. Barapo petupae coyenewa apara xua jiwi caewa werapaena po jiwi jopa pejume cowuntsiwi. <sup>15</sup>Iruu pomonae xua jopa wun dubenaeyo barapo diborotha po diborotha ba jiwi nacapanenebiya tsaibi poxonae wun dubeibatsi, barapomonae iru barapo isoto pucuatha bebaichi, Nacom bebai.

**Meje yabara po diwesi xua pena itaboco yawa xua pena ira**

**21** Bapoxonae tan pena itaboco yawano pena irano, tsipei po itaboco copiya ducua yawa po ira copiya ducua aichurubena, equeicha jopa naitutsiyo. Yawano pin mar mene aichurucuae. <sup>2</sup>Xan, pon Juan tsocuaein, tan Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. Barapo tomara nacui xaxainchiya weta, icha yabuyo ichi xua poxonae nacui xaxainchiya weta xua poxonae pecotsiwa peru nacoyobina. <sup>3</sup>Jume tan pejume xua peitaboco wetsica jume daunweya jeye: “Taema anoxuae Nacom popona pebiwitha. Nacom baru poponaena, bara barapomonae Nacom pijimonae tatsi tsane. Nacom ataya tsitecaeya baru poponaena barapomonae penacana exanaexae xua piamonae tatsi pia Nacom tatsi. <sup>4</sup>Barapomonae Nacom itacuere mene canotsina xua pewecoyeixa, xua barapomonae equeicha jopa peatenewa tsane. Equeicha jiwi jopa werapae tsane barapo petupae coyenewatha. Matautano jopa pewecoyeinexa tsane, tsipei xua xuan copiya exana po irathe bayatha aichurucuae nacaewita”, jei po jume xua itaboco wetsica paeba.

<sup>5</sup>Bapon Nacom pon eca pia pexeinya peecaethopaewatha nejeyi: “Taema daxita exanan xua xuan penawan”, nejeyi Nacom. Equeicha nejeyi: “Baxuan tinare, tsipei barapo jumein pexainyei jumein, daxota ichamonae itacupatsi xua tana neyabara jume cowuntsiwa xua bara exanaein pocotsiwa xua taneme”, nejeyi Nacom.

<sup>6</sup>Bapoxonae equeicha nejei: “Bara baxuan bayatha nacui weta. Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano ataya tsitecaeya bara tapoponaewa tsane. Po pebin xua bichocono meratsipa xua daxota bara amanaya mera neapatsiwa barapo coyenewa icha be ichin poxonae jiwi yawenan. Pon xua bejuntu coyene jichatsi xua ajuntucoyeneyapusu peexanaewatsi bara bapon amanaya catsin peajuntucoyeneyapusuwa, po peajuntucoyeneyapusuwa xua ataya tsiteca. <sup>7</sup>Pon xua juntu coyene amanayaba caurimonae poxonae caurimonae bequein abe exana bapontha, bapon xeinaena pocotsiwa be pentoma pocotsiwa xua bayatha juntana jeban bapon. Barapon pia Nacom tatsin tsane yawa barapon apara bara taxanto tsane. <sup>8</sup>Ichitha pomonae pijunuwi jopa nejume cowuntsiyo xua ichamonae abe peexanaewa tsane barapomonaetha iruru pomonae jopa benejume cowuntsiyo, iruru pomonae peajuntucoyenebewi, iruru pomonae jiwi pejutebiwi, iruru pomonae xua penasi cui exanaewi xua peweiweinaewa, iruru pomonae mara pexeinaewi iruru pomonae wunae pejainchiwi ibo nacom, iruno pomonae naerabiya pepaebiwi, daxita barapomonae bebai tsainchi isoto pucuatha po pucuatha ichaxota ataya tsitecaeya taxuncua xua bichocono aitareyapusu tsuncuae po peitare pewun azufre matawun. Barapo petupae coyenewa apara xua poxonae equeicha jiwi caewa werapaena pomonae pejume cowuntsiwi”, jei Nacom pon eca pia pexeinya peecaethopaewatha.

### Meje yabara po diwesi xua pena Jerusalén tomara

<sup>9</sup>Bapoxonae matatsunpin patopa pon xua siete poyobe jiwana, po siete poyobe matatsunpiwi xua xeina coroton siete xoyobe xua wunba peabe cuiu coyenewan xua bara nama opi ducua pocotsiwa Nacom exanaena. Bapon nejei: “Anetha catsita itatsinchi Cordero pecotsiwa tatsi xua bara yatsicaya piowa tatsi”, jei matatsunpin. <sup>10</sup>Tanansita itatsiwatha xua poxonae Nacom pia Pejumope tunaxu tatsi netsita ituta bapoxonae matatsunpin necapona pin demxuwa beya po demxuwa xua bichocono taucha. Yawano baxotiya matatsunpin netsita ituta Nacom pia pepa pexeinya tomara tatsi ichaxota jinompa pomonae peantobewichi Nacom. Barapo tomara pena Jerusalén tomara, po tomara Nacom pia xainya wetsica tatsi pona xua itaboco wetsica. <sup>11</sup>Barapo tomara bichocono wunae xua pentha exanuncua Nacom pia pexeinya itupanae coicha tatsi, tsipei Nacom baxota popona. Barapo pepentha tsuncuae coichawa bichocono daedaena icha iboto ichi xua po iboto itupana po iboto ira baxupana iboto. Bara pocotsi itupanae iboto jaspe matawun, po iboto xua epa nasaba. <sup>12</sup>Barapo Jerusalén tomara yacaincha matawacaichiya uncuatsi xua pocotsiwa be curara xua u ibo xua bichocono amuxuburutiya xuano xua bichocono taucha. Yawano xeina doce po coibotobe. Daxita barapo coibontha tsiniya umena matatsunpiwi, xua be caein tsiniya. Barapo coibontha tsitsiniya wun dudubenapoinya Israel pia pemomoxi susato bicheiton tatsi. <sup>13</sup>Matautano acoibi po coibotobe ducua ichaxota pocotsiwa xometo weecoina. Icha acoibi coibotobe ducua ichaxota pocotsiwa

xometo bejopiya. Yawano epatauta dena ainya acoibibe po coibotobe nantiya ducuabe. <sup>14</sup>Yawano barapo curaratha ira wetsina umena iboton. Barapo iboton doce po ibotonbe xua barapo ibotontha tsiniya wun dubena pewanxi xua doce poyobe pomonae Cordero pia peitorobi jiwí tatsi.

<sup>15</sup>Barapo matatsunpin, po matatsunpin netsipaeba, bapon capatopa pocotsiwa xua pecacanaubiwa xua be naewa xua oro nainto peepa canaubinexa tomara yawa pecoiboton yawa curara. <sup>16</sup>Tomara nantiya namuxuburu jupabe xua apiya dena. Barapo matatsunpin epa canubarena barapo tomara dos mil doscientos po kilómetrobe xeina xua apiya dena yawa xua taucha xua asiyeicha daxita baxuan nantiya naepa jupa. <sup>17</sup>Barapoxonae epa canauba curara muxuburu sesenta y cinco po metrobe xeina xua pemuxuburu xua aitiyu. Baxuan matatsunpin exana be jiwí pia pecanaubiya coyenewa tatsi.

<sup>18</sup>Curara iboton u xuan pexeinya iboton, xua ira buxupana iboton xuan jaspe matawun. Tomara acaba u xuan pocotsiwan oro matawun be xuan peepa nasabiwan. <sup>19</sup>Po iboton ira weumeina xua doce po ibotonbe, daxita mata pepena xua mata wunae exana icha be iboton ichi pocotsi iboton ainya matoman. Po iboto copiya barapo iboto mata pepena xua jaspe iboton matawun. Po iboto ichaxota ba “dos”, jei, barapo iboto mata pepena xua zafiro ibo matawun. Po iboto ichaxota ba “tres”, jei, barapo iboto mata pepena ágata ibo matawun. Po iboto ichaxota ba “cuatro”, jei, barapo iboto mata pepena esmeralda ibo matawun. <sup>20</sup>Po iboto ichaxota ba “cinco”, jei, barapo iboto mata pepena ónice ibo matawun. Po iboto ichaxota ba “seis”, jei, barapo iboto mata pepena cornalina ibo matawun. Po iboto ichaxota ba “siete”, jei, barapo iboto

mata pepena crisólito ibo matawun. Po iboto ichaxota ba “ocho”, jei, barapo iboto mata pepena berilo ibo matawun. Po iboto ichaxota ba “nueve”, jei, barapo iboto mata pepena topacio ibo matawun. Po iboto ichaxota ba “diez”, jei, barapo iboto mata pepena crisoprasa ibo matawun. Po iboto ichaxota ba “once”, jei, barapo iboto mata pepena jacinto ibo matawun. Po iboto ichaxota ba “doce”, jei, barapo iboto mata pepena amatista ibo matawun. <sup>21</sup>Barapo doce po boupanbe exana u xuan be perla matawun xua daxita barompaya peboupan tsiniya. Barapo pepa namto xua tomaratha exana u pocotsiwa xua xuan be oro nainton xua xuan peepa nasabiwan poxoru xua be pepa oro nainton.

<sup>22</sup>Barapo tomaratha jopa taeinyo Nacom pin pia bo tatsi tsipei bara Nacom baxota pepoponaexae po Nacom daxita pia peayapusu itorobi coyenewan xeina. Iruru xua baxota pepoponaexae Cordero daxota jopa nantawenonaeyo Nacom pin pia bo tatsi. <sup>23</sup>Barapo tomara jopa nantawenonaeyo xometo xua tomara pentha peexanaewa tsane yawano xua jomocoichatono, tsipei Nacom baxota popona peyacoicha jinaexae xua barompaya pia pexeinya pecoichaxae tatsi, xuano iruru xeina Cordero barapo coicha. <sup>24</sup>Pomonae xua bayatha Nacom capanenebiya, barapomonae barapo coichatha ponaena barapo tomaratha po coicha Nacom pia coicha. Daxita pomonae jiwí itorobiya pia pepa peewatsiwichi barapomonae Nacom catsibinchi barapo tomaratha po coyene xua Nacom wunae pejainchiwatsi po coyene xua tsita exanatsi xua bayatha jiwí tsita exana barapomonaetha. <sup>25</sup>Peboupan jopa bapana coibo xatababanobi mataqueitha, xua baxota jopa ataya tsitecaeya pequirei tsaibi tsouneibixae. <sup>26</sup>Daxita nacuanpiwi

Nacom capona barapo tomaratha xua Nacom pecatsibiwa tsainchi pocotsiwan pewnaewan xua be copei. Matautano Nacom catatsi po coyene xua Nacom wnae pejainchiwatsi. <sup>27</sup> Ichitha xua xuan peabe coyenein bapana jopa patsi tsane barapo tomaratha. Matautano jopa patsi tsane baxota pomonae abe peexanaewi iru pomonae pemuxutorobiwi. Saya meisa patsina baxota pomonae wun dubena po diborotha ba jwi nacapanenebiya tsaibi poxona wun dubeibatsi baxota, xua po diboro xeina Cordero.

**22** Nexata matatsunpin netsita ituta mene, po mene xua mene itarana, po mene xua jwi axumerasu exanatsi, xua icha Nacom ichi xua jwi ajuntucoyenyapusu exanatsi. Barapo mene bichocono mene itarana icha bosibu ichi xua epa nasaba, baxua xua Nacom pia pexeinya peecaethopeibiwa werena pona, yawano xua Cordero pia pexeinya peecaethopeibiwa tatsi werena pona. <sup>2</sup> Barapo mene, mene ducuaponarena pepa namto dena tomaratha. Barapo mene dena nantiya ainya muxunene denabe naein xuwa xua po naein jwi ajuntucoyenyapusu exainchi. Barapo naein nacoiteiba doce po cuiyobe xua cae weitha. Daxita xometontha nawetouneiba. Barapo naein noxuton jwi yawenatsi xua juntea pejinompaewa xua jopa peatenewa. <sup>3</sup> Barapo tomaratha jopa xeinae tsane xua peabe coyenein. Barapo tomaratha uncuena Nacom pia pexeinya peecaethopeibiwa tatsi iru baxota uncuena Cordero pia pexeinya peecaethopeibiwa tatsi. Pomonae Nacom pia petanacuichiwichixaetsi barapo tomaratha barapomonae Nacom wnae jainchinch. <sup>4</sup> Bapoxonae jwi Nacom itabara taeya cueicueijejei tsainchi. Barapomonae peitapatha cainompaena Nacom pewun tatsi. <sup>5</sup> Barapo tomaratha ataya tsitecaeya jopa quirei tsounae

tsaibi tsane. Pomonae baxota jinompa jopa nantawenonae tsane pecoicha xua lampara coicha xuano xua xometo coichano. Daxota jopa nantawenonaeyo tsipei Nacom pon jwi Pecanamataxeinaein baxota popona, barompaya pia pecoicha peyacoicha jinaexae xua pia pepontha. Iru pomonae baxota jinompa jwi itorobiya ewatsinchi xua ataya tsitecaeya tsane.

### Meje yabara po diwesi xua Jesucristo poxonae patopeicaena xua imoxoyo bara nama

<sup>6</sup> Bapoxonae equeicha matatsunpin nejei: “Barapo jumein pexainyei jumein. Daxota ichamonae itacupatsi xua tana neyabara jume cowuntsiwa xua bara exanaein pocotsiwa xua taneme. Pon jwi Pecanamataxeinaein bapon Nacom itoroba pia Pejumo pe tunaxu tatsi xua jwi peyawaewa tsainchi xua poxonae jwi cueicueijejei Nacom nexa. Yawano Nacom itoroba pia matatsunpin xua petsita itutsinexa pomonae pia penacajume caitorobi diwesi tatsi petacueicueijejichiwichi xua barapo matatsunpin barapomonae yabara petsipaebinxatsi po coyene Nacom imoxoyo exanaenaba”, nejei.

<sup>7</sup> Equeicha matatsunpin nejei xua saya Jesús tapaebatsi, jeye: “¡Bara nama imoxoyo patopeican! ¡Juntu coyene weiweinaena pon xua exana xuan pocotsiwan Nacom ichichipa xuan pocotsiwan paeba po diboroth!” jeje barapo matatsunpin xua Jesús tapaebatsi.

<sup>8</sup> Xan, pon Juan tsocuaein, tan daxita baxuan yawano jume tan. Poxonae bayatha jume tan, yawa xua bayatha tan xua pocotsiwan matatsunpin netsita ituta, bapoxonae bapon petaxutha irabe taeuncuarecan xua wnae tajainchinexa bapon. <sup>9</sup> Ichitha bapon nejei: “¡Bara! Jopa baxua neexanaeinde. Aparaxan ponxaein taexanaein Nacom piawa tatsi,



icha xam ichim yawa icha pomonae jinya jiwimonae ichi, pomonae Nacom peitorobi jume pepaebiwi, iruno pomonae xua jume cowanta dubenanae-biya daxita po coyenein xua po diborothe tinan. Jame Nacom bapon wuna jainde”, nejei matatsunpin.

<sup>10</sup>Yawano nejei: “Jopa moya yawun xeinaein Nacom Pejume Diwesi, xua xuan pocotsiwan paeba po diborothe. Tsipei imoxoyo nama Nacom exanaena xua pocotsiwan po diborothe pepaebixae. <sup>11</sup>Poxonae cataunxuae Nacom jopa wetsiyo, pon xua abe peexanaein, bu moya bara abe exana ducuanae-biya. Iru pon xua nanthu coyene xeina peacuirucoyenebewan, bu moya bara baxuan nanta xeina ducuanae-biyaena. Ichitha pon wuna exana Nacom nexa, bu moya exana ducuanae-biya. Pon xua Nacom petsita naexanaewatsi xua penthuthu xeicaein penaexanaewa, bu moya bara Nacom jume cowanta ducuanae-biyatsi”, nejei.

<sup>12</sup>Bapoxonae Jesús jeye: “Aa, bara nama imoxoyo patopeicaein. Capatopeicaein pocotsiwan be pentoman, xua caeintha barompaya piawan catsibin. Pon xua nawita inta exana xuya nawita catsin. Pon xua be conotha inta exana xuya be conotha catsin. <sup>13</sup>Xan ponxaein apara ataya tsitecaeya tapoponaein xua poxonae aena daxita tamropata pitaban. Matautano bexano daxita coyenein wetsin tsipei ataya tsitecaeya bara tapoponaewa tsane”, jei Jesús.

<sup>14</sup>Juntu coyene weiweinaena pomonae najuntu coyene cui barapenta peabe coyenewan. Baxuan be poxonae barapomonae pia paparuwan matanaca xua jopa tsoreiyo. Bapoxonae barapomonae itacupaeinchi xua jojoniyaena tomara coiboto iya tsipei pia paparuwan inyapana yawa juntu coyene wuna. Yawa barapomonae itacupaeinchi

xua tomaratha iya xaena po pethei pexaewa, po pethei jiwi ajuntucoyenesu exainchi. <sup>15</sup>Ichitha nama aisowatha xua tomara jumatha umenaena pomonae peajuntucuirucoyenebewi iruru pomonae mara pexeinaewi. Yawano pesatotha umena pomonae penata siwa xeinaewi yabuxitha, iruno pomonae jiwi pejutebiwino, iruno pomonae ibo nacom wuna pejainchiwi. Daxitano pomonae becu jichatsi xua naerabiya pepaebiwi xua naerabiya exanano, barapomonae pesatotha umenaena.

<sup>16</sup>Equeicha Jesús nejei: “Xan, pon Jesús, itoroban tamatatsunpin xua daxita baxuan pepaebinexa pomonaetha pomonae pejume cowantsiwi. Xan bara yatsicaya David pia pemomoxi susato jiwi jiwanapin tatsin, pon David Israel nacuapiwi itorobiya pia pepa peewatsinchi tatsi. Icha be jarawato ichi pototo xua bichocono wuna xua pototo baya ecoina poxonae icha matacabi patopa, xan barichin. Patopan tacapatopaenexa jiwitha po coyene xua bichocono wuna po coyene xua Nacom tsixana, xua jiwi tsixanatsi”, nejei Jesús.

<sup>17</sup>Nacom pia Pejumope tunaxu tatsi, iru Cordero pia pecotsiwa tatsi, pomonae Nacom pia pejume cowantsiwichixaetsi, jeye Jesthath: “Anetha”, jei Nacom pia Pejumope tunaxu tatsi iru Cordero pia pecotsiwa tatsi. Pomonae xua iruru jume tane, jeye: “Anetha”, jei. “Xan Juan paeban pon xua meratsipa yawa beapaena, moya antha, bu apa po mera jiwi ajuntuyapusu exainchi xua saya amanaya nexa”, jan.

<sup>18</sup>Daxita pomonae xua jume tane barapo diwesi xua Nacom Pejume Diwesi xua barapo diborothe tinan barapomonae tsipaeban, meje baxue: Icha ichun mataropeicha paeba icha diwesi xua jopa xainyeyo xua po diwesithe,

bapoxonae bapontha Nacom itorobina peabe coyenewan be pocotsi coyene cuirun yabara caunuta po diborothe. <sup>19</sup>Icha ichun jiwana jume wexuba xua po diborothe paeba, xuya Nacom pia diborothe wun xubina, po diborothe jiwi nacapanenebiya tsaibi poxonae wun dubeibatsi baxota. Yawano Nacom jopa copatsiyo xua bapon peatopaewa Nacom pia pepa pexeinya tomaratha tatsi po tomara pena tomara ichaxota jinompa pomonae peantobewichi Nacom. Barapo pecapanenebiya coyenewa iru barapo tomarano barapo diborothe yabara tina.

<sup>20</sup>Jesús pon pia matatsunpin peitorobixae xua barapo matatsunpin yabara tana netsipaebiwa pocotsiwa xua bexa exanaena, bapon nejei: “Aa, bara nama imoxoyo patopeicaein”, jei.

Je, moya anetha patopeinca xam, Jesús, ponxaem Tanecanamataxeinaem, jan.

<sup>21</sup>Jesucristo, pon jiwi Pecanamataxeinaein, barabu paca yawenaena pia painya nepaca caantobexae daxita paxam. Je bara ichi tsane.

Baja Juan.